


Topa Yōg Tappet



New Testament in Maxakalí (BR:mbl:Maxakalí)

Topa Yōg Tappet

New Testament in Maxakalí (BR:mbl:Maxakalí)

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
a212b59e-62d7-5a38-9773-b0ce1d5b248b

Contents

MĀTEO	1
MĀ'AK	40
NOK	64
YOĀM	107
'AT	140
HŌMĀN	176
1 KONĪN	194
2 KONĪN	210
GAT	222
'EPEX	229
PINIPĒN	235
KONOXĒN	239
1 TEXANŌN	243
2 TEXANŌN	247
1 TĪMŌN	250
2 TĪMŌN	255
TIT	259
PINĒM	261
'EMEO	262
TIAK	275
1 PET	279
2 PET	285
1 YOĀM	289
2 YOĀM	293
3 YOĀM	294
YOT	295
APOKALIPSE	297

MÁTEO TE HĀM'ĀPAK MAX'AX'ĀKTUX

Yeyox Kunnix yōg mōnāyoxop

¹ Yeyox Kunnix yōg mōnāyoxop xohix xop te tik hittap Namix hā' mōkputox, ha mōnāyoxop hittap 'Amanām hā' mōkputox.

² 'Amanām te 'Iyak mūg tak, ha 'Iyak te Yako mūg tak, ha Yonah mūg tak, xi' taknōy xop mūg tak.

³ Ha Yonah te Pet mūg tak, xix Yet mūg tak, ha' mūg tut 'āxet'ax Tām. Ha Pet te 'Exnōg mūg tak, ha 'Anām mūg tak,

⁴ ha 'Āmīnānap mūg tak, ha Nāy mūg tak, ha Xanmōm mūg tak,

⁵ ha Moax mūg tak, ha' mūg tut 'āxet'ax Hap. Ha Moax te 'Omet mūg tak, ha' mūg tut 'āxet'ax Hot, ha 'Omet te Yexe mūg tak,

⁶ ha Namix mūg tak. Yā hōmā Namix te 'Iyaet yōg tikmū'ūn xohix xat.

Ha Namix te 'Onit xetut mūg, ha Xanomām put,

⁷ ha Homo'ām mūg tak, ha 'Amit mūg tak, ha 'Axa mūg tak,

⁸ ha Yoxapah mūg tak, ha Yonām mūg tak, ha 'Oyit mūg tak,

⁹ ha Yotām mūg tak, ha 'Akax mūg tak, ha 'Eyekit mūg tak,

¹⁰ ha Mānāxex mūg tak, ha 'Āmōm mūg tak, ha Yoyit mūg tak,

¹¹ ha Yekōnīn mūg tak, xi' taknōy xop mūg tak, 'Ihā puknōg xop te 'Iyaet yōg tikmū'ūn mōgāhā', nūy hām puknōg ha' mōgā', tu hāpaxexka Maminōn tu' mōgāhā', pu tu pi'.

¹² Tu Maminōn tu' pip, 'Ihā Yekōnīn te Xanātīt mūg tak, ha Yonomameo mūg tak,

¹³ ha 'Amiot mūg tak, ha 'Enitkīy mūg tak, ha 'Ayoh mūg tak,

¹⁴ ha Xanok mūg tak, ha 'Akīy mūg tak, ha 'Eniot mūg tak,

¹⁵ ha Mātā mūg tak, ha Yako mūg tak,

¹⁶ ha Yoye mūg tak, ha Mānix mūtik yāytaha', ha' put Yeyox 'āxet'ax Kunnix.

¹⁷ Kaxīy 'Amanām mōkputox te homik-tok put, ha tehomiik-tok put, ha tehomiik-tok put, tu mōktu xohix te 14, tu mōktu Namix te 'Iyaet yōg tikmū'ūn xat, ha tehomiik-tok put xohix te 14, tu mōktu 'Iyaet yōg tikmū'ūn te hāpaxexka Maminōn tu' mōg, ha mōkputox nōy xohix te 14 kamah, ha mōktu Yeyox Kunnix mūg tut te' put.

Yeyox mūg tut te' put

¹⁸ Tu' put hā xīy: Tute yāytap-tup Yoye mūtik, pa nōm mūtik nōm 'ohnāg 'Ihā Topa Koxuk tek-tok putnāhā'.

¹⁹ Ha Mānix te yāy kutok xuk, ha Yoye te' yūmmūg, yā hāmyok mīy, tu' yīy 'ohnāg, tu hāmp'e'paxex, hu: "Pūyā tikmū'ūn Mānix

kummuk 'āktux hok!" Kaxīy. Tu' xaptop tu' nīm putup,

²⁰ tu hāmp'e'paxex, 'Ihā pexkox yōg nū'kutnā'ax nūn. Yoye mō'yōn 'Ihā' nūn, tu' yōtkup tu hām'āktux, hu:

–Yoye, 'āmūn yā Namix hā 'āmōkputox, hu 'ākuxanōg hok, nūy Mānix mūy, nūy nū mūtik yāytax. Yā' max Mānix, ha Topa Koxuk tek-tok putnāp-tup,

²¹ hak-tok pit put putup, ha xate' xuxet'ax mīy putup Yeyox, ha yāy yōg tikmū'ūn kuxa kummuk xit putup, nūy kuxa max tat 'ūyānān tu'.

²² Topa te hāpaxopmā ka'ok, yā hōmā tik te Topa pupi hām'āktux tikmū'ūn pu', yīy:

²³ "Ūn hok yūm tek-tok xuk putup, hak-tok 'āxet'ax te: 'Ēmāneo." Yā tikmū'ūn yīy'ax hā: "Topa te yūmūg mūtik tihi'." Kaxīy. Tu ta tu' kux. Yā Topa yōg hām'āktux hittap hā Mānix te yāy kutok xuk nōmhā.

²⁴ Ha Yoye yāy koxak, tu' yīp'kox pip, tu Mānix mūg,

²⁵ pa nōm mūtik nōm 'ohnāg, mōktuk-tok put, ha Yoye te' xuxet'ax mīy Yeyox.

2

Tik puknōg xop te hāmyūmmūg nūn

¹ Yeyox mūg tut te' put kōmēn Menēg tu', yā hāpaxexka Yonex yōg kōmēn, ha 'Enot te hāpaxexka yōg tikmū'ūn xohix xat, 'Ihā Mānix tek-tok put, ha tik puknōg xop te hāmyūmmūg nūn, māyōn xupep'ax ha' nūn, tu māyōnnāg xop yūmmūg, tu Yenyoyanēn ha' nūn, tu' nūn tu nūktu mōxaha',

² nūy kaxxop pit xax, tu' yīkopit, hu:

–Pi'yā' xip tik te tikmū'ūn xat'ax kutok? Yā tu' te' put nōmhā, pu Yoneo yōg tikmū'ūn xohix xat. Hāptox tukmūg tihi', tu kaxxop yōg māyōnnāg pēnāhā pepi pexkox tu', tu māyōn xupep'ax ha māyōnnāg pēnāhā', tuk nūn tu nūktu nūk-tettex kaxxop pu'. Kaxīy.

³ Ha 'Enot te' xupak, tu' xutīgāhā', xix Yenyoyanēn yōg tikmū'ūn xohix xutīgāhā',

⁴ yīy 'Enot te' 'āmānex xexka xop xānāhā', xix hāmyūmmūg xop xānāhā', pu yāy tu nūnnāy, tu ta' nūn tu nūktu mōxaha', ha 'Enot te:

–Tep mūn 'āktux Topa yōg tappet te'? Pi'yā' xip putup 'ūtut 'Ihāk-tok put, Topa te nōm yāykutnāhā'? Kaxīy.

⁵ Ha:

–Kōmēn Menēg kopa' put putup, hāpaxexka Yonex tu'. Yā tik hittap te Topa pupi hām'āktux, tu tappet tu kax'āmi', tu kaxxop nā'ax 'āktux, hu:

⁶ "Menēg mūn kōmēn kutōgnāg, pa Topa te' xexkānāp-tup,

'ūyāykutnā'ax yōg kōmēn hah,

yīy Topa te kōmēn xexkānāp-tup,

ha yāykutnā'ax te yōgnū tikmū'ūn xat max putup,

tu 'Iyaet yōg tikmū'ūn xat putup." Kaxīy.

⁷ Ha ta 'Enot te tik xop xānāhā', nōm tik te hāmyūmmūg xop te hāptox tu' nūn, ha' xānāhā', pu nū', ha' xaptop tu' nūn, pu tikmū'ūn 'ūpēnā hok, ha 'Enot te' yīkopit, hu:

—Hām 'ūm 'Ihā 'āxop te nō māyōnnāg pēnāhā'? Kaxīy.

Ha' xuktux,

⁸ yīy 'Enot te mō'pok Menēg hah, tu:

—Mōy kaxxop pit xax, nūy xipi', nūy nūy 'ā' xuktux, 'ūyīy kama nūk xup kaxxop kep-pah. Kaxīy.

⁹ Tu hām'āktux kux, ha ta tik xop mōg, tu ta' mōg putat hā, tu mōktu Menēg tu' mōxaha', tu māyōnnāg pēnāhā 'ūxeheh. Hōmā māyōnnāg te māyōn xupep'ax tu' xip hāmōgnōy tu', yā hōnhā pepi' xip, tu tik keppa' mōg, nūy tik xop mōgā', tu mōktu mīptut tu' xupep, ha kaxxop pit xip, yīy māyōnnāg hup, tu' xup pepi' tu pexkox yokama' xup,

¹⁰ ha tik xop kuxa hittup xexkah, māyōnnāg pēnāhā tu' kuxa hittup,

¹¹ tu mīptut hā' mōxakux, tu kaxxop pēnāhā', 'ūtut Mānix mūtik tihi', yīy nūktettex kaxxop keppah, tu' kuxa te' yēy. Hak-nāy tu hāpxop max popmāhā', ha takat xexkah, yā pipkup yānām 'āta popmāhā', xix hāpxop puk haxnāg tu' hōm xix mīxux hep 'ūhaxnāg mīha tu' hōm.

¹² Tu mō'yōn 'Ihā Topa te' yōtkup hā hāmyūmmūgāhā', puyīy 'Enot ha putpu' mōg hok, yīy ta' mōg, putat nōy hā' mōg, tu mōktu yāy yōg hām tu' mōxaha'.

Hāpxexka 'Eyit tu nū'pah'

¹³ Ha pexkox yōg nū'kutnā'ax te Yoye ha' mōg, 'Ihā mō'yōn, tu' yōtkup hā hām'āktux, hu:

—'Āpu 'āyok, nūy 'āknihā xihip. 'Āk-tok put, xi' tut mōgā', nūy hāpxexka 'Eyit tu mōy 'āmōxān, nūy nō te nox pi', ha mōktu 'āte xa hām'āktux. Yā 'Enot te kaxxop xak, 'ūp-tex putup tu'. Kaxīy.

¹⁴ Yīy Yoye yok, tu kaxxop put, xi' tut mōgāhā', tu hāpxexka 'Eyit 'ūnūpa tu' mōg 'Ihā 'ānnīy,

¹⁵ tu' ti ka'ok, ha mōktu 'Enot tu' xok. Hōmā tik hittap te Topa pupi hām'āktux, tu tappet tu kax'āmi', tu Yeyox 'āktux, hu: "Ātek kutok xānāhā', 'Ihā hāpxexka 'Eyit ta tu' xip." Kaxīy. Yā Topa yōg hām'āktux hittap hā Yeyox nox xip hāpxexka 'Eyit kopa nōmhā'.

'Enot te xonat xop xat pu kaxxop kix

¹⁶ Ha ta 'Enot te' hip, tu tik puknōg te hāmyūmmūg xop hip, pa 'ap nūn'ah, tu yā mō'āmā'. Yīy 'Enot gāy xexkah, tu' xat, pu kōmēn yōg kaxxop pit xohix xexka kix, nūy kaxxop yōg hāmyāxatamuk 2 xohix kix Menēg kopah, xix kōmēn kūnāpa' pip kaxxop pit kix. Yā hōmā, hāmyāxatamuk 2 'Ihā tik puknōg te hāmyūmmūg xop te

māyōnnāg pēnāhā', hu' nūn, nūy kaxxop xax, yīy 'Enot te' xat, pu kaxxop pit kutōgnāg xohix kix, nūy kaxxop puxet putex.

¹⁷ Hōmā, hāmyāxatamuk xohix xexka 'Ihā, tik hittap Yenemīn te Topa pupi hām'āktux, nūy tappet tu kax'āmi', yīy:

¹⁸ "Kōmēn Hāmā yōg tikmū'ūn potaha',

yā Haket potaha', 'ūk-tok xak tu',

tu' kuxa teknōg, 'ūk-tok xaxik hah." Kaxīy.

Yā Topa yōg hām'āktux hittap hā' xat'ax gāy te kaxxop kix nōmhā'.

Yāy yōg hām tu' putpu' nūn

¹⁹ Hāpxip kutōgnāg 'Ihā 'Enot xok, ha pexkox yōg nū'kutnā'ax te 'Eyit ha' mōg, tu 'Yoye ha' mōg, tu hām'āktux 'Ihā Yoye mō'yōn, 'ūyōtkup hā hām'āktux,

²⁰ hu:

—'Āpu, 'āyok, kaxxop put, xi' tut mōgā', nūy 'Iyaet yōg hām ha putpu mōg. Yā tik kummuk xok, nōm te kaxxop xak, nūy putex. Yīy mōg. Kaxīy.

²¹ Ha Yoye yok, tu kaxxop put, xi' tut mōgāhā', ha ta' mōg 'Iyaet ha', tu' mōg tu mōktu' mōxaha',

²² ha tikmū'ūn te hāmyūmmūgāhā', tu 'Enot kutok 'Akenap 'āktux, ha Yonex yōg tikmū'ūn xat, yāy tak yānān tu' xat, yīy Yoye kuxānōg, pa Topa te hāmyūmmūgāhā', 'Ihā mō'yōn, 'ūyōtkup hā hāmyūmmūgāhā', yīy Yoye mōg hāpxexka Ganinet tu', xix kaxxop mōg, xi' tut mōg,

²³ nūy tu ti ka'ok kōmēn Nāyane kopah. Yā hōmā tik hittap te Topa pupi hām'āktux, tu Yeyox 'āktux, hu: "Tikmū'ūn te' xuxet'ax mīy putup, tu Nāyane yōg tik 'āxet'ax putup." 'Ūkux. Kaxīy. Yā Topa yōg hām'āktux hittap hā Yeyox xip ka'ok kōmēn Nāyane tu' nōmhā'.

3

Yoām te Topa pupi hām'āktux

¹ Hāpxip 'Ihā Yoām tep-tox pix, tu hāpxexka Yonex yōg hām panip xexka ha' mōg, nūy Topa pupi hām'āktux,

² tu:

—Mā', yāyhāhup, nūy hāpkummuk mīy kux. Yā hōnhā Topa te 'āxat nūnte' Kaxīy.

³ Yā hōmā tik hittap 'Iyaet te Yoām 'āktux, 'Ihā Topa pupi hām'āktux, yīy:

"Tik xip hām panip xexka tu', tu' yīy ka'ok, tu:

'Āpu, Topa yōg putat max mīy, nūy Topa pu putat kohe tu' yoa'."

'Ūkux. Kaxīy.

⁴ Yoām te kāmēn xeh hā topixxax mīy, nūy tu xokxop xax hēg-nāy hīy, tu kunit māhā', xix puk hep xup.

⁵ Ha ta kōmēn Yenoyanēn yōg tikmū'ūn xohix nūn, xix hāpxexka Yonex yōg tikmū'ūn, xix tikmū'ūn te kōnāg xexka Yohnām yīka' pip, tu' nūn,

⁶ ha Yoām te tikmū'ūn xohip-tox pix, 'lhā tikmū'ūn te yāy yōg hāpkummuk mīy'ax 'āktux, tu yāyhāhup tu hām'āktux, nūy nōm kuxyā'.

⁷ Ha Paniye xop nūn kamah, xix Xanoxeo xop nūn, puyīy Yoām kamap-tox pix. Pa Yoām te:

—Āxop kummuk xop te kāyāk-tok putuk! Piyā 'āxat, xayīy 'ōg hāpkummuk mīy'ax tu kux, puyīy Topa 'āha gāy hok, nūy 'ākummugā hok?

⁸ Āpu hāpxopmā max, pu tikmū'ūn xohix xate yāyhāhup yūmmūg.

⁹ Hām'āktux hok, hu: “Yā mōnāyxop 'Amanām yā yūmū'ā hā mōnāyxop xe'e', 'a Topa te 'ūgkummugāp-tup'ah,” Kaxīy. 'Ūxuktux hok! Yā Topa mūn ka'ok, tu mīkax xap hā 'Amanām mōkputox mīy'ax.

¹⁰ Tikmū'ūn te mīm kup kummuk xak, kupuk hā' xak, tu kuxap hā mō'hap, pu tu nōg, ha kaxīy Topa te tikmū'ūn kummuk kix putup, tu' nōa'.

¹¹ Āte 'āp-tox pix, tu kōnāg hā 'āp-tox pix, xa yāyhāhup, nūy hāpkummuk mīy hok 'ūxeheh, pa tik puxet tek pe' nūn putup, tu' ka'ok, ha tak pu'uk. 'Ap max'ah 'āte nō pataxax tat, yāk mūn kutōgnāg. Hamūn te Topa Koxuk xa mō'kutnāp-tup puyīy 'ākuxa ka'ogā', nūy 'ākuxa kummuk tupmā'.

¹² Yā pēnēn paha', nūy xuxnāg xetox xap mōy mīxux kopah, nūy xap xix mīptut kopah, 'lhā mīxux naknāg mō'hap kuxap tu', ha kaxīy Topa te yāy yōg tikmū'ūn xex max, pa' yīpkox 'ohnāg xop xūyāp-tup, kuxap hā' puk putuk nō xūyāp-tup, ha' xūy xuxix tapax 'ohnāg. 'Ūkux. Kaxīy.

Yoām te Yeyox putox pix

¹³ Hāpxip kutōgnāg 'lhā Yeyox mōg, tu ta hāpxexka Ganinet tu' xip, tu kōnāg xexka Yohnām ha' mōg, pu Yoām putox pix,

¹⁴ pa Yoām te:

—Āmhok! Kaxīy hok! Pak mūn putox pix 'ūyānān tu! 'Āxexka, hak mūn kutōgnāg, Teptu xatek xat, 'ūg 'āp-tox pix? Kaxīy.

¹⁵ Ha Yeyox te:

—Topa te 'āp-tup, xak putox pix. Yā puxi'. Kaxīy.

Ha: —Ya hamūn. Kaxīy. Tup-tox pix.

¹⁶ Ha' pix kux, 'lhā Yeyox te kōnāg kox tu' xupep, ha pexkox xōn, ha Yeyox te Topa Koxuk pēnāhā', ha ta tu' yīxohoh kuxxuxtut putuk, tu mōktu Yeyox putox tonnok, tu yīmū' xip,

¹⁷ ha ta Topa yīy, tu hām'āktux pexkox tu', hu:

—Nūhū 'ūgkutok pit. 'Āte nōm mō'yāy xe'ēgnāg, hak kuxa hittupmāhā'! Kaxīy.

4

Hāmgyāgnāg te Yeyox xapit puyīy hāpkummuk mīy

¹ Ha Topa Koxuk te Yeyox mōgāhā hām panip tu', ha Hāmgyāgnāg te Yeyox xapit, puyīy hāpkummuk mīy.

² Yā 'āmniy xohix te 40 hā 'ap xit'ah Yeyox, ha putup tep-tex,

³ yīy Hāmgyāgnāg te' yīka xupep, tu:

—Pax xa yā Topak-tok, 'āpu' xat, pu nūhū mīkaxxap yāyhā pām xe'e', xayī' mā'. Kaxīy.

⁴ Ha Yeyox te:

—Topa yōg tappet te tikmū'ūn xat, pu pām puxet hā tu hi ka'ok hok, pāyā' xat, pu Topa yōg hām'āktux hā tikmū'ūn kuxa hi ka'ok. Kaxīy.

⁵ Ha Hāmgyāgnāg te kōmēn Yenoyanēn ha' mōgāhā', yā Topa yōg kōmēn, ha Topa pet xexka tu' mōgāhā', pu' pet tox xanep yīmū 'āti',

⁶ ha:

—Pax xa Topak-tok, xa nūy nūhāy hām tu'. Yā Topa yōg tappet te:

“Topa te pexkox yōg xop nū'pok putup, nūy 'āpēnā max,

tu 'ātat putup, 'ūyim hā 'ātat putup, ka mīkaxxap 'āpata xūy.”

'Ūkux. Kaxīy.

⁷ Ha:

—Pa Topa yōg tappet te hām'āktux kamah, hu: “'Ōgnū Topa hā hāpkutex'ex hā gāyā hok.” Kaxīy.

⁸ Ha Hāmgyāgnāg te' mōgāhā yīktix tox xanep yīmū', tu hām xexka max xohix tu' mūg, tu hāpxopmā'ax max xohix tu' mūg,

⁹ tu:

—Pēnā! 'Ūgmūn pu nū'āxup, kopxix xa' hōm hāpxop xohix. Kaxīy.

¹⁰ Ha Yeyox te:

—'Ākmūn'ah. Mōg, nūy 'āpep. Yā Topa yōg tappet te: “Topap-xehnāg pu nū'āxup, nūy 'ākuxa' yēy.” Kaxīy.

¹¹ Yīy Hāmgyāgnāg te' nīm, ha pexkox yōg nū'pok xop nūn, nūy Yeyox pēnā max.

Yeyox te hāpxopmā kōnāmāhā'

¹² Ha ta' nūn xonat xop, tu Yoām mūg, tu kanet hā mō'tat, ha Yeyox te' yūmmūg, tu hāpxexka Ganinet tu' mōg,

¹³ tu kōmēn Nāyane nīm, nūy kōmēn Kapānān tu' xip, ha kōnāg xexka Ganinet te' yīka' xup, yā' xip hāpxexka Yemonōm xix Nāptanix tu'.

¹⁴ Hōmā, hāmyāxatamuk xohix 'lhā Topa te hām'āktux, ha tik hittap 'Iyait te nōm pupi hām'āktux, tu tappet tu kax'āmi', nūy tikmū'ūn xohix pu hāmyūmmūgā', nūy Yeyox xip'ax 'āktux. Yā Topa yōg hām'āktux hittap hā Yeyox te kōmēn Kapānān tu' nox xip, yīy:

15 "Yemonōn yōg hahām, xix Nāptanix yōg hahām,

yā kōnāg xexka kux tu' pip, tu kōnāg xexka Yohnām xatapa' pip,

nō'ōm puknōg yōg Ganinet.

16 Yā' puknōg xop te hāpkoxtap kopa' pip, tu hāmyūmmūg 'ohnāg,

tu kuyānām xexka pēnāp-tup, puyīy hāptupmā',

puyī' puknōg xop hāmyūmmūg, ha kuyānām te hāpkoxtap tu māp-tup, nūy nōm puknōg xop kuxa hittupmā'."

Ūkux. Kaxīy.

17 Ha Yeyox te hām'āpak max'ax 'āktux hāmāxap, hu:

—'Āpu, yāyhāhup, tu 'ōg hāpoxpōmā'ax kum-muk kux! Yā hōnhā Topa te yāy yōg tikmū'ūn xat. 'Āpu ṽpox pi!' Kaxīy.

Yeyox te tik te 4 xānāhā'

18 'Āmnīy 'ūm ṽhā Yeyox te hāpkumep, tu kōnāg xexka Ganinet yōg hāpkux tu' hāpkumep, ṽhā tik taknōy 2 pēnāhā', ha mām xuk, tu' xuxet'ax Xīmām, yā' xuxet'ax nōy te: Pet, xi' taknōy 'āxet'ax 'Ānene', tu mō tu' panip yōn, tu mām xuk pax,

19 ha Yeyox te:

—'Āpu, 'ūkpe mōg 'ūg 'āyūmmūgā', xayīy tikmū'ūn tuk ha nūnnā'. Kaxīy.

20 Yīy tut panip nīm, nūy Yeyox mūtik hāpkumep.

21 Ha' mōg ṽhā tik taknōy 2 nōy pēnāhā', ha' xuxet'ax Tiak, xi' taknōy 'āxet'ax Yoām, yā Yemeneo kutok, tu yāy tak yōg mīpkox kopa' mām, nūy tut panip mīy. Ha Yeyox te' xapit, puyīy nū mūtik hāpkumep,

22 ha hāpxip 'ohnāg ṽhā' mōg, tu yāy tak nīm, xix mīpkox nīm, nōm te kōnāg yīmū' mōg, ha Yeyox pe' mōg.

Yeyox te hāmyūmmūgāhā xix hittupmāhā'

23 Ha Yeyox te hāpkumep punethok, tu ta Ganinet yōg hāpexka xohix hā hāpkumep, tu Topa pet xohix kopa hāmyūmmūgāhā', tu Topa yōg hām'āpak max'ax 'āktux, xix Topa te tikmū'ūn xat'ax 'āktux, tu tikmū'ūn pakut xop hittupmāhā',

24 ha hāpexka Xit yōg tikmū'ūn xohix te' xupak, hu' pakut xop tat Yeyox hah, yā hāmpakut xohix te tikmū'ūn pakutnāhā', xix yāmīy kummuk te' pakutnāhā', ha nōm tikmū'ūn te yāy pu xu'ux xop tat, xix hāpkumep hok xop tat, ha Yeyox te' xohix hittupmāhā'.

25 Ha tikmū'ūn xohix punethok te' pe' mōg, yā Ganinet yōg tikmū'ūn, xix kōmēn te 10 yōg tikmū'ūn, xix Yenyōanēn yōg tikmū'ūn, xix Yonex yōg, xix Yohnām xat-apa' pip xop. Yā' xohix te Yeyox pe' mōg.

5

Yeyox te hām'āktux yīktix yīmū'

1 Jesus te tikmū'ūn xohix pēnāhā', tu yīktix tu' mōg, tu mōktu pepi' xip, tu' yūm. Ha yāy yōg tik xop te' yīka' mām,

2 ha hāmyūmmūgāhā', nūy Topa yōg hāpoxpōmā'ax yūmmūgā', hu:

3 —'Ūkuxa hittup'ax tikmū'ūn kuxa kopa' hok xop.

Yā Topa te nōm tikmū'ūn xat xe'e', hu' kuxa hittupmāhā'.

4 —'Ūkuxa hittup'ax tikmū'ūn pota punethok xop.

Yā Topa te' kuxa hittupmāp-tup.

5 —'Ūkuxa hittup'ax tikmū'ūn te yāy kutōgnāg pe'paxex.

Yā Topa te nōm pu hām'āktux xex, tu' xaxok 'ohnāg, yīy pexkox yōg hāpoxop pop putup.

6 —'Ūkuxa hittup'ax tikmū'ūn yīpkox pip xop, nōm te' xak, nūy Topa pu' yīpkox pi', tu hāmyok mīy putup xūy.

Yā Topa te' kuxa māmāhā'.

7 —'Ūkuxa hittup'ax tikmū'ūn te' nōy kuxa ka'.

Yā Topa te nōm tikmū'ūn kuxa ka'.

8 —'Ūkuxa hittup'ax tikmū'ūn kuxa tup xop.

Yā nōm te Topa pēnāp-tup.

9 —'Ūkuxa hittup'ax tikmū'ūn te yāy kix kuxyāhā'.

Yā 'ōm te Topa hāk-tok xe'e'.

10 —'Ūkuxa hittup'ax tikmū'ūn xūy, nōm tikmū'ūn xūy nūy hāpoxpōmā max.

Yā Topa te' xexkānāp-tup ṽhā' hep xop xohix xat.

11 —'Ākuxa hittup'ax ṽhā' gāy xop te 'āxūyāhā', xix 'āmānōg, xix 'ākte'ex kum-muk, xix 'ākupep, 'ūkpe 'āmōg hah.

12 'Ākuxa hittup'ax, yā Topa te xa popmāp-tup pexkox yōg hāpoxop xohix. Yā hōmā tik gāy xop te Topa yōg tik hittap xop xūyāhā', tu' pupi hām'āktux xop xūyāhā kamah, 'āmūn putuk.

Yeyox te 'āmot xuxpex 'āktux xix kuyānām

13 —'Āmot xuxpex te' xit'ax xuxpexgāhā', ha xogyīn kutnat, puyīy tuk-tox hok. Ha kaxīy 'āxop te Topa hā' puknōg xop pu hāmmaxnāhā'. Pax pu 'āmot ku'uk kummuk hāk-tox, puxix tikmū'ūn xep-tup nōg, nūy hāptopa putyōn, ha' xohix te' tonnok.

14 —Kuyānām te hāptupmāhā', ha kaxīy 'āxop te tikmū'ūn pu Topa pupi hām'āktux, tu' kuxa hittupmāhā'. Tikmū'ūn xohix te kōmēn pēnāhā', yā kōmēn te yīktix yīmū' pip.

15 Piyā kuyānām tat'ax paha', nūy nō manax kopa' yūm, tu mō'nīy? 'Ap yūm'ah, pāyā mīmpe yīmū' yūm, puyīy mīptut xohix tupmā', puyīy tikmū'ūn nō hāmpēnā max.

16 Ha kaxīy 'āxop te tikmū'ūn pu Topa yōg hām'āktux 'āktux, pu tu hittup, ha kaxīy 'āxop te hāpoxpōmā max, pu tikmū'ūn pēnā',

nŷy 'Átak Topa pu hām'áktux, hu: "Yā 'āmāx xe'ēgnāg"! Kaxīy.

Tu Topa yōg xat'ax 'áktux

17 —Ūpe'āpaxeh hok, hu: "Yeyox nŷn, nŷy Mōyyex yōg xat'ax nōa!" Kaxīy. 'Ámhok. 'Aknŷn'ah 'ūg tik hittap xop yōg hām'áktux nōa', nōm hittap xop te Topa pupi hām'áktux, 'ap nōāp-tup'ah, pak nŷn nŷy hām'áktux yŷmmŷgā max.

18 Ūxaxok hok. Yā' xat'ax xip ka'ok, tu' nōg 'ohnāg. Yā Topa yōg tikmŷ'ūn te' xuk-tux putup mō'kuma' mōg. Yā kax'āmi'ax kutōgnāg xut 'ohnāg, 'Īhā pexkox xip, 'Īhā' xip hahām. Ūnōg 'ohnāg.

19 Yīy tikmŷ'ūn yīpkox pip 'ohnāg Topa yōg xat'ax pu', xi' nōy yŷmmŷgā'ax, pu' yīpkox hok, puxix 'ōm kutōgnāg. Yā Topa te nōm kutōgnāg 'áktux putup 'Īhā yāy yōg tikmŷ'ūn xat. 'A xexkānāp-tup'ah. Pa tikmŷ'ūn yīpkox pip, tu' nōy yŷmmŷgā'ax, pu yīpkox pi', puxix Topa xexka 'áktux putup, 'Īhā yāy yōg tikmŷ'ūn xat.

20 Yīy hāp-xopmā max Topa pu', tu 'āyīpkox pip pax Topa pu', puyīy Topa 'āxop pu pexkox xōn, 'Īhā yāy yōg tikmŷ'ūn xat, nŷy: Mōnāy! Kaxīy. Pa hāmyŷmmŷg xop yīpkox 'ohnāg xop, xix Paniye xop te' mōxakux 'ohnāg.

Tu tep-tup nōg 'áktux

21 —Tik hittap te mōnāyxop pu hām'áktux, tu' xat, hu: "Ūp-tex hok. Tikmŷ'ūn te' nōy putex, puxi' mōgā tik pa te hāmyŷmmŷg keppah, puyī' yōg hāpkummuk mīy'ax kopit." Kaxīy.

22 Pa 'āte 'āxat, hu: Tikmŷ'ūn te' nōy hā' gāy, puxix tik pa te hāmyŷmmŷg kopit. Ha tikmŷ'ūn te' nōy pu hām'áktux, hu: "Ákummuk," kaxīy, puxix tik xexka xop hāpkummuk mīy'ax kopit. Ha tikmŷ'ūn te' nōy putup nōg, hu nōm pu hupmāhā', hu: "Āp-tox kummuk!" kaxīy, puxix nōm mōgā Hām-gāyāgnāg Pet hah.

23 Ámōg Topa pet hah, nŷy Topa pu hāp-xop mō'hap, nŷy tu' haxyā', tu hāmpē'paxex, hu: "Hamŷn, 'ūgnōy gāy, tute 'ā tu' gāy," kaxīy.

24 'Āpu, 'ōg hāp-xop mō'hap'ax nīm, nŷy mōg mō'ka'ok 'ānōy hah, pu 'ānōy mŷtik yāyhā 'āxape 'ūxeheh, hak-nāy tu 'ōg hāp-xop mō'hap Topa pu'.

25 —Tikmŷ'ūn te xa tu' gāy, xix 'ākupeh, tu 'āmōgā'ax tik pa te hāmyŷmmŷg hah, 'āpu nŷ mŷtik yāyhā 'āxape, ka 'āmōgā tik pa te hāmyŷmmŷg hah, ha' xat pu 'āmŷy, nŷy kanet kopa mō'ātat.

26 Pax xa kanet kopa 'āxip, hu ta 'āxupa hok, tu mōktu tayŷmak xexka hā pago, xayīy 'āpep.

Ūnōy hā' xupxet 'áktux

27 —'Āxop te Topa yōg xat'ax yŷmmŷg, ha: "Ānōy hā xupxet hok!" Kaxīy.

28 Pa 'āte 'āxat, hu: Ūn 'āpa hā pēnā hok, nŷy 'ūn putup hok. Tikmŷ'ūn te 'ūn pēnāhā' puxi' kuxa kopa' xonnix.

29 Pax xa 'āpa xe'e xa hāp-xopmā kum-mugā', 'āpu 'āpa xut, nŷy putyōn. Yā' max 'āpap-xet, ha ta' kummuk, xa Hām-gāyāgnāg Pet ha 'āmōg.

30 Pax xa 'āyīm xe'e xa hāp-xopmā kum-mugā', 'āpu 'āyīm xax mīkax hā, nŷy putyōn. Yā' max 'āyīm puxet, ha ta' kummuk xa Hām-gāyāgnāg Pet ha 'āmōg.

Tik te yāy xetut nīm 'áktux

31 —Tikmŷ'ūn te 'āxat kamah, hu: "Tik te' xetut nīm putup, puxix tappet mīy, pu tu' nīm." Kaxīy.

32 Pa 'āte 'āxat xe'e: 'Āxetut nīm hok. Pēyā' xetut te tik nōy mŷtik xonnix, 'ūtux hok pu nīm, pāyā' xetut te tik nōy mŷtik xonnix hok, 'ūtux hok pu nīm hok, ka tik nōy mŷy, nŷy nŷ mŷtik tu' xonnix. Yā tik te' nōy xetut mŷg, tu nōm hā' xupxet, yā hāpkummuk mīy.

Tute hām'áktux xex'ax 'áktux

33 —Mōnāyxop hittap te Topa yōg hām'áktux 'āpak, hu 'āxat, hu: "Xate Topa pu hām'áktux xex, 'āpu' xaxok hok, nŷy mīy." Kaxīy.

34 Pa 'āte: Topa 'āxet'ax 'áktux hok 'Īhā hām'áktux xex, xix pexkox 'áktux hok. Pexkox yā Topa xip'ax xe'ēgnāg hah,

35 xix hām xexka 'áktux hok, 'Īhā hām'áktux xex. Yā hām xexka xohix Topa yōg, yā' yōg hāptonnok'ax. Ha Yenoyanēn 'áktux hok. Yā Topa te' xat xe'ēgnāg, yā' yōg kōmēn xe'e',

36 xix 'āxe 'áktux hok, 'Īhā hām'áktux xex. Pi'yā' yāy xe yāyhā yām-nok, xip-nīy? 'Ap yāyhā yā yŷmmŷg'ah, yīy 'āxe 'áktux hok, 'Īhā hām'áktux xex.

37 Hu hām'áktux kutōgnāg, hu: "Ámhok," kaxīy, xix: "Hamŷn," kaxīy. Puxi'. Yā Hām-gāyāgnāg mŷn te tikmŷ'ūn yŷmmŷgāhā, pu hām'áktux tox. Hām'áktux tox hok!

Ūnōy pu hāpkummuk hā' yānān 'áktux

38 —Tikmŷ'ūn te: "Yā' max tikmŷ'ūn kummuk pu hāpkummugā 'ūyānān tu', nŷy tu pago." Kaxīy.

39 Pa 'āte: Tikmŷ'ūn kummuk pu hāpkummugā hok, nŷy tu pago hok, pa tik te 'āpayīn kix, 'āpu' tux hok pu 'āpayīn nāg nōy kix kamah.

40 Tikmŷ'ūn te 'ōg topixxax xut, 'āpu 'ōg kayak tu' hōm kamah, ha tu paxmōg.

41 Xonat puknōg te 'āxat, xayīy 'ūyōg hāp-xop putux tat, 'āpu' tat. Ha 'āxat pu kinōm puxet hā' tat, 'āpu kinōm 2 hā' tat.

42 Tikmŷ'ūn te hāp-xop 'ūm xak, nŷy ta putpu xa' hōm, 'āpu tu' hōm. Tikmŷ'ūn te' hok xak hāp-xop 'ūm, 'āpu tu' hok hōm.

'Áhã' puknõg xop putup pax

43 —Tikmũ'ũn te: "Áxapep-tup pax, pa' puknõg xi' gây xop putup hok." Kaxiy.

44 Pa 'áte': Gây xop putup pax, xi' puknõg xop, xix Topa tu' xax, pu nõm hã hãmmaxnã',

45 xa 'axop yâyhã Topa hã 'æk-tok xop xe'e'. Yã Topa te mãyõn xat, pu' hep xop xohix pu hãm pukgã', yã hãpxorpã kummuk xop pu' mĩy, xix hãpxorpã max xop pu' mĩy kamah. Tute tex nũ'kutnãhã' hep xop xohix pu. Yã tikmũ'ũn te hãmyok mĩy xop pu nũ'kutnãhã', xix tikmũ'ũn te hãpkohe' mĩy xop pu tex nũ'kutnãhã kamah.

46 Áxop te 'axapep-tup xix tikmũ'ũn gây xop putup nõg, puxix Topa xa pexkox yõg hãpxop 'ũm hõm hok. Yã tik kummuk xop te gohet pupi tayũmak pop, tute yây xape xop mũn putup pax, xi' puknõg xop putup nõg.

47 Áxop te 'axape xop mütik hãm'ãktux puxehñãg, ha ta' puknõg xop te yây xape mütik hãm'ãktux kamah, nõm xop te Topa hã' puknõg xop.

48 —Ápu hãpxorpã max xe'egnãg, nũy 'Átak Topa putuk, ha pexkox kopa' xip, tu hãpxorpã max xe'egnãg mõ'kuma' mõg.

6*'Ánõy pu hãmmaxnãhã'*

1 —'Õg pa 'ãti!' Hãpxorpã max hok, nũy mõ'ãmã hok, puyiy tikmũ'ũn pẽnã'. Ámhok. Pa Topa pu hãpxorpã max xe'e, puyiy Topa pẽnã'. Pãyã xate' mĩy puyiy tikmũ'ũn pẽnã', puxix Topa yũmũg Tak xa pexkox yõg hãpxop 'ũm hõm putup hok.

2 —Xate tikmũ'ũn hok xop pu hãpxop hok hõm, 'ãpu ÿy hok. Yã mõ'ãmã'ax xop pa max, pãyã' kuxa kummuk, tu yây yõg hãpxorpã max'ax 'ãktux, tu Topa pet kopa hãm'ãktux, xix kõmẽn kopa hãm'ãktux, pu tikmũ'ũn hãpxorpã'ax yũmmũg, tu: "Yã tik max, 'õhõm!" Kaxiy. Yã Topa tep-tup nõg, tu: "Puxi." Kaxiy. Tu pexkox yõg hãpxop 'ap hõm putup'ah, mõ'ãmã pax xop pu' hõm putup'ah.

3 Xate tikmũ'ũn hok hã nõ teheh, 'ãpu hãm'ãktux hok, pu tikmũ'ũn 'ũm yũmmũg hok, pu 'axape xe'e yũmmũg hok.

4 Tikmũ'ũn 'ũm pu' xuktux hok, puxix Topa xa pexkox yõg hãpxop hõm. Yã Topa te hãpxorpã'ax xohix pẽnãhã'.

Tute Topa pu hãm'ãktux 'ãktux

5 —Tikmũ'ũn te mõ'ãmã, yã' pa max, pãyã' kuxa kummuk, tu Topa pu hãm'ãktux hitop, tu kõmẽn yõg putat hã' xuktux, xix Topa pet kopa' xuktux, pu tikmũ'ũn pẽnã', nũy tu: "Úmax nõ'õm! Yã Topa pu hãm'ãktux pax!" Kaxiy. Pãyã yã' koit.

6 Pa 'ãpet ha mõg, nũy mõhãmyĩnnĩn, nũy 'ãp-xehñãg hã 'õg 'Átak Topa pu hãm'ãktux, 'Ihã xate nõm pẽnã 'ohnãg, ha' xupak, tu xa'

hõm pexkox yõg hãpxop. Yã Topa 'õg 'Átak te hãpxorpã'ax xohix pẽnãhã'.

7 —Topa pu 'ãp-xehñãg hã hãm'ãktux, tu hãm'ãktux 'ãhiynãg hok, 'ũpuknõg xop putuk. Nõm te Topa pu hãm'ãktux tox, tu hãm'ãktux 'ãhiynãg, puyiy Topa' xupax.

8 Kaxiy mĩy hok! Topa yã 'õg 'Átak, tu hãmyũmmũg xe'egnãg, tu xatep-tup yũmmũg tap.

9 Yiy Topa pu hãm'ãktux kaxiy, hu: "Yũmũg 'Átak, nõm te pexkox tu' xip, puyã' xohix kuxa' yey 'ãkeppah, tu 'ãmãx xe'egnãg 'ãktux.

10 Puyã tikmũ'ũn xohix 'õg xat'ax pu' yĩpkox pi' nũhũ hãhãm tu'.

Yã pexkox yõg xop xohix yĩpkox pip nõmhã.

11 'Ámnỹy xohix 'Ihãk mũ'ã hãpxop 'ũm nũ'kutnã', 'ũy' mã',

12 hak mũ yõg hãpkummuk mĩy'ax xaxogã', pu tu kux.

Tikmũ'ũn tek mũg kummugãhã', hak mũ'ãte nõm mĩy'ax xaxogãhã kamah, ha' kux.

13 'Ûtux hok puk mũg kopit hok, 'ũgmũ'ã hãpxorpã kummuk hok, pak mũg ka'õgã', 'ũyiy hãpxorpã max.

Yã 'ãxexka xe'egnãg, hu tikmũ'ũn xohix xat, xix hãpxop xohix xat, ha' xat kuxyã 'ohnãg, 'ãka'ok xe'egnãg hah, xix 'ãmãx xe'egnãg kamah. Hamũn."

14 —'Ánõy yõg hãpkummuk mĩy'ax xaxogã', puxix 'Átak Topa 'õg hãpkummuk mĩy'ax xaxogã',

15 pa 'ãnõy yõg mĩy'ax xaxogã hok, puxix Topa 'õg mĩy'ax xaxogã 'ohnãg.

'Áxit hok nũy Topa pu hãm'ãktux

16 —'Áxit hok nũy Topa pu hãm'ãktux, hu ta 'ãpa hittup. Tikmũ'ũn te mõ'ãmã', yã' pa max, pãyã' kuxa kummuk, tu' xit hok 'Ihã pa kummuk, puyiy tikmũ'ũn pa kummuk pẽnã', tu' xit hok yũmmũg, pa Topa te nõm xop pu pexkox yõg hãpxop hõm 'ohnãg.

17 'Áxit hok, nũy Topa pu hãm'ãktux, 'ãpu 'ãpayĩn pix, xix 'ãxe yoa',

18 puyiy tikmũ'ũn 'ãxit hok yũmmũg hok. Yã 'Átak Topa puxehñãg te' yũmmũg, ha tikmũ'ũn te Topa pẽnã hok, ha hãpxorpã'ax xohix pẽnãhã', tu xa pexkox yõg hãpxop hõm putup.

Pexkox yõg hãpxop 'ãktux

19 —Hãpxop xohix pop hok, xix tayũmak xexka pop hok, nũy yãy tu nũ'xok, tu mõktu 'õg tayũmak xohix nũnte hãm xexka tu'. Yã' kut te' mãhã', hak-nox, ha' nõg, ha tik kummuk te' nõy yõg hãpxop hã' xupxet, xix 'õg tayũmak hã' xupxet'ax, yiy pop hok,

20 pa pexkox yõg hãpxop pop, tik 'ũm te nõm hãpxop hã' xupxet hok, xik-nox 'ohnãg.

21 Tikmũ'ũn kuxa te yãy yõg hãpxop xak, yiy pexkox yõg hãpxop xax, puyiy 'ãkuxa hitupmã'.

Kuyānām 'āktux

²² –Kuyānām te tikmū'ūn pa putuk, tu hāptupmāhā', ha tikmū'ūn te hāmpēnā max. 'Ūpa max, puxix nōmhā hāmpēnā max kamah.

²³ 'Ūpa kummuk, puxix hāmpēnā kummuk. Pax xa 'āpa hok, puxix hāmpēnā 'ohnāg. Yā 'āmnīy koxtap pax!

Tute 'ūptexop xexka 'āktux

²⁴ –Tikmū'ūn te' xuxyā 2 pu hām hok. Yā' xuxyāp-xet putup nōg, tu ta' nōy putup pax. Kaxīy tikmū'ūn te Topa pu hām hok 'īhā tayumak xak pax.

²⁵ –Yīy 'āte xa hām'āktux, hu: Xutigā hok, nūy tu: “'Ātep-tep mā'ax?” Kaxīy. Xix: “'Ātep-tep mūn xo'op'ax?” Kaxīy. Xix: “Pi'a 'āte mō'tat'ax?” Kaxīy. Yūmmūg. Tikmū'ūn yīn max hāmāxap, hak-nāy tu hāp̄xop xit'ax xix topixxax.

²⁶ Putuxnāg pēnā', ha' topaha'. 'Ap hāp̄xop xap xok'ah, xix hāp̄xop ta nūnnā 'ohnāg, tu' pet kopa' xex 'ohnāg, pa 'Ātak Topa te pexkox tu' xip, tu pēnānā' xip, puyīy putuxnāg xit. Pi'yā Topa tep-tup? Yā Topa te tikmū'ūn putup xexkah, tu putuxnāg xop putup kutōgnāg.

²⁷ Pax pu tikmū'ūn 'ūm yāyuxop xexkah, puxi' xutigā'ax hā' hi tox 'ohnāg.

²⁸ –Teptu hāmpē'āpaxex, hu: “Tep tek mō'tat'ax?” Kaxīy. Pēnā mīnnut. 'Ūtuk max, tu' hām 'ohnāg, tu topixxax xap 'ohnāg yāy pu'.

²⁹ pa 'āte xa hāp̄xe'e 'āktux: Mōnāy xop hittap Xanomām yā' xexkah, tu 'Iyaet yōg tikmū'ūn xohix xat, tep-xetop xexkah, tu topixxax max mō'tat, pa Xanomām xax 'ānuk max, ha mīnnut xax 'ānuk māynāg.

³⁰ Yā Topa te mīnnut xop xax mīy, xix mīxux xop xax, ha hōnhā' xip, tu hāptup 'īhā' tap, ha kuxap hā mō'xut, ha' nōg, yīy Topa te xa topixxax mō'tatnāhā kamah, pa 'ākuxa mām pu'uk Topa kopah.

³¹ Yīy yāy xutigā hok, nūy 'āxit'ax xax hok, nūy xo'op'ax xax hok, nūy topixxax xax hok. 'Āmhok. Kaxīy hok.

³² 'Ūpuknōg xop te Topa yūmmūg 'ohnāg, hu' yāyuxop punethok, pa Topa yā 'āxop hā 'Ātak, tu pexkox tu' xip, tu 'āpēnānā' xip, nūy xa hāp̄xop xohix mō'pok,

³³ yīy Topa xax hāmāxap, tu nōm pu 'āyīpkox pi', nūy nō xat'ax mīy, ha xa' popmāp-tup hāp̄xop xohix.

³⁴ Yīy xutigā hok 'īhā hāptup pe'āpaxex. Yā hāptup mō'nāp-tup, ha xate hāp̄xop xak putup punethok, nūy yāyuxop. Pa hōnhā yā yāyuxop punethok. Yā' puxi'.

3

'Ūnōy yōg hāp̄xopmā'ax 'āktux kummuk

¹ Tikmū'ūn nōy yōg hāp̄xopmā'ax kopit hok, nūy nō kummuk 'āktux hok, ka Topa 'ōg hāp̄xopmā'ax kopit, nūy 'ākummuk 'āktux kamah.

² 'Āxop te 'ānōy yōg hāp̄xopmā'ax kopit, ha kaxīy Topa te 'ākopit putup; 'ōg panat hā 'ānōy pu hāp̄xop xap hāmenex, puxix nōm panat hā xa hāmenex hāp̄xop xap kamah 'ūyānān tu'. 'Ānōy puk-tōgnāg hōm, puxix xa' hōm 'āk-tōgnāg kamah. 'Ānōy pu punethok hōm, puxix xa' hōm punethok 'ūyānān tu'.

³ Xate 'ānōy yōg hāp̄xopmā'ax kummuk pēnāhā'. Teptu xate pēnā hok yāy yōg hāp̄xopmā'ax kummuk?

⁴ Xate 'ānōy pu hām'āktux, hu: “Nāy, tux hok 'ū xa hāmyūmmūgā',” kaxīy, 'īhā 'āpa te hāmyūmmūg 'ohnāg.

⁵ 'Āpa te hāmyūmmūg 'ohnāg, yā mō'āmā'. Yāy yōg hāp̄xopmā kummuk kux hāmāxap, xayīy kunāy tu 'ānōy yōg hāp̄xopmā'ax kummuk kuxyā'.

⁶ –Topa yōg hāp̄xop max hōm hok kokex putuk xop pu', ka gāy ha 'āp-top. 'Ōg kupxat xap max hōm hok xapup putuk xop pu', ka' gāy ha nōm tonnok. Kaxīy Topa yōg hām'āktux 'āktux hok hāmgāy xop pu', ka 'āp-tex 'ūgāy tu'.

Topa mūn max

⁷ –Topa tu' xax, puxix xa' hōm. 'Ūxax, hu ta' xipi', hāptopa 'āxip, tu' xānā', puxix xa' xōn.

⁸ Tikmū'ūn te ta tu' kax, puxi' pop, ha tikmū'ūn te' xak, puxi' xipi', ha Topa te hāp̄xōn putup 'īhā tikmū'ūn te hāptopa xānāhā', hu: “Hāp̄xōn!” Kaxīy.

⁹ 'Āk-tok te pām xak. 'Ok hōm putup mīkaxxap, nūy tu yānān? 'Āmhok!

¹⁰ 'Āk-tok te mām xak. 'Ok hōm putup kāyā gāy, nūy tu yānān? 'Āmhok. 'Ap yānān putup'ah.

¹¹ Tikmū'ūn kuxa kummuk, tu hāp̄xopmā kummuk, pak-tok putup pax, tu tu hāp̄xop max hōm, ha 'Ātak Topa kuxa max xe'ēgnāg, tu pexkox tu' xip, tu' yāy kutok xop pu hāp̄xop max xe'e popmāhā', 'īhāk-tok xop te ta tu' kax, pu' popmā'.

¹² –Xatep-tup tikmū'ūn xa hāmmaxnā', yīy nōm pu hāp̄xopmā max hāmāxap. Yā Mōyyex te' xat, xix tik xop hittap te yūmū'ā hāmyūmmūgāhā'.

Tute putat 2 'āktux

¹³⁻¹⁴ –Hāmpak'ax yīkox kutōgnāg hā mōy mōnāy. Ha ta' xip hāmpak'ax yīkox xexkah, 'ūyōg putat te Topa yōg putat xakgāhā', ha tikmū'ūn punethok te putat xexka hā' mōg, yīy mōnāy hok, pak-tōgnāg nōm hāmpak'ax yīkox hā mōnāy, nūy Topa yōg putat xe'e hā mōg, xayīy 'āhi xe'ēgnāg mōkuma mōg.

Tute tik xop te mō'āmā'ax 'āktux

¹⁵ —Ög pa 'äti!' Yä tik xop te mō'āmā', tu Topa pupi hām'äktux xop putuk, päyā hamün'ah. Yä' koit. 'Üpa te kahnēn pa putuk, päyā' kuxa kopa kokex gāynām putuk.

¹⁶ Tu hām'äktux max, pa häpxopmā kummuk. Xate tikmū'ün yög häpxopmā'ax pēnāhā', nūy tikmū'ün yūmmüg. Mīm kup te xäpxox taha', päyā 'a xupxak ta'ah, xix göyap ta'ah.

¹⁷⁻¹⁸ Kaxīy mīm kup max xohix te mīnta max taha', 'ap kummuk 'üm ta'ah, ha mīm kup kummuk te mīnta kummuk taha', 'ap max mün ta'ah,

¹⁹ ha tikmū'ün te' kup kummuk xak, pu hām tu nāy, pu kuxap hä mō'xut, ha' nū' nī' nūy nög.

²⁰ Ha kaxīy 'äxop te tik te mō'āmā'ax pēnāhā', tu' yög häpxopmā'ax kopit, nūy yög häpxopmā'ax kummuk yūmmüg.

Tikmū'ün te Yeyox pu' yīpkox pip

²¹ —Tikmū'ün tek xānāhā', hu 'ātu: "Yäyā', Yäyā'" kaxīy, pa 'üyäg yīpkox 'ohnäg, ha yögnū 'Ätak Topah, tu pexkox tu' xip, tu nōm yīpkox hok xop xat putup 'ohnäg. Pa tikmū'ün yäg yīpkox pi', puxix Topa nōm xat.

²² Yä' yög häptup xe'e mō'nā'ax, 'lhā tikmū'ün punethok te: "Yäyā', Yäyā', 'ügmū'äte 'äxuxet'ax 'äktux nūy hām'äpak max'ax 'äktux, tu yämīy kummuk möy tikmū'ün kuxa kopah, tu häpxopmā ka'ok xe'ēgnäg, tikmū'ün puxet te' mīy hok," kaxīy,

²³ kopix hām'äktux putup, nūy tu nōy yānān, hu: "Äte 'äyümmüg 'ohnäg. Möy, mög, nūy 'äpep, 'äte 'äp-tup'ah, 'äxop te häpxopmā kummuk punethok hah." Kaxīy.

Tute mīptut mīy'ax 'äktux

²⁴ —Tikmū'ün te yög hām'äktux 'äpak, tu' yīpkox pi', puxix ta tu hāmyümmüg, yä tik pet max putuk, ha mīkaxxap xexka yīmū' yā' pet,

²⁵ ha tex gāy mō'yüm, tu' xupep, tu yā kōnäg xet, ha 'āmuuh gāy te mō'kouk xexkah, pa mīptut yüm ka'ok mīkaxxap xexka hä.

²⁶ —Ha tikmū'ün te yög hām'äktux 'äpak, tu' yīpkox 'ohnäg, tu hāmyümmüg 'ohnäg, tu tik pet kummuk putuk, ha 'āmot yīmū' yā' pet.

²⁷ Ha tex gāy ka'ok, ha mīptut te 'āmot tu mō'yüm, tu' pu'uk, tu yāy koxyöy, tu nū'nānām. Ta tu' kux.

Yeyox te hām'äktux ka'ok

²⁸ Tu hām'äktux kux, ha tikmū'ün kuxānög. Yä hām'äktux ka'ok hä Yeyox te tikmū'ün pu hāmyümmügāhā'.

²⁹ Tik te hāmyümmüg xop te hām'äktux pu'uk, päyā Yeyox mün te hām'äktux ka'ok, 'üxat tu'.

8

Yeyox te tik xax kunutnām tapmāhā'

¹ Yeyox te yīktix tu' yīxohoh, 'lhā tikmū'ün xohix punethok te' pe' mög,

² ha tik pakut nūn, tu' xax kunut, tu Yeyox keppa' kopaxux hä' nāhā', tu tu nū' xup, tu: —Yäyā', 'ok xatek putup 'üg hittupmā'?

Kaxīy.

³ Ha Yeyox mō'yīm kutit, tu tik 'äpit, tu:

—Hamün. 'Äte 'äp-tup. 'Ähittup. Kaxīy.

Häpxip 'ohnäg 'lhā tik xax max xupep,

⁴ ha Yeyox te:

—Tikmū'ün pu 'äktux hok, pa 'ämānēn ha mög hāmāxap, pu 'äxax pēnā', nūy 'ähittup yūmmüg, hak-nāy tu Topa pu häpxop mō'hap, pu tu hax. Yä hōmā mōnāyoxop Möyyex te häpxop mō'hap xat, pu tikmū'ün pu yāy hit-tup'ax yūmmügā'. Kaxīy.

Yeyox te kāmānat hittupmāhā'

⁵ Tu ta' mög, Yeyox mög kōmēn Kapānān ha', tu' mög tu mōktu' xupep, pa' xip tik te Hōm yög gohet puknög pu' hām, tu Yeyox ha' nūn, tu ta tu' xak, pu' yög kāmānat hittupmā',

⁶ hu:

—Notot, yögnū kāmānat tek pet tu' xip, tu pakut xexkah, tu häpkumep hok. Yä' xūy xexkah. Kaxīy.

⁷ Ha Yeyox te:

—'Ügmög, nūy nō' hittupmā'. Kaxīy.

⁸ Ha gohet yög tik te:

—'Ämhok! 'Ämög hok! Nāy. 'Äxexkah, hakmün kutögnäg, yīk pet ha mög hok. 'Äpu, hämpakut'ax xat, pu kāmānat nīm, ha' hit-tupmāp-tup.

⁹ 'Ügmün yīpkox xip yögnū xexka xop pu', tu xonat xop xat 'üyānān tu', hakmün pu yīpkox pip. 'Äte xonat puxet xat, hu: "Mög," kaxīy, ha' mög, ha xonat nōy xat, hu: "Mā," kaxīy, ha' nūn. Ha' nōy xat, hu: "Möy mīy!" kaxīy, ha' mīy. Kaxīy.

¹⁰ Ha Yeyox te' xupak, tu' kuxa hittup, tu tikmū'ün te' pe' mög pu hām'äktux, hu:

—'Äte xa häpxe'e 'äktux: Nūhū tik kuxa yüm ka'ok 'ügkopah, ha 'Iyaet yög tikmū'ün kuxa mām pu'uk, yümū yög tikmū'ün kuxa mām pu'uk.

¹¹ 'Üxaxok hok! Hämpuknög xop nūn putup, tu hām xexka xohix tu' nūn putup, nūy 'ämuk xexka mā Yoneo xop mütik, 'lhā Topa te yāy yög tikmū'ün xat, ha mōnāyoxop hittap 'Amanām mütik xit putup, xix mōnāyoxop hittap 'Yak mütik xit putup, xix mōnāyoxop hittap Yako mütik xit putup,

¹² ha Topa te 'Iyaet yög tikmū'ün mō'pok putup häptopa', tu' papuk putup, häpkoxtap kopa' pip putup, 'ükuxa mām 'ohnäg hah. Tu' xūy xexkap-tup, hu potaha häptopa' pip tu'. Kaxīy.

¹³ Tu gohet yög tik pu hām'äktux, hu:

—'Äpet ha mög. 'Äkuxa yüm ka'ok 'ügmün kopah, yīy Topa te 'ög kāmānat hittupmāhā'. Kaxīy.

Häpxip 'ohnäg 'lhā kāmānat hittup.

Yeyox te tikmū'ün punethok hittupmāhā'

14 Ha ta' mōg Yeyox, tu Pet xetut mūg tut ha' mōg, tu' mōg tu mōktu mīptut tu' xupep, tu mō'nāhā', pa' xetut mūg tut pip, 'ūpakut tu', tu' xax pukpex,

15 ha Yeyox te 'ūn yīm 'āpit, ha' xuxi', ha' yok, tuk-nūhā' xip, tu hāpxop xit'ax puk, ha nō' xit.

16 Ha 'āmāxak 'Ihā tikmū'ūn te' pakut xop nūnnāhā Yeyox hah, puyīy yāmīy kummuk mōy, puyīy hittupmā', tu' xat, tu' yīy'ax hā yāmīy kummuk mōy, tu tikmū'ūn pakut hittupmāhā'.

17 Hōmā, hāmyāxatamuk xohix 'Ihā, tik hit-tap 'Iyait te Topa pupi hām'āktux, tu Topa yōg yāykutnā'ax 'āktux, yā Yeyox 'āktux, tu: "Tik te yūmū yōg hāmpakut hā' tot, tu yūmūg xūy'ax hā' tot." Kaxīy. Yā Topa yōg hām'āktux hit-tap hā Yeyox te tikmū'ūn hittupmāhā nōmhā'.

Tikmū'ūn te Yeyox mūtik hāpkumep

18 Ta Yeyox te tikmū'ūn xohix xexka pēnāhā', hu' xat, pu yāy tik xop mōg, ha kōnāg xexka xak.

19 Ha tik te hāmyūmmūg nūn, tu:

—Notot, 'āte 'āmūtik hāpkumep putup. Yā hām'ūm hā 'āmōg'ax, kamak mōg'ax 'āpehe'. Kaxīy.

20 Ha:

—Kokexmax hex te hāpkox kopa' pet, ha putuxnāg te mīm yīpkak tu' pet, pak mūn Tikmū'ūn Kutok, 'ak pet 'ūm xip'ah, nūy 'ūkpihi'. Kaxīy.

21 Ha ta tik nōy te Yeyox mūtik hāpkumep, tu:

—Yāyā', tux hok 'ūktak nō hāpkot hāmāxap. Kaxīy.

22 Ha Yeyox te:

—'Ūgmūtik hāpkumep. Pūyā' xakix xop 'ūxakix nōy xop nō 'āpkot. Kaxīy.

Yeyox te 'āmuuh gāy' āxi'

23 Tu ta' mōg, tu mīpkox hā mō'nāhā', nūy kōnāg xexka yīmū' mōg, ha yāy yōg tik xop te nū mūtik mōg.

24 Hāpxip 'ohnāg 'Ihā kōnāg gāy, ha 'āmuuk gāy kamah, tu mīpkox mō'yōn, ha yāy mahamnām kōnāg yīmū', ha kōnāg te mīpkox hā mō'yūm, pa Yeyox mō'yōn.

25 Ha tik xop te Yeyox yīkagnāg hā' mōg, tu tuhuk, ha yāy koxak, ha:

—Yāyā'! Mō'ōn hok, ka yūmūg xakix! Kaxīy.

26 Ha Yeyox te:

—Teptu yā 'ākuxānōg? 'Ākuxa mām pu'ūgnāg 'ūgkopah! Kaxīy.

Tu' yok, tu 'āmuuh gāy tu' xat, xix kōnāg gāy tu' xat, pu tu xuxi', ha' xuxi'.

27 Ha tik xop te' pēnā ka'ok, 'ūkuxānōg tu', tu:

—Tik 'ūm 'ōhōm? Yā 'āmuuh gāy xat, xix kōnāg gāy xat, ha' yīpkox pip, hu' xuxi'! Kaxīy.

Yeyox te yāmīy kummuk mōy

28 Ha ta' mōg Yeyox, tu hāpxexka Ganat tu' mōg, tu' mōg Ganinet yōg kōnāg xexka xat-apa', tu mōktu' xupep, pa tik 2 nūn, ha yāmīy kummuk tek-te'ex kummuk, yīy xukpot tu' tihī'. Ha yāmīy te' gāyāhā', yīy tikmū'ūn xohix te' yīpkutuk, tu xukpot yōg putat nōā'yēn, hu yīmmap hā' mōg.

29 Hāpxip 'ohnāg 'Ihā tik yīy ka'ok, tu:

—Xate tep mūn putup? 'Āmūn yā Topak-tok. 'Ok nūn, nūy 'ūgmūg kummugā hāmāxap? Kaxīy.

30 Ha ta' pip xapup, tu mīxux māhā',

31 ha yāmīy te:

—Pēyā xatekmūg mōy, 'āpu' xat 'ū xapup kopak mūg mōxakux. Kaxīy.

32 Ha:

—Mōg, nūy mōxakux. Kaxīy.

Ha' mōg, tu xapup xop hā' mōxakux, ha yīktix yīmū' pip, tu yīxo mō'ka'ok, tu kōnāg xexka tu' mōxaha', tu kōnāg hā' mōxakux, tu' xakix kōnāg xexka kopah.

33 Ha tik xop te xapup pēnāhā', tu nū'paha', tu kōmēn ha' mōg, tu mōktu mōxaha' kōmēn tu', tu hām'āktux, tu yāmīy kummuk 'āktux, xix tik 2 'āktux, yāmīy te nōm gāyāhā'.

34 Ha ta' nūn kōmēn yōg tikmū'ūn xohix, tu Yeyox ha' nūn, tu' pēnāhā', 'Ihā tu' xak, pu nōm hāpxexka nīm, nūy mōg, ha' mōg.

9

Yeyox te tik te hāpkumep hok hittupmāhā'

1 Ha ta mō'nāhā Yeyox, tu mīpkox hā mō'nāhā', tu kōnāg yīmū' mōg, tu' mōg, tu mōktu kōmēn Kapānān tu' xupep.

2 Ha ta tikmū'ūn te tik nūnnāhā', ha hāpkumep hok, yīy tikmū'ūn te tutpe hā mō'tat. Ha Yeyox te' pēnāhā', tu tikmū'ūn kuxa mām ka'ok pēnāhā', tu tik te hāpkumep hok pu hām'āktux, hu:

—'Ūgnix 'āhittup. Yā Topa te 'ōg hāpkummuk mīy'ax xaxogāhā' pu tu kux. Kaxīy.

3 Ha tik xop te hāmyūmmūg 'ūm te:

—Nūhū tik te yāy 'āktux Topah! Yā' koit. Kaxīy.

4 Ha Yeyox te tik xop yōg hāmpē'paxex yūmmūg, hu:

—Teptu 'āxop te hāpkummuk pe'āpaxex?

5 Piyā' ka'ok, pe hāpkummuk mīy'ax xaxogā'ax 'āktux, pe' yok nūy hāpkumep'ax 'āktux?

6 'Ūgmūn yā Tikmū'ūn Kutok, tu xa hāmyūmmūgāhā', xayīy hāmyūmmūg. Yā Topa te 'ā' hōm yāy 'āxet'ax 'ūyīy hām xexka tu hāpkummuk mīy'ax xaxogā'. Kaxīy.

Tu' yōkānām, tu tik te hāpkumep hok xat, hu:

—'Āyok, nūy 'āknīhāxip, tu tutpe pepi' xup, nūy 'āpet ha mōg. Kaxīy.

7 Ha' yok, tuknīhā' xip, tu yāy pet ha' mōg.

⁸ Ha tikmũ'ün te' pēnāhā', tu kuxānōg, tu Topa max 'āktux. Yā Topa te tikmũ'ün ka'ogāhā pu tu' nōy hittupmā'!

Yeyox xix Māteo

⁹ Tu ta' mōg Yeyox, tu hāpkumep, 'ihā tik nōy pēnāhā', ha tik te gohet puknōg pu' hām, nūy nōm pupi tayūmak pop, tu' xuxet'ax Māteo, tu gohet yōg petnāg kopa' xip, nūy tayūmak pop, ha Yeyox te:

—'Ūkpe mōg. Kaxīy.

Ha Māteo yok, tuknīhā' xip, tu ta' mōg Yeyox mūtik,

¹⁰ tu'yāy xip'ax ha' mōg, nūy tu' xit, ha Yeyox te nōm mūtik mōg, tu' xit, 'ihā Māteo xape xop nūn, xix tik te nōm mūtik tayūmak pop nūn, xix tikmũ'ün kummuk nūn, tu Yeyox mūtik xit, xix 'ūyōg tik xop mūtik xit,

¹¹ ha Paniye xop te' pēnāhā', tu Yeyox yōg tik xop yīkopit, hu:

—Teptu 'ōgnū Notot xit tayūmak pop xop mūtik, xix tikmũ'ün kummuk mūtik xit? 'Ap max'ah. Kaxīy.

¹² Ha Yeyox te' xupak, hu:

—Tikmũ'ün hittup te notot xak 'ohnāg, pa 'ūpakut xop te' xak.

¹³ Mōg, nūy Topa yōg tappet mō'kupix, nūy hāmyūmmūg, ha: "A 'ātep-tup'ah xokxop mō'hap' ūg hax. 'Āmhok. Pa 'āte tikmũ'ün te hāpxopmā maxp-tup." Kaxīy. Yāk nūn, nūy tikmũ'ün kummuk xānā', 'ūyīy tu hupmā', ha 'āte' xānā' 'ohnāg tikmũ'ün te yāy max pe' paxex. Kaxīy.

Yeyox te' xit hok 'āktux

¹⁴ Hāpxip kutōgnāg 'ihā Yoām yōg tik xop nūn, nōm tep-tox pix yōg tik xop nūn, tu Yeyox ha' nūn, tu nūktu' yīkopit, hu:

—'Ūgmūg xit hok punethok, xix Paniye xop xit hok punethok. Teptu 'ōg tik xop xit hok'ah? Kaxīy.

¹⁵ Ha Yeyox te hāmyūmmūgāhā', nūy Topa yōg hāpxopmā'ax yūmmūgā', tu:

—Tik te yāytaha', tu 'āmuk xexka mīy, tu' xape xop xānāhā', puyīy nū mūtik tu hittup. 'Ok potaha 'ūxape xop 'ihā tik te yāyta'ax te nū mūtik xip? 'Ap pota'ah. Yā' hittup! Pa tik te yāyta'ax mōg, tu 'āmuk xexka kuxyāhā', ha nōmhā' xape xop hittup 'ohnāg. 'Ap xit putup'ah. 'Ūgmōg, puxik yōg tik xop xit hok kamah.

¹⁶ —Tikmũ'ün te topixxax kutut tu nō yāg xex, tu' xap, 'ap yāg tup xap'ah topixxax kutut tu', ka yāy pot. Kaxīy Yoām yōg tik xop te mōnāyxop yōg hāpxopmā'ax hittap tat, ha' yōg tik xop te yōgnū hāpxopmā'ax tup tat.

¹⁷ Ha tikmũ'ün te xupyāg hep mīy, tu' xokxax kutut kopa' xuk 'ohnāg, ka nō xax kutut tu yāy pot, ha' hep te hām tu nū'nāhā', ha' nōg. 'Āmhok. Pa xupyāg hep tup xuk xokxax tup kopah, nūy ti ka'ok. Kaxīy Yoām

yōg tik xop te hāpxopmā'ax hittap tat putup, tu nōm tup putup nōg. Kaxīy.

Yeyox te 'ün xix kaxkop hex hittupmāhā'

¹⁸ Yeyox te hām'āktux 'ihā Yoneo xop yōg tik te' xat'ax nūn, tu nūktu' kopaxux hā' nāhā', tu:

—Hōnhāk-tok hex xok. Mā', nūy 'ūkpet ha mōg, nūy tu tukūm yīmū yīm xeh, nūy putpu' hīnnā'. Kaxīy.

¹⁹ Ha Yeyox mōg, ha ta tik pe' mōg, ha tik xop te nū mūtik mōg kamah.

²⁰ Ha 'ün nūn, tu hāmyāxatamuk xohix te 12 hā' pakut, ha 'ün yōg hāmpakut'ax hā' pakut, tu Yeyox xāmpa' xip, tu' xax kuxyā 'āpit, hu:

²¹ "Āte' xax 'āpit putup mō'ka'ok, 'ūghittupmā'." Kaxīy.

²² Ha yōkānām, tu 'ün pēnāhā', tu:

—'Ākuxānōg hok, Nixix! 'Āhittup, 'ākuxa yūm ka'ok tu'. Kaxīy.

Hāpxip 'ohnāg 'ihā 'ün hittup.

²³ Ha ta' mōg Yeyox, Yoneo xop yōg tik te' xat'ax pe' mōg, tu mōktu mōxa tik pet tu', tu' mōxakux, tu nō hāpkot yōg kax 'āpak, ha tikmũ'ün xohix te mīptut kopa' pīp,

²⁴ ha Yeyox te:

—Mōg, nūy 'āpep hāptopa'. 'A kaxkop 'ūm xok'ah, yā mō'yōn! Kaxīy.

Ha tikmũ'ün te nō yīxix,

²⁵ tu' mōg, 'ihā Yeyox te kaxkop hex pet ha mō'nāhā', tu' yīm mūg, ha' yok, tuknīha' xip,

²⁶ ha tikmũ'ün xohix te' yūmmūg, tu' xe' xuktux hāpxexka xohix yōg tikmũ'ün pu'.

Yeyox te tik pa hok 2 pa nāhā'

²⁷ Ha ta' mōg Yeyox, tu putat hā' mōg, pa tik pa hok 2 tihī', tu' pe' mōg, tu' yīy ka'ok, tu:

—'Āmūn yā mōnāyxop Namix mōkputox, yīk mūg kuxa ka'! Kaxīy.

²⁸ Ha Yeyox te mīptut hā mō'nāhā', ha tik pa hok te' yīka' tihī', ha:

—'Ok 'ākuxa mām ka'ok 'ūgmūn kopah? 'Ok 'āhittupmā'ax 'āte'? Kaxīy.

Ha:

—Hamūn! Kaxīy.

²⁹ Yīy Yeyox te' pa 'āpit, tu:

—Hāmpēnā! 'Ākuxa mām ka'ok 'ūgkopah. Yā' puxī'. Kaxīy.

³⁰ Tu' pa maxnāhā', ha hāmpēnā max. Ha Yeyox te:

—Tikmũ'ün xop pu' xuktux hok! Kaxīy.

³¹ Pa tu ta' mōg, tu Yeyox 'āktux hāpxexka yōg tikmũ'ün xohix pu'.

Yeyox te tik yīy hok yīgāhā'

³² Tu' mōg, 'ihā tikmũ'ün te tik yīy hok nūnnāhā', tu Yeyox ha' nūnnāhā', ha yāmīy kummuk te tik kummugāhā', pu tu yīy hok,

³³ ha Yeyox te yāmīy xut, tu' tu' mō'kutnāhā', tu' xat pu mōg, 'ihā tik yīy, tu hām'āktux. Ha tikmũ'ün kuxānōg, tu:

—Tep te 'üm nühü'? Yä hõnhä 'Iyaet yõg tikmü'ün te häpxopmä ka'ok xe'ëgnäg pënä hãmäxap. Hõmä 'ap pënä'ah. Kaxíy.

³⁴ Pa Paniye xop gäy, tu:

—Yä Hãmgäyãgnäg mün te Yeyox ka'ogähä pu yämíy kummuk möy. Kaxíy.

Yeyox te tikmü'ün kuxa ka'

³⁵ Ha ta Yeyox te häpkumep, tu kômên xohix ha' mõg, xix xip tu xexka xohix ha' mõg, tu hãmyümmügähä Topa pet kopah, tu hãm'apak max'ax 'äktux, xix Topa te tikmü'ün xat'ax 'äktux, tu tikmü'ün pakut hittupmähä, yä hãmpakut'ax xohix möy, nüy nõ tu hittupmä',

³⁶ 'Thä tikmü'ün pënähä', tu' kuxa ka', 'üp-xehnäg pip hah, tu kahnên xop putuk, tik te nõm pënä 'ohnäg putuk,

³⁷ yíy yäy yõg tik xop pu hãm'äktux, hu:

—Yä häpxop ta punethok, puyíy pet ha yíkúy, nüy kopa nü' xok, pa tikmü'ün kutõgnäg pip nüy nõ yíkúy.

³⁸ 'Äpu, häpxa xuxyã tu' xax, pu tikmü'ün xãnä', puyíy häpxop ta nunnã'. Kaxíy. Ha kaxíy Yeyox te tikmü'ün 'äktux. Yä punethok te Topa xak, päyã 'a' xipi yümmüg'ah. 'Äpu Topa tu' xax, pu tik nü'pok, puyíy tikmü'ün yümmügã max, nüy Topa ha mögã'.

10

Yeyox yõg tik xop te 12

¹ Tu ta yäy yõg tik xop xãnähä', nüy mõ'pok, tu yäy 'äxet'ax hõm pu yämíy kummuk tu möy, nüy tikmü'ün pakut xohix hittupmä',

² ha tik xohix te 12 mõ'pok, ha' xuxet'ax te: Xímãm, yä' xuxet'ax nõy Pet, xi' taknõy 'Änene', xix Tiak, xi' taknõy Yoãm. Yä Yeme-neo kutok 2,

³ xix Piníp, xix Matõmëo, xix Tõmë, xix Mãteo, nõm te gohet pupi tayümak pop, xix 'Appeo kutok 'äxet'ax Tiak kamah, xix Tanep,

⁴ xix nõm tik te Yoneo xop xexkanãp-tup, tu' xuxet'ax Xímãm kamah, xix Yot 'Ixkanot, nõm te mõ'ãmã', nüy gäyxop mögã Yeyox hah.

Yeyox te tik te 12 mõ'pok

⁵ Ha Yeyox te mõ'pok, tu:

—Hãmpuknõg xop ha 'ãmõg hok, xix Xãmãnit yõg kômên ha 'ãmõg hok,

⁶ 'ãmhok. Pa 'Iyaet yõg tikmü'ün xax, yä Yõneo xop, yä kahnên te hãmyümmüg hok putuk nõ'õm, tikmü'ün te nõm xaxok hah. 'Üxax, nüy 'üm pipi',

⁷ nüy hãm'apak mãm'ax 'äktux, hu: "Hõnhä Topa te yäy yõg tikmü'ün xat, puyíy tu yípkox pi'." Kaxíy.

⁸ Tikmü'ün hittupmä', xi' xax kunut xop pu' xax tapmä', xix hãmpakut xop xohix tupmä'. Tikmü'ün xakix xop hĩnnã putpu', xix yãmíy kummuk möy tikmü'ün kopah,

pu tu hittup. Topa te xa' hok hittupmähä', yíy tayümak pop hok 'üyãnãn tu', 'Thä 'ãnõy hittupmä'. Yä' hok hittupmä'.

⁹ Tayümak xexka ta hok,

¹⁰ xix tut ta hok, nüy häpxop xuk, xix topixxax punethok ta hok, xix pataxax, xi' kuptõy ta hok. 'Ämhok. Tikmü'ün hãm, puxix tu xit max, puxix tu' pip max kamah, yíy häpxop punethok ta hok. Püyã tikmü'ün xa' popmä häpxop xohix.

¹¹ —Kômên xix xip tu xexka ha mõxakux, 'äpu tikmü'ün max xax, xayíy 'üpet kopa 'äpi', 'äpíhi nüy nox pi', 'Thä kômên kopa hãm'apak max'ax 'äktux, tu mõktu putpu 'ãmõg.

¹² Tikmü'ün pet ha mõxakux, 'äpu' xuxyã pu hãm'äktux, hu: "Püyã tikmü'ün kuxa mãm, nõm te 'äpet kopa' pip." Kaxíy.

¹³ Tikmü'ün te 'äxop pu: "Mõnãy, nüy pihi' nũnteh," kaxíy, yíy ta' pi', ha nõm tikmü'ün kuxa mãm putup. Pa tikmü'ün te: "Mõnãy hok, pa mög!" kaxíy, hu ta nõm tikmü'ün kuxa mãm 'ohnäg.

¹⁴ Pëyã kômên yõg tikmü'ün 'ãp-tup nõg, tu 'äxĩnnã hok, 'äpu möy, tu häpkõnõn xit 'äpata tu', pu tikmü'ün xohix pënã', nüy yümmüg. Yãp-tup nõg xop yípkox 'ohnäg.

¹⁵ 'Üxaxok hok: häptup mõ'nãp-tup 'Thä Topa te' hep xop xohix yõg häpxopmä'ax kopit, tu kômên Xonõm yõg tikmü'ün kuxa kap-tup, xix kômên Gömõg yõg tikmü'ün kuxa kap-tup, pa tikmü'ün yípkox hok xop kuxa ka 'ohnäg.

Tute häpkummügã'ax 'äktux

¹⁶ —Üg 'äpax: 'Äte mõ'äpok tikmü'ün gäy kopah. Pa mõxip, nüy hãmyümmüg, pu 'äxix hok, nüy hãmgäy te kahnên kix putuk hok. Kãyã gäy xop te hãmyümmüg, xix kuxxuxtut gäy 'ohnäg. Xapi 'äxop gäy hok kamah, päyã hãmyümmüg, nüy häpkummuk míy hok.

¹⁷ 'Õg pa 'äti! Tikmü'ün gäy te 'ãmüg putup, nüy 'ähíy, nüy 'ãmõgã tik pa te hãmyümmüg keppah, tu xikot hã 'äxix putup Topa pet kopah.

¹⁸ Yä 'äxop mög 'ügmütik, yíy tikmü'ün te 'ãmõgãp-tup gohenanok xop keppah, xix häpxexka yõg tik te' xat'ax keppah, pu 'õg häpxopmä'ax kopit, yíy 'äxop te hãm'apak max 'äktux putup 'üxat'ax xop pu', xi' puknõg xop pu'.

¹⁹ 'Ämõgã', 'äpu 'äxutigã hok, hu: "'Äte putep 'äktux'ax?" kaxíy, xix: "'Äte hãm'äktux 'üm 'äktux'ax?" kaxíy. 'Äxutigã hok. Hãpxip 'Thä Topa te xa hãm'äktux yümmügãp-tup, xa hãm'äktux.

²⁰ Yä yäy yõg hãm'äktux xa yümmügãp-tup, xayíy hãm'äktux, tu 'õg 'Ätak Topa Koxuk pupi hãm'äktux.

21 –Ha tikmū'ün punethok te yāy xape mōgāp-tup pu gāyxop tu kix, ha' tak xop tek-tok xop mōgāp-tup pu' kix, hak-tok xop te' tak mūtik yāytukmīy putup, tu' kix putup,

22 yā tikmū'ün xohix te 'āp-tup nōg putup, 'āmōg 'ūgmūtik hah, pa 'āpu nōā' tot, ha mōktu' kux. Yā Topa te' gāyxop nōāp-tup, tu 'āmōy putup hāpkummuk mīy xop kopah, xa mōg.

23 Tikmū'ün te xa hāpkummugā', 'āpu nūmān, nūy kōmēn nōy ha mōg. 'Āte xa hāpxe'e 'āktux: 'A 'āxop te hām'āktux kux putup'ah 'Iyaet yōg kōmēn xohix kopa, 'īhāk nūn, 'a xate hāpxopmā kux putup'ah, 'īhāk nūn, 'īhā 'ūgmūn yā Tikmū'ün Kutok nūn.

24 –Tik te hāmyūmmūgāhā', tu hāmyūmmūg max, pa tik nōy te hām'āpak, tu hāmyūmmūg kutōgnāg. Ha' xuxyā te' xat, hu' ka'ok, pa kāmānat yīpkox pip, hu' pu'uk.

25 Yā' max tik te hāmyūmmūgā'ax yōg hām'āktux 'āpak, tu mōktu hāmyūmmūg, nūy 'ūyōg yūmmūgā'ax putuk. Ha kāmānat max hām, nūy māynāg mīy, tu' xuxyā putuk. Pax pu' xuxyā yā Meyemo', puxix tu kummuk nām, ha' yōg kāmānat kummuk xexka kamah.

26 –Yīy tikmū'ün yīpkutuk hok. Tikmū'ün te hāpxopmā'ax xaptop, pa Topa te hāpxopmā xaptop'ax tu' mūg putup, puyī' xohi' pēnā'.

27 'Āte xa hām'āktux 'āmniy 'īhā', nūy xe' xuktux hāptup 'īhā'. 'Āte 'āxop 'āp-xet pu hām'āktux, ha 'āxop te hām'āktux ka'ok putup, puyī' xohi' yūmmūg.

28 Tikmū'ün yīpkutuk hok. Yā 'āyīn putex'ax, pa 'ākoxuk putex hok. 'Āpu Topa yīpkutuk. Tute 'āyīn nōā'ax xix 'ākoxuk, nūy kuxap hā mō'hap Hāmgyāgnāg Pet tu', ha 'āxūy xuxi' ohnāg.

29 Putuxnāg ta manat, yā tayūmak kutōgnāg hā hāmenax, pa Topa te nōm xop putup pax, tu' pēnā max, pu hām tu tu nā hok, ha' xaxok 'ohnāg,

30 tu 'āxop mō'āyāy xe'ēgnāg, tu mō 'āxe kupix, nūy 'āxe xohix te xīy yūmmūg, 'āp-tup pax tu'.

31 Yā Topa te mō'āyāy xe'ēgnāg, yīy 'ākuxānōg hok!

Yeyox yūmmūg hok 'āktux

32 –Tikmū'ün xohix te: “'Ūgmūn yā Yeyox yōg,” kaxīy, puyīy tikmū'ün xupax, kopxix 'Ātak Topa pu' yānān tu hām'āktux, nōm te pekkox tu' xip pu hām'āktux, hu: “'Ōhōm yōgnū'.” Kaxīy.

33 Pa tikmū'ün te' nōy xop keppa hām'āktux, hu: “'Ūgmūn 'ā Jesus yōg'ah,” kaxīy, kopxix 'Ātak Topa pu' yānān tu hām'āktux, yā yōg 'Ātak te pekkox tu' xip pu hām'āktux, hu: “'Ōhōm 'ap yōg'ah.” Kaxīy.

Tute yāytukmīy 'āktux

34 –'Ak nūn'ah, nūy 'ūhep xop xohix kuxa māmā'. 'Āmhok. Pak nūn, hām tuk nūn, pu tikmū'ün yāytukmīy,

35 xix nūn puk-tok pit xop yāy tak xop mūtik yāytukmīy, xix nūn puk-tok hex xop yāy tut xop mūtik yāytukmīy, puk-tok xetut xop yāy yīpxox mūk tu mūtik yāytukmīy.

36 Yā tikmū'ün te yāy xape hā' puknōg, 'ūgāy tu'.

37 –Tikmū'ün te' tak putup pax hāmāxap, pe' tut putup pax hāmāxap, tuk-nāy tuk putup, puxix 'ūgmūtik tu hāpkumep hok. Ha tikmū'ün tek-tok pit putup hāmāxap, pekkok hex putup hāmāxap, tuk-nāy tuk putup, puxix 'ūgmūtik tu hāpkumep hok.

38 Pa tikmū'ün tek putup hāmāxap, nūy 'ūgmūtik xok, puxix 'ūgmūtik tu hāpkumep mō kuma' mōg.

39 Tikmū'ün xok 'ohnāg putup, puxix tu xok, ha tikmū'ün te Topa tu' xok, puxix tu hi mōkuma' mōg.

Topa te hāpxopmā max hā' yānān

40 –Tikmū'ün te 'āp-tup, puxix 'ūkputup, ha Topap-tup kamah, nōm te nūgkutnāhā'.

41 Tikmū'ün te Topa yōg nū'kutnā'ax putup, Topa te nū'kutnāhā' puyīy yāy pupi hām'āktux, puxix pekkox yōg hāpxop pop, nū'kutnā'ax mūtik pop putup. Ha tikmū'ün te tik max putup, 'ūmax hah, yā tik max xop mūtik pop putup pekkox yōg hāpxop.

42 –'Ūxaxok hok: Tikmū'ün te Topa yōg tik kutōgnāg pu kōnāg tat, puyīy xo'op, tu' tat tik tek mūtik mōg hah, puxix pekkox yōg hāpxop pop xe'e. Tu ta tu' kux.

11

Yoām nōm tep-tox pix te Yeyox ha mō tik pok

1 Tu hām'āktux kux, tu yāy yōg tik xop pu' xat kux, tu ta' mōg Yeyox, nūy hāmyūmmūgā', nūy kōmēn xohix yīkagnāg hā hām'āktux.

2 Ha ta' xip Yoām kanet kopah, Yoām nōm tep-tox pix, tu Kunnix 'āpak, hu yāy yōg tik xop mō'pok,

3 pu Yeyox yīkopit, hu:

–'Ok 'āmūn yā Topa yōg yāy kutnā'ax xe'e, pe tik nōy nūn? Kaxīy.

4 Ha Yeyox te:

–Putpu mōg, nūy Yoām pu hām'āktux, nūy hāpxopmā'ax ka'ok xe'ēgnāg 'āktux, 'āte nōm hāpxopmāhā'. Yā 'āxop te' pēnāhā', tu' xupak.

5 Hām'āktux te kaxīy: Tikmū'ün pa hok te hāmpēnā max, xix hāpkumep hok xop te hāpkumep, xix yāy xax kunut xop xax tup, xix hām'āpak hok xop te hām'āpak max, xi' xakix xop te putpu' hi', xi' hok xop te hām'āpak max'ax 'āpak.

6 Yā tikmū'ün kuxa hittup, nōm kuxa yūm ka'ok 'ūgkopah, tuk yīkopit 'ohnāg. Kaxīy.

7 Ha Yoãm yõg tik xop mõg, 'Ihã Yeyox te tikmũ'ün pu Yoãm 'áktux, hu:

—'Ámõg hãm panip xexka hah, nũy Yoãm pẽnã'. Tep-tep pẽnãhã? 'Ok mítkup pẽnãhã', 'ámuh te nõm mahap?

8 Tep-tep pẽnãhã? 'Ok pẽnãhã tik te top-ixxax max tat? 'Ámhok! 'Ûptexop mũn te mũtput xexka tu' pip.

9 'Ápu, 'âyiy: Xatep-tep pẽnãhã? 'Ok pẽnãhã tik te Topa pupi hãm'áktux? Hamũn! 'Áte xa hãpxe'e 'áktux: Yoãm te Topa pupi hãm'áktux xe'e'.

10 Yã Topa yõg tappet te Yoãm 'áktux, yã Topa te Yoãm 'áktux, hu: "Áte mõ tik kutnãhã, 'áte nõm mõ'kutnãp-tup 'ákeppah, nũy 'õg putat maxnã'." Kaxiy.

11 'Áte xa hãpxe'e 'áktux: Tik xop hittap yã' xexka miãx, ha ta Yoãm xexka xe'e'. Pãyã tikmũ'ün yĩpkox pip xop xexka xe'egnãg.

12 Hõmã Yoãm te Topa yõg hãm'áktux 'áktux, xix hõnhã, ha tikmũ'ün te hãpxopmã xe'egnãg, Topa te' ka'ogã hah, ha' yĩpkox pip.

13 Yã tik xop te Topa pupi hãm'áktux xop xohix te hãm'áktux, tu Topa te tikmũ'ün xat 'áktux, ha Mõyyex yõg xat'ax te' xuktux kamah.

14 Ha Topa yõg tappet te mõnãyxop hittap 'Enit 'áktux, yã Topa pupi hãm'áktux nõ'õm, yã Yoãm xix 'Enit te yãy putuk, Topa te nõm nũ'pok hah.

15 'Áyĩpkox pi', nũy hãm'ápxax.

16 —Hõnhã tikmũ'ün tep-tep putuk? Tute kaxkop putuk. Kaxkop te hãmnuhnõg tu' mãm, ha yã' yiy ka'ok 'ünõy xop pu', hu:

17 "'Ûgmũ'áte kãyãhã', yãyta'ax kãyã putuk, pa 'áxop te hãmã 'ohnãg. Ha ta kãyãhã nõ 'ápkot kãyã'ax putuk, pa 'áxop pota 'ohnãg.'" Kaxiy.

18 Kaxiy Yoãm tep-tox pix, tu' xit hok, xix xupyãg xo'op hok, ha' xohix te: "Yãmiy kummuk te nõm kopa' xip." Kaxiy. Pãyã' koit.

19 Hak mũn Tikmũ'ün Kutok, tuk nũn, tuk xit xi' xo'op, ha' xohix te: "Pẽnã! 'Õhõm xit xexka nãm, xi' xo'op xexka nãm, tu tik kummuk hã' xape, xix nõm xop te gohet pupi tayũmak pop hã' xape," kaxiy. 'Ok max, pe' kummuk nõ'õm? Xate' yõg hãpxopmã'ax kopit, hu' yũmmũg. 'Ûkux. Kaxiy.

Kõmẽn yõg tikmũ'ün kuxa mãm 'ohnãg

20 Tu ta xe kõmẽn yõg tikmũ'ün 'áktux kummuk, ha kõmẽn yõg tikmũ'ün te hãpxopmã ka'ok xe'egnãg pẽnãhã', tikmũ'ün puxet te nõm mĩy hok, pãyã hãpkummuk mĩy kux 'ohnãg, tu yãyhãhup 'ohnãg. Yiy Yeyox te:

21—Kõmẽn Konãy yõg tikmũ'ün xũy putup, xix kõmẽn Metxax yõg tikmũ'ün xũy putup. Tute hãpxopmã ka'ok xe'egnãg pẽnãhã', tikmũ'ün puxet te nõm mĩy hok, ha yãyhãhup 'ohnãg, nũy hãpkummuk mĩy kux. Pax pu

kõmẽn hittap Tinok yõg tikmũ'ün pẽnã', pax pu kõmẽn hittap Xinõm yõg tikmũ'ün pẽnã', puxix yãyhãhup, nũy xagok hã mõ'tat, tu putok nũ'xok yãy putox yĩmũ', puyi' xohix yãyhãhup yũmmũg.

22 'Áte xa hãpxe'e 'áktux, 'ũxaxok hok: 'Ámnĩy 'ũm mõ'nãp-tup 'Ihã Topa te' hep xop xohix yõg hãpxopmã'ax kopit, tu kõmẽn hittap Tinok yõg tikmũ'ün kuxa kap-tup, xix kõmẽn hittap Xinõm yõg tikmũ'ün kuxa kap-tup, pãyã kõmẽn Konãy yõg tikmũ'ün kuxa ka 'ohnãg, xix kõmẽn Metxax yõg tikmũ'ün kuxa ka 'ohnãg.

23 Ha Kapãnãn yõg tikmũ'ün te hãmpe'paxex, hu: "'Ûgmũg mõg pekkox hah.'" Kaxiy. Pãyã' mõg 'ohnãg. Yã Hãmãgãgnãg Pet ha' mõg. Tu hãpxopmã'ax ka'ok xe'egnãg pẽnãhã', tikmũ'ün puxet te nõm mĩy hok, pãyã' kuxa mãm 'ohnãg. Pax pu Xonõm yõg tikmũ'ün hittap pẽnã', puxi' kuxa mãm ka'ok, nũy kõmẽn tu tu' pip nõmhã.

24 'ũxaxok hok: 'Ámnĩy 'ũm mõ'nãp-tup 'Ihã Topa te' hep xop xohix yõg hãpxopmã'ax kopit, tu Xonõm yõg tikmũ'ün kuxa kap-tup, pa Kapãnãn yõg tikmũ'ün kuxa ka 'ohnãg. 'Ûkux.

Tute tikmũ'ün xapit pu tu' kuxa mãm

25 Ta xe Topa pu hãm'áktux, hu:

—'Átak, 'ãmũn yã pekkox hã 'áxuxyã', xix hãm xexka hã 'áxuxyã! 'Ámax, tu tikmũ'ün te hãmũmmũg hok xop yũmmũgãhã', puyiy hãmũmmũg, 'Ihã tikmũ'ün te hãmũmmũg pu' xaptop, puyi' yũmmũg hok.

26 Hamũn. Yã kaxiy xatep-tup. Kaxiy.

27 Tu yãy yõg tik xop pu hãm'áktux, hu:

—Yõgnũ 'Átak te 'ã' popmãhã' hãpxop xohix. Yãk tak puxehnãg tek-tok yũmmũg, hak puxet te 'Átak Topa yũmmũg, nũy tikmũ'ün pu hãmũmmũgã'.

28 —Mã', 'ũg ha nũ', 'Ihã 'áteknõg, 'Ihã 'õg hãpxop xak hã' tot hok, ha 'áte 'ákuxa yũmmãp-tup.

29 'Ûg pe mõg, 'ũ xa hãmũmmũgã', 'ũgmũn yãg max, tu yãy kutõgnãg pekkaxex, yiy 'ákuxa yũm putup,

30 ha 'áte 'áxat'ax, xayiy mĩy, ha' ka'ok 'ohnãg yõg xat'ax, yiy 'âyĩpkox xip, nũy yõgnũ hãpxop xak'ax tat, hap-tux 'ohnãg. 'Ûkux. Kaxiy.

12

Yeyox te nit xap 'áktux

1 'Ámnĩy xohik-tõgnãg nõg, 'Ihã nit xap, ha Yeyox te hãpkumep, tu ta hãpxa xexka xak, ha xunãg xetox xap ta', ha tik xop te' pe' mõg, tu' xap mõy, nũy mã', 'üp-tup te' kix hah,

2 ha Paniye xop te' pẽnãhã', tu Yeyox pu hãm'áktux, hu:

—Pēnā! 'Ōg tik xop te xuxnāg ta xetox xap mōy, ha yūmū yōg xat'ax te' xat hok, pu' xut hok nit xap 'ihā'. Kaxīy.

³ Ha:

—Ok mō'kupix Topa yōg tappet? Hōmā putup te mōnāyxop hittap Namix putex, ha putup te' kix tik te nū mütik mōg,

⁴ yīy Topa pet xexka hā' mōxakux, tu pām pop, nōm pām te Topa keppa' pip pop, tu' māhā', ha Topa te' xat hok, pu' tikmū'ūn mā hok. Yā 'āmānex xop puxet te' mā'ax.

⁵ 'Ok mō'kupix hok xate'? Mōyyex te' xat, pu' 'āmānex xop hām nit xap 'ihā', Topa pet xexka kopa hāpxopmāhā', tu hāpxopmā max.

⁶ 'Āte xa hāpxe'e 'āktux: Topa pet xexkah, pak mūn xexkah xe'ēgnāg.

⁷ 'A 'āxop te hāmyūmmūg'ah, tu Topa yōg tappet mō'kupix, 'ihā hāmyūmmūg 'ohnāg, ha: "Ātep-tup xa hāpxopmā max, pa hāpxop mō'hap'ax 'ūyīy hax 'ātep-tup nōg." Kaxīy. Pax xa 'āxop nōm hām'āktux'ax yūmmūg, puxix yōg tik xop 'ūhitop kopit 'ohnāg.

⁸ Yākmūn Tikmū'ūn Kutok, tu nit xap hāk xuxyā kamah. 'Ūkux. Kaxīy.

Tik yīm nā hittupmāhā'

⁹ Tu ta' mōg, tu Topa pet hā' mōg,

¹⁰ pa tik xip, tu' yīm nā', ha tikmū'ūn te Yeyox yōg hāpxopmā'ax kopit putup, nūy kupeh, nūy nit xap 'ihā hām hā' kupeh, hu' yīkopit, hu:

—Ok yūmū yōg xat'ax te' xat, 'ok pe' xat hok, 'ūhittupmā nit xap hā' Kaxīy.

¹¹ Ha:

—Tikmū'ūn yōg kahnēn puxet, tu nit xap 'ihā hāpxox kopa' nāhā', puxix tik xut, mō'ka'ok,

¹² ha kahnēn kutōgnāg yā manat, ta tikmū'ūn xexkah, Topa te mō'yāy xe'ēgnāg, tu te takat putuk. Yīy yūmū yōg xat'ax te' xat 'ū yūmūg nōy hā tehet nit xap 'ihā'. Kaxīy.

¹³ Tu tik yīm nāa pu hām'āktux, hu:

—hu:

—Āyīm koa! Kaxīy

Ha' koa', tu' hittup, ha' yīm te' yīm nōy putuk.

¹⁴ Yīy ta' mōg Paniye xop, tu yāy mütik hām'āktux, Yeyox putex putup tu'.

Topa te yāy tik yāy kutnāhā'

¹⁵ Ha Yeyox te hāmyūmmūg, hu ta' mōg, ha tikmū'ūn te' pe' mōg, ha' pakut xop xohix hittupmāhā',

¹⁶ tu' xat, pu' tikmū'ūn nōy pu' xuktux hok, nūy Yeyox 'āktux hok.

¹⁷ Hōmā 'Iyait te Topa pupi hām'āktux, tu tappet tu kax'āmi', pu' tikmū'ūn mō'kupix, ha Yeyox 'āktux, yīy:

¹⁸ —Topa te hām'āktux, hu: "Āte nūhū tik yāy kutnāhā', nūy mō'kutnā', tu mō'yāy xe'ēgnāg, hak kuxa hittupmāhā'.

'Ūgkoxuk te nōm kopa' xip putup, nūy 'ūgmūn 'āktux,

pu' yōgnū putat 'āktux 'ūhep xop xohix pu', tu hāpxe'e 'āktux putup.

¹⁹ Tu hām'āktux hā' nōy yānān putup 'ohnāg, tu' yīy ka'ok putup 'ohnāg,

tu kōmēn yōg putat hā hām'āktux 'āhiynāg putup'ah.

²⁰ Tu tikmū'ūn hok xop kuxa kap-tup,

tu' pu'ūgnāg xop mō'nīynām putup, puyīy tu ka'ok,

tu hāpxopmā ka'ok putup, nūy tikmū'ūn pu hāmmxnā mō'kuma' mōg.

²¹ Ha' hep xohix xop kuxa mām ka'ok 'ūkopah, tu hāmmax hip."

'Ūkux. Kaxīy.

Yeyox xix Meyemo

²² Ha ta' xip tik pa hok, ha' mōgāhā Yeyox hah, ha' yīy hok kamah, yā yāmīy kummuk te tik kopa' xip. Yeyox te' hittupmāhā', ha hāmpēnāhā', tu hām'āktux.

²³ Ha tikmū'ūn xohix kuxānōg, tu' yīkopit, hu:

—'Ok nū tik mōnāyxop Namix hā' mōkputox? Kaxīy.

²⁴ Ha Paniye xop te' xupak, tu:

—Meyemo te yāmīy xop xohix xat, tu Yeyox ka'ogāhā' pu yāmīy kummuk xop mōy. Kaxīy.

²⁵ Pa Yeyox te nōm xop te hāmpe'paxex yūmmūg, hu:

—Hāpxexka yōg tikmū'ūn te yāytukmīy, puxix tu nōg, xi' xape xop nōg'ax, 'ūyāytukmīy tu'.

²⁶ Pax pu Hāmgāyāgnāg xop yāytukmīy, tu yāy mōy, puxix tu nōg kamah.

²⁷ 'Āxop te: Meyemo te Yeyox ka'ogāhā' pu yāmīy kummuk mōy. Kaxīy. Xate' koit. 'Ū 'ūm te 'ōg tik xop ka'ogāhā' pu' mōy? 'A' Meyemo'ah. Ha kaxīy 'ūxohix te xate yā' koit yūmmūg.

²⁸ Pa Topa Koxuk tek ka'ogāhā' 'ū yāmīy mōy, xa 'āxop yūmmūg. Yā hōnhā Topa te tikmū'ūn xat nūnte'.

²⁹ —Tik 'ūm ka'ok xip, yīy tik te hāpxop hā' xupxet te' pet hā 'ā mō'nā'ah, nūy tu' xupxet. Pa tik ka'ok kīy, puxix hāpxop xohix hā tu xupxet, yīy 'āte Hāmgāyāgnāg kīy hāmāxap, nūy kūnāy tu yāmīy kummuk mōy tikmū'ūn kopah.

³⁰ —Tik tek mütik mōg hok, puxik tukmīy. Ha ta tik te 'āhā te hok, puxik kummūgā',

³¹ yīy 'āte xa hām'āktux xe'e': Tikmū'ūn te Topa 'āktux kummuk, puxix Topa' xaxogā pu tu kux, pa timū'ūn te Topa Koxuk 'āktux kummuk, puxi' xaxogā 'ohnāg, pu tu xip.

³² Tikmū'ūn te Tikmū'ūn Kutok 'āktux kummuk, puxix Topa' xaxogā pu tu kux, pa tikmū'ūn te Topa Koxuk 'āktux kummuk, puxi' xaxogā 'ohnāg mō kuma' mōg.

Mîpkup max xix mînta max

³³ –Mîpkup max te mînta ta max taha', ha ta mîpkup kummuk te mînta ta kummuk taha', yîy tikmû'ün te mînta pênâhâ', tu' kup yûmmûg kamah, 'ok pe' max, 'ok pe' kummuk.

³⁴ Āxop yâ kâyâ gây kutok xop! Ākummuk, hu hām'āktux kummuk. 'Ap hām'āktux max yûmmûg'ah. Tik kuxa kummuk, puxix tik hām'āktux kummuk, pa tik kuxa max, puxix tik hām'āktux max.

³⁵ Tikmû'ün max te' kuxa max tu hāmmax 'āktux, ha ta tikmû'ün kummuk te' kuxa kummuk tu hāpkummuk 'āktux.

³⁶ –Āte xa hāpxe'e 'āktux: Topa yōg hāptup mō'nāp-tup, 'Īhā Topa te tikmû'ün yōg hāpxopmā'ax xohix kopit, tu' yōg hām'āktux hitop kopit putup, 'ok pe yā' max, 'ok pe yā' kummuk.

³⁷ Yā 'ōg hām'āktux hā Topa te 'āxop yōg hāpxopmā'ax kopit putup, nūy yûmmûg, 'ok pe 'āmax, 'ok pe 'ākummuk. Kaxîy.

Yoneo xexka xop te hāpxopmā'ax ka'ok xe'ēgnāg xak

³⁸ Ha ta' pip tik te hām̄yûmmûg xop, tu Yeyox pu hām'āktux, ha Paniye xop 'üm te:

–'Ūgmû'āte 'āp-tup xa hāpxopmā ka'ok xe'ēgnāg, tikmû'ün te nōm mîy hok, 'ūgmûg pênâ'. Kaxîy.

³⁹ Ha:

–Hōnhā tikmû'ün kuxa kummuk, tu mām 'ohnāg Topa yōg hām'āktux kopah. 'Āxop te hāpxopmā'ax ka'ok xe'ēgnāg xak, 'a' mîy 'ātep-tup'ah. 'Āxop te Topa yōg tappet mō'kupix, ha tik hittap Yōn 'āktux, nōm te Topa pupi hām'āktux, yîy 'āxop te mōnāyoxop Yōn yōg hāpxopmā'ax puxet pênâp-tup.

⁴⁰ Yōn te mām xexka te kopa' xip, tu 'āmnîy tikoxyuk hā' kopa' xip, ha kaxîy 'ūgmûn te hāpkox kopak xip putup, yāk mûn Tikmû'ün Kutok, tu 'āmnîy tikoxyuk hā hāpkox kopak xip putup.

⁴¹ Topa yōg hāptup mō'nāp-tup, 'Īhā Topa te' hep xop xohix yōg hāpxopmā'ax kopit, ha Nîn yōg tikmû'ün te 'āxop 'āktux'ax kummuk. Yā nōm te Yōn yōg hām'āktux'ax 'āpak, tu' yîpkox pip, tu yāyhāhup, nūy kuxyā hāpxopmā'ax kummuk, ha Yōn 'ük-tōgnāg, ha tak mûn xexkah, pa xate yāyhāhup 'ohnāg.

⁴² Topa yōg hāptup mō'nāp-tup, 'Īhā hāpxexka Xamah yōg 'ün tu yok, nōm te hāpxexka yōg tikmû'ün hittap xat, tu' yok putup, nūy 'āxop kummuk 'āktux. Yā hāptox tu' nūn, nūy tik te' xat'ax hittap Xanomām pênâ', ha ta Xanomām 'ük-tōgnāg, ha tak mûn xexka'.

Yāmîy kummuk te put pu' mōg

⁴³ –Yāmîy kummuk te tikmû'ün 'üm kopa' xip, tu' nîm, tu hām panip ha' mōg, tu' xak, nūy ta pihî'. 'Ūxip hok,

⁴⁴ puxix tute: “'Ūkpet ha putpuk mōg.” Kaxîy. Tu' mōg, tu mōktu tikmû'ün tu' xupep, tu' mō'nāhâ', ha' hok yūm, ha hāpkunut xit, ha mōktu yā' max,

⁴⁵ ha xe' mōg, tu yāmîy kummuk xop nōy xānāhā pu nū mütik mōg, tu' tihî', yîy tikmû'ün xūy xexkah. Ha kaxîy nōm tikmû'ün kummuk xūy'ax nōmhā. Kaxîy.

Yeyox xape nūn

⁴⁶ Tu hām'āktux ha ta' tut nūn, xi' taknōy xop nūn, tu hāptopa' pip, tu' xak, nūy Yeyox mütik hām'āktux,

⁴⁷ yîy tik te Yeyox pu hām'āktux, hu:

–Pênâ'! 'Ātut xix 'ātaknōy xop te hāptopa' pip, nūy 'āmütik hām'āktux. Kaxîy.

⁴⁸ Ha:

–Pi'yāk tut? Pi'yāk taknōy xik hex? Kaxîy.

⁴⁹ Tu tikmû'ün te yāy mütik hāpkumep xop pênâhâ', tu' yîm xix, tu:

–Pênâ'! Nū xop yāk tut, xik taknōy xop xe'e!

⁵⁰ Yā tikmû'ün xohix te 'Ātak Topa pu' yîpkox pip, nōm te pexkox tu' xip, puxix yāk xape, tuk taknōy, xik hex, xik tut. Kaxîy.

13*Tik te hāpxop xap xok*

¹ Hāpxip kutōgnāg 'Īhā Yeyox mōg hāptopa', tu kōnāg xexka ha' mōg, tu ta' mōg tu mōktu hāpkux tu' xupep, tu' yūm, tu tikmû'ün yûmmûgāhâ', ha tikmû'ün te' xakot, nūy xupax.

² Yā' xohix xexkah, yîy Yeyox te mîpkox hā mō'nāhâ', tu mîpkox te kōnāg yîmû' mōg, ha mōktu mō'nāhâ', tu' yūm, ha tikmû'ün te yāykote' pip, tu' xakot hāpkux tu',

³ ha Yeyox te hām'āktux'ax hā hām̄yûmmûgāhâ', nūy Topa yōg hāpxopmā'ax yûmmûgā', hu:

–Tik mōg, nūy hāpxop xap xok,

⁴ tu hāpxa xexka tu' xok, ha' yāg te putat yîka te tu' nāhâ', ha putuxnāg te' māmām, ha' nōg.

⁵ Ha ta' yāg nōy te mîkax xap tu' nāhâ', ha hām xet kutōgnāg, tu mîkaxxap yîmû' pip, ha' xap xokax mō'ka'ok,

⁶ ha māyōn xupep, tu' nāgāhâ', 'ūyîpxatit kutōgnāg pip tu' nāgāhâ',

⁷ ha ta' yāg nōy te mîmyām xop kopa' nāhâ', tu' tuk mîmyām xop mütik, pa' xupep 'ohnāg, mîmyām kopa' pip tu', ha' nōg.

⁸ Hā ta' yāg te hām max tu' nāhâ', hu' tuk max, tu mōktu xexkah, tu' xap xohix xexka popmāhâ', yā' xap puxet te 30 popmāhâ', ha ta' xap nōy te 60 popmāhâ', ha ta' xap nōy te 100 popmāhâ', 'Ūkux. Kaxîy.

⁹ Tu xe hām'āktux, hu:

–'Ūg 'āpax, xa 'āyîpkox pi'. Kaxîy.

Teptu hām'āktux'ax hā hām̄yûmmûgāhâ'?

¹⁰ Ha tikmũ'ũn te Yeyox mũtik hãpkumep, tu' nũn, tu nũktu Yeyox yĩka' pip, tu' yĩkopit, tu:

—Teptu xate hãm'ãktux'ax hã tikmũ'ũn nõy pu hãmýũmmũgãhã'? Kaxĩy.

¹¹ Ha:

—Topa te 'ãxop pu hãmýũmmũgãhã', xayĩy hãmýũmmũg. 'Ap nõy xop pu' xuktux'ah, tu yã yõg tikmũ'ũn xat, pa tikmũ'ũn nõy te pexkox yõg hãpxopmã'ax yũmmũg'ah, yĩy hãm'ãktux'ax hã 'ãte hãmýũmmũgãhã', nõy Topa yõg hãpxopmã'ax yũmmũgã'.

¹² Yã 'ãxop te hãmýũmmũg tap, yĩy xa 'ã' yũmmũgãp-tup, ha mõktu hãmýũmmũg xexkah, ha tikmũ'ũn te hãmýũmmũg hok, tu hãpxaxok putup, tu mõktu hãmýũmmũg 'ohnãg.

¹³ Yĩy 'ãte hãm'ãktux'ax hã hãmýũmmũgãhã' nõy Topa yõg hãpxopmã'ax yũmmũgã'. Yã pa mãm, pãyã' pãnã' ohnãg, tu hãm'ãktux'ax 'ãpak, pãyã' yũmmũg 'ohnãg.

¹⁴ Yĩy tik hittap 'Iyãit te Topa pupi hãm'ãktux, tu:

“ãxop te hãm'ãpak, pãyã 'a hãm 'ũm 'ãpak 'ohnãg,

tu' pãnãhã', pãyã hãm 'ũm pãnã' ohnãg.

¹⁵ Yã tikmũ'ũn putox ka'ok, tu mõ'yã yĩpkox yĩmĩn, nõy hãm'ãpak hok,

xi' pa kĩy ka'ok, nõy hãm'pãnã hok,

ka hãmýũmmũg, xix yãyhãhup, ka Topa yõg putat hã' mõg 'ũxehh.

Yã 'ãte nõm hittupmã'ax, pãyãp-tup nõg.

Yã Topa te' xuktux tap.” Kaxĩy.

¹⁶ Tu xe hãm'ãktux, hu:

—Pa 'ãxop kuxa hittup xop, hãm'pãnã max tu', xix hãm'ãpak max tu'!

¹⁷ 'ũxaxok hok: Tik xop te Topa pupi hãm'ãktux, pu tikmũ'ũn yũmmũgã', tu' xak, nõy pexkox yõg hãpxop pãnã', 'ãxop te nõm pãnãhã nõmhã, xix Topa yõg tikmũ'ũn punethok te' xak, nõy pãnã', nõy xupax, pãyã' pãnã' ohnãg, xi' xupak 'ohnãg.

Yeyox te hãm'ãktux'ax hã hãmýũmmũgãhã'

¹⁸ Yĩy 'ũg 'ũm 'ãpax, nõy yõg hãm'ãktux 'ũm yũmmũg max, nõy yõg hãpxopmã'ax yũmmũg.

¹⁹ Hãpxop xap te putat kuxyã' nãhã', ha kaxĩy tikmũ'ũn te yõg hãm'ãktux'ax 'ãpak, ha 'ãte Topa te tikmũ'ũn xak'ax 'ãktux, ha' xupak, pa hãmýũmmũg 'ohnãg. Hãm'ãgãgnãg nũn, tu yõg hãm'ãktux xaxogãhã', pu tikmũ'ũn yĩpkox pip hok.

²⁰ Ha ta hãpxop xap yãg te mĩxax xap tu' nãhã', ha kaxĩy tikmũ'ũn te hãm'ãktux'ax 'ãpak, tu' kuxa hittup.

²¹ Pa hãpxip kutõgnãg 'ĩhã' xũy, ha' gãy xop te' kummũgãhã', yĩy Topa yõg hãm'ãktux'ax xaxok mõ'ka'ok, 'ũkuxa yũm pu'uk tu'.

²² Ha ta' yãg nõy te mĩmyãm xox xop kopa' nãhã', ha kaxĩy tikmũ'ũn te hãm'ãktux 'ãpak, pa hãpxip kutõgnãg 'ĩhã' yãyxuxop punethok,

ha tayũmak nõg, ha hãm'ãktux xaxok, ha' nõg.

²³ Ha' yãg nõy te hãm max tu' nãhã', ha kaxĩy tikmũ'ũn te hãm'ãktux'ax 'ãpak, tu hãmýũmmũg, tu' yĩpkox pip, tu Topa yõg putat hã' mõg kuma' mõg. Tu ta tu' kux.

²⁴ Tu xe hãm'ãktux'ax hã hãmýũmmũgãhã', nõy Topa yõg hãpxopmã'ax yũmmũgã', hu: —Tik te hãpxop xap xuxnãg xetox xok, ha kaxĩy Topa te yã yõg tikmũ'ũn xat.

²⁵ 'ãmniy 'ũm 'ĩhã' nũn tik gãy, tu' xap kummuk xok hãpxop xap max kotĩnnãhã', tu' xok kux, tu' mõg,

²⁶ ha' xap xokax, tu' tuk, ha mĩxux kummuk punethok te nõm max kotĩnnãhã',

²⁷ yĩy kãmãnat xop te hãpxa xexka xuxyã xãnãhã', tu: “Yãyã', xate hãpxop xap max xok nũhũ hãm tu'. Teptu' mãm mĩxux kummuk kamah?” Kaxĩy.

²⁸ —Ha: “Yã tik gãy te' xap kummuk xok,” kaxĩy.

—Ha: “Xatek mũ putup 'ũ mõy?” kaxĩy.

²⁹ —Ha: “'ũmõy hok, pũyã' pi', ka hãpxop mõy kamah mĩxux kummuk mũtik.

³⁰ 'ũtux hok pu tu' tuk, nõy mõy yã tu ta', 'ĩhã 'ãte' xat, pu mõ' yãy pot, tu mĩxux kummuk putyõn hãmãxap, nõy nõ kuxap hã mõ'xut, nõy xuxnãg ta xetox nũnnã', tuk pet kopa' xex.” Tu ta tu' kux. Kaxĩy.

Tute mõyxtap xap 'ãktux

³¹ Tu xe hãm'ãktux'ax hã hãmýũmmũgãhã', nõy Topa yõg hãpxopmã'ax yũmmũgã', yã Topa te tikmũ'ũn xat,

—Hãpxop xap mõyxtap yãk-tĩgnãg, ha tik te' xap xok hãm kopah,

³² ha' xokax, tu' tuk tu mõktu yã' kup xexkah, ha putuxnãg xop te' mĩmmãg tu' pet. Kaxĩy Topa te tikmũ'ũn kutõgnãg xat hãmãxap, ha tikmũ'ũn nõy nã' mõg, tu mõktu tikmũ'ũn xohix te Topa pu' yĩpkox pip. Tu ta tu' kux. Kaxĩy.

Pãm yõg tokatogã'ax 'ãktux

³³ Tu xe hãm'ãktux'ax hã hãmýũmmũgãhã', nõy Topa yõg hãpxopmã'ax yũmmũgã', hu:

—'ũn te pãm yõg tokatogã'ax paha', xix xuxnãg ta xetox xap kõnnõn, tu' yõg xox tix paha', nõy 'ũyõg kãnẽy 3 tu nõm kanop, tu mõktu 'ũpohot, ha' tokatogã'ax te' mõmmãhã', ha kaxĩy Topa te tikmũ'ũn kutõgnãg xat hãmãxap, ha' mõg, nõy nõy pu' xuktux, hãknãy tu tikmũ'ũn xohix xexka xat. 'ũkux. Kaxĩy.

Teptu Yeyox te hãm'ãktux'ax hã hãmýũmmũgãhã'?

³⁴ Yã Yeyox te hãm'ãktux'ax hã hãmýũmmũgãhã tikmũ'ũn pu', nõy Topa yõg hãpxopmã'ax 'ãktux, tu hãm'ãktux nõy hã' xuktux 'ohnãg.

³⁵ Topa yõg hãm'ãktux hittap hã Yeyox te hãmýũmmũgãhã', yã Topa yõg tappet hittap

te' xuktux. Hōmā tik hittap 'Iyait te Topa pupi hām'āktux, tu tappet tu kax'āmi', tu Yeyox 'āktux, hu:

“Āte yāy pupi hām'āktux'ax hā hāmyūmmūgāhā', nūy tikmū'ūn yūmmūgā', nūy hāpxopmā'ax hittap xop 'āktux, yā hōmā Topa te hām xexka xohix mīy xix hōnhā,

ha tikmū'ūn te nōm hāpxopmā'ax ka'ok yūmmūg'ohnāg.” Kaxīy

Yeyox te hām'āktux hā'yānān

³⁶ Ha ta Yeyox mōg, tu tikmū'ūn nīm, nūy yāy xip'ax ha' mōg, ha tikmū'ūn te Yeyox mūtik hāpkumep, tu' yīgāhā' mōg, tu' yīkopit, hu:

—'Ūgmū'ā hām'āktux. Putep yūmmūgāhā xate', 'hā mīxux kummuk 'āktux? Kaxīy.

³⁷ Ha Yeyox te:

—'Ūgmūn yā Tikmū'ūn Kutok Pit, tu tik putuk, nōm te hāpxop xap max xok,

³⁸ tu hāpxa xexka tu' xok, ha hām xexka putuk, ha hāpxop xap max te tikmū'ūn max putuk, Topa te nōm xat, ha mīxux kummuk te Hāmāyāgnāg yōg tikmū'ūn kummuk putuk,

³⁹ ha tik gāy te Hāmāyāgnāg mūn putuk. Yā tikmū'ūn te hāpxop ta nūnnāhā', ha kaxīy hām xexka nōg putup, 'hā pekkox yōg nū'pok xop nūn, nūy mō'pot.

⁴⁰ Kāmānat xop te mīxux kummuk mōy, nūy kuxap kopa mō'pok, pu mō'xut, ha kaxīy pekkox yōg nū'pok xop te hāpxopmā kummuk xop mōy putup, nūy kuxap xe'ēgnāg kopa mō'pok.

⁴¹ 'Ūgmūn yā Tikmū'ūn Kutok, tu pekkox yōg xop nū'pok putup, nūy tikmū'ūn kummuk xeh ya'oma', 'ūp-tup nōg tu', yā mō'pok putup, pu tu pip hok, 'hā 'āte yāy yōg tikmū'ūn xat. Yā nōm kummuk xop te' nōy pu hāpkummuk yūmmūgāhā'. Yā' kummuk xop xohix te hāpxopmā kummuk ya'oma'mōg,

⁴² nūy kuxap xe'ēgnāg kopa mō'pok. Tu potap-tup, 'ūxūy xexka tu'.

⁴³ Ha Topa yōg tikmū'ūn xexkanāp-tup xe'ēgnāg, māyōn putuk, tu' yōg 'Ātak Topa mūtik pip putup pekkox tu'. 'Āxop te hām'āpax, 'āpu 'āyīpkox pi'. Kaxīy.

Tu hāpxop takat xexka 'āktux

⁴⁴ Tu xe hām'āktux, nūy Topa yōg hāpxopmā'ax yūmmūgā', hu:

—Tik te hāpxaha 'hā hāpxop te takat xipihī hāpkox kopah, tu xe' xaptop, tu' kuxa hittup xexkah, hu' mōg mō'ka'ok, tuyāy hāpxop xohix hāmenex hāmāxap, nūy tayūmak punethok pop, tuk-nāy tu hāpxa pa yāy pu'. Ha kaxīy tikmū'ūn te Topa yōg hām'āktux 'āpak, tuyāy yōg hāpxop xohix xaxok, 'ūhittup tu', nūy Topa pu tu' yīpkox pi'. Ha kaxīy Topa te yāy yōg tikmū'ūn xat. 'Ūkux.

Tute kupxat xap max 'āktux

⁴⁵ Tu xe hām'āktux, nūy Topa yōg hāpxopmā'ax yūmmūgā', nūy tu tikmū'ūn xat 'āktux, hu:

—Tik te' xap max pop, yā kupxat xap max pop, nūy xe nōmenax, tayūmak xexka hā' nōy yānān,

⁴⁶ tu nōm xap max xipihī', hu' mōg, tu yāy yōg hāpxop xohix hāmenex, nūy tayūmak xexka pop, nūy ta tu' xap max pa'. Ha kaxīy tikmū'ūn te hāpxop xohix xaxok, nūy Topap-xehnāg pu' yīpkox pi'. 'Ūkux.

Tute māpxamut 'āktux

⁴⁷ —Topa te hāpxopmāhā', tuyāy yōg tikmū'ūn xat hā kaxīy: Tikmū'ūn te māpxamut kōnāg xexka kopah, tu mām xohix pop,

⁴⁸ ha nū'xip 'hā hāpkux ha' nūnnāhā', tu hām tu' mām, nūy mām mō'pot. Tu' yīy max ya'oma'mōg manax kopah, tu' yīy kummuk ya'oma'mōg kōnāg kopah. Ha kaxīy Topa te' hep xop xohix mō'pot putup,

⁴⁹ ha kaxīy mō'āgmūg xohix kux putup, 'hā pekkox nū'pok xop te' hep xop xohix mō'pot,

⁵⁰ tu' yīy kummuk xop ya'oma' mō'pok, tu kuxap xe'ēgnāg kopa mō'pok putup, ha potap-tup, 'ūxūy xexka tu'. 'Ūkux. Kaxīy.

Tute hām'āktux xe'e 'āktux

⁵¹ Ha Yeyox te yāy yōg tikmū'ūn yīkopit, hu:

—'Ok yūmmūg hāpxopmā'ax 'āte xa' xuktux? Kaxīy.

Ha:

—Yā 'āte' yūmmūg. Kaxīy.

⁵² Ha:

—Yā tik te hāmyūmmūg xop tek mūtik hāpkumep, nūy 'ūgmūn puxehnāg pu tu yīpkox pi', puxix mīptut xuxyā putuk, tu hāpxop kutut xex, yāy pet kopa' xex, xix hāpxop tup xex, nūy kūnāy tu' mōy. Kaxīy.

Yeyox te kōmēn Nāyane tu' xip

⁵³ Tu hām'āktux kux, tu ta' mōg,

⁵⁴ tuyāy yōg kōmēn ha' mōg, tu' mōg tu mōktu' xupep, tu Topa pet kopa tikmū'ūn yūmmūgāhā', ha tikmū'ūn te hām'āpak, tu' yēy, tu:

—'Ok hāmyūmmūg 'ūm 'ōhōm? Tute xīy 'ōhōm te hāpxopmā ka'ok xe'ēgnāg?

⁵⁵ Yā Yoye kutok, nōm te mīmpe mīy'ax, ha' tut Mānix, ha' taknōy xop yūmmū'āte' yūmmūg. 'Ūxohix te: Tiak, xix Yoye, xix Xīmām, xix Yot.

⁵⁶ Yā' hex xop nūnte 'āti kamah. 'Ū 'ūm te Yeyox ka'ogāhā', pu hāpxopmā ka'ok xe'ēgnāg? Yā tikmū'ūn puxet te' mīy hok. 'Īntu'. Kaxīy.

⁵⁷ Tup-tup nōg, yīy Yeyox te:

—Tik te Topa pupi hām'āktux, yā hāpxexka yōg tikmū'ūn xohix te' xexka 'āktux, pāyā

yāy xape xop tek-tōgnāg 'āktux, xix kōmēn yōg tikmū'ūn tek-tōgnāg 'āktux kamah. Kaxīy.

⁵⁸ 'Ap hāp̄xopmā ka'ok xe'ēgnāg'ah, tikmū'ūn 'ūm kuxa mām 'ohnāg hah.

14

'Enot te Yoām putex, nōm tep-tox pix

¹ Hāp̄xip 'Ihā 'Enot te hāp̄xexka Ganinet yōg tikmū'ūn hā gohenanok, tu nōm tikmū'ūn xat, ha tikmū'ūn te Yeyox 'āktux, ha 'Enot te' xupak,

² yīy kāmānat xop pu hām'āktux, hu:

–Hamūn! 'Ōhōm yā Yoām, nōm tep-tox pix! Yā' xok, pa' putpu' hi', hu hāp̄xopmā ka'ok xe'ēgnāg nōmhā, tikmū'ūn te nōm mīy hok. Kaxīy.

³⁻⁴ Hōmā 'Enot te yāy taknōy Pinip xetut mūg, ha' xuxet'ax 'Enonit, ha Yoām te' mānōg pax, tu: “Yāyta hok! Topa yōg xat'ax te' xat hok, pu yāy taknōy xetut mīy hok!” Kaxīy. Ha 'Enot gāy, 'ūyāy tap-tup tu', hu' xat, pu xonat xop Yoām mūy, ha' mūg, tu' yīm kīy, tu kanet ha mō'tat, ha' kopa' xip.

⁵ Yā 'Enot tep-te'x putup, pa Yoneo yōg tikmū'ūn yīpkutuk, tikmū'ūn te Yoām 'āktux max hah, tu: “Ōhōm te Topa pupi hām'āktux!” Kaxīy. Tu' xexka pe'paxex.

⁶ 'Āmnīy puxet 'Ihā 'Enot te 'āmuk xexka mīy, nūy yāy yōg hāmāxatamuk xohix hā' hittup, ha 'Enonit kutok hex te hāmāyāg, 'ūxexka xop keppa' hāmāyāg,

⁷ ha 'Enot tep-tup pax, hu hām'āktux xex, tu Topa 'āxet'ax 'āktux nūy hām'āktux xeh 'ūtuk tup hex pu', hu:

–Topa tek yūmmūg, 'āte xa' hōm hāp̄xop xohix xatep-tup. Kaxīy.

⁸ Ha tukūm te' tut tu' xak, pu tu hāmāyūmmūgā', ha' tut te hāmāyūmmūgāhā', yīy putpu' nūn 'Enot keppah, tu:

–'Āte Yoām putox putup, tu nōm tat putup kāmēy pet xax yīmū nōmhā'. Kaxīy.

⁹ Ha 'Enot kuxa hittup 'ohnāg, pāyā yāyhāhup, hām'āktux xex tu',

¹⁰ hu' xat, pu Yoām putox xax,

¹¹ ha' xak, tu kāmēy pet xax yīmū' yūm, tu' tuk tup hex pu' hōm, ha homi' tut pu' hōm.

¹² Ha Yoām yōg tik xop te' xokxax paha', tu' mōgāhā', tu mōktu nō hāp̄kot, tu hāp̄kot kux, 'Ihā' mōg, nūy Yeyox pu' xuktux.

Yeyox te tikmū'ūn xīnnāhā'

¹³ Ha' xupak, tu ta' mōg, tu mīpkox hā mō'nāhā', nūy kōnāg yīmū' mōg, tu yāp-xehnāg mōg, hām panip ha' mōg, tu mōktu' xupep, pa tikmū'ūn te' yūmmūg, tuyāy pip'ax nīm, tu hāmnaq hā' pe' mōg,

¹⁴ ha Yeyox te mīpkox mōktu' xupep, tu ta tikmū'ūn pēnāhā', yā tikmū'ūn xohix xexkah, ha' kuxa ka', tu' pakut xop hit-tupmāhā'.

¹⁵ Ha 'āmāxak 'Ihā' yōg tik xop nūn, tu Yeyox pu hām'āktux, hu:

–Māyōn mog, ha hām panip tu yūmūg pip. 'Āpu tikmū'ūn mō'pok, pu' xip tu xexka ha mōg, nūy tu' xit'ax pop kōmēn tu'. Kaxīy.

¹⁶ Pa Yeyox te:

–'A' mōg putup'ah. 'Āpu, nōmhā xīnnā'. Kaxīy.

¹⁷ Ha:

–'Ūxit'ax yāk-tōgnāg: yā pām te 5 pip, xix mām 2 mām. Kaxīy.

¹⁸ Ha:

–Paxnū'! Kaxīy.

¹⁹ Tu' xat pu tikmū'ūn te mīxux yīmū' mām, tu pām pop, xix māmāh, tu pexkox tu' pēnāhā', tu Topa pu hām'āktux, hu:

–'Āmax Topah. Xate tikmu'ūn xohix pu' xit'ax popmāhā'. Yā' puxi'! Kaxīy.

Tu pām koxip, tuyāy yōg tik xop pu' popmāhā', ha tikmū'ūn xohix xexka pu' popmāhā',

²⁰ ha' māmā', tu nō hi ka'ok, pāyā' pip xit'ax punethok, yīy tik xop te manax hā' tat, tu mōktu manax te 12 nū' tihigāhā',

²¹ ha tikmū'ūn xohix xexka te' māmā', tik xohix te 5.000 te' māmā', ha 'ūn xit kamah, xix kakxop, pāyā' ap tikmū'ūn te nōm mō'kupix'ah.

Yeyox te kōnāg xexka yīmū hāpkumep

²² Hāp̄xip kutōgnāg 'Ihā Yeyox te' xat, pu yāy yōg tik xop mīpkox hā mōxakux, nūy tu mōg hāmāxap, nūy kōnāg xexka xak, 'Ihā Yeyox te tikmū'ūn xat pu yāy pet ha mōg,

²³ ha' mōg, ha Yeyox te yīktix tu' mōg, tu mōktu yīmū' xip, tu Topa pu hām'āktux 'ūp-xehnāg hā, ha mōktu yā' 'āmnīy, hap-xet xip,

²⁴ 'Ihā mīpkox te kōnāg yīmū' mōg, tu kōnāg xexka kote' xup, ha 'āmuuh ka'ok, tu kōnāg mahapnām, ha' mōg putux,

²⁵ ha hāptup 'Ihā māyōn xupep putup, 'Ihā Yeyox te kōnāg xexka yīmū hāpkumep,

²⁶ ha tik xop te' pēnāhā', tu' kuxānōg xexkah, tu:

–Yā' koxuk 'ōhōm! Kaxīy.

Tu' yīy ka'ok, 'ūkuxānōg tu',

²⁷ 'Ihā Yeyox te:

–'Ākuxānōg hok! Yākmūn xe'e'! 'Ūkyīpkutuk hok! Kaxīy.

²⁸ Yīy Pet te:

–'Āmūn xe'e', 'āpuk xat, 'ū kōnāg xexka yīmū hāpkumep kamah, nūy 'āhākmōg! Kaxīy.

²⁹ Ha:

–Mā'! Kaxīy.

Ha' mōg, pa 'āmuuh gāy te mō'ko'uk,

³⁰ yīy Pet te' yīpkutuk, tu kōnāg hā mō'nā'ax, hu' yīy ka'ok tu:

–Yāyā', 'ūkxut! Kaxīy.

³¹ Hāp̄xip 'ohnāg 'Ihā Yeyox yīm yok, tu Pet yīm tu' mūg, tu' xut, tu:

—'Ákuxa yŷm pu'tuk 'ŷgkopah. Teptu 'ákuxa tek yŷkopit, 'ákuxânŷg tu'? Kaxŷy.

³² Tu mŷpkox hã' mŷxakux, ha 'ãmuuh kux,

³³ ha tik xop kuxa te' yŷy, tu:

—'Ãmŷn yã Topak-tok xe'e! Kaxŷy.

Yeyox te hãpxexka Gẽnẽyane tu hãpxopmã'ax

³⁴ Tu kŷnãg xexka xak, tu hãpkux tu' mŷxaha', tu hãpxexka Gẽnẽyane tu' mŷxaha',

³⁵ ha' yŷg tikmũ'ũn te Yeyox pẽnãhã', tu' yŷmmũg, tu' pakut xop xohix pu' xuktux, nŷm te hãmhũmnãg tu' pip, ha' pakut xop nũnnãhã Yeyox hah,

³⁶ tu' xak, pu tux hok, pu topixxax 'ãpit. Ha tikmũ'ũn te' xupit, hu' hittup.

15

Yeyox te mŷnãyxop yŷg hãpxopmã'ax 'ãktux

¹ Ha Paniye xop xix tik xop te hãmyũmmũg nũn, tu ta Yenoyanẽn tu' nũn, nũy Yeyox mũtik hãm'ãktux, tu' yŷkopit, hu:

² —Teptu 'ŷg tik xexka xop te mŷnãyxop yŷg hãpxopmã'ax tat hok? 'Ap yãy yŷm pix'ah, nũy kũnãy tu tu' xit, tu kaxŷy mŷnãyxop yŷg hãpxopmã'ax tat 'ohnãg. Kaxŷy.

³ Ha:

—Teptu 'ãxop te Topa yŷg hãm'ãktux tu 'ãyŷpkox hok, pa mŷnãyxop yŷg hãm'ãktux tu 'ãyŷpkox pip?

⁴ Yã Topa te: "ŷg 'ãtak pu 'ãyŷpkox pi', xix 'ãtut pu'." Kaxŷy. Tu xe: "Pũyã tu xok tik te' tak 'ãktux kummuk, xi' tut 'ãktux kummuk." Kaxŷy.

⁵ Pa 'ãxop te tikmũ'ũn yŷmmũgãhã', hu: "Tikmũ'ũn 'ũm yŷg tayũmak pip, tu' tak 'ũm hã tu te hok, xi' tut hã tu te hok, nũy Topa pu' hŷm, puxix hãpxopmã max,

⁶ 'Ihã' tak, pe' tut hã te 'ohnãg. Kaxŷy. Yã kaxŷy 'ãxop te Topa yŷg hãm'ãktux putup nŷg, nũy yãy yŷg hãpxopmã'ax tat.

⁷ 'Apa mũn max, pãyã 'ákuxa mũn kummuk! Yã tik hittap 'Iyait te Topa pupi hãm'ãktux, tu 'ãxop 'ãktux, hu:

⁸ "Topa te hãm'ãktux, tu tikmũ'ũn 'ãktux, hu: 'Nũhũ tikmũ'ũn tek mũn 'ãktux max, pãyã' kuxa tek nŷm pax.

⁹ Tu yã hitop hã hãm'ãktux, nũy nũk-tetex 'ũgkeppah.

Yã Topa yŷg hãm'ãktux xaxogãhã', nũy yãy yŷg hãm'ãktux 'ũyãnãn tu hãmyũmmũgã'. Kaxŷy. Tu ta tu' kux." Kaxŷy.

Yeyox te' kuxa kummuk 'ãktux

¹⁰ Tu xe tikmũ'ũn xãnãhã', hu:

—'ŷg 'ãpax, nũy hãmyũmmũg:

¹¹ 'ŷxit'ax te tikmũ'ũn kuxa kummugã 'ohnãg. 'Ãmhok. Pa yãy yŷy'ax te' kuxa kummugãhã'. Kaxŷy.

¹² Ha tik xop te nũ mũtik hãpkumep, tu' nũn, tu' yŷkãgnãg hã' pip, tu:

—Yãyã', 'ok xate hãmyũmmũg? Yã Paniye xop te 'ŷg hãm'ãktux putup nŷg, tu' gãy. Kaxŷy.

¹³ Ha:

—Yŷgnũ 'Ãtak te pexkox tu' xip, tu mŷxux puknŷg xohix mŷy putup, nŷm xok 'ohnãg tu'.

¹⁴ Pũyã' pi! 'ŷm te' pa hok xop putuk, tu' nŷy mŷgãp-tup, pãyã hãmpẽnã 'ohnãg, hãmyũmmũg 'ohnãg tu', hu' pẽnã hok nŷy mŷgã', puxi' pẽnã hok 2 te hãpkox kopa nã'. Kaxŷy.

¹⁵ Ha Pet te:

—'ãpu hãm'ãktux 'ũgmũ'a yŷmmũgã'. Kaxŷy.

¹⁶ Ha:

—'ãxop te hãmyũmmũg 'ohnãg, tikmũ'ũn nŷy putuk.

¹⁷ Hãpxop te' yŷkox hã mŷ'nãhã', tu' tex ha' mŷg, ha mŷktu mŷ'yŷn, ha' kux,

¹⁸ pa' yŷy'ax te' kuxa kopa pip hãpxopmã'ax 'ãktux, tu' kummugãhã',

¹⁹ yã' kuxa kopa' pip hãpxopmã'ax te' nŷy hã' xupxet, xi' nŷy putex, xix hãpxopmã kummugãhã', yã hãmp'e'paxex kummuk te' xupxetnãhã', xi' koitnãhã', xi' kupexyãhã'.

²⁰ Hã kaxŷy 'ũkuxa kopa' pip hãpxopmã'ax te tikmũ'ũn kummugãhã', pa tu yŷm pix hok, nũy tu xit, yã hãpkummugã 'ohnãg. Tu ta tu' kux. Kaxŷy.

Tu yã 'ũn puknŷg 'ãktux

²¹ Tu ta' mŷg, tu kŷmẽn Tinok ha' mŷg, xix kŷmẽn Xinŷm ha' mŷg,

²² ha hãpxexka Kãnã'ãg yŷg 'ũn xip, tu ta' nũn tu nũktu Yeyox yŷka' xip, tu' yŷy ka'ok, tu:

—Notot! Mŷnãyxop Namix hã 'ãmŷkputox xe'ẽgnãg, tuk kuxa ka! Yãmŷy kummuk tek kutok hex kopa' xip, ha' xok putũmnãg. Kaxŷy.

²³ Ha Yeyox yŷy 'ohnãg, yŷy tik xop te' yŷka' nũn, tu:

—'ãpu' xat, pu mŷg. Yak mũk pe' nũn, tu' yŷy ka'ok! Kaxŷy.

²⁴ Ha:

—Topa te nũgkutnãhã 'Iyaet yŷg tikmũ'ũn puxehnãg hah, nũy nŷm tikmũ'ũn xaxok xop xax. Kaxŷy.

²⁵ Ha 'ũn te' kopaxux hã' nãhã' Yeyox kep-pah, tu:

—Notot, 'ãhã 'ãtehet! Kaxŷy.

²⁶ Ha:

—'A' max'ah 'ũk-tok yŷg xit'ax xut, nũy kokex pu mŷ'yŷn. Kaxŷy.

²⁷ Ha 'ũn te:

—Hamũn. 'Ap koit'ah, pãyã pãmnãg te hãm tu' nãhã', 'Ihã kaxxop xit, puxix kokex mã'. Kaxŷy.

²⁸ Ha:

—Xok 'ũm, 'ákuxa yŷm ka'ok xexka 'ũgkopah. Pũyã Topa' mŷy xate nŷm putup. Kaxŷy.

Hāpxip 'ohnāg 'Īhā kakxop hex hittup.

Yeyox te tikmū'ūn punethok hittupmāhā'

²⁹ Ha ta' mōg Yeyox, tu kōnāg xexka Gannet ha' mōg, tu mōktu yīktix tu mō'kanūn, tu' yūm,

³⁰ ha tikmū'ūn punethok te hāpkumep hok xop nūnnāhā', xi' pa hok xop, xi' yīy hok xop, xi' pakut xop xohix nūnnāhā', tu Yeyox keppa nū'xok, ha' xohix hittupmāhā'.

³¹ Ha tikmū'ūn te' yēy, 'Īhā hāpkumep hok xop te hāpkumep, xi' pa hok xop te hāmpēnāhā', xi' yīy hok xop te hām'āktux, ha tikmū'ūn te Topa pu hām'āktux, hu:

—Topah, yā 'āmax, 'āmūn yā 'Iyaet yōg Topah, tu tikmū'ūn hittupmāhā'. Kaxīy.

³² Yeyox te yāy yōg tik xop xānāhā', tu:

—Āte tikmū'ūn kuxa ka'. Yā' pip 'āmniy tikoxyuk hā, 'ap hāpxop 'ūm pip'ah, puyī' mā'. Āte' xat putup'ah, pu mōg, ka puāthaāt kopa' xakux, 'ūpu'uk tu'. Kaxīy.

³³ Ha:

—Pi'yā' xip 'ūxit'ax xohix, puyīy tikmū'ūn xohix xīnnā'? Yā kōmēn tu hāptox tu' pip. Kaxīy.

³⁴ Ha:

—'Ōg pām xohix te xīy? Kaxīy. Ha: —Pām xohix te 7, xix māhām. Kaxīy.

³⁵ Ha Yeyox te tikmū'ūn xat, pu hām tu' māhām, ha' māhām,

³⁶ ha pām pop, xix māhām, tu Topa pu hām'āktux, hu:

—Topah, yā 'āmax. Xatek mū'ā 'ūkxit'ax punethok hōm. Yā' puxi'. Kaxīy.

Tu pām koxip xix māhām, tu tik xop pu' popmāhā', pu tu tikmū'ūn xohix pu' nīm.

³⁷ Ha' xohix te' māhā', tu' hi ka'ok. Yā' pip pām punethok, yīy tik xop te' xuk manax xohix te 7 kopah, ha nū' tihī'.

³⁸ Yā tik xop te' māhā', 'ūxohix te 4.000, ha 'ūn te' māhā kāmah, xix kakxop, 'ap nōm xop mō'kupix'ah.

³⁹ Ha Yeyox te tikmū'ūn xat pu mōg, ha' mōg, ha Yeyox te mīpkox hā mō'nāhā', tu kōnāg yīmū' mōg, tu mōktu hāpxexka Māganāg tu' xupep.

16

'Ūxexka xop te hāpxopmā'ax ka'ok xe'ēgnāg xak

¹ Paniye tik xop xix Xanoxeo tik xop te Yeyox ha' mōg, nūy nū mūtik hām'āktux, nūy yīkopit, tu ta tu' xak pu pexkox yōg hāpxopmā ka'ok xe'ēgnāg, tikmū'ūn puxet te nōm mīy hok, pu' xexka xop hāmyūmmūg, nūy Topa Yeyox ka'ogā' yūmmūg,

² pa Yeyox te:

—Āmniy hā 'āxop te: “Hāptup 'Īhā' max. Yā hōnhā pexkox xax 'āta'!” Kaxīy.

³ Tu hāptup 'Īhā pexkox pēnāhā, tu: “Tex tip-tup. Yā pexkox xax 'āta xim-nīy.” Kaxīy.

'Āxop te pexkox pēnāhā', xayīy yūmmūg, pa hōnhā Topa te hāpxopmā max xe'ēgnāg, ha 'āxop te' pēnāhā', tu hāmyūmmūg 'ohnāg.

⁴ Hōnhā' kummuk tikmū'ūn, tu' kuxa māhām 'ohnāg. 'Āxop te hāpxopmā ka'ok xe'ēgnāg xak, pa Yōn yōg hāpxopmā'ax puxehnāg pēnāp-tup. Kaxīy.

Tu' mōg, tu tikmū'ūn nīm.

Yeyox te Paniye xop xix Xanoxeo xop 'āktux

⁵ Ha tik te nū mūtik hāpkumep te mīpkox hā kōnāg yīmū' mōg, tu pām xaxok, tu' paxmōg 'ohnāg.

⁶ Ha Yeyox te:

—'Ōg pa 'āti', nūy Paniye xop yōg pām yōg tokatogā'ax pa hok, xix Xanoxeo xop yōg. Kaxīy.

⁷ Ha tik xop te yāy mūtik hām'āktux hā' nōy yānān, tu:

—Tu te' xuktux, yūmū'āte pām xaxok hah. Kaxīy.

⁸ Ha Yeyox te' xupak, tu' yīkopit, hu: Tep tu yāy tukmīy hām'āktux hā, pām xaxok tu'? 'Ākuxa māhām pu'uk!

⁹ 'Ok hāmyūmmūg hok? 'Ok xaxok? Yā 'āte pām te 5 koxip, nūy tik xohix te 5.000 xīnnā',

¹⁰ xix 'āte' koxip pām te 7, nūy tik xohix te 4.000 xīnnā'. 'Ok xate' xaxok? Manax xohix te xīy nū'tihi pām hā?

¹¹ 'Ok hāmyūmmūg hok xate'? 'A pām 'āktux 'ohnāg. 'Ōg pa 'āti', nūy Paniye xop xix Xanoxeo xop yōg tokatogā'ax pa hok! Kaxīy.

¹² Ha tik xop te hāmyūmmūg. Yā Yeyox te Paniye xop yōg hāmyūmmūg'ax 'āktux, xix Xanoxeo yōg, tu pām xe'e' āktux 'ohnāg.

Pet te Yeyox yā Kunnix 'āktux

¹³ Tu ta' mōg Yeyox, Pinip yōg kōmēn Xeyanet ha' mōg, tu' mōg tu mōktu kōmēn kūnāpa' xip, ha' pip tik xop te nū mūtik hāpkumep xop, ha Yeyox te' yīkopit, hu:

—Tikmū'ūn tep-tep 'āktux 'ā'? 'Ū 'ūm Tikmū'ūn Kutok? Kaxīy.

¹⁴ Ha:

—Tikmū'ūn 'ūm te: “'Ōhōm Yoām, nōm tep-tox pix,” kaxīy, ha ta' nōy te: “'Ōhōm 'Enit,” kaxīy, ha ta' nōy te: “'Ōhōm yā Yenemīn, 'ok pe tik nōy te Topa pupi hām'āktux,” Kaxīy.

¹⁵ Ha:

—Xix 'āxop? 'Āxop tep-tep 'āktux? 'Ū 'ūm 'ūgmūn? Kaxīy.

¹⁶ Ha Xīmām Pet te:

—Āmūn yā Kunnix, Topa yōg hāmyāyutnā'ax, yā Topak-tok xe'ēgnāg! Kaxīy.

¹⁷ Ha:

—Ākuxa hittup Xīmān, Yoām kutok. Yā tikmū'ūn te xa nōm tup yūmmūgā 'ohnāg. 'Āmhok, pa 'Ātak Topa te pexkox tu' xip, tu xa hāmyūmmūgāhā',

18 yīy 'āte xa hāpxe'e 'āktux: 'Āmūn Pet, yā tikmū'ūn yīy'ax hā: Mīkaxxap. Kaxīy, Tikmū'ūn te mīkaxxap yīmū' pet, nūy mīptut ka'ogā', ha kaxīy 'āte 'ōg hām'āktux'ax hā tikmū'ūn kuxa māmmāhā', puyīy tikmū'ūn kuxa mām nōy nā' mōg, tu mōktu yā' xohix xexkah, ha yāmīy kummuk xop xohix te' kuxyā 'ohnāg, yā' pip ka'ok, tu nōāp-tup 'ohnāg.

19 'Āte xa pipkup mōhāmīyinnīn'ax hōm putup, xayīy pexkox mō'yīnnīn xi' xōn, xayīy Topa mūtīk xat. Xate' tux hok pu mōnāy hām xexka hā, hu ta kama mō'nā pexkox hā. Xate' tux hok puyīy mōtutnā hok hām xexka hā, hu ta mō'nā hok kama pexkox hā. Kaxīy.

20 Tu tik xop xat, puyīy tikmū'ūn pu hām'āktux hok, puyīy Topa Yeyox yāykutnā yūmmūg hok.

Yeyox te yāy xok'ax 'āktux, xi' putpu' hi'ax 'āktux

21 Nōm 'āmnīy 'Thā Yeyox te hām'āktux xe'e', 'ūyōg tik xop pu hām'āktux xe'e', hu:

—'Ūgmōg Yenoyanēn tu', ha 'ōnte Yoneo xexka xop tek xūygāp-tup, xix 'āmānex xexka xop tek xūygāp-tup, xix tik te hāmīyūmmūg xop tek xūygāp-tup. 'Ūkkok putup, ha 'āmnīy tīkoxytū nōg, 'Thā Topa tek hīnnāp-tup putpu'. Kaxīy.

22 Ha Pet te Yeyox xapit, tu' mōgāk-tōgnāg, nūy yā tup-xet hā hām'āktux, tu:

—Pūyā Topa 'ātux hok xa 'axok hok! Kaxīy hok! Kaxīy.

23 Ha Yeyox te yōkānām, tu Pet mānōg, hu:

—Mōy, 'ūkxāmpa mōg, nūy 'āpep! Xate Hāmgāyāgnāg! Xatek putup 'ūxax Topa yōg putat. Xate hāmpē'āpaxex tikmū'ūn putuk, pa Topa te hāmpē'paxex nōy. Kaxīy.

24 Tu yāy yōg tik xop pu hām'āktux, hu:

—Tikmū'ūn 'ūgmūn mūtīk hāpkumep putup, puxix yāy pe tu paxex kutōgnāg, tu mōktu yā yāy putpu'ax xaxok, kaxīy tute yāy yōg mīpkupnix tat, nūy xūy, 'ūgmūn putuk, tuk mūn mūtīk hāpkumep.

25 Tikmū'ūn te yāy xaxok hok, puxi' kuxa tu hi' 'ohnāg, pāyā yāy xaxok pax, puxi' kuxa tu hīp-tup mō kuma' mōg.

26 'Ok max tikmū'ūn putexop, tu hām xexka yōg tayūmak xohix xexka pop, pāyā' xok? 'A' max'ah. Yā' xok, tu tayūmak xohix xaxok, tu yā' hok xe'ēgnāg, ha tayūmak xohix te tikmū'ūn putpu hīnnā hok.

27 Yāk mūn Tikmū'ūn Kutok, tuk nūn putup putpu', 'Ūkxekap-tup 'Ātak Topa putuk, tu pexkox yōg nū'pok xop mūtīk nūn putup, tu tikmū'ūn xohix yōg hāpxopmā'ax kopit putup, nūy yūmmūg, 'ok pe hāpxopmā max 'ok pe hāpxopmā kummuk.

28 'Āte xa hāpxe'e 'āktux: Tikmū'ūn tīhi', tu' xaxix putup'ah 'Thāk nūn, 'ūgmūn yā Tikmū'ūn Kutok, tuk nūn putpu', nūy 'ūhep xop xohix xat. 'Ūkux. Kaxīy.

17

Yeyox xix Mōyyex xix 'Enit

1 'Āmnīy te 6 nōg, 'Thā Yeyox te Pet mōgāhā', xix Tiak, xix Yoām, pa' nōy xop mōgā hok, tu yīktix tox mō'kanīn, tu mōktu mōxaha',

2 ha Yeyox tu' pēnāhā', ha' pa te yāyhā yānām putuk, māyōn yānām putuk, ha' yōg topixxax te yāyhām-nok, kūyānām putuk.

3 Ha tik tīkoxyuk te mōnāyxop hittap Moyyex pēnāhā', xix mōnāyxop hittap 'Enit pēnāhā', ha Yeyox mūtīk hām'āktux hā' nōy yānān.

4 Ha Pet te:

—Yāyā', yā' max yūmūg pip nūnte! 'Ok xate putup, 'ūnūnteh 'āte 'āpet 3 mīy? 'Āpet puxet, xi' nōy mōnāyxop Mōyyex pet puxet, xi' nōy mōnāyxop 'Enit pet puxet. Kaxīy.

5 Pet te hām'āktux, 'Thā hāmōy xexka te kūyānām mō'nīy, ha ta Topa yīy, tu:

—'Ōhōm 'ūgkutok, 'āte 'ōm mō'yāy xe'ēgnāg, hak kuxa hittupmāhā'. 'Ūxupax! Kaxīy.

6 Ha tik xop te Topa yīy'ax 'āpak, 'Thā' kuxānōg xexkah, tu hām tu' xakux, ha' kuxa te' yēy,

7 ha Yeyox nūn, tu nōm hā' xupit, tu:

—'Āpu, 'āyok, 'ākuxānōg hok. Kaxīy.

8 Ha' yok, tu' yōkānām, tu hāmpēnāhā', tu Yeyox puxet pēnāhā'.

9 Ha' xat, pu yīktix tu yīxox, ha ta' mōg, 'Thā Yeyox te' xat pu tikmū'ūn pu' xuktux hok. Yā Yeyox te' putpu' hi, 'Thā yāy tik xop te hāpxopmā'ax xohix 'āktux.

10 Yīy tik xop te' yīkopit, hu:

—Teptu tik xop te hāmīyūmmūg te 'Ēnit 'āktux, tu nōm nūn putup hāmāxap 'āktux? Kaxīy.

11 Ha:

—Hamūn. Mōnāyxop 'Enit nūn hāmāxap, nūy Topa yōg hāmīyāykutnā'ax keppa mōg,

12 pa 'āte xa hāpxe'e 'āktux: Mōnāyxop 'Ēnit nūn tap, 'ap tikmū'ūn te' yūmmūg'ah, tuk-tex'ex kummuk, tu Tikmū'ūn Kutok kute'ex kummuk putup kamah, hak xūy xekap-tup. Kaxīy.

13 Yīy tik xop te hāmīyūmmūg. Yā Yeyox te Yoām 'āktux, nōm tep-tox pix.

Yeyox te tik kutok hittupmāhā'

14 Ta putpu' mōg tikmū'ūn hah, tu' mōxaha', 'Thā tik te Yeyox ha' nūn, tu' kakak hā' nāhā',

15 tu:

—Yāyā', 'āpu xōnnū kuxa ka! 'Ūpakut, tu hām tu' nāhā', xix kuxap kopa' nāhā', xix kōnāg kopa' nāhā', tu yāy pu xu'ux, ha yīkonnop te' yīkox hā' xupep, 'ūyīy xax tu' xupep,

16 ha' nūnnāhā' 'ōg tik xop hah, pāyā' hittupmā yūmmūg 'ohnāg. Kaxīy.

17 Ha Yeyox te:

—'Áxop kummuk xop! 'Ákuxa mām 'ohnāg! Yā 'āmnyī xohix hā 'āte 'āxop hā' tot. Hām 'ūm hā' kux'ax? 'Āk-tok nūnnā'. Kaxīy. Ha' nūnnāhā'.

¹⁸ Ha Yeyox te' xat, ha yāmīy kummuk mōg, 'hā tik tup hittup.

¹⁹ Ha tik xop te Yeyox yīka' nūn, tup-xet hā' pip, 'hā' yīkopit, hu:

—Tepduk mū'āte yāmīy kummuk xut hok? Kaxīy.

²⁰ Ha:

—'Ākuxa mām pu'uk, hu' xut hok. 'Ūxaxok hok: Tikmū'ūn kuxa mām kutōgnāg, mīpkup mōyatat xap kutōgnāg putuk, puxi' xat, pu yīktix mōg, nūy kōnāg xexka kopa yūm, hu' yūm'ax. Yā kaxīy 'āxop ka'ok, nūy hāpxopmā ka'ok xohix.

²¹ Topa mūtik hām'āktux pax, 'hā xit hok, hu ta nū yāmīy kummuk papux. Kaxīy.

Yeyox te xe hām'āktux, tu yāy xok'ax' āktux

²² Ha ta 'āmnyī 'ūm 'hā nōm tik xop te yāy tu nū'nāhā hāpxexka Ganinet tu', ha Yeyox te:

—Tīmū'ūn te' gāyox mōgāp-tup 'ūghah,

²³ hak putex putup, yāk mūn Tikmū'ūn Kutok. 'Āmnyī tikoxyuk nōg putup, 'hāh hip-tup putpu'. Kaxīy.

Ha tik xop kuxa hittup 'ohnāg.

Yeyox te Topa pet tu pago

²⁴ Tu ta' mōg kōmēn Kapānān tu', Yeyox mūtik mōg, ha tik tihi', tu Topa pet pupi tayūmak pop, tu Xīmām Pet yīkopit, hu:

—'Ok 'āxop xuxyā te Topa pet tu tayūmak hā pago? Kaxīy.

²⁵ Ha:

—Yā' pago. Kaxīy.

Tu mīptut hā mō'nāhā', 'hā Yeyox te hām'āktux hāmāxap, hu:

—Xīmām, xatep-tep mūn pe'āpaxex? 'Ū 'ūm te gohet pu tayūmak hā pago? 'Ok pe tikmū'ūn, 'ok pe puknōg xop?

²⁶ Ha:

—Puknōg xop. Kaxīy.

Ha Yeyox te:

—Hamūn. Yīy tikmū'ūn te pago hok,

²⁷ pa yūmū'āte tikmū'ūn gāyāp-tup'ah, yīy mōg, nūy māpxamut. Yā mām te māxap mō'xuk, puxi' yīkox tu' xut'ax tayūmak, nūy Topa pet tu tayūmak hā pago. Mōg, nūy yūmūg pupi pago. Kaxīy.

18

Pi'yā tik xexka nām?

¹ Tu hām'āktux kux, 'hā tik xop nūn, tu Yeyox yīkopit, hu:

—'Ū 'ūm yā Topa yōg tikmū'ūn xat'ax, 'hā Topa te yāy yōg tikmū'ūn xat? Kaxīy.

² Ha kakxop xānāhā', tu tik xop keppa' nūnnāhā',

³ tu:

—'Ūxaxok hok: 'Āxop kuxa te kakxop kuxa putuk hok, hu ta pexkox hā mōxakux 'ohnāg, 'hā Topa te yāy yōg tikmū'ūn xat.

⁴ Topa yōg tikmū'ūn xe'e kuxa te kakxop kuxa putuk, tu yāy kutōgnāg pe'paxex, tu Topa pu' yīpkox pip, yā nū kutōgnāg putuk.

⁵ Ha tikmū'ūn te kakxop putup, 'ūgmūn putup tu', koxpik xip nōm tikmū'ūn mūtik kamah.

Hāpkummuk mīy'ax hā' yāy pu hāpkummūgāhā'

⁶ —Kakxop kuxa mām ka'ok 'ūgkopah, ha tikmū'ūn te' mōgāhā', nūy Topa yōg putat xax, puxix Topa te nōm tikmū'ūn kummugāp-tup 'ūyānān tu'. Yā' max māykox hīy, xix mīkaxxap putux, nūy nō kōnāg kox kopa nū'xok, puyīy tu xok.

⁷ Yā' kummuk tikmū'ūn te kakxop mōgā kummuk! Topa te nōm tikmū'ūn kummugāp-tup xe'e'!

⁸ —Pax xa 'āyīm 'ākummugā, xa hāpkummuk mīy, pax xa 'āpata 'ākummūgā', xa hāpkummuk mīy, 'āpu kuyut, nūy xak, nūy putyōn. Yā' max pexkox hā mōnāy 'āyīm hok xix 'āpata hok hā. Pāyā' kummuk 'ūnōy te 'āxix kuxap kopah, ha 'āyīm 2, xix 'āpata 2. Yā nōm kuxap xok 'ohnāg.

⁹ Pax xa 'āpa 'ākummugā', xa hāpkummuk mīy, 'āpu' xut, nūy putyōn. Yā' max 'āpap-xet hā pexkox hā mōnāy, tu ta' kummuk 'āpa 2 hā Hāmgyāgnāg Pet ha 'āmōg, ha 'āputyōn kuxap kopah. Yā nōm kuxap xok 'ohnāg.

Yeyox te kahnēn te yāyaxogāhā' āktux

¹⁰ —'Ōg pa 'āti'! Kakxop pe'āpaxeh kutōgnāg hok. 'Āte xa hāpxe'e' āktux: 'Ūyōg nū'kutnā'ax te 'āmnyī xohix hā 'Ātak Topa keppa' xip pexkox tu'.

¹¹ Yāk mūn Tikmū'ūn Kutok, tuk nūn, nūy tikmū'ūn kummuk xop xax, nūy pipi', puyīy tu kuxa hi xe'ēgnāg.

¹² —'Āxop tep-tep pe'āpaxex? Tikmū'ūn yōg kahnēn xohix te 100, ha ta kahnēn puxet te yāy xaxok. Putep mūn mīy'ax 'ūxuxyā'? Tu kahnēn te 99 nīm, nūy kahnēn puxet xax.

¹³ 'Āte xa xe hāpxe'e' āktux: 'Ūxipihī', 'hā' xuxyā kuxa hittup xexka kahnēn puxet hā, tu' hittup kutōgnāg kahnēn te 99 hā.

¹⁴ Hā kaxīy 'Ātak Topa te pexkox tu' xip, tup-tup nōg, pu tikmū'ūn kutōgnāg yāy xaxok, kahnēn putuk, nūy hāpkummuk mīy.

¹⁵ —'Ānōy te xa hāpkummugāhā', 'āpu, mōg, nūy hāpkummugā'ax yūmmūgā'. 'Āp-xet hā mōg, nūy nū mūtik hām'āktux. 'Ānōy yīpkox pip, puxix 'āmūn hā 'āxape 'ūxeheh.

¹⁶ 'Ānōy yīpkox hok, 'āpu mōg, 'ānōy puxet mūtik 'āmōg, nūy hāpkummugā'ax yūmmūgā', xa hām'āktux hā nōy yānān. Yā Topa tappet te: "'Ok pe tikmū'ūn 2 tihi', 'ok pe tikmū'ūn 3 tihi', tu hām'āktux puxet, puxix tik pa te

hāmyūmmūg kopit max, tu nōm tikmū'ūn hām'āktux puxet ha' kopit max." Kaxīy.

¹⁷ Pa tikmū'ūn yīpkox hok, 'āpu tikmū'ūn kuxa mām ka'ok xop pu' xuktux. 'Ūkuxa mām ka'ok xop pu' yīpkox hok, puxix 'ōm 'āxop hā tu puknōg, 'āyuhuk putuk, xix tik te gohet puknōg pupi tayūmak pop putuk, yā' puknōg.

Tu' xat pu mīy, xi' xat hok puyīy mīy hok

¹⁸ –Yīy 'āte xa hām'āktux, hu: 'Āxop te' xat hok pu mīy hok hām xexka tu', puxix Topa' xat hok pu mīy hok pexkox tu' kamah. 'Āxop te' xat pu mīy, puxix Topa' xat pu mīy kamah pexkox tu'.

¹⁹ –Āte kama xa hām'āktux, hu: Xatix te Topa ta tu' xak pu hāpxopmā', tup-tox puxet hā' xax, xix kuxap-xet hā' xax, puxix 'Ātak Topa xip pexkox tu', tu hāpxopmāp-tup xa'.

²⁰ Yā tikmū'ūn 2 pe 3 te yāy tu' xakux, kopxix xip nōm tikmū'ūn mütik. Kaxīy.

Kāmānat kummuk 'āktux

²¹ Ha ta Pet te Yeyox yīka' nūn, tu:

–Yāyā', hāpkummuk mīy'ax xohix te xīy 'āte' xaxogā'ax, pu tu kux? Yāk taknōy tek kummugāhā', tu xek kummugāhā', tu mōktu yā' xohix. Hām 'ūm hā 'āte' xaxogā' kux'ax? 'Ok xaxogā'ax xohix te 7? Kaxīy.

²² Ha:

–Āmhok. 'Ūxaxogā' 'ūxohix te 7, tu xe xaxogā' 'ūxohix te 7, tu' xe xaxogā', tu mōktu xe xaxogā' te homi' 70, yā' xohix te 490 xate xaxogāp-tup.

²³ Yā Topa te' xat kaxīy, yīy 'āte xa hāmyūmmūgā'ax, nūy Topa yōg hāpxopmā'ax yūmmūgā', hu: Hāpxexka yōg tik te' xat'ax, tu kāmānat xop xānāhā' pu nū', pu tayūmak te ta nemēn hā pago,

²⁴ yīy kāmānat puxet nūnnāhā', ha ta nemēn tayūmak xohix xexka punethok,

²⁵ pāyā' hok, 'ap xip'ah tayūmak, yīy tik te' xat'ax te' xat pu nōm kāmānat hāmenax, xi' xetut, xik-tok xop, xi' yōg hāpxop xohix, pu tu' hok hā' hām, nūy tayūmak xexka hā' yānān, nūy tu pago.

²⁶ Pa kāmānat kopaxux hā' nāhā', tu' xat'ax tu' xak, pu mīy hok, tu: "'Ūgmūn hā tot, nūy 'ūghip, 'ū xa pago. Yā 'āte tayūmak xohix xexka hā xa pagop-tup. Kaxīy.

²⁷ –Ha' xat'ax te kāmānat kuxa ka', tu te ta nemēn'ax yōg tayūmak xaxogāhā', ha' mōg,

²⁸ pa kāmānat nōy pēnāhā', 'īhā' mōg, ha ta nemēn tayūmak kutōgnāg te 10 'ūnōy pu', yī' nōy māykok mūg, tu' nuhuk, tu: "'Hōnhā 'ā' pago. 'Āte hōnhā yāy yōg tayūmak putup!" Kaxīy.

²⁹ –Ha' nōy te' kopaxux hā' nāhā', tu tu' xak, hu: "'Ūgmūn hā' tot, nūy 'ūghip, xa pago, yā 'āte xa tayūmak xohix hā pagop-tup." Kaxīy

³⁰ –Pap-tup nōg, tu' mōg, tu kanet hā mō'tat, tu' kopa' xix, puyīy tayūmak xohix hā pago.

³¹ Ha ta kāmānat xop te' pēnāhā', tup-tup nōg, tu' gāy, hu tik te' xat'ax ha' mōg, tu tu' xuktux,

³² ha' xat'ax te kāmānat kummuk xānāhā', tu:

–"Āxupkumīy, 'ākummuk! Āte 'ōg ta nemēn xaxogāhā', ha' kux, xate 'ā' xak hah,

³³ pa 'ākummuk, tu 'ānōy kuxa ka' okpa 'āte 'ākuxa ka'." Kaxīy.

³⁴ –Tu' gāy xexkah, tu' xat, pu kāy mōgā kanet hah, nūy nō kummugā kanet kopah, ha mōktu tayūmak xohix ta nemēn hā' pago. 'Ūkux. Kaxīy.

³⁵ Tu hām'āktux kux, tu:

–Ha kaxīy 'Ātak Topa te pexkox tu' xip, tu' pēnānā' xip. 'Āxop te 'ānōy yōg hāpkummuk mīy'ax xaxogā' hok, puxix Topa 'ōg kummuk mīy'ax xaxogā' hok kamah. Tu ta tu' kux. Kaxīy.

19

Yeyox te' yīpxox xop 'āktux, nōm te yāy xe-tut nīm

¹ Tu hām'āktux kux, tu' mōg, tu hāpxexka Ganinet nīm, tu ta' mōg, tu mōktu hāpxexka Yonex tu' xupep, tu kōnāg xexka Yohnām xatapa' xip,

² ha tikmū'ūn xohix te' pe' mōg, ha' pakut xop hittupmāhā',

³ ha Paniye yōg tik xop mōxaha kamah, tu' yīkopit, nūy hām'āktux 'ax hā' kupeh, hu' yīkopit, hu:

–'Ok yūmū yōg xat'ax te' tux hok, pu tik yāy xetut nīm? Kaxīy.

⁴ Ha:

–'Ok 'āxop te mō'kupix hok Topa yōg tap-pet? Ha kax'āmi', hu: "Topa te tik mīy hāmāxap, xik-nāy tu 'ūn mīy." Kaxīy.

⁵ Ha Topa te: "Pūyā tik yāy tak nīm, xix yāy tut nīm, nūy tu' xetut mūy, nūy nū mütik yāytax, ha yāyhā' yīn puxet." Kaxīy.

⁶ Ha kaxīy Topa te yāyta tix hā' mīy yāp-xet, yā' yīpxox xi' xetut yāyhāp-xet. Yīy Topa te' xat hok puyīy tu yāyxtat hok. Kaxīy.

⁷ Ha Paniye xop te:

–Teptu Mōyyex te' tux hok pu mōnāy xop tu xetut nīm? Teptu' tux hok pu' xetut pu tappet hōm hāmāxap, nūy kūnāy tu' nīm? Kaxīy.

⁸ Ha:

–Mōyyex te' tux hok 'āxop kuxa kummuk hah. Pa Topa te tik mīy xi' 'ūn, puyīy yāy mütik nox tu ti ka'ok.

⁹ Āte xa hāpxe'e 'āktux: 'Ūxetut xonnix hok, ha' yīpxox te' nīm, puxix tik te hāpkummuk mīy, 'ūhūn nōy mūg tu'. Kaxīy.

¹⁰ Ha Yeyox yōg tik xop te:

–Tik te yāy xetut nīm hok, puxi' max tu yāyta hok. Kaxīy.

¹¹ Ha Yeyox te' yānān, hu:

–Topa te tikmū'ūn xohix pu hāmyūmmūgā'ah, pa' yāg kutōgnāg pu hāmyūmmūgāhā'.

¹² Tik xop yāg te yāyta 'ohnāg. 'Ūtut te' put kaxīy hah, 'ap yāyta'ah. Ha tikmū'ūn yāg yāyhā 'Ennōk, hu' yāyta 'ohnāg. Ha' yāg kutōgnāg yāyta 'ohnāg, nūy Topa pu' yīpkox pi', Topa te' xat hah. Tikmū'ūn hām'āpax, puxi' yōg hām'āktux yūmmūg. Kaxīy.

Yeyox xix kaxxop

¹³ Hāpxip kutōgnāg ha ta tikmū'ūn te kaxxop nūnnāhā', tu Yeyox ha' nūnnāhā', pu tup-tox yīmū' yīm nōm, nūy Topa pu hām'āktux kaxxop pupi', pa tik xop te' mānōg, tu' xat hok, pu Yeyox ha nūnnā hok,

¹⁴ yīy Yeyox te:

–'Ūtux hok pu kaxxop nūnnā', 'ūmānōg hok. Yā Topa te kaxxop kuxa tu' xat putup, puyī' yīpkox pi'. Ha' yīpkox pip xop xohix xat putup, nōm te kaxxop putuk tu hām'āpak. Kaxīy.

¹⁵ Tup-tox yīmū' yīm nōm, tu ta' mōg.

Tu tep-texop xexka 'āktux

¹⁶ 'Āmmīy nōy 'īhā tik nūn, yā Yeyox ha' nūn, tu' yīkopit, hu:

–Notot, 'ātep-tep mīy'ax, nūy tuk kuxa hi xe'ēgnāg mō' kumak mōg? 'Āte hāpxopmāhā hā xīy? Kaxīy.

¹⁷ Ha Yeyox te hām'āktux hā' yānān, hu:

–Teptuk yīkopit, nūy hāmmax 'ūm yūmmūg? Topap-xehnāg max. 'Āhi xe'ēgnāg putup, 'āpu, Topa yōg xat'ax pu 'āyīpkox xip. Kaxīy.

¹⁸ Ha:

–'Ūxat'ax 'ūm? Kaxīy.

Ha:

–“'Ūp-tex hok,” xix “'ānōy hā' xupxet hok,” xix “'ānōy yōg hāpxop hā' xupxet hok,” xix “koit hok,”

¹⁹ xix “'ōg 'ātak pu 'īpkox pi', xix 'ātut pu 'īpkox pi',” xix “'ānōy putup pax, xate yāy putup'ax putuk.” Kaxīy.

²⁰ Ha tik te:

–Yā 'āte' xat'ax xohix puk yīpkox xip tap. 'Ātep-tep mīy'ax homi', nūy hāpxopmā max? Kaxīy.

²¹ Ha Yeyox te:

–Mōy, 'ōg hāpxop xohixnāg hāmenax hāmāxap, xayīy Topa hā 'āmāx xe'ēgnāg, tu 'ōg tayūmak pop, nūy 'ūhok xop pu' nīm, xayīy pekkox yōg hāpxop pop 'ūyānān tu', nūy kūnāy tuk pe mōg. Kaxīy.

²² Ha tik te hām'āpak, tu' mōg, tu Yeyox nīm, 'ūkuxa hittup 'ohnāg tu'. Yā 'ūptexop xexkah,

²³ yīy Yeyox te yāy yōg tik xop pu hām'āktux, hu:

–'Ūptexop kutōgnāg te Topa yōg putat hā' mōg, 'ūyōg xat'ax pu' yīpkox pip hok tu'.

²⁴ Yā xok xexka kāmēn te 'āmuxnāg ta kup kox ha mō'tat hok, ha tap-texop 'ūm te Topa pu' yīpkox pip hok kamah. Kaxīy.

²⁵ Ha tikmū'ūn te Yeyox mūtik hāpkumep xop te' xupak, tu' yēy, tu:

–Yā kaxīy tikmū'ūn 'ūm mō'nā hok pekkox kopah! Kaxīy.

²⁶ Ha Yeyox te' pēnāhā', tu:

–Hamūn. Tikmū'ūn 'ūm mō tu nā hok, pa Topa te' ka'ogā'ax pu mōnāy. Kaxīy.

²⁷ Ha Pet te:

–'Ūgmū'āte' xohix nīm, nūy 'āpek mōg. 'Ok mū'āte hāpxop 'ūm popmāp-tup 'ūyānān tu'? Kaxīy.

²⁸ Ha:

–'Āte xa hāpxe'e 'āktux: 'Ūgmūn yā Tikmū'ūn Kutok, ha 'āmnīy xe'e mō'nāp-tup, 'īhāk yūm putup, tik te' xat'ax yōg mīmpe max yīmūk yūm putup, nūy 'Iyaet xop te 12 yōg hāpxopmā'ax xohix kopit, ha 'āxop mām putup kamah, mīmpe max te 12 yīmū 'āmām putup, nūy kama' kopit.

²⁹ Tikmū'ūn xohix tek mūn hā mīptut 'ūm nīm, xi' taknōy nīm, xi' hex nīm, xi' tutnōy nīm, xi' pit nīm, xi' tak nīm, xi' tut nīm, xik-tok nīm xix hām nīm, puxi' xohix pop, tu mōktu tehompit te 10 pop, tu' kuxa hip-tup xe'ēgnāg,

³⁰ pa tikmū'ūn te māxap yāyhā ka'ax putup, ha ta' ka'ax xop yāyhā māxap putup. Kaxīy.

20

Yeyox te kāmānat xop 'āktux

¹ Yeyox te hām'āktux'ax hā hāmyūmmūgāhā', nūy Topa yōg hāpxopmā'ax yūmmūgā', tu hāpxa xuxyā 'āktux, nūy Topa yāy yōg kāmānat pu pago 'āktux, tu hāmyūmmūgāhā, tu Topa te yāy yōg tikmū'ūn xat yūmmūgāhā', hu:

–Tik yōg mīnta 'op kup punethok, ha' ta mīnta', yī' mōg hāptapkoa 'īhā', nūy kāmānat xop xax, nūy nō nūnnā', pu mīnta ta put, nūy nūnnā'.

² Yā 'āmnīy xohix 'īhā' mōg, tu tayūmak 'ānuk puxet hā' pago kāmānat pu', 'āmnīy puxet yōg tayūmak te takat hā' pago kāmānat pu', hu hōnhā' mōg kamah, nūy kāmānat xop xānā'.

³ Ha māyōn te pekkox puka' yūm 'īhā' mōg, tu' putpu' mōg, nūy kāmānat xop nōy xānā', pu nūy tu hām, ha kōmēn yōg hāmnuhōg tu' tīhī', yāmhook tu' pip,

⁴ yīy hāpxa xuxyā te: “Mōg, nūy 'āhām yōg hām tu', ha 'āte xa pago maxp-tup.” Kaxīy.

⁵ –Ha' mōg. Māyōn yāykote' yūm 'īhā' xuxyā mōg 'ūxeheh, xix māyōn he 'īhā' putpu' mōg, nūy kāmānat xop nōy xānā', pu nūy tu hām, tu' nūn,

6 ha xe' mōg 'āmāxak 'Ṯhā', tu kōmēn yōg hāmmuhnōg tu' mōg, tu tik xop nōy pēnāhā', ha yāmhok pip, yīy: "Tep tu 'āpip 'Ṯhā māyōn mōg? 'E 'āhām 'ohnāg." Kaxīy.

7—Ha: "Yā tik tek mūk xānā 'ohnāg," kaxīy. Ha' xuxyā te: "Mōy, nūy 'āhām kamah yōg hām tu', nūy mīnta nūnnā'." Kaxīy.

8—'Āmnīy 'Ṯhā' xuxyā te kāmānat te māxap xat, nōm te kāmānat xohix xat 'ūxuxyā pupi', yīy: Kāmānat xohix xop xānā', nūy tu pago. Kāmānat nōm hām ka'ax pu' pago hāmāxap, tuk-nāy tu kāmānat nōy xohix hām'ax pu' pago, tu mōktu kāmānat hām hāmāxap pu' pago 'ūka'ax hā." Kaxīy.

9—Ha kāmānat xop te 'āmāxak 'Ṯhā' nūn, nūy tu hām. 'Ūxohix te tayūmak 'ānuk puxet paha',

10 yīy kāmānat xop te māxap hittup, tu' hipnām, nūy tayūmak xexka tu pop, pa' xohix te tayūmak 'ānuk puxet paha kamah.

11 Tu' paha', tu' gāy, tu' xuxyā pu hām'āktux,

12 hu: "Nū xop te ka'ax hā' nūn, nūy tu hām, tu 'ot puxet hā' hām, pak mūg hām xexkah, māyōn tox hāk mūg hām, ha māyōn pukpex tek mūg mō'hap koxūgnāg, 'Ṯhāk mūg hām, pāyā yūmū'āte tayūmak kutōgnāg pop, nōm xop te' ka'ax hā' nūn putuk." Kaxīy.

13—Ha' xuxyā te: "Nāy. 'Ūg'āpax. 'Āte hāmyok mīy, 'ūyā tu 'āxop pu pago max. 'Āte 'āxānāhā', tu xa hām'āktux, tu tayūmak 'ānuk puxet hā pagop-tup, ha 'ānūn, tu 'āhām, nūy pa tayūmak,

14 hu pa 'ōgnū tayūmak, nūy ta 'āpet ha mōg. Yā 'āte kāmānat xohix pu tayūmak puxet hā pagop-tup, 'āxop pu pago putuk.

15 Yā tayūmak yōgnū', 'āte 'āxop xohix pu pagop-tup, 'āxop hā yāyputuk, 'ūyīy pago. 'Ok xate 'ānōy yīpkumīy, 'āte nōm xop ha hāmmaxnāhā', ha' yīpkumīy?" Kaxīy. 'Ūkux.

16 Yeyox te hām'āktux kux, tu:

—Yā kaxīy tikmū'ūn te māxap xop yāyhāp-tup 'ūka'ax xop, ha ta tikmū'ūn ka'ax xop yāyhāp-tup hāmāxap xop, Kaxīy.

Yeyox te yāy xok'ax 'āktux 'ūxeheh

17 Tu putat hā pepi' mōg, nūy kōmēn Yenoyanēn ha' mōg, yāy yōg tikmū'ūn mūtik mōg, ha nōm mōg putat tu', nūy tup-xet hā hām'āktux, 'Ṯhā hāpkumep, tu:

18—Pēnā'! Kōmēn Yenoyanēn ha yūmū mōg. 'Ūgmūn yā Tikmū'ūn Kutok, hak mōgāp-tup 'āmānex xexka xop hah, xix tik te hāmyūmmūg xop hah, ha tak putex putup,

19 tuk mōgāp-tup 'ūpuknōg xop hah, hak kute'ex kummuk putup, tuk kix putup, tuk xup putup mīpkupnix tu', nūy 'ūkputex, pa 'āmnīy tikoxyuk hā' nōg putup, 'Ṯhā putpuk hip-tup. Kaxīy.

Tiak xix Yoām mūg tut te Yeyox pu hām'āktux

20 Hāpxip kutōnāg ha ta Yemeneo xetut nūn, tuk-tok pit 2 nūnnāhā', tu Yeyox keppa nū' xup, nūy ta tu' xax, yīy Yeyox te:

21—Xatep-tep putup? Kaxīy.

Ha:

—'Āpu, hām'āktux xeh 'ūgmūtik, puk kutok pit puxet 'āyīm xe'e hā' yūm, xi' nōy 'āyīm xax hā' yūm, 'Ṯhā xate yāyhā 'āxexka xe'ēgnāg, nūy tikmū'ūn xohix xat. Kaxīy.

22 Ha Yeyox te 'ūn kutok 2 pu hām'āktux, hu:

—Xate hāmyūmmūg 'ohnāg, tu 'ā' xak pu 'āxexkānā'. Tikmū'ūn te' hep kohāgnāg xo'op, ha kaxīy 'ūkxūy xexka putup. 'Ok xatix 'āxūy xexka hā' tot? Kaxīy.

Ha:

—'Ūgmū'āte nōā'tot. Kaxīy.

23 Yīy Yeyox te:

—Yā' xo'op putup hep xūy, hu 'āxūy putup, 'ūkxūy putuk, pa' āte yāyknā hok, xak yīm xe'e hā yūm, xix yīm xax hā yūm. Yōgnū' Ātak te' yīmōgātux, pu' mām. Kaxīy.

24 Ha tik xop te 10 te hām'āpak, hu' gāy 'ūtaknōy 2 tu',

25 yīy Yeyox te' xohix xānāhā', pu' yīkahnāg nū', ha:

—Gohenanok xop te tikmū'ūn xat, ha' xexka xop te tikmū'ūn xat,

26 pa 'āxop kopa kaxīy mīy hok. 'Āmhok. Tikmū'ūn 'ūm te yāy xexkānāp-tup, puxi' nōy hā tu' tehet, 'ūyōg kāmānat putuk,

27 ha tikmū'ūn te yāyhāp-tup hāmāxap, puxi' nōy xop tu hok hā' hām.

28 'Ūgmūn yā Tikmū'ūn Kutok, pak nūn hok, pu yīy tikmū'ūn 'ā' hāpxopmā'. 'Āmhok. Yāk nūn 'ūhep xohix xop pu hāpxopmā', nūy 'ūkxok, nūy tikmū'ūn kuxa kummuk xit, nūy kuxa max mō'tat 'ūyānān tu'. Kaxīy.

Yeyox te tik pēnā hok pu' pa max nāhā'

29 Tu hāpxip 'Ṯhā' mōg, tu kōmēn Yenikot nīm, ha tikmū'ūn xohix xexka te' pe' mōg,

30 ha tik 2 pa hok mām, putat yīka te tu' mām, tu tikmū'ūn yīy 'āpak, tu Yeyox nūn yūmmūg, hu' yīy ka'ok, tu:

—Notot, yā mōnāyxop Namix hā 'āmōkputox, 'ūg 'ūm kuxa ka'! Kaxīy.

31 Ha tikmū'ūn te' mānōg, tu:

—'Āhup, 'āyīy hok! Kaxīy. Pāyā' yīy ka'ok 'ūxeheh, tu:

—Notot, yā mōnāyxop Namix hā 'āmōkputox, 'ūg 'ūm kuxa ka'! Kaxīy.

32 Yīy Yeyox hup, tu tik pa hok xānāhā', tu' yīkopit, hu:

—Xatep tek mūn putup, 'ūmīy xa'? Kaxīy.

33 Ha:

—Notot, 'ūgmūg 'ūm pa nā', 'ūgmūg hāmpēnā'! Kaxīy.

34 Ha Yeyox te' kuxa ka', tu' pa 'āpit, ha hāpxip 'ohnāg 'Ṯhā' pa', tu hāmpēnāhā', tu Yeyox pe' mōg.

21

Yeyox te kômên Yenoyanên tu' xupep

¹ Ha ta' mōg, tu mōktu kômên Yenoyanên yīka' pip, 'Thā' pip'ax Metpaye tu' mōxaha', ha yīktix 'Onimet yīka' yūm, tu' yōg tik 2 mō'kutnāhā', pu' keppa mōg,

² tu' xat, hu:

—Mōg, nōm xip tu xexka ha mōg, tu mōktu mōxaha', ha yohmên hex pēnāp-tup, hak-tok te nū mūtik tihī', ha' mīm tu' hīy, ha mōy hīy'ax koa', nūy nūnnā'.

³ Tikmū'ūn te xa' yīkopit, 'āpu yīy, tu: "Ūgmūg xuxyā te yohmên putup, tu' putpu' nūnnāp-tup," kaxīy, ha 'ātux hok putup xa yohmên 2 nūnnā'. Kaxīy.

⁴ Ha hāpxopmāhā', tu Topa yōg hām'āktux hittap hā yohmên nūnnāhā'. Hōmā tik hit-tap te Topa pupi hām'āktux, tu tappet tu kax'āmi',

⁵ hu:

"Pu, Xiām yōg kômên kopa' pip xop pu hām'āktux, hu:

Hōnhā tik te tikmū'ūn xat'ax xupep, tu yāk-tōgnāg, tu yohmên yīmū' yūm, tu yohmên kutok yīmū' yūm." Kaxīy.

⁶ Ha ta tik xop mōg, tu Yeyox keppa' mōg, tu' xat'ax mīy,

⁷ tu yohmên nūnnāhā', xik-tok nūnnāhā', tu yāy kap xix yohmên yīmū', pu Yeyox yīmū' yūm, ha' yūm,

⁸ ha tikmū'ūn xohix yāy yōg kap mō'yōn hām tu', pu yohmên mōy yīmū' mōg,

⁹ ha mōktu tikmū'ūn te' keppa' mōg, xix tikmū'ūn te' pe' mōg, yīy ka'ok, tu:

—Mōnāyxop hittap Namix mōkputox xexka xe'ēgnāg! Pūyā Topa xa hāmmaxnā! Yā xa' hōm yāy 'āxet'ax, xa nū! Yā Topa mūn xexka xe'ēgnāg! Kaxīy.

¹⁰ Tu kômên Yenoyanên tu' mōxaha', 'Thā tikmū'ūn xohix te' xupak, tu:

—Putep mūn mīy? 'Ū 'ūm 'ōhōm? Kaxīy.

¹¹ Ha tikmū'ūn te Yeyox mūtik mōxaha, tu:

—Yā nō'ōm Yeyox, tu Topa pupi hām'āktux, yā hāpxexka yōg kômên Nāyane yōg tihik. Kaxīy.

Yeyox te Topa pet xexka hā mō'nāhā'

¹² Yeyox te Topa pet xexka hā mō'nāhā', tu tikmū'ūn papuk, nōm te' kopa hāpxop hāmenax, tu tayūmak yānān'ax xop yōg mīmpe putxok, xix yāy yūm'ax putxok kamah, tu tik xop te putuxnāg hāmenax yōg yūm'ax putxok.

¹³ Ha Yeyox te:

—Topa yōg tappet te Topa yōg hām'āktux'ax 'āktux, ha: "Ūkpet xexka 'āxet'ax Topa pu hām'āktux'ax pet," kaxīy, pa 'āxop te Topa pet xexka kummugāhā', ha yāyhā hāpxupxet pet! Kaxīy.

¹⁴ Ha tikmū'ūn pa hok xop nūn, xix tikmū'ūn te hāpkumep hok xop nūn, Topa pet

xexka ha' nūn, puyīy Yeyox hittupmā', ha' hittupmāhā',

¹⁵ yīy 'āmānex xexka xop gāy, xix tik te hāmyūmmūg xop gāy, 'Thā Yeyox te hāpxopmā max xe'ēgnāg, ha' pēnāhā', ha kaxxop yīy ka'ok Topa pet xexka kopah, tu:

—Mōnāyxop hittap Namix mōkputox xexka xe'ēgnāg! Kaxīy. Ha' xexka xop te' xupak.

¹⁶ Tu Yeyox pu hām'āktux, hu:

—'Ok xate kaxxop yīy 'ūm 'āpak? Kaxīy.

Ha:

—Yā 'āte' xupak. 'Ok 'āxop te Topa yōg tappet 'ūm mō'kupix hok? Yā: "Topa te kaxxop pu hāmyūmmūgāhā', pu tu Topa 'āktux māynāg." Kaxīy.

¹⁷ Tu ta' nīm, tu kômên nīm kamah, tu' pip'ax Metān ha' mōg, tu mōktu' pip'ax tu' xip 'āmnīy tox hā.

Yeyox te piget kup mānōg

¹⁸ Hāptup 'Thā' mōg, Yenoyanên tu putpu' mōg, ha putup te Yeyox putex,

¹⁹ ha ta mūnta kup piget pēnāhā', ha putat puka' yūm, yī' mōg, pa mūnta 'ūm ta 'ohnāg, 'ūxux puxet mō'tat, yīy Yeyox te' kup xat, hu:

—Mūnta 'ūm ta hok! Kaxīy.

Hāpxip 'ohnāg 'Thā mūnta kup yā tāmnāg,

²⁰ ha tik xop te' pēnāhā', tu' kuxa te' yēy, tu:

—Yā' kup tāmnāg mō'ka'ok! Kaxīy.

²¹ Ha Yeyox te:

—'Āte xa hāpxe' 'āktux: 'Ākuxa mām ka'ok xix yāy kuxa yīkopit hok, hu ta mūnta kup nakgā kamah, tu' xat'ax hā' nakgāhā', pāyāp-xet'ah. 'Āxop te yīktix xat'ax, pu 'āpep, nūy kōnāg xexka kopa mō'yāykutnā', puxix mō'kutnā'.

²² 'Ākuxa mām ka'ok, puxix Topa xa' hōm hāpxop 'ūm 'āxop te ta tu' ākax. Kaxīy.

Yeyox te' xat'ax

²³ Tu Topa pet xexka ha' mōg putpu', tu hāmyūmmūgāhā', 'Thā 'āmānex xexka xop nūn, xix Yoneo xexka xop nūn, tu Yeyox yīka' pip, tu' yīkopit, hu:

—Tep te xa' hōm yāy 'āxet'ax, xayīy hāpxopmā' ka'ok xix hāmyūmmūgā'? Kaxīy.

²⁴ Ha:

—'Āte 'āyīkopit'ax kamah, xa 'āxop hām'āktux 'ūyānān tu', kopxix xa hām'āktux, tup-tep te 'ā' hōm yāy 'āxet'ax, ha xa' xuktux.

²⁵ 'Āyīy! Tep te Yoām pu 'āxet'ax hōm, pu tup-tox pix? 'Ok pe Topa te tu' hōm? 'Ok pe tikmū'ūn te tu' hōm? Kaxīy.

Ha' xexka xop te yāy pu hām'āktux hā' nōy yānān, hu:

—Pax 'ū yūmū'āte: Topa te tu' 'āxet'ax hōm," kaxīy, puxi' yānān tu' yīkopit, hu: "Teptu 'ākuxa mām 'ohnāg Yoām kopah?" kaxīy.

²⁶ Pax 'ū yūmū'āte: "Tikmū'ūn te' xuxet'ax tu' hōm," kaxīy, puxix tikmū'ūn gāy, ha yūmū'āte' yīpkutuk. Yā' xohix te Yoām

pe'paxex 'üxexkah, tu pe'paxex Yoãm te Topa pupi hãm'äktux. Kaxíy.

²⁷ Hu' yãñãn tu hãm'äktux, hu:

—Ap yümmüg'ah 'äte'. Kaxíy.

Ha Yeyox te:

—A 'äte xa hãm'äktux putup'ah kamah, tu yãy 'üm 'äxet'ax 'ä' hõm 'äktux putup'ah. Kaxíy.

Tik kutok 2

²⁸ Tu xe hãmyümmügãhã hãm'äktux'ax hã, nüy Topa yõg hãpxopmã'ax yümmügã', tu:

—Xatep tep pe'äpaxex? Tik kutok pit 2, tuk-tok hãmãxap xat, nüy: “Xõnnü”, möy nõmhã nüy yõgnü mĩnta 'op yõg hãpxa'ax tu 'ãhãm.” Kaxíy.

²⁹ —Hak-tok te mãxap te: “Ap 'ügmõg putup'ah.” Kaxíy.

—Pa hãpxip kutõgnãg 'ĩhã yãyhãhup, tu' mõg.

³⁰ —Ha' tak tek-tok kuhñõy xat kamah, pu möy tu hãm, hak-tok te kuhmõy te: “Yãk mõg.” Kaxíy.

—Pa' mõg 'õhnãg. Kaxíy.

³¹ Tu hãm'äktux kux, tu' xexka xop yĩkopit, hu:

—'Ük-tok te xíy te' tak pu' yĩpkox xip? Kaxíy.

Ha:

—Yãk-tok te mãxap. Kaxíy. Yíy Yeyox te:

—Gohet pupi tayümak pop xop xi' xotit xop te Topa pu' yĩpkox pĩp, pãyã 'äyĩpkox 'ohnãg.

³² Yã Yoãm tep-tox pix, tu 'ãkeppa' mõg nüy xa Topa yõg putat müg, ha 'ãkuxa mãm 'õhnãg Yoãm kopah, pãyã tayümak pop xop xi' xotit xop kuxa mãm ka'ok. Ha 'ãxop te' yümmüg, tu yãyhãhup 'ohnãg, nüy hãpkummuk mĩy kux, nüy 'ãkuxa mãm ka'ok Yoãm kopah. Kaxíy.

Tute kãmãnat kummuk 'äktux

³³ Tu xe:

—'Üg 'ãpax! Hãm'äktux'ax nõy hã 'äte xa hãmyümmügã'ax, nüy Topa yõg hãpxopmã'ax xa hãmyümmügã', hu: Tikmü'ün te hãpxaha', tu mĩnta 'op xok, tu hãmpak'ax hã' yĩmmap, tu mĩkaxxap xox tix hã' taf'ax mĩy, pu tox hep 'op tonnok, nüy' hep xut, nüy ta hep xupyãg mĩy, xix mĩptut tox mĩy, nüy hãpxa xexka pẽnã', ha tikmü'ün nõy pu' nĩm, tayümak hã' nõy yãñãn tu', tu ta hãpkumep hãptox tu'.

³⁴ Ha ta hãmyãxatamuk 'ĩhã' xuxyã te kãmãnat tikoxyuk nü'pok, pu tu' xuxyã yõg tayümak nõm pupi pa'.

³⁵ Pa hãpxa xexka yõg kãmãnat te' müg, tup-xet kix, xi' nõy putex, xi' nõy mĩkaxxap hã' tux.

³⁶ Hãpxip 'ĩhã' xuxyã te xe kãmãnat xop nü'pok, tu ta kãmãnat punethok nü'pok, pu tu' xuxyã pupi tayümak pop, ha hãpxa xexka yõg kãmãnat xop te xe hãpxopmã kummuk.

³⁷ Yíy hãpxip 'ĩhã' xuxyã te nü yãy kutok kutnãhã', tu hãmp'e'paxex, hu: “Yãk kutok

xexka pe'paxex'ax, 'ap kummügãp-tup'ah.” Kaxíy.

³⁸ Ha ta' nũn, pa hãpxa xexka yõg kãmãnat te' pẽnãhã', tu: “Yã' xuxyãk-tok xe'e'! 'Äpu yümüp-tex, nüy hãpxa xexka pa'!” Kaxíy.

³⁹ —Tuk-tok müg, tu hãpxa xexka künãpa ha' mõgãhã', tu' mõg, tup-tex, ha' xok. 'Ükux. Kaxíy.

⁴⁰ Yeyox te' yĩkopit, hu:

—Tep mũn mĩy'ax 'üxuxyã', 'ĩhã' putpu' nũn, nüy hãpxa xexka yõg kãmãnat xop 'üyãñãn tu' kummügã'? Kaxíy.

⁴¹ Ha tikmü'ün te:

—Ya' kix'ax, nüy hãpxa xexka hõm tikmü'ün nõy pu', pu tu' xuxyã pu hãpxa yõg tayümak hã pago hãmyãxatamuk xohix 'ĩhã'. Kaxíy.

⁴² Yíy Yeyox te xe' yĩkopit, hu:

—'Ok 'ãxop te Topa yõg tappet 'üm mõ'kupix hok? Ha: “Tikmü'ün pet, tu mĩm xexka putup nõg, pa hõnhã yãyhã mĩptut mãykup xix mĩptut koxuk, yã mĩm xexka xe'ëgnãg. Topa mũn te' xexkãñãhã', ha yümüg kuxa te' yëy.” Kaxíy.

⁴³ Tu hãm'äktux kux, tu:

—'Äte xa hãpxe'e' äktux: 'A Topa te 'ãxop 'üm xat putup'ah, pãyã' nõy xat putup, nõm te Topa pu' yĩpkox pĩp, tu hãpxopmã max.

⁴⁴ Tikmü'ün te mĩkaxxap hã' nã', puxix tu yãy koxyõy. Mĩkaxxap te tikmü'ün yĩmü' nã', puxix yã' xohix koxyõynãm. Kaxíy.

⁴⁵ Ha 'ãmãnex xexka xop xix Paniye xop te Yeyox yõg hãm'äktux'ax 'ãpak, tu hãmyümmüg. Yã' xexka xop 'äktux 'ĩhã hãm'äktux hã hãmyümmügãhã',

⁴⁶ yí' gãy, tu' müg putup, pa tikmü'ün yĩpkutuk, ha Yeyox yã' xexka pe'paxex, tu: “Yeyox te Topa pupi hãm'äktux xe'e'.” Kaxíy.

22

Tik te' xat'ax te 'ãmuk xexka mĩy

¹ Yeyox te xe hãm'äktux'ax hã hãmyümmügãhã', nüy Topa yõg hãpxopmã'ax yümmügã', nüy Topa yã' hep xop xohix xãnã 'äktux, tu:

² —Topa te yãy yõg tikmü'ün xat, ha' yĩpkox pĩp, ha kaxíy hãpxexka 'üm yõg tik te' xat'ax te 'ãmuk xexka mĩy, 'ük-tok pit te yãytap-tup hah,

³ yí' tak te kãmãnat mõ'pok pu tikmü'ün xãnã', pãyã 'ap nũn putup'ah,

⁴ yíy kãmãnat nõy mõ'pok, pu tikmü'ün pu hãm'äktux, hu: “'Äte 'ãmuk xexka mĩy tap, tu mũnũytut tak kix, xix mũnũytut kutok kix, xa nü', nüy 'ãxit!” Kaxíy.

⁵ —Pãyã tikmü'ün tep-tup nõg, tu yãy kuxop punethok, tup-tup-nõg. 'Üpxet te' yõg hãpxa xexka ha' mõg, xi' nõy te' yõg mẽn ha' mõg.

⁶ ha tikmü'ün nõy te kãmãnat xop müg, tu' kix kakixnãg, tu' kix ha mõktu' xakix.

7 Ha hãpaxexka yõg tik te' xat'ax gãy xexkah, hu' xat, pu tu kummuk xop kix 'üyânân tu', xi' yõg pip'ax mõ'xut kuxap hã', pu tu nõg.

8 Ha' xat'ax te kãmânat xop xe xãnãhã', tu: "Xõnnũ te yãytaha', ha 'ãte' mÿy' amuk xexka, tu tikmũ'ün xãnãhã put nü', pãyã' kummuk, tu' nũn' ohnãg,

9 pa hõnhã mõg, putat hã mõg, nũy tikmũ'ün xohix xãnãhã." Kaxÿy.

10 –Ha putat hã' mõg, tu tikmũ'ün xohix xãnãhã put nü', tu tikmũ'ün max xãnãhã', xix tikmũ'ün kummuk xãnãhã', yã' xohix xãnãhã', ha' xat'ax yõg mÿptut max ha' mõg tikmũ'ün xohix, nũy 'ãmuk xexka mã', ha mõktu mÿptut xexka nü'xĩmãng.

11 Ha tik te' xat'ax xexka te hãm'ãta kox hã mõ'nãhã', nũy nũy tikmũ'ün pãnã', tu tik puxet pãnãhã', 'a 'ãmuk xexka yõg topixxax max mõ'tat'ah. Yã mõnãyxop yõg hãpxopmã'ax tat 'õhnãg,

12 yÿy tik te' xat'ax te: "Tep te xÿy hã mõ'ãnãhã', pa 'ãmuk xexka yõg topixxax mõ'tat hok?"

–Ha tik yÿy kÿy ka'ok, tu' yÿy 'õhnãg,

13 yÿy tik te' xat'ax te kãmânat xat, tu: "Üyÿm kÿy, xi' kup kÿy, tu' putyõn hãpkoxtap kopah, ha' potap-tup, 'üxÿy xexka tu'." Kaxÿy. 'Ükux.

14 Yeyox te hãm'ãktux kux, tu:

–Topa te tikmũ'ün punethok xãnãhã', pak-tõgnãg hã yÿmõgatux. Kaxÿy.

Tik xop te' puknõg yõg gohet 'ãktux

15 Ha Paniye xop mõg, tu yãy mütik hãm'ãktux, nũy Yeyox yõg hãm'ãktux'ax hã' yÿkopit, nũy tu' kummugã',

16 hu yãy tik xop nü'pok 'Enot xop mütik, nũy Yeyox tu yÿkopit. Yã tik xop pa max, pãyã' kuxa kummuk, tu:

–Notot, yÿmũ'ãte 'ãyÿmũg, ha hãpxe'e 'ãktux, tu hãmyÿmmũgã max, pu tu tikmũ'ün Topa yõg hãmputup'ax yÿmmũg. Yã tikmũ'ün 'üm pu 'ãyÿpkox 'õhnãg, nũy hãpxopmã'ax hi-top hã' kopit hok, yÿy yÿmũ'ãte 'ãyÿkopit,

17 hu: Xatep-tep mÿn pe'ãpaxex? 'Ok yÿmũ yõg xat'ax te' xat hok, pu tayÿmak hã pago hok gohet puknõg pu'? 'Ok pe' xat pu pago? Xatep-tep mÿn pe'ãpaxex? Kaxÿy.

18 Tu yã mõ'ãmã', pãyã Yeyox te' yÿmmũg, hu:

–Ãxop pa max, pãyã 'ãkuxa mÿn kummuk! Tep tuk yÿkopit putup xate'?

19 Paxnũ tayÿmak! Kaxÿy.

Ha ta' paxnũn, tu tu' mũg,

20 yÿy Yeyox te' yÿkopit, hu:

–'Üxuxet'ax nũhũ tik koxuk? Kaxÿy.

21 Ha:

–Yã' puknõg yõg gohet te tikmũ'ün xat'ax koxuk. Kaxÿy.

Yÿy Yeyox te:

–Gohet pu' hõm gohet yõg yã hãpxop, xix Topa pu' hõm Topa yõg hãpxop. Kaxÿy.

22 Ha' xupak, tu' yÿy, tu' yÿkopit kux, tu ta' mõg.

Xanoxeo xop te put pu' hi'ax 'ãktux

23 Hãpxip 'ÿhã Xanoxeo xop nũn, tu' kuxa mãm 'õhnãg putpu' hi'ax kopah, tu nũktu Yeyox yÿka' nũn,

24 tu:

–Notot, Mõyyex te yÿmũ'ã hãmyÿmmũgãhã', hu: "Tik 'üm xok, 'ÿhã' xetut tek-tok put hok, puxix tik taknõy xe' xetut mÿy, nũy nü mütik yãytax, pu ta tu tuk-tok put, pÿyÿk-tok 'üyÿpxox nõm te mãxap yõg hãpxop pop." Kaxÿy.

25 Yã yÿmũg tikmũ'ün kopa' pip taknõy 'üxohix te' 7 'axa', ha' taknõy nõm hãmãxap te yãytaha', ha' xetut tek-tok put 'õhnãg, ha' yÿpxox xok, ha ta' taknõy tu' kuhmõy te' mũg,

26 tu nü mütik yãytaha', ha' xetut tek-tok put 'õhnãg, ha' yÿpxox xok kamah, ha' taknõy tu' kuhmõy te' mũg, tu nü mütik yãytaha', ha mõktu' taknõy xohix te 7 te 'ün mütik yãytaha', tu' xok, ha' xetut tek-tok put 'õhnãg.

27 Yã 'ün te ka'ax ha' xok kamah.

28 'Ütaknõy 'üm yã 'ün hã' xetut xe'e'? Pax pu tikmũ'ün putpu hi, puxi' taknõy 'üm 'üxetut mÿy? Yã' taknõy xohix te 'ün mütik yãytaha'. Yã yãyta xohix. Ta tu' kux. Kaxÿy.

29 Ha Yeyox te' yãnãn hã hãm'ãktux, hu:

–'Ãxop te yã yãy pu mõ'ãmã', 'ap Topa yõg tappet 'üm yÿmmũg'ah, xix Topa yõg hãpka'ok'ax yÿmmũg 'õhnãg.

30 'Üxakix xop te' putpu' hip-tup, hu ta pexkox yõg nü'pok xop putuk, tu yã yãyta 'õhnãg.

31 'Ate yã xa putpu yãy hi'ax yÿmmũgã'ax. 'Ok 'ãxop te Topa yõg tappet 'üm mõ'kupix hok? Yã Topa te:

32 "'Ügmũn yã mõnãyxop 'Amanãm yõg Topa, xix mõnãyxop 'Iyak yõg Topa, xix mõnãyxop Yako yõg Topah." Kaxÿy. Yã' hi xop mÿn hã Topah, pa' xakix xop 'ap hã Topa'ah. Kaxÿy.

33 Ha tikmũ'ün te hãmyÿmmũg'ax 'ãpak, tu' yÿy.

Topa yõg xat'ax te mãxap

34 Ha Paniye xop te hãm'ãpak kamah, tu yãy tu nü' nãhã', 'ÿhã hãmyÿmmũg. Yã Yeyox te Xanoxeo xop pu hãm'ãktux hã tu' hupmãhã',

35 ha Paniye xop yõg tik 'üm te' xat'ax yÿmmũg max, tu Yeyox yõg hãmyÿmmũgã'ax yÿkopit putup, hu:

36 –Notot, pi'yã' mÿn 'üxat'ax xohix hã' mãxap? Kaxÿy.

37 Ha:

–"'Õgnũ Topa mÿn putup pax, 'ãkuxa xexka hãp-tup pax, xix' 'ãp-tox xexka hãp-tup pax."

38 Yã' xat'ax xohix hã' mãxap.

³⁹ Ha' xat'ax künāy tu te' nōy putuk, tu: “Ānōy putup pax, xate yāy putup pax putuk.” Kaxīy.

⁴⁰ Yā' xat'ax 2 te Mōyyex yōg xat'ax xohix yūmmūgāhā', ha tik hittap xop te Topa pupi hām'āktux, tu' yūmmūgāhā' kamah. Kaxīy.

Yeyox te Topa yōg hāmyāyikutnā'ax 'āktux

⁴¹ Ha Paniye xop te yāykotinnāhā', 'Ihā Yeyox te' yīkopit, hu:

⁴² –'Āxop tep-tep mūn pe'āpaxex Topa yōg hāmyāyikutnā'ax tu'? Tik 'ūm mūn hā 'ūmōkputox 'ōhōm? Kaxīy.

Ha:

–Yā mōnāyxop hittap Namix hā' mōkputox. Kaxīy.

⁴³ Ha xe' yīkopit, hu:

–Tep tu Topa Koxuk te mōnāyxop hittap Namix pu hāmyūmmūgāhā', puyīy Topa yōg hāmyāyikutnā'ax 'āktux, hu: “'Ūkxuyā'.” Kaxīy.

⁴⁴ Yā Namix te: “Topa tek xuxyā pu hām'āktux, hu: 'Yūhūm 'ūgyīm xe'e hā, 'Ihā 'āte' gāyxop nōā'.” Kaxīy.

⁴⁵ Yīy mōnāyxop Namix te hāmyāyikutnā'ax pu: “'Ūkxuyā'.” Kaxīy. 'Ok yāyikutnā'ax yā mōnāyxop Namix hā' mōkputox xe'e'? Kaxīy.

⁴⁶ 'Ap yānān tu hām'āktux yūmmūg'ah, hu' yēy, tu xep yīkopit 'ohnāg.

23

Yeyox xix Yoneo xexka xop

¹ Ha Yeyox te hām'āktux yāy mūtik hāpkumep xop pu', xix tikmū'ūn xohix pu', tu:

² –Tik xop te hāmyūmmūg, xix Paniye xop te Mōyyex yōg xat'ax yūmmūgāhā', ha Topa te yāy 'āxet'ax hōm puyīy hāmyūmmūgā',

³ yīy 'āyīpkox pi', nūy tu 'ūm hāpxopmā max, pāyā' xexka xop yōg hāpxopmā'ax hitop tat hok, 'ūyāy yōg hām'āktux pu' yīpkox 'ohnāg hah.

⁴ Yā' xat, pu tikmū'ūn hāpxop putux tat, ha hā tu te 'ohnāg.

⁵ Tu hāpxopmāhā', pu tikmū'ūn pēnā', tu Topa yōg tappet tox kax'āmi', nūy kux tu' tat, xi' yīm kō'ō tu tu mō' tat. 'Ok 'āxop te' pēnā' hok? Ha kayak xexka mō'tat,

⁶ tu 'āmuk xexka ha' mōg pax, tu yāy mām'ax max xak, nūy ta tu' mām, tu Topa pet kopa' xexka xop yōg mām'ax yīmū' mām.

⁷ Tup-tup tikmū'ūn te: “Notot!”, kaxīy, kōmēn kopah, nūy tu' xexkānā'.

⁸ 'Ūtux hok pu tikmū'ūn 'āxānā hok, hu: “Notot,” kaxīy. Yā 'āxop te' ānōy hā yā 'āxape', hok mūn puxet te 'āxop yūmmūgāhā'.

⁹ 'Ōg 'Ātak xe'e te pexkox tu' xip, yīy hām tu' xip tik xānā hok, hu: “'Ātak,” kaxīy.

¹⁰ Tu 'ānōy xānā hok, hu: “Yā yūmmūg xuxyā',” kaxīy. Yā Kunnix mūn puxet 'āxop hā' xuxyā'.

¹¹ Tikmū'ūn te hāpxopmāhā', nūy tu' nōy hā tu tehet, puxix yā 'ākopa 'ūxexkah.

¹² Tikmū'ūn te yāy xexka pe'paxex, pūyā yāy yāyhāhup kutōgnāg, ha Topa te' xexkānāp-tup.

Yeyox te' xat hok pu mō'āmā hok

¹³ –Yā 'ākuxānōg hāmyūmmūg xop xix Paniye xop! 'Āpa hitop tu max, pāyā 'ākux mūn kummuk. Tikmū'ūn kuxa te Topa xak, puyīy yōg putat hā mōg, pa 'āxop te' xat hok, pu mōg hok, 'Ihā kama 'āmōg 'ohnāg.

¹⁴ –Yā 'ākuxānōg hāmyūmmūg xop xix Paniye xop! 'Āpa hitop tu max, pāyā 'āktux mūn kummuk.

¹⁵ Yā 'āxop te hāpkumep hāpxexka xohix tu', tu kōnāg xexka xohix mep, puyīy tikmū'ūn puxet 'ōg hāpxopmā'ax tat, tu' tat, puxix yā tu' kummuk xexkah, ha ta 'āxop kummuk miāx, nūy yā 'āxohix 'āpet Hāmgyāgnāg mūtik.

¹⁶ –Yā 'ākuxānōg 'āpa hok xop, tu tikmū'ūn pa hok xop mōgāhā', yā tikmū'ūn yūmmūgā kummuk, tu: “Tikmū'ūn te Topa pet xexka 'āktux, nūy nōy pu hām'āktux xeh, puxix yā' hitop hā' xex, 'ap ta nemēn'ah. Yā' max tu' mīy hok. Pāyā tikmū'ūn te Topa pet xexka yōg pipkup yānām 'āta 'āktux, nūy hām'āktux xeh, puxix hām'āktux xex ka'ok, tu ta nemēn. Pūyā tu' mīy,” kaxīy.

¹⁷ 'Āxop putox kummuk xix 'āpa hok! Pi'yā' mūn yā' xexkah, 'ok pe pipkup yānām 'āta, 'ok pe Topa pet xexkah? Yā' pet yā' xexkah!

¹⁸ 'Āxop te hāmyūmmūgāhā kamah, hu: “Tikmū'ūn te mīmpe pipkup mō'hap'ax 'āktux, nūy hām'āktux xeh, puxix tu' hitop hā yā' xex, 'ap ta nemēn'ah. Pa tikmū'ūn te xokxop mō'hap'ax 'āktux, nūy hām'āktux xeh, puxix tu ta nemēn, nūy tu' mīy,” kaxīy.

¹⁹ 'Āpa hok xop! Pi'yā' mūn te māxap, 'ok pe xokxop mō'hāp'ax, 'ok pe mīmpe mō'hāp'ax, nūy Topa pu' haxyā'? Yā mīmpe te māxap!

²⁰ Yīy 'āte xa hāpxe'e 'āktux: Tikmū'ūn te mīmpe 'āktux, nūy hām'āktux xeh, puxix xokxop mō'hap'ax xohix 'āktux, tikmū'ūn te mīmpe yīmū mō'hāp tu'.

²¹ Tikmū'ūn te Topa pet xexka 'āktux, nūy hām'āktux xeh, puxix kama Topa 'āktux, yā' xip yāy pet tu'.

²² Tikmū'ūn te pexkox 'āktux, nūy hām'āktux xeh, puxix Topa xip'ax xe'ēgnāg 'āktux kamah, xix Topa mūn 'āktux, yā' xip pexkox tu'.

²³ –Yā 'ākuxānōg hāmyūmmūg xop xix Paniye xop! 'Āxop te Topa pu mīxux kutōgnāg popmāhā', 'ūyāg te 9 'ōgnū', tu' yāg puxet hōm Topa pu', tu mīxux 'otāg yōg yāg hōm, xix mīxux 'emanox yōg yāg hōm, xix mīxux kōmīn yōg yāg hōm Topa pu', tu yā tu' hōm māynāg, pāyā hāpxopmā max'ax xaxok, xix hāmyok mīy'ax xaxok, xix hāmmaxnā'ax

xaxok, xix 'âyîpkox pip'ax Topa pu xate' xaxok. 'Ápu hâpxopmâ max, xix hâpxop hõm Topa pu kamah, xayîy hâpxopmâ max xohix xaxok hok!

²⁴ 'Ápa hok xop te tikmũ'ün mögâ kummuk! Tikmũ'ün te kumâyöynâg xut nũy putyõn, päyâ' xok xexka kâmên tõmâhâ', ha kaxîy 'âxop te hâpxopmâ'ax kutîgnâg mîy mãynâg, päyâ hâpxopmâ'ax max 'âxop te' xaxok!

²⁵ —Yâ 'âkuxânõg hâmyümmüg xop xix Paniye xop! 'Ápa mün max, päyâ 'âkuxa mün kummuk! Yâ 'âxop te kânëy pet xax pix, xix kânëy xâm pix, päyâ kânëy kox kopa yâ' igâ', ha kaxîy 'âkuxa kummuk. Yâ 'âxop te 'ânõy hâ yîpkumîy, xî' yõg hâpxop hâ' xupxet, xix 'ânõy yõg hâpxop hâ xupkumîy kamah.

²⁶ Paniye pa hok 'âxop! Kânëy kox pix hãmâxap, puxix tu xâm max kamah.

²⁷ —Yâ 'âkuxânõg hâmyümmüg xop xix Paniye xop! 'Ápa mün max, päyâ 'âkuxa mün kummuk! Yâ' xukpot putuk, hâptopa mün max, päyâ' kopa' xuk xokxax, xî' kup, yâk-tox xe'egnâg.

²⁸ Ha kaxîy 'âxax max, päyâ 'âkuxa kopa 'âkummuk, yâ 'âxop te koit, tu hâpxopmâ kummuk xohix.

Topa te' kuxa kummuk xop nõâp-tup

²⁹ —Yâ 'âkuxânõg hâmyümmüg xop xix Paniy xop! 'Ápa mün max, päyâ 'âkuxa mün kummuk! 'Âxop te xukpot mãynâg 'âhâ mîy, nũy Topa pupi hãm'âktux xop no hâpkot, ha tik xop hittap te Topa pupi hãm'âktux, tu' max, ha 'âxop te xukpot maxnâhâ',

³⁰ tu: "Pax 'ügmüg pip hõmâ', 'Thâ tik xop te Topa pupi hãm'âktux, kopxix tu mõnâyxop yõg hâpxopmâ kummuk tat hok, nũy tu tik max xop kix. 'Âmhok!" kaxîy.

³¹ Hamün. 'Âxop yâ mõnâyxop kummuk hâ 'âmõkputox, ha Topa pupi hãm'âktux xop kix,

³² ha 'âxop te mõnâyxop yõg hâpxopmâ'ax kummuk tat, nũy tu' mîy kamah.

³³ 'Âxop te kâyâ gâynâm xop putuk, xix kâyâ gây hâ 'âk-tok! Ha Topa te 'âkummugâp-tup 'üyânân tu', xa' xupmâ hok Hâmgâyâgnâg Pet tu'.

³⁴ 'Áte xa hâpxe'e 'âktux: 'Áte xa ha mõ'pok putup, tik te Topa pupi hãm'âktux xop, xix tik te hâmyümmüg xop, xix tik te hâmyümmüg'ax xop, ha 'âxop te' yâg kix putup, xî' yâg xupmâp-tup mîpkupnix tu', xî' yâg kix kakixnâg putup Topa pet kopah, tu kômên xohix tu 'ûpapuk putup.

³⁵ Yîy Topa te 'âxüygâp-tup, xix 'õg mõnâyxop yõg hâpxopmâ'ax kummuk hâ 'âxüygâp-tup. Ha mõnâyxop hittap max 'Ameo putex, hõmâ, hâmyâxatamuk hittap 'Thâp-tex, xix mõnâyxop Manakit kutok Yakanit putex, 'Thâ Topa pet xix mîmpe

mõ'hâp'ax tu yây kote' xip, tu hâpkummuk mîy 'õhnâg, yîy Topa te 'âxüygâp-tup.

³⁶ 'Áte xa hâpxe'e 'âktux: Yâ Topa te yâ hõnhâ' pip xop xüygâp-tup 'üyânân tu', nũy mõnâyxop yõg hâpxopmâ'ax kummuk hâ pago. Kaxîy.

Yeyox te mõ tikmũ'ün yây xe'egnâg

³⁷ Yeyox te hãm'âktux kux, tu kômên Yenoyanên yõg tikmũ'ün pu hãm'âktux, hu:

—'Ûg 'âpax! Topa te xa mõ tik xop pok, pu xa Topa pupi hãm'âktux, ha 'âxop te' kix, tu mîkaxxap hâ' tux, päyâ 'âte mõ 'âyây xe'egnâg. Xokakkak tek-tok xânâhâ', nũy mõ'tat yây kaka', ha kaxîy 'âte tikmũ'ün xânâhâ', päyâk ha 'ânün putup 'õhnâg!

³⁸ Yîy 'âpet hõgnâg putup.

³⁹ 'Áte xa hâpxe'e 'âktux: 'Âxop tek pênâp-tup 'üxeheh, 'Thâk mün 'âktux, hu: "Püyâ Topa tu hãmmaxnâ'! Yâ tu yây 'âxet'ax hõm pu nü'!" Kaxîy

24

Yeyox te Topa pet xexka nõg'ax 'âktux

¹ Hâpxip 'Thâ Yeyox te Topa pet xexka kopa' xupep, tu' nîm, tu ta' mõg, 'Thâ yây yõg tikmũ'ün mõxaha', tu' yîka' pip, tu tu' mûg Topa pet xexkah,

² yîy Yeyox te:

—'Ok 'âxop te' pênâhâ'? 'Áte xa hâpxe'e 'âktux: Yâ' koxyoý putup Topa pet, tu mõktu yõg mîkaxxap xohix hãm tu nü'nâp-tup. Kaxîy.

Yeyox te hâpkummugâ'ax 'âktux

³ Hâpxip 'Thâ Yeyox te yîktix 'Onimet yîmũ' yüm, ha yây yõg tikmũ'ün nün, nũy yâ tup-xet hâ hãm'âktux hâ' nõy yânân, ha:

—Hãm 'üm hâ Topa pet koxyoý putup? Hâpxopmâ'ax 'üm te xîy pênâ'ax, 'Thâ' putpu 'ânün, nũy hâpxopmâ xe'egnâg xohix tu kuxyâ'? Kaxîy.

⁴ Ha Yeyox te:

—'Õg pa mõxip, pu tikmũ'ün yâ 'âmõ'âmâ hok!

⁵ Yâ tik punethok nün putup, tuk 'üm 'âxet'ax 'âktux putup, nũy yâ tu' koit, hu: "'Ûgmün yâ Kunnix. Yâ Topa tek mün yâykutnâhâ', 'ünũ'." Kaxîy. Tu tikmũ'ün xohix mögâp-tup kummuk.

⁶ Xate yâykix'ax 'âpak putup, ha tikmũ'ün te xa yâykix'ax 'âktux putup. Yâ 'âkuxânõg hok. 'Üyâykix xexkap-tup, päyâ 'a hâmyâxatamuk xohix xox putox'ah.

⁷ Ha hâpxexka 'üm yõg xonat xop te hâpxexka nõy yõg xonat mütik yâykix putup, ha' hep xop te' hep xop nõy mütik yâykix putup, ha hãm yâynuhuk putup, xix hãmhõgnâg, ha putup te tikmũ'ün kix putup.

⁸ Yâ nõm xüy hãmâxap, tu 'ün tek-tok put xüy putuk.

⁹—Hak-nây tu' gây xop te 'âxop mûg putup, nûy 'âkix kakixnâg, tu' xat putup, pu 'âkix. Yâ' xohix te 'âp-tup nôg 'ûgmûn hâ.

¹⁰ Yîy tikmû'ûn punethok tek nîm putup, tu Topa yôg putat xak putup, tu yây xape kummugâp-tup, 'ûp-tup 'ohnâg tu'.

¹¹ 'Îhâ yâ tik xop nûn, nôm te yâ mō'âmâ', nûy Topa pupi hâ'm'âktux, pâyâ' mō'âmâ', yâ yây pupi hâ'm'âktux, tu tikmû'ûn punethok mōgâp-tup kummuk, tu yâ' koit tu'.

¹² Ha tikmû'ûn te hâpxopmâ kummuk putup, tu mōktu hâpxopmâ kummuk xexkah, yî' kuxa mâm ka'ok xop kuxa teknôg, nôm xop kuxa mâm ka'ok Yeyox kopah, tu yâ' nōy putup pax xaxok putup.

¹³ Pa tikmû'ûn te Topa yôg putat hâ' mō kuma' mōg, puxix Topa' mōy hâpkummuk mîy'ax xop kopah, tu' hîmnâp-tup xe'êgnâg.

¹⁴ Yîy hâ'm'âpak max'ax 'âktux putup hâm xexka xohix tu', puyî' hep xop xohix hâ'm'âpak, nûy tu hâmyûmmûg. Yâ Topa te yây yôg tikmû'ûn xat, ha' yîpkox pip. Ha hâmyâxatamuk xohix xox putox mō'nâ'ax. Kaxîy.

Tute hâpxûy xexka 'âktux

¹⁵ Tu xe hâ'm'âktux, hu:

—Topa pet kopa' xip hâ'm'âta yîkox 'âxet'ax Topa xip'ax. Hōmâ mōnâyxop hittap Nan'îeo te Topa pupi hâ'm'âktux, tu Topa yây xip'ax 'âktux, tu yâ hâpxop yây 'îgâ xexka 'âktux, ha Topa yây xip'ax kopa' xip putup. (Pûyâ tikmû'ûn mō'kupix, nûy hâmyûmmûg.)

¹⁶ Tikmû'ûn te hâpxexka Yonex tu' pip, puxix yîktix tu nûmân.

¹⁷ Tikmû'ûn te mîptut pepi tu' pip, puxix tu nûmân, yâ' hok tu 'ânûmân, pâyâ hâpxop 'ûm pa hok, nûy mōg mō'ka'ok.

¹⁸ Tikmû'ûn te hâpxa xexka tu' pip, puxix yây pet ha tu mōg hok, nûy yây xax pa'. 'Âmhok.

¹⁹ Ha 'ûn mûnôp xop xûy xexkap-tup, 'ok pek-tok xuk, 'ok pek-tok yây yôgtat hep xo'opmâhâ'.

²⁰ Topa tu' xax, xayîy hâm 'âxi hok 'Îhâ 'ânûmân, nûy nit xap 'Îhâ 'ânûpa hok.

²¹ Yâ' xûy xexka nâm putup nit xap 'Îhâ', xix hâm 'âxi 'Îhâ'. Hōmâ Topa te hâm xexka mîy, xix hōnhâ, 'ûxûy kutôgnâg, pâyâ nôm xûy xexkanâm.

²² Yîy Topa te' xûy'ax yôg 'âmnîy xohix kuxyâhâ', pu tikmû'ûn nōâ'tot. Pa Topa te yây yôg tikmû'ûn yîmôgatux, pu tu kuxa hi xe'êgnâg, yîy 'âmnîy xohix hâ' kuxyâhâ'.

²³ —Tikmû'ûn 'ûm te xa: “'Ûpênâ! Topa yôg hâmyâykutnâ'ax xip!” kaxîy, xix: “Nây, yâ 'ônte' xip!” kaxîy, 'âpu 'âyîpkox hok.

²⁴ Yâ tik te mō'âmâ'ax xop punethok nûn putup, tu Topa pupi hâ'm'âktux 'ohnâg, xix yâ hâmyâykutnâ'ax 'ohnâg. Pâyâ hâpxopmâ ka'ok xe'êgnâg putup, tikmû'ûn puxet te nôm mîy hok, tu' mîy pu tikmû'ûn pênâ',

puyîy nô tikmû'ûn mōgâ kummuk. Yâ' xak, nûy Topa yôg tikmû'ûn mōgâ kummuk kamah, mō'âmâ'ax hâ', puyîy Topa yôg putat xax.

²⁵ 'Ûg'âpax, nûy hâmyûmmûg, nûy hâpxopmâ'ax yûmmûg tap.

²⁶ —Tikmû'ûn te: “'Ûpênâ! Hâm panip tu' xip!” kaxîy, 'Îhâ 'âmôg hok. Yâ' koit. Xix: “'Ûpênâ! Tute yây xaptop 'ônte!” kaxîy, 'Îhâ 'âyîpkox hok. 'Âmôg hok. Yâ' koit.

²⁷ Tex yânâm te pexkox xexka tupmâ mō'ka'ok, ha kaxîy 'ûgnûn putup, 'ûgmûn yâ Tikmû'ûn Kutok, tu putpuk nûn putup.

²⁸ —Kuptap xop te yây tu nû'nâhâ', nûy xok yîn xakot. Kaxîy.

Tikmû'ûn Kutok nûn putup

²⁹ Tu xe hâ'm'âktux, hu:

—'Ûxûy'ax yôg 'âmnîy xohix nôg putup, 'Îhâ mâyôn xok putup, xix mâyônhex. Mâyônâg xop te hâm tu nû'nâp-tup, ha hâmnôgnôy yôg xexka xop yâynuhuknâm putup,

³⁰ 'Îhâ tikmû'ûn te hâpxopmâ'ax xe'êgnâg pênâp-tup pexkox tu', hak nûn'ax 'âktux. Yâk mûn Tikmû'ûn Kutok, tu putpuk nûn. Ha Topa hâ' gây xop tek pênâp-tup, hu 'âtu potap-tup, ha hâmgôy xexka kopak yîxop-tup, 'ûkxexka xe'êgnâg tu',

³¹ ha mîxuxxop tut kâyâp-tup, ha yâk mûn Tikmû'ûn Kutok, tu pexkox yôg xop nû'pok putup, nûy Topa yôg tikmû'ûn yîmôgatux'ax nûnnâ', ha hâm xexka tu' xexka xop xohix mōxap-tup, nûy yây tu nûnnây. Kaxîy.

Yeyox te piget kup 'âktux

³² Yeyox te xe hâ'm'âktux, nûy hâmyûmmûgâ', hu:

—Mînta kup piget te xa hâmyûmmûgâhâ', 'Ûmîxux xokax, yâ mîxux puk 'Îhâ 'âxop te hâmyûmmûg. Yâ hâmpukpex mō'nâp-tup.

³³ Ha kaxîy 'âxop te hâpxopmâ'ax xexka pênâhâ', 'Îhâ hâmyûmmûg kamah. Yâ' xûy'ax yôg 'âmnîy mō'nâp-tup.

³⁴ 'Âte xa hâpxe'e 'âktux, 'ûxaxok hok: Tikmû'ûn 'ûm pip nômhâ, 'ap xakix putup'ah, 'Îhâ nôm 'âmnîy mō'nâhâ'.

³⁵ Pexkox te yâyaxogâ'ax, pâyâ yôgnû hâ'm'âktux xip ka'ok, tu' nôg 'ohnâg. Kaxîy.

Hâm 'ûm hâ Tikmû'ûn Kutok nûn putup

³⁶ Tu xe hâ'm'âktux, hu:

—'Âmnîy 'ûm 'Îhâk nûn putup, yâ 'Âtak Topa puxet te' yûmmûg. Pexkox yôg nû'pok xop te' yûmmûg 'ohnâg, xik mûn yâ Topak-tok, pâyâ 'âtep yûmmûg'ah kamah.

³⁷ 'Ûgmûn yâ Tikmû'ûn Kutok, tu putpuk nûn putup, 'Îhâ tikmû'ûn te hâpxopmâ kummuk pax. Hōmâ hâmyâxatamuk xohix 'Îhâ mōnâyxop hittap Nōe xip,

³⁸ 'Îhâ tikmû'ûn hittap xit pax, xix yâ' xo'op pax, xix yâyta pax, tu mōktu Nōe te

mĩptut xexka hã mō'nãhã, nõm te kõnãg yĩmũ' mōg,

³⁹ ha tikmũ'ũn te hãmyũmmũg 'ohnãg, tu' yĩpkox 'ohnãg, ha tex xexka nãhã', ha kõnãgkox xet xexkah, tu hãmnak hã' xupep, tu tikmũ'ũn xohix kopugnãm, ha' xakix. Hã kaxĩy putpuk nũn putup, yãkmũn Tikmũ'ũn Kutok, tuk nũn 'ĩhã

⁴⁰ tik 2 te hãpxa xexka tu' hãm, hap-xet mōgãp-tup, ha ta yã' nõy te nox xip.

⁴¹ 'Ūn 2 te xuxnãg xetox xap kõnõnnãhã', hap-xet mōgãp-tup, ha ta' nõy te' nox xip.

⁴² 'Ōg pa mōxip! Yãy 'ũm pupi hãmpẽnã max. 'A 'ãxop te 'ãmnĩy 'ũm yũmmũg'ah 'ĩhã 'ãxuxyã nũn.

⁴³ 'Ūxaxok hok. Pax pu tikmũ'ũn te hãpxop hã' xupxet'ax nũn yũmmũg, puxix tu pẽnãnã' pi' kamah, puyĩy tu' xupxet hok.

⁴⁴ Yĩy 'ãxop pẽnãnã' pi' kamah. 'A' yũmmũg'ah 'ãmnĩy 'ũm 'ĩhãk nũn. Yãk mũn Tikmũ'ũn Kutok, tuk nũn putup, 'ĩhã yã 'ãxop tek hip 'ohnãg. Kaxĩy.

Kãmãnat max xix kãmãnat kummuk 'ãktux

⁴⁵ Tu xe hãm'ãktux, nũy Topa yōg hãpxopmã'ax yũmmũgã', hu:

—Tep te kãmãnat max? Kãmãnat max yã tik te hãmyũmmũg, tu yã hãmyōk mĩy pax. Ha' xat, pu kãmãnat xop tu pẽnãnã' pi', nũy tu xĩnnã max.

⁴⁶ Ha' xuxyã nũn, 'ĩhã hãm max, yĩ' kuxa hittup.

⁴⁷ 'Áte xa hãpxe'e 'ãktux: 'Ūxuxyã te kãmãnat max xekkãnãp-tup, pu tu hãpxa xexka yōg hãpxop xohix pẽnã'.

⁴⁸ Pa kãmãnat kummuk te hãmp'e'paxex, hu: "Ak xuxyã nũn putup'ah," kaxĩy,

⁴⁹ tu yã hãpkute'ex kummuk, tu kãmãnat nõy kix, tu yã' xit xexkah, tu yã' xo'op xexkah, tu mōktu yã' paptux, tikmũ'ũn pap-tux xop mũtik.

⁵⁰ Ha' xuxyã nũn, ha ta kãmãnat te' hip 'ohnãg, tu yã' nũn yũmmũg 'ohnãg,

⁵¹ puxi' xuxyã gãy nãm, tu kãmãnat xũygã'ax 'ũyãnãn tu', tu' mōgã'ax, nũy tu kummugã tikmũ'ũn kummuk mũtik, nõm pa max, pãyã' kuxa kummuk. Ha' potap-tup, 'ũxũy xexka tu'. Tu ta tu' kux. Kaxĩy.

25

'Ūn te yãyta hok te' 10

¹ Yeyox te hãm'ãktux'ax hã hãmyũmmũgãhã', nũy Topa yōg hãpxopmã'ax yũmmũgã', tu 'ũn tuk tup xop te yãyta hok 'ãktux, nũy tikmũ'ũn pu hãmyũmmũgã', puyĩy tu' xuxyã nũn'ax hip, ha:

—Topa te yãy yōg tikmũ'ũn xat putup hã kaxĩy. 'Ūn te yãyta hok te 10 te 'ãmuk xexka ha' mōg, 'ãmnĩy 'ĩhã' mōg, tu kuyãnãm tat'ax pop, nũy tik te yãyta'ax hip putat kopah, puyĩy tik yãyta'ax mōgã'ãmuk xexka hah,

² ha ta 'ũn te 5 pa te hãmyũmmũg 'ohnãg, ha ta 'ũn te 5 pa te hãmyũmmũg,

³ ha 'ũn xop pa te hãmyũmmũg 'ohnãg te kuyãnãm tat'ax pop, pãyã' hep tox xaxok,

⁴ pa' nõy xop te kãnẽy tat kamah, ha yã' hep tox kopã' xup, nũy tat'ax hã' pux.

⁵ —'A tik te yãyta'ax 'ũm nũn'ah, yĩy kũmĩm tetet' kix, ha mō'yõn putat pukah.

⁶ —'ãmnĩy kote 'ĩhã tikmũ'ũn yĩy ka'ok, hu: "Tik te yãyta'ax nũn! Mã', yũmũ nũ mũtik mōg!" Kaxĩy.

⁷ —Ha 'ũn xop yãykokak mō'ka'ok, tu kuyãnãm mō'xup.

⁸ Ha 'ũn pa te hãmyũmmũg 'ohnãg te' nõy xop pu hãm'ãktux, hu: "Á' hõm 'õg hep tox, 'ũ mōy yãy yōg ta'ax hã' pux. Yãk mũ yōg kuyãnãm xakix." Kaxĩy.

⁹ —Ha:

—“Ak mũ'ãte xa popmãp-tup'ah. Yãk-tõgnãg 'ũm hep tox. 'ãxop putup, mōy mōg kõmẽn hah, nũy 'ũm pa'.” Kaxĩy.

¹⁰ —Ha' mōg, tu' paha', 'ĩhã tik te yãyta'ax xupep. Ha 'ũn pa te hãmyũmmũg te nũ mũtik mōg 'ãmuk xexka hah, tu mōktu' mōxaha', tu' mōxakux, ha ta mō'yãy yĩnnũn.

¹¹ —Hãpxip kutõgnãg 'ĩhã 'ũn xop nõy mōxaha 'ũyãnãn tu', tu hãptopa' pip, tu' xãnãhã', hu: “Yãyã', Yãyã', hãpxõn! Yãk mũg nũn!” Kaxĩy.

¹² —Ha tik te yãyta'ax te: “'A 'ãte 'ãxop 'ũm yũmmũg'ah. Mōy, nũy 'ãpep! Kaxĩy. 'Ūkux.

¹³ Yeyox te hãm'ãktux kux, tu:

—Yĩy 'ãpa mōxip! Yã hãm 'ũm hãk nũn 'ãxop te' yũmmũg 'ohnãg. Kaxĩy.

Kãmãnat tikoxyuk 'ãktux

¹⁴ Tu xe hãm'ãktux'ax hã hãmyũmmũgãhã', nũy Topa yōg hãpxopmã'ax yũmmũgã', nũy yũmũg hãm max 'ãktux, nũy Topa pu yũmũg hãm max 'ãktux, hu:

—Topa te yãy yōg tikmũ'ũn xat kaxĩy: Tik te hãpkumep putup, ha kãmãnat xop xãnãhã', pu hãpxa xexka pẽnãnã 'ãti',

¹⁵ tu tu tayũmak popmãhã', tu tik te hãmyũmmũg xexka pu' hõm tayũmak te 5.000, tu' nõy te hãmyũmmũg miãx pu tayũmak te 2.000 hõm, tu tik te hãmyũmmũg kutõgnãg pu tayũmak te 1.000 puxet hõm, tu ta' mōg.

¹⁶ Ha kãmãnat te 5.000 paha', tu' mōg, tu hãpxop hãmenax, tu mōktu tayũmak nõy te 5.000 paha'.

¹⁷ Ha kãmãnat nõy te 2.000 paha', tu' mōg, tu hãpxop hãmenax, tu mōktu tayũmak nõy te 2.000 paha'.

¹⁸ Pa tik te 1.000 paha', tu' mōg, tu hãpkot, tu' xuxyã yōg tayũmak xaptop hãm kopah.

¹⁹ —Hãpxip punethok tap 'ĩhã' xuxyã nũn, nũy ta yãy yōg tayũmak pop,

²⁰ ha kãmãnat te 5.000 paha', tu' nũn hãmãxap, tu tayũmak te 10.000 hõm 'ũxuxyã pu', tu: “Ūpẽnã'! Xate 'ã' hõm tayũmak te

5.000. 'Áte hāpxop nōy yānān hā tayūmak te 5.000 nōy paha.'" Kaxīy.

21 —Ha: "Yā' max! 'Āhām max. Xate hāmyok mīy tayūmak kutōgnāg hā, yīy 'āte 'āxekkānāhā', xayīy hāpxop punethok pēnā max. 'Āpu yūmū'āte 'āmuk xexka mīy!'" Kaxīy.

22 —Ha kāmānat te 2.000 paha', tuk-nāy tu' nūn, tu: "Xate 'ā' hōm tayūmak te 2.000. Yā 'āte hāpxop nōy yānān hā tayūmak te 2.000 nōy paha'. 'Ūpēnā!'" Kaxīy.

23 —Ha' xuxyā te: "Yā' max! 'Āhām max! Tayūmak kutōgnāg hā xate hāmyok mīy, yīy 'āxekkānāhā', xayīy hāpxop 'ūm xexka pēnā max. 'Āpu yūmū'āte 'āmuk xexka mīy!'" Kaxīy.

24 —Ha kāmānat te 1.000 puxet paha', tu' nūn, tu: "Áte 'āyūmmūg. Xate 'ūm kuxa ka 'ohñāg. 'Ūnōy te hāpxop xap xok, ha xate' nūnnāhā',

25 yīy 'ūgkuxānōg, tu 'ōg tayūmak xaptop hāpkox hā mō'tat. 'Ūpēnā 'ōgnū tayūmak, nūy pa.'" Kaxīy.

26 —Ha' xuxyā te: "Āhām kummuk, 'āteknōg tu'. Xatek yūmmūg, ha 'āte hāpxop xap xok 'okpa hāpxop ta nūnnāhā'.

27 Teptu xate tayūmak xex hok tayūmak xut'ax pet kopah? 'Ūyīy putpu nū', tu yōgnū tayūmak paha', 'ūnōg nōy nā' mōg, tu mōktu yā' kux.'" Kaxīy. Tu yōkāmā' tu kāmānat nōy pu' xat, hu:

28 —"Kāmānat kummuk yōg tayūmak xut, nūy kāmānat nōy pu' hōm, nōm te tayūmak te 10.000 pop.

29 Yā tikmū'ūn te punethok pop, puxix tu xe' pop, tu mōktu yā' xohix pop, pa tikmū'ūn te' pa hok, puxi' yōg hāpxop kutōgnāg xut kamah, pu tu' hok xip.

30 Yā kāmānat kummuk, tu' hitop hā' hām. 'Āpu, nōm mō'yōn hāptopa', puyīy hāpkoxtap kopa tu xip ka'ok. 'Ōnte potap-tup, 'ūxūy xexka tu'. Kaxīy. 'Ūkux.

31 Yeyox te hām'āktux, nūy hāmyūmmūgā kux, tu:

—Yāk mūn Tikmū'ūn Kutok, tu yā putpuk nūn putup, tu' xat xe'ēgnāg putup, Thāk nūn, ha pexkox yōg nū'pok xop te nū mūtik nūn putup, hāk yūm putup, nūy tu hep xop xohix xat.

32 Ha' hep xop xohix te yāy tu nū'nāp-tup 'ūgkeppah, ha 'āte tikmū'ūn yāg mō'pot putup. Yā kaxīy tik pēnā'ax te kahnēn mō'pot xix mot,

33 tu kahnēn mō'pot, pu tu yīm xe'e hā mō'xip, xix mot mō'pot, pu tu yīm xax hā mō'xip, ha 'āte' yīpkox pip xop mō'xip putup 'ūgyīm xe'e hā, tu' yīpkox hok xop mō'xip putup 'ūgyīm xax hā,

34 ha 'āte hām'āktux putup, tikmū'ūn tek yīm xe'e hā' pip pu hām'āktux putup, hu:

"Mā'! 'Ōgnū 'Ātak te 'āxop ha hāmmaxnāhā'. Mā', nūy pexkox yōg hāpxop xohix pop. Yā Topa te xa' xex tap 'Thā hām xexka xip 'ohñāg.

35 Yā 'āxop tek xīnnāhā 'Thā putup tek putex, tu 'ā' xo'opmāhā'. 'Thā 'āte kōnāg tat xak, tuk xānāhā', 'ūxihip 'āpet kopa, 'Thā 'āte xa hak puknōg.

36 'Ak xax 'ūm xip'ah, ha 'ā 'āxax 'ūm hōm, 'ūyīy mōktat, tuk pakut, hak pēnā max. Kanet kopak xip, ha 'āxop 'ūg ha mōg, nūy mōy mōgnīynām.'" Kaxīy.

37 —Ha tikmū'ūn max te: —Yāyā', hām 'ūm hāk mū'āte 'āpēnāhā', 'Thā putup te 'āp-tex, ha 'āxīnnāhā'?

38 Hām 'ūm hā 'āmūn 'ūgmū'ā hā puknōg, ha 'āxānāhā', xa 'ūgmūg pet kopa xihip? Hām 'ūm hāk mū'āte xa topixxax 'ūm nīm, xa mō'tat?

39 Hām 'ūm hā 'āpakut, hak mū'āte 'āpēnā max? Hām 'ūm hā kanet kopa 'āxip, hak mūg mōg, nūy mō'ānīynām?'" Kaxīy.

40 —Ha 'āte hām'āktux'ax hā' nōy yānān putup, tu: "Áte xa hāpxe'e 'āktux: 'Āxop tek xape 'ūm kutōgnāg hā 'ā tehet, huk mūn yā 'ātehet kamah. Kaxīy.

41 —Tu tikmū'ūn kummuk pu hām'āktux putup, nōm tek yīm xax hā' pip, hu: "Mōy, nūy 'āpep! Yā Topa te xa hāpkummūgāhā'. Mōg, pu kuxap xe'e mō'āhap mō kuma mōg. Topa te kuxap mīy tap nūy Hāmgyāgnāg xūygā', nūy 'ūyōg nū'pok xop kummuk xūygā'.

42 Ya putup tek putex, pak xīnnā 'ohñāg, ha 'āte kōnāg tat xak, pa 'ām xo'opmā 'ohñāg.

43 'Ūgmūn xa hāk puknōg, pa 'āxop te 'ūkxānā 'ohñāg, 'ūxihip 'āpet kopah. 'Ak xax 'ūm xip'ah, 'a 'āxax 'ūm nīm'ah, 'ū mōktat. 'Ūkpakut, xix kanet kopak xip, pāyā 'āxop tek pēnā 'ohñāg.'" Kaxīy.

44 —Yīy tikmū'ūn te: "Yāyā', hām 'ūm hāk mū'āte 'āpēnāhā', ha putup te 'āp-tex, ha xate kōnāg tat xak, xikmū'ā hā 'āpuknōg, xix 'āxax hok, xix 'āpakut, xix kanet kopa 'āxip, hak mū'āte xa hā te 'ohñāg?'" Kaxīy.

45 —Ha 'āte: "Áte xa hāpxe'e 'āktux: 'Āxop tek xape kutōgnāg hā 'ā te 'ohñāg, hu tu 'ā te 'ohñāg kamah.'" Kaxīy. Tu ta tu' kux.

46 Yeyox te hām'āktux kux, tu:

—Tikmū'ūn kummuk xūy putup mō'kuma' mōg, ha' kuxyā 'ohñāg, pāyā tikmū'ūn max hi xe'ēgnāg mō'kuma' mōg, ha' kux 'ohñāg kamah. Kaxīy.

26

'Ūxexka xop te hāpxopmā kummuk 'āktux

1 Yeyox te hāmyūmmūgā kux, tu ta yāy yōg tikmū'ūn pu hām'āktux, hu:

2 —Āxop te hāmyūmmūg, yā 'āmñīy 2 nōg, puxix tikmū'ūn 'āmuk xexka 'āxet'ax Nōa'yēn mīy, ha tikmū'ūn tek mōgāp-tup, nūy

mīpkupnix tu Tikmū'ün Kutok putex, yāx putex putup. Kaxīy.

³Tu hām'āktux, 'Ihā 'āmānex xexka xop yāy tu nū'nāhā', xi' xexka xop yāy tu nū'nāhā', tu ta 'āmānex xat'ax Kaxpax pet xexka kopa yāy tu nū'nāhā',

⁴nūy hāmpē tu paxex, nūy putep te xīy Yeyox putex'ax yūmmūg, nūy xaptop hā' mūy,

⁵tu:

—'Āmuk xexka mīy 'Ihā 'ap putex putup'ah. Nāy, pu 'āmuk xexka tu kux, kopxi' xat, nūy 'ūp-tex, nūy ta tu tikmū'ün gāyā hok. Kaxīy.

Yeyox te' pip'ax Metān tu' xip

⁶Hāpxip 'Ihā Yeyox te xip tu xexka Metān kopa' xip, tu Ximām pet kopa' xip, ha' xuxet'ax nōy te: 'Ūyāy xax kunut nām. Kaxīy.

⁷Ha 'ün te nōm mō'nāhā', tu Yeyox yīka' mōg. Ha naxnāg 'anamax tat, ha' hep haxyā max xup, takat xexkah. Ha Yeyox xit 'Ihā 'ün te' hep pux, yā Yeyox putox yīmū' pux.

⁸Ha' yōg tik xop te' pēnāhā', tu' gāy, tu' mānōg, hu:

—Tepu 'ün te' hep haxnāg xaxogāhā'? Yā takat xexkah!

⁹'Ūyōg naxnāg hāmenax, puxix tayūmak xexka pa', nūy tu tikmū'ün hok xop pu' nīm. Kaxīy.

¹⁰Pa Yeyox te hāmyūmmūg, tu:

—Tepu xate 'ün hā 'āgāy? Yā tute hāpxopmā māynāg!

¹¹Hāmyāxatamuk xohix hā' hok xop te 'āmūtik pip, pāyāk mūn'ah,

¹²yīy 'ün te' pux, nūy 'ūgyīn haxyā max, puyīy nō hāpkot.

¹³'Āte xa hāpxe'e 'āktux: Tikmū'ün te hām'āpak max'ax 'āktux putup, tu hām xexka xohix tu' xuktux putup, yā kama 'ün yōg hāpxopmā'ax 'āktux putup, nūy 'ün xaxogā hok. Kaxīy.

Yot te hāpkummugāhā'

¹⁴Hāpxip kutōgnāg 'Ihā Yeyox yōg tik 'āxet'ax Yot 'Ixkanot mōg, nūy 'āmānex xexka xop mūtik hām'āktux,

¹⁵tu:

—Tayūmak xohix te xīy 'ā' hōm putup, 'ūyīy 'āxop mōgā', xayīy Yeyox mūy? Kaxīy.

Ha' xexka xop te' yōg tayūmak mō'kupix, tu tayūmak te 30 xut, tu tu' hōm.

¹⁶Yīy Yot mōg, tu hāmpē'paxex, tu' xak, nūy gāy xop mōgā', pu ta Yeyox mō'tat kanet hah.

Yoneo xop te 'āmuk xexka 'āxet'ax Nōa'yēn mīy

¹⁷'Āmnīy nōg 'Ihā Yoneo yōg tikmū'ün te 'āmuk xexka 'āxet'ax Nōa'yēn mīy, tu pām tokatok hok māhā', ha 'āmnīy te māxap Yeyox yōg tik xop te Yeyox ha' mōg, tu' yīkopit, hu:

—Xatep-tep putup? Piyā' mīy'ax 'āmuk xexkah, nūy tu pām tokatok hok mā 'āmnīy hā? Kaxīy.

¹⁸Ha:

—Kōmēn ha mōg, tu tik 'üm xax, nūy tu' xax, hu: "'Ūgmūg xuxyā te' xat, 'ū xa hām'āktux, hu: Yā hōnhā yōgnū tik xop xix mūn te 'āmuk xexka mīy putup, tu 'āpet kopa 'āte' mīy putup." Kaxīy.

¹⁹Ha' yōg tik xop te hām'āpak, tu' mīy, tu 'āmuk xexka mīy tik pet kopah.

²⁰Ha 'āmnīy hā Yeyox xix tik xop mām, 'āmuk tu' xakot, nūy tu xit,

²¹tu' xit, 'Ihā Yeyox te:

—'Āte xa hāpxe'e 'āktux: 'Āp-xet 'üm te' gāy xop mōgāp-tup 'ūghah. Kaxīy.

²²Ha tik xop kuxa hittup 'ohnāg, yā' xohix te yāy yīkopit, tik puxet hāmāxap te' yīkopit, hak-nāy tu' nōy, xi' nōy te' yīkopit, tu mōktu xohix, tu:

—'Ū 'üm? Yāyā', xatep-tep pe'āpaxex? 'Ok 'ūgmūn tik kummuk? Kaxīy.

²³Ha Yeyox te:

—Tik te' gāy xop mōgā'ax, tu pām xup kānēy pet xax kopah, 'ūgmūtik tu pām xup nōmhā.

²⁴'Ūkxok putup, yā Topa yōg tappet te hām'āktux tap, pāyā tik kummuk xūy putup, nōm tek kummugāp-tup! 'Ūgmūn yā Tikmū'ün Kutok, hak kummugāp-tup, yā hāpxopmā'ax kummuk. Pax pu' tut te nōm put hok, puxix hāpkummuk mīy hok. Kaxīy.

²⁵Ha Yot te' yīkopit kamah, tik te' mōgā'ax kummuk te hāmyīkopit, hu:

—Yāyā', xatep-tep pe'āpaxex? 'Ok yākmūn tik kummuk? Kaxīy.

Ha Yeyox te:

—Hamūn. Xate' xuktux. Kaxīy.

Yūmūg xuxyā xit'ax

²⁶Ha' xit, 'Ihā Yeyox te pām paha', tu Topa tu:

—'Āmax Topah! Xatek mū'ā hāpxop xit'ax hōm. Puxi'. Kaxīy.

Tu pām koxip, tu tik xop pu' popmāhā', tu:

—'Ūpa', nūy mā'. Yāk yīn. Kaxīy.

²⁷Tuk-nāy tu kānēy paha', tu Topa pu:

—'Āmax Topah! Xatek mū'ā' hep max hōm, 'ū xo'op. Puxi'. Kaxīy.

Tu yāy yōg tik xop pu' hōm, tu:

—'Ūpa', nūy 'āxop xohix xo'op.

²⁸Yāk hep 'āta', ha yā' xohix pupi nū'nāhā', pu Topa te hāpkummuk mīy'ax xaxogā', pu tu kux. 'Ūghep 'āta hā Topa te' pa'ax tup mīy tikmū'ün mūtik.

²⁹'Āte xa hāpxe'e 'āktux: 'Āte mīnta hep xupyāg xe' xo'op hok, pāyā yōgnū 'Ātak mūtik 'ūkti', kopxi' xo'op, 'Ihā 'Ātak te yāy yōg tikmū'ün xat xe'e'. Kaxīy.

³⁰Ha Topa puk-tex, tuk-tex kux, tu ta' mōg 'Onimet yōg yīktix hah.

Yeyox te Pet pu hām'āktux

³¹ Tu ta' mōg, 'Īhā Yeyox te tik mūnōm xop pu hām'āktux, hu:

—Hōnhā 'āmnīy 'Īhā', 'āxop xohix nū'pap-tup, tuk nīm putup. Yā Topa yōg tappet te hām'āktux tap, tu: "Āte kahnen yōg pēnā'ax putex, yīy kahnēn nū'paha!" Kaxīy. Yīy hām'āktux hittap hā 'āxop tek nīm putup nōmhā,

³² pāyā putpuk hi', kopxix 'ākeppak mōg hāpxexka Ganinet hah. Kaxīy.

³³ Yīy Pet te:

—Ak mūn'ah! 'Āte 'ānīm 'ohnāg. 'Ūnōy xohix te 'ānīm, kopxix 'ānīm hok. Kaxīy.

³⁴ Ha Yeyox te Pet pu hām'āktux, hu:

—Ūg 'āpax, nūy tu xaxok hok! 'Āte xa hāpxe'e 'āktux: Yā hōnhā, 'āmnīy 'Īhā, xate koit putup, tuk yūmmūg hok 'āktux, tu' xuktux putup tikoxyuk, 'Īhā xokakkak tak xatap-xet. Kaxīy.

³⁵ Ha Pet te:

—Āmhok! 'Āte koit 'okpa 'āmūtik 'ūkxok! Pāyā 'āyūmmūg hok 'āte hām'āktux 'ohnāg! Kaxīy.

Ha tik xop xohix te:

—Ya hamūn! Kaxīy.

Yeyox te Topa pu hām'āktux Yetxēm tu'

³⁶ Ha ta' mōg tu mōktu Yetxēm tu' mōxaha', ha Yeyox te:

—Nāy, māhām, 'Īhāk mōg 'ākeppah, nūy Topa pu hām'āktux. Kaxīy.

³⁷ Tu Pet mōgāhā nū mūtik, xix Yemeneo kutok 2, tu' kuxa teknōg, 'ūxūy xexka tu',

³⁸ tu:

—Ūgkuxa xūy xexka tu mōktuk kuxa teknōg, tuk xok putūmnāg. Nūnte' tīhi', nūy pēnānā 'āti 'ūgmūtik. Kaxīy.

³⁹ Tu ta' keppa' mōg kutōgnāg, tu nū'xup hām tu', tu Topa pu hām'āktux, hu:

—Ātak, 'ūkxūy xexkah, 'ap hā' tot'ah. 'Ūktux hok 'ūkxūy hok, kopxix hittup. Pāyāk tux hok 'ūkxūy, kopxix xūy. 'Āpuk xat, yāk yīpkox xīp 'āmūn pu'. Kaxīy.

⁴⁰ Tu put pu' nūn, tu tik tikoxyuk pēnāhā', ha mō'yōn, kūmīm te' kix hah, yīy Pet pu hām'āktux, hu:

—Ok 'āxop te pēnānā 'āti hok, nūy yāk mūtik pēnā kutōgnāg?

⁴¹ Mō'ōn hok, pāyā Topa pu hām'āktux pax, xayīy hāpkummuk mīy hok. 'Ākuxa te hāpxopmā maxp-tup, pāyā 'āyīn pu'uk. Kaxīy.

⁴² Tu xe' mōg, tu:

—Ātak, xatek putup 'ūkxūy, kopxix xūy. Yāk yīpkox xīp. Kaxīy.

⁴³ Tu xe putpu' nūn, ha tik xop mō'yōn 'ūxeheh, yā kūmīm xūy xexkah, tu' pa xax mōm.

⁴⁴ Yīy Yeyox xe' mōg, tu Topa pu hām'āktux.

⁴⁵ Tu putpu' nūn tik xop hah, tu nūktu' yīkopit, hu:

—Ok 'ūm yāykoax hok, 'āteknōg tu'? Hāmpēnā! Yā hōnhā' gāy xop nūn, nūy 'ūgmūn yā Tikmū'ūn Kutok mūy, nūy tikmū'ūn kummuk mōgā 'ūghah.

⁴⁶ Āyok, 'āpu yūmū mōg. Yā tik kummuk nūn nōmhā. Kaxīy.

Ūgāy xop te Yeyox mūg

⁴⁷ 'Ap hām'āktux kux'ah, 'Īhā Yot nūn, yā Yeyox yōg tihik, tu tikmū'ūn punethok nūnnāhā', ha mīkax xexka taha', xix mīm kix'ax taha'. 'Āmānex xexka xop xix Yoneo xexka xop te mō'pok.

⁴⁸ Yā Yot te' xexka xop pu hām'āktux tap, tu: "Āte tik puxet yāy kep ha' mūg putup, nūy tu 'āneo, xayī' mūy. 'Āte Yeyox mūn kep ha' mūg putup, xayī' pēnā', nūy mūy. Kaxīy.

⁴⁹ Tu' xupep, tu Yeyox ha' nūn, tu:

—Yāyā', pūyā Topa 'ākuxa yūmmā'! Kaxīy.

Tu yāykep ha' mūg.

⁵⁰ Ha Yeyox te:

—'Ūkxape', xate hāpxopmā'ax. Pūyā hāpxopmā mō'ka'ok, nūy ta tu kuxyā'. Kaxīy.

Ha' gāy xop te' mūg, tu' yīm kīy.

⁵¹ Pa tik puxet te Yeyox mūtik hāpkumep, tu mīkax xexka xut, tu 'āmanex xat'ax yōg kāmānat yīpkox xak,

⁵² ha Yeyox te:

—'Ōg mīkax mō'xix 'ūxax kopah. Yā tik te mīkax xexka hāp-tenx, puxi' nōy putex mīkax xexka hā 'ūyānān tu'.

⁵³ Āte yāy yōg 'Ātak tu' xax, puxix nū'pok pekkox yōg xonat xop xohix, pu tu 'āhā tu tehet.

⁵⁴ Pa Topa yōg tappet te hām'āktux tap, yī' tux hok pu tu hāpxopmā nōmhā, nūy hām'āktux hittap hā hāpxopmā'. Kaxīy.

⁵⁵ Tut xexka xop yōg tikmū'ūn pu hām'āktux, hu:

—'Āxop nūn, tu mīkax xexka taha', xix mīm topnāg paha', nūy tuk mūy. 'Āxop tep-tep pe'āpaxex? 'Ok yākmūn tik kummuk, tik te hāpxop hā' xupxet putuk? Yā 'āmnīy xohix 'Īhā Topa pet xexka kopak xīp, nūy hāmyūmmūgā', ha 'āxop te 'ūgmūg 'ohnāg.

⁵⁶ Pāyā hōnhā Topa te' tux hok pu hāpxopmā kummuk, yā Topa pupi hām'āktux xop te tappet tu kax'āmi tap, yīy Topa yōg hām'āktux hittap hāk mūg nōmhā. Kaxīy.

Ha yāy yōg tik xop te hām'āpax, tu nū'paha'.

Yoneo xexka xop te Yeyox yīkopit

⁵⁷ Ha tikmū'ūn te Yeyox mūg, tu Kaxpax pet ha' mōgāhā', ha Kaxpax yā 'āmanex xop xat'ax, ha tik xop te hāmyūmmūg pīp, xix Yoneo xexka xop nūn, tu yāy tu nū'nāhā Kaxpax pet kopah.

⁵⁸ Ha Pet te Yeyox pe' mōg, hāptox tu' pe' mōg, tu' pet yōg hāmuknōg tu mōktu' xupep,

tu mō'nāhā', tu mōktu' yūm xonat xop mūtik, nūy 'ūyōg hāpxopmā'ax pēnā',

⁵⁹ ha' xexka xop xak nūy Yeyox kupeh, nūy tup-tex, tu' koit'ax hā' kupex,

⁶⁰ pāyā tep tup-tex'ax 'ūm yūmmūg 'okpa tik punethok te koit, ha hām'āktux hā' nōy yānān punethok. Hāpxip 'Thā tik 2 te hām'āktux,

⁶¹ tu:

—Yeyox te yāy ka'ok'ax 'āktux, tu: “‘Āte Topa pet xexka koxyōy'ax, tu xe' pet'ax 'āmnyī tikoxyuk hā.” Kaxīy.

⁶² Ha Kaxpax yok, tu Yeyox pu hām'āktux, hu:

—Yā tik te 'ākupex. 'Ok xate yāy 'āktux hok, nūy yūmūg yūmmūgā'? 'Ok pe tik te hāpxe'e 'āktux, 'ok pe yā xa' koit? Kaxīy.

⁶³ Pa Yeyox yīy 'ohnāg, yīy 'āmānex xop xat'ax te hām'āktux 'ūxeheh, hu:

—Topa te 'ā' hōm yāy 'āxet'ax 'ūyīy 'āyīkopit, hu 'āxat. 'Āyīy. 'Ok Topa xe'ēgnāg te 'āyāykutnāhā'? 'Ok yā 'āmūn Topak-tok xe'e'? Kaxīy.

⁶⁴ Ha Yeyox te:

—Ya hamūn. Xate' xuktux. Pāyā 'āte xa hāpxe'e 'āktux: 'Āxop te Tikmū'ūn Kutok pēnāp-tup, ha Topa xe'ēgnāg yīm xe'e hak yūm putup pexkox tu', tuk yīxop-tup, hāmgōy xexka hāk yīxop-tup. Kaxīy.

⁶⁵ Ha 'āmānex xop xat'ax te yāy xax pot, nūy yāy kuxa xūy'ax tu' mūg, tu:

—Puxi! Yā Topa 'āktux kummuk pax 'ōhōm! 'Āxop te' xupak nōmhā.

⁶⁶ Hu putep' āktux'ax? Kaxīy.

Ha:

—Yā hāpkummuk mīy xexka! Pūyā tu' xok! Kaxīy.

⁶⁷ Tu mō yīy hep yōn, xi' payīn kix, 'Thā' yīkopit,

⁶⁸ hu:

—'Āmūn yā Topa yōg hāmyāykutnā'ax. 'Āpu, Topa pupi hām'āktux, nūy 'āyīy: 'Ū 'ūm te 'ākix? Kaxīy.

Pet te Yeyox yūmmūg hok 'āktux

⁶⁹ Ha ta' xip Pet hāptopa', ha ta kāmānat hex te:

—'Āxip kama Ganinet yōg Yeyox mūtik. Kaxīy.

⁷⁰ Ha:

—Xatep-tep mūn 'āktux? 'A 'āte' yūmmūg'ah. Kaxīy.

⁷¹ Tu hāmyīkox tu' mōg, ha ta kāmānat hex nōy te' pēnāhā', tu xonat xop pu hām'āktux, hu:

—'Ōhōm xip Nāyane yōg Yeyox mūtik. Kaxīy.

⁷² Ha Pet te xe:

—'Ak mūn'ah. Topa tek yūmmūg. 'Ap 'ūkxip'ah. Yā 'āte' a kāy yūmmūg'ah. Kaxīy.

⁷³ Hāpxip kutōgnāg 'Thā tik xop te Pet yīka' nūn, tu:

—'Āyīy'ax te Ganinet xop yīy'ax putuk! Yā Yeyox mūtik xate hāpkumep. Kaxīy.

⁷⁴ Yīy Pet te:

—Topa tek yūmmūg. 'Āte nōm kāy yūmmūg 'ohnāg. Pax 'ū koit 'āte', puxix Topa 'ūkxūygā'. Kaxīy.

Hāpxip 'ohnāg 'Thā xokakkak tak xataha',

⁷⁵ ha Pet te Yeyox yōg hām'āktux'ax xutigāhā', ha: “Xate yā koit putup 3, xate hām'āktux putup 'ūgyūmmūg hok te 3, 'Thā xokakkak tak xatap-xet.” Kaxīy.

Tu ta' mōg, tu pota punethok.

27

Xonat xop te Yeyox mōgāhā Pinat keppah

¹ Hāptup, māyōn te hāpkanet tu' xupep 'Thā', 'āmānex xexka xop xix Yoneo xexka xop xohix te yāy tu nū'nāhā', nūy Yeyox putex,

² tu' kīy, tu Gohenanok Pinat ha' mōgāhā'.

Yot te yāy putex

³ Hōmā Yeyox yōg tik Yot te' mōgā kummuk, nūy tu tayūmak pa', tu' xexka xop yōg hāmpē'paxex yūmmūg nōmhā, yā Yeyox putex putup, ha yāyhāhup xexkah, tu tayūmak te 30 paxmōg, nūy mōy putpu' hōm 'ūxexka xop pu', tu' xexka xop pu hām'āktux,

⁴ hu:

—'Āte hāpkummuk mīy 'Thā 'āxop mōgāhā tik max, xa tup-tex. Kaxīy.

Ha:

—Paŕīy! 'Āpu, yāy yōg hāpkummuk mīy'ax tat! Kaxīy.

⁵ Ha Yot te tayūmak hā putnū Topa pet xexka kopah, tu ta' mōg, tu yāy māy hīy, tu' xok xe'e'.

⁶ Ha 'āmānex xexka xop te tayūmak paha', tu:

—'Ap max'ah, yūmū yōg xat'ax te' xat hok, pu tayūmak hōm hok Topa pu'. Yā nūhū tayūmak tu tik putex. Yūmū'ātep-tep mūn mīy'ax? Kaxīy.

⁷ Hu tayūmak paha', tu 'Onet yōg hām xexka paha', puŕī' xukpot mīy, pu tu' puknōg xop nō hāpkot.

⁸ Yīy tikmū'ūn te' xukpot 'āxet'ax, hu: “‘Ūhep 'āta'ax tu hahām.” Kaxīy. Yā hōmā 'ūxuxet'ax 'ūhep 'āta, xix hōnhā'.

⁹ Hōmā tik hittap Yenemīn te Topa pupi hām'āktux, yīy: “Tikmū'ūn te tayūmak te 30 paha', tu te tik hāmenax tayūmak te 30 hā, 'Iyaet yōg tikmū'ūn xohix te yā pagop-tup,

¹⁰ tu tayūmak hā' nōy yānān, nūy 'Onet yōg hām paha'. Yā Topa tek xat tap, yīy 'āte' mīy.” Kaxīy. Ha Topa yōg hām'āktux hittap hā' xexka xop te hām paha nōmhā.

Yeyox te Pinat keppa' xip

¹¹ Ha Yeyox te Gohenanok Pinat keppa' xip, ha' yīkopit, hu:

—'Ok xate Yoneo yōg tikmū'ün xat xe'e'?
Kaxīy.

Ha:

—Xate' xuktux. Kaxīy.

¹² Pāyā' yīy 'ohnāg 'īhā 'āmānex xexka xop xix Yoneo xexka xop te' kupex,

¹³ yīy Pinat te:

—'Ok xate hām'āpak hok? Yā 'āxat'ax xop te 'ākupex! Kaxīy.

¹⁴ Pāyā' 'ap yīy'ah, ha Gohenanok kuxa te' yēy.

Pinat te' xat, pu Yeyox putex

¹⁵ Hāmyāxatamuk xohix 'īhā', 'āmūk xexka 'āxet'ax Nōa'yēn mīy 'īhā', Pinat te tik kummuk xut kanet kopah, tikmū'ün te ta tu' xak, ha' xut.

¹⁶ Ha tikmū'ün xohix te tik kummuk Mahamax yūmmūg,

¹⁷ tu yāy tu nū'nāhā Gohenanok pet tu', ha Pinat te tikmū'ün yīkopit, hu:

—'Āxop tep-tep putup? Piyā' mūn 'āte' xut'ax? 'Ok pe Mahamax xut'ax, 'ok pe Yeyox xut'ax? Yā' xuxet'ax nōy Kunnix. Kaxīy.

¹⁸ Ha' xexka xop te Yeyox yīpkumīy, tup-tex putup, ha Pinat te' yūmmūg.

¹⁹ Tu yāy yōg yūm'ax xexka yīmū' yūm, nūy tu' xat, nūy tu' yīkopit, ha yāy xetut te hām'āktux nū'kutnāhā', tu:

—Tik max koa pu mōg. Yā 'āmnīy kote 'īhāk yōnkup, tuk xūy xexkah nōm tik max hah. Yī' xut, pu mōg. Kaxīy.

²⁰ Ha 'āmānex xexka xop xix Yoneo xexka xop te tikmū'ün hām'āktux hā' gāyāhā', pu yīy tikmū'ün Pinat tu' xax pu Mahamax xut, nūy tu' xax, pu Yeyox putex.

²¹ Ha Gohenanok te:

—Tik 'ūm 'āte' xut'ax pu mōg? Kaxīy.

Ha tikmū'ün te:

—'Āpu, Mahamax xut. Kaxīy.

²² Ha xe' yīkopit, hu:

—'Ātep-tep mūn mīy'ax Yeyox hā? Yā yāy 'āxet'ax nōy Kunnix. Kaxīy.

Ha:

—Mīpkupnix tup-tex! Kaxīy.

²³ Ha Pinat te xe' yīkopit, hu:

—'Ūyōg hāpkummuk mīy'ax 'ūm texīy? Kaxīy.

Pāyā' tikmū'ün yīy ka'ok, tu:

—Mīpkupnix tup-tex! Kaxīy.

²⁴ Yīy Pinat kuxa teknōg tikmū'ün gāy hah, tu' xat, pu kōnāg tat, pu tu' yīm pix tikmū'ün keppah, tu:

—'Āxop te tik max putex putup. 'Ak mūn'ah! 'Ap hāpkummuk 'ūm mīy'ah. 'Āpu yāy yōg hāpkummuk mīy'ax tat! Kaxīy.

²⁵ Ha' yānān, tu:

—Pūyā Topa 'ūgmūg kummugā 'ūyānān tu', xik mūk kutok xupep tup xop kummugā kamah! Kaxīy.

²⁶ Yīy Pinat te Mahamax xut tikmū'ün pu', tu' xat, pu tu Yeyox kix xikot hā, ha' mōgāhā', nūy mīkupnix tup-tex.

Xonat xop te Yeyox kute'ex kummuk

²⁷ Hāp xip kutōgnāg 'īhā Pinat yōg xonat xop te Yeyox mōgāhā Gohenanok Pinat pet xexka hah, ha xonat xop te yāy tu nū'nāhā', tu Yeyox yīmmap hā' pip,

²⁸ tu Yeyox xax xut, tu kap 'āta hā mō'tat,

²⁹ tu mīmyām xox hā' kux xax mīy, tup-tox yīmū' yūm, tu mīm xahix Yeyox yīm xe'e kopa' hōm, tu nūktu nūktettex Yeyox keppah, nūy tuk-tex'ex kummuk, tu:

—Pūyā Yoneo xop tu xat mō'kuma' mōg' Kaxīy.

³⁰ Tu yāy yīy hep mō'yōn, nūy tu hupmā', tu mīm xahix paha', tu nōmp-tox hā' tak,

³¹ tuk-te'ex kummuk kux, tu kap xut, tu xe yāy xax hā mō'tat, tu' mōgāhā', nūy mīpkupnix tup-tex.

Yeyox te mīpkupnix tu' xup

³² Tu ta' mōg, 'īhā tik nūn, 'ūxuxet'ax Xīmām, yā Xīnēn yōg tihik, ha' xat, pu mīpkupnix tat, tu' taha'.

³³ Ha' mōg, tu mōktu' xip'ax tu' mōxaha', ha' xuxet'ax Gok, tu tikmū'ün yīy'ax hā: "Ūp-tox kup." Kaxīy.

³⁴ Tu xupyāg kanop peo mūtik, tu Yeyox pu' xo'opmāhā', ha yā xo'op kutōgnāg, tup-tup mōg.

³⁵ Ha xonat te Yeyox xup mīpkunix tu', tu' xax koxip, tu mō'xap yōn, nūy xonat puxet te' xax max pa',

³⁶ tu' mām, tu' pēnānā' pip,

³⁷ tu mīmpehnāg yīmū kax'āmi', tu mīpkupnix tu' xup, nūy Yeyox yōg hāpkummuk mīy'ax yūmmūgā', ha: "Nūhū Yeyox, tu Yoneo yōg tikmū'ün xohix xat." Kaxīy.

³⁸ Ha tik kummuk 2 xup kamah, nūy mīpkupnix tu' kix, ha hāp xop hā' xupxet pax. 'Ūp-xet te Yeyox yīm xe'e hā' xup, xi' nōy te' yīm xax hā' xup.

³⁹ Ha tikmū'ün te putat hā' mōg, tu mōktu' pēnāhā', tuk-te'ex kummuk, tup-tox mahap, tu Yeyox 'āktux kummuk, tu:

⁴⁰ —Kāy te yāy 'āktux ka'ok, nūy Topa pet xexka koxyo, tuk-nāy tu' pet 'āmnīy 2 hā! Paxpu Topak-tok xe'e', puxix tu mīpkupnix tu' yīxox, nūy yāy hā tu' tehet, nūy tu xok hok! Kaxīy.

⁴¹ Ha 'āmānex xexka xop, xix tik te hāmyūmmūg xop, xix Yoneo xexka xop tek-te'ex kummuk kamah, tu:

⁴² —Hamūn te tikmū'ün punethok mōy, pāyā yāy mūn xut yūmmūg'ah. 'Ok 'Iyaet yōg tikmū'ün xat xe'e'? Paxpu mīpkupnix tu' yīxox, puxix 'ūgmū kuxa mām ka'ok 'ōm kopah!

43 'Ūkuxa yūm ka'ok Topa kopah, tu yā Topak-tok 'āktux. Nāy! 'Āpu yūmū' hip, puyīy Topa' xut nōmhā! Kaxīy.

44 Ha tik te hāpxuxet'ax 2 te hāpkute'ex kummuk kamah, tu hām 'āktux kummuk.

45 Māyōn te nūktu yāy kote' yūm, tu ta' xok, ha hām xexka xohix hāpkoxtap.

46 Ha māyōn he tu ta' putpu' hi 'ūxeheh, ha Yeyox yīy ka'ok, tu:

—“Enix, 'Enix, nēmā xamatān!” Kaxīy. Tu tikmū'ūn yīy'ax hā: “Yā yōgnū Topah, tep texīy hā xatek nīm?” Kaxīy.

47 Ha tikmū'ūn 'ūm te' xupak, tu:

—Yā 'Enit mūn xānāhā! Kaxīy.

48 Ha tik mōg mō'ka'ok, tu hāpxop patok, 'ūhep xupyāg kummuk hā' patok, nūy Yeyox pu' xo'opmā',

49 pa tikmū'ūn nōy te:

—Nāy! Pa nū 'Enit, puyī' xut! Kaxīy.

50 Ha Yeyox yīy ka'ok 'ūxeheh, tu' xok xe'e'.

51 Hāpxip 'ohnāg 'Thā Topa pet xexka yōg topixxax mō'yīnnīn'ax te yāy pot, 'ūxax pepi yāy pot hāmāxap, tu mōktu kakak yāy pot mōg. Ha hām yāynuhuk, ha mīkaxxap xexka yāy pot,

52 ha' xukpot te yāy xōn, ha Topa yōg tikmū'ūn xakix hittap xop punethok te putpu' hi',

53 tu hāpkox kopa' mōxaha', tu hāpkumep, ha Yeyox te putpu' hi, 'Thā' nōm xop te kōmēn Yenoyanēn hā' mōxakux, yā Topa yōg kōmēn, ha tikmū'ūn xohix te' pēnāhā'.

54 Hāpxexka Hōm yōg kapitām xip, yā' puknōg, xix xonat xop te pēnānā' pip, tu hāpxopmā'ax xe'ēgnāg xohix pēnāhā', xix hām yāynuhuk pēnāhā', tu kuxānōg, tu:

—Yā hamūn yā Topak-tok xe'ēgnāg! Kaxīy.

55 Ha ta 'ūn xop te hāptox hā yā' pēnāhā', yā nōm te Yeyox mūtik hāpkumep tap, tu Ganinet tu' mōxaha', tu Yēyox hā' tehe'.

56 'Ūxohix te: Mānix Mānanēn, xix Mānix yā Tiak xix Yoye hā' tut, xix Yemeneo xetut, yāk-tok pit 2 te Yeyox yōg tik xop kopa' tihī'.

57 Hāpxip kutōgnāg yā 'āmāxak, 'Thā Yoye nūn, tuptexop xexkah. Yā kōmēn 'Ānimātex yōg tihix, tu kama' mōg Yeyox pehe',

58 tu' mōg, tu Pinat tu' xak, puyī' tux hok pu Yeyox xokxax hā hāpkot, ha' tux hok,

59 yīy Yoye te' xokxax kīy topixxax xekap-nok hā', yā' xax tūmnāg.

60 Ha Yoye te yāy yōg mīkaxxap kox xexka hā mō'tat, tu nō kopa hāpkot, ha mīkaxxap putux yīkūy, nūy nō kox mō'yīnnīn, tu ta' mōg,

61 'Thā Mānix Mānanēn xix Mānix nōy mām, tu mīkaxxap kox xexka yīka' mām.

Xonat xop te' xukpot tu pēnānā' pip

62 Hāptup nōy yā nit xap, 'Thā 'āmānex xexka xop xix Paniye xop te yāy tu nū'nāhā Pinat mūtik, tu:

63 —Gohenanok: hōmā kāy te koit pax, tu: “‘Āmnīy 3 nōg, 'Thā putpuk hip-tup.” Kaxīy.

64 Yīy xa' xak, xa xonat xop mō'pok xukpot ha, 'āmnīy 3 hā', ka' yōg tik xop te' xokxax xut, nūy nō tu' xupxet, nūy tikmū'ūn pu: “Yā' hi putpu'!” Kaxīy. Yā' koit'ax xexka nō'ōm. Kaxīy.

65 Ha Pinat te:

—Xonat xop mōgā pu pēnānā' pi', pu hāpxopmā kummuk hok. Kaxīy.

66 Ha ta' mōg, tu puk hi hā mīkaxxap hāmyīnnīn'ax muk, puyīy tikmū'ūn yīkūy hok, nūy tu' xōn hok, ha xonat xop te' pēnānā' pip.

28

Yeyox te putpu' hi'

1 Hāptup nōy yā ye nomīn, ha māyōn xupep 'Thā Mānix Mānanēn xix Mānix nōy mōg, mīkaxxap kox xexka ha' mōg, nūy pēnā'.

2 Hāpxip 'ohnāg 'Thā hahām yāynuhuk, ha pekkox yōg nū'kutnā'ax nūn, tu mīkaxxap xexka xut, nōm te mīkaxxap kox mō'yīnnīn, ha' xut, tu mīkaxxap yīmū' yūm.

3 Tu tex yānām putuk, yā topixxax tūmnāg ponnok, yā hām 'āxi yōg hāpxop xapxūy'ax putuk.

4 Ha xonat xop te yā yīpkutuk xexkah, tu' yāy pu xu'uxnām, tu' xakix kōmnāg,

5 ha nū'kutnā'ax te 'ūn xop pu hām'āktux, hu:

—'Ākuxānōg hok! 'Āxop te Yeyox xak, nōm te mīpkupnix tu' xok. 'Āte' yūmmūg.

6 'Ap xip'ah. Yā' hi putpu', tu xa hām'āktux tap. Mā', nūy pēnā! Yā hōmā' xip mīkaxxap xexka kox kopah, pāyā 'ap xip'ah nōmhā.

7 Yīy mōg mō'ka'ok, nūy tik xop pu hām'āktux, hu: “Yā putpu' hi', tu 'ākeppa' mōg hāpxexka Ganinet hah. 'Ōnte 'āxop te' pēnā'ax.” Kaxīy. 'Āxutigā max, xayī' xaxok hok! Kaxīy.

8 Ha ta' mōg 'ūn xop, tu' mōg mō'ka'ok, tu kuxānōg, pāyā' kuxa hittup xexkah, tu tik xop ha' mōg, nūy tu' xuktux.

9 Hāpxip 'ohnāg 'Thā Yeyox te 'ūn mūtik yā' tihī', tu:

—Pūyā Topa 'ākuxa māmā! Kaxīy.

Ha' yīkahnāg ha' mōg, tu tu nūktettex, tu' nōy pata mūg, tu' kuxa te' yēy.

10 Ha Yeyox te:

—'Ākuxānōg hok. Mōg, nūy mōy 'ūkxape xop pu hām'āktux, pu Ganinet ha mōg, nūy 'ūgmūn pēnā'. Kaxīy.

Xonat xop te xupmāhīy hā mō'āmā'

11 Ha 'ūn xop mōg, ha xonat xop te kōmēn ha' mōg, nūy 'āmānex xexka xop pu hām'āktux, tu hāpxopmā'ax xohix 'āktux.

12 Yīy yāytu nū'nāhā Yoneo xexka xop mūtik, nūy hāpxopmā'ax 'ūm te xīy 'āktux, tute tayūmak xexka popmāhā xonat xop pu',

¹³ tu' xat, hu:

—Mōg, nūy tikmū'ūn xohix pu hām'āktux, nūy yā tu te mō'āmā', hu: “Yeyox yōg tik xop te' xokxax hā' xupxet 'āmnīy koxtap hā, hak mūg mōkyōn.” Kaxīy.

¹⁴ Gohenanok te 'ōg hām'āktux 'āpax, kopxik mūg hām'āktux, puyīy 'āxop kum-mugā hok. Yā 'āxutigā hok! Kaxīy.

¹⁵ Ha xonat xop te tayūmak pop, tu' mōg, tu nōm hām'āktux'ax 'āktux 'ūxohix pu', yīy hōnhā Yoneo yōg tikmū'ūn te' xuktux pax.

Tik xop te Yeyox pēnāhā'

¹⁶ Ha ta tik xop te Ganinet ha' mōg, tu mōktu yīktix tu' mōxaha', yā Yeyox te' xat tap, puyīy yīktix ha mōg, yī' mōg,

¹⁷ tu Yeyox pēnāhā', tu nūktettex, ha' kuxa te' yēy, pa tik 'ūm kuxa te yāy yīkopit. 'Ap mā'm'ah,

¹⁸ yīy Yeyox te:

—Topa tek ka'ogāhā 'ū xat pexkox tu', xix hām xexka xohix tu xat.

¹⁹ Āmōg, nūy hep xop xohix ha 'āmōy, nūy hāmyūmmūgā', puyī' yōgnū tikmū'ūn. 'Āpup-tox pix kamah. Yā Topa te 'āxop pu' hōm yāy 'āxet'ax, xa yōgnū tikmū'ūn putox pix,

²⁰ tu hāmyūmmūgā', puyīy tu yīpkox pi' yōgnū xat'ax pu'. 'Ūxaxok hok. Yā 'āxop mūtik 'ūkxip mō'kumak mōg putup. Yā hāmyāxatamuk xohix xox putox 'īhā 'āmūtik 'ūkpi' putup, nūy 'ānīm hok. Kaxīy. Tu ta tu' kux.

MÄ'AK TE TOPA YÖG HÄM'ÄPAK MAX'ÄKTUX

Yoām tep-tox pix, tu hām'äktux

¹ Nühü', yä Yeyox Kunnix yög hām'äpak max'ax, yä Topak-tok yög.

² Hömā 'ühittap 'Iyait te Topa pupi hām'äktux, hu Yeyox Kunnix yög hām'äpak max'ax 'äktux, hu nō kax'amix tappet tu, hu:

“Topa te: 'Äte tik mōkutnāp-tup, puyīy 'üg pupi hām'äktux, puyīy 'äkeppa mōg, puyīy xa hāmmaxnā'.

³ Tute hām'äktux ka'ok putup hām panip xexka tu', hu hām'äktux, hu: Yümüg xuxyā nün putup. 'Äpu yä tu hāmmaxnā'. 'Äpu yä hāmmax mīy.” Kaxīy.

⁴ Hāpxip 'ihā' nün Yoām, nōm tep-tox pix. 'Ünün, tu nüktu' xupep hām panip xexka tu', tu tikmü'ün putox pix, tu hām'äktux, hu:

–'Äpu yä yāyhāhup, nūy hāpkummuk mīy kux, ha 'äte 'äp-tox pix putup, puyīy Topa 'äxop yög hāpkummuk mīy'ax xaxogā', pu tu' kux. Kaxīy.

⁵ Ha ta' nün hāpxexka Yonex yög tikmü'ün xohix xix kōmēn Yenoyanēn yög tikmü'ün xohix, nūy Yoām yög hām'äktux 'äpax. 'Ünün xohix, nüktu' mōxaha', tu Yoām yög hām'äktux 'äpak, tu yāy yög hāpkummuk mīy'ax 'äktux, ha Yoām tep-tox pix kōnāg kox Yohnām kopah.

⁶ Yoām te' tat topixxax, yä kāmēn xe hā' mīy, tu xokxax hāg-nāy hüy, tu kunit mähā', tu puk hep xup.

⁷ Yoām te:

–Hāpxip 'ihā' nōy tek pe' nün putup. Yä' ka'ok nō'ōm, ha tak pu'uk. 'Üxexka xop te' yög pataxax ko'a, pu' max, pak pu'uk, hu yög pataxax ko'a, pu' kummuk.

⁸ 'Äte 'äp-tox pix kōnāg hā, pa tute 'äxop ha Topa Koxuk nū'kutnāp-tup, nūy 'äxop ka'ogā'. Kaxīy.

Yoām te Yeyox putox pix

⁹ Ha ta' xip Yeyox kōmēn Nāyane tu' hāpxexka Ganinet kopah, tu ta' nün, tu nüktu' xupep Yoām tu', ha Yoām te Yeyox putox pix kōnāg kox Yohnām kopah,

¹⁰ tup-tox pix kux, ha kōnāg kopa' xupep Yeyox, tu' pēnähā', ha ta pexkox xōn, ha ta' yīxohoh Topa Koxuk, yä kuxxuxtut putuk. 'Ünün, tu nüktu Yeyox yīmū' xupep.

¹¹ Ha ta pexkox kopa Topa te:

–Xōmnē', 'äte mō'äyāy xe'ēgnāg. Xatek kuxa hittupmähā'. Kaxīy.

Hāmgāyāgnāg te Yeyox xapit

¹² Hāpxip 'ihā Topa Koxuk te Yeyox mōkutnähā hām panip xexka tu',

¹³ ha ta' mōg, tu' xip, ha Hāmgāyāgnāg te Yeyox xapit, puyīy hāpkummuk mün mīy, pa' mīy 'ohnāg, ha ta' pip xokxop gāy, pa pexkox yög nū'pok xop te Yeyox pēnā max. Yä' xip Yeyox 'āmnīy xohix te' 40 hā.

Yeyox te hāpxopmā kōnāmähā hāpxexka Ganinet tu'

¹⁴ Hāpxip ha ta xonat te Yoām mūg, tu kanet ka'ok kopa' xix, 'ihā putpu' nün Yeyox, tu nüktu' xupep hāpxexka Ganinet tu', tu Topa yög hām'äpak max'ax 'äktux,

¹⁵ tu:

–Hōnhā Topa te yāy yög tikmü'ün xat putup, ha' yīpkox pip putup. 'Äpu yä yāyhāhup, nūy hāpkummuk mīy kux. 'Äpu yä 'äkuxa mām Topa yög hām'äktux kopah, puyīy Topa 'äkuxa kummuk xit, nūy kuxa max mō'tat, 'üyānān tu'. Kaxīy.

¹⁶ Ta' mōg Yeyox kōnāg xexka Ganinet kux tu', pa' pip tik tix, yä Xīmām Pet xix taknōy 'üxuxet'ax 'Änene', ha kōnāg xexka tu mō tutpanip yōn. Yä māpxexex putuk, hu mām xukpax.

¹⁷ Ha Yeyox te:

–Mā, nūy 'üg pe mōg. 'Äxop te mām xuk, pa 'äte xa hāmyümmügāp-tup, xayīy 'üg ha tikmü'ün nūnnā'. Kaxīy.

¹⁸ Ha tik te tutpanip nīm, tu ta' mōg Yeyox peheh,

¹⁹ tu' mōg, pa' pip tik tix nōy, yä Tiak xi' taknōy Yoām, yä Yemeneo kutok, tu mīpkox kopa' mām, tu tutpanip māynāg mīy,

²⁰ ha Yeyox te tik xānähā', ha' tak nīm xix kāmānat xop nīm mīpkox kopah, tu Yeyox pe' mōg.

Tik kopa' xip yāmīy kummuk

²¹ Tu' mōg Yeyox xix yög tihik, tu mōktu' mōxaha kōmēn Kapānām tu', tu' nox pip. Nit xap ha ta' mōg Yeyox, tu Yoneo xop yög Topa pet hā mō'nähā', tu tikmü'ün pu hāmyümmügāhā',

²² ha tikmü'ün te' xupak, tu hāmyümmüg'ax putuppax. Yä Yeyox 'ūka'ok, tu hāmyümmüg, tu hāmyümmügā max, 'ap tik te hāmyümmüg xop putuk'ah.

²³ Ha ta' nün tihik, ha' kopa' xip yāmīy kummuk, ha tik te hām'äktux ka'ok, hu:

²⁴ –Kōmēn Nāyane yög Yeyox, putep mün mīy putup? 'Ok 'änün, nūy 'ükputex? 'Äte 'äyümmüg. Topa te 'äyāy kutnähā'! Kaxīy.

²⁵ Pa Yexox te yāmīy kummuk xat, hu:

–Hām'äktux hok, nūy ta 'äpep! Kaxīy.

²⁶ Yāmīy kummuk te tik yāy nuhugāhā', tu hām'äktux ka'ok, tu ta häptopa' xupep,

²⁷ ha tikmü'ün kuxa te' yēy, tu' yīkopit, hu: –Pute 'üm? 'Ok tute hāpxop tup yümmügāhā'? Tute yāmīy kummuk xat, ha' yīpkox pip, nūy xupep. Kaxīy.

²⁸ Hāpxip kutōgnāg 'Thā tikmū'ūn xohix te' yūmmūg hāpxexka Ganinet xexka tu', Yeyox te hāpxopmā max xe'ēgnāg.

Yeyox te Xīmām Pet xetut mūktut hitupmāhā'

²⁹ Tu ta' mōg Jesus xix Tiak xix Yoām, tu mōktu' mōxaha Xīmām Pet pet hā, yā 'Ānene pet kamah.

³⁰ Ūxip Xīmām Pet xetut mūktut, tu' pip, tu' xax pukpex, ha tikmū'ūn te nōm 'āktux mō'ka'ok,

³¹ ha ta' mōg Yeyox 'ūn yīkāgnāg, tu' nōy yīm mūg, tu' yīm xīnnāhā', ha' yūm, tu' xuxi', tu' nōy pu' hām mīptut kopah.

Yeyox te tikmū'ūn pakut xohix hitupmāhā'

³² Āmāxāgnāg, ha ta tikmū'ūn te' nūnnāhā tikmū'ūn pakut xohix xix yāmīy kummuk te tikmū'ūn kopa' pip xop nūnnāhā Yeyox tu'

³³ ha ta' nūn kōmēn yōg tikmū'ūn xohix xexka', tu nūktu mīptut yīkāgnāg tu' pip, nūy pēnā',

³⁴ ha Yeyox te tikmū'ūn pakut xohix hitupmāhā', tu hāmpakut xohix mōy, tu yāmīy kummuk xohix mōy, ha yāmīy kummuk xohix te Yeyox yūmmūg, yīy Yeyox te nōm xat, pu hām'āktux hok.

Yeyox xip hāpxexka Ganinet tu'

³⁵ Hāptup nūn, ha ta Yeyox yāy koxak, tu ta' mōg, tu mōktu hām panip xexka tu' xupep, tu Topa pu hām'āktux,

³⁶ pa Xīmām Pet te Yeyox xax xi' xape xop te' xak punethok,

³⁷ tu' nūn, tu nūktu' xipihī', tu:

—Tikmū'ūn xohix te' āxak. Kaxīy.

³⁸ Ha Yeyox te:

—Āpu yūmū mōg xiptuxexka xohix mōyāy koxip, tu' tikmū'ūn nōy hah, nūy Topa yōg hām'āpak max'ax 'āktux hato'a kamah. Yā 'ūgnūn hām xexka tu', nūy tikmū'ūn xohix pu Topa yōg hām'āpak max'ax 'āktux. Kaxīy.

³⁹ Tu ta' mōg, tu hāpkumep punethok hāpxexka Ganinet xexka tu', tu Topa yōg hām'āpak max'ax 'āktux punethok Yoneo xop yōg Topa pet xohix kopah, tu yāmīy kummuk mōy.

Yeyox te tik xax kunutnām tapmāhā'

⁴⁰ Ha ta' nūn tihik, tu' xax kunutnām, 'ūnūn, tu nūktu Yeyox yīkāgnāg 'ūkopaxux hā' xip, tu ta tu' xak, hu:

—Āte' yūmmūg. Xatep-tup, nūy ta 'ūkxax tapmā yūmmūg. Kaxīy.

⁴¹ Ha' kuxa ka' punethok, tu' nōy yīmū yāy yīm xix, hu:

—Hamūn, 'ātep-tup. Āxax tap. Kaxīy.

⁴² Hāpxip 'ohnāg 'Thā' xax kunutnām tap. Yā' hittup.

⁴³⁻⁴⁴ Ha Yeyox te' xat ka'ok, hu:

—Ūxupax. Tikmū'ūn pu nū hāpxopmā'ax 'āktux hok. Mōg 'āmānex hah, puyīy 'āxax pēnā'. Āpu 'āmānex pu hāpxop hōm, puyīy Topa pu nōm hōm, xayīy Mōyyex yōg xat'ax mīy. Hā kaxiy tikmū'ūn te' yūmmūg, 'āxax tap. Kaxīy.

Tu tik xat, pu mōg.

⁴⁵ Ha ta' mōg tihik, tu' xohix pu hām'āktux kōnāmāhā', hu:

—Pēnā', Yeyox tek xax tapmāhā'. Kaxīy.

Hā kaxiy Yeyox te kōmēn xohix hā' mō'nā xaptop 'ohnāg. Yā tikmū'ūn te Yeyox yūmmūg, yīy ta' nox xip hām panip xexka tu', ha ta' nūn tikmū'ūn xohix, nūy Yeyox xax.

2

Yeyox te tik hāpkumep hok hittupmāhā'

¹ Āmnīy xohix mōg, 'Thā putpu' mōg Yeyox kōmēn Kapānām tu', tu nūktu mīptut hā mō'nāhā'. Pa hāpxip 'Thā tikmū'ūn te hām'āktux, ha tikmū'ūn xohix te' yūmmūg, 'ūxip Yeyox,

² tu ta' nūn tikmū'ūn, yā yāytunū'nāhā 'ūxohix, ha mōktu mīptut hā nū'xīmnāg xix hāmīy kox yīka nū'xip kama hāptopah, ha Yeyox te tikmū'ūn pu Topa yōg hām'āktux'ax 'āktux,

³ ha ta' nūn tik te' 4, tu tik hāpkumep hok nūnnāhā', yā tutpe hā mō'tat.

⁴ Ūnūn pa' pip tikmū'ūn xohix, yīy ta Yeyox ha' mōg 'ohnāg mīptut kopah, hu ta pepi' mōg, tu mōktu mīptut yīmū' mām, tu hāpxax mōy Yeyox xuka', tu ta hām tu tutpe hā tik pakut xix Yeyox keppa',

⁵ ha Yeyox te' yūmmūg tik kuxa mām ka'ok. Yeyox te tik hāpkumep hok pu hām'āktux, hu:

—Ūgnix, Topa te 'ōg hāpkummuk mīy'ax xaxogāhā', ha' kux. Kaxīy.

⁶ Ha ta' pip tik te hāmīyūmmūg xop, tu' kuxa kopa' yīkopit, hu:

⁷ "Texīy hām'āktux? Tute Topa 'āktux kummuk! Tep te hāpkummuk mīy'ax xaxogā yūmmūg? Yā Topap-xehnāg te!" Kaxīy.

⁸ Pa Yeyox te tik yōg hāpe'paxex'ax yūmmūg, tu:

—Texīy 'ākuxa kopa 'āyīkopit?

⁹ Hām'āktux 'ūm yāy xat 'ohnāg? 'Ok pe tik hāpkumep hok pu hām'āktux, hu: "Āte 'ōg hāpkummuk mīy'ax xaxogāhā', ha' kux," kaxīy, 'ok pe hām'āktux, hu: "Āpu 'āyīpxit, nūy pepix xihip, nūy 'ōg tutpe pepix xup, nūy ta mōg?" Kaxīy.

¹⁰ Āte hāpxopmā putup, ha 'āxop te' pēnāp-tup, hu' yūmmūg, 'ūgmūn yā Tikmū'ūn Kutok te tikmū'ūn yōg hāpkummuk mīy'ax xaxogā'ax nūnte hām xexka tu'. Kaxīy.

Tu tik hāpkumep hok pu hām'āktux, hu:

¹¹ —Āpu 'āyīpxit, nūy pepi xihip, nūy 'ōg tutpe pepi' xup, nūy ta mōg yāy pet hah. Kaxīy.

¹² Hāp̄xip 'ohnāg 'Ihā tik te hāpkumep hok yīp̄xit, nūy pepi' xip, nūy yāy yōg tutpe pepi' xup, tu ta' mōg, ha tikmū'ūn xohix te' pēnāhā', tu' kuxa te' yēy, tu Topa 'āktux max, hu:

–Tikmū'ūn te hāp̄xopmā'ax nōy hā kaxīy pēnā 'ohnāg! Kaxīy.

Yeyox xix Nemi'

¹³ Ta xe' mōg Yeyox, tu mōktu' xupep kōnāg xexka Ganinet tu', ha ta' nūn tikmū'ūn xohix Yeyox hah, ha' xohix pu hāmyūmmūgāhā'.

¹⁴ Tu ta' mōg, pa' xip Nemi', yā 'Āppeo kutok, tu' yūm gohet pupi tayūmak pop'ax pet kopah, ha Yeyox te Nemi pu hām'āktux, hu:

–Mā, nūy 'ūkpe mōg. Kaxīy.

Nemi pepi' xip, tu ta pe' mōg, tu mōktu Nemi pet hā' mōxaha',

¹⁵ ha hāp̄xip 'Ihā' xit Yeyox xix yāy yōg tik xop xix gohet pupi tayūmak pop'ax xop xix hāpkummuk mīy'ax xop nōy,

¹⁶ ha ta' nūn tik te hāmyūmmūg xop xix Paniye xop nūn, tu nūku' pēnāhā', Yeyox xit tik mūtik xix gohet pupi tayūmak pop'ax xop mūtik, tu Yeyox yōg tik xop pu' yīkopit, hu:

–Teptu Yeyox xit 'ūkummuk xop mūtik? Kaxīy.

¹⁷ Ha Yeyox te' xupak, tu tik te hāmyūmmūg xop pu hām'āktux, hu:

–Nonot xop te' hīttup xop hā te 'ohnāg, pa pakut xop hā tehet. Hā kaxīy 'ūgnūn, nūy hāpkummuk mīy'ax xop xānā', pa' max xop xānā 'ohnāg. Kaxīy.

Yeyox te' xit hok 'āktux

¹⁸ Ha ta' pip Yoām mūtik mōg xop xix Paniye xop, tu' xit hok, nūy Topa pu hām'āktux.

Ha ta' xip Yeyox, ha ta' nūn tikmū'ūn, tu nūktu' yīkopit, hu:

–Yoām mūtik mōg xop xit hok, nūy Topa pu hām'āktux xix Paniye xop te' kamah. Texīy 'ōg tik te' 12 xop xit hok 'ohnāg, nūy Topa pu hām'āktux? Kaxīy.

¹⁹ Ha Yeyox te:

–Tikmū'ūn te yāyta pēnāhā', ha' xip tik te yāyap-tup. 'Ok tikmū'ūn xit hok nōmhā'? 'Āmhok, yā' xit.

²⁰ Nāy, pu tik te yāyta mōg, ha tikmū'ūn xit hok nōmhā'. Hā kaxīy 'ūk̄xip, 'Ihā yāy yōg tik te' 12 xit hok 'ohnāg. Nāy, 'ūgmōg putup, 'Ihā' xit hok putup. Kaxīy.

²¹ Tu Yeyox te xe:

–Tikmū'ūn te' xap 'ohnāg topixxax yāg tup, yā' pix 'ohnāg, xix topixxax kunox. Ka' xap, ha' pix, puxix yāg yāy nū'nā', ha topixxax yāy pot.

²² Ha ta' pux 'ohnāg tikmū'ūn te xupyāg tup xokxax kox kutut kopah. Ka' pux, puxix xupyāg xokxax kox kōxyōy, ha' xaxok xupyāg, ha' kummuk xokxax kox. Pa'

pux xupyāg tup xokxax kox tup kopah, pu' max. Hā kaxīy tikmū'ūn te mōnāyxop yōg hāp̄xopmā'ax tat, xix kama yōgnū hāp̄xopmā'ax tat, pu' kummuk. Kaxīy.

Yeyox te' āmnīy hām hok 'āktux

²³ Nit xap, yā 'āmnīy hām hok, ha ta' mōg Yeyox xix yāy yōg tik te 12 xop, tu mōktu xuxnāg ta xe tox yōg hām mep, tu xuxnāg ta xe tox mep, nūy mā',

²⁴ ha ta' nūn Paniye xop tu' yīkopit, hu:

–Teptu 'ōg tik xop te' mep 'āmnīy hām hok 'Ihā'? Yā' kummuk. Yūmū yōg xat'ax kax'āmi tappet tu', tu' xat, pu hām hok 'āmnīy hām hok 'Ihā'. Kaxīy.

²⁵ Ha Yeyox te:

–'Ok 'āxop te' mōkupix tappet tu'? Putep mūn mīy Namix? Yā putup tep-tex Namix xix yāy yōg tihik.

²⁶ Namix mōg, tu mōktu Topa pet hā mō'nāhā', pa' mām pām, yā Topa keppa' mām, ha Namix te' pām pop tu' māhā', tu yāy yōg tik xop pu' popmāhā', puyīy mā', 'Ihā 'āmānex yā 'Amit, tu 'āmānex xop xohix xat 'ūkax'āmi yūmū yōg xat'ax yōg tappet tu'. 'Ūxat, pu 'āmānex te nōm pām mā', pa' nōy mā hok, pa Namix te' māhā'. Kaxīy.

²⁷ Ha Yeyox te xe:

–Topa te tikmū'ūn pu 'āmnīy hām hok mīy, pa 'ap 'āmnīy hām hok pu tikmū'ūn mīy'ah. Yā 'āmnīy hām hok te tikmū'ūn yōg kāmānat putuk, pa tikmū'ūn te 'āmnīy hām hok yōg kāmānat putuk 'ohnāg.

²⁸ ha tak mūn Tikmū'ūn Kutok te' xat 'āmnīy hām hok yōg hāp̄xopmā'ax. Kaxīy.

3

Yeyox xix tik yīm te nū' yāy nūnnāhā'

¹ Tu ta' mōg Yeyox, tu mōktu Yoneo xop yōg Topa pet hā xe mō'nāhā', pa' xip tihik, tu' yīm te nū' yāy nūnnāhā',

² ha ta' pip tikmū'ūn, tup-tup, nūy Yeyox hāpkummuk mīy pēnā' nit xap 'Ihā', nūy hām'āktux, hu:

–Yeyox te' xat'ax mīy 'ohnāg. Kaxīy.

³ Ha Yeyox te tik pu hām'āktux, hu:

–Mā'. Kaxīy.

⁴ Tu ta' tikmū'ūn pu hām'āktux hu:

–Putep xat Topa yōg xat'ax yōg tappet? Putep xat, puyīy tikmū'ūn hāp̄xopmā nit xap 'Ihā', yā 'āmnīy hām hok 'Ihā': 'ok pe hāp̄xopmā max, 'ok pe hāp̄xopmā kummuk? 'Ok pe tikmū'ūn hīnnāhā, 'ok pe tikmū'ūn nīm, puyīy xakix? Kaxīy.

Pa tikmū'ūn te hāmaāktux 'ohnāg.

⁵ Ha' gāy Yeyox, tu' kuxa hīttup 'ohnāg, tikmū'ūn te hāmyūmmūg putup 'ohnāg hah.

Ta Yeyox te tik pu:

–'Āpu yā 'ūyōa 'āyīm. Kaxīy.

Ha' yoa', ha' yīm hīttup.

⁶ Hāpxip ha ta' mōg Paniye xop, tu mōktu xat'ax xexka 'Enot yōg xop mütik hām'āktux, tu hām'āktux texī Yeyox putex putup.

Yeyox te pakut xop nōy hittupmāhā'

⁷ Ha ta' mōg Yeyox xix yāy yōg tik te 12 xop, tu mōktu' mōxaha kōnāg xexka Ganinet kux tu'. Ha ta' nūn tikmū'ün xohix, yā hāpxexka Ganinet yōg xop, xix hāpxexka Yonex yōg.

⁸ xix kōmēn Yenoyanēn yōg, xix hāpxexka 'Inumēn yōg, xix kōnāg kox Yohnām kūnāpa yōg xop, xix kōmēn Tinok yōg, xix Tinok yīmap pip xop, xix kōmēn Xinōm yōg, xix Xinōm yīmap pip xop. Yā' xohix te Yeyox yōg hāpxopmā'ax 'āpak, hu' nūn, nūy Yeyox pēnā'.

⁹ ha ta yāy yōg tik xop mō'pok Yeyox te, puyīy mīpkox nūnnā', puyīy tikmū'ün xohix Yeyox mō'yōn hok.

¹⁰ Yā tikmū'ün xohix hittupmāhā Yeyox te', yīy ta tikmū'ün pakut xohix nūn, nūy yāy mō'yōn, nūy Yeyox 'āpit, puyīy hittupmā'.

¹¹ Ha ta' pip tikmū'ün, tu' kopa' pip yāmīy kummuk, tu' nūn, tu' nūktu kup tomāhā Yeyox keppah, tu hām'āktux ka'ok, hu:

—Āmūn yā Topak-tok! Kaxīy.

¹² Pa Yeyox te yāmīy kummuk xat ka'ok, hu:

—Hām'āktux hok, yāg-mūn yā Topak-tok 'āktux hok. Kaxīy.

Yeyox te yāy yōg tik te 12 yīymōgātux

¹³ Tu ta' mōg Yeyox, tu mōktu yīktix tu' pūnāp, tu' nōy xānāhā', ha ta' nūn,

¹⁴ ha Yeyox te tik te 12 yīmōgātux, puyīy Yeyox mütik mōg, puyīy Yeyox tik mō'pok, puyīy tik Topa yōg hām'āpak max'ax 'āktux, yā' xuxet'ax Yeyox yōg mō'pok xop.

¹⁵ Yeyox te nōm ka'ogāhā, pu yāmīy kummuk mōy.

¹⁶ Tik te 12 xop kopa' pip yā Xīmām, kama' xuxet'ax Pet,

¹⁷ xix Tiak xi' taknōy Yoām, yā Yemeneo kutok, yā Tiak xix Yoām 'āxet'ax nōy Motnēy, yā tikmū'ün yīy'ax kopa yā' yāy no'ok kutok,

¹⁸ xix 'Ānene', xix Pinip, xix Matōmēo, xix Māteo, xix Tōmē', xix 'Appeo kutok Tiak, xix Tanep, xix Xīmām, yā tutep-tup, puyīy 'Iyaet xop yāyhā xexkah,

¹⁹ xix Yot 'Ixkanot, yā tute' gāy xop mōgāhā Yeyox hah, puyīy xūygā'.

Yeyox xix Hāmgyāgnāg

²⁰ Ha ta' nūn Yeyox, tu' nūktu mīptut hā mō'nāhā', ha tikmū'ün xohix nūn, ha Yeyox xit putup, pa yā' xit 'ohnāg, yā tikmū'ün xohix pip.

²¹ Ha ta' nūn Yeyox xape xop, nūy Yeyox mōgā', yā' xupak tikmū'ün te' xuktux Yeyox putox kummuk,

²² ha kōmēn Yenoyanēn yōg tik te hām yūmmūg xop te:

—Yeyox kopa' xip Meyemo', yā yāmīy kummuk xop yōg xat'ax, ha Meyemo te Yeyox ka'ogāhā', puyīy yāmīy kummuk mōy. Kaxīy.

²³ Ha Yeyox te tikmū'ün xohix xānāhā', nūy hāmīyūmmūgā', tu hām'āktux'ax hā hāmīyūmmūgāhā'. Tute:

—Texīy Hāmgyāgnāg te tikmū'ün kopa yāy xut?

²⁴ Hāpxexka yōg tikmū'ün te yāy pot, nūy yāy kix, tu hāpxip 'Thā' xakix 'ūxohix.

²⁵ 'Ūxape xop te yāy pot, nūy yāy kix, tu hāpxip 'Thā' nōg 'ūxape xop.

²⁶ Hā kaxīy Hāmgyāgnāg xop te yāy pot, nūy yāy kix, puxix xakix 'ūxohix.

²⁷ —'Ūxupxet te hāpxop hā' xupxet putup mīptut kopah, pa' xip tik ka'ok mīptut kopah. Texīy hāpxop xupxet putup? Yā tik ka'ok xoxit hā' hīy hāmāxap, tu nōmhā' xupxet. Hā kaxīy 'āte Hāmgyāgnāg hīy, nūy tikmū'ün kopa yāmīy kummuk mōy.

²⁸ —'Āpu 'ūxaxogā hok. Topa te tikmū'ün yōg hāpkummuk mīy'ax xohix xaxogā yūmmūg, pu tu' kux. Tikmū'ün te Topa 'āktux kummuk, ha Topa te' xaxogā yūmmūg, pu tu' kux.

²⁹ Pa tikmū'ün te Topa Koxuk 'āktux kummuk, ha Topa te' xaxogā yūmmūg 'ohnāg. Yā' xip 'ūyōg hāpkummuk mīy'ax mōkuma' mōg, tu' kux 'ohnāg. Kaxīy.

³⁰ Hā kaxīy hām'āktux Yeyox. Hamūn, tikmū'ün te hām'āktux, 'ūxip yāmīy kummuk Yeyox kopah. Pa 'āmhok, yā Topa Koxuk te' kopa' xip.

Yeyox mūktut xi' taknōy xop

³¹ Ha ta' nūn Yeyox mūktut xi' taknōy xop, tu' nūktu hāptopa' pip, tu' nōy mō'kutnāhā', puyīy Yeyox xānā'.

³² Ha ta kopa' mām tikmū'ün Yeyox mütik, tu hām'āktux, hu:

—Hāptopa' pip 'ātut xix 'ātaknōy xop, tu 'āxānāhā'. Kaxīy.

³³ Ha:

—Tep-te 'ūktut putuk xik taknōy xop putuk? Kaxīy.

³⁴ Tu' yāy yīmap xop pēnāhā', tu:

—Pēnā nūhū', yāg tut xik taknōy xop.

³⁵ Nōm te' mīy Topa te' nōm putup, yāg taknōy xop xik hex xik tut yāg xape xop. Kaxīy.

4

Hāpxopxap

¹ Ta xe tikmū'ün pu hāmīyūmmūgāhā Yeyox te kōnāg xexka Ganinet kux tu', ha ta' pip tikmū'ün xohix, yīy ta' mō'nāhā mīpkox hā, tu' yūm, ha' pip tikmū'ün hāmīyūmmūg hām kux tu',

² ha Yeyox te hām'āktux'ax hā hāpxop xohix yūmmūgāhā', nūy Topa yōg hāpxopmā'ax yūmmūgāhā', tu:

³ —'Ūgxupex, 'ūmōg tihik, nūy hāp̄xor̄xap mō'pok,

⁴ tu hāp̄xor̄xap mō'pok, ha yāg te nū'nāhā putat kopah, ha ta' nūn putuxnāg, tu' xohix māhā',

⁵ ha ta' yāg nōy te nū'nāhā hām kutōgnāg kopa mīkaxxap yīmū' yūm, tu hāp̄xip kutōgnāg 'Ihā' xokax hām tūnēm̄nāg tu',

⁶ pa māyōn xip, ha mō'hap, tu' nak, yā' yīpxatit kutōgnāg, hu' nak,

⁷ ha ta' yāg nōy te nū'nāhā mīmyām kup kakak, tu' xokax, tu' tuk, ha mīmyām kup tuk, tu' nōy mō'nīy, ha' ta' 'ohnāg,

⁸ ha ta' yāg nōy te nū'nāhā hām max kopah, tu' xokax, tu' tuk, tu mōktu kup puxet te mīnta te' 30 popmāhā', ha ta kup nōy ta' tu 60, ha ta kup nōy ta tu 100. Kaxīy.

⁹ Tu xe:

—'Āyīpkox pip, nūy ta 'āpu yā xupax. Kaxīy.

Yeyox te hāp̄xor̄xap 'āktux

¹⁰ Ha ta' mōg tikmū'ūn punethok, ha ta' yāg xip Yeyox mūtik xix Yeyox yōg tik te 12 xop mūtik, tu yāy tu nū'nāhā', nūy Yeyox mūtik hām'āktux, tu:

—Hāmyūmmūg'ax 'ūm yūmmūgāhā xate? Kaxīy.

¹¹ Ha:

—Texīy Topa te yāy yōg tikmū'ūn xat, ha' yīpkox pip? Topa te xa' mūg. Pa Topa te 'āxop kūnāpa pip xop pu hāmyūmmūgāhā hām'āktux'ax hā,

¹² puyīy hāmpēnā', pa hāmyūmmūg 'ohnāg, puyīy hām'āpak, pa hāmyūmmūg 'ohnāg, puyīy yāy yōg hāpkummuk mīy'ax nīm hok, puyīy Topap-tuppax hok, puyīy Topa tikmū'ūn yōg hāpkummuk mīy'ax xaxogā hok, pu tu' kux 'ohnāg. Kaxīy.

¹³ Tu xe:

—'Āxop te hām'āktux'ax yūmmūg 'ohnāg. Texīy 'āxop kūnāpa pip xop te nōm yūmmūg? Kaxīy.

¹⁴ Tu xe:

—Tik te hāp̄xor̄xap mō'pok. Hā kaxīy tikmū'ūn te Topa yōg hām'āktux'ax 'āktux, ha hāp̄xor̄xap te Topa yōg hām'āktux putuk,

¹⁵ ha ta hāp̄xor̄xap yāg te nū'nāhā putat kopah, ha ta' nūn putuxnāg, tu' māhā'. Hā kaxīy tikmū'ūn te Topa yōg hām'āktux'ax 'āpak, pa Hāmgāyāgnāg nūn, tu Topa yōg hām'āktux'ax xut.

¹⁶ Ha ta hāp̄xor̄xap yāg te nū'nāhā hām kutōgnāg kopa mīkaxxap yīmū' yūm, tu' xokax, tu' nak mō'ka'ok 'ūyīpxatit kutōgnāg hah. Hā kaxīy tikmū'ūn te Topa yōg hām'āktux 'āpak, tu' kuxa hittup,

¹⁷ pa hāp̄xip 'Ihā tikmū'ūn te' kuxa mām xop kute'ex kummuk, ha' kuxa mām kux.

¹⁸ Ha ta hāp̄xor̄xap yāg te nū'nāhā mīmyām kup kakak, tu' xokax, ha mīmyām te' nōy mō'nīy, ha' ta' 'ohnāg. Hā kaxīy tikmū'ūn te Topa yōg hām'āktux 'āpak,

¹⁹ pa hām xexka yōg hāp̄xor̄mā'ax pe'paxex punethok, tu 'ūp-texop xexkap-tup, tu hāp̄xor̄xap xohix putup, hu Topa yōg hām'āktux xaxok, tu hāp̄xor̄mā max mīy'ah.

²⁰ Ha ta hāp̄xor̄xap yāg te nū'nāhā hām max kopah, tu' xokax, tu' tuk, tu mōktu kup puxet te mīnta te' 30 popmāhā', ha ta kup nōy ta' tu 60, ha ta kup nōy ta' tu 100. Hā kaxīy tikmū'ūn te Topa yōg hām'āktux'ax 'āpak, tu' kuxa mām nōm kopah, tu hāp̄xor̄mā max punethok. Kaxīy.

Kuyānām

²¹ Tu Yeyox te xe:

—'Ok tikmū'ūn te kuyānām tat'ax xex manax kopah? 'Āmhok. 'Ok tikmū'ūn te kuyānām tat'ax xex mīmpe mō'yōn'ax kakak? 'Āmhok. Pa tikmū'ūn te kuyānām tat'ax yōg yūm'ax yīmū' xex, ha nōmhā kuyānām max, ha tikmū'ūn te hāp̄xor̄ pēnāhā'.

²² Hā kaxīy tikmū'ūn te hāp̄xor̄mā xap-top hōnhā', ha tikmū'ūn te' pēnā 'ohnāg, pa hāp̄xip 'Ihā tikmū'ūn xohix te' pēnāp-tup.

²³ 'Āyīpkox pip, nūy ta 'āpu yā xupax. Kaxīy.

²⁴ Ta Yeyox te xe:

—'Āpu 'ākuxa hā' xupax. Xate 'ānōy yōg hāp̄xor̄mā'ax kopit, puxix Topa te 'ōg hāp̄xor̄mā'ax kopit, yā' yāy putuk, yā Topa te 'ōg hāp̄xor̄mā'ax kopit xe'ēgnāg putup.

²⁵ Tikmū'ūn yōg hāp̄xor̄ pip, puxix hāp̄xor̄ nōy pop putup. Tikmū'ūn yōg hāp̄xor̄ kutōgnāg pip, puxix nōm xaxok putup.

Hāp̄xor̄xap

²⁶ Tu Yeyox te xe:

—Texīy Topa te yāy yōg tikmū'ūn xat, ha' yīpkox pip? Yā' putuk, tik te hāp̄xor̄xap mō'pok, ha' xokax, tu' tuk.

²⁷ Texīy 'ūxokax? Texīy 'ūtuk? Tik te' yūmmūg 'ohnāg. 'Āmniy hā mō'yōn, tu hāptup hā hāpkumep, 'Ihā' tuk.

²⁸ Hāp̄xor̄xap te hām hā' mōxaha', tu' xokax, tu' tuk, ha' tut pip, ha' xap ta punethok.

²⁹ Yā' ta, ha tik te' mep kupukhe hā, tu' nūnnāhā'. Hā kaxīy Topa yōg tikmū'ūn xohix nōy nā' mōg, Topa te nōm xat. Kaxīy.

Mōytat xap

³⁰ Tu Yeyox te xe:

—Texīy Topa te yāy yōg tikmū'ūn xat, ha' yīpkox pip? Texīy 'āte xa hāmyūmmūgāp-tup?

³¹ Yā hāp̄xor̄xap putuk, yā mōytat xap putuk. Yā' kutōgnāg mōytat xap, pa hāp̄xor̄xap nōy xohix 'ūxexkah.

³² Tikmū'ūn te mōytat xap xok, tu' xokax, tu' tuk, tu mōktu kup tox, ha ta' kup nōy kutōgnāg, ha mōytat kup māg xexkah, ha ta' nūn putuxnāg, tu yāy pet mīy mīm māg tu'. Hā kaxīy Topa yōg tikmū'ūn xop kutōgnāg hāmāxap, pa' xohix nōy nā'mōg tu mōktu' xohix. Kaxīy.

³³ Hā kaxīy Yeyox te tikmū'ūn pu hāmyūmmūgā punethok hām'āktux'ax hā, yīy tīkmū'ūn te hāmyūmmūg.

³⁴ Yā tīkmū'ūn pu hāmyūmmūgāhā hām'āktux'ax hā, pa yāy yōg tik te 12 xop mütik hām'āktux nōy, nūy hāmyūmmūgā'.

Yeyox te 'āmuuh xat xix kōnāg tot

³⁵ Āmnīy ha ta yāy yōg tik xop pu Yeyox te: —Āpu yūmū kōnāg xexka xak, nūy kūnāpa mōg. Kaxīy.

³⁶ Ha Yeyox yōg tik xop te tīkmū'ūn mō'pok hatō'ah, ha' mōg, ha ta' mōg tihik Yeyox hah, tu yōg mīpkox hā' mōxaha', tu ta' mōg Yeyox mütik, ha ta mīpkox xape mōg kama nūmütik,

³⁷ pa hāpxip 'īhā' āmuuh xexka nūn, ha ta' nūn kōnāg tot xexka', tu nūktu mīpkox hā' mōxaha', ha mīpkox te kōnāg hā nū'xip,

³⁸ ha Yeyox mō'yōn mīpkox xahixpa tu', tup-tox tep-tox yūm'ax yīmū' yūm, ha Yeyox yōg tik xop te' nuhuk, ha' koxak, ha hām'āktux, hu:

—Yāyā, yūmūg xakix putup. 'Ok 'ūgmūg kuxa ka? Kaxīy.

³⁹ Ha Yeyox yok, tu 'āmuuh xat xix kōnāg tot, puyīy tu xuxix, ha' xuxix, tu nū'yēy.

⁴⁰ Ha Yeyox te yāy yōg tik xop pu yīkopit, hu:

—Texīy 'ākuxa nōg? 'Ok 'ākuxa mām 'ohnāg? Kaxīy.

⁴¹ Ha tik kuxanōg, tu:

—'Ū'ūm tihik? Yā tute 'āmuuh xat xix kōnāg tot, ha' xuxix, tu nū'yēy! Kaxīy.

5

Tik kopa' pip yāmīy kummuk

¹ Tu ta' mōg Yeyox xix yāy yōg tik xop mīpkox hā, tu mōktu' mōxaha kōnāg xexka Ganinet kux tu' hāpxexka Yenax tu',

² tu mīpkox nīm, tu ta' mōg, pa' xip tihik, ha tik kopa' pip yāmīy kummuk.

³ Yā tik pet yūm xukpot tu', ha' nūn. Yā' gāy, ha tīkmū'ūn te' hīy yūmmūg 'ohnāg māxap hā.

⁴ Yā tīkmū'ūn te' mūg punethok, nūy māxap hā' hīy 'ūyīm xi' pata', pa tik te' koxyōy 'ūxohix, tu' mōg. Yā tīkmū'ūn te' hīy yūmmūg 'ohnāg.

⁵ Hāptup 'īhā' xip tihik yīktix tu' xix xukpot tu' xix 'āmnīy 'īhā' kamah, tu' xahok ka'ok, tu yāy po'oxnām mīkaxap hā.

⁶ Ta Yeyox pēnāhā hāptox tu, tu ta' nōy ha' nūn mō'ka'ok, nūktu Yeyox pu nū'xup,

⁷ tu hām'āktux ka'ok, hu:

—Yeyox, yā Topa xexka xe'ēgnāg kutok, 'āte xa tatu' xak: 'Āpu yā 'ūgkummugā hok! Kaxīy.

⁸ Yā hamūn, Yeyox te: "Yāmīy kummuk, tik kopa 'āpep!" Kaxīy.

⁹ Tu Yeyox te:

—'Āxuxet'ax texīy? Kaxīy.

Ha:

—'Ūkxuxet'ax 'Ūxohix Xop, yā 'ūgmūgmūn punethok. Kaxīy.

¹⁰ Tu xe:

—'Āpu 'ūgmūg mō'pok hatō'a hāptox tu'. Kaxīy.

¹¹ Ha ta' pip xapup xohix, tu' xit yīktix tu' hāmhūmnāg.

¹² Ha yāmīy kummuk te Yeyox pu hām'āktux, hu:

—'Āpu 'ūgmūg xat, 'ūyīy xapup hā mōxān' Kaxīy.

¹³ Ha Yeyox te' xat, ha tik nīm, tu ta' mōg, tu mōktu xapup hā' mōxaha'. Yā' xohix xapup, yā' xohix te' 2000 kōmnāg, tu ta' mōg mō'ka'ok, tu mō'yīxohō', tu mōktu kōnāg xexka hā' mōxaha', tu' xakix xit hā.

¹⁴ Ha ta' nū'paha xapup pēnā'ax xop, tu nōm 'āktux kōmēn yōg tīkmū'ūn pu xix hām panip yōg tīkmū'ūn pu',

¹⁵ ha ta' nūn tīkmū'ūn xohix, nūy hām pēnā', tu' nūn, tu nūktu Yeyox yīka' pip, tu tik pēnāhā', pa' pip'ah yāmīy kummuk tik kopah, ha tīkmū'ūn kuxa te' yēy. Yā tik yūm, tu' xax taha', tup-tox max.

¹⁶ Ha ta tīkmū'ūn pu hāpxopmā'ax xohix 'āktux nōm te tik pēnāhā xix xapup,

¹⁷ tu Yeyox pu tatu' xak, puyīy mōg hatō'ah,

¹⁸ ha ta' mōg Yeyox, tu mīpkox hā mō'nāp-tup, ha tik nūn, tu:

—'Ūgmōg putup 'āmütik. 'Ok max? Kaxīy.

¹⁹ Pa Yeyox te:

—'Āmhok. 'Āpu mōg yāy pet hah, nūy 'āxape xop pu' xuktux yūmūg xuxyā Topa te xa' mīy. Kaxīy.

²⁰ Ha ta' mōg tihik, tu mōktu hām'āktux Kōmēn te' 10 tu', xix kōmēn yīkak, yā' xuktux Yeyox te' mīy, ha tīkmū'ūn xohix tep-tup pax.

Yax te Yeyox xānāhā'

²¹ Ha ta' mōg Yeyox mīpkox hā, tu kōnāg xexka xak putpu', tu mōktu' xupep, ha ta' nūn tīkmū'ūn xohix, nūy Yeyox pēnā',

²² ha ta' nūn tihik 'ūxuxet'ax Yax, yā Yoneo xop yōg Topa pet yōg tik xat'ax, 'ūnūn, tu nūktu Yeyox pata yīka' mōhāmñy,

²³ tu:

—'Ūk-tok hex xok putūmnāg. 'Āpu mōg, nūy 'ūyīmū' 'āyīm nōm, puyīy xuxix, puyīy hi! Kaxīy.

²⁴ Ha ta' mōg Yeyox tik mütik xix tīkmū'ūn xohix mütik. Yā tīkmū'ūn xohīynāg, hu yāy mō'yōn.

Yeyox te 'ūn pakut hittupmāhā'

²⁵ Ha ta' nūn 'ūhūn, yā' pakut, yā 'ūn hep kux 'ohnāg hāmyāxatamuk xohix te' 12 hā.

²⁶ Yā nonot punethok te tu' popmāhā hehmēn, yīy tayūmak noa'. Yā' hittup 'ohnāg, pa' pakut xexka nōy nā' mōg.

²⁷ Tikmū'ūn te Yeyox 'āktux, ha 'ūn te' xupak, tu ta' mōg, tu tikmū'ūn xohix kopa' mōg, tu Yeyox pe' mōg, tu' topixxax 'āpit.

²⁸ Yā 'ūn te hāmpē'paxex, hu: "Āte 'ūyōg topixxax 'āpit, kopxix hittup." Kaxīy.

²⁹ Hāpxip kutōgnāg 'īhā' hep kux, ha 'ūn te' yūmmūg 'ūhittup xe'e',

³⁰ ha Yeyox te' yūmmūg yāy kopa' xupep hāpka'ok. Yeyox yōkânām, tu tikmū'ūn pu' yīkopit, hu:

—'Ū'ūm te yōg topixxax 'āpit? Kaxīy.

³¹ Ha Yeyox yōg tik te 12 xop te:

—Tikmū'ūn xohix te yāy mō'yōn 'āyīmap. Texīy xate' yīkopit? Kaxīy.

³² Pa Yeyox yōkânām, nūy pēnā nōm te' xupit,

³³ ha 'ūn te' yūmmūg, hu' nūn, tu nūktu Yeyox pata yīka mōhāmniy, tu' yīpkutuk, hu yāy puxu'ux, tu hāpxopmā xohix 'āktux.

³⁴ Ha Yeyox te:

—Tukūm, 'ākuxa yūm ka'ok 'ūgkopah, hu 'āhittup. 'Āpu 'ākuxa nōg hok. Mōg! 'Āhittup! Kaxīy.

Yeyox xix Yax kutok

³⁵ Yeyox te 'ūn mūtik hām'āktux, ha ta' nūn Yax yōg kāmānat, yā Yax pet tu' nūn, nūktu:

—Yax, 'āk-tok hex xok. 'Āpu notot Yeyox xānā hok. Kaxīy.

³⁶ Pa Yeyox te nūmūtik hām'āktux 'ohnāg, pa Yax pu hām'āktux, hu:

—'Āpu 'ākuxa nōg hok. 'Āpu 'ākuxa yūm ka'ok! Kaxīy.

³⁷ Yeyox te tikmū'ūn xohix xat, pu mōg hok yāy mūtik, pa' xat, pu mōg Pet xix Tiak xix Yoām,

³⁸ tu ta' mōg, tu mōktu Yax pet hā' mōxaha', pa' pip tikmū'ūn, tu' potaha', tu' xaho ka'ok,

³⁹ ha Yeyox te:

—Texīy 'āxop potaha', nūy xaho ka'ok? 'Ūk-tok hex xok tāmnāg 'ohnāg. Yā mō'yōn. Kaxīy.

⁴⁰ Ha tikmū'ūn yīxix, pa Yeyox te xohix xat, pu hāptopa mōg. Yā' mōg 'ūxohix. Ha ta' mōxaha Yeyox xix yāy yōg tik te' 3 xik-tok hex mūktak xī' tut 'ūk-tok hex yōg mīptut kox hā,

⁴¹ ha Yeyox tek-tok yīm mūg, tu:

—"Tanita kōmīy!" Kaxīy. Yā tikmū'ūn yīy'ax hā: "Nixix, 'āpu 'āk-nīhāxip!" Kaxīy.

⁴² Yā hāpxip 'ohnāg 'īhāk-tok hex yīpxit, nūy pepi' xip, nūy hāpkumep, ha tikmū'ūn te' yēy. Yāk-tok hex yōg hāmyāxatamuk xohix te 12,

⁴³ ha Yeyox te tikmū'ūn xat, puyīy tikmū'ūn pu nōm 'āktux hok, tu' xat, puk-tok hex pu xit'ax hōm.

6

Yeyox xip Nāyane tu'

¹ Tu ta' nūn putpuk Yeyox xix yāy yōg tik xop kōmēn Nāyane tu', tu nūktu kōmēn hā' mōxaha'.

² Nit xap 'īhā' mōg, tu mōktu Yoneo xop yōg Topa pet hā mō'nāhā', tu tikmū'ūn pu hāmyūmmūgāhā', ha tikmū'ūn te' xupak, tu hām'āktux'ax putup nōg, tu:

—Texīy tik te hāpxop xohix yūmmūg? Tep te tik pu hāmyūmmūgāhā'? Texīy tik te hāpxopmā ka'ok xe'ēgnāg?

³ Yūmū'āte tik yūmmūg. Yā mīmpe mīy, yā Mānix kutok, yā taknōy 'ūxuxet'ax Tiak, xix Yoye', xix Yot, xix Xīmām. Yā' hex tihi nūnteh kamah. Kaxīy.

Yā tikmū'ūn te' yūmmūg putup'ah, Yeyox yā Topak-tok.

⁴ Pa Yeyox te:

—Tikmū'ūn te yāy xape 'āpak 'ohnāg nōm te Topa pupi hām'āktux. Kaxīy.

⁵ Yeyox te hāpxopmā ka'ok xe'ēgnāg, pa' mīy kutōgnāg. Yā' pakut xop yīmū' yīm xex, nūy hittupmā' yā 'a' xohix'ah hittupmāhā' kōmēn Nāyane tu'.

⁶ Yā tikmū'ūn kuxa mām 'ohnāg, ha Yeyox kuxa hittup 'ohnāg.

Yeyox yōg tik te 12 xop mōg

Tu ta' mōg Yeyox, tu mōktu xiptuxexka xohix yōg tikmū'ūn pu hāmyūmmūgāhā' kōmēn Nāyane yīkak.

⁷ Tu ta' xānāhā yāy yōg tik te 12 xop, ha' nūn, ha Yeyox te nōm ka'ogāhā', puyīy yāmīy kummuk mōy. Tute tik mō'pok, pu mōg 'ūtix tu pe' tix hā kaxīy, puyīy yāmīy kummuk mōy.

⁸ Yeyox te:

—Hāpxop tat hok, yā xit'ax tat hok, xix tayūmak tat hok, pa mīm hām tonnognā 'āmōg.

⁹ 'Āpu pataxax tat. 'Āpu kāmīn puxehnāg mō'tat. Kaxīy.

¹⁰ Tu xe:

—'Āxop mōg putup, tu kōmēn hā 'āmōxap-tup, tu mīptut hā' 'āmōxap-tup. 'Āpu nox pi' mīptut puxet kopah, tu mōktu 'āmōg, tu kōmēn nīm.

¹¹ Pa kōmēn yōg tikmū'ūn te 'āp-tup nōg, tu hām'āktux'ax putup nōg, nūy ta mōg. 'Āpu nox pi' hok. 'Āxop te yāy pataxax tu hāpxut nuhuk putup, xayīy hām'āktux 'ūkummuk tikmū'ūn. Kaxīy.

¹² Ha ta' mōg Yeyox yōg tik xop, tu tikmū'ūn pu hām'āktux, hu:

—'Āpu 'āyāyhāhup, nūy hāpkummuk mīy kux. Kaxīy.

¹³ Tik te yāmīy kummuk mōy, tu tikmū'ūn punethok pakut putox pix heptox hā, tu nōm hittupmāhā'.

Yoām xok

¹⁴ Ha ta' xip 'Enot, yā tikmū'ūn yōg xat'ax xexkah, tu nōm hāpxopmā'ax 'āpak,

yā tikmū'ūn xohix te Yeyox yūmmūg, tu hām'āktux punethok. Tikmū'ūn yāg te:

—Yā' putpu' hi Yoām nōm tep-tox pix, tu hāpxopmā ka'ok xe'ēgnāg. Kaxīy.

¹⁵ Ha ta yāg te:

—Yā 'Enit. Kaxīy.

Ha ta yāg nōy te:

—Yā tute Topa pupi hām'āktux, yā Topa pupi hām'āktux xop hittap putuk. Kaxīy.

¹⁶ Ha 'Enot te' xupak, tu:

—Yā Yoām nōm tep-tox pix. Hōmā 'āte' xat, pup-tox xax, ha' kuyut, pa hōnhā putpu' hi'! Kaxīy.

¹⁷ Hamūn, hōmā 'Enot te' xat, puyīy xonat Yoām mūy, puyīy 'ūyīm hīy, puyīy kanet ka'ok kopa' xix. Texīy? Yā hōmā 'Enot xix 'Enonit te yāy taha', pa 'Enonit yā 'Enot taknōy Pinip xetut,

¹⁸ yīy ta Yoām te 'Enot pu hām'āktux, hu: “Yā' max'ah. Topa yōg xat'ax kax'āmīx tap-pet tu, tu' xat, xayīy yāyta hok 'ātaknōy xetut mūtīk!” Kaxīy.

¹⁹ Yīy ta' gāy 'Enonit, tu Yoām putup nōg, hup-tup, puyīy Yoām putex. Pa 'ām hok,

²⁰ yā 'Enot te Yoām yīpkutuk, yā tute' yūmmūg yā' max xe'ēgnāg Yoām, ha Yoām putex putup'ah. Yoām te 'Enot pu hām'āktux punethok, ha 'Enot kuxa hittup 'ohnāg, pa 'Enot te' nōy yōg hām'āktux'ax putuppax.

²¹ Pa hāpxip 'hā 'Enot te yāy yōg hāmyāxatamuk yōg 'āmuk xexka mīy, ha ta' nūn gohet yōg xexka xop, yā' xat'ax xexka xop, xix xonat yōg xat'ax xop, xix hāpxexka Ganinet yōg xat'ax xop.

²² Ha ta' nūn 'Enonit kutok hex, nūktu' hāmyā max, ha 'Enot tep-tuppax xexka', yā hāmyā max. 'Enot tek-tok hex pu hām'āktux, hu:

—Xate putep-tup? 'Āte xa' hōm putup. Kaxīy.

²³ Tu xe hām'āktux xex, hu:

—Xate putep-tup? Yā 'āte xa popmāp-tup hāpxop xohix, tu mōktu yōg hāpxop xahix, yā' xahix yōgnū hāhām, xi' xahix yōgnū tikmū'ūn! Kaxīy.

²⁴ Ha ta' mōg 'ūk-tok hex, nūy tut mūtīk hām'āktux, nūy yīkopit, ha' tut te:

—'Āpu tatu' xax Yoām putox nōm tep-tox pix. Kaxīy.

²⁵ Ha putpu' nūn 'ūxat'ax tu', tu:

—'Ā' hōm mō'ka'ok Yoām putox kănēypetxax yīmū' yūm! Kaxīy.

²⁶ Ha ta' kuxa hittup 'ohnāg 'Enot, pa yā hām'āktux xex tu Topa 'āxet'ax 'āktux ha tikmū'ūn xohix te' xupak, yīy ta' hōm putup,

²⁷ hu hāpxip 'ohnāg 'hā xonat mō'kutnāhā', puyīy Yoām putox nūmā', ha ta' mōg xonat kanet ka'ok tu', tu Yoām putox xak,

²⁸ tu kănēypetxax yīmū' nūnnāhā', tuk-tok hex pu' hōm, ha ta' mōg, tu' tut pu' hōm.

²⁹ Ha ta' yūmmūg Yoām mūtīk mōg xop, tu ta' nūn, tu nūktu Yoām xokxax paha', tu ta' mōg, tu mōktu mīkaxxap kox kopa' xix xukpot tu'.

Yeyox te tikmū'ūn xohix pu' xit'ax popmāhā'

³⁰ Ha ta' nūn Yeyox yōg tik te 12 xop Yeyox hah, tu nūktu yāy yōg hāpxopmā'ax xohix 'āktux xix yōg hāmyūmmūg'ax xohix,

³¹ pa' pip tikmū'ūn xohix, tu xohix te hāpkumep, yīy ta' xit 'ohnāg Yeyox yōg tik xop, yā tikmū'ūn xohix pip. Ha Yeyox te yāy yōg tik xop pu hām'āktux, hu:

—'Āpu yūmū mōg hām panip xexka tu', nūy hām hok. Kaxīy.

³² Tu ta' mōg, tu mīpkox hā' mōxaha', tu ta' mōg, tu kōnāg xak.

³³ Pa tikmū'ūn punethok te mōg'ax pēnāhā', yā' Yeyox pēnāhā' xix tik xop. Ha ta' nūn xiptuxexka xohix yōg tikmū'ūn, tu pata hā' nūpaha hām kux tu', tu nūktu' mōxaha', tu' nōy hip.

³⁴ Ha ta' xupep mīpkox kōnāg xexka kux tu', ha Yeyox te' pēnāhā' tikmū'ūn xohix, tu' kuxa ka'. Kahnēn yōg pēnā'ax xip'ah. Hā kaxīy tikmū'ūn putuk. Yā' hittup 'ohnāg, yīy' kuxa ka', tu tikmū'ūn pu hāmyūmmūgāhā kōnāmāhā hāpxop punethok.

³⁵ Māyōn mō'nāp-tup 'hā' nūn Yeyox yōg tik xop, tu nūktu Yeyox pu hām'āktux, hu:

—Māyōn mō'nāp-tup, yā hām panip xexka nūnteh, yā xit'ax pip 'ohnāg.

³⁶ 'Āpu yā tikmū'ūn xat, pu mōg hāpxa'ax tu' xix xiptuxexka tu', puyīy xit'ax pop. Kaxīy.

³⁷ Pa Yeyox te:

—'Āpu tikmū'ūn pu xit'ax popmā'. Kaxīy.

Ha tik xop te:

—Texīy pām popmā tikmū'ūn xohix pu'.

'Ūyōg tayūmak xohix, yā tayūmak 'ānuk xohix te' 200, yā tayumak yānām ponnok. Kaxīy.

³⁸ Ha:

—Pām xohix texīy pip 'ōhnū'? Mōy pēnā' Kaxīy.

Tik mōg, tu putpu' nūn, tu:

—Yā pām te' 5 xix mām tix. Kaxīy.

³⁹ Ha Yeyox te tikmū'ūn xat, puyīy xux yīmū' mām, puyīy yānōm xohix hā' mām,

⁴⁰ ha' yānōm hā' mām, yā' yānōm kopa' mām xohix te' 100 xi' nōy kopa' mām xohix te' 50 hā kaxīy.

⁴¹ Ha Yeyox te' pām te' 5 pop xix mām tix, tu pexxok pēnāhā', tu:

—Topa, xate nū' popmāhā'. Yā 'āmax. Kaxīy.

Tu pām koxip, tu yāy yōg tik xop pu' popmāhā', puyīy tikmū'ūn pu popmā'. Tik te' popmāhā'. Ha ta mām tix koxip, tu' popmāhā' kamah,

⁴² ha tikmū'ūn xohix te' māhā', tu mōktu xe xit putup'ah. Puxix.

43 Ha ta' mōg Yeyox yōg tik xop, tu pām yāg pop xix mām yāg. Yā pām yāg hā nū'xip manax xohix te' 12 xix mām hā, ha' nūnnāhā'.

44 Hamūn, yā' xohix te pām māhā', yā' tik xohix te' 5000.

Yeyox te kōnāg yīmū' mōg pata hā

45 Hāpxip 'Thā Yeyox te yāy yōg tik xop pu hām'āktux hu:

—'Āpu mīpkox hā mōxakux, nūy mōg kūnāpa hāpkux nōy tu' xiptuxexka Metxax tu', ha 'āte tikmū'ūn mō'pok putup. Kaxīy.

46 Ha ta' mōg Yeyox yōg tik xop, ha ta' mōg Yeyox, tu yīktix yokoma', nūy Topa pu hām'āktux.

47 Āmnīy 'Thā' pip Yeyox yōg tik xop mīpkox kopa kōnāg xexka kote', ha ta yāp-xehnāg xip Yeyox hāpkux tu',

48 tu yāy yōg tik xop pēnāhā'. Tik te mīpkox hā mōgāhā', pa yā mōg putux, yā 'āmuuh te ha' nūn. Hāmāyāykuhmōy ha ta' mōg Yeyox, tu kōnāg xexka yīmū' mōg pata hā, tu nōā' yēn putup.

49 Ha tik te' pēnāhā yā Yeyox te kōnāg yīmū' mōg pata hā, ha hāmpē'paxex yā yāmīy putuk, tu' xahok.

50 Yā' xohix te' pēnāhā', tu' yīpkutuk. Pa hāpxip 'Thā Yeyox te:

—'Ākuxa nōg hok! Yāg mūn. 'Ūgyīpkutuk hok! Kaxīy.

51 Tu ta' mīpkox hā mō'nāhā Yeyox, tu' xip yāy yōg tik xop mūtik, 'Thā' kux 'āmuuh. Ha tik xop kuxa te' yēy,

52 yā tik te' yūmmōg 'ohnāg texīy Yeyox te tikmū'ūn te' 5000 xitnāhā', yā tik putox ka'ok.

Yeyox te tikmū'ūn hittupmāhā Yēnēyane tu'

53 Tu ta' mōg Yeyox xix yāy yōg tik xop, tu mōktu kōnāg kox kux tu' mōxaha' hāpxexka Yēnēyane tu', tu mīpkox tutxit hā hīy kōnāg kux tu',

54 tu ta' mōg, pa tikmū'ūn pip, tu Yeyox pēnāhā'.

55 tu ta' mōg, tu' pet xohix ha' xupaha', tu tikmū'ūn pakut tutpe hā' put nūn, tu nūktu Yeyox ha' nūnnāhā', ha Yeyox te nōm hit-tupmāhā'.

56 Tu ta' mōg Yeyox, tu hāpkumep xip-tuxexka xohix tu' xix kōmēn xohix tu' xix yānōm xohix tu', pa' pip tikmū'ūn xohix, tu' nūnnāhā tikmū'ūn pakut, tu nūktu nāpet hām tu' xex, tu Yeyox tu' xak, pu tux, puyīy pakut xop Yeyox yōg topixxax kuyāg 'āpit, ha pakut xohix te' xupit, tu' hittup.

7

Yoneo xop te mōnāyoxop yōg hāpxopmā'ax tat

1 Ha ta' nūn Paniye xop xix tik te hāmūmmūg xop, yā kōmēn Yēnoyanēn tu' nūn, tu nūktu Yeyox ha yāy tu nū'nāhā'.

2 Yā hōmā nōm te' pēnāhā Yeyox yōg tik xop xit 'ūyīm xut putūynāg hā, yā 'ap yīm pix'ah. Yā Paniye xop te tikmū'ūn xat, pu yāy yīm pix.

3 Yā Yoneo xop te mōnāyoxop yōg hāpxopmā'ax tat, ha Paniye xop te Yoneo xop kopa' xip, tu mōnāyoxop yōg hāpxopmā'ax tat punethok, tu yāy yīm pix max, tu nōmhā' xit,

4 tu nāpet tu' nūnnāhā hāpxop, tu nōm pix 'ūxohix, tu mōnāyoxop yōg hāpxopmā'ax nōy tat. Yā kōnāg xo'op'ax pix xix nax xix kenenām.

5 Tu ta' yīkopit Paniye xop te xix tik te hāmūmmūg xop te', hu:

—Texīy 'ōg tik xop te mōnāyoxop yōg hāpxopmā'ax tat 'ohnāg, hu yāy yīm xut putūynāg hā' xit? Kaxīy.

6 Ha Yeyox te:

—'Āpa max, pa yā 'ākuxa kummuk. Hōmā 'Iyait te' āxop 'āktux! Tute kax'āmi, hu: "Topa te: 'Tikmū'ūn tek mūn 'āktux max, pa yā' kuxa tek mūn xak 'ohnāg.

7 Tikmū'ūn tek mūn pu nūktettex, pa yā' kummuk. Yā tikmū'ūn te yāy yōg hām'āktux'ax 'āktux, tu: Yā Topa yōg xat'ax nūhū'." Kaxīy.

8 Tu Yeyox te xe:

—'Āxop te Topa yōg xat'ax mīy 'ohnāg, nūy mōnāyoxop yōg hāpxopmā'ax tat. Kaxīy.

9 Tu Yeyox te xe:

—'Āxop te Topa yōg xat'ax nīm pax, nūy yāy yōg xat'ax mīy.

10 Yā hōmā Mōyyex te' xat, hu: "Āpu 'ātak mō'yāy xe'ēgnāg, nūy nōm pu hāpxopmā max. 'Āpu 'ātut mō'yāy xe'ēgnāg, nūy nōm pu hāpxopmā max." Kaxīy.

11 Pa 'āxop te tikmū'ūn pu hāmūmmūgāhā', hu: "Ūxip tikmū'ūn yōg hāpxop, tu Topa pu' hōm, tu yāy 'ātak pu' hōm 'ohnāg xī' tut pu' hōm 'ohnāg. Nōmhā' max.

12 Nōmhā' hōm hok." Kaxīy.

13 Pa 'āmhok, hām'āktux kummuk. Hā kaxīy 'āxop te Topa yōg hām'āktux 'āpak 'ohnāg, pa yāy yōg hām'āktux 'āpak, tu 'āk-tok pu nōm yūmmūgāhā', tu 'āxop te hāpxopmā kummuk nōy punethok hā kaxīy. Kaxīy.

Tep te hām kummugāhā'?

14 Yeyox te xe tikmū'ūn xānāhā', ha' nūn, ha hām'āktux, hu:

—'Āpu yōg hām'āktux'ax 'āpax max, nūy hāmūmmūg:

15-16 Tikmū'ūn hāptopa' pip hāpxop, tu tikmū'ūn hā' mōxaha', tu' kopa' pip nōmhā. Yā hāpxop te kaxīy te tikmū'ūn kummugā 'ohnāg. Pa hāpxop pip tikmū'ūn kopah tu' mōxaha', tu mōktu hāptopa' pip. Yā hāpxop te kaxīy te tikmū'ūn kummugāhā'. Kaxīy.

17 Tu ta' mōg Yeyox, tu mōktu mīptut hā mō'nāhā', ha ta' nūn Yeyox yōg tik xop, nūy Yeyox yōg hām'āktux'ax yīkopit,

18 ha Yeyox te:

—Āxop te tikmū'ūn xohix putuk, yā hāmyūmmūg 'ohnāg. Hāpfox te hāptopa' pip, tu tikmū'ūn yīkox hā' mōxaha', tu kopa' pip. Yā hāpfox te kaxīy te tikmū'ūn kummugā 'ohnāg.

19 Yā' kuxa hā' mōxa 'ohnāg, pa yā' tex hā' mōxaha', tu hāpfox 'Thā' mōg hāptopah. Kaxīy. Yā Yeyox te' xuktux, yā' max xit'ax xohix.

20 Yeyox te xe:

—Hāpfox 'ūm te tikmū'ūn kummugāhā'? Hāpfox 'ūm te tikmū'ūn kopa' pip, tu' mōxaha', tu' mōg hāptopah?

21 Yā' pip hāpfox kummuk tikmū'ūn kuxa kopah, yā tikmū'ūn te hāmp'e'paxex kummuk, nūy hāpfox kummuk mīy, yā' xupxet, tu tikmū'ūn putex,

22 tu' nōy hā' xupxet, tu' xupkūmīy, tu hāpkummugā pax, yā' koit, tu hām'kute'ex pax, tu' yīpkumīy, tu' mānōg kummuk, tu yāy xexka pe'paxex, tup-tox kummuk.

23 Yā nōm xohix hāpfox kummuk te tikmū'ūn kopa' pip, tu' mōxaha', tu mōktu hāptopa' pip. Yā hāpfox te kaxīy te tikmū'ūn kummugāhā'. Kaxīy.

'Ūn puknōg

24 Tu ta' mōg Yeyox, tu mōktu hāpfoxka tu' mō'nāhā' kōmēn Tinok yīkak, tu mīptut hā mō'nāhā', tu yāy xaptop putup, pa 'ām'hok, yā tikmū'ūn xohix te' yūmmūg.

25 Ha ta' nūn 'ūhūn, hak-tok hex kopa' xip yāmīy kummuk. Yā tikmū'ūn te Yeyox'āktux, ha 'ūn te' xupak, hu' nūn, tu nūktu' kopaxux hā' xip Yeyox yīkak.

26 Yā 'ūn puknōg, yā hāpfoxka Xitpenīy yōg, tu Yeyox tu' xak, puyīy yāmīy kummuk xut 'ūk-tok hex kopah.

27 Ha Yeyox te:

—Tikmū'ūn tek-tok pu xit'ax hōm hāmāxap. 'Āp max'ah kakxop yōg xit'ax paha', tu kokex pu' hōm. Hā kaxīy Yoneo yōg hāpfox hōm hok puknōg xop pu'. Kaxīy.

28 Pa 'ūn te:

—Yāyā, hamūn, pa kokex kutok te mīmpe xit'ax kaka' pip, ha kakxop yōg pām yāgnāg xaha', ha' māhā'. Kaxīy.

29 Ha Yeyox te:

—Xate hām'āktux max. 'Āpu mōg yāy pet hah. Xip'ah yāmīy kummuk 'āk-tok kopah. Yā' mōg. Kaxīy.

30 Tu ta' mōg 'ūhūn yāy pet hah, tu nūktu' xupep, pa' xip 'ūk-tok hex, tu mīmpe mō'yōn'ax yīmū' pip, ha yāmīy kummuk xip'ah 'ūkopah.

Tik yīpkox hok, tu hām'āktux yūmmūg 'ohnāg

31 Ha ta' xip Yeyox kōmēn Tinok yīkak, tu ta' mōg, tu kōmēn Xinōm hā' tep, tu Kōmēn te' 10 yōg hāpfoxka tep, tu mōktu kōnāg xexka Ganinet tu' xupep.

32 Ha ta' nūn tikmū'ūn, tu' nūnnāhā' tihik, yā' yīpkox hok, tu hām'āktux yūmmūg 'ohnāg. Tikmū'ūn te Yeyox pu' xak, puyīy tik yīmū' yīm xex, puyīy hittupmā'.

33 Ha ta' mōg Yeyox xix tihik tikmū'ūn xohix kūnāpah. Yeyox te yāy yīpkutok hā' nōy yīpkox 'āpit, tu' yīynīn, tu' yīkox hep hā' nōy yōyxōg 'āpit yāy yīpkutok yā,

34 tu' pexkox pēnāhā' pepix, tu xit xut xexkah, tu:

—“Epatah!” Kaxīy. Yā tikmū'ūn yīy'ax hā: “Pu yā 'āyīpkox xōn, nūy hām'āpax!” Kaxīy.

35 Ha' yīpkox max, tu hām'āpak, ha' yōyxōg max, tu hām'āktux max.

36 Ha Yeyox te tikmū'ūn xat puyīy nōm 'āktux hok. Yeyox te' xat punethok hā kaxīy, pa tikmū'ūn te nōm 'āktux punethok,

37 ha tikmū'ūn te' xupak, tu' kuxa te' yēy, tu:

—Tik te hāpfoxpā max xe'ēgnāg' Tute tik yīpkox hok xupakgāhā', tu tik te hām'āktux yūmmūg 'ohnāg xat, puyīy hām'āktux! Kaxīy.

8

Yeyox te tikmū'ūn te' 4,000 pu xit'ax popmāhā'

1 Hāpfox ha ta' yāy tu nū'nāhā' tikmū'ūn xohix, tu yōg xit'ax pip'ah. Ha' xip Yeyox, tu yāy yōg tik te 12 xop xānāhā', tu:

2 —'Āte tikmū'ūn kuxa ka', yā 'āmnīy tikoyuk hā' pip tikmū'ūn 'ūgmūtik, ta hōnhā 'ūyōg xit'ax 'ūm pip'ah.

3 'Ūmā hok, ha 'āte tikmū'ūn mō'pok 'ūpet hah, puxix xakux putat kopah, 'ūpu'uk tu'. Yā hāptox tu' nūn tikmū'ūn. Kaxīy.

4 Ha Yeyox yōg tik xop te:

—Tep-te tikmū'ūn pu xit'ax hāmenex nūnte hām panip xexka tu'? Yā' pip'ah xit'ax. Yā tikmū'ūn xohix. Kaxīy.

5 Ha Yeyox te:

—Pām xohix tēxīy 'ōgnū? Kaxīy.

Ha:

—'Ūxohix te' 7. Kaxīy.

6 Ha tikmū'ūn xat, pu hām tu' mām, tu pām te' 7 pop, tu Topa pu hām'āktux, hu:

—Xate 'ūgmū'ā pām popmāhā'. 'Āmax. Kaxīy.

Yeyox te pām koxip, tu yāy yōg tik xop pu' popmāhā', puyīy tikmū'ūn pu popmā'.

7 Ha ta' pip māhām kamah, yā' xohix'ah, ha Yeyox te Topa pu mām 'āktux, tu yāy yōg tik xop pu' popmāhā', puyīy tikmū'ūn pu' popmā',

8 ha tikmū'ūn te' māhā', tu mōktu xe xit putup'ah, yā puxix, ha Yeyox yōg tik xop te' xit'ax yāgnāg yāy tu nū'xok manax te' 7 hā nū'xip.

⁹ Yā tikmū'ūn xohix te' 4.000 te' mähā pām xix mähām.

Ha ta tikmū'ūn mō'pok hato'a Yeyox te',

¹⁰ tu ta' mōg yāy yōg tik xop mütik, tu mīpkox hā' mōxaha', tu ta' mōg tu mōktu' mōxaha hāpxexka Namānot tu'.

Peniye xop te Yeyox tu' xak, puyiy hāpxopmā ka'ok xe'ēgnāg

¹¹ Ha ta' nūn Paniye xop, tu Yeyox mütik hām'āktux, tup-tup, puyiy Yeyox hām'āktux kummuk, hu ta tu' xak, puyiy hāpxopmā ka'ok xe'ēgnāg, pu tikmū'ūn pēnā', puyiy tikmū'ūn yūmmūg Topa te Yeyox ka'ogāhā',

¹² ha Yeyox te xit xut xexka, tu:

—Teptu tikmū'ūn te hāpxopmā'ax ka'ok xe'ēgnāg xak, puyiy tikmū'ūn pēnā'. 'Āte xa hām'āktux, 'āte xa hāpxopmā ka'ok xe'ēgnāg putup'ah, xayiy pēnā'. Kaxīy.

¹³ Tu ta' mōg Yeyox xix yāy yōg tik xop, tu mīpkox hā' mōxaha', tu ta' mōg, tu kōnāg xexka xak.

Paniye xop yōg pām tokatokgā'ax xix 'Enot yōg

¹⁴ Ha Yeyox yōg tik xop yōg pām 'ūm xip'ah, yā' xaxok. Yā pām puxet xip mīpkox kopah,

¹⁵ ha Yeyox te:

—Pa 'ātit. 'Ūkummuk Paniye xop yōg pām yōg tokatokgā'ax xix 'Enot yōg. Kaxīy.

Yā 'ap tokatokgā'ax 'āktux'ah, pa yā 'üyōg hāmyūmmūgā'ax.

¹⁶ Ha Yeyox yōg tik xop te yāy mütik hām'āktux punethok, tu:

—Hamūn. Yūmū yōg pām 'ūm xip'ah, yiy ta nōm 'āktux. Kaxīy.

¹⁷ Ha Yeyox te' xupak, tu:

—Teptu yāy mütik hām'āktux pām 'ūm xip'ah? 'Ok 'āxop te' yūmmūg 'ohnāg yōgnū hām'āktux? Texīy 'āp-tox ka'ok?

¹⁸ 'Āpa te hāmpēnā 'ohnāg, xix 'āyīpkox te hām'āpak 'ohnāg. 'Ok 'ūxutigāhā

¹⁹ 'āte pām te' 5 koxip, nūy tikmū'ūn te' 5.000 pu' popmā'? 'Ūmā kux, ha pām yāgnāg xe' pīp, manax hā nū'xip. 'Āxop te manax xohix texīy pop? Kaxīy.

Ha':

—12. Kaxīy.

²⁰ Ha Yeyox te xe:

—'Āte pām te' 7 koxip, nūy tikmū'ūn te' 4.000 pu' popmā'. 'Ūmā kux, ha pām yāgnāg xe' pīp, manax hā nū'xip. 'Āxop te manax xohix texīy pop? Kaxīy.

Ha':

—7. Kaxīy.

²¹ Ha Yeyox te:

—'Ok 'āxop te hāmyūmmūg nōmhā'? Kaxīy.

Yeyox xix tik pa hok Metxax tu'

²² Tu ta' mōg Yeyox xix yāy yōg tik xop, tu mōktu' mōxaha xiptuxexka Metxax tu', ha

ta' nūn tikmū'ūn, tu tik pa hok nūnnāhā', tu Yeyox tu' xak, puyiy 'üyīm xex tik yīmū', nūy hittupmā'.

²³ Ha Yeyox te' nōy yīm mūg, tu ta' mōg tik mütik tikmū'ūn xohix kūnāpa', tu yīy'pu'in tik pa kopah, tu nōy yīmū yāy yīm xex, tu:

—'Ok hāpxop pēnāhā'? Kaxīy.

²⁴ Ha tik te hāmpēnāhā', tu:

—'Āte' pēnāhā tihik, pa yā mīm te hāpkumep putuk. Kaxīy.

²⁵ Ha Yeyox te xe yāy yīm xex tik pa yīmū', ha tik te hāmpēnā mō'ka'ok, tu hāmpēnā max xe'ēgnāg. Yā' hittup.

²⁶ Ha Yeyox te tik xat, pu' pet ha mōg, puyiy xiptuxexka tu mōg hok.

Pet te hām'āktux max

²⁷ Tu ta' mōg Yeyox xix yāy yōg tik xop tu xiptuxexka Pinip yōg Xeyanet tu'.

Yeyox te tik pu hām'āktux, hu:

—Putep xuktux tikmū'ūn? 'Ū'ūm 'ūgmūn? Kaxīy.

²⁸ Ha tik te:

—Yā' yāg te: "Yā Yoām, nōm tep-tox pix." Kaxīy. Ha ta' yāg nōy te: "Yā 'Enit." Kaxīy. Ha ta' yāg nōy te: "Yā nōm te Topa pupi hām'āktux." Kaxīy.

²⁹ Ha Yeyox te:

—Xix 'āxop, putep xuktux 'āxop, 'ū'ūm 'ūgmūn? Kaxīy.

Ha Pet te:

—Yā Topa te 'āyāyikutnāhā'. Kaxīy.

³⁰ Ha Yeyox te tik xat, puyiy nōm 'āktux hok.

Yeyox te' xuktux 'ūxok putup, tu putpu' hip-tup

³¹ Tu ta hām'āktux Yeyox te yāy yōg tik xop pu, tu:

—'Ūgmūn, yā Tikmū'ūn Kutok, tuk xūy xexkap-tup, yā Yoneo xop yōg xexka xop tek putup nōg putup, xix 'āmānex xexka xop te', xix tik te hāmyūmmūg xop te', tu' nōy xat putup, puyiy 'ūkputex. 'Ūkxok xe'e putup, pa 'āmnīy tikoyuk nōg, 'īhā putpuk hip-tup. Kaxīy.

³² Yā hām'āktux xe'e Yeyox te', ha Pet te:

—'Āmhok. Kaxīy hok! Kaxīy.

³³ Ha Yeyox yōkānām, nūy yāy yōg tik xop pēnā', nūy Pet pu hām'āktux, hu:

—'Ūg hām'āktux'ax yā Hāmgāyāgnāg yōg. 'Āpu 'ūkxāmpa mōg! Xate hāmpē'āpaxex, yā tikmū'ūn te hāmpē'paxex putuk, yā 'ap Topa te hāmpē'paxex putuk'ah. Kaxīy.

³⁴ Tu ta tikmū'ūn xānāhā Yeyox te, xix yāy yōg tik xop xānāhā', ha' nūn, ha Yeyox te:

—Tikmū'ūn tek mūn mütik hāpkumep putup, puxix yāy kutōgnāg pe'paxex, puxix yāy yōg putup'ax mīy 'ohnāg, nūy 'āmnīy xohix hā' yāy yōg mīpkupnix tat, nūy xūy, nūy 'ūkxūy putuk, tuk mūn mütik hāpkumep putup nōmhā'.

³⁵ Ha tikmü'ün te' yāy xaxok hok, puxix tu' hi xe'e 'ohnäg, pa tikmü'ün xok 'ügmün hah, puxix tu hip-tup mōkuma' mōg, tu hi kux 'ohnäg.

³⁶ Teptu hām xexka yōg hāpxop xohix pop, pāyā' xok? 'Ūp-texop, tu' xok, tu hāpxop xohix xaxok, 'ūxok tu', puxix' hok xe'ēgnäg.

³⁷ 'Ok max, pu tikmü'ün putexop xexkah, tu hām xexka yōg tayūmak xohix xexka pop, pa' xok? 'A' max'ah. Yā' xok, tu tayūmak xohix xaxok, tu hok xe'ēgnäg, ha tayūmak xohix te tikmü'ün putpu' hūmnā hok.

³⁸ Tikmü'ün tek mūn hā yāyhāhup, xix yōgnū hām'āktux ha yāyhāhup, yā 'ünōy xop pu yāyhāhup, hu: "Agmün Yeyox yōg'ah." Kaxiy. Kōpxix 'āte nōm hā yāyhāhup, 'üyānān tu'. 'Ātak Topa pu 'āte nōm xop hā yāyhāhup, 'īhāg nūn, tu: "Ōhōm 'a' yōg'ah." Kaxiy. 'īhāg xexka xe'ēgnäg nūn 'ātak Topa putuk, xix pexkox yōg nū'pok xop putuk.

9

¹ Tu ta xe hām'āktux Yeyox te, hu:

—'Āte xa hām'āktux, yā' pip tikmü'ün nūnteh, tu xakix hāmāxap'ah, pa' pēnāp-tup hāmāxap Topa te yāy yōg tikmü'ün xat xe'e putup, ha' yīpkox pip putup. Kaxiy.

Yeyox, xix Mōyyex, xix 'Enit

² Ta 'āmnīy xohix te' 6 nōg, 'īhā' mōg Yeyox, tu Pet mōgāhā', xix Tiak, xix Yoām, tu' nōy mōgā 'ohnäg, tu' mōg yīktix tox tu', tu' mōxaha', ha' xip Yeyox tik keppah, tu yāyhā kuyānām putuk,

³ ha' topixxax yāyhā 'ūmnok tūmnāg, tu yōg kuyānām pip. Yā tikmü'ün te topixxax pix hā kaxiy yūmmūg 'ohnäg.

⁴ Ha tik tikoyuk te' pēnāhā 'Enit te Yeyox mūtik hām'āktux, xix Mōyyex te',

⁵ ha Pet te Yeyox pu hām'āktux, hu:

—Yāyā, yā' max yūmūg pip nūnteh. 'Ūgmū'āte xa' mīy putup 'āpetnāg, yā 'ōgnū', xix Mōyyex yōg, xix 'Enit yōg. Kaxiy.

⁶ Yā' kuxa nōg tihik, yīy hām'āktux hitop Pet te'.

⁷ Hāpxip 'īhā' nūn hāmgōy xexkah, nūktu kuyānām mō'nīy, ha Topa te hām'āktux hāmgōy xexka kopah, hu:

—Yā 'ūgkutok pit nō'ōm. 'Āte mō'yāy xe'ēgnäg. 'Āpu 'üyōg hām'āktux 'āpax! Kaxiy.

⁸ Ha tik te yāy yīmap pēnāhā mō'ka'ok, pa Yeyox puxet pēnāhā'. Yā' nōy pip'ah.

⁹ Tu ta yīktix hā kukpa yīxohoh Yeyox xix tihik, ha Yeyox te:

—'Āpu hāmpēnā'ax 'āktux hok. Nāy. 'Ūgmūn Tikmü'ün Kutok te putuk hip-tup, ha nōmhā nōm 'āktux putup. Kaxiy.

¹⁰ Ha tik te nōm 'āktux 'ohnäg, pa yāy yīkopit, hu:

—Putep xuktux 'ūputpu' hip-tup? Kaxiy.

¹¹ Tu Yeyox pu yīkopit, hu:

—Teptu tik te hām'yūmmūg xop te hām'āktux 'Enit nūn putup hāmāxap? Kaxiy.

¹² Ha Yeyox te:

—Hamūn, 'Enit nūn hāmāxap, nūy hāmmaxnā'. Pa Topa tappet tu hām'āktux 'ūgmūn Tikmü'ün Kutok xūy putup, ha tikmü'ün tek putup nōg putup,

¹³ pa 'āte xa hām'āktux, hōmā yā' nūn 'Enit nūnteh, ha tikmü'ün te' kute'ex kummuk pax. Yā hōmā Topa tappet tu hām'āktux, hu:

—Tikmü'ün te 'Enit kute'ex kummuk putup. Kaxiy.

Yeyox te kaxxop hittupmāhā'

¹⁴ 'Ūpip Yeyox yōg tik xop, tu tik te hām'yūmmūg xop mūtik hām'āktux,

¹⁵ ha tikmü'ün xohix pip 'üyīmap, tu Yeyox pēnāhā', hu' nūn, nūy Yeyox mūtik hām'āktux.

¹⁶ Ha Yeyox te yāy yōg tik xop pu hām'āktux, hu:

—Putep 'āktux 'āxop yāy mūtik? Kaxiy.

¹⁷ Ha ta' xip tihik tikmü'ün kopah, tu:

—Notot, 'āte yāy kutok pit nūnnāhā', yā' kopa' xip yāmīy kummuk, ha 'ūgkutok te hām'āktux yūmmūg 'ohnäg.

¹⁸ Yāmīy kummuk te' mūkpax, tu hām tu mō'yōnpax, ha' yīkox hā' konnoppax, tu' xox hā' nōy nahatpax, hu' pu'uk 'ūgkutok. Ha 'āte yāy kutok nūnnāhā, puyiy 'ōgnū tik xop yāmīy kummuk xut, pa' xut yūmmūg 'ohnäg. Kaxiy.

¹⁹ Ha Yeyox te:

—Yā tik kuxa mām kutōgnäg 'ūgkopah! 'Āmnīy xohix texiy hāg nox xip'ax 'āxop mūtik, xaxiy 'ākuxa mām? 'Āmnīy xohix texiy hā 'āte 'ōg hāpkummuk hā tot putup? 'Āpu' nūnnā 'āk-tok. Kaxiy.

²⁰ Yā' nūnnāhā', ha yāmīy kummuk te Yeyox pēnāhā', tu kaxxop yāy nuhugā ka'ok, ha' nāhā', tu' yōkanām nā' mōg, tu' yīkox hā konnop.

²¹ Ha Yeyox te 'ātak pu hām'āktux, hu:

—Hāmāxatamuk xohix texiy hā' kummuk hā kaxiy? Kaxiy.

Ha 'ātak te:

—Yā hōmā yā' pu'ūgnäg xix hōnhā'.

²² Yā yāmīy kummuk te mō nōy yōn punethok kuxap kopah, xix kōnāg kopah, nūy putex. Xate hāpxopmā yūmmūg, hu tak mū'ā teh. 'Āpu 'ūgmūg kuxa ka'. Kaxiy.

²³ Ha Yeyox te:

—'Ok 'āte xa hāpxopmā yūmmūg? 'Ok 'ākuxa yūm ka'ok? Yā 'āte' kuxa mām ka'ok xop pu hāpxopmā xohix yūmmūg. Kaxiy.

²⁴ Ha hām'āktux ka'ok, hu:

—Yā 'ūgkuxa yūm 'ākopah. 'Āpu 'ūgka'ogā', 'üyiy 'ūgkuxa yūm ka'ok punethok. Kaxiy.

²⁵ Ha tikmü'ün xohix yīnnāhā' tu' nūn, ha Yeyox te yāmīy kummuk xat, hu:

Yāmīy kummuk, xate' nōy yīpkox hogāhā'.
Yāmīy kummuk, 'āpep, nūy putpu mōnā hok.
Kaxīy.

²⁶ Ha yāmīy kummuk te hām'āktux ka'ok,
tu kakxop yāy nuhugā xexkah, tu ta' mōg, ha
ta' pip kakxop, ha tikmū'ūn te:

—Yā' xok. Kaxīy.

²⁷ Pa Yeyox te' nōy yīm hā' mūg, tu' yīm
xīnnāhā', hak-nīhā' xip.

²⁸ Ha ta' mōg Yeyox, tu mōktu mīptut hā
mō'nāhā', ha Yeyox yōg tik xop te:

—Teptuk mū'āte yāmīy kummuk xut
yūmmūg 'ohnāg?

²⁹ Ha:

—Tikmū'ūn te Topa pu hām'āktux. Hā
kaxīy nōm yāmīy kummuk xut. Kaxīy.

*Yeyox te xe hām'āktux 'ūxok putup, tu
putpu' hip-tup*

³⁰ Tu ta' mōg Yeyox yāy yōg tik xop mūtik,
tu mōktu hāpxexka Ganinet tu hāpkumep.
Yeyox te yāy xaptop putup, puyīy tikmū'ūn
pēnā hok,

³¹ yā yāy yōg tik xop pu hāmyūmmūgāhā',
tu:

—Tik te' gāy xop mōgāp-tup, puyīy 'ūgmūy,
nūy 'ūkputex, yā Tikmū'ūn Kutok putex, hak
xok putup, pa' āmnīy tikoyuk nōg 'hā put-
puk hip-tup. Kaxīy.

³² Pa tik te Yeyox yōg hām'āktux yūmmūg
'ohnāg, pa' kuxa nōg, hu xe yīkopit 'ohnāg.

Tik 'ūm xexkanām

³³ Ta' mōg Yeyox yāy yōg tik xop mūtik,
tu mōktu kōmēn Kapānām tu' mōxaha', tu
mīptut hā' mōxaha'. Yeyox te tik te 12 xop pu
hām'āktux, hu:

—Āxop te putep yāy mūtik hām'āktux putat
kopah? Kaxīy.

³⁴ Pa yā' yēy. Yā tik te hām'āktux, hu:

—Tik 'ūm xexkanām Yeyox yōg tik xop
kopah? Kaxīy.

³⁵ Yeyox yūm, tu' xānāhā yāy yōg tik xop,
ha' nūn, ha:

—Ok xatep-tup, xayīy xexkah? 'Āpu yāy
kutōgnāg pe'āpaxeh, nūy nōy pu 'āhām, yā'
xohix yōg kāmānat. Kaxīy.

³⁶ Yeyox te kakxop paha', tu tik xop kopa'
xix, tu' nōy yīmū' yīm xex, tu:

³⁷ —Tikmū'ūn 'ūm te kakxop te kaxīy
putup, nūy kakxop pēnā', 'ūkputuppax tu'.
Yā nōm tek putup kamah. Tikmū'ūn 'ūm
tek putup, yā Topap-tup kamah, yā nōm te
nūgkutnāhā'. Kaxīy.

*Tikmū'ūn te yūmūg hā' gāy 'ohnāg, puxix
yūmūg hā xape'*

³⁸ Ha Yoām te:

—Yāyā', 'Ūgmū'āte' pēnāhā tihik, ha yāmīy
kummuk mōy. Tute:

“Yeyox te 'ā yāy 'āxet'ax hōm, 'ūyīy yāmīy
kummuk mōy. Yāmīy kummuk, 'āpep!”
Kaxīy.

Hak mū'āte:

“Āmhok! 'Ūmōy hok!” Kaxīy.

Yā tik xip'ah 'ūgmūg xop kopah. Kaxīy.

³⁹ Ha Yeyox te:

—Kaxīy hok. Yā' max. 'Āte yāy 'āxet'ax
hōm, puyīy yāmīy kummuk mōy, puxix tik
'ūgmūn 'āktux kummuk putup'ah.

⁴⁰ Yā yūmūg hā' gāy 'ohnāg, puxix yūmūg
hā xape tikmū'ūn.

⁴¹ 'Āpu 'ūxaxok hok, tikmū'ūn te xa kōnāg
tat, 'ūkuxa mām 'ūgkopah tu', puxix Topa nōm
hā maxnā'. Kaxīy.

Pa 'ātx. Hāpkummuk mīy hok

⁴² Tu xe:

—Tikmū'ūn 'ūm te' kuxyāhā kakxop
kutōgnāg kuxa yūm'ax 'ūgkopah. Yā' max,
pu nōm kummuk xop xuknikup tu mīkaxxap
xexka hīy poxit hā, nūy kōnāg xexka kopa
mō'yōn.

⁴³ Paxpu 'āyīm te 'ākummugā', xayīy
hāpkummuk mīy, 'āpu kuyut, nūy 'ūxak, nūy
putyōn. Yā' max, pexkox hā mōnāy 'āyīm
puxet hā. Pa' kummuk, 'ūnōy te 'āxix kuxap
kopah, ha 'āyīm tix pip. Yā kuxap xok
'ohnāg.

⁴⁴ Yā 'ūk-tox nōy nā' mōg putup hāpxop
xohix, ha kuxap xok 'ohnāg.

⁴⁵ Paxpu 'āpata te 'ākummugā, xayīy
hāpkummuk mīy, 'āpu kuyut, nūy 'ūxak, nūy
putyōn. Yā' max, pexkox hā mōnāy 'āpata
puxet hā. Pa' kummuk, 'ūnōy te 'āxix kuxap
kopah, ha 'āpata tix pip.

⁴⁶ Yā 'ūk-tox nōy nā' mōg putup hāpxop
xohix, ha kuxap xok 'ohnāg.

⁴⁷ Paxpu 'āpa te 'ākummugā, xayīy
hāpkummuk mīy, 'āpu 'ūxut, nūyputyōn. Yā'
max, Topa yōg xop hā mōnāy 'āpa puxet hā.
Pa' kummuk, 'ūnōy te 'āxix kuxap kopah, ha
'āpa tix pip.

⁴⁸ Yā 'ūk-tox nōy nā' mōg putup hāpxop
xohix, ha kuxap xok 'ohnāg.

⁴⁹ Kuxap te pipkup kopit, pe' max pe'
kummuk. Hā kaxīy Topa te tikmū'ūn yōg
hāpxopmā'ax kopit putup.

⁵⁰ Tikmū'ūn te'putyōn 'āmotxuxpex kum-
muk. Hā kaxīy Topa te hāpkummuk mīy xop
putyōn putup. Pa 'āpu hāmmax mīy, nūy
tikmū'ūn pu hāmmaxnā'. Kaxīy.

10

'Ok 'īpcox te' xetut nīm, pu' kummuk

¹ Tu ta' mōg Yeyox hāpxexka Yonex tu',
tu kōnāg kox Yohnām xak. Ha ta' yāy
tu nū'nāhā tikmū'ūn xohix Yeyox yīmāp
'ūxehet, ha xe tikmū'ūn pu hāmyūmmūgāhā'.
Yā Yeyox te hāmyūmmūgā pax.

² Ha ta' nūn Paniye xop, tup-tup, puyīy
Yeyox koit, tu:

—Putep kax'āmi yūmū yōg xat'ax yōg tap-
pet tu? Topa te putep xat? 'Ok xat, pu tik
xetut nīm? Kaxīy.

³ Ha Yeyox te:

—Möyex te putep xat? Kaxīy.

⁴ Ha:

—Möyex te' xat, pu tik tappet kax'āmi, nūy xetut nīm, puyīy xetut mōg. Kaxīy.

⁵ Ha Yeyox te:

—Hamūn. Hōmā tikmū'ūn yīpkox 'ohnāg, yīy' xat'ax te kaxīy kax'āmi'.

⁶ Pa 'āmhok. Hōmā Topa te' mīy hāhām xix hāpxox xohix, 'hā Topa yōg tappet te: "Topa te' mīy tihik xix 'ūhūn,

⁷ yīy ta tik te' tak nīm xi' tut, nūy xetut mūtik yāytax,

⁸ ha nōmhāp-xet. Yā' tix'ah 'īpxox xix xetut, yāp-xet.

⁹ Yā Topa te yāytagāhā', ha tikmū'ūn te nōm nīmāhā', pu' kummuk. Kaxīy.

¹⁰ Ta' mōg Yeyox xix yāy yōg xop, tu nūktu mīptut hā' mōxaha', ha Yeyox yōg tik xop te:

—Putep xuktux hatō'ah? Kaxīy.

¹¹ Ha Yeyox te:

—'īpxox te' xetut nīm, nūy nōy mūy, yā hāpkummuk mīy. Yā' nōy hā' xupxet.

¹² Ha ta' xetut te 'īpxox nīm, nūy nōy mūy, hā hāpkummuk mīy. Yā' nōy hā' xupxet. Kaxīy.

Yeyox xix kaxxop

¹³ Hāpxip 'hā tikmū'ūn te kaxxop nūnnāhā Yeyox tu', puyīy Yeyox kakop pu hāmmāxānā', pa Yeyox yōg tik xop te:

—'āmhok, 'ūnūnā hok. Kaxīy.

¹⁴ Pa Yeyox te' xupak, tup-tup nōg, tu:

—'ūtux, puk ha nū' kaxxop. Hām'āktux hok, hu: "Ūnūnā hok." Kaxīy. Yā Topa te yāy yōg tikmū'ūn xat, ha' yīpkox pip. Yā nōm xop te kaxxop putuk.

¹⁵ 'Āte xa hāpxe'e 'āktux: Kaxxop yīpkox pip Topa xat'ax pu', ha Topa tep-tup, pu tikmū'ūn yīpkox pip kamah, kaxxop putuk, nūy Topa yōg tikmū'ūn kopa' pi'. Kaxīy.

¹⁶ Yeyox te kaxxop yīmū' yīm xex, tu kaxxop pu hāmmāxāhā'.

Tik 'ūp-texop xexka'

¹⁷ Tu ta xe' mōg Yeyox, tu' mōg kutōgnāg, ha ta nū'xupaha tihik, tu nūktu Yeyox keppa' kopaxux hā' xip, tu:

—Notot max, 'āte putep mūn mīy putup, nūy hi xe'ēgnāg mōkumakmōg, ha' kux 'ohnāg? Kaxīy.

¹⁸ Ha Yeyox te

—Teptu xate: "Notot max"? Kaxīy. Yā Topa 'ūmax, yāp-xet 'ūmax, ha ta' nōy max 'ohnāg.

¹⁹ Xate' yūmmūg Topa te' xat, hu: "Tikmū'ūn putex hok, 'ānōy hā xupxet hok, hām xupxet hok, 'ānōy hā kupex kummuk hok, koit hok, 'ōg 'ātak tu 'āyīpkox pi' xix 'ātut tu.'" Kaxīy.

²⁰ Ha tik te:

—Notot, 'āte' mīy xohix. Yā hōmā 'ūgmūn yā kaxxop xix hōnhā hā' mīy xohix. Kaxīy.

²¹ Ha Yeyox te tik pēnāhā', tu mō'yāy xe'ēgnāg, tu:

—Xate hāpxoxmā'ax puxet xip'ax hok. Mōg, nūy 'ōg hāpxox xohix hāmenex, nūy tayūmak pop, nūy 'ūhok xop pu' nīm, nūy pi' 'ōg hāpxox max xe'ēgnāg pekkox kopah, nūy nū', nūy 'ūkpe mōg. Kaxīy.

²² Yā tik te hām'āktux 'āpak, tu' yēy, tu' kuxa hittup 'ohnāg, tu ta' mōg nūpeheh. Yā 'ūp-texop xexkānām.

²³ Ha Yeyox te yāy yōg tik xop te' yīmap pēnāhā', tu:

—Yā 'ūp-texop xexka kutīgnāg te Topa yōg putat hā' mōg, Topa yōg xat'ax pu' yīpkox pip hok tu'. Kaxīy.

²⁴ Ha Yeyox yōg tik xop te' yēy, ha Yeyox te:

—'Ūgnix mūnōm xop, yā tikmū'ūn kutīgnāg te Topa yōg putat hā' mōg, nūy Topa yōg xat'ax pu' yīpkox pi'. Yā hāpxoxmā ka'ok.

²⁵ Xok xexka kāmēn te 'āmuxnāg ta kup kox hā mō'tat hok, ha tap-texop xexka xop te Topa yōg putat hā mōg 'ohnāg, tu Topa yōg xat'ax pu' yīpkox pip 'ohnāg.

²⁶ Ha Yeyox yōg tik xop kuxa te' yēy, tu yāy mūtik hām'āktux, hu:

—'Ok Topa te tikmū'ūn kuxa kummuk xit 'ohnāg? Kaxīy.

²⁷ Ha Yeyox te' nōy pēnāhā, tu:

—Hamūn, Topa tep-texop xexka xop kuxa kummuk xit yūmmūg, nūy kuxa max mō'tat 'ūyānān tu', pa yā tikmū'ūn te kuxa kummuk xit yūmmūg 'ohnāg. Kaxīy.

²⁸ Ha Pet te:

—Xate' yūmmūg, 'ūgmū'āte yāy yōg hāpxox xohix nīm, nūy 'āpek mūg mōg. Kaxīy.

²⁹ Ha Yeyox te:

—'Āte xa hāpxe'e 'āktux, tikmū'ūn te' yāy pet nīm, nūy 'ūkpe mōg, pe' taknōy nīm, pe' pit, pe' tutnōy, pe' hex, pe' xip, tu' pe' tak, pek-tok, nūy 'ūkpe mōg, nūy 'ūkpupi hāpxoxmā', nūy Topa yōg hām'āpak max'ax 'āktux.

³⁰ Ha Topa te nōm pu popmāp-tup nūnte hām xexka tu', yā' popmāp-tup 'ūpet xohix te' 100, xi' taknōy 100, xi' pit 100, xi' tutnōy 100, xi' hex 100, xi' tut 100, xik-tok 100, xix hām te' 100, ha tikmū'ūn te nōm kute'ex kummuk xexkap-tup. Hāpxip 'hā Topa te nōm hīnnāp-tup, puyīy hi xe'ēgnāg mōkuma' mōg, ha' kux 'ohnāg.

³¹ Yā tikmū'ūn te māxap yāyhā ka'ax putup, ha ta ka'ax xop yāyhā māxap putup. Kaxīy.

Yeyox te xe hām'āktux 'ūxok putup, tu putpu' hip-tup

³² Tu ta' mōg Yeyox xix yāy yōg tik xop, tu putat hā' mōg kōmēn Yeyoxanēn tu', ha Yeyox yōg tik xop te Yeyox pe' mōg, ha tikmū'ūn te' pe' mōg kamah, ha Yeyox yōg tik xop kuxa te' yēy, ha tikmū'ūn kuxa nōg, ha Yeyox te yāy yōg tik xop mōgāhā', tu tikmū'ūn nīm, tu:

³³ —Ūyümmüg? Yümüg mög kōmēn Yenoyanēn tu', ha ta 'ōnte tik te 'āmānex xexka xop mögāp-tup xix tik te hāmyümmüg xop mögāp-tup, puyīy 'ügmün Tikmü'ün Kutok mūy, tu hām'āktux putup, hu:

—'Āpu 'ūp-tex! Kaxīy.

Tu puknōg xop puk hōm putup,

³⁴ hak mūn 'āktux kummuk putup, tu' yīyup'īn putup, tuk kix putup, tuk putex putup, hak xok putup. Pa 'āmniy tikoyuk nōg putup, Thā putpuk hip-tup. Kaxīy.

Tiak tep-tup hāp xop xix Yoām te'

³⁵ Hāpxip 'hā' nūn Yemeneo kutok Tiak xix Yoām, nūktu Yeyox pu hām'āktux, hu:

—Yāyā, 'ügmü'ātep-tup, xayīy hāpxopmā'. Kaxīy.

³⁶ Ha Yeyox te:

—Putep putup? Kaxīy.

³⁷ Ha:

—Hāpxip 'hā 'āyūm putup 'ūxexka yōg mūmpe yūm'ax xe'ēgnāg yīmū', nūy yāy yōg tikmü'ün xat. 'Āpuk mūg xat, 'ū mām yāpxet 'āyīm xe'e ha xi' nōy 'āyīm xax ha 'ōnteh. Kaxīy.

³⁸ Ha Yeyox te:

—'Āxop te' yümmüg 'ohnāg 'āxop te nōm putup. Hāpxip 'hā tikmü'ün tek xūyāp-tup, tuk kute'ex kūmmuk putup, tup-tex putup. 'Ok 'āxop te' xūy hā kaxīy tot kamah? Kaxīy.

³⁹ Ha:

—Yā hamūn. Kaxīy.

Ha Yeyox te:

—Yā hamūn. Tikmü'ün te 'āxop xūyāp-tup, tu 'āxop kute'ex kummuk putup, tu 'āxop kix putup,

⁴⁰ pa 'a 'āte' xat'ah, pa Topa te' xat, pu tikmü'ün mām 'ūgyīm xe'e ha xix 'ūgyīm xax hah, yā 'ūnōy yōg xip'ax. Kaxīy.

⁴¹ Ha ta' xupak Yeyox yōg tik te 10 te', hu' gāy.

⁴² Ha Yeyox te yāy yōg tik xohix xānāhā', yīy ta' nūn. Yeyox te:

—'Āxop te' yümmüg, 'ūxat'ax xop te' xat pax 'ūkuxa mām kūnāpa pip xop.

⁴³ Pa 'āxop kopa hā kaxīy yā' kummuk. 'Āpu Topa kopa kuxa mām xop xat pax hok. 'Ok xatep-tup, xayīy 'āxexka'? 'Āpu tikmü'ün pu hāpxopmā max, yā tikmü'ün yōg kāmānat max putuk.

⁴⁴ 'Ok xatep-tup, xayīy 'āxexka'? 'Āpu tikmü'ün xohix yōg kāmānat putuk.

⁴⁵ Yā 'ügmün Tikmü'ün Kutok nūn nūnte hām xexka tu', nūy tikmü'ün pu hāpxopmā max, yā tikmü'ün yōg kāmānat putuk. 'Ügnūn, nūy tikmü'ün pupik xok, nūy tikmü'ün xohix kuxa kummuk xit, nūy kuxa max mō'tat, 'ūyānān tu'. Kaxīy.

Yeyox xix Matimēo yā pa hok

⁴⁶ Tu ta' nūn Yeyox xix yāy yōg tik xop, tu nūktu' mōxaha kōmēn Yenikot tu'. 'Ūpip

kōmēn tu', tu ta' mög kōmēn kūnāpa', ha ta' mög tikmü'ün xohix kamah, pa' xip tihik, yā pa hok, yā' xuxet'ax Matimēo, yā Timeo kutok. Tik yūm putat pukah, tu tayūmak xak, puyīy tikmü'ün tayūmak nīm.

⁴⁷ Ha tikmü'ün te hām'āktux Yeyox te kōmēn Nāyane tu' nūn, ha Matimēo te' xupak, tu hām'āktux ka'ok, hu:

—Yeyox, yā Namix mōkputox, 'āpu 'ügmün kuxa ka'! Kaxīy.

⁴⁸ Ha tikmü'ün te:

—'Āyīy hok! Kaxīy.

Pa tik yīy ka'ok nōy nā' mög, hu:

—Namix mōkputox, 'āpu 'ügmün kuxa ka'! Kaxīy.

⁴⁹ Ha Yeyox hup, tu:

—'Āpu tik pa hok nūnnā'. Kaxīy.

Ha tikmü'ün te tik pu hām'āktux, hu:

—'Ākuxa nōg hok. 'Āpu 'āyok. Tute 'āxānāhā', xa nū'! Kaxīy.

⁵⁰ Ha Matimēo te yāy kayak putxok, tu pepi' xip, tu ta' mög Yeyox hah, tu mōktu' xupep.

⁵¹ Ha Yeyox te:

—Putep putup, 'ū mīy? Kaxīy.

Ha:

—Notot, 'ātep-tup, 'ūyīy hāmpēnā 'ūxeheh. Kaxīy.

⁵² Ha Yeyox te:

—Mōg! 'Āpa hittup, 'ākuxa yūm ka'ok 'ūgkopa hah. Kaxīy.

Hāpxip 'ohnāg 'hā Matimēo te xe hāmpēnāhā', tu ta' mög Yeyox peheh.

11

Yeyox te kōmēn Yenoyanēn tu' nūn

¹ Ta xe' nūn Yeyox xix yāy yōg tik xop, tu nūktu kōmēn Yenoyanēn yīka' pip yīktix 'Onimet Kup tu' xiptuxexka Metpaye yīka' xix xiptuxexka Metān yīka'. Ha Yeyox te yāy yōg xop xat,

² hu:

—Mōg xiptuxexka tu'. Xiptuxexka tu 'āmōxap-tup, pa' xip putup yomēnnāg, yā' hīy, yā tikmü'ün te nōm yīmū' yūm 'ohnāg. 'Āpu 'ūko'a', nūy nūnnā'.

³ Ka tikmü'ün te: "Teptu 'ümōgāhā?" Kaxīy. Ha 'āxop te hām'āktux putup, hu: "Yā 'ügmüg xuxyā tep-tup. Hāpxip 'hā' nūnnāp-tup 'ügmü'āte!." Kaxīy.

⁴ Ha ta' mög, pa' xip yomēnnāg, 'ūhīy hāmyīkox yīka'. Tik te' ko'a',

⁵ ha ta' nūn tikmü'ün, tu:

—Teptu yomēn ko'a'? Kaxīy.

⁶ Ha tik te:

—Yā 'ügmüg xuxyā tep-tup. Hāpxip 'hā' nūnnāp-tup 'ügmü'āte'. Kaxīy.

Ha tikmü'ün te:

—'Āpu yomēnnāg mōgā'. Kaxīy.

7 Ha ta' mōg tihik, tu yomēnnāg nūnnāhā Yeyox tu', tu yāy yōg kayak xex yomēnnāg yīmū', ha Yeyox te nōm yīmū' yūm.

8 Ha ta tikmū'ūn xohix te putat yīmū' yāy yōg kayak xatat ha' mōg, ha ta tikmū'ūn xohix nōy te mīm tu' mep mīmmāg, tu nōm putat yīmū' xatat ha' mōg.

9 Ha ta' mōg tikmū'ūn Yeyox keppah, ha ta' mōg tikmū'ūn nōy Yeyox peheh. 'Ūxohix te hām'āktux ka'ok, hu:

—Yā' max xe'ēgnāg Topah! Topa te nū'ākutnāhā', tu 'āka'ogāhā'!

10 Yā' max xe'ēgnāg, xate yāy yōg tikmū'ūn xat kōnāmāhā', hā yīpkox pip. Xate mōnāyxop Namix putuk, yā tikmū'ūn xat putup. Yā' max xe'ēgnāg Topah! Kaxīy.

11 'Ūnūn Yeyox, tu nūktu' xupep kōmēn Yenoyanēn tu', tu ta' mōg, tu mōktu Topa pet xexka hā mō'nāhā', tu hāpxop xohix yīmap pēnāhā'. 'Āmāxak'ax ha ta' mōg Yeyox xix yāy yōg tik te 12 xop, tu nūktu xiptuxexka Metān hā' mōxaha'.

Piget kup

12 Hāptup ha ta' mōg Yeyox xix yāy yōg tik xop, ha Yeyox putup xūy,

13 pa hāptox tu' pēnāhā piget kup, ha yōg mīxux punethok, ha ta' mōg, nūy piget ta pēnā', tu' mōg, pa piget ta pēnā' ohnāg, yā mīxux pēnāhā', yā piget ta yōg mō'āgmūg'ah,

14 ha Yeyox te piget kup pu hām'āktux, hu: —Tikmū'ūn te 'ōg mīnta xe māp-tup'ah. Kaxīy.

Ha Yeyox yōg tik xop te' xupak.

Yeyox xip Topa pet xexka tu'

15 'Ūnūn Yeyox xix yāy yōg tik xop, tu nūktu' mōxaha kōmēn Yenoyanēn tu', tu ta' mōg Topa pet xexka tu', ha' nūn Yeyox, pa' pip tikmū'ūn, tu' nōmenex, tu' pop tayūmak Topa pet xexka kopah, ha Yeyox te' xohix papuk, ha ta' mōg hāptopah, ha ta' mām tikmū'ūn, tu tāyūmak nōy yānān, ha Yeyox te yōg mīmpe xit'ax putxok, ha ta' mām tikmū'ūn, tu kuxxuxtut hāmenex, ha Yeyox te yōg mīmpe yūm'ax putxok,

16 tu' xat, pu Topa pet xexka kopa hāpxop tat hok,

17 tu tikmū'ūn pu hāmyūmmūgāhā', hu:

—Topa yōg tappet tu' kax'āmi Topa yōg hām'āktux. Yā Topa te: “'Ūkpet 'āxet'ax putup 'ūhep xop xohix yōg Topa pu hām'āktux'ax pet.” Kaxīy. Pa 'āxop te' mīy xupxet'ax pet, nūy yāy xaptop! Kaxīy.

18 Yā 'āmānex xexka xop te' xupak xix tik te hāmyūmmūg te', tu hāmp'e'paxex texīy Yeyox putex, pa' yīpkutuk, yā tikmū'ūn tep-tup pax Yeyox yōg hāmyūmmūg'ax.

19 'Āmāxak ha ta' mōg Yeyox xix yāy yōg tik xop kōmēn kūnāpa'.

'Āpu 'ākuxa mām Topa kopah

20 Hāptup ha ta' mōg Yeyox xix yāy yōg tik xop, tu piget kup yīka' mōg, tu' pēnāhā', yā' nak piget kup, yā' xexka 'ūnak,

21 ha Pet te' xutigāhā', tu Yeyox pu hām'āktux, hu:

—Notot, pēnā'. Hōmā xate piget kup mānōg, ha ta' hōnhā' nak. Kaxīy.

22 Ha Yeyox te:

'Ākuxa mām Topa kopah,

23 hu ta yīktix pu hām'āktux, hu: “'Āpep, nūy mōg kōnāg xexka tu'”, kaxīy, puxix' mōg putup kōnāg xexka tu'. 'Ākuxa mām ka'ok Topa kopah, puxix mōg kōnāg xexka tu'.

24 Yā 'āte xa hām'āktux: 'Āxop te Topa pu hām'āktux, nūy tatu hāpxop 'ūm xak. 'Āpu 'ākuxa mām Topa kopah, nūy yūmmūg xe'e Topa te xa' popmāp-tup, ha Topa te xa' popmāp-tup 'ūxohix.

25 'Āxop te Topa pu hām'āktux. 'Āpu 'ūxaxogā', 'ūnōy te 'ākute'ex kummuk. 'Āpu 'ūxaxogā', putu' kux, ha ta' pexkox tu Topa te' xaxogap-tup 'ōg hāpkummuk mīy'ax, putu' kux.

26 Xate tikmū'ūn yōg hāpkummuk mīy'ax xaxogā 'ohnāg, puxix 'Ātak pexkox yōg te 'ōg hāpkummuk mīy'ax xaxogā 'ohnāg. Kaxīy.

Tep-te Yeyox pu yāy 'āxet'ax hōm

27 Ta' nūn Yeyox xix yāy yōg tik xop, tu nūktu' mōxaha kōmēn Yenoyanēn tu', tu ta' mōg tu mōktu Topa pet xexka hā' mōxaha', ha ta' nūn 'āmānex xexka xop xix tik te hāmyūmmūg xop, xix Yoneo xop yōg xexka xop, tu nūktu Yeyox pu hām'āktux, hu:

28 —Tep-te xa yāy 'āxet'ax hōm, xayīy hāpxopmā nūhū'? Tep-te' xat, xayīy mīy'? Kaxīy.

29 Ha Yeyox te:

—'Āte xa yīkopit kamah. 'Āxop te hām'āktux xe'e', kōpxix xa nōm 'āktux.

30 'Āpu hām'āktux: Tep-te Yoām pu yāy 'āxet'ax hōm, puyīy tikmū'ūn putox pix? 'Ok pe Topa te 'ok pe tikmū'ūn te'? Tep-te' xat? Kaxīy.

31 Ha yāy mūtik hām'āktux, hu:

—Yūmū'āte hām'āktux yā Topah, puxix yīkopit putup, hu: “Teptu 'ākuxa mām 'ohnāg Yoām kopah?”

32 Pa yūmū'ate hām'āktux yā tikmū'ūn, puxix xok 'ūm'? Kaxīy.

Yā nōm te tikmū'ūn yīpkutuk. Yā tikmū'ūn te hāmp'e'paxex Yoām te Topa pupi hām'āktux.

33 Ha:

—'Īntu', 'ap yūmmūg'ah 'ūgmū'āte'. Kaxīy.

Ha Yeyox te:

—Tep-te 'ā yāy 'āxet'ax hōm, 'ūyīy hāpxopmā nūhū'? 'Āte xa nōm 'āktux putup'ah kamah. Kaxīy.

1 Hâpxip 'Ihâ Yeyox te tikmü'ün pu hām'äktux'ax hâ hämyümmügähä', nüy Topa yög häpxopmä'ax yümmügä', tu:

–Tik yög mīnta 'op tox pip hām xa'ax xexka kopah, tu hām pak'ax mīy tu' yīmap, tu hep ta't ax xexka mīy, nüy nōm kopa xupyäg mīy, tu mīptut tox mīy, nüy nōm kopa tik xix, puyiy häpxop xohix pēnā'. Tik te kāmānat pu' hōm hām xa'ax, puyiy pēnā', tu ta' mōg hatō'a'.

2 Hâpxip 'Ihâ mīnta yāy koxuk, ha hām xa'ax yög xuxyā te tik nū'kutnāhā', puyiy mīnta yög tayūmak pop,

3 ha ta' mōg, pa kāmānat te tik mūg, tu' kix, tu nū'kutnāhā', 'ūhok tat.

4 Ha hām xa'ax yög xuxyā te xe tik nōy nū'kutnāhā', pa kāmānat xop te nōm häpkute'ex kummuk kamah, tu tik putox kix.

5 Ha hām xa'ax yög xuxyā te tik nōy nū'kutnāhā', pa kāmānat xop tep-tex. Ha xe' punethok mō'pok, pa kāmānat xop te yäg kute'ex kummuk, tu' yäg kix, ha' xakix.

6 Nōmhā' xip yāp-xet, puyiy mō'kutnā', yā hām xa'ax yög xuxyā kutok pit, ha hām xa'ax yög xuxyā te hāmp'e'paxex hu: "Kāmānat tek-tok 'āpak putup." Kaxīy, tuk-tok nū'kutnāhā',

7 pa kāmānat xop te yāy mütik hām'äktux, hu: "Yā hām xa'ax yög xuxyāk-tok. 'Āpu yūmūp-tex, nüy pa hām xa'ax, nüy yūmū yög hām xa'ax." Kaxīy.

8 –Kāmānat tek-tok mūg, tuptex, tu xok-xax putyōn hām xa'ax nāpah. Kaxīy.

9 Tu Yexox te xe:

–Putep mūn mīy putup hām xa'ax yög xuxyā nōmhā'? Yā' mōg putup, nüy kāmānat kix, ha' xakixp-tup, ha kāmānat nōy pu hām xa'ax hōm putup.

10 'Ok 'āxop te mō'kupix Topa yög tappet tu'. Yā' kax'āmi, hu: "Mīptut mīy'ax te mīkaxxap paha', tu hāmp'e'paxex, yā' kūmmuk, tu' putyōn. Pa 'āmhok, yā' max xe'ēgnāg mīkaxxap,

11 Yā Topa te' mīy, yā' max xe'ēgnāg!" Kaxīy.

12 Ha ta' yümmüg nōmhā Yoneo xop yög xexka xop te', yā Yeyox te nōm xop 'äktux. Yā nōm tep-tup, nüy Yeyox kute'ex kummuk, pa 'āmhok, 'ümüy 'ohnäg, yā tikmü'ün yīpkutuk. Yā häpxop mīy 'ohnäg, tu ta' mōg hatō'a'.

'Ok max gohet pu tayūmak pagok

13 Hâpxip 'Ihâ tik te nū'pok Paniye xop xix 'Enot xop, puyiy Yeyox koit'ax xak.

14 'Ūnūn tu nūktu:

–Notot, 'ügmü'äte' yümmüg xate hāpxe'e 'äktux, tu tikmü'ün yīpkutuk 'ohnäg. Xate' xexka xop yīpkutuk 'ohnäg, pa xate tikmü'ün pu' yümmügähä Topa te nōm putup. 'Āpu hām'äktux: putep xuktux yūmū yög Topa yög tappet tu'. 'Ok pe' max gohet pu tayūmak

tanemēn'ax pagok, yā Hōm xop yög xat'ax Xet pu pagok? 'Ok pe' kummuk? Kaxīy.

15 Pa Yeyox te' yümmüg, tik pa max, pa yā' kuxa kummuk. Yeyox te:

–Teptu 'āxop te' xak 'äte' koit. Paxnū tayūmak 'ānuk, 'ü pēnā'. Kaxīy.

16 Ha ta' mōg, tu putpu' nūnnāhā', ha Yeyox te:

–'Ū'üm yög 'āxet'ax kax'āmi tayūmak 'ānuk tu'? Xix 'ü'üm yög xumix xip tayūmak 'ānuk tu'?

Ha:

–Yā gohet yög xat'ax Xet yög. Kaxīy.

17 Ha Yeyox te:

–'Āpu gohet yög xat'ax pu gohet yög xat'ax yög häpxop pagok. 'Āpu Topa pu Topa yög häpxop pagok kamah. Kaxīy.

Ha' kuxa te' yēy.

Texīy tikmü'ün te putpu' hix

18 Ha ta' nūn Xanuxeo xop, yā Xanuxeo xop te hāmp'e'paxex tikmü'ün putpu' hip-tup'ah. 'Ūnūn, tu nūktu Yeyox pu hām'äktux hu:

19 –Notot, hōmā Möyyex te yūmū'ā tappet kax'āmi, hu: "Ūxok tihik, ha ta' xip xetut, pak-tok 'üm xip'ah. Möyyex te' xat, tik taknōy te xetut hokyūm mütik yāytaha', pu' max, nüy nōy xok pu' pop kaxxop.

20 Hōmā' pip 'ütaknōy xohix te' 7. Tik māxap te 'ün mütik yāytaha', pak-tok 'ohnäg, tu' xok.

21 Ha' taknōy 'üg-nāy tu te' yāytaha', tuk-tok put 'ohnäg, tu' xok, ha' taknōy yāykote hā kaxīy kama'.

22 Hā kaxīy 'ūxohix te' 7 te yāytaha 'ün mütik, 'ük-tok 'üm pop 'ohnäg, tu' xakix 'ūxohix. Hâpxip 'Ihâ' xok kama 'ūhūn.

23 Hâpxip 'Ihâ Topa te tikmü'ün xohix putpu' hīnnāp-tup, 'ü'üm yög xetut nōmhā'? Yā xohix te' 7 te yāytaha 'ün mütik! Kaxīy.

24 Ha Yeyox te:

–'Āxop te hämyümmüg 'ohnäg! Texīy? Yā 'āxop te' yümmüg 'ohnäg Topa yög tappet. 'Āxop te' yümmüg 'ohnäg Topa 'ūka'ok xexka'.

25 Yā xakix xop putpu' hip-tup. Topa yög nū'pok xop te yāyta 'ohnäg pexkox tu'. Hā kaxīy tikmü'ün te yāyta 'ohnäg pexkox tu'.

26 Hōmā Möyyex te' kax'āmi tappet tu', tu putpu' hīnnā'ax kax'āmi'. 'Ok 'āxop te nōm mōkupix 'ohnäg? Yā 'ūkax'āmi Topa te mīm pahok kup puk kopa Möyyex pu hām'äktux, hu: "Ūgmūn yā 'Amanām yög Topah, xix 'Iyak yög, xix Yako yög." Kaxīy.

27 Hā kaxīy Topa te' xuktux 'ap xakix xop yög Topa'ah, pa yā hi xop yög. 'Āxop te hämyümmüg 'ohnäg. Kaxīy.

Topa yög xat'ax xexkanām

28 Ha ta' xip tihik, tu' xip tik te hämyümmüg xop kopah, tu hām'äktux 'āpak,

tu' yūmmūg Yeyox te hām'āktux max. Tik te Yeyox pu hām'āktux, hu:

—Topa te tikmū'ūn xat. Xat'ax 'ūm xexkanām? Kaxīy.

²⁹ Ha Yeyox te:

—Yā Topa te tikmū'ūn xat, hu: “Iyaet xop, 'āpu 'ūxupax. Yūmūg xuxyā yā yūmū yōg Topa yāp-xet, yā' nōy xip'ah.

³⁰ 'Āpu 'āxuxyā Topap-tuppax 'ākuxa xexka hā xix 'ākokux xexka hā xix 'āp-tox xexka hā xix 'ōg ka'ok'ax xexka hā.” Kaxīy.

³¹ Ha Topa te xe tikmū'ūn xat, yā xat'ax 'ūk-nāy tu'. Topa te: “'Āpu 'ānōy putup pax xate yāy putup pax putuk.” Kaxīy. Yā' xat'ax tix 'ūxexkanām, ha ta xat'ax nōy 'ūxexka'. Kaxīy.

³² Ha tik te:

—Notot, yā hām'āktux max! 'A koit'ah. Yā' xip Topap-xet, ha ta' nōy 'ūm 'ap xip'ah.

³³ Yā' max yūmū'āte Topap-tuppax yāy kuxa xexka hā xix yāy putox xexka hā xix yāy ka'ok'ax xexka hā. Yā' max kama yūmū'āte yāy nōy putup pax yūmū'āte yāy putup pax putuk. Yā' max xexka yūmū'āte xat'ax tix mīy nō'ōm, ha ta' max miāx yūmū'āte xokxop mō'hap, nūy Topa pu haxyā'. Kaxīy.

³⁴ Ha Yeyox te' yūmmūg tik te hāmyūmmūg, yā hām'āktux max. Yeyox te:

—'Āxip Topa yōg xop yīka' Topa te nōm xat, ha' yīpkox pip. Kaxīy. Ha tikmū'ūn kuxa nōg, hu xe hāpxop nōy yīkopit 'ohnāg.

Topa yōg yāykutnā'ax

³⁵ 'Ūxip Yeyox Topa pet xexka tu', tu tikmū'ūn pu hām'āktux, hu:

—Tepu tik te hāmyūmmūg xop te tikmū'ūn pu' yūmmūgāhā Topa yōg yāykutnā'ax yā Namix mōkputox?

³⁶ Pa Topa Koxuk te Namix kax'āmiyāhā', ha tute kax'āmi', hu: “Yūmūg xuxyā Topa te 'ūgxuxyā pu hām'āktux, hu: Yūhūm 'ūgyīm xe'e tu', ha 'āte puknōg gāy xop xix putup 'āpata yīkāgnāg.” Kaxīy.

³⁷ Yā Namix te: “'Ūkxuxyā'.” Kaxīy. Yā Topa yōg yāykutnā'ax xānāhā, hu: “'Ūkxuxyā'.” Kaxīy. Texīy Topa yōg yāykutnā'ax yā Namix mōkputox? Kaxīy.

Yeyox xix tik te hāmyūmmūg xop

Ha tikmū'ūn xohix te Yeyox yōg hām'āktux putup pax.

³⁸ Ha Yeyox te:

—Pa 'ātix, tik te hāmyūmmūg xop tep-tup pax, nūy hāpkumep, nūy topixxax xe'ēgnāg ta', puyīy tikmū'ūn nōm 'āktux max, yā nōm 'āpak nāpet tu'. Tik te hāmyūmmūg xop te' pop 'ūxexka xop yōg pip'ax Yoneo xop yōg Topa pet kopa

³⁹ xix 'āmuk xexka tu',

⁴⁰ tu hokmām xop yōg hāpxop pop, tu' xupxet, tu Topa pu hām'āktux, puyīy

tikmū'ūn hāmp'e'paxex yā' max. Topa te yōg hāpkummuk mīy'ax yānān xexkap-tup! Kaxīy.

Ūn hok yūm te tayūmak nīm

⁴¹ 'Ūxip Yeyox Yoneo yōg Topa pet kopa tayūmak tat'ax mīpkox yīkak, tu' pēnāhā tikmū'ūn nūn, nūy tayūmak nīm tayūmak tat'ax kopah. Tikmū'ūn punethok 'ūp-texop xexka te tayūmak xohix nīm,

⁴² ha ta' nūn 'ūhūn, yā hok yūm, yā hām hōgnāg. 'Ūnūn, tu nūktu tayūmak 'ānuk tix mō'tat mīpkox kopah, yā tayūmak kutōgnāg.

⁴³ Ha Yeyox te yāy yōg tik xop xānāhā', tu: —'Āte xa hāpxe'e 'āktux, nū 'ūn hok yūm, yā hām hōgnāg, pa yā hāpxop xohix mō'tat, pa nōm nōy xohix te hāpxop kutōgnāg mō'tat.

⁴⁴ Yā 'ūp-texop xexka xop yōg hāpxop punethok, tu tayūmak yāgnāg xut, nūy mō'tat, ha yōg hāpxop punethok pip, pa 'ūn hok yūm te yāy yōg hāpxop xohix mō'tat, ha' nōg. Kaxīy.

13

Topa pet xexka kōyyōy putup

¹ Tu ta' mōg Yeyox xix yāy yōg tik xop, ha tik xop te:

—Yāyā, pēnā Topa pet xexka 'ūmax xe'ēgnāg, yā mīptut max!

² Ha Yeyox te:

—'Ok mīptut max xe'ēgnāg pēnāhā'? Hāpxip 'īhā yōg mīkaxxap te' nōy yīmū' mām putup'ah, yā' xohix xexka koxyōy putup! Kaxīy.

Tikmū'ūn te 'āxop xūyāp-tup

³ Tu ta' mōg Yeyox xix yāy yōg tik xop, tu mōktu yīktix 'Onimet yīmū' mām, ha Pet te' yīkopit, xix Tiak te, xix Yoām te, xix 'Ānene te', hu:

⁴ —Hām'ūmhā nōm hāpxopmāp-tup? Tikmū'ūn te hāpxopmā'ax 'ūm pēnāp-tup, 'īhā nōm hāpxopmāp-tup? Kaxīy.

⁵ Ha Yeyox te hāmyūmmūgāhā kōnāmāhā', hu:

—Pa 'ātix, nūy hāmyūmmūg, nūy 'ākuxa mām hok koit'ax kopah.

⁶ Yā' nūn putup 'ūxohix, tu hām'āktux putup, hu: “'Ūgmūn nō'ōm, Topa tek mūn yāy kutnāhā', yā Yeyox 'ūgmūn!” Kaxīy. Ha tikmū'ūn xohix kuxa mām putup koit'ax kopah.

⁷ 'Āxop te' xupax putup hāmūhūn xexka hāmūhūnāg, yā tikmū'ūn te yāy kix kakīynāg. Ha tikmū'ūn nūn putup, tu: “Yā yāy kix kakīynāg tikmū'ūn hāptox tu'.” Kaxīy. 'Āpu 'ākuxa nōg hok. Yā tikmū'ūn te yāy kix putup te kaxīy, pa hāpkux 'ohnāg.

⁸ Hāpxexka yōg tikmū'ūn te hāpxexka nōy yōg tikmū'ūn mūtik yāy kix putup, ha ta' hep xop te' hep xop nōy mūtik yāy kix putup, ha ta hām xexka yāy nuhuk nām panip putup,

ha ta hāmhōgnāg, ha putup te tikmū'ūn kix putup. 'Ūn tek-tok put putup, tu' xūy xexka'. Hā kaxīy tikmū'ūn xūy putup, ha mōktu hāpkux.

⁹ Pa 'ātiḫ, tikmū'ūn te 'āxop mōgāp-tup 'ūpa te hāmyūmmūg xop tu', puyīy 'āxop kopit, yā 'āxop kummugāp-tup. Ha tikmū'ūn nūn putup kamah, nūy 'āxop kix xikot hā Yoneo xop yōg Topa pet kopah. Yā 'ākuxa mām 'ūgkopah, yīy ta' nūn putup tikmū'ūn, nūy 'āxop mōgā gohenanok tu' xix gohet yōg xat'ax xexka tu', puyīy 'āxop kopit, ha 'āxop te nōm pu Topa yōg hām'āpak max'ax 'āktux,

¹⁰ ha tikmū'ūn te' hep xop xohix xexka pu Topa yōg hām'āpak max'ax 'āktux putup hāmāxap, hak-nāy tu hāpkux.

¹¹ Tikmū'ūn te 'āxop mūg, nūy 'āxop mōgā' gohet yōg xexka xop tu'. 'Āpu 'ākuxa nōg hok. 'Āpu hāmpē'āpaxe hok, hu: "'Āte putep xuktux putup?" Kaxīy. Pa 'āmhok, 'āmōg putup gohet yōg xexka tu', ha Topa te xa hām'āktux'ax hōm putup, xayīy hām'āktux, yā 'ōg hām'āktux 'ohnāg, pa yā Topa Koxuk mūn yōg.

¹² Tikmū'ūn punethok te yāy taknōy mōgāp-tup gohet yōg xexka xop tu', puyīy nōm kix, ha ta 'ātak te yāy kutok mōgāp-tup kamah xi' tut te', puyīy nōm kix. Ha tak-tok te 'ātak mōgāp-tup kama xi' tut, puyīy nōm kix, ha' xakix putup 'ūxohix.

¹³ 'Ākuxa mām 'ūgkopah, yīy tikmū'ūn te 'āp-tup nōg putup, pa 'āpu 'ākuxa mām ka'ok mōkuma'āmōg, ha Topa te 'āhīnāp-tup. Kaxīy.

'Ūxūy xexka'

¹⁴ Yeyox te xe:

—'Āxop te' pēnāp-tup hāpxop yāy 'īgā xexka 'ūnōy yōg xip'ax tu'—xate nū mōkupix, 'āpu hāmyūmmūg—'āxop pip hāpxexka Yonex tu', nūy ta mōg mō'ka'ok yīktix tu'.

¹⁵ 'Āxop mām mīptut yīmū, nūy ta mōg mō'ka'ok. Mīptut hā mōxa hok, nūy hāpxop pa'.

¹⁶ 'Āxop pip hāpxa tu', nūy ta mōg mō'ka'ok, yāy pet hā mōxa hok, nūy topixxax pa'

¹⁷ Yā' kummuk xexkap-tup 'ūn tek-tok xuk xop pu' xix 'ūn tek-tok put xop pu'.

¹⁸ 'Āpu Topa pu hām'āktux, nūy ta tu' xak, puyīy tikmū'ūn 'āxop kummugā mō'āgmūg pukpex 'īhā'.

¹⁹ Yā nōm 'āmnīy hā 'āxop xūy xexkap-tup, pa hōmā Topa te' mīy hām xexka xix hōnhā' xūy kutōgnāg.

²⁰ Topa te' xat, xayīy 'āmnīy xohix'ah hā 'āxop xūy putup. Topa te' xat hok, puxix xakix xohix xexka'. Pa' pip Topa kopa kuxa mām ka'ok xop, yā Topa te nōm yīmōgātux, nūy nōm hīnnā', hu' xat putup, puyīy 'āmnīy xohix'ah hā' xūy.

²¹ —Tikmū'ūn te hām'āktux putup, hu: "Mū, nūy pēnā', Topa yōg yāy kutnā'ax xip nūnteh." Kaxīy. Ha ta' nōy te hām'āktux putup, hu: "Mōg, nūy pēnā', Topa yōg yāy kutnā'ax xip 'ōnteh, yā' xip Yeyox." Kaxīy. 'Āpu 'āyīpkox pip hok. Yā' koit.

²² Yā nōm koit xop te Topa pupi hām'āktux xop putuk putup, tu Topa yōg yāy kutnā'ax putuk putup, tu hāpxopmā ka'ok xe'ēgnāg, nūy Topa putuk, puyīy tikmū'ūn kuxa' yēy. Nōm tep-tup, nūy Topa yōg yīmōgātux xop kuxa mām koit'ax kopah.

²³ Pa 'ātiḫ. 'Āte 'āxop pu hāmyūmmūgāhā' hōnhā'. Hāpxip 'īhā nōm hāpxopmā'ax pēnāp-tup, tu' yūmmūg putup. Kaxīy.

Tikmū'ūn Kutok putpu' nūn

²⁴ Yeyox te xe:

—Yā' xūy xexka nōg putup, ha ta māyōn yāyhāp-tup hāpkoxtap, ha ta māyōn hex yānām pip putup'ah,

²⁵ ha ta māyōnnāg pip pexkox yo'oma', pa xakux putup, ha ta hāpxop xohix ka'ok nuhuk putup pexkox yo'oma' xix pexkox kopah,

²⁶ ha ta pexkox tuk yīxop-tup, yā Tikmū'ūn Kutok, tu hāmōy xexka kopak yīxop-tup, yā' max xe'ēgnāg, ha tikmū'ūn xohix te' pēnāp-tup,

²⁷ ha 'āte yāy yōg pexkox yōg nū'pok xop mō'pok putup hāpxexka xohix tu'. 'Ūmōg putup, nūy Topa yōg yīmōgātux xop nūnnā', puyīy xohix yāy tu nū'nā'. Kaxīy.

Piget kup

²⁸ Yeyox te xe:

—'Āpu hāmyūmmūg. 'Ūxip piget kup, tu yōg mīmmāg tup, tu yōg mīxux xupep. 'Āxop te' pēnāhā' tu' yūmmūg mō'āgmūg pukpex, yā tex tihix.

²⁹ Hā kaxīy xate nōm hāpxopmā'ax pēnāp-tup 'āte xa nōm 'āktux, tu' yūmmūg putup 'ūgnūn putup putpu'.

³⁰ 'Āpu hāmyūmmūg, hōnhā' pip tikmū'ūn, ha ta' yāg te nōm hāpxopmā'ax xohix pēnāp-tup, pa yā' yāg te' pēnāp-tup 'ohnāg, pa xakix putup hāmāxap.

³¹ 'ūnōg putup hāmōgnōy xix hām xexka', pa yōgnū hām'āktux pip mōkuma'mōg, tu' nōg putup 'ohnāg. Kaxīy.

Hām'ūmhā

³² Yeyox te xe:

—Hām'ūmhā tikmū'ūn te nōm hāpxopmā'ax pēnāp-tup? Hāptup 'ūm, pe 'āmnīy 'ūm? Māyōn yūm 'ūm? Yā pexkox nū'pok xop te' yūmmūg 'ohnāg, ha Topak-tok te' yūmmūg 'ohnāg, pa 'ātak Topa puxehnāg te' yūmmūg.

³³ Pa 'ātiḫ. 'Āpu 'ūkhip, nūy hāmpēnā'. Yā 'āxop te' yūmmūg 'ohnāg. Hām'ūmhā nōm hāpxopmā'ax pēnāp-tup? Yā 'āxop te' yūmmūg 'ohnāg.

³⁴ Yā hā kaxīy putuk. Tik mōg putup hāptox tu', tu kāmānat xex, puyīy hām, tu hāmīyīkox pēnā'ax xat, puyīy hāmpēnā', tu ta' mōg tihik.

³⁵ Hām'ūmhā putpu' nūn putup tihik, 'ok pe 'āmāxak, 'ok pe 'āmnīy kote hā, 'ok pe xokakkak tak xata hā, 'ok pe hām yāy kuhmōy hā? Yā kāmānat te' yūmmūg 'ohnāg. Hā kaxīy tikmū'ūn te' yūmmūg 'ohnāg, hām'ūmhā 'ūgnūn putup putpu'.

³⁶ 'Ūgnūn putup, pa tikmū'ūn mō'yōn, yā' kummuk.

³⁷ 'Āte xa hām'āktux, xix tikmū'ūn xohix pu nōm'āktux, hu: "Pa 'ātix!" Kaxīy.

14

Ūp-tup, nūy Yeyox putex

¹ Hōnhā 'āmnīy tix 'Thā 'āmuk xexka xip'ax, yā 'āmuk xexka 'āxet'ax Nōa' Yēn xix Pām Tokatok Hok. Ha 'āmānex xexka xop tep-tup xix tik te hāmīyūmmūg xop tep-tup, puyīy xonat xop Yeyox mūy, puyīy kīy, 'ūp-tex putup hah,

² tu yāy mūtik hām'āktux, hu:

—Pa 'āmhok hōnhā'ah. Yā 'āmuk xexka xip. Hōnhā yūmū'āte Yeyox putex, puxix tikmū'ūn gāy xexkah. Nāy, pu 'āmuk xexka mā kux. Kaxīy.

Yeyox xip xiptuxexka Metān tu'

³ 'Ūxip Yeyox xiptuxexka Metān tu' Ximām pet kopah, yā Ximām xax kunutnām. Ha ta' nūn 'ūhūn, tu mīkaxxap koxnāg max nūnnāhā', yā mīkaxxap 'anamax hā' mīy, ha' kopa' xip hep haxnāg max 'ūxuxet'ax nān, yā takat xexkah. 'Ūn nūn, tu nūktu mīkaxxap koxnāg koxyōy, tu Yeyox putox yīmū hep pux.

⁴ Ha ta' pip tikmū'ūn, tu' gāy, tu yāy mūtik hām'āktux, hu:

—Yā' kummuk. Teptu hā kaxīy hep haxnāg max putyōn?

⁵ Yā hep nōmenex, pu' max, nūy tayūmak pop, nūy 'ūhok xop pu nōm popmā'. Yā yōg tayūmak xexkah, yā yōg tayūmak 'ānuk, yā yānām ponnok hā mīy, yā xohix te' 300 'ūyōg tayūmak 'ānuk. Kaxīy.

Yā tikmū'ūn te' 'ūn mānōg,

⁶ pa Yeyox te:

—'Ūmānōg hok' Teptu 'āxop gāy xexkah? 'Ūn te hāpxopmā max.

⁷ Yā' hok xop pip mōkuma'mōg 'āxop kopah. 'Āxop tep-tup, nūy ta nōm hā tehet, pak xip ka'ok 'ohnāg 'āxop kopah.

⁸ 'Ūn te hāpxopmā max yūmmūg, hu' mīy. 'Ūkxok putup, hak hāpkot putup, yīy ta hōnhā 'ūn tek yīn muk, nūy haxyā max, xokxax putuk.

⁹ 'Āte xa' hāpxe'e 'āktux tikmū'ūn te hāpxexka xohix tu' Topa yōg hām'āpak

max'ax 'āktux putup, tu nū 'ūn 'āktux putup kamah.

Yot te gāy xop mōgāp-tup Yeyox ha

¹⁰ Ha ta' mōg Yot 'Īkkanot, yā' xip Yeyox yōg tik te 12 xop kopah, tu' mōg, tu mōktu 'āmānex xexka xop mūtik hām'āktux, nūy gāy xop mōgā Yeyox ha, puyīy xūyγā',

¹¹ ha 'āmānex xexka xop te' xupak, hu' kuxa hittup:

—'Ūgmū'āte xa tayūmak popmāp-tup. Kaxīy.

Hā kaxīy Yot te gāy xop mōgāp-tup Yeyox ha, puyīy xūyγā'? Yā Yot te hāmp'e'paxex.

'Āmuk xexka 'āxet'ax Nōa' Yēn

¹² 'Āmuk xexka xip 'āxet'ax Pām Tokatok Hok, yā 'āmnīy māxap, 'Thā Yoneo xop te kahnēn kutok kix 'āmuk xexka 'āxet'ax Nōa' Yēn pu'. Ha ta' pip Yeyox yōg tik xop, tu Yeyox pu hām'āktux, hu:

—Pi'yā xatep-tup? Pi'yā 'ūgmū'āte 'āmuk xexka Nōa' Yēn mīy putup? Kaxīy.

¹³ Ha Yeyox te yāy yōg tik mō'pok, tu' xat, hu:

—Mōg kōmēn tu'. 'Āmōg putup, pa' mōg putup tihik, tu naxtox hā kōnāg tat putup. 'Āpu nōm pe mōg.

¹⁴ Tik te mīptut hā mō'nāp-tup. 'Āpu nōm hā mōxā kamah, nūy xuxyā pu hām'āktux. 'Āpu hām'āktux, hu: "Yāyā te' yīkopit. Pi'yā' yūm hām'āta kox? 'Ūgmū'āte 'āmuk xexka Nōa' Yēn mīy putup 'ōnteh, 'ūgmūn xix yāy yōg tik xop." Kaxīy.

¹⁵ Ha tik te xa' mūg hām'āta kox max, yā pepi' yūm, ha' pip mīmpe max. 'Ōnte 'āxop te' mīy putup 'āmuk xexkah. Kaxīy.

¹⁶ Ha ta' mōg Yeyox yōg tik tix, tu mōktu hāpxop xohix pēnāhā Yeyox te nōm xuktux, tu 'āmuk xexka 'āxet'ax Nōa' Yēn mīy.

¹⁷ 'Āmāxak ha ta' mōg Yeyox xix yāy yōg tik xop, tu mōktu hām'āta kox hā' mōxaha',

¹⁸ tu mīmpe xit'ax tu' mām, tu' xit, ha Yeyox te:

—Hamūn, 'āte xa hām'āktux. 'Ūxip tihik 'āxop kopah, tuk mūtik xit. Tute' gāy xop nūnnāp-tup, puyīy 'ūgxūyγā'. Kaxīy.

¹⁹ Ha Yeyox yōg tik xop kuxa hittup 'ohnāg, ha yāp-xet te:

—Yāyā, 'ū'ūm? 'Ok 'ūgmūn? Kaxīy.

Ha ta' nōy te yīykopit, ha' nōy te, tu mōktu xohix te' yīykopit kamah.

²⁰ Ha Yeyox te:

—Yā tik puxet 'āxop kopah, yā nōm te pām pix putup kāmēy pet xax kopah.

²¹ Yā 'ūkxok putup, yā Tikmū'ūn Kutok xok putup. Yā hā kaxīy Topa yōg tappet te nōm 'āktux. Tik te gāy xop mōgāp-tup Tikmū'ūn Kutok ha, puyīy xūyγā'. Yā' kummuk xexka nōm pu'. 'Ūtut te nōm put 'ohnāg, pu' max! Kaxīy.

Pām mähā, tu xupyāg xo'op, nūy Yeyox pe'paxeh

²² Ūxit Yeyox xix yāy yōg tik xop, ha Yeyox te pām paha', tu Topa pu hām'āktux, hu:

—Xatek mū'ā pām popmähā'. 'Āmax. Yā' max. Kaxīy.

Yeyox te pām koxip, tu yāy yōg tik xop pu nōm popmähā', tu:

—Āpu 'ūpop. Nūhū yā 'ūgyīn. Kaxīy.

²³ Tu kănēy xo'op'ax paha', tu Topa pu hām'āktux, hu:

—Topa, yā' max, 'āmax. Kaxīy.

Tu ta yāy yōg tik xop pu' hōm, ha' xo'op.

²⁴ Ha Yeyox te:

—Nūhū yā 'ūkhep 'āta. 'Āte yāy hep 'āta tikmū'ūn xohix pupi nū'nāp-tup. 'Ūkhep 'āta yā pa'ax tup Topa yōg xix tikmū'ūn yōg.

²⁵ 'Āte xa hām'āktux xe'e', 'āte xe xupyāg xo'op putup'ah. Nāy, pu Topa yāy yōg tikmū'ūn xat putup, ha' yīpkox pīp, 'Thā xe' xo'op.

²⁶ Ha' xohix te Topa puk-tex, tu ta' mōg yīktix 'Onimet tu'.

Yeyox te Pet pu hām'āktux

²⁷ Ha Yeyox te yāy yōg tik xop pu hām'āktux, hu:

—'Āxop xohix tek nīm putup. Yā Topa yōg tappet te: "Tikmū'ūn te kahnēn pēnā'ax putex putup, ha ta kahnēn xumāp-tup." Kaxīy.

²⁸ Pa putpuk hip-tup 'ūgmūn, tu tak mōg putup 'āxop keppa hāpxexka Ganinet tu'. Kaxīy.

²⁹ Ha Pet te:

—'Āmhok! 'Āte 'ānīm putup'ah. Nōm xohix te 'ānīm putup, kopxix 'ānīm putup'ah. Kaxīy.

³⁰ Ha Yeyox te:

—'Āte xa hām'āktux xe'e: 'āmīy ha ta hām'āktux tikoyuk xate, hu: "'Āte Yeyox yūmmūg 'ohnāg!" Kaxīy. Hāpxip 'Thā xokakkak tak xatap-tup tix. Kaxīy.

³¹ Pa Pet te xe hām'āktux ka'ok, hu:

—'Āmhok! 'Āte nōm 'āktux putup'ah, 'āyūmmūg 'ohnāg. 'Ūkxok 'āmūtik, kopxix nōm 'āktux putup'ah. Kaxīy.

Ha ta nōm 'āktux kamah Yeyox yōg tik xohix xop.

Yeyox xip mīm mātiknāg Yetxēm tu'

³² Tu ta' mōg Yeyox xix yāy yōg tik xop mūtik mīm mātiknāg tu' 'ūxuxet'ax Yetxēm, tu' mōg, tu mōktu' mōxaha', ha Yeyox te:

—Māhām nūnteh, 'Thāg mōg, nūy Topa pu hām'āktux. Kaxīy.

³³ Tu ta' mōg Yeyox, tu' mōgāhā Pet, xix Tiak xix Yoām, tu hāpxip 'Thā Yeyox kuxa hūtup 'ohnāg kōnāmāhā', tu' kuxanōg xexkah,

³⁴ tu:

—'Ūgxuxa hittup 'ohnāg, yāg xok putup putuk. 'Āpu nox 'āti nūnteh, nūy 'ūkhip. Pa 'āti. Kaxīy.

³⁵ Tu ta' mōg kutōgnāg, tu mō hām nīy, tu Topa pu hām'āktux, hu:

—Topa, xate' xat, kopxix xūy putup'ah.

³⁶ Tak yōgnū 'ātak, xate hāpxopmā xohix yūmmūg. 'Āpu xat, 'ūyīy xūy hok. Pa 'ātep-tup'ah 'āte nōm putup, pa 'ātep-tup xate nōm putup. Kaxīy.

³⁷ Tu ta' nūn putpu', tu nūktu yāy yōg tik tikoyuk pēnāhā', ha mō'yōn, ha Yeyox te Pet pu:

—Xīmām, 'ok mō'ōn? 'Ok māyōn mōg kutōgnāg hāg hip 'ohnāg?

³⁸ 'Āpu 'āpa ka'ok, nūy Topa pu hām'āktux, puyīy nōy 'āxapit hok, xayīy hāpkummuk mīy. 'Ākoxuk tep-tup, nūy mō'yōn hok, pa 'āyīn tep-tup, nūy mō'yōn, yā 'ākoxuk ka'ok, pa 'āyīn pu'uk. Kaxīy.

³⁹ Tu ta xe' mōg Yeyox, nūy Topa pu hām'āktux, tu yōg hām'āktux 'āktux 'ūxehet, yā' yāy putuk,

⁴⁰ tu ta xe' nūn putpu', pa' pīp yāy yōg tik xop, tu mō'yōn. Yā kūmīm tep-tex xexkah, tu' pa ka'ok yūmmūg 'ohnāg, tu yānān hām'āktux yūmmūg 'ohnāg.

⁴¹ Ha ta' xe' mōg Yeyox, tu xe' nūn putpu', yā' nūn tikoyuk, tu:

—'Ok mō'ōn kux'ah, 'ok kūmīm te 'āp-tex? Puxix! Yā nōmhā'! Yā nōmhā tik nūn, nūy hāpkummuk mīy xop nūnnā', puyīy 'ūgmūn Tikmū'ūn Kutok xūyγā'.

⁴² Pepix 'āpīp. 'Āpu yūmū mōg. Pēnā', 'ūnūn tihik, tu' gāy xop nūnnāhā, puyīy 'ūkxūyγā'! Kaxīy.

Tikmū'ūn te Yeyox mūg

⁴³ Yeyox te hām'āktux, 'Thā' xupep Yot, yā nōm te Yeyox yōg tik te 12 xop kopa' xip, ha nūmūti' mōxaha tikmū'ūn, ha' taha mīkaxxexka xix mīptopnāg. Yā 'āmānex xexka xop te nū'pok, xix tik te hām yūmmūg xop te', xix Yoneo xop yōg xexka xop te'.

⁴⁴ Yā Yot tep-tup, nūy gāy xop mōgā', puyīy Yeyox xūyγā', hu nūmūtik hām'āktux, "'Āte tik kep hā' mūg putup. 'Āpu nōm mūy, nūy mōgā'. Yā nō'ōm." Kaxīy.

⁴⁵ Hāpxip 'Thā' nūn Yot, tu nūktu Yeyox yīkāgnāg xip, tu:

—Yāyā'! Kaxīy.

Tu' nōy kep hā' mūg, yā xape xop putuk.

⁴⁶ Ha tikmū'ūn te Yeyox mūg, tu' hīy.

⁴⁷ Ha ta' xip tihik, tu' mīkaxxexka xut, tu tik te 'āmānex xop xat yōg kāmānat yīpkox xak,

⁴⁸ ha Yeyox te tikmū'ūn pu hām'āktux, hu:

—'Ok 'āxop nūn, tu' taha mīkaxxexka xix mīptopnāg, nūy xupxet hīy? Yā' putuk.

⁴⁹ Hōmāg xip ka'ok 'āxop kopah, nūy 'āxop pu hāmyūmmūgā' Topa pet xexka tu', pa 'āxop tek hīy 'ohnāg. Pa hōmā 'ūhittap nōm te kax'āmi Topa yōg tappet tu', ha ta hōnhā nōm putuk. Kaxīy.

⁵⁰ Ha Yeyox yōg tik xop te Yeyox nīm, tu hāpxūmānām.

⁵¹ Yā' xip tik tuktu, tu komenok ponnok hā' taha', ha tikmū'ūn te' hīy putup,

⁵² pa tik te' nīm komenok, tu' xaxtop, tu ta' mōxupaha'

Yoneo xop yōg xexka xop te Yeyox kopit

⁵³ Hāpxip 'īhā tikmū'ūn te Yeyox mōgāhā tik te 'āmānex xop xat pet tu', tu mōktu' mōxaha', ha' pip 'āmānex xexka xop, xix Yoneo xop yōg xexka xop, xix tik te hāmyūmmūg xop.

⁵⁴ Ha ta' xip Pet, tu hāptox tu Yeyox pe' mōg, tu mōktu' xupep tik te 'āmānex xop xat pet yōg hāmnuhnōg tu', tu' yūm kuxap yīkak xonat xop mūtik, nūy xapak.

⁵⁵ Ha ta' pip 'āmānex xexka xop, xix tik pa te hāmyūmmūg xop te hāmpē'paxex, texīy Yeyox 'āktux kummuk putup, puyīy putex. Pa 'āmhok, 'ap yūmmūg'ah.

⁵⁶ Tikmū'ūn xohix te' kupep, tu' koit, pa' yāy yōg hām'āktux te' nōy yōg putuk 'ohnāg.

⁵⁷ Yā tikmū'ūn tek-nīhā' pip, tu' koit, hu:

⁵⁸ —'Ūgmū'āte Yeyox yōg hām'āktux 'āpak, yā tute: "Tikmū'ūn te Topa pet xexka mīy, ha ta' 'āte' koxyōy putup, pa' 'āte xē' mīy putup 'āmniy tikoyuk hā. Yā tikmū'ūn te nōm mīy putup 'ohnāg." Kaxīy.

⁵⁹ Tikmū'ūn te hām'āktux, pa' yōg kupep'ax te yāy putuk 'ohnāg.

⁶⁰ Ha tak-nīhā' xip tik te 'āmānex xop xat tikmū'ūn kopah, tu Yeyox pu hām'āktux, hu:

—'Ok xate hām'āktux yānān 'ohnāg? Kaxīy.

⁶¹ Pa' yēy. Yā hām'āktux yānān 'ohnāg, ha tik te 'āmānex xop xat te xe:

—'Ok Topa te 'āyāy kutnāhā'? 'Ok Topa xe'ēgnāg kutok? Kaxīy.

⁶² Ha Yeyox te:

—Yā hamūn. 'Āxop xohix tek pēnāp-tup, yā Tikmū'ūn Kutok pēnāp-tup. 'Ūgyūm putup Topa ka'ok yīm xe'e tu'. 'Āxop te kamak pēnāp-tup, 'ūkxip putup pexkox kopah, tu ta' yīxop-tup hāmgōy xexka kopah! Kaxīy.

⁶³ Ha tik te 'āmānex xop xat te yāy topixxax pot, yā' gāy, tu:

—Puxix. Yā hām'āktux kummuk!

⁶⁴ Tute Topa 'āktux kummuk. 'Āxop te' xupak. Putep hāmpē'āpaxex nōmhā'? Kaxīy.

Ha tikmū'ūn xohix te Yeyox putup nōg, tu hām'āktux, hu:

—'Āpu 'ūp-tex! Kaxīy.

⁶⁵ Ha tikmū'ūn te yīynīn xōn kōnāmāhā Yeyox tu', tu' nōy putox mō'nīy, tu' kix, tu:

—'Āpu hām'āktux. Tep-te 'ākix? Kaxīy.

Ha ta' pip xonat, tu Yeyox kix yāy yīm hā.

Pet te hām'āktux Yeyox yūmmūg 'ohnāg

⁶⁶ Ha ta' xip Pet kukpa hāmnuhnōg tu', ha' nūn tik te 'āmānex xop xat yōg kāmānat hex,

⁶⁷ tu nūktu Pet pēnāhā', tu:

—Hōmā 'āxip kōmēn Nāyane yōg Yeyox mūtik, yā yōg xop kopa 'āxip. Kaxīy.

⁶⁸ Pa Pet te:

—'Ap 'āte nōm yūmmūg'ah. Putep 'āktux? Kaxīy. Tu ta' mōg Pet hāmpak'ax mō'nīynīn'ax tu', 'īhā xokakkak tak xataha'.

⁶⁹ Ha kāmānat hex te Pet pēnāhā', ha yīka' nōy pip, ha kāmānat hex te:

—Hamūn, tihik 'ōhōm yā Yeyox yōg xop kopa' xip. Kaxīy.

⁷⁰ Pa Pet te:

—'Āk mūn'ah. Kaxīy.

Hāpxip 'īhā tikmū'ūn te:

—Hamūn. 'Ūgmū'āte' yūmmūg xe'e. 'Āxip Yeyox yōg tik xop kopah. Hamūn, 'āmūn yā hāpxexka Ganinet yōg tihik kamah. Kaxīy.

⁷¹ Ha Pet te:

—'Āte xa hām'āktux, ha Topa te' xupak, tu' yūmmūg. 'Āxop te tik 'āktux, pa 'āte nōm yūmmūg 'ohnāg! 'Āte' koit, puxix Topa 'ūgkix! Kaxīy.

⁷² Hāpxip 'ohnāg 'īhā xe' xataha xokakkak tak, ha Pet te' xutigāhā, yā hōmā Yeyox te: "Xate hām'āktux tikoyuk, hu: 'Āte Yeyox yūmmūg 'ohnāg! Kaxīy. 'īhā xokakkak tak xatap-tup tix." Kaxīy.

Ha Pet kuxa hittup 'ohnāg, hu' potaha'.

15

Yeyox xip Pinat keppah

¹ Māyōn xupep 'īhā yāytunū'nāhā 'āmānex xexka xop, xix Yoneo xop yōg xexka xop, xix tik te hāmyūmmūg xop, tu hām'āktux tik pa te hāmyūmmūg xop mūtik.

Ha ta xonat xop te Yeyox hīy, tu ta' mōgāhā Pinat hah, tu mōktu Pinat pu Yeyox hōm.

² Ha Pinat te Yeyox pu hām'āktux, hu:

—'Ok xate Yoneo xop xat? Kaxīy.

Ha Yeyox te:

—Hamūn. Xate hām'āktux. Kaxīy.

³ Ha 'āmānex xexka xop te Yeyox 'āktux kummuk punethok.

⁴ Ha Pinat te xe yīy kopit, hu:

—'Ok xate hām'āktux hā yānān 'ohnāg?

'Āpu 'ūxupax, nōm xop te hām'āktux 'ākummuk! Kaxīy.

⁵ Pa Yeyox te xe hām'āktux yānān 'ohnāg, yīy Pinat kuxa kopa' yēy.

Tikmū'ūn te hām'āktux Yeyox 'ūkummuk

⁶ 'Āmuk xexka 'āxet'ax Nōa' Yēn xip, ha tikmū'ūn te ta tu' xak, yīy ta Pinat te tik xut kanet ka'ok kopah, pu mōg. Yā hāmyāxatamuk xohix hā kaxīy.

⁷ Ha ta' xip tihik 'āxet'ax Mahamax kanet ka'ok kopa yāy xape xop mūtik. Yā hōmā tikmū'ūn te gohet yōg xop mūtik yāy kix, ha Mahamax te tikmū'ūn kix, ha' xakix.

⁸ Ha ta' nūn nōmhā tikmū'ūn, nūy ta tu' xak, puyīy tik xut kanet ka'ok kopah, pu mōg, Yā hāmyāxatamuk nōy xohix putuk.

⁹ Ha Pinat te:

—'Ok 'āxop tep-tup, 'ūyīy xut, pu mōg Yoneo xop yōg xat'ax Yeyox? Kaxīy.

¹⁰ Yā Pinat te' yūmmūg 'āmānex xexka xop Yeyox hā yīpkumīy, hu Yeyox nūnnāhā Pinat hah,

¹¹ tu hām'āktux hā tikmū'ūn gāyāhā', puyīy ta tu' xak, puyīy Pinat Mahamax xut pu mōg, 'ap Yeyox'ah,

¹² ha Pinat te:

—'Āxop te putep-tup, 'ū mīy tik mūtik? Yā 'āxop te nōm xānāhā nōm te Yoneo xop xat. Kaxīy.

¹³ Ha tikmū'ūn te:

—'Āpu mīpkup nix yīmūp-tex pipkup hā. Kaxīy.

¹⁴ Ha Pinat te:

—Teptu, putep kummuk mīy? Kaxīy.

Ha tikmū'ūn te hām'āktux ka'ok nōy nā' mōg, hu:

—'Āpu mīpkupnix yīmūp-tex! 'Āpu mīpkupnix yīmūp-tex! Kaxīy.

¹⁵ Ha Pinat tep-tup, nūy tikmū'ūn kuxa hittupmā', hu Mahamax xut, pu mōg, tu hāpxīp 'hā xat, puyīy xonat Yeyox kix xikot hā, tu xonat xop pu Yeyox hōm, pup-tex.

Xonat te Yeyox kute'ex kummuk

¹⁶ Ha ta' mōg xonat xop, tu Yeyox mōgāhā gohenanok pet tu', tu mōktu' mōxaha', ha xonat xohix te yāy tu nū'nāhā'.

¹⁷ Hāpxīp 'hā xonat te Yeyox pu mō xax tat, yā topixxax tox 'āta', puyīy xexka xop putuk, tu Yeyox putox yīmū' xix kuxxax, puyīy xexka xop putuk, yā mīmyāmtoxmāg hā' mīy.

¹⁸ Xonat te:

—'Āmax xe'ēgnāg! Xate Yoneo xop xat! Kaxīy.

¹⁹ Xonat te Yeyox putox kix mīm xahix hā, tu mōg yīyhep yōn, tu kopaxux tu' pip Yeyox keppah, yā' xexka xop keppa putuk, yā' xexka xop 'āpak putuk,

²⁰ tu Yeyox kute'ex kummuk kux, tu topixxax tox 'āta xut, tu mō xax tat, yā Yeyox yōg, tu Yeyox mōgāhā hāptopah, nūy mīpkupnix yīmūp-tex.

Yeyox putex mīpkupnix yīmū'

²¹ Tu ta' mōg, tu putat hā' mōg, pa' xīp tihik 'āxet'ax Xīmām, yā hām panip tu' nūn, tu kōmēn tu' mōg, yā kōmēn Xīnēn yōg tihik, yā 'Anexān mūktak xix Hop mūktak. Ha ta' xat xonat te, pu Xīmām mīpkupnix tat, ha' taha',

²² ha xonat xop te Yeyox mōgāhā hām tu 'āxet'ax Gok, yā tikmū'ūn yīy'ax hā: "Hām tu' xīp putox kup." Kaxīy. Tu' mōg tu mōktu' mōxaha',

²³ ha xonat te Yeyox pu' hōm xupyāg xix hehmēn, yā xupyāg hā' kanop hehmēn, pa yā' xo'op'ah,

²⁴ ha xonat te Yeyox xix mīpkupnix yīmū' pipkup hā, tu mō' xap yōn, nūy xonat puxet

pu Yeyox xax hōm, ha ta' nōy pu' nōy hōm hā kaxīy.

²⁵ Yā māyōn te pexkox puka' yūm 'hā mīpkupnix yīmū' xup Yeyox pipkup hā.

²⁶ Ha ta' 'ōm xīp, tu' kax'āmi, hu: "Tik te Yoneo xop xat". Kaxīy. Tu nōm xix mīpkupnix yīmū'.

²⁷ Ha xonat xop te mīpkupnix yīmū xupxet tix kix pipkup hā, yāp-xet xup Yeyox yīm xe'e tu', ha ta' nōy xup 'ūyīm xax tu'.

²⁸ Hā kaxīy Topa yōg tappetxax te hām 'āktux xe'e'. Yā Topa yōg tappetxax te, "Yā' xīp 'ūkummuk xop mūtik."

²⁹ Ha ta' nūn tikmū'ūn, tu nūktu Yeyox mānōg, tup-tox mahap, tu:

—'Ūgāynām! Tute hām'āktux Topa pet xexka koxoyōy yūmmūg, tu xe' mīy yūmmūg 'āmnyī tikoyuk hā'

³⁰ Pu yā yīyox mīpkupnix tu', nūy xok hok. Kaxīy.

³¹ Ha ta Yeyox mānōg kama 'āmānex xexka xop te' xix tik te hāmyūmmūg xop te', tu:

—Tute tikmū'ūn hīnnā yūmmūg, pa yāy hīnnā yūmmūg 'ohnāg!

³² Topa te 'āyāyutnāhā, ha xate Yoneo xop xat. 'Āpu mīpkupnix tu yīyox. 'Ūgmū'āte' pēnāp-tup, huk mūg kuxa mām putup 'ākopah! Kaxīy.

Ha ta xupxet te Yeyox kute'ex kummuk kamah.

Yeyox xok

³³ Māyōn te yāykote' yūm, pa hām xohix tu hāpkoptax, tu mōktu māyōn he'.

³⁴ Ha māyōn he 'hā Yeyox te hām'āktux ka'ok, hu:

—"Enix, 'Enix, nēmā xamatān?" Kaxīy. Yā tikmū'ūn yīy'ax hā: "Yōgnū Topa, yōgnū Topa, teptuk nīm?" Kaxīy.

³⁵ Ha tikmū'ūn te' xupak, tu:

—'Ūxupax! Tute 'Enit xānāhā! Kaxīy.

³⁶ Ha 'ōm xīp, tu ta' mōg, tu tohok hā xupyāg kummuk xup, tu mīm hā' xuhmīy, tu' nūnnāhā', tu Yeyox pu' hōm, pu xo'op. Tute:

—'Āpu yūmū'āte pēnā'. 'Ok 'Enit nūn, nūy mīpkupnix tu' xut? Kaxīy.

³⁷ Ha Yeyox te hām'āktux ka'ok, tu' xok xe'e'.

³⁸ Ha ta Topa pet xexka yōg topixxax mōhāmnyīn'ax pot 'ūpepīx mōktu' kakak.

³⁹ Ha ta' xīp xonat yōg kapitām Yeyox kep-pah, tu Yeyox te hām'āktux ka'ok 'āpak, tu Yeyox xok pēnāhā', tu:

—Hamūn, tihik nūhū' yā Topak-tok! Kaxīy.

⁴⁰ Ha ta' pip 'ūhūn hāptox miāx tu', tu' pēnāhā', yā 'ūn xop kopa' pip Mānix Mānanēn, xix Xanomē', xix Manix, yā Yoye mūktut xix Tiak mūktut, yā Tiak yā tukkup.

⁴¹ Yā hōmā 'ūn te Yeyox mūtik mōg pax tu hāpxexka Ganinet tu', tu Yeyox pu hāpxop

max m̄y. Ha ta' pip kama 'ün n̄y xohix. Yä' n̄n Yeyox mütik k̄m̄en Yenoyan̄en tu'.

Yeyox ȳin xix m̄ikaxxap kox kopah

42-43 'Äm̄axak 'Ihä' n̄n Yoye', yä k̄m̄en 'Anim̄atex ȳog tihik, yä' xexkah, tu tik pa te hämyümm̄ug xop kopa' xip. Yä tute' hip Topa te yäy ȳog tikm̄ü'ün xat, ha' ȳipkox pip. Yä xexta pet 'äm̄axak 'Ihä Yoneo xop te hämm̄axnäh̄ä nit xap pu', ȳy ta Yoye kux-an̄og 'ohn̄äg, hu ta' mög Pinat hah, n̄y ta tu Yeyox xokxax xax.

44 Pinat te' xupak Yeyox xok xe'e n̄m̄h̄ä, tu' ȳy, yä' xok m̄ö'ka'ok. Pinat te' xānäh̄ä H̄öm̄ ȳog xonat xop ȳog xat'ax, ȳy ta' n̄n, tu n̄ktu' xupep. Ha Pinat te:

—'Ok xok tämn̄äg Yeyox? Kax̄y.

45 Ha:

—Ham̄ün. Kax̄y.

Ha Pinat te Yoye pu xokxax h̄öm̄.

46 Ha ta' mög Yoye, tu topixxax paha', tu ta' mög, tu m̄ipkupnix tu Yeyox ȳin putxok, tu topixxax hä' k̄y, tu' n̄n, tu n̄ktu m̄ikaxxap kox kopa' xix, tu m̄ikaxxap xexka yökän̄äm̄äh̄ä hämȳikox kopah,

47 ha Mānix Mānan̄en te' pēnäh̄ä xix Mānix te', yä Yoye mütkut. Yä Yeyox ȳin pēnäh̄ä' xix m̄ikaxxap kox.

16

Yeyox te putpu' hix

1 Nit xap 'āmn̄y tukn̄ög n̄ög 'Ihä' mög Mānix Mānan̄en, xix Xanom̄ē', xix Mānix, yä Tiak mütkut, tu hep häyn̄äg max paha', n̄y Yeyox ȳin muk.

2 Yenom̄y māyōn̄ xupep 'Ihä' mög m̄ikaxxap kox tu',

3 tu putat kopa yäy mütik hām'āktux, hu:

—'Ü'üm tek mü'ä m̄ikaxxap xexka yökän̄äm̄ap-tup, n̄y xut hämȳikox tu'? Kax̄y.

4 Yä' xexkanām̄ m̄ikaxxap, ȳy n̄m̄ 'āktux. Pa' pēnäh̄ä', pa' xip'ah hämȳikox tu'. Tep-te' yökän̄äm̄äh̄ä'?

5 'Ün te m̄ikaxxap kox hä' m̄öxaha', pa' ȳüm̄ tihik, tu ȳog topixxax tox ponnok, yä' ȳüm̄ 'ün ȳim̄ xe'e tu', ȳy 'ün te' ȳipkutuk xexkah.

6 Pa tik te:

—'Äkuxan̄ög hok! 'Äte' ȳümm̄ug, 'äxop te' xak k̄m̄en Nāyane ȳog Yeyox. 'Ap xip'ah n̄nteh. Yä putpu' hi'. Pēnā 'üȳög xip'ax n̄nteh.

7 Mög, n̄y Pet pu hām'āktux xix Yeyox ȳog tik n̄y pu'. 'Äpu hām'āktux, hu: "Yeyox te 'äkeppa mög häpxexka Ganinet tu'. 'Äxop te' pēnāp-tup 'önteh. Yä Yeyox te xa n̄m̄ 'āktux h̄öm̄ä." Kax̄y.

8 Ha ta' mög 'üh̄ün, tu' mög m̄ö'ka'ok, yä' ȳipkutuk, yä' kuxan̄ög, hu' ȳy, yä hām'āktux 'ohn̄äg.

Yeyox te Mānix Mānan̄en pu yäy m̄üg

9 Häptup yenom̄y 'Ihä putpu' hix Yeyox, tu Mānix Mānan̄en pu yäy m̄üg hām̄axap. Yä h̄öm̄ä Yeyox te' möy yām̄y kummuk te' 7 Mānix Mānan̄en kopah,

10 ha ta' mög, pa' pip Yeyox mütik mög xop, tu' kuxa hittup 'ohn̄äg, tu' potaha', ha Mānix Mānan̄en te:

—'Üputpu' hix Yeyox. Kax̄y.

11 Ha' xupak, yä putpu' hi', tu tikm̄ü'ün pu yäy m̄üg, pa' kuxa mām 'ohn̄äg hām'āktux kopah.

Yeyox te yäy ȳog tik tix pu yäy m̄üg

12 Häpxip 'Ihä Yeyox te yäy ȳog tik tix pu yäy m̄üg. Yä tik mög hām panip tu', tu Yeyox pēnäh̄ä',

13 tu putpu' n̄n, tu n̄ktu Yeyox ȳog tik n̄y pu n̄m̄ 'āktux, pa' kuxa mām 'ohn̄äg hām'āktux kopah.

Yeyox te yäy ȳog tik te 11 xop pu yäy m̄üg

14 Ha ta' mög Yeyox, tu yäy ȳog tik te 11 xop pu yäy m̄üg. Yä' xit tihik, ha' n̄n Yeyox, tu tik pu yäy m̄üg, tu:

—Teptu 'ākuxa mām 'ohn̄äg. Tikm̄ü'ün te: "Ügm̄ü'äte' pēnäh̄ä Yeyox. Yä putpu' hi'". Kax̄y. Pa 'ākuxa mām 'ohn̄äg hām'āktux kopah. Yä' kummuk. Kax̄y.

15 Tu xe:

—'Äpu mög häpxexka xohix xexka tu', n̄y Topa ȳog hām'āpak max'ax 'āktux tikm̄ü'ün xohix xexka pu'.

16 Tikm̄ü'ün 'üm̄ kuxa ȳüm̄ ka'ok 'ügkopah, hap-tox pix, puxix Topa kuxa kummuk xit, n̄y kuxa max m̄ö'tat, 'üȳän̄an tu'.

17 Topa te' kuxa mām ka'ok xop ka'ogāp-tup, puȳy häpxopm̄ä ka'ok xe'ēgn̄äg. Yä yām̄y kummuk möy putup, tu' ȳy'ax tup punethok hä' xuktux putup.

18 Käyā gāy tep-top, puxix x̄y 'ohn̄äg. Hep kummuk xo'op n̄m̄ te tikm̄ü'ün kix, puxix x̄y 'ohn̄äg, tu pakut xop ȳim̄ü yäy ȳim̄ xex, puxix hittup.

Yeyox mög pexkox tu'

19 Ȳüm̄ug xuxyā Yeyox te hām'āktux kux, ha' n̄y te' mögäh̄ä pepix pexkox tu', ha' ȳüm̄ Topa ȳim̄ xe'e tu'.

20 Ha ta' mög Yeyox ȳog tik xop, tu tikm̄ü'ün pu Topa ȳog hām'āpak max'ax 'āktux häpxexka xohix tu'. Ha ȳüm̄am̄ug xuxyā te ȳog hām'āktux ka'ogäh̄ä', yä n̄m̄ m̄ö'n̄ign̄am̄, puȳy häpxopm̄ä ka'ok xe'ēgn̄äg. Hā kax̄y tikm̄ü'ün te' ȳümm̄ug 'üxe'e ȳog hām'āpak max'ax.

Tu ta tu' kux.

NOK TE YEYOX 'ĂKTUX

Nok te Teop pu kax'āmi'

¹ Teop: —Hōmā tikmū'ūn te hāpxopmā ka'ok pēnāhā', tu' pēnā hāmāxap, tu nōm hāpxopmā'ax 'ăktux,

² ha tik xop te nōm hām'ăktux kax'āmi tappet tu',

³ yīy 'āte mō'kupix punethok, tu hām'āpak, tu' yīkopit, nūy nōmhā yūmmūg max, tu hāmpē'paxex, hu: Yā' 'āte hāpxopmā'ax xohix kax'āmi', tu tappet tu kax'āmi', nūy xa mō'kutnā',

⁴ xa 'ākuxa yūm ka'ok, nūy hāpxopmā'ax kopa' yūm ka'ok, tikmū'ūn te xā nōm yūmmūgāhā'.

Pexkox yōg nū'kutnā'ax te Yakanit pu hām'ăktux

⁵ Hōmā 'Enot te hāpxexka Yonex yōg tikmū'ūn xat, 'Ihā Yakanit xip, tu 'Amīt xop yōg 'āmanex, 'ūxet' 'ăxet'ax 'Iyamet, ha 'Iyamet pa 'āmānex kutok hex.

⁶ Yā' max Yakanit xi' xetut, tu hāpxopmā max, ha Topa te' pēnāhā', tu' xat, ha' yīpkox pip xi' xetut, 'ūmīynāg hu' mīy,

⁷ pa 'Iyamet ka'ok, tuk-tok 'ohnāg, 'ūk-tok pip 'okpa kutut 'Iyamet xi' yīpxox.

⁸ 'Āmnīy 'ūm 'Ihā Yakanit te 'āmānex yōg hām hā' hām, tu Topa pet kopa' hām, ha 'Amīt yōg xop xohix hām, ha nōm xop te mō' xap yōn, tu' xap tu' yūmmūgāhā', ha' xut Yakanit, nūy hām, 'ūnōy yānān tu',

⁹ pu mīm xax 'ūm puk, nūy haxyā, xix mīm hep 'ūm puk, nūy Topa pu' haxyā', ha Yakanit te Topa pet xexka ha' mō'nāhā',

¹⁰ ha Yoneo yōg tikmū'ūn tek-nīhā' pip hāptopa', tu Topa pu hām'ăktux pax, 'Ihā 'āmānex xop te mīm hep puk, mīmpe yīmū' yūm ha' puk, nūy Topa pu' haxyā'.

¹¹ Hāpxip 'ohnāg 'Ihā Yakanit te pexkox yōg nū'kutnā'ax pēnāhā', ha mīmpe puk'ax yīka' xip, 'ūyīp xe'e hā' xip,

¹² ha' kuxānōg, tu' kuxa te' tu' yēy,

¹³ pa nōm nū'kutnā'ax te:

—'Ākuxanōg hok, nūy 'āka'ok. Topa te 'ōg hām'ăktux'ax 'āpak, ha 'ăxetut te 'āk-tok pit put putup, ha xate' xuxet'ax mīy putup Yoām.

¹⁴ 'Āk-tok put 'Ihā 'ākuxa hittup putup, ha tikmū'ūn hittup putup kamah,

¹⁵ yā Topa te 'āk-tok pit xexka mīy putup, 'ūtut tex kopa' xip 'Ihā Topa Koxuk te 'āk-tok ka'ogāp-tup, yīy xupyāg xat hok puyīy xo'op hok,

¹⁶ tu 'Iyaet yōg tikmū'ūn punethok mōgāp-tup, tu 'Iyaet yōg Topa ha mōgāp-tup.

¹⁷ Yā Topa te 'āk-tok nū'kutnāp-tup tikmū'ūn hah, pu yāy pupi hām'ăktux. Hōmā mōnāyxop hittap 'Enit te Topa pupi

hām'ăktux, tu' ka'ok, ha kaxiy 'āk-tok ka'ok putup, tu' tak xop pu: “'Āpu, yāyhāhup,” kaxiy, puk-tok tu gāy kuxyā', nūy nōm putup pax 'ūxeheh, ha 'āk-tok te' yīpkox 'ohnāg xop pu hupmāp-tup, pu hāmpē'paxex, nūy yāy hāmyoa', 'Iyaet yōg tikmū'ūn xat'ax nūn ha hāmyoa'. Kaxiy.

¹⁸ Ha Yakanit te:

—'Īntu'. 'Ātep yūmmūg'ah. 'Ūgkuxa yūm 'ohnāg hām'ăktux kopah. 'Ūgkuxa te xa tu' pa yūm ka'ok, 'ūgkutut xik xetut hah. Kaxiy.

¹⁹ Ha nōm nū'kutnā'ax te:

—'Ūgmūn Gamineo. Topa keppak xip, tu Topa puk hām, ha xa nūgkutnāhā', 'ūyīy xa hāmyūmmūgā', tu xa hām'āpak max 'ăktux,

²⁰ pāyā xate 'ātu 'āpa yūm ka'ok, tu kuxa yūm 'ohnāg. Xapi 'āyīy hok, tu mōktu 'ăxetut te 'āk-tok put, yīy ta 'āyiy'ax 'ūxeheh, ta tu 'āte' koit 'ohnāg hah. Kaxiy. Tu' mōg pexkox ha' put pu'.

²¹ Ha tikmū'ūn te hāptopa' pip, tu Yakanit hip, tu' hip, tu xe' hip, pa' nūn 'ohnāg, ha' yēy.

²² Ha ta Yakanit te Topa pet xexka kopa' xip, tu hāptopa' mōg, tu' yōyxōg ka'ok, tu' yīy tapax 'ohnāg, ha tikmū'ūn te:

—'Ūpēnā', Yakanit te Topa pet kopa' xip, 'Ihā hām yāy koxuk pēnāhā'. Kaxiy. Ha' yīm xix, 'ūyīy hok tu'.

²³ Tu 'āmānex yōg hām'ax kux, tu ta' mōg, tu mōktu yāy pet tu' xupep.

²⁴ Hāpxip kutōgnāg 'Ihā' xetut te kopak-tok yūm, tu mēy te 5 hā' yāy pet kopa' xip, tu hāpkumep 'ohnāg, tu:

²⁵ —Hōmā 'āte yāyhāhup, 'ūgkutok 'ohnāg tu', pa Topa tek pēnāhā', tuk kuxa ka', tu yōgnū yāyhāhup nōah, yā hōnhāk kutok yūm 'ūgkopah. Kaxiy.

Pexkox yōg nū'kutnā'ax te Mānix pu hām'ăktux

²⁶ Tuk-tok xuk mēy te 6 'Ihā Topa te nū Gamineo kutnāhā', tu hāpxexka Ganinet yōg kōmēn Nāyane tu nū'kutnāhā', ha ta' nūn pexkox yōg nū'kutnā'ax, tu nūktu Nāyane tu' xupep,

²⁷ tu 'ūn yāyta hok ha' mōg, ha' xuxet'ax Mānix, tu mōnāyxop Namix xop yōg Yoye mūtik yāyap-tup, pāyā' hok yūm.

²⁸ Ha Gamineo te Mānix pet ha mō'nāhā', tu:

—'Āneo. Topa te xa hāmmāxnāhā', tu nū mūtik tihi'. Kaxiy.

²⁹ Pa Mānix kuxānōg, tu yāy pu hām'ăktux, hu: Putep mūn 'ăktux nō'ōm? Kaxiy.

³⁰ Ha nū'kutnā'ax te:

—Mānix, Topa te xa hāmmāxnāhā', yīy 'ākuxānōg hok.

³¹ Xate 'āk-tok pit put putup, tu' xuxet'ax mīy putup Yeyox.

³² Ha tikmū'ūn xohix xat putup, yā' xuxet'ax nōy te: Topa Xe'ēgnāg kutok pit.

Kaxīy. Hōmā mōnāyoxop Namix te tikmū'ūn xat, ha kaxīy 'āk-tok te tikmū'ūn xat putup,

³³ tu mōnāyoxop hittap Yako mōkputox xat putup, tu hāmyāxatamuk xohix hā tikmū'ūn xat putup mōg kuma' mōg, 'ap xat kux putup'ah Yeyox. Kaxīy.

³⁴ Pa Mānix te:

—'Intu'. 'Ātep yūmmūg'ah. 'Ūgkutok put te xīy? Yāk hok yūm. 'Āte tik 'ūm mūtik 'ūgnōm 'ohnāg. Kaxīy.

³⁵ Ha nōm nū'kutnā'ax te:

—Topa Koxuk ka'ok, tu 'āk-tok putnāp-tup, 'hā hok yūm, yīy 'āk-tok max xe'ēgnāg, yā Topak-tok xe'ēgnāg.

³⁶ Yūmmūg. 'Āxape Iyamet kutut, tuk-tok te' kopa' yūm, ha mēy te 6 'ūk-tok xuk, 'ūk-tok nōm hāmāxap xuk.

³⁷ Topa te hāpoxopmā'ax xohix. Kaxīy.

³⁸ Ha Mānix te:

—Hamūn. 'Āte Topa puk kopaxux hāk xip, tu nūk xup, tu Topa tu hāpoxopmāhā'. Xate hām'āktux max. Kaxīy.

Ha pexkox yōg nū'kutnā'ax mōg.

Mānix mōg 'Iyamet pet hah

³⁹ 'Āmnīy kutōgnāg 'hā Mānix yok, tu ta' mōg mō'ka'ok, tu hāpexka Yonex yōg kōmēn tu' mōg, tu hām xanep tu' mōg,

⁴⁰ tu mōktu Yakanit pet tu' xupep, tu mō'nāhā', tu 'Iyamet pu' āneo,

⁴¹ ha' xupak, tuk-tok te' tut tex kopa' hitup, tu yāy xit,

⁴² ha 'Iyamet yīy ka'ok, hu:

—Topa te 'ūn xop pu hāmmaxnāhā', ha xa hāmmaxnā xexkah. Xate 'āk-tok put putup, ha Topa te nōm pu hāmmaxnāp-tup kamah.

⁴³ Tik tek xat mūk tut nūn. Putep tuk ha 'ānūn? 'Ap yūmmūg'ah 'āte pute 'ūm. 'Ūgkuxa te' yēy.

⁴⁴ 'Āte xa hāpxe'e 'āktux: 'Āte 'ōg 'āneo 'āpak, 'hāg kutok tek tex kopa' kuxa hittup, tu yāy xit.

⁴⁵ Topa te hām'āktux, ha 'ākuxa yūm ka'ok, hu' hip, pu Topa hāpoxopmā', ha 'ākuxa hittup. Kaxīy.

Mānix tek-tex

⁴⁶ Ha Mānix te:

—'Ūgkuxa te 'ā Topa xexka 'āktux,

⁴⁷ tuk koxuk te Topa tu' hittup kamah, hak hīnāhā',

tuk pēnā max,

⁴⁸ 'hāk mūn kutōgnāg,

yā Topa hā kāmānat hex,

yīy tikmū'ūn xohix te hām'āktux putup mō'kuma' mōg, hu:

“Topa te Mānix pu hāmmaxnāhā'.” Kaxīy.

⁴⁹ Ha Mānix te xe':

—Topa ka'ok xe'ēgnāg, tu tek mūn pu hāpoxopmāhā',

yā Topa max xe'ēgnāg,

⁵⁰ tu yāy yōg tikmū'ūn kuxa ka', nōm xop yīpkox pip Topa pu',

ha tikmū'ūn kuxa ka', xik-tok xop,

xik mōkputox kuxa ka' Topa te',

nōm xop yīpkox pip Topa pu' kuxa ka',

⁵¹ ha hāpoxopmā max xe'ēgnāg, tu' gāy nām xop hā hāpuxopmāhā',

nōm xop te hāmpe'paxex, hu: “'Ūgmūn xexkah.” Kaxīy.

⁵² Topa te' xexka xop xupepmāhā, puk-tōgnāg xop yāyhā tu xexkah,

⁵³ ha' hok xop pu hāpoxop punethok popmāhā',

tup-texop xexka pu hāpoxop popmā 'ohnāg,

tu': “Mōg, mōg!” Kaxīy. Tu' xupepmāhā'.

⁵⁴ Tu hām'āktux xex mōnāyoxop pu', tu' xutigāhā',

tu 'Iyaet yōg tikmū'ūn mō'nīynām,

tu' yōg kāmānat xop xaxok 'ohnāg, tu mō'nīynām.

⁵⁵ Hōmā, hāmyāxatamuk xohix 'hā',

Topa te mōnāyoxop 'Amanām pu hām'āktux xex, tu' xaxok 'ohnāg.

Ta tu' kux. Kaxīy.

⁵⁶ Mēy 3 hā Mānix te 'Iyamet mūtik tihi', ha mēy 3 kux, 'hā yāy pet ha' mōg, tu' mōg tu mōktu xupep 'ūyāy pet tu'.

'Iyamet tek-tok 'āxet'ax Yoām put

⁵⁷ 'Āmnīy xohix nōg 'hā 'Iyamet tek-tok put, ha' pit,

⁵⁸ ha' xape xop xix tikmū'ūn te' yīmap hā' pip te' xupak, tu Topa te nōmhā hāmmax mīy yūmmūg, ha 'Iyamet kuxa hittup xix tikmū'ūn.

⁵⁹ Tikmū'ūn nūn, 'āmnīy te 7 nōg 'hā' nūn, 'Iyamet pet ha' nūn, nūy 'ūk-tok pit yāy xax xak kutōgnāg, tu' xuxet'ax mīy putup Yakanit, 'ūtak 'āxet'ax hā xanāp-tup,

⁶⁰ pāyā' tut tep-tup nōg, tu:

—'Āmhok, kaxīy hok! 'Āte' xuxet'ax mīy'ax yāy xe'e tu Yoām. Kaxīy.

⁶¹ Ha tikmū'ūn te:

—Putep xuktux? Yoām te xīy? 'Āxape 'ūm 'āxet'ax Yoām? 'Ap xip'ah. Teptu' xuxet'ax mīy putup Yoām? 'Ū 'ūm te nō Yoām? Kaxīy.

⁶² Tu' yīm xix, pu Yakanit tek-tok 'āxet'ax yūmmūgā',

⁶³ ha Yakanit kax'āmi putup, yīy tik 'ūm te tappet tu' hōm, xix tappet kup, ha Yakanit kax'āmi', hu: “'Ūxuxet'ax pi' Yoām.” Kaxīy. Ha tikmū'ūn kuxa te' yēy.

⁶⁴ Hāpxi'p 'ohnāg 'hā Yakanit yōyxōg pu'uk, tu hām'āktux, tu Topa max 'āktux, hu:

—'Ūmax Topah. Kaxīy.

⁶⁵ Ha tikmū'ūn te Yakanit pet tu' yīmap hā' pip, tu kuxānōg, tu tikmū'ūn pu' xuktux, tu Yonex yōg hām xanep tu tikmū'ūn pip xop pu' xuktux, ha' xohix te nōmhā yūmmūg,

⁶⁶ hu' kuxa te' yēy, tu hāmpe'paxex, hu:

—Kakxop xe'e, tu' tuk kux, 'Thā tik xexka putup. Kaxīy.

Yā Topa te nōm ka'ogāhā', tu nū mütik tihi'.

Yakanit te Topa pupi hām'āktux

⁶⁷ Ha' tak Yakanit te Topa Koxuk hā nū' xip, tu Topa pupi hām'āktux, hu:

⁶⁸ —'Āpu yūmū'āte Topa max 'āktux, yā 'Iyaet yōg Topa max,

tu' nūn, nūy yāy yōg tikmū'ūn mōy pu mōg,
⁶⁹ tu tik xe'ēgnāg yāykutnāhā', tu nū' kutnāhā',

ha' ka'ok, hamūn yā mōnāxop Namix hā mōkputox,

tu yūmūg yōg tikmū'ūn mōy gāy xop kopah, 'ūmōg.

⁷⁰ Hōmā, hāmyāxatumuk xohix 'Thā' Topa te tik max xop yīymōgātux,

puyīy yāy pupi hām'āktux, pūyīy mōnāxop pu hām'āktux,

tu Topa te' mōy putup 'āktux,

⁷¹ tu Topa te hām'āktux xex 'āktux, hu:

Topa te 'āmōy putup gāy xop kopah,

nōm xop te 'āxop putup nōg. Kaxīy.

⁷² Topa te mōnāxop kuxa ka', tu yāy yōg hām'āktux xex,

tu' pa'ax max xutīgāhā',

⁷³ tu mōnāxop hittap 'Amanām mütik hām'āktux,

tu nōm pu hām'āktux xex,

yā yāy 'āxet'ax hā hām'āktux xex,

⁷⁴ nūy gāyxop kopa yūmūg mōy, pu Topa keppa yūmūk pip,

nūy 'āktetex, nūy Topa pu hāpxopmā', tu' yīpikutuk 'ohnāg,

⁷⁵ 'ūyīy hāmyok mīy, 'ūyīy tu max xe'ēgnāg, Topa putuk,

yūmūg hī'ax tox hā yūmūg max, mōg kuma' mōg.

⁷⁶ Ha 'āmūn, xōnnū', 'āxuxet'ax nōy mīy putup, hu:

Topa xe'ēgnāg pupi hām'āktux'ax. Kaxīy.

Xate Topa keppa 'āmōg, nūy 'ūyōg putat max mīy,

⁷⁷ nūy yōg tikmū'ūn pu hām'āktux, hu:

"Topa te 'ākuxa kummuk xit, nūy kuxa max tat 'ūyānān tu',

tu 'ōg kummuk mīy'ax xaxogāp-tup, pu tu kux."

⁷⁸ Yā Topa te yāy yōg tikmū'ūn kuxa ka',

hu tik nū'kutnāhā', ha yūmūg ha' nūn,

tu yūmūg yūmmūgāhā'.

⁷⁹ Tu' nūn putup, tu hāmyūmmūg hā tikmū'ūn kuxa hittupmāhā',

tu tikmū'ūn te hāpkox tap ta ka' mām xop pu hāptupmāhā',

ha kaxīy Topa te yāy yōg putat yūmmūgāhā', tu yūmūg kuxa māmāhā'. Ta tu' kux. Kaxīy.

⁸⁰ Ha Yakanit kutok pit 'ūtuk, tu mōktu xip-tap ka'ok, tu' tuk kux, tu hām panip xexka kopa' xip, tu mōktu' xupep, pu 'Iyaet yōg tikmū'ūn pēnā'.

2

Mānix tek-tok put

¹ Hāmyāxatumuk 'ūm 'Thā hāpxexka Hōm yōg xat'ax xexka 'āxet'ax 'Agōy, tu hāpxexka yōg tikmū'ūn xohix xat, pu yāy yōg kōmēn tu mōg, puyīy gohet te tikmū'ūn mō'kupix, nūy tikmū'ūn xohix te xīy yūmmūg,

² ha Hōm yōg gohet te tikmū'ūn mō'kupix hāmāxap, 'Thā Kinūn te hāpxexka Xit yōg tikmū'ūn xat.

³ Ha tikmū'ūn mōg, pu tu mō'kupix, ha yāy yōg kōmēn tu' mōg.

⁴ Yoye xip, tu hāpxexka Ganinet yōg kōmēn Nāyane tu' xip, tu' mōg, tu mōktu hāpxexka Yonex yōg kōmēn Menēg tu' xupep. Hōmā, hāmyāxatumuk xohix 'Thā, mōnāyxop hittap Namix mük tut te' put, tu Menēg kopa Namix put, ha Namix mūn te 'Iyaet yōg tikmū'ūn hittap xat, yīy hōnhā Yoye mōg Menēg tu', Namix mōkputox 'ūm tu', tu' mōg,

⁵ tu' xetut mütik mōg, ha Mānix tek-tok xuk xexka, ha' mōg.

⁶ Yoye mōg, xix Mānix, tu ta' mōg, tu mōktu Menēg tu' mōxaha', tu tīhi 'Thāk-tok nāhā'.

⁷ Kōmēn yōg 'āmuk nū'xip, yīy Mānix tek-tok pit māxap put, tu mūnūytut pet kopa' put, tu topixxax hā' kīy, tu mūnūytut yōg mīpkox xit'ax kopa' xex.

Tik xop te kahnēn pēnā max 'Thā pexkox yōg nū'pok xop nūn

⁸ Ha kōmēn kūnāpa' pip tik xop te kahnēn pēnāhā', 'āmnīy tox ka'ok hā' pēnāhā',

⁹ 'Thā pexkox yōg nū'kutnā'ax nūn, ha Topa yōg kuyānām te' yīmap 'ūxakot, ha kuxānōg xexkah,

¹⁰ ha nū'kutnā'ax te:

—'Ākuxānōg hok! 'Ūg 'āpax! 'Āte xa hām'āpak max 'āktux, nūy tikmū'ūn kuxa xohix hittupmā':

¹¹ Yā hōnhā, 'āmnīy 'Thā, Namix yōg kōmēn Menēg kopa' nāhā' Kunnix, nō'ōm 'axop hā 'āxuxyā'. Topa te nōm yāykutnāhā', tu 'Iyaet yōg tikmū'ūn ha nū'kutnāhā'. Hamūn te tikmū'ūn kuxa kummuk xit putup, nūy 'ūyānān tu' kuxa max mō'tat nō'ōm.

¹² 'Āmōg, nūy xax, nūy xipi'. Pēnā'! Kakxop te mūnūytut yōg mīpkox kopa' pip, ha topixxax hā' kīy, ha kaxīy xate nō kakxop yūmmūg'ax. Kaxīy.

¹³ Hāpxip 'ohnāg 'Thā pexkox yōg nū'pok xohix pip, 'ūnōy mütik pip, tu Topa 'āktux max, hu:

¹⁴ —Topa mūn xexka xe'ēgnāg pexkox kopah,

tu tikmū'ūn kuxa māmāhā hām tu',

mō'yāy xe'ēgnāg tu' kuxa māmāhā'. Kaxīy.

¹⁵ Ha pexkox yōg nū'pok xop mōg, tu pexkox ha' mōg putpu', ha kahnēn pēnā xop te yāy pu hām'āktux hu:

—Topa te yūmūg yūmmūgāhā'. 'Āpu mōg, yūmūg mōg kōmēn Menēg tu', nūy pēnā'. Kaxīy.

¹⁶ Tu ta' mōg mō'ka'ok, tu mōktu mōxaha kōmēn Menēg tu', tu Mānix pēnāhā', xix Yoye pēnāhā', xix kaxxop, ha kaxxop te mūnūytut yōg xit'ax kox kopa' pip.

¹⁷ Ha' pēnāhā', tu hāpxopmā'ax ka'ok 'āktux, tu kaxxop 'āktux,

¹⁸ ha tikmū'ūn te' xupak, tu kahnēn pēnā xop yīy'ax 'āpak, tu' kuxa te' yēy,

¹⁹ ha Mānix hāmpē'paxex nām, tu' xutūgāhā'.

²⁰ Ha kahnēn pēnā'ax xop put pu' mōg, tu Topa 'āktux, hu:

—Topa mūn 'ūxexkah. Kaxīy. Tu Topa 'āktux max, tu:

—Pexkox yōg nū'kutnā'ax te hām'āktux hāmāxap, hāpxip 'Ihāk mū'āte' pēnāhā'. Yā xexka xe'ēgnāg Topah! Kaxīy.

Yā xuxet'ax mīy Yeyox

²¹ Ha 'āmnīy te 8 nōg, 'Ihā kaxxop pit yāy xax xak kutōgnāg, tu' xuxet'ax mīy Yeyox. Hōmā pexkox yōg nū'kutnā'ax te Yoye pu' xat, 'Ihā Mānix te yāy kutok xuk, ha' xat tap pu' xuxet'ax mīy Yeyox, yīy hōnhā' mīy.

Yoye xix Mānix te Yeyox tat Topa pet xexka tu'.

²² Ha 'āmnīy te 40 hā Mānix yīpkox pip, tu Mōyyex yōg xat'ax pu' yīpkox pip, 'ap Topa pet xexka kopa mō'nā'ah, ha' 'āmnīy te 40 nōg, 'Ihā' mōg, Yoye mūtik mōg, tu kaxxop tat, tu kōmēn Yenoyanēn tu' xupep, nūy xōnnū hōm Topa pu'.

²³ Yā Topa te' xat, hu: 'Iyaet yōg tikmū'ūn kutok māxap 'ūpit, puxix 'ūktok yā Topa xe'ēgnāg yōg.' Kaxīy.

²⁴ Yīy putuxnāg 2 popmāhā', 'ūk-tok tu' yānān popmāhā', yā Topa te' xat.

²⁵ Ha Xīmēām te Yenoyanēn tu' tihī, 'ūkutut, tu' max, tu hāpxopmā max, tu Topa xak, tu hāmmax hip, pu Topa 'Iyaet yōg tikmū'ūn mōy puknōg xop kopah, ha' hip, ha Topa Koxuk te Xīmēām ka'ogāhā',

²⁶ tu' kuxa pu hāmyūmmūgāhā', hu: "Ap 'āxok putup'ah tu mōktu Topa te yāy yōg tik nū'kutnāhā', hak-nāy tu' 'āxok putup.'" Kaxīy. Hāmyāxatamuk xohix punethok hā 'Iyaet yōg tikmū'ūn te Topa yōg hāmyāyikutnā'ax hip, ha Topa te hām'āktux xex mōnāyoxop hittap pu',

²⁷ ha Topa Koxuk te Xīmēām mōgāhā', Topa pet xexka ha' mōgāhā', ha' mōg, tu mōktu Topa pet xexka tu' xupep, ha Yoye xix Mānix te kaxxop putmōg, tu Topa pet xexka tu' mōxakux kamah, Topa te' xat ha.

²⁸ Ha Xīmēām te kaxxop put, tu Topa pu hām'āktux, hu:

—Āmax Topah!

²⁹ Hōmā xate hām'āktux xex, tu hām'āktux hittap hā' mīy nōmhā,

hak kuxa hittup yīk mōg putup, yīk tux hok 'ū mōg,

yāk kuxa yūm hāk mōg.

³⁰ 'Āte nō kaxxop pēnāhā', xate nōm nū'kutnāhā',

pu tikmū'ūn kuxa kummuk xit, nūy yānān pu' max tat,

³¹ ha tikmū'ūn xohix te Topa yōg tik pēnāp-tup,

xix' hep xohix xop te' pēnāp-tup,

³² ha Xate nōm nū'kutnāhā' puknōg xop hah, nūy nōm kuxa kummuk tupmā',

pu puknōg xop xohix 'ōg putat max hā mōg, pu 'Iyaet yōg tikmū'ūn xexkanā'. Ta tu' kux.

Kaxīy.

³³ Ha Yeyox mūg tak te' xupak, xix' tut te' xupak, tuk-tok pit ha kuxānōg, tu' yēy.

³⁴ Ha Xīmēām te:

—Pūyā Topa 'āxop ka'ogā', yā' max xe'e Topah! Kaxīy.

Tu Yeyox mūg tut Mānix pu hām'āktux, hu:

—Topa te 'āk-tok pit nū'kutnāhā' 'Iyaet yōg tikmū'ūn hah, ha' yāg tep-tup putup, ha' yāg tep-tup nōg putup,

³⁵ ha Topa te 'āk-tok hā tikmū'ūn yāy kuxa kummuk yūmmūgāp-tup, ha yāy yōg hāmpē'paxex yūmmūg putup. Tikmū'ūn te mīkax xexka hā' xuhmīy, ha' xūy, ha kaxīy tikmū'ūn te 'ākuxa xūyāp-tup, yīy 'ākuxa tekōg putup. Kaxīy.

³⁶ Ha 'ūn xip, 'ūxuxet'ax 'Ān, tu Topa pupi hām'āktux. 'Ūkutut 'Ān, tu 'Axeh yōg Pānēo hāk-tok hex. Hōmā, hāmyāxatamuk xohix 'Ihā 'Ān te yāytaha', tu' yīpxox mūtik tihī hāmyāxatamuk te 7 hā, ha' xok, ha 'Ān hok yūm,

³⁷ tu hāmyāxatamuk te 84 hā āyā' hok yūm, xix hōnhā' hok yūm, tu kōmēn Yenoyanēn kopa' xip, tu Topa pet xexka kopa' xip, tu 'āmnīy hā' xip, xix hāptup, tu hāpkumep 'ohnāg, tu Topa max 'āktux, tu' xit hok, nūy Topa pu hām'āktux.

³⁸ Tu hōnhā kaxxop 'āktux Yenoyanēn yōg tikmū'ūn pu', tu 'Iyaet yōg tikmū'ūn xexkānā'ax 'āktux, tu tikmū'ūn pu hām'āktux, nōm te Topa yōg hāmyāyikutnā'ax hip pu' xuk-tux.

Yoyex xix Mānix te putpu' mōg Nāyane tu'

³⁹ Ha Yoye te Topa yōg xat'ax mīy, xix Mānix te' mīy, tu' mīy kux, tu ta Ganīnet tu' putpu' mōg, tu mōktu yāy pet tu' mōxaha', ha' pet te kōmēn Nāyane kopa' yūm.

⁴⁰ Ha kaxxop tuk tu mōktu ka'ok, tu hāmyūmmūg, ha Topa te nōm pu hāmmaxnāhā'.

Yeyox mōg Topa pet xexka tu'

⁴¹ Hāmyāxatamuk xohix nōg 'Ihā' mōg, nūy Yoneo xop yōg 'āmuk xexka 'āxet'ax Nōa'yēn mīy, tu' mōg, 'ūtak xix' tut te kōmēn Yenoyanēn tu' mōg,

⁴² ha kaxxop yōg hāmyāxatamuk te 10 xix' 2 mīy, 'lhā Yoneo xop yōg kaxxop pit tuk tup mōg, tu Yenoyanēn tu' mōg, 'ūyāy tak mūtik mōg, nūy 'āmuk xexka mīy, nūy yāy yōg tikmū'ūn mūtik mīy, ha Yeyox mōg kamah,

⁴³ ha ta' mōg, tu' pip, ha 'āmuk xexka mīy, tu 'āmnyī xohix hā' mīy, ha' kux, ha ta' mōg, tu yāy pet ha' mōg. 'Ap Yeyox mōg'ah, pāyā' tak xix' tut te' yūmmūg'ah,

⁴⁴ hu hāmpē'paxex, hu: "Yeyox tek xape mūtik mōg." Kaxīy. Tu' mōg 'āmnyī puxet hā', tuk-tok pit xak, tu' xape xop kopa' xak, xix' nōy xop kopa' xak,

⁴⁵ pāyā 'a' xip'ah, ha putpu' mōg Yenoyanēn tu', nūy xax,

⁴⁶ tu 'āmnyī tikoyuk hā' xak, tu' xipihī, ha Yeyox te Topa pet xexka kopa' yūm, ha hāmyūmmūgā xop te' xakot, ha Yeyox te hām'āpak, tu' yīkopit,

⁴⁷ ha nōm xop te hām'āpak hā' yānān, tu' yōg hām'āktux ka'ok 'āpak, yā hāmyūmmūg xexkah, yī' yēy.

⁴⁸ Ha Yeyox mūk tak te' pēnāhā', xix' tut, ha' yēy, ha Mānix te:

—Xōnnū', teptu' mīy xate'? Pēnā', 'ātak xik-mūn te 'āxak, yāk kuxa hittup 'ohnāg xa tu'. Kaxīy.

⁴⁹ Ha Yeyox te:

—Teptu' āxop tek xak? Topa yā yōgnū 'Ātak xe'e', yīy 'āte yōgnū 'Ātak pet xexka kopak xip. 'Ūyūmmūg hok xate'? Kaxīy.

⁵⁰ A' tak tek-tok pit hām'āktux yūmmūg'ah, xix' tut te' yūmmūg'ah.

⁵¹ Ha Yeyox mōg, 'ūyāy tak mūtik mōg, xix' tut mūtik mōg, tu ta' mōg tu mōktu kōmēn Nāyane tu' mōxaha', tu nōm pu' yīpkox pip, ha' mūg tut te hāmpē'paxex, tu' xutīgāhā'.

⁵² Ha Yeyox tuk tu mōktu xexkah, tu hāmyūmmūg tu mōktu hāmyūmmūg xexkah, ha Topa tep-tup pax, xix tikmū'ūn xohix tep-tup pax.

3

Yoām te Topa pupi hām'āktux

¹ Ha Hōm yōg tik te tikmū'ūn xat'ax yā 'āxet'ax Timet Xex, tu' xat hāmyāxatamuk xohix te 15 hā, 'lhā Pōn Pinat mūn te hāpxexka Yonex yōg tikmū'ūn xat, ha 'Enot te hāpxexka Ganinet yōg tikmū'ūn xat, ha' taknōy Pinip te hāpxexka 'Itonet xix Tanakōnit yōg tikmū'ūn xat, 'lhā Nixān te 'Aminēn yōg tikmū'ūn xat.

² Tu' xat 'lhā 'Anān yā Topa yōg 'āmānex xexkah, xix Kaxpax kamah, ha Topa te Yoām mō'kutnāhā', tu hām panip xexka tu mō'kutnāhā', puyīy Topa pupi hām'āktux, ha Yoām yā Yakanit kutok.

³ Tu' mōg, tu kōnāgkox xexka Yohnām yīka' mōg, tu hām'āktux, tu Topa te hām'āktux 'āktux, tu tikmū'ūn pu' xuktux, tup-tox pix 'āktux, hu:

—'Āpu yāyhāhup, nūy kummuk mīy kux, ha 'āp-tox pix, pu Topa 'ōg kummuk mīy'ax xaxogā, pu tu kux. Kaxīy.

⁴ Hōmā mōnāyxop hittap 'Iyait te Topa pupi hām'āktux, tu tikmū'ūn pu' xuktux, tu tappet tu' kax'āmi', hu:

“'Ūg'āpax. Tik yīy ka'ok, tu hām panip xexka kopa' yīy ka'ok, hu: 'Āpu Topa yōg putat max mīy, tu' yōg putat yoa',

⁵ yīktix tu mōm yūm, ha' xut, nūy kox kotit kopa mōm tox yūm,

'ūkohe xit, nūy ta' yoa',

'hāpkummuk xit tap, nūy ta tupmā'.

⁶ Ha' hep xop xohix te nōm pēnāp-tup,

Topa te nōm tik nū'kutnāp-tup,

pu tikmū'ūn kuxa kummuk xit, nūy kuxa max tat 'ūyānān tu'." Kaxīy.

⁷ Ha hāpxexka yōg tikmū'ūn punethok nūn nūktu Yoām hah, puyīy Yoām putox pix, pāyā' mānōg, tu:

—'Āxop yā kāyāk-tok xop putuk! 'Ākummuk! Pīyā' xat, xa nū, nūy hāp kummuk mīy tu kux, xayīy xupmān, ka Topa xatu' gāy, hu 'ākummugā 'ūyānān tu'?

⁸ 'Āpu yāyhāhup, tu 'ōg hāpxopmā kummuk kux, nūy hāpxopmā max, pu tikmū'ūn xohix' pēnā', nūy xate yāyhāhup yūmmūg, ha hāmpē'āpaxeh hok, hu: 'Amanām mūn yā 'ūgmū'ā hā mōnāyxop, yīy Topa tek mūg kummugāp-tup'ah. Kaxīy. Yā' koit. 'Āte xa hāpxe'e 'āktux: Topa mūn yā' ka'ok, nū mīkaxxap hā 'Amanām mōkputox xop mīy'ax!

⁹ Mīnta kup 'ūm te mīnta pip hok, puxix tikmū'ūn 'ūkup xax, tu kuxap kopa mō'pok, nūy mō'hap, ha kaxīy Topa te nōm tikmū'ūn pu hāpkummugāp-tup 'ūyānān tu', yā hōnhā' kummugāp-tup, ha' xūy xuxix tapax 'ohnāg. 'Āpu hōnhā yāyhāhup, nūy hāpkummuk mīy kux. Kaxīy.

¹⁰ Ha tikmū'ūn te Yoām pu hām'āktux, hu:

—Putep mīy'ax 'ūgmū'ūg? Kaxīy.

¹¹ Ha:

—Tikmū'ūn xax 2 pip, pūyā' koxip, nūy 'ūnōy pu' xax nīm, 'ūnōy hok hōm. Ha tikmū'ūn xit'ax pip, pūyā' koxip, nūy 'ūnōy pu' hōm, 'ūnōy hok pu' xit'ax hōm. Kaxīy.

¹² Ha tik te Hōm yōg gohet pupi tayūmak pop, tu' nūn, pup-tox pix, ha Yoām pu hām'āktux, hu:

—Notot, putep mūn mīy'ax 'ūgmū'ūg? Kaxīy.

¹³ Ha:

—'Ūg kapitām te 'āxop xat, 'āpu' mīy, tu nōm tayūmak pop puxehnāg, pāyā tayūmak te xexka nōy pop hok, ka tikmū'ūn yōg tayūmak hā xupxet. Kaxīy.

¹⁴ Ha xonat xop te kama' yīkopit, hu:

—Putep mūn mīy'ax 'ūgmū'ūg? Kaxīy.

Ha Yoām te:

—'Ānōy xop yōg tayumak mōy hok 'āgāy tu', tu kupex hā' yōg tayūmak xut hok. 'Ōg yāy yōg tayūmak pa', ha puxi'. Kaxīy.

¹⁵ Ha 'Iyaet yōg tikmū'ūn te' hip, 'Ihā Yoām pe'paxex, hu: "Ok nō'ōm Kunnix? 'Ok Topa te nōm yāy kutnāhā xe'e'?" Kaxīy.

¹⁶ Ha Yoām te tikmū'ūn pu hām'āktux 'ūxeheh, hu:

—'Āte 'āp-tox pix, pa' nōy nūn putup, tu' ka'ok, hak mūn pu'uk, tuk kopaxux hāk yūm putup, nūy tu pataxax koah, pāyāk-tōgnāg, huk yāyhāhup. Nō'ōm te Topa Koxuk yīxōnnāp-tup, puyīy 'ākuxa ka'ogā', nūy 'ākuxa kummuk tupmā', tu' yīpkox 'ohnāg xop nōap-tup kuxap hā.

¹⁷ Tu pēnēn pa', nūy xap mō'po'ok, nūy xuxnāg xetox xap xeh mīptut kopah, tu' xux puk putup, tu kuxap hā' puk putuk, ha nōm kuxap xok 'ohnāg, yī' xūy xuxix tapax 'ohnāg. Kaxīy.

¹⁸ Tu hām'āktux punethok, nūy tikmū'ūn ka'ogā', tu hām'āpak max 'āktux.

¹⁹ Pa Yoām te' xexka 'Enot mānōg, yī' gāy. Hōmā 'Enot te' taknōy xetut 'Ēnonit mūg, ha Yoām te' yūmmūg, tu:

—'Āmhok. Xate hāpoxpām kummuk! Topa tep-tup nōg, xix hāpoxpām kummuk xohix xate' mīy Topa tep-tup nōg. Kaxīy.

Ha 'Enot gāy, tu' xat pu' mūy, tu kanet kopa' xix.

²⁰ Ha 'Enot te hāpoxpām kummuk tu mōktu xohix nōg nōy nā' mōgāhā', tu Yoām xix kanet kopah.

Yoām te Yeyox putox pix

²¹ Yoām te tikmū'ūn xohip-tox pix, tu Yeyox putox pix kamah, ha Yeyox te Topa pu hām'āktux, 'Ihā pexkox xōn,

²² ha Topa Koxuk yīxohoh Yeyox hah, putuxnāg putuk tu' yīxohoh, ha Topa yīy, tu pexkox kopa' yīy, tu:

—'Āmūn 'ūgkutok, yā mō'āyāy xe'ēgnāg, yā xatek-kuxa hittupmāhā'. Kaxīy.

Yeyox yōg mōnāyoxpox xohix

²³ Ha Yeyox yōg hāmyāxatamuk te 30, ha 'Iyaet yōg tikmū'ūn hāmpē'paxex, hu: Nō'ōm Yoye kutok, kaxīy. Ha Yoye te 'Enix kutok,

²⁴ ha Mātat kutok, ha Nemi' kutok, ha Mākix kutok, ha Yānāy kutok, ha Yoye kutok,

²⁵ ha Mātatit kutok, ha 'Āmōy kutok, ha Nāōm kutok, ha 'Exnix kutok, ha Nāgax kutok,

²⁶ ha Māt kutok, ha Mātatit kutok, ha Xēmēy kutok, ha Yoye kutok, ha Yot kutok,

²⁷ ha Yoānāg kutok, ha Hex kutok, ha Yonomeo kutok, ha Xanatit kutok, ha Nenix kutok,

²⁸ ha Mēkix kutok, ha 'Anix kutok, ha Koxāg kutok, ha 'Enmānāo kutok, ha 'Eh kutok,

²⁹ ha Yoyoe' kutok, ha 'Eniex kutok, ha Yōy kutok, ha Mātat kutok, ha Nemi' kutok,

³⁰ ha Ximeām kutok, ha Yona kutok, ha Yoye kutok, ha Yonāg kutok, ha 'Enitkīy kutok,

³¹ ha Mēnea' kutok, ha Mēnā' kutok, ha Mātat kutok, ha Nātāg kutok, ha Namix kutok,

³² ha Yexe' kutok, ha 'Omet kutok, ha Moax kutok, ha Xat kutok, ha Nāxōg kutok,

³³ ha 'Āmīnanap kutok, ha 'Atmīy kutok, ha 'Ahnīy kutok, ha 'Exnōg kutok, ha Pet kutok, ha Yonah kutok,

³⁴ ha Yako' kutok, ha 'Iyak kutok, ha 'Amām kutok, ha Tet kutok, ha Nākoh kutok,

³⁵ ha Xenok kutok, ha Haga'ok kutok, ha Panek kutok, ha 'Ep kutok, ha Xat kutok,

³⁶ ha Kaxnāg kutok, 'Ahpaxat kutok, ha Xēy kutok, ha Nōe' kutok, ha Namēk kutok,

³⁷ ha Mētōyānēg kutok, ha 'Ēnōk kutok, ha Yanet kutok, ha Māneneo kutok, ha Kaxnāg kutok,

³⁸ ha 'Enōy kutok, ha Xet kutok, ha 'Anāo kutok, ha Topak-tok.

4

Yeyox te hām panip xexka tu' xip

¹ Ha Topa Koxuk te Yeyox kuxa ka'ogāhā', ha' xip kōnāg xexka Yohnām tu', ha Topa Koxuk te' mōgāhā', ha ta' mōg tu mōktu hām panip xexka tu' xupep,

² ha Hāmgyāgnāg te Yeyox xapit puyīy hāpoxpām kummuk, 'āmnīy te 40 hā' xapit, ha Yeyox xit 'ohnāg, ha putup tep-tex,

³ yīy Hāmgyāgnāg te:

—'Ok 'āmūn yā Topak-tok xe'e'? Pax xa Topa hā 'āktok, 'āpu' xat, pu nūhū mīkaxxap yāyhā pām, xayī' mā, nūy 'āhi'. Kaxīy.

⁴ Pa Yeyox te:

—'Ap xat putup'ah 'āte'. Yā Topa tappet te: "A tikmū'ūn kuxa te pām puxet hā' hi'ah, yā pām puxet hā' kuxa hi 'ohnāg." Kaxīy.

⁵ Ha Hāmgyāgnāg te Yeyox mōgāhā yīktix yīmū', tu hām xexka xohix tu' mūg,

⁶ tu:

—Hām xexka xohix 'āte xa' hōm'ax xix tayūmak xohix xa' hōm'ax, xa' xat tikmū'ūn xohix, 'ūgmūn te hām xexka yōg xop xohix xat hah, yā hām xexka xohix yōgnū, hu 'āte xa' hōm'ax.

⁷ 'Ākopaxux hā' nū' 'āxup 'ūgmūn pu', xik mūn xexka 'āktux, hata hām xexka xohix 'ognū'! Kaxīy.

⁸ Pa Yeyox te:

—'A nūk xup putup'ah. Topa tappet te: "Topa tu nū 'āxup, tu nōm tu hāpoxpām'. 'Ūnōy tu nū 'āxup hok, nūy nōm pu 'āyīpkox pip hok." Kaxīy.

⁹ Ha Hāmgyāgnāg te kōmēn Yenoyanēn ha' mōgāhā', tu Topa pet xexka tu' mōgāhā',

tu' mōg tu mōktu Topa pet xexka yīmū' pip, tu:

—Pax xa yā Topa-tok xe'e', 'āpu, mō'āyōn, nūy hahām tutnāy.

¹⁰ Yā Topa yōg tappet te: “Topa te pexkox yōg xop nū' pok'ax 'āha, puyiy 'āpēna max, ka mīkaxxap hā 'āpata xūy.” Kaxīy.

¹¹ Topa tappet te xe hām'āktux, hu: “Pexkox yōg nū'pok xop te 'āta'ax yāy yīm hā, xayīy 'āpata xūy hok mīkaxxap tu.” Kaxīy.

¹² Ha Yeyox te:

—Topa yōg tappet te: “Ōgnū Topa hā hāpkute'ex hā gāyā hok.” Kaxīy.

¹³ Ha Hāngāyāgnāg te' xapit kux, hu' mōg, tu Yeyox nīm nōmhā.

Yeyox mōg hāpexka Ganinet tu', tu hāpoxopmā kōnāmāhā'

¹⁴ Ha Yeyox mōg, tu ta putpu' mōg, Ganinet tu', tu mōktu xupep, ha Topa Koxuk te' ka'ogāhā', ha tikmū'ūn te Yeyox 'āktux hāpexka xohix tu',

¹⁵ Ha Yoneo yōg Topa pet kopa hāmyūmmūgāhā', ha tikmū'ūn xohix te nōm 'āktux max.

Yeyox xip kōmēn Nāyane tu'

¹⁶ Ha Yeyox mōg, tu ta tu' mōg, tu mōktu kōmēn Nāyane tu' xupep, tu yāy yōg hām tu' xupep, tu nit xap xohix 'īhā' mōg, tu Topa pet ha' mōg, tu hōnhā' mōg, tu mōktu xupep, tu mō'nāhā', tuknīhā' xip, nūy Topa tappet mō'kupix,

¹⁷ ha tik te mōnāyoxop hittap 'Iyait yōg tappet paha', tu Yeyox pu' hōm, pu mō'kupix. Hōmā 'Iyait te Topa pupi hām'āktux, tu tappet tu' kax'āmi, ha hōnhā Yeyox te tappet paha', tu hām'āktux xak tappet kopah, tu' xipihī', tu mō'kupix, hu:

¹⁸ “Topa Koxuk tek mūn ka'ogāhā', tuk yāykutnāhā', 'ū hām'āpak max 'āktux, 'ū 'hok xop pu hām'āktux, hak mūn tu' xat, 'ū kanet kopa' pip xop pu hām'āktux, hu: “Topa te kanet xōn xā 'āmōg.” Kaxīy.

Hak mūn nūgkutnāhā' 'ūpa hok xop pu', 'ū hām'āktux, pu hāmpēnā max. Kaxīy.

Ha nūgkutnāhā' 'ū kuxa hittap 'ohnāg xop pu hām'āktux, hu: 'Ūnīm, 'ūkummuk xop nīm. Kaxīy.

¹⁹ Yā hōnhā Topa te tikmū'ūn mō'yāy xe'ēgnāg,

tu hāpoxopmā max tikmū'ūn pu', tu 'kuxa kummuk xit,

nūy kuxa max tat ūyānān tu'.”

Ta tu' kux. Kaxīy.

²⁰ Ha Yeyox mō'kupix kux, tu tappet mō'xex, tu Topa pet yōg tik pu' hōm, tu' yūm, ha tikmū'ūn xohix te' pēnā ka'ok,

²¹ ha Yeyox te:

—'Āxop te Topa te hām'āktux 'āpak, 'āte xa mō'kupix nōmhā, yā hōmā Topa te' xuktux,

tuk mūn 'āktux, tu Topa tappet hā 'ūgmūn 'āktux, yā hōnhāk nūn. Kaxīy.

²² Ha tikmū'ūn xohix te' xupak, tu' yēy, tu Yeyox 'āktux max, hām'āktux max hah, tu:

—'Ok hamūn yā Yoye kutok pit? Yamūn. Kaxīy.

²³ Ha Yeyox te:

—Pe 'āxop tek mūn pu hām'āktux'ax, tu tikmū'ūn yāy yōg hām'āktux hā' xuktux'ax, hu: Notot, 'ōg yāy yōg hehmēn xō'op. Kaxīy. Tu xe': Xate hāpoxopmā ka'ok xe'ēgnāg kōmēn Kapānān kopah. 'Āpu, 'ōg kōmēn kopa' mīy kamah. Kaxīy.

²⁴ Tu xe hām'āktux, hu:

—'Āte xa hāpxe'e' 'āktux: Tikmū'ūn xohix te Topa yōg tik xop putup pax, nōm te Topa pupi hām'āktux, pāyā yāy xape 'ūm putup nōg, xix nōm xop te kōmēn kopa tihī tep-tup nōg, 'īhā nōm tik te Topa pupi hām'āktux.

²⁵ 'Āte xa hāpxe'e' 'āktux: Hōmā 'ūn hok mām punethok hāpexka 'Iyaet kopah, 'īhā mōnāyoxop hittap 'Enit te Topa pupi hām'āktux, yā 'Iyaet yōg thihik, ha tehēx 'ohnāg, yā hāmyāxatamuk tikoyuk hā hām'hōgnāg,

²⁶ pa Topa te nū 'Enit kutnā 'ohnāg 'Iyaet yōg hāpexka tu', tu 'Iyaet yōg 'ūn hok mām ha nū'kutnā 'ohnāg. 'Āmhok. Topa te' puknōg 'ūn hok yūm hah mō'kutnāhā', tu kōmēn Xanep yōg 'ūn ha mō'kutnāhā', ha Xanep te hāpexka puknōg Xinōm tu' yūm,

²⁷ ha 'Iyaet yōg tikmū'ūn yāy xax kunut punethok, 'īhā mōnāyoxop 'Eniyeo te Topa pupi hām'āktux, tu 'Iyaet yōg thihik kamah, pa Topa te nōm hittupmā 'ohnāg. 'Āmhok. Pa hāpexka Xit yōg tik puknōg 'āxat'ax Naamā, tu yāy xax kunut nām, ha Topa te' hit-tupmāhā'. Hamūn. Kaxīy.

²⁸ Ha tikmū'ūn te' xupak, hu' gāy,

²⁹ tuknīha' pip, tu Yeyox mūg, tu' yīkūy, tu kōmēn kūnāpa hā' yīkūy, tu yīktix pepi' mōgāhā', ha kōmēn te yīktix yīmū' yūm, ha tikmū'ūn te hām tu Yeyox putyōn putup.

³⁰ Pāyā Yeyox te tikmū'ūn xop kotit hā' mōg, tu' mōg, tu' xupaha',

Yāmīy kummuk te tik kummugāhā'

³¹ Tu ta' mōg tu mōktu kōmēn Kapānān tu' xupep, ha Kapānān te hāpexka Ganinet kopa' yūm, ha Yeyox te tikmū'ūn yūmmūgāhā', nit xap 'īhā' yūmmūgāhā',

³² ha tikmū'ūn kuxānōg, Yeyox te hāmyūmmūgā hah. Tikmū'ūn xexka xop te hām'āktux ka'ok, ha kaxīy Yeyox te hām'āktux ka'ok kamah, 'ūxat'ax tu'.

³³ Ha tik xip, tu Topa pet kopa' xip, ha yāmīy kummuk te tik kopa' xip, yīy tik yīy ka'ok, tu:

³⁴ —Nāyane yōg Yeyox, 'ok xatek mūp-tex putup? 'Āte 'āyūmmūg. 'Āmūn yā Topa yōg nū'kutnā'ax xe'e'! Kaxīy.

³⁵ Ha Yeyox te' mānōg, tu:

—'Äyîy hok, nûy tik nîm, nûy 'äpep! Kaxîy.

Ha yämîy kummuk te mō tik yōn hām tu', tu' xupep, tu tik xûyġā 'ohnāg,

³⁶ Ha tikmū'ün xohix kuxānōg, tu' yēy, tu' nōy pu hām'äktux, hu:

—Hām'äktux 'üm nūhū'? Yeyox te yämîy xat, tu' xupepmāhā', yāy yōg hām'äktux'ax hā' xupepmāhā', tik te tikmū'ün xat'ax putuk. Kaxîy.

³⁷ Ha tikmū'ün te Yeyox 'äktux punethok, tu kōmēn Kapānām yîka' xuktux,

Yeyox te tikmū'ün punethok hittupmāhā'

³⁸ Ha Topa pet tu' xip, tu ta' mōg tu mōktu Xīmām pet tu' xupep, ha' xetut mūg tut pakut, tu' xax pukpex nām, ha Yeyox tu' xak pu tu hittupmā',

³⁹ yîy' mōg, tu mîmpe yîka' xip, tu' xat pu tu xax 'äxi', ha xuxi', ha 'ün yok, tuknîhā' xip, tu hāpxop xit'ax puk.

⁴⁰ Ha mâyōn mō'nāhā 'îhā tikmū'ün te pakut xop popnūn Yeyox hah, ha' xape xop te tikmū'ün pakut popnūn, ha Yeyox te pakut xop yîmū' yîm nōm, tu' xohix hittupmāhā',

⁴¹ tu yämîy kummuk xop xupepmānām, ha' yîy ka'ok, tu:

—'Ämūn yā Topak-tok xe'e'! Kaxîy.

Ha Yeyox te' xat, hu:

—'Äyîy hok! Kaxîy.

Tu' tux hok pu hām'äktux hok, yämîy kummuk te Yeyox yūmmūg hah, tu Yeyox yā Kun-nîy yūmmūg, yā Topa te' yāyuktūnāhā xe'e, ha' yūmmūg, yîy Yeyox te' tux hok pu yîy hok.

Yeyox te hām'āpak max'ax 'äktux

⁴² Hāptup 'îhā Yeyox te kōmēn kopa' xip, tu ta' mōg tu mōktu hām panip tu' xupep, ha tikmū'ün te' xak, tu' xipihî', tu:

—'Ämōg hok 'ûxeheh! Kaxîy.

⁴³ Pāyā Yeyox te:

—Topa te nūgkutnāhā pu hām'āpak max 'äktux, puyîy Topa yōg hām'äktux pu' yîpkox pi', yā Topa te tikmū'ün xat xe'ēgnāg, ha kōmēn nōy yōg tikmū'ün pu 'äte' xuktux putup, huk mōg. Kaxîy.

⁴⁴ Tu ta' mōg, tu 'lyaet yōg hāpxexka Ganinet ha hāpkumep, tu Yoneo yōg Topa pet ha' mōg, tu hām'āpak max 'äktux Topa pet kopah.

5

Yeyox te yāy yōg tik xop yîmōgatux

¹ 'Ämnîy 'üm 'îhā Yeyox te kōnāg xexka Gēnēyane yōg hāpkux tu' xip, tu hām'äktux, ha tikmū'ün punethok pip, tu' xupak xûy, hu Yeyox yîkagnāg hā' pip, nûy xupak max,

² ha Yeyox te' pēnāhā', tu kōnāg tu mîpkox hā' mōg pēnāhā', tu nōm mîpkox 2 pēnāhā', ha tikmū'ün te mîpkox hā mōxakux, nûy kōnāg yîmū mōg, nûy māpxamut, tu' nîm nōmhā, nûy māpxamut'ax pix,

³ ha Yeyox mōg, tu mîpkox kopa' yūm, tu Xīmām yōg mîpkox kopa' yūm, tu Xīmām tu' xak, pu mîpkox te kōnāg xet hā' mōg kutōgnāg. Ha' mōg, ha Yeyox te tikmū'ün yūmmūgāhā'.

⁴ Tu hāmuyūmmūgā kux, tu Xīmām pu':

—Mōg, kōnāg xexka tu' mōg, xayîy mām pop, pu 'äxape xop māpxamut. Kaxîy.

⁵ Ha:

—Yāyā', 'āmnîy tox hāk mūg mām xut 'ohnāg, pāyā xate' xat, yîk mū'āte māpxamut'ax putyōn kōnāg kopah. Kaxîy.

⁶ Tu' mîy, tu mām xohix punethok pop, māpxamut hu' pop, ha mām putux ha' koxyōy,

⁷ yîy' xape xop xānāhā', pu mō'nîynām, ha mō'nîynām, tu mām pop, tu mîpkox nōy te kōnāg yîmū' mōg kopa' xex, ha mîpkox putux nām, yîy mō'nāhā 'ûptux hah.

⁸ Ha Xīmām te' pēnāhā', 'îhā' kopaxux hā' nāhā', nûy Yeyox keppah 'ûxup, tu:

—Yāyā', 'āmōg, tuk nîm, 'ūgkummuk hah! Kaxîy.

⁹ Tu kuxānōg, xi' xape xop kuxānōg māpxamut xexka hah,

¹⁰ ha Yemeneo kutok Tiak xi' taknōy Yoām, tu kuxānōg kamah, tu Xīmām mütik mām pop, ha Yeyox te Pet pu hām'äktux, hu:

—'Äkuxānōg hok. Hōmā xate mām pop. Hōnhā xix hāptup 'îhā xate tikmū'ün nūnnāp-tup pax 'ūgmūn hah. Kaxîy.

¹¹ Ha mîpkox yîkūy, tu hāpkux ha' yîkūy, tu' nîm, tu ta Yeyox mütik mōg.

Yeyox te tik xax tapmāhā'

¹² Ha 'āmnîy 'üm 'îhā Yeyox te kōmēn 'üm tu' xip, ha tik xip, yā yāy xax kunut, tu Yeyox pēnāhā', tu' kopaxux ha' nāhā', tu:

—Notot, 'ok xatek putup 'ūghittupmā'? Kaxîy.

¹³ Ha Yeyox te yāy yîm yok, tu' xupit, tu:

—'Äte 'āp-tup, 'āhittup. Kaxîy.

Hāpxip 'ohnāg 'îhā tik hittup, ha' xax tup.

¹⁴ Ha Yeyox te' xat, hu:

—Tik 'üm pu 'îy hok, pa mōg 'āmānex hah, pu 'āxax pēnā', ha xokxop 'üm Topa pu mō'hap. Hōmā Mōyyex te' xat, ha tikmū'ün xohix te' yūmmūg'ax, tu Topa te 'āhittupmā yūmmūg'ax. Kaxîy.

¹⁵ Pāyā tikmū'ün xohix te' xupak, tu' nūn, pu Yeyox yōg hām'äktux 'āpax, pu Yeyox hittupmā',

¹⁶ pāyā Yeyox mōg, tu hām panip xexka ha' mōg, nûy Topa pu hām'äktux.

Yeyox te tik te hāpkumep hok hittupmāhā'

¹⁷ 'Ämnîy nōy 'îhā Yoneo yōg Paniye xop, xix hāmuyūmmūg xop te hāpxexka Ganinet yōg kōmēn xohix tu' pip, xix hāpxexka Yonex yōg kōmēn xohix tu' pip, xix kōmēn Yenoy-anēn tu' pip, tu' nūn tu nūktu mōxaha mîptut tu', tu' mām, nûy Yeyox 'āpax, ha tikmū'ün

yümmügähä', ha Topa te Yeyox ka'ogähä pu pakut xop hittupmä',

¹⁸ ha tik xop nõy nün, tu tik pakut tat, tu tutpe hä tat, yä tik te häpkumep hok, ha' nün tu nüktu mōxaha mīptut tu', tu mōxakux putup, nõy tik pi Yeyox keppa', päyā mīptut nū'xip,

¹⁹ tu 'xak, päyā' mōxa 'ohnäg, hu mīptut tu pepi' mōg, tu häpax mōy, tu tik pakut te hām tu' nāhā', tu mīptut kopa' nāhā', ha Yeyox keppa' pip,

²⁰ ha' pēnāhā', ha' kuxa mām ka'ok Yeyox kopah, yīy tik pakut pu hām'äktux, hu:

–'Ämün, 'äte xa hām'äktux, Topa te 'ög häpkummuk mīy'ax xaxogähä', pu tu' kux. Kaxiy.

²¹ Ha hämyümmüg xop xix Paniye xop tep-tup nõg, tu hām'äktux hä' nõy yānān, tu' yāy pu yīkopit, hu:

–Tik 'üm 'öhöm? Topap-xehnäg te häpkummuk mīy'ax xaxogä 'äktux, päyā Yeyox te yāy 'äktux, hu Topa 'äktux kummugähä'. Tik 'üm 'öhöm? Kaxiy.

²² Ha Yeyox te' yümmüg, tu hāmp'e'paxex yümmüg, hu:

–Putep mün tu 'äpe'äpaxex 'äkuxa kopah?

²³ Pi'ya xatep-tup, pe 'äte mīy'ax kummuk xaxogä 'äktux, pe 'äte' kup yok, nūy häpkumep 'äktux. Pi'ya xatep-tup?

²⁴ 'Äte xa hām'äktux, xa hämyümmüg, 'Ügmün yä tikmü'ün kutok pit. 'Ügka'ok, ha Topa te' yāy 'äxet'ax hōm 'ä', 'üyiy häpkummuk mīy'ax xaxogä 'äktux. 'İy hok, nūy tak 'äpax. Kaxiy.

Tu tik te häpkumep hok pu:

–'Äyok, nūy 'ägnihäxip, tutpe tu pepi' xup, nūy 'äpet ha mōg. Kaxiy. Tu' xat'ax hä hittupmähä'.

²⁵ Ha häpaxip 'ohnäg 'ihā' yok, tukniha' xip, tu tutpe pepi' xup, tu yāy pet ha' mōg, tu Topa max 'äktux.

²⁶ Ha tikmü'ün kuxānög, tu Topa max 'äktux, hu:

–Hōnhā yümü'äte häpoxpmā max xe'ēgnäg pēnāhā'! Kaxiy.

Yeyox xix Nemix

²⁷ Ha ta' mōg, Yeyox mōg, tu tik nõy pēnāhā', ha tik te gohet pupi tikmü'ün yōg tayūmak pop, tu' xuxet'ax Nemix, tu gohet yōg pet kopa' yūm, ha Yeyox te nõm pu:

–'Ükpe mōg. Kaxiy.

²⁸ Ha' yok, tukniha'xip, tu häpox xohix nīm, nūy Yeyox mütik mōg.

²⁹ Tu 'ämuk xexka mīy yāy pet tu', Yeyox tu' mīy, ha tik punethok pip, tu gohet pupi tayūmak pop, tu mīmpe xit'ax yīmap mām,

³⁰ ha Paniye xop tep-tup nõg, xix hämyümmüg xop tep-tup nõg kamah, tu tik xop yīkopit, nõm xop te Yeyox mütik häpkumep xop, hu:

–Tep tu 'äxit nõm tayūmak pop xop mütik, xix tik kummuk xop mütik xit? Kaxiy.

³¹ Ha Yeyox te' xupak, hu:

–Tikmü'ün hittup xop 'a' hehmēn putup'ah, 'ap notot xānā'ah, päyā pakut xop mün te hehmēn putup, hu notot xānāhā'.

³² Ha kaxiy 'ügnün nūy tikmü'ün kummuk xop xānā', pu nū', nūy yāyhähup, nūy häpkummuk mīy'ax nīm, päyā tikmü'ün 'üm te yāy pe'paxex, hu: "'Ügmax." Kaxiy. 'A 'äte xop xānā'ah pu nū'. Kaxiy.

Yeyox te' xit hok 'äktux

³³ Ha tikmü'ün te:

–Tik xop te Yoām mütik häpkumep, Yoām nõm tep-tox pix, ha 'ämniy punethok hä' xit hok, nūy Topa pu hām'äktux, ha Paniye xop yōg mütik häpkumep xop xit hok kamah, päyā 'ög tik xop xit hok'ah, xi' xo'op. Kaxiy.

³⁴ Ha Yeyox te hämyümmügähä', nūy Topa yōg häpoxpmā'ax yümmügä', tu:

–Tik te yāytaha', ha' xape xop hittup, tu 'ämuk xexka mīy, ha' xape xop xit punethok, 'ihā' xip, 'ihā tik te yāyta' xip,

³⁵ päyā häpaxip 'ihā tik nõy te nõm mōgähä', ha' mōg, 'ihā' xape xop kuxa teknög, tu' xit 'ohnäg. 'Ügmög, puxix yōg tik xop xit hok kamah. Kaxiy.

³⁶ Tu xe hämyümmügähä', tu hām'äktux'ax hä hämyümmügähä', nūy Topa yōg häpoxpmā'ax 'äktux, tu hām'äpak'ax tup 'äktux, hu:

–Tikmü'ün xax kunox. 'Ok 'ün te ta tu mō'yäg nõm, tu 'ün 'üm tu' yāy tup paha', pu tu xax kunox tu mō'xeh? 'Ap pa'ah. Top-ixxax tup ka'ok, ha' xax kunox pu'uk, tu yāy pot'ax. Kaxiy Yoām yōg tik xop te mōnāyxop yōg häpoxpmā'ax hittap tat, ha yōg tik xop te yōgnü häpoxpmā'ax at, yā häpoxpmā'ax tup tat.

³⁷ Ha tikmü'ün te' hep xupyäg mīy, tu xokxax tup hä' xuk, päyā 'ü 'üm te xupyäg tup xuk, tu xokxax kutut hä' xuk? Yämhok. Xokxax tup ka'ok, ha' xax kutut pu'uk, tu' yāy pot'ax, ha xupyäg nü'nā'ax, tu mōktu nõg,

³⁸ yīy tik te' hep xupyäg tup mīy, mūy xokxax tup hä' xuk.

³⁹ Ha tik te xupyäg kutut putup, tu ta' hep tup putup nõg, tu: "Nõm kutut nõm 'ūmax. 'A' tup max'ah." Kaxiy Yoām yōg tik xop te häpoxpmā'ax hittap tat putup, tu nõm tup putup nõg. Ta tu' kux. Kaxiy.

6

Yeyox te nit xap 'äktux

¹ 'Nīt xap te Yoneo yōg tikmü'ün hä häptup xe'e', ha nīt xap 'üm 'ihā Yeyox häpkumep, tu häpox yāy koxuk mep, ha xuxnäg xetox ta', xi' xap te' kopa' xip, ha tik xop te Yeyox mütik häpkumep, tu' xap mōy, tu' xap yōg xax

nak mōy, tu' yīm hā kuyōnnāhā', tu' xap xut, tu' māhā'.

² Ha Paniye xop pip, tu' yīkopit, hu:

—Tep tu xate xuxnāg ta xetox xap mōy nit xap 'īhā'? Mōnāyxop hittap Mōyyex te' xat hok pu yūmūg xut hok nit xap 'īhā'. Nō'ōm yā Topa yōg hāptup xe'e'. Kaxīy.

³ Ha Yeyox te:

—'Ok 'āxop mō'kupix Topa yōg tappet? Hōmā putup te mōnāyxop hittap Namix putex, xix tik xop te Namix mūtik hāpkumep kix kamah,

⁴ tu Topa pet xexka hā mō'nāhā', tu pām pop, ha pām te Topa keppa' mām, ha Topa te' tux hok pu tikmū'ūn nōm mā hok, 'āmānex xop yāp-xet te' māhā', pāyā mōnāyxop hittap Namix te' māhā', tu nōm xop te mūtik hāpkumep pu' popmāhā', ha' māhā'. 'Ūkux. Kaxīy.

⁵ Tu xe':

—'Ūgmūn yā Tikmū'ūn Kutok, hu nit xap xohix hāk xuxyā'. Kaxīy.

Tikyīm xe'e nīā'

⁶ Ha nit xap nōy 'īhā Yeyox te Topa pet ha' mōg, tu' mōg, tu mōktu xupep Topa pet tu', tu mō'nāhā', tu hāmyūmmūgāhā', ha tik 'ūm xip, ha' yīm xe'e nīā', tu' pu' ūgnāg,

⁷ ha tik xop te hāmyūmmūg te' pēnāhā', xix Paniye xop te' pēnāhā', nūy Yeyox pēnā', nūy tik hittupmā pēnā', 'ok pe nit xap 'īhā' hittupmā', pu Yeyox kupeh,

⁸ pāyā Yeyox te nōm pe' paxex yūmmūg, hu tik te yīm nīā' pu hām'āktux, hu:

—'Āyok, nūy 'ā'kihāxip, pu tikmū'ūn 'āxakot. Kaxīy.

Ha' yok, tuk-nīhā'xip,

⁹ ha Yeyox te:

—'Āte 'āyīkopit, putep xat Mōnāyxop Mōyyex? Mōyyex te putep tux hok pu mīy hok nit xap hā? 'Ok xat pu hāpxopmā max, 'ok pe hāpxop mā kummuk? 'Ok xat pu tik kōnāg kopa tu' xut pu tu xok hok, pe tik nīm pu tu xok? Kaxīy.

¹⁰ Tu' pēnā ka'ok, tu tikmū'ūn yīmmap xop pēnā ka'ok, tu tik yīm nīā' pu hām'āktux, hu:

—'īm yoah. Kaxīy.

Ha' yok, ha' hittupmāhā'.

¹¹ Ha tikmū'ūn xexka xop gāy, tu hām'āktux hā' nōy yānān, tu Yeyox kummūgāp-tup 'āktux.

Yeyox te yāy yōg tik xop te 12 yīmōgatux

¹² Ha 'āmnīy 'ūm 'īhā Yeyox te yīktix tox tu' mōkānīn ha' mōg, nūy Topa pu hām'āktux, ha 'āmnīy tox hā Topa pu hām'āktux.

¹³ Ha hāptup, tu tik te mūtik hāpkumep xop xānāhā', tu tik te 12 yīmōgatux nūy mō'pok, tu' xuxet'ax mīy yāy yōg mō'pok xop. Kaxīy.

¹⁴ Ha' xohix te: Xīmām, 'ūxuxet'ax nōy Pet xix' taknōy 'Ānene', xix Tiak, xix Yoām, xix Pinip, xix Matōmēo,

¹⁵ xix Māteo xix Tōmē, xix 'Appeo kutok Tiak, xix Xīmām nōy, nōm te yāy yōg Yoneo xop xexkanāp-tup,

¹⁶ xix Tiak kutok Yot, xix Yot nōy, 'ūxuxet'ax nōy 'Ixkanot, nōm te' gāy xop mōgāhā' Yeyox hah.

Yeyox te hāmyūmmūgāhā' xix hittupmāhā'

¹⁷ Ha Yeyox te yīktix yīxohoh, xix' yōg tik xop yīxohoh, tu hām yok tu' mōg, ha tikmū'ūn punethok te Yeyox mūtik hāpkumep, tu' pip, yā hāpxexka Yonex yōg tikmū'ūn, xix kōmēn Yenyoyanēn yōg, xix kōmēn Tiro yōg, xix Xīnōm yōg, nōm kōmēn 2 te kōnāg kox xexka hūmnāg tu' mām,

¹⁸ ha' nūn, tu Yeyox te hām'āktux 'āpak, pūyī' pakut xop hittupmā', ha tikmū'ūn te yāmīy kummuk kopa' pip xop nūn, ha' hit-tupmāhā'.

¹⁹ Ha tikmū'ūn xohix te Yeyox 'āpit putup, Yeyox mūn ka'ok hah, yīy tikmū'ūn kuxa hittup.

Tikmū'ūn kuxa hittup xi' teknōg

²⁰ Yeyox te yāy mūtik hāpkumep xop pēnāhā', tu:

—'Ākuxa hittup 'āhok xop nōmhā. Yā Topa te 'āxop xat, ha Topa yōg tikmū'ūn xe'e'.

²¹ —'Ākuxa hittup 'āp-tup xūy xop nōmhā. Topa te 'ātex hi ka'ok putup.

—'Ākuxa hittup 'āpota xop nōmhā. Topa te 'āxop kuxa hittupmāp-tup.

²² —'Ākuxa hittup 'īhā tikmū'ūn te 'āp-tup nōg, tu' 'āxop mānōg, 'ūkpe 'āmōg hah, hak mūn yā Tikmū'ūn Kutok, tu' 'ākeppak mōg.

²³ 'Ākuxa hittup 'īhā 'āp-tup nōg. Yā pūn, pūn 'ākuxa hittup tu', yā Topa te xa' hōm putup pexkox yōg hāpxop xohix. Hamūn. Hōmā mōnāyxop kummuk tep-tup nōg Topa pupi hām'āktux xop kamah.

²⁴ —Pa 'ākuxānōg 'āptexop xexka tu'. Hōnhā xate hāpxop xohix pip, yā' puxi'.

²⁵ —'Ākuxānōg 'āxop hi ka'ok nōmhā, putup te 'ākix putup hah.

—'Ākuxānōg 'āxop yīxix nōmhā, 'āpotap-tup tu'.

²⁶ —'Ākuxānōg 'īhā tikmū'ūn xohix te xa 'āktux max. Hōmā mōnāyxop kummuk te' koit'ax xop 'āktux max kamah.

Xatu' gāyxop putup pax

²⁷ —'Ūg 'āpax. 'Āte xa hapxe'e 'āktux. 'Āpu, tikmū'ūn gāy xop putup pax, tu hāpxopmā max 'āp-tup nōg xop pu',

²⁸ nōm xop te xa hāpkummūgāhā', yīy 'āxop te nōm pu hāmmāxnā', tu Topa tu' xak pu nōm hā hāmmāxnā', nōm xop te 'āxūyā pu hāmmāxnāhā'. Nōm xop te xa: "Pūyā Topa xa hāpkummūgā!". Kaxīy. Pāyā 'āxop te nōm pu: "Pūyā Topa xa hāmmāxnā'". Kaxīy.

²⁹ Tik 'ūm te 'āpayīn kix, 'apu tux hok pu 'āpayīnng nāg nōy kix kamah, ha tik 'ūm te

'ōg kāmīn xut, 'āpu' tux hok pu 'ōg kayak xut nūy paxmōg kamah.

³⁰ Tik 'ūm te 'āxak pu hāpxop 'ūm hok hōm, 'āpu, tu' hōm, ha tik te 'ōg hāpxop xut, 'āpu' tux hok pu' xut, yīy putpu' xak hok 'ōg hāpxop.

³¹ Xatep-tup, pu 'ānōy xa hāmmaxnā', yīy 'ānōy pu hāmmaxnā hāmāxap.

³² —'Āxop te 'āxape xop putup pax, tu' puknōg xop putup nōg. Teptu 'āmpē'āpaxex, hu: Topa tek mūn pu hāmmaxnāp-tup, 'ūgmūn max hah? Kaxīy. 'Āmhok, yā' koit. Tikmū'ūn kummuk te yāy xape xop putup pax kamah, pa Topa te nōm hā hāmmaxnā 'ohnāg.

³³ Tikmū'ūn te xa hāpxopmā max, ha xate nōm pu hāpxopmāhā' 'ūyānān tu'. Teptu 'āmpē'āpaxex, hu: Topa te 'ā hāmmax nāp-tup, 'ūgmūn max hah. Kaxīy. 'Āmhok. Tikmū'ūn kummuk te' xapep-tup pax kamah, tu hāpxopmā max 'ūyānān tu', pa Topa te nōm xop pu hāmmaxnā 'ohnāg.

³⁴ Xate hāpxop 'ūm hōm, tu ta' putpu' paha', tu 'āmpē'āpaxex, hu: Tik te pagop-tup. Kaxīy. Teptu 'āmpē'āpaxex, hu: "Topa te 'ā hāmmax nāp-tup, yāk mūn te hāpxopmā max." Kaxīy. 'Āmhok. Tik te hāpkummuk mīy, tu hāpxop 'ūm hōm kamah, tu' nōy xop pu' hōm, nūy ta put pu pa'.

³⁵ 'A 'āmūn'ah. 'Ōg hāpxop xak hok, nūy put pu pa'. 'Āpu' puknōg xop putup pax, tu hāmmaxnā', tu hāpxop hōm, pāyā' xak hok 'ūyānān tu', ha Topa te xa hāmmaxnāp-tup, yīy 'āxop yā Topa xe'ēgnāg hā 'āktok xop, yā Topa mūn max, tu hāmmaxnāhā tik max xop pu', xix tik kummuk xop pu'.

³⁶ Topa yā 'Ātak, tu tikmū'ūn kuxa ka', 'āpu tikmū'ūn nōy kuxa ka kamah, 'Ātak Topa putuk 'ūkuxa ka', yā Topa max xe'ēgnāg.

Topa te hāpxopmā'ax xohix kopit putup

³⁷ —'Ānōy yōg hāpxopmā'ax kopit hok, nūy hām'āktux kummuk, puyīy Topa 'ōg hāpxopmā'ax kopit hok. 'Ānōy yōg hāpkummuk mīy'ax xaxogā', ha Topa te 'ōg hāpkummuk mīy'ax xaxogāp-tup, pu tu' kux.

³⁸ 'Ānōy pu' hōm, ha Topa te xa' hōm putup, ha xate hāpxop punethok pop putup, yā Topa te hāpxop punethok xa popmāhā', yīy 'āyīm 2 nū'xip putup. 'Ōg panat hā 'ānōy pu hāpxop xap hāmenex, puxix nōm panat hā xa hāmenex hāpxop xap kama 'ūyānān tu'. 'Ānōy puk-tōgnāg hōm, puxix xa' hōm 'ūk-tōgnāg kamah. 'Ānōy pu punethok hōm, puxix xa' hōm punethok 'ūyānān tu'. Kaxīy.

³⁹ Tu xe hām 'āktux, hu:

—Tik pa hok te' nōy pa hok mūg, puyīy mōgā', puxix tik 2 hāpkox ha' mōnāy.

⁴⁰ Tik te hāmyūmmūgā'ax, tu hāmyūmmūg xexkah, ha tik te tappet mīy yā hāmyūmmūg

kutōgnāg, pāyā tappet mīy kux, tute hāmyūmmūg xexkap-tup, nūy hāmyūmmūgā kamah.

⁴¹ Xate 'ānōy yōg hāpxopmā'ax kummuk pēnāhā'. Teptu xate' pēnā hok yāy yōg hāmpxopmā'ax kummuk?

⁴² Hu hām'āktux hok 'ānōy pu', hu: "Nāy, 'āte xa hāmyūmmūgāp-tup." Kaxīy, 'Īhā 'āpa te hāmyūmmūg 'ohnāg. Xate' yūmmūg hok? Yāy yōg hāpxopmā kummuk kux hāmāxap, xayīy kūnāy tu 'ānōy yōg hāpxopmā kummuk kuxyā'.

Mīm kup max xix mīm kup kummuk 'āktux

⁴³ —Mīm kup max te mīnta max taha', 'ap mīnta kummugā'ah, ha' kup kummuk te mīnta max ta 'ohnāg.

⁴⁴ Tikmū'ūn te mīnta pēnāha', nūy tu' kup kopit. Mīnta tu max, puxix' kup tu max, ha mīnta tu kummuk, puxix' kup tu kummuk. 'A tikmū'ūn te tepta xut'ah mīmyām kup tu', tu xupxak xak 'ohnāg mīmyām kup tu'.

⁴⁵ Tik max te hāpxopmā max, 'ūkuxa max tu' mīy, ha tik kummuk kuxa kummuk, tu hāpxopmā kummuk. 'Ūyīy'ax te yāy kuxa kopa hāpxop yūmmūgāhā'.

Tikmū'ūn pet max xix' kummuk 'āktux

⁴⁶ —'Āxop te: "Āmūn yāk xuxyā", kaxīy, pāyā 'āyīpkox 'ohnāg. 'Āte 'āxat, pāyā xate' mīy 'ohnāg.

⁴⁷⁻⁴⁸ 'Āte xa hāmyūmmūgā'ax, nūy Topa yōg hāpxopmā'ax yūmmūgā', nūy ta tikmū'ūn yīpkox pip 'āktux. Tikmū'ūn te yōg hām'āktux 'āpak, pūyā' yīpkox pi', puyīy tu ta hāmyūmmūg, tu tik pet max putuk. Ha hāpkot, tu mīkaxxap tu' xupep, pu tu kox tox tu nōm mō'tat, tu nō māykup mō'xix mīhīm, ha' ka'ok, ha tex mō'yūm tu' xupep, tu nū'xip, tu mīptut kopa' xup, tu' xet xexkah, pāyā mīptut kopa mō'yūm hām hā, tu' nak, tu' ka'ok, ha kaxīy tik nūn, 'ūgha' nūn, nūy yōgnū hām'āktux 'āpak, tuk xupak, tu' yīpkox pip, tu' ka'ok kamah, mīptut max mō'yūm hām hā putuk.

⁴⁹ Pāyā tik nōy pet, tu 'ap hāpkot'ah, tu mō'tat mīhīm hām pepi', tu mō'xix hām tu', ha' pu'uk, ha tex gāy te mīptut xit, ha' topaha', tu hāpxop patōnnāhā', tu' koxyōy mīptut. Ha kaxīy tik te yōgnū hām'āktux 'āpak, tu' yīpkox 'ohnāg, tu' pu'uk kamah, mīptut kummuk putuk. Ta tu' kux. Kaxīy.

7

Yeyox te kāmānat hittup māhā'

¹ Ha Yeyox te hām'āktux kux, tu tikmū'ūn pu hām'āktux kux, tu ta' mōg tu mōktu xupep kōmēn Kapānān tu',

² ha tik puxet yā Hōm yōg gohet hā kāmānat, ha' hām max, yīy' xat'ax tep-tup pax, ha' pakut, tu' xok putūmnāg,

³ ha tikmũ'ün te Yeyox 'äktux, yīy gohet yōg tik te Yoneo xexka xop tu' xak, pu nü', pu Yeyox tu' xax, pu mōg, nüy tik pakut hittupmā'.

⁴ Ha Yeyox ha' nūn, tu' mōxaha', tu tu' xak, hu:

–Gohet yōg tihik max, 'äpu, nōm mō'nīynām.

⁵ Tute yūmũ yōg tikmũ'ün putup pax, tu Topa pet mīy yūmũ yōg tikmũ'ün pu'. Kaxīy.

⁶ Ha ta' mōg, 'ūxexka xop mütik mōg, tu gohet yōg kāmānat ha' mōg, ha' pet hūmnāg tu' yūm, ha gohet yōg tik te' xape nü'pok, tu Yeyox ha nü'pok, nüy yāy pupi hām'äktux, nüy Yeyox pu' hām'äktux, hu:

–'Änūn hok, 'äxexka tu', hak-tōgnāg, hu 'äte yāyhāhup 'äkeppah.

⁷ 'Äte hām'äktux yūmmūg'ah. 'Äka'ok, nüy hāmpakut'ax mānōg, pu mōg. 'Äpu, hāmpakut'ax xat, puyīy kāmānat hittup, nüy xat'ax hā' hittup.

⁸ Yūmmūg, gohet yōg xexka xop tek xat kamah, ha 'äte yōgnū xonat xop xat, ha' yīpkox pip. 'Äte xonat pu: "Mōg, mōg," kaxīy, ha' mōg, ha xonat nöy pu: "Mā', 'änū'!" kaxīy, ha' nūn, ha 'äte kāmānat pu' xat, hu: "'Ümīy," kaxīy, ha' mīy. Puxi'. Kaxīy.

⁹ Ha Yeyox hup, tu tik pakut ha' mōg'ah, tu gohet yōg tik te hām'äktux 'äpak, tu' hittup, tu tikmũ'ün te' pe' mōg xop pu hām'äktux, hu:

–'Äte xa hāpxe'e 'äktux: Tik kuxa yūm ka'ok yōgnū hām'äktux'ax kopah. Yā' puknōg, päyā Iyaet yōg tikmũ'ün kuxa mām pu'uk, yūmũ yōg tikmũ'ün kuxa mām pu'uk. Kaxīy.

¹⁰ Ha gohet yōg tik xape xop putpu' mōg, kāmānat pet ha' mōg, tu' mōg tu möktu mōxaha', ha kāmānat xip, tu' hittup nōmhā, 'ūxat'ax hā Yeyox te nōm hittupmāhā'.

Yeyox te' putpu hīnāhā 'ün kutok pit

¹¹ Hāpxip kutōgnāg 'ihā Yeyox mōg, tu ta' mōg tu möktu kōmēn Nāiy tu', ha' xop te Yeyox mütik hāpkumep xop pip, xix tikmũ'ün punethok pip,

¹² tu kōmēn yīka' pip, 'ihā tikmũ'ün nūn, tu kōmēn yīka' nūn, nüy tik nō hāpkot. 'Ün hok yūm, tuk-tok pit puxeñnāg, ha' xok, ha tikmũ'ün punethok te 'ün mütik nūn, nüy tuk-tok nō hāpkot,

¹³ ha Yeyox te' pēnāhā', tu 'ün kuxa ka', hu: –'Äpota hok, 'ūxak hok. Kaxīy.

¹⁴ Tu' mōg, tu tik xok yōg mīpkox 'äpit, ha tikmũ'ün hup, tu' mōg 'ohnāg, yīy Yeyox te:

–'Ügnix! 'Ate 'äxat, hu: 'Äyok. Kaxīy.

¹⁵ Ha put pu hi', tu' yoah, tu' yūm, tu hām'äktux, ha Yeyox te' mük tut pu' hōm, ha' hittup.

¹⁶ Ha' xohix kuxānōg, tu Topa 'äktux max, hu:

–Topa te nü tik yāykutnāhā', puyīy yāy pupi hām'äktux, tu' nūn, nüy tikmũ'ün pu hām'äktux, ha' xexkah! Topa nūn, nüy yāy yōg tikmũ'ün mō'nīynām. Kaxīy.

¹⁷ Ha kaxīy tikmũ'ün te Yeyox 'äktux, tu hāpxexka xohix kopa hām'äktux, xix hāpxexka hāmhūmnāg tu hām'äktux.

Yoām te mō tik pok

¹⁸ Tik xop te Yoām mütik hāpkumep, tu nōm tep-tox pix mütik hāpkumep, ha tik xop te Yoām pu hām'äktux, tu Yeyox te tik xok putpu' hīnā' äktux, ha Yoām te' yōg tik 2 mōg yīmōgatus,

¹⁹ tu Yeyox ha mō'pok, nüy yīkopit, hu: "'Ok 'ämün tihik, Topa te nōm yāykutnāhā'? 'Ok pe Topa te' nöy nü'kutnā'ax?'" Kaxīy.

²⁰ Ha tik xop te Yeyox ha' mōg, tu hām'äktux, tu Yoām te hām'äktux 'äktux, hu:

–'Ok 'ämün yā tihik, Topa te nōm yāykutnāhā'? 'Ok pe Topa te' nöy nü'kutnāp-tup? 'Ükux. Kaxīy.

²¹ 'Ihā Yeyox te tikmũ'ün punethok hittupmāhā nōmhā, tu yāmīy kummuk kopa' pip xop hittupmāhā', xi' pa hok xop hittupmāhā',

²² tu hām'äktux hā' nöy yānān Yoām yōg tik xop mütik, hu:

–Putpu mōg, nüy Yoām pu hām'äktux, tu hāpxopmā'ax xohix pēnā'ax 'äktux, hu: 'Üpa hok xop te hāmpēnāhā, xix hāpkumep hok xop te hāpkumep, xix yāy xax kunut xop yā' xax tup, xi' yīpkox hok xop te hām'äpak, ha' xok tihik, tu putpu hi', ha' hok xop te hām'äpak max'ax 'äpak.

²³ Ha tikmũ'ün kuxa yūm ka'ok 'ūgmün kopah, tu' kuxa hittup, tuk yīkopit 'ohnāg. 'Ükux. Kaxīy.

²⁴ Ha Yoām yōg tik xop mōg, ha Yeyox te Yoām 'äktux tikmũ'ün pu', hu:

–'Ämōg hām panip tu', nüy Yoām pēnā'. Putep xate pēnāhā'? 'Ok mōg nüy mīxux tox pēnā'? 'Ok 'āmuuh te nōm mīxux nuhuknām? 'Ap pēnā'ah.

²⁵ Xatep-tep pēnāhā? 'Ok mōg nüy tik pēnā', tik te topixxax maxnāg mō'tat? 'Ämhok. Yoām te xoktut xax mō'tat, 'ap xax max'ah. Yūmmūg. Tikmũ'ün nöy te topixxax max xe'e mō'tat, tu mīptut max xe'e kopa tihī', tu 'ämuk xexka mīy pax, tu' xexka xop mütik tihī', päyā panip xexka tu' tī'ah xexka xop, ha Yoām hok xip, tu panip xexka tu' pet.

²⁶ Päyā xatep-tep pēnāhā'? 'Ok tik te Topa pupi hām'äktux pēnāhā'? Hamün. 'Äte xa hāpxe'e 'äktux. Yoām mün te Topa pupi hām'äktux xe'e'.

²⁷ Xate' yūmmūg. Hōmā tik hittap te Yoām 'äktux, tu Topa yōg tappet tu kax'āmi', hu: "Topa te hām'äktux, ha tik te' nōm pupi hām'äktux. Topa te nōm tik 'äkeppa mō'kutnāp-tup, nüy 'ōg putat maxnā'." Kaxīy.

²⁸ —Āte xa hāpxe'e 'āktux. Tik xop hittap xexkak-tōgnāg, ha Yoām xexka xe'e, pāyā tik kutōgnāg, tu' yīpkox xip, Topa te nōm xat hah, nō'ōm xexka xe'ēgnāg. Kaxīy.

²⁹ Ha tik xop te gohet pupi tayūmak pop, tu Yeyox yōg hām'āktux 'āpak. Hōmā Topa te nōm xat, ha' yīpkox pip, ha Yoām tep-tox pix.

³⁰ Pāyā Paniye xop xix yūmmūgā xop yīpkox 'ohnāg, yīy Yoām tep-tox pix 'ohnāg kamah.

³¹ Ha Yeyox te xe hām'āktux, nūy hāmyūmmūgā', hu:

—Hōnhā tikmū'ūn tep-tep putuk?

³² Tu kakxop putuk, nōm te hāmuhnōg tu' māim, ha hāmku'te'ax, tu' nōy pu' yīy ka'ok, hu: “Ūgmū'āte kāyāhā', yāyta'ax kāyā putuk, payā 'āxop te hāmyā 'ohnāg, hakmū'āte kāyāhā, nō hāpkot kāyā'ax putuk, pāyā 'āxop tekmu' mūtik pota 'ohnāg.” Kaxīy.

³³ Yoām tep-tox pix, tu' xit hok, nūy Topa pu hām'āktux, tu' hep xupyāg xo'op hok, ha 'āxop te: “Yāmīy kummuk te nōm kopa' xip.” Kaxīy. Pāyā' koit.

³⁴ Ūgnūn, 'ūgmūn yā Tikmū'ūn Kutok, tuk nūn, tuk xit xi' xo'op, ha 'āxop tek mūn kummuk 'āktux, hu: “Pēnā', 'ūxit xexka nām, tu xo'op xexka nām kamah, tu tix kummuk hā' xape, xix tik xop te gohet pupi tayūmak pop xop hā' xape.” Kaxīy.

³⁵ Tukmūn 'āktux kummuk, pāyā Topa te hāmyūmmūg, ha tikmū'ūn yāg te nōm hāmyūmmūg putup, tu nōm max 'āktux, tu' hāpxe'e 'āktux. Ta tu' kux. Ūkux. Kaxīy.

Yeyox te Paniye tik pet ha' mōg

³⁶ Āmnīy Ūm Thā Paniye xop yōg tik te Yeyox xānāhā, pu yāy pet tu' xit, ha' mōg, tu mō'nāhā', tu' yūm, tu' xit,

³⁷ ha kōmēn yōg xotit xip, ha tikmū'ūn te nōm pu hām'āktux, hu: 'Ok yūmmūg xate'? Yeyox te tik pet kopa' xit. Kaxīy. Yīy nax tōynāg paha', yā naxnāg max, takat xexkah, ha hāpxop hax max kopa' xuk, tu kamah takat,

³⁸ ha Yeyox yīkāgnāg hā' xip, tu potaha', ha' pa hep te Yeyox pata tu' nāhā', tu' pa hep hā' pata pix, hu Yeyox pata nakgāhā', tu yāy xetox hā' 'ūktux tu' nakgāhā', tu Yeyox pata hax, tu hāpxop hax max pux, tu Yeyox pata tu' pux.

³⁹ Ha Paniye yōg tik te' pēnāhā', tu hāmpē'paxex, hu: “Ok yūmmūg hok Yeyox te? Paxpu tu Topa pupi hām'āktux xe'e', puxix 'ūn xotit yūmmūg, hu' tux hox pu tu' xupit hok.” Kaxīy.

⁴⁰ Ha Yeyox te Paniye yōg tik pu hām'āktux, tu:

—Xīmām, 'āte xa hām'āktux putup. Kaxīy.

Ha:

—Āyīy. Kaxīy.

⁴¹ Ha hām'āktux, nūy Topa yōg hāpxopmā'ax yūmmūgā', hu:

—Hōmā tik 2 ta nemēn tik nōy pu', tu' nōy pu ta nemen tayūmak hā, ha tik 'ūm ta nemēn tayūmak te 500, ha' nōy ta nemēn tayūmak te 50.

⁴² Pāyā' nōm tik te tayūmak 'ūm xip'ah, 'ap pagok yūmmūg'ah, ha tik max te' homip tu' kax 'ohnāg, ha' kux. 'Āte xa yīkopit, hu: Tik 'ūm kuxa hittup xe'e', nūy tik max tup-tup pax xexkah, pe tik ta nemēn tayūmak te 50, pe tik ta nemēn tayūmak te 500? Putep pe'āpaxex? Kaxīy.

⁴³ Ha Xīmām te:

—Nōm tik ta nemēn kutōgnāg 'ūkuxa hittup kutōgnāg, ha tik ta nemēn xexka kama' kuxa hittup xexkah, hu tik max tup-tup pax xexkah. Kaxīy.

Ha:

—Hamūn.

⁴⁴ Nū 'ūn pēnā'. 'Āpet tu mōknāhā', ha kōnāg 'ūm xate tat'ah, puk pata pix, ha 'ūn tek pata pix, yāy pa hep hā' pix, tu xetox hā' nakgāhā',

⁴⁵ hak mūg 'ohnāg yāy kep ha, nūy 'aneo, pāyā 'ūn tek pata hax punethok.

⁴⁶ Xate 'ā' hōm'ah mīxux hep tox, puk xe 'ānnut, pāyā 'ūn te hāpxop hax max hep pux 'ūkpata tu',

⁴⁷ yīy 'āte xa hāpxe'e 'āktux: Topa te 'ūn kuxa kummuk xit nūy kuxa max tat 'ūyānān tu', yīy ha Topap-tup pax xexkah. Topa te tikmū'ūn yōg kummuk mīy'ax xexka xaxogāhā', yīy ha Topap-tup pax xexka 'ūyānān tu', ha Topa te tikmū'ūn yōg kummuk mīy'ax kutōgnāg xaxogāhā', yīy ha Topap-tup pax kutōgnāg. Kaxīy.

⁴⁸ Tu 'ūn pu hām'āktux, hu:

—Topa te 'ōg kummuk mīy'ax xaxogāhā', ha' kux. Kaxīy.

⁴⁹ Ha tikmū'ūn te Yeyox mūtik mām te:

—'Ū 'ūm nūhū'? Topap-xehnāg te hāpkummuk mīy'ax xaxogā 'āktux. Yeyox te' xaxogā 'āktux hok! Kaxīy.

⁵⁰ Ha Yeyox te 'ūn pu hām'āktux, hu:

—'Ākuxa yūm ka'ok 'ūgmūn kopah, yā' puxi'. Mōg. Pūyā 'ākuxa yūm. Kaxīy.

Ha' mōg.

8

Ūn xop te Yeyox mūtik hāpkumep

¹ Hāpxip kutōgnāg Thā Yeyox hāpkumep, tu kōmēn xohix kotit hā' mōg, xi' xip tu xexka xohix kotit hā' mōg, tu hām'āpak max'ax 'āktux, tu Topa te yāy yōg tikmū'ūn xat 'āktux, tu nōm xop yīpkox pip 'āktux, ha tik te 12 nū mūtik mōg,

² ha 'ūn xop mōg kamah. Hōmā Yeyox te nōm xop hittupmāhā', tu yāmīy kummuk mōy 'ūkopah, ha 'ūn xohix te: Mānix 'āxet'ax Mānanēn, ha Yeyox te yāmīy kummuk te 7 mōy 'ūkopah,

³ ha 'ün nōy Yoān, tu Koy zetut, ha' xat'ax 'Enot yōg kāmānat te māxap, tu nōm yōg hāpxop pēnāhā', ha 'ün nōy Xoyān, xix 'ün punethok te Yeyox mō'nīynām, tu tik te 12 mō'nīynām kamah, tu yāy yōg hāpxop tu' popmāhā'.

Tik te hāpxop xap xok

⁴ Ha tikmū'ün punethok nūn, yā kōmēn xohix yōg tikmū'ün, tu Yeyox ha' nūn, tu yāy tu nū'nāhā', ha Yeyox te' yūmmūgāhā', tu hām'āktux hā' hāmyūmmūgāhā', nūy Topa yōg hāpxopmā'ax yūmmūgā', puyiy tikmū'ün Topa yōg hām'āktux pu' yīpkox pi', hu:

⁵ –Tik 'üm mōg nūy hāpxop xap xok, tu' xap nāhā hām kopah, nūy tu' xok, ha' yāg te putat yīka tu' xok, yīy tikmū'ün te pata hā' totnok, tu' koxyo, ha putuxnāg te' māmām,

⁶ ha' xap yāg te mīkax xap tu' nāhā', tu' xokax, pāyā hāmna, ha' tap, tu yāy xaxogāhā'.

⁷ Ha' xap yāg te mīmyām xop kopa' nāhā', tu' xokax, tu' tuk, tu mīmyām mūtik tuk, tu mōktu xexkah, pāyā' xut 'ohnāg, mīmyām kopa' xip tu'.

⁸ Ha' xap yāg te hām max tu' nāhā', tu' xokax, tu' tuk, tu mōktu xohix xexkah, tu' xap max xohix punethok hōm. Yā' xap puxet te' xap te 100 popmāhā'. Ta tu' kux. Kaxiy. Tu xe hām'āktux, hu:

–'Ūg'āpax, xa 'āyīpkox pi'. Kaxiy.

Yeyox te hāmyūmmūgāhā'

⁹ Ha tikmū'ün te Yeyox mūtik hāpkumep, tu' yīkopit, hu:

–'Ok hām'āktux 'üm nūhū'? Teptu xate hām'āktux'ax hā hāmyūmmūgāhā'? Kaxiy.

¹⁰ Ha Yeyox te:

–Topa te xa hāmyūmmūgāhā', tu yāy yōg tikmū'ün xat, hu' yūmmūgāhā', puyiy Topa yōg hāpxopmā'ax yūmmūg, pāyā 'a' tikmū'ün nōy pu hāmyūmmūgā'ah, yīy Topa te nōm pu hāmyūmmūgāhā hām'āktux'ax hā, pu tu pa pip, pāyā 'a hāmpēnā'ah, xix hām'āpak, pāyā 'a yūmmūgāhā hām'āktux'ax hā, pu tu pa pip, pāyā 'a hāmpēnā'ah, xix hām'āpak, pāyā 'a' yūmmūg'ah.

¹¹ –Nōm hām'āktux te 'āyūmmūgāhā kaxiy: Mīxux xap te Topa yōg hām'āktux 'āktux.

¹² Hāpxop xap te putat yīka tu' nāhā', hā kaxiy tik 'üm te Topa yōg hām'āktux 'āktux, ha tikmū'ün te' xupak, pāyā Hāmgyāgnāg te hām'āktux putup nōg, tu' kuxa kopa' xut, yīy' kuxa yūm 'ohnāg Topa yōg hām'āktux kopah, ha Topa te' kuxa kummuk xit 'ohnāg.

¹³ Ha hāpxop xap te mīkaxxap tu' nāhā', hā kaxiy tikmū'ün te hām'āktux 'āpak, tu' kuxa hittup, pāyā' kuxa yūm kutōgnāg, tu mōktu' xūy, hu' xaxok, tu Topap-tat xak.

¹⁴ Ha' xap te mīmyām xop kopa' nāhā', hā kaxiy tikmū'ün te nōm hām'āktux'ax 'āpak, pāyā yāy yōg hāpxop xak punethok, tu

hāpkute'ex punethok, tu' kuxa yūm 'ohnāg, hu Topap-tat hā' mōg pu' ūgnāg.

¹⁵ Ha hāpxop xap te hām max tu' nāhā', ha kaxiy tikmū'ün te hām'āktux'ax 'āpak, tu' yīpkox pip hām'āktux xe'e pu', tu' kuxa yūm ka'ok hām'āktux'ax kopah, tu' xaxok 'ohnāg, tu Topa yōg putat hā' mōg, yā' mōg kumak mōg. Tu ta tu' kux. Kaxiy.

Kūyānām 'āktux

¹⁶ Tu xe hām'āktux, nūy Topa yōg hāpxopmā'ax yūmmūgā', hu:

–Tikmū'ün te kuyānām tat'ax yūm mīpe yīmū', pu tikmū'ün xohix pu tupmā', 'ap mīmpe kaka' yūm'ah, xix mana kopa' yūm 'ohnāg.

¹⁷ Ha kaxiy Topa te hāpxopmā'ax xap-top'ax yūmmūgāp-tup, tu tikmū'ün xohix yūmmūgāp-tup.

¹⁸ –Paxip, 'ūg'āpax max. Tikmū'ün te hāmyūmmūg, Topa te nōm pu hāmyūmmūgāp-tup, pu tu hāmyūmmūg xohix, pāyā tikmū'ün nōy te hāmyūmmūg 'ohnāg, Topa te nōm pu hāpxoxogāp-tup. Kaxiy.

Yeyox mūg tut nūn xi' taknōy xop

¹⁹ Yeyox mūg tut nūn, xi' taknōy xop nūn tu nūktu Yeyox tu' mōxaha', pāyā 'ā' pēnā'ah, tikmū'ün punethok hah,

²⁰ ha tik te Yeyox pu hām'āktux, hu:

–'Ātut nūn xix 'ātaknōy xop nūn, tu nūktu hāptopa' tihī', tu 'āhip, nūy 'ā mūtik hām'āktux. Kaxiy.

²¹ Pa Yeyox te:

–Yā tikmū'ün te Topa yōg hām'āktux 'āpak, tu' yīpkox pip, yāk tut, xik taknōy, xik hex, tuk mūn hā' xape'. Kaxiy.

Yeyox te 'āmuuh xat, pu tu' xuxi'

²² 'Āmnīy 'üm 'īhā Yeyox te kōnāg xexka ha' mōg, tu ta mīpkox xup hā nōm mō'nāhā', xix yāy mūtik hāpkumep xop te' mōxakux, nūy kōnāg yīmū' mōg, ha Yeyox te:

–'Āpu, yūmū mōg nūpehe, kōnāg xexka xatapak hāpkux nōy tu'. Kaxiy.

Tu' mōg,

²³ 'īhā Yeyox pip mīpkox kopah, tu mō'yōn, ha 'āmuuh ka'ok mō'ko'uk kōnāg xexka tu', ha kōnāg te mīpkox mahap, tu' mōm tu mīpkox kopa mō'nāhā', ha mīpkox putux, tu kōnāg kopa mō'nāp-tup, yīy tik xohix xok'ax, tu kuxānōg,

²⁴ Tu Yeyox yīka ha' mōg, tu' tuhuk, ha' yāy koxak, yīy:

Yāyā', Yāyā', yūmūg xakix putup! Kaxiy.

Ha yāy koxak, tu' 'āmuuh xat, xix kōnāg gāy xat, pu tu xuxi', ha' xuxi',

²⁵ ha Yeyox te tik xop pu hām'āktux, hu:

–Piya' kuxa mām 'ūgkopah? Kaxiy.

Ha Yeyox yīpkutuk, tu yāy pu hām'āktux, hu:

—Ū 'üm nō'ōm? Tu 'āmuuh gāy xat, xix kōnāg gāy xat, ha' yīpkox pip, tu' kux. Kaxīy.

Yeyox te yāmīy kummuk xupepmāhā'

²⁶ Yeyox mōg, xix' yōg tik xop te nōm mütik mōg, tu mōktu mōxaha hāp xexka Yenax tu, ha Ganinet yōg kōnāg xexka kux tu' yūm,

²⁷ ha Yeyox te mīpkox kopa' xupep, tu' mōg hām nak ha', ha kōmēn yōg tihik nūn tu nūktu Yeyox hah, tu 'āmnyī xohix hā xax top, tu' pet xip 'ohnāg, pāyā' xukpot tu' xip, yāmīy kummuk xop te' kuxa kopa' pip hah.

²⁸⁻²⁹ Hāpxip punethok 'Thā yāmīy kummuk xop te' kummukgāhā', ha' gāy, yīy tikmū'ūn te tik yīm hīy, xi' kup hīy, pip kup mūg xap hā' hīy, pāyā tik te' koxoyā, ha yāmīy kummuk te panīp xexka tu' mōgāhā', yīy Yeyox te yāmīy xat pu mōg, ha tik te Yeyox pēnāhā' tu' yīy ka'ok, tu kopaxux ha' nāhā', tu nū'xup, tu:

—Yeyox, 'āmūn yā Topa xe'ēgnāg kutok. Xatep-tep tup? 'Āte xa tu' xak 'ūgkummugā hok. Kaxīy.

³⁰ Ha Yeyox te' yīkopit, hu:

—'Ok 'āxuxet'ax te xīy? Kaxīy.

Yā yāmīy punethok te tik kopa tihi', hu' yānān tu hām'āktux, hu:

—'Ūkxuxet'ax 'Ūxohix Xop. Kaxīy.

³¹ Tu Yeyox tu' xak pu Hām gāy āgnāg Pet ha mō'pok hok.

³² Ha xapup punethok te yīktix tu' pip, tu hām hūm nāg, yīy yāmīy te tu' xak, pu' tux hok pu tu xapup xop kopa' mōg, ha' tux hok pu mōg,

³³ tu tik nīm, tu mōktu xapup xop hā mōxakux, ha xapup xop te yīktix tu' yīxo mō'ka'ok, tu kōnāg xexka tu' mōxaha', tu kōnāg kopa nām, tu' xakix.

³⁴ Ha tik xop te xapup pēnāhā', tu xapup xakix pēnāhā', tu nū'paha', tu' mōg, tu kōmēn ha' mōg, nūy 'ūkopa hām'āktux, xix hāp xexka tu' hām'āktux,

³⁵ ha tikmū'ūn nūn nūy tu pēnā', tu Yeyox ha' nūn, tu tik pēnāhā', yāmīy kummuk te' nīm, ha' nūn, ha topixxax mō'tat, tu' Yeyox yīkāgnāg hā' yūm,

³⁶ ha tik xop te xapup xop pēnā'ax mōg, tu tikmū'ūn nōy pu hām'āktux, tute tik hittup 'āktux,

³⁷ ha Yenax yōg tikmū'ūn te xapup tu Yeyox yīpkutuk, hu nōm xat pu mōg, pu hāp xexka nīm, ha Yeyox 'ūpapak ha' mōg, tu kōnāg xexka ha' mōg, tu mīpkox tu mō'nāhā', nūy mōg,

³⁸ ha tik hittup, tu Yeyox tu' xak, hu:

—'Ūktux hok 'ū mōg 'āxop mütik. Kaxīy.

Pāyā Yeyox te:

³⁹ —Yāy pet ha mōg, Topa te xa hāmmaxnāhā', yīy tikmū'ūn pu hām'āktux, Kaxīy.

Ha ta' mōg, tu tikmū'ūn xohix pu hāpxopmā'ax xe'ēgnāg 'āktux, Yeyox te nōm hāpxopmāhā.

Yeyox te 'ūn hittupmāhā' xix kaxxop hex

⁴⁰ Ha ta' mōg Yeyox, tu hāpkux nōy ha' mōg put pu', tu mīpkox hā' mōg, tu kōnāg xexka yīmū' mōg, tu mōktu xupep hāpkux tu', xix yāy mütik hāpkumep xop mōxa kamah, ha tikmū'ūn xohix te' hīp, hu' hittup,

⁴¹ ha tik nūn, 'ūxuxet'ax Yax, 'ūxexkah, tu Yoneo yōg tikmū'ūn xat, tu kōmēn yōg Topa pet kopa' xat'ax, tu' kopaxux ha' nāhā', tu Yeyox tu' xak, pu' pet ha' mōg,

⁴² hak-tok hex puxehnāg, 'ūyōg hām yāxatamuk xohix te 12, 'ūtuk tup, tu' pakut, tu' xok putūm nāg, yīy Yeyox mōg.

Ha tikmū'ūn xohix te nū mütik mōg, yā' xohix punethok, tu yāy tu nū'nāhā', tu' mūg ka'ok,

⁴³ 'Thā 'ūn nūn, tu' pakut, yā 'ūn yōg hāmpakut'ax, ha yāy hep 'āta xupep, ha hām yāxatamuk xohix te 12 hā' pakut, 'Thā 'ūn te notot xop xohix tu' kax, pu tu hittupmā', ha 'ūn te tayūmak xohix hā pago, tu' hitop popmāhā notot xop pu', pāyā hittup 'ohnāg,

⁴⁴ hu Yeyox pe' mōg, tu' yōg topixxax 'āpit, tu' hittup,

⁴⁵ ha Yeyox te:

—'Ū 'üm tek 'āpit? Kaxīy.

Ha tikmū'ūn xohix te:

—'Ūntu. 'Ākmūn'ah. Kaxīy.

Ha Pet te:

—Yāyā', tikmū'ūn xohix te 'āyīmap pip, tu 'āmūg ka'ok. Kaxīy.

⁴⁶ Pa Yeyox te:

—Tikmū'ūn 'ūm nōm tek 'āpit, 'a' yūmmūg. Topa tek ka'ogāhā' 'ū hittupmā', ha tikmū'ūn 'ūm nōm tek 'āpit xe'e', 'ūyīy hittupmā'. Kaxīy.

⁴⁷ 'Ap 'ūn te yāy xaptop yūmmūg'ah, hu' nūn, tu kuxānōg, tu yāy nuhuk, tu' kopaxux ha' nāhā' Yeyox keppah, tu hām'āktux, tu Yeyox xax 'āpit 'āktux, ha tikmū'ūn xohix te' xupak.

⁴⁸ Ha Yeyox te:

—Nixix, 'ākuxa yūm ka'ok 'ūgkopah, yīy Topa te 'āhittupmāhā', Mōg 'āpet hah, 'Thā 'ākuxa yūm. Kaxīy.

⁴⁹ Tu hām'āktux 'Thā tik nūn, yā Yax yōg kāmānat, tu nōm pu hām'āktux, hu:

—Yax, 'āk-tok hex yā' xok. 'Ūtux hok pu Notot put pu mōg, mō'kutnā' pu yāy xip'ax tu xihīp. Kaxīy.

⁵⁰ Ha Yeyox te' xupak, tu Yax pu hām'āktux, hu:

—'Ākuxānōg hok, 'ākuxa yūm ka'ok, ha Topa te 'āk-tok hittupmāp-tup hok'ah. Kaxīy.

⁵¹ Tu' mōg tu mōktu Yax pet tu' xupep, ha tikmū'ūn mōxaha kamah, ha Yeyox te' tux hok pu tikmū'ūn mōxakux hok, tu Pet yīmōgatux, xix Tiak, xix Yoām, pu yāy mütik mōg, ha' mōxakux Yeyox mütik, xix kaxxop hex mūg tak xi' mūg tut mōxakux.

⁵² Pa tikmū'ūn nōy 'ap mōxakux'ah, tu hāptopa' pip, tu kaxxop hex hā' potaha', ha Yeyox te:

—'Āpota hok. Kaxxop hex 'ap xok xe'e'ah, yā mō'yōn. Kaxīy.

⁵³ Ha tikmū'ūn yīxix kummuk, tu Yeyox 'āktux kummuk, tu:

—Yā' xok xe'e'! 'Ūgmū'āte' yūmmūg! Kaxīy.

⁵⁴ Pa Yeyox mōg, tu kaxxop yīm mūg, tu' yīy ka'ok, tu:

—Nixix, 'āyok nūy 'āknīhā xihip! Kaxīy.

⁵⁵ Ha' put pu hi', tu' yok, tuknīhā'xip, ha' xat, pu xit'ax hōm kaxxop pu', puyīy mā'.

⁵⁶ Ha' tak xi' tut kuxānōg, tu' tu' kuxa hitup, pa Yeyox te:

—Tikmū'ūn 'ūm pu' xuktux hok! Kaxīy.

9

Yeyox te tik te 12 mō'pok

¹ Yeyox te yāy yōg tik xop te 12 xānāhā', tu yāy 'āxet'ax hōm pu yāmīy kummuk xohix xit tikmū'ūn kopah, nūy tu tikmū'ūn pakut xop hittupmā',

² Ha' xat, pu Topa yāy yōg tikmū'ūn xat 'āktux, xi' xat, pu 'yīpkox pip 'āktux, xi' xat pu tikmū'ūn pakut xop hittupmā',

³ tu:

—'Āhok mōg, tu hāpxop 'ūm ta hok, xi' kup hā tu 'āmōg hok, xi' tut ta hok, xix topixxax nōy ta hok.

⁴ Ha tikmū'ūn te: "Ūkpet kopa 'āxip'ax," kaxīy, 'āpu xihip ka'ok, tu' nīm hok, 'īhā kōmēn kopa 'āti'.

⁵ Pa tikmū'ūn te: "Mōg, mōg," kaxīy, 'āpu mōg mō'ka'ok, tu nōm tikmū'ūn nīm, tu hāpkōnōn 'āpata ha' xit, nūy tikmū'ūn kummuk 'āktux. Ta tu' kux. Kaxīy.

⁶ Tu mō'pok, ha' mōg, tu hāpkumep, tu' xip tu xexka xohix kotit kopa' mōg, tu hām'āpak max 'āktux, hu Topa te tikmū'ūn xat 'ātux, ha yīpkox pip 'āktux, tu kōmēn yōg pakut xop hittupmāhā',

⁷ tu hāpxopmā ka'ok.

'īhā tikmū'ūn nōy te Ganinet yōg gohenanok pu Yeyox 'āktux, tu' yōg hāpxopmā'ax 'āktux, ha gohenenaok 'āxet'ax 'Enot, tu:

—Pi'ya nō'ōm? Kaxīy.

Ha tikmū'ūn yāg te Yōam putpu hi 'āktux, nōm tep-tox pix,

⁸ ha' yāg te:

—Mōnāyox hittap 'Enit te put pu hi 'āktux.

Yā' xohix te hāmpē'paxex, hu: "Ū 'ūm nōm Yeyox?" Kaxīy.

⁹ Yīy 'Enot te:

—'Āte' xat pu mōy Yoām putox xak, pu tu xok, hap-tex, pa 'ū 'ūm nō'ōm, tu hāpxopmā ka'ok? Kaxīy.

Tu' xak, nūy Yeyox pēnā'.

Yeyox te tikmū'ūn xohix xexka xīnnāhā'

¹⁰ Ha Yeyox yāy yōg mō'pok xop nūn, tu putpu' nūn, tu nūktu hām'āktux Yeyox pu', tu hāpxopmā ka'ok 'āktux, ha Yeyox te tik xop te 12 mōgāhā', 'ap nōy mōgā'ah, tu' mōg tu mōktu kōmēn kutōgnāg Metxax tu' mōxaha',

¹¹ pa tikmū'ūn te' yūmmūg, tu' pe' mōg, ha Yeyox kuxa hittup, tu:

—'Ok 'āxop nūn? Kaxīy.

Tu hām'yūmmūgāhā', hu:

—Topa te yāy yōg tikmū'ūn xat. Kaxīy.

Tu' pakut xop hittupmāhā'.

¹² Ha 'āmnīy, yīy mō'pok xop te 12 te:

—Putup te' kix tikmū'ūn, 'āpu mō'pok pu mōg putpu', nūy xip tu xexka kopa hāpxop pop, nūy mīptut 'ūm kopa nū'xok, nūnte hām panip hah. Kaxīy.

¹³ Pa Yeyox te:

—'Āpu, 'ūxīnnā', puyīy tu hi ka'ok. Kaxīy. Ha:

—'Ūxit'ax 'ūm? 'Ap xip'ah. 'Ūgmū'āte pām xohix te 5 pip, xix mām tix mām, ha tikmū'ūn xohix xexka punethok. Pi'yā' mōg putup, nūy pām xohix pop, nūy tikmū'ūn pu popmā', nūy tu' xīnnā'? 'Ap kōmēn xexka yūm'ah. Kaxīy.

¹⁴ Ha tikmū'ūn yōg tik xop xohix te 5.000, ha Yeyox te yāy yōg mō'pok xop xat, pu tikmū'ūn hām tu mō'xip, ha' yāg puxet te 50 mō'xip, xi' nōy te 50 mō'xip, tu mōktu xohix.

¹⁵ Ha mō'pok xop yīpkox pip, ha tikmū'ūn xohix te hām tu' mām,

¹⁶ ha Yeyox te pām xohix te 5 pop, xix mām 2, tu pexkox ha' pēnāhā', tu Topa 'āktux max, hu:

—Topa 'āmax. Xatek mūg hāpxop max xohix popmāhā'. Puxi'. Kaxīy.

Tu yāy yōg mō'pok xop pu pām koxip, tu xe' koxip, tu nōg nōy nā' mōg tu mōktu xohix, nūy tikmū'ūn xohix xīnnā',

¹⁷ ha' xohix te' māhā', tu' hi ka'ok, pāyā pām pip punethok, ha tikmū'ūn xit tap 'īhā tik xop te pām pop, tu manax kopa' xex, ha manax te 12 nū'xip pām hah, xix mām hah.

Pet te' Yeyox yā Kunnix 'āktux

¹⁸ 'Āmnīy nōy 'īhā Yeyox puxehnāg xip, tu Topa pu hām'āktux, ha yāy yōg mō'pok xop nūn, tu Yeyox yīkāgnāg hā' pip, ha Yeyox te:

—Tikmū'ūn te putep 'āktux 'ā'? Kaxīy.

¹⁹ Ha tik xop te:

—'Ūyāg te 'āmūn yā Yoām 'āktux, nōm tep-tox pix, ha' yāg nōy te 'āmūn yā 'Enit 'āktux, hōmā nō'ōm 'Enit te Topa pupi hām'āktux, ha' yāg nōy te: "Yeyox yā tik hittap nōy, tu Topa pupi hām'āktux, yā putpu hi nōmhā." Kaxīy.

²⁰ Ha:

—Xix 'āxop? Putep 'āmpē'āpanōm? 'Ok pek mūn? Kaxīy.

Ha Pet te:

—'Āmūn yā Kunnix, Topa te xa yāyikutnāhā'. Kaxīy.

Yeyox te' xok'ax 'äktux, xi' putpu' hi'ax 'äktux

²¹ Ha Yeyox te:

—Näy, häm'äktux hok tikmü'ün nöy pu'.
Kaxiý.

²² Tu xe häm'äktux, hu:

—Ügmün yä Tikmü'ün Kutok, tuk xüy xexkap-tup, ha Yoneo xexka xop tek mün putup nög, xix 'ämānex xexka xop, xix hämyümmüg xop tek mün putup nög, tuk putex putup, ha 'ämniý tikoyuk nög, 'Thā put puk hip-tup. Kaxiý.

²³ Tu häpxip kutögnäg 'Thā xe häm'äktux, tu' xohix pu häm'äktux, hu:

—Tikmü'ün tek mün mütik häpkumep putup, puxix yäy pe'paxexk-tögnäg, tu möktu yäy putup ax xaxok, nüy 'ämniý xohix hä' yäy yög mīpkupnix tat, nüy xüy, nüy 'ügmün putuk xüy, tuk mün mütik häpkumep xe'ëgnäg.

²⁴ Ha tikmü'ün te yäy xaxok hok, puxix tu' hi xe'e 'ohnäg, pa tikmü'ün xok 'ügmün hah, puxix tu hip-tup mö kuma' mög, tu' hi kux 'ohnäg.

²⁵ Teptu häpxexka yög häpxop xohix pop, päyā' xok? 'Üp-texop xexkah, tu' xok, tu häpxop xohix xaxok, 'üxok tu', puxix yā' hok xe'ëgnäg.

²⁶ Tikmü'ün tek mün hä yäyhähup, xix yögnü häm'äktux hä yäyhähup, 'ünöy xop pu yäyhähup, hu: "Akmün Yeyox yög'ah", kaxiý, koxix 'äte nöm tikmü'ün hä yäyhähup 'üyānān tu'. 'Ätak Topa pu 'äte nöm xop hä yäyhähup, 'Thā nün, hu: "'öhöm 'ā' yög'ah," kaxiý, 'Thā xexka xe'ëgnäg nün, 'Ätak Topa putuk, xix pexkox yög nü'pok xop putuk.

²⁷ 'Äte xa häpxe'e 'äktux: 'Äxop 'äyäg xok putup hok, tu möktu Topa te yäy yög tikmü'ün xat xe'ëgnäg. Ta tu' kux. Kaxiý.

Yeyox xix Mōyeyx xix 'Enit

²⁸ Ha 'ämniý te 8 nög, 'Thā Yeyox te Pet mögāhā', xix Tiak, xix Yoām, ha yīktix tu mö'kānīn ha' mög tu pūnānep, nüy Topa pu häm'äktux.

²⁹ Yeyox te häm'äktux 'Thā' pa yānām putuk, ha topixxax tūmnäg, tu kuyānān putuk.

³⁰ Häpxip 'ohnäg 'Thā tik 2 tihi', tu Yeyox pu häm'äktux hä' nöy yānān, tik puxet 'äxel'ax Mōyeyx, ha' nöy 'äxel'ax 'Enit, yā Yoneo yög tikmü'ün hä mönāyxop hittap, hōmā Topa te' mögāhā' pexkox tu', nüy tihi' hämyāxatamuk xohix hä,

³¹ ha Topa yög yānām xe'ëgnäg te pexkox tu' xakot, ha tik 2 te Yeyox xok'ax 'äktux, tu' xok putup kōmēn Yenyonēn kopa 'äktux, tu Topa tep-tup kaxiý 'äktux,

³² 'Thā Pet xi' nöy xop mö'yōn ka'ok, tu yäy koxak, tu Yeyox xexka xe'ëgnäg pēnāhā', tu tik 2 xexka xe'ëgnäg pēnāhā',

³³ ha tik hittap 2 mög putup, 'Thā Pet te:

—Yāyā', yā' max nūntek mūg pip. 'Äpu, yūmū mīptut kumex tikoyuk mūy, yāpzet 'ā pu', xix nöy Mōyeyx pu', xix' nöy 'Enit pu'. Kaxiý.

Pāyā hämyümmüg 'ohnäg.

³⁴ Tu häm'äktux, 'Thā hämgöy xexka nün, tu tik 2 xaxogāhā', tu mö'nīy, ha tik xop kuxānög, 'Thā hämgöy kopa' xip, hämpēnā 'ohnäg hah,

³⁵ ha Topa yīy, tute hämgöy xexka kopa häm'äktux, hu:

—Nūhū 'ügkutok pit xe'ëgnäg. 'Äte nöm yäykutnāhā'. 'Üxupax!. Kaxiý.

³⁶ Tu häm'äktux kux, ha Yeyox puxehnäg xip, ha yäy yög mütik häpkumep xop yīy 'ohnäg, 'ap häm'äktux'ah, tu häpxopmā 'üm pēnā'ax 'äktux 'ohnäg 'ünöy xop pu nōmhā.

Yeyox te kakxop pit hittupmāhā'

³⁷ Häptup 'Thā yīktix tu 'üyīxohoh, ha tikmü'ün xohix punethok pip, tu Yeyox hip,

³⁸ ha tik xip, tu' yīy ka'ok tu:

—Notot, mā'! 'Ügkutok pit puxehnäg pakut.

³⁹ Yāmīy kummuk te' pakutnāhā', ha' yīy ka'ok, tu häm tu' nāhā', tu yäy pu xu'ux, ha yīkonnope te yīkox tu' xupep, 'üyīy xax tu' xupep. Yā yāmīy te' xüygāhā', tu' nīm 'ohnäg.

⁴⁰ 'Äte 'ög tik te 'ämütik häpkumep xop tu' xak, tu nöm xop tu' xak, pu yāmīy xit pu mög, päyā 'ap xit yūmmüg'ah. Kaxiý.

⁴¹ Ha Yeyox te:

—Tikmü'ün kuxa mām 'ohnäg, tu' kummuk 'ämniý xohix hä, 'äte 'äxop nōā'tot. Häm 'üm hä' kux'ax? Kaxiý.

Tu' tak pu häm'äktux, hu:

—'Äk-tok putnū'. Kaxiý.

⁴² Ha' putnūn, 'Thā yāmīy kummuk 'ükopa nuhukgāhā', tu häm tu' putkox, ha Yeyox te yāmīy xat pu mög, yī' mög, ha kakxop hittup, ha Yeyox te' tak ha' mögāhā'.

⁴³ Ha tikmü'ün xohix kuxānög, Topa mün xe'ëgnäg ka'ok hah, tu' yēy,

Yeyox te' xok'ax 'äktux 'üxeheh

Tikmü'ün kuxa te' yēy, 'Thā Yeyox te yäy yög mütik häpkumep xop pu häm'äktux, hu:

⁴⁴ —'Üg'āpax, 'üxaxok hok! 'Äte xa häpxe'e 'äktux: 'Ügmün yā Tikmü'ün Kutok, ha tik puxet te gāy xop mögāp-tup 'üghah, 'ükoit'ax häk mögāp-tup, pu tuk putex. Kaxiý.

⁴⁵ Ha' xupak, päyā nöm häm'äktux ka'ok, yīy tik xop kuxa yūm 'ohnäg, hu' yūmmüg'ah, 'ap yīkopit putup'ah.

Ü'üm xexkah?

⁴⁶ Tik xop te yäy mütik häm'äktux hä' nöy yānān, nüy pi'yā tik yäy xexka yūmmüg, nüy pi'yāk-tögnäg yūmmüg, hu: —'Ügmün yāk xexkah, kaxiý, ha' nöy te: —'Ap 'üxexka'ah, yāk-tögnäg, päyā' nöy yā' xexkah. Kaxiý.

⁴⁷ Ha Yeyox te' yūmmūg, ha kaxxop te' yīka' xip, yī' put,

⁴⁸ tu:

—Tikmū'ūn tek putup, ha 'āte kaxxop putup, nōm yīpkox pip, puxix nōm tikmū'ūn yā kaxxop putup kamah. Tikmū'ūn tek putup, puxix 'Ātak Topa putup kamah, nōm te nūgkutnāhā'. 'Ūk-tōgnāg xop yīpkox pip, nōm xop te yāyhāp-tup xexkah xop, 'āxop mūtik. Kaxīy.

Tikmū'ūn te 'āxop tukmīy hok, puxix 'āxop mūtik tu hāpxopmā'

⁴⁹ Ha Yoām te:

—Yāyā', 'ūgmū'āte tik pēnāhā', tu yāmīy kummuk xit, tu xa' xuktux, tu 'āxuxet'ax 'āktux hā' xut, hak mū'āte' tux hok pu mīy hok, hamūn tek mūk mūtik hāpxopmā' ohnāg hah. Kaxīy.

⁵⁰ Ha Yeyox te hām'āktux Yoām pu', xix yāy yōg mūtik hāpkumep xop pu hām'āktux, hu:

—'Ūtux hok pu mīy. Tik te 'āxop mūtik yāy tu yānān hok, puxix tu 'āmūtik hāpxopmā'. Kaxīy.

Xāmānit yōg tikmū'ūn te Yeyox putup nōg

⁵¹ Hāpxip kutōgnāg 'īhā 'ūxexka xop te Yeyox putex putup, yā' xok'ax hūmnāg, ha' yūmmūg, hu kōmēn Yenoyanēn ha' mōg putup,

⁵² tu tik xop mō'pok hāmāxap, ha' mōg, tu mōktu hāpxexka Xāmānit tu' mōxaha', nūy pip'ax xax, tu' mōg, nūy 'āmuk xax,

⁵³ pāyā hāpxexka yōg tikmū'ūn tep-tup nōg, tu kōmēn Yenoyanēn ha' mōg pēnāhā', hup-tup nōg.

⁵⁴ Ha Tiak xix Yoām gāy, tu:

—'Ok xatep-tup 'ūgmū'āte' xat, pu kuxap pexkox tu nū'yōn, nūy tikmū'ūn kummuk kix? Kaxīy.

⁵⁵ Pa Yeyox te' mānōg, tu' yokānām,

⁵⁶ tu' kep ha' mōg, tu xip tu xexka, nōy ha' mōg, ha yāy mūtik hāpkumep xop mōg kamah.

Tikmū'ūn te Yeyox pe' mōg putup

⁵⁷ Tu' mōg, 'īhā tik te Yeyox pu hām'āktux hu:

—'Āte 'āmūtik hāpkumep putup, yā' hām 'ūm tu 'āmōg'ax 'ūgmōg kamah. Kaxīy.

⁵⁸ Ha Yeyox te:

Kokexmax hex pet, xix putuxnāg xohix pet, pak mūn yā Tikmū'ūn Kutok, 'āk pet 'ūm pip'ah 'ū kopak pihi'. Kaxīy.

⁵⁹ Tu tik nōy xānāhā', hu:

—'Ūgmūtik hāpkumep, kaxīy.

Pa' nōy te:

—Nāy. Yāy pet hak mōg tap nūy 'ātak nō hāpkot, nūy 'āmūtik hāpkumep kūnāy tu'. Kaxīy.

⁶⁰ Ha:

—Pūyā xakix xop 'ūnōy xop nō hāpkot, pa nū', nūy 'ūgmūtik hāpkumep, nūy Topa yāy yōg tikmū'ūn xat 'āktux. Kaxīy.

⁶¹ Ha tik nōy te:

—'Ūgmōg 'āpehe, pak tux hok 'ū xape xop pu 'āno, nūy hāpkumep'ax 'āktux. Kaxīy.

⁶² Ha:

—Tik hām, tu ta' taxutnak nīm, nūy hām kumāgnāg mōg, puxix Topa nōm xe homip xat putup 'ohnāg. Kaxīy.

10

Yeyox te tik te 72 mō'pok

¹ Hāpxip kutōgnāg 'īhā Yeyox te tikmū'ūn pēnāhā', tu tik nōy yīmōgātux, ha tik xohix te 72 yīmōgātux, tu tik 2 mō'pok, xix tik 2 nōy mō'pok, xix tik 2 nōy gā hu mō'pok, tu mōktu xohix, nūy 'ūkeppa' mōg kōmēn xohix hah, xix xip'ax xohix hah,

² 'īhā' xat, hu:

—Hāpxop xohix ta', xix yīmpa', pa kāmānat pip'ah pu hāpxop nūnnā'. 'Āpu, Topa tu' xax, pu tikmū'ūn nū'pok, pu hāpxop nūnnā'. 'Āpu, Topa tu' xax, pu tikmū'ūn nū'pok, pu hām'āpak max 'āktux.

³ Mōg. 'Āxop yā' gāy hok xop, kahnēn putuk, ha 'āte mō'āpok hāmāgāy xop kopah, nōm gāy xop te kokex gāy putuk.

⁴ Tāyūmak paxmōg hok, xix tuhut, xix pataxax tat hok. Putat kopa' hip hok, nūy hām'āktux hā' nōy yānān.

⁵ Mīptut 'ūm tu 'āmōxap-tup, hu ta hām'āktux hāmāxap, hu: "Pūyā' kuxa mām nū mīptut kopah," kaxīy, tuknāy tu' mōxa'ax.

⁶ Tikmū'ūn max te mīptut kopa tihi', puxi' kuxa mām, pa tikmū'ūn kummuk tihi', puxi' kuxa mām 'ohnāg, pa 'ākuxa mām pax putup.

⁷ —Mīptut kopa' nox pihi', hu ta' mōg hok mīptut nōy tu', pāyā pi', nūy' xit, nūy xo'op. Mīptut yōg tikmū'ūn te 'āp-tup, pu pihi', hu ta pi'. Yā' max tikmū'ūn hām punethok, tu' xit max kamah.

⁸ Tikmū'ūn te 'āp-tup, tu xa' hōm xit'ax, 'āpu, 'ūpa', nūy mā', 'īhā kōmēn tu' pip.

⁹ Kōmēn yōg pakut xop hittupmā', tu hām'āktux, hu: "Hōnhā Topa te 'āxop xat nūnte'. 'Āpu 'āyīpkox pi'," kaxīy.

¹⁰ —Pa kōmēn tu mōxaha, ha nōm tikmū'ūn te 'āp-tup nōg, 'āpu kōmēn kotit hā mōg, nūy hām'āktux, hu:

¹¹ "Ap max'ah kōmēn, tu Topa yōg hām'āktux putup nōg, yīy kōmēn yōg hāpkōnōn tek mūk pata tu' mōy, nūy Topa gāy 'āktux. Pāyā' xaxok hok. Hōnhā Topa te 'āxop xat nūnte, ha 'āxop tep-tup nōg, tu yīpkox 'ohnāg." Kaxīy.

Tu xe hām'āktux, hu:

¹² —'Āte xa hāpxe'e 'āktux: Hāptup xe'e mō'nāp-tup, 'īhā Topa te kōmēn kummuk yōg tikmū'ūn kopit putup, tu' kummukgāp-tup 'ūyānān tu', tu kōmēn kummuk yōg tikmū'ūn

kuxa kak-tõgnäg, ha kõmēn hittap Xonõm yõg tikmũ'ün kuxa ka xexka putup. Kaxiy.

Kõmēn xexka yõg tikmũ'ün kuxa mām'ohnäg

¹³ Tu xe:

–Kõmēn Konāy yõg tikmũ'ün xũy putup, xix kõmēn Metxax yõg tikmũ'ün xũy kamah. Topa te hāpɣopmā xe'ēgnäg kõmēn kopah, pāyā hāpkummuk hā yāyhāhup 'ohnäg, hu hāpkummuk mĩy pax. Paxpu Topa hāpɣopmā xe'ēgnäg kõmēn hittap Tinok yõg tikmũ'ün keppah, xix kõmēn hittap Xinõm yõg tikmũ'ün keppah, puxix yāyhāhup xexkah, nũy tu kummuk mĩy kux, tu xagok hā mō'tat'ax, tu putok hā yāy mō'nĩy, pu tikmũ'ün xohix yā yāyhāhup pēnā'.

¹⁴ Hāptup mō'nāp-tup 'hā Topa te hāpɣopmā'ax xohix kopit putup, tu kõmēn Metxax yõg tikmũ'ün kuxa kak-tõgnäg, xix kõmēn Konay yõg tikmũ'ün kuxa kak-tõgnäg, pāyā kõmēn Tinok yõg tikmũ'ün kuxa ka xexkah, xix kõmēn Xinõm yõg tikmũ'ün kuxa ka xexkah.

¹⁵ Ha kõmēn Kapānān yõg tikmũ'ün kummuk te pexkox ha' mōg putup, pāyā yāyhāhup 'ohnäg, nũy tu kummuk mĩy kux, yiy Topa te mō'pok putup Hāmgāyāgnäg pet hah. Kaxiy.

¹⁶ Tu yāy yõg mütik hāpkumep xop pu hām'āktux, hu:

–Tikmũ'ün te 'õg hām'āktux 'āpak, tu' yīpkox pīp, puxik mūn pu yīpkox pīp kamah, yāy putuk yīnmūn. Tikmũ'ün te 'āp-tup nōg, puxik mūn putup nōg kamah. Tikmũ'ün tek mūn putup nōg, puxix Topap-tup nōg kamah, nōm tek mūn nūgkutrnhā'. Ta tu' kux. Kaxiy.

Tik te 72 nūn putpu'

¹⁷ 'Āmĩy 'üm 'hā tik xop put pu' nūn nām, tik xop te 72 nūn, tu' kuxa hittup xexkah, tu:

–Yāyā'! Xate 'āxuxet'ax 'ā' hōm, 'üyiy yāmĩy kummuk xop xit, hak mūk'āte' xit, pu mōg xupaha'! Kaxiy.

¹⁸ Ha Yeyox te:

–Hamūn. 'Āte Hāmgāyāgnäg pēnāhā'. Tex yānām te hām tu' xakot mō'ka'ok, hā kaxiy Hāmgāyāgnäg te pexkox tu' nāhā', tex yānām putuk.

¹⁹ 'Ūg'āpax, 'āte yāy 'āxet'ax xa' hōm, xa nō kāyā gāy tonnok, nũy tup-tex, xi' xok pata kuhmĩy tonnok nũy tup-tex, nũy Hāmgāyāgnäg yõg hāpɣopmā'ax kuxyā', pu 'āxūyā' hok,

²⁰ pa 'ākuxa hittup hok, 'āxop ka'ok tu'. 'Āmhok. Topa te 'āxuxet'ax mō'kupix pexkox kopah, yā' xip'ax max xa' popmāhā' pexkox tu', pu 'āhittup. Kaxiy.

Yeyox kuxa hittup xexkah

²¹ Hāpɣip 'ohnäg 'hā Topa Koxuk te Yeyox kuxa hittupmāhā', ha Topa pu hām'āktux, hu:

–'Ātak, 'āmūn yā pexkox hā 'āxuxyā', xix hām xexka hā 'āxuxyā'. 'Āmax, xate tikmũ'ün 'ūk-tõgnäg xop pu hāmyūmmūgāhā', tu tikmũ'ün xexka xop pu' xaptop, puyiy tu yūmmūg hok. Hamūn. Kaxiy xatep-tup. Kaxiy.

²² Tu xe:

–Yõg 'Ātak te 'ā' popmāhā hāpɣop xohix, 'ū puxehnäg 'ātak yūmmūg, xix tik xop 'āte hāmyūmmūgā xop te 'Ātak Topa yūmmūg. Kaxiy.

²³ Tu yāy yõg xop xānāhā', nũy tup-xehnäg pu hām'āktux, hu:

–'Ākuxa hittup, hāpɣopmā pēnā nũy, ha tikmũ'ün kuxa hittup te nōm pēnāhā kamah.

²⁴ 'Āte xa hāpɣe'le 'āktux: Hōmā, hāmyāxatamuk xohix 'hā tik te Topa pupi hām'āktux, nũy tikmũ'ün pu' xuktux, tu nōm hāpɣopmā'ax xe'ēgnäg xak, nũy pēnā', ha' xat'ax xop hittap te' pēnāp-tup kamah, pāyā' pēnā'ah, tu hām'āktux 'āpak putup, pāyā' xupak'ah, ha 'āxop te' xupak nōmhā. Kaxiy.

Xāmānit yõg tik max

²⁵ Tik te hāmyūmmūg xip, tu Yeyox yīkopit putup, tu ta' nūn, nũy Yeyox yīkopit, tu:

–Notot, 'ātep-tep mūn mĩy'ax nũy Topa mütik 'ūghi xe'ēgnäg mōg kumak mōg, ha' kux 'ohnäg? Kaxiy.

²⁶ Ha:

–Tep-te 'ümāgāhā Topa yõg tappet hā? Topa tep-tep xat xa? 'Ok xate' yūmmūg? Kaxiy.

²⁷ Ha tik te:

–Yamūn. Topa tappet te Topap-tup pax xat hāmāxap, tu tikmũ'ün te Topap-tup pax xat, tu' kuxa hāp-tup pax xat, tup-tup pax ka'ok xat, tup-tox hāp-tup pax xat, tu yā' nōy putup pax xat, yāy putup pax putuk. Kaxiy.

²⁸ Ha:

–Yamūn. 'Āpu mĩy, tu hip-tup 'ap nōg'ah Topa mütik. Kaxiy.

²⁹ Ha' nōy te yāy pe'paxex max, hu:

–'Ū 'üm tek mūn hāk nōy? Kaxiy.

³⁰ Ha Yeyox te hām'āktux hā hāmyūmmūgāhā', nũy Topa yõg hāpɣopmā'ax yūmmūgā', nũy 'ūnōy pu hāmmaxnā'ax 'āktux, hu:

–Kõmēn Yenoyanēn te yīktix yīmũ' yūm, ha ta Yoneo yõg tik te kõmēn tu kekpa' mōg, tu kõmēn Yenikot ha' mōg putup, 'hā tik kummuk xop te' mūg, tu' yõg topixxax hā' xupxet, tu' kix kakixnäg, tu' nīm, ha' xok putūmmnäg.

³¹ Ha 'āmānex puxet tep-tat hā' nūn, tu Yenikot ha' mōg, tu tik pēnāhā', pāyā nōā'yēn, tu' mōg.

³² ha Nemix xop yõg tik kama' nūn, tu tu' pēnāhā', tu nōā'yēn, tu' mōg.

³³ Pa hāpxexka Xāmānit yōg puknōg te putat hā' nūn, tu nūktu xupep, tu tik pēnāhā', tu tik kayax punethok ha' kuxa ka',

³⁴ tu hūmnāg tu' xip, tu heptox hā kayax ku'uk, tu topixxax ponnok hā' kīy, tu kāmānok yīmū tu yāy keppa' yūm, tu' mōg, tu mōktu pip'ax tu' xupep, tu' āmuk ha' mōg, nūy ti ka'ok, tu tik pakut pēnāmax.

³⁵ Hāptup nōy 'ihā' puknōg te' pip'ax tu tu pagok, tu tayūmak hōm, tu: "Ūpēnā max, xa tik hāpxop xex, nūy ta' xīnnā'. Putpuk nūn putup, tu xa' hōm'ax tayūmak nōy." Ta tu' kux. Kaxīy.

³⁶ Tu tik te hāmyūmmūg pu' yīkopit, hu:

—Putep 'āpe'āpaxex? 'Ū 'ūm te tik hā' xape', nōm hāpxupxet xop te' kix kakixnāg? Kaxīy.

³⁷ Ha:

—Tik puknōg te nōm tik kuxa ka', hu' nōy hā' xape'. Kaxīy.

Ha:

—Hamūn. Mōg, nūy kaxīy 'ānōy pu hāpxopmā'. Kaxīy.

Yeyox te Mā'at xix Mānix pet ha' mōg

³⁸ Yeyox mōg, tu ta' mōg, xix yāy yōg mūtik hāpkumep xop, tu ta' mōg, tu mōktu xip tu xexka tu' mōxaha', ha 'ūn xip, 'ūxuxet'ax Mā'at, tu' xānāhā', pu nū', ha' nūn, tu ta tu' pip,

³⁹ ha 'ūn tutnōy 'āxet'ax Mānix, tu Yeyox nūktu keppa' yūm, nūy yōg hām'āktux 'āpak,

⁴⁰ 'ihā Mā'at te 'āmuk xexka, tup-xehnāg te 'āmuk, tu hāpxop kutet, hu Yeyox yīkagnāg ha' nūn, tu:

—Yāyā', putep 'āpe'āpaxex: 'ok max yāk puxet te 'āmuk? 'Āpu, 'ūktutnōy xat, pu nū', nūy hāk tehet. Kaxīy.

⁴¹ Ha Yeyox te:

—Mā'at, Mā'at 'āyāyuxop punethok,

⁴² pa hāpxop puxet 'ūmax, ha 'ātutnōy te nōm hāpxop max xe'ēgnāg yāykutnāhā', tu Topa yōg hām'āktux 'āpak hāmāxap, ha tik 'ūm te' kuxa kopa' xut 'ohnāg. Kaxīy.

11

Yeyox te Topa pu hām'āktux'ax yūmmūgāhā'

¹ 'Āmnīy puxet 'ihā Yeyox xip, tu yāy yōg xop mūtik 'āti', tu Topa pu hām'āktux, ha' yōg tik puxet te:

—Yāyā', 'ūgmūk yūmmūgā kamah, 'ūyīy Topa pu hām'āktux. Hōmā Yoām te yāy yōg tik xop yūmmūgāhā'. Kaxīy.

² Ha Yeyox te:

—'Āpu Topa pu hām'āktux kaxīy, hu:

“Ātak,

pūyā tikmū'ūn xohix kuxa' yēy 'ākeppa, nūy 'āmax xe'ēgnāg 'āktux.

Pūyā hāpxexka xohix yōg tikmū'ūn 'ōg xat'ax pu' yīpkox pi'.

³ 'Āmnīy xohix 'ihāk mūk 'ā hāpxop 'ūm nū'kutnā, puyīy' mā',

⁴ hak mū yōg hāpkummuk mīy'ax xaxogā', pu tu kux. Tikmū'ūn nōy tek mū'ā kummugāhā', hak mū 'āte nōm mīy'ax xaxogāhā kamah,

tu xa tu' xak, xak mūg kopitnā hok. 'Ūkux." Kaxīy.

⁵ Tu xe hām'āktux, nūy Topa yōg hāpxopmā'ax yūmmūgā', nūy tikmū'ūn kuxa teknōg hok 'āktux, hu:

—'Āmnīy kote 'ihā 'āmōg'ax 'āxape pet hah, tu mōktu xupep, nūy ta tu' xak, hu: "Hāpxop hak nūn, 'ōgnū 'ihā tu' hōm,

⁶ 'ūkxape nūn, tu' xit pip 'ohnāg." Kaxīy.

⁷ —'Ok 'āxape te xa hām'āktux'ax kummuk? Hu: "Mōg, 'āpep, 'āmnīy koxtap hah, hak kutok tek mūn mūtik nōm, xa' xōn putup'ah 'āte', tu hāpxop xit'ax xa' hōm putup'ah." Kaxīy. 'Ok 'āxape te xa' xuktux'ax kaxīy? 'Āmhok.

⁸ —'Āte xa hāpxe'e 'āktux: 'Āxape yok putup hok, pāyā xate tu' xak, tu xe' xak, tu xe' xak, puxix 'āxape tu' yok'ax, tuknīha' xip, tu' pa'ax hāpxop nūy xa' hōm, 'āmōg xak tu'. Ta tu' kux.

⁹ Yā'āte xa hāpxe'e 'āktux, hu: 'Āpu Topa tu' xax, ha xa' hōm putup, 'ūxa' mōg, tu' xipihī'. Hāptopa tu xip, tu' xānā', puxix xa hāpxōn.

¹⁰ Tikmū'ūn xohix te tu' xak, tu' xipihī', ha mō'yinnīn'ax xōn putup, 'ihā tikmū'ūn 'ūm te hāptopa' xip tu' xānāhā'.

¹¹ 'Āk-tok 'ūm te xa tu' xak hu: 'Ām mām 'ūm hōm. Kaxīy. Xate nōm pu kāyā gāy hōm 'ohnāg 'ūyānān tu'. 'Āmhok.

¹² 'Āk-tok te xa tu' xak'ax puyīy xok xu'uk tu' hōm. Xate nōm pu' hōm xok pata kuhmīy 'ohnāg 'ūyānān tu'. 'Āmhok.

¹³ 'Āxop kummuk, tu hāpxopmā kummuk, pāyā 'āk-tok pu hāpxop max popmāhā', ha 'Ātak Topa te pexkox kopa' xip, tu' max xe'ēgnāg, tu xa yāy Koxuk nū'kutnāp-tup, nōm xop te ta tu' xak ha nū'kutnāp-tup, tikmū'ūn xop te 'Ātak Topa ta tu' kax, puyīy nū'kutnā'. Ta tu' kux. Kaxīy.

Yeyox xix Meyemo

¹⁴ Hāpxip kutōgnāg 'ihā Yeyox te yāmīy kummuk xit, tu yāmīy yīy hok xit pu mōg, tu' mōg, 'ihā tik te hām'āktux max, ha tikmū'ūn kuxa te' yēy.

¹⁵ Pa' yāg te:

—Meyemo te yāmīy xit, hu' yōg xat'ax, tu Yeyox xat pu yāmīy xit tikmū'ūn kopah, pu tu hittupmā'. Kaxīy.

¹⁶ Ha' yāg te' yīkopit putup, tu Yeyox tu' xak, hu:

—'Āpu, yī' mā' hāpxopmā ka'ok xe'ēgnāg, 'ūgmū'ā' pēnā, nūy 'ūgmū'ā yūmmūg, 'ūyīy Topa te 'āp-tup pax yūmmūg. Kaxīy.

17 Pa Yeyox te tikmũ'ün yõg hãmp'e'paxex yũmmũg, tu:

–Hãp'xexka yõg tikmũ'ün yãykix, puxi' nõg. 'Ûxape xop yãykix yã ymũtik, puxix hãpxummãnãm.

18 Pax pu Hãmgãyãgnãg yõg yãmiy yãykix, puxix 'ũnõg kamah. 'Ãxop tek mũn 'ãktux, tu Meyemo tek xat 'ãktux, 'ũ xit yãmiy kummuk.

19 Xate yã koit. 'Õgnẽ tik xop te yãmiy kummuk xit kamah. 'Û 'ũm te 'ãxop ka'õgãhã, xa mõy? 'Ap Hãmgãyãgnãg'ah. Topa te 'ãka'õgã hok'ah. Ha kaxiy 'ũxohix te 'ãxop te koit'ax yũmmũg.

20 Topa tek mũn ka'õgãhã 'ũ yãmiy xupepmã', ha kaxiy 'ũxohix te' yũmmũg, tu Topa ka'ok yũmmũg, tu yã yõg tikmũ'ün xat kamah yũmmũg, nũnte 'ãxop te' pãnãhã'.

21 –Tik ka'ok xup mĩkax xexkah, tu yãyhã pãnãhã' xip, ha' nũn 'ohnãg kummuk xop, nũy xupxet,

22 pa tik ka'ok xexka nũn, nõm ta tut, tu' nõy yãyhã toph, tu yã yõg, tu mĩkax xexka xut, 'ũxexka tu', tu' nõy yõg hãpxop xohix hã' xupxet, tu' pop, tu yã yõg tik xop pu' koxip.

23 –Tikmũ'ün tek mũn mũtik hãpxopmã hok, puxik mũtik yã tukmỹ. Tikmũ'ün tek mũn mõ'nĩnãm hok pu hãpxop nũnnã', puxix hãpxummãhã'. Kaxiy.

Yãmiy kummuk te put pu' nũn

24 Tu xe hãm'ãktux, hu:

–Yãmiy kummuk te tikmũ'ün kopa' xip, tu' mõg, nũy 'ũnĩm, tu hãmnak tu hãpkumep, tu' xip'ax nõy xak, nũy xihip. 'Ûxipihok, puxix yã pu hãm'ãktux, hu: Put puk mõg putup nõm tikmũ'ün hah, nũy xihip. Kaxiy.

25 Tu' nũn tu nõktu xupep, pa tik te yã kopa' xit, ha' max nõmhã,

26 yã yãmiy mõg, tu yã nõy xop te 7 xãnãhã' pu nũ mũtik nũn, ha yãmiy kummuk xe'e, tu tikmũ'ün ha' mõxaha', tu kopa' pip, ha tikmũ'ün kuxa te' yẽ. Hõmã 'ũkopa' xũy kutõgnãg, pãyã hõnhã' xũy xexkah. Ta tu' kux. Kaxiy.

Tikmũ'ün kuxa hittup xe'e'

27 Hãpxip kutõgnãg 'ĩhã tikmũ'ün xohix xexka pip, ha 'ũn xip kamah, tu' yĩy ka'ok, hu:

–'Ûn kuxa te 'ãput hittup, xix xa pu yã xo'õpmãhã', tu' kuxa hittup. Kaxiy.

28 Ha Yeyox te:

–Hamũn, pãyã hittup'ax xexka tikmũ'ün kuxa te Topa yõg hãm'ãktux 'ãpak, tu' yĩpkox pip. Kaxiy.

Tikmũ'ün te hãpxopmã ka'ok xe'ẽgnãg xak

29 Ha tikmũ'ün te yã tu nũ 'nãhã', tu Yeyox 'ũxakot ha' pip, tu' xak pu tikmũ'ün pu hãpxopmã ka'ok, puyiy' pãnã', nũy Topa tep-tup yũmmũg, yĩy Yeyox te:

–Hõnhã' pip tikmũ'ün kummuk, tu Topa tu' xak pu nõm pu hãpxopmã ka'ok xe'ẽgnãg, pãyã 'ap hãpxopmãp-tup'ah, ha mõnãyxop hittap Yõn yõg hãpxopmã ka'ok puxehñãg pãnãp-tup.

30 Hõmã Yõn te kõmẽn xexka Nĩn yõg tikmũ'ün pu hãm'ãktux, tu Topa ta tu' gãy 'ãktux. Yã hõnhã 'ũgmũn, Tikmũ'ün Kutok te tikmũ'ün pu hãm'ãktux nõmhã, tu Topa te ta tu' gãy 'ãktux kamah.

31 'Ãmnĩy mõ'nãp-tup 'ĩhã Topa te 'Iyaet yõg tikmũ'ün yõg hãpxopmã'ax kopit, tu' xũygãp-tup, ha 'ũn hittap te hãp'xexka Xamah yõg tikmũ'ün xat, tu hõnhã' pip tikmũ'ün kummuk 'ãktux'ax. Hõmã, yã hittap, tu' nũn, nũy Xanomãm yõg hãm'ãktux 'ãpak, ha 'Iyaet yõg tikmũ'ün xat, tu hãm'yũmmũg xexkah. Pãyã nũntek xip, tuk mũn hãm'yũmmũg yĩn koxuk xe'ẽgnãg.

32 'Ãmnĩy mõ'nãp-tup 'ĩhã Topa te hõnhã' pip tikmũ'ün yõg hãpxopmã'ax kopit, tu' xũygãp-tup, ha Nĩn yõg tikmũ'ün te hõnhã' pip tikmũ'ün kummuk 'ãktux'ax, yãyhãhup 'ohnãg hah. Hõmã Yõn te Topa pupi hãm'ãktux, nũy ta tikmũ'ün pu' xuktux, tu Topa te Nĩn yõg tikmũ'ün tu' gãy 'ãktux, ha nõm tikmũ'ün te yãyhãhup, tu hãpkummugã'ax kux, pa hõnhã' pip tikmũ'ün te yãyhãhup 'ohnãg, tu hãpkummuk mĩy pax, ha Yõn xexka kutõgnãg, yãk mũn xexka xe'ẽgnãg. Ta tu' kux. Kaxiy.

Yeyox te Topa yõg kũyãnãm 'ãktux

33 Tu xe hãm'ãktux, nũy Topa yõg hãpxopmã'ax yũmmũgã', hu:

–Tikmũ'ün te kũyãnãm tat'ax paha', tu mĩmpe yĩmũ' xix, nũy hãptupmã max, yĩy tikmũ'ün te mĩptut ha mõxakux, tu hãmpãnãm max, pa nax kopa' xuk 'ohnãg kũyãnãm tat'ax, ka mõ'nĩy. Yã kũyãnãm max te hãptupmãhã', ha tikmũ'ün xohix tep-tup pax.

34 'Ûpa te kũyãnãm putuk. 'Ûpa tup te' kuxa hittupmãhã', pãyã' pa ku'uk te' kuxa hittupmã 'ohnãg, tu yãyhã hãpkoxtap.

35 'Õg pa 'ãti', 'õg kũyãnãm tat'ax xaxok hok, ka yãyhã hãpkoxtap, kaxiy Topa yõg hãm'yũmmũg xaxok hok kamah, xayiy Topa yõg putat hã mõg kuma mõg.

36 Kũyãnãm te mĩptut kopa' xakot, tu hãptupmãhã', ha kaxiy 'ãte hãm'ãktux'ax hã xa hãm'yũmmũgãhã', pũyiy hãm'yũmmũg, nũy yõgnũ hãm'ãktux pu' yĩpkox pí', nũy 'ãkuxa tu hittup. 'Ûkux. Kaxiy.

Yeyox te' xexka xop pu hãm'ãktux

37 Tu hãm'ãktux kux, 'ĩhã Paniye xop yõg tik te' xãnãhã', pu' xit, ha ta' mõg tik pet hah, tu' xit,

38 ha Paniye yõg tik te:

–Pute 'ũm? Teptu 'ãxit, pãyã 'ap yã yĩm 'ũm pix'ah? Kaxiy.

³⁹ Ha:

—'Áte xa hāmyūmmūgāhā'. 'Āxop te kânēy xām pīx, xix kânēy xo'op'ax xām pīx, pa 'āxop kuxa kopa tupmā 'ohnāg, ha yāy 'īgā, yā 'ākopa kummuk xix yāy kix yāy tukmīy pax.

⁴⁰ 'Āp-tox kummuk xop, tu hāmyūmmūg 'ohnāg. Topa te 'ākuxa mīy xix 'āyīn xax mīy, pūyīy 'ākuxa tup, xix 'āxax, pu tu' max.

⁴¹ 'Āpu, 'ōg hāpxop hōm 'ūhok xop pu', nōm hāpxop xate kânēy kopa' xex, tu tu' hok hōm, nūy 'ākuxa tupmā'.

⁴² —'Ākuxānōg, 'āxop Paniye xop! Xate mīxux xuxpex te 100 pop, 'ūmā yīmū putup, tu Topa pu popmāhā te 10, pa xate hāmyok mīy'ax xaxok, xix Topap-tup pax xate' xaxok. Yā' max hāmmax xohix mīy, tu' xaxok 'ohnāg.

⁴³ —'Ākuxānōg 'āxop Paniye xop! 'Āxop te mīmpe yūm'ax max xak, Topa pet kopa tu' xup, tu' yūm, tup-tup pu tikmū'ūn 'āxānā', hu: Notot. Kaxīy. Nūy 'āxexka 'āktux kōmēn tu'.

⁴⁴ —'Ākuxānōg, 'āxop te xukpot putuk, ha tikmū'ūn te 'āyīmū hāpkumep, tu' xukpot pēnā'ah. 'Ūkux. Kaxīy.

⁴⁵ Ha hāmyūmmūg xop yōg tik te:

—Nāy, xatek mūg mānōg kamah! Kaxīy.

⁴⁶ Ha:

—'Ākuxānōg, 'āxop hāmyūmmūg xop! 'Āxop te tikmū'ūn xat, tu hāpxop putux tatnāhā', ha 'īm hā' tot 'ohnāg, pa 'āxop te nōm mō'nīynām 'ohnāg.

⁴⁷ 'Ākuxānōg! Hōmā tikmū'ūn hittap te Topa pupi hām'āktux, nūy tikmū'ūn pu' xuk-tux, ha 'ōg mōnāyxor hittap te' kix, ha 'āxop te nōm hām'āktux xop pu xukpot maxnāhā',

⁴⁸ pu tikmū'ūn xohix yūmmūg, yā 'āxop te 'ōg mōnāyxor kummuk putuk. Mōnāyxor te' kix, ha 'āxop te' yōg xukpot maxnāhā',

⁴⁹ yīy Topa te hāmyūmmūg, tu hām'āktux, hu: "Áte yāy pupi hām'āktux'ax xop mō'pok putup, pu tikmū'ūn pu hām'āktux, ha tikmū'ūn te' yāg kix putup, xi' yāg xūygāp-tup." Kaxīy.

⁵⁰ Yīy Topa te hōnhā' pip tikmū'ūn xūygāp-tup, 'ūyānān tu' xūygāp-tup, yā hāmyāxatamuk xohix xexka hā tikmū'ūn kummuk te Topa yōg tik xop kix.

⁵¹ Tikmū'ūn hittap te 'Ameo putex hām'āxap, yā 'Anāo kutok 'Ameo putex, tu Topa yōg xop xohix kix, tu mōktu Yakanit putex, nōm Topa pet kopa' xip, nūy nōm pu xokxop mō'hap nūy haxayā', pāyā tik kummuk te Topa pet kopap-tex. 'Áte xa hāpxe'e 'āktux, yā hōnhā Topa te tikmū'ūn xūygāp-tup, hāpkummuk xohix mīy ha' xūygāp-tup, nūy hāpkummugā'ax hā pago.

⁵² —'Ākuxānōg, 'āxop hāmyūmmūg xop! Topa te xa' hōm pipkup mō'hāmyīnnīn'ax, nūy hāmyūmmūg'ax xōn, pāyā 'āxop te

hāmyūmmūg 'ohnāg, tu' xat hok pu tikmū'ūn yūmmūgā hok kamah. 'Ūkux. Kaxīy.

⁵³ Tu' mōg, ha hāmyūmmūg xop xix Paniye xop gāy, tu Yeyox 'āktux kummuk, tu' xupmāhīy, tu' yīkopit,

⁵⁴ tu Yeyox yōg hām'āktux'ax hā' kopit, tu' xupak, pūyīy hām'āktux kummuk.

12

Yeyox te Mō'āmā'ax 'Āktux

¹ —'Ōg pa 'āti!' Paniye xop mō'āmā', yā' pa mūn max, pāyā' kuxa kummuk, tu' koit pax, tu pām yōg tokatogā'ax putuk, ha pām kopa' xip, tu' mōmmāhā tu mōktu xexkah, ha kaxīy Paniye xop mō'āmā tikmū'ūn kopah, tu mō'āmā mūn mīy.

² Tikmū'ūn kummuk te yāy yōg hāpkummuk mīy'ax xaptop, tu mō'nīy, pa Topa te tikmū'ūn xohix tu' mūg putup, pu tikmū'ūn xohix' pēnā'.

³ Tikmū'ūn yīy pu 'ūgnāg 'āmnīy koxtap hā, pa Topa te tikmū'ūn xohix pu' xupakgāp-tup, ha hām'āktux'ax pu'uk mīptut kopah, pa tikmū'ūn xohix te' xuktux'ax ka'ok, tu hām'āktux'ax ka'ok hā' xupak putup. Kaxīy.

Tep-te' yīpkutuk?

⁴ Tu xe hām'āktux, hu:

—'Āxop tek mūn hā 'āxape'. Tik xop kummuk yīpkutuk hok. Nōm te 'āyīn xe'ep-tex, pa 'ākokuk putex 'ohnāg,

⁵ pa Topa mūn ka'ok xe'ēgnāg, yīy nōm yīpkutuk, nō'ōm te 'āp-tex'ax, tu mō'ākutnā'ax Hāmgāyāgnāg Pet ha, pu' xihip. Hamūn. Topa mūn yīpkutuk.

⁶ —Putuxnāg xop 'a' takat'ah, tu tayūmak kutōgnāg hā' nōy yānān, pāyā Topa te nōm xop xaxok 'ohnāg,

⁷ tu 'āxe mō'kupix, tu' xohix te xīy yūmmūg. 'Ākuxānōg hok. Topa te putuxnāg xop xohip-tup kutōgnāg, tu 'āxop mūn putup xexkah. Kaxīy.

Yā' max Kunnix 'āktux 'ānōy pu'

⁸ Tu xe hām'āktux, hu:

—'Ūgmūn ya Tikmū'ūn Kutok, tu xa hām'āktux nām. Tikmū'ūn te' xohix pu hām'āktux, hu: 'Ūgmūn yā Yeyox yōg, kaxīy, kopxix 'āte hām'āktux putup, tu pekkox yōg nū'pok xop pu' xuktux putup, hu: Hamūn yā yōgnū'. Kaxīy.

⁹ Pa tikmū'ūn te' xohix pu hām'āktux, hu: 'Ak mūn yā Yeyox yōg'ah, kaxīy, tuk mūn hā yāyhāhup tu' xuktux, kopxix 'āte hām'āktux putup, tu pekkox yōg nū'pok xop pu hām'āktux putup, hu: "Hāmūn 'ap yōgnū'ah." Kaxīy.

¹⁰ —Tikmū'ūn tek mūn 'āktux kummuk, puxix Topa xaxogāp-tup, pa tikmū'ūn te Topa Koxuk 'āktux kummuk, puxix Topa xaxogāp-tup 'ohnāg.

11 –Yümü yög tik te tikmü'ün xat'ax te 'äxor mögâp-tup Topa pet hah, nüy 'äyikopit, tu gohenanok keppa 'äyikopit, xix 'üxexka xop keppa 'äyikopit, pa kuxânög hok, tu xutigâhok, hu: "Pute 'üm 'äte 'äktux putup, 'äte 'üggâ?" Kaxîy.

12 Yâ Topa Koxuk te xa hämyümmügâp-tup, tu häm'äktux'ax xa hämyümmügâp-tup. Kaxîy.

Üptexop xexka pa te hämyümmüg 'ohnäg

13 Ha tik te tikmü'ün mütik tihî, tu Yeyox pu häm'äktux, hu:

–Notot, 'äpu, 'üktaknöy mänög, nüy hämyümmügâ. Hömäk müg tak xok, hak taknöy te 'atak yög häpxop xohix pop, tu' yägnäg 'a höm putup'ah. 'Äpu, tu' xat, pu häpxop koxip. Kaxîy.

14 Ha Yeyox te:

–Ak pa te hämyümmüg'ah, nüy häpxop koxip. Kaxîy.

15 Tu xe häm'äktux, hu:

–Üg'äpax max. 'Äxupkümüy hok. 'Änöy yög häpxop putup hok. Tikmü'ün hi xe'e', puxix 'üptexop xi' hok xop te yäy putuk, yîy 'äxupkümüy hok, xa' hi xe'e'. Kaxîy.

16 Tu tikmü'ün yümmügâhâ, häm'äktux'ax hä' hämyümmügâhâ, nüy Topa yög häpxopmä'ax yümmügâ, nüy xupkümüy hok 'äktux, hu:

–Üptexop yög hahäm xexkah, ha häpxop ta xohix xexkah, tu ta häpxop nünâhâ, tu mîptut kutögnäg kopa nü'xok hä' xohix, ha nü'xip,

17 yîy hämpe'paxex, hu: "Yögnü häpxop punethok 'äte nünâhâ, pi'yâ' xex putup 'äte'? 'İntu'.

18 Nây. 'Äte mîptut kutögnäg koxyöy'ax, nüy 'nöy xexka müy, nüy yögnü häpxop xohix nü'xok,

19 tu yäy pu häm'äktux'ax, hu: 'Üghittup xexkah, tuk mün 'üptexop xexkah, yâ hönhâ puxi', 'ak häm putup'ah 'üxeheh. 'Ükux. 'Ükteknög, huk xi'tax punethok, xix' xo'op'ax punethok, tuk kuxa hittup." Kaxîy.

20 Pa Topa te: "Äp-tox kummuk, tu hämyümmüg 'ohnäg. Hönhâ, 'ämnîy hä, 'äxok putup, ha 'ü 'üm te' pop'ax 'ögnü häpxop, 'ög häpxop xate nöm nü'xok?" Ta tu' kux. Kaxîy.

21 Tu xe:

–Kaxîy 'üptexop xohix xakix, nöm xop te Topa keppa 'ühok xop. Kaxîy.

Tikmü'ün kuxa yüm ka'ok Topa kopah

22 Tu yäy yög tik xop pu häm'äktux, hu:

–Yîy 'äte xa häm'äktux, hu: 'Äxutigâhok, yîy: "Putep mün 'äte' mä'ax?" Kaxîy, xix: 'Äte pi'ya' mün tat'ax topixxax?" Kaxîy.

23 'Ähi'ax mün max xexkah, ha 'äxit'ax max kutögnäg, xix 'äyîn max xexkah, ha topixxax max kutögnäg.

24 Putuxnäg katâmânäg pênâ'. Yâ häpxop xap xok 'ohnäg, tu häpxop ta'ax nünâ 'ohnäg, nüy pet kopa nü'xok, pa Topa te nöm pu häpxop höm, püyî' mä'. 'Üyümmüg hok, xate'? Topa te putuxnäg xop putup pax kutögnäg, pa 'äxor putup pax xexkah.

25 Tik te: "Ükkok putup, päyâ 'üghi'ax tox xak, nüy hämyäxatamuk kutögnäg nöy hi'." Kaxîy. Pa' xutigâ'ax hä tik hi tox 'ohnäg.

26 Tikmü'ün te häxopmä kutögnäg 'a yümmüg'ah, nüy tu hi tox, hu häxopmä xexka yümmüg 'ohnäg, hu xutigâ hok.

27 'Äpu mînnut pênâ'. 'Ütuk max, tu' häm 'ohnäg, tu topixxax xap 'ohnäg yäy pu', ha' xax max. Hömâ mönâyxop hittap Xanomâm yäp-texop xexkah, tu topixxax max mö'tat mög kuma', pa Xanomâm xax 'änuk kutögnäg, ha mînnut xax 'änuk xe'e'.

28 Topa mün te xax max höm mînnut xop pu', pu mö'tat, tu hönhâ' xip, pa häptup 'İhâ' tu tap, ha kuxap kopa mö'yön. Yümmüg hok xate'? Topa te xa' höm putup topixxax max kamah, xa mö'tat. 'Äkuxa yüm pu'uk Topa kopah.

29 'Äkuxânög hok, tu yäy yög häpxop xak hok, nüy xit, nüy xo'op.

30 'Ämhok. Tikmü'ün te Topa yümüg'ah, hu ta' xak, päyâ Topa yâ 'Ätak xe'e', tu pexkox tu' xip, tu 'äpênâ max, tu 'äxix ka'ok,

31 tu yäy yög tikmü'ün xat, yîy 'İpkox pi' Topa pu hämäxap, ha ta xa' popmäp-tup häpxop xohix. Kaxîy.

Pexkox yög häpxop xohix

32 Tu xe:

–'Äkuxânög hok. 'Äxor yâ 'Ätak Topak-tok xop, ha mö'äyây xe'egnäg, hu 'äxat xe'egnäg kamah.

33 'Ög häpxop xohix hämenax, nüy tayümak pop, nüy hok xop pu' nîm. 'Äpu 'äxap tuhut nüy tayümak tat, nüy mö'xuk ponnok, ha hämyäxatamuk nög putup, 'İhâ' tut ponnok tup, yîy 'ög tayümak xeh, nüy mö'xuk pexkox kopah, ha tik kummuk te nō' xupxet 'ohnäg, ha' kut te' mä 'ohnäg.

34 'Äkuxa te yäy yög häpxop xak, yîy xeh pexkox kopah, nüy yäy mün mög putup pexkox ha kamah, 'Ükux. Kaxîy.

Kämānat xop te' pēnānā' pīp

35 Tu xe häm'äktux, nüy Topa yög häpxopmä'ax yümmügâ, nüy tikmü'ün mö'ön hok 'äktux, hu:

–'Äyok, mög 'äxax tat, nüy häm, tu 'ög küyänäm mö'tat.

36 Kämānat häm 'İhâ yäy xuxyâ' hip, yâ' xuxyâ xape yäytaha', yîy 'ämuk xexka hä' mög, tu putpu' nün tu nūktu yäy pet hä' nün, tu häptopa hä' xänâhâ, ha kāmānat xop te häpxön, tu häpxön mö'ka'ok.

37 Kāmānet xop häm max yäy xuxyâ pu', puxix yäy kuxa hittup, ha nöm xuxyâ kuxa

hittup pax, hu kāmānat xop pu hāpxop popmāp-tup, tu' xat pu' xit'ax puk, ha kāmānat xop pu' hōm,

³⁸ yīy kuxa hittup, üyōg hāpxop pēnā max hah, tu mō'yōn 'okpa 'āmñy koxtap, 'ihā' xuxyā xupep.

³⁹ Ūxaxok hok. Paxpu mīptut xuxyā hāmyümmüg, tu hām 'üm hā tik te hāpxupxet nūn yümmüg, puxi' xuxyā yāy pet pēnā max, puyīy tik tu nō hāpxop hā xupxet hok.

⁴⁰ Äxop kamah mō'ōn hok, nūy 'āmñy xohix hā pēnāmax. Ūgmün yā Tikmū'ün Kutok, tuk nūn putup putpu', ha hām 'üm hāk nūn putup, 'ap' äxop tek yümmüg'ah 'ügnūn'ax, hu 'ōg pa 'āti!' Tu ta tu' kux. Kaxīy.

Kāmānat max

⁴¹ Ha Pet te:

–Yāyā', 'ok xatek müg puxehnāg pu' hāmyümmügāhā', tu hām'äktux hā hāmyümmügāhā', pe tikmū'ün xohix pu hāmyümmügāhā'? Kaxīy.

⁴² Ha hām'äktux, nūy Topa yōg hāpxopmā'ax yümmügā', hu:

–Tik te hāmyümmüg, tu hām max yāy xuxyā pu', ha' xuxyā kuxa yüm ka'ok nō'ōm kopah, tu' xat, puyīy kāmānat xop hā māxap, nūy hāpxop xohix pēnā max, tu 'āmñy xohix 'ihā tikmū'ün kāmānat xop xīnnā max.

⁴³ Ha' xuxyā nūn putpu', tu kāmānat pēnāhā', ha' hām max, hu' kuxa hittup xexkah.

⁴⁴ Äte xa hāpxe'e' äktux: Ūxuxyā te kāmānat pu hām'äktux putup, hu: “Hōmā xate yōgnū hāpxop pēnā max. Hōnhā yōg hāpxop xohix pēnā'ax, nūy xeh max, tu yōgnū kāmānat xop xohix xat'ax kamah.” Kaxīy.

⁴⁵ Paxpu kāmānat hāmp'e'paxex, hu: “Yāk xuxyā mōg, tu putpu' nūn 'ohnāg,” kaxīy, tu' pit xop kute'ex kummuk, xi' hex xop kute'ex kummuk, xix kenmuk xo'op xexka tu mōktu' paptux, tu' xit xexkah, tu' hām 'ohnāg,

⁴⁶ puxi' xuxyā nūn mō'ka'ok, 'ap kāmānat te' yümmüg'ah, ha' gāy, tu: Mōg, mōg, nūy 'āpep! Kaxīy. Tu' kix hā' yānān putup, 'üyīpkox 'ohnāg hah.

⁴⁷ –Kāmānat te yāy xuxyā pu' hām, tu hāmyümmüg, tu' xuxyāp-tup'ax yümmüg, ha' yīpkox 'ohnāg, puxi' xuxyā te' kix kakixnāg, 'üp-tox ka'ōgnāg hā' kix putup.

⁴⁸ Pa kāmānat nōy te yāy xuxyā pu' hām, tu' nōm tep-tup'ax yümmüg 'ohnāg, hu 'ühām kummuk, puxi' xuxyā te' kix kutōgnāg putup. Topa te tikmū'ün hōm punethok, puxi' xat pu tu' hām punethok 'üyānān tu'.

Tikmū'ün te Yeyox hā yāy tukmīy

⁴⁹ Tu xe:

–Ūgnūn nūy Topa gāy 'äktux, ha Topa gāy tikmū'ün kummuk tu'. Kuxap te hāmpuk,

hā kaxīy Topa te nōm tikmū'ün xūyāp-tup. Paxpu hāmpuk nōmhā, kopxik hittup.

⁵⁰ Tikmū'ün te kōnāg kox hā' mōxakux pup-tox pix, ha kaxīy tikmū'ün tek xūyāp-tup, tu mōktu' xūy xexkah, yīk kuxa teknōg.

⁵¹ 'Ok 'āmp'e'āpaxex, hu: “Yeyox nūn pu hāpxexka xohix yōg kuxa māmā,” kaxīy? 'Ämhok. 'Ap hamūn'ah. 'Ügnūn pu tikmū'ün te yāytuk-mīy,

⁵² Ūxape xop te 5 te yāytuk-mīy putup, ha 3 yāytuk-mīy putup 2 nōy mütik, ha 2 yāytuk-mīy putup 3 mütik.

⁵³ Yā 'ātak xop tek-tok pit xop mütik yāytuk-mīy putup, hak-tok pit xop te' tak xop mütik tuk-mīy putup yāy tu', 'ütut xop tek-tok hex xop mütik yāytuk-mīy putup, hak-tok hex xop te' tut xop mütik tuk-mīy putup yāy tu', ha' yīpkox mük tut xop te' xetut xop mütik yāytuk-mīy putup, ha' xetut xop te' yīpkox mük tut xop mütik kūmīy putup. Kaxīy.

⁵⁴ Tu tikmū'ün pu hām'äktux kamah, hu:

–Äxop te texgōy pēnāhā', tu: “Tex tip-tup.” Kaxīy. Yā texeh xe'ēgnāg. Yamūn.

⁵⁵ Ha 'āmuuh xexka mō'ko'uk, ha: “Hāmpukpex mīy putup.” Kaxīy. Yā' pukpex. Yamūn.

⁵⁶ 'Ok hāmyümmüg hok xate'? Yā 'āpa hitop tu max, pāyā 'ākuxa kummuk! Tu hām yōg hāpxop yümmüg, xix hāmñōgnōy yōg, pa hōnhā Topa te hāpxopmā ka'ok, ha xate' yümmüg 'ohnāg. Kaxīy.

Ūgāy kuxyāhā'

⁵⁷ Tu hām'äktux kux putup, hu:

–Teptu 'äxop te yāy yīkopit hok, nūy hāpxopmā'ax yümmüg hāmāxap, pe' kummuk, pe' max?

⁵⁸ Tik te 'äkupep, tu pa te hāmyümmüg xop ha' 'āmōgāp-tup, 'āpu, nūmütik mōg, 'ihā yāy kix kuxyāhā', ka hāmyümmüg xop xa' hōm xonāt xop pu, pu mōg 'ātat hah, nūy xip ka'ok.

⁵⁹ Äte xa hāpxe'e' äktux: Xate 'ā xupap-tup hok, 'ihā xate pago hok tayūmak xexka hā. Kaxīy.

13

'Äpu, hāpkummuk mīy kux, ka 'äxok

¹ Ha' nūn tikmū'ün, tu hām'äktux Yeyox pu', tu hāpxexka yōg tikmū'ün xat'ax Pīnat 'äktux, ha hōmā' xat pu xonāt xop tik xop kix, ha hāpxexka Ganinet yōg tik xop xakix, 'ihā hāpxop mō'hāp, nūy Topa pu' haxyā'.

² Ha Yeyox te:

–Ganinet yōg tik xop xakix. Putep hāmp'e'āpaxex? 'Ok tik xop kummuk xe'e' 'ōhōm? 'Ok Ganinet yōg tikmū'ün nōy max?

³ 'Ämhok. Xate yāyhāp hok, nūy 'ōg hāpkummügā kux hok, hu ta xakix putup kamah, tik xop putuk.

⁴ 'Ok xate xip'ax Xino'e yōg tik te 18 yūmmūg? Mīptut tox te yāy koxyōy, tu tik yīmū' koxyōy tu tu' nāhā', tu' kix. 'Ok tik kummuk xe'e nō'ōm? 'Ok kōmēn Yenoyanēn yōg tikmū'ūn nōy max?

⁵ 'Āmhok. Xate yāyhāhup hok, nūy 'ōg hāpkummukgā hup hok, hu ta xakix putup kamah, tik xop te 18 putuk. Kaxīy.

⁶ Tu hām'āktux'ax hā' hāmyūmmūgāhā', nūy Topa yōg hāpxopmā'ax yūmmūgā, nūy tikmū'ūn yāyhāhup 'āktux, pu tu hāpkummuk mīy kux, hu:

–Tik te hāpxa'ax tu' xip, ha nanūy kup xip, pa mīnta 'ūm xip 'ohnāg,

⁷ ha kāmānat te hāpxop pēnāhā', ha' xuxyā te: “Pēnā! Hāmyāxatamuk tikoyuk hā 'āte mīnta ta xak, pa' xip 'ohnāg. Mōg, tu' kup xak, 'ūkummuk hah, pu mīnta kup nōy xok hām kopah.” Kaxīy.

⁸ Pa kāmānat te: “Nāy, 'ūxup nōg, tu hāmyāxatamuk nōy hīp. 'Āte' kup yīmap kot putup, tu' anop hāpkox kopa' xuk putup,

⁹ ha hāmyāxatamuk nōy nōg, kopxix tu ta' pēnā', pe tut max, tu mīnta punethok 'ūta xupep. 'Ūkup kummuk, tu mīnta 'ohnāg tu ta panipnāg, kopxi' xak.” Ta tu' kux. Kaxīy.

Yeyox te 'ūn hittupmāhā 'thā nit xap

¹⁰ Hāpxip kutōgnāg 'thā, nit xap 'thā, Yeyox te Topa pet kopa hāmyūmmūgāhā',

¹¹ ha 'ūn xip, tu hāmyāxatamuk xohix te 18 hā xām xok, ha yāmīy kummuk te' pakutnāhā', ha' xām yok 'ohnāg,

¹² ha Yeyox te' pēnāhā', tu' xānāhā', hu:

–Mā', yā hāg, Kaxīy.

Tu xe':

–Topa te 'āhittupmāhā! Kaxīy.

¹³ Tu 'ūn yīmū' yīm xex, ha' yok, tu Topa max 'āktux.

¹⁴ Pa tik te Topa pet kopa' xat, tu' gāy, Yeyox te nit xap hā' tikmū'ūn hittupmā', ha' gāy, tup-tup nōg, hu tikmū'ūn pu hām'āktux, hu:

–Āmnīy te 6 hā tikmū'ūn hām, tu' nūn, pūyīy hittupmā', pa 'ap nit xap'ah. Kaxīy. Nō'ōm Yoneo xop yōg hāptup xe'e', ha Yoneo yōg tikmū'ūn hām 'ohnāg nit xap 'thā'.

¹⁵ Ha Yeyox te:

–Xate mō'āmā'. 'Āpa mūn max, pāyā 'ākuxa mūn kummuk! Tikmū'ūn te mūnūytut tak xip, 'ok pe yohmēn xip, tu' hīy tu' xix hāmpak'ax kopah, tu nit xap 'thā koah, nūy mōgā kōnāg hah, pu' xo'op, yā' max,

¹⁶ pa 'ūn xip, tu mōnāyxop hittap 'Amanām hā' mōkputox, ha Hāmgyāgnāg te' xām hīy ka'ok, tu hāmyāxatamuk xohix te 18 hā' hīy. Teptu 'āxop tek tux hok pu' xut hok pu mōg? Kaxīy.

¹⁷ Ha' gāy xop te yāyhāhup, tu' yīy 'ohnāg, 'thā tikmū'ūn te Yeyox yōg hāpxopmā'ax xohix putup pax, tu' kuxa hittup.

Mōydat xap

¹⁸ Ha Yeyox te hām'āktux, nūy Topa yōg hāpxopmā'ax yūmmūgā',

–Topa te tikmū'ūn xat te xīy? 'Ok xate' yūmmūg? 'Āte xa hāmyūmmūgā'ax, hu:

¹⁹ Tik te mīpkup mōydat xap paha', tu hāpkot, ha' kopa' xok, ha xokax, tu' tuk, tu mōktu mōydat kup xupax, ha putuxnāg te yāy pet mīy mīmmāg kopah. Kaxīy tikmū'ūn kutōgnāg te Topa pu' yīpkox pip hāmāxap, hak-nāy tu tikmū'ūn nōy yīpkox pip, ha tikmū'ūn nōy xohix nōg nōy nā' mōgāhā', tu mōktu xohix. Ta tu' kux. Kaxīy.

Tokatogā'ax

²⁰ Tu xe' yīkopit, hu:

–Topa te tikmū'ūn xat te xīy? 'Āte xa hāmyūmmūgā'ax, nūy Topa yōg hāpxopmā'ax xa hāmyūmmūgā' hu:

²¹ 'Ūn te pām yōg tokatogā'ax paha', tu' xap xoxitix tīnik kōnōn kopa' kanop, tu mōktu 'ūpohot, ha pām mōmmāhā'. Kaxīy tikmū'ūn kutōgnāg yīpkox pip hāmāxap, ha' nāg nōy nā' mōgāhā', tu mōktu xohix yīpkox pip. Tu ta tu' kux. Kaxīy.

Hāmyīkox kutōgnāg

²² Yeyox te hāpkumep xix yāy yōg tik xop, tu ta kōmēn tu' mōg, xix xip tu xexka tu' mōg, tu hāmyūmmūgāhā', tu kōmēn xexka Yenoyanēn ha' mōg,

²³ ha tikmū'ūn 'ūm te' yīkopit, hu:

–Yāyā', 'ok tikmū'ūn kutōgnāg te' kuxa kummuk xit, nūy tu kuxa max 'ūyānān tu' tat? Kaxīy.

²⁴ Yīy Yeyox te:

–'Āpu, hāpxopmā punethok, nūy hāmyīkox kutōgnāg hā' mōxakux. Tikmū'ūn punethok mōxakux putup, pa' mōxakux 'ohnāg, tu ta yā 'ātihi'.

²⁵ –Ha mīptut xuxyā yok putup, tu mō'yīnnīn'ax hā mō'yīnnīn, 'thā 'āxop tihi' hāptopa, tu' xānā-tup, hu: “Hāpxōn, hāpxōn,” kaxīy, pa' xuxyā te: “Kōmēn 'ūm yōg 'āxop? 'Āte 'āyūmmūg'ah, 'apxōn putup'ah, xayīy pexkox ha mōxakux hok.”

²⁶ Ha 'āxop te hām'āktux putup, hu: “'Ūgmū'āte hāpxop māhā 'āmūtik, nūy ta xo'op. Xate yōg kōmēn kopak hāmyūmmūgāhā'!” Kaxīy.

²⁷ Ha' yānān tu hām'āktux putup, hu: “'A 'āte 'āxop yūmmūg'ah. Mōg, mōy, nūy 'āpep, yā 'āxop te hāpkummuk mīy pax!” Kaxīy.

²⁸ Ha Topa te' xat yāy yōg tikmū'ūn pexkox tu', ha 'āxop te pēnāp-tup hāptox tu', tu mōnāyxop pēnāp-tup, ha pexkox kopa' pip, ha mōnāyxop hittap 'Amanām pēnāp-tup, xix mōnāyxop 'Iyak, xix mōnāyxop Yako pēnāp-tup pax xix Topa pupi hām'āktux xop pēnāp-tup, 'thā hāptopa 'ātihi', ha mō'āxakux putup, pa mō'āxakux 'ohnāg, tu potap-tup, hu 'āxox kāyāhā', 'āxūy xexka tu'.

²⁹ Ha hãpxexka xohix yõg tìkmũ'ũn nũn putup, hãptox tu' nũn putup, nũy 'ãmuk xexka mĩy, tu' mãm putup, nũy tu' xit, tu Topa pu' yĩpkox pip.

³⁰ Pa nõm xop mõxa tap xop hã' ka'ax putup, ha nõm ka'ax hã nõm nũn, tu' mãxap putup. Ta tu' kux. Kaxĩy.

³¹ Hãpxip 'ohnãg 'Ihã Paniye yõg tìkmũ'ũn nũn, tu:

—Mõy, mõg. 'Ûxat'ax 'Enot te 'ãp-tex putup! Kaxĩy.

³² Ha Yeyox te:

—Mõg, 'ãte mõ'ãpok, xa nõm mõ'ãmã'ax pu hãm'ãktux, hu: 'Ãte xupepmãhã yãmĩy kum-muk, tu tìkmũ'ũn hittupmãhã, 'ãte' hõnhã' mĩy, xix hãptup hã, nũy hãptup nõy, kopxix hãpxopmã'ax kux.

³³ 'Ûgmõg putup kõmẽn Yenoyanẽn hah, yã hõnhã 'ãte hãpkumep putup, xix hãptup, xix hãptup nõy hãpkumep putup, nũy Yenoyanẽn tuk xupep, pu tìkmũ'ũn tek putex, tu Topa pupi hãm'ãktux xop kix, yã hõmã nõm xop xohix kix Yenoyanẽn kopah.

³⁴ —'Ûg'ãpax, kõmẽn Yenoyanẽn yõg tìkmũ'ũn! 'Ãxop te Topa pupi hãm'ãktux xop punethok kix, Topa te kõmẽn ha nũ' pok tik xop, ha xate mĩkaxxap xexka tux hã' kix. Xokakkak tek-tok xãnãhã', nũy mõ'tat yãy kaka, hã kaxĩy 'ãte kõmẽn yõg tìkmũ'ũn xãnãhã', pãyã 'ũgha 'ãnũn putup 'ohnãg.

³⁵ Yĩy 'ãpet 'ũhok yũm putup, ha xatek pẽnãp-tup 'ũxeheh, 'Ihã 'ã 'ãktux, hu: "Topa te yãy 'ãxet'ax hõm xa', pu nũ'. Pũyã xa hãmmax nã'." Tu ta tu' kux. Kaxĩy.

14

Yeyox te tik hittupmãhã'

¹ Ha nit xap nõy 'Ihã Yeyox te Paniye yõg tik ha' mõg, tu' pet ha' mõg, ha yã' xexkah, ha tìkmũ'ũn te' pẽnã ka'ok Yeyox,

² ha tik nũn, 'ũyĩpkup mõm, xix patakup, tu Yeyox ha' nũn,

³ ha Yeyox te hãmýũmmũg xop pu hãm'ãktux, xix Paniye xop pu hãm'ãktux, hu:

—Mõnãyxop hittap Mõyyex te Topa yõg xat'ax kax'ãmi'. 'Ok xat hok pu tìkmũ'ũn hittupmã hok nit xap hã? Kaxĩy.

⁴ Ha' yĩy 'ohnãg, yĩy Yeyox te tik pakut mũg, tu' hittupmãhã', tu' pet ha mõ'kutnãhã',

⁵ tu' xexka xop pu hãm'ãktux, hu:

—Pe 'ãk-tok te hãpkox kopa mõ'nãhã', pe 'õg mũnũytut tak te hãpkox kopa mõ'nãhã' nit xap hã, 'ok hãpxip 'ohnãg 'Ihã xate' xut'ax pu mõg? Yã' xut'ax mõ'ka'ok. Yã kaxĩy 'ãte tìkmũ'ũn hittupmãhã nit xap 'Ihã. Kaxĩy.

⁶ Ha' xutigãhã', tu hãm'ãktux yũmmũg 'ohnãg.

Yeyox te 'ãmuk xexka hã' mõg'ax 'ãktux

⁷ 'Ûyũm Yeyox, tu' xexka xop pẽnãhã', ha' yũm'ax max yãykutnãhã yãy pu', ha

tìkmũ'ũn te' mũtik mãm yũmmũgãhã', tu hãm'ãktux'ax hã hãmýũmmũgãhã, nũy Topa yõg hãpxopmã'ax yũmmũgã, hu:

⁸ —Tìkmũ'ũn yãytaha', ha' nõy te 'ãxãnãhã pu 'ãmuk xexka ha mõg, 'ãpu mõg, pa' yũm'ax max xak hok yãy pu'. 'Ãmhook. Peyã tik xexka mõg kamah, ha 'ãk-tõgnãg,

⁹ puxix mĩptut xuxyã xa hãm'ãktux, hu:

“'Ãpu, yũm'ax nõy xax nũy tu yũm. Tik xexka te nũ yũm'ax max putup, nũy tu yũm.” Kaxĩy. Ha xate yãyhãhup, tu' yũm'ax nõy xak.

¹⁰ Kaxĩy mĩy hok. Pa tik te 'ãxãnãhã pu mõg 'ũpet hah, 'ãpu, mõg, pa' yũm'ax kum-muk yãykutnã', nũy yũm, ha tìkmũ'ũn te xa hãm'ãktux'ax hu: “'Ãmũn tek mũn hã 'ãxape', mã', nũy 'ũyũm'ax max yĩmũ' yũm.” Kaxĩy. Ha 'ãhittup xexkah, yã tìkmũ'ũn xohix te' pẽnãhã', tu 'ãxape te 'ãp-tup pax pẽnãhã, ha 'ãhittup.

¹¹ Kaxĩy Topa te' hupmãp-tup tìkmũ'ũn te yãy xexka pe' paxex, ha tìkmũ'ũn te yãy pe'paxexk-tõgnãg te yãyhãp-tup xexkah. 'Ûkux. Kaxĩy.

¹² Tu Paniye yõg tik pu hãm'ãktux, tu tik te' xãnãhã pu hãm'ãktux hu:

—Xate 'ãmuk xexka mĩy, 'ãpu 'ãxape xop xãnã hok pu tu' xit, xix 'ãnõy xop xãnã hok, xip-texop xexka te 'ãyĩmap pip xãnã hok, yã' xohix xãnã hok, ka nõm xop te' yãnãn tu 'ãxãnã', nũy pago.

¹³ Pa 'ãmuk xexka xate' mĩy, 'ãpu hãpxop hok xop xãnã', xix hãpkumep hok xop xãnã', xi' pa hok xop xãnã'.

¹⁴ Hamũn. Ha Topa te xa hãmmaxnãp-tup, 'ũhok xop te xa pago 'ohnãg hah, yã Topa mũn te xa pago putup, 'Ihã tìkmũ'ũn te hãmýok mĩy xop hi' putpu'. 'Ûkux. Kaxĩy.

'Ãmuk xexkah

¹⁵ Tik te mĩmpe xit'ax tu' yũm, tu' xupak, tu hãm'ãktux Yeyox pu', hu:

—Tìkmũ'ũn kuxa hittup, nõm te Topa yõg 'ãmuk xexka mãp-tup. Kaxĩy.

¹⁶ Ha Yeyox te hãmýũmmũgãhã', nũy Topa yõg hãpxopmã'ax yũmmũgã', nũy Topa te tìkmũ'ũn xãnã 'ãktux, hu:

—Tik te 'ãmuk xexka mĩy, tu tìkmũ'ũn punethok xãnãhã', pu' pet ha' nũ', nũy xit,

¹⁷ tu 'ãmuk xexka mĩy, ha' puk, ha kãmãnat xat, pu tìkmũ'ũn yũmmũgã', hu: “Yã' puk, mã', nũy xit.” Kaxĩy.

¹⁸ —Pa tìkmũ'ũn tep-tup nõg, yĩy tik puxet te: “'Ãte hãm max nõmenax, tu tayũmak 'ũyãnãn tu' hõm, nũy pop. 'Ûgmõg putup, nũy pẽnã', 'a' mãp-tup'ah.” Kaxĩy.

¹⁹ —Ha' nõy te: “'Ãte mox te 10 pop. 'Ûgmõg putup nũy pẽnã', 'ak xit putup'ah.” Kaxĩy.

²⁰ —Ha nõy te: “'Ãte yãytaha, huk mõg putup'ah.” Kaxĩy.

²¹ —Ha kãmãnat nũn put pu', tu yãy xuxyã pu' xuktux, ha' gãy, tu: “Mõg,

'āmō'ka'ok, kōmēn kotit ha mōg, nūy kōmēn yōg tikmū'ün hok xop nūnnā', 'ük pet tu nūnnā'." Kaxīy.

22 —Ha' mīy, tu hāpxip kutōgnāg 'hā putpu' nūn, tu: "Xate' xat, ha 'āte' mīy, pa 'āmuk xexka punethok." Kaxīy.

23 —Ha' nōy xe mō'kutnāhā', hu: "Mōg, putat xexka hā mōg, xix putat kutōgnāg hā mōg, nūy tikmū'ün xapit, tu nūnnā', pu 'āmuk xexka xohix mā'.

24 'Āte hāpxe'e 'āktux xa', hu: 'Ūxexka xop 'āte' xānāhā', hap-tup nōg, hu' yōg 'āmuk xexka māp-tup 'ohnāg.' Ta tu' kux. Kaxīy.

Tikmū'ün te Yeyox mütik hāpkumep'ax

25 'Āmīy nōy tu ta hāpkumep, ha tikmū'ün punethok te' mütik hāpkumep, ha' yōkānām, tu hām'āktux, hu:

26 —Tikmū'ün tek mūn mütik hāpkumep putup, pūyāk putup pax xexkah, tu yāy yōg xape xop putup kutōgnāg. Tikmū'ün tek mūn mütik hāpkumep, pūyā yāy tak putup kutōgnāg, xi' mūg tut, xi' xetut, xik-tok, xi' tutnōy xop, xi' pit xop, xi' hex xop putup kutōgnāg, xix yāy pe'paxex kutōgnāg, nūy 'ükputup xexkah.

27 Tikmū'ün te yāy yōg mīpkupnix tat hok, tu' xūy hok 'ūgmūn putuk, puxix yōgnū tikmū'ün mütik hāpkumep hok.

28 Xate mīptut tox mīy'ax, hu 'āyūm hāmāxap, nūy yāy yīkopit, hu: Tayūmak xohix te xīy yōgnū? Kaxīy. Tu 'ōg tayūmak mō'kupix. Paxpu 'ōg tayūmak punethok, 'āpu, mīptut mīy.

29 Paxpu mīptut hām tu' xup, pa 'ōg tayūmak kutōgnāg, puxix mīptut kuxyā hok, ha' nōy te xa 'āktux'ax kummuk, hu:

30 "Ūpa te hāmyūmmūg 'ohnāg 'ōhōm. 'Ūyōg tayūmak xohik-tōgnāg, pāyā mō'kupix yūmmūg 'ohnāg kamah." Kaxīy. Ta tu' kux.

31 Tu xe hām'āktux, nūy Topa yōg hāpxopmā'ax yūmmūgā', hu:

—Hāpxexka yōg tik te' 'xat'ax, tu xonat xop xohix te 10,000 mō'pok, nūy hāpxexka nōy yōg xonat xop mütik yāyix, pa xonat xop nōy xohix te 20,000, yīy tik te tikmū'ün 'xat'ax yūm, nūy yāy yīkopit hāmāxap, hu: "Ok yōgnū xonat xop ka'ok, pe xonat nōy xop ka'ok?" Kaxīy.

32 Xonat xop nōy ka'ok, puxix tik xop mō'pok hāpxexka nōy hah, pu ta' xexka xop tu' xax, pu yāyix kuxyā', ha hāptox tu mō'pok'ax, nūy gāy kuxyā'.

33 —Kaxīy 'āxop te yāy yōg hāpxop xohix nīm hok, hu 'ūgmūn mütik xate hāpkumep hok kamah. Kaxīy.

'Āmot Xuxpex

34 Tu xe hām'āktux, hu:

—'Āmot xuxpex mūn max, pa yāy xuxpex nōg, puxix max'ah 'ehe',

35 ha tikmū'ün tep-tup nōg, hu hāptopa mō'yōn. 'Ūg'āpax, nūy 'āyīpkox pi'. Kaxīy.

15

Kahnēn te yāy xaxok

1 Hāpxip kutōgnāg 'hā tik xop nūn, nūy Yeyox yīy 'āpax, tu gohet pupi tikmū'ün yōg tayūmak pop, ha Yoneo yōg tikmū'ün te nōm tik xop putup nōg,

2 ha Paniye xop xix hāmyūmmūg xop te Yeyox 'āktux kummuk, hu:

Nū tik te tik kummuk hā' xape, tu nōm mütik xit. Yā kummuk Yeyox. Kaxīy.

3 Ha Yeyox te hāmyūmmūgāhā', tu Topa yōg hāpxopmā'ax yūmmūgā', tu kahnēn 'āktux hā hāmyūmmūgāhā', nūy tu Topa te tikmū'ün kummuk xak 'āktux, hu:

4 —Tikmū'ün yōg kahnēn te 100, tu kahnēn puxet xaxok, hu' mōg, tu' xip'ax kox, tu kahnēn xop te 99 nīm, nūy kahnēn puxet xak, tu' xak, tu mōktu xipihī',

5 tu xipihī', tu ta' kuxa hittup xexkah, tu' nūn putpu', tu kahnēn te' yīpak hā' tat,

6 tu' nūn tu nūktu xupep yāy pet tu', tu' xape xop xānāhā', xix hām yīmap ha' pip xop xānāhā', tu: "Ākuxa hittup 'ūgmütik! Yā 'āte yāy yōg kahnēn xipihī!" Kaxīy. Ta tu' kux.

7 —Kaxīy pexkox kopa' pip xop kuxa hittup xexkah, tik kummuk yāyhāhup ha' hittup xexkah, pa' kuxa hittup kutōgnāg 'hā tik xop te yāy pe'paxex, hu: "Ūgmax." Kaxīy.

8 Ha Yeyox te tayūmak hā hāmyūmmūgāhā', nūy Topa yōg hāpxopmā'ax yūmmūgā', nūy Topa te tikmū'ün kummuk xak 'āktux, hu:

—'Ūn puxet te tayūmak 'ānuk te 10 pip, tup-xet xaxok, tu' xak, tu kuyānām hā' xak, tu' pet kunut xit max, tu' xak,

9 tu' xipihī', tu' paha', tu' kuxa hittup, tu' xape xop xānāhā', xix hām hūmnāg ha' pip xop, tu: 'Ākuxa hittup 'ūgmütik, 'āxop. 'Āte yāy yōg tayūmak 'ānuk xipihī!'" Kaxīy. Ta tu' kux.

10 —Kaxīy pexkox yōg mō'pok xop kuxa hittup, tik kummuk ta yāyhāhup ha' kuxa hittup. Kaxīy.

Tik kutok xupaha'

11 Tu xe hām'āktux nūy hāmyūmmūgā', nūy Topa yōg hāpxopmā'ax yūmmūgā', nūy Topa te tikmū'ün kummuk putup 'āktux, pu tu yāyhāhup, xix hāpkummuk mīy kux. Tu hām'āktux, hu:

—Tik tek-tok pit 2, yā' xip tap,

12 hak-tok te' nōy hā' kuhmōy te yāy tak pu hām'āktux, hu: "Ātak, 'āxok, kopxix 'āte 'ōg hāpxop pop, 'ūyāg pop'ax, pa hōnhā 'āte' yāg putup, yā tayūmak putup tek putex. 'Āte' hip putup'ah, xa 'āxok. 'Ā' hōm nōmhā, 'ūyiy nōmenax, nūy tayūmak pop, nūyk mōg hāptox tu.'" Kaxīy.

—Ha' tak te hāpxop xohix koxip, tuk-tok te kuhmōy tu tu' yāg popmāhā'.

¹³ Hāpxip kutōgnāg 'ṭhāk-tok te 'ūyāg tayūmak pop, tu' mōg hāptox tu', tu mōktu hāpxexka puknōg tu' xupep, tu hāpkummuk mīy pax, tu tayūmak xexka xaxogānāg, ha' nōg.

¹⁴ —Ha' hok, 'ūyōg tayūmak hoknāg, ha hāmhōgnāg hāpxexka xohix tu', yīy putup tep-tex, xix hāpxexka yōg tikmū'ūn xohix kix,

¹⁵ ha hāpxop 'ūm xak, nūy mā', tu: 'Ūm hōm. 'Ūgmā', kaxīy, ha' nōy te yāy yōg hām tu mō'kutnāhā', pu xapup pēnā',

¹⁶ ha putup tep-tex, hu xapup xit'ax xak, pa' hōm 'ohnāg tik te',

¹⁷ yīy yāy koxak, tu yāy mūtik hām'āktux, hu: "Ātak yōg kāmānat xop xit punethok, tu tu' hix ka'ok, ha putup tek putex.

¹⁸ Put puk mōg 'ātak hah, yāy 'Ātak pet hak mōg'ax, tu hām'āktux'ax, hu: "Ātak, 'āte hāpkummuk mīy pax, tu yāyhāhup Topa tu', xix xa tu',

¹⁹ 'Āmax, hak mūn kummuk, tu xa' hupmāhā', puk mūn yā 'āk-tok 'āktux. 'Ūktux hok puk hām 'ōg kāmānat xop mūtik." Kaxīy.

²⁰ Tu putpu' mōg yāy tak pet hah.

—Tu mōktu' pet tu' xupep, hak-tok te hāptox tu' xip, 'ṭhā' tak te' pēnāhā', tuk-tok te' nōy hā kuhmōy kuxa ka', tu' mōg mō'ka'ok, tuk-tok mūg yāy kep hah, nūy tu' āneo, ta tu' kuxa hittup tu' āneo,

²¹ hak-tok te: "Ātak, 'āte hāpkummuk mīy pax, tu Topa pu hāpkummugāhā', xix 'āmūn pu', tu xa hupmāhā' puk mūn yā 'āk-tok 'āktux." Kaxīy.

²² —Pāyā' tak te kāmānat xat, tu: "Mō'ka'ok, mōg, tu topixxax max popnū', pu xōnnū tat, ha hāpxop 'ūm yānām paxnū pu xōnnū tu yīpkutok ha mō'tat, ha pata xax max popnū', pu' tat,

²³ ha mūnūytut kutok tuktu max nūnnā', tup-tex. 'Āpu yūmū nō 'āmuk xexka mīy 'ūghittup tu'.

²⁴ Xōnnē nūn, ha yūmūg kuxa hittup. Hōmā' xok putuk, tu' hittup nōmhā, hōmā' xupaha, tu' putpu' nūn nōmhā." Kaxīy.

—Tu 'āmuk xexka mīy!

²⁵ —Hak-tok te māxap xip, hāpxa xexka tu' xip, tu putpu' nūn yāy pet hah, tu kāyā 'āpak, xix hāmyā 'āpak,

²⁶ yīy: "Pute 'ūm nūhū'? Tep tu tikmū'ūn kāyāhā yīy hāmyā'?" Kaxīy.

²⁷ —Ha: "Ātaknōy nūn, ha 'ātak xat pu mūnūytut kutok putex, 'ūkuxa hittup tu', 'ūktok putpu' nūn ha' kuxa hittup." Kaxīy.

²⁸ —Pak-tok te māxap gāy, tu' mō'nāp-tup'ah mīptut hā', ha' tak nūn, tu ta tu' xapit, pu mōnāy,

²⁹ pak-tok te: "Hāmyāxatamuk xohix hā xatek-xat, hak yīpkox xip, tu' mīy, pāyā

xate hāpxop 'ūm 'a' hōm'ah, xate mot kutok kutōgnāg 'a' hōm 'ohnāg, puk xape xop mūtik 'āmuk xexka mīy,

³⁰ pa 'āk-tok nōy nūn, tu' xotit xop punethok pēnāhā', tu 'ōg tayūmak hā' pagok, ha tayūmak nōg, ha 'āha' nūn putpu', ha xate 'āmuk xexka mīy!' Kaxīy.

³¹ Ha' tak te: "Xōnnū! Hāmyāxatamuk xohix hā 'ūgmūtik 'āxip, ha 'āte yāy yōg hāpxop xohix popmāp-tup xa'.

³² Yā' max yūmūg kuxa hittup, nūy 'āmuk xexka mīy, 'ātaknōy put pu' nūn, ha yūmūg kuxa hittup. Yā' xok putuk, pāyā' hi', tu' xupaha', pāyā' putpu' nūn." Kaxīy. Tu ta tu' kux. Kaxīy Yeyox te tikmū'ūn yūmmūgāhā', tu Topa te tikmū'ūn kummuk xak 'āktux, puyīy yāyhāhup, xix hāpkummuk mīy kux, nūy tu kuxa hittup.

16

Kāmānat te māxap te hāpkohe' mīy

¹ Yeyox te xe hām'āktux yāy yōg tik xop pu', nūy Topa yōg hāpxopmā'ax yūmmūgā', hu:

—'Ūptexop xexka xip, ha tik te nō pēnānā' xip, yā kāmānat te māxap, ha tik nōy nūn, tup-texop xexka pu hām'āktux, hu: "Nōm kāmānat te māxap te 'ōg hāpxop xohix pēnāhā, tu hāmyūmmūg 'ohnāg, tu' knū'ūn kummuk xak 'āktux, puyīy yāyhāhup, xix hāpkummuk mīy kux, nūy tu kuxa hittup.

Kāmānat te xaxogānāg 'ōg hāpxop." Kaxīy.

² Hap-texop te yāy yōg kāmānat ha' xānāhā', tu: "Xatep-te' mūn mīy? Tikmū'ūn te 'ākummuk 'āktux. Hōnhā xate nō pēnā kux. Puxi'." Kaxīy.

³ —Ha kāmānat te yāy pu hām'āktux, hu: "Ātep-te mūn mīy'ax? 'Ūkxuxyā tek mūn putup nōg. 'Ak mūn ka'ok'ah, 'ūyīy mū' hāpxa'. Hāpxop 'ūhok tu' kax 'ātep-tup'ah, 'āte yāyhāhup tu'.

⁴ Nāy. 'Āte' yūmmūg. 'Ūkxape xe'e xop max, ha 'āte nōm xop pu hām'āktux hā hāmmaxnā'ax, puk mūn pu hāmmax hā yānān, 'ū pet kopak xihip, 'ṭhāk xuxyā tek xat pu mōg." Kaxīy.

⁵ —Hu' xuxyā yōg kāmānat nōy ha' xānāhā', xix kāmānat nōy ha' xānāhā', tu mōktu xohix, tu 'ōm te māxap pu hām'āktux, hu: "Hāpxop xohix te xīy xate ta nemēn yūmūg xuxyā pu'?" Kaxīy.

⁶ —Ha' nōy te: "Hep tox yōg kāmēy te 100 'āte ta nemēn." Kaxīy.

—Ha: "Ta nemēn yōg pa' tappet, tu mō'kupix, hu: 50 'ūyānān tu', nūy 'ōg hāpxop yāggā xate ta nemēn." Kaxīy.

⁷ —Tu tik tek-nāy tu' xānāhā', tu: "Xate ta nemēn hā xīy hāpxop?" Kaxīy.

—Ha: "Āte ta nemēn xuxnāg yōg panat xohix te 1.000." Kaxīy.

—Ha xe': "Ōgnū ta nemēn yōg pa' tap-pet, nūy mō'kupix ha' yūm, hu: 800 nūy 'ōg 'ūyānān tu'." Kaxīy.

⁸ —Ha' xuxyā te hāmyūmmūg, tu' yōg kāmānat te hāpkohe mīy yūmmūg, tu hāmyūmmūg 'āktux kamah. Ta tu' kux.

—Kaxīy Topa hā' puknōg xop te hāmyūmmūg xexkah, pāyā Topa yōg tikmū'ūn te hāmyok mīy, tu hāmyūmmūg kutōgnāg,

⁹ yīy 'āte xa hām'āktux: Yā' max tikmū'ūn te tayūmak hā hāmmaxnā', nūy' xape xop pu hāpχopmā max, puyīy nōm xop mō'āniynām 'ūyānān tu', 'īhā 'ōg tayūmak nōg, puxix 'āmōgā pexkox hah, xa xihip ka'ok.

¹⁰ Tik te hāmyok mīy, tu hāpχop kutōgnāg pēnā max, puxix hāpχop xexka pēnā max kamah. Kaxīy tik kummuk te hāpχop kutōgnāg pēnā kummuk, puxix hāpχop xexka pēnā kummuk kamah.

¹¹ Tik te hāpkohe' mīy, tu tayūmak hā' pēnā kummuk, puxix kamah Topa yōg hāpχopmā max pēnā kummuk.

¹² Xate 'ānōy yōg hāpχop pēnā kummuk, puxix tikmū'ūn kuxa 'ākopa yūm 'ohnāg, tu hāpχop max xa' hōm putup 'ohnāg kamah. 'Āmhok.

¹³ —Tikmū'ūn te yāy xuxyā 2 pu' hām hok, ka xuxyāp-xet putup pax, 'īhā' nōy putup nōg. Ha tikmū'ūn xupkūmīy, puxix tayūmak tu' hām, pa tikmū'ūn te Topa xak, puxix Topa tu' hām. 'Ūkux. Kaxīy.

Yeyox te hām'āktux

¹⁴ Ha Paniye yōg xop te xupak, tu Yeyox hah yīxix kummuk, hu' xox yīxix, tu tayūmak hā kūmīy, hu' gāy, tu' yīxix kummuk.

¹⁵ Pa Yeyox te:

—Tikmū'ūn te 'āpēnāhā', tu: 'Ūmax, kaxīy, 'āhā, pāyā Topa te 'ākuxa kopa pēnāhā', tup-tup nōg, 'ākuxa kummuk hah.

¹⁶ —Hōmā mōnāyχop hittap Mōyex te Topa yōg xat'ax kax'āmi, ha' nōy xop te Topa pupi hām'āktux, nūy tikmū'ūn pu' xuktux, tu hāmyāxatamuk xohix hā hāmyūmmūgāhā', tu mōktu Yoām xip, nōm tep-tox pix, ha hōnhā Topa te yāy yōg tikmū'ūn xat, ha hām'āpak max 'āktux, ha' xohix yīpkox pip, puyīy Topa yōg putat ha' mōg.

¹⁷ —Ha pexkox te yāy xagogāp-tup, xix hahām, pāyā Topa yōg hāmāktux xip ka'ok, ha' xaxogā 'ohnāg.

¹⁸ —Tikmū'ūn te' xetut nīm, tu 'ūn nōy mūg, yā hāpχopmā kummuk, ha tik nōy te' nōy xetut mūg, nūy yāytax, yā hāpχopmā kumuk kamah, tu' nōy hā' xupxet. Kaxīy.

Ūptexop xexka xix Nay

¹⁹ Tu xe hām'āktux, nūy hāmyūmmūgā', nūy Topa yōg hāpχopmā'ax yūmmūgā', puyīy Topa yōg hām'āktux pu' yīpkox pip, hu:

—Ūptexop xip, tu topixxax max tat, tu ta' mīy pax 'āmuk xexkah,

²⁰ ha tik hok xip, tu' pakut, tu' pip 'ūptexop yōg hāmyīkox tu', 'ūxuxet'ax Nay, 'ūkayax punethok tu' pip,

²¹ tu' xit'ax 'ūm xak, putup tep-tex hah, ha kokex xop te tik kayax xup, tu' yōyōg hā' xup.

²² Hāpχip kutōgnāg tik hok 'āxet'ax Nay xok, ha pexkox yōg nū 'pok xop te' put, tu' tat, tu' pexkox ha mō'tat, ha mōnāyχop hittap 'Amanām mūtik tihi pexkox kopah, tu' hittup, 'īhā 'ūp-texop xok kamah, ha nō hāpkot,

²³ ha' xakix xop yōg pip'ax tu' mōg, tu' xūy xexkah, tu mōnāyχop hittap 'Amanām pēnāhā', ha hāptox tu' xip pepi', pa Nay te 'Amanām mūtik pepi' tihi',

²⁴ yīp-texop te' xānā ka'ok, hu: "Yā 'āmāxap 'Amanām!' kaxīy, ha: "Putep mūn putup xate?" Kaxīy. Ha' nōy te: "Ūg 'ūm kuxa ka', 'ūkxūy hah. 'Āpu, Nay nū'kutnā', nūy yīpkutok hā 'ūgyōyōg 'ūm pix, kōnāg hā' pix. Yāk xūy xexka kuxap kopah." Kaxīy.

²⁵ —Pa 'Amanām te: "Xōnnū', Topa te xa hāmmaxnāhā hām tu', 'īhā Nay ha hāpkummugāhā', yā hōnhā' hittup pax 'īhā 'āxūy,

²⁶ ha hāpkanet xexka xip, ka mōnāy 'ūghah, ha kamak mōg 'ohnāg 'āha ku'u mōnāy." Kaxīy.

²⁷ —Hap-texop te: "Nay nū'kutnā 'ūktak pet hah.

²⁸ 'Ūktaknōy xohix te 5 tihi', yīy mō'kutnā hām tu', ka nū pip'ax ha' nūn, hu' xūy." Kaxīy.

²⁹ —Pa 'Amanām te: "Āmhok. 'A mō'kutnāp-tup'ah 'ātaknōy xop hah. Yā xip Topa tappet, nūy mō'kupix, nūy yīpkox pi'. Yā' puxi'." Kaxīy.

³⁰ —Ha' nōy te: Yāk-tōgnāg, 'ap punet'ah. 'Ūktaknōy xop kuxa mām 'ohnāg Topa yōg tappet kopah. 'Āpu, mō Nay kutnā', nūy taknōy xop ha' mōg. Pax pu tik xok xe'e', tu put pu hi', tuk taknōy xop pu hām'āktux, puxi' kuxa mām ka'ok hām'āktux'ax kopah, tu yāyhāhup, nūy hāpkummuk mīy kux." Kaxīy.

³¹ —Pa 'Amanām te: "Ūkuxa mām 'ohnāg Topa yōg tappet kopah, hu' mām hok tikmū'ūn hām'āktux'ax kopa kamah, tu tik xop tu putpu hi 'āpak'ax, 'īhā' kuxa mām 'ohnāg." Ta tu' kux.

17

Hāpkummuk mīy'ax xaxogāhā', pu tu' kux

¹ Yeyox te yāy yōg mūtik hāpkumep xop pu hām'āktux, hu:

—'Āmnīy xohix 'īhā hāpχopmā'ax kummuk te' kummukgā'ax, pa tikmū'ūn te hāpkummuk mīy, nūy nōy kummukgā', puxix Topa nōm xūyγā xexka.

² Yā' max nōm tik te' kummukgā mūg, nūy mīkax xexka hīy 'ūmāykox tu', tu kōnāg xexka kopa tu' xok, ha' kummuk nōm te tikmū'ūn kutōgnāg pu hāpkummuk mīy'ax yūmmūgāhā'.

³ Ōg pa 'āti!' Ānōy te hāpkummukgāhā'. Āpu' mānōg, pu yāyhāhup, ha ta xaxogā'.

⁴ Ānōy te xa hāpkummukgā pax, tu xe' mīy pu tu 7, ṭhā xa tu' xak pu kummugā'ax xaxogā'. Āpu 'ānōy kuxa ka', nūy hāpkummuk mīy'ax xaxogā', pu tu kux. Kaxīy.

Ūkuxa yūm ka'ok

⁵ Ha yāy yōg xop te:

—Ūgmū kuxa mām kutōgnāg. Āpuk mū kuxa māmā', pu tu mām ka'ok. Kaxīy.

⁶ Ha Yeyox te:

—Ok 'ākuxa mām kutōgnāg? Pēnā mīm xexka kup 'āxet'ax mōytat, ha mīm xap kutōgnāg. Pax xa kuxa mām kutōgnāg kaxīy, hu ta mīm xexka kup nōy piget pu' xat, hu: "Hām tu yāy xut, nūy kōnāg xexka kopa 'āxip, nūy kōnāg kaka yōg hām kopa 'āxok," kaxīy, puxix mīm xexka kup yīpkox pi', nūy' mīy. Kaxīy.

Kāmānat hām'ax

Tu xe:

⁷ —Ōg kāmānat te hāpxa', pe mūnūytut pēnā', tu 'āmnīy hā putpu' nūn 'āpet tu', pāyā xate' xapit hok pu yūhūm, nūy xit.

⁸ Āmhok, pāyā' xat, hu: "Hāpxop 'ūm puk, tu mōktu max, tu hāpxop ke'et, tu kānēy yīmū' xak-nāy 'ūkxit. Ūkxit kux yīy ta 'āxit 'ūk-nāy tu xix xo'op." Kaxīy.

⁹ Tu 'ōg kāmānat pu hām'āktux hok, nūy: "Puxi', 'āhām max," kaxīy. Āmhok.

¹⁰ Kaxīy 'āxop yā Topa hā kāmānat xop. Topa xat'ax xohix pu 'āyīpkox pip, xapix tu hām'āktux, hu: "Ūgmūg hām kummuk Topa pu', 'ūxat'ax mīy puxehngā tu.'" Kaxīy.

Yeyox te tikmū'ūn xax kunut xop hitupmāhā'

¹¹ Tu ta hāpkumep, tu kōmēn Yenoyanēn ha' mōg, ha hāpxexka Xamānit te' keppa' yūm, xix hāpxexka nōy Ganinet te' xām pa' yūm.

¹² Tu' mōg tu mōktu' xupep xip tu xexka tu', ha tik te 10 pip, tu pakut, tu yāy xax kunutnām, kayax punethok tu', hāptox tu' pip xip'ax tu',

¹³ tu' xānāhā', hu:

—Yeyox, Notot! Ūgmū kuxa ka'! Kaxīy.

¹⁴ Ha' pēnāhā', tu:

—Mōg, 'āmānēx xop ha mōg pu 'āpēnā'. Kaxīy.

Ha' mōg. 'Ūmōg, ṭhā' hittup, ha' xax tap tup xupep tu max,

¹⁵ Ha tik puxet yā hāpxexka Xāmānit yōg, yā' puknōg, tu yāy xax tap max pēnāhā', yī'

putpu' nūn, tu' yīy ka'ok, tu Topa max 'āktux, 'ūhittup tu',

¹⁶ tu' kopaxux ha' nāhā', tu Yeyox pu hām'āktux, hu: 'Āmax xe'ēgnāg! Kaxīy.

¹⁷ Ha:

—Tik xohix te 10 hittup. Pi'yā' pip nōm tix xohix te 9?

¹⁸ Tu putpu' nūn 'ohnāg, tu Topa max 'āktux 'ohnāg, pāyā' puknōg puxehngāg te Topa max 'āktux. Kaxīy.

¹⁹ Tu' puknōg pu:

—Āyok, nūy mōg, 'ākuxa yūm ka'ok, yīy Topa te 'āhittupmāhā'. Kaxīy.

Topa te yāy yōg tikmū'ūn xat putup

²⁰ Hāpxip kutōgnāg ṭhā Yeyox te hām'yūmmūgāhā', yīy Paniye yōg xop te' yīkopit, hu:

—Hām 'ūm ṭhā Topa te hām xexka xohix yōg tikmū'ūn xat putup hām tu'? Kaxīy.

Ha:

Tikmū'ūn te' xak, tu' pēnāp-tup,

²¹ 'A hām'āktux putup'ah, hu: "Hēnā', 'ūxip nūnte,'" kaxīy. Āmhok. Xix 'ap hām'āktux putup'ah, hu: "Pēnā', 'ōnte' xip," kaxīy. Āmhok. Tikmū'ūn te' pēnā' 'ohnāg ṭhā Topa te yāy yōg tikmū'ūn xat. Āmhok. Yā Topa te tikmū'ūn kuxa kopa' xat. Kaxīy.

²² Tu yāy yōg mūtik mōg xop pu hām'āktux, hu:

—Ūgmūn yā Tikmū'ūn Kutok, ha 'āmnīy punethok nōg putup, ṭhā xe 'āxop tek mūn pēnāp-tup, pāyā' 'ak pēnā'ah,

²³ ha tikmū'ūn te xa hām'āktux putup, hu: "Hēnā', Yeyox xip," kaxīy. Ha' nōy te: "Pēnā', 'ōnte' xip," kaxīy. Pak xip putup'ah. Āmōg hok nūy pēnā'. 'Ak xip putup'ah.

²⁴ Ūgmūn yā Tikmū'ūn Kutok, huk nūn putup mō'ka'ok, 'ūgnūn putup tex yānām xexka putuk, ha hāpxexka xohix yōg tikmū'ūn tek pēnāp-tup,

²⁵ pa hōnhāk xūy nām putup hāmāxap, ha tikmū'ūn tek putup nōg.

²⁶ Hōmā tikmū'ūn hittap te mōnāyxop Nōe putup nōg kamah,

²⁷ tu' xit, tu' xo'op, tu yāytaha', tu hām'yāxatamuk xohix hā' yīpkox pip 'ohnāg Topa yōg hām'āktux pu', tu mōktu Nōe te mīptut xexka hā mō'nāhā', nōm mīptut te kōnāg hā' mōg ha mō'nāhā', ha tex xexkah, ha kōnāg kox xohix nū'xip, tu' hāmnaq hā' xupep nām, ha mōktu tikmū'ūn xohix xakix kōnāg kopah.

²⁸ Ha tikmū'ūn hittap te mōnāyxop No putup nōg kamah, tu' xit, tu' xo'op, tu hāpxop hāmenax, tu' hām, tu' pet punethok, tu hām'yāxatamuk xohix hā' yīpkox pip 'ohnāg Topa yōg hām'āktux pu',

²⁹ tu mōktu No te kōmēn Xonōm nīm, ha hāpxip 'ohnāg ṭhā kuxap te pexkox tu' xakot,

xix mīkax xap pukpex te pexkox tu' nāhā', tu tikmū'ün koxyōy, 'ūpuk ha' nōa'.

³⁰ Kaxīy tikmū'ün te hāpɣopmāp-tup 'īhāk nūn, hak mūn yā Tikmū'ün Kutok,

³¹ tuk nūn 'īhā xupmān mō'ka'ok, pe yā mīptut kopa' pip, pe yā hām tu tihī'. 'Ūhip hok, 'ōg hāpɣop nūm, pūyā' pi', pāyā 'āxupmān mō'ka'ok, ka 'āxok.

³² Mōnāyɣop te xa No xetut 'āktux, tu' yōkānām hu' xok, 'ūxaxok hok nō'ōm!

³³ Tikmū'ün xak, pūyīy hī, puxix tu' xok, pa tikmū'ün xok puxix hī xe'ēgnāg.

³⁴ 'Āte xa hāpɣe'e 'āktux, 'ūgnūn putup, 'īhā tikmū'ün 2 mō'yōn, ha yā mōgāp-tup 'ūpɣet, tu' nōy nīm putup,

³⁵ ha 'ün 2 te xuxnāg xetox xap koxyōy putup, nūy nō pām mīy, hā mōgāp-tup 'ün puxet, tu' nōy nīm putup,

³⁶ ha tik 2 hām putup, hā mōgāp-tup tik puxet, tu' nōy nīm putup. Kaxīy.

³⁷ Ha' yōg xop te Yeyox yīy'ax 'āpak, hu' yīkopit, hu:

–Yāyā', pi'ya' xip nūhū'? Kaxīy.

Ha:

–Kuptap xop te yāy tu nū' nāhā' nūy xokxax tu hāmhūmnāg pip. Kaxīy.

18

Tik pa te hāmyūmmūg xix 'ün hokyūm

¹ Yeyox te hāmyūmmūgāhā hām'āktux'ax hā, nūy Topa yōg hāpɣopmā'ax yūmmūgā', pūyīy tikmū'ün Topa pu hām'āktux pax, nūy kuxa teknōg hok, tu:

² –Tik pa te hāmyūmmūg, hu' xip kōmēn kopah, tu' kuxānōg 'ohnāg, hu Topa yīpkutuk hok, xix tikmū'ün yīpkutuk 'ohnāg.

³ Ha kōmēn kopa' xip 'ūhūn, tu' hok yūm, tu 'āmnīy xohix hā tik pa te hāmyūmmūg ha' mōg, nūy ta tu' xak, hu: “'Āpu, mōknīnām. Tikmū'ün kummuk hupmā, pu tu 'ā hāpkummugā kux,” kaxīy. Pa tik te hāpkohe' mīy, tu' kuxyā 'ohnāg.

⁴ –Ha 'āmnīy xohix hā tik te' kuxyā 'ohnāg, pa 'āmnīy xohix hā 'ün nūn, nūy ta tu' xax, pu hāpkummuk mīy kuxyā', hu 'āmnīy xohix hā' mīy, tu mōktu tik te yāy pu hām'āktux, hu: “'Āte Topa yīpkutuk 'ohnāg, tu tikmū'ün puk yīpkox 'ohnāg kamah,

⁵ pa 'ün te 'a' xak pu' kummuk mīy xop kuxyā', tuk kuxa teknōg, 'ün nūn kux 'ohnāg hah. Puxi'. 'Āte 'ün mō'nīnām putup, puk putox kummugā hok.” Kaxīy. Ta tu' kux.

⁶ Tu xe:

–Tik pa te hāmyūmmūg, pāyā hāpkohe' mīy, ha 'ün te ta tu' xak, tu xe tu' xak, tu' hup 'ohnāg, tu mōktu tik te mō'nīnām.

⁷ 'Ok Topa te yāy yōg tikmū'ün mō'nīnām hok, mō nōm yāy xe'ēgnāg tu'? Hamūn. Yā' yīmōgatux, tu mō'nīnām xe'ēgnāg, nōm xop te 'āmnīy xohix hā ta tu' xak, xix hāptup xohix hā, pu tu mō'nīnām.

⁸ 'Āte xa hāpɣe'e 'āktux: Topa te hāpkummuk mīy xop kuxyāhā', nūy yāy yōg tikmū'ün mō'nīnām mō'ka'ok. 'Ūgmūn yā Tikmū'ün Kutok, tuk nūn putup putpu'. 'Ok tikmū'ün kuxa mām putup 'ūgkopa 'īhāk nūn? 'Īntu!' Kaxīy.

Paniye yōg tihik, xix tik te gohet pupi tāyūmak pop

⁹ Tu hām'āktux nōy hā hāmyūmmūgāhā', nūy Topa yōg hāpɣopmā'ax yūmmūgā', pu tikmū'ün yāy pe'paxex max hok, nūy nōy pe'paxexk-tōgnāg hok kamah, tu:

¹⁰ –Tik 2 mōg, tu Topa pet xexka ha' mōg, nūy Topa pu hām'āktux, ha tik puxet Paniye xop yōg, xi' nōy te gohet pupi tayūmak pop,

¹¹ ha Paniye yōg tik te yāy pe'paxex max, tu Topa pu hām'āktux, tu yāy pu' xuktux, hu: “Topah, 'ūgmūn max. Tikmū'ün xohix kummuk pax, tu hāpɣop hā' xupxet, xi' nōy hā' xupxet, tu hāpkummuk mīy, nū tik kummuk putuk, tik te gohet pupi tāyūmak pop putuk, yā' kummuk, ha tak mūn max.

¹² 'Ūkxit hok xegōn pet xohix 'īhā', xix kīn pet xohix 'īhāk xit hok, nūy ta Topa pu hām'āktux, tu yōg tayūmak yāg 'āte Topa pu' hōm, yā tayūmak xohix te 10 yōgnū', hu Topa pup-xet hōm. Puxi. 'Ūkux.” Kaxīy. Pa Topa te nōm pe'paxex kummuk.

¹³ –Ha tik te gohet pupi tayūmak pop, tu yāyhāhup, tu hāptopa tu' xip 'ūgnīha', tu Topa yīpkutuk, hu pexkox pēnāp-tup 'ohnāg, tu nū' xup, tu yāy kep to'ok, tu: “Topa, 'ūg 'üm kuxa ka', 'āte hāpkummugā pax hah.” Kaxīy. Ta tu' kux.

¹⁴ Tu xe:

–'Āte xa hāpɣe'e 'āktux: Tik te gohet pupi tayūmak pop, tu te yāy pet ha' mōg putpu', ha Topa te' kuxa yūmmāhā', pa Paniye yōg tik kuxa yūm 'ohnāg, Topa te' kuxa yūmmā 'ohnāg hah. Tik te yāy xexka pe'paxex, puxix Topa' hupmā', ha tik te yāk-tōgnāg pe'paxex, puxix tu yāyhā' xexkah. Kaxīy.

Yeyox xix kakxop

¹⁵ Ha 'ün xop tek-tok tat Yeyox hah, pu' xupit, pūyīy kakxop pu hām 'üm maxnā', ha yāy yōg mūtik hāpkumep xop te' pēnāhā', tu 'ün xop mānōg,

¹⁶ pa Yeyox te' xānāhā', hu:

–Mā'. Pūyā kakxop nū 'ūghah, tu' tux hok pūyīy nū', yā Topa te' xat putup kakxop kuxa tu'.

¹⁷ 'Āte xa hāpɣe'e 'āktux, 'ūxaxok hok: Kakxop yīpkox pip Topa yōg xat'ax pu', ha Topa tep-tup pu tikmū'ün yīpkox pip kamah, kakxop putuk, nūy Topa yōg tikmū'ün kopa' pi'. Kaxīy.

Ūp-texop xexka

¹⁸ Ha Yoneo yōg tik te' xat'ax, tu' nūn, tu Yeyox yīkopit, hu:

—Notot, xate yümmügä'ax, yä 'āmax. 'Āteptep mün mīy'ax nūy 'ūghi xe'ēgnāg mō'kumak mōg? Kaxīy.

¹⁹ Ha:

—Tep tu xatek mün 'āxet'ax max? 'Ap xip'ah tikmū'ün kuxa max. Topa mün puxehnāg max.

²⁰ Xate Topa yōg xat'ax xohix yümmüg, hu: "Ānōy' hā' xupxet hok, xip-tex hok, xix 'ānōy yōg hāpxop hā' xupxet hok, xi' koit hok, xix 'ōg' ātak pu 'āyīpkox pi', xix 'ātut pu 'āyīpkox pi.'" Kaxīy.

²¹ Ha tik te:

—'A' yümmüg. Hāmyāxatamuk xohix hā 'āte' xat'ax yümmüg, tuk yīpkox xip. Kaxīy.

²² Ha' xupak, tu:

—Pāyā hāpxopmā'ax puxet xate' xaxok, 'ap mīy'ah. Mōy, nōmenax 'ōg hāpxop xohix, nūy tayūmak pop, tu' nīm 'ūhok xop pu', ha Topa te pexkox yōg hāpxop xa' xex putup pexkox kopa, ha nūn tu nūktu 'Ūkpe mōg. Kaxīy.

²³ Ha tik te hām'āpak, tu' kuxa hittup 'ohnāg, 'ūp-texop xexka tu', tu Yeyox nīm.

²⁴ Ha Yeyox te' pēnāhā', tu:

—'Ūp-texop te yōg hāpxop nīm putup hok, puxix Topa yōg xat'ax pu' yīpkox hok kamah.

²⁵ Ha xoktut kāmēn te 'āmuxnāg ta kup kox hā mō'tat 'ohnāg, yā hāpxopmā ka'ok miāx, pāyā 'ūp-texop te Topa pu' yīpkox xip, yā hāpxopmā hok xe'ēgnāg. Kaxīy.

²⁶ Ha yāy yōg xop te' xupak, tu:

—'Ū 'üm mün te Topa pu' yīpkox xip'ax? Yā hāpxopmā ka'ok xexkah. Kaxīy.

²⁷ Pa Yeyox te:

—Tikmū'ün 'a' ka'ok'ah, pa Topa mün ka'ok xexkah, nūy tu hāpxopmā ka'ok xe'ēgnāg. Kaxīy.

²⁸ Ha Pet te:

—Pēnā', 'ūgmüg yāy pet nīm, nūy 'āpek mōg. Kaxīy.

²⁹ Ha:

—'Āte xa hāp xe'e 'āktux: Tikmū'ün te yāy pet nīm, tu' xetut nīm, tu' tak yīmot nīm, tu' tūy nīm, tuk-tok nīm, tu' nīm nūy yāyhā Topa yōg tikmū'ün, puyīy Topa nōm xat,

³⁰ puxix Topa nōm pu hāmmax hā' yānān putup hām tu', ha' hi xe'ēgnāg putup pexkox tu', ha' kux 'ohnāg. Kaxīy

Yeyox te' xok'ax 'āktux, xi' putpu hi'ax

³¹ Ha' mōg, ha Yeyox te yāy yōg tik xop xapit, tu:

—Pēnā', pūm, yūmū mōg kōmēn Yenoyanēn tu', pu tik kummuk 'ūkputex. Hōmā tik xop te Topa pupi hām'āktux, tu kax'āmi tap-pet tu', tuk mün Tikmū'ün Kutok 'āktux. Yā Topa yōg hām'āktux hittap hāk kummugāp-tup,

³² ha puknōg xop hak mōgāp-tup, pu 'ā tu yāyhāhupmā', tu' yīy hep nū'xok putup,

³³ tu 'ā' kix kakixnāg putup, tuk putex putup, 'ūtik xok xe'e', ha 'āmny tikoyuk nōg 'Thā putpuk hip-tup. Kaxīy.

³⁴ Pa yāy yōg tik xop te hāmyümmüg 'ohnāg. Hām'āpak, tup-tox ka'ok.

Yeyox te tik pa hok pu' pa nāhā'

³⁵ Ha ta' mōg, tu mōktu mōxa kōmēn Yenikot hāmhūmnāg tu', ha tik pa hok yūm, tu putat yīka te tu' yūm, nūy hāpxop hok xak,

³⁶ tu hām'āpak nīm 'Thā tikmū'ün xohix xexka nūn, tu' yīkopit, hu:

—Tep ha' mōg tikmū'ün xohix? Kaxīy.

³⁷ Ha:

—Kōmēn Nāyane yōg Yeyox te putat ha' nūn. Kaxīy.

³⁸ Ha tik pa hok te' xānāhā', hu:

—Yeyox, 'āmūn yā mōnāy xop hittap Namix hā 'āmōkputox, 'ūg 'üm kuxa ka'. Kaxīy.

³⁹ Ha tikmū'ün nōy te' keppa' pip, tu:

—Puxi', 'āyiy hok. Kaxīy.

Pa' yīy nōy ka'ok, hu:

—'Āmūn yā mōnāy xop hittap Namix hā 'āmōkputox. 'Ūg 'üm kuxa ka'. Kaxīy.

⁴⁰ Ha Yeyox tu' hup, tu' xat, pu nūnnā', hu nūnnāhā', ha' yīka' xip, ha Yeyox te:

⁴¹ —Xatep-tek putup 'āte xa' mīy? Kaxīy.

Ha:

—Notot, 'Āte hām 'üm pēnāp-tup. Kaxīy.

⁴² Ha Yeyox te:

—'Āpu, hāmpēnā'. 'Ākuxa yūm ka'ok 'ūgkopah, yīy Topa te 'āpa maxnāhā'. Kaxīy.

⁴³ Hāpxip 'ohnāg 'Thā hāmpēnā max, tu' kuxa hittup xexkah, tu Topa max 'āktux, xix Topa ka'ok 'āktux, ha tikmū'ün te' pēnāhā', hu Topa max 'āktux kamah.

19

Yeyox xix Yakeo

¹ Yeyox te kōmēn Yenikot tu' xupep, tu' kotit ha' mōg,

² ha tik 'āxet'ax Yakeo xip. Hamūn te puknōg yōg gohet pupi tayūmak pop, tu' tikmū'ün yōg tayūmak pop, tup-texop xexkah,

³ tu Yeyox pēnāp-tup, nūy tu' yümmüg, pāyāk-tōgnāg, 'a' tox'ah, ha tikmū'ün xexka punethok, yīy' pēnā 'ohnāg.

⁴ Tikmū'ün xop mōg 'Thā tik yokoma' mōg, tu mōktu' nōy hip, tu' kup xexka piget pepi' mōg, tu' xip ha mōkahmāg, nūy Yeyox pēnā', putat ha' nūn hah,

⁵ tu' xupep, tu mōkahmāg tu' penāhā', tu Yakeo pu hām'āktux, hu:

—Yakeo, hām tu' 'ānū mō'ka'ok, Hōnhā 'ūkxip'ax 'āpet kopah. Kaxīy.

⁶ Ha' kuxa hittup, tu hām tu' nāhā', tu hām tonnok, tu yāy pet ha' mōgāhā', 'ūkuxa hittup tu'.

⁷ Ha tikmū'ün te' pēnāhā', tup-tup nōg, hu:

—Yeyox te tik kummuk hã 'xape', tu tik te hãpxop hã xupxet mütik mög, nüy xihip, nüy tu xit. Kaxîy.

⁸ Ha' xit kux 'ihã Yakeo yok, tu hãm'ãktux Yeyox pu, nüy tikmü'ün xupax, tu:

—Yögnü hãpxop xohix 'äte' koxip putup, nüy xahix nîm 'ühok xop pu'. Hömã 'äte' nöy yög tayûmak puxet hã' xupxet, koxix hõnhã nõm pu tayûmak tehomi te 4 popmãp-tup, 'ünöy yãñã tu'. Kaxîy.

⁹ Ha Yeyox te:

—Hõnhã Topa te 'ãkuxa kummuk xit, nüy kuxa max tat 'üyãñã tu', xix 'ãxape kuxa kummuk xit kamah, 'ãxape te 'ãpet kopa tihî'. 'ãmün yã mõñãyxop hittap 'Amanãm hã 'ãmõkputox kamah.

¹⁰ 'Ügmün yã Tikmü'ün Kutok, tuk nün, nüy tikmü'ün xax, nüy xaxnãm, nõm tikmü'ün te Topa yög putat xak, 'ü mögã, puyîy Topa yög putat ha' mög 'üxeheh. Kaxîy.

Tayûmak 'ãnuk te

¹¹ Ha hãm'ãpak tikmü'ün te', 'ihã Yeyox te hãm'ãktux'ax hã hãmümmügãhã', nüy Topa yög hãpxopmã'ax yümmügã', puyîy Topa pu hãpxopmã max, ha kõmën Yenoyanën hãmhümnãg tu Yeyox xip, tu yã yög xop yümmügãhã', ka' pe'paxex, hu: "Topa te tikmü'ün xop xohix xat putup nõmhã", pãyã 'ap xohix xat'ah nõmhã,

¹² yîy Yeyox te:

—Tik te' xat'ax yã kutok mög hãpxexka nöy tu', hãptox tu' mög, nüy yãyhã hãpxexka yög tik te tikmü'ün xohix xat, nüy hãmüxatamuk kutõgnãg nõg, puxix putpu nü'.

¹³ Tu kãmãnat te 10 xãñãhã', tup-xet pu tayûmak puxet hõm, xix kãmãnat tuk-nãy tu' hõm tayûmak puxet, tu mõktu xohix pu tayûmak puxet hõm, tu: "Hãpxop hãmenax nüy tayûmak punethok pop, tu mõktu 'ükxupep put pu'." Kaxîy.

¹⁴ —Tu' mög, pãyã 'üyög tikmü'ün tep-tup nõg, tu tik xop mõ'pok hãptox tu', 'õm xat'ax ha mõ'pok, nüy nõ: "'Ügmü'äte 'ãp-tup nõg. 'Äpu, xihip hãptox tu'. Putpu 'ãnün hok, nüy mü'ã xat.'" Kaxîy.

¹⁵ —Pa hãmüxatamuk kutõgnãg nõg 'ihã' xupep putpu', tu kãmãnat te 10 xãñãhã', nõm xop te' yög tayûmak pop, tu hãpxop hãmenax xi' nõ' nöy yãñãn nüy tayûmak xexka pop, ha' xat'ax te tik xop te 10 xãñãhã nüy' yîkopit, nüy tayûmak xohix te xîy tik xop te' pop yümmüg.

¹⁶ Ha kãmãnat hãmãxap nün, tu: "'Äte 'ög tayûmak hã tayûmak nöy te 10 pop,'" kaxîy.

¹⁷ Ha' xat'ax te:

—Yã max, 'ãhãm max. 'Äte mõ'ãkutnãp-tup kõmën xohix te 10 hah, xa pënãñã' xip. Kaxîy.

¹⁸ —Ha kãmãnat tuk-nãy tu' nün, tu: "'Ög tayûmak hã 'äte tayûmak nöy te 5 pop.'" Kaxîy.

¹⁹ —Ha: "'Äte mõ'ãkutnãp-tup kõmën xohix te 5 hah, xa pënãñã' xip.'" Kaxîy.

²⁰ —Ha kãmãnat te ka'ax tu' xip, tu' nün, tu: "Nõ pa 'ög tayûmak. 'Äte topixxax hã' kîy, tu' xaptop,

²¹ 'ügkuxãñög tu'. 'Äte 'ãyîpkutuk, 'ãmün xupkümüy hah. Xate 'ãnöy yög tayûmak paha', ha tik nöy te hãpxop xap xok, ha 'ãmün te nõ nünãhã.'" Kaxîy.

²² —Ha' xat'ax te: "'Ähãm kummuk. 'Äte 'ãkopit'ax, 'ög hãm'ãktux'ax hã 'äte 'ãhãm kummuk yümmüg. Xatek xupkümüy 'ãktux, tu 'ãtu hãpxop nünã 'ãktux.

²³ Pax xa yögñü tayûmak ma'ãg kopa' xex, pu tikmü'ün nöy hãpxop hãmenax, puxix tayûmak tu xohix punethok nõmhã." Kaxîy.

²⁴ —Tu tikmü'ün te' yîmmap tu 'õm pip pu hãm'ãktux, hu: "Tayûmak xut tik tu', tu tik nöy pu' hõm, tik te tayûmak te 10 pop pu' hõm." Kaxîy.

²⁵ —Ha tikmü'ün te: "Yã' pip tayûmak punethok, yã' pip tayûmak te 10." Kaxîy.

²⁶ —Ha: "'Äte xa hãpxe'e 'ãktux: Tikmü'ün te hãpxop punethok pip ha hãpxop nöy nã' mög'ax tu mõktu yã' xohix, ha hãpxop xohix xut'ax, tu' hok tu'.

²⁷ Tik xop nünã nõmhã, tik xop tek putup nõg, tuk mün te' xat putup nõg. 'Äpu, 'ününã', nüy 'ügkeppa' kix." Ta tu' kux.

Yeyox te kõmën Yenoyanën tu' xupep

²⁸ Tu hãm'ãktux kux, 'ihã' mög, tu kõmën Yenoyanën ha' mög, ha' yög mütik hãpkumep xop te' pe' mög,

²⁹ tu' mög, tu' xip'ax Metpaye te hãmhümnãg tu' pip, xi' xip'ax Metãn te hãmhümnãg tu' pip, tu yîktix 'Onimet yîka' pip, ha yã yög tik 2 mõ'pok, pu mög nü peheh, tu:

³⁰ —'Ämög xip tu xexka tu', tu yohmënnãg tuk tup pënãp-tup, ha tikmü'ün 'üm te' yîmü' yüm hok. 'Üxut, nüy nünã'.

³¹ Tik te 'ãyîkopit, 'ãpu, tu hãm'ãktux, hu: "'Ügmüg xuxyã tep-tup, puyîy nõ yîmu' yüm." Kaxîy.

³² Ha' mög, tu Yeyox te' xat'ax hã' mîy.

³³ Tu yohmënnãg xut, 'ihã yohmën xuxyã nün, tu:

—Tep tu' xut 'ãxop te nü yohmën? Kaxîy.

³⁴ Ha:

—'Ügmüg xuxyã tep-tup, 'üg müg xut, yîk tux hok 'ü xut. Kaxîy. Ha' tux hok, ha' hîy'ax koah.

³⁵ Tu Yeyox ha' nünãhã', tu topixxax te yohmën yîmü' yüm, tu' yüm,

³⁶ tu' mög, ha tikmü'ün te nü yã xex topixxax putat kopah, ha Yeyox te nüktu yîmü' mög,

³⁷ tu yīktux 'Onimet tu hām̄hūmnāg tu' xip, ha tixmū'ūn xohix xexka te Yeyox mūtik hāpkumep, tu' kuxa hittup xexkah, tu Topa max 'āktux, xix Topa ka'ok 'āktux, tu' yīy ka'ok hāpxopmā max xe'ēgnāg pēnāhā tu',
³⁸ tu hām'āktux, hu:

—Pūyā Topa tik te' xat'ax pu hāmmax nā'. Yā yāy 'āxet'ax tu hōm pu nū', ha pexkox kopa' pip xop kuxa mām, yā Topa xexka xe'ēgnāg. Kaxīy.

³⁹ Ha Paniye yōg xop te tikmū'ūn mūtik pip, tu Yeyox pu hām'āktux, hu:

—Notot, 'āpu 'ōg tik xop māmōg, pu yīy hok. Kaxīy.

⁴⁰ Ha:

—Āte xa hām'āktux: Pax pu tik xop yīy hok, puxix mīkaxxap yīy ka'ok, 'ūhittup tu'. Kaxīy.

Yeyox te Kōmēn Yenoyanēn ha' potaha'

⁴¹ Tu' mōg, tu kōmēn Yenoyanēn te hām̄hūmnāg tu' xip, tu kōmēn pēnāhā', hu' potaha',

⁴² tu kōmēn yōg tikmū'ūn pu hām'āktux, hu:

—Pax xa hām̄yūmmūg, tu hāmmax xak, nūy tu kuxa mām, puxix Topa xa hāmmaxnā', pāyā hām̄yūmmūg 'ohnāg xate',

⁴³ ha hām̄yāxatamuk 'ūm nōg 'hā' puknōg gāy xop te kōmēn yīmmap tu' pip putup, ha 'ānū'pap-tup, pāyā 'ānū'pa 'ohnāg,

⁴⁴ ha kōmēn koxyōy putup, xix tikmū'ūn te kōmēn kopa' pip kix putup, xix kaxxop, tu mīptut yōg tiyot xohix koxyōy putup, 'āxop te hām̄yūmmūg 'ohnāg hah. Topa te 'āha' nūn, pāyā 'āxop te hām̄yūmmūg 'ohnāg. Kaxīy.

Yeyox xip Topa pet xexka kopah

⁴⁵ Hāpxip 'ohnāg 'hā Yeyox te Topa pet xexka ha' mō'nāhā', tu tikmū'ūn te' kopa' pip xop papuk, nōm xop te hāpxop hāmenax Topa pet xexka kopa' papuk,

⁴⁶ tu:

—Hōmā tik te Topa tappet hā' kax'āmi, hu: "Tikmū'ūn te Topa pet xexka hā' mōxakux nūy Topa pu hām'āktux," kaxīy, pāyā 'āxop tep-tūynāg, ha yāyhā hāpxupxet pet. Kaxīy.

⁴⁷ 'Āmnīy xohix hā Yeyox te tikmū'ūn yūmmūgāhā' Topa pet kopah, ha Yoneo yōg 'āmānex xop, xix hām̄yūmmūg xop, xix tikmū'ūn xexka xop te Yeyox putup nōg, tup-tex putup,

⁴⁸ 'hā tikmū'ūn xohix kuxa mām ka'ok Yeyox yōg hām'āktux'ax kopah, yī' xexka xop te' xaptop, tu' gāy.

20

Topa te Yeyox tu' hōm yāy 'āxet'ax

¹ 'Āmnīy puxet 'hā Yeyox xip Topa pet xexka kopah, tu tikmū'ūn yūmmūgāhā', xix hām'āktux max 'āktūx, ha Yoneo xexka xop nūn, xix 'āmānex xexka xop nūn, xix

hām̄yūmmūg xop nūn, xix tikmū'ūn xat'ax xop nūn,

² tu Yeyox yīkopit, hu:

—'Ū 'ūm te xa' hōm yāy 'āxet'ax, xa hām̄yūmmūgā tikmū'ūn? Kaxīy.

³ Ha' nōy yānān tu' yīkopit, hu:

—'Āpu 'ā' hām'āktux:

⁴ 'Ū 'ūm te Yoām nū'kutnāhā', pup-tox pix tikmū'ūn? 'Ok Topa te nū'kutnāhā', pe tikmū'ūn te nū'kutnāhā'? 'Āyīy. Kaxīy.

⁵ Ha' xexka xop te yāy pu hām'āktux hā' nōy yānān, tu:

—Yūmū'ātep-putep mūn 'āktux'ax? Pe yūmū'āte Topa te' xat 'āktux, puxix tu hām'āktux, hu: "Putep-te xīy 'ākuxa yūm 'ohnāg 'ūp-tox pix'ax kopah?" Kaxīy.

⁶ Pe yūmū'āte tikmū'ūn te' xat'ax 'āktux, puxix tikmū'ūn mīkaxxap pop, nūy nō' yūmūg kix. Yoām putup pax tu', yā' xohix te hāmpe'paxex, hu: "Yoām te Topa pupi hām'āktux." Kaxīy.

⁷ Hu' xexka xop te hām̄yūmmūg, pa hām'āktux 'ūm putup'ah, hu:

—'Īntu', 'ap yūmmūg'ah. Kaxīy.

⁸ Ha Yeyox te:

—'A' āte xa hām'āktux putup'ah kamah, tu 'ū 'ūm te 'ā' xat 'āktux putup 'ohnāg. Kaxīy.

Kāmānat xop Kummuk

⁹ Tu hām'āktux hā tikmū'ūn yūmmūgāhā', nūy Topa yōg hāpxopmā'ax yūmmūgā', nūy yāy xok'ax 'āktux, 'hā' xuxyāk-tok 'āktux, hu:

—Tikmū'ūn 'ūm te mīnta 'op xap xok punethok, tu yāy yōg hāpxa'ax hōm tikmū'ūn nōy pu', ha tik te pupi pagok, ha' nōy yōg hahām, ha ta hāpxexka nōy ha' mōg, tu mōktu mōxaha', tu hām̄yāxatamuk xohix hā' nox xip,

¹⁰ ha hām̄yāxatamuk xohix nōg, 'hā hāpxa'ax xuxyā te mīnta 'op yōg tayūmak xak, hu yāy yōg hām tu kāmānat nū'kutnāhā', tu nū'kutnāhā', pūyīy mīnta 'op yōg tayūmak pop, ha' nūn tu nūktu xupep, pāyā tikmū'ūn xop te' kix kakixnāg, tu yā' hok mō'kutnāhā yāy pet hah.

¹¹ Ha nōm xuxyā te xe nū'kutnāhā', tu kāmānat nōy nū'kutnāhā' nūy tayūmak pop, ha' nūn tu nūktu xupep, pāyā tikmū'ūn xop te' kix kakixnāg kamah, tu' hupmāhā', tu yā' hok mō'kutnāhā yāy pet hah.

¹² Ha hāpxa'ax xuxyā te xe nū'kutnāhā, ha tikmū'ūn te' kix kamah, xix mō'kutnāhā'.

¹³ Yī' xuxyā te: "Āte putep mūn mīy'ax? Tikmū'ūn te kāmānat xop putup nōg, tu' yīpkox 'ohnāg. Nāy, 'āte 'ūgkutok pīt mō'kutnā'ax, nōm te māxap mō'kutnā'ax, pūyīy tikmū'ūn nōm tu' yīpkox pī'. 'Ūxexka pe'paxex tu.'" Kaxīy. Tu nū'kutnāhā', ha' nūn, tu nūktu xupep 'ūtak yōg hahām tu'.

¹⁴ —Ha tikmū'ūn te hām pupi pagok, tu' kummuk, tu hāpxa'ax xuxyāk-tok xe'e pēnāhā', tu yāy pu hām'āktux, hu: "Ōhōm

'ūxuxyāk-tok te māxap. 'Āpu, yūmūp-tex, pūyīy yūmū yōg yāyhā hāpxa'ax." Kaxīy.

¹⁵ —Tu hāpxa'ax tu hāptopa mōgāhā', tup-tex, ha' xok. Putep mūn pe'āpaxex, putep mūn mīy putup mīnta xuxyā te'?

¹⁶ 'Ūnūn putup tikmū'ūn kummuk hah, tu' kix'ax, pu tu xakix xe'ēgnāg, tu mīnta yōg hāpxa'ax hōm putup tikmū'ūn nōy pu'. Ta tu' kux. Kaxīy.

Ha tikmū'ūn te' xupak, tu:

—'Āmhok! Pūyā Topa tux hok pu' hōm hok! Kaxīy.

¹⁷ Pa Yeyox te' pēnā ka'ok, tu:

—Hōmā tik te' Topa pupi hām'āktux, tu tap-pet hā kax'āmi', hu: "Tikmū'ūn te' mīptut xexka mīy'ax, tu mīm xexkap-tup nōg, pa Topa te' mīy mīptut māykup xix mīptut koxuk, yīy mīm xexka xe'ēgnāg." Kaxīy.

¹⁸ Tikmū'ūn te' nōm mīm xexka tu' nāhā', tu yāy putex, pa mīm xexka te' tikmū'ūn yīmū' nāhā', tu' koxoy'ax tu mōktu' xok xe'e'. Kaxīy.

Gohet puknōg pu tayūmak hōm

¹⁹ Ha tik te' hāmyūmmūg xop gāy, xix 'āmānex xexka xop gāy, tu Yeyox te' xuktux kummuk yūmmūg, tu' mūg putup nōmhā, nūy 'ūp-tex, pāyā tikmū'ūn yīpkutuk,

²⁰ yī' xexka xop te' hip, tu Yeyox pēnānā' pip, tu tik xop mō'pok, pu tu' pēnā max, yā' pa max, pāyā' kuxa kummuk, tu Yeyox yōg hām'āktux 'āpak, nūy yāy xexka xop pu' xuktux, xaptop hā hām'āktux'ax, pūyī' xexka xop Yeyox kupex, nūy mūg, nūy gohet yōg xonat pupi' mūg,

²¹ ha' pēnā'ax xop te' Yeyox ha' mōg, tu:

—Notot, xate tikmū'ūn yūmmūgā'ax, tu' yūmmūgā max, hak mū'āte' yūmmūg, ha xatep-tup tikmū'ūn xohix, tu hāpxe'e' āktux pax, hu tikmū'ūn xohix mōgāhā, hāmyok mīy hā nō mōgāhā'.

²² 'Āyīy. 'Ok Topa yōg xat'ax te' xat hok, 'ū puknōg yōg gohet pu tayūmak hōm hok, 'ok pe' xat 'ū tu' hōm? Kaxīy.

²³ Pa Yeyox te' nōm tik xop yā mō'āmā'ax yūmmūg, tu nōm pēnā'ax yōg hāmp'e'paxex yūmmūg, 'ap max'ah, yīy hām'āktux, hu:

²⁴ —'Ā' mūg tayūmak 'ānuk. Putep koxuk nūhū'? Kaxīy.

Ha:

—Gohet yōg tik te' xat'ax koxuk. Kaxīy.

²⁵ Yīy:

—Gohet pu' hōm gohet yōg hāpxop, xix Topa pu' hōm Topa yōg hāpxop. Kaxīy.

²⁶ Ha tik pēnā'ax xop te' yēy, tu' yīy 'ohnāg, Yeyox te' hāmyūmmūg, yī' yīy 'ohnāg.

Yeyox te' putpu hi'ax' āktux

²⁷ Ha Xanoxeo yōg tik xop nūn, ha nōm xop te' putpu tikmū'ūn hi' 'ohnāg' āktux, tu Yeyox yīkopit, hu:

²⁸ —Notot, xate tikmū'ūn yūmmūgā'ax. Hōmā mōnāyxop hittap Mōyyex te' xat'ax kax'āmi', tu: "Tik te' yāytaha', tu' xok, tuk-tok 'ohnāg, pūyā yāy taknōy 'ūxetut mūy, nūy yāy taknōy nōm xok pupik-tok put." 'Ūkux. Kaxīy.

²⁹ Tu xe hām'āktux, hu:

—'Ūtaknōy xop xohix te' 7 tihī' 'āxa', ha 'ōm te' māxap te' yāytaha', tu' xok, pāyāk-tok xip 'ohnāg,

³⁰ ha' taknōy tek-nāy tu' yāytaha', tu' taknōy nōm xok xetut mūg, tu' xok kamah, tuk-tok xip 'ohnāg.

³¹ Ha' taknōy tek-nāy tu', tu' taknōy nōm xok yōg xetut mūg, tu' xok, tuk-tok 'ohnāg, tu mōktu taknōy xop xohix te' 7 te' 'ūn mūg, tu' xok, tuk-tok 'ohnāg,

³² ha' taknōy xop xetut puxet xok, 'ūka'ax hā' xok 'āxa'.

³³ Hāptup mō'nāp-tup, 'īhā Topa te' putpu' hīnnāp-tup tikmū'ūn xakix xop. Tep te' xetut mūg'ax? Yā' taknōy xop xohix te' 7 te' 'ūn puxet hā' yīpcox. Kaxīy.

³⁴ Ha Yeyox te:

—Hōnhā tikmū'ūn te' yāytaha',

³⁵ pa Topa te' yāy yōg tikmū'ūn xexkānāp-tup, pu tu' hī' 'ap kux'ah, hu yāyap-tup 'ohnāg,

³⁶ tu' pexkox yōg nū 'pok xop putuk, yā Topa hāk-tok xop xe'e', 'ūhi putpu hah, tu xakip-tup 'ohnāg,

³⁷ ha mōnāyxop hittap Mōyyex te' putpu hī'ax' āktux, 'īhā Topa yā mōnāyxop yōg Topa 'āktux, tu 'Amanām yōg Topa 'āktux, xix 'Iyak yōg Topa 'āktux, xix Yako yōg Topa 'āktux,

³⁸ yīy Topa te' tikmū'ūn hī'ax xop yōg Topa, 'ap xakix xop yōg Topa'ah, yā 'ūxohix te' Topa tu' hī' xe'e'. Kaxīy.

³⁹ Ha hāmyūmmūg xop te:

—Xate hām'āktux max, xate yā hāmyūmmūgā max. Kaxīy.

⁴⁰ Ha' yēy, hu xe' yīkopit 'ohnāg.

Topa yōg hāmyāyikutnā'ax' āktux

⁴¹ Yīy Yeyox te' yānān tu' yīkopit, hu:

—Tep te' xīy Topa tappet te: "Topa yōg hāmyāyikutnā'ax te' mōnāyxop hittap Namix hā' mōkputox?"

⁴² Namix mūn tek-tex'ax yōg tappet tu' kax'āmi, hu: "Topa xe'ēgnāg tek xuxyā pu hām'āktux, hu: "Ūyīp xe'e' ha 'āyūm,

⁴³ tu mōktu 'āte tik xop te' 'āha gāy nōa', " kaxīy.

⁴⁴ Yūmmūg. Namix te' yāy xuxyā' āktux, tu kama yāy mōkputox' āktux. Tep tu' Namix te' mōkputox'ax yā' xuxyā' āktux? Kaxīy.

Yeyox te' tik te' hāmyūmmūg xop' āktux

⁴⁵ Ha tikmū'ūn xip, 'īhā Yexox te' yāy yōg xop pu hām'āktux, tu:

⁴⁶ —'Ōg pa mōxip! Hāmyūmmūg xop te' topixxax tox mō'tat, tup-tup, pu tikmū'ūn 'āneo kōmēn kopah, ha' yūm'ax max xak, tu

Yoneo xop yōg Topa pet kopa mīmpe max xak, nūy māhām, tu 'āmuk xexka ha' mōg pax, ha tikmū'ūn te: "Ūxexka 'ōhōm." Kaxīy.

⁴⁷ Ha Topa pu hām'āktux kumaknāg, pu tikmū'ūn pēnā', tu 'ūn hok mām xop tu' mōy tayūmak xexkah, tu mō'āmā hā Topa pu hām'āktux. Pa Topa te hāmyūmmūg, tup-tup nōg, hu' xūyġāp-tup, Topa te mō'āmā'ax xop xūyġāp-tup xexka. Kaxīy.

21

'Ūn hok yūm te Topa pu tayūmak hōm

¹ Ha Yeyox te Topa pet xexka kopa' xip, tu tikmū'ūn pēnāhā', ha 'ūp-texop xexka nūn, tu tayūmak punethok mō'tat Topa pet yōg mīpkox kopah,

² ha Yeyox te 'ūn pēnāhā kamah, 'ūn hok yūm ha' pēnāhā', ha tayūmak ka'ok 2 hōm.

³ Yīy:

—Āte xa hāpxe'e 'aktux: Nūhū 'ūn te tayūmak kutōgnāg hōm, pāyā' xexkah, 'ūxohix tu',

⁴ ha 'ūp-texop xexka xop te tayūmak xexka hōm, pāyāk-tōgnāg, 'ūyāg tu', ha 'ūn 'ūhok te yāy yōg tayūmak xohix hōm. Kaxīy.

⁵ Ha tikmū'ūn te Topa pet xexka 'āktux, tu mīkaxxap max hā' pet 'āktux, hōmā tikmū'ūn hittap te' xap popmāhā, ha nō' pet, ha Yeyox te:

⁶ —Hāmyāxatamuk mō'nāp-tup, 'īhā' puknōg gāy xop te Topa pet koxyōy putup, ha' yōg mīkaxxap max xohix putyōn putup. Kaxīy.

Hāpkummugā'ax 'āktux

⁷ Ha tikmū'ūn te' yīkopit, hu:

—Yāyā', hām 'ūm hā' mīy'ax? 'Ok hāpxopmā'ax pēnāp-tup, nūy tu hām 'ūm hā' yūmmūg? Kaxīy.

⁸ Ha Yeyox te:

—Ōg pa 'āti', ka tikmū'ūn kummuk xop putat kummuk hā 'āmōgā', yā mō'āmā'ax hā 'āmōgā'ax, tu: "Ūgmūn yā Topa yōg hāmyāyikutnā'ax 'āxet'ax Kunnix" kaxīy, xix: "Hōnhāk nūn," kaxīy. 'Ōg pa'āti!' Nōm tikmū'ūn pe 'āmōg hok!

⁹ Ha xa hām'āktux'ax, tu tikmū'ūn xop xohix yāy'ax 'āktux, pa 'ākuxānōg hok. Yā yāy'ax punethok putup, pāyā 'ap 'āmniy mōg putōynāg'ah. Kaxīy.

¹⁰ Tu xe:

—Hāpxexka yōg tikmū'ūn te yāy nōy yōg tikmū'ūn gāyā'ax, xix gohet te yāy nōy gāyā'ax.

¹¹ Ha hāmyāynuhuk xexka putup, xix hāmhōgnāg, ha tikmū'ūn te' xit'ax xak putup, pāyā hāmhōgnāg, xix hāmpakut xexka pip putup, ha tikmū'ūn te hāpxopmā'ax pēnāp-tup, ha pexkox tu yīmū nāp-tup, ha tikmū'ūn xohix kuxānōg putup.

¹² —Ha' gāy xop te 'āmūg putup hāmāxap, tu 'āxūyġāp-tup, xix yāy tu nū'nā'ax pet ha 'āmōgāp-tup, nūy 'āyīkopit, tu' xat'ax xop ha 'āmōgāp-tup, 'ūgmūn hāh,

¹³ yīy 'āxop te hām'āpak max 'āktux'ax,

¹⁴ hu xutīgahok, 'ākuxānōg hok, nūy: "Putep mūn 'āktux'ax 'āte'?" Kaxīy. 'Āmhok.

¹⁵ Hāpxip 'ohnāg 'īhā 'āte' 'āyūmmūgāp-tup, ha hām'āktux max'ax, pu tu 'ākupex xop yēy.

¹⁶ Ha yāy'atak te 'āmūg putup, xix 'ātaknōy xop, xix 'āxape xop, tu 'āmūg putup, tu kanet ha mōgāp-tup, pūyīy 'āp-tex, tu 'āxop yāg putex putup,

¹⁷ ha tikmū'ūn xohix te 'āp-tup nōg, 'āxop yā yōgnū tikmū'ūn hah,

¹⁸ pa Topa te 'āpēnā max, tu 'āpēnānā' xip, yīy 'āxe te 'āp-tox tu 'ap nāp-tup'ah, nūy tu yāy'axok hok,

¹⁹ yīy Topa yōy putat xak hok, nūy 'āhi xe'ēgnāg. Kaxīy.

Gāy xop te Yenoyanēn koxyōy putup

²⁰ Tu xe hām'āktux, hu:

—Āxop te kōmēn Yenoyanēn pēnāp-tup, ha' puknōg yōg xonat xop te kōmēn Yenoyanēn xakot putup, nūy kōmēn koxyōy, tu' koxyōy putup, hōnhā xate' yūmmūg.

²¹ Pūyā hāpxexka Yonex kopa' pip tikmū'ūn nū'mān, tu yīktix tu' mōg nū'paha', pūyā kōmēn kopa' pip tikmū'ūn yāy papuk, pūyā kōmēn tu hāptopa' pip tikmū'ūn kōmēn tu mō'xakux hok.

²² Ha Topa gāy Yoneo yōg tikmū'ūn mūtik, tu' xūyġāp-tup. Hōmā tik te Topa pupi hām'āktux, tu tappet tu' kax'āmi', yā Topa yōg hām'āktux hittap hā' pēnāp-tup nōmhā.

²³ Pa 'ūn tek-tok xuk yāy kopah, tu' xūy xekkap-tup, xix 'ūn tek-tok pu yāy xo'opmāhā', tu' xūy xekkap-tup. Nū tikmū'ūn xohix potap-tup, ha hāpxexka xohix yōg tikmū'ūn xūy putup, yā Topa te' xūyġāp-tup xexka,

²⁴ ha' kix'ax mīkax xexka hā, yī' yāg'ax tikmū'ūn 'ūyāg, tu' yāg nōy mūg putup, tu hāpxexka puknōg ha' mōgāp-tup. Hāmpuknōg xop te kōmēn Yenoyanēn tonnok putup, nōm xop te Topa yūmmūg 'ohnāg, tu mōktu Topa te puknōg xop pu hām'āktux, hu: "Puxī." Kaxīy.

²⁵ Tu xe hām'āktux, hu:

—Tikmū'ūn te hāpxopmā'ax ka'ok pēnāp-tup, māyōn tu hāpxopmā'ax pēnāp-tup, xix māyōn hex tu', xix māyōnāg tu', ha hāpxexka yōg tikmū'ūn xohix kuxa teknōg, tu kōnāg xexka yo'ok xexka 'āpak'ax, hu' kuxānōg.

²⁶ Tik xop kuxa teknōg putup, 'ūkuxānōg tu', ha hāpxop te hāmōgnōy tu' pip xop te yāy nuhuk putup,

²⁷ hak mūn yā Tikmū'ūn Kutok, tuk nūn putup put pu', 'īhā tikmū'ūn tek pēnāhā',

hãmgõy xexka kopak nûn putup, 'ügka'ok xe'ëgnãg tu', tuk xexka xe'ëgnãg nûn putup.

²⁸ 'Äxop te nôm hãpxopmã'ax ka'ok pënã', 'äpu pexkox yokomak pënã'. Yã 'äxuyã' nûn, pu 'ãmõy, nüy 'äxüy kuxyã'. Ta tu' kux. Kaxiy.

Tute piget kup 'äktux

²⁹ Yeyox te hãm'äktux nõy hã hãmyümmügãhã', nüy Topa yög hãpxopmã'ax yümmügã', hu:

—Mim kup piget pënã', xix mîm kup xohix pënã',

³⁰ 'ümîxux xupep, 'üxokax puk tup, 'ihã xate' yümmüg, yã hãm pukpex xupep.

³¹ Kaxiy 'äxop te hãpxopmã'ax ka'ok pënãhã', 'ihã hãmyümmüg, tu Topa nûn yümmüg, ha' nûn, pu yã yög tikmü'ün xat, yã' hãmhümnãg.

³² —Äte xa hãpxe'e 'äktux: Hõnhã' pip tikmü'ün yãg te hãpxopmã'ax xohix pënãp-tup.

³³ Pax pu yõgnü hãm'äktux'ax nõg, puxix pexkox xix hahãm nõg hãmãxap, hãm'äktux'ax ka'ok xe'ëgnãg hah. Kaxiy.

Pu tikmü'ün yã' pënãnã' pip

³⁴ Tu hãm'äktux kux, tu:

—Ög pa mõxip! Yãy pupi' pënã max, pu yãy yög hãpxop xak'ax 'ähîy hok, pu 'ämuq xexka xix kenmuq xo'op xexka 'ähîy hok, ka 'äxop hãmyümmüg 'ohnãg, 'ihã Topa yög hãptup xe'e mõ'nãhã'.

³⁵ Yã mõ'nãp-tup hãpxexka xohix tu', xix tikmü'ün xop xohix tu', ha pãmãg te xokxop müg, 'üxaptop ha' müg, kaxiy Topa yög 'ämnîy mõ'nãp-tup, 'ihã tikmü'ün pa pip 'ohnãg.

³⁶ Ög pa mõxip, xix yãy pupi' pënã max. Topa pu hãm'äktux, püyîy 'äka'ogã', pu hãpxopmã kummuk tu hãpxupmã', nüy 'ügün keppa' pi', 'ügün yã Tikmü'ün Kutok hah. Ta tu' kux. Kaxiy.

³⁷ 'Ämnîy xohix hã Yeyox te Topa pet xexka kopa hãmyümmügãhã', tu 'ãmãxak xohix 'ihã' mög, tu yïktix 'Onimet yîmü' mög, nüy yîmü' pi',

³⁸ ha mãyõn küynãg xut xohix, 'ihã' putpu' nûn, tu Topa pet xexka ha' nûn, nüy hãmyümmügã', ha tikmü'ün xohix xexka nûn, mãyõn xupep 'ihã' nûn, nüy Yeyox te hãm'äktux 'äpax.

22

Yoneo xexka xop te Yeyox putex putup

¹ Ha Yoneo yög tikmü'ün te 'ämuq xexka mîy putup, 'üxuxet'ax pãm tokatok hok, ha' xuxet'ax nõy te Nõa'yën,

² ha 'ãmãnex xexka xop xix hãmyümmüg xop te Yeyox putex putup, tu' xaptop hãp-tex putup, tikmü'ün yïpkutuk tu'. Yã tikmü'ün te Yeyox putup pax.

Yot pa mûn max, pãyã' kuxa kummuk

³ Ha Hãmgãyãgnãg te Yot kuxa kum-mugãhã, ha Yeyox yög tik xop mütik hãpkumep.

⁴ Pãyã' mög, tu 'ãmãnex xexka xop mütik hãm'äktux, ha yãy yãnãn, ha Yot te:

—Äte 'äxop mõ'nîynãm'ax, xayîy Yeyox müy. Kaxiy.

⁵ Ha' hittup, tu tu' hõm'ax tayümak,

⁶ ha Yot te tayümak putup, hu hãmpe' paxex punethok, nüy xexka xop mõ'nîynãm, pu' xaptop hah Yeyox müy, püyîy tikmü'ün yümmüg hok.

Ämuq xexka Nõa'yën mîy

⁷ Ha 'ämnîy punethok nõg, 'ihã Yoneo xop te 'ämuq xexka Nõa'yën mîy, tu pãm tokatok hok mãhã', tu kahñen kutok putex, tu mõ'hap, pu tikmü'ün xohix' mã',

⁸ ha Yeyox te Pet xix Yoãm mõ'pok, tu:

—Mög, nüy yümmü'ã 'ämuq xexka mîy, nüy yümmüg mã'. Kaxiy.

⁹ Ha:

—Pi'yã' mîy'ax? Kaxiy.

¹⁰ Ha:

—Üg'äpax. Kõmën xexka tu mõnãy, tu tikmü'ün 'üm pënãp-tup, ha nax tox hã kõnãg tat, tu 'aha' nûn putup. 'Üpe mög, tu mõktu mõxaha mîptut tu', tu' mõxakux,

¹¹ tu mîptut xuxyã pu hãm'äktux, hu:

“Ügmüg xuxyã tek müg xat, pu 'äyïkopit, hu: Pi'a' xip mîptut 'üm kox, pu 'äte 'ämuq xexka 'äxet'ax Nõa'yën mîy yãy yög tik xop mütik?” Kaxiy.

¹² Ha xa' müg putup hãpkox xexkah, yã mîmpe yüm'ax punethok, xix mîmpe xit'ax punethok mãn, ha mîptut mõkãñin yîmü' yüm. 'Önte 'ämuq xexka mîy, 'üxuxet'ax Nõa'yën. Kaxiy.

¹³ Ha Yeyox te' xat kux, 'ihã Pet mög, xix Yoãm, tu' xat'ax xohi' mîy, yã Yeyox yög hãm'äktux'ax hã hãpxopmãhã', tu 'ämuq xexka mîy nôm mîptut kopah.

Yümmüg xuxyã yög xit'ax

¹⁴ Tu' mîy kux, ha Yeyox yüm, tu mîmpe xit'ax yîmü' yüm, ha yãy yög mõ'pok xop te nü mütik mãn,

¹⁵ ha:

—Äte' xak, 'üxit 'äxop mütik, nüy 'äxop mütik 'ämuq xexka 'äxet'ax Nõa'yën mîy hãmãxap, tuk-nãy tuk xüy putup,

¹⁶ tu xa hãm'äktux, hu: 'Ak 'üm xit 'ämuq xexka 'üxeheh nunte, pãyã tikmü'ün te Nõa'yën xe'e yümmüg, kopxik xit putup, 'ihã Topa yög tikmü'ün xohix yïpkox pip. Kaxiy.

¹⁷ Tu kãnëy paha', tu Topa pu:

—Ämax! Kaxiy.

Tu xe:

—Üpa kãnëy, xayîy 'äxop xohi xo'op.

¹⁸ Äte xa hãm'äktux: 'A 'äte mînta hep xupyãg xe xo'op putup'ah, pa Topa yög

tikmũ'ün xohix yĩpkox pip, kopxi' xo'op putup 'üxeheh. Kaxĩy.

¹⁹ Tu pãm paha', tu' koxip, tu Topa pu: 'Ámax! Kaxĩy. Tu yãy yõg tik xop pu' popmãhã', tu:

—Nũhũ 'ũgyĩn, yãk xok 'ãxop pupi', 'ũkoxip, nũy tak xaxok hok. Kaxĩy.

²⁰ Ha' xit kux, 'ĩhã Yeyox te:

—Nũ kãnēy pa kamah, yã' hep te' kopa' xup. Topa te pa'ax tup mĩy tikmũ'ün mütik, hak hep 'ãta nũ'nãhã 'ãxop pu', pu pa'ax tup mĩy.

²¹ Pa tik mō'ãmã'ax te yũmũk mütik xit, tu gãyxop mōgãp-tup 'ũghah.

²² 'ũgmũn yã Tikmũ'ün Kutok, tuk xok putup, pa Topa gãynãm, tu tik mō'ãmã'ax hã' gãy. Kaxĩy.

²³ Yeyox yõg tik xop te yãy yĩkopit, hu:

—Pi'yã' nõm te' kummugã'? Kaxĩy.

Pi'yã' tik te' xohix xat'ax

²⁴ Tu kamah hãm'ãktux hã' nõy yãnãn, nũy tik 'ũm 'ũxohix xat'ax yũmmũg,

²⁵ yĩy Yeyox te:

—Hãmpuknõg xop yõg tik te' xat, ha' yõg tikmũ'ün yĩpkox pip, tu' yõg gohenanok 'ãxet'ax mĩy, hu: Tik te tikmũ'ün hã' xape'. Kaxĩy.

²⁶ Pa 'ãxop kopa 'ãnõy xat hok. Pũyã' xat'ax hãpxopmã 'ũnõy xop pu', 'ãtaknõy tu' ka'ax putuk, yã yãyhã'ax kutõgnãg, nũy tikmũ'ün xohix pu yĩpkox pi'.

²⁷ Pi'yã mũn xexka? 'Ok tik te mĩmpe tu' yũm, nũy tu xit, pe tik te hãpxop tat nũy nõy xĩnnã'? Nõm te' yũm yã' xexkah, pãyã 'ãxop xohix pu 'ãte hãpxopmãhã'.

²⁸ 'ãxop tek mütik hãpkumep, tuk mütik hãpxopmãhã' xix 'ãxũy.

²⁹ Yõg 'ãtak te 'ã yãy 'ãxet'ax hõm 'ũ tikmũ'ün xat, yã kaxĩy 'ãte yãy 'ãxet'ax xa' hõm, xa tikmũ'ün xat,

³⁰ nũy 'ũgmütik 'ãxit xi' xo'op, yõgnũ hãpxexka tu' 'ãxit'ax, xa' yũm'ax max yĩmũ' yũm, nũy 'lyaet yõg tikmũ'ün yõg hãpxopmã'ax xohix kopit.

Yeyox te Pet pu hãm'ãktux

³¹ Tu xe:

—Xĩmãm, 'ũg'ãpax max. Hãmgãyãgnãg te 'ãp-tup, nũy 'ãnuhuk. Tikmũ'ün te xuxnãg nuhuk, pẽnẽn hã nuhut, hã kaxĩy Hãmgãyãgnãg te 'ãxut putup,

³² pa 'ãte Topa pu hãm'ãktux, ta tu 'ã xak, pu 'ãka'ogã', nũy 'ãkuxa yũmmã ka'ok. 'Üg ha 'ãnũn'ax putpu', 'ãpu 'ãnõy xop ka'ogã'. Kaxĩy.

³³ Ha Xĩmãm Pet te:

—'ãte 'ãmütik 'ũgmõg, tu kanet hak mõg'ax 'ãmütik nõmhã, nũy xok 'ãmütik. Kaxĩy.

³⁴ Yĩy:

—'ãte xa hãpxe'e 'ãktux, Pet: Xate tikmũ'ün yĩpkutuk, huk nũm putup, tu hãm'ãktux

putup, tu: "Yeyox 'ãtep yũmmũg'ah." Kaxĩy. Tu xe' xuktux putup, tu xe' xuktux putup. Xate koit kux, 'ĩhã xokakkak te xatap-xehnãg putup. Kaxĩy.

Yeyox te yãy yõg tik xop yũmmũgãhã'

³⁵ Tu yãy yõg xop pu hãm'ãktux hu:

—Hõmã 'ãte mō'ãpok, 'ũhok mō'ãpok, 'ap pata xax 'ãptat'ah, xix tayũmak 'ap tat'ah, xix xagok 'ãxop tep tat'ah. 'Ok putup te 'ãp-tex 'ĩhã 'ãmõg? Kaxĩy.

Ha:

—'ãmhok, yã puxi'. Kaxĩy.

³⁶ Ha:

—Pa hõnhã 'õg tayũmak tat, xix xagok mō'tat. 'Õg kayak hãmẽnax, nũy tayũmak pa', nũy mĩkax xexka 'ũm pa', tu' mō'tat.

³⁷ Hõmã tik hittap xop te Topa pupi hãm'ãktux, tu' yõg hãm'ãktux yã tappet tu kax'ãmi', hu: "Tik te' kummuk xop mütik mõg." Kaxĩy. Huk mũn 'ãktux, ha Topa yõg hãm'ãktux hittap hã tikmũ'ün kummuk te hãpxopmãp-tup nõmhã, 'ũkxok hãh hãpxopmãp-tup. Kaxĩy.

³⁸ Ha' yõg tik xop te:

—Hẽnã', mĩkax xexka 2 tihi'. Kaxĩy.

Ha:—Puxi'. Kaxĩy.

Yeyox te yĩktix 'Onimet tu' xip

³⁹ Tu' mõg, tu 'ãmniy hã yĩktix 'Onimet ha' mõg, tu 'ãmãxak xohix 'ĩhã' mõg, ha' yõg tik xop te' mütik mõg,

⁴⁰ tu yĩktix yĩmũ' mõxaha', ha Yeyox te:

—Topa tu' xax, pu 'ãka'ogã', xa hãpkummuk mĩy hok. Kaxĩy

⁴¹ Tup-xehnãg ha' mõg kutõgnãg, tu' kopaxux hã' xip, tu Topa mütik hãm'ãktux, hu:

⁴² —'ãtak, 'ãte xa tu' xak 'ũyik xũy hok. Ka 'ãte yãy yõg putup'ax mĩy, 'ũyã 'õg putup'ax mĩy hãmãxap. Kaxĩy.

⁴³ Ha pexkox yõg nũ'kutnã'ax xupep, tu Yeyox ka'ogãhã',

⁴⁴ ha' xũy xexka, hu hãmpukpex hep te' xax tu' nãhã', yã' hep punethok, 'ũhep 'ãta putuk, tu hãm tu nũ' nãhã'.

⁴⁵ Ha Topa pu hãm'ãktux nãm, tu' kux, tuknĩhã' xip, tu yãy yõg tik xop xak, tu' pipihi', ha mō'yõn ka'ok, 'ũkuxa teknõg tu mō'yõn,

⁴⁶ ha:

—Te xĩy hu mō'õn? 'ãyok, 'ãknĩhã 'ati', nũy Topa tu' xax, pũyĩy 'ãka'ogã', xa hãpkummuk mĩy hok. Kaxĩy.

Xonat xop te Yeyox mũg, tu' kĩy

⁴⁷ Yeyox te hãm'ãktux, 'ĩhã tik xop nũn, ha Yot te' nũnnãhã', 'ãmniy xohix hã tu Yeyox mütik mõg, hu yãy kep ha' mũg, nũy tu 'ãneo.

⁴⁸ Pa Yeyox te:

—Xatep-tep mũn mĩy putup, Yot? 'Ügmũn yã Tikmũ'ün Kutok. 'Ok xatek mũg yãy kep

hah, mō'āmā'ax hak mūg, nūy gāy xōp tuk mūg? Kaxīy.

⁴⁹ Ha tik xop te' pēnāhā', nōm tik te Yeyox mūtik hāpkumep, tu' pēnāhā', tu hāmyūmmūg, hu:

—Yāyā, 'ok xatek putup 'ükix mīkax xexka hā? Kaxīy.

⁵⁰ Hu tik te mīkax xexka paha', tu 'āmānex xat'ax yōg kāmānat yīpkox xak, tu' yīpkox xaxit, 'ūyīpxe'e hā nōm xip,

⁵¹ ha:

—Hup! Kaxīy.

Tu' yīpkox 'āpit, tu' tapmāhā',

⁵² tu 'āmānex xop pu hām'āktux, xix Topa pet yōg kapitām pu' xuktux, xi' xexka xop pu hām'āktux, hu:

—'Ok 'ānūn, nūy tik te hāpxop hā' xupxet'ax mūy? Tep tu 'āxop te mīkax xexka tat, xix mīhīm?

⁵³ 'Āmnīy xohix hā 'āte tikmū'ūn yūmmūgāhā', Topa pet xexka kopa hāmyūmmūgāhā', ha 'āxop tek mūg 'ohnāg. 'Āka'ok nōmhā, xix Hāmgāyāgnāg ka'ok nōmhā, nōm te hāpkox tap kopa' xip. Kaxīy.

Pet te Yeyox yūmmūg hok 'āktux

⁵⁴ Ha' mūg, tu' mōgāhā 'āmānex xat'ax pet hah, ha Pet te hāptox tu' pe' mōg,

⁵⁵ ha 'āmānex yōg kāmānat xop te kuxap xexka mīy hāptopa', tu kuh xexka yīmmap hā' mām, ha Pet te kāmānat xop mūtik mām,

⁵⁶ ha kāmānat hex te Pet pēnāhā', kuxap yōg kuyānām hā' pēnāhā', tu:

—Nū kāy te Yeyox mūtik hāpkumep! Kaxīy.

⁵⁷ Pa Pet te:

—'Āmhok! 'Āte nō'ōm 'ap yūmmūg'ah! Kaxīy.

⁵⁸ Hāpxip kutōgnāg 'Ihā tik te' pēnāhā', tu:

—Xate Yeyox yōg tik xop mūtik ti kamah. Kaxīy.

Pa Pet te:

—'Ak mūn'ah. Kaxīy.

⁵⁹ Hāpxip kutōgnāg 'Ihā yā 'ūnōy te:

—Hamūn, tute Yeyox mūtik hāpkumep! 'Ūyīy'ax yā hāpxexka Ganinet yōg kamah! Kaxīy.

⁶⁰ Pa Pet te xe hām'āktux, hu:

—Pute 'ūm? Xate putep mūn xuktux? 'A 'āte' yūmmūg'ah! Kaxīy.

Ha hāpxip 'ohnāg 'Ihā xokakkak tak xataha',

⁶¹ ha Yeyox te ha' yokānām, tu Pet pēnā ka'ok, ha Pet te Yeyox yōg hām'āktux pe'paxex. Yā hōmā Yeyox te hām'āktux, hu: "Xate koit tikoyuk putup, tuk mūn yūmmūg hok 'āktux, 'Ihā xokakkak tak xatap-xehnāg." Kaxīy.

⁶² Ha Pet te yāyhāhup xexkah, tu hāptopa' mōg, tu' pota punethok.

Xonat xop te Yeyox kix

⁶³ Ha tik xop te Yeyox mūg, tuk-tex'ex kummuk, tu' kix,

⁶⁴ tu topixxax hā Yeyox pa mō'nīy, tu' yīkopit, hu:

—'Āpu, 'ūgmū'ā Topa pupi hām'āktux. 'Ū 'ūm nōm te 'ākix? Kaxīy.

⁶⁵ Tu hām'āktux hā Yeyox kuxa xūygāhā', 'āmñiy tox hā' xūygāhā'.

Yoneo xexka xop te Yeyox yīkopit

⁶⁶ Ha māyōn xupep, 'Ihā' Yoneo xexka xop te yāy tu nū' nāhā ta tu 'āmānex xexka xop mūtik, xix hāmyūmmūg xop mūtik yāy tu nū' nāhā', ha Yeyox mōgāhā', 'āmānex xat'ax pet ha' mōgāhā', puyī' yīkopit.

⁶⁷ Tu:

—'Ok 'āmūn yā Kunnix? 'Ok Topa te xa yāy kutnāhā'? 'Āpu, 'ūgmū'ā' xuktux. Kaxīy.

Pa Yeyox te:

—'Ākuxa mām 'ohnāg yōgnū hām'āktux tu'.

⁶⁸ 'Āte 'āyīkopit, puxix 'āxop 'ap hām 'ūm 'āktux putup'ah,

⁶⁹ pak mūn yā Tikmū'ūn Kutok, yā hōnhāk yūm'ax Topa yīpxe'e hah, Topa ka'ok xe'ēgnāg yīpxe'e hak yūm'ax. Kaxīy.

⁷⁰ Ha' xexka xop te:

—'Ok 'āmūn yā Topak-tok xe'ēgnāg? Kaxīy.

Ha:

—Xate' xuktux. Kaxīy.

⁷¹ Ha' xexka xop te:

—Puxī! Kāy yāy yīy'ax hā 'ūgmū'āte' xupak! Kaxīy.

23

Pinat te Yeyox yīkopit

¹ Ha' xexka xop xohix 'ūknīha' tihī', tu Yeyox mōgāhā gohenanok ha', 'ūxuxet'ax Pinat,

² ha' kupex nām, hu:

—Kāy te tikmū'ūn yūmmūgā kummuk, tu' xat hok pu tayūmak hōm hok gohet pu', tu yāy mūn yā tik te tikmū'ūn xat'ax 'āktux, tu Topa te' yāy kutnā 'āktux. Kaxīy.

³ Ha Pinat te Yeyox yīkopit, hu:

—'Ok xate Yoneo yōg tikmū'ūn xat xe'ēgnāg? Kaxīy.

Ha:

—'Ā xate' xuktux. Kaxīy.

⁴ Yīy Pinat te 'āmānex xop pu hām'āktux, xix tikmū'ūn pu hām'āktux, hu:

—Yeyox te hāpkummugā 'ohnāg. Yā' max. Kaxīy.

⁵ Pāyā' xexka xop te:

—Yā' kummuk ta pax! Tute tikmū'ūn gāyāhā', tu hāmyūmmūgā'ax hā' gāyāhā hāpxexka xohix tu', yā Yonex tu', xix Ganinet tu', xix nūnte kamah. Kaxīy.

⁶ Ha Pinat te' xupak, tu' yīkopit, hu:

—'Ok kāy mūn yā Ganinet yōg? Kaxīy.

⁷ Ha' kupex'ax xop te:

—Hamūn. Kaxīy.

Yīy Pinat te' xat, pu 'Enot ha' mōgā', ha 'Enot te Yoneo yōg tikmū'ūn xohix xat, tu kōmēn Yenoyanēn tu' xip.

⁸ Ha xonat xop te' mōgāhā', tu mōktu mōxaha 'Enot pet hah, ha' pēnāhā', hu' kuxa hittup, tu 'āmnīy xohix hā' pēnāp-tup, pāyā pēnā 'ohnāg, yā hōnhā pēnā'ax, ha tikmū'ūn te Yeyox 'āktux 'Enot pu', ha 'Enot xak, puyīy Yeyox hāp-xopmā ka'ok xe'ēgnāg,

⁹ hu' yīkopit, tu xe yā' yīkopit, pāyā Yeyox te' yēy.

¹⁰ Ha 'āmānex xexka xop xix hāmyūmmūg xop tihi', tu Yeyox kupex nām.

¹¹ Ha 'Enot tup-tup nōg, xix yōg xonat xop, tu' kute'ex kummuk, tu' xexka xop yōg top-ixxax mūn mō'tat nūy Yeyox kummukgā', tu put pu' mōgāhā Pinat hah.

¹² Hōmā 'Enot gāy Pinat hā', xix Pinat gāy 'Enot hā', pa hōnhā yāy tu' gāy xit, tu yāyhā' xape.

Pinat te' xat pu Yeyox putex

¹³ Ha Pinat te 'āmānex xop xānāhā', xi' xexka xop xānāhā', hay yāy tu nū'nāhā',

¹⁴ ha:

—'Āxop te nūktu tik nūnnāhā', tu' kupex, tu tikmū'ūn gāyā 'āktux, pa 'āte' yīkopit, ha yā' max, 'ap hāpkummuk 'ūm mīy'ah,

¹⁵ ha 'Enot te yīkopit kamah, tu' put pu nū'kutnāhā'. Hāpkummuk 'ūm mīy 'ohnāg, puyīy tu xok,

¹⁶ Yīy 'āte' xat putup pu' kix xikot hā, nūy xut pu mōg. Kaxīy.

¹⁷ Hāmyāxatamuk xohix 'Īhā Pinat te tik kummuk xut, 'āmuk xexka Nōa'yēn 'Īhā' xut, tu kanet kopa' xip tik xut, pu mōg, ha Yoneo yōg tikmū'ūn te yāy'kutnā tik puxet, pu mōg, ha Pinat te Yeyox xut putup pu mōg,

¹⁸ pa Yoneo yōg tikmū'ūn xohix yīy ka'ok, hu:

—'Ūmōgā Yeyox, nū' putex. 'Ūgmū'ātep-tup nōg, pa Mahamax xut pu mōg. Kaxīy.

¹⁹ Ha Mahamax te' nōy putex, tu kanet kopa' xip, tu tikmū'ūn gāyāhā', pu tu' kix gohet yōg xonat xop.

²⁰ Pa Pinat te:

—Nāy. Hāmpē'āpaxex max, 'ūyā xa' xut tik max, tu Yeyox xa' xut'ax. Kaxīy.

²¹ Pa tikmū'ūn tep-tup nōg, tu' yīy ka'ok, tu:

—'Ūp-tex, 'ūp-tex, mīpkupnix hāp-tex! Kaxīy.

²² Ha Pinat te xe hām'āktux tikmū'ūn pu', hu:

—Putep mūn mīy Yeyox te', xap-tex? Yā' max, hāpkummuk mīy 'ohnāg tute', yīy 'āte' xut'ax pu mōg. Kaxīy.

²³ Ha xe tikmū'ūn yīy ka'ok, tu Yeyox putup nōg 'āktux,

²⁴ yīy Pinat te' xat, pu Yeyox putex, xix Mahamax xut pu mōg,

²⁵ ha' xut tik kummuk Mahamax, pu tikmū'ūn gāy Yeyox mōgā'.

Mīpkupnix tu Yeyox putex

²⁶ Ha' mōgāhā', 'Īhā xonat xop te Xinēn yōg tik Ximām xat, pu mīpkupnix tax, tu Yeyox pe' mōg, tu' taha'.

²⁷ Ha tikmū'ūn xohix xexka te' pe' mōg, xix kōmēn yōg 'ūn xop, tu' potahā' mōg,

²⁸ ha Yeyox te' hā yokānām, tu:

—'Ūgmūn hā 'āpota hok, pāyā yāymūn hā 'āpotaha', xix 'āk-tok hā potaha'.

²⁹ 'Āmnīy mō'nāp-tup, 'Īhā tikmū'ūn te hām'āktux, hu: "Ūhūn kuxa hittup, nōm tek-tok 'ohnāg, ha kama' kuxa hittup nōm 'ūn tek-tok yāy xo'opmā hok." Kaxīy.

³⁰ Ha tikmū'ūn kuxa teknōg'ax, tu: "Pūyā yīktix 'ūgmūk tu' nāy, nūy mōknīy." Kaxīy.

³¹ Yā hōnhā mīm yīxux, ha' puk putup. Putep mūn mīy'ax mīm nak hā? Yā' puk putūmnāg. Kaxīy hōnhā tik max xok. Putep mūn mīy'ax tik kummuk hā? Kaxīy.

³² Ha xonat xop te tik kummuk 2 mōgāhā', nūy tu' kix Yeyox mūtik,

³³ ha' mōg tu mōktu yīktix hāmhūmnāg tu' mōxaha, ha yīktix 'axet'ax Gok, 'ūkuxoh tox putuk tu', ha xonat xop te Yeyox yīm xuhmīy, xix pata xuhmīy, pu Mīpkupnix tu' xup, ha Yeyox te yāy kote' xip: yā tik puxet te 'ūyīpxe'e hā' xup, xix tik nōy te 'ūyīpxax hā' xup.

³⁴ Ha Yeyox te:

—'Ātak, 'ūyōg hāpkummuk mīy'ax xaxogā', pu ta tu' kux, hāmyūmmūg 'ohnāg hah. Kaxīy.

Ha xonat xop te Yeyox xax koxip, pāyā' max, 'ūkoxyōy putup'ah, hu mō'xap yōn, nūy tik yāy'kutnā', pu pa'.

³⁵ Ha tikmū'ūn xohix mō'xip, tu' pēnāhā', ha' xexka xop kute'ex kummuk, tu:

—Tute tikmū'ūn hīnnāhā' putpu'. Pūyā yāy xit hōnhā', nūy mōg, puyīy tu' xok hok! Pax pu yā Kunnix, nōm Topa te yāy'kutnāhā', puxix yāy xit hōnhā nūy mōg! Kaxīy.

³⁶ Ha xonat xop kama xox yīxix kummuk, tuk-tex'ex kummuk, tu' xupyāg kummuk xo'opmāp-tup,

³⁷ tu:

—'Ok xate Yoneo tikmū'ūn xat xe'e'? 'Āpu, mīpkupnix tu yāy xit. Kaxīy.

³⁸ Ha tappet tu kax'āmi', tup-tox yīmū' hīy, mīpkup nix tu' hīy, tu kax'āmi', hu: "Nūhū tik te Yoneo yōg tikmū'ūn xohix xat." Kaxīy.

³⁹ Ha tik nōy te mīpkupnix tu' xup, tuk-te'ex kummuk kamah, tu Yeyox pu hām'āktux, hu:

—'Ok 'āmūn yā Kunnix? 'Ok Topa te xa yāy'kutnāhā'? 'Āpu yāy xit, xixmūg mōy kamah. Kaxīy.

⁴⁰ Pa tik nōy te' māmōg, hu:

—'Ok xate Topa yīpkutuk hok? Hōnhā 'āxok, xate hāpkummugāhā' tu xok.

⁴¹ 'Ūgmū'āte hāpkummuk mīy punethok, yīk mūg kix, pa nū tik te hāmyok mīy, tu hāpkummugā' ohnāg. Kaxīy.

42 Tu Yeyox tu' xak, hu:
—Yeyox, 'ükxaxok hok, 'ihā xate yāy yōg tikmū'ün xohix xat. Kaxīy.

43 Ha:
—'Āte xa hāpxe'e 'āktux: Hōnhā xatek mūn mütik 'āxip putup pexkox kopah. Kaxīy.

Yeyox xok

44 Ha māyōn te pexkox kote' yūm, 'ihā hāpkoxtap te hāpxexka xohix tu' xip, tu 'ot 3 hā' xip māyōn he',

45 'ihā māyōn kuyānām xok, ha Topa pet xexka yōg topixxax yāy koxip, nōm te hāmyīkox mō'yīnnīn.

46 Ha Yeyox yīy ka'ok, tu:
—'Ātak, 'āte xa' hōm yāy koxuk!. Kaxīy.
Tu hām'āktux kux, tu' xok xe'e'.

47 Ha xonat xop yōg kapitām te Topa max 'āktux, tu:

—Yamūn! Nū tik te hāpkummugā 'ohnāg! Kaxīy.

48 Ha tikmū'ün xohix xexka nūn, tu yāy tu nū'nāhā', tu' pēnāhā', tu' kuxānōg, tu yāy kep to'ok, tu' yēy, 'ükuxa teknōg tu'.

49 Ha tikmū'ün te Yeyox hā' xape pip, xix 'ün pip, nōm xop te' pe' mōg, tu Ganinet tu' pip kōnāmāha', tu Yeyox mütik hāpkumep tap, tu hāpxopmā'ax xohix pēnāhā nōmhā'.

Yoye te Yeyox nō hāpkot

50 Ha tik max xip, 'ūxuxet'ax Yoye, tu hāpxexka Yonex tu' nāhā', tu kōmēn 'An-imātex yōg tihik, tu Yoneo xexka xop mütik mōg, yā' max, tu hāmyok mīy,

51 tu' xexka xop yōg hāpxopmā'ax putup nōg, tu' kuxa yūm ka'ok Yeyox kopah, tu' xak, pu Topa pu' yīpkox pi',

52 tu' mōg Pinat hah, tu ta tu' xak, pu Yeyox xokxax tu' hōm, pu yīy nō hāpkot, ha' hōm.

53 Ha mīpkupnix tu' xup Yeyox, ha Yoye te' xokxax xut, tu topixxax max hā' kīy, tu mīkax xap kox kopa nō hāpkot, ha' hok xip, mīkax xap 'ūkox, 'ūxokxax nōy te' kopa' xip 'ohnāg.

54 Yā xexta pet, 'ihā Yoneo yōg tikmū'ün te nit xap yōg hāpxop mīy, yā 'āmāxak, 'ihā nit xap mō'nāhā'.

55 'Ūhūn xop te Ganinet tu' pip tap, tu Yeyox pe' nūn pax, tu xukpot pēnāhā', ha Yoye te Yeyox xokxax xex mīkax xap kox kopa ha' pēnāhā',

56 tu' putpu' mōg, tu hāpxop hax max'ax mīy, nūy xokxax xutzok.

Tu nit xap hā' hip. Yā hōmā, hāmyāxatāmuk hittap 'ihā', Topa te Yoneo xop xat hok, pu tu nit xap 'ihā hām hok.

24

Yeyox te putpu' hi'

1 Ha yenomīn 'ihā, māyōn te hāpkanet tu' xupep 'ihā, 'ün xop te xokpot ha' mōg, tu hāpxop hax max'ax tat,

2 tu' mōg tu mōktu mōxaha mīkax xap kox tu'. Hōmā mīkax xap te mō kox nīy, pāyā hōnhā' yīkūy tap, tu mīkax kox xōn, ha 'ün xop te' kox kopa pēnāhā'.

3 'Ap Yeyox xokxax 'üm xip'ah, tu mīkax xap kox kopa' xip 'ohnāg,

4 yīy 'ün te: "Pute 'üm?" Tu hāpe'paxex, 'ihā tik 2 te' yīka' tihī, 'ūpata hā' tihī, yā' yōg topixxax tūmnāg, kuyānām putuk,

5 ha 'ün xop kuxānōg, tu nūktettex, tu yāy pa mō'nīy, tu' yēy, ha pexkox yōg xop te:

—Tep tu 'āxop te yāy hi'ax xop xak hām xukpot tu'?

6 'Ap xip'ah Yeyox, yā' putpu' hi'! 'Ok 'āxop te' xaxok? Tute xa hām'āktux 'ihā hāpxexka Ganinet tu' tihī',

7 ha tik kummuk te' mō'āmā', nūy gāyxop mōgā Yeyox hah. Yeyox yā Tikmū'ün Kutox, tu xa hām'āktux, tu yāy yōg xok'ax 'āktux, tu mīpkunīx hā' xok'ax xa' xuktux, tu putpu hi'ax 'āmnīy tikoyuk 'ihā xa hām'āktux. Kaxīy.

8 Ha 'ün xop te hāmp'e'paxex, tu: "Hamūn! Hōmā Yeyox tek mū'ā hām'āktux." Kaxīy.

9 Tu putpu' mōg, tu Yeyox yōg tik xop te 11 pu hām'āktux, xix tikmū'ün te nōm mütik hāpkumep pu' xuktux.

10 Nōm 'ūhūn 'āxet'ax Manix Mānanēn, xi' nōy 'āxet'ax Yoān, xi' nōy 'āxet'ax Mānix, ha Mānix yā Tiak mük tut, ha 'ün xop te Yeyox yōg mō'pok xop pu hām'āktux,

11 pa tik xop kuxa mām 'ohnāg 'ün yōg hām'āktux tu', tu: "Yā' xupmāhīy!" Kaxīy.

12 Pāyā Pet yok, tu' mōg mō'ka'ok 'ūxukpot tu', tu' xupep, 'ihā pēnā tu' mōg, nūy mīkax kox kutōgnāg hā' mōnāy, tu topixxax te xokxax kīy'ax pēnāhā', yāp-xehnāg yūm, tu putpu' nūn mīptut tu', tu' kuxa te' yēy.

'Ēmā'ox yōg putahat

13 'ihā tik 2 hāpkumep, tu xip tu' xexka 'Ēmā'ox ha' mōg, ha mō'āgmūg 2 kōmēn Yenoyanēn tu',

14 ha yāy pu hām'āktux, tu hāpxopmā'ax xohix 'āktux,

15 tu hām'āktux, 'ihā Yeyox xip, hāpxip 'ohnāg 'ihā' xip, tu tik mütik mōg,

16 ha tik xop te' pēnāhā', pāyā' yūmmūg'ah.

17 Ha Yeyox te:

—Tep-tep 'āktux 'āxop te', 'ihā hāpkumep? Kaxīy.

Ha tik xop hāpkumep kux, 'ūhittup 'ohnāg tu',

18 ha tik puxet 'āxet'ax Kene'op, tu:

—Tikmū'ün xohix te kōmēn kopa' pip, tu hāpxopmā kummuk yūmmūg. 'Ok 'āp-xehnāg te' yūmmūg hok? Kaxīy.

19 Ha:

—Hāpxopmā'ax tute xīy? Kaxīy.

Ha' nōy te:

—Kōmēn Nāyane yōg Yeyox te Topa pupi hām'āktux, tu hāpxopmā ka'ok, Topa

keppa' mīy, xix tikmū'ün keppa' mīy, tu hämyümmügä ka'ok kamah,

²⁰ ha 'ämānex xop xik mū yōg xexka xop te xonat xop pu' hōm, pu tup-tex, tu mīpkupnix hāp-tex, ha' xok xe'ēgnāg,

²¹ pak mū'āte hāmpē'paxex tap, hu: "Pe Yeyox yā Topa yōg mō'kutnā'ax, ha' yāy'kutnāhā', pu 'Iyaet yōg tikmū'ün xexkänā'!" Hamūn, pāyā' xok, ha hōnhā 'āmniy tikoyuk nōg.

²² Yā hōnhā 'ün te hām'āktux, hak mū kuxānōg. Māyōn xupep 'hā 'ün mōg, 'ūxukpot ha' mōg,

²³ pāyā Yeyox xokxax xip 'ohnāg, mīkax xap kox kopa' xip 'ohnāg, ha putpu' nūn, tu pexkox yōg mō'pok xop 'āktux, tu' pēnāhā nō'ōm, ha Yeyox putpu' hi'ax 'āktux,

²⁴ ha tik te xukpot ha' mōg kamah, ha' kox xip, pāyā 'ap pēnā'ah Yeyox. Kaxīy.

²⁵ Ha Yeyox te:

—'Āp-tox kummuk, 'ākuxa yūm pu'uk hām'āktux'ax kopah! Hōmā tik hittap te Topa pupi hām'āktux, tu tappet hā kax'āmi', pāyā 'ākuxa yūm 'ohnāg hām'āktux'ax kopah.

²⁶ 'Ok 'āxop te hämyümmüg hok? Topa te yāy'kutnāhā', pu tu' xūy, nūy yāyhā tu xexkah. Kaxīy.

²⁷ Tu Topa tappet hā tik 2 yūmmügāhā', tu mōnāyxop Mōyyex yōg xat'ax hā hämyümmügāhā', tu mōktu tik xohix te Topa pupi hām'āktux xop 'āktux, tu kama yāy mūn 'āktux, tu Topa yōg hām'āktux hittap hā hämyümmügāhā', nūy yāy mūn 'āktux.

²⁸ Ha mōktu xip tu xexka tu' mōxaha', ha Yeyox mōg'ax nō pehe',

²⁹ pa tik 2 te:

—Nāy, 'āmōg hok! 'Ügmū 'ātu' xip, nūy mōhōn nūnte', yā hōnhā 'āmāxak. Kaxīy.

Yīy Yeyox te tik mütik mōg,

³⁰ tu nōm mütik xit, tu pām paha', tu Topa pu: "Āmax," kaxīy, tu pām koxip, tu yāy xape pu' popmāhā',

³¹ ha Topa te tik pa maxnāhā', ha Yeyox yūmmüg, ha hāp'xip 'ohnāg 'hā Yeyox xip 'ohnāg, yā yāy xaxogāhā',

³² ha yāy pu hām'āktux, hu:

—Yāk kuxa hittup xexka 'hā hām'āktux putat kopah, tu Topa tappet hittap hā hämyümmügāhā'! Kaxīy. Ha' nōy te: Yamūn! Kaxīy.

³³ Tu' yok mō'ka'ok, tu Yenoyanēn tu' mōg, tu mōktu mōxaha', ha tik te 11 te yāy tu nū'nāhā', xi' mütik pip xop,

³⁴ tu:

—Hamūn! yā Yeyox te putpu' hi xe'ēgnāg! Yā Ximām te' pēnāhā'! Kaxīy.

³⁵ Ha tik 2 te Yeyox 'āktux, tu Yeyox te putat kopa hämyümmügā 'āktux, tu pām koxip tu ta 'ōm xip hok 'āktux.

Yeyox xip tik xop mütik

³⁶ Ha hāp'xip 'ohnāg 'hā', hām'āktux 'hā', Yeyox te nōm xop kopa' xip, tu:

—Pūyā Topa 'ākuxa māmāmā'! Kaxīy.

³⁷ Pāyā tik xop kuxānōg, tu' koxuk yīp'kutuk, pāyā 'a koxuk'ah,

³⁸ ha Yeyox te:

—Teptu 'ākuxānōg? Putep mūn hāpkīy hā xate'?

³⁹ Mā', 'ūgyīm pēnā', xik pata pēnā', yā 'ūgmūn yīnmūn. Mā', nūy 'ūg 'āpit. 'Ūkoxuk te' yīn xip 'ohnāg, xi' kup tox xip 'ohnāg, pak yīm pip, xik pata pip, xik yīn xe'e xip! Kaxīy.

⁴⁰ Tu hām'āktux kux, 'hā yāy yīm tu' mūg, xix yāy pata tu' mūg, tikmū'ün te mütik hāpkumep tu' mūg,

⁴¹ ha tikmū'ün kuxa hittup xexka nām, tu' yēy, hu yāy kuxa yīkopit, yīy Yeyox te:

—'Üpuk? Kaxīy.

⁴² Ha tu' hōm māhām, ha mō'hap kuxap xox yā' tu',

⁴³ ha' māhā', 'hā tikmū'ün xohix te' pēnāhā'.

⁴⁴ Ha Yeyox te:

—Hōmā 'āmütik 'ūk'xip, tu 'āxop hämyümmügāhā', tu Topa tappet hā 'āyümmügāhā', xayīy 'āyümmüg, ha mōnāyxop hittap Mōyyex te' xat'ax kax'āmi', xix tik xop te Topa pupi hām'āktux te kax'āmi', ha kaxīy 'ūkxūy'ax xik xok'ax kax'āmi', yak mūn Kunnix. Kaxīy.

⁴⁵ Tu yāy yōg xop putox maxnāhā', pu tu hämyümmüg, nūy Topa yōg hām'āktux hittap hā hämyümmüg,

⁴⁶ tu xe hām'āktux, hu:

—Topa yōg tappet te Kunnix 'āktux, 'ūxuxet'ax nōy yā Topa yōg hämyāy'kutnā'ax, ha tappet te' xok'ax 'āktux, tu nō hāpkot'ax 'āktux, tu 'āmniy tikoyuk nōg 'hā putpu' hi'ax 'āktux, yāk mūn 'āktux,

⁴⁷ tu' xat, pu hām'āktux, pūyīy hām'āpak max'ax 'āktux hām xexka xohix tu', 'ūhep xohix pu', tu kōmēn Yenoyanēn kopa hām'āktux'ax hāmāxap, pu tikmū'ün yāyhāhup, tu hāpkummuk mīy kux, pūyīy Topa xaxogā', pu tu' kux.

⁴⁸ 'Āxop te nōmhā hāp'xopmā'ax xohix pēnāhā xi' xupak,

⁴⁹ Nāy, 'ūhip, yā Topa te 'āxop pu hām'āktux xex, ha 'āte xa nū'kutnāp-tup, pa kōmēn Yenoyanēn kopa 'āti', 'ūhip tu', tu mōktu Topa te 'āxop ka'ogāhā', tu Topa Koxuk nū'kutnāp-tup, pu 'āka'okgā', ha 'āxop te hāpka'ok'ax mō'tat putup, topixxax putuk. Kaxīy.

Yeyox mōg pepi pexkox tu'

⁵⁰ Tu' xip tu xexka Metān tu' mōgāhā', tu' yīm kute tex pepi', tu:

—Pūyā Topa xa hāmmaxnā'! Kaxīy.

⁵¹ Tu hām'āktux 'hā pepi' mōg, tu pexkox ha' mōg,

⁵² ha nōm tikmũ'ũn te' kopaxux ha' mōxip,
tu nūktettex, tu' yēy, tu Yenoyanēn tu' putpu'
mōg, tu' kuxa hittup xexkah,

⁵³ tu 'āmnīy xohix hā' pip Topa pet xexka
kopah, nūy Topa max 'āktux pax.

Tu ta tu' kux.

YOÄM TE TOPA YÖG HÄM'ÄPAK MAX'AX KAX'ÄMI'

Topa yög häm'äktux te tikmü'ün hññähä'

¹ Hömä 'ühittap 'ap xip'ah häm xexka', ha ta' xip Yeyox, tu Yeyox 'äxet'ax nõy hä: Topa yög Häm'äktux. Kaxiy. Yä tikmü'ün pu Topa müg. Topa yög Häm'äktux te Topa müti' tihī', tu Topa putuk, yä Topa xe'e'.

² Topa te häm xexka mīy, ha Topa müti' tihī Topa yög Häm'äktux.

³ Topa te Yeyox ka'ogähä', puyiy häpxop xohix xexka mīy. 'Ok Topa te yäpxehnäg hä' mīy häpxop? 'Ämhok. 'Ok Topak-tok müti' mīy häpxop xohix xexka? Hamün, 'ümīy häpxop xohix xexka nümütik.

⁴ Topa yög Häm'äktux te yönnä'ī xohix hññähä', ha' hi'ax te kuyänäm putuk tikmü'ün kuxa kopah, tu tikmü'ün pu häptupmähä', puyiy hämyümmüg,

⁵ ha mö yänäm yön häpkoxtap kopah, ha häpkoxtap te kuyänäm putex 'ohnäg. Hä kaxiy Yeyox nün, tu nõktu tikmü'ün kuxa kopa häptupmähä', pa' kummuk xop te Yeyox hupmä yümmüg 'ohnäg.

⁶ Ha ta' xip tihik 'üxuxet'ax Yoäm, ha Topa te' yäykutnähä', tu' xut tikmü'ün kopah, tu nū'kutnähä tikmü'ün hah.

⁷ Ha ta' nün Yoäm, nūy tikmü'ün pu Topak-tok 'äktux, yä nõm te kuyänäm putuk 'äktux, puyiy tikmü'ün xohix häm'äktux 'äpax, nūy tu' kuxa mäm ka'ok.

⁸ Yoäm te kuyänäm putuk'ah, pa' nün, nūy nõm te kuyänäm putuk 'äktux.

⁹ Nõm te kuyänäm xe'e' putuk, tu ta' nün, tu nõktu tikmü'ün xohix tu' xupep, yä' nün Yeyox.

¹⁰ Kuyänäm, yä Topa yög Häm'äktux, yä Topak-tok, tu' xip nün te häm xexka tu'. Hömä Topa te yäy kutok ka'ogähä', puyiy häm xexka mīy, pa' tikmü'ün te Topak-tok yümmüg 'ohnäg nõmhä'.

¹¹ Yä' nün Topa yög Häm'äktux, tu nõktu yäy yög häm xexka tu' xupep pa' xape xop tep-tup nõg,

¹² pa' tikmü'ün yäg te Yeyox putup, tu' kopa' kuxa mäm, ha Topa te nõm xop ka'ogähä', puyiy yäyhä xape xop Topa yög, yä Topak-tok xop.

¹³ Yä Topa hä xape xop. 'Ok 'ütut te' put xi' tak te nõ' tehe', yiy yäyhä xape xop Topa hä? 'Ämhok. 'Ok tut tep-tup xi' tak, hu' put? 'Ämhok. Pa yä Topa mün hä xape xop. Yä Topa tep-tup, ha yäyhä Topa xape xop.

¹⁴ Ha ta' nün Topa yög Häm'äktux häm xexka tu' nün tehe, ha' tut te' put, yä tikmü'ün Yeyox, tu' tikmü'ün müti' tihī'. Yä' max

xe'ëgnäg, yä' max tikmü'ün xohix pu', tu häpxe'e' 'äktux, yä Topa te yäy kutok pit puxet 'ümax xe'ëgnägähä', yä Topa te' maxnähä tikmü'ün xohix pu', ha hämyok xohix 'äktux.

¹⁵ Ha ta' nün Yoäm, tu nõktu häm'äktux ka'ok, hu:

–Hömä 'äte xa häm'äktux hu: "'Üg pe' nün putup tihik. Hamün xexka', ha tak mün kutögnäg, yä 'üyög hämyäxatamuk xohix kux 'ohnäg pa' yög nū xohix miax." Kaxiy.

¹⁶ 'Ükuxa max xe'ëgnäg, hu yümüg xohix pu hämmaxnähä', tu xe hämmaxnä mökuma'mög

¹⁷ Hömä Topa te Möyyex pu yäy yög xat'ax popmähä', puyiy Möyyex Yoneo xop xat, pa Topa te Yeyox Kunnix pu hämmaxnähä', yiy ta Yeyox te tikmü'ün pu hämmaxnähä', tu häpxe'e' 'äktux.

¹⁸ Tikmü'ün te Topa pēnā 'ohnäg, pa Topak-tok puxehnäg te Topa putuk, tu Topa müti' tihī', ha tikmü'ün te Topak-tok pēnähä', hu ta tu' yümmüg Topah. Yä tute yümü'ä Topa müg.

Yoäm te tikmü'ün putox pix, tu Topa yög häm'äpak max'ax 'äktux

¹⁹ Ha ta' pip Yoneo xexka xop kōmēn Yenoyanēn tu', tu mō'pok 'ämānex xop xix Nemi yög xop, puyiy Yoäm yīkopit. Ha ta' nün, tu nõktu' yīkopit, hu:

–'Ü'üm 'ämün? Kaxiy.

²⁰ Ha Yoäm te häm'äktux xe'e, hu:

–'Ak mün Kunnix'ah, yä Topa te Kunnix yäykutnähä', puyiy tikmü'ün kuxa kummuk xit. Kaxiy.

²¹ Ha xe' yīkopit hu: 'Ü'üm 'ämün? 'Ok 'Enit? Kaxiy.

Ha Yoäm te:

–'Ämhok. Kaxiy.

Ha xe:

–'Ok 'ämün nõ'öm, tu Topa pupi häm'äktux? 'Ok putpu 'änün? Kaxiy.

Ha:

'Ämhok. Kaxiy.

²² Ha:

–'Äpu häm'äktux, 'ü'üm 'ämün? 'Ügmü'äte 'äyümmüg putup, hu mög, hu nõm te nüg müg pok xop pu häm'äktux. Putep 'äktux? Kaxiy.

²³ Ha Yoäm te:

–Yä yänmün xupep'ax 'ügmün, tu häm'äktux ka'ok häm panip xexka tu', hu: 'Äpu 'äxop putat yoa'. Yümmüg xuxyā nün. Yä 'ög häpxopmä'ax yoa'. Kaxiy.

Yä häm'äktux te' putuk 'Iyait yög, nõm te Topa pupi häm'äktux.

²⁴ Yä Paniye xop te Yoäm yīkopit,

²⁵ hu:

–'A 'ämün yä Kunnix'ah Topa te nõm yäy kutnähä', xix 'ap 'Enit'ah, xix 'ap nõy'ah nõm te Topa pupix häm'äktux. Tepte 'äxat xate tikmü'ün putox pix? Kaxiy.

²⁶ Ha Yoām te:

—Ātep-tox pix kōnāg hā, pa 'āxop kopa' xip nō'ōm, pa yā 'āxop te' yūmmūg 'ohnāg,

²⁷ hak pe' nūn putup nō'ōm. Hamūn xexka', hak-mūn kutōgnāg, hu yōg pataxax ko'ap-tup 'ohnāg. Yāk-tōgnāg 'ūgmūn.

²⁸ Yā nōm hāpxopmāhā xiptuxexka Metān tu' kōnāg kox Yohnām xatapah. Yā Yoām te tikmū'ūn putox pix 'ōnteh.

Nōm te tikmū'ūn pupi' xok putup kahnēn xok putuk

²⁹ Hāptup 'Ihā' nūn Yeyox Yoām hah, ha Yoām te' pēnāhā', tu:

—'Ūpēnā' nōm te tikmū'ūn pupi' xok putup Topa yōg tihik kahnēn xok putuk. Tute tikmū'ūn xohix kuxa kummuk xit putup.

³⁰ Hōmā 'āte nōm 'āktux, hu: "Tik tek pe' nūn putup, tu' xexkah, ha tak mūn kutōgnāg. Yā 'ūyōg hāmyāxatamuk xohix kux 'ohnāg, pa yōgnū xohix miax." Kaxīy.

³¹ Hōmā 'a' yūmmūg'ah nōm tihik, pak nūn, nūy tikmū'ūn putox pix, puyīy tikmū'ūn nōm yūmmūg. Kaxīy.

³² Tu xe: 'Āte' pēnāhā Topa Koxuk te pexkox tu' yīxohoh, yā kuxxuxtut putuk, tu nūktu tik tu' xupep, tu nōm yīmū' xip ka'ok.

³³ Yā 'āte' yūmmūg'ah tihik, pa Topa te nūgkutnāhā, 'ūyīy tikmū'ūn putox pix. Topa te: "Xate pēnāp-tup Topa Koxuk yīxop-tup, tu nūktu tik yīmū' xip ka'ok putup, ha nōm te tikmū'ūn pu' hōm putup Topa Koxuk." Kaxīy.

³⁴ Āte nōm pēnāhā', tu xa' xuktux, tihik yā Topak-tok. Kaxīy.

Yeyox yōg tik xop te māxap

³⁵ Hāptup 'Ihā xe' xip Yoām tik tix mūtik, yā Yoām mūtik mōg xop kopa' pip,

³⁶ ha' nūn Yeyox, tu nōā'yēn, ha Yoām te Yeyox pēnāhā', tu hām'āktux, hu:

—Nōm te tikmū'ūn pupi' xok putup, kahnēn xok putuk, yā' yīy 'ohnāg, yā Topak-tok. Kaxīy.

³⁷ Ha tik tix te' xupak, tu ta' mōg Yeyox hah, nūy Yeyox pe' mōg, tu' mōg,

³⁸ Ha Yeyox yōkānām, tu tik tix pēnāhā', tu: —Tep mūn xak? Kaxīy.

Ha:

—Notot, pi'yā 'āpet yūm?

³⁹ Ha Yeyox te:

—Mā, nūy pēnā'. Kaxīy.

Ta' mōg Yeyox xix tik tix, tu' pet pēnāhā' māyōn he 'Ihā' tihī', 'Ihā mōktu yā 'āmāxak.

⁴⁰ Yā tik tix, ha yāp-xet 'āxet'ax 'Ānene', yā Xīmām Pet taknōy. Yā hōmā tute Yoām yōg hām'āktux 'āpak, hu Yeyox pe' mōg.

⁴¹ Tu ta' mōg 'Ānene', nūy yāy taknōy xax, tu' xipihī', tu:

—'Ūgmū'āte Kunnix xipihī', yā Topa te nōm yāy kutnāhā'. Kaxīy.

⁴² Tu ta' nūn 'Ānene', tu' taknōy Xīmām nūn nā nā' nūn, tu nūktu Yeyox tu' mōxaha', ha Yeyox te Xīmām pēnāhā', tu:

—Āmūn yā Xīmām, yā Yoām kutok. 'Āte xa 'āxet'ax nōy hōm, yā Xep. Kaxīy.

Yā Xep, yā 'āxet'ax nōy hā: Pet, yā tikmū'ūn yīy'ax hā: mikaxxap. Kaxīy.

Yeyox te' xānāhā Pinip xix Nātānāyet

⁴³ Hāptup 'Ihā Yeyox mōg putup hāpxexka Ganinet tu', tu Pinip xak, tu' xipihī', tu:

—Mā, 'ūg pe mōg! Kaxīy.

⁴⁴ Yā Pinip yōg kōmēn Betxax. Yā 'Ānene yōg kōmēn kamah, xix Pet yōg kamah.

⁴⁵ Ha ta' mōg Pinip, tu Nātānāyet xak, tu mōktu' xipihī', tu:

—'Ūgmū'āte' xipihī nō'ōm. Hōmā 'ūhittap Mōyyex te nōm kax'āmi Topa yōg xat'ax yōg tappet tu', xix Topa pupix hām'āktux xop te nōm kax'āmi kamah. Yā Yeyox, yā Yoye kutok, yā kōmēn Nāyane yōg tihik. Kaxīy.

⁴⁶ Ha Nātānāyet te:

—'Ok 'ūm max tikmū'ūn 'ōnte Nāyane kopah? Āmhok. Kaxīy.

Ha Pinip te:

—Pu yūmū mōy, pēnā'. Kaxīy.

⁴⁷ Tu ta' mōg, pa' xip Yeyox, tu' nōy nūn pēnāhā', tu:

—Pēnā' Iyaet xop yōg tik xe'e, yā tik te' koit 'ohnāg. Tik te hāpxopmā yok. Kaxīy.

⁴⁸ Ha Nātānāyet te:

—Teptu xatek yūmmūg? Texīy? Kaxīy.

Ha Yeyox te:

—'Āte 'āpēnāhā', yā 'āxip piget kup kakak, ha Pinip te 'āxānāhā'

⁴⁹ Ha Nātānāyet te:

—Notot, 'āmūn Topak-tok. Xate 'Iyaet xop xat.

⁵⁰ Ha Yeyox te:

—'Āte xa' xuktux 'āte 'āpēnāhā piget kup kakak, yīy 'ākuxa yūm 'ūgkopah. 'Ok kaxīy 'ākuxa yūm? Yā' max nūhū', pa xate xe' pēnāp-tup hāpxopmā max xohix xe'ēgnāg.

⁵¹ Āte xa hām'āktux xe'e xate pexkox xōn pēnāp-tup, ha ta' pexkox yōg nū'pok xop pepi' mōg putup, tu putpu' yīxop-tup, tu nūktuk mūn xuka' xup putup, yā Tikmū'ūn Kutok xuka' xup putup.

2

Yeyox te yāyta pēnāhā'

¹ 'Āmnīy tix nōg, 'Ihā tikmū'ūn yāy tap-tup kōmēn Kānā tu' hāpxexka Ganinet kopah, tu 'āmuk xexka mīy, ha Yeyox mūktut xip.

² Ha tikmū'ūn te' xānāhā Yeyox xix yōg tik te 12 xop, pu tu xit. Yīy ta' mōg, tu mōktu' mōxaha'.

³ Ha tikmū'ūn xohix te xupyāg xo'op, ha mōktu' kox, ha ta' xip Yeyox mūktut, tu Yeyox pu hām'āktux, hu:

—'Ūkox xupyāg. 'Ūnōg. Kaxīy.

4 Ha Yeyox te:

—Mây, hõnhâ 'ûkxat hok, 'ûyîy hâpxopmâ xate nõm putup. 'A hõnhâ'ah. Pa hâpxip, 'îhâ Topa tek xat putup. Kaxîy.

5 Ha' tut te kãmānat pu:

—'Āpu hâpxopmâ tute 'āxop xat. Kaxîy.

6 Ha ta' pip naxtox xexkanām mîkaxxap hâ nõ'õm 'ûxohix te' 6, ha Yoneo xop te nõm hâ yây pix, xix nax pix, xix kânēy pix, nûy yây yõg xat'ax mîy. Yâ' xexkanām naxtox. Naxtox puxet te' tat nit xohix te' 80, xi' nõy 100.

7 Ha Yeyox te kãmānat xop pu hām'āktux, hu:

—'Āpu kõnāg pux, pu naxtox hâ nõ'xih. Kaxîy.

Ha' pux ha nõ'xîmnāg.

8 Ha Yeyox te:

—'Āpu' hep kutõgnāg xut, nûy pax mõg, nûy 'āmuk xexka yõg xat'ax pu' hõm. Kaxîy.

Ha' xut, tu' pax mõg,

9 ha xat'ax te' hep xo'op, pa 'ap kõnāg'ah, yâ yâyhâ xupyāg. Hām 'ûm tu' nûn 'ûhep? Yâ' yûmmûg 'ohnāg, pa kãmānat te' yûmmûg nõm te' hep xut, ha 'āmuk xexka yõg xat'ax te tik te yâyta xânāhâ',

10 tu:

—Tikmû'ûn xohix te' popmāhâ xupyāg max hāmāxap, ha tikmû'ûn te nõm xo'op, tu mõktu hix ka'ok, hak-nāy tu' popmāhâ xupyāg kummuk, pa nõmhâ' pip xupyāg max 'ohnû'. Kaxîy.

11 Yâ hâ kaxîy Yeyox te hâpxopmâ ka'ok xe'ēgnāg hāmāxap, yâ kômēn Kānâ tu' mîy hâpxexka Ganinet tu' Yeyox max xe'ēgnāg, ha Yeyox yõg tik xop kuxa mām Yeyox kopah.

12 Hâpxip 'îhâ' mõg Yeyox, xi' tut, xi' taknõy xop, xix Yeyox yõg tik xop, tu' nox tihî kômēn Kapānām tu'.

Yeyox mõg Topa pet xexka tu'

13 Hâpxip 'îhâ Yoneo xop te' mîy putup 'āmuk xexka 'ûxuxet'ax Nõā'yēn. Ha ta' mõg Yeyox kômēn Yenoyanēn tu', tu' mõg, tu mõktu' xupep.

14 Tu ta' mõg Topa pet xexka tu', pa' kopa' pip tikmû'ûn, tu nõmenex mûnûytut pit, xix kahnēn, xix kuxxutut, tu tayûmak hâ' nõy yānān, ha mîmpe xit'ax 'îhâ' mām,

15 ha Yeyox te xikot mîy poxît hâ, tu hâptopa papuk kahnēn xix mûnûytut pit, tu tayûmak nõ'xok, yâ tayûmak hâ' nõy yānān xop yõg, tu' yõg mîmpe xit'ax nõ'xok kamah.

16 Tikmû'ûn te kuxxutut nõnenex, ha Yeyox te nõm pu:

—'Āpu kuxxutut mõgâ nûpeheh. 'Ūmîy hok nâpet nûnte 'âtak pet kopah. Kaxîy.

17 Ha Yeyox mûtik mõg xop te' xutîgāhâ', yâ Topa yõg tappet tu' kax'āmi hu: "Yâ kuxap putuk 'ûgkuxa kopah, yâ 'âte Topa pet putup-pax, tu Topa pet hâ yîpkumîy." Kaxîy.

18 Ha Yoneo xexka xop te:

—'Āpu hâpxopmâ ka'ok xe'ēgnāg, 'ûyîy yûmmûg Topa te nõ'ākutnāhâ', xayîy xohix papuk Topa pet kûnāpah. Kaxîy.

19 Ha Yeyox te:

—'Āxop te nõ' pet putxok, kopxix xe' mîy'ax 'āmniy tikoyuk hâ. Kaxîy.

20 Ha:

—'Ok xate' mîy'ax 'āmniy tikoyuk hâ? Tikmû'ûn te Topa pet xexka mîy hāmîyaxatamuk xohix te' 46 hâ. Kaxîy.

21 Pa 'āmihok, Yeyox te yây yîn 'āktux, yâ Topa xip Yeyox kopah, Topa pet putuk.

22 Hâpxip ha ta Yeyox putpu' hi', 'îhâ Yeyox yõg tik xop te' xutîgāhâ Yeyox yõg hām'āktux, hu' kuxa mām ka'ok Topa yõg hām'āktux kopa xix Yeyox yõg hām'āktux kopah.

Yeyox te tikmû'ûn xohix yûmmûg

23 'Ūxip Yeyox kômēn Yenoyanēn tu', 'îhâ tikmû'ûn te' mîy 'āmuk xexka 'āxet'ax Nõā'yēn, ha Yeyox te hâpxopmâ ka'ok xe'ēgnāg punethok. Yâ tikmû'ûn te' mîy yûmmûg 'ohnāg. Tikmû'ûn te' pēnāhâ', hu' xohix kuxa mām ka'ok Yeyox kopah.

24 Pa Yeyox kuxa yûm 'ohnāg tikmû'ûn kopah xix yõg hāmîy yûmmûg kopah, tute tikmû'ûn xohix yûmmûg tu'.

25 'Ok Yeyox pu tikmû'ûn yûmmûgāhâ?' 'Āmhok. Yâ tute tikmû'ûn xohix kuxa yûmmûg.

3

Yeyox xix Nîkonēm

1 'Ūxip tihîk 'ûxuxet'ax Nîkonēm, yâ Yoneo xop yõg xat'ax xop yõg tihîk, yâ Paniye xop kopa' xip.

2 'Āmniy 'îhâ' nûn Yeyox hah, nûy hām'āktux, hu:

—'Ūgmû'âte' yûmmûg Topa te nõ'ākutnāhâ'. Yâ xate hâpxopmâ ka'ok xe'ēgnāg. Paxpu Topa 'âyõkāmû mõg hok, ha ta hâpxopmâ ka'ok xe'ēgnāg 'ohnāg. Kaxîy.

3 Ha Yeyox te:

—'Āte xa hām'āktux hâpxop xe'e. Tep-te Topa pēnāp-tup xix yây yõg tikmû'ûn, 'îhâ Topa te yây yõg tikmû'ûn xat putup, ha' yîpkox pip? Yâ nõm nāhâ 'ûxeheh. 'Ap nõy te' pēnāp-tup'ah. Kaxîy.

4 Ha Nîkonēm te:

—Tep texîy tik xiptap 'ûm nāhâ 'ûxeheh? 'Ok 'ûtut hâ mō'nāhâ 'ûxeheh, ha xe' put? Kaxîy.

5 Ha Yeyox te:

—'Āte xa hâpxe'e 'āktux. Yûmûg xakux. Yûmûg tut te yûmûg pop, ha ta Topa Coxuk te yûmûg mîy Topa yõg tikmû'ûn. Hâ kaxîy yûmûg xakux 'ûxeheh, yâ yûmûg xakux tix. Yûmûg xe xakux 'ohnāg, kopxix yûmûg mōxakux 'ohnāg Topa yõg tikmû'ûn xop kopah.

⁶ 'Ūn tek-tok pop, ha' hi 'ūk-tok. Ha ta Topa Koxuk te' hīnnāhā Topa yōg tikmū'ūn.

⁷ 'Āte xa hām'āktux, hu: "Āpu nāhāy 'ūxeheh. Hām'āktux hok hu: Xok 'ūm?" Kaxīy.

⁸ 'Āmuuh mōg hām 'ūm tup-tup, ha xate 'āmuuh 'āpak. Pi'a' nū? Xate' yūmmūg'ah. Pi'a' mōg? Xate' yūmmūg'ah. Yā xate' pēnā 'ohnāg. Hā kaxīy xate' yūmmūg 'ohnāg, Topa Koxuk te' mīy Topa yōg tikmū'ūn, tu' hīnnāhā nōm xakux 'ūxeheh.

⁹ Ha Nīkonēm te:

—Texīy? Kaxīy.

¹⁰ Ha Yeyox te:

—Xate 'Iyaet yōg tikmū'ūn pu hāmyūmmūgāhā', pa' yūmmūg 'ohnāg Topa Koxuk te' mīy Topa yōg tikmū'ūn.

¹¹ Hamūn, 'āte xa hām'āktux xe'e'. 'Ūgmū'āte hāmyūmmūg, hu nōm 'āktux, tu hāmpēnāhā, hu nōm 'āktux, pa' āxop te yōgnū hām'āktux 'āpak 'ohnāg.

¹² 'Āte xa hām xexka yōg xop yōg hāpχopmā'ax 'āktux, pa' ākuxa yūm 'ohnāg. 'Āte xa pexkox yōg xop yōg hāpχopmā'ax 'āktux. Texīy ākuxa yūm putup? 'Ap yūm putup'ah.

¹³ Tikmū'ūn te pexkox tu' mōg 'ohnāg, tu yīxo 'ohnāg hām xexka tu', tu pexkox yōg xop yōg hāpχopmā'ax 'āktux 'ohnāg. 'Ūkpušet yā Tikmū'ūn Kutok te nōm 'āktux, pexkox tuk yīxohoh tu'.

¹⁴ —Hōmā 'ūhittap Mōyyex te kāyā komut mīy hām panip xexka tu', tu mīm yīpaka' xup. Hā kaxīy tikmū'ūn tek mūn yīpaka xup putup, yā Tikmū'ūn Kutok yīpaka xup putup,

¹⁵ puyīy xohix 'ūm 'ūkuxa mām 'ūgkopah, tu' hi xe'ēgnāg mōkuma' mōg, ha' kux 'ohnāg.

¹⁶ Yā Topa te mō'yāyxe'ēgnāg hām xexka yōg xohix xop, hu yāy kutok pit puxehnāg nū'kutnāhā' hām xexka tu', puyīy xohix 'ūm 'ūkuxa mām ka'ok Topak-tok kopah, hu' xakix ka'ok putup'ah, pa' hi xe'ēgnāg mōkuma' mōg putup, ha' kux 'ohnāg.

¹⁷ Topa te yāy kutok nū'kutnāhā hām xexka tu', nūy nōm hā hām xexka yōg xohix xop kuxa kummuk xit, nūy kuxa maxnā', nūy nōm yōg hāpkummuk mīy'ax hā yānān hok.

¹⁸ —Topa te' kuxa mām xop yōg hāpkummuk mīy'ax hā yānān 'ohnāg, pa' yānān 'ūkuxa mām 'ohnāg xop yōg hāpkummuk mīy'ax hā, yā' kuxa mām 'ohnāg Topak-tok puxet kopa hah.

¹⁹ Teptu Topa te hāpkummuk mīy'ax hā yānān? Yā Yeyox nūn, yā kūyānām nūn putuk, tu nūktu' xupep nūnte hām xexka tu', pa tikmū'ūn tep-tup hāpkoxtap, 'ap putup'ah kūyānām, yā Yeyox putup'ah, hāpkummuk mīy tu'.

²⁰ Yā hāpkummuk mīy'ax xop tep-tup nōg kūyānām, tu' mōg 'ohnāg kūyānām hah, nūy hāpkummuk mīy'ax pēnā hok.

²¹ Pa hāmyo'a'ax xop mōg Yeyox hah, yā kūyānām putuk hah, puyīy xohix pēnā', yā Topa 'āpak, hu hāmyok mīy. Kaxīy.

Yeyox xix Yoām, yā nōm tep-tox pix

²² Tu ta' mōg Yeyox xix yāy yōg tik xop, tu mōktu hāpχexka Yonex tu' mōxaha', tu' nox tihi', tu tikmū'ūn putox pix.

²³ Ha ta' xip Yoām, yā 'Ēnōm tu' xip, yā Xanīn yīkak, tu tikmū'ūn putox pix, kōnāg punethok hah, ha ta' nūn 'ūxohix, hap-tox pix.

²⁴ Yā xonat te Yoām mō'tat putup kanet ka'ok hā, pa hōnhā' xip'ah kanet kopah.

²⁵ Ha ta' pip Yoām mūtik mōg yāg xop, tu yāy mānōg kōnāmāhā Yoneo puxet mūtik. Yā Yoneo xop yōg 'āmuk xexka tu yāy mānōg, yā 'āmuk xexka 'āxet'ax Yāy Pix. Kaxīy.

²⁶ Ta' nūn Yoām mūtik mōg xop Yoām hah, tu:

—Yāyā, hōmā' xip tihik 'āmūtik kōnāg kox xatapa', yā hōmā xate nōm 'āktux. Hōnhā tik tep-tox pix, ha tikmū'ūn xohix te ha nū' yāy xix. Kaxīy.

²⁷ Ha Yoām te:

—Pexkox yōg Topa te tikmū'ūn xexka mīy, ha tikmū'ūn xohix te nōm pe' mōg, pa' xexka mīy hok, puxix tikmū'ūn nōm pe' mōg 'ohnāg.

²⁸ Hōmā 'āte xa yāy 'āktux, hu: "Ūgmūn 'ap Kunnix'ah, yā 'āte tikmū'ūn kuxa kummuk xit 'ohnāg, pa Topa te nūgkutnāhā, 'ū mōg hāmāxap, hak-nāy tu nōm nūn." Kaxīy. Ha xate' xupak, tu' yūmmūg.

²⁹ Yā hā kaxīy putuk: Tikmū'ūn te yāy tap-tup, ha 'ūn te yāy taha yā tik te yāy taha yōg. Ha ta' xip tik te yāy taha xape', tu hām'āktux 'ohnāg, pa hām'āpak, tu tik te yāy taha yōg hām'āktux 'āpak, hu' kuxa hittup xexka', tu' yāykūmīy 'ohnāg. Yāg mūn putuk. 'Āte tik te yāy taha xape putuk, tuk kuxa hittup xexka nōmhā, yā tikmū'ūn xohix te Yeyox pe' mōg.

³⁰ Yā' max, nōm xexka nōy nā' mōg, pu tikmū'ūn xohix nōm pēnā', ha ta' max, 'ūgmūn kutōgnāg nōy nāg mōg, pu tikmū'ūn 'ūgmūn pēnāk-tōgnāg.

Nōm te pexkox tu' yīxohoh

³¹ Hōmā nōm xip pepi', tu' yīxohoh. Hamūn 'ūxexkanām, ha ta' xohix nōy 'ap xexka'ah. Hām xexka yōg tikmū'ūn yā hām xexka yōg xop xe'e', tu hām xexka yōg tikmū'ūn yōg hāpχop 'āktux. Ha ta nōm te pexkox tu' yīxohoh yā' xexkanām.

³² Tute hāpχop pēnāhā pexkox tu', tu' pēnā'ax 'āktux, tu' xupak'ax 'āktux, pa tikmū'ūn te yōg hām'āktux kopa' kuxa mām 'ohnāg.

³³ Pa tikmū'ūn 'ūm te 'ūyōg hām'āktux kopa' kuxa mām, puxix hām'āktux hu: "Topa 'ūmax xe'e'." Kaxīy.

³⁴ Topa te yây kutok nû'kutnâhâ', ha tute Topa yôg hâ'm'âktux 'âktux, ha Topa te nôm pu' hôm Topa Koxuk, ha nôm hâ nû'xîmnâg Topa Koxuk hâ, tu Topa Koxuk 'âpaknâm.

³⁵ Yâ' tak Topa te yây kutok mō'yây xe'ëgnâg, tu' nōy pu hâpxop xohix popmâhâ', puyiy 'ûxohix xop xat.

³⁶ Tikmû'ûn 'ûm kuxa yûm Topak-tok kopah, tu' hi xe'ëgnâg mōkuma'mōg, ha' kux 'ohnâg. Ha ta' nōy 'ûm te Topak-tok pit 'âpak 'ohnâg, tu 'a' hi xe'ëgnâg mōkuma'mōg putup'ah, pa Topa te nôm tu' gây mōkunâ'mōg, ha' kux 'ohnâg.

4

Yeyox xix hâpxexka Xâmânit yôg 'ûhûn

¹ Ta tikmû'ûn xohix te hâ'm'âktux, ha Paniye xop te' xupak. Yâ hâ'm'âktux Yeyox mûtik hâpkumep xop xohix nōy nâ' mōg xexka', ha ta Yoâm mûtik hâpkumep xop xohix tapax 'ohnâg. Tikmû'ûn te kama' hâ'm'âktux, Yeyox te tikmû'ûn xohip-tox pix, ha ta Yoâm te tikmû'ûn tîgnâg putox pix.

² Pa 'âmhok. Yeyox te 'ap-tox pix'ah, pa Yeyox yôg tik xop tep-tox pix.

³ Ha Yeyox te nôm 'âpak, tu ta' mōg hâpxexka Yonex kûnâpah, tu putpu' mōg hâpxexka Ganinet tu'.

⁴ Pa' xip hâpxexka Xâmânit, ha nôm hâ yâyikutut, yâ Topa tep-tup.

⁵ Tu ta' nûn, tu nûktu kômên Xik tu' xupep hâpxexka Xâmânit kopah, yâ Yako yôg hâ'm yîkah. Yâ hōmâ Yako te yây kutok Yoye pu hâ'm hōm.

⁶ Yâ' xip Yako yôg kônâg xupup kox, ha ta' tuknôg Yeyox, hu kônâg xupup kox kux tu' yûm, 'hâ mâyôn te yây kote' yûm.

⁷ Ha ta' nûn 'ûhûn hâpxexka Xâmânit yôg, nûy kônâg tat xut. Ha Yeyox te:

—'Â kônâg 'ûm tat, 'û xo'op. Kaxîy.

⁸ Yâ Yeyox yôg tik xop 'ap xip'ah. 'Ûmôg kômên tu', nûy yây xit'ax pop.

⁹ Ha 'ûn te:

—'Âmûn yâ Yoneo xop kopa 'âxip, pak mûn yâ Xâmânit xop kopak xip. Teptu 'âtu 'âkax, hu: "Â kônâg 'ûm tat"? Kaxîy.

Yâ Xâmânit xop te hâpxopmâ 'ohnâg Yoneo xop mûtik.

¹⁰ Ha Yeyox te:

—'Ok xate' yûmmûg Topa te tikmû'ûn pu nôm hok hōm, tu nû' nôm kutnâhâ'? 'Ok xate' yûmmûg 'ûgmûn 'û'ûm? Xate' yûmmûg, nûy ta 'âtu 'âkax, yîy 'âte xa' hōm kônâ'âg, nôm te tikmû'ûn hînnâ xe'ëgnâg. Kaxîy.

¹¹ Ha 'ûn te:

—Notot, naxtox 'ûm yûm hok, ha kônâg xupup kox tox. Tep hâ' xut xate kônâ'âg, nôm te tikmû'ûn hînnâ xe'ëgnâg?

¹² Yûmû yôg mōnâyxop Yako te yûmû'â hōm nûhû' kônâg xupup kox. Yako te' xo'op nûhû' kônâ'âg, xik-tok te', xix yôg xokxop

tut xop te'. 'Ok 'âmûn xexka', ha ta Yakok-tôgnâg? Kaxîy.

¹³ Ha Yeyox te:

Tikmû'ûn te' xo'op kônâ'âg nûhû', pa hâpxip 'hâ kônâg tup-tup xûy 'ûxeheh.

¹⁴ Pa 'âte tikmû'ûn pu kônâg nōy hōm, ha tikmû'ûn te nôm xo'op, tu xe kônâg putup xûy pip putup'ah. 'Âte tikmû'ûn pu' hōm nō'ôm kônâ'âg, ha nôm te nâgyîkox putuk tikmû'ûn kuxa kopah, tu tikmû'ûn hînnâ xe'ëgnâg mōkuma'mōg, ha' kux 'ohnâg. Kaxîy.

¹⁵ Ha 'ûn te:

—'Â' hōm nō'ôm kônâ'âg, ha xe kônâg putup xûy 'ûm pip putup'ah, ha 'âte putpuk nûn putup'ah nûnteh, nûy kônâg tat xut. Kaxîy.

¹⁶ Ha Yeyox te:

—Mōg, nûy 'âyîpxox xânâ', pu nû'. Kaxîy.

¹⁷ Ha 'ûn te:

—'Ap xip'ah 'ûgyîpxox. Kaxîy.

Ha Yeyox te:

¹⁸ —Hamûn, xate hâ'm'âktux xe'e', 'a' xip'ah 'âyîpxox. Pa hōmâ xate 'âyîpxox mûtik yâytaha', tu' nîm, nûy nōy mûtik yâyta', tu mōktu 'âyîpxox xohix te' 5 te kaxîy, ha ta hōnhâ 'âtihi tik mûtik, pa yâ 'a' 'îpxox'ah. Xate hâ'm'âktux xe'e', 'ap koit'ah. Kaxîy.

¹⁹ Ha 'ûn te:

—'Âte' yûmmûg nōmhâ, xate Topa pupi hâ'm'âktux, yâ 'ûgyûmmûg xexkah.

²⁰ 'Ûgmû yôg mōnâyxop te Topa pu nûktetex yîktix tu' nûhû', pa 'âxop te' xuktux, 'ûmax, pu Topa pu nûktetex kômên Yenoyanên tu'. Kaxîy.

²¹ Ha Yeyox te:

—Nîxxix, 'ûxupax. Hâpxip puxix tikmû'ûn te Topa pu nûktetex putup, pa yîktix tu' nûktetex hok, xix Yenoyanên tu' nûktetex hok.

²² 'Âxop te Topa pu nûktetex, pa nôm yûmmûg 'ohnâg. 'Ûgmû'âte Topa pu nûktetex, tu nôm yûmmûg. 'Ûgmûg xop yâ Yoneo xop, ha ta' xip tik puxet Yoneo xop kopah, tu nôm te tikmû'ûn kuxa kummuk xit, tu' kuxa maxnâhâ'.

²³ Pa hâpxip 'hâ, yâ hōnhâ 'hâ tikmû'ûn te Topa pu nûktetex putup, tu Topa 'âktux max xe'ep-tup yây kuxa kopah, tu Topa yôg hâmyûmmûg xe'e' yûmmûg putup. Topa tep-tup, puyiy tikmû'ûn Topa pu nûktetex hâ kaxîy.

²⁴ Topa yâ' koxuk, 'ap yîn xip'ah. Yâ' max, pu tikmû'ûn Topa pu nûktetex yây kuxa hâ, tu Topa yôg hâmyûmmûg xe'e' yûmmûg. Kaxîy.

²⁵ Ha 'ûn te:

—'Ûnûn putup nō'ôm. Topa te nôm nû'kutnâp-tup, yâ' xuxet'ax Kunnix, yâ Topa te nôm yâyikutnâhâ'. 'Âte' yûmmûg

'ūnūn putup, tu yūmū'ā hāpxop xohix xexka yūmmūgāp-tup. Kaxīy.

²⁶ Ha Yeyox te:

—Yā hamūn, yāg mūn, nōm te 'āmūtik hām'āktux. Kaxīy.

²⁷ Ha ta' nūn Yeyox yōg tik xop, tu nūktu' pēnāhā' Yeyox te hām'āktux 'ūn mūtik, tu' yēy, tu 'ūn pu' yīkopit 'ohnāg, hu: “Putep putup?” Kaxīy. Tu Yeyox pu' yīkopit 'ohnāg, hu: “Tep mūn 'āktux?” Kaxīy.

²⁸ Ha 'ūn te yāy yōg naxtox nīm, tu ta' mōg kōmēn tu', tu tikmū'ūn pu hām'āktux, hu:

²⁹ —Mā, nūy pēnā tihik, tute' xuktux 'āte hāpxopmā xohix xexka'. 'Ok nō'ōm yā Kun-nix, yā Topa te nōm yāy kutnāhā'? Kaxīy.

³⁰ Ha ta' mōg tikmū'ūn, nūy Yeyox pēnā'.

³¹ Ha ta' pīp Yeyox yōg tik xop, tu Yeyox mūtik hām'āktux, hu:

—Yāyā, 'āpu 'āxit'ax mā'. Kaxīy.

³² Ha:

—'Ūxip xit'ax yōgnū' xate' yūmmūg'ah. Kaxīy.

³³ Ha Yeyox yōg tik xop te yāy mūtik hām'āktux, hu:

—'Ok tikmū'ūn te tu' hōm 'ūxit'ax? Kaxīy.

³⁴ Ha Yeyox te:

—Pute 'ūm 'ūgxit'ax? Yā 'āte hāpxopmā Topa te nōm putup. Yā 'ūgxit'ax putuk. Topa te nūgkutnāhā', hak hām kuxyāp-tup. Yā 'āte Topa puk hām, yā' xit'ax putuk. Yā 'āxop tep-tuppax 'āxit'ax, ha 'ātep-tuppax 'ūghām Topa te nōm putup.

³⁵ Xate hām'āktux, hu: “Māyōnhex 'ānuk xohix te' 4 nōg putup, 'īhā' ta' mīnta'.” Kaxīy. Pa 'āte xa hām'āktux, hāmpēnā'! Hōnhā 'ūta'. 'Ūnūnnā', pu' max hōnhā'. Pēnā tikmū'ūn nūn hōnhā, nūy kuxa mām 'ūgkopah, yā mīnta ta nūnnā putuk hōnhā.

³⁶ Tikmū'ūn te mīnta ta nūnnāhā', ha xuxyā te tu' pago. Hā kaxīy nōm te 'ātu tikmū'ūn nūnnāhā', puyīy hi xe'ēgnāg mōkuma'mōg, ha' kux 'ohnāg, yīy ta' kuxa hittup nōm te hāpxop xap xok xix nōm te mīnta ta nūnnāhā', yā' hittup 'ūtix. Hā kaxīy tik te tikmū'ūn puk mūn yūmmūgāhā', ha ta' nōy te tikmū'ūn māmāhā 'ūgkopah, yā' kuxa hittup 'ūtix.

³⁷ Yā hām'āktux xe'e': “Tik te hāpxop xap xok, ha ta' nōy te mīnta ta nūnnāhā'”. Kaxīy. Hā kaxīy tik te tikmū'ūn puk mūn yūmmūgāhā', ha ta' nōy te tikmū'ūn kuxa māmāhā 'ūgkopah.

³⁸ 'Āte mō 'āxop pok, xa mīnta ta nūnnā'. Xate hāmxa 'ohnāg. 'Ūnoy te hām xaha', ha xate mīnta nūnnāhā'. Yā xate tikmū'ūn kuxa māmāhā 'ūgkopah. Kaxīy.

³⁹ Ha ta' kuxa mām ka'ok Yeyox kopa kōmēn Xāmānit yōg tikmū'ūn xohix. Yā 'ūn te hām'āktux, hu: “Mā, nūy pēnā tihik, tute hām'āktux 'āte hāpxopmā xohix xexka'”. Kaxīy.

⁴⁰ Ta' nūn kōmēn Xāmānit yōg tikmū'ūn, tu nūktu Yeyox tu' kax, pu nox xip. Ha' nox tihī' nūmūtik 'āmniy tix hā.

⁴¹ Ha xe xape xohix te Yeyox yōg hām'āktux 'āpak, hu' kuxa mām ka'ok Yeyox kopah,

⁴² tu 'ūn pu hām'āktux, hu:

—Hōmā 'ūgmū'āte 'ōg hām'āktux 'āpak, pa hōnhā Yeyox yōg hām'āktux 'āpak, hu' yūmmūg Yeyox te hām xexka yōg tikmū'ūn kuxa kummuk xit, nūy kuxa max mō'tat, 'ūyānān tu'. Kaxīy.

Yeyox te tik xexkak-tok hittupmāhā'

⁴³ 'Āmniy tix nōg, ha ta' mōg Yeyox hāpxexka Ganinet tu'.

⁴⁴ Yā, hōmā Yeyox te' xuktux hu: “'Ūxape xop te Topa pupi hām'āktux xop 'āpak 'ohnāg yāy yōg hām tu', pa hām nōy yōg tikmū'ūn te nōm 'āpak. Kaxīy.

⁴⁵ Ta' nūn Yeyox, tu nūktu' xupep hāpxexka Ganinet tu', ha Ganinet yōg tikmū'ūn tep-tup Yeyox. Yā hōmā Ganinet yōg tikmū'ūn te' pēnāhā' Yeyox te hāpxopmā ka'ok xe'ēgnāg punethok kōmēn Yeyoyanēn tu', 'Thā' xip 'āmuk xexka 'āxet'ax Nōā'yēn.

⁴⁶ Ha ta' mōg Yeyox, tu mōktu' xupep kōmēn Kānā tu' hāpxexka Ganinet kopah. Yā hōmā Yeyox te kōnāg hā xupyāg mīy Kānā tu', yā yāyhā xupyāg.

Ha ta' xip Kānā tu' kōmēn Kapānām yōg tik xexka' hak-tok pakut.

⁴⁷ Tik te Yeyox nūn 'āpak, tu ta' mōg, tu mōktu Yeyox tu' kax, pu nū', nūyk-tok pit hittupmā', yā 'ūxok putūmnāg.

⁴⁸ Ha Yeyox te:

—'Āte hāpxopmā ka'ok xe'ēgnāg 'ohnāg, ha ta' 'ākuxa yūm 'ohnāg. Kaxīy.

⁴⁹ Ha tik te:

—Yāyā, mā hōnhā mō'ka'ok. 'Ūxok putūmnāg 'ūgkutok! Kaxīy.

⁵⁰ Ha Yeyox te:

—Mōg, 'āk-tok hip-tup. Kaxīy.

Ha tik kuxa yūm Yeyox yōg hām'āktux kopah, tu ta' mōg,

⁵¹ pa yōg kāmānat xip putat kopah, tu hām'āktux, hu:

—'Ūhi 'āk-tok. Kaxīy.

⁵² Ha tik te:

—Pi'yā' yūm māyōn, 'Thā' hittup kōnāmāhā'? Kaxīy.

Ha:

—Yā māyōn te yāy kote' yūm, 'Thā xuxi'. Kaxīy.

⁵³ Ha tik te' yūmmūg yā māyōn te yāy kote' yūm 'Thā Yeyox te: “'Āk-tok hip-tup’”. Kaxīy.

Ha tik kuxa mām Yeyox kopah, xix' xape xop kuxa mām kamah.

⁵⁴ Yā Yeyox te hāpxopmā ka'ok xe'ēgnāg tix hāpxexka Ganinet tu'. Yā hōmā Yeyox xip hāpxexka Yonex tu', tu ta' nūn hāpxexka Ganinet tu'.

5

Yeyox te' hittupmāhā tik yīn mōg hok

¹ Hāpxip 'Thā' xip'ax Yoneo xop yōg 'āmuk xexka kōmēn Yenoyanēn kopah, ha ta' mōg Yeyox Yenoyanēn tu', tu mōktu' xupep.

² 'Ūxup puxhep max kōmēn yōg hāmpak'ax yīkox yīkah. Yā hāmyīkox 'ūxuxet'ax kahnēn yōg hāmyīkox, ha puxhep max 'ūxuxet'ax Metex, yā Yoneo xop yīy'ax kopah. Yā' pip kuxkaxax xohix te' 5 puxhep max yīmap.

³ Ha kuxkaxax kopa' pip pakut xop, yā' pa hok xop xix hāpkumep hok xop xix yīn mōg hok xop. 'Ūxohix te kōnāg yo'ok hip.

⁴ Hāpxip ha ta' xupep pexkox yōg nū'kutnā'ax, tu kōnāg kanop, ha ta pakut xop mōg kōnāg hah, ha nōm mō'nāhā hāmāxap, puxix tu' hittup.

⁵ Ha ta' xip tihik, tu' pakutpax hāmāxatamuk xohix te' 38 hā.

⁶ Ha Yeyox te' pēnāhā', tu' yūmmūg tik pakut mōkuma'mōg, ha Yexox te:

—'Ok xatēp-tup 'āhittup? Kaxīy.

⁷ Ha tik pakut te:

—Yāyā, 'ap xip'ah 'ūnōy, nōm tek mōgāhā puxhep max tu', 'Thā kōnāg yo'ok. 'Āte mīkaxxap ku'In hāg yīxohoh, pa' nōy xupep hāmāxap. Kaxīy.

⁸ Ha Yeyox te:

—Pu 'āg-nīhā xip! 'Ōg 'Īxtet pa', nūy ta mōg! Kaxīy.

⁹ Ha tik hittup mō'ka'ok, tu 'Īxtet paha', tu ta' mōg.

¹⁰ Pa' pip Yoneo xop, tu tik pu hām'āktux, hu:

—Hōnhā nīt xap. Yā' kax'āmi tikmū'ūn yōg xat'ax yōg tappet tu', tu hām'āktux, hu: "Nīt xap hā 'Īxtet tat hok". Kaxīy.

¹¹ Ha tik te:

—Tik tek hittupmāhā', tu 'ā hām'āktux, hu: "Pu 'ōg 'Īxtet pa', nūy ta mōg. Kaxīy.

¹² Ha:

—'Ū'ūm tihik nō'ōm, nōm te hām'āktux hu: "Pu 'ōg 'Īxtet pa'?" Kaxīy.

¹³ Pa tik te' yūmmūg 'ohnāg, yā' mōg Yeyox. Yā' pip tikmū'ūn xohix 'ōnteh, yīy ta' mōg.

¹⁴ Hāpxip 'Thā' mōg Yeyox Topa pet xexka ha', tu mōktu tik xīpīhi', tu:

—Āpu yāy pēnā', yā 'āhittup. Pu 'ūxe hāpkummuk mīy hok. Hāpkummuk mīy, nūy ta putpu 'āpakut xexkanām. Kaxīy.

¹⁵ Ta' mōg tihik, tu Yoneo xop pu hām'āktux hu:

—Yeyox tek hittupmāhā'. Kaxīy.

¹⁶ Yīy ta' gāy Yoneo xop, hu Yeyox kute'ex kummuk. Yā nīt xap 'Thā tik hittupmāhā'.

¹⁷ Pa Yeyox te tu hām'āktux, hu:

—Yōgnū 'ātak hām mōkuma'mōg, tu' hup 'ohnāg, ha tak hām kamah. Kaxīy.

¹⁸ Yīy ta' gāy xexka Yoneo xop, hu Yeyox putex putup. Yā Yeyox te nīt xap yōg xat'ax koxyōy, tu Topa 'āktux hu: "Yōgnū 'ātak".

Kaxīy. Yā Topa putuk Yeyox. Yīy ta' gāy Yoneo xop.

Topak-tok te' xat

¹⁹ Ha Yeyox te:

—'Āte hām'āktux xe'e, 'ap koit'ah. 'Ūgmūn, yā 'ātak kutok pit, tu yāp-xehnāg hā hāpxopmā 'ohnāg, pa yōg 'ātak te hāpxopmā', ha 'āte' pēnāhā', tu kama' mīy, hā' putuk.

²⁰ 'Ātak te mōgyāy xe'ēgnāg, yā mō yāy kutok yāy xe'ēgnāg, tuk-tok pu yāy yōg hāpxopmā'ax xohix mūg, puyīy pēnā'. Hōnhā tute tikmū'ūn pu hāpxopmā'ax mūg, ta hāpxip 'Thā hāpxopmā'ax max xe'ēgnāg mūg putup, xayīy 'ākuxa yēy.

²¹ Yōgnū 'ātak te xakix xop putpu' hīnnāhā', yā tute' hīnnāhā', xixk mūn Topak-tok te tikmū'ūn hīnnāhā kamah, tu tikmū'ūn 'ūm putup tu nōm hīnnāhā'.

²² Yōgnū 'ātak te tikmū'ūn yōg hāpxopmā'ax kopit 'ohnāg, nūy yōg hāpkummuk mī'ax hā yānān 'ohnāg. Tute yāy kutok xat, pu kopit,

²³ puyīy 'ūgmūn pe tu paxeh xexkah, yā tikmū'ūn te 'ātak pe'paxex xexka putuk. Tikmū'ūn 'ūm tek-tok pe'paxex xexka 'ohnāg, tu 'ātak pe'paxex xexka 'ohnāg kamah. Yā 'ātak te yāy kutok nū'kutnāhā'.

²⁴ —Nūhū yā hām'āktux xe'e'. Tikmū'ūn 'ūm te yōgnū hām'āktux 'āpak, tu Topa kopa' kuxa mām ka'ok, puxix hi xe'ēgnāg mōkuma'mōg, ha' kux 'ohnāg. Topa te nūgkutnāhā'. 'Āte nōm yōg hāpkummuk mīy'ax hā yānān putup'ah, ha' xakix xe'e putup'ah, pa' hi xe'ēgnāg mōkuma'mōg, ha' kux 'ohnāg.

²⁵ Nūhū hām'āktux xe'e. Hāpxip 'Thā, yā hōnhā 'Thā kamah, xakix xop te Topak-tok yōg hām'āktux 'āpak putup, tu' xupak xop hip-tup.

²⁶ 'Ātak kopa' xip 'ūhi'ax, yā tute hi'ax hōm. Tute yāy kutok pu' hōm, ha' xip 'ūhi'ax Topak-tok pit kopah. 'Ūgmūn, yā Topak-tok, tu hi'ax hōm kamah,

²⁷ ha 'ātak te yāy kutok xat, pu tikmū'ūn yōg hāpkummuk mīy'ax kopit. Hamūn, 'ūgmūn yā Tikmū'ūn Kutok.

²⁸ —Tēxyī 'ākuxa te' yēy? Hāpxip 'Thā xukpot tu xakix xohix xop te yōgnū hām'āktux 'āpak putup,

²⁹ tu xukpot nīm putup, tu ta' mōg. Nōm te hāpxopmā max te putpu' hip-tup, tu hi xe'ēgnāg mōkuma'mōg, ha' kux 'ohnāg, ha ta nōm te hāpkummuk mīy te putpu' hip-tup, ha' kopit putup 'ūyōg hāpkummuk mīy'ax, nūy hāpkummuk mīy'ax hā' yānān.

Yeyox te' xat

³⁰ Yeyox te xe:

—'Āte yāp-xehnāg hā hāpxopmā 'ohnāg, pa Topa te hām'āktux, ha 'āte' xupak 'ūxohix xexkah. Hā kaxīy 'āte tikmū'ūn yōg hāpxopmā'ax kopit, tu' kopit xe'e'. 'Āte' mīy

'ohnāg 'āte nōm putup, pa 'āte' mīy Topa te nōm putup. Tute nūgkutnāhā 'ūgmūn.

³¹ —Āte yāy 'āktux, ha ta 'āxop hām'āktux, Yeyox max'ah, yā hām'āktux 'ap xe'e'ah.

³² Pa' nōy tek mūn 'āktux kamah. Yā 'ātak tek mūn 'āktux kamah. 'Āte' yūmmūg tutek mūn 'āktux xe'e'.

³³ Hōmā 'āxop te mō' nōy pok Yoām hah, ha Yoām tek mūn 'āktux xe'e'.

³⁴ Ap 'ātep-tup'ah, pu tikmū'ūn tek mūn 'āktux. Pa 'āte xa Yoām 'āktux, xayīy 'āxop Yoām yōg hām'āktux 'āpax, puyīy Topa 'āxop kuxa kummuk xit, nūy kuxa max mō'tat, 'ūyānān tu'.

³⁵ —Yoām te kuyānām ta'tax putuk, ha xatep-tup, tu 'ākuxa hittup Yoām yōg kuyānām kopah. Yā kuyānām xip, ha tikmū'ūn te hāmyūmmūg, tu Topa yōg putat max pēnāhā'. Yā' xip Yoām, ha tikmū'ūn tek mūn yūmmūg xix hāmmax yūmmūg.

³⁶ Yoām tek mūn 'āktux, yā' max. Pa 'āte hāpxopmā max. Yā' max xe'ēgnāg. Yōg 'ātak te nūgkutnāhā', 'ūyīy hāpxopmā ka'ok xe'ēgnāg. Nōm te xak mūn mūg, ha xate' yūmmūg yōgnū 'ātak te nūgkutnāhā'.

³⁷ 'Ātak tek mūn 'āktux max kamah. Tute nūgkutnāhā nūnteh. 'A xate Topa te hām'āktux 'āpak'ah, tu Topa pēnā 'ohnāg,

³⁸ ha 'ap xip ka'ok'ah Topa yōg hām'āpak max'ax 'ākuxa kopah, 'ākuxa mām 'ohnāg Topa yōg hām'āpak max'ax kopah hah. Topa te nūgkutnāhā', pa 'ākuxa mām 'ohnāg 'ūgkopah.

³⁹ 'Āxop te Topa yōg tappet mōkupix punethok, tu hāmp'e'āpaxex Topa yōg tappet mōkupix, xayīy hi xe'ēgnāg mōkuma'āmōg, ha' kux 'ohnāg. Pa 'āmhok. Yā Topa yōg tappet tek mūn 'āktux,

⁴⁰ pa 'a 'āxop tep-tup'ah, nūy 'ūg ha nū', nūy hi xe'ēgnāg mōkuma'āmōg, ha' kux 'ohnāg.

⁴¹ —'A 'āte' xak'ah, pu tikmū'ūn 'ūgmūn 'āktux max.

⁴² Yā 'āte' 'āxop yūmmūg, yā 'āxop te Topap-tuppax 'ohnāg 'ākuxa hā.

⁴³ Yōgnū 'ātak te 'ā' hōm yāy yōg xuxet'ax, ha 'āte yāy 'ātak pupik xip, pa 'a 'āxop tek mūn pa 'ohnāg 'ākuxa hā. Yā 'āxop tek putup nōg. Ha ta' nōy nūn, yā 'ūyāy yōg xuxet'ax hā' nūn, ha ta' 'āxop nōy pap-tup 'ākuxa hā, tu' nōy putup pax putup.

⁴⁴ 'Āxop tep-tup, pu tikmū'ūn 'āxop 'āktux max, pa 'āxop tep-tup'ah, pu Topa mūn 'āxop 'āktux max. Texīy 'ākuxa mām putup?

⁴⁵ Hāmp'e'āpaxex hok 'āte yōgnū 'ātak pu 'āxop 'āktux kummuk putup. 'Āmhok. 'Ākuxa mām Mōyyex kopah, ha Mōyyex te Topa pu 'āxop 'āktux kummuk putup.

⁴⁶ 'Ākuxa mām xe'e Mōyyex kopah, nūy ta 'āxop kuxa mām 'ūgkopah, tuk mūn 'āpak. Hamūn Mōyyex tek mūn kax'āmi'.

⁴⁷ Pa 'ākuxa mām xe'e 'ohnāg Mōyyex yōg tappet kopah. Texīy 'āxop kuxa mām putup yōgnū hām'āktux kopah, tu nōm 'āpak? Kaxīy.

6

Yeyox te tikmū'ūn pu xit'ax nīm

¹ Hāpxip 'Ihā' mōg Yeyox, tu kōnāg xexka xak, yā kōnāg xexka 'āxet'ax Ganinet yōg xix 'āxet'ax nōy yā Timenit.

² Ha tikmū'ūn xohix te Yeyox pe' mōg. Yā Yeyox te hāpxopmā ka'ok xe'ēgnāg, tu pakut xop hittupmāhā', ha tikmū'ūn te' pēnāhā', hu' pe' mōg.

³ Ha ta' mōg Yeyox xix yāy yōg tik xop yīktix tu', tu' mām.

⁴ Ha' xip'ax Yoneo xop yōg 'āmuk xexka 'āxet'ax Nōā'yēn.

⁵ Ha Yeyox te' pēnāhā', pa' nūn tikmū'ūn xohix, ha Yeyox te Pinip pu hām'āktux, hu: —Pi'yā yūmū'āte' pop'ax xit'ax tikmū'ūn xohix pu'? Kaxīy.

⁶ Yā Yeyox te nōm 'āktux, nūy Pinip yōg hāpxopmā'ax kopit. Yā Yeyox te' yūmmūg tute hāpxopmāp-tup.

⁷ Ha Pinip te:

—Pām yōg tayūmak xohix. Yā tik hām mey te' 4, nūy tayūmak pop, nūy nōm hā' pop pām, ha ta tikmū'ūn te pām kutōgnāg māp-tup. Kaxīy.

⁸ Ha 'Ānene te hām'āktux, yā 'Ānene te Yeyox yōg tik xop kopa' xip, yā Pet taknōy. 'Ānene te:

⁹ —'Ūxip nūnte kaxkop pit, tu yōg pām te xemat hā' mīy, tu' xohix te' 5, xix yōg mām tix pip kamah. Tu texīy tikmū'ūn xohix pu'? Kaxīy.

¹⁰ Ha Yeyox te:

—'Āpu 'ūxat, pu tikmū'ūn māhām. Kaxīy. Yā' xux xohix pip. Ha' xat, ha' mām tikmū'ūn, yā' xohix te' 5.000 tihik, ha 'ūn pip kamah xix kaxkop.

¹¹ Ha Yeyox te pām pop, tu Topa pu hām'āktux, hu:

—'Ūmax pām xix māhām. Puxi'. 'Āmax. Kaxīy.

Tu pām koxip, tu tikmū'ūn pu' nīm, tu mām koxip kamah, tu tikmū'ūn pu' nīm, ha tikmū'ūn te xohix pop, hu ta' kux, 'ap nōy putup'ah. Puxix.

¹² Tu' mā kux, tu' hix ka'ok, ha Yeyox te yāy yōg tik xop pu:

—'Āpu yā 'āxit'ax yāg xohix mām tikmū'ūn te nōm putup'ah. Nōm putyōn hok. Kaxīy.

¹³ Ha Yeyox yōg tik xop te' xit'ax yāg mām, tu manax hā' tat, yā manax xohix te' 12, tikmū'ūn te nōm mā 'ohnāg. Yā Yeyox te pām xemat te' 5 hā' mīy xohix.

¹⁴ Ha tikmū'ūn te' pēnāhā', yā Yeyox te hāpxopmā ka'ok xe'ēgnāg. Tikmū'ūn te:

—Topa yōg tappet tu' xuktux, 'ūnūn putup tik te Topa pupi hām'āktux hām xexka tu'. Hamūn, Yeyox yā nō'ōm. Kaxīy.

¹⁵ Tikmū'ūn tep-tup, nūy Yeyox mōgā mō'ka'ok, nūy Yeyox mīy tikmū'ūn yōg xat'ax, pa Yeyox te' yūmmūg, hu ta' mōg yīktix tu', tu yāp-xehnāg xip.

Yeyox te kōnāg yīmū' mōg pata hā

¹⁶ Āmāxak ha ta' mōg Yeyox yōg tik xop, tu yīktix tu yīxoho' tu mōktu' mōxaha kōnāg xexka tu',

¹⁷ tu mīpkox tu' mōxaha', tu nōm mōxakux, tu kōnāg tu' mōg kōmēn Kapānām tu'. Āmnūy, ha ta' xupep'ohnāg Yeyox yāy yōg tik xop tu'.

¹⁸ Pa 'āmuuh xexka te mō'kouk, ha kōnāg tot xexkah,

¹⁹ ha Yeyox yōg tik xop te mīpkox mōgāhā', tu mōktu 5 kīnōm ha' mōg pe' 6 ha' mōg, tu' pēnāhā', pa' xip Yeyox, ha kōnāg yīmū' hāpkumep, yā' kōnāg yīmū' mōg pata hā, tu mīpkox yīka' nūn, ha ta' yīpkutuk Yeyox yōg tik xop,

²⁰ ha Yeyox te:

—'Ūgyīpkutuk hok, yāg mūn. Kaxīy.

²¹ Tu ta mīpkox hā mō'nāhā Yeyox, yīy ta' hittup Yeyox yōg tik xop, yā mō'nāhā', ta hāpxip'ohnāg ha ta' xupep mīpkox hāpkux nōy tu'.

Tikmū'ūn te Yeyox xak

²² Hāptup ha ta tikmū'ūn te kōnāg xexka xatapa' pip hāpkux nōy tu', tu' pēnāhā mīpkox kutōgnāg yāp-xehnāg mōg nōm te Yeyox yōg tik xop tat, pa Yeyox mō'tat'ohnāg.

²³ Ha ta' nūn kōmēn Timenit tu' mīpkox xape xohix, tu nūktu' mōxaha hāpkux tu'. Yā hōmā tikmū'ūn te pām māhā' ōnteh. Yā Yeyox te Topa pu pām'āktux'ōnteh.

²⁴ Ha tikmū'ūn te' pēnāhā 'ap xip'ah Yeyox, ha Yeyox yōg tik xop 'ap pip'ah kamah. Tikmū'ūn te mīpkox tu' mōxaha', tu ta' mōg kōmēn Kapānām tu', nūy Yeyox xax.

Yeyox te pām putuk, tu tikmū'ūn hīnnāhā'

²⁵ Tu ta' mōg tikmū'ūn, tu kōnāg xexka xak, tu mōktu' mōxaha hāpkux nōy tu', tu Yeyox xak, tu' xipihī', tu Yeyox pu:

—Notot, hām'ūmhā' āxupep nūnteh? Kaxīy.

²⁶ Ha:

—Āte xa hāpxe'e' āktux. Āxop tek xak, xayīy pām mā', tu mōktu' āhix ka'ok. Āte hāpxopmā', pa' āxop te nōm yūmmūg'ohnāg. Ūgka'ok, pa' āxop te nōm yūmmūg'ohnāg.

²⁷ Āpu pām xax hok, yā hāpxip kutōgnāg 'ihāg-nox pām. Āpu pām nōy xax, yā' nōy xip ka'ok hāmyāxatamuk xohix kux'ohnāg hā. Ūgmūn, yā Tikmū'ūn Kutok, tu xa' popmāp-tup pām nō'ōm. Hamūn, Topa tek xat, 'ū' hōm nō'ōm. Kaxīy.

²⁸ Ha tikmū'ūn te:

—Topa te putep putup, pu tikmū'ūn mīy? Kaxīy.

²⁹ Ha Yeyox te:

—Topa tep-tup nūhū'. Tutep-tup, pu tikmū'ūn kuxa mām nōm kopah Topa te nōm nū'kutnāhā'. Kaxīy.

³⁰ Ha tikmū'ūn te:

—Āpu hāpxopmā ka'ok xe'ēgnāg, puyīy tikmū'ūn kuxa mām'ākopah. Putep mūn mīy putup?

³¹ Hōmā 'ūhittap yūmū yōg mōnāy xop te' māhā nōm te pām putuk 'ūxuxet'ax mānā', yā hām panip xexka tu' māhā'. Hāmūn, Topa yōg tappet te: “Topa te pekkox tu' putxok pām, puyīy tikmū'ūn mā'. Kaxīy.

³² Ha Yeyox te:

—Āte xa hāpxe'e' āktux. 'A Mōyyex te xa' pōpmā'ohnāg pekkox yōg pām, pa yōgnū'ātak te xa' popmāhā pekkox yōg pām xe'.

³³ Topa te pām'ūm popmāhā'? Yā nōm te pekkox tu' nūn, ha nōm te tikmū'ūn xohix hīnnā mōkuma'mōg, ha' kux'ohnāg. Kaxīy.

³⁴ Ha tikmū'ūn te:

—Notot, 'āpu'ūgmū'ā popmā' nō'ōm pām. Āpu nōm popmā mōkumamōg. Kaxīy.

³⁵ Ha Yeyox te:

—Āte pām putuk nō'ōm pekkox yōg. Pām te tikmū'ūn hīnnāhā', ha 'āte tikmū'ūn hīnnāhā', puyīy hi xe'ēgnāg mōkuma'mōg. Tikmū'ūn tek ha' nūn, puxix putup xūy nōāp-tup'ūkuxa kopah. Tikmū'ūn tek mūn kopa' kuxa mām, puxix kōnāg putup xūy putuk nōāp-tup'ūkuxa kopah, yā 'a xe kōnāg putup xūy putuk xip putup'ah'ūkuxa kopah.

³⁶ Pa 'āte xa' xuktux, 'āxop tek pēnāhā', pa 'ākuxa mām ka'ok'ohnāg.

³⁷ Yōgnū'ātak te 'ā' popmāhā tikmū'ūn, puyīy' kuxa mām'ūgkopah, ha nōm tek ha' nūn putup, ha 'āte xohix pop putup, tu' ātep-tup nōy'ohnāg putup, yā yōg xop, 'āte mō nōm yāy xe'ēgnāg.

³⁸ Hamūn, 'āte pekkox tuk nūn tuk yīxoho', nūy mīy Topa te nōm putup. Yā tute nūgkutnāhā'. 'Ak nūn'ah, nūy mīy 'āte nōm putup.

³⁹ Topa te nūgkutnāhā', 'ūyīy hāpxopmā', yā 'āte yāy yōg tikmū'ūn xaxok'ohnāg. Yā nōm te' kuxa mām'ax xaxok putup'ah, ha Hāmgāyāgnāg te nōm pop putup'ah. Ātak te 'ā nōm popmāhā', ha 'āte nōm putpu' hīnnāp-tup hāmyāxatamuk xohix xox putox 'ihā'.

⁴⁰ Hamūn, yōgnū'ātak tep-tup hā kaxīy. Ūp-tup, puyīy nōm hi xe'ēgnāg mōkuma'mōg, yā nōm xohix te Topak-tok pēnāhā', hu' kuxa mām Topak-tok kopah. Ha ta hāmyāxatamuk xohix xox putox 'ihā putpu' hīnnāp-tup 'āte'. Kaxīy.

⁴¹ Ha Yoneo xop te Yeyox'āktux kummuk kōnāmāhā'. Yā Yeyox te: “Ūgmūn yā pām putuk, nōm te pekkox tu' yīxoho'”. Kaxīy.

⁴² Ha Yoneo xop te:

—Yā tihik nūhū', yā Yeyox. 'Ok Yoyek-tok? Yūmū'āte' yūmmūg 'ūyōg 'ātak xi' tut. Teptu hām'āktux pexkox tu 'yīxoho'? Kaxīy.

⁴³ Ha Yeyox te:

—Āhup. Yāy mūtik hām'āktux kummuk hok!

⁴⁴ Yōgnū 'ātak tek ha tikmū'ūn nūnnāhā', yā' kuxa mām 'ūgkopah. Ha Topa te tikmū'ūn nūnnāp-tup'ah, yā' kuxa mām putup'ah 'ūgkopah. Ha ta hāmyāxatamuk xohix xox putox 'Thā' āte yāy yōg xop putpu' hīnnāp-tup.

⁴⁵ Hōmā 'ūhittap tik te Topa pupi hām'āktux xop te' kax'āmi, hu: "Topa te tikmū'ūn xohix xexka pu hāmyūmmūgāhā'. 'Ūxohix te 'ātak 'āpak, hu hāmyūmmūg, yā nōm xohix 'ūg ha' nūn putup.

⁴⁶ 'Ap 'āte hām'āktux'ah tik 'ūm te Topa pēnāhā'. Nōm te Topa ha' nūn, yā nōm pux-ehnāg te Topa pēnāhā'.

⁴⁷ —Āte xa hāp'xe' āktux. Tikmū'ūn kuxa mām ka'ok 'ūgkopah, puxix hi xe'ēgnāg mōkuma'mōg, ha' kux 'ohnāg.

⁴⁸ 'Ūgmūn yā pām putuk, tu tikmū'ūn hīnnāhā'.

⁴⁹ Hōmā 'ūhittap mōnāyxop te pām mānā māhā hām panip xexka tu', pa' xakix pax.

⁵⁰ Pa tikmū'ūn 'ūm te pām nōy māhā', puxix xakix ka'ok putup 'ohnāg.

⁵¹ 'Ūgmūn yā pām putuk, tu tikmū'ūn hīnnāhā', ha' hi xe'ēgnāg mōkuma'mōg, ha' kux 'ohnāg. 'Āte pexkox tuk yīxohoh. Tikmū'ūn 'ūm te' māhā', puxix hi xe'ēgnāg mōkuma'mōg, ha' kux 'ohnāg. Pute 'ūm pām nō'om 'āte tikmū'ūn pu nōm hōm? Yā yāy yōg yīn. 'Āte yāy yīn hōm, puyīy tikmū'ūn xohix hi xe'ēgnāg mōkuma'mōg, ha' kux 'ohnāg. Kaxīy.

⁵² Ha ta' gāy Yoneo xop, tu yāy mūtik hām'āktux, hu:

—Texīy tik te yūmū'ā yāy yīn hōm, 'ū mā'? Kaxīy.

Yā tikmū'ūn kuxa mām'ax te' putuk tikmū'ūn te Yeyox yīn māhā'.

⁵³ Ha Yeyox te:

—Āte xa hāp'xe' āktux. Tikmū'ūn te Tikmū'ūn Kutok yīn mā 'ohnāg, yāg yīn mā 'ohnāg, pixix hi xe'ēgnāg mōkuma'mōg 'ohnāg. Tikmū'ūn te Tikmū'ūn Kutok hep 'āta xo'op 'ohnāg, puxix hi xe'ēgnāg mōkuma'mōg 'ohnāg.

⁵⁴ 'Ūxohix tek yīn māhā', tuk hep 'āta xo'op, puxix hi mōkuma'mōg, ha' kux 'ohnāg, ha ta hāmyāxatamuk xohix xox putox 'Thā' āte nōm putpu' hīnnāp-tup.

⁵⁵ Hamūn, 'ūgyīn yā xit'ax xe'e, xik hep 'āta yā hep xe'e'.

⁵⁶ Tikmū'ūn 'ūm tek yīn māhā' xik hep 'āta xo'op, yā nōm kuxa mām 'ūgkopah, hak xip ka'ok nūmūtik.

⁵⁷ Yōgnū 'ātak te nūgkutnāhā', tuk hīnnāhā'. Hā kaxīy 'āte tikmū'ūn hīnnāhā', nōm tek yīn māhā', yā' kuxa mām 'ūgkopah.

⁵⁸ 'Āte pām putuk, tu pexkox tuk yīxohoh, yā' putuk'ah pām nōy. Mōnāyxop te nōm māhā', pa' kaxixpax. 'Ūxohix 'ūm tek yīn māhā', yā' kuxa mām 'ūgkopah, puxix hi xe'ēgnāg mōkuma'mōg, ha' kux 'ohnāg. Kaxīy.

⁵⁹ Hā kaxīy hām'āktux Yeyox Yoneo yōg Topa pet kopah kōmēn Kapānām tu'.

Yeyox yōg hām'āktux'ax te tikmū'ūn hīnnāhā'

⁶⁰ Yā hām'āktux 'āpak tikmū'ūn xohix, nōm te Yeyox pe' mōg, tu:

—Yā tute yūmū'ā hāmyūmmūg ka'ok yūmmūgāhā'. 'Ū'ūm te nōm 'āpak, nūy yīpkox pi'? Yā tik 'ohnāg. Kaxīy.

⁶¹ Hā kaxīy hām'āktux kummuk Yeyox pe' mōg xop. Tikmū'ūn te Yeyox pu hām'āktux 'ohnāg, pa Yeyox te tikmū'ūn yōg hām'āktux'ax yūmmūg, tu:

—'Ok yōgnū hām'āktux te 'āxop kuxa nōā'?

⁶² Paxpu 'āxop te' pēnāhā' 'ūgmūn, yā Tikmū'ūn Kutok pēnāhā', Thāg mōg pepix putpu' yāy yōg xip'ax tu', nūy ta putep pe 'āxop paxex putup?

⁶³ Tikmū'ūn koxuk pip, puxix hi tikmū'ūn. Yōgnū hām'āktux te' koxuk putuk, tu tikmū'ūn hīnnāhā'.

⁶⁴ Pa' pip 'āxop kopah tikmū'ūn kuxa mām 'ohnāg. Kaxīy.

Yā hōmā 'ūhittap Yeyox te' yūmmūg mōkuma'mōg yāg xop kuxa mām 'ohnāg, tu kama' yūmmūg tik te' gāy xop mōgāp-tup Yeyox hah, puyīy xūyāg'.

⁶⁵ Ha Yeyox te:

—Hamūn 'āte xa hām'āktux, Topa tek ha tikmū'ūn nūnnāhā, puxix 'ūg ha nū'. Pa Topa tek ha tikmū'ūn nūnnā 'ohnāg, puxix nūn 'ohnāg, yā 'ūgkopa' kuxa mām putup'ah. Kaxīy.

⁶⁶ Yīy ta Yeyox nīm tikmū'ūn xohix te', tu xe Yeyox pe' mōg 'ohnāg.

⁶⁷ ha Yeyox te yāy yōg tik te 12 xop pu:

—'Ok 'āxop tek nīm putup kamah, nūy ta mōg? Kaxīy.

⁶⁸ Ha Xīmām Pet te:

—Tep pek mūg mōg putup? 'Ōg hām'āktux'ax tek mūg hīnnāhā', hak mūg hi hāmyāxatamuk xohix kux 'ohnāg hā.

⁶⁹ 'Ūgmū'āte' yūmmūg 'āmūn yā Kunnux, ha Topa te 'āmūn yāykutnāhā'. Yā Topa tu 'ānūn. Kaxīy.

⁷⁰ Ha Yeyox te:

—'Ok 'āte 'āxop yīmōgātux tikmū'ūn kopah? Pa 'āxop kopa' xip yāp-xet, yā Hāmgāyāgnāg xop yōg tik te 'āxop kopa' xip. Kaxīy.

⁷¹ Hamūn, Yeyox te Yot 'āktux, yā Xīmām kutok Yot, yā' xip Yeyox yōg tik te 12 xop

kopah, pa hâpxip 'Thâ Yot te' gây xop mōgâp-tup Yeyox hah, puyiy Yeyox xūyġā'.

7

Yeyox xix' taknōy xop

¹ Ta' mōg Yeyox, tu hâpkumep hâpxexka Ganinet tu'. 'A' putup'ah, nūy hâpkumep hâpxexka Yonex tu', yā Yoneo xexka xop tep-tup, nūy Yeyox putex Yonex tu'.

² Hâpxip kutōgnāg 'Thâ' xip'ax 'āmuk xexka 'āxet'ax Mīptutnāg Yōg 'Āmuk Xexka'.

³ Ha ta' pīp Yeyox taknōy xop, tu:

—'Āpu mōg Yonex tu', puyiy 'āmūtik hâpkumep xop pēnā' xate hâpxopmā ka'ok xe'ēgnāg.

⁴ Xatep-tup, pu tikmū'ūn 'āyūmmūg, ha ta yāy yōg hâpxopmā'ax xaptop putup'ah. Xate hâpxopmā ka'ok xe'ēgnāg. 'Āpu 'ūmīy, puyiy tikmū'ūn xohix pēnā', nūy 'āyūmmūg, Kaxīy.

⁵ Yā 'a' taknōy xop mūn te Yeyox kopa kuxa mām 'ohnāg

⁶ Ha Yeyox te:

—Hōnhā 'ūmīy hok pu' max. 'Ap xe'e'ah hōnhā, pa 'āmnīy xohix 'ūxe'e' āxop yōg.

⁷ Tikmū'ūn xohix te 'āxop putup nōg yūmmūg 'ohnāg, pa tikmū'ūn xohix tek putup nōg, yā 'āte hām'āktux punethok tikmū'ūn te hâpkummuk mīy.

⁸ 'Āpu mōg 'āmuk xexka hah. 'Ap 'ūgmōg putup'ah nōmhā. 'A' 'āmnīy xe'e'ah yōgnū'. Kaxīy.

⁹ Hā kaxīy Yeyox te hām'āktux, tu' nox xip hâpxexka Ganinet tu'.

Yeyox mōg 'āmuk xexka hah

¹⁰ Ha ta' mōg 'ūtaknōy xop 'āmuk xexka hah, ha hâpxip 'Thā' mōg kama Yeyox, pa yāy xaptop, yā tikmū'ūn te' pēnā 'ohnāg.

¹¹ Ha Yoneo xexka xop te Yeyox xak 'āmuk xexka tu', tu tikmū'ūn yīykopit, hu:

—Pi'yā' xip Yeyox? Kaxīy.

¹² Ha tikmū'ūn te hām'āktux pū'ūgnāg punethok, ha' yāg te:

—Yā tik max nō'ōm. Kaxīy.

Pa' yāg nōy te:

—Tute mō'āmā'. Kaxīy.

¹³ Pa' xohix te hām'āktux pū'ūgnāg, yā hām'āktux xaptop, Yoneo xexka xop yīpkutuk tu'

¹⁴ Hâpxip 'āmuk xexka kote 'Thā' mōg Yeyox, tu mōktu Topa pet xexka hā mō'nāhā', tu tikmū'ūn pu hāmyūmmūgāhā kōnāmāhā',

¹⁵ ha Yoneo xexka xop te' yēy, tu:

—Texīy kāy te hāmyūmmūg xexka', pa tap-pet mīy 'ohnāg? Kaxīy.

¹⁶ Ha Yeyox te:

—'A' āte yāy yōg hāmyūmmūg yūmmūgā'ah, pa Topa yōg, yā tute nūg mūn kutnāhā'.

¹⁷ Tikmū'ūn 'ūm tep-tup, nūy mīy Topa te nōm putup, puxix yūmmūg putup 'āte Topa yōg hāmyūmmūg 'āktux, 'a yōg'ah.

¹⁸ Tikmū'ūn 'ūm te yāy yōg hāmyūmmūg 'āktux, puxip-tup, pu tikmū'ūn hāmpe'paxex yā' xexka nō'ōm. Ha ta' nōy tep-tup, pu tikmū'ūn hāmpe'paxex yā' xexka Topah. Yā Topa te nū nōm kutnāhā', yā tik yok, yā' koit 'ohnāg.

¹⁹ Hōmā Mōyyex te xa' popmāhā Topa te nōm xat. Hamūn, pa 'āxop xohix te' mīy 'ohnāg Topa yōg xat'ax. Teptu 'āxop tep-tup, nūy 'ūkputex? Kaxīy.

²⁰ Ha tikmū'ūn te:

—Yāmīy kummuk xip 'ākopah. Tep-te 'āp-
tex putup? Kaxīy.

²¹ Ha Yeyox te:

—'Āte hâpxopmā ka'ok xe'ēgnāg puxet, yīy 'āxop kuxa te' yēy.

²² Hōmā 'ūhittap mōnāyxop tek-tok pit xop xax mep 'ūyīmap hāmāxap, ha ta hāmyāxatamuk punethok nōg, 'Thā Mōyyex te' xat, pu' mīy nō'ōm, yīy ta hōnhā 'āxop te' mīy 'āmnīy hām hok 'Thā'.

²³ 'Āxop tek-tok pit xax mep 'ūyīmap 'āmnīy hām hok 'Thā', nūy Mōyyex yōg xat'ax mīy. Texīy 'āxop gāy, yā 'āte tik hittupmāhā 'āmnīy hām hok 'Thā'?

²⁴ 'Āxop te hāmpe'nāhā mō'ka'ok, tu yōgnū hâpxopmā'ax kopit mō'ka'ok, tu hām'āktux mō'ka'ok 'ūgkummuk. Kaxīy hok! 'Āpu yōgnū hâpxopmā'ax kopit mō'ka'ok hok! Kaxīy.

'Ok Topa te Yeyox yāykutnāhā'?

²⁵ Ha ta kōmēn Yenoyanēn yōg yāg xop te:
—'Ok nō'ōm tihik? 'Ok tikmū'ūn te' kāy
putex putup?

²⁶ Pēnā! Tute tikmū'ūn xohix mūtik hām'āktux, pa tikmū'ūn te Yeyox pa 'ohnāg, yā' mūg 'ohnāg. 'Ok xexka xop te' yūmmūg 'ohnāg yā Yeyox, Topa te nōm yāykutnāhā'?

²⁷ 'Ūnūn nō'ōm, Topa te nōm yāykutnāhā', puxix tikmū'ūn yūmmūg putup'ah 'ūyōg xip'ax, xix hām tu' nūn yūmmūg putup'ah, pa yūmūg xohix te' yūmmūg Yeyox yōg xip'ax, xix yōg hām tu' nūn, xix yōg 'ātak, xi' tut. Kaxīy.

²⁸ Ha ta' xip Yeyox Topa pet xexka kopah, tu tikmū'ūn pu hāmyūmmūgāhā', tu hām'āktux ka'ok, hu:

—'Ok 'āxop tek mūn yūmmūg xe'e'? 'Ok 'āxop te' yūmmūg hām tuk nūn? 'Ak puxet nūn'ah, yā Topa xe'e te nūgkutnāhā', pa 'āxop te Topa yūmmūg 'ohnāg.

²⁹ Pa' 'āte nōm yūmmūg. Yā 'āte nōm tuk nūn, ha tute nūgkutnāhā'. Kaxīy.

³⁰ Ha tikmū'ūn te' kax, pu xonat xop Yeyox mūy, pa' mūg 'ohnāg, yā Yeyox mūg yōg 'āmnīy xe'e xupep 'ohnāg.

³¹ Pa tikmū'ūn punethok kuxa mām ka'ok Yeyox kopah, tu:

—Kunnix nūn, yā Topa te nōm yāykutnāhā', ha' nūn, tu hāpoxpmā ka'ok xe'ēgnāg. Yā Yeyox te' mīy punethok te kaxīy. Kaxīy.

Xonat xat, pu Yeyox mīy

³² Yā tikmū'ūn xohix te hām'āktux pū'ūgnāg te kaxīy, ha Paniye xop te' xupak, hu xonat xat xix 'āmānex xexka xop te xonat xat, pu Yeyox mīy.

³³ Ha Yeyox te:

—Hāpxip kutōgnāg hāg xip'ax 'āxop kopah, tu tak mōg putup nōm hah, yā nōm te nūgkutnāhā', yā nōm hak mōg putup.

³⁴ 'Āxop tek xak putup, pak xipi tapax 'ohnāg. Yā 'ūgmōg putup nōm hām tu', pa 'āmōg yūmmūg 'ohnāg. Kaxīy.

³⁵ Ha Yoneo xexka xop te yāy mūtik hām'āktux, hu:

—Pi'yā' mōg putup? Texīy yūmū'āte nōm xipi tapax 'ohnāg? 'Ok mōg putup kōmēn tu' hāpxexka Genex tu'? Yā Yoneo xop pip 'ōnteh. 'Ok Genex yōg xop pu hāmyūmmūgāp-tup?

³⁶ Putep 'āktux? Tute: “'Āxop tek xak putup, pak xipi tapax 'ohnāg. 'Āmōg yūmmūg 'ohnāg.” Kaxīy. Putep xuktux Yeyox? Kaxīy.

Kōnāg kox putuk tikmū'ūn kuxa kopah

³⁷ Ta 'āmuk xexka yōg 'āmnīy xox putox, yā 'āmuk xexka yōg 'āmnīy xexka', 'Thā' xip Yeyox, tu hām'āktux ka'ok, hu:

—'Ū'ūm te kōnāg putup xūynāg putuk 'ākuxa kopah. Mā 'ūg ha, nūy xo'op putuk.

³⁸ Yā Topa yōg tappet te: “Tikmū'ūn 'ūm 'ūgkopa' kuxa mām, tu' kuxa kopa' mōg putup kōnāg kox xexka punethok putuk, yā kōnāg xet putuk, tu hāptopa' mōg putup”. Kaxīy.

³⁹ Yā Yeyox te Topa Koxuk 'āktux, yā kōnāg kox putuk Topa Koxuk tikmū'ūn kuxa kopah, tu tikmū'ūn hīnnāhā'. 'Ūkuxa mām xop te Topa Koxuk pap-tup. Pa nōm 'āmnīy 'Thā Yeyox te hām'āktux, 'Thā' hōm 'ohnāg Topa Koxuk. Nāy, pu Yeyox xok, tu putpu' hi', tu yōg hām xe'ēgnāg tu' mōg hāmāxap, tuk-nāy tu Topa Koxuk hōm putup.

Tikmū'ūn hāmpē'paxex'ax yāy pot

⁴⁰ Tikmū'ūn te' xupak, ha punethok te:

—Yā tute Topa pupi hām'āktux xe'e'. Kaxīy.

⁴¹ Ha ta' yāg te:

—Nōm yā Kunnix, yā Topa te nōm yāykutnāhā'. Topa yōg tappet te hām'āktux Kunnix nūn putup. Kaxīy.

Pa tikmū'ūn nōy te:

—'A' Ganinet tu' nūn putup'ah Kunnix.

⁴² Topa yōg tappet te hām'āktux Kunnix te Namix yōg xupepmā xop kopa' xip putup, tu nāp-tup kōmēn Menēg tu', yā Namix yōg xip'ax Menēg. Kaxīy.

⁴³ Ha tikmū'ūn hāmpē'paxex'ax yāy pot.

⁴⁴ Yā yāg xop tep-tup, pu xonat Yeyox mīy, pa' mūg 'ohnāg.

Yoneo xexka xop kuxa mām 'ohnāg Yeyox kopah

⁴⁵ Ha ta' mōg putpu' xonat xop 'āmānex xexka xop hah, tu paniye xop ha' mōg, ha' yīy'kopit, hu:

—Tepu Yeyox nūnnā 'ohnāg? Kaxīy.

⁴⁶ Ha xonat xop te:

—Yā hām'āktux max Yeyox te'. Tep-te hām'āktux nōm tik yōg hām'āktux putuk? Yā tik 'ohnāg. Hām'ūmhā hām'āktux nōm tik yōg hām'āktux putuk? Yā hām'āktux 'ohnāg. Kaxīy.

⁴⁷ Ha Panixet xop te:

—'Ok 'ākuxa mām 'ūyōg mō'āmā'ax kopa kamah?

⁴⁸ Tik xexka 'ūm kuxa yūm kāy kopah, xix Paniye 'ūm? Hām'ūmhā'? Yā tik xexka 'ohnāg xix Paniye 'ohnāg kuxa mām kāy kopah. 'Āmhok.

⁴⁹ Tikmū'ūn te' yūmmūg 'ohnāg Mōyyex yōg xat'ax, yīy Topa te nōm xūygāp-tup. Kaxīy.

⁵⁰ Pa' xip Nīkonēm, yā hōmā Yeyox ha' mōg Nīkonēm, yā Paniye xop kopa' xip. Tute:

⁵¹ —Yūmū yōg xat'ax te hām'āktux, hu: “'Āpu tik yōg hāpoxpmā'ax kopit hāmāxap, tuk-nāy tu' xuktux 'ūkummuk tīhik.” Kaxīy.

⁵² Ha' nōy te:

—'Ok hāpxexka Ganinet tu 'ānūn kamah Yeyox putuk? 'Āpu mōkupix max Topa yōg tappet, ha xate' yūmmūg putup Topa pupi hām'āktux xop te hāpxexka Ganinet tu' nūn 'ohnāg. Kaxīy.

⁵³ Ha ta' nūn tikmū'ūn yāy pet hah.

8

Ūn te' nōy hā' xupxet

¹ Ha ta' mōg tikmū'ūn xohix xexka yāy pet hah, ha ta' mōg Yeyox yīktix 'Onimet Kup tu'

² Hāptup māyōn xupep 'Thā' mōg Yeyox tu mōktu putpu' xupep Topa pet xexka tu', pa tikmū'ūn xop xexka te Yeyox xakot, ha Yeyox yūm, tu tikmū'ūn pu hāmyūmmūgāhā kōnāmāhā'.

³ Ha ta' pip kama tik te hāmyūmmūg xop xix Paniye xop, tu' nūnnāhā' 'ūhūn. Hōmā 'ūn te' nōy hā' xupxet, ha tikmū'ūn te' pēnāhā'. Nōm te 'ūn xix tikmū'ūn keppah, hak-nīhā' xip.

⁴ Ha nōm xop te Yeyox pu hām'āktux, hu:

—Notot, nū 'ūn te' nōy hā' xupxet, ha tikmū'ūn te' pēnāhā'. Yā' xonnix.

⁵ Ha ta' hōmā Mōyyex te' kax'āmi yūmū yōg xat'ax yōg tappet tu', tu kax'āmi, pu tikmū'ūn 'ūn te kaxīy tu' mīkaxxap hā tux, tu nōp-tex. Putep xuktux 'āmūn nōmhā'. Putep mūn mīy putup yūmū'āte'? Kaxīy.

⁶ Yā Paniye xop yōg hām'āktux te pamāg putuk. Yā 'ūp-tup, puyīy Yeyox hām'āktux kummuk, puyīy tikmū'ūn xuktux Yeyox

'ükummuk. Pa Yeyox nū'xup, tu' yīm kutok hā' kax'āmi hām tu'.

⁷ Ha tik te xe' yīy kopit punethok, ha' yok Yeyox, tu:

—'Ok xip nūnte tik te hāpkummuk mīy 'ohnāg? 'Ūxip, puxix mō xap yōn hāmāxap putup. Kaxīy.

⁸ Yeyox nū'xup 'ūxeheh, tu xe kax'āmi hām tu',

⁹ ha' xupak xop 'ūp-xet hu' mōg, yā kutut mōg hāmāxap, tu mōktu tik xip 'ohnāg Yeyox mūtik xix 'ūn mūtik. Yā' xip Yeyox xix 'ūhūn, ¹⁰ ha Yeyox yok, tu:

—Nixxix, pi'yā' mōg tihik? Pi'ā' pip tik te hām'āktux 'ākummuk? Kaxīy.

¹¹ Ha:

—Yāyā, 'ūmōg ka'mām, yā' pip'ah. Kaxīy.

Ha Yeyox te:

—Hamūn, 'a 'āte hām'āktux'ah 'ākummuk, 'a yā 'ākummuk'ah. Mōg, nūy xe hāpkummuk mīy hok. Kaxīy.

Yeyox te tikmū'ūn xohix yōg kūyānām putuk

¹² Ta xe' xip Yeyox xix tikmū'ūn, ha Yeyox te:

—'Āte kuyānām putuk tikmū'ūn xohix pu'. Nōm te 'ūg pe' mōg, yā' xip kuyānām putuk 'ūkuxa kopah, yā hi'ax kux 'ohnāg yōg kuyānām, ha nōm xop 'a' pip'ah hāpkoxtap kopah. Kaxīy.

¹³ Ha Paniye xop te:

—Nōmhā 'āp-xehnāg te yāy 'āktux, yīy 'ōg hām'āktux 'ūxe'e 'ohnāg. Kaxīy.

¹⁴ Ha Yeyox te:

—Paxpuk puxehnāg te yāy 'āktux, puxix 'ūxe'e yōg hām'āktux. Hamūn, 'āte' yūmmūg hām tuk nūn, xix hām tuk mōg putup kama' yūmmūg. Pa xate' yūmmūg 'ohnāg hām tuk nūn, xix hām tuk mōg putup kama xate' yūmmūg 'ohnāg.

¹⁵ 'Āxop te hām'āktux mō'ka'ok 'ūnōy kummuk, yā 'āxop te tikmū'ūn xohix putuk. Pa 'āte hām'āktux 'ohnāg 'ūnōy kummuk.

¹⁶ Paxpu 'āte hām'āktux 'ūnōy kummuk, kopxix 'ūnōy yōg hāpxopmā'ax kopit xe'e'. 'Ūgpuxehnāg xip 'ohnāg, pa yōgnū 'ātak xip 'ūgmūtik. Tute nūgkutnāhā'.

¹⁷ Yā 'ūkax'āmi 'ōg xat'ax yōg tappet tu', 'ūtix te pēnā xop 'āktux, ha hām'āktux tix te yāy putuk, puxi' xe'e 'ūyōg hām'āktux.

¹⁸ 'Āte yāy 'āktux, ha yōgnū 'ātak tek mūn 'āktux kamah, yā hām'āktux tix te yāy putuk. Tute nūgkutnāhā' Kaxīy.

¹⁹ Ha nōm te:

—Pi'yā' xip 'ōg 'ātak? Kaxīy.

Ha Yeyox te:

—'Ap 'āxop tek yūmmūg'ah xix yōgnū 'ātak 'ap yūmmūg'ah kamah. Paxpu 'āxop 'ūgyūmmūg, hu ta yōgnū 'ātak yūmmūg kamah. 'A' 'āxop tek 'ūgyūmmūg'ah. Kaxīy.

²⁰ Hā kaxīy Yeyox te xohix pu hām'yūmmūgāhā Topa pet xexka kopah. 'Ōnte tikmū'ūn te mīpkox kopa tayūmak nīm. 'A' xonat te Yeyox mūg'ah, yā yōg 'āmnīy xe'e'ah, yī' mūg 'ohnāg.

'Ū'ūm Yeyox

²¹ Ta xe hām'āktux Yeyox tikmū'ūn mūtik, hu:

—'Ūgmōg putup nūpeheh, ha xatek xak putup, pa' pip' 'ōg hāpkummuk mīy'ax, 'Ihā 'āxakix putup, hu 'āmōg yūmmūg 'ohnāg yōgnū xip'ax, tu 'a' nōm tu 'āmōg putup'ah. Kaxīy.

²² Ha Yoneo xexka xop te:

—Tute hām'āktux: "'Āmōg yūmmūg 'ohnāg yōgnū xip'ax. Putep xuktux? 'Ok yāy putex putup? Kaxīy.

²³ Ha Yeyox te:

—'Ōg pip'ax pip nūnte hām xexka tu', pa 'ūkxip'ax pip pepix pexkox tu'. 'Ōgnū pip'ax yā hām xexka', pa 'ūkxip'ax xip'ah hām xexka tu'.

²⁴ Hā kaxīy 'āte xa hām'āktux, 'ūpip' 'ōg hāpkummuk mīy'ax, 'Ihā 'āxakix putup. 'Āxop kuxa mām 'ohnāg 'ūgmūn kopah, 'Ihā 'ōg hāpkummuk mīy'ax pip ka'ok 'āxop mūtik. Hamūn, 'ākuxa mām 'ohnāg 'ūgmūn kopah, yā 'ūkxuxet'ax nōy yā 'ūgmūn yāg mūn. Kaxīy.

²⁵ Ha nōm te:

—'Āmūn 'ū'ūm? Kaxīy.

Ha Yeyox te:

—Hōmā 'āte xa nōm 'āktux punethok

²⁶ 'Āte xe xa hām'āktux punethok, tu xe 'ōg hāpxopmā'ax kopit putup punethok, nūy hām'āktux 'āxop te hāpkummuk mīy punethok. Topa te nūgkutnāhā', yā' xe'e', ha 'āte nōm yōg hām'āktux 'āpak, tu nōm 'āktux tikmū'ūn xohix pu', tu hāpxop nōy 'āktux 'ohnāg. Kaxīy.

²⁷ Ha tikmū'ūn te' yūmmūg 'ohnāg Yeyox yōg hām'āktux, yā Yeyox yōg 'ātak 'āktux'ax yūmmūg 'ohnāg.

²⁸ Ha Yeyox te:

—'Āxop tek mūn Tikmū'ūn Kutok xup putup pepix mīpkupnix tu', hak xup putup, tuk xok putup, 'Ihā 'āxop te' yūmmūg putup 'ūgmūn yāg mūn, tu 'āxop te' yūmmūg putup 'āte yāp-xehnāg hā hāpxopmā 'ohnāg, pa yōgnū 'ātak yōg hām'yūmmūg 'āktux 'āte', tu hāpxop nōy 'āktux 'ohnāg,

²⁹ ha Topa te nūgkutnāhā', yā' xip 'ūgmūtik, tuk nīm putup'ah. Yā hamūn, 'āte hāpxopmā', hā Topa tep-tuppax, ha hāpxop nōy mīy 'ohnāg. Kaxīy.

³⁰ Ha tikmū'ūn te' xupak Yeyox yōg hām'āktux, ha' punethok kuxa mām Yeyox kopah.

Nōm te hok hā hām putuk

³¹ Ha Yeyox te Yoneo xop yōg kuxa mām ka'ok xop pu hām'āktux, hu:

—'Āxop te yōgnū hāmyūmmūg tu ʾīpkox pip, tu' mīy, nūy ta 'āxop yā yōgnū xop.

³² 'Āxop te nōm te hok hā hām putuk, ha' nōy te 'āxop xatpax. Pa 'āxop te' yūmmūg putup hāmyūmmūg'ax xe'e, ha hāmyūmmūg xe'e'ax te 'āxop mōy putup, xayīy mōg, tu xe nōm te hok hā hām xop putuk'ah. Kaxīy.

³³ Pa tikmū'ūn te:

'Amanām yōg xupepmā xop kopak mūg pip, tu nōm te hok hā hām putuk 'ohnāg. Yā' nōy tek mūg xatpax 'ohnāg. Teptu xate hām'āktux, 'ūgmūg mōy, nūy ta mōg? Kaxīy.

³⁴ Ha Yeyox te:

—'Āte xa hām'āktux hāmyūmmūg xe'e'. Tikmū'ūn 'ūm te hāpkummuk mīy, ha hāpkummuk mīy'ax putup xūy'ax te tikmū'ūn xatpax, ha tikmū'ūn te nōm te hok hā hām putuk.

³⁵ 'A' nōm te hok hā hām xip ka'ok'ah xuxyā xop kopah, pa' mōg putup. 'A' xip ka'ok'ah. Ha tak-tok xip ka'ok xuxyā xop kopah, tu' mōg putup'ah, yā' xip ka'ok.

³⁶ Pak mūn Topak-tok te 'āxop mōy, xa mōg, yā 'āmōg putup xe'e', tu nōm te hok hā hām putuk putup 'ohnāg, ha hāpkummuk mīy'ax te 'āxop xat putup 'ohnāg.

³⁷ 'Āte' yūmmūg 'āxop yā mōnāyxop 'Amanām yōg xupepmā xop. Pa 'āxop tep-tup, nūy 'ūkputex. 'Āxop te yōgnū hāmyūmmūg pa 'ohnāg, hup-tup, nūy 'ūkputex.

³⁸ Yōgnu 'ātak te 'ā' mūg hāpxop punethok, ha 'āte xa nōm 'āktux, pa 'āxop te' mīy 'ōgnū 'ātak yōg xat'ax. Kaxīy.

³⁹ Ha tikmū'ūn te:

—Yōgnū 'ātak yā 'Amanām. Kaxīy.

Ha Yeyox te:

Paxpu 'āxop yā 'Amanām yōg xop, nūy ta hāpxopmā yā 'Amanām putuk.

⁴⁰ Topa te 'ā hām'āktux, ha 'āte xa nōm 'āktux, yā hāpxop nōy 'āktux 'ohnāg. Pa 'āxop tep-tup, nūy 'ūkputex, yā 'a 'Amanām putuk'ah.

⁴¹ 'Āxop te hāpxopmā 'ōgnū 'ātak putuk. Kaxīy.

Ha tikmū'ūn te:

—Topa mūn yā 'ūgmū yōg 'ātak, yā Topap-xehnāg, yāg mūg yā Topak-tok xe'e, yā 'ap 'āmūn putuk'ah. Kaxīy.

⁴² Ha Yeyox te:

—Paxpu Topa yā 'ōgnū 'ātak, nūy ta 'āxop putupxax 'ūgmūn. Hamūn, 'āte Topa tuk nūn, tu nūktuk xupep nūnteh. 'A' 'āte nū yāy kutnā'ah, pa yā Topa te'.

⁴³ Teptu 'āxop te' yūmmūg 'ohnāg yōgnū hām'āktux. 'Ok' 'āxop te nōā' tot 'ohnāg yōgnū hām'āktux?

⁴⁴ 'Āxop yā Hāmgāyāgnāg kutok, tu 'āxop te' mīy 'ōgnū 'ātak te nōm putup. Yā hām xexka yōg hāmyāxatamuk tox

hā Hāmgāyāgnāg te' kixpax. Tutep-tup nōg hok'ah hāmyūmmūg'ax xe'e, yā Hāmgāyāgnāg 'ūyok 'ohnāg, tu' koitpax, yā Hāmgāyāgnāg te kaxīy, tu' koitpax, yā koit'ax xohix xexka mīy. Koit'ax yā Hāmgāyāgnāg kutok.

⁴⁵ 'Āte xa hāpxe'e 'āktux, yā' koit 'ohnāg, pa 'āxop kuxa mām 'ohnāg yōgnū hāmyūmmūg'ax kopah.

⁴⁶ Pi'yā 'āxop kopa te' xuktux'ax 'āte hāpkummuk mīy? Yā tīk te nōm 'āktux 'ohnāg. 'Āte hāpxe'e 'āktux. Teptu 'āxop tek kopa 'ākuxa mām 'ohnāg?

⁴⁷ Topa yōg tikmū'ūn te Topa yōg hām'āktux'ax 'āpak, tu' yīpkox pip. Pa 'āxop 'a' Topa yōg'ah, hu 'āyīpkox pip 'ohnāg. Kaxīy.

Yeyox xix 'Amanām

⁴⁸ Ha Yoneo xexka xop te:

—'Ok 'ūgmū'āte hāpxe'e 'āktux 'āmūn te Xāmānit xop kopa 'āxip, ha' xip yāmīy kummuk 'ākopah? Yā hamūn. Kaxīy.

⁴⁹ Ha Yeyox te:

—'Ap xip'ah yāmīy kummuk 'ūgkopah. 'Āte yōgnū 'ātak max 'āktux, ha ta 'āxop tek mūn 'āktux kummuk.

⁵⁰ 'A' 'āte' xak 'ohnāg, puyīy tikmū'ūn 'ūgmūn 'āktux max. 'Āte' xak 'ohnāg, puyīy tikmū'ūn 'ūgmūn xexka mīy. Yā' nōy puxet tek mūn 'āktux max, tuk xexka mīy, tu 'ōg hāpxopmā'ax kopit, tu' xuktux 'āxop kohe', pak mūn yok.

⁵¹ 'Āte hāpxe'e 'āktux. Nōm 'ūm te yōg hām'āktux'ax 'āpak, tu' yīpkox pip, puxix hi xe'ēgnāg mōkuma' mōg, ha' kux 'ohnāg yā xakix xe'e putup 'ohnāg. Kaxīy.

⁵² Ha Yoneo xop te:

—'Ūgmū'āte' yūmmūg nōmhā' 'ūxip yāmīy kummuk 'ākopah. 'Amanām xok, xix tīk te Topa pupi hām'āktux xop xakix kamah, pa xate' xuktux, hu: "Nōm 'ūm te yōg hām'āktux'ax 'āpak, tu' yīpkox pip, puxix xakix xe'e putup 'ohnāg.

⁵³ Yūmū yōg 'ātak 'Amanām xok. Xate putep mūn 'āktux? 'Ok 'āmūn xexka', pa 'Amanām kutōgnāg? Yā Topa pupi hām'āktux xop xakix kamah. 'Ok xate hāmp'e'āpaxex 'āxexkanām? Kaxīy.

⁵⁴ Ha Yeyox te:

—Paxpu 'āte yāy max 'āktux, tu yāy xexka mīy, puxix tu' kummuk, yā hām'āktux kummuk. Pa yōgnū 'ātak tek mūn max 'āktux, tuk xexka mīy. Yā yōgnū 'ātak te' mīy. Yōgnū 'ātak yā 'āxop te' xānāhā', hu: "Topa yūmū yōg".

⁵⁵ Pa 'āxop te nōm yūmmūg 'ohnāg hok'ah, pa 'āte nōm yūmmūg. Paxpu 'āte hām'āktux nōm yūmmūg 'ohnāg, kopix koit, yā 'āxop putuk. Pa 'āte nōm yūmmūg, tu yōg hām'āktux'ax 'āpak, tuk yīpkox pip.

⁵⁶ Hōmā 'ūhittap 'ōg 'ātak 'Amanām kuxa hittup yā tute' yūmmūg 'āte hāpxopmā'ax, tu' yūmmūg, hu' kuxa hittup. Kaxīy.

⁵⁷ Ha Yoneo xop te:

—'A 'ög hämyāxatamuk te 50'ah. 'Ok xate 'Amanām pēnāhā'? Kaxīy.

⁵⁸ Ha Yeyox te:

—'Āte xa hāpxe'e 'āktux. Hōmāg xip ha kunāy tu' xip 'Amanām. 'Ūgxip mōkumakmōg. Kaxīy.

⁵⁹ Ha tikmū'ün te mīkaxxap pop, nūy nō Yeyox tux, nūy putex, pa Yeyox te yāy xap-top, tu ta' mōg Topa pet xexka künāpah.

9

Yeyox xix tik pa hok

¹ Ta xe hāpkumep Yeyox, pa' xip tihik, tu' pa hok. 'Ūtut te' put, 'Īhā' pa hok, tu yōg hämyāxatamuk tox hā' pa hok.

² Ha ta' pip Yeyox yōg tik xop, tu Yeyox pu' yīkopit, hu:

—Yāyā', tep-te hāpkummuk mīy, yīy tik pa hok, 'Īhā' tut te' put? 'Ok pe tik te hāpkummuk mīy, 'ok pe' tak xi' tut? Kaxīy.

³ Ha Yeyox te:

—'A' tik te yāy pa hokgā'ah, xi' tak te' pa hokgā'ah, xi' tut te' pa hokgā'ah. Yā tik pa hok, puyīy tikmū'ün yūmmūg Topa ka'ok xexka te tik pu' mīy putup hāpxop max xe'ēgnāg.

⁴ 'Āpu yūmū hām mōkumakmōg. Yā Topa te nūkutnāhā', 'ū hām. 'Āpu yūmū hām. Hāpxip 'Īhā yūmūg hām putup 'ohnāg, yā 'āmnīy putuk 'Īhā tikmū'ün hām 'ohnāg.

⁵ 'Ūkxip nūnte hām xexka tu', tu 'āte tikmū'ün pu Topa mūg xix hāmmax mūg. Yā 'āte kuyānām putuk, yā tikmū'ün pu hāpxop xohix tupmāhā'. Kaxīy.

⁶ Ta Yeyox te mō' yīyhep yōn hām tu', tu hām kotūnāhā', tu putōy mīy, tu putōy hā tik pa mō'nīy,

⁷ tu tik pu hām'āktux, hu:

—Mōg, nūy yāy pa pix puxhep Xīno'e tu'. Yā kōnāg kox te puxhep xetnāhā'. Kaxīy.

Yā Xīno'e te tikmū'ün yīy'ax hā: "Mōkutnāhā'" Kaxīy.

Ha ta' mōg tihik, tu yāy pa pix, tu hāmpēnāhā', tu putpu' nūn, tu nūktu' xupep.

⁸ Ha ta' pip tik xape xop xix tikmū'ün nōy. Hōmā nōm te tik pēnāhā', 'Īhā tik te ta tu hāpxop kax xix tayūmak xak. Ha' xohix te:

—'Ok nō'ōm tihik. 'Ok hōmā' yūm, tu ta tu' kax, nūy tayūmak pop? Kaxīy.

⁹ Ha' yāg te:

—Hamūn nō'ōm. Kaxīy.

Ha ta' yāg nōy te:

—'Āmhok, yā nōm putuk. Kaxīy.

Pa tik te:

—Yāg mūn. Kaxīy.

¹⁰ Ha tikmū'ün te:

—Texīy xate hāmpēnāhā nōmhā'? Tep-te 'āpa mīy? Kaxīy.

¹¹ Ha tik te

—'Ūxip tihik 'ūxuxet'ax Yeyox, tu putōy mīy, tu nōm mōg pa nīy, tuk xat hu: "Mōg, nūy yāy pa pix puxhep Xīno'e tu'". Kaxīy. Ha tak mōg, tu yāy pa pix, tu hāpxip 'ohnāg 'Īhā 'āte hāmpēnāhā'. Kaxīy.

¹² Ha tikmū'ün te:

—Pi'yā' xip nōm tihik? Kaxīy.

Ha tik te:

—'Īntu', 'a 'ātep yūmmūg'ah. Kaxīy.

Paniye xop te' yīkopit

¹³ Ha ta tik mōgāhā tikmū'ün te Paniye xop hah.

¹⁴ Yā nit xap, yā Yoneo xop yōg 'āmnīy hām hok 'Īhā Yeyox te putōy mīy, tu tik pa mīy.

¹⁵ Ha Paniye xop te xe tik hā' yīkopit, texīy hāmpēnāhā nōmhā'. Ha tik te:

—Yā tute putōy hā mō 'ūgpa nīy, ha 'āte yāy pa pix, hu nōmhā hāmpēnāhā'. Kaxīy.

¹⁶ Ha Paniye yāg xop te:

—Nōm te' nōy pa mīy, 'ap Topa yōg tik'ah. Yā tute 'āmnīy hām hok yōg xat'ax 'āpak 'ohnāg. Kaxīy.

Pa yāg nōy te:

—'Ok tik kummuk te hāpxop ka'ok xe'ēgnāg texīy mīy? 'Āmhok. Kaxīy.

Yā yāg tep-tup nōg Yeyox, ha ta yāg tep-tup, yā nōm putox puxet 'ohnāg.

¹⁷ Ha Paniye xop te xe:

—Tep-te xa 'āpa mīy? Xate putep mūn 'āktux? Texīy nō'ōm tihik? Kaxīy.

Ha tik te xe:

—Yā nōm te Topa pupi hām'āktux xop kopa' xip. Kaxīy.

¹⁸ Ha Yoneo xop yōg xexka xop kuxa mām 'ohnāg. Hōmā tik pa hok, pa hōnhā hāmpēnāhā', pa nōm kuxa mām 'ohnāg, hu' xānāhā tik yōg 'ātak xi' tut,

¹⁹ yīy ta' nūn, tu nūktu' mōxaha'. Ha Yoneo xexka xop te:

—'Ok nūhū 'āk-tok pit? Xate hām'āktux, xate' put, tu ta pa hok. Texīy hōnhā hāmpēnāhā'? Kaxīy.

²⁰ Ha' tak xi' tut te:

—Hamūn, 'ūgmūg kutok, hak mū'āte' yūmmūg 'ūnāhā', tu ta' pa hok,

²¹ pak mū'āte' yūmmūg'ah tu texīy tu hōnhā hāmpēnāhā', tuk mū'āte' yūmmūg'ah, tep-te tu pa mīy. 'Āpu 'ūgmūk-tok yīkopit. Yā' xiptap, tu hāmyūmmūg. Tute xa hām'āktux putup. Kaxīy.

²² Yā 'ātak te Yoneo xexka xop yīpkutuk xi' tut te', hu kaxīy hām'āktux. Yā Yoneo yōg xexka xop te' xat, pu tikmū'ün Yoneo xop yōg Topa pet hā mōxa hok nōm te hām'āktux Yeyox yā Kunnix, yā Topa nū nōm kutnāhā'.

²³ Yīy ta hām'āktux hā kaxīy 'ātak xi' tut, yā hām'āktux hu: "Yā' xiptap. 'Āpu' yīkopit". Kaxīy.

²⁴ Ha Yoneo xexka xop te xe' xānāhā tihik, yā' tut te nōm put, tu ta pa hok. Ha ta tik nūn, ha' nōy te:

—'Āpu hām'āktux xeh Topa keppah. 'Āpu koit hok. 'Ūgmū'āte' yūmmūg 'ūkummuk Yeyox, yā hāpkummuk mīy. Kaxīy.

²⁵ Ha tik te:

—'Āte' yūmmūg'ah 'ok pe tu' max, 'ok pe tu' kummuk nō'ōm, pa 'āte' yūmmūg hōmā 'ūkpa hok, pa hōnhā 'āte hāmpēnāhā'. Kaxīy.

²⁶ Ha: Texīy? Putep mūn mīy? Tep texīy 'āpa mīy? Kaxīy.

²⁷ Ha tik te:

—'Āte xa hām'āktux, pa 'āyīpkox 'ohnāg. Tep texīy 'āxop te xe yīkopit? Kaxīy.

Ha' nōy te:

—'Ok xatep-tup, nūy Yeyox mūtik mōg? Kaxīy.

²⁸ Tuk-te'ex kummuk, tu:

—Yeyox mūtik 'āmōg, pak mūg mōg Mōyyex mūtik.

²⁹ 'Ūgmū'āte' yūmmūg Topa te Mōyyex mūtik hām'āktux, pa nō'ōm, yā hām 'ūm tu' nūn? Yā' yūmmūg'ah. Kaxīy.

³⁰ Ha tik te:

—Texīy 'āxop te' yūmmūg 'ohnāg? 'Āxop te' yūmmūg'ah hām 'ūm tu' nūn, pa tutek pa mīy.

³¹ Yūmū'āte' yūmmūg Topa te hāpkummuk mīy'ax xop 'āpak 'ohnāg, pa Topa te' nōy xop 'āpak, yā nōm te Topa 'āpak, tu' yīpkox pip, tu' mīy Topa te nōm putup.

³² Hām xexka yōg hāmyāxatumuk xohix xexka 'hā tikmū'ūn te hāpxorpā ka'ok xe'ēgnāg 'ohnāg, yā nōm putuk 'ohnāg. 'Ok xate' xupak tikmū'ūn te' pa mīy, nōm nāhā, hu ta pa hok? 'Āmhok.

³³ Paxpu Topa yōg tik 'ohnāg 'ōhōm, puxix hāpxorpā ka'ok xe'ēgnāg 'ohnāg. Kaxīy.

³⁴ Ha:

—'Āmūn, 'ānāhā hāpkummuk mīy'ax mūtik, tu hāpkummuk mīypax. 'Ok xatek mū'ā hāmyūmmūgā'? 'Āmhok. Kaxīy.

Tu' ta tik putyōn Yoneo xop yōg Topa pet kūnāpah, tu' xat, pu xe mō'nā hok.

Pa hok xop putuk

³⁵ Yā' putyōn, ha Yeyox te' xupak, tu ta' mōg, nūy tik xax, tu' xipihī, tu:

—'Ok 'ākuxa yūm ka'ok Tikmū'ūn Kutok kopah? Kaxīy.

³⁶ Ha tik te:

—Yāyā, 'āpu hām'āktux, 'ū'ūm nō'ōm? 'Ūgkuxa yūm putup nōm kopah. Kaxīy.

³⁷ Ha Yeyox te:

Yāk mūn, 'āte 'āmūtik hām'āktux nōmhā. Kaxīy.

³⁸ Ha tik te:

—Yāyā, 'ūgkuxa yūm ka'ok 'ākopah. Kaxīy.

Tu' kopaxux hā' xip Yeyox keppah.

³⁹ Ha Yeyox te:

—'Ūgnūn hām xexka tu', nūy tikmū'ūn yōg hāpxorpā'ax kopit, nūy tikmū'ūn xatat. Tikmū'ūn yāg te hām'āktux, hu: "'Ūgmū'āte Topa yōg hām'āktux yūmmūg kutōgnāg, pak

mū'ātep-tup, 'ū hāmyūmmūg". Kaxīy. Yā nōm te' pa hok xop putuk, pa hāpxip 'hā hāmpēnāhā'. Ha ta tikmū'ūn yāg nōy te hām'āktux hitop, hu: "'Ūgmū'āte Topa yōg hām'āktux yūmmūg". Kaxīy. Yā nōm te pa hok xop putuk. Kaxīy.

⁴⁰ Ha Paniye xop te' xupak, ha' yāg te' yīkopit, hu:

—Texīy, 'ok 'ūgmūg pa hok xop putuk? Kaxīy.

⁴¹ Ha Yeyox te:

—'Āxop te hām'āktux Topa yōg hām'āktux yūmmūg kutōgnāg, pap-tup, nūy hāmyūmmūg, nūy ta' pa hok xop putuk, tuk-nāy tu hāmpēnāhā', yā 'āmax Topa keppah. Pa 'āxop te kaxīy 'ohnāg. Yā 'āxop te hitop 'āktux Topa yōg hām'āktux yūmmūg, nūy ta' pa hok xop putuk, tu 'ākummuk Topa keppa mōkuma 'āmōg. Kaxīy.

10

Kahnēn

¹ Ta xe tikmū'ūn pu hām'āktux Yeyox te, hu:

—'Āte xa' yūmmūgāp-tup hāpxop, tu hāpxe'e 'āktux putup. 'Ūxip kahnēn yōg hāmpak'ax, ha' xupxet te hāmpak'ax 'ātex, pa hāmpak'ax yīkox hā' xupep 'ohnāg,

² pa kahnēn yōg pēnā'ax te hāmpak'ax yīkox hā' xupep,

³ ha hāmyīkox pēnā'ax te hāpxōn, ha' xupep kahnēn yōg pēnā'ax, tu kahnēn xānāhā', yā xuxet'ax xohix hā' xānāhā kahnēn, ha kahnēn te' xupak, hu' pe' mōg, ha kahnēn yōg pēnā'ax te kahnēn mōgāhā hāptopah,

⁴ tu hāptopa' pip, tu' pēnā'ax te māxap tu' mōg, ha kahnēn te' pe' mōg, kahnēn te' yūmmūg pēnā'ax yōg hām'āktux tu',

⁵ ha kahnēn te' nōy pe' mōg 'ohnāg. 'Ūnōy te kahnēn xānāhā', pa kahnēn nūpanām, kahnēn te' yūmmūg 'ohnāg 'ūnōy yōg hām'āktux tu'. Kaxīy.

⁶ Yeyox te nōm 'āktux, nūy tikmū'ūn pu hāpxop nōy yūmmūgāhā', pa tikmū'ūn te hāmyūmmūg 'ohnāg. Tikmū'ūn te hāmpē'paxex texīy hām'āktux.

Yeyox te kahnēn yōg pēnā'ax max putuk

⁷ Ta xe hām'āktux Yeyox te, hu:

—'Āte xa hāpxe'e 'āktux. Kahnēn te hāmpak'ax yīkox hā mōxakux hāmpak'ax kopah. Yā' pip 'ūkopah, ha' nōy te kahnēn koxyo'y 'ohnāg. Hā kaxīy 'āte yōg kuxa mām ka'ok xop pēnāhā', ha' nōy te nōm koxyo'y 'ohnāg.

⁸ Kahnēn te xupxet 'āpak 'ohnāg. Hā kaxīy yōg kuxa mām ka'ok xop te nōm te koit hā' yūmmūgā xop 'āpak 'ohnāg.

⁹ Kahnēn te hāmpak'ax yōg hāmyīkox hā mōxakux hāmpak'ax kopah, tu ta' mōg nōmhā hatō'ah kamah, nūy tu xit. 'Ūnōy te kahnēn

koxyōy 'ohnāg. Hā kaxīy 'āte yōg kuxa mām xop pēnāhā', ha' nōy te nōm koxyōy 'ohnāg.

¹⁰ Ha ta xupxet nūn, nūy tu xupxet, nūy kahnēn kix, nūy xohix koxyōy. Hā kaxīy 'ūnōy tep-tup, nūy yōg kuxa mām ka'ok xop kix, nūy koxyōy. Pa 'āte yōg kuxa mām ka'ok xop pēnā max, ha' kuxa mām, tu' hittup, yā' kuxa hittup xexkah.

¹¹ —Ta 'āte kahnēn pēnā'ax max putuk kamah. Kahnēn pēnā'ax max te kahnēn pupi tu xok, yā 'āte tikmū'ūn pupik xok putup.

¹² Ha ta' xip kāmānat. Xuxyā te nōm pu pago, pu tu kahnēn pēnā', pa 'ap kahnēn yōg pēnā'ax xe'e'ah, yā kāmānat, yā 'ūyōg'ah kahnēn. Ta kokexkata nūn, ha ta mōxupaha kāmānat, yīy ta kokexkata te kahnēn pop, ha kahnēn xohix nūpānām.

¹³ Kāmānat mōxupaha'. Hamūn, tayūmak tu' hām, tu kahnēn putuppax 'ohnāg.

¹⁴⁻¹⁵ Pa 'āte kahnēn yōg pēnā'ax max putuk. Yōgnū 'ātak tek yūmmūg, ha 'āte yāy yōg 'ātak yūmmūg. 'Āte yāy yōg kuxa mām xop yūmmūg, ha yōg kuxa mām ka'ok xop tek yūmmūg, ha 'āte mō nōm yāyxe'ēgnāg, hu nōm pupik xok putup.

¹⁶ —Ha ta kahnēn nōy xohix pip hāmpak'ax kūnāpah. Hā kaxīy tikmū'ūn panip xop kuxa mām ka'ok putup 'ūgkopah. Nōm tek mūn 'āpak putup, ha' kuxa mām ka'ok xop nōy mōxakux putup, ha xohix kuxap-xet, tup-tox puxet, ha 'āte xohix xexka pēnāp-tup.

¹⁷ —'Āte' tux hok, pu tikmū'ūn 'ūkputex, puxix tikmū'ūn 'ūkputex, ha putuk hip-tup. Hā kaxīy 'ātak Topa tek mōyāy xe'ēgnāg.

¹⁸ 'Āte tux hok, pu tikmū'ūn 'ūkputex hok, puxix tikmū'ūn 'ūkputex hok. 'Ātep-tup, puxix tikmū'ūn 'ūkputex. Topa te' xat, ha 'ātep-tup, kopxik xok putup, tu putuk hip-tup. Kaxīy.

¹⁹ Tikmū'ūn te' xupak Yeyox yōg hām'āktux, tu yāy yōg hāmp'e'paxex'ax te yāy putuk 'ohnāg.

²⁰ Tikmū'ūn punethok te:

—Yā' xip yāmīy kummuk Yeyox kopah! 'Ūp-tox kummuk! Teptu 'āxop te nōm 'āpak? Kaxīy.

²¹ Ha ta tikmū'ūn nōy te:

—Tik te hām'āktux max hā kaxīy 'ohnāg nōm kopa' xip yāmīy kummuk. Texīy tute tik pa hok pu' pa mīy? Kaxīy.

Yoneo xop te Yeyox putup nōg

²² Ha ta' xip 'āmuk xexkah kōmēn Yenoy-anēn tu', yā Topa pet xexka yōg 'āmuk xexkah. Yā hōmā 'ūhittap tikmū'ūn te xe' mīy Topa pet xexka', tu nō 'āmuk xexka mīy. Yā hām'āxīynāg.

²³ Ha ta' hāpkumep Yeyox te Topa pet xexka kux kaxax kaka', yā kux kaxax 'āxet'ax Xanomām Yōg Kux Kaxax.

²⁴ Ha ta' nūn Yoneo xop, tu nūktu Yeyox xakot, tu:

—'Āmnīy xohix texīy hāg mū'āte' hip'ax, nūy hāmyūmmūg? 'Āpu hāpxe'e 'āktux. 'Ok 'āmūn yā Kunnix, Topa te nōm yāykutnāhā'? Kaxīy.

²⁵ Ha Yeyox te:

—Hōmā 'āte xa hām'āktux, pa 'ākuxa mām 'ohnāg 'ūgkopah. 'Āte hāpxopmā max yōgnū 'ātak te nōm putup, ha 'āxop te' pēnāhā', tu nōm hāg yūmmūg'ax.

²⁶ Pa 'āxop tep-tup 'ohnāg, nūy 'ākuxa mām, 'a 'āxop te yōgnū kahnēn putuk'ah tu', yā yōgnū kuxa mām ka'ok xop putuk'ah.

²⁷ 'Āte yāy yōg kuxa mām ka'ok xop xānāhā', ha nōm tek 'āpak, tu' yīpkox pip. 'Āte nōm yūmmūg, ha nōm tek pe' mōg, yā kahnēn putuk, yā kahnēn te kahnēn pēnā'ax pe' mōg putuk.

²⁸ Yā yōg kuxa mām ka'ok xop, ha' nōy te nōm pop putup'ah. 'Āte yāy yōg xop hīnnāhā', ha' pip hāmyāxatamuk xohix kux 'ohnāg hā Topa yīka', yā' xakix xexkap-tup'ah.

²⁹ Yōgnū 'ātak 'ā kuxa mām xop popmāhā'. Ha yōgnū 'ātak 'ūxexkanām. 'Ūkuxa mām xop yā yōgnū 'ātak yōg, ha' nōy te nōm pop putup'ah.

³⁰ Yōgnū 'ātak 'ūxexka xik mūn yā yāy putuk. Kaxīy.

³¹ Ha Yoneo xop te mīkaxxap pop, nūy Yeyox tux, nūy putex.

³² Ha Yeyox te:

—'Āte hāpxopmā max punethok 'āxop kopah. Yā yōgnū 'ātak te' xat, 'ū mīy. Hāpxopmā'ax 'ūm 'ūkummuk, yīy 'āxop tek tux putup mīkaxxap hā? Kaxīy.

³³ Ha Yoneo xop te:

—'Ūgmū'ātep-tup, nūy 'ātux mīkaxxap hā. Yā xate hāpxop kummuk mīy, yā Topa 'āktux kummuk, yā xate' xuktux 'āmūn yā Topah, pa 'āmhok, yā tihik 'āmūn. Kaxīy.

³⁴ Ha Yeyox te:

—'Ūkax'āmi 'ōg xat'ax yōg tappet tu', hu: "Āxop te Topa putuk". Kaxīy.

³⁵ Tu xe:

—Topa te nōm pu' hōm yāy yōg hām'āktux, tu nōm xānāhā', hu: "Topa putuk xop". Kaxīy. Yā' kax'āmi Topa yōg tappet tu nō'ōm, ha Topa yōg tappet te' koit 'ohnāg.

³⁶ Ha Topa tek mūn yāykutnāhā', tu nūgkutnāhā nūnte hām xexka tu', ha 'āte' hām'āktux 'ūgmūn yā Topak-tok. Texīy 'āxop tek mūn 'āktux kummuk?

³⁷ Paxpu 'āte yōgnū 'ātak pu hāpxopmā 'ohnāg, ha ta' 'āpu 'ākuxa mām hok.

³⁸ Pa 'āte yōgnū 'ātak pu hāpxopmāhā'. 'Āxop tek kopa 'ākuxa mām 'ohnāg, pa 'āpu 'ākuxa mām yōg hāpxopmā'ax kopah, yā yōg hāpxopmā'ax ka'ok xe'ēgnāg kopah, nūy

yūmmūg xe'e yōgnū 'ātak xip 'ūgmūtik, xik xip yōgnū 'ātak mūtik. Kaxīy.

³⁹ Ha Yoneo xop te xonat xat, pu Yeyox müy, pa Yeyox te tikmū'ün kopa' xip, tu' mōg,

⁴⁰ tu mōktu kōnāg kox Yohnām xak put-puk, tu mōktu' xupep Yoām yōg xip'ax tu', yā hōmā Yoām te tikmū'ün putox pix nōnteh, ha Yeyox te' nox xip.

⁴¹ Ha ta' nūn tikmū'ün punethok, tu nūktu Yeyox tu' mōxaha', tu hām'āktux, hu:

—Yoām te hāpxopmā ka'ok xe'ēgnāg 'ohnāg, pa Yoām te Yeyox 'āktux, ha hām'āktux xohix 'ūxe'e', yā' koit 'ohnāg. Kaxīy.

⁴² Ha ta' tikmū'ün punethok kuxa mām ka'ok Yeyox kopah.

11

Nay xok

¹ Ha ta' xip tihik 'āxet'ax Nay, yā' xip xip-tuxexka Metān tu', tu' pakut. Ha ta' kama' tihī' Metān tu' Mānix xi' tutnōy, yā Mā'at.

² Yā hōmā Mānix te hep haxnāg max pux, yā' takat, tu Yeyox pata yīmū' pux, tu' xe hā' pata nagāhā', yā Mānix te Yeyox putuppax. Manix taknōy yā Nay pakut.

³ Mānix te' nōy mō'kutnāhā' xix Mā'at te', puyīy Yeyox xānā', hu:

—Yāyā, yā' āxape 'ūpakut. Xate nōm mō'yāy xe'ēgnāg. Kaxīy.

⁴ Ha Yeyox te:

—Yā' pakut, pa' pakut, puyīy tikmū'ün pēnā' Topa te hāpxopmā ka'ok xe'ēgnāg. Tikmū'ün te' pēnāp-tup yā' max xe'ēgnāg Topa xix Topak-tok. Kaxīy.

⁵ Yeyox te mō'yāy xe'ēgnāg Mā'at xi' tutnōy xix Nay.

⁶ Nay pakut, ha Yeyox te' xupak, tuk-nāy tu' nox xip 'āmnīy tix hā, yā' mōg'ah Nay hah.

⁷ 'Ūnōp 'āmnīy tix, ha Yeyox te yāy yōg tik te 12 xop pu hām'āktux, hu:

—'Āpu yūmū mōg hāpxexka Yonex tu'. Kaxīy.

⁸ Ha Yeyox yōg tik xop te:

—Yāyā, hōmā hāpxip kutōgnāg 'Thā Yoneo xop tep-tup, nūy mīkaxxap hā' āp-tex 'ōnteh. 'Ok xatep-tup, nūy putpu mōg. 'Āmōg hok!

⁹ Ha Yeyox te:

—Māyōn mōg puxet yōg 'ot xohix te' 12. Tik 'ūm te hāpkumep hāptup hah, hu nāp-tup'ah, yā hāmpēnāhā 'Thā' xip kuyānām. Kuyānām xip 'Thā' āte hāpxopmāhā'.

¹⁰ Pa tik 'ūm te hāpkumep 'āmnīy 'Thā, hu' nāp-tup, yā hāpkoxtap. Hāpxip 'Thā hāpkoxtap'ax, 'Thā' āte hāpxopmā 'ohnāg. Kaxīy.

¹¹ Tu xe:

—Yūmūg xape Nay te mō'yōn, pak mōg putup, nūy tuhuk. Kaxīy.

¹² Ha Yeyox yōg tik xop te:

—Yāyā, mō'yōn, puyā xip, 'ūhittup putup. Kaxīy.

¹³ Pa Yeyox te xok'ax 'āktux, yā' xok, pa Yeyox yōg tik xop te hāmpē'paxex, Yeyox te mō'yōn'ax 'āktux.

¹⁴ Yīy Yeyox te hām'āktux ka'ok, hu:

—Nay 'ūxok.

¹⁵ 'Ak xip'ah Nay mūtik, 'Thā' xok, pak kuxa hittup, yā' āte 'āxop kuxa māmāp-tup. 'Āpu yūmū mōg Nay hah. Kaxīy.

¹⁶ Ha Tōmē', yā' xuxet'ax nōy te 'Ūktonnix, yā Tōmē' te:

—'Āpu yūmū mōg yāyā mūtik, nūy xakix nūmūtik. Kaxīy.

Yeyox te tikmū'ün hīnmāhā'

¹⁷ Ha ta' mōg Yeyox, tu' xupak tikmū'ün te hām'āktux hōmā 'āmnīy te' 4 'Thā Nay hāpkot.

¹⁸ Xiptuxexka Metān xix kōmēn Yenoy-anēn yōg kinōm te' 3 kōmnāg.

¹⁹ Yīy ta' mōg Yoneo xohix, nūy Mā'at kuxa hittupmā' xix Manix kuxa hittupmā', yā' taknōy xok, ha' potaha'.

²⁰ 'Ūnūn Yeyox, ha Mā'at te' xupak, tu' mōg, nūy yāy tu' xakux, pa Mānix nox xip yāy pet tu'.

²¹ Ha ta' mōg Mā'at Yeyox hah, tu' mōktu' xupep, tu:

—Yāyā, pax xa xip nūnteh, puxix 'ūktaknōy xok 'ohnāg.

²² Pa 'āte' yūmmūg, xate Topa tu' xak hāpxop 'ūm nōmhā, puxix xa hāpxopmā'. Kaxīy.

²³ Ha Yeyox te:

—'Ātaknōy te putpu' hip-tup. Kaxīy.

²⁴ Ha Mā'at te:

—'Āte' yūmmūg, hāmyāxatamuk xohix xox putox 'Thā putpu' hip-tup. Kaxīy.

²⁵ Ha Yeyox te:

—'Āte tikmū'ün putpu' hīnmāhā', tu' hi'ax hōm, yā hām'hīnnā'ax xip 'ūgkopah. Tikmū'ün 'ūm kuxa mām 'ūgkopah, hu' hip-tup. Tikmū'ün xakix, puxix tu' hip-tup.

²⁶ Ha tikmū'ün 'ūm pip, tu' kuxa mām ka'ok 'ūgkopah, puxix tu' xok xexka putup 'ohnāg. 'Ok 'ākuxa mām nū' hām'āktux kopah? Kaxīy.

²⁷ Ha Mā'at te:

—Yāyā, hamūn, 'ūgkuxa yūm. 'Āte' yūmmūg, 'āmūn yā Kunnix, yā Topak-tok, tu' 'ānūn nūnte hām xexka tu'. Kaxīy.

Yeyox potaha'

²⁸ Tu' ta' nūn Mā'at, tu' nūktu' xupep, tu' tutnōy Mānix mūtik hām'āktux, yā' tix te yāy mūtik hām'āktux, 'ap nōy xip'ah. Mā'at te:

—Yāyā xip, tu' āxak. Kaxīy.

²⁹ Ha Mānix te' xupak, tu' ta' mōg mō'ka'ok, nūy Yeyox ha mōg.

³⁰ Yā Yeyox xupep 'ohnāg xiptuxexka tu', pa' xip nōm xip'ax tu', yā hōmā hām'āktux Mā'at mūtik 'ōnteh.

³¹ Ha ta' pip Yoneo xop mīptut kopah, nūy Mānix kuxa hittupmā', tu' Mānix pēnāhā'. Yā'

yok Mānix, tu ta' mōg mō'ka'ok hāptopah, ha Yoneo xop te hāmpē'paxex Mānix mōg xukpot tu', nūy pohoh.

³² Ta' mōg Mānix, tu mōktu Yeyox ha' xupep, tu Yeyox pēnāhā', tu hām tu' xip Yeyox pata yākak, tu:

—Yāyā, pax xa xip nūnte, puxix 'ūktaknōy xok 'ohnāg. Kaxīy.

³³ Mānix potaha', ha Yeyox te pota pēnāhā' xix Yoneo xop pota pēnāhā nōm nūn Mānix mūtik, tu' kuxa ka' xexkah,

³⁴ tu:

—Pi'yā 'āxop te nō hāpkot? Kaxīy.

Ha' nōy te:

—Yāyā, mā, nūy pēnā'. Kaxīy.

³⁵ Ha Yeyox potaha'

³⁶ Yīy Yoneo xop te:

—Ūpēnā', Yeyox te Nay mō'yāyā xe'ēgnāg xexka'. Kaxīy.

³⁷ Pa' yāg te:

—'Ok tute tik pa hok pu' pa mīy? Hamūn. Paxpu Nay hittupmā, puxix tu xok 'ohnāg. Kaxīy.

Ūputpu' hi Nay

³⁸ Ha' kuxa ka' xexka 'ūxehet Yeyox, tu ta' mōg xukpot tu', ha' xip Nay yōg mīkaxxap kox, ha mīkaxxap te mōhāmñīyīn mīkaxxap kox.

³⁹ Ha Yeyox te xat, hu:

—Āpu' xut mīkaxxap. Kaxīy.

Ha Mā'at, yā tik mūktutnōy te:

—Yāyā, 'ūhax kummuk xexka'ax. Yā' xok hōmā 'āmñīy te' 4. Kaxīy.

⁴⁰ Ha Yeyox te:

—'Ok 'āte xa hām'āktux, 'ākuxa yūm, hu ta' pēnāp-tup Topa te hāpxopmā max xe'ēgnāg mīy putup? Kaxīy.

⁴¹ Ha tikmū'ūn te mīkaxxap yōkāmāhā', ha Yeyox te pepi pēnāhā', tu:

—Yōgnū 'ātak, 'āmax, xate yōg hām'āktux 'āpak.

⁴² 'Āte' yūmmūg, xate yōg hām'āktux 'āpak mōkuma'āmōg. Pa 'āte nū 'āktux, puyīy tikmū'ūn hām'āktux 'āpax, hu' kuxa mām 'ūgmūn kopah, yā xate nūkutnāhā'. Kaxīy.

⁴³ Ta hāpxip Ṭhā Yeyox te' xānā' ka'ok, hu:

—Ney, 'āpep, nūy nū'! Kaxīy.

⁴⁴ Ha ta nōm xok xupep, yā' yīm kīy xix pata', yā xakix xop yōg topixxax kīy'ax hā, xix pa yīn kīy kamah. Ha Yeyox te:

—Āpu 'ūko'a', nūy xut, pu mōg. Kaxīy.

Tikmū'ūn tep-tup puyīy xonat Yeyox putex

⁴⁵ Yā' pip Yoneo punethok, tu' pēnāhā', hu' kuxa mām ka'ok Yeyox kopah. Yā' nūn, nūy Manix mūtik pip, tu' pēnāhā' Yeyox te Nay putpu' hīnnāhā', hu' kuxa mām ka'ok Yeyox kopah.

⁴⁶ Ha ta' yāg mōg putpu', nūy Paniye xop pu Yeyox yōg hāpxopmā'ax 'āktux, tu hām'āktux,

⁴⁷ yīy ta' yāy tu nū'nāhā' Paniye xop xix 'āmānex xexka xop xix tik pa te hāmyūmmūg xop, tu:

—Putep mūn mīy putup yūmū'āte'? Tik te hāpxopmā ka'ok xe'ēgnāg punethok.

⁴⁸ Yūmū'āte' tux hok, pu mīy hāpxopmā ka'ok xe'ēgnāg hā kaxīy, puxix tikmū'ūn xohix xexka kuxa mām ka'ok putup Yeyox kopah, ha ta' nūn putup Hōm yōg xop, tu yūmū' yōg Topa pet koxyōy putup, xix yūmūg xop xohix xexka kix putup. Kaxīy.

⁴⁹ Pa' xip yāp-xet 'ūxuxet'ax Kaxpax, yā nōm hāmyāxatamuk Ṭhā 'āmānex xop xat Kaxpax te', tu:

—'Āxop te hāmyūmmūg 'ohnāg.

⁵⁰ 'Ok 'āxop te hāmpē'āpaxex 'ohnāg? Yā' max, pu tik puxet tikmū'ūn pupi' xok, pa yā' kummuk, pu yūmūg xohix xexka xakix. Kaxīy.

⁵¹ Yā Kaxpax te yāy yōg hāmpē'paxex'ax 'āktux 'ohnāg, pa yā nōm hāmyāxatamuk Ṭhā 'āmanex xop xat Kaxpax te', tu Topa pupi' hām'āktux, tu Yeyox xok'ax 'āktux. Yā Yeyox te Yoneo xop pupi' xok putup.

⁵² Yā Yeyox te Yoneo xop pupi' xok putup, tu' xok putup, nūy yāytunū'hoh nōm nōy kamah, yā hām panip tu' pip hāpxexka xohix tu', yā Topak-tok xop, tu Yoneo xop hā' mīy putup xi' nōy hā', pu tu' pip puxet, yā xop puxet.

⁵³ Ha ta Yoneo xexka xop te yāy mūtik hām'āktux kōnāmāhā nōmhā texīy Yeyox putex putup,

⁵⁴ yīy ta Yeyox te yāy xaptop hā hāpkumep hāpxexka Yonex tu', tu hāpxip Ṭhā' mōg, tu mōktu' xupep hām nak yīka', tu' nox xip kōmēn 'Epayīy tu' yāy yōg tik xop mūtik.

⁵⁵ Ha ta hāmhūmnāg Yoneo xop yōg 'āmuk xexka xuxet'ax Nōā'yēn, ha ta' mōg tikmū'ūn punethok kōmēn Yenoyanēn tu', nūy yāy pīx, nūy Yoneo yōg xat'ax mīy.

⁵⁶ Ha ta tikmū'ūn te Yeyox xak kōmēn tu', tu yāy mūtik hām'āktux, hu:

—Putep hāmpē'āpaxax, 'ok nūn putup Yeyox 'āmuk xexka hah? Kaxīy.

⁵⁷ Ha ta' xat 'āmānex xexka xop te' xix Paniye xop te', pu tikmū'ūn 'ūm Yeyox pēnā', mā', nūy nōm 'āktux, puyīy xonat xat, pu Yeyox mīy.

12

Yeyox xip xiptuxexka Metān tu'

¹ Ta xe 'āmñīy te' 6 Ṭhā' xip'ax 'āmuk xexka 'ūxuxet'ax Nōā'yēn, ha ta' mōg Yeyox, tu mōktu' xupep xiptuxexka Metān tu', yā Nay pet yūm Metān tu', yā hōmā Yeyox te nōm putpu' hīnnāhā'.

² Ha ta' puk 'āmuk, tu Mā'at te xit'ax nūnnāhā', nūy tikmū'ūn pu' nīm, ha ta' yūm Nay nīmpe xit'ax tu' Yeyox mūtik,

³ ha Manix te' paha hep haxnāg max takat xexkah, yā' kit xahix, yā' mīnntu nān hā' mīy. Manix te nōm pux Yeyox pata yīmū', tu yāy xe hā' pata nagāhā'. 'Ūhax māynāg 'ūhep yōg, tu hāpxip 'lhā mīptut hā nū'xip 'ūhax max.

⁴ Ha ta' xip Yot 'I'xkanot, yā Yeyox yōg tik te 12 xop kopa' xip, yā' gāy xop mōgāp-tup, puyīy Yeyox xūygā'.

⁵ Yot te:

—Teptu hep haxnāg nōmenex 'ohnāg, nūy 2 xēmān yōg hām hā' pop tayūmak, nūy hok xop pu tayūmak nīm? Kaxīy.

⁶ Yā Yot te hām'āktux te kaxīy, pa hok xop putuppax 'ohnāg, pa' xupxet putup, yā tute' tat tayūmak Yeyox yōg xix Yeyox yōg tik xop yōg, tu nōm hā' tat'ax kopa yāy pu tayūmak mōyrap.

⁷ Ha Yeyox te:

—Pu yā' xip 'ūhūn. Hām'āktux kummuk hok. Tute hep tat, nūy 'ūgyīn muk, yā' 'ūkxok putup.

⁸ 'Ūhok xop pip ka'ok mōkuma'mōg 'āxop kopah, pa noxk xip ka'ok 'ohnāg 'āxop kopah. Kaxīy.

'Ūxexka xop tep-tup, nūy Nay putex

⁹ Ha ta' tikmū'ūn xohix xexka te' xupak hato'a Yeyox xip xiptuxexka Metān tu', tu ta' mōg, nūy Yeyox pēnā' xix Nay pēnā', yā putpu' hī'.

¹⁰ Yīy ta' 'āmānex xexka xop te yāy mūtik hām'āktux texīy yīp-tex Nay kamah.

¹¹ Yā Yeyox te' Nay putpu' hīnnāhā', ha Yoneo punethok te' pēnāhā', tu' xupak, hu yāy yōg xexka xop nīm, nūy kuxa mām Yeyox kopah, yīy ta' xexka xop tep-tup nūy Nay putex.

Yeyox te kōmēn Yenoyanēn ha mō'nāhā'

¹² Hāptup ha ta' pip tikmū'ūn 'āmuk xexka tu' 'āxet'ax Nōā'yēn, tu' xupak Yeyox nūn kōmēn Yenoyanēn tu'.

¹³ Ha tikmū'ūn xohix te' pop patxap kup māg, tu ta' mōg Yeyox hah, tu' mōg, tu hām'āktux ka'ok hu:

—'Ūmax xe'ēgnāg Topah. Topa, 'āpu nōm pu hāmmāxnā' xate nū nōm kutnāhā', yā tute 'Iyaet xop xat. Topa, 'āpu nōm pu hāmmāxnā'. Kaxīy.

¹⁴ Ha Yeyox te' paha yomēn kutok, tu nōm yīmū' yūm. Yā Topa yōg tappet te:

¹⁵ "Kōmēn Xiām yōg tikmū'ūn, 'āpu 'ākuxa nōg hok. 'Ūnūn 'ōg tik xexkah, yā yomēn kutok yīmū' yūm". Kaxīy.

¹⁶ Ha Yeyox yōg tik xop te nōm kax'āmi xutīgā 'ohnāg, pa Yeyox mōg putup pepi pexkox tu', 'lhā' yūmmūg putup Topa yōg tappet yōg hām'āktux xix tikmū'ūn te hāpxopmā yūmmūg putup kamah.

¹⁷ Yā tikmū'ūn te' pēnāhā Yeyox te' Nay xānāhā mīkaxxap kox kopah, tu putpu' hīnnāhā', ha tikmū'ūn te' xape xohix pu nōm 'āktux.

¹⁸ Ha' nōy te' xupak Yeyox te hāpxopmā ka'ok xe'ēgnāg, hu ta' mōg Yeyox hah.

¹⁹ Yīy ta' yāy mūtuk hām'āktux Paniye xop te', hu:

—Pēnā'. Tikmū'ūn tek mūg 'āpak 'ohnāg, pa tikmū'ūn xohix xexka te' Yeyox pe' mōg. Kaxīy.

Genex yōg xop mōg, nūy Yeyox pēnā'

²⁰ Yā' pip tikmū'ūn xohix Yenoyanēn tu' 'āmuk xexka tu', tu Topa pu nūktettex, ha nōm xop kopa' xip hāpxexka Genex yōg xop,

²¹ tu' nūn, tu nūktu Pinip ha' mōxaha', tu: —Yāyā, 'ūgmū'ātep-tup, nūy Yeyox pēnā'. Kaxīy.

Yā Pinip yōg kōmēn yā Metxax, yā hāpxexka Ganinet kopa' xip.

²² Tu ta' mōg Pinip, tu mōktu 'Ānene pu' xuktux nō'ōm, ha ta' mōg tik tix, tu mōktu Yeyox pu' xuktux nō'ōm,

²³ ha Yeyox te:

—'Ūgmūn yā Tikmū'ūn Kutok. Hāpxip kutōgnāg 'lhāg xok putup, hak-nāy tu Topa te' 'ūkxexka mīy putup, ha tikmū'ūn xohix tek mūn 'āktux max putup.

²⁴ Tikmū'ūn te hāpxop xap xok. Yāk-tōgnāg hāpxopxap, pa hāpxip 'lhā yāyhā kup, tu mīnta ta xohix popmāhā', yā' max xe'ēgnāg. Hā kaxīy putuk 'ūgmūn. 'Ūkxok putup, pa put-puk hīp-tup, ha nōmhā' max xe'ēgnāg.

²⁵ Hā kaxīy kama tikmū'ūn. Tikmū'ūn te yāy yōg putup'ax mīy 'ohnāg, puxi' pop putup hāpxop max xe'ēgnāg, yā Topa yīka' pip putup hāmyāxatamuk xohix kux 'ohnāg hā. Ha ta' nōy te yāy yōg putup'ax mīy, puxi' pop putup'ah hāpxop max xe'ēgnāg, yā Topa yīka' pip putup'ah hāmyāxatamuk xohix kux 'ohnāg hā.

²⁶ Yōgnū kāmānat te yāy putup'ax mīy'ah, pa' mīy 'āte nōm putup, tuk pe' mōg putup, nūy 'ūgmūtik pip, ha Topa te nōm xexka mīy putup. Kaxīy.

Yeyox te hām'āktux 'ūxok putup

²⁷ Tu Yeyox te xe:

—Hōnhā 'lhāg kuxa hittup 'ohnāg. 'Āte putep 'āktux putup? 'Ok 'āte hām'āktux putup, hu: "Yōgnū 'ātak, 'āpu 'ūkxūy xut". Kaxīy. 'Āmhok, 'āte nōm 'āktux putup'ah. Pak nūn, nūy tu xok.

²⁸ 'Ātak, 'āpu 'āxexka nōy nā mōg tikmū'ūn xop kopah! Kaxīy.

Ha ta' hām'āktux Topa pexkox tu', hu:

—'Āte yāy xexka mīy nōy nāg mōg tikmū'ūn xop kopah, tu xe' mīy putup. Kaxīy.

²⁹ Ha tikmū'ūn te' xupak, tu hām'āktux, hu: —Yā tex tīnnāhā'. Kaxīy.

Pa' nōy te:

—Yā pexkox yōg nū'pok xop te hām'āktux.
Kaxīy.

³⁰ Pa Yeyox te:

—Topa te hām'āktux, xayīy 'āxop xupax.
Kaxīy.

³¹ Hāpxip kutōgnāg, 'Ihā Topa te hep yāy koxuk xop yōg hāpxopmā'ax kopit putup, nūy yōg hāpkummuk mīy'ax hā' yānān. Hāpxip kutōgnāg 'Ihā Topa te' pu'ugāp-tup nōm te Topap-tup 'ohnāg xop xat.

³² 'Āte mīpkupnix yīmūg xup putup, tu yāy pu' pop putup tikmū'ūn xohix hāpxexka xohix tu'. Kaxīy.

³³ Yā Yeyox te hām'āktux hā kaxīy, hu tikmū'ūn pu hāmyūmmūgāhā te kaxīy xok putup.

³⁴ Ha tikmū'ūn te:

—Pak mū'āte' mōkupix xat'ax yōg tappet tu Kunnix xip'ax hāmyāxatamuk xohix kux 'ohnāg hā, pa xate hām'āktux Tikmū'ūn Kutok xup putup mīpkupnix yīmū', tu' xok putup. 'Ū'ūm Tikmū'ūn Kutok? Kaxīy.

³⁵ Ha Yeyox te:

—Hāpxip kutognāg hāg xip'ax nūnteh. 'Āpu 'ūg 'āpax, nūy hāmyūmmūg, 'Ihāg xip nūnteh. Yā 'āte kuyānām putuk. 'Ūkxip, ha tikmū'ūn te hāmyūmmūg. Kuyānām xip, ha tikmū'ūn te hāmpēnāhā'.

³⁶ 'Āpu 'ākuxa mām ka'ok 'ūgkopah, 'Ihāg xip, nūy hāmyūmmūg. Kaxīy.

Yoneo xop kuxa mām 'ohnāg Yeyox kopah

Yeyox te hām'āktux kux, tu ta' mōg, tu yāy xaptop,

³⁷ tu hāpxopmā ka'ok xe'ēgnāg punethok, ha tikmū'ūn te' pēnāhā', pa' kuxa mām 'ohnāg Yeyox kopah.

³⁸ Yā hōmā 'ūhittap 'Iyait te Topa pupi hām'āktux, yā hōnhā putuk hāpxopmā'ax. 'Iyait te: "Topah, 'ū'ūm kuxa mām yūmū yōg hām'āktux kopah? Yā' kuxa mām 'ohnāg. Tep-te' yūmmūg, yā Topa te hāpxopmā ka'ok xe'ēgnāg? Yā' yūmmūg 'ohnāg". Kaxīy.

³⁹ Hā kaxīy 'ūkuxa mām yūmmūg 'ohnāg. Hamūn. 'Iyait te:

⁴⁰ "Topa te tikmū'ūn pa te hāmyūmmūg 'ohnāg mīy,

tu tikmū'ūn putox ka'ok mīy, puyīy tikmū'ūn pa hāmyūmmūg 'ohnāg, puyīy tikmū'ūn hāmyūmmūg hok, puyīy tikmū'ūn hāpkummuk mīy kux hok, puyīy Topa tikmū'ūn kuxa kummuk xit hok."

Kaxīy.

⁴¹ 'Iyait te hām'āktux, tute' yūmmūg Yeyox 'ūmax xe'ēgnāg tu', hu Yeyox 'āktux.

⁴² Pa Yoneo xexka xohix xop kuxa mām Yeyox kopah, pa nōm te Paniye xop yīpkutuk, hu hām'āktux xaptop, puyīy Paniye xop xat hok, pu Yoneo xop yōg Topa pet hā mōxakux hok.

⁴³ Yā' xexka xop tep-tup punethok, pu tikmū'ūn nōm 'āktux max, pap-tup kutōgnāg, pu Topa nōm 'āktux max.

Yeyox yōg hām'āktux'ax te tikmū'ūn yōg hāpxopmā'ax kopit

⁴⁴ Ha ta xe hām'āktux Yeyox, hu:

—Tikmū'ūn 'ūm kuxa mām 'ūgkopah, yā' kuxa mām kama nōm kopah, nōm te nūgkutnāhā'.

⁴⁵ Tikmū'ūn 'ūm tek pēnāhā', yā nōm pēnāhā kamah, nōm te nūgkutnāhā'.

⁴⁶ 'Ūgnūn hām xexka tu', tuk mūn, yā hām xexka yōg tikmū'ūn yōg kuyānām putuk, yā' kuxa mām 'ūgkopa xop kuxa te hāpkoxtap kopa' pip 'ohnāg.

⁴⁷ Tikmū'ūn 'ūm te yōgnū hām'āktux 'āpak, pa' yīpkox 'ohnāg, kopxix yōg hāpxopmā'ax kopit putup'ah. Yā 'ūgnūn hām xexka tu', nūy tikmū'ūn kuxa kummuk xit, tu' kuxa max mō'tat, 'ūyānān tu', nūy yōg hāpkummuk mīy'ax hā yānān hok.

⁴⁸ Tikmū'ūn 'ūm tek putup nōg, xix yōg hām'āktux putup nōg, puxix Topa hām'āktux putup, hu: "Yā' kummuk nō'ōm. Nōm te Yeyox yōg hām'āktux 'āpak 'ohnāg. Kaxīy Topa te hām'āktux putup hāmyāxatamuk xohix xox putox 'Ihā'.

⁴⁹ Hamūn 'āte yāp-xehnāg hā hām'āktux 'ohnāg, pa yōgnū 'ātak te nūgkutnāhā', tu 'ā' hōm hām'āktux'ax, 'ūyīy tikmū'ūn pu nōm 'āktux.

⁵⁰ Ha 'āte' yūmmūg Topa yōg xat'ax te tikmū'ūn mōgāhā', puyīy hi xe'ēgnāg mōkuma' mōg, ha' kux 'ohnāg. Yōgnū 'ātak te 'ā' hōm hām'āktux'ax, 'ūyīy tikmū'ūn pu nōm 'āktux.

13

Yeyox te yāy yōg tik xop pata pix

¹ Hāmhūmnāg, yā 'āmnīy puxet 'Ihā' xip'ax 'āmuk xexka 'ūxuxet'ax Nōā'yēn 'Ihā Yeyox te' yūmmūg, hāpxip 'Ihā hām xexka nīm putup, nūy yāy 'ātak ha mōg. Tute mō'yāy xe'ēgnāg yāy yōg kuxa mām xop, tu mō'yāy xe'ēgnāg kux 'ohnāg.

² Ta' xit Yeyox yāy yōg tik te 12 xop mūtik. Hōmā Hāmgāyāgnāg te Yot 'Ixkanot mōgāhā', pu hāmp'e'paxex textīy gāy xōp mōgāp-tup Yeyox hah, puyīy' xūyγā'.

³ Ha Yeyox te' yūmmūg yāy yōg 'ātak te tu' popmāhā 'ūxohix xexkah, puyīy nōm xat. Yeyox te' yūmmug Topa tu' nūn, tu Topa ha' mōg putup putpu'.

⁴ Yeyox yūm mīmpe xit'ax tu', tu tak-nīhā' xip, tu topixxax xut 'ūyīmū nō'ōm, tu topixxax yāy nagā' ax paha', tu nō yāy kunāy hīy,

⁵ tu' pux kōnā'āg pa pix'ax kopah, tu yāy yōg tik xop pata pix kōnāmāhā', tu topixxax yāy nagā' ax hā nagāhā' nōm tek-nāy hīy hā,

⁶ tu' xupep Xīmām Pet yīkak, pa Pet te:

—Yāyā, 'āmhok. 'Ok 'ūkpaata pix putup? Kaxīy.

⁷ Ha Yeyox te:

—Hōnhā xate' yūmmūg'ah'āte hāpxopmāhā', pa hāpxip 'īhā' yūmmūg putup xate'. Kaxīy.

⁸ Ha Pet te:

—Xatek pata pix putup 'ohnāg. 'Āmhok!

Pa Yeyox te:

Paxpu 'āpata pix 'ohnāg, ha ta 'āmūn yā yōg'ah. Yā 'āxip'ah yōg tik xop kopah. Kaxīy.

⁹ Ha Ximām Pet te:

—Yāyā, 'āpu 'ūkpaata pix, xik yīm xik putux? Kaxīy.

¹⁰ Ha Yeyox te:

—Tikmū'ūn te tatzok, hu' xexka tup. 'A xe tatzok putup'ah, pa' pata pix putup 'ūxeheh. 'Āxop xohix kuxa tup, pa yāp-xet 'āmhok, yā' xutputux.

¹¹ Hamūn, Yeyox te' yūmmūg nōm te' gāy xop mōgāp-tup Yeyox hah, puyīy xūyā'. Hā kaxīy hām'āktux hu: "Āxop xohix kuxa tup, pa yāp-xet, 'āmhok, yā' xutputux". Kaxīy.

¹² Yeyox te' pata pix kux, tu topixax mō'tat putpu', tu ta mōg yāy yōg xip'ax tu' mūmpe tu' xit'ax tu', tu:

—'Ok 'āxop te' yūmmūg teptu 'āte 'āpata pix?

¹³ 'Āxop tek xānāhā, hu: "Notot", Kaxīy, xix: "Yāyā". Kaxīy. Hamūn, yāg mūn.

¹⁴ 'Āte 'āxop xat, tu 'āte 'āxop pu hāmyūmmūgāhā', tu 'āpata pix kamah. Yā 'ūkxexka', pa 'āpata pix, yīy ta 'āxop te' nōy pata pix, pu' max. Yā 'āte 'āxop hāg teheh. 'Āpu tikmū'ūn hā 'ātehet.

¹⁵ 'Āte hāpxopmā', xayīy 'āxop pēnā', nūy mīy kamah.

¹⁶ 'Āte xa hāpxe'e 'āktux nōm te' xat yā' xexka', pa kāmānat yāk-tōgnāg. Nōm te mō nōy kutnāhā' yā' xexka', pa nōm mōg yāk-tōgnāg. 'Ūkxexka', pa yā kāmānat putuk. Yā 'āte 'āpata pix, yā kāmānat putuk. 'Āte 'āxop hāg teheh. 'Āpu kāmānat putuk kamah, nūy tikmū'ūn hā 'ātehet.

¹⁷ 'Āxop te' yūmmūg nōm hāpxop xe'e nōmhā. 'Āxop te' mīy, nūy ta 'ākuxa hittup.

¹⁸ —'Āte 'āxop xohix xexka 'āktux 'ohnāg, tu tap-xet 'āktux. 'Āte yāy yōg yīmōgātux xop yūmmūg. Pa Topa yōg tappet te: "Tik xit 'ūgmūtik, tu 'ā tu' gāy". Kaxīy. Ta hōnhā' gāy.

¹⁹ 'Āte nōm 'āktux hōnhā. Hāpxip 'īhā 'āxop te nōm hāpxopmā'ax pēnāp-tup. 'Āte nōm 'āktux hōnhā, xayīy 'ākuxa mām putup, tu' yūmmūg putup 'ūg'āxet'ax 'ūgmūn yāg mūn. Kaxīy.

²⁰ 'Āte xa hāpxe'e 'āktux. 'Āte mō'pok tihik, ha ta xohix 'ūm te nōm putuppax yāg putuppax putuk. Ha nōm tek putuppax te Topap-tuppax kamah, yā Topa te mōgkutnāhā 'ūgmūn.

Yot te' gāy xop mōgāp-tup

²¹ Yeyox te hām'āktux kux, tu' kuxa hittup 'ohnāg tu hām'āktux, hu:

—'Āte xa hāpxe'e 'āktux, yā' xip 'ūp-xet 'āxop kopah, tu nōm te' gāy xop mōgāp-tup 'ūg hah, puyīy 'ūgxūyā'. Kaxīy.

²² Ha Yeyox yōg tik xop te yāy pēnāhā', tu' kuxa te' yēy. Putep 'āktux?

²³ Ha ta' xip tihik Yeyox yōg tik xop kopah. Yā Yeyox te mō nōm yāy xe'ēgnāg, ha' yūm Yeyox yīkak,

²⁴ ha Ximām Pet te nōm pu' yīm mahap, tu:

—'Āpu 'ūyīy kopit, putep xuktux. Kaxīy.

²⁵ Ha nōm mōg Yeyox yīkāgnāg, tu:

—Yāyā, 'ū'ūm nō'ōm? Kaxīy.

²⁶ Ha Yeyox te:

—'Āte pām mō'tat putup hep kopah, tu pām hōm putup nōm tik pu'. Hamūn nō'ōm. Kaxīy.

Tu pām paha', tu mō'tat hep kopah, tu Yot pu' hōm, yā Ximām 'Ixxanot kutok.

²⁷ Ha Yot te pām paha', tu hāpxip 'ohnāg 'īhā Hāmāyāgnāg te Yot hā mō'nāhā', ha Yot te Hāmāyāgnāg 'āpak. Ha Yeyox te:

—Xatep-tup, nūy hāpxopmā'. 'Āpu 'ūmīy mō'ka'ok. Kaxīy.

²⁸ Pa xohix te mūmpe xit'ax tu' mām, tu' yūmmūg 'ohnāg, putep xuktux Yeyox Yot pu'.

²⁹ Yā Yot te Yeyox yōg tik xop yōg tāyūmak tat'ax pēnāhā', ha yāg te hāmp'e'paxex Yeyox te Yot xat, pu mōg, nūy pām pop 'āmuk xexka pu', ha ta yāg te hāmp'e'paxex Yeyox te' xat, pu mōg, nūy tayūmak popmā 'ūhok xop pu'.

³⁰ Yot te pām paha', tu ta' mōg hāptopah. Yā 'āmīy.

'Ūxat'ax tup

³¹ Ha Yeyox te:

—Hōmā tikmū'ūn te' pēnāhā', 'ūmax xe'ēgnāg Tikmū'ūn Kutok. Tikmū'ūn tek yūmmūg, hu' yūmmūg Topa 'ūmax xe'ēgnāg.

³² Tikmū'ūn tek yūmmūg, hu' yūmmūg Topa 'ūmax xe'ēgnāg, yīy ta Topa te tikmū'ūn puk mūn mūg 'ūgmax xe'ēgnāg. Hāpxip kutōgnāg 'īhā Topa te nōm mīy putup.

³³ 'Ūkxape xop, hāpxip kutōgnāg hak xip kux'ax 'āxop kopah. 'Āxop tek xak'ax, pa 'āxop tek mōg'ax yūmmūg 'ohnāg. Yā hōmā 'āte Yoneo xop pu nōm 'āktux.

³⁴ 'Āte xa' hōm xat'ax tup, hu:

—'Āpu 'ānōy putuppax, 'āte 'āxop putuppax putuk.

³⁵ 'Āxop te' 'ānōy putuppax, puxix tikmū'ūn xohix yūmmūg 'āxop pip yōg tik xop kopah. Kaxīy.

Yeyox te Pet mūtik hām'āktux

³⁶ Ha Ximām Pet te:

—Yāyā, piyā 'āmog? Kaxīy.

Ha Yeyox te

—'Ūkpe 'āmog yūmmūg 'ohnāg, pa hāpxip 'īhāg pe' 'āmog putup. Kaxīy.

³⁷ Ha Pet te

—Texiý 'äpek mög yümmüg 'ohnäg hõnhâ?
'Äte xa tuk xok putup. Kaxiý.

³⁸ Ha Yeyox te:

—'Ok xate 'ä tu 'äxok putup? 'Ämhok. 'Äte xa häpxe'e 'äktux, xate häm'äktux tikoyuk putup, hu: "'Äkxip'ah 'ügmün Yeyox yög tik xop kopah". Kaxiý. Hak-nây tu xokakkak pit xatap-tup. Kaxiý.

14

Yeyox te tikmü'ün mögähä yây tak hah

¹ Ta Yeyox te:

'Äkuxa nög hok. 'Äpu 'äkuxa mähäm Topa kopah. 'Äpu 'äkuxa mähäm 'ügkopah kamah.

² Yögnü 'atak pet kopa' pip pip'ax punethok. 'Ügmög putup, nüy 'äpip'ax max mîy. Paxpu te kaxiý 'ohnäg, kopxix xa' xuktux 'ohnäg nüühü'.

³ 'Ügmög putup, tu' max mîy putup 'äpip'ax, tu putpuk nün putup, tu 'äxop mögäp-tup, xayiy pip 'äpip'ax tu 'ügmütik.

⁴ 'Äxop te' yümmüg putahat nō' mög 'ükxip'ax tu'. Kaxiý.

⁵ Ha Tömē te:

—Yâyä, 'ügmü'äte' yümmüg'ah. Piyä' yüm 'äxip'ax? Texiý 'ügmü'äte' yümmüg putahat? Kaxiý.

⁶ Ha Yeyox te:

'Äte putat putuk, tu putat mög yögnü 'atak hah. Hä kaxiý 'äte tikmü'ün mögähä yây tak hah. 'Ap xip'ah putat nōy. 'Äte tikmü'ün pu häpxe'e yümmügähä', tu tikmü'ün hīnnähä', pu iyiy hi max, ha' kux 'ohnäg.

⁷ 'Äxop te' yümmüg, tu yögnü 'atak yümmüg putup kamah. Hamün, 'äxop te' yümmüg yögnü 'atak. Kaxiý.

⁸ Ha Pinip te:

—Yâyä, 'äpu 'ügmü'ä 'ög 'atak müg. 'Ügmü'äte xa tuk kax putup'ah häpxop nōy. Kaxiý.

⁹ Ha Yeyox te:

—'Ämniy xohix häg xip 'äxop mütik. Pinip, 'ok xatek yümmüg 'ohnäg? Tikmü'ün 'üm tek pēnähä', hu yög 'atak pēnähä kamah. Teptu xate' xuktux, hu: "'Äpu 'ügmü'ä 'ög 'atak müg'?" Kaxiý.

¹⁰ Pinip, 'ok 'äkuxa yüm 'ohnäg, 'ükxip yögnü 'atak mütik, ha yögnü 'atak xip 'ügmütik, tu yä kuxap-xet. 'Äte xa häm'äktux, 'a yög'ah häm'äktux. Pa yögnü 'atak xip 'ügmütik, tu häpxopmā max xe'ëgnäg.

¹¹ 'Äpu 'äkuxa mām nū häm'äktux kopah. Yä 'ükxip yög 'atak mütik, ha yög 'atak xip 'ügmütik, tu yä kuxap-xet. Pa yög häm'äktux kopa 'äkuxa mām 'ohnäg, pa 'äpu 'äkuxa mām yög häpxopmā'ax kopah.

¹² 'Äte xa häpxe'e 'äktux, tikmü'ün 'üm kuxa mām 'ügkopah, yä nöm te häpxopmā

ka'ok xe'ëgnäg mîy putup, 'ügmün putuk. Yä 'äte häpxopmā ka'ok xe'ëgnäg mîy, pa nöm te häpxopmā ka'ok xe'ëgnäg punethok mîy putup, yögnü 'atak hak mög putup hah.

¹³ 'Äxop te Topa tu' xak häpxop 'üm, tu 'äkuxa mām 'ügkopah, kopxix xa' popmāp-tup nöm häpxop xohix. Topa te 'ä' popmāp-tup, ha 'äte xa nöm popmāp-tup. Hä kaxiý 'äxop te Topa max xe'ëgnäg yümmüg putup.

¹⁴ 'Äxop te 'ä tu' xak häpxop 'üm, kopxix nöm mîy putup. Kaxiý.

Topa te Topa Koxuk hōm putup

¹⁵ Tu Yeyox te xe:

—'Äxop tek putuppax, nüy ta mîy putup 'äte nöm xat.

¹⁶ 'Äte Topa tu' xak, ha tute xa Topa Koxuk hōm putup nöm te 'äxop hä' tep-tup, tute xa nöm hōm putup. Yäg mün putuk, yä Topa Koxuk, yä häpxe'e yög, ha tute 'äxop mütik nox xip'ax mökuma'mög hämyāxatamuk xohix kux 'ohnäg hä.

¹⁷ Ha ta' kuxa mām 'ohnäg xop te Topa Koxuk pa yümmüg 'ohnäg. Topa Koxuk pēnā 'ohnäg tu'. Pa 'äxop te Topa Koxuk yümmüg, yä' xip 'äxop mütik hah. Kaxiý.

¹⁸ Tu xe:

—'Äte 'äxop nīm tämnäg putup'ah, yä 'äxop te' hok pip xop putuk putup'ah. 'Äte 'äxop nīm putup, tuk mög putup, pak nün putup putpuk 'ä hah.

¹⁹ Häpxip 'hā' kuxa mām 'ohnäg xop tek pēnāp-tup'ah, pa 'äxop tek pēnāp-tup, tu 'äxop pip putup, 'ükxip putup hah.

²⁰ Nöm 'ämniy 'hā 'äxop te' yümmüg putup 'ükxip yögnü 'atak mütik, ha 'äxop pip 'ügmütik, yä kuxap-xet, hak xip 'äxop mütik.

²¹ —Tikmü'ün 'üm te yögnü xat'ax pop, tu nöm mîy, yä tutek putuppax, ha yögnü 'atak te nöm putuppax putup, nöm tek putuppax, ha 'äte nöm putuppax putup kamah, tu yây müg putup 'öm pu'.

²² Yot xip, yä 'a' Yot 'Ixkanot'ah, pa' nōy, yä Yot te:

—Yâyä, texiý xate 'ügmü'ä yây müg, pa' kuxa mām 'ohnäg xop pu yây müg 'ohnäg? Kaxiý.

²³ Ha Yeyox te:

—Tikmü'ün 'üm tek putuppax, yä nöm te yögnü häm'äktux pap-tup, tu' mîy putup, ha yögnü 'atak te nöm putuppax, tu' nün putup, tu nüktu nöm ha' xupep, tu' xip putup nümütik.

²⁴ Tikmü'ün 'üm tek putup nög, puxix yögnü häm'äktux 'äpak 'ohnäg, yä' yīpkox 'ohnäg. 'Äxop te häm'äktux 'äpak. 'A' yög'ah häm'äktux, pa yög 'atak yög. Tute nügkutnähä 'ügmün.

²⁵ —'Äte xa nöm häpxop 'äktux nōmhä, tuk xip 'äxop mütik nōmhä.

²⁶ Yōgnū 'ātak te Topa Koxuk nū'kutnāp-tup, ha tute 'āxop hā' tep-tup, yā 'āte 'āxop hāg teheh putuk, 'īhā 'ākuxa mām 'ūgkopah. Topa Koxuk tek mūn pupi' xip putup. Tute xa hāp̄xop xohix yūmmūgāp-tup, tu 'āxop pu xutīgāh yōgnū hām'āktux xohix:

²⁷ —'Āte 'ākuxa māmāhā'. 'Ūgkuxa yūm ka'ok, ha 'āte 'ākuxa māmāhā', 'ūkputuk. 'Āte hām xexka yōg kummuk xop kuxa māmāhā 'ohnāg. 'Āpu 'ūyīpkutuk hok. 'Āpu 'ākuxa nōg hok.

²⁸ 'Āxop te' xupak, yā 'āte xa' xuktux hu: "Ūgmōg putup, pa 'āhak nūn putup putpu'. 'Āxop tek putuppax, nūy ta 'ākuxa hittup, yāg mōg putup yāy yōg 'ātak hah. 'Ūkxexka, pa nōm xexka nām.

²⁹ Hōnhā 'āte xa hām'āktux hāptup yōg hāp̄xopmā'ax. Hāp̄xip 'īhā 'āxop te nōm pēnāp-tup, tu 'ākuxa mām putup 'ūgkopah.

³⁰ 'Āte xe hām'āktux kutīgnāg, yā Topa hā puknōg xop yōg xat'ax nūn hōnhā. Nōm tek xat 'ohnāg.

³¹ pa' max, pu tikmū'ūn xohix yūmmūg 'āte yōgnū 'ātak putuppax, nūy mīy tute nōm xohix xat. 'Āpu yūmū mōg. Kaxīy.

15

Yeyox te tox kup kūnīy putuk

¹ Ta Yeyox te:

—'Āte xa' yūmmūgāp-tup hāp̄xop. 'Āte tox kup kūnīy xe'e putuk, yā mīnta 'op yōg, ha ta yōgnū 'ātak te tox pēnā'ax putuk.

² 'Ūgkopa kuxa mām xop te tox māg max putuk xix tox yīpkup max. 'Ūgkopa kuxa mām xop te hāp̄xopmā max, ha nōm te mīnta ta pōpmā putuk. Ha tak kopa kuxa mām hok xop te tox māg kummuk putuk xix tox yīpkup kummuk. 'Ūgkopa kuxa mām hok xop te hāp̄xopmā max'ah, tu mīnta ta popmā 'ohnāg putuk. 'Ūkuxa mām xop kuxa mām 'ūgkopah. Hā kaxīy tox māg te tox kup xahix tu' pip xix tox yīpkup te'. Yōgnū 'ātak tep-tup'ah kuxa mām hok xop. Hā kaxīy tox pēnā'ax te mīm māg kummuk mep, tu' putyōn xix yīpkup kummuk. 'Ūkuxa mām hok xop te' kuxa mām xop nīm, ha' max nōmhā. Hā kaxīy tox māg kummuk pip'ah xix tox yīpkup kummuk pip'ah, ha ta tox yīpkup max te mīnta ta punethok popmāhā nōmhā.

³ Hōmā 'ākuxa mām yōgnū hām'āktux kopah, ha yōgnū 'ātak te 'ākuxa kummuk xit.

⁴ 'Āpu 'ā tu pip ka'ok, ha 'āte 'āxop tuk xip ka'ok putup. 'Āxop 'ā tu 'āpip ka'ok 'ohnāg, nūy ta hāp̄xopmā max 'ohnāg, tu 'āxop te' mīy 'ohnāg putup Topa te nōm putup. Hā kaxīy tox māg te tox kup xahix tu' pip'ah xix tox yīpkup, puxix mīnta ta popmā hok.

⁵ —'Āte tox kup xahix putuk, ha 'āxop te tox māg putuk xix tox yīpkup. 'Āxop te 'ā tu 'āpip ka'ok, nūy 'ākuxa mām ka'ok 'ūgkopah, tu 'āxop tuk xip ka'ok, nūy hāp̄xopmā max xohix 'āxop mūtik, ha ta 'āxop hāp̄xopmā max punethok, nūy mīy Topa te nōm putup. Pa 'āxop te 'ā tu 'āpip ka'ok'ah, nūy ta hāp̄xopmā max hok, tu' mīy 'ohnāg Topa te nōm putup. Hā kaxīy tox kup xahix xix tox māg xix tox yīpkup.

⁶ Tox pēnā'ax te' putyōn tox māg kummuk xohix xix tox yīpkup kummuk xohix, ha' nak, ha tikmū'ūn te nōm yāy tu nū'xok, tu kuxap kopa mō'pok, ha' puk. Hā kaxīy putuk 'ūkuxa mām hok xop, yā 'ātu' pip ka'ok 'ohnāg.

⁷ 'Āxop nox pip 'ā tu', ha yōgnū hām'āktux te' nox xip 'āxop tu', 'īhā 'ā tu' xak xate nōm putup, ha 'āte xa' popmāp-tup 'ūxohix.

⁸ 'Āxop te hāp̄xopmā max punethok, yīy tikmū'ūn te' pēnāp-tup, yā' max xe'ēgnāg Topah. Hā kaxīy kama tikmū'ūn te' pēnāp-tup 'āxop mōg Yeyox mūtik, yā mīnta max punethok putuk.

⁹ 'Āte mō 'āxop yāy xe'ēgnāg, yā yōgnū 'ātak te mōg mūn yāy xe'ēgnāg putuk. 'Āpu nox pi 'ūgmūtik, 'ūyīy mō 'āxop yāy xe'ēgnāg.

¹⁰ 'Āxop te' mīy 'āte nōm xat, nūy ta nox 'āpip putup 'ūgmūtik, ha 'āte mō 'āxop yāy xe'ēgnāg putup. Yā 'āte' mīy yōg 'ātak te nōm xat. Hā kaxīy putuk 'āxop xix mūn.

¹¹ —'Āte xa nōm hāp̄xop 'āktux, nūy 'ākuxa hittupmā', ha 'ākuxa hittup xexka'.

¹² 'Āte 'āxop xat, hu: 'Āpu 'ānōy putuppax 'āte 'āxop putuppax putuk.

¹³ Tikmū'ūn te yāy xape pupi' xok, puxix yāy xapep-tuppax xexkanām. Yā tikmū'ūn xohix te yāy xape pupi' xakix 'ohnāg.

¹⁴ 'Āxop te yōgnū xat'ax mīy, 'īhā 'ūkxape 'āxop.

¹⁵ 'Āte 'āxānā kux, hu: "Yōgnū kāmānat xop". Kaxīy. Yā kāmānat xop te' yūmmūg 'ohnāg 'ūxat'ax xop yōg hāp̄xopmā'ax. Pa 'āte 'āxop xānāhā, hu: "'Ūkxape xop". Kaxīy. 'Āte 'āxop pu' xuktux yōg 'ātak te nōm 'āktux.

¹⁶ 'Āxop tek mūn yāy kutnā 'ohnāg, pa 'āte 'āxop mūn yīmōgātux, tu mō 'āxop pok, xayīy hāp̄xopmā max punethok, yā mīnta ta punethok putuk. 'Āxop te hāp̄xopmā max putup, ha tikmū'ūn te nōm pēnāp-tup, hu' kuxa mām ka'ok putup, tu 'ā tu nox pip ka'ok putup. Ha 'āxop te yōg 'ātak tu' xak hāp̄xop 'ūm, tu 'ākuxa mām 'ūgkopah, ha tute xa' popmāp-tup hāp̄xop xohix.

¹⁷ 'Āte 'āxop xat, 'āpu 'ānōy putuppax. Kaxīy.

Tikmū'ūn te' kute'ex kummuk putup Yeyox yōg xop

¹⁸ Tu Yeyox te xe:

—'Ūkuxa mām hok xop te 'āxop putup nōg. 'Āpu hāmyūmmūg, nōm tek putup nōg hāmāxap.

¹⁹ Paxpu 'āxop kuxa mām hok xop kopa pip, nūy nūmūtik mōg, puxix 'āxop putuppax, yā yāy yōg xop putuppax. Pa 'āxop pip'ah nōm xop kopah. Pa 'āte 'āxop yāykutnāhā kuxa mām hok xop kopah. 'Āmūn 'ap kuxa mām hok xop'ah. Hā kaxīy nōm te 'āxop putup nōg.

²⁰ Hōmā 'āte xa hām'āktux. 'Āpu hām'āktux'ax xaxok hok. 'Ūxat'ax xop yā' xexka, pa kāmānat xop yāg-tōgnāg. Tikmū'ūn tek kute'ex kummuk, puxix 'āxop kute'ex kummuk putup kamah. Tikmū'ūn te yōgnū hām'āktux 'āpak, tu' yīpkox pip, puxix 'ōg hām'āktux 'āpak putup kamah, tu' yīpkox pip.

²¹ Tikmū'ūn te 'āxop kute'ex kummuk te kaxīy, 'āxop yōgnū hah. Yā nōm te' yūmmūg 'ohnāg Topah. Tute nūgkutnāhā'.

²² Paxpuk nūn 'ohnāg, puxix tikmū'ūn yāy hāpkummuk mīy'ax yūmmūg 'ohnāg. Pak nūn, tu tikmū'ūn pu hāmyūmmūgāhā'. Nōmhā tikmū'ūn te' yūmmūg yāy yōg hāpkummuk mīy'ax.

²³ Tikmū'ūn tek putup nōg, xix yōg 'ātak putup nōg kamah.

²⁴ 'Āte hāpxopmā ka'ok xe'ēgnāg tikmū'ūn kopah, yīy tikmū'ūn te' pēnāhā', tu yāy yōg hāpkummuk mīy'ax yūmmūg, hu' yāyhāhup. Tik nōy te hāpxopmā ka'ok xe'ēgnāg 'ohnāg, 'ak putuk'ah. Pa tikmū'ūn te' pēnāhā 'āte hāpxopmā max, tuk putupnōg xix yōg 'ātak putup nōg kamah.

²⁵ Hōmā 'ūhittap Topa yōg tappet te: "Tikmū'ūn tek putup nōg, pa 'āte hāpkummuk mīy'ohnāg". Kaxīy. Hamūn, hōnhā tikmū'ūn te kaxīy putuk, yā Topa yōg tappet te' koit 'ohnāg.

²⁶ —Ta Topa Koxuk te xa hā' tep-tup, yā' xe'e Topa Koxuk. Hōnhā' xip yōgnū 'ātak mūtik, ha 'āte xa nōm nū'kutnāp-tup, ha tutek mūn 'āktux putup.

²⁷ Ha 'āxop tek mūn 'āktux putup kamah, yā 'āxop pip 'ūgmūtik hāmyāxatamuk xohix hā nūnte hām xexka tu'.

16

¹ Ta Yeyox te xe:

—'Āte xa' xuktux hāpxop xohix, xayīy putat max xak hok.

² Tikmū'ūn te 'āxop xat putup, xa mōxa hok Yoneo yōg Topa pet hā. Hāpxip 'Ihā tikmū'ūn te 'āxop kix putup, ha 'āxop xakix putup, ha tikmū'ūn te hāmpē'paxex putup Topa pu' hām.

³ Yā tikmū'ūn te' mīy putup yōgnū 'ātak kopa' kuxa mām 'ohnāg tu', xik mūn kopa' kuxa mām 'ohnāg tu'.

⁴ Pa 'āte xa hām'āktux tikmū'ūn te 'āxop kummugāp-tup. Hāpxip ha ta tikmū'ūn te 'āxop kummugāp-tup, ha 'āxop te' xuktux putup, hu: "Yā hamūn Yeyox te nōm 'āktux hōmā. Yā hōnhā te kaxīy". Kaxīy.

Topa Koxuk te hāpxopmāp-tup

Ta Yeyox te xe:

—Hōmā 'āte xa nōm 'āktux 'ohnāg, yāk xip 'āxop kopah.

⁵ Pa hāpxip 'Ihāg mōg putup, yā nōm hak mōg putup, nōm te nūgkutnāhā', pa 'āxop te' yīkopit 'ohnāg, hu: "Tep hah?" Kaxīy.

⁶ Pa hōnhā 'āte xa nōm 'āktux, ha 'ākuxa hittup 'ohnāg.

⁷ Pa 'āte xa hāpxe'e 'āktux, yā' max noxk xip nūnteh, pa' max xe'ēgnāg 'ūgmōg. Pax-puk mōg 'ohnāg, puxix Topa Koxuk nūn putup'ah, nūy 'āxop hā tu tehet. Pak mōg, kopxix nū nōm kutnāp-tup 'āxop hah.

⁸ Hā ta' nūn putup Topa Koxuk, tu nūktu tikmū'ūn pu hām yūmmūgā', hu: "Tikmū'ūn te hāpkummuk mīy, tu tikmū'ūn te hām yok yūmmūg 'ohnāg, ha Topa te tikmū'ūn yōg hāpkummuk mīy'ah yānān putup, tu nōm xūyāp-tup." Kaxīy.

⁹ Topa Koxuk te hām'āktux putup, hu: "Tikmū'ūn te hāpkummuk mīy. Yā Yeyox kopa' kuxa mām 'ohnāg." Kaxīy.

¹⁰ Yāy yōg 'ātak hak mōg putup, ha ta Topa Koxuk nūn putup, tu nūktu tikmū'ūn pu hāmyok yūmmūgāp-tup, tu' xuktux putup, hu: "Yā' yok Yeyox". Kaxīy.

¹¹ Topa Koxuk te hām'āktux putup, Topa te tikmū'ūn yōg hāpkummuk mīy'ax hā yānān putup, tu nōm xūyāp-tup. Hamūn, Topa te' kuxa mām hok xop yōg xat'ax yānān, pu tu' kux, tu nōm xūyāhā', pu tu' kux.

¹² —Ūpip yōgnū hām'āktux nōy punethok. 'Āxop pu nōm yūmmūgāhā', pu' max, pa hōnhā 'āxop te hāmyūmmūgā'ax xohix hā tot 'ohnāg.

¹³ Pa hāpxip 'Ihā' nūn putup Topa Koxuk, tu xa hāmyok yūmmūgāp-tup. Tute 'āxop mōgāp-tup putat max hā, yā xa' yūmmūgāp-tup hāmyok xohix xexkah. Tute yāy yōg hām'āktux 'āktux putup'ah, pa hām 'āpak 'āktux putup, tu xa nōm 'āktux putup, tu hāptup yōg hāpxopmā'ax 'āktux putup.

¹⁴ 'Āte tu' popmāp-tup hām'āktux, ha tute xa nōm 'āktux putup. Hā kaxīy xate' yūmmūg putup 'ūgmax xe'ēgnāg.

¹⁵ Yōgnū 'ātak yōg hāpxopmā'ax xohix xexka yā yōgnū kamah. Hā kaxīy 'āte xa hām'āktux Topa Koxuk te' pop putup yōg hāpxop, tu xa nōm yūmmūgāp-tup. Kaxīy.

'Ūkuxa hittup 'ohnāg, tu' kuxa hittup

¹⁶ Ta Yeyox te xe:

—Hāpxip kutōgnāg yīy ta 'āxop tek pēnāp-tup'ah, tu xe hāpxip kutōgnāg yīy ta xek pēnāp-tup. Kaxīy.

17 Ha Yeyox yōg tik yāg xop te:

—Teptu hām'āktux? 'Ūxuktux, hu: “Hāpxip kutōgnāg yīy ta 'āxop tek pēnāp-tup'ah, tu xe hāpxip kutōgnāg yīy ta xek pēnāp-tup”. Kaxīy. Texīy hām'āktux? 'Ūxuktux, hu: “Hamūn, yōgnū 'ātak hak mōg putup”. Kaxīy.

18 Teptu 'Ūxuktux, hu: “Hāpxip kutōgnāg”? Kaxīy. 'Īntu', putep mūn 'āktux? Yūmū'āte' yūmmūg'ah. Kaxīy.

19 Nōm tep-tup, nūy Yeyox yīkopit, ha Yeyox te' yūmmūg, tu:

—Hāpxip kutōgnāg yīy ta 'āxop tek pēnāp-tup'ah, tu xe hāpxip kutōgnāg yīy ta xek pēnāp-tup. 'Ok kaxīy 'āxop te yāy yīkopit?

20 'Āte xa hāpxe'e 'āktux. 'Āte 'āxop mūtik tip-tup'ah, ha 'āxop potap-tup, tu 'ākuxa hit-tup 'ohnāg putup, pa' kuxa mām hok xop kuxa hittup'ax. 'Ākuxa hittup 'ohnāg putup, pa hāpxip 'Īhā' ākuxa hittup putup.

21 'Āte xa' yūmmūgāp-tup hāpxop. Yā 'ūn tek-tok put putuk, yāk-tok put putup, ha' xūy. Pak-tok xip, ha ta' xūy xaxok, tu' hittup, 'ūk-tok pit xip hah, ya' xip 'ūk-tok pit nōy hām xexka tu'.

22 Yā 'āxop putuk. Hōnhā 'ākuxa hittup 'ohnāg, pa hāpxip 'Īhā' āxop hak nūn putup putuk, ha 'ākuxa hittup putup, ha tikmū'ūn te 'ākuxa hittup'ax nōā' yūmmūg putup'ah.

23—Hāpxip 'Īhā' āxop tek mūn tu' xak putup hāpxop 'ohnāg, pa 'āte xa' xuktux 'āxop te yōgnū 'ātak mūn tu' xak putup hāpxop, tu 'ākuxa mām 'ūgkopah, ha tute xa' popmāp-tup hāpxop xohix.

24 Hōmā tu yā hōnhā 'āxop te Topa tu' xak 'ohnāg hāpxop, tu 'ākuxa mām 'ūgkopah. 'Āpu ta tu' xax, xayīy 'ākuxa hittup xexkanām.

Yeyox te' kuxa mām hok xop pop

25 'Āte xa hāmyūmmūgāhā, tu' xuktux tikmū'ūn te tox māg putuk xix kahnēn putuk. Hōnhā 'āte hām'āktux hā kaxīy. Pa hāpxip 'Īhā kaxīy'ah, pa xa yāy 'ātak yūmmūgāp-tup mō'ka'ok.

26 'Āmnīy xupep 'Īhā yōgnū 'ātak tu' xak putup hāpxop 'āxop te', tu 'ākuxa mām 'ūgkopah, ha 'āte xa hām'āktux'ah 'āte yāy yōg 'ātak tu' xak, pu xa' hōm hāpxop.

27 Hamūn, yōgnū 'ātak te mō 'āxop yāy xe'ēgnāg, 'āxop tek putuppax hah, xix 'ākuxa mām hah. Yā 'ākuxa mām, tu' yūmmūg 'āte Topa tuk nūn.

28 Hamūn, 'āte Topa tuk nūn, tu nūktuk xupep nūnte hām xexka tu', pa hōmāg mōg putup, yā hām xexka nīm putup, nūy yāy yōg 'ātak ha mōg putpu'. Kaxīy.

29 Ha Yeyox yōg tik xop te:

—Nōmhā xate hām'āktux mō'ka'ok, 'ap xate hām'āktux nōy hā yūmmūgā 'ohnāg.

30 'Ūgmū'āte' yūmmūg xate' yūmmūg hāpxop xohix xexka'. 'A xatep-tup'ah tikmū'ūn te xa hāmyūmmūgāhā'. Yā xate'

yūmmūg tikmū'ūn yōg hāmpē'paxex'ax xohix xexkah. Nōmhāg mū'āte' yūmmūg Topa tu 'ānūn. Kaxīy.

31 Ha Yeyox te:

—'Ok 'ākuxa mām hōnhā.

32 Hāpxip kutōgnāg 'ihā 'āxop te hāpxumā'ax yāy pet tu', kopxix puxet hā xip putup. Pa 'a' 'ūkpuxet xip'ah, pa yāy yōg 'ātak xip putup 'ūgmūtik.

33 'Āte xa nōm 'āktux, xayīy 'ākuxa mām, yā 'ākuxa mām ka'ok 'ūgkopah. 'Ūkuxa mām hok xop te 'āxūyāp-tup, pa 'ākuxa nōg hok, yā 'āte' kuxa mām hok xop pop, yā 'āte' xut. Kaxīy.

17

Yeyox te Topa pu hām'āktux

1 Ta hām'āktux kux Yeyox, tu pepi' pēnāhā pexkox tu', tu Topa pu hām'āktux, hu:

—Tak, 'āmnīy nō'ōm xupep xate nōm 'āktux. 'Āpu 'ūgxexka xe'ēgnāg mīy, puyīy tikmū'ūn pēnā 'ūgmax xe'ēgnāg. Yā tikmū'ūn te' yūmmūg putup kama 'āxexka xe'ēgnāg xix 'āmax xe'ēgnāg.

2 Xatek mūn mīy 'ūkxexka', yā tikmū'ūn xohix yōg xexka', tu tikmū'ūn xohix hīnnāhā', hā hi xe'ēgnāg mōkuma'mōg, ha' kux 'ohnāg. Xate 'ā' popmāhā 'ūxohix, ha' kuxa mām 'ūgkopah. Yā 'āte nōm hīnnāhā', ha' kux 'ohnāg.

3 Texīy tikmū'ūn hi xe'ēgnāg mōkuma'mōg, ha' kux 'ohnāg? Yā tikmū'ūn te 'āyūmmūg, yā Topa yūmmūg. 'Ap xip'ah Topa xe'e nōy. Texīy tikmū'ūn hi xe'ēgnāg mōkuma'mōg, ha' kux 'ohnāg? Yā tikmū'ūn tek mūn yūmmūg. Xate nūgkutnāhā'.

4 'Āte tikmū'ūn pu 'āmax xe'ēgnāg yūmmūgāhā'. 'Āte hāpxopmā kux xate 'ā nōm xax.

5 Tak, 'ūkxip putup nōnteh 'āmūtik. 'Āpu 'ā' hōm hāpxop max xe'ēgnāg nōnteh, yā 'ūkxexka mīy. Hōmā 'ūhittap 'a hām xexka xip'ah, hak max xe'ēgnāg xik xexka'. 'Āpu 'ām popmā 'ūxeheh nō'ōm.

6—Xate tikmū'ūn yīmōgātux hām xexka yōg tikmū'ūn kopah, tu 'ā tikmū'ūn popmāhā', pu 'ūgkopa kuxa mām, ha 'āte tu 'āyūmmūgāhā', yā yōgnū tikmū'ūn, ha xate 'ā' popmāhā nō'ōm, ha nōm te 'ōg hām'āktux 'āpak, tu' yīpkox pīp,

7 tu nōm te' yūmmūg xate 'ā' popmāhā hām'ākux xohix, tuk ka'ogā punethok.

8 Xate 'ā' popmāhā hām'āktux, ha 'āte tikmū'ūn pu nōm 'āktux, tu' yūmmūg xe'e', 'ātuk nūn, tu' kuxa mām xate nūgkutnāhā'.

9—'Āte yāy yōg kuxa mām xop 'āktux. 'A 'āte puknōg xop 'āktux'ah. Pa 'āte yāy yōg xop 'āktux xate 'ā nōm popmāhā', yā 'ōg kuxa mām ka'ok xop kamah.

¹⁰ Ūxohix xexka yōgnū tikmū'ūn xix 'ōgnū kamah, ha tikmū'ūn xohix xexka 'ōgnū xix yōgnū kamah, ha tikmū'ūn te' pēnāhā', tu' yūmmūg'āte hāpxopmā xe'ēgnāg.

¹¹ Hāpxip kutōgnāg ṭhā 'ā hak mōg putup, tu 'ap ūkxip putup'ah hām xexka tu'. Pa yōgnū xop te' kuxa mām hok xop mūtik yāy kotūmāp-tup. 'Āpu yōg xop hā 'ātehet. 'Āpu nōm pēnā max, 'āka'ok hah. Yā 'āka'ok, ha xatek ka'ogāhā hā kaxīy. 'Āpu nōm pēnā max, pu' xohix tu' kuxap-xet, yā yūmmūg putuk.

¹² Ūkxip yōg xop mūtik, tu nōm hāg teheh, tu' pēnā max. Xatek ka'ogāhā', hā kaxīy 'āte nōm hāk teheh, tu nōm xaxok 'ohnāg, yā' kuxa mām kux putup'ah, pa yā tik puxet xaxok. Yā hōmā 'ūhittap Topa yōg tappet te: "Ūxaxogāp-tup yāp-xet". Kaxīy. Hā kaxīy 'āte' xaxok tik puxet.

¹³ Hōnhā 'ā hak mōg putup. Tak, 'āte 'āmūtik hām'āktux hōnhā, puyīy' kuxa mām xop kuxa hittup xexka' ūgkuxa hittup putuk.

¹⁴ 'Āte yāy yōg xop pu 'ōg hām'āktux hōm, ha' kuxa mām hok xop te' kuxa mām xop putup nōg. 'A' kuxa mām hok xop'ah nō'ōm, yāg mūn putuk. 'A' kuxa mām hok xop yōg'ah 'ūgmūn.

¹⁵ 'A 'āte xa tuk kax'ah, xayīy yāy yōg xop mōy 'ūkuxa mām hok xop kopah. 'Āmhok, 'ūmōy hok. Pa 'āte xa tuk kax, xayīy nōm pēnā max, puyīy Hāmgāyāgnāg nōm pop hok.

¹⁶ Ūgmūn 'a' kuxa mām hok xop yōg'ah. Hā kaxīy nōm xop 'a' kuxa mām hok xop yōg'ah kamah.

¹⁷ 'Āte hāpxe'e 'āktux, ha tikmū'ūn te' xupak, tu' yīpkox pīp, tu' mīy, tu' āputuk. 'Ātep-tup nō'ōm.

¹⁸ 'Āte yāy yōg xop mō'pok hāpxexka xohix tu. Xate nūgkutnāhā hām xexka tu', yā yāy putuk.

¹⁹ 'Āte xa yāy mūn hōm, nūy mīy xate nōm putup, puyīy nōm xa yāy mūn popmā', nūy mīy xate nōm putup.

²⁰ —'Āte yāy yōg xop 'āktux 'āmūtik. Nōm te hām'āpak max'ax 'āktux putup, ha ta' nōy xop kuxa mām putup 'ūgkopah, ha 'āte nōy xop 'āktux 'āmūtik kamah.

²¹ Tak, 'āte xa tuk kax, puyīy nōm xop xohix tu kuxap-xet, nūy yāy putuppax yā yūmmūg putuk. 'Āxip 'ūgmūtik, hak xip 'āmūtik. 'Ātep-tup, puyīy nōm xop tu kuxap-xet, nūy yāy putuppax, puyīy hām xexka yōg tikmū'ūn yūmmūg xate nūgkutnāhā'.

²² Xatek mīy 'ūkxexka', tuk max xe'ēgnāg mīy. Hā kaxīy 'āte yāy yōg xop max xe'ēgnāg mīy, puyīy tu kuxap-xet, nūy yāy putuppax yūmmūg putuk.

²³ Ūkxip nūmūtik, ha 'āxip 'ūgmūtik, puyīy nōm xop tu kuxap-xehnāg, puyīy hām xexka

yōg tikmū'ūn yūmmūg xate nūgkutnāhā puyīy hām xexka yōg tikmū'ūn yūmmūg xate mōg mūn yāy xe'ēgnāg.

²⁴ Tak, xate 'ā nōm tikmū'ūn popmāhā', ha 'ātep-tup, puyīy nōm nox pī' 'āmūtik 'ūkxip'ax tu', puyīy' pēnā 'ūkxexkah, tuk max xe'ēgnāg. Yā xatek mīy 'ūkxexkah, tuk max xe'ēgnāg mīy. Hamūn, hōmā 'ūhittap hām xexka 'ap xip'ah, ha xate mōg mūn yāy xe'ēgnāg.

²⁵ Tak, xate hāpxopmā yok. 'Ūkuxa mām hok xop te' āyūmmūg 'ohnāg, ha ta' 'āte 'āyūmmūg, ha yāy yōg xop te' yūmmūg xate nūgkutnāhā'.

²⁶ 'Āte nōm pu 'āmūn yūmmūgāhā', tu xe nōm xop pu xe 'āmūn yūmmūgāp-tup punethok, puyīy' nōy putuppax xatek putuppax putuk. 'Āte xe tu 'āmūn yūmmūgāp-tup punethok, nūy noxk xip nūmūtik. Kaxīy.

18

Ūgāy xop te Yeyox mūg

¹ Yeyox te Topa pu hām'āktux kux, tu ta' mōg yāy yōg tik te 12 xop mūtik, tu mōktu kōnāg kox Xet xak, ha ta' xip mīm mātiknāg max, ha Yeyox te nō' mōxakux yāy yōg tik xop mūtik.

² Pa Yot te mīm mūtiknāg yūmmūg. Tute' gāy xop mōgāp-tup Yeyox hah, puyīy Yeyox xūygā'. Yā mīm mūtiknāg yūmmūg. Yā Yeyox xix yāy yōg tik xop te yāy tu nū'nā punethok 'ōnteh.

³ Ha ta' nūn Yot xonat xop mūtik xix Topa pet xexka yōg xonat xop mūtik. Yā 'āmānex xexka xop te nū'pok Topa pet xexka yōg xonat xop xix Paniye xop te, ha mīkaxxaxka taha' xix mīm topnāg pop xix kuyānām tat'ax tat.

⁴ Ha Yeyox te hāyūmmūg hāpxopmā'ax xohix, hu ta' nōy ha' mōg, tu:

—Tep mūn xak? Kaxīy.

⁵ Ha nōm te:

—Yā Yeyox mūn xak kōmēn Nāyane yōg Yeyox. Kaxīy.

Ha Yeyox te:

—Yāg mūn. Kaxīy.

Yā' xip Yot 'ūgāy xop mūtik.

⁶ Ha Yeyox te:

—Yāg mūn. Kaxīy.

Ha nōm xop te' xām hā' mōg, tu hām tu' xakux.

⁷ Ha Yeyox te xe:

—Tep mūn xak? Kaxīy.

Ha nōm te:

—Yā Yeyox xak kōmēn Nāyane yōg. Kaxīy.

⁹ Yā hōmā Yeyox te Topa pu hām'āktux hu: "Tak, xate 'ā' popmāhā nōm xop, ha 'āte' xaxok 'ohnāg". Kaxīy. Yā nōmhā putuk hāpxopmā'ax.

¹⁰ Ha' xip Xīmām Pet, tu' xut yāy yōg mīkaxxekka', tu' xak 'āmānex xexka yōg kāmānat yīpkox. Yā kāmānat 'ūxuxet'ax Mā'ok.

¹¹ Ha Yeyox te Pet pu hām'āktux, hu:

—'Āpu mō'tat 'ōg mīkaxxekka 'ūxax hā. 'Ok xate hāmpē'āpaxex 'āte xūy hā tot putup'ah? Yā yōgnū 'ātak te 'ā xūy hōm putup. Kaxīy.

Yeyox te 'Ānān ha' mōg

¹² Hāpxip 'Thā xonat xop te Yeyox mūg xix xonat xop yōg kapitām te' xix Topa pet xexka yōg xonat xop te', tu Yeyox kīy,

¹³ tu ta' mōgāhā 'Ānān hah. 'Ānān yā Kaxpax xuxyā, ha Kaxpax te 'āmānex xop xat nōm hāmāyaxatamuk hā.

¹⁴ Hōmā Kaxpax te Yoneo xop pu' xuktux 'ūmax, pu tik puxet te tikmū'ūn xohix xexka pupi' xok.

Pet te hām'āktux Yeyox yūmmūg 'ohnāg

¹⁵ Ha Xīmām Pet te Yeyox pe' mōg, ha ta' nōy te' pe' mōg, yā' nōy xip Yeyox yōg tik xop kopah, yā tik te 'āmānex xop xat hā xape' hu mō'nāhā tik te 'āmānex xop xat pet yōg hāmnuhnōg hā, yā Yeyox mūti' mōxaha',

¹⁶ ha ta' nox xip Pet hāptopa hāmpak'ax yīykox tu', tu 'ūn mūtik hām'āktux nōm te' yīykox pēnāhā', tu Pet nūnnāhā 'ūkopah,

¹⁷ ha 'ūn te Pet pu hām'āktux, hu:

—'Ok 'āxip Yeyox yōg tik xop kopah? Kaxīy. Ha Pet te:

—'Āmhok. 'Ak mūn'ah. Kaxīy.

¹⁸ 'Ūxapxūy, yī' kuhu' xonat te', xix mīptut pēnā'ax xop te' xix mīptut yōg hāmnuhnōg pēnā'ax xop te', tu kuxap xakot, tu nō xapuk. Ha Pet te kama nūmūtik xip, tu' xapuk.

Yeyox mōg tik te 'āmānex xop xat hah

¹⁹ Ha ta tik te 'āmānex xop xat te Yeyox yīkopit, hu:

—Texīy 'ōg tik xop. Xate putep mūn yūmmūgāhā'? Kaxīy.

²⁰ Ha Yeyox te:

—Hōmā 'āte hām'āktux punethok tikmū'ūn xop kopah, ha' xohix te' xupak. 'Āte Yoneo yōg Topa pet kopa hām'āktux Yoneo xohix pu', ha' xohix te' xupak. 'Āte hām'āktux xapto' ohnāg.

²¹ Hamūn, teptu xatek yīkopit? 'Āpu' xupak xop yīkopit. Nōm te yōg hām'āktux 'āpak, hu hāmūyūmmūg, Kaxīy.

²² Yeyox te hām'āktux, ha xonat xip, yā nōm te mīptut pēnāhā' xix mīptut yōg hāmnuhnōg pēnāhā', tu' yīm hā Yeyox kix, tu:

—Texīy xate hām'āktux kummuk tik te 'āmānex xop xat pu'? Kaxīy.

²³ Ha Yeyox te:

—Paxpu hām'āktux kummuk, puxix' max, xa xuktux yā hām'āktux kummuk. Pa 'āte hām'āktux max. Teptu xatek kix? Kaxīy.

²⁴ Yīy ta mō Yeyox kutnāhā 'Ānān te', yīy ta' mōg Yeyox, tu pipkup māxap hā' kīy, ha' mōg, tu mōktu Kaxpax ha' xupep. Yā Kaxpax te 'āmānex xop xat.

Pet te xe' xuktux Yeyox yōg tik'ah

²⁵ Ha ta' nox xip tu kuxap hā xapuk, ha nōm te:

—'Ok 'āxip Yeyox yōg tik te 12 xop kopah? Kaxīy.

Ha Pet te:

—'Āmhok, 'ak mūn'ah. Kaxīy.

²⁶ Ha ta' xip tik te 'āmānex xop xat yōg kāmānat, yā hōmā Pet te' nōm yōg xape yīpkox xak. Kāmānat te:

—'Ōk 'āte 'āpēnāhā Yeyox mūtik mīptut yōg hāmnuhnōg kopah? Kaxīy.

²⁷ Ha Pet te:

—'Āmhok! Kaxīy.

Ha hāpxip 'ohnāg 'Thā xokakkak pit xataha'.

Yeyox mōg Pinat hah

²⁸ Māyōn kutōgnāg ha ta' mōg Yeyox gohenanok pet tu'. Pa Yoneo xop mōxa 'ohnāg. Yā Yoneo xop yōg xat'ax te' tux hok, pu tu mōxa hok Hōm xop pet kopah, 'Thā 'āmuk xexka mīy, yā 'āmuk xexka 'ūxuxet'ax Nōā'yēn.

²⁹ Ha ta' mōg Pinat mīptut kūnāpah, nūy Yoneo xop mūtik hām'āktux, tu:

—Texīy hu' nūnnā'? Putep kummuk mīy? Kaxīy.

³⁰ Ha Yoneo xop te:

—Hāpkummuk mīy 'ohnāg, kopxi' nūnnā 'ohnāg 'ā hah. Kaxīy.

³¹ Ha Pinat te:

—'Ūpip 'āxop yōg xat'ax, yā nōm kax'āmi tappet tu'. 'Āpu 'ūyōg hāpxopmā'ax kopit. Kaxīy.

Ha Yoneo xop te:

—'Āmhok, 'āpu 'ūkopit. 'Ūgmū yōg xat'ax te' xat 'ohnāg tikmū'ūn putex. Kaxīy.

³² Hamūn. Hōmā Yeyox te hām'āktux mīpkupnix yīmū' xok putup. Yā Hōm xop te tikmū'ūn kix mīpkupnix yīmū', pa Yoneo xop te tikmū'ūn kix 'ohnāg mīpkupnix yīmū'. Yā Yeyox te hām'āktux xe'e'.

³³ Ha Pinat te putpu mō'nāhā mīptut hā, tu Yeyox pu hām'āktux hu:

—'Ōk xate Yoneo xop xat? Kaxīy.

³⁴ Ha Yeyox te:

—'Ok yā 'āp-xet te hāmpē'āpaxex, huk yīkopit, pe' nōy te xa' xak, yīy xatek yīkopit? Kaxīy.

³⁵ Ha Pinat te:

—'Ok hāmpē'āpaxex Yoneo xop kopak xip? 'Āmhok. 'Āxape xop te 'ānūnnāhā nūnteh. Putep kummuk mīy xate'? Kaxīy.

³⁶ Ha Yeyox te:

—'Ūkxexkah, tu yāy yōg xop xat. Pa 'āte hām xexka yōg xexka xop putuk'ah. Hā kaxīy

'āte xat'ah. Paxpu hām xexka yōg xexka xop putuk, puxix yōg xop yāykix 'ūgāy xop mūtik, puyī' nōy 'ūgmōgā hok Yoneo xop hah. Pa 'āmhook. 'Āte hām xexka yōg xexka xop putuk'ah. Kaxīy.

³⁷ Ha Pinat te:

—'Ok 'āmūn xexka'? Kāxīy.

Ha Yeyox te:

—Hamūn, xate nōm 'āktux 'ūkxexka'. 'Ūgnūn hām xexka tu', tuk nāhā', nūy hāpxe'e 'āktux, yā hāpxe'ēgnāg. Hāmyoa'ax yōg tikmū'ūn te yōgnū hām'āktux 'āpak, tu' yīpkox pip. Kaxīy.

³⁸ Ha Pinat te:

—Pute 'ūm hāmyok? Yā' xip'ah hāmyok. Pute 'ūm hāpxe'e? Yā' xip'ah hāpxe'e'. Kaxīy.

Yoneo xop tep-tup nōg Yeyox

Tu ta' mōg hāptopa Pinat, nūy Yoneo xop pu hām'āktux, hu:

—'Ap kummuk'ah tihik.

³⁹ Pa 'ōg hāpxopmā'ax te kaxīy. Yā hāmāxatamuk xohix 'hā' mīy 'āmuk xexka 'ūxuxet'ax Nōā'yēn, 'hā' 'āte kanet ka'ok kopa' xut tik puxet, pu mōg. Pi'yā 'āxop tep-tup? 'Ok mōg putup nōm te Yoneo xop xat? Kaxīy.

⁴⁰ Ha Yoneo xop te hām'āktux ka'ok, hu:

—'Āmnok, 'a' mōg putup'ah. 'Āpu Mahamax xut, pu mōg. Kaxīy.

Yā' xupxet Mahamax.

19

¹ Ha Pinat te' xat ha xonat te Yeyox kix xikot hā.

² Ha xonat xop te' mīy 'ūkuxxax, yā mīmyām tox māg hā' mīy, tu mōktu Yeyox putox yīmū' xix, puyīy xexka xop putuk, tu Yeyox pu mō' xax tat topixxax 'āta', puyīy xexka xop putuk.

³ Tu' nūn xonat, tu hāpkute'ex, hu:

—'Āmax. Xate Yoneo xop xat. Kaxīy.

Tu' yīm hā Yeyox kix.

⁴ Ha ta' mōg hāptopa 'ūxehet Pinat, tu Yoneo xop pu hām'āktux, hu:

—'Ūxupax. 'Āte tik yōg hāpkummuk mīy'ax xak, pa' pipi 'ohnāg. 'A' kummuk'ah tihik. 'Āte nōm hā' nūnnāp-tup, xayīy yūmmūg 'āte yōg hāpkummuk mīy'ax pipi 'ohnāg, tī xūyāp-tup'ah. Kaxīy.

⁵ Ha ta' mōg Yeyox hāptopah, hap-tox yīmū' yūm 'ūkuxxax, yā mīmyām tox māg hā' mīy, ha mō'tat topixxax 'āta'. Ha Pinat te:

—'Ūpēnā' tihik! Kaxīy.

⁶ Ha 'āmānex xexka xop te hām'āktux ka'ok xix Yoneo xexka xop te', hu:

—'Āpu mīpkupnix yīmūp-tex pipkup hā, 'āpu mīpkupnix yīmūp-tex pipkup hā. Kaxīy.

Ha Pinat te' xat, hu:

—'Āpu 'ūmōgā, nūy mīpkupnix yīmūp-tex pipkup hā. 'Āte Yeyox yōg hāpkummuk mīy'ax pipi 'ohnāg, hu' xūyāp-tup'ah. Kaxīy.

⁷ Pa Yoneo xop te hām'āktux yānān, hu:

—'Ūkax'āmi 'ūgmū yōg xat'ax, tu nōm te' xat, pup-tex. Hamūn, tute hām'āktux, "Ūgmūn yā Topak-tok". Kaxīy.

⁸ Ha Pinat te' xupak, tu' kuxa nōg nōy nā' mōg.

⁹ Tu xe mīptut hā mō'nāhā', tu Yeyox pu hām'āktux, hu:

—Hām 'ūm tu 'ānūn? Kaxīy.

Pa Yeyox te hām'āktux 'ohnāg.

¹⁰ Ha Pinat te:

—'Ok hām'āktux 'ohnāg? 'Ok xate' yūmmūg, 'āte' xat, xa mōg, pa' xat hok, xa mōg hok. 'Āte' xat, puxix xonat 'āp-tex mīpkupnix yīmū'. Kaxīy.

¹¹ Ha Yeyox te:

—'Topa te' xat, xa' xat, pa' xat hok, xa' xat 'ohnāg. Xate hāpkummuk mīy, pa' nōy te hāpkummuk xexka mīy, nōm te 'āhak mōgāhā'. Kaxīy.

¹² Ha Pinat te' xupak, hup-tup, nūy Yeyox xat pu mōg. Pa Yoneo xop te hām'āktux ka'ok, hu:

—Paxpu Yeyox xat, pu mōg, hu ta Hōm xop xape 'ohnāg 'āmūn. Hōm xop tep-tup nōg nōm te yāy xexka mīy. Kaxīy.

¹³ Ha Pinat te' xupak, tu ta xe mō'nāhā mīptut hā, tu ta Yeyox mōgāhā hāptopah, tu pa te hāmūmmūg xop yōg mīmpe yīmū' yūm hām tu 'ūxuxet'ax Mīkax Pet Xax. Yā 'āxet'ax nōy yā Gabatah, yā Yoneo xop yīy'ax kopah.

¹⁴ Māyōn te yāykote' yūm'ax. Hāpxip 'hā' 'āmuk xexka mīy'ax, yā 'āmuk xexka 'āxet'ax Nōā'yēn. Ha Pinat te Yoneo xop pu hām'āktux, hu:

—'Ūxip nūnte 'ohnū xexka'. Kaxīy.

¹⁵ Pa Yoneo xop te:

—'Āpu 'ūp-tex, 'āpu 'ūp-tex, 'āpu 'ūp-tex mīpkupnix yīmū'! Kaxīy.

Ha Pinet te:

—'Ok 'ātep-tex'ax mīpkupnix yīmū tik te 'āxop xat? Kaxīy.

Ha 'āmānex xexka xop te:

—Yā Hōm xop yōg xexkap-xehnāg tek mūg xat. Puxix. Kaxīy.

¹⁶ Ha Pinat te xonat xop pu Yeyox hōm, pup-tex mīpkupnix yīmū pipkup hā. Ha xonat xop te Yeyox pēnāhā'.

Yeyox putex mīpkupnix yīmū'

¹⁷ Ha ta' mōg Yeyox, tu mīpkupnix taha', tu' mōg, tu mōktu' xupep hām tu, yā hāhām 'ūxuxet'ax putox kup, yā Yonet xop yāy yīy'ax tu Gok.

¹⁸ Ha xonat te pipkup hā' xuhnīy Yeyox mīpkupnix tu', ha' xup. Ha xonat te pipkup hā' xuhnīy kama tik tix nōy mīpkupnix nōy tu', hak-tetex tik tix, yāp-xet xup Yeyox yīpxax tu' xi' nōy xup Yeyox yīpxe'e tu', ha Yeyox xup yāykote'.

¹⁹ Ha Pinat te' kax'āmi', tu' xat, pu nōm xix Yeyox yōg mīpkupnix xox putox tu'.

'Ūkax'āmi, hu: "Kōmēn Nāyane yōg Yeyox. Tute Yoneo xop xat". Kaxīy.

²⁰ Ha Yoneo punethok te nō mōkupix. Hāmhūmnāg yūm kōmēn, tu yōg tikmū'ūn te' yīy'ax tikoyuk hā hām'āktux, yīy ta Pinat te nōm kax'āmi 'ūyīy'ax tikoyuk hā', yā Yoneo xop yōg yīy'ax hā xix Hōm xop yōg yīy'ax hā xix Genex xop yōg yīy'ax hā.

²¹ Pa 'āmānex xexka xop te Pinat pu hām'āktux, hu:

—'Ūkax'āmi hok, hu: "Tute Yoneo xop xat". Kaxīy. 'Āpu 'ūkax'āmi, hu: "Tik te hām'āktux hu: "Āte Yoneo xop xat". Kaxīy.

²² Ha Pinat te:

—Puxix. 'Āte xe kax'āmpip-tup'ah. Kaxīy.

²³ Yā xonat te pipkup hā' xuhmīy Yeyox, tu Yeyox yōg topixxax mōy, tu mō topixxax koxip, tu mōktu topixxax xop te' 4 mīy xonat te' 4 pu'. Nōm te' paha Yeyox yōg kayak, yā 'ūyōg xap'ax xip'ah.

²⁴ Ha xonat xop te yāy mūtik hām'āktux, hu: 'Āpu yūmū kayak koxip hok. 'Āpu yūmū mō xap yōn, puyīy xonat puxet pa'. Yā hōmā 'ūhittap 'ūkax'āmi Topa yōg tappet tu', hu: "Nōm te mō'koxip yōgnū topixxax, tu mō xap yōn, nūy yōg kayak pa". Kaxīy. Hamūn, 'ūkax'āmi xe'e'. Hā kaxīy, yīy ta xonat te' mīy.

²⁵ Ha ta' xip Yeyox yōg mīpkupnix yīkāgnāg hā Yeyox mūktut xix Yeyox mūktut tutnōy, yā Mānix, yā Konop xetut, ha Mānix Mānanēn xip kamah.

²⁶ Ha Yeyox te' pēnāhā yāy tut xix tik te Yeyox yōg tik te 12 xop kopa' xip, yā Yeyox te mō nōm yāy xe'ēgnāg.

Yeyox te:

—Māy, nō'ōm 'āk-tok pit. Kaxīy.

²⁷ Tu xe hām'āktux 'ūnōy pu', nōm te Yeyox yōg tik te 12 xop kopa' xip, hu:

—Nō'ōm 'ātut. Kaxīy.

Ha tik te 'ūn mōgāhā yāy pet hah.

Yeyox xok

²⁸ Ha Yeyox te' yūmmūg 'ūhām kux, tu hām'āktux, hu:

—Kōnāg putup tek putex. Kaxīy.

Yā Topa yōg tappet yōg hām'āktux putuk. Hōmā 'ūhittap nōm te' kax'āmi Topa yōg tappet tu'.

²⁹ Ha ta' xip naxtox, ha kopa' xup xupyāg kummuk, ha 'ōm te tok hā hep tit, tu nōm mīm hā' xuhmīy, tu' xix Yeyox yīkox xax tu'.

³⁰ Ha Yeyox te xo'op, tu:

—'Ūkhām kux. Kaxīy.

Tup-tox put xok, tu' xok, ha ta' mōg 'ūkoxuk.

Xonat te Yeyox xuhmīy

³¹ Ta Yoneo xop te Pinat pu' xak. 'Ūp-tup, puyīy xonat xop xakix xop kup kūnākohoh. 'Ūp-tup kamah, puyīy mīpkupnix tu' mōy 'ūxakix xop. Yā xexta pet, ha nōm tep-tup nōg 'ūxakix xop kutetex pepix mīpkupnix yīmū nit

xap hā. Nit xap yā Yoneo xop yōg 'āmnīy tuknōg, yā hām hok, ha nōm nit xap xexkah.

³² Ha ta' mōg xonat xop, tu tik puxet kup xa'ah, tu tik nōy kup xa'ah nōm xakix Yeyox mūtik.

³³ Xonat nūn Yeyox hah, tu' pēnāhā' 'ūxok tāmnāg, yīy' kup xa'a' ohnāg.

³⁴ Xonat puxet te Yeyox puka xuhmīy pox xexka hā, tu hāprip 'ohnāg 'īhā' xupep hep 'āta xix kōnā'āg.

³⁵ Tak mūn Yoām. 'Āte hāprip xohix pēnāhā', tu nōm kax'āmi, xayīy 'ākuxa mām Yeyox kopah. 'Āte' yūmmūg, yā hām'āktux xe'e'. 'Ap koit'ah.

³⁶ Yā xonat te Yeyox kup xa'a' ohnāg. Yā Topa yōg tappet te hām'āktux putuk. Yā Topa yōg tappet te: "'Ūkup xa'ap-tup hok". Kaxīy.

³⁷ Yā Topa yōg tappet hām'āktux nōy putuk. Yā Topa yōg tappet te: "Nōm te' pēnāp-tup, yā 'ūxuhmīy pox xexka hā". Kaxīy.

Yeyox hāpkot

³⁸ Hōmā kōmēn 'Animātex yōg Yoye te Yeyox pe' mōg. Pa Yeyox pe' mōg yāy xaptop, yā Yoneo xexka xop yīpkutuk. Ta' mōg Yoye', tu mōktu Pinat tu' kax Yeyox yīn, ha Pinat te: —Mōy pa'. Kaxīy.

Yīy ta' mōg Yoye', tu' paha Yeyox yīn, tu' mōgāhā'.

³⁹ Hōmā ha ta' mōg Nīkonēm 'āmnīy 'īhā', tu Yeyox mūtik hām'āktux. Tu ta' mōg Nīkonēm, yā Yoye mūtik mōg. Nīkonēm te' mōgāhā mīm kōnyōn hax max, yā' xohix te' 45 kit, yā' xuxet'ax 'anoex xix mīha'.

⁴⁰ Ta nōm tik tix te Yeyox yīn kīy topixxax tox hā, tu kopa' mām mīm kōnyōn hax max. Hā kaxīy Yoneo xop te' mīy, nūy yīn hāpkot.

⁴¹ Ha ta' yūm xukpot max hām tu Yeyox putex yīkāgnāg, ha xukpot tu' yūm mīkaxxap kox, yā mīkaxxap kox tūmnāg.

⁴² Hāptup yā Yoneo xop yōg 'āmnīy hām hok, yā nit xap, ha Yeyox yīn yūm mīkaxxap kox kopah. Yā hāmhūmnāg mīkaxxap kox.

20

Mīkaxxap kox kox

¹ Ye nomīy hāptup'ax, yā hāpkoxtap ha ta' mōg Mānix Mānanēn, tu mōktu' xupep mīkaxxap kox tu', tu' pēnāhā', pap xip hok mīkaxxap xexka hām mō'yīnnīn mīkaxxap yīkox tu'. Putep-te' xut?

² Ta' mōg mō'ka'ok, tu Xīmām Pet mūtik hām'āktux, xix' nōy mūtik hām'āktux, yā nōm xip Yeyox yōg tik xop kopah, yā Yeyox te mō nōm yāy xe'ēgnāg. Manix Mānanēn te:

—Tikmū'ūn te' xut Yeyox yīn mīkaxxap kox kopah, hak mū'āte' yūmmūg'ah hām 'ūm tu' yūm 'ūyīn. Kaxīy.

³ Ha ta' mōg Pet xi' nōy mīkaxxap kox hah.

⁴ 'Ūmōg mō'ka'ok 'ūtix, pa' nōy mōg mō'ka'ok xe'e', tu mōktu' xupep hāmāxap,

⁵ tu' mō' pa yūm, hu mīkaxxap kox hā mō' pa yūm, tu' pēnāhā topixxax tox, pa mō'nā 'ohnāg.

⁶ Hāpxip kutōgnāg 'Ihā' xupep Xīmām Pet, tu mō'nāhā mīkaxxap kox hā, tu' pēnāhā topixxax yūm.

⁷ Ha' xip topixxax tox nōy nōm te Yeyox putox kīy, yā' kīy, tu yāp-xehnāg tu' xip, yā topixxax nōy mūtik xip'ah.

⁸ Ha nōm te mīkaxxap kox hā' xupep hāmāxap, tu mō'nāhā', tu' pēnāhā', tu' kuxa yūm.

⁹ Pa nōm xop te' yūmmūg xe'e 'ohnāg. Yā Topa yōg tappet te: "Ūputpu' hi'ax". Kaxīy.

¹⁰ Tu ta' mōg putpu' Yeyox yōg tik xop yāy pet hah.

Yeyox te Mānix Mānanēn pu' yāy mūg

¹¹ Ha ta' xip Mānix mīkaxxap kox yīkak hāptopah, tu potaha', tu mō' pa yūm, tu kopa' pēnāhā'.

¹² Pa' pippekkox yōg nū'pok xop yōg tik tix, tu topixxax ponnok mō'tat, tu' mām Yeyox yīn xip'ax tu', yā yāp-xet xip Yeyox pata xip'ax tu', ha' nōy xip Yeyox putox xip'ax tu',
¹³ tu:

—Yāhāg, teptu 'āpotaha'? Kaxīy.

Ha:

Tikmū'ūn te' mōgāhā 'ūkxuyā'. 'A 'āte' yūmmūg'ah hām 'ūm tu' yūm. Kaxīy.

¹⁴ Tute hām'āktux, tu yōkām, tu Yeyox pēnāhā, pa Yeyox yūmmūg 'ohnāg.

¹⁵ Ha Yeyox te:

—Yāhāg, teptu 'āpotaha'? Tep mūn xak? Kaxīy.

Yā 'ūn te hāmpē'paxex yā tihik nōm te xukpot pēnāhā', tu:

—'Ok xate nōm mōgāhā'? 'Āpu 'ā' xuktux. Pi'yā yūm, hak mōg putup, nūy pa'. Kaxīy.

¹⁶ Ha Yeyox te:

—Mānix! Kaxīy.

Ha Mānix te hā' yōkām, tu hām'āktux Yoneo xop yāy yī'ax hā, hu:

—Hamōn! Kaxīy.

Yā tikmū'ūn yī'ax hā, "Yāyā". Kaxīy.

¹⁷ Ha Yeyox te:

—'Āpu 'ūgmūg hok. Yāg mōg putup putpu' yōgnū 'ātak hah. 'Āpu mōg 'ūkxape xop hah, nūy hām'āktux 'ūgmōg yāy yōg 'ātak hah, yā 'ōgnū, yā yōgnū Topa, yā 'ōgnū. Kaxīy.

¹⁸ Ha ta' mōg Mānix Mānanēn Yeyox yōg tik xop hah, tu mōktu hām'āktux, yā yāyā Yeyox pēnāhā', tu Yeyox yōg hām'āktux 'āktux.

Yeyox te yāy yōg tik xop pu yāy mūg

¹⁹ Ye nomīy yōg 'āmāxak, ha ta' yāy tu nū'nāhā Yeyox yōg tik xop, tu mōhāmyīnīn pipkup hā, yā Yoneo xexka yīpkutuk. Ha ta' nūn Yeyox, tu nūktu' xip yāy yōg xop kopah, tu:

—'Ākuxa nōg hok. Kaxīy.

²⁰ Yā tute hām'āktux, tu nōm pu yāy yīm mūg xix yāy puka mūg, yā kayax mūg, ha nōm te yāy xuxyā pēnāhā', hu' hittup xexka'.

²¹ Ha Yeyox te:

—'Ākuxa nōg hok. Yōgnū 'ātak te nūgkutnāhā'. Hā kaxīy 'āte 'āxop mō'pok kamah. Kaxīy.

²² Tute hām'āktux, tu' nōy yīmū' xitxok, tu:

—'Āpu 'ūpa Topa Koxuk.

²³ 'Āxop te tikmū'ūn yōg hāpkummuk mī'y'ax xaxok, ha' kux, puxix Topa hāpkummuk mī'y'ax xaxok, ha' kux kamah. Pa 'āxop te tikmū'ūn yōg hāpkummuk mī'y'ax xaxok 'ohnāg, ha' kux 'ohnāg, puxix Topa hāpkummuk mī'y'ax xaxok putup'ah, ha' kux 'ohnāg kamah. Kaxīy.

Yeyox xix Tōmē'

²⁴ Ha ta' xip Tōmē Yeyox yōg tik xop kopah, yā kama 'ūxuxet'ax kutonnix. 'Ap xip'ah 'Ihā' xupep Yeyox.

²⁵ Ha Yeyox yōg tik xop te Tōmē pu hām'āktux hu:

—'Ūgmū'āte yāy xuxyā pēnāhā'. Kaxīy.

Ha Tōmē te:

—'Āte' pēnā 'ohnāg 'ūyōg kayax 'ūyīm tu', pipkup te nōm xuhmīy, kopxix 'ūgkuxa yūm putup'ah. Tuk yīpkutok hā kayax 'āpit 'ohnāg, kopxix 'ūgkuxa yūm putup'ah, tuk yīm hā 'āpit 'ohnāg 'ūpuka', kopxix 'ūgkuxa yūm putup'ah. Kaxīy.

²⁶ Xēmān puxet nōg, 'Ihā yāy tu nū'nāhā Yeyox yōg tik xop mīptut kopah, ha' xip Tōmē nūmūtik. Nōm te mōhāmīnīyīn pipkup hā, pa Yeyox nūn, tu nūktu nōm xop kopa' xip, tu:

—'Ākuxa nōg hok. Kaxīy.

²⁷ Tu Tōmē pu hām'āktux, hu:

—'Āpu 'āyīm xix nūnte. 'Āpu 'ūgyīm pēnā'. 'Āpu 'āyīm hāg 'āpit 'ūkpuka'. 'Āpu 'ākuxa yūm 'ohnāg kuxyā'. 'Āpu 'ākuxa yūm. Kaxīy.

²⁸ Ha Tōmē te: Yāyā, yōgnū Topah. Kaxīy.

²⁹ Ha Yeyox te:

—'Ok 'ākuxa yūm, xate hāmpēnāhā tu'?

'Ūhittup tikmū'ūn kuxa mām, pa' pēnā 'ohnāg. Kaxīy.

³⁰ Ta Yeyox te hāpxopmā ka'ok xe'ēgnāg nōy punethok, pa nōm kax'āmi 'ohnāg nū tappet tu'.

³¹ Pa hāpxopmā'ax kax'āmi, xayīy 'ākuxa mām, yā Yeyox yā Kunnix, yā Topa te nū'kutnāhā'. Yā' kax'āmi, xayīy 'ākuxa mām, yā Yeyox yā Topak-tok. 'Ākuxa mām Yeyox kopah, nūy ta hi xe'ēgnāg mōkuma' mōg, ha' kux 'ohnāg.

21

Yeyox te yāy yōg tik te 7 pu yāy mūg

¹ Ta Yeyox te yāy yōg tik xop pu yāy mūg 'ūxeheh konāg xexka Tīmenit yōg hāpkux tu'. Yā' yāy mūg hā kaxīy.

² Ūpip Xīmām Pet, xix Tōmē ūxuxet'ax Kuttonix kamah, xix Nātānāyet, yā xiptuxexka Kānā yōg tihik hāp̄xexka Ganinet tu', xix Yemeneo kutok xop, xix tik tix nōy, yā Yeyox yōg tik xop kopa' pip.

³ Ha Xīmām Pet te' nōy pu hām'āktux, hu:

—Ūgmōg, nūy mām xuk. Kaxīy.

Ha xape xop te:

—Āpu yūmū mōg. Kaxīy.

Tu ta' mōg ka'mām, tu mōktu mīpkox tu' mōxaha', tu' mōxakux, tu ta' mōg kōnāg xexka tu', tu mām xuk 'āmñīy tox hā, pap xuk 'ohnāg.

⁴ Māyōn xupep, 'hā' xip Yeyox hām kux tu', pa Yeyox yōg tik xop te' yūmmūg 'ohnāg, yā' xip Yeyox.

⁵ Ha Yeyox te:

—Ūkxape xop, 'ok mām 'ūm xuk hok? Kaxīy.

Ha nōm te:

—Āp xuk'ah. Kaxīy.

⁶ Ha Yeyox te:

—Āpu mō māpxuk'ax yōn mīpkox yōg yīp̄xe'e hā' yūm, tu 'āxop te' pipip-tup. Kaxīy.

Ha nōm te' mīy, ha mām nū'xīmnāg ūxuk'ax hā, ha tik te mām xuk'ax mōy yūmmūg 'ohnāg.

⁷ Ha' xip tihik, yā Yeyox yōg tik xop kopa' xip, yā Yeyox te mō nōm yāy xe'ēgnāg. Tute Pet pu hām'āktux, hu:

—Yā yūmūg xuxyā nō'ōm. Kaxīy.

Ha Xīmām Pet xaxtop, hu mō toppixxax tat, tu' pūn kōnāg kopah.

⁸ Ha ta xape te yā' pip mīpkox kopah. Ha ta mīpkox xix hāpkux yōg mēn xohix te' 100. Ha ta' mōg, tu māpxuk'ax nūnnāhā kōnāg kopah, yā mām nū'xīmnāg.

⁹ Tu' mōg, tu mōktu' mōxaha hāpkux tu', tu hāpkux tu' mōg, tu mōktu kuxap pēnāhā', tu mām pugā pēnāhā xix pām.

¹⁰ Ha Yeyox te:

—Putnū' māhām 'āxop te' xuk. Kaxīy.

¹¹ Ha ta mō'nāhā Xīmām Pet mīpkox hā, tu māpxuk'ax yīkūy, tu' nūnnāhā', yā mām nū'xīmnāg mām xohix te' 153. Ūxohix māhām, pa māpxuk'ax yāy pot 'ohnāg.

¹² Ha Yeyox te:

—Mā, nūy 'āxit. Kaxīy.

Ha tik te' yīkopit 'ohnāg, hu:

—Ū'ūm 'āmūn? Kaxīy.

Yā hā kaxīy yīkopit 'ohnāg, pa' yūmmūg, yā' xuxyā'.

¹³ Yeyox te pām pop, tu tik pu' popmāhā', tu mām pop, tu tik pu' popmāhā'.

¹⁴ Hāmūn, Yeyox te putpu' hi', tu yāy yōg tik xop pu yāy mūg tikoyuk.

Yeyox xix Pet

¹⁵ Ta' xit kux, ha Yeyox te Xīmām Pet pu hām'āktux, hu:

—'Ok xatek putuppax xexka, pa 'ōm putuppax kutōgnāg? Kaxīy.

Ha Pet te:

—Yāyā, hamūn, xate' yūmmūg, 'āte 'āp-tuppax. Kaxīy.

Ha Yeyox te:

—Āpu tikmū'ūn pu yōg hām'āktux yūmmūgā', nūy nōm pēnā'ax putuk. Kaxīy.

¹⁶ Ha Yeyox te:

—Xīmām, yā Yoām Kutok, 'ok xatek putup-pax? Kaxīy.

Ha:

—Yāyā, hamūn, xate' yūmmūg, 'āte 'āp-tuppax. Kaxīy.

Ha Yeyox te:

—Āpu tikmū'ūn pēnā' kahnēn pēnā'ax putuk. Kaxīy.

¹⁷ Ha Yeyox te xe hām'āktux, hu:

Xīmām, yā Yoām kutok, 'ok xatek putup-pax? Kaxīy.

Ha Pet kuxa hittup 'ohnāg, Yeyox te' yīkopit tikoyuk hah tu:

—Yāyā, xate' yūmmūg hāp̄xop xohix xexkah. Xate' yūmmūg, 'āte 'āp-tuppax. Kaxīy.

Ha Yeyox te:

—Āpu tikmū'ūn pēnā', kahnēn pēnā'ax putuk.

¹⁸ Āte xa hāp̄xe'e 'āktux. Hōmā 'ātuktup, tu yāy kūnāy hīy, nūy ta mōg, tu hāpkumep hām xohix tu' xatep-tup. Pa hāp̄xip 'hā 'ākutut'ax, tu 'āyīm yoap-tup, ha' nōy te 'āyīm kīy putup, tu 'āmōgāp-tup hām tu xatep-tup'ah. Kaxīy.

¹⁹ Hā kaxīy Yeyox te hām'āktux hā kaxīy Pet putex putup, puyīy tikmū'ūn yūmmūg ūxexka Topah. Yeyox te Pet pu hām'āktux hu:

—Āpu 'ūkpe mōg. Kaxīy.

Yeyox te tik nōy 'āktux

²⁰ Pa Pet te yōkānām, tu tik nōy pēnāhā', yā Yeyox te mō nōm yāy xe'ēgnāg. Yā hōmā nōm xip Yeyox yīkāgnāg, tu' yīkopit, hu: "Yāyā, tep-te' gāy xop mōgāp-tup 'ā ha, puyīy 'āxūyā'?" Hā kaxīy nōm te hām'āktux hōmā.

²¹ Ha Pet te nōm pēnāhā', tu Yeyox pu hām'āktux, hu:

—Yāyā, xix 'ōhōm tihik. Tikmū'ūn te nōm pu putep mūn mīy putup? Kaxīy.

²² Ha Yeyox te:

—Paxpu 'ātep-tup tik nox xihip nūnte, ha mōktuk nūn putpuk, ha ta xate' yūmmūg putup'ah. Āpu 'ūkpe mōg! Kaxīy.

²³ Yīy ta Yeyox mūtik mōg xop kopa hām'āktux punethok, yā hām'āktux tik xok putup'ah. Pa 'āmhok. Yeyox 'ap xuktux'ah ūxok putup'ah. Pa Yeyox te: "Paxpu 'ātep-tup tik nox xihip nūnteh, ha mōktuk nūn putpuk, ha ta xate' yūmmūg putup'ah". Kaxīy.

²⁴ Nō'ōm tihik yāg mūn. Āte hāp̄xop xohix xe'e 'āktux, tu nōm kax'āmi nūnteh. Yūmū'āte' yūmmūg ūxe'e nū hām'āktux.

Ūkux

²⁵ Yeyox te hāpχormā nōy punethok kamah. 'Ūkax'āmi Yeyox yōg hāpχormā'ax xohix xexka', puxix pip'ax tappet xohix xexkah. 'Āte hāmppekpaχex hām xexka putuk'ah tappet xohix. Yā hām xexka kutōgnāg, pa nōm tappet xexkah.
Tu ta tu' kux.

YEYOX YŌG MŌ'POK XOP TE HĀPXOPMĀHĀ'

¹ Teop:

Hōmā 'āte xa kax'āmi hāmāxap tappet tu', nūy Yeyox yōg hāpxopmā'ax xohix 'āktux xa', xi' yōg hāmyūmmūg'ax xohix 'āktux,

² ha Yeyox te yāy yōg tik xop yīmōgatux, tu mō'pok, pu hām'āpak max 'āktux, ha Topa Koxuk te Yeyox ka'ogāhā', ha Topa te Yeyox mōgāhā pepi pexkox tu',

³ nōm xok, tu putpu' hi', ha tikmū'ūn punethok te' pēnāhā', tu 'āmniy te 40 hā' pēnāhā', yīy ta' xohix te hāmyūmmūg, yā' hi' putpu' Yeyox. Tute Topa te tikmū'ūn xat xe'ēgnāg 'āktux, tu Topa te yāy yōg tikmū'ūn xat 'āktux,

⁴ tu yāy yōg mō'pok xop mūtik tihi', tu:

—Nāy, Yenoyanēn kopa nox pi'. Hōmā 'Ātak Topa te hām'āktux xex, hu: "Āte yāy Koxuk Xe'ēgnāg nū'kutnāp-tup tikmū'ūn xohix hah," kaxīy. 'Āte xa hām'āktux, ha' xupak, hu' hip kōmēn Yenoyanēn kopah.

⁵ Yoām te kōnāg hāp-tox pix, pa hāpxip kutōgnāg 'ihā 'āte Topa Koxuk xa nū'kutnāp-tup, 'āp-tox pix'ax putuk nū'kutnāp-tup, puyīy 'āka'ogā'. Kaxīy.

Yeyox te pexkox ha' mōg

⁶ Ha mō'pok xop te nū mūtik pip, tu:

—Hām 'ūm hā xate' puknōg xop mōy putup, nōm puknōg xop te yūmū yōg hām tu' pip? 'Ok hōnhā nō' nōy yānān putup, nūy yūmū yōg tikmū'ūn 'Iyaet xexkānā'? Kaxīy.

⁷ Ha Yeyox te:

—'Āmniy 'ūm hā' xexkānāp-tup, 'Ātak puxet te' yūmmūg. 'Ap nōy 'ūm te' yūmmūg'ah. 'A 'Ātak Topa te 'āyūmmūgāp-tup'ah.

⁸ Pa Topa Koxuk yīxop-tup, yā kaxīy Topa te 'āka'ogāp-tup, xak mūn 'āktux tikmū'ūn pu', kōmēn Yenoyanēn kopah hām'āktux putup, xix hāpxexka Yonex tu', xix hāpxexka Xāmānit tu', xix hāpxexka xohix tu hām'āktux putup. Kaxīy.

⁹ Tu hām'āktux kux, ha Topa te' mōgāhā pepi', pexkox ha' mōg, ha yāy yōg mō'pok xop te' pēnāhā', ha hāmgyō xexka te' xax-ogāhā', pāyā' kopa' mōg, tu mōktu' xupep.

¹⁰ Ha Yeyox yōg mō'pok xop te' pēnā ka'ok, Yeyox pēnāp-tup tu', tu pepi' pēnā', 'ihā pexkox yōg mō'pok xop 2 mōxa mō'ka'ok, tu topixxax ponnōhnāg mō'tat,

¹¹ tu:

—Ganinet yōg tihik, tep mūn xak xate pexkox kopah? Topa te Yeyox mōgāhā pexkox hah, ha xate' pēnāhā', ha hāmgyō xexka kopa' putpu' nūn putup. Kaxīy.

Tik xop te Mātīt yāy kutnāhā'

¹² Ha yīktix 'Onimet tu' pip tik xop, tu ta' mōg, tu mōktu Yenoyanēn tu' mōxaha'. Putahat 'ap tox'ah, yā' hūmāng, kinōm puxet.

¹³ Tu mōktu' mōxaha mīptut tox tu', tu mīpku'īn tu mō'kānīn, tu mīptut kox tu' mōgāhā', tu' mōxakux. Tik xohix te: Pet, xix Yoām, xix Tiak, xix 'Anene', xix Pinip, xix Tōmē', xix Matēmēo, xix Māteo, xix 'Appeo kutok Tiak, xix Xīmām, nōm te Yoneo xop xexkanāp-tup, xix Tiak nōy kutok Yot.

¹⁴ Tu' kuxap-xet, xip-tox puxet, ha 'ūn xop nū mūtik yāy tu nū'nāhā', xix Mānix, Yeyox mūg tut, xix Yeyox taknōy xop. 'Ūxohix te Topa xak, tu nōm pu hām'āktux pax.

¹⁵ Hāpxip 'ihā yāy tu nū'nāhā', 'ūkuxa mām ka'ok xop xohix te 120, ha Pet tek-nihā' xip, tu hām'āktux, hu:

¹⁶⁻²⁰ —'Ūnōy mūnōp xop, hōmā, hāmyāxatamuk xohix punethok 'ihā, Topa Koxuk te hām'āktux, tu mōnāyxop Namix hā hām'āktux, ha kax'āmi' 'ūkte'ex yōg tappet tu', hu:

"Pūyā yāy hām'ax tu' xut, puyīy kāmānat nōy hām," kaxīy. Tu kax'āmi', ha hāmyāxatamuk xohix nōg, ha Topa yōg hām'āktux hittap hā' mīy nōmhā. Yeyox te Yot xānāhā', pu yūmūg mūtik 'āti', tu hāpxopmāhā', yā yūmūg hā' xape'.

—Pāyā Yot te' gāyxop mōgāhā Yeyox hah, nūy tayūmak pop, tu hām hā' nōy yānān, tu yōkānām tu' nāhā', ha' yōn yāy koxyoōy. Ha Yenoyanēn yōg tikmū'ūn xohix te' xupak, tu nōm hām 'āxet'ax mīy 'Axenām, yāy yīy'ax hā: "Ūhep 'āta'ax tu hahām," kaxīy.

²¹ —'Āpu, tik nōy yāy kutnā', pu Yot pupi hāpxopmā', tik te yūmūg mūtik hāpkumep hāmyāxatamuk 3 hā, 'ihā Yeyox te yūmūg mūtik hāpkumep.

²² Tik te Yoām putox pix'ax pēnāhā', tu Yeyox te pexkox tu' mōg pepi' pēnāhā', yā' xohix pēnāhā', pu Yeyox yā putpu' hi' 'āktux, yūmūg mūtik tu hām'āktux. Tu ta tu' kux. Kaxīy.

²³ Ha tik xop te tik 2 yīmōgatux, 'ūxuxet'ax Yoye Maxamax, yā 'āxet'ax nōy Hāmyok, xix Mātīt,

²⁴ tu Topa pu hām'āktux, hu:

—Topa 'āxexkah, yūmū'āte xa tu' xak, xate tikmū'ūn kuxa xohix yūmmūg hah, hukmū'ā yūmmūgā': Pi'ā' mūn putup xate? 'Ok pe Maxamax, 'ok pe Mātīt?

²⁵ Yot te Hāmgyāgnāg pet ha' mōg, 'āpu yūmū'ā' nōy yāy kutnā', pu Yot pupi hāpxopmā', nūy Yeyox yōg mō'pok xop kopa' xihip, nūy Yot hā' yānān hāpxopmā', Kaxīy.

²⁶ Tu mō'xap yōn, puyī' xap hāmyūmmūgā', ha' xut Mātīt, ha Mātīt te nōm tik te 11 mūtik hāpxopmāhā'.

2

Topa Koxuk te tikmū'ūn ha yīxohāh

¹ Hāpxip ṭhā Yoneo xop te 'āmuk xexka mīy, 'ūxuxet'ax Pēteket, ha' kuxa mām ka'ok xop xohix te yāy kotīnnāhā mīptut puxet kopah,

² tu' mām, tu mō'ka'ok tīnnā ka'ok 'āpak, yā 'āmuuh gāy putuk, tu xupep mīptut kopah, tu mīptut kopa nū'xip,

³ ha' yōyxōg punethok pēnāhā', yā kuxap putuk, tu hāpxummāhā', tu mōktu 'ūp-tox xohix xuka' mām,

⁴ ha Topa Koxuk te pexkox tu' yīxohoh, tu' xohix ka'ogāhā', pu tu hām'āktux. Yā Topa Koxuk te' yīgāhā'.

⁵ Ha hāpxexka xohix yōg Yoneo xop te Yenoyanēn kopa' tihī', nōm te Topa xak,

⁶ tu' xupak, tu yāy tu nū'nāhā', tu' nūn, tu nūktu mōxaha', tu yāy yīy'ax xohix 'āpak, tu' yēy,

⁷ tu kuxānōg, tu:

—Pēnā', 'ōhōm Ganinet yōg tihik, tu' yīy, pāyā' yīy'ax puknōg xohix hā hām'āktux.

⁸ Pute 'ūm? Yūmūg nūn, tu hām'āpak, tu yāy yīy'ax hā hām'āpak.

⁹ Yā' yīy'ax xohix te: Pat yōg, xix Met yōg, xix 'Enamīt yōg, xix Mēyopatām yōg, xix Yonex yōg, xix Kapanox yōg, xix Po'ōn yōg, xix 'Ax yōg yīy'ax,

¹⁰ xix Pīnik yōg, xix Pānpit yōg, xix 'Eyit yōg, xix Nip yōg, xix Xinēn yōg, xix nōm te Hōm tu' pip xop yāy yīy'ax nōm xop nūn, tu nūktu Yenoyanēn tu' mōxaha', tu' pip.

¹¹ Yā' yāg Yoneo, xi' yāg yā' puknōg xop, nōm te Topa xak, xix Yoneo mōnāyxop yōg hāpxopmā'ax tat. Yā Kenet yōg, xix 'Anap yōg, yūmū'āte Topa yōg hāpxopmā max xe'ēgnāg 'āpak, tu yāy yīy'ax hā' xupak. Kaxīy.

¹² Hu kuxānōg, tu yāy pu yīkopit, hu:

—'Īntu', pute 'ūm nūhū'? Kaxīy.

¹³ Ha tik yāg kute'ex kummuk, tu:

—Yā mīnta hep xupyāg xo'op, hu nō pap-tux! Kaxīy.

Pāyā 'ap paptux'ah.

Pet te hām'āktux

¹⁴ Ha Pet yok, tuk-nīhā' xip tik te 11 kopah, tu' yīy ka'ok tu:

—Yonex yōg tihik, xix kōmēn Yenoyanēn kopa ti xop kamah: 'Ūg'āpax, 'āte 'ūm mūgā 'āpax.

¹⁵ 'A tik xop paptux'ah. 'Āmhok. Yā hōnhā māyōn te pexkox puka' yūm.

¹⁶ Pa hōmā tik hittap Yoeo te Topa pupi hām'āktux, hu:

¹⁷ "Hōmā, hāmyāxatamuk xohix nōg putup, ṭhā Topa te yāy Koxuk yīxōnnāp-tup 'ūhep xop xohix hah,

ha 'āk-tok pit xix 'āk-tok hex te Topa pupi hām'āktux putup,

ha' xiptap xop te yāy koxuk hā' pēnāp-tup, ha kutut xop te nō yōnkup putup.

¹⁸ Ha 'āmnīy 'ūm ṭhā Topa te yāy Koxuk yīxōnnāp-tup yāy yōg kāmānat xohix hah, tik xop xix 'ūn xop,

ha Topa pupi hām'āktux putup.

¹⁹ Ha Topa te hāpxopmā xe'ēgnāg xa' mūg putup pexkox tu' xix hām tu',

ha' hep 'āta pēnāp-tup, xix kuxap, xix kugōy.

²⁰ Māyōn yānām xok putup hāpkoxtap hah, ha māyōn hex yāyhā' hep 'ātap-tup,

ha 'āmnīy 'ūm xop ṭhā Topa nūn putup, tu hām tu' nūn putup, pu hāpxopmā'ax xohix kopit.

²¹ Tikmū'ūn 'ūm te Topa 'āxet'ax hā' xānā', pu' xut, puxix Topa nōm xut putup, pe tihik, pe 'ūhūn.' Kaxīy.

²² Pet te xe:

—'Iyaet yōg tikmū'ūn, 'āyīpkox pi', tu hām'āpax. Topa mūn te Nāyane yōg Yeyox yāyuktūnāhā', tu 'āxop ha nū'kutnāhā', nūy xa' mūg. Tu Yeyox hā hāpxopmā max xe'ēgnāg 'āxop keppah, ha hāmyūmmūg xate'.

²³ Topa te hāmyūmmūg, tu Yeyox hōm 'āxop xohix pu', ha 'āxop tep-tup nōg, tu tik kummuk xop pu' hōm Yeyox, pu mīpkupnix tup-tex.

²⁴ Pa Topa te putpu' hīnnāhā'. 'Ūxok xe'e', pāyā Topa mūn ka'ok, tu putpu' hīnnāhā'. Yā Yeyox te Topa hāk-tok xe'e'.

²⁵ Hōmā mōnāyxop Namix te Topa pupi hām'āktux, tu Yeyox 'āktux kamah, 'a yāy 'āktux'ah, hu:

“'Āmnīy xohix hā 'ātek xuxyā pēnāhā', 'ūgyīp xe'e hā' xip, nūy mōknīynām, huk kuxānōg 'ohnāg.

²⁶ Huk kuxa hittup, xix yīy'ax hittup.

Hōmāk xok putup, pāyāk kuxa yūm ka'ok, tu hāmmax hip, tuk hittup.

²⁷ Xatek koxuk nīm putup'ah. 'Ap xukpot tuk nīm putup'ah.

Xatek hep kutox 'āta tux hok, puk-tox 'ohnāg,

yāk mūn tik max xe'ēgnāg.

²⁸ 'Ōgnū putat xe'ēgnāg hāk mōg. Xate 'a' mūg putahat. 'Ūgyīkāgnāg hā 'āxip, yīk kuxa hittup," kaxīy.

²⁹ Tu xe:

—'Ūnōy mūnōm xop, 'āte xa hāpxe'e 'āktux: Mōnāyxop hittap Namix xok, ha nō hāpkot, ha' yōg hāpkox xip 'ūxukpot tu', tu yā' xip hōnhā.

³⁰ Namix te Topa pupi hām'āktux, tu Topa te hām'āktux xex yūmmūg, tu Topa yā' koit 'ohnāg yūmmūg, yā yāy 'āxet hā Topa te hām'āktux xex, hu: "Āte 'āmōkputox xekanāp-tup, pu tikmū'ūn xohix tu xat," kaxīy.

³¹ Hōmā kumak Namix te hōnhā yōg hāpxopmā'ax pēnāhā', tu' koxuk hā' pēnāhā', tu Topa yōg hāmyāyuktūnā'ax pēnāhā', tu' yōg putpu hī'ax pēnāhā', ha Topa te Yeyox nīm 'ohnāg xukpot kopah, ha Namix te' pēnāhā', tu Yeyox yāy hep 'āta kutox 'ohnāg pēnāhā'.

³² Hamūn, Topa te Yeyox hīnnā putpu', hak mūg xohix te' pēnāhā'.

³³ Yīy Topa te' xexkânāhā 'ūyīpxe'e hah, tu hām'āktux xex, tu hām'āktux, hu: "Āte Topa Koxuk yīxōmāp-tup tikmū'ūn hah," kaxīy. Ha hōnhā 'āxohix te' pēnāhā', tu' xupak.

³⁴ Namix mūn te pexkox ha 'a' mōg'ah. 'Ap pepi' mōg'ah, pāyā hām'āktux, hu: "Topa te hām'āktux 'ūkuxyā pu', hu: —'Ūgyīpxe'e hā yūhūm.

³⁵ 'Āte xa tu' gāy xop hupmāp-tup, xayī' xat, ha 'āmūn pu' yīpkox pī', " kaxīy.

³⁶ 'Iyaet yōg tikmū'ūn, 'āxop te Yeyox putex mīpkupnix tu'. 'Āte xa hām'āktux xe'e', 'ap koit'ah: Topa te Yeyox yāy kutnāhā', puyīy 'āxop hā 'āxuxyā xe'ēgnāg. Tu yā Topa yōg hāmyāy kutnā'ax xe'e'. Tu ta tu' kux. Kaxīy.

³⁷ Ha' xohix te' xupak, tu yāyhāhup, tu' kuxa te' xak, tu hām'āktux Pet pu', xix mō'pok xop xohix pu', hu:

—'Ūnōy mōnōm xop, putep mūn mīy'ax? Kaxīy.

³⁸ Ha Pet te:

—'Āpu yāyhāhup, nūy hāpkummuk mīy kux, hap-tox pix, xa Yeyox yā 'āxuxyā 'āktux, ha Topa te 'āxop yōg hāpkummuk mīy'ax xax-ogāp-tup, pu tu' kux, ha xa nū'kutnāp-tup yāy Koxuk Xe'ēgnāg.

³⁹ Topa te xa hām'āktux xex, hu: "Āte yāy Koxuk mō'kutnāp-tup xa', xix 'āk-tok hah, yā' xohix hah, nōm te hāptox tu' pip, Topa te nōm xop xānāhā'." Kaxīy.

⁴⁰ Ha Pet te hām'āktux punethok, nūy tu ka'ōgā', tu' xānāhā', hu:

—'Ānūn, tu tikmū'ūn kummuk nīm, Topa te tikmū'ūn kummuk xūyōgāp-tup hah. Kaxīy.

⁴¹ Ha tikmū'ūn xohix xexkah te hām'āpak, tu' yīpkox pip, hap-tox pix, yā yāy koxuk xop xohix te 3.000.

⁴² Ha Yeyox yōg mō'pok xop te hāmyūmmūgāhā mōkuma' mōg. Tu 'āmnīy xohix hā Topa pu hām'āktux, tu nū mūtik hām'āktux xī' xit, nūy Yeyox nōm te' pupi' xok pe'paxeh.

Tikmū'ūn kuxa mām ka'ok Yeyox Kunnix kopah

⁴³ Ha tikmū'ūn kuxānōg, 'Īhā Yeyox yōg mō'pok xop te hāpxopmā ka'ok xe'ēgnāg punethok,

⁴⁴ ha' kuxa mām ka'ok Yeyox kopa', tu yāy mūtik pip, tu hāpxop xohix koxip yāy pu',

⁴⁵ ha tik xop te yāy yōg hāpxop xohix hāmenex, nūy 'ūhok xop xohix pu' nīm, tu' xupkumīy 'ohnāg.

⁴⁶ 'Āmnīy xohix hā yāy tu nū'nāhā' Topa pet xexka kopa', tu yāy mūtik xit yāy pet kopa', nūy Yeyox xok'ax pe'paxeh, tu' kuxa hittup, yā kuxap-xet,

⁴⁷ tu Topa 'āktux max, ha tikmū'ūn xohix tep-tup, ha 'āmnīy xohix hā Topa te tikmū'ūn kuxa kummuk xit, nūy yānān tu' kuxa max

tat, tu' xohix nāg nōy nā' mōgāhā', tu mōktu xohix.

3

Topa te tik te hāpkumep hok hittupmāhā'

¹ Māyōn he 'Īhā Pet mōg xix Yoām, tu Topa pet xexka ha' mōg, nūy Topa pu hām'āktux Yoneo xop mūtik.

² Tik 'ūm te hāpkumep hok, tu' xip. 'Ūtut te' put tu hāpkumep hok, yāy hi'ax tox hā. 'Āmnīy xohix hā tikmū'ūn te Topa pet xexka mō'yīnnīn'ax tu' tat, nō'ōm mō'yīnnīn'ax 'āxet'ax "'Ūmax", ha tikmū'ūn nūn, ha tik te tu' kax, pu tu hāpxop 'ūm hok popmā',

³ ha Pet mōg nōmhā, xix Yoām, tu Topa pet xexka hā' mōxaha', ha tik te hāpkumep hok te' pēnāhā', tu:

—'Ām hok hōm hāpxop 'ūm! Kaxīy.

⁴ Ha tik 2 te' pēnāhā', tu' pēnā ka'ok, tu:

—Hēnā'! Kaxīy.

⁵ Ha tik te hāpkumep hok te' pēnā ka'ok, nūy hāpxop 'ūm pa'.

⁶ Ha Pet te hām'āktux, hu:

—'Ap pip'ah tayūmak, 'ūyā xa hāpxop 'ūm nōy hōm. Yā Nāyane yōg Yeyox Kunnix tekū'ā yāy 'āxet'ax hōm, 'ū' āxat, hu: 'Āpu, 'āk-nīhā xihip, nūy hāpkumep! Kaxīy.

Tu' yīy'ax hā' hittupmāhā'.

⁷ Tu' yīpxe'e mūg, tuk-nīhā' xip, ha' nōy yok mō'ka'ok, tu' kup ka'ok xi' pata ka'ok,

⁸ tu' hittup xexka', hu: Pūn, pūn, pūn, kaxīy, tu Topa 'āktux max.

⁹ Ha tikmū'ūn te' pēnāhā', tu hāpkumep pēnāhā', tu Topa 'āktux max 'āpak,

¹⁰ tu tik tupmāhā yūmmūg, hu hām'āktux, hu:

—'Āmnīy xohix hā' yūm, tu ta tu' xak Topa pet xexka mō'yīnnīn'ax 'Ūmax tu'! Kaxīy.

Tu' yēy.

Pet te hām'āktux Topa pet xexka kopa'

¹¹ Ha tik te Pet yāy kep hā' mūg, xix Yoām, ha tikmū'ūn kuxānōg, tu' nūn, tu yāy tu nū'nāhā', Xanomām yōg hāptopa hāmyīkox tu yāy tu nū'nāhā',

¹² ha Pet te tikmū'ūn pēnāhā', tu hām'āktux, hu:

—'Iyaet yōg tihik: Teptu 'ākuxānōg, tuk pēnā ka'ok? Putep pe'āpaxex? 'Ak mūg ka'ok'ah, 'ak mūg max xe'e'ah, nūy tik hit-tupmā'.

¹³ Mōnāy xop hittap 'Amanām yōg Topah, xix Mōnāy xop 'Iyak yōg, xix Mōnāy xop Yako yōg Topah, xix mōnāy xop xohix yōg Topah, yā Topa te' yōg Kāmānat Xe'ēgnāg Yeyox xexkanā xe'ēgnāg, pa 'āxop tep-tup nōg, tu' puknōg xop ha' mōgāhā'. Pinat pa te hāmyūmmūg, tu' xut putup, pu mōg, pāyā xatep-tup'ah.

14 'Ūmax xe'ēgnāg Yeyox, pāyā xatep-tup nōg, hu Pinat tu' xak, pu tik kummuk xut 'ūyānān tu', pu mōg, nōm te' nōy putex.

15 Yeyox te' xohix hīnnāhā', ha xatep-tex Yeyox, pa Topa te' putpu' hīnnāhā', hak mū'āte' pēnāhā'.

16 Yā Yeyox mūn ka'ok, tu tik hittupmāhā'. Tik kuxa yūm ka'ok Yeyox kopa', ha tik pata kup ka'ogā xe'e'. 'Āxop te' pēnāhā', tu' yūmmūg.

17 —'Ūnōy mūnōm xop, hōmā 'āxop te hāmyūmmūg 'ohnāg, xix 'āxexka xop te hāmyūmmūg 'ohnāg.

18 Hōmā tik xop hittap te Topa pupi hām'āktux, tu tikmū'ūn hittap pu hām'āktux, hu: "Topa te Kunnix yāyikutnāhā', pu nū'kutnā 'āxop hah," kaxīy. Yā Topa yōg hām'āktux hittap hā Yeyox xok mīpkupnix tu' nōmhā.

19 'Āpu yāyhāhup, nūy 'ōg hāpkummuk mīy kux, tu Topa ha mōg, pu'yīy Topa 'ōg mīy'ax kummuk xaxogā', pu tu' kux,

20 pu'yīy Topa 'ākuxa ka'ogā', tu Yeyox yāyikutnā tap, nūy xa nū'kutnā', tu nū'kutnāp-tup putpu',

21 pa hōnhā pexkox tu' xip, tu Topa yōg hāptup xe'e hīp. Yā Topa pupi hām'āktux xop te' xuktux tap.

22 Mōnāyxop hittap Mōyyex te Yeyox 'āktux kamah, tu: "Hōmā Topa te tik te yāy pupi hām'āktux yāyikutnāp-tup, 'āxop kopa' yāyikutnāp-tup, tu tik puxet xānāp-tup, pu'yī' pupi hām'āktux, 'ūkputuk. 'Ūxupax, nūy xat'ax xohix mīy.

23 Tikmū'ūn te Topa pupi hām'āktux 'ax 'āpax, tu 'āyīpkox hok, puxix nōm xop yīpkox pip hok xop kix putup," kaxīy.

24 Ha tik xop xohix te hām'āktux, yā' xohix te' xuktux, yā' Xāmō'eo, yā' xohix te' xuktux.

25 'Āxop xix mū'ūg yā nōm tik xop hāk mōkputox, ha hōmā Topa te pa'ax mīy yūmūg mōnāyxop mūtik, tu mōnāyxop 'Amanām pu hām'āktux, hu: "Āmōkputox te' hep xop xohix hā hāmmāxnāp-tup," kaxīy.

26 —Tu nū Kāmānat Xe'ēgnāg Yeyox kutnāhā 'āxop ha hāmāxap, pūyīy 'āhittupmā' xa hāpxopmā kummuk kux. Kaxīy.

4

Pet xix Yoām te Yoneo xexka xop keppa' tihī'

1 Hāpxip 'ohnāg 'Ihā Yoneo yōg 'āmānex xop nūn, xix Topa pet xexka yōg xonat xop kapitām, xix Xanoxeo xop nūn,

2 ha Pet xix Yoām te hām'āktux tikmū'ūn pu', tu hāmyūmmūgāhā, tu Yeyox yōg putpu' hī'ax 'āktux, ha' xexka xop gāy,

3 tu Pet mūg xix Yoām, tu 'āmnīy hā kanet ha' mō'tat, ha' tihī', ha' 'āmnīy, yā hāptup hīp.

4 Pa nōm te hām'āpax kuxa mām ka'ok Pet yōg hām'āktux kopa', ha' kuxa mām tik xop

xohix nōy nā' mōg, tu mōktu 5.000, yā' xohix xexka punethok.

5 Hāptup 'Ihā Yoneo xexka xop xix tik xop te hāmyūmmūg xop te yāy tu nū'nāhā Yenoy-anēn kopa',

6 tu Yoneo 'āmānex xexka xop mūtik pip, 'ūxohix te: 'Anān, yā 'āmānex xop xohix xat'ax, xix Kaxpax mūtik pip, xix Yoām, xix 'Anexān, xī' xape xop,

7 tu Pet xix Yoām xānāhā', tu' yīkopit, hu:

—Putep te 'āxop xat, xa tik pakut hittupmā'? Putep hā 'āxop te nōm tik hittupmāhā'? Kaxīy.

8 Ha Topa Koxuk te Pet ka'ogāhā', ha hām'āktux ka'ok, hu:

—Tikmū'ūn xexka xop, xix tik xop te hāmyūmmūg xop: 'Ūg'āpax!

9 'Āxop tek mūn yīkopit, hu: "Putep te 'āxop xat, xa nōm tik hittupmāhā'? Putep hā 'āxop te' hittupmāhā'?" Kaxīy.

10 'Ūg'āpax, 'āte xa hāmyūmmūgā'ax, xa hāmyūmmūg, pu'yīy 'Iyaet yōg tikmū'ūn hāmyūmmūg. 'Āxop te Nāyane yōg Yeyox Kunnix putex mīpkupnix tu', ha Topa te' hīnnāhā putpu', hamūn te nōm tik hittupmāhā', Yeyox 'āxet'ax 'āktux hā' hittupmāhā'. Pēnā'. Nōmhā' xip, tu hāpkumep.

11 Yeyox yā mīptut hā' māykup putuk, xix koxuk. 'A 'āxop te Yeyox putup nōg, pa Topa te' xexkanāhā xe'ēgnāg.

12 'Ok xip tik nōy te tikmū'ūn kuxa kummuk xit, nūy yānān tu' kuxa max tat? 'Ok xip hāpxexka xohix tu'? 'Ap xip'ah. Yeyox yāp-xet xip. Topa te Yeyox 'āxet'ax hōm tikmū'ūn pu', pu Yeyox yūmūg kuxa kummuk tu xit, nūy nō max tat 'ūyānān tu'. Kaxīy.

13 Ha' xexka xop te Pet pēnāhā xix Yoām, ha' yīpkutuk 'ohnāg, yīy hāmp'e'paxex, hu:

—Tappet xax yūmmūg kutōgnāg, pāyā tute Yeyox mūtik hāpkumep, yā' yōg tik xop, kaxīy.

14 Ha tik tupmāhā' xip, ha' xexka xop te' pēnāhā', hu yāyhāhup, tu' yīy 'ohnāg,

15 tu:

—'Āpep, nūy hāptopa mōg. Kaxīy.

Ha' mōg, ha' xexka xop te yāy mūtik hām'āktux hā' nōy yānān,

16 hu:

—Putep mūn mīy'ax? Pet xix Yoām te hāpxopmā ka'ok xe'ēgnāg. Tep tu yā' koit? Yā Yenoyanēn yōg tikmū'ūn xohix te' pēnāhā', tu' yūmmūg.

17 'Āpu, nōm tik 2 xat hok, pu Yeyox 'āxet'ax 'āktux hok tikmū'ūn pu', pu tikmū'ūn Yeyox xaxok. Kaxīy.

18 Tu Pet xānāhā xix Yoām, tu' xat hok, hu:

—Yeyox 'āxet'ax 'āktux hok, xix tikmū'ūn pu Yeyox yūmmūgā hok. Kaxīy.

19 Pa Pet xix Yoām te:

—'Ăxop pa te hămyŭmmŭg: Pi'yā' max, 'ok pe 'ăxop puk yĭpkox pip, 'ok pe Topa puk yĭpkox pip? 'Ăxop te hămyŭmmŭg.

²⁰ 'Ūgmŭ'ăte Yeyox 'ăxet'ax 'ăktux putup mō'kuma' mōg, Topa te 'xat, hak mŭg yĭpkox pip Topa pu hămăxap, hu hăpxopmă'ax pēnăhă 'ăktux putup, xix hăpxopmă'ax 'ăpak 'ăktux putup kamah. Kaxĭy.

²¹⁻²² Ha tik hittup yōg hămyăxatamuk te 40, yĭy tikmŭ'ŭn xohix te Topa 'ăktux max, hăpxopmă ka'ok xe'ēgnăg hah, ha 'xexka xop te Pet xŭyġăp-tup, xix Yoăm, păyă tikmŭ'ŭn yĭpkutuk, hu' mĭy 'ok pa' găy, tu Pet xu-pepmăhă xix Yoăm.

Yeyox yōg tik xop te Topa pu hăm'ăktux

²³ Ha' mōg, tu mōktu mōxaha' xape pet tu', tu' xexka xop yōg hăm'ăktux'ax 'ăktux 'ŭxape xop pu', tu 'ămănex xexka xop yōg hăm'ăktux'ax 'ăktux, xix tik xop te hămyŭmmŭg yōg hăm'ăktux'ax 'ăktux.

²⁴ Ha' xupak, tu Topa pu hăm'ăktux, tu yăy yĭy puxet hă hăm'ăktux, hu:

—Topah, 'ăxexka xe'ēgnăg, xate pexkox mĭy, xix hahăm, xix kōnăg xexka', xix hăpxop xohix te kopa' pip mĭy.

²⁵ Hōmă 'Ăkoxuk Xe'ēgnăg te hăm'ăktux, tu' xat, pu 'ōg kămănat Namix hăm'ăktux, hu: "Tep tu' puknōg xop găy? Ha' hep xop xohix te hămpe'panōm, hu: "Ūkxexka", kaxĭy, pak-tōgnăg, tu xe: "Ūgka'ok", kaxĭy, păyă' pu'ŭgnăg.

²⁶ Hăpxexka xohix yōg xexka xop te yăy tu nŭ'năhă', nŭy Topa hă kumĭy, nŭy Topa yōg hămyăyikutnă'ax mŭtik yăy tuk-mĭy," kaxĭy.

²⁷ —'Ap koit'ah. Yă Yenoyanēn yōg xexka xop, yă Yoneo yōg tikmŭ'ŭn xi' puknōg xop, xix Pinat, xix 'Enot, tu yăy tu nŭ'năhă', nŭy 'ōg Kămănat Xe'ēgnăg hă kumĭy, păyă xate Yeyox yăyikutnăhă', tu nōm xexkană xe'ēgnăg.

²⁸ Hōmă xate hămpe'ăpaxex, tu hăm'ăktux tap, yĭy 'ōgnŭ hăm'ăktux hittap hă Yoneo yōg tikmŭ'ŭn kummuk te Yeyox kummugăhă nōmhă, xi' puknōg kummuk xop te' kummugăhă nōmhă.

²⁹ Tu' găy, tu' yĭy găynăm, yĭg mŭ'ăte xa tu' xak, xak mŭg ka'ogă', 'ŭyĭy hăpxopmă max, nŭy nōm xexka xop yĭpkutuk hok, nŭy 'ōgnŭ hăm'ăktux 'ăktux pax.

³⁰ Yă 'ăka'ok, hu tikmŭ'ŭn hittupmăhă', tu hăpxopmăhă', xix hăpxopmă ka'ok xe'ēgnăg, pu tikmŭ'ŭn pēnă', tu 'ōg Kămănat Xe'ēgnăg Yeyox hă hăpxopmăhă'. Kaxĭy.

³¹ Tu Topa pu hăm'ăktux kux, ha mĭptut yăy nuhuk, ha Topa Koxuk te' xohix ka'ogăhă', hu Topa yōg hăm'ăktux 'ăktux, tu' yĭpkutuk 'ohnăg.

'Ūkuxa măm ka'ok xop te hăpxop xohix koxip

³² Yă' kuxa măm ka'ok, tu' kuxap-xet, xip-tox puxet. 'Ap hăm'ăktux'ah, hu: "Yōgnŭ", kaxĭy. 'Ămhok. Păyă hăpxop xohix yă yăy yōg, tu' xupkumĭy 'ohnăg.

³³ Ha Yeyox yōg mō'pok xop te hăm'ăktux ka'ok, tu yŭmŭg xuxyă Yeyox putpu hi'ax 'ăktux, ha Topa te' kuxa măm ka'ok xop ka'ogăhă', ha tikmŭ'ŭn tep-tup pax.

³⁴ 'Ap hok xop pip'ah, pap-te xop te mĭptut hămenex xix hahăm, tu tayŭmak pop, tu' xape xop pu' popmăhă',

³⁵ Ha' mō'pok xop te' pop, tu' hok xop pu' popmăhă'.

³⁶ Ha Xip yōg tik yă Nemi hă' mōkputox, tu' xuxet'ax Yoye Maname', ha' xuxet'ax te tikmŭ'ŭn yĭy'ax hă: "Nōm te' nōy ka'ogăhă",

³⁷ tu yăy yōg hăm hămenex, tu tayŭmak paha', tu mō'pok xop pu' hōm.

5

'Ănănŭn xix Xapit

¹ Tik 'ăxet'ax 'Ănănŭn, xi' xetut 'ăxet'ax Xapit, tu yăy yōg hăm hămenex,

² ha' nōmenex, tu tayŭmak paha', tu mō'pot, tu' yăg xaptop, tu' yăg nōy paxnŭn mō'pok xop hah, Yă mō'ămă', hu:

—Yă tayŭmak xohix, yă' kux, 'ap nōy xip'ah. Kaxĭy.

Ha' xetut te yă' koit yŭmmŭg, tu mō'ămă kamah.

³ Pa Pet te:

—'Ănănŭn, tep tu xate Hămgăyăgnăg yōg hăm'ăktux 'ăpak, tu 'ăyĭpkox xip nōm hăm'ăktux kummuk pu'? Yă Topa Koxuk pu yă' koit, tu tayŭmak yăgnăg xaptop, tu' yĭy 'ohnăg!

⁴ Hahăm 'ōgnŭ, xix tayŭmak xohix 'ōgnŭ'. Putep mŭn pe'ăpaxex 'ăkuxa kopah? Xate tikmŭ'ŭn pu' koit'ah, pa Topa mŭn pu' koit. Kaxĭy.

⁵ Ha' xupak, tu hăm tu' năhă', tu' xok xe'e', ha nōm te' xupak kuxănōg xexka'.

⁶ Tik xiptap te 'Ănănŭn kĭy topixxax hă, tu mō'tat, tu nō hăpkot.

⁷ Ha 'ot 3 nōg, 'Īhă' xetut mō'năhă', 'ap te yĭpxox xok'ax yŭmmŭg'ah,

⁸ ha Pet te:

—Pu, 'ăyĭy. 'Ūgnŭ hahăm yōg tayŭmak xohix te xĭy? Kaxĭy.

Ha:

—Hamŭn. Yă tayŭmak xohix, 'ap nōy xip'ah. Kaxĭy.

⁹ Pa Pet te:

—Tep tu 'ăyĭpxox te koit, xix 'ămŭn? 'Ok Topa Koxuk pu' koit, nŭy nō găyă'? 'Ūxupax: Tik te 'ăyĭpxox nō hăpkot, tu ta' nŭn, tu nŭ', tu mō'ătat putup kama hăptopa'. Kaxĭy.

¹⁰ Pet te hăm'ăktux kux, 'Īhă' xetut te hăm tu' năhă', Pet pata yĭka' năhă', tu' xok, ha tik xiptap nŭn, tu' pēnăhă', tu hăptopa mō'tat, tu' yĭpxox yōkămă' xe nō hăpkot.

¹¹ Ha' kuxa mām ka'ok xop kuxānōg xexka', ha tikmū'ūn xohix te' xupak, tu kuxānōg kamah.

Ha hāpxopmā ka'ok xe'ēgnāg

¹² Ūkuxa mām ka'ok xop te yāy tu nū'nāhā' Topa pet kux kaxax kaka hah, ha' kux kaxax 'āxet'ax Xanomām yōg, ha Yeyox yōg mō'pok xop te hāpxopmā ka'ok xe'ēgnāg tikmū'ūn kopah, puyī' pēnā',

¹³ yīy tikmū'ūn kuxa mām 'ohnāg xop kuxānōg, tu' kuxa mām xop yīpkutuk, 'ap te yāy tu nū'nā'ah nōm xop mūtik, pāyā' xohix te nōm hāp-tup pax.

¹⁴ Ha tikmū'ūn punethok kuxa mām ka'ok yūmūg xuxyā kopah, tu' nūn, tu' nōy tu' mōxaha', tu yāy tu nū' kuxa mām ka'ok xop xok, tik xop xix 'ūn xop,

¹⁵ ha tikmū'ūn te' pakut xop tat putat kopah, tu mīm xix 'extet tu' xex, pu Pet koxuk kopa nāy, nūy hittupmā'.

¹⁶ Ha kōmēn punethok te Yenoyanēn yīka' pip, ha kōmēn nōy yōg tikmū'ūn nūn Yenoyanēn tu', tu' pakut xop tat, xix yāmīy kummuk kopā' pip xop tat, ha' hittupmāhā'.

Ūxexka xop te tik xop kummugāhā'

¹⁷ Pa tik te 'āmānex xop xat'ax te' yīpkumīy, xix Xanoxeo xop te' yīpkumīy,

¹⁸ tu' xat, pu Yeyox yōg mō'pok xop mūy, tu kōmēn yōg kanet ha mō'tat, tu' xex.

¹⁹ Pa 'āmnīy koxtap 'īhā pexkox yōg nū'kutnā'ax nūn, tu hāmyīnnīn'ax xōn, tu tik xop mōy kanet kopah, tu hāptopa' mōgāhā', tu' xat, hu:

²⁰ —Mōg, mōg, Topa pet xexka ha mōg, nūy Yeyox 'āktux, nōm te tikmū'ūn xop xohix hīnnā'ax. Kaxīy.

²¹ Ha hām'āpak, tu' mōg, tu māyōn xupep 'īhā tikmū'ūn yūmmūgāhā Topa pet xexka kopah.

Ha ta tik te 'āmānex xop xat'ax nūn, xi' yōg xop xohix, tu Yoneo xexka xop xohix xānāhā', pu yāy tu nūnnāy, ha' xat, hu:

—'Āpu, kanet tu nūnnāy Yeyox yōg mō'pok xop. Kaxīy.

²² Ha xonat xop mōg kanet hah, tu' xak, pāyā 'ap ti'ah, yīy putpu' nūn, tu' xexka xop pu' xuktux,

²³ hu:

—Pīpkup ka'ok hā mō'yīnnīn, ha' xōn ha' xīy 'ohnāg, ha xonat xop te hāmyīnnīn'ax yīka' pip, nūy pēnā', hak mū'āte kanet yōg hāmyīnnīn'ax xōn, pāyā 'ap tik 'ūm xip'ah kanet kopah. Kaxīy.

²⁴ Ha Topa pet xonat xop yōg kapitām te' xupak, xix 'āmānex xexka xop te' xupak kamah, tu:

—'Īhok, pute 'ūm? Kaxīy.

²⁵ Ha tik 'ūm nūn, tu:

—Hōmā 'āxop te tik tigāhā kanet kopah, yā hōnhā Topa pet xexka tu' pip, tu tikmū'ūn yūmmūgāhā'. Kaxīy.

²⁶ Ha xonat xop te tikmū'ūn yīpkutuk, tu hāmpē'paxex, hu "Pe yā 'ā mīkaxxap tux!" kaxīy. Hu mō'pok xop xūyā 'ohnāg, pāyā' mūg, tu' nūnnāhā',

²⁷ tu' xexka xop keppa' xex, ha tik te 'āmānex xop xat'ax te' yīkopit, hu:

²⁸ —'Ok 'āyīpkox hok? Hōmāg mū'āte xa' xat, hu: "Āyīy hok, Yeyox 'āxet'ax hā yūmmūgā hok!" kaxīy. Pa 'āxop te tikmū'ūn xohix yūmmūgāhā Yenoyanēn kopah, nūy 'ūgmūg kupex Yeyox xok'ax hah, pu tikmū'ūn 'ūgmūg 'āktux kummuk. Kaxīy.

²⁹ Pa Pet xix mō'pok xop te hām'āktux hā' nōy yānān, tu:

—'Ūgmū'āte Topa yī'ax 'āpak, tu Topa puk yīpkox pip hāmāxap, tuk-nāy tu tikmū'ūn puk mūg yīpkox pip.

³⁰ Āxop te Yeyox putex mīpkupnix tu', pipkup hā' xup mīpkupnix tu', nūy tup-tex, ha mōnāy xop yōg Topa te' putpu' hīnnāhā',

³¹ tu' xexkanāhā yāy yīpxe'e hā', nūy hāpkummuk mīy'ax xaxogā', pu tu' kux.

³² 'Ūgmū'āte' pēnāhā', xix Topa Koxuk te' pēnāhā', tu hām'āpak, tu xe hām'āktux, ha Topa te yāy Koxuk Xe'ēgnāg nū'kutnāhā tikmū'ūn hah, nōm xop kuxa mām ka'ok xop ha nū'kutnāhā'. Kaxīy.

³³ Ha' xupak, tu' gāynām, tu' kix putup,

³⁴ pa Paniye xop yōg tik xip, 'ūxuxet'ax Gāmāniet. 'Ōhōm tik te hāmyūmmūg xexka', tu Topa yōg xat'ax yūmmūgāhā', ha tikmū'ūn xohix tep-tup pax. Hak-nīhā' xip, tu' xat, hu:

—'Āpu, tik xop hāptopa mōgā'. Kaxīy.

Ha' mōgāhā Yeyox yōg mō'pok xop.

³⁵ Ha Gāmāniet te' xexka xop pu hām'āktux, hu:

—'Iyaet yōg tik xop, 'ōg pa mōxip, xayīy 'āmpē'āpaxeh, nūy hāpkummuk 'ūm mīy hok.

³⁶ Hōmā Teot te tikmū'ūn xat putup, tu tik xop te 400 mōgāhā', hap-tex, ha nōm xop te' pe' mōg te' xaxok, ha' kux.

³⁷ Ha hāpxip 'īhā gohet te tikmū'ūn mō'kupix, tu tikmū'ūn xohix te xīy yūmmūg putup, hu mō'kupix, 'īhā Ganinet yōg Yot xip, ha tikmū'ūn punethok te Yot pe' mōg, ha' xok, ha tikmū'ūn te yīkām xupmāhā'.

³⁸⁻³⁹ Yīy hōnhā 'āte xa hām'āktux, hu: Tik xop nīm, tu' kummūgā hok. Pī'yā? 'Ok pe Topa te nōm nū'pok, 'ok pe tik 'ūm te nū'pok? 'Āte' yūmmūg'ah. Yī' hīp, ka Topa mūtik yūmūg yāy tuk-mīy. Kaxīy.

Ha' xexka xop te Gāmāniet yōg hām'āktux 'āpak, tu' yīpkox pip,

⁴⁰ tu Yeyox yōg mō'pok xop xānāhā', tu' kix xokxax hā', tu' xat, hu:

—Yeyox 'āxet'ax 'āktux hok! Kaxīy.

Tu' tux hok, pu mōg.

⁴¹ Ha 'mōg, tu' kuxa hittup. Yā' xexka xop te' xūyāhā', Yeyox xūy putuk tu' xūyāhā', yī' hittup.

⁴² Tu 'āmñiy xohix hā hāmyūmmūgāhā Topa pet xexka kopah, xix mīptut xohix kopah, tu Yeyox yā Kunnix 'āktux. Topa te nōm yāyuktñāhā xe'ēgnāg.

6

Tik te 7 te mō'pok xop hā' tehe'.

¹ Hāpxip 'lhā' kuxa mām ka'ok xop xohix nōy nā' mōg. Ha Genex yī'ax yōg tikmū'ūn te:

—'Āmñiy xohix hā 'āxop tek xit'ax popmāhā yūmū yōg hok mām xop pu', pāyā 'ūgmūg yī'ax xop xate' xaxok, tuk xit'ax 'ohnāg hōm, 'lhā Yoneo yī'ax hok mām xop pu' popmāhā'. Kaxīy.

² Ha mō'pok xop te 12 te' kuxa mām ka'ok xop xohix xānāhā', tu:

—Topa tek-mūg xat, 'ūyōg hām'āktux yūmmūgā', hak mū'āte Yeyox tu hāpxopmāhā'. 'Ap hāmyūmmūgā kux putup'ah, nūy kuxa mām ka'ok xop tu' xit'ax popmā'.

³ 'Āpu, tik max te 7 yīmōgatux 'āxop kopah, pu hāpxop popmā', puyīy 'ūn xop xaxogā hok,

⁴ pak mū'āte Topa pu hām'āktux pax putup, tu Topa yōg hām'āktux yūmmūgāp-tup. Kaxīy.

⁵ Ha' xohix te nōm hām'āktux putup, hu' kuxa hittup, tu tik xop yīmōgatux, tu 'Extep yāyuktñāhā hāmāxap. Yā' kuxa yūm ka'ok, ha Topa Koxuk te' ka'ogāhā'. Ha tik nōy yīmōgatux 'Extep mūtik, tik xohix te: Piniḡ, xix Ponok, xix Nīkānōg, xix Tīmām, xix Pām, xix kōmēn 'Ātitik yōg Nīkonao, yā Nīkonao te Yoneo xop hā' puknōg tap, pāyā hōmā nōm xop kopa mō'nāhā', tu mōnāy xop yōg hāpxopmā'ax tat.

⁶ Ha tik te 7 mōgāhā mō'pok xop hah, tu' keppa tigāhā', ha Topa pu hām'āktux, tup-tox yīmū' yīm nōm, pu Topa Koxuk ka'ogā'.

⁷ Ha tikmū'ūn punethok te Topa yōg hām'āktux 'āpak, ha Yenyoyanēn yōg tikmū'ūn punethok kuxa mām ka'ok, ha' kuxa mām ka'ok xop xohix nōy nā' mōg. 'Āmānex xop kama te Topa yōg hām'āktux pu' yīpkox pip.

'Ūgāy xop te 'Extep mūg ka'ok

⁸ Ha 'Extep te hāpxopmā xe'ēgnāg, pu tikmū'ūn pēnā', ha Topa te' ka'ogāhā', tup-tup pax,

⁹ ha Topa pet 'āxet'ax Nimet yōg, ha' yōg xop nūn, tu hām'āktux hā' nōy yānān 'Extep mūtik, ha tik xohix te: Xinēn yōg, xix 'Anex-anit yōg, xix Xinix yōg, xix 'Ax yōg. 'Ūxohix te hām'āktux hā' nōy yānān nām 'Extep mūtik.

¹⁰ Pa 'Extep te hāmyūmmūg xexka', yā Topa Koxuk te nōm pu hāmyūmmūgāhā', ha' nōy xop te' yēy, tu' gāy.

¹¹ Tu' nōy xop pu tayūmak xaptop hā' hōm, tu' xat, hu:

—'Āmōg, nūy yā' koit. Kaxīy.

Ha' mōg, tu' koit, hu:

—'Extep te hām'āktux kummuk, tu Topa 'āktux kummuk xix Mōnāy xop Mōyyex 'āktux kummuk. Kaxīy.

¹² Tu' yīy hā tikmū'ūn gāyāhā', xi' xexka xop, xix hāmyūmmūg xop, tu' koit hā' xohix gāyāhā', tu 'Extep mō'tat, tu' xexka xop keppa' xix,

¹³ ha tik xop te koit hā hām'āktux, hu:

—'Extep te hām'āktux kummuk, tu' xuktux pax, ha' kux 'ohnāg, tu Topa pet xexka 'āktux kummuk, xix Mōyyex yōg xat'ax 'āktux kummuk.

¹⁴ Kāy te hām'āktux, hak mū'āte hām'āpak, ha: Nāyane yōg Yeyox te Topa pet xexka koxyōy putup, tu Mōyyex yōg hāpxopmā'ax hittap nōāp-tup, nūy yā' xat'ax puknōg hā' nōy yānān. Kaxīy.

Pāyā' koit.

¹⁵ Ha tikmū'ūn xexka xop te 'Extep pēnā ka'ok, ha' pa hittup xe'ēgnāg, tu pexkox yōg mō'kutnā'ax putuk.

7

'Extep te yāy pupi hām'āktux

¹ Ha tik te 'āmānex xop xat'ax te 'Extep yīkopit, hu:

—'Ok tik te hāpxe'e 'āktux? Kaxīy.

² Ha 'Extep te:

—'Ūkxape xop xi' tak mūnōm xop, 'ūg'āpax: Topa xexka xe'ēgnāg te pexkox kopa' xip, tu hām'āktux mōnāy xop 'Amanām pu', ha hāpxexka Mēyopotām tu' xip hāmāxap.

³ Ha hām'āktux, hu: "'Ūg hām nīm, xix 'āxape xop nīm, nūy mōg hām 'ūm tu 'āte xa' mūg putup," kaxīy.

⁴ Ha' xip hāpxexka Kānet tu', tu' mōg, tu mōktu xupep kōmēn 'Anāg tu', tu' tihī', ha yāy tak xok, ha Topa te mō'kutnāhā 'ōg hām hah, nūnte'.

⁵ Pa Topa te 'Amanām pu hām 'ohnāg hōm, hām 'ūm kutōgnāg tu' hōm 'ohnāg, ha 'Amanām te' puknōg yōg hām tu' xip, pa Topa te hām'āktux xex, hu: "'Hōmā 'āte xa nū hām hōm putup, tu 'āxok tehomiḡ, 'āmōkputox pu' hōm putup," kaxīy. Pāyā 'Amanām kutok hok.

⁶ Ha Topa te xe hām'āktux 'Amanām pu', hu: "'Āk-tok xupep-tup xop te' puknōg yōg hām tu' pip putup, ha hāmyāxatamuk xohix te 400 hā' puknōg xop te' xūyāp-tup, ha' hok hā' hām putup.

⁷ 'Ūkpa te hāmyūmmūg, ha hāmyāxatamuk te 400 nōg, 'lhā 'āte' gāy xop 'ūyānān tu'

xūygāp-tup, ha 'āmōkputox xupepmāp-tup, puk xax nūnte, nūy tu nūk tetex," kaxīy.

⁸ Ha Topa te pa'ax mīy 'Amanām mūtik, pu tuk-tok xupep-tup xop xohix hāmyūmmūg, yā Topa yōg tikmū'ūn xe'e, ha Topa te' xat, hu: "Āxop yāy nāg xax xak kutōgnāg 'ūyīmap. Puyā 'āk-tok pit xupep-tup xop xohix yāy xax mep, ha 'a' kux'ah," kaxīy. Ha 'Amanām tek-tok 'Iyak put, ha 'āmnīy te 8 nōg, 'Thāk-tok pit yāy xax yīmap tu' xak, ha 'Iyak tek-tok pit Yako put, ha Yako tek-tok put te 12, tuk-tok pit xohix yāy xax 'ūyīmap tu' mep kutōgnāg.

⁹ —Ha mōnāyxor Yako kutok pit xop te' taknōy yīpkumīy, tu' taknōy Yoye putup nōg, hu' nōmenex hāpxexka 'Eyit yōg puknōg xop pu', tu tayūmak pop, ha' mōgāhā', tu ta tu' mōg, tu mōktu xupep 'Eyit tu', ha Yoye kuxa tek-nōg, pāyā Topa te Yoye mūtik tihī,

¹⁰ tu hāpkummuk tu' xut, tu mō'nīynām, puyīy hāmyūmmūg xexka, ha 'Eyit yōg tik te tikmū'ūn xat'ax te Yoye putup pax, tu' xexkanāhā yāy pet kopah, xix hāpxexka 'Eyit kopah.

¹¹ Ha hāmyāxatumuk 'ūm hā hāmhōgnāg, 'ap xit'ax pip'ah, ha putup te' kix 'Eyit yōg tikmū'ūn, xix Kānā'āg yōg tikmū'ūn, ha mōnāyxor te yāy xit'ax xak, pāyā xipī'ah.

¹² Pa tik 'ūm te hām'āktux Yako pu', hu: "Yā' pip xit'ax 'Eyit kopah." Kaxīy. Ha Yako tek-tok pit te 10 mō'pok 'Eyit tu', ha' taknōy te 10 mōg hāmāxap, tu ta tu' xit'ax xak.

¹³ Tuk-nāy tu' mōg 'ūxeheh, ha Yoye te hām'āktux yāy taknōy xop pu', hu: "Ūgmūn yā 'ātaknōy Yoye!" kaxīy. Ha tik te' xat'ax 'āxet'ax Pana'o', tu Yoye xape xop yūmmūg.

¹⁴ Ha Yoye te yāy tak xānāhā', xi' xape xop xohix, pu nū', 'ūxohix te 75.

¹⁵ Hu' nūn, tu ta tu' nūn tu nūktu mōxaha 'Eyit tu', ha hāpxip 'Thā Yako xok xix Yoye', xi' taknōy xop.

¹⁶ Ha' yīnxax tat Xikēg tu putpu', tu nō hāpkot. Hōmā 'Amanām te nōm xukpot pop, tu tayūmak hā' yānān 'Emōg kutok mūtik.

¹⁷ —Ha 'Iyaet yōg tikmū'ūn xop xohix nōy nā' mōg, tu mōktu xohix xexka', ha hāmyāxatumuk xohix nōg, 'Thā Topa te yāy yōg hām'āktux xutīgāhā', tu hām xexka hōm 'Amanām mōkputox pu'.

¹⁸ Ha tik puknōg nōy xip 'Eyit tu', nōm te Yoye yūmmūg 'ohnāg,

¹⁹ tu kokexmax putuk, tu' gāynām, tu yūmūg mōnāyxor xūygāhā', tu' xat 'ūgāy tu', hu: "Ūtut tek-tok pit put, puyā' nīm hāptopa', puyī' xok!" kaxīy.

²⁰ Ha Mōyyex mūg tut te' put, ha' māynāg, Topa te nōm putup pax, ha māyōn hex 'ānuk te 3 hā yāy tak pet kopa' xip,

²¹ ha hāptopa' xupep, tu' xex, ha nōm xat'ax kutok hex te' xipihī', tup-tup, 'ūmax hah, tu' nōy yāy.

²² Ha' puknōg xop te Mōyyex pu hāmyūmmūg'ax hāmyūmmūgāhā', puyīy hāmyūmmūg xexka', ha hām'āktux ka'ok, xix hāpxopmā ka'ok kamah. Kaxīy.

²³ 'Extep te xe:

—Hāmyāxatumuk te 40 nōg, 'Thā Mōyyex mōg, nūy xape xop pēnā',

²⁴ tu' pēnāhā', ha tik puknōg te 'Iyaet yōg tik kummugāhā', ha Mōyyex te' xape mō'nīynām, tu 'Eyit yōg puknōg 'ūyānān tu' kix, ha' xok.

²⁵ Ha Mōyyex te hāmp'e'paxex, hu: "Topa tek putup, 'ūxape xop mō'nīynām," kaxīy. Pāyā tik 'ūm te Mōyyex yōg hāmp'e'paxex yūmmūg 'ohnāg.

²⁶ Ha hāptup nōy 'Thā tikmū'ūn yāykix, ha Mōyyex te' pēnāhā', tu' nōy nīmāp-tup, hu: "Āxop yā xape'. Putep tu yāykix?" kaxīy.

²⁷ —Pa' nōy tep-tup nōg, tu: "Ū 'ūm 'āmūn? 'Ū 'ūm te 'āxexkanāhā', xayīy hāpxopmā'ax tu kopit? 'Āpa te hāmyūmmūg 'ohnāg.

²⁸ Hōmā xate 'Eyit yōg tik putex. 'Ok hōnhā xatek mūn putex'ax?" kaxīy.

²⁹ Ha Mōyyex kuxānōg, tu' xupaha hāptox hah, tu' nōy yōg hāpxexka Mīni'ān tu' xip, tu hāpkumep, tuk-tok pit 2 pop.

³⁰ —Ha hāmyāxatumuk te 40 nōg, ha pexkox yōg nū'kutnā'ax nūn, ha Mōyyex te' pēnāhā', tu hām panip xexka yōg yīktix Xīnāy yīmū' pēnāhā', ha mīxux te kuxap xakot, ha pexkox yōg nū'kutnā'ax te' kopa' xip,

³¹ ha' pēnāhā', tu kuxānōg, tu hūmnāg tu' mōg, tu Topa yīy'ax 'āpak, ha:

³² "Ūgmūn yā Mōnāyxor hā Topah, xix Mōnāyxor 'Amanām hā Topah, xix Mōnāyxor 'Iyak hā, xix Mōnāyxor Yako hā Topa kamah," kaxīy. Ha Mōyyex kuxānōg xexka', tu yāy puxux nām, 'ap pēnāp-tup'ah,

³³ ha Topa te: "Hām te 'āk-nīhā 'āxip hām tu', mō'ānā hok, Topa xip tu'.

³⁴ 'Āte yāy yōg tikmū'ūn xūy pēnāhā 'Eyit kopah, hu' kokōn 'āpak, tuk nūn, 'āhak nūn, nūy mō'ākutnā 'Eyit tu'." kaxīy.

³⁵ 'Extep te xe:

—Hōmā tikmū'ūn te Mōyyex putup nōg, tu: "Ū 'ūm te 'āxexkanāhā', xayīy kopit?" kaxīy. Pa hōnhā Topa te Mōyyex nū'kutnāhā tikmū'ūn hah, nūy Mōyyex xexkānā', nūy tikmū'ūn mōy hām puknōg kopah, ha Topa te pexkox yōg nū'kutnā'ax nū'kutnāhā', nōm te mīxux kopa' xip, pu Mōyyex mūtik tu' ti', tu mō'nīynām.

³⁶ Ha Mōyyex te 'Iyaet yōg tikmū'ūn hittap mōy hāpxexka 'Eyit kopah, tu hāmyāxatumuk te 40 hā' mōgāhā', tu hāpxopmā ka'ok xe'ēgnāg hāpxexka 'Eyit tu', xix kōnāg xexka 'Āta tu', xix hām panip xexka tu', puyīy nōm tikmū'ūn pēnā'.

³⁷ Hamūn, Mōyyex te tikmū'ūn hittap pu hām'āktux, hu: "Topa te tik yāy'kutnāp-tup

puyîy tu pupi hām'āktux, 'āxape xop kopa yāyikutnāp-tup, 'ānōy, 'ūkputuk," kaxîy.

³⁸ Mōyyex xix tikmū'ūn te hām panip xexka tu' pip, ha pexkox yōg nū'kutnā'ax te hām'āktux yīktim Xīnāy yīmū', tu Mōyyex pu hām'āktux, xix yūmūg mōnāy xop pu', ha Mōyyex te Topa yōg xat'ax pop, nūy yūmūg xohix pu' popmā'.

³⁹ —Mōnāy xop te Mōyyex yōg hām'āktux 'āpak, pāyā' yīpkox 'ohnāg, tu' nīm, tu hāp xexka 'Eyit xak, tu 'Eyit tu' mōg putup putpu',

⁴⁰ tu hām'āktux 'Anām pu', ha 'Anām te 'Iyaet yōg tikmū'ūn hā 'āmānex xat'ax hāmāxap, ha hām'āktux, hu: "Āpu, Topa komut 'ūm pipkup hā mīy, 'ūyīy heyah, puyîy yūmūg xohix tu mōgā'. Pi'yā' mōg Mōyyex, nōm tek mūg mōgāhā'? 'Ap yūmmūg'ah," kaxîy.

⁴¹ Ha mūnūytut kutok komut mīy, pipkup yānām nāg 'āta hā' mīy, hu nō heyah, ha xok xop mō'hap nōm mūnūytut kutok komut keppah, tu' haxyāhā', tu' kuxa hittup.

⁴² Pa Topa te nōm topa komut xop putup nōg, hu tikmū'ūn nīm, 'ūgāy tu', ha' kuxa mām ka'ok māyōn kopah, xix māyōn nāg kopah, ha Topa pupi hām'āktux xop hittap te tappet tu kax'āmi', Topa pupi kax'āmi', hu:

"Hāmyāxatamuk te 40 hā 'āxop te 'a' mō'hap 'ohnāg xok xop, 'ūhax, hām panip xexka kopah 'a mō'hap'ah. Āmhok.

⁴³ Āxop tep-tup puknōg xop yōg topahnāg komut xop, 'ūxuxet'ax Mōnok, yā topahnāg komut Hēnpāg yōg māyōn nāg 'āxop tep-tup xop, tu hāp xop 'ūm 'āyīm hā' mīy putup, hu nō heyah.

'Āte mō'āktunāp-tup Maminōn kūnāpa', hāptox tu'." Kaxîy.

⁴⁴ —Mōnāy xop te Topa pet mīy hām panip xexka kopah, ha Topa te Mōyyex yūmmūgāhā', ha' mīy, topixxax ka'ok xexka hā' mīy.

⁴⁵ Ha mōnāy xop te Topa pet tat, ha Yoyoe te mōnāy xop mōgāhā', ha yāy yōg hām tu nū'tat, 'ihā Topa te' puknōg xop xohix hām kopa' mōy, nūy mōnāy xop pu' hōm. Ha mōnāy xop pip, ha hāmyāxatamuk xohix mōg, ha Namix te 'Iyaet yōg tikmū'ūn xat.

⁴⁶ Ha Topa te Namix putup pax, ha Topa pet max xexka mīy putup, mōnāy xop Yako yōg Topa pu' mīy putup,

⁴⁷ pāyāk-tok Xanomām te' mīy.

⁴⁸ —Pa Topa xexka xe'ēgnāg te mīptut 'ūm kopa' ti'ah, nōm mīptut yīm hā' mīy, ha tik te Topa pupi hām'āktux, tu:

⁴⁹ "Pexkox xexka yāk xip'ax xe'ēgnāg,

ha hahām yāk mūn hā hāptonnok'ax.

Xate 'a mīptut 'ūm mīy putup, puk pip'ax? 'Ak pip putup'ah.

⁵⁰ 'Ūgyīm te hāp xop xohix mīy." Kaxîy.

⁵¹ Yā 'Extep te hām'āktux kux, tu:

—Āyīpkox 'ohnāg! Ākuxa mām 'ohnāg Topa kopah! Yā 'āmnīy xohix hā Topa Koxuk pu' āyīpkox 'ohnāg, mōnāy xop yīpkox hok, xix 'āxop.

⁵² Mōnāy xop te Topa pupi hām'āktux xop kix, nōm te Yeyox nūn'ax 'āktux, ha 'āxop te Topak-tok hōm hām puknōg yōg xop pu', puyīp-tex.

⁵³ Pexkox yōg nū'pok xop te xa Topa yōg xat'ax hōm, pa 'āxop tep-tup nōg. 'Ūkux. Kaxîy.

⁵⁴ Ha' xexka xop te hām'āpak, tu' gāynām, tu' xox kāyānām, 'ūgāy tu'.

⁵⁵ Pa Topa Koxuk te 'Extep ka'ogāhā', tu mō pexkox kāgmāg, tu Topa yōg yānām xe'ēgnāg pēnāhā', tu Yeyox pēnāhā kamah, ha Topa yīp x'e hāk-nīhā' xip,

⁵⁶ tu:

—Āte pexkox kopa' pēnāhā', tu Yeyox pēnāhā', yā Tikmū'ūn Kutok, tu Topa yīp x'e hāk-nīhā' xip. Kaxîy.

⁵⁷ Pa Yoneo xexka xop gāynām, tu' yīy ka'ok, tu mō yīpkox yīnnīn, nūy hām'āpak hok, tu mō' nū'paha',

⁵⁸ tu kōmēn Yenoyanēn kopa' xut, hak-nāpa' mōg, ha mīkax xexka tux, nūy putex, ha tik xop te' pēnāhā', tu' xax mōy, tu tik xīptap 'āxet'ax Xaot pata yīka mō'yōn.

⁵⁹ Ha mīkax xax xexka tux nām, 'ihā 'Extep te Yeyox xānāhā', hu:

—Yāyā Yeyox, 'āte xa 'ūgkoxuk hōm, pa' Kaxîy.

⁶⁰ Tu' kopaxux hā' xip, tu' yīy ka'ok, hu:

—Yāyā', 'āpu 'ūyōg hāpkummuk mīy'ax xax-ogā', pu tu kux! Kaxîy.

Tu hām'āktux kux, tu' xok.

Ha Xaot te' pēnāhā', tu 'Extep xok'ax putup, yī' kuxa hittup.

8

Ha Xaot te' kuxa mām ka'ok xop kummugāhā'

¹ Ha Yoneo xop te' kuxa mām ka'ok xop kummugāhā' kōmēn Yenoyanēn kopah, ha nū'paha', tu mō tika' mōg hāpxupmāhā tu', hāp xexka Yonex tu' mōg, xix hāp xexka Xāmānit tu' mōg, ha mō'pok xop te 12 nox pip Yenoyanēn kopah.

² Tik xop max te Topap-tup pax, tu 'Extep nō hāpkot, tu mō'nīy, tu ta pota ka'ok.

³ Pa Xaot te hāpkummugāhā', tu' kuxa mām ka'ok xop xūyāhā', tu' pet kopa' mōy, tu' yīm kīy ka'ok, tu kanet kopa' xex, tik xop xix 'ūn xop.

Tik xop te hām'āpak max 'āktux kōmēn Xāmānit kopah

⁴ Ha nōm nū'paha te Topa yōg hām'āktux 'āktux putat tox hā, xix kōmēn xohix kopah.

⁵ Ha ta' mōg Pinip, tu mōktu Xāmānit tu' xupep, tu Yeyox yā Kunnix 'āktux. Yā 'ōhōm Yoneo yōg tikmū'ūn xat'ax xe'ēgnāg.

⁶ Ha Xāmānit yōg tikmū'ūn kuxap-xet, xip-tox puxet, tu Pinip yōg hām'āktux 'āpak, tu hāp-xopmā xe'ēgnāg pēnāhā'.

⁷ Ha Pinip te yāmīy kummuk mōy Xāmānit yōg tikmū'ūn kopah, ha yāmīy kummuk yīy ka'ok, tu' mōg, ha hāpkumep hok xop hittup, tu hāpkumep, yāy hi ha' mōg.

⁸ Yīy Xāmānit yōg tikmū'ūn kuxa hittup xexkah.

⁹⁻¹¹ Pa tik 'āxet'ax Xīmām te' xut mīhīm, tu hāmīyaxatamuk xohix hā kugōy hāp-tex, tu yāy 'āktux xexka', ha Xāmānit yōg tikmū'ūn kuxānōg Xīmām hā, 'ūxut mīhīm hah, tu' yīpkox pip Xīmām pu', tu: "Yā Topa mūn te Xīmām ka'ogāhā xexka!" kaxīy.

¹² Pa Pinip nūn, tu Yeyox yōg hām'āpak max 'āktux, tu Topa te yāy yōg tikmū'ūn xat 'āktux, tu Yeyox yā Kunnix 'āktux, ha tikmū'ūn kuxa mām ka'ok Yeyox kopah, hap-tox pix, tik xop xix'ūn xop.

¹³ Ha Xīmām kuxa yūm ka'ok kamah, hap-tox pix, ha Pinip pe' mōg, tu hāp-xopmā xe'ēgnāg pēnāhā', tu tikmū'ūn hittupmā'ax pēnāhā', tu kuxānōg.

¹⁴ Ha Yeyox yōg mō'pok xop pip Yenoyanēn kopah, tu Xāmānit yōg tikmū'ūn yāyhā Yeyox yōg xop yūmmūg, tu Pet xix Yoām mō'pok.

¹⁵ Ha' mōg, tu mōktu mōxaha Xāmānit tu', tu Topa tu' xak, puyīy yāy Koxuk nū'kutnā nōm tikmū'ūn hah.

¹⁶ Hōmā xix hōnhā Topa te yāy Koxuk Xe'ēgnāg nū'kutnā hok Xāmānit yōg tikmū'ūn hah, pa kōnāg hāp-tox pix puxehnāg, 'Ihā Yeyox yā yāy xuxyā 'āktux.

¹⁷ Ha Pet xix Yoām tep-tox yīmū' yīm xex, ha Topa te tikmū'ūn ha nū'kutnāhā yāy Koxuk Xe'ēgnāg.

¹⁸⁻¹⁹ Ha Xīmām te' pēnāhā', tu mō'pok xop tep-tox yīmū' yīm xex pēnāhā', yā Topa te yāy Koxuk nū'kutnāhā tikmū'ūn hah, ha Xīmām te' pēnāhā', hu hām'āktux, hu:

—'A' nōmenex nōm hāpka'ok'ax, yīy xa tayūmak hā' nōy yānān 'ūyīy tikmū'ūn putox yīmūg yīm xeh, puyīy Topa Koxuk 'ūka'ogā'. Kaxīy.

²⁰⁻²¹ Pa Pet te' māmōg, tu:

—Topa te 'ōg tayūmak nōāp-tup, xix 'āmūn nōāp-tup kamah! Xate hāmpe'āpaxex tayūmak hā' nōy yānān, nūy Topa Koxuk pa'. Topa te' hok tu nū'kutnāhā', pāyā xa nū'kutnā hok, 'ākuxa kummuk hah. Topa te 'āka'ogāp-tup 'ohnāg.

²² 'Āpu, yāyhāhup, tu hāpkummuk mīy kux, tu Topa tu' xax, pu 'ōgnū hāpkummuk mīy'ax xaxogā', pu tu' kux.

²³ 'Āte 'āyūmmūg. 'Ōgnū hāpkummuk mīy'ax te 'āhīy yāy pu'. 'Āmūn yīpkumīy xexka nām. Kaxīy.

²⁴ Ha Xīmām te tu' xak, hu:

—'Āpu, Topa tu' xax, 'ūgmūn pupi tu' xax, pu tu nū hok hāp-xopmā'ax kummuk, nōm hāp-xopmā'ax kummuk xate hām'āktux. Kaxīy.

²⁵ Ha Pet xix Yoām te Topa yōg hām'āktux 'āktux, tu ta' mōg putpu Yenoyanēn tu', hu putat tox hā Yeyox yōg hām'āpak max'ax 'āktux, nūy xip tu xexka xohix kopa' xuktux.

Pinip te hāpkumep

²⁶ Ha pexkox yōg nū'kutnā'ax te Pinip pu hām'āktux, hu:

—'Āyok, nūy mōg Yenoyanēn yōg putat hā, nūy mōy kōmēn Gayat tu 'āpep. Kaxīy.

Ha putat te hām panip xexka kopa' xip.

²⁷ Ha ta' yok, tu' mōg, tu hāp-xexka yōg 'Etxop yōg tapāyōg pēnāhā', ha tapāyōg yā 'Ennōk, tu 'Etxop yōg xat'ax hex Kānax hā kāmānat, tu hāp-xexka yōg tayūmak xex, tu' pēnā max, tu' mōg Yenoyanēn tu', nūy Topa xax, nūy Topa pu nū' xup.

²⁸ Tu putpu' nūn, tu te hāp-xop yīkūy'ax yīmū' yūm, tu' nūn, tu mō'kupix, tu Topa pupi hām'āktux 'ax 'Iyait yōg tappet mō'kupix,

²⁹ ha Topa Koxuk te Pinip pu hām'āktux, hu:

—Mōg, nūy nū mūtik mōg hāp-xop yīkūy'ax yīmū'. Kaxīy.

³⁰ Ha' mōg mō'ka'ok, tu tapāyōg mō'kupix 'āpak, tu:

—'Ok yūmmūg xate hāp-xop mō'kupix'ax? Kaxīy.

³¹ Ha' nōy yānān, tu:

—'Ap yūmmūg'ah. 'A tik 'ūm tek yūmmūg'ah. Kaxīy.

Tu' xānāhā', pu mōg, pu yāy mūtik mōg. Ha hāp-xop tat'ax yīmū' mām, tu' nōy mūtik mōg.

³² Ha mō'kupix hā kaxīy:

—'Tikmū'ūn te kahnēn mōgāhā', nūy putex, hā kaxīy tikmū'ūn te nōm tik mōgāhā', nūy putex.

Tikmū'ūn te kahnēn kutok xax xaxit, ha' yīy hok, yā kaxīy nōm tik yīy 'ohnāg.

³³ Tu' hok tu yāyhāhup, hāpkummuk mīy 'ohnāg tu', yīy tik xop te hāpkohe' mīy, 'Ihā tik max pu hāpkummugāhā'.

'Ū 'ūm te tik mōkputox 'ūm pēnāhā'? 'Ap xip'ah, tik xok hah." Kaxīy.

³⁴ Ha tapāyōg te:

—'Āyīy, tik 'ūm 'ōhōm? 'Ok pe 'Iyait te yāy kax'āmi', 'ok pe' nōy pupi kax'āmi'? Kaxīy.

³⁵ Ha Pinip te hām'āktux, tu hāmīyūmmūgāhā', tu nōm tappet hittap hā Yeyox 'āktux, tu Yeyox yōg hām'āpak max'ax 'āktux, tu Topa yōg hām'āktux hittap hā hāmīyūmmūgāhā'.

³⁶ Ha' mōg putat hā, tu kōnāgkox pēnāhā', ha tapāyōg te:

—Pēnā! Kōnāgkox! 'Āpu, kōnāg hāk putox pix! Kaxīy.

³⁷ Ha Pinip te:

—Āte 'āp-tox pix'ax. 'Ok 'ākuxa yūm ka'ok xe'e'? Kaxīy.

Ha' nōy te:

—Hamūn! 'Ūgkuxa yūm ka'ok Yeyox Kun-nix kopah. 'Ōhōm yā Topak-tok xe'ēgnāg. Kaxīy.

³⁸ Ha hāpxop yīkūy'ax tu' xakux, ha Pinip te tapāyōg putox pix kōnāg hā.

³⁹ Ha kōnāgkox tu' xupep, tu putpu' nūn, ha Topa Koxuk te Pinip putmōg, yīy tapāyōg te' pēnā hok, tu' kuxa hittup hā' mōg yāy pet hah.

⁴⁰ Ha tik 'ūm te Pinip pēnāhā kōmēn 'Ayot tu', ha kōmēn xohix tu hām'āktux hā' mōg, tu Yeyox yōg hām'āpak max'ax 'āktux, tu' mōg, tu mōktu xupep Xeyanet tu'.

9

Xaot te hāpkummuk mīy'ax hā yāyhāhup

¹ Pa Xaot gāy, tu' yīy gāynām, tu:

—Āte Yeyox mūtik mōg xop xohix kix putup! Kaxīy.

Tu' mōg tik te 'āmānex xop xat'ax hah,

² tu tappet pop, pu kōmēn Namān yōg xexka xop tu' mūg, nūy Yeyox yōg putat hā' mōg xop mūy, nūy tik xop xix 'ūn xop mūy, nūy kīy, tu nūktu Yenoyanēn ha' mōgā'.

³ Tu ta' mōg Namān yōg putat hā' mōg, ha kōmēn hāmhūmnāg tu' xip, ha hāpxip 'ohnāg 'hā kuyānām xexka xakot Xaot yīmap.

⁴ Ha Xaot te hām tu' nāhā', tu yānmūn xupep'ax 'āpak, ha:

—Xaot, Xaot, tep tu xatek xūygāhā'? Kaxīy.

⁵ Ha Xaot kuxānōg, tu:

—'Ū 'ūm 'āmūn? Kaxīy.

Ha' nōy te:

—'Ūgmūn yā Yeyox. Xatek mūn xūygāhā',

⁶ pa 'āyok, nūy 'āk-nīhā xihip, tu mōg tu mōktu kōmēn Namān tu xupep. 'Ōnte tik 'ūm te xa hāmyūmmūgāp-tup. Kaxīy.

⁷ Ha tikmū'ūn te Xaot mūtik hāpkumep, tu' hip, tu' yēy. Tu' yīy'ax 'āpak, pāyā 'a tik 'ūm pēnā'ah.

⁸ Ha Xaot yok, tuk-nīhā' xip, pāyā hāmpēnā hok, ha tik te Xaot yīm mūg, tu' mōgāhā', tu mōktu mōxaha Namān tu'.

⁹ Ha 'āmniy 3 hā Xaot te hāmpēnā hok, tu' xit hok, xi' xo'op hok kamah.

¹⁰ Ha kōmēn Namān kopa' xip tik kuxa yūm ka'ok Yeyox kopah, 'ūxuxet'ax 'Ānānīn, ha yāy koxuk hā hām'āpak, ha yūmūg xuxyā te' xānāhā', hu:

—'Ānānīn! Kaxīy.

Ha:

—Te 'ūm? Kaxīy.

¹¹ Ha yūmūg xuxyā te' xat, hu:

—'Āyok, nūy mōg putat yok hā Yot pet hah, nūy Tax yog tik 'āxet'ax Xaot xax. 'Ūpēnā! Tute Topa mūtik hām'āktux!

¹² Tu' yōtkup hā tik 'āxet'ax 'Ānānīn pēnāhā', ha' nūn, tu' xupep, tup-tox yīmū' yīm xex, pu xe hāmpēnā'. Kaxīy.

¹³ Pa 'Ānānīn te' yānān, hu:

—Yāyā', tikmū'ūn te Xaot 'āktux kummuk. Tute 'ōg tikmū'ūn xūygāhā Yenoyanēn kopah,

¹⁴ tu Yenoyanēn tu' xip, tu tappet pop Yoneo yōg 'āmānex xexka xop tu', tu' nūn, nūy mūy, nūy kīy, nōm xop te 'āxānāhā'. Kaxīy.

¹⁵ Pa yūmūg xuxyā te:

—'Āmōg, 'Āte Xaot yāykutnāhā, puk mūn 'āktux hāmpuknōg xop pu', xi' xexka xop pu', xix Yoneo yōg tikmū'ūn pu',

¹⁶ tu' xūy putup 'ūgmūn hā, ha 'āte tu nōm 'āktux putup. Kaxīy.

¹⁷ Ha 'Ānānīn mōg, tu mīptut tu' xupep, tu mō'nāhā', tu Xaot putox yīmū' yīm xex, tu:

—'Ūgnōy Xaot, xate yūmūg xuxyā Yeyox pēnāhā putat kopah, hak xat xa', pu xe pēnā', pu Topa Coxuk 'ākuxa ka'ogā'. Kaxīy.

¹⁸ Hāpxip 'ohnāg 'hā 'ūxax 'ūm te Xaot pa tu' nāhā', ha' xax yā māpxax putuk, ha Xaot te hāmpēnā max, tu' yok, tuk-nīhā' xip, hāp-tox pix,

¹⁹ ha' xit, xi' xo'op, tu mōktu ka'ok.

Xaot te kōmēn Namān tu' xip

'Āmnīy kutōgnāg 'hā Xaot te nōm xop kuxa mām ka'ok xop mūtik tihī Namān kopah.

²⁰ Tu' mōg Topa pet hah, nūy Yeyox 'āktux, tu hāmyūmmūgāhā', hu:

—Yeyox yā Topak-tok xe'ēgnāg! Kaxīy.

²¹ Ha' xohix kuxānōg, hu yāy pu hām'āktux, hu:

—'Ok yā Xaot xe'e'? Hōmā Xaot kuxa yūm 'ohnāg Yeyox kopah, tu' gāynām nōm xop tu', nōm xop te Yeyox 'āxet'ax hā Topa xānāhā', ha' nūn, nūy mūy, nūy kīy, nūy Yenoyanēn yōg 'āmānex xop ha' mōgā'. Pāyā hōnhā Xaot kuxa yūm ka'ok Yeyox kopah, tu Yeyox 'āktux! Kaxīy.

Tu' kuxa te' yēy.

²² Ha Xaot ka'ok, tu hām'āktux max, tu Yeyox yā Kunnix 'āktux, tu yā Topa yōg hāmyāykutnā'ax 'āktux, ha tikmū'ūn te Namān kopa' pip te' yēy.

²³ Hāpxip kutōgnāg 'hā Yoneo gāy xop te yāy tu nū'nāhā', nūy Xaot putex.

²⁴ Tu' xaptop hā' pip Namān yōg mō'yīnnīn'ax tu', tu' Xaot hip, tu 'āmniy xohix hā' hip, xix hāptup xohix hā mō'yīnnīn'ax hā pēnānā' pip, nūy Xaot mūy, nūy putex, pa tik 'ūm te Xaot pu' xuktux.

²⁵ Ha 'āmniy koxtap 'hā tik xop te Xaot mūtik hāpkumep te Xaot xix manax kopah, pu' gāy xop 'ūp-tex hok, 'ūxaptop tu' xix, tu

hāpxux 'lhā' yūm, pu tu xupmān, ha' xut, ha' xupaha'.

Xaot te kōmēn Yenoyanēn tu' xip

²⁶ Tu ta' mōg, tu mōktu xupep Yenoyanēn tu', tu nōm xape xop pēnāp-tup, pāyā nōm xop kuxānōg, tu hāmpē'paxex, hu: "Xaot te yā mō'āmā'. Tute' koit. 'A Yeyox yōg'ah." Kaxīy. Tu' yīpkutuk.

²⁷ Pa Maname nūn, nūy Xaot mō'nīynām, tu' mōgāhā mō'pok xop hah, ha mō'pok xop te' pēnāhā, ha Maname te nōm xop pu hāmyūmmūgāhā'. Yā hōnhā Xaot te Yeyox 'āktux, tu yūmūg xuxyā yōg hām'āktux'ax 'āktux Namān kopah, tu' yīpkutuk 'ohnāg.

²⁸ Ha Xaot te nōm xop mūtik nox tihī', tu yūmūg xuxyā 'āktux Yenoyanēn xohix kopah,

²⁹ tu' yīpkutuk 'ohnāg, tu hām'āktux hā' nōy yānān Genex yī'ax xop mūtik, ha nōm gāy xop te Xaot putex putup.

³⁰ Pāyā' xape xop te' yūmmūg, tu Xaot mōgāhā Xeyanet tu', tu yāy yōg hām ha' kutnāhā kōmēn Tax tu'.

³¹ Ha hāpxexka Yonex yōg kuxa mām ka'ok xop hittup, tu' kuxa mām, xix hāpxexka Ganinet yōg xop kuxa mām, xix hāpxexka Xāmānit yōg xop, tu' hittup, 'ūgāy nōg hah, tu Topa xak, tu' kuxa te' yēy Topa keppah, tu yūmūg xuxyā Yeyox yōg putat hā' mōg, ha Topa Koxuk te' ka'ogāhā', ha tikmū'ūn nūn, tu nōm xop xohix nōy nā' mōg.

Pet te kōmēn Nit tu' mōg, xix kōmēn Yop tu'

³² Ha Pet te hāpkumep punethok, tu kōmēn xohix tu' mōg, tu 'āmnīy ha ta' mōg, tu mōktu xupep kōmēn Nit tu', tu' kuxa mām xop xape xop mūtik pip.

³³ Ha tik 'ūm 'āxet'ax 'Ēnēy xip, tu hāmyāxatamuk xohix te 8 hā hāpkumep hok, tu mīmpē mō'yōn'ax yīmū' pip.

³⁴ Ha Pet te:

—Ēnēy, Yeyox Kunnix te 'āhittupmāhā'. 'Āyok, nūy 'āk-nīhā xip, xa 'ōg komenok yūm. Kaxīy.

Ha' yok, tuk-nīhā' xip.

³⁵ Ha Nit yōg tixmū'ūn xohix te' pēnāhā', xix Xanōn yōg xop te' pēnāhā', hu' kuxa mām ka'ok yūmūg xuxyā kopah, tu yāyhā Yeyox yōg tikmū'ūn.

³⁶ Ha 'ūn 'ūm xip, Yop kopa' xip, tu' xuxet'ax Tamit, yā' xuxet'ax nōy Nok, nōm tikmū'ūn yī'ax hā: "Mūnūy." Kaxīy. Ha Nok kuxa yūm ka'ok Yeyox kopah. Nōm 'ūn max, tu hāpxopmā max, ha tikmū'ūn te' yūmmūg, ha hāpxop hok popmāhā', 'ūhok xop pu' nīm.

³⁷ Tu' 'āmnīy 'ūm 'lhā' pakut, tu' xok, ha' pix, tu mīpku'ūn yīmū' put mōg, tu' mōg, tu mō'tat pepi mīptut nōy yīmū' mōg'ax kopah, tu' xex.

³⁸ Ha Pet te Yop tu' yīkā' xip, ha' kuxa mām ka'ok xop te tik 2 mō'pok, ha Pet xānāhā', tu ta' mōg, tu mōktu Pet ha mōxaha', tu:

—Mā'! 'Ānūn mō'ka'ok! Kaxīy.

³⁹ Ha' yok, tu yōkāmū' nūn, tu nūktu mōxaha mīptut tu', ha 'ūn hok mām xop te Pet yīmap hā' potaha'. Hōmā Nok te topixxax xap, 'ūhok mām xop pupi' xap, yā hōnhā Pet tu nōm xax mūg, nūy Pet tu Nok mūn max mūgā'.

⁴⁰ Ha Pet te' xohix xat, hu:

—Hāptopa 'āmōxān. Kaxīy.

Ha' mōg, yīy Pet te' kopaxux hā' xip, tu Topa pu hām'āktux, tu hām'āktux kux, tu pepi' mōg, tu Nok yīnax xat, hu:

—Tamit, 'āyok, nūy pepi xip. Kaxīy.

Ha' pa ko'a', tu' yūm.

⁴¹ Ha Pet te' yīm hā' mūg, tu' yoa', tu' 'ūn xop xānāhā', xi' kuxa mām ka'ok xop, tu:

—'Ūpēnā'! Yā' hi'! Kaxīy.

⁴² Ha Yop yōg tikmū'ūn xohix te' yūmmūg, hu' kuxa mām ka'ok yūmūg xuxyā Yeyox kopah,

⁴³ ha 'āmnīy xohix hā Pet te Yop kopa' nox xip, Xīmām mūti ti', ha xokxax hā hām Xīmām, tu xokxax xut, tu' hīy, tu' xup, ha' nak.

10

Pet xix Kohnēn

¹ Ha tik puknōg 'ūm 'āxet'ax Kohnēn, tu kōmēn xexka Xeyanet kopa' pet, tu 'Itat yōg xonat xop hā kapitām.

² Tu Topa xak, tu' kuxa te' yēy Topa keppah, xik-tok te', xi' xetut te', xi' xape xop xohix te Topa xak, nōm te Kohnēn pet kopa' tihī'. Tu Yoneo hok pip xop pu hāpxop hok nīm, tu' xupkumīy 'ohnāg, tu' 'āmnīy xohix hā Topa pu hām'āktux.

³ Ha māyōn he 'lhā Kohnēn te pexkox yōg nū'kutnā'ax pēnāhā', yāykoxuk hā' pēnāhā', tu' pēnā max, ha' nūn Kohnēn hah, tu hām'āktux, hu:

—Kohnēn. Kaxīy.

⁴ Ha' nōy te' yēy, tu kuxānōg xexka', tu' pēnā ka'ok, tu:

—Pute 'ūm nūhū'? Kaxīy.

Ha' nōy te:

—Topa te 'ōg hām'āktux'ax 'āpak, tu 'ōg hāpxopmā max pēnāhā', tu 'āxaxok 'ohnāg.

⁵ 'Āpu, tik 'ūm mō'pok kōmēn Yop tu', pu Xīmām Pet xānā',

⁶ ha Xīmām nōy pet tu' xip, nōm Xīmām nōy te xokxax hā' hām, tu' xut, tu' hīy, tu' xup, ha' nak, ha Xīmām pet te kōnāg xexka kux tu' yūm. Kaxīy.

⁷ Tu' mōg, pexkox yōg nū'kutnā'ax mōg, ha Kohnēn te' yōg kāmānat 2 mō'pok, xix xonat xe'ep-xet mō'kutnāhā', ha xonat te Topa xak kamah.

⁸ Ha Kohnēn te mō'pok xop pu hāmyūmmūgāhā', tu tu' pexkox yōg nū'kutnā'ax te hām'āktux 'āktux, tu Yop tu mō'pok.

⁹ Ha hāptup ha ta' mōg, tu mōktu mōxaha kōmēn Yop tu', 'Ihā Pet te māyōn te yāy kote' yūm 'Ihā pepi' mōg, tu mīptut xanep yīmū' yūm, nūy Topa pu hām'āktux.

¹⁰ 'Ūp-tup tep-tex, ha' xit putup, pa' xit'ax puk'ohnāg, yī' hip, tu yāy koxuk hā' pēnāhā', ha pekkox xōn,

¹¹ ha Pet te' pēnāhā', ha pekkox tu top-ixxax xexka yīxohoh, tu' kuxyā hā' hīy,

¹² tu xokxop kopā' xex, xix putuxnāg, xī' kep hā' mōg xop.

¹³ Ha yānmūn xupep'ax te:

—Pet, 'āyok, nūy kix, nūy mā'! Kaxīy.

¹⁴ Pa Pet te:

—'Ak mūn'ah. 'Āte' mā xet'ah xokxop mā hok xop. Kaxīy.

¹⁵ Ha' yānmūn xupep'ax te xe':

—Topa te nōm putup, yī' max. Kaxīy.

¹⁶ Ha' yīxohoh, tu' nūn tehomip tikoxyuk, ha pekkox tu' mōg, tu yāy xaxogāhā'.

¹⁷ Pa Pet te' yēy, tu:

—Topa tep-tep 'ūgyūmmūgāp-tup? Kaxīy.

Tu hāmpē'paxex, 'Ihā Kohnēn yōg kāmānat nūn, tu nūktu mōxaha', tu Xīmām pet xak, tu yā' xipi', tu mīptut yōg mō'yīnnīn'ax tu' tihī',

¹⁸ tu' xānāhā', hu:

—'Ok xip Xīmām Pet? Kaxīy.

¹⁹ Ha Pet te hāpxopmā'ax pe'paxex, 'Ihā Topa Koxuk te:

—'Ūpēnā'! Yā tik 3 te 'āxak.

²⁰ 'Āpu, nāhāy, nūy nōm xop mūtik mōg. 'Ākuxānōg hok, 'āte nōm tik nū'pok 'āhā. Kaxīy.

²¹ Ha Pet yīxohoh, tu:

—Yāk mūn Xīmām Pet. Tep ha 'ānūn? Kaxīy.

²² Ha' nōy te:

—'Āhak nūn. Kapitām Kohnēn tek mūg nū'pok, yā' māx, tu hāmyok mīy, tu Topa xak, tu' kuxa te' yēy Topa keppah, ha 'Iyaet yōg tikmū'ūn xohix te nōm putup pax, ha pekkox yōg nū'kutnā'ax te' xat, hāk mūg nū'pok, ha 'āxānāhā', pu Kohnēn pet ha mōg, 'ūyīy' ognū hām'āktux'ax 'ūm 'āpax. Kaxīy.

²³ Ha Pet te tik 3 tu' kax, pu' xit, nūy mōhōn yāy pet kopah.

Hāptup ha ta' mōg Kohnēn yōg tik mūtik, ha' xape xop mōg kamah,

²⁴ tu mōktu hāptup nōy 'Ihā' mōxaha Xeyanet tu', ha Kohnēn te' hip, tu' xape xop xohix mūtik hip,

²⁵ ha Pet nūn tu nūktu mō'nāhā', ha Kohnēn te' kopaxux hā' nāhā', tu nū'xup, nūy heyak,

²⁶ pa Pet te:

—Xihip 'āk-nīhā'. Yāk mūn tihik kamah. Kaxīy.

²⁷ Tu hām'āktux hā' nōy yānān, tu mō'nāhā', tu tikmū'ūn punethok pēnāhā',

²⁸ tu hām'āktux, hu:

—Yoneo yōg xat'ax xate' yūmmūg, ha' xat hok, hu: "Mōnā hok tik puknōg pet kopah," kaxīy. Pa Topa tek mūn yūmmūgāhā', hu: "Hāmpē'āpaxeh hok, hu: —Topa te' puknōg xop putup nōg, kaxīy. 'Āmhok. Topa te nōm putup, puyīy yāyhā yāy yōg tikmū'ūn," kaxīy.

²⁹ Xatek xānāhā', 'āhak nūn. Putep hā xatek xānāhā'? Kaxīy.

³⁰ Ha Kohnēn te:

—Hōmā, 'āmnīy te 4 'Ihā, māyōn he 'Ihā, 'āte Topa pu hām'āktux, tu tik 'ūm pēnāhā', ha yōg topixxax te yānām putuk,

³¹ ha: "Kohnēn, Topa te 'ōg hām'āktux'ax 'āpak, tu 'ōg hāpxop popmā'ax pēnāhā'.

³² 'Āpu, Yop tu mō'pok, pu Xīmām Pet xānā', ha kōnāg xexka kux tu' xip Xīmām nōy pet kopah, ha Xīmām te xokxax hā' hām, tu' xut, tu' hīy, tu' xup, ha' nak," kaxīy.

³³ Hāpxip 'ohnāg 'Ihā 'āte 'āxānāhā', ha 'ānūn, hak mūg hittup. Hōnhāk mūg pip, ha Topa tek mūg pēnāhā', hak mū'āte 'ōgnū hām'āktux'ax 'āpak putup, Topa te nōm 'āxat, xa' xuktux. Kaxīy.

Pet te puknōg xop pu hāmyūmmūgāhā'

³⁴ Ha Pet te hām'āktux, hu:

—Hōnhā 'āte hāmyūmmūg. Yā Topa te' xohip-tup, 'ok pe Yoneo yōg tikmū'ūn, 'ok pe' puknōg, ha Topa pu' nōy putuk.

³⁵ Topa te hāmyok mīy'ax xop xohip-tup pax, ha tikmū'ūn 'ūm xohix te Topa xak, tu' kuxa te' yēy Topa keppah, puxix Topa nōm putup,

³⁶ tu yāy pupi hām'āktux'ax nū'kutnāhā 'Iyaet yōg tikmū'ūn hah, tu Yeyox Kun-nix nū'kutnāhā', ha Yeyox te' kuxa mām yūmmūgāhā', xix yāy kep hā' mūg'ax kama yūmmūgāhā', 'ūyīy yūmūg hittup. Yā Yeyox yūmūg xohix hāg xuxyā'.

³⁷ Yoām te hām'āpak max'ax 'āktux hāmāxap, tup-tox pix, tu Topa yōg hām'āktux'ax 'āktux hāpxexka Ganinet kopah, xix hāpxexka Yonex xohix kopah.

³⁸ Hak-nāy tu Topa te Nāyane yōg Yeyox ha yāy Koxuk nū'kutnāhā', nūy nō ka'ogā', ha yāyhā ka'ok xe'ēgnāg, tu hāpkumep hāpxexka xohix tu', tu hāpxopmā max, tu tikmū'ūn xohix hittupmāhā', Hāmgāyāgnāg te nōm xop kummugāhā', yā Topa te Yeyox mūtik xip.

³⁹ Hak mū'āte' pēnāhā Yoneo yōg hāpxexka tu', xix Yēnoyānēn kopah, pa Yoneo yōg tikmū'ūn te Yeyox putex mīpkupnix tu'. Kaxīy.

⁴⁰ Tu xe:

—Pa 'āmnīy 3 nōg, 'Ihā Topa te' hīnnāhā putpu', hak mū'āte' pēnāhā'.

⁴¹ Yāk mūg xit xī' xo'op Yeyox mūtik. 'Ap tikmū'ūn xohix te' pēnā'ah.

⁴² Ha Topa tek mūg xat, 'ū hām'āpak max'ax 'āktux, nūy tikmū'ūn xohix pu hām'āktux, nūy tikmū'ūn xohix yūmmūga', ha Topa te Yeyox putpu nū'kutnāp-tup, pu

tikmū'ūn yōg hāp̄xopmā'ax kopit, xi' puknōg yōg, 'ūxakix xop, xi' hi xop yōg hāp̄xopmā'ax kopit putup.

⁴³ Hōmā Topa pupi hām'āktux xop te Yeyox 'āktux, hu: "Topa te tikmū'ūn yōg hāp̄kummuk mīy'ax xaxogā'ax, pu tu' kux, nōm xop kuxa mām ka'ok Kunnix kopah, 'ūka'ok hah," kaxīy.

Topa Koxuk te Yoneo hā' puknōg xop ka'ogāhā'

⁴⁴ 'Ap Pet te hām'āktux kux'ah, 'hā Topa Koxuk te' puknōg xop ha yīxohoh, nōm te hām'āpak ha' yīxohoh,

⁴⁵ ha Yoneo yōg kuxa mām ka'ok xop te' yēy, tu:

—Topa te kama' puknōg xop ha yāy Koxuk nū'kutnāhā'! Kaxīy.

⁴⁶ Ha' puknōg xop te yāy pu' puknōg yīy'ax hā hām'āktux, Topa te' ka'ogāhā, puyī' xuk-tux, nūy Topa 'āktux max nōmhā'.

⁴⁷ Ha Pet te:

—'Ū'ūm te' puknōg xop pup-tox pix'ax xat hok? 'Ak mūn'ah. Yā Topa te yāy Koxuk nū'kutnāhā' puknōg xop hah, 'ūgmūg putuk! Kaxīy.

⁴⁸ Hu' xat, hu:

—Kōnāg hāp-tox pix, puyīy Yeyox yā yāy xuxyā 'āktux. Kaxīy.

Ha Kohnēn te' xak, pu tu 'āmnīy kutōgnāg hā' nox xhip yāy pet kopah, ha' nox xip.

11

Pet te hāp̄xopmā'ax 'āktux

¹ Ha hāp̄xexka Yonex kopa' pip Yeyox yōg mō'pok xop, xi' xape xop, tu' puknōg xop kuxa mām ka'ok'ax 'āpak,

² ha Pet nūn, tu nūktu xupep Yenoyanēn tu', ha' xape xop te' puknōg xop te yāyhā Yoneo hāmāxap putup, hu' mānōg,

³ tu:

—Tep mīy xate? Tep tu 'āxit hāmpuknōg xop mūtik, nōm te yāy xax yīmap tu' mep 'ohnāg? Kaxīy.

⁴ Pa Pet te tik xop yūmmūgāhā', hu:

⁵ —'Āte Topa pu hām'āktux Yop kopah, tu yāy koxuk hā' pēnāhā', ha pexkox tu top-ixxax xexka yīxohoh, tu' kuxyā hā' hīy, tu' nūn tu nūktu 'ūgha' nūn.

⁶ 'Āte' pēnā ka'ok, ha xokxop gāy xop kopa' kux, xi' kep hā' mōg xop, xix putuxnāg,

⁷ ha' yānmūn xupep'ax te: "Pet, 'āyok, nūy kix, nūy mā'!" kaxīy.

⁸ Pa 'āte: "Ak mūn'ah. 'Āte' mā xet xokxop nōm mā hok xop," kaxīy.

⁹ Ha' yānān, hu: "Topa te nōm putup, yī' max," kaxīy.

¹⁰ Ha' xe yīxohoh te 3, ha pexkox tu' mōg putpu', tu yāy xaxogāhā'.

¹¹ Ha Xeyanet yōg tik 3 nūn, tu nūktu mōxahā', tik puknōg te nōm mō'pok 'ā,

¹² 'hā Topa Koxuk te: "Mōy, 'āmōg, tu' yīkopit hok." Kaxīy. Ha tak mūg mōg, nū' xape te 6 mūtik mōg, tu mōktu mōxaha tik puknōg pet tu'.

¹³ Ha tik puknōg te hām'āktux, hu: "Hōmā 'āte pexkox yōg nū'kutnā'ax pēnāhā mīptut kopah, ha' xat, hu: "Āpu, tik 'ūm Yop tu mō'pok, pu Xīmām Pet xānā'.

¹⁴ Pet te xa Topa yōg hām'āpak'ax yūmmūgāp-tup, xix 'āxape, pu 'ākuxa mām ka'ok nōm hām'āktux'ax kopah, pu Topa 'ākuxa kummuk xit, nūy nō max tat 'ūyānān tu', kaxīy."

¹⁵ Yīy 'āte hām'āktux, 'hā Topa Koxuk te' puknōg xop tu' yīxohoh, 'ūgmūg putuk. Hōmā Topa Koxuk te yūmū'ā tu' yīxohoh, tu yūmū'ā tu' xip hām tu kamah.

¹⁶ 'Āte hāmpē'paxex. Yūmūg xuxyā te hām'āktux, hu: "Yoām tep-tox pix kōnāg hā, pa 'āte xa nū'kutnāp-tup Topa Koxuk, puyīy 'āka'ogā'," kaxīy.

¹⁷ Hōmā yūmūg kuxa mām ka'ok yūmūg xuxyā Yeyox kopah, ha Topa te yūmū'ā nū'kutnāhā yāy Koxuk. Yā hōnhā' puknōg xop kuxa mām ka'ok yūmūg xuxyā kopa kamah, ha Topa te yāy Koxuk nū'kutnāhā kamah, yā' nōy putuk. 'Āte Topa mutik yāy tuk-mīy putup'ah. Kaxīy.

¹⁸ Ha' mō'pok xop te' xupak, tu' mānōg kux, tu' yēy. Tu Topa 'āktux max, hu:

—Yā Topa te' puknōg xop pu hūpmāhā', pu hāpkummuk mīy kux, nūy hi xe'ēgnāg! Kaxīy.

'Ātikit yōg xop kuxa mām ka'ok Yeyox kopah

¹⁹ Tikmū'ūn te 'Extep putex Yenoyanēn tu', ha' gāy xop te' kuxa mām ka'ok xop kummūgāhā', tu' xūyūgāhā', ha' xupmāhā hāptox tu', hāp̄xexka Penix tu', xix hām'yīn yūm Xip tu', xix kōmēn 'Ātikit tu', tu hām'āpak max'ax 'āktux hā' mōg, tu Yoneo yōg tikmū'ūn pu hām'āktux, 'ap puknōg xop pu hām'āktux'ah.

²⁰ Pāyā Xip yōg tihik, xix kōmēn Xīnēn yōg tik mōg, tu ta' mōg, tu mōktu mōxaha 'Ātikit tu', tu hām'āktux hā' mōg, tu yūmūg xuxyā Yeyox yōg hām'āpak max'ax 'āktux Genex yōg puknōg xop pu' kamah,

²¹ Ha' xop te' kuxa mām ka'ok xop mō'nīynām, tu' ka'ogāhā', ha' puknōg xop punethok kuxa mām ka'ok yūmūg xūxyā Yeyox kopah, tu hāpkummuk mīy kux.

²² Ha' kuxa mām ka'ok xop te' xupak Yenoyanēn kopah, tu mō Maname kutnāhā 'Ātikit tu'.

²³ Ha ta' mōg, tu mōktu xupep 'Ātikit tu', tu Topa te nōm xop ha hāmmaxnā pēnāhā', ha' kuxa hittup xexka', tu hām'yūmmūgāhā', nūy ka'ogā', puyī' kuxa mām xe'e yūmūg xuxyā kopah, mō kuma' mōg.

²⁴ 'Ūmax Maname', yā Topa Koxuk te' ka'ogāhā', ha' kuxa yūm ka'ok xe'e', ha'

puknōg xop xohix nūktu Yeyox tu yāy kotīnnāhā'.

²⁵ Ha ta' mōg Maname', tu mōktu xupep Tax tu', nūy Xaot xax,

²⁶ tu' xipihī', tu' nūnnāhā 'Ātikit tu', ha hāmyāxatamak puxet hā Xaot xix Maname te' kuxa mām ka'ok xop mütik nūn tu nū'nāhā', tu nōm xop xohix pu hāmyūmmūgāhā', ha nū mütik yāy kotīnnāhā', ha 'Ātikit yōg tikmū'ūn te' xuxet'ax mīy kōnāmāhā', tu: "Kunnix yōg xop." Kaxīy.

²⁷ Ha Topa pupi hām'āktux xop te Yenoy-anēn tu' pip, tu ta' nūn tu nūktu mōxaha 'Ātikit tu',

²⁸ ha tik te Topa pupi hām'āktux 'āxet'ax 'Āg, tu' yok, tuk-nīhā' xip, tu hām'āktux, Topa Koxuk te' yūmmūgāhā', ha 'Āg te:

—'Ūxit'ax nōg putup, yā hāmhōgnāg, ha putup te' kix putup tikmū'ūn xop xohix te hām xexka xohix kopa' pip. Kaxīy.

Ha hāmhōgnāg, 'Īhā Kanao te Hōm yōg tikmū'ūn xat.

²⁹ Ha 'Ātikit yōg kuxa mām ka'ok xop te:

—'Āpu, yūmūg tayūmak 'ūm mōgā', pu Yenoyanēn yōg xape xop pu' popmā'. Kaxīy.

³⁰ Ha' mōgāhā', ha Maname xix Xaot mōg Yonex tu', nūy tayūmak mōgā tik pēnā max'ax xop pu'.

12

'Ūgāy xop te xe hāpkummugāhā'

¹ Yā 'Enot te Yoneo yōg tikmū'ūn xat, tu hāpkummugāhā', tu' kuxa mām ka'ok xop xūyghāhā',

² tu Yoām taknōy Tiak putex mīkax xexka hā.

³ Ha Yoneo xop hittup, yīy 'Enot te' pēnāhā', tu xe' nōy putex putup, hu Pet mūg kamah, ha kanet ha mō'tat, 'Īhā Yoneo yōg 'āmuk xexka 'āxet'ax Pām Tokatok Hok māhā'.

⁴ Ha 'Enot te Pet xix kanet kopah, ha xonat xop yāg te 4 te' pēnānā' pip, ha 'Enot te Pet putex putup hāptup 'Īhā', 'āmuk xexka kux, 'Īhāp-tex putup, yī' kuxa mām ka'ok xop te Topa pu hām'āktux, tu 'āmnīy tox hā Topa tu' xak, Pet pupi' xak, 'Īhā Pet mō'ōn kanet kopah, ha pipkup māg xap 2 hā' hīy, ha xonat 2 te hāmyīnnīn'ax yīka' tihī', nūy pēnānā' ti'.

⁷ Hāpxip 'ohnāg 'Īhā pexkox yōg nū'kutnā'ax xip, ha kuyānām xexka', ha pexkox yōg mō'kutnā'ax te Pet nuhuk, tu:

—'Ūpitnāy, nūy mōg mō'ka'ok! 'Āyok, nūy 'āk-nīhā xihīp! Kaxīy.

Ha pipkup māg xap 2 te' yīy yāy ko'a'.

⁸ Ha nū'kutnā'ax te:

—'Āxax mō'tat, tu 'āpata xax tat. Kaxīy.

Ha' tat, ha nū'kutnā'ax te:

—Kap mō'tat tu mōyāy nīy, tuk pe mōg. Kaxīy.

⁹ Ha' pe' mōg, pa Pet te hāmp'e'paxex, tu yāy koxuk hā' pēnā'ax pe'paxex.

¹⁰ Ha tik te xonat hā' yēn, tu' mōg, tu xonat nōy hā' yēn, ha pipkup mō'yīnnīn'āy yāy xōn, ha kōmēn kotit hā' mōg, ha nū'kutnā'ax te yāy xaxogāhā'.

¹¹ Ha Pet te hāmyūmmūg, 'ap yōtkup'ah, tu: —Topa te pexkox yōg nū'kutnā'ax nū'kutnāhā' ūghah, pu 'Enot yōg kanet kopak xut, ha 'Enot tek xūyghāp-tup hok! 'Ap Yoneo yōg tikmū'ūn tek xok'ax pēnāp-tup'ah. Kaxīy.

¹² Tu ta' mōg, tu hāmp'e'paxex, tu mōktu xupep Mānix pet tu', yā Yoām Mā'ak mūg tut, ha' kuxa mām ka'ok xop xohix te yāy tu nū'nāhā', tu Topa pu hām'āktux pax, tu Pet pupi hām'āktux.

¹³ Ha Pet te hāptopa tu' xānāhā', hu:

—Hāpxōn! Kaxīy.

Ha kaxxop hex 'āxet'ax Hone nūn,

¹⁴ tu Pet yīy'ax yūmmūg, tu' kuxa hittup xexka', hu' mōg mō'ka'ok 'ūxape xop tu', tu: Ya' xip Pet! Kaxīy.

¹⁵ Ha' kuxa mām ka'ok xop te:

—'Āp-tox kummuk! 'Ap hamūn'ah! Kaxīy.

Pa Hone te:

—Hamūn! 'Āte' yīy'ax 'āpak! Kaxīy.

Tu xe' suktux, ha' xape xop te:

—'Ōhōm yā pexkox yōg nū'kutnā'ax, nōm te Pet pēnā max. Kaxīy.

¹⁶ Pāyā Pet te:

—Hāpxōn, hāpxōn! Kaxīy.

Tu xe:

—Hāpxōn! Kaxīy.

Ha hāpxōn, tu' pēnāhā', tu' yēy.

¹⁷ Ha Pet te' yīm nuhuk, tu:

—'Āyīy hok, pu xonat xop nūn hok. Kaxīy.

Tu hām'āktux pu'uk, hu:

—Topa te hāpxōpmā max, puk mūn xut. Mōg, Tiak pu hām'āktux, nūy kanet kopak xut'āktux 'ūxape xop pu'. Kaxīy.

Tu' mōg, tu mōktu xupaha'.

¹⁸ Ha hāptup ha ta xonat xop te Pet xak kanet kopah, pāyā 'ap xip'ah, ha xonat xop kuxānōg, tu:

—Pi'yā' xip Pet? Kaxīy.

¹⁹ Ha 'Enot te' xat, pu tu Pet xax, ha' xak, pāyā 'a' pēnā'ah, yīy 'Enot gāy xexka', tu xonat xop mūg, tu' yīkopit, tu' kix kakixnāg, ha' xakix.

Ha 'Enot mōg, tu ta' mōg tu mōktu Xeyanet tu', tu 'āmnīy xohix hā' nox xip.

'Enot xok

²⁰ Tu ta tu' gāy Tinok yōg tikmū'ūn tu', xix Xinōm yōg tikmū'ūn tu', hu 'ap hāpxop mōgāp-tup'ah. Ha nōm tikmū'ūn kuxānōg, tu' gāy kux xak, pu 'Enot te hāpxop xe mōgā'. Ha yāy tu nū'nāhā' 'Enot pet xexka kopah, tu 'Enot yōg kāmānat Manax yūmmūgāhā', pu 'Enot pu nōm tikmū'ūn pupi hām'āktux.

²¹ Hāptup nōy 'Ihā 'Enot te tik te' xat'ax yōg topixxax max mō'tat, tu' xat'ax yōg mīmpe' yūm'ax yīmū' yūm, nūy tu tikmū'ūn xat, tu hām'āktux tox, tu hām'āktux kux,

²² ha tikmū'ūn yīy ka'ok, tu:

—Topahnāg 'ūm yīy'ax putuk, 'ap tik yīy'ah. Kaxīy.

²³ Ha hāpxip 'ohnāg 'Ihā pekkox yōg nū'kutnā'ax te 'Enot kix, tu' pakutnāhā', ha puxō'oy te māhā', ha' xok, Topa 'āktux max 'ohnāg tu'.

²⁴ Ha' kuxa mām ka'ok xop mōg hāptox tu', tu Yeyox yōg hām'āpak max'ax 'āktux, ha tikmū'ūn punethok kuxa mām ka'ok Yeyox Kunnix kopah.

²⁵ Ha Maname xip Yenoyanēn tu', xix Xaot, tu' yōg hām'ax kux, tu' mōg, tu ta' mōg tu mōktu mōxaha 'Ātitik tu', tu Yoām Mā'ak mōgāhā'.

13

Maname xix Xaot te hāpkumep kōnāmāhā'

¹ 'Ātitik yōg kuxa mām ka'ok xop kopa' xip Topa pupi hām'āktux'ax xop, xix hām'yūmmūgā'ax xop. 'Ūxohix te: Maname', xix Xīmām Tapāyōg, xix Xinēn yōg Noxit, xix Xaot, xix Mānā'ēm. Hōmā 'Enot mūg tut te Mānā'ēm paha', ha 'Enot mūtik yāy tu tittap, tu' taknōy putuk, pāyā 'a' taknōy'ah.

² Hāptup 'ūm 'Ihā nōm tik xop te Topa pu nūktettex, tu' kuxa te' yēy, tu' xit hok, nūy Topa pu hām'āktux, ha Topa Koxuk te:

—Āte Maname yāykutnāhā', xix Xaot yāykutnāhā', tu nōm xānāhā', pu tu hāpxopmā', nūy hām'āpak max'ax 'āktux hāptox tu'. Kaxīy.

³ Ha' xohix te Topa pu hām'āktux, hu' xit hok, tu Maname putox yīmū' yīm xex, xix Xaot, tu hāptox tu mō'pok.

Tu Xip tu' tihī'

⁴ Topa Koxuk te mō Maname kutnāhā', xix Xaot, ha' mōg tu mōktu mōxaha kōmēn Xeneo tu', tu mīpkox hā' mōg, nōm mīpkox te kōnāg yīmū' mōg, tu mōktu mōxaha hām'yīn yūm Xip tu'.

⁵ tu ta' mōg, tu mōktu mōxaha kōmēn Xanamīn tu', tu Topa yōg hām'āktux'ax 'āktux Yoneo yōg Topa pet kopah, ha Yoām Mā'ak te mō'nīynām.

⁶ Tu ta' mōg hām'yīn yūm tu', tu mōktu mōxaha kōmēn Pap tu'.

Ha Yoneo yōg tik yā' xut mīhīm, 'ūxuxet'ax Mayeyox, tu Topa pupi hām'āktux'ax putuk, pāyā mō'āmā'. 'A' max'ah Mayeyox.

⁷ Tu tik nōy mutik xip, 'āxet'ax Xet Paot, tu Xip yōg tikmū'ūn xat, tu hām'yūmmūg xexkah, tu Maname tu' xānāhā' xix Xaot, nūy Topa yōg hām'āktux'ax 'āpax max.

⁸ Ha Mayeyox 'āxet'ax nōy 'Enip, ha tikmū'ūn yīy'ax hā: "Ūxut mīhīm," kaxīy.

Tutep-tup nōg, tu Xet Paot xut putup, puyīy Topa yōg hām'āktux 'āpax hok.

⁹ Ha Xaot 'āxet'ax nōy yā Paot kamah, ha Topa Koxuk te' ka'ogāhā', yīy mīm pēnā ka'ok,

¹⁰ tu:

—Āmūn yā Hāmγāyāgnāg yōg. 'Ākuxa kum-muk, yā hāmmax hā 'āpuknōg. Xate koit pax. Topa te' yōg putat yok mīy, pāyā xate' kohe' mīy. Paxīp! 'Āhup!

¹¹ Hōnhā Topa te 'ākix, ha hāpxip kutōgnāg 'Ihā xate hāmpēnā hok putup, tu 'āmnyī xohix hā māyōn 'ūm pēnāp-tup 'ohnāg. Kaxīy.

Ha hāpxip 'ohnāg 'Ihā hāmpēnānmok, tu' pa hok, tu tikmū'ūn xak, puyīy yīm hā' mōgā',

¹² Ha Xet Paot te Topa yōg hāpxopmā'ax ka'ok xe'ēgnāg pēnāhā', hu' kuxa yūm ka'ok Yeyox kopah, tu Topa yōg hām'yūmmūgā'ax 'āpak, tu' yēy.

Tu hāpxexka Pixit yōg kōmēn 'Ātitik tu' tihī'

¹³ Ha kōmēn Pap tu' tihī', ha ta' mōg Paot xi' xape xop, tu mīpkox hā' mōg, tu mōktu mōxaha hāpxexka Pānpit yōg kōmēn Pehek tu', tu mīpkox hā' mōg 'ūxeheh, pa Yoām Mā'ak te' nīm, tu putpu' mōg, tu mōktu' xupep Yenoyanēn tu'.

¹⁴ Ha ta' mōg Maname xix Paot, Pehek tu' pip, tu' mōg, tu mōktu mōxaha hāpxexka Pixit yōg kōmēn 'Ātitik tu', tu Yoneo yōg Topa pet hā' mōxakux, nit xap 'Ihā', ha Yoneo xop yōg hāptup xe'e', ha' mām,

¹⁵ ha Yoneo yōg tik te Mōyyex yōg xat'ax mō'kupix, xix Topa pupi hām'āktux xop yōg tappet mō'kupix, tu mō'kupix kux, ha Topa pet yōg tik te' nōy xat, te:

—Ūgnōy xop, 'āyīy, nūy 'ōgnū hām'āktux hā tikmū'ūn ka'ogā'. Kaxīy.

¹⁶ Ha Paot tek-nīhā' xip, tu' yīm xix, pu' nōy tu: "Ūy hok!" kaxīy. Tu hām'āktux, hu:

—Ūyaet yōg tihik, xix nōy xop, nōm te Topa xak, nōm kuxa te' yēy Topa keppah, 'ūg 'ūm 'āpax:

¹⁷ Hōmā hām'yāxatumuk punethok hā, 'Ūyaet yōg Topa te mōnāyxop hittap yīmōgatux, tu 'Ūyaet yōg tikmū'ūn xexkanāhā hāpxexka 'Eyit kopah, tu' puknōg yōg hāpxexka tu' mōy, tu yāy yōg ka'ok'ax hā' mōy.

¹⁸ Ha tikmū'ūn max 'ohnāg, pāyā hām'yāxatumuk te 40 hā Topa te hāpkummuk mīy'ax xop hā' tot, hām panip xexka tu nō'ātot, tu mō'nīynām, tu' nīm 'ohnāg,

¹⁹ tu' puknōg hep xop te 7 kix hāpxexka Kānā'āg kopah, tu' yōg hām pop, tu tikmū'ūn pu' hōm, pu tikmū'ūn mōkputox xohix pi'

²⁰ hām'yāxatumuk te 450 hā.

Ha hām'yāxatumuk te 450 nōg, ha Topa te tikmū'ūn pa te hām'yūmmūg ka'ok xop yīmōgatux, puyīy tikmū'ūn xat, xix Topa pupi hām'āktux'ax Xāmō'eo yāykutnāhā, puyīy xat.

²¹ Pa tikmū'ün te tik te' xat xexka xak, ha Topa te Xao yäykutnähä', yä Meyamiy yög Kix kutok pit, ha' xexkanähä', tu tikmū'ün pu' hōm, ha hämyāxatamuk te 40 hä Xao mūn te 'Iyaet yög tikmū'ün xat.

²² Ha Xao xok, ha Topa te Namix yäykutnähä', puyiy tikmū'ün xat, tu hām'āktux, hu: "Āte Namix putup pax, tuk kuxa hittup Yexe kutok pit hä. Yä' max. 'Āte' xat, ha' mīy." kaxīy.

²³ Ha Namix mōkputox yä Yeyox, ha Topa te 'Iyaet yög tikmū'ün ha nū'kutnähä', pu tikmū'ün kuxa kummuk xit, nūy kuxa max mō'tat 'üyānān tu'.

²⁴ Yoām nūn hāmāxap, tup-tox pix, tu 'Iyaet yög tikmū'ün xohix pu hām'āktux, hu: "Āpu, yāyhāhup, nūy hāp̄xop kummuk mīy kux," kaxīy.

²⁵ Pāyā Yoām te hāp̄xopmā kux, tu: "Tep kunāy tu hāmpe'āpaxex? 'Ak mūn yä Topa yög hämyāykutnäh'ax'ah, pa' nōy tek pe' nūn putup, nōm 'üm xexka xe'ēgnāg. 'Āte yāy kopaxux hāk yūm putup, nūy tu pataxax koa', pāyāk kutōgnāg, hu yāyhāhup." Kaxīy.

²⁶ Yä Paot te xe:

—'Ügnōy mūnōm xop, 'Amanām mōkputox, xix nōm nōy xop te Topa xak, nōm kuxa te' yēy Topa keppah: Topa te hām'āpak max'ax nū'kutnähä' āhah.

²⁷ Pāyā Yenoyanēn kopa tihi tikmū'ün te hämyūmmūg 'ohnāg, xi' yög xexka xop, ha nit xap xohix 'Ihā Topa pet ha' mōg, Yoneo xop yög hāptup xe'e 'Ihā' mōg, tu Topa yög tappet mō'kupix'ax 'āpak, pāyā' yīpkox 'ohnāg, hu Yeyox putup nōg. Hōmā Topa pupi hām'āktux xop hittap te Yeyox xok'ax 'āktux, ha hōnhā Yoneo yög tikmū'ün gāy xop tep-tex, Topa yög hām'āktux hittap hāp-tex.

²⁸ Yā' gāy nām Yeyox tu', tu Pinat tu' xak, pu Yeyox putex, pāyā Yeyox te hāpkummuk 'üm mīy 'ohnāg.

²⁹ Ha hōmā, Yeyox mūg tut te nōm put 'ohnāg, 'Ihā Topa pupi hām'āktux xop te Yeyox xūy'ax kax'āmi', tu tappet tu' kax'āmi', ha hōnhā Yoneo yög tikmū'ün te Yeyox putex mīpkupnix tu', Topa yög hām'āktux hittap hāp-tex, ha mīpkupnix tu' xut, tu nō hāpkot.

³⁰ Pa Topa te' putpu' hīnnähä',

³¹ ha 'āmnīy xohix hā' mōg, ha' xape xop te' pēnähä', nōm te hämyāxatamuk 3 hä hāpkumep Yeyox mūtik, tu Ganinet tu' pip hāmāxap, tu' nūn, tu nūktu Yenoyanēn tu', tu Yeyox putpu hi yā' pēnähä', nūy tikmū'ün nōy pu hām'āktux.

³² —Hak mū'āte hām'āpak max. 'ax xa nūnnähä'. Hōmā Topa te yūmūg mōnāyoxop pu hām'āktux xex,

³³ tu hōnhā' mīy Yeyox hīnnā'ax hä, ha hōmā Topa te hām'āktux xex, ha Topa yög hām'āktux'ax kax'āmi 'ūktex yög tappet 2 kopah, hu:

“Āmūn yā 'ūgkutok.

Hōnhā 'āte 'āmūn yāg kutok 'āktux.” Kaxīy.

³⁴ —Tu Yeyox kutox 'ohnāg 'āktux, tu putpu' hi 'āktux, hu:

“Hōmā 'āte Namix pu hām'āktux xex, nūy tu hāmmaxnā xe'ēgnāg.” Kaxīy.

³⁵ Tu xe hām'āktux, hu:

“Xatek hep kutox putup'ah, tu' tux hok puk hep kutox hok, 'ūgmūn yā 'ōg kāmānat max xe'ēgnāg hah.” Kaxīy.

³⁶ Tu xe:

—Ha Namix te Topa pu hāp̄xopmāhā', tu hāp̄xopmā kux, tu' xok, ha mōnāyoxop mūtik nō hāpkot, hak-tox,

³⁷ pāyā Topa te Yeyox hīnnähā putpu', 'ak-tox'ah.

³⁸ 'Ünōy mūnōm xop, 'āte xa hämyūmmūgāp-tup: Topa te 'ōg hāpkummuk mīy'ax xaxogāp-tup, tu Yeyox puxet hā' xaxogāp-tup, pu tu' kux.

³⁹ Tikmū'ün kuxa yūm ka'ok Yeyox kopah, puxix Topa nōm hāpkummuk mīy'ax xaxogā', pu tu' kux. Mōyyex yög xat'ax hittap pu'uk, tu hāpkummuk mīy'ax 'üm xaxogā hok, pāyā Yeyox ka'ok.

⁴⁰ 'Ōg pa mōxip! 'Āyīpkox pip, nūy Topa gāy'ax pēnā hok, ha Topa tappet te:

⁴¹ “Nāy, xa hip, 'āxop yīxix kummuk xop, 'āxop kuxa mām 'ohnāg xop.

'Āpu 'ākuxa yēy, nūy yāy xaxogā', ha' kux.

Hōnhā 'āte hāp̄xopmāp-tup,

ha tik 'üm te xa hām'āktux'ax,

pāyā 'ākuxa mām 'ohnāg. 'Ūkux. Kaxīy.”

⁴² Tu hām'āktux kux, ha tikmū'ün te Paot tu' xak, pu nit xap nōy 'Ihā hām'āktux 'ūxeheh. Tu' mōg.

⁴³ Ha Yoneo yög tikmū'ün punethok yīpkox pip, xi' puknōg te Topa xak xop, nōm te Yoneo xop hā' mōxakux, tu Paot pe' mōg, xix Maname', nūy hām'āktux'ax 'āpax, ha tikmū'ün yūmmūgāhā', puyi' kuxa mām ka'ok xe'ēgnāg Yeyox kopah.

⁴⁴ Ha nit xap nōy 'Ihā kōmēn 'Ātitik yög tikmū'ün xohix te yāy tu nū'nähā', nūy Topa te hām'āktux 'āpax,

⁴⁵ ha Yoneo xop te' xohix pēnähā', tu' yīpkumīy, tu Paot mānōg, hu:

—Paot te mō'āmā', yā' kummuk. 'Ūxupax hok. Kaxīy.

⁴⁶ Pa Paot te hām'āktux ka'ok xix Maname', tu' yīpkutuk 'ohnāg, tu:

—Hōmā Topa tek xat, hu: “Āpu, yōgnū hām'āktux'ax 'āktux Yoneo xop pu hāmāxap,” kaxīy. Pāyā 'āyīpkox 'ohnāg, tu 'ākuxa hi xe'ēgnāg putup nōg, yīk mūg mōg hāmpuknōg xop hah, 'ūyiy hām'āpak max'ax 'āpax, nūy yīpkox pi', nūy kuxa mām ka'ok Yeyox kopah.

⁴⁷ 'Ūgmūg xuxyā tek xat, hu: “Āte mō'āpok pu' puknōg xop pu hämyūmmūgā', xa' hit-tupmā', nūy nōm xop pu Topa yög hām'āpak max'ax 'āktux, xix hāp̄xexka xohix yög xop pu

hām'āktux, 'ūyīy tikmū'ūn kuxa kummuk xit, nūy kuxa max tat 'ūyānān tu,'" kaxīy. 'Ūkux.

⁴⁸ Ha' puknōg xop te hām'āpak, tu' kuxa hittup, tu Topa yōg hām'āktux 'āktux max. Hōmā Topa te nōm yīmōgatux, pu' kuxa tu mām ka'ok Yeyox kopah, nūy hi xe'ēgnāg mō'kuma' mōg.

⁴⁹ Ha Topa yōg hām'āktux'ax 'āktux hāpexka xohix tu',

⁵⁰ pāyā Yoneo xop te Yoneo xexka xop xix 'ūn xexka xop pu hām'āktux, hu:

—'Āpu, tik kummuk xat, pu mōg hāptox tu'. Kaxīy.

Ha 'ūn xop te Paot putup nōg, xix Maname', tu' xat, pu mōg hāptox tu'.

⁵¹ Ūmōg, tu hāmnaq ha pataxax mōy, tuk-to'ok, pu hāpkōnōn nūnnāy, nūy Yoneo xop yōg hāpkummuk mīy'ax 'āktux. Tu' mōg, tu mōktu mōxaha kōmēn 'Ikōn tu',

⁵² ha' kuxa mām ka'ok xop kuxa hittup xe'ēgnāg, yā Topa Koxuk te' ka'ogāhā'.

14

Tu 'Ikōn tu' tihī'

¹ Tu kōmēn 'Ikōn tu' tihī', tu Topa pet hā' mō'nāhā', tu hām'āktux max, yīy Yoneo yōg tikmū'ūn xohix xexka', xix Genex yōg puknōg xop xohix xexka kuxa mām ka'ok Yeyox kopah.

² Pa Yoneo yōg tik 'ūm kuxa mām 'ohnāg, tu' kuxa mām xop putup nōg, hu' kummuk 'āktux 'ūpuknōg xop pu', nūy gāyā'.

³ Ha 'āmniy punethok hā' tihī', tu yūmūg xuxyā 'āktux, tu' xuxyā te hāmmaxnā 'āktux, yā hāpex'e 'āktux, ha Yeyox te mō'pok xop yōg hām'āktux putup, hu' ka'ogāhā', puyīy hāpoxpmā ka'ok xe'ēgnāg, pu tikmū'ūn xohix pēnā'.

⁴ Ha tikmū'ūn te hāmpē'panōm, ha' yāg te: "Yoneo xop mūn max," kaxīy. Ha' yāg nōy te: "Hamūn'ah. Pāyā Yeyox yōg tik xop mūn max," kaxīy.

⁵ Ha' puknōg xop xix Yoneo xop xi' yōg xexka xop te mō'pok xop kummugāp-tup, tu mīkaxxap xexka hā' tux putup, nūy kix,

⁶ ha' xupak, tu nū'paha', tu mōktu mōxaha hāpexka Nikōn yōg kōmēn Nixtat tu', xix kōmēn Nep tu', xix hām yīmap tu',

⁷ tu Yeyox yōg hām'āpak max'ax 'āktux.

Tu kōmēn Nixtat xix kōmēn Nep tu' tihī'

⁸ Ha Nixtat kopa' xip tik 'ūm te hāpkumep 'ohnāg, ha hāmīxatamuk xohix hā' mōg 'ohnāg, 'ūhi'ax tox hā, yā' yūm ka'ok,

⁹ tu Paot yōg hām'āktux'ax 'āpak, tu' kuxa yūm ka'ok 'ūhittupmā'ax kopah, ha Paot te' pēnā ka'ok, tu' nōy kuxa yūm ka'ok pēnāhā',

¹⁰ tu' yīy ka'ok, tu:

—'Āk-nīhā xihīp! Kaxīy.

Ha' yok, tuk-nīhā' xip mō'ka'ok, tu' mōg kōnāmāhā nōmhā, tu hāpkumep.

¹¹ Ha tikmū'ūn te' pēnāhā', tu' yīy ka'ok, tu hām'āktux Nikōn yīy'ax hā, hu:

—Yā topahnāg te mōxaha', tu tikmū'ūn mūtik yāy putuk! Kaxīy.

¹² Tu Maname pu' mīy 'ūxuxet'ax nōy, hu: "Yop", xix Paot pu', hu: "Mēkot", hām'āktux punethok hah.

¹³ Ha topahnāg Yop yōg 'āmānex nūn, ha topahnāg pet te kōmēn kunāpa' yūm, ha mūnūytut pit nūnnāhā', xix mūnnut max, tu hāmpē'paxex, hu: "Nōm tik 2 yā topahnāg, ha 'āte mūnūytut pit kix putup, nūy nōm topahnāg 2 pu mō'hap, nūy haxiyā', nūy heyah Nixtat yōg tikmū'ūn mūtik," kaxīy.

¹⁴ Pa tik nōy te mō'pok xop pu' xuktux, ha' xupak, hu yāy tu topixxax pot, nūy kuxa hittup 'ohnāg 'āktux, tu tikmū'ūn ha' mōg, tu' yīy ka'ok, tu:

¹⁵ —'Āhup! Putep mūn mīy putup? 'Ak mūn yā Topa'ah, yāk mūn tihik, 'āxop putuk, tu hām'āpak max'ax ha xa' nūnnāhā', xa 'ānīm hāpoxop 'ūm 'āyīm hā' mīy, nūy heyah, xa Topa xe'ēgnāg xax, yā' hi xe'ēgnāg, nōm te hāmōngōy mīy, xix hahām, xix kōnāg xexka', xix hāpoxop xohix kopa' pip.

¹⁶ Hōmā tikmū'ūn xop xohix te hāpoxpmā xohix, 'ap Topa te' kuxyā'ah, pa' tux hok pu mīy, nūy yāy putat hā' mōg,

¹⁷ ha xa' nū'kutnāhā' tehex, xayīy hāpoxop ta nūnnāy 'āpet hah, nūy 'āxit, nūy 'ākuxa hittup. Kaxīy.

¹⁸ Ha Paot te Nixtat yōg tik xat hok, pu mō'hap hok yāy pu', xix Maname pu', nūy heyah.

¹⁹ Ha 'Ātikit yōg Yoneo xop nūn, xix 'Ikōn yōg xop, tu Nixtat yōg tikmū'ūn pu hām'āktux, tu' gāyāhā Yeyox yōg mō'pok xop hā', ha tikmū'ūn te mīkaxxap xexka tux punethok, nūy Paot putex, ha hām tu' nāhā', tu' xok putūmnāg, ha tikmū'ūn te Paot hām manit ha' mōg, tu kōmēn kotit hā' xut, tuk-nāpa' mōg, tu hāmpē'paxex, hu: "Nōmhā' xok xe'e'," kaxīy.

²⁰ Pa' kuxa mām ka'ok xop te yāy tu nū'nāhā', tu Paot yīmap hā' pip, ha Paot yūm, tu' yok, tuk-nīhā' xip, tu' xupep putpu kōmēn tu', tu hāptup 'Ihā Maname mūtik mōg, tu mōktu mōxaha Nep tu'.

Tu Xit xix 'Ātikit ha putpu' mōg

²¹ Tu Yeyox yōg hām'āpak max'ax 'āktux, ha Nep yōg tikmū'ūn punethok kuxa mām ka'ok Yeyox kopah, ha hām'āktux kux, ha putpu' mōg, tu mōktu mōxaha Nixtat tu', tu' mōg tu mōktu mōxaha 'Ikōn tu', tu' mōg, tu mōktu mōxaha 'Ātikit tu'.

²² Tu hām'āktux xe'e', tu hāmīyūmmūgāhā', puyī' ka'ogā', nūy kuxa māmā' ka'ok Yeyox kopah, ha hām'āktux, hu:

—Nōm xop te Yeyox pu yīpkox pip, puxi' xūy'ax hā' tot, 'Ihā pexkox ha' mōg. Kaxīy.

²³ Ha Paot te tik pēnā max xop yīmōgatux, 'ūkuxa mām ka'ok xop xohix kopa' yīmōgatux, tu' xat, pu' nōy xop pēnā max, nūy tu xeh, ha Topa pu hām'āktux, hu' xit hok hā hām'āktux, tu' pēnā max xop pu:

—'Ākuxa mām ka'ok Topa kopah. Pūyā hōnhā Topa 'āmōgā', xix 'āpēnā', xix 'ānīm hok! Kaxīy.

²⁴ Tu ta' mōg, Pixit kotit hā' mōg, tu mōktu mōxaha Pānpit tu'.

²⁵ Tu' mōg, tu mōktu mōxaha Pehek tu', tu Topa yōg hām'āktux'ax 'āktux, tu' mōg, tu mōktu mōxaha 'Atat tu', tu hāpxopmāhā', tu yā' kux,

²⁶ Tu mīpkox hā' mōg, nōm te kōnāg yīmū' mōg, ha mōktu mōxaha hāpxexka Xit yōg kōmēn 'Ātikit tu putpu', nūy Topa yōg hāpxopmā'ax ka'ok xe'ēgnāg 'āktux, nūy kuxa mām ka'ok xop pu' xuktux. Hōmā 'Ātikit yōg kuxa mām ka'ok xop te Topa tu' xak, pu Paot pēnā max, xix Maname pēnā max, ha mō'pok, pu hām'āpak max'ax 'āktux kōmēn xohix tu', tu' mōg tap, tu hāpxopmāhā', tu ta putpu' nūn 'ūxeheh.

²⁷ Ha 'Ātikit tu' mōxaha', tu' kuxa mām ka'ok xop xānāhā', ha' nūn tu nūktu nū'nāhā', ha tik te hām'āktux, tu Topa yōg hāpxopmā'ax xohix 'āktux, tu Topa te' puknōg xop pu yāy yōg putat yok mīy 'āktux, tu' puknōg kuxa mām ka'ok Yeyox kopa 'āktux.

²⁸ Tu 'āmnyy xohix hā' nox ti kuxa mām ka'ok xop mūtik 'Ātikit kopah.

15

Tu Kōmēn Yenoyanēn xop mūtik yāykoīmāhā'

¹ Hāpxip kutōgnāg 'hā Yonex yōg tikmū'ūn nūn, tu nūktu mōxaha 'Ātikit tu', tu' nōy xop yūmmūgāhā', hu:

—'Āxop yā puknōg. 'Āpu, tik xop nāg xax mep 'ūyīmap, puyīy Topa 'āxop kuxa kummuk xit, nūy 'ākuxa max tat 'ūyānān tu'. Mōyyex yōg xat'ax hittap te 'āxat, yīy hōmā xix hōnhā, hāmyāxatamuk xohix punethok hā, Yonex tik xop xohix te' mīy, yā kaxxop pit 'hā' mīy. Kaxīy.

² Pa Paot xix Maname te:

—Kaxīy hok! 'Āmhok! Topa te' puknōg xop xat 'ohnāg, pu yāy xax xak. Kaxīy.

Tu hām'āktux hā' nōy yānān nām punethok, ha' kuxa mām ka'ok xop te Paot xix Maname yīmōgatux, tu mō'pok, xix 'Ātikit yōg nōy xop mō'pok, pu' mōg Yenoyanēn tu', nūy Yeyox yōg tik xop yīkopit, xix tik pēnā max xop yīkopit.

³ Tu ta' mōg, Penix kotit hā' mōg, xix Xāmānit kotit hā' mōg, tu' puknōg xop te Topa ha' mōg 'āktux, ha' kuxa mām xop xohix hittap xexka'.

⁴ Ha mōktu mōxaha Yeyoyanēn tu', ha' kuxa mām ka'ok xop hittap xexka kamah, xix Yeyox yōg mō'pok xop, xix tik pēnā max xop, ha Paot te Topa yōg hāpxopmā'ax 'āktux, Topa te hāpxopmā Paot hā, xix Maname hā, yī' xuktux.

⁵ Pa Paniye yōg kuxa mām ka'ok xop tek-nūhā' pip, tu:

—Topa te' xat, pu tik xop nāg xax yīmap mep. 'Āpu, hāmpuknōg yōg tik xop xax mep kutōgnāg, nōm xop kuxa mām ka'ok Yeyox kopah, puyīy Mōyyex yōg xat'ax hittap xohix pu' yīpkox pi'. Kaxīy.

⁶ Ha mō'pok xop, xix tik pēnā max xop nūn, tu nūktu nū'nāhā', nūy hāmpu tu pānōm.

⁷ Tu hām'āktux hā' nōy yānān nām, ha Pet tek-nūhā' xip, tu:

—'Ūkxape xop: Hōmā Topa tek yāykutnāhā 'āxop kopah, 'āxop te' yūmmūg, ha mōgkutnāhā', 'ū hām'āpak max'ax 'āktux hāmpuknōg xop pu', ha' puknōg xop te hām'āpak, tu' yīpkox pip, tu' kuxa mām ka'ok Yeyox kopah.

⁸ Topa te tikmū'ūn xop kuxa yūmmūg, tu Topa Koxuk nū'kutnāhā' puknōg xop hah, 'ūgmūg putuk,

⁹ ha' puknōg xop te Yoneo yōg tikmū'ūn mūtik yāy putuk Topa pu', tu' kuxa mām ka'ok Yeyox kopah, ha Topa te' yōg hāpkummuk mīy'ax xaxogāhā', pu tu' kux.

¹⁰ Tep tu 'ākuxa mām 'ohnāg Topa yōg hāpxopmā'ax kopah? Mōyyex yōg xat'ax xohix tox xexka', yūmūg'āte yāy yūmmūgā hok, 'ap mīy yūmmūg'ah, xix mōnāyxop te' mīy hok kamah. Tep tu 'āxop te' puknōg xop xat, 'hāg mū'āte Mōyyex yōg xat'ax xohix mīy hok? 'Ap max'ah nūhu'.

¹¹ Pāyā yūmūg xuxyā Yeyox te' hok hā hāmmaxnāhā', tu yūmūg kuxa kummuk xit, xī' puknōg xop kuxa kummuk xit kamah, nūy yānān tu' kuxa max tat, yā yāy putuk. Yūmūg xuxyā Yeyox te' hok hā' yānān, nōm xop kuxa mām ka'ok nōm kopah. Kaxīy.

¹² Ha tik xop yīy 'ohnāg, yīy Maname yōg hām'āktux'ax 'āpak, xix Paot yōg, ha Topa te hāpxopmā xe'ēgnāg, puyī' puknōg xop pēnā', ha tik mō'pok'ax te' xuktux,

¹³ tu hām'āktux kux, ha Tiak te:

—'Ūkxape xop, 'ūg'āpax:

¹⁴ Xīnām te xa hām'āktux, hu: "Topa te' puknōg xop mō'yāy xe'ēgnāg, tu 'ā' hāmyūmmūgāhā hāmāxap, tu nōm xop yīmōgatux hāmpuknōg xop kopah, ha yāyhā Topa yōg tikmū'ūn," kaxīy.

¹⁵ Hōmā tik hittap te Topa pupi hām'āktux kamah, hu:

¹⁶⁻¹⁸ "Hōmā, hāmyāxatamuk xohix 'hā, Topa te hām'āktux, hu:

'Hōmā 'āte mōnāyxop Namix xexkanāhā', ha' yōg tikmū'ūn tek xak, ha hōnhāk nūn putup,

tu Namix mōkputox puxet xexkanāp-tup, puyī hep xohix xop 'ūk xax, ha 'āte nōm puknōg xop mō'yāy xe'ēgnāg, tu' nōy yāy, nūy yāy 'āxet'ax mīy yōgnū tikmū'ūn," kaxīy. 'Ūkux.

19 Ha Tiak te xe hām'āktux, hu:

—'Āte 'āpekpaxex. Yā' max hāmpuknōg xop kuxa mām ka'ok xop te Yoneo yōg xat'ax mīy hok, xix mōnāyxop yōg hāpxopmā'ax tat hok kamah, nūy kuxa mām puxehnāg Yeyox kopah.

20 'Āpu, yūmū'āte tappet kax'āmi' kuxa mām ka'ok xop pu', nūy tu' xat hok, pu' mā hok topa komut xop xit'ax, xix xok xop 'ūm māy mūg tup-tex mā hok, xix xokxop hep 'āta mā hok, xi' nōy hā' xupxet hok.

21 Yā nit xap xohix 'ihā Yoneo xop te Mōyyex yōg xat'ax mō'kupix Topa pet kopah, tu Mōyyex te hām'āktux 'āktux kōmēn xohix kopah. Yā' puxi'. 'Ūkux. Kaxīy.

Tu tappet tu kax'āmi'

22 Ha mō'pok xop, xix tik pēnā max xop, xi' kuxa mām ka'ok xop xohix te Tiak yōg hām'āktux'ax 'āpak, tup-tox puxet, hu tik 2 yīmōgatux, pu Paot xix Maname mūtik mōg, tu 'Ātikit tu mō'pok, ha tik 2 'āxet'ax Yot Maxamax, xix Xinox, ha' xape xop tep-tup pax, tu nōm pe'paxex max.

23 Ha kax'āmi' kuxa mām ka'ok xop pu', tu tik hā mō tappet kutnāhā', ha tappet tu kax'āmi', hu:

“Yeyox yōg mō'pok xop xix tik pēnā max xop te 'āneo, 'ūkxape xop pu 'āneo, 'Ātikit yōg kuxa mām ka'ok xop, xix Xit yōg kuxa mām ka'ok xop, xix Xinox yōg kuxa mām ka'ok xop pu 'āneo.

24 'Ūgmū'āte' nōy xop yōg hām'āktux'ax 'āpak, nōm te nūnte' tihi', tu 'āhā' mōg, tu 'āxat, hu: “Āpu, tik xop xohix yāy xax mep kutōgnāg, pu Topa 'ākummuk mīy'ax xaxogā 'ūyānān tu', kaxīy. Ha 'ākuxa hittup 'ohnāg. 'Ak mū'āte nōm Yoneo tik xop mō'pok'ah, 'ak mūn te 'āxat'ah.

25 Hu hōnhāk mū'āte xohix te tik 2 yīmōgatux, pu xa mō'pok, ha Paot, xix Maname mūtik mōg. 'Āxohix te Paot putup pax, xix Maname', tu nōm pe'paxex max.

26 Yā' hi Yeyox tu', yā yāy xuxyā', yīy xe yāy yōg'ah. Yeyox te' xat, pu mōg, ha' mōg, 'ok pe' hi', 'ok pe' xok.

27 Hak mū'āte Xinox mō'pok, xix Yot, ha xa' xohix hāmyūmmūgāp-tup.

28 Ha Topa Koxuk te 'āxat hāmāxap, hak-nāy tuk mū'āte, hu:

29 'Ūmā hok topa komut xop xit'ax, xix xokxop 'ūm māy mūg tup-tex mā hok, xix xokxop hep 'āta mā hok, tu 'ānōy hā xupxet hok. Puxi', yā' max. Ha' kux.” Kaxīy.

30 Ha ta' mōg tik xop, tu mōktu mōxaha 'Ātikit tu', ha' kuxa mām ka'ok xop te yāy tu nū'nāhā', nūy mō'pok yōg tappet mō'kupix,

31 tu mō'kupix kux, ha' kuxa hittup xexka'.

32 Ha Yot xix Xinox yā Topa pupi hām'āktux xe'e', tu' xape xop ka'ogāhā'.

33 'Āmnīy kutōgnāg 'ihā' tihi', tu putpu' mōg, tu mōktu mōxaha Yenoyanēn tu'.

34 Pa Xinox mōg'ah, tu' nox xip 'Ātikit tu'.

35 Ha Paot xip 'Ātikit tu', xix Maname', tu' nox tihi', tu hāmyūmmūgāhā', nūy Topa yōg hām'āktux'ax 'āktux, 'ūnōy xop mūtik.

Paot xix Maname te yāy xatat

36 Ha 'āmīy punethok nōg, ha Paot te Maname pu hām'āktux, hu:

—'Āpu, yūmū mōg putpu', nūy xape xop xohix pēnā', nūy kōmēn xohix kopa' pēnā', nūy Topa yōg hām'āktux'ax xe 'āktux. Kaxīy.

37 Ha Maname te Yoām Mā'ak mōgāp-tup,

38 pa Paot tep-tup nōg. Hōmā Yoām Mā'ak te' nīm Pānit tu', tu hāpxopmā 'ohnāg.

39 Ha Paot te hām'āktux hā' nōy yānān Maname mūtik, tu' gāy, ha Maname gāy, tu yāy xatat, ha Maname te Yoām Mā'ak mōgāhā', tu' mōg, tu mīpkox hā' mōg, nōm te kōnāg xexka yīmū' mōg, tu mōktu mōxaha hāmyīn yūm 'āxet'ax Xip tu'.

40 Pa Paot te Xinox yāykutnāhā pu mōg, ha' nōy xop te:

—Pūyā Topa 'āmūtik mōg. Kaxīy.

41 Ha' mōg, tu Xit kotit hā' mōg, xix Xinit kotit hā' mōg, tu' kuxa mām xop ka'ogāhā'.

16

Tīmōn te Paot mūtik mōg, xix Xinox

1 Tu' mōg, tu mōktu mōxaha kōmēn Nep tu', xix kōmēn Nixtat tu', ha tik 'ūm xip, 'ūxuxet'ax Tīmōn, tu' kuxa yūm ka'ok Yeyox kopah, tu' mūg tut Yoneo hex, pāyā' tak Genex yōg, tu Yoneo xop hā' puknōg.

2 Ha Nixtat tu' pip xape xop te Tīmōn putup pax, xix 'Ikōn yōg xop te',

3 ha Paot te' mōgāp-tup yāy mūtik, hu' nōy yāy xax yīmap xak kutōgnāg, nūy Yoneo xop gāyā hok, yā' xohix te Tīmōn mūg tak yā' puknōg yūmmūg.

4 Ha ta' mōg kōmēn tu', tu Yeyox yōg mō'pok xop, xix Yenoyanēn yōg tik pēnā max xop pupi hāmyūmmūgāhā', tu' xape xop pu hāmyūmmūgāhā',

5 Ha' xape xop kuxa mām ka'ok Yeyox kopah, 'ihā' xohix nōy nā' mōg.

Tik xop te kōmēn Tonot ha' mōg

6 Ha ta' mōg, tu mōktu hāpxexka Pinik kotit hā' mōg, xix hāpxexka Ganax kotit hā' mōg, ha Topa Koxuk te hām'āktux xat hok, hu:

—'Ax yōg kōmēn kopa hām'āktux hok! Kaxīy.

⁷ Ha ta' mōg, tu mōktu mōxaha Mīy tu', tu' mōg putup Miñ tu', pa Yeyox Koxuk te' xat hok, pu mōg hok.

⁸ 'Ap mōg'ah, tu Mīy hā' yēn hā' mōg, tu mōktu Tonot tu' mōxaha'.

⁹ Ha 'āmnīy hā Paot te yāy koxuk hā hāpxexka Māxenōn yōg tik pēnāhā', hak-nīhā' xīp, tu Paot tu' xak, hu:

—Mā'! Māxenōn tu' ānū', nūy mōy 'ūgmūg nūynām. Kaxīy.

¹⁰ Hāpxip 'ohnāg 'īhā Paot koxuk te' pēnā kux, hak mūg mōg putup Māxenōn tu', tu hāmpē'paxex, hu: "Topa tek mūg xānāhā', 'ū Yeyox yōg hām'āpak max'ax 'āktux Māxenōn yōg tikmū'ūn pu'," kaxīy. (Hak mūn Nok te kax'āmi'.)

Tu kōmēn Pinio tu' tihi'

¹¹ Tuk mūg pip Tonot kopah, tuk mūg mōg mīpkox hā, kōnāg xexka yīmū' mōg, tu mōktu hāmyīn yūm 'āxet'ax Xāmōtanax tu' mōxaha'. Hāptup 'īhāg mūg mōg, tu mōktu mōxaha kōmēn Nēyap tu'.

¹² Tuk mūg mōg, tu mōktu mōxaha hāpxexka Māxenōn yōg kōmēn te māxap Pinio tu', ha' yōg gohet yā hāpxexka Hōm yōg, ha 'āmnīy punethok hak mūg tihi Pinio kopah.

¹³ Tu nit xap 'īhāk mūg mōg kōmēn kunāpa', tu Topa yōg hām'āktux'ax pet xak, nūy Topa pu hām'āktux, 'īhā kōnāgkox tu' mōxaha', hu kōnāg kux tuk mūg mām, ha 'ūn pip, hak mū'āte 'ūn mūtik hām'āktux.

¹⁴ Ha kōmēn Tittit yōg 'ūn xip, tu topixxax max hāmenex, 'ūxuxet'ax Nit, tu Topa xak, tu' kuxa te' yēy Topa keppah, tu Yeyox hām'āpak max'ax 'āpak, ha Topa te' kuxa tupmāhā', yīy Paot yōg hām'āktux'ax 'āpak, tu' yīpkox xip,

¹⁵ hap-tox pix, xi' xape xop 'ūpet kopa tihi' xop putox pix, ha' xak, hu:

—'Ūgkuxa yūm ka'ok Yeyox kopah, yīy 'ūkpet ha mōg, nūy nox pi'. Kaxīy.

Hak mūg mōg Nit pet hah.

Tu kanet kopa' tihi kōmēn Pinio tu'

¹⁶ 'Āmnīy kutōgnāg nōg, 'īhāk mūg mōg Topa pet hah, ha' mīm hex te putat hā' nūn, tu yāmīy pupi hām'āktux, tu hāpxopmā'ax pēnā hok 'āktux, tu hām'āktux hā tayūmak xexka pop, tu tik xop 'ūm pu' popmāhā', tu nōm tik xop pu' hok hā' hām.

¹⁷ Tu Paot pe' mōg, xik mūg pe' mōg, tu' yīy ka'ok, hu:

—Nū tik xop te Topa xe'ēgnāg hā kāmānat, hu xa hāmyūmmūgāp-tup, nūy Topa yōg putat hā 'āmōgā'. Kaxīy.

¹⁸ Tu xe hām'āktux hā kaxīy, 'āmnīy xohix hā' xuktux, ha hām'āktux kux 'ohnāg, yīy Paot gāy, tu' yōkānām, tu yāmīy kummuk mānōg, hu:

—Hōmā Yeyox te yāmīy kummuk mōy tikmū'ūn kopah, tu' mōg pexkox tu', tuk mū'ā yāy 'āxet'ax hōm, pu yāmīy kummuk

mōy, hu 'āte 'āxat, hu: 'Āpep, nūy mīm hex 'āpe' nīm. Kaxīy.

Ha' nīm, tu' mōg xupaha'.

¹⁹ Pa tik xop nōy te mīm yōg tayūmak xak, hu' gāy xexkah, tu Paot mūg, xix Xīnax, tu' xexka xop keppa' mōgāhā', ha' xexka xop te kōmēn yōg hāmnuknōg tu' pip,

²⁰ ha tik xop gāy, tu' kupex, hu:

—Nū tik yā Yōneo yōg xop, tu kōmēn Pinio yōg tikmū'ūn gāyāhā', tu hāpxopmā kummuk yūmmūgāhā',

²¹ ha Hōm yōg gohet te nōm hāpxopmā'ax putup nōg, tu' xat hok, 'ū mīy hok, hak mū'āte Hōm yōg tikmū'ūn. Kaxīy.

²² Ha tikmū'ūn te yāy tu nū'nāhā', tup-tox puxet, nūy Paot kix, xix Xīnax kix, ha kōmēn yōg xexka xop te tik yōg topixxax koxip, tu' mōy, tu' xat, pu kix mīm mūnāg hā.

²³ Tu' kix kakixnāg, tu kanet ha' mōgāhā', tu kanet yōg xonat xat, hu:

—Pēnā ka'ok, pu tu xupa hok! Kaxīy.

²⁴ Ha hām'āpak, tu kanet hā mō'tat, tu' kopa tigāhā', tu' xex, tu tik kup hīy mīm ka'ax tu', ha' mōg 'ohnāg, tu' pip.

²⁵ Ha 'āmnīy kote 'īhā Paot xix Xīnax te Topa pu hām'āktux, tuk-tex, nūy Topa 'āktux max, ha kanet kopa' pip tikmū'ūn te' xupak.

²⁶ Hāpxip kutōgnāg 'īhā hām yīy nuhuk nām, ha mīptut yōg hāpkopa mīkaxxap nuhut, ha mō'yīnnīn'ax te yāy xōn, ha tikmū'ūn te kanet kopa' pip, ha' hīy'ax kōa', nōm te kanet kopa' xup, ha' mōxaha'.

²⁷ Ha kanet yōg xonat te yāy koxak, tu kanet mō'yīnnā'ax pēnāhā', pa yāy xōn, ha xonat te hāmpē'paxex, hu: "Yā' xohix nū'paha'!" Kaxīy. Hu yāy putex putup mīkax xexka hā,

²⁸ pa Paot yīy ka'ok, tu:

—Yāy xuhmīy hok! Yāg mūg xohi' pip! Kaxīy.

²⁹ Ha' nōy te:

—Kuyānām paxnū'. Kaxīy.

Tu mō'nāhā', tu kuxānōg, tu yāy puxu'uxnām, tu' kopaxux hā' nāhā Paot keppah, xix Xīnax keppah,

³⁰ tu' yok, tuk-nīhā' xīp, tu hāpkopa' mōy, tu:

—'Ūgnōy, 'āte putep mīy'ax, puyīy Topa 'ūgkuxa kummuk xit, nūy 'ātu' gāy hok? Kaxīy.

³¹ Ha Paot xix Xīnax te:

—'Ākuxa yūm ka'ok 'ūgmūg xuxyā Yeyox kopah, puxix Topa 'ākuxa kummuk xit, nūy yānān tu 'ākuxa max tat, 'āmūn, xix 'āxape te 'āpet kopa' pip. Kaxīy.

³² Ha tik xop te Topa yōg hām'āktux'ax 'āktux kanet yōg xonat pu', xix' xape xop pu'.

³³ 'Āmnīy kote 'īhā' xonat te' nōy yōg kayax pix, ha Paot xix Xīnax te xonat putox pix, xi' xape xop, nōm xop kuxa mām ka'ok Yeyox kopah.

³⁴ Ha xonat te yāy pet ha' mōgāhā', tu hāpxop pop nūn, ha' māhā', ha xonat kuxa yūm ka'ok Topa kopah, xi' xape xop kamah, hu' kuxa hittup.

³⁵ Hāptup ha ta Hōm yōg xexka xop te' xat, hu:

—Kanet kopa' mōy tik 2, pu mōg, tu nūmān. Kaxīy.

³⁶ Ha xonat te Paot pu hām'āktux, hu:

—Tik xexka xop te 'āmōy putup, ha 'ānūpap-tup, hu mōy, xa 'ākuxa mām. Kaxīy.

³⁷ Pa Paot te:

—'Āmhok! Kaxīy hok! Hōmā tik tek mūg kix kakixnāg, ha kōmēn Pinio yōg tikmū'ūn te' pēnāhā'. Hak mūg yīkopit 'ohnāg, tuk mū yōg hāpxopmā'ax kopit, 'okpak mūg hāpxexka Hōm yōg tūhik, ha kanet kopak mūg tīgāhā', yā hōnhā nūmān yāy xaptop tu! 'Āmhok! 'Ak mūg mōg putup'ah. 'Āpu, tik xānā', pu nū, pu nūy 'ūgmūg mōy kanet kopah, nūy hāptopak mūg mōgā'. Kaxīy.

³⁸ Ha xonat xop te Hōm yōg xexka xop pu hām'āktux, ha' xexka xop kuxānōg, Paot xix Xinax yā hāpxexka Hōm yōg tik hah.

³⁹ Ha' nūn, tu tik 2 pu hām'āktux, hu:

—'Āgāy hok 'ātu'. 'Āte nūktu yāyhāhup hok'ah. Kaxīy.

Tu kanet kopa' mōy, tu ta' mōg, tu kōmēn kunāpa' mōgāhā', tu:

—'Āmōg. Kaxīy.

⁴⁰ Ha' mōg, tu Nit pet ha' mōg, tu' xape xop mō'nīynām, tu' mōg.

17

Tu kōmēn Texanōn tu' tihi'

¹ Tu ta' mōg, kōmēn 'Āppit kotit hā' mōg, xix kōmēn 'Aponōn kotit hā' mōg, tu mōktu mōxaha kōmēn Texanōn tu', ha Yoneo yōg Topa pet yūm,

² ha nit xap yā Yoneo yōg hāptup xe'e', yīy nit xap xohix 'Thā Paot te Yoneo yōg Topa pet hā' mōg, hu hōnhā' mōg, tu nit xap

³ 'Thā hām'āktux hā' nōy kutnāhā'. Kaxīy.

⁴ Ha tik 'ūm te:

—Hamūn! Kaxīy.

Hu Paot xix Xinax mūtik yāy kotīnnāhā', ha Genex yōg puknōg xop te Topa xak, xix 'ūn xexka xop, tu nōm tik mūtik yāy kotīnnāhā'.

⁵ Pa Yoneo xop te' yīpkumīy, tu tik kummuk yīmōgatux, nōm hām hok xop, tu hāpkute'ex kummuk pax, 'ap max'ah, tu kōmēn xohix kopa hāpkummugāhā', tu kōmēn xohix gāyāhā', tu Paot xak xix Xinax, hu Yaxām pet hā' mōxakux.

⁶ Pāyā 'ap ti'ah, yīy Yaxām mūg, tu' xut yāy pet kopah, tu' xape xop mōy kamah, tu kōmēn yōg xexka xop keppa' mōgāhā', tu:

—Nū tik te hām xexka xohix tu hāpkummugāhā', tu nūktu nūn kamah,

⁷ tu Yaxām pet kopa' tihi', ha' xohix te hāpxexka Hōm yōg Xex putup pax, pa tik xop kummuk te hāpkummuk yūmmūgāhā', hu: "Hōm yōg Xex tek mūg xat 'ohnāg. Yā Yeyox tek mūg xat xe'ēgnāg! Kaxīy."

⁸ Ha Texanōn yōg tikmū'ūn te hām'āpak, xix kōmēn yōg xexka xop, hu' gāy,

⁹ tu tayūmak xak Yaxām tu hāmāxap, xi' nōy xop tu', puyīy Paot xix Xinax mōy, puyīy kōmēn Texanōn nīm. Ha pago, tu nū'paha'.

Tu kōmēn Menet tu' tihi'

¹⁰ Ha 'āmnīy hā' kuxa mām ka'ok xop te Paot xix Xinax mōgāhā', tu' mōg tu mōktu mōxaha kōmēn Menet tu', tu Yoneo yōg Topa pet hā' mōxakux.

¹¹ Ha Menet yōg Yoneo xop te hāmyok mīy, pa Texanōn yōg xop te hāpkohe' mīy. Yā Menet yōg tikmū'ūn te Topa yōg tappet mō'kupix nām, puyīy Paot yōg hām'āktux kopit, nūy hām'yūmmūg, nūy hāpxe'e yūmmūg.

¹² Hū Menet yōg tikmū'ūn punethok kuxa mām ka'ok Yeyox kopah, xix Genex yōg 'ūn xexka xop, xix tik xop.

¹³ Ha Paot te hām'āpak max'ax 'āktux, ha Texanōn yōg Yoneo xop te hām'āpak, hu' gāy, tu' nūn, tu nūktu tikmū'ūn gāyāhā'.

¹⁴ Ha' xape xop te Paot xut, tu:

—Mōg, mōg, pu 'āp-tex hok! Kaxīy.

Ha' mōg, kōnāg xexka ha' mōg, pāyā Xinax nox xip, xix Tīmōn, tu Menet kopa' tihi'.

¹⁵ Ha nōm xape xop te Paot mōgāhā kōmēn xexka 'Atēn tu', tu putpu' mōg Menet tu', tu Paot pupi hām'āktux, nūy Xinax xānā', xix Tīmōn, pu kōmēn 'Atēn tu' mōg mō'ka'ok.

Tu kōmēn 'Atēn tu' xip

¹⁶ Ha Paot te 'Atēn tu' tik 2 hip, tu kōmēn xexka pēnāhā', tu topahnāg komut pēnāhā', ha nōm komut yīm hā' mīy, nūy heyah, ha kōmēn nū'xip nōm hāpxop hā, yīy Paot kuxa hittup 'ohnāg.

¹⁷ Tu' mōg Yoneo yōg Topa pet hah, nūy Yoneo xop mūtik hām'āktux hā' nōy yānān nām, xix nōm xop te Topa xak xop mūtik hām'āktux hā' nōy yānān. Tu nāpet ha' mōg kamah, ha 'āmnīy xohix hā hām'āktux hā' nōy yānān 'Atēn yōg tikmū'ūn mūtik.

¹⁸ Tu hām'āktux, tu hāmyūmmūg'ax xop 'āxet'ax 'Epikoneo xop mūtik hām'āktux, xix 'Extox xop mūtik hām'āktux hā' nōy yānān, ha' yāg te' yīkopit, hu:

—Kāy te hām'āktux punethok. Putep mūn 'āktux putup? Kaxīy.

Ha' yāg nōy te' yānān, hu:

—Tute topahnāg puknōg 'āktux. Kaxīy.

Ha Paot te Yeyox 'āktux, tu Yeyox putpu' hi 'āktux.

¹⁹ Ha tik xop te hāmyūmmūg te Paot yīm mūg, tu 'Axenop yōg hāmyūmmūg xop ha' mōgāhā', pu hām'āktux'ax 'āpax, tu' yīkopit, hu: koneo xop mūtik hām'āktux, xix 'Extox

xop mütik hām'āktux hā' nōy yānān, ha' yāg te' yīkopit, hu:

—Kāy te hām'āktux punethok. Putep mūn 'āktux putup? Kaxīy.

Ha' yāg nōy te'

—Ok hāmyūmmūg'ax tup nūhū xate hāmyūmmūgāhā'?

²⁰ 'Āpu, 'āyīy, tu hāmyūmmūg'ax puknōg 'āktux, nūy 'ūgmū yūmmūgā'. Kaxīy.

²¹ Yā 'Atēn yōg tikmū'ūn hām hok, xix puknōg xop te kōmēn kopa' tihī' hām 'ohnāg, pa hām'āpak pax, nūy tu xe' xuktux, tu 'āmnīy xohix hā hām'āpak tup 'āpak, xī' xe' xuktux.

²² Ha Paot te hām'āktux, ha 'Anenop xop te Paot xakot, ha Paot te:

—Atēn yōg tikmū'ūn: 'Āxop te 'ōg topahnāg komut xop xohix xak.

²³ 'Āte hāpkumep, tu topahnāg komut punethok pēnāhā', nōm mīy nūy heyah, ha 'āte topahnāg yōg mīmpe pēnāhā', ha tikmū'ūn te topahnāg pu hāpxop 'ūm hōm, tu mīmpe yīmū' xix, ha tik 'ūm te mīmpe yīmū' kax'āmi', hu: "Nūhū topa puknōg pu," kaxīy. 'Āte xa nōm puknōg 'āktux putup.

²⁴ —Topa xe'ēgnāg te hām xexka mīy, xix hāpxop xohix mīy, hu pexxok xix hahām xat. 'A' pet mīy xak'ah tikmū'ūn yīm hā. Yā mīptut kopa ti 'ohnāg. 'Ūxexka xe'ēgnāg Topah.

²⁵ Tu hāpxop 'ūm xak 'ohnāg, yā hāpxop xohix mīy, nūy tikmū'ūn pu' xit xut popmāhā', xī' hi'ax, xix hāpxop xohix yā' hok popmāhā'.

²⁶ Tu tik puxet mīy hāmāxap, tu nōm hā' mīy tikmū'ūn xohix, xī' hep xohix, pu yōg hām tu 'āti', ha Topa te tikmū'ūn pu hām 'ūm hā' xakux'ax xat, xix hām 'ūm hā' xakix'ax xat, tu' pip'ax 'ūm xat, pu mōg hāpxexka pu kopa 'āti'.

²⁷ Puyīy tikmū'ūn Topa xax, nūy xipi', pāyā tikmū'ūn yīka hā Topa xip.

²⁸ Hōmā 'ōgnū tik te hāmyūmmūg te kax'āmi', hu: "Topa hā yūmū'āte' xit xut, xix yūmūg mōg, xix yūmūg tihī'," kaxīy. Ha' nōy te: "Yūmū'ā Topa hā kutok xe'e'," kaxīy.

²⁹ Hamūn, yūmū'ā Topa hā kutok, hu hāmpē'āpaxex hok, hu: "Topa te pipkup yānām putuk," kaxīy. Xix hāmpē'āpaxex hok, hu: "Topa te mīkaxxap putuk," kaxīy. 'Āmhok. Tik 'ūm te Topa xe'e mīy 'ohnāg.

³⁰ Hōmā tikmū'ūn te hāmyūmmūg'ah, ha Topa te nōā'tot, pa nōmhā Topa te' xat, xa yāyhāhup, tu hāpkummuk mīy kux, pu Topa 'āxop yōg hāpkummuk mīy'ax xaxogā', pu tu kux.

³¹ Yā Topa pa te hāmyūmmūg, tu hāptup puxet yāyutnāhā', 'lhā' tute hep xop xohix yōg hāpxopmā'ax kopit putup, tu tik te hāmyok mīy hā' kopit putup, tu Yeyox yāyutnāhā', pu tu kopit, ha' putpu

nōm hīnnāhā', nūy tikmū'ūn xohix pu hāmyūmmūgā'. Kaxīy.

³² Ha tikmū'ūn te' xupak, ha' yāg te:

—Putep te hām'āktux? 'Ūxok, tu putpu' hī'?" Kaxīy.

Tu' yīxix kummuk. Ha' yāg nōy te:

—Yā' max. Hāptup 'ūm nōy 'lhā xe xa 'āpak putup. Kaxīy.

³³ Ha Paot mōg,

³⁴ pāyā tik 'ūm kuxa mām ka'ok, 'ūxohix te: 'Axenop yōg Nionīy, xix 'ūn Nām, xī' nōy xop kuxa mām ka'ok.

18

Tu kōmēn Konīn tu' tihī'

¹ Ha Paot te 'Atēn tu' xip, tu ta' mōg, tu mōktu xupep kōmēn Konīn tu'.

² Ha Pō'ōn yōg Yoneo xip, 'āxet'ax 'Ak, xī' xetut Pinixit, tu hāpxexka 'Itat tu' tihī', tu hāpxip kutōgnāg nūn. Hōmā hāpxexka Hōm yōg tik te tikmū'ūn xat'ax Kanao Xex te Yoneo xop nūmāhā', ha hōnhā Paot mōg 'Ak hah, xī' xetut hah.

³ Ha Paot xix 'Ak te yīmāgkox xexka mīy hā' hām, tu topixxax ka'ok hā' mīy, tu' nōmēnex, tu tayūmak pop, ha Paot te 'Ak mütik tihī'.

⁴ Ha nit xap xohix 'lhā Paot mōg Yoneo yōg Topa pet hah, tu hām'āktux hā' nōy yānān nām Yoneo xop mütik, xix Genex yōg xop mütik hām'āktux, nūy hāmyūmmūgā'.

⁵ Ha Xinox xix Tīmōn te Māxēnōn tu' tihī', tu' nūn, tu nūktu mōxaha Konīn tu', 'lhā Paot te hām'āktux Yoneo xop pu', hu:

—Yeyox yā Kunnix, yā Topa te' yāyutnāhā'. Kaxīy.

⁶ Pa tikmū'ūn tep-tup nōg, tu' yīpkox 'ohnāg, tu' mānōg, tu Yeyox 'āktux kummuk, yīy Paot te yāy yōg topixxax kuto'ok, tu:

—Topa te 'ōg hāpxopmā'ax kopit putup, nūy hāpkummuk mīy'ax hā' yānān. Kaxīy.

Tu xe hām'āktux, hu:

—Xate Topa yōg putat yok max putup nōg. 'Ak yā kuxop'ah, huk mōg Yoneo xop hā' puknōg xop hah. Kaxīy.

⁷ Tu' mōg Tix Yox pet hah, ha Topa xak, tu' kuxa te' yēy Topa keppah, yā yāy pet te Yoneo yōg Topa pet yīka' yūm.

⁸ Ha Kīnix te Topa pet yōg xop xat, tu' kuxa yūm ka'ok Yeyox kopah, xī' xape xop kamah, ha Konīn yōg tikmū'ūn punethok te Paot yōg hām'āktux'ax 'āpak, tu' kuxa mām ka'ok, hap-tox pix.

⁹ Ha 'āmnīy koxtap 'lhā Yeyox te Paot pu hām'āktux, ha Paot te yāy koxuk hā' xupak, yīy:

—'Ākuxānōg hok, xix yāy xaptop hok.

¹⁰ Yā 'āmütik 'ūktihi', tu 'āpēnānāg xip, pu tik 'ūm 'āmūy hok. Yā yōgnū tikmū'ūn punethok pip nū kōmēn tu'. Kaxīy.

¹¹ Ha' xip hāmyāxatamuk puxet xi' xahi', tu Topa yōg hām'āktux'ax yūmmūgāhā Konīn yōg tikmū'ūn pu'.

¹² Ha Gat te hāpxexka Genex yōg tikmū'ūn xat, ha Yoneo xop te yāy tu nū'nāhā, nūy Paot kupeh, tu' mūg, tu' mōgāhā kōmēn yōg xexka xop keppah, nōm xop pa te hāmyūmmūg keppah, puyi' yīkopit.

¹³ Ha' kupex, hu:

—Kāy te Topa xak'ax yūmmūgāhā tikmū'ūn pu', pāyā tik te yūmūg xat te' xat hok, kāy te hāmyūmmūgā kummuk hah. Kaxīy.

¹⁴ Ha Paot te' yīkox xix, 'ūyīy putup tu', pāyā Gat te hām'āktux Yoneo xop pu', hu:

—Nāy, 'Ok pe kāy tep-tex, 'ok pe nō xupxet, kopxi' kopit,

¹⁵ pāyā 'āxop yīy'ax 'āte yūmmūg'ah, xix 'ōg xat'ax puknōg 'āte kama yūmmūg'ah, xi' xuxet'ax 'ūm 'āte' yūmmūg'ah. 'Ak kopit putup'ah 'āte'. Kaxīy.

¹⁶ Tu papuk hāpxupmāhā, ha' mōg, tu' gāy.

¹⁷ Ha' xohix te Topa pet xop xat'ax Xox mūg, tu' kix Gat keppah, pāyā Gat te' pēnā hok, tu nūpe mō'kep, tu nūpe mō'kut.

Tu kōmēn 'Ātitik tu putpu' mōg

¹⁸ Ha 'āmnīy xohix nōg, Thā Paot te mīpkox hā' mōg, nōm te kōnāg yīmū' mōg, ha mōktu xupep hāpxexka Xit tu', ha Pinixit xix 'Ak te nūmūtik mōg, tu mōktu mōxaha kōmēn Xēnkenex tu', ha Paot te' xe mep, tu' xut xok nām, Topa pu hām'āktux xex tu'.

¹⁹ Tu' mōg, tu mōktu mōxaha kōmēn 'Ep tu', tu Pinixit xix 'Ak nīm, tu' mōg Yoneo yōg Topa pet hah, tu hām'āktux hā' nōy yānān Yoneo xop mūtik.

²⁰ Tu' mōg putup, pa Yoneo xop te:

—Nāy! 'Āmōg hok! Kaxīy.

²¹ Pāyā' mōg putup, hu:

—Topa tek putup, kopxix putpu 'āhāk nū'. Kaxīy.

Tu mīpkox hā' mōg.

²² Tu mōktu xupep kōmēn Xeyanet tu', ha' mōg kuxa mām ka'ok xop hah, tu' mōg, tu mōktu mōxaha 'Ātitik tu',

²³ Tu 'āmnīy punethok hā' tihi', tu' mōg, tu hāpxexka Ganax kotit hā' mōg, xix Pinik kotit hā' mōg, tu' kuxa mām ka'ok xop ka'ogāhā'.

'Apot te kōmēn 'Ep tu' xip

²⁴ Ha kōmēn xexka 'Anexānit yōg Yoneo pit nūn kōmēn 'Ep tu', 'ūxuxet'ax 'Apot, tute Topa yōg hām'āktux'ax 'āktux max, tu Topa yōg tappet hittap yūmmūg xe'e'.

²⁵ Tu Topa yōg putat yūmmūg, tu' hittup, tu Yeyox 'āktux, tu Topa yōg hāmyūmmūg'ax yūmmūgāhā', pa Yoām puxet yōg putox pix'ax yūmmūg, tup-tox pix'ax nōy yūmmūg'ah, 'ūp-tox pix nūy Yeyox yā yāy xuxyā 'āktux yūmmūg'ah.

²⁶ Tu hām'āktux, tu' yīpkutuk 'ohnāg Yoneo yōg Topa pet kopah, ha Pinixit xix 'Ak te' xupak, tu yāy pet ha' mōgāhā', nūy Topa yōg putat yūmmūgā xe'e'.

²⁷ Ha 'Apot te hāpxexka Genex tu' mōg putup, ha 'Ep yōg kuxa mām ka'ok xop te mō'nīynām, tu tappet kaxāmi Genex yōg kuxa mām ka'ok xop pu', puyi' nū' nūnānām yāy nōy putuk. Ha' mōg, tu mōktu xupep Genex tu', tu nōm xop mō'nīynām punethok 'ūyānān tu', tu hāmyūmmūgāhā', tu' ka'ok, tu' nōy xop ka'ogāhā', ha Topa te hāmmaxnāhā'.

²⁸ Ha Yoneo xop mūtik hām'āktux hā' nōy yānān nām, tu Topa yōg tappet hā Yeyox yā Kunnix 'āktux, tu Topa te nōm yāy kutnāhā 'āktux, ha Yoneo xop te' yēy, tu' yīy 'ohnāg.

19

Paot te 'Ep tu' xip

¹ 'Apot te Konīn tu' xip, 'Thā Paot yīnāpa' nūn kōmēn xohix yīktix yīmū' pip tu', tu nūktu xupep 'Ep tu', tu' kuxa mām xop pip-ihī',

² tu' yīkopit, hu:

—'Ok Topa Koxuk te 'ākuxa ka'ogāhā', Thā 'ākuxa mām ka'ok tap Yeyox kopah? Kaxīy.

Ha' nōy te:

—Topa Koxuk 'ūm? 'Ak mū'āte' yūmmūg'ah. Kaxīy.

³ Ha Paot te:

—'Āp-tox pix'ax te xīy? Kaxīy.

Ha' nōy te:

—Yoām yōg putox pi'ax. Kaxīy.

⁴ Ha Paot te:

—Yoām tep-tox pix, xa yāyhāhup, nūy hāpkummuk mīy kux, xa kuxa mām ka'ok Yeyox kopah, nōm te Yoām pe' nūn. Kaxīy.

⁵ Ha' xupak, hap-tox pix, Thā Yeyox yā yāy xuxyā 'āktux.

⁶ Ha Paot tep-tox yīmū' yīm xex, ha Topa Koxuk te nōm xop ha yīxohoh, ha' yīy'ax puknōg xohix hā hām'āktux, tu Topa yōg hām'āktux'ax 'āktux.

⁷ Ha tik xohix ya'omi' mōg te 12.

⁸ Ha Paot mōg Yoneo yōg Topa pet hah, tu māyōn 'ānuk 3 hā hām'āktux hā' nōy yānān tikmū'ūn mūtik, nūy Topa te yāy yōg tikmū'ūn xat 'āktux.

⁹ Pa tikmū'ūn yīpkox pip 'ohnāg, tu' kuxa mām 'ohnāg Yeyox kopah, tu Topa yōg putat 'āktux kummuk tikmū'ūn nōy pu', yīy Paot mōg, tu' kuxa mām ka'ok xop mōgāhā', tu 'āmnīy xohix hā Tinān yōg tappet mīy'ax pet kopa hāmyūmmūgāhā'.

¹⁰ Hāmyāxatamuk 2 hā hāmyūmmūgāhā', ha hāpxexka 'Ax yōg tikmū'ūn xohix te Topa yōg hām'āktux'ax 'āpak, Yoneo xop te' xupak, xi' puknōg xop.

Xep kutok put te 7

¹¹ Ha Topa te hāpxopmā ka'ok xe'ēgnāg, tu Paot ka'ogāhā, pu hāpxopmā'.

12 Ha nôm tikmũ'ün te Paot yög topixxax yäg pop, tu' pakut xop pu' popmähä', ha hämpakut'ax te' pakut xop tu' xupepmähä', ha' hittup, xix yämïy kummuk xop tu' xupepmähä' kamah.

13-14 Ha Yoneo yög taknöy xop te 7 pip, tu Yoneo yög 'ämānex xop xat'ax Xep kutok, tu häpkumep pax, nüy yämïy kummuk xupepmä', tu Yeyox 'äxet'ax yümmüg, 'Thä hämp'e'paxex, hu: "Yeyox 'äxet'ax yä' ka'ok. 'Apu, yämïy kummuk tikmũ'ün kopa' xut Yeyox 'äxet'ax 'äktux hä'," kaxïy. Hu yämïy tu' xat, hu:

—'Äte 'äxat, Yeyox 'äxet'ax hä, yä Paot te nôm 'äktux. Pu 'äpep xa mög. Kaxïy.

15 Päyā yämïy kummuk te:

—Yeyox 'äte' yümmüg, xix Paot yümmüg, pa 'ü 'üm 'äxop? 'Äte 'äyümmüg'ah. Yeyox te 'äxop pu yäy 'äxet'ax hōm 'ohnäg, Kaxïy.

16 Ha tik nôm yämïy kummuk kopa' xip te' yok mö'ka'ok, tu nôm taknöy xop te 7 kix kakixnäg, yïy kayax taha', tu' xax top hä müptut tu nü'paha'.

17 Ha 'Ep yög tikmũ'ün xohic te' yümmüg, Yoneo xop xix Genex yög xop te' yümmüg, tu' kuxänög, tu Yeyox 'äxet'ax ka'ok 'äktux, tu' kuxa te' yëy.

18 Ha tikmũ'ün punethok kuxa mām ka'ok Yeyox kopah, tu' nūn, ha nôm te hōmā mīhīm, tu hōnhā yāyhāhup, tu yāy yög häpkummuk mïy'ax 'äktux, nüy tu mïy kux.

19 Tu' mīm xop yög tappet xax xohix popnūn, tu kuxap kopa mö'pok, ha' mö'xut, ha tikmũ'ün xohic te' pēnähä', ha tappet xax xohix yög tayūmak te 50.000.

20 Yä kaxïy hä tikmũ'ün te Topa yög häm'äktux'ax 'äpak, tu xe häm'äktux häptox tu', ha tikmũ'ün punethok kuxa mām ka'ok, tu' yïpkox pip.

Nemēn te 'Ep yög tikmũ'ün gāyāhā'

21 Ha häpxip kutōgnäg 'Thä Paot mög putup Yenoyanēn tu', Māxenōn kotit hä' mög putup, xix häpxexka 'Akax kotit hä' mög putup, tu häm'äktux, hu:

—Yenoyanēn tuk mög, nüy möy tu 'äpep, tuk-nāy tu 'äte Hōm pēnāp-tup kamah. Kaxïy.

22 Tu Timōn xix 'Enax mö'pok häpxexka Māxenōn tu', tu häpxip kutōgnäg 'Thä Hōm yög häpxexka 'Ax tu' tihī'.

23 Ha 'Ep yög tikmũ'ün te Topa yög putat tu' gāy,

24 ha tik 'üm 'äxet'ax Nemēn, tu topahnäg hex Niām komut mïy, xi' pet komut mïy, pu heyeh, tu pipkup yānām ponnok hä' mïy, tu tayūmak xexka pop.

25 Tu tik te topahnäg komut mïy xop xānähä', ha yāy tu nü'nāhā', ha Nemēn te:

—Tik xop: Yümmüg häm, nüy tayūmak xexka pop, 'äxop te' yümmüg.

26 Pa Paot te häm'äktux, ha tikmũ'ün xohix te häm'äpak, ha häm'äktux, hu: "Tik te' yīm

hä' mïy nôm topahnäg komut. 'Ap Topa xe'e'ah, yä häpxop mö'ämā'ax, yïy häpxop te mö'ämā'ax nīm," kaxïy. Ha tikmũ'ün punethok yïpkox pip, hu topahnäg komut xop hämenex putup'ah.

27 Hak kuxänög, pu tikmũ'ün topahnäg 'a pop putup hok, xix Niān pet 'a' putup hok, xix topahnäg hex Niān mūn putup hok, 'Thä häpxexka 'Ax xohix te nôm pu heyah, xix häpxexka nōy xohix te'. Yïy yümū'äte tayūmak xax. Kaxïy.

28 Ha' xupak, tu' gāy xexkah, tu' yïy ka'ok, hu:

—'Ep yög Niān xexka xe'ēgnäg! Kaxïy.

29 Ha tikmũ'ün xohix te häm'äktux punethok kōmēn xohix kopah, hu häm'äpak 'ohnäg, tu yāy tu nü'nāhā müptut xexka kopah, tikmũ'ün yög yāy tu nü'nā'ax pet kopah, ha Māxenōn yög tik 2 tihī'. Yä Paot mütik häpkumep, ha tikmũ'ün gāy, tu nôm tik 2 mögähä tikmũ'ün yög yāy tu nü'nā'ax pet hah,

30 ha Paot mög putup, nüy tikmũ'ün pu häm'äktux, pa' kuxa mām ka'ok xop te' tux hok, pu mög hok.

31 Ha 'Ax yög xexka xop te Paot hä' xape, tu' xax, hu:

Tikmũ'ün yög yāy tu nü'nā'ax pet ha 'ämög hok pu gāyxop 'äpenā hok! Kaxïy.

32 Ha tikmũ'ün yïy ka'ok, tu häm'äktux punethok, hu häm'äpak 'ohnäg, tu tep tu yāy tu nü'nāhā' yümmüg 'ohnäg.

33 Ha Yoneo xop te Topa pet xop xat'ax 'Anexān xut, tu' kopa' mögähä', pu häm'äktux tikmũ'ün pu', ha 'Anexān yīm xix, häm'äktux putup tu', pu 'Ep yög tikmũ'ün gāy hok Yoneo xop tu'.

34 Pa tikmũ'ün te 'Anexān yä Yoneo yümmüg, tu' yïy ka'ok, tu xe' yïy xexka', tu xe' yïy, tu yānmūn xupep'ax puxet putuk, tu 'ot 2 hä te:

—'Ep yög Niān yä' xexka xe'ēgnäg. Kaxïy.

35 Ha kōmēn yög kaxāmi'ax te:

—'Ähup, 'ähup! Kaxïy.

Tu xe' suktux, hu:

—'Ep yög tikmũ'ün: 'Ü 'üm te kōmēn 'Ep yümmüg hok? Yä' xohix te' yümmüg, ha 'Ep te topahnäg hex Niān pet xexka xix, tu topa xap xix, nôm te pekkox tu' nāhā', yä' xohix te' yümmüg.

36 yä' yümmüg tap, yïy 'ähup, nüy häpkummuk mïy hok.

37 Xate tik 2 nünnähä', ha 'ap kummuk'ah, tu topa hex Niān 'äktux kummuk 'ohnäg, tu topa hex Niān yög häpxop 'üm hä' xupxet 'ohnäg.

38 Nemēn te häm'äktux 'üm putup, xix yāy xop te', puxix tik pa te hämyümmüg tu' xax, puyī' kopit, yïy mög, nüy tik 'üm kupeh.

39 Pe häpxopmä'ax nōy kopit putup, puxix tikmũ'ün xohix kopit.

⁴⁰ 'Āte koit'ah, pa 'āte gohet yōg hāmpē'paxex yīpkutuk, pax pu: "'Ep yōg tikmū'ūn yāy'kix kakixnāg," kaxīy, puxix xonat xop nū'pok 'Ep tu, pu'yik yīkopit, tep tu 'āgāy nām. Pāyā 'ap yūmmūg'ah 'āte'. Kaxīy.

⁴¹ Tu hām'āktux, tu:

—Mōg. Kaxīy.

Ha' mōg.

20

Paot te Māxenōn tu' xip, xix Genex tu' xip

¹ Ha Paot te' kuxa mām ka'ok xop xānāhā', tu hām'āktux hā' kā'ogāhā', tu:

—'Ūgmōg. Kaxīy.

Tu ta' mōg hāp'xexka Māxenōn tu'.

² Tu hām xohix kotit hā hāpkumep, tu hām'āktux hā' kuxa mām ka'ok xop ka'ogāhā', tu' mōg tu mōktu hāp'xexka Genex tu' xupep.

³ Tu' xip māyōn 'ānuk 3 hā, ha' mōg, ha Yoneo xop tep-tex putup, ha mīpkox te kōnāg yīmū' mōg hā' mō'nāhā', nūy hāp'xexka Xit kotit hā' mōg, tu Māxenōn tu' putpu' nūn putup.

⁴ Ha Paot mūtik nūn kōmēn Menet yōg Pihok-tok Xopat, xix kōmēn Texanōn yōg 'Ānixtah, xi' yōg Xegōn, xix kōmēn Nep yōg Gax, xi' yōg Timōn, xix hāp'xexka 'Ax yōg Tikik, xi' yōg Tonop,

⁵ tu Paot keppa' mōg, hak mūn Nok te kax'āmi', hak mū'āte Paot hip kōmēn Tonot tu'.

⁶ Ha Yoneo xop yōg 'āmuk xexka 'āxet'ax "pām tokatok hok" kux, hak mūg pip Pinio tu', tu mīpkox hāk mūg mōg, tu kōnāg yīmū' mōg, ha 'āmnīy te 5 nōg, 'Īhāk mūg mōg tu mōktu mōxaha Tonot tu', ha' nōy xop mūtik yāy tu nū'nāhā', tu' pip 'āmnīy te 7 hā.

Paot te Tonot tu' xip

⁷ Tu yenomīy 'Īhāk mūg yāy tu nū'nāhā', tu pām koxip, nūy mā', nūy Yeyox yā yūmūg pupi' xok pekpaxeh, ha Paot mōg putup hāptup 'Īhā', hu hām'āktux tox, tu 'āmnīy kote 'Īhā hām'āktux, tu' kux 'ohnāg.

⁸ Ha kuyānām tat'ax punethok te mīptut nōy yīmū' mōg'ax kopa' pip, hak mūg yāy tu nū'nāhā',

⁹ ha tik xiptap 'Ettik xip, tu mīptut tox yāy yīmū' mōg'ax 3 kopa' xip, tu yanēn kox yīmū' yūm, ha kūmīm tep-tex, ha mō'yōn, Paot yōg hām'āktux tox hah, ha hām tu' nāhā', tu' xok.

¹⁰ Ha Paot te mīptut yīmū tu' yīxohoh, tu 'Ettik mūg, tu' nōy xop pu hām'āktux, hu:

—Kuxānōg hok! Yā' koxuk te' kopa' xip, yā' hī'! Kaxīy.

¹¹ Tu xe pepi' mōg, tu pām koxip, tu' māhā', nūy Yeyox pe'paxeh, tu hām'āktux yūmūg xape xop mūtik, ha xokakkak xataha', 'Īhā hām'āktux kux, tu' mōg.

¹² Ha 'Ettik hī', yīy tikmū'ūn kuxa hittup xexka', tu' yāy pet ha' mōg.

Tu Mīnet ha' mōg

¹³ Hak mūn Nok te xe kaxāmi', tuk mūg mōg mīpkox hā, tu' mōg, tu mōxaha hāmyīn yūm 'Axox tu', tu Paot hip, 'Īhā Paot te hām tu yā' mōg.

¹⁴ Tu' xupep, 'ūgmū'āte ta tu yāy tu nū'nāhā', hak mūg mōg, tu mōktu mōxaha kōmēn Mītinēn tu'.

¹⁵ Tuk mūg mōg mīpkox hā, tu Kiox hā' yēn, tu hāptup nōy kōmēn Xāmōy tu' mōxaha', tuk mūg mōg, tu mōktu mōxaha kōmēn Mīnet tu'.

¹⁶ Ha Paot mōg putup nōg kōmēn 'Ep tu', nūy mōg mō'ka'ok, nūy kōmēn Yenoyanēn tu 'āmōxān, nūy Yoneo yōg 'āmuk xexka Pēteket mīy.

Paot te hām'āktux

¹⁷ Tu kōmēn Mīnet tu' xip, tu 'Ep yōg tik pēnā max xop xānāhā',

¹⁸ ha' nūn, ha Paot te:

—Hōmāg nūn 'Ax tu hāmāxap, ha xatek yūmmūg, tu yōgnū hāp'xopmā'ax yūmmūg kamah, 'Īhā hāmyaxatamuk xohix hāk xip 'āxop mūtik.

¹⁹ Tu hāp'xopmāhā Topa tu', tuk kutōgnāg, tuk kuxa hittup 'ohnāg, yā Yoneo xop tek kummugāhā'.

²⁰ Ha xa hām'āktux xe'e, tu Topa yōg hām'āktux'ax xohix 'āktux, tu' xaxok 'ohnāg, tu xa hāmyūmmūgāhā', nūy 'āka'ogā', nūy mō'ānīynām, ha tikmū'ūn tek xupak, 'Īhā 'āte kōmēn kotit hā xa hāmyūmmūgāhā', xix mīptut xohix kopa hāmyūmmūgāhā kamah.

²¹ Tu xa hām'āktux xe'e, tu Yoneo yōg tikmū'ūn pu hām'āktux, xix Genex yōg tikmū'ūn pu hām'āktux, tu Topa pu yāyhāhup 'āktux, tu 'ōg hāpkummuk mīy kux 'āktux, tu 'ākuxa mām ka'ok Yeyox kopa 'āktux.

²² Yā hōnhā 'ūg'āpax: 'Ūgmōg Yenoyanēn tu', ha Topa Koxuk tek xat, ha nōm puk yīpkox xip, tu 'a' hāmyūmmūg'ah, 'ok pek hip-tup, 'ok pek xok putup,

²³ pāyā Topa Koxuk te 'ā hām'āktux kōmēn xohix tu', hu: "Kanet kopa 'āxix putup, xix 'āxūy putup," kaxīy.

²⁴ Pa 'ak kuxānōg'ah, 'a yāy mūn tuk hī'ah, pāyā Topa tuk hī'. 'Ōk pek hī', yā' māx, pek xok, yā' max, 'ūyīy yāy yōg hāp'xopmā'ax kux. Yeyox tek yāykutnāhā', 'ūyīy Yeyox yōg hām'āpak max'ax 'āktux, ha'āte hāp'xopmāhā', yā Topa te' hep xop xohix pu hāmmaxnāhā'.

²⁵ —Hōmā 'āte Topa te yāy yōg tikmū'ūn xat 'āktux, tu nūktu 'āxop pu hām'āktux, tu hōnhā hāmyūmmūg: Yā 'āxop tek 'ūm pēnāp-tup'ah 'ūxehēh.

²⁶⁻²⁷ 'Ūg'āpax: 'Āte xa hāp'xe'e 'āktux, 'āte 'āxop pu hām'āktux, tu Topa yōg hām'āktux'ax xohix 'āktux, tu Topa yōg hām'āktux 'ūm xaxok 'ohnāg. Tik 'ūm yīpkox hok, puxix yāy yōg hāpkummuk mīy'ax tat.

²⁸ Pēnā ka'ok! Topa Koxuk te 'āxat, pu' kuxa mām ka'ok xop pēnā max, nūy ka'ogā'; Yā Topak-tok xok nōm pupi', tu yāy hep 'āta nū'nāhā', nūy nōm xop kuxa tupmā'.

²⁹ 'Ūgmōg, ha nōm 'ākopa' pip putup, kokex gāy nām putuk, tu' nūn putup, nūy kuxa mām ka'ok xop kix 'āxop kopah. Kokex gāy te kahnēn kix, hā kaxīy nōm gāy xop te' kuxa mām ka'ok xop kix putup.

³⁰ Ha tik kummuk te 'āxop kopa' pip putup, tu hām'āktux hā mō'āmāp-tup, ha' kuxa mām ka'ok xop mōgāp-tup, pu Topa yōg putat xax.

³¹ 'Ōg pa mōxip! Pēnā max! 'Ūxaxok hok! Hāmyāxatamuk tikoyuk hā 'āte xa hāmyūmmūgāhā', 'ok pe 'āmnīy tox hā, 'ok pe hāptup tox hā, 'āte' xohix yūmmūgāhā', tuk potaha', 'āp-tup pax tu'.

³² —Yā hōnhā 'āte: 'Āxop yā Yeyox yōg tikmū'ūn. Pūyā Topa 'āpēnā max, xix nū mūtik ti', xix xa hāmyūmmūgā', xix 'āxex, xix xa hāmmāxā', xix xa pexkox yōg hāpxop popmā' yāy yōg tikmū'ūn mūtik.

³³ 'Ak xupkumīy'ah, tuk nōy yōg hāpxop putup 'ohnāg, tuk nōy yōg tayūmak yīpkumīy 'ohnāg, tuk nōy yōg topixxax yīpkumīy 'ohnāg.

³⁴ 'Āmhok. 'Ūghām punethok, nūy tayūmak pop, nūy hāpxop 'ūm pop, nūy mā', tu' nōy xop pu' popmāhā',

³⁵ nūy xa hāmyūmmūgā 'ūghām'ax hā, xayīy nōm hāpxop 'ūm pip hok xop pu' hōm, xi' pakut xop pu' hōm, nūy Yeyox yōg hām'āktux'ax xutigā', hu: "Tikmū'ūn te hāpxop 'ūm pa', puxi' kuxa hittup kutōgnāg, pa tikmū'ūn te hāpxop 'ūm hōm, puxi' kuxa hittup xexka'," kaxīy. 'Ūkux.

³⁶ Tu hām'āktux kux, tu' kopaxux hā' xip, tu Topa pu hām'āktux 'ūnōy xop mūtik.

³⁷ Ha' potaha', tu yāy kep hā' mōg.

³⁸ Yā' kuxa te Paot xak, hām'āktux'ax hah. Yā' xuktux, hu: "A xe xatek 'ūm pēnāp-tup'ah," kaxīy. Ha' mōgāhā mīpkox hah.

21

Paot te Yenoyanēn ha' mōg

¹ Hak mūg mōg mīpkox hā, tu kōnāg xexka xak, mīpkox te kōnāg yīmū' mōg hā' xak, tuk mūg mōg tu mōktu hāmyīn yūm Kox tu' mōxaha', tu hāptup nōy ha tak mōg tu mōktu mōxaha hāmyīn yūm Honex tu', tu xek mūg mōg, tu mōktu kōmēn Pa'at tuk mūg mōxaha'.

² Ha mīpkox nōy mōg Penix tu', hak mū'āte' xīpihi', tu nōm mīpkox hāk mūg mōg,

³ tu hāmyīn yūm Xip pēnāhā', tu 'īpxax ha' mōg, tu mōktu mōxaha hāpxexka Xit tu', tu kōnāg hā' mōg, tu mōktu mōxaha kōmēn Tinok tu', pu mīpkox hāpxop pop'ax xupepmāhā kōmēn Tinok tu',

⁴ ha' kuxa mām ka'ok xop pipihi', tu 'āmnīy xohix te 7 hā' nox pip kuxa mām ka'ok xop mūtik, ha Topa Koxuk te Paot xūy'ax

yūmmūgāhā' kuxa mām ka'ok xop pu', yīy: "Yenoyanēn tu 'āmōg hok!" kaxīy.

⁵ Pa xemān nōg, 'īhāk mūg mōg, ha' nōy xop tek mūg mōgāhā kōmēn kunāpa', xi' xetut xop te', xix kaxxop te', hak mūg kopaxux hā' pip, tu Topa pu hām'āktux hāpkux tu',

⁶ tu yāy kep mūg, xix yāy hax, tu 'āneo, nūy mōg, hak mūg mōg mīpkox hā, pa' nōy xop te putpu' mōg yāy pet hah.

⁷ 'Ūgmūg pip kōmēn Tinok tu', tu mōktu mōxaha kōmēn Tonēmāy tu', tu' kuxa mām xop yōg xape xop pēnāhā', tu' nox pip 'āmnīy tox hā.

⁸ Hāptup 'īhāk mūg mōg, tu mōktu mōxaha kōmēn Xeyanet tu', tu Pinip pet tu' nox pip. Pinip te hām'āpak max 'āktux pax. Hōmā 'ūkuxa mām ka'ok xop te tik te 7 yīmōgatux, pu hāpxop xit'ax popmā', nūy hok xop pu' popmā', tu Pinip yāykutnāhā kamah.

⁹ Ha Pinip kutok hex te 4, 'ap yāyta'ah, 'ūxohix yā Topa pupi hām'āktux.

¹⁰ Hak mūg nox pip Pinip pet kopah, 'ihā tik te Topa pupi hām'āktux nūn, 'ūxuxet'ax 'Ag, tu Yonex tu' xip,

¹¹ tu' nūn, tu' nūktu xupep Xeyanet tu', tu Paot yōg nāy hīy'ax paha', tu nō yāy yīm kīy, xi' kup kīy, tu:

—Topa Koxuk te hām'āktux, hu: "Hā kaxīy Yenoyanēn yōg Yoneo gāy xop te Paot kīy putup, nūy puknōg xop ha mōgā'," kaxīy.

¹² Ha' xupak, ha tikmū'ūn xik mū'āte Paot tu' xak, hu:

—Yenoyanēn tu 'āmōg hok! Kaxīy.

¹³ Ha Paot te:

—'Āxop tep-tep mūn mīy? Tep tu 'āpotaha', tuk kuxa xūyāhā'? 'Ak kuxānōg'ah. 'Ok pe kanet kopak xip, 'ok pek xok Yenoyanēn tu', 'āte Yeyox tu hāpxopmāhā', nūy Yeyox 'āxet'ax 'āktux max. Kaxīy.

¹⁴ Tu hām'āktux kux, hak mū'āte' hup, tu:

—Pūyā Topa yāy putup'ax mīy. Kaxīy.

¹⁵ Tuk mūg mōg, tu yāy yōg hāpxop pop, tu' xuk, nūy Yenoyanēn tu' mōg.

¹⁶ Ha kōmēn Xeyanet yōg kuxa mām ka'ok xop 'ūm 'ūgmūg mūtik mōg, tuk mūg mōgāhā hāmyīn yūm Xip yōg Mēnān hah, ha' kuxa yūm ka'ok tap, hāmyāxatamuk xohix hā' yūm, ha' pet kopak nox pip.

Paot te Tiak pēnāhā'

¹⁷ Tuk mūg mōg, tu mōktu mōxaha kōmēn Yenoyanēn tu', ha' nōy xop tek mūg pēnāhā', tu' kuxa hittup.

¹⁸ Hāptup 'īhāk mūg mōg Tiak pet hah, ha Paot tek mūg mūtik mōg, ha tik pēnāmax xop xohi' pip.

¹⁹ Ha Paot te 'āneo, tu Topa te hāpxopmā max xohix 'āktux, tu Paot ka'ogāhā pu hāpxopmā'ax hāmpuknōg xop kopa 'āktux.

²⁰ Ha' xupak, tu' kuxa hittup xexka', tu Topa 'āktux max, tu Paot pu hām'āktux, hu:

—'Ūgnōy: Yoneo xop punethok kuxa mām ka'ok Yeyox kopah, ha xate' yūmmūg, ha Mōyyex yōg xat'ax xohix pu' yīpkox pip kamah, nūy māynāg mīy.

²¹ Ha tikmū'ūn te 'āmūn 'āktux, tu 'ākupey, hu: "Paot te Yoneo xop yūmmūgā kummuk, tu nōm xop te hāmpuknōg kopa' pip pu hāmyūmmūgāhā', hu: "Āpu, Mōyyex yōg xat'ax nīm, tuk-tok pit nāg xax yīmap mep hok, tu mōnāyxop yōg hāpxorp mā'ax hittap tat hok kamah," kaxīy. Pāyā tikmū'ūn te koit.

²² Putep mūn mīy? 'Ānūn, ha' xohix te hāmyūmmūg putup.

²³ Nāy, 'ūg'āpax, nūy mīy: Nūnte' pip tik te 4, nōm tik te Topa pu hām'āktux xex.

²⁴ 'Āmōg, tu nōm tik mōgāhā', tu tik xemep'ax hā' pago, pu Yoneo yōg tikmū'ūn xohix pēnā', nūy 'āyīpkox xip Mōyyex yōg xat'ax pu' yūmmūg.

²⁵ Yāk mū'āte' puknōg xop pu tappet kax'āmi', tu' xat, pu topa komut xop xit'ax mā hok, xix xokxop hep 'āta mā hok, xix xokxop 'ūm māy mūg tup-tex mā hok, xi' nōy hā' xupxpet hok. Kaxīy.

²⁶ Yīy Paot mōg, tu tik te 4 mōgāhā', tu hāptup nōy 'Ihā yāy pix tik te 4 mūtik, tu Mōyyex yōg xat'ax pu' yīpkox xip, tu' mīy, tu tik te Topa pet xexka xop xat'ax pu' xuktux, tu 'āmniy 'ūm pix'ax kux putup yūmmūgāhā', ha 'āmniy te 7 mō'nāp-tup, 'Ihā yāy pix kux putup. Ha Paot te xokxop 'ūm putex putup, nūy Topa pu mō'hap, nūy tu' hāxyā'.

Yoneo gāy xop te Paot mūg

²⁷ Ha xemān puxet hā' nōg putup, ha Paot te Yoneo yōg Topa pet xexka kopa' xip, 'Ihā 'Ax yōg Yoneo xop te' pēnāhā', tu Yoneo yōg tikmū'ūn gāyāhā', tu hām'āktux hā nūktu' xohix gāyāhā', tu Paot mūg,

²⁸ tu:

—'Iyaet yōg tihik, mā! Nū tik te hāmyūmmūgā kummuk hāpxexka xohix tu', pu Mōyyex yōg xat'ax xaxogā', tu Topa pet xexka 'āktux kummuk, tu Genex yōg puknōg xop nūnnāhā', pu Topa xip'ax yāyhāp-tup-tūnāg. Kaxīy.

²⁹ Hōmā Yoneo yōg tikmū'ūn te Paot pēnāhā kōmēn kopah, ha 'Ep yōg tik puknōg 'āxet'ax Tonop mōgāhā', ha hāmp'e'paxex, hu: "Paot te' mōgāhā Topa pet xexka kopa kamah," kaxīy. Pāyā' mōgā'ah.

³⁰ Ha nōm tikmū'ūn xohix gāy, tu yāy tu nū'nāhā mō'ka'ok, tu Paot mūg, tu Topa pet xexka kopa' xut, tu yāykumiy hāptopah, ha hāpxip'ohnāg Topa pet xexka mō'yīnnīn.

³¹ Ha tikmū'ūn te Paot putex putup, ha tik 'ūm te xonat yōg Kononeo pu hām'āktux, hu:

—Yenoyanēn yōg tikmū'ūn xohix gāy nām! Kaxīy.

³² Ha xonat xop yōg Kononeo te xonat xop xat, xix kapitām xop, ha' nūn mō'ak'ok, ha

Yoneo yōg tikmū'ūn te' pēnāhā', hu Paot kix kux.

³³ Ha Kononeo te Paot mūg, tu' xut gāy xop kopah, tu pipkup māg xap hā' hīy, tu' yīkopit, hu:

—'Ū'ūm nūhū'? Kaxīy.

Tu' xe:

—Putep mūn mīy? Kaxīy.

³⁴ Ha nōm tikmū'ūn gāy te hām'āktux hā' yānān, yīy Kononeo te hām'āpak 'ohnāg, hu' xat, hu:

—Kāy mōgā xonat pet ka'ok hah. Kaxīy.

³⁵ Ha' mōgāhā mīptut mīpku'ūn tu', pa nōm tikmū'ūn tep-tex putūmmāg, yīy xonat xop te Paot pupi tu pepi' xup, tu mīptut hā mōxakux.

³⁶ Ha Yoneo yōg tikmū'ūn xohix te' pe' mōg, tu' yīy ka'ok, tu:

—'Ūp-tex! 'Ūp-tex! Kaxīy.

Paot te yāy pupi hām'āktux

³⁷ Ha xonat pet ha' mōgāhā', 'Ihā Paot te:

—'Ok xatek tux hok 'ū hām'āktux? Kaxīy.

³⁸ Ha Kononeo te:

—Xate Genex yīy'ax yūmmūg. 'Ok 'āmūn yā 'Eyt yōg tihik, nōm te tik te 4.000 mōgāhā hām panip tu', nūy gohet mūtik yāy kix? Kaxīy.

³⁹ Ha Paot te:

—'Ak mūn'ah. Yāk mūn Tax yōg Yoneo, tu hāpxexka Xinit tuk nāhā', ha Tax mūn kōmēn xexka hok'ah. 'Ok xatek tux hok, 'āte hām'āktux tikmū'ūn pu'? Kaxīy.

⁴⁰ Ha Kononeo te:

—'Āpu, 'āyīy. Kaxīy.

Ha Paot te mīpku'ūn yīmū' xip, 'Ihā' yīm xix, pu tikmū'ūn yīy hok, ha Paot te hām'āktux tikmū'ūn pu', Yoneo xop yāy yīy'ax hā hām'āktux, hu:

22

¹ —'Ūnōy mūnōm xop, xi' tak mūnōm xop, 'ūg'āpax 'āte hām'āktux. Kaxīy.

² Ha Yoneo yōg tikmū'ūn te yāy yīy'ax 'āpak, tu:

—Nāy, hup, nūy 'īy hok. Kaxīy.

Tu' yīy 'ohnāg, ha Paot te:

³ —'Ūgmūn Yoneo, tu kōmēn Tax yōg tihik, tu hāpxexka Xinit tuk nāhā', pa kōmēn Yenoyanēn kopak tittap, ha hāmyūmmūgā'ax Gāmāniet te 'ā hāmyūmmūgāhā', tu mōnāyxop hittap yōg hāpxorp mā'ax xohix 'ā hāmyūmmūgāhā', ha 'āte Topa xak 'āxop xohix putuk, tu' xat'ax māy māynāg.

⁴ Hōmāg gāy, tu' kuxa mām ka'ok xop kix putup, Yeyox yōg putat putup nōg tu'. 'Ate' mūg, tu kanet kopa' xex nōm xop, 'ok pe tihik, 'ok pe 'ūhūn.

⁵ Ha tik te 'āmānex xop xat'ax te' yūmmūg, xix tik te hāmyūmmūg xop te' yūmmūg. 'A' 'āte mō'āmā'ah, pāyā hāpxe'e' āktux. Nōm xop te 'a' popmāhā tappet, tu kōmēn Namān

yōg Yoneo xop pu kax'āmi', 'ūyīy kuxa mām ka'ok xop mūy, tu' kīy, ōhūy kix. Kaxīy.

⁶ Tu xe hām'āktux, hu:

—Tu tak mōg, tu kōmēn Namān tu hāmhūmnāg tuk xip, māyōn yāy kote' yūm 'īhāk xip, ha hāpxip 'ohnāg 'īhā kuyānām xexka te pexkox tu' xakot.

⁷ Hak nāhā hām tu', tu yānmūn xupep'ax 'āpak, ha: “Xaot, Xaot, teptu xatek xūyghāh’?” Kaxīy.

⁸ —Ha 'āte: “'Ū 'ūm 'āmūn’?” kaxīy.

—Ha tute: “'Ūgmūn Nāyane yōg Yeyox. Xatek xūyghāhā’,” kaxīy.

⁹ —Ha tikmū'ūn te 'ūgmūtik mōg te kuyānām pēnāhā', pāyā 'a' yīy'ax 'ūm 'āpak'ah.

¹⁰ Ha 'āte' yīkopit, hu: Yāyā', putep xatek putup 'ū mīy xa'?” kaxīy.

—Ha: “'Āyok, nūy mōg, tu mōktu xupep Namān tu', ha tik'ūm te xa hām'āktux putup, tu Topa yōg xat'ax xa hāmyūmmūgāp-tup,” kaxīy.

¹¹ —Yā 'āte hāmpēnā hok nōm kuyānām xexka hah, yīy tikmū'ūn tek mōgāhā', yīm hā Namān tu'.

¹² Ha tik te Topa xak, 'ūxuxet'ax 'Ānānīn, ha Namān yōg Yoneo xop xohix te nōm 'āktux max.

¹³ Hak ha' nūn, tuk yīkagnāg xip, tu hām'āktux, hu: “'Ūgnōy Xaot, Topa te 'āpa maxnāhā', xa xe hāmpēnā’,” kaxīy.

—Hak pa max, ha 'āte 'Ānānīn pēnāhā',

¹⁴ ha: “Hōmā hāmyāxatamuk xohix 'īhā mōnāy xop yōg Topa te xa yāykutnāhā', xa Topa yōg putup'ax mīy, nūy tik te hāmyok mīy 'āxet'ax Yeyox pēnā', nūy nōm yīy'ax 'āpax, ha hōnhā xate' xupak, xī' pēnāhā', xix hāmyūmmūg,

¹⁵ tu Yeyox yōg hām'āpak māx'ax 'āktux putup tikmū'ūn xohix pu', tu hāpxopmā'ax xohix pēnā'ax 'āktux putup.

¹⁶ Putep hip xate'? 'Āpu, 'āte 'āp-tox pix putup, pu Topa 'ākuxa maxnā', nūy 'ōg hāpkummuk mīy'ax 'axogā', 'īhā Yeyox yā 'āxuxyā 'āktux,” kaxīy.

¹⁷ Tu xe hām'āktux, hu:

—Tuk nūn putpu', tu nūktu xupep kōmēn Yenoyanēn tu', tu Topa pu hām'āktux Topa pet xexka kopah, tu yāy koxuk hā Yeyox pēnāhā',

¹⁸ ha hām'āktux, hu: “Mōg, Yenoyanēn kunāpa 'āmōg, yā tikmū'ūn tek mūn 'āktux'ax putup nōg,” kaxīy.

¹⁹ —Ha 'āte: “'Yāyā', tikmū'ūn te 'āte hāpkummugāhā yūmmūg, ha 'āte' kuxa mām ka'ok xop mūg Topa pet kopah, ha' yūmmūg kamah, yā 'āte kanet ha' mō'tat, tu' kix nōm xop kuxa mām ka'ok 'ākopah, ha tikmū'ūn xohix te' yūmmūg.

²⁰ Tikmū'ūn te 'ōg nū'kutnā'ax 'Extep putex, 'īhāk xip, tu pekpa xex max, tup-tup,

tu tikmū'ūn yōg topixxax pēnāhā' nōm te 'Extep putex,” kaxīy.

²¹ —Ha Yeyox te: “'Āmōg, 'āte 'āmōgāp-tup hāptox tu', hāmpuknōg xop hah,” kaxīy. Tu ta tu' kux. Kaxīy.

²²⁻²³ Ha tikmū'ūn te Paot yōg hām'āktux'ax 'āpak, tu' yīy 'ohnāg, pa Paot te' puknōg xop 'āktux, yīy ta tikmū'ūn gāy, tup-tup nōg, tu' yīy ka'ok tu:

—'Ūp-tex! 'Ūp-tex! Kaxīy.

—Tik kummuk putex! Kaxīy.

—Pūyā tu xok! Kaxīy.

Tu topixxax tox mahap, tu hāpkōnōn mō'pok pepi', 'ūgāy tu'.

²⁴ Ha xonat xop yōg Kononeo te' pēnāhā', hu Paot xut mō'ka'ok, tu' xat, pu xonat pet xexka ka'ok ha' mōgā', ha xe' xat, pu' kix xokxax hā, ha:

—'Ūxūy hā hām'āktux putup, tu 'ōg hāpxopmā'ax kummuk 'āktux putup. Kaxīy.

²⁵ Ha xokxax xit hā' hīy, nūy nō' kix 'īhā' Paot te Kapitām yīkopit, hu:

—'Ok Hōm yōg gohet te' xat, pu Hōm yōg tik 'ūm kix, 'īhā hāpkummuk mīy 'ohnāg? Kaxīy.

²⁶ Ha xonat xop yōg Kapitām te' xupak, tu Kononeo pu hām'āktux, hu:

—Nāy, paxip. Putep mūn mīy putup? Kāy yā Hōm yōg tihik! Kaxīy.

²⁷ Ha nōm Kononeo nūn, tu Paot yīkopit, hu:

—'Āyīy. 'Ok 'āmūn yā Hōm yōg tihik? Kaxīy.

Ha:

—Ya hamūn. Kaxīy.

²⁸ Ha Kononeo te:

—'Āte tayūmak xexka hā pago, nūy yāyhā Hōm yōg tihik. Kaxīy.

Pa Paot te:

—Yā Hōm yōg 'ūgnāhā', xik mūg tak, xik mūg tut. Yāk mūn Hōm yōg tik xe'e'. Kaxīy.

²⁹ Ha xonat xop nōm te' kix putup nū'paha', 'ūkuxānōg tu', ha Kononeo kuxānōg kamah, Paot kīy huh, 'īhā Hōm yōg gohet te' xat hok pu yīy Hōm yōg tik kix hok.

Paot te' xexka xop keppa' xip

³⁰ Hāptup 'īhā Kononeo te Paot xut, tu Yoneo xop yōg tik xop pa te hāmyūmmūg ha' mōgāhā', xix 'āmānex xexka xop keppah, pu' yīkopit, nūy Paot yōg hāpkummuk mīy'ax yūmmūg. Ha Paot te Yoneo xexka xop keppa' xip.

23

¹ Tu tik xop pa te hāmyūmmūg pēnā ka'ok, tu:

—'Ūnōy mūnōm xop, Topa tek kuxa yūmmūg, ha hāmyok mīy 'ūghi'ax tox hā. Kaxīy.

² Ha tik te 'āmānex xop xat'ax 'Ānānīn, tu' xat, pu Paot yīkox kix,

³ ha Paot te:

—Pūyā Topa 'ākix! 'Āpa max, pāyā 'ākuxa kummak! Xate' nōy mōgāhā mō'āmā'ax hā. 'Āyūm, nūy hāp̄xopmā'ax kopit, nūy Mōyyex yōg xat'ax hā' kopit, pa Mōyyex te' kix'ax xat hok. Kaxīy.

⁴ Ha tik nōy te:

—Teptu xate 'āmānex xop xat'ax mānōg? Kaxīy.

⁵ Ha Paot te:

—'Ūgnōy, 'āte' yūmmūg'ah. 'Ok tik te 'āmānex xop xat'ax nō'ōm? Topa yōg tappet tek xat, hu: "Tik te 'āxop xat'ax 'ūm 'āktux kummuk hok," kaxīy.

⁶⁻⁸ Tu' xexka xop pēnāhā, ha' yāg Paniye xop, ha' yāg Xanoxeo xop. Paniye xop xohix kuxa mām ka'ok putpu' hi'ax kopah, hu: "Tikmū'ūn xohix xakix, tu' putpu' hip-tup," tu xe: "Yā' pip koxuk, xix pexkox yōg nū'pok xop," kaxīy. Pa Xanoxeo xop xohix kuxa mām 'ohnāg, tu: "Āmhok. 'A' koxuk 'ūm xip'ah. Yā' xakix xe'e, tu' putpu' hip-tup 'ohnāg," kaxīy. Yīy Paot yīy ka'ok, tu:

—'Ūnōy mūnōm xop: 'Ūgmūn Paniye yōg, huk kuxa yūm ka'ok putpu' hīnnā'ax kopah. Xatek yīkopit, 'ok pe' xakix xop putpu' hip-tup, 'ok pe' hip-tup hok. Kaxīy.

Ha Paniye xop te hām'āktux hā' nōy yānān Xanoxeo xop mūtik, tu' gāy nām.

⁹ Tu' yīy ka'ok, tu yāy kix putup Paot hā, ha tik te hāmyūmmūg yok, yā kama Paniye yōg, tu:

—Yā' max Paot! 'Ok pe koxuk 'ūm, 'ok pe pexkox yōg nū'kutnā'ax 'ūm te kāy pu hām'āktux, kopix Topa mūtik yūmūg kumīy putup hok. Kaxīy.

¹⁰ Ha' gāy xexkah, yīy xonat yōg Kononeo te Paot hā' yīpkutuk, tu' xat, pu' xut, tu xonat pet ka'ok ha' mōgāhā'.

¹¹ 'Āmnīy koxtap 'Īhā Yeyox xip Paot yīka', tu:

—'Ākuxānōg hok! 'Āmūn tek mūn pupi hām'āktux, tu 'ūgmūn 'āktux putup kōmēn Yenoyanēn tu', xix hāp̄xexka Hōm tu kamah. Kaxīy.

Ha' xaptop hā Paot putex putup

¹² Hāptup 'Īhā Yoneo xop te yāy tu nū'nāhā', tu hām'āktux xex, tu Topa 'āxet'ax 'āktux hā hām'āktux xex, tu:

—Paot putex hok, kopix xit hok! Kaxīy.

¹³ Yā tik te 40 tep-tex putup,

¹⁴ tu' mōg 'āmānex xexka xop hah, xix tik xop te hāmyūmmūg hah, tu:

—'Ūgmū'āte hām'āktux xex Topa pu', hu: "Paot putex hok, kopix xit hok," kaxīy.

¹⁵ 'Āmōg, Hōm yōg xonat xop yōg Kononeo hah, nūy tu' xax, pu Paot nūnnāy, 'ūyīkopit nūy, pāyā mō'āmā'. 'Ūgmū'ātep-tex putup putat hā, 'ūxaptop huh 'ūp-tex putup. Kaxīy.

¹⁶ Pa Paot 'ūptix te' xupak, tu' mōg tu mōktu xupep xonat pet ka'ok xexka tu', tu Paot pu' xuktux,

¹⁷ ha Paot te xonat yōg Kapitām xānāhā', hu:

—Nū tik tuktup mōgā 'āxop yōg Kononeo hah, puyīy hām'āpak'ax 'āpax. Kaxīy.

¹⁸ Ha' mōgāhā' nōm Kononeo hah, tu:

—Paot te kanet kopa' xup, tuk xānāhā' pu tik tuktup mōgā 'āhah. Kaxīy.

¹⁹ Ha Kononeo te tik tuktup yīm hā' mūg, tu' xut, tu' yīkopit, hu:

—Xate putep 'āktux putup? Kaxīy.

²⁰ Ha tik tuktup te:

—Yoneo xop te yāy tu nū'nāhā', nūy 'āmūn tu' xax, xa hāptup 'Īhā Paot mōgā', pu xe' yīkopit. Pāyā mō'āmā'. 'A' yīkopit putup'ah, pāyāp-tex putup.

²¹ Yā tik te 40 te hām'āktux xex Topa pu', tu' xit hok xi' xo'op hok, nūy Paot putex. Yā hōnhāp-tex putup. Kaxīy.

²² Ha Kononeo te tik tuktup pu hām'āktux, hu:

—Hām'āktux hok, 'a' xaptop hok'ah. Kaxīy.

Ha Paot mōgāhā Gohenanok Penik hah

²³ Tu Kapitām 2 xānāhā', tu' xat, hu:

—'Āmnīy koxtap 'Īhā mōg kōmēn Xeyanet tu', yā hōnhā kāmānok te 200 pop, xix xonat xop te 200 pop kamah, pu kāmānok yīmū' mām, ha xonat nōy te 200, te yā' pata hā' mōg, tu pox tox tat pop.

²⁴ Ha Paot pu kāmānok nūnnāy, tu Gohenanok Penik ha' mōgā'. Kaxīy.

²⁵ Tu Gohenanok Penik pu tappet kax'āmi', hu:

²⁶ "'Ūgmūn Kononeo Kanao Nix, 'āte Gohenanok xe'e Penik pu kax'āmi', nūy hāmyūmmūgā', tu 'āneo.

²⁷ Yoneo xop te nū tik mūg, nūy putex, hak xut Yoneo gāy xop kopah. Yā hāp̄xexka Hōm yōg tik 'āxa.

²⁸ Tu' mōgāhā Yoneo yōg pa te hāmyūmmūg xop hah, nūy Paot yōg hāpkummuk mīy'ax yūmmūg.

²⁹ Ha Yoneo xop te yāy yōg xat'ax hā' yīkopit, tu' kupex, tu Paot yōg hāmyūmmūg'ax puknōg 'āktux, pāyā kāy te tik 'ūm putup 'ohnāg, tu yā' xupxet 'ohnāg, 'a' kummuk'ah, 'ap putex putup'ah 'āte', yā kanet kopa' xix 'ap putup'ah 'āte kamah.

³⁰ Ha Yoneo xop tep-tex putup 'ūxaptop huh, yīy hāp̄xip 'ohnāg 'āte xa mōgāp-tup, pu Yoneo xop kupeh, ha xate' kopit. Tu ta tu' kux." Kaxīy.

³¹ Ha ta 'āmnīy koxtap 'Īhā xonat xop te kāmānok yīmū' mām xop mōg, ha xonat xop te pox tox tat mōg, tu' pata hā' mōg, tu putpu' mōg Yenoyanēn tu',

³² ha kāmānok yīmū' mām xop te Paot mūtik mōg. Tu' mōg,

³³ tu mōktu mōxaha kōmēn Xeyanet tu', tu Gohenanok Penik pu tappet hōm, tu Paot mōgāhā Penik keppah.

³⁴ Ha tappet mō'kupix hāmāxap, tuk-nāy tu' yīkopit, hu:

–Pi'yā 'ōgnū hahām? Kaxīy.

Ha Paot te:

–Yā Xinit. Kaxīy.

³⁵ Ha Penik te:

–Nāy, 'āte 'ōg hām'āktux'ax 'āpak putup, ḥhā kupex'ax xop nū'. Kaxīy.

Tu' xat, pu Paot xix 'ūxat'ax 'Enot yōg kopit'ax pet kopah, ha' mōgāhā', tu' xix.

24

Yoneo xop te Paot kupex

¹ 'Āmnīy te 5 nōg, ḥhā tik te 'āmānēx xop xat'ax 'Ānānūn nūn, tu nūktu xupep kōmēn Xeyanet tu', xix Yoneo xexka xop nūn, xix tik gāy xop yōg hām'āktux'ax Tet nūn, nūy Paot kupeh.

² Ha' xānāhā', ha Tet te nōm Gohenanok pu hāmīyūmmūgāhā' hu:

–Gohenanok Penik: Tikmū'ūn xohix te 'āp-tup pax, 'ōg hāpxopmā'ax max hah, ha Yoneo yōg tikmū'ūn kuxa xohix mām, tu' hittup, xate hāmīyūmmūg hah,

³ yīy tikmū'ūn xohix te 'āmūn 'āktux max. Yā' puxi'.

⁴ 'Āte hām'āktux kutōgnāg putup. 'Ūg'āpax, kopxix hāpxip kutōgnāg hām'āktux kux.

⁵ Paot te hām'āktux kummuk, tu' yīy hā nūktu tikmū'ūn xohix gāyāhā', tu hāpxexka xohix tu' mōg, yā Nāyane yōg xop xohix xat.

⁶ Hōmā tute Yoneo yōg Topa pet xexka yāyhāp-tūynāg putup, tu tik puknōg mōgāhā Topa pet xexka kopah, pak mū'āte' mūg, nūy hāpxopmā'ax kummuk kopit 'ūgmū yōg xat'ax hā.

⁷ Pa 'āxop yōg Kononeo gāy, tu Paot xut, tu' mōgāhā', tu' xat, pu nū nōm xop kāy kupeh, nūy Paot kupeh 'ākeppah.

⁸ 'Āpu, 'ūyīkopit, nūy hāpxopmā'ax kummuk yūmmūg. Kaxīy.

⁹ Ha Yoneo xop te:

–Ya hamūn! 'Ap koit'ah! Kaxīy. Pāyā' koit.

Paot te yāy 'āktux Penik keppah

¹⁰ Ha Gohenanok Penik te tu' yīm xix, nūy Paot pu':

–'Āyīy, kaxīy.

Ha Paot te:

–Gohenanok Penik, hāmīyāxatamuk xohix hā xatek mū yōg tikmū'ūn yōg hāpxopmā'ax kopit max, yāk hittup, nūy xa hām'āktux.

¹¹ 'Āmnīy xohix te 12 ḥhā 'āte Yenoyanēn tu' xupep nūy nūk xup Topa pu', 'ūxohix te' yūmmūg.

¹² 'Āte hām'āktux hā' nōy yānān 'ohnāg tikmū'ūn mūtik, tuk yīy hā gāyā 'ohnāg Topa

pet xexka kopah, 'a kōmēn kopa hāk 'ūm gāyā'ah.

¹³ Yoneo xexka xop te koit.

¹⁴ Pa Yeyox yōg putat hāk xip, tu Topa xak, tu nōm pu nūk xup, tuk yīpkox xip Mōyex yōg xat'ax xohix pu', xix Topa pupi hām'āktux xop xohix pu'.

¹⁵ Tuk kuxa yūm ka'ok: yā tikmū'ūn te hāmīyok mīy te putpu' hip-tup, xix tikmū'ūn te hāpkohe mīy te putpu' hip-tup kamah, ha nōm Yoneo xop te yāy putpu' hi'ax hip kamah, tu hāmmax hip.

¹⁶ Yāk hāmīyok mīy, ha Topa tek yūmmūg, xix tikmū'ūn. Kaxīy.

¹⁷ Tu xe hām'āktux, hu:

–Ha hāmīyāxatamuk xohix nōg, ḥhā nūn, tu nūktu xupep yōgnū hāpxexka tu', nūy hāpxop hok popmā Topa pu', xix yōgnū tikmū'ūn pu',

¹⁸ ḥhā 'Ak yōg Yoneo xop nūn, tuk pēnāhā Topa pet xexka kopah, ha 'āte yāy pix, Topa yōg xat'ax tek xat hah, hak yīy 'ohnāg, yāk puxehnāg xip.

¹⁹ Pi'yā' pip 'Ax yōg Yoneo xop hōnhā? 'Ap nūn'ah, nūy 'ūgkupeh.

²⁰ Hōmā Yoneo xexka xop tek yīkopit. 'Āpu, nōm xexka xop 'ūyānān tu' yīkopit, 'ok pe 'āte hāpxe'e' āktux, 'ok pe 'āte koit.

²¹ Pāyā hōmā nōm xop te yōgnū hām'āktux'ax putup nōg, ḥhā 'āte hām'āktux, hu: "Hōnhā xatek yīkopit, 'ok pe xakix xop putpu' hip-tup, 'ok pe putpu' hip-tup hok," kaxīy. Tu ta tu' kux.

²² Ha Penik te hāmīyūmmūg, tu Topa yōg putat yūmmūg max, pāyā 'ap Paot yīkopit putup'ah, hu:

–Nāy, 'ūhip, pu xonat xop yōg Kononeo Nix nū'. 'Ūnūn, yīy ta 'āte 'ākopit. Kaxīy.

²³ Tu' xat, ha Paot xix mīptut kopah, pu xonat pēnā', pāyā hāpkumep mīptut xexka kopah, tu hāpxopmāp-tup, puxi' mīy, ha' tux hok kamah pu' xape xop pēnā', nūy hāpxop 'ūm popmā Paot pu'.

Paot te yāy pupi hām'āktux Penik keppah, xix Nonoxit keppah

²⁴ 'Āmnīy kutōgnāg ḥhā' nōg, ha Penik nūn, xi' xetut Nonoxit nūn kamah, nōm Yoneo hex, ha Paot xānāhā', ha Paot te tikmū'ūn kuxa yūm ka'ok Yeyox Kunnix kopa 'āktux, ha' xupak.

²⁵ Ha Paot te:

–Topa te' xak, pu tikmū'ūn xohix hāmīyok mīy, ha' yōg hāpxopmā'ax xohix kopit putup, 'ok pe' max, 'ok pe' kummuk. Kaxīy.

Ha Penik kuxānōg, tu Topa te' kopit'ax yīpkutuk, hu:

–Mōg, mōg! Kaxīy.

Tu xe:

–Hāptup nōy kopxix 'āxānā'. Kaxīy.

²⁶ Pāyā tayūmak 'ūm hip, pu Paot tu tayūmak 'ūm xax, yīy xānā punethok,

hām'āktux hā' nōy yānān nām huh, pa yā Paot te tu' hōm 'ohnāg.

²⁷ Ha hāmyāxatamuk 2 nōg, ha Penik mōg kuma' mōg, ha Pox Pex nūn 'ūyānān tu', ha Penik te Paot xix mīptut kopah, nūy Yoneo xop kuxa hittupmā'.

25

Paot te Hōm yōg tik te' xohix xat'ax tu' xak, puyī' xut pu mōg

¹ Ha Pex nūn tu nūktu kōmēn Xeyanet tu' xupep, ha 'āmnīy 3 nōg, 'Thā' mōg tu mōktu Yenoyanēn tu' xupep.

² Ha 'āmānex xexka xop te hāmyūmmūgāhā', xix Yoneo xexka xop te hāmyūmmūgāhā', tu Paot 'āktux, tu' kupex, tu' xak,

³ pu Paot nūnnāy Yenoyanēn tu', 'ūxaptop putex putup ha putat kopah.

⁴ Pa Pex te:

—'Āmhok. Yā' xip Xeyanet tu', hak mōg putup putpu Xeyanet tu'.

⁵ Nāy, pax xa Paot kupex, hu ta mōg 'ūgmūtik, nūy kupeh. Kaxīy.

⁶ Ha 'āmnīy te 10 nōg, 'Thā Pex te Xeyanet tu' putpu' nūn, tu hāptup nōy 'Thā' xat pu Paot nūnnāy.

⁷ Ha' nūn, ha Yenoyanēn yōg Yoneo xop te' kupex nām, tu yīkopit, pāyā hām'āktux hā koit, ha Pex te' gāy xop yōg hām'āktux 'āpak, tu:

—'Īntu'. 'Āte hāmyūmmūg'ah, 'ok pe Paot te hāpkummuk mīy, 'ok pe' mīy hok? Kaxīy.

⁸ Ha Paot te:

—'Āte hāpkummuk 'ūm mīy 'ohnāg, 'ok pe Yoneo yōg Topa pet xexka tu', 'ok pe Hōm yōg gohet puknōg tu'. Kaxīy.

⁹ Pa Pex te Yoneo xop kuxa hittupmāp-tup, hu:

—'Ok mōg putup Yenoyanēn tu', 'āte 'āyīkopit? Kaxīy.

¹⁰ Pa Paot te:

—'Ak mōg putup'ah. 'Āte Xex putup, pu yōgnū hāpxopmā'ax kopit. Yā' max. 'Āte hāpkummuk 'ūm mīy 'ohnāg, ha xate' yūmmūg.

¹¹ Pax pu Yoneo xop koit hok, kopxix xupap-tup hok. Yā 'āte' xok'ax yīpkutuk 'ohnāg. Pax pu Yoneo xop koit, ha 'āte hāpkummuk 'ūm mīy hok, 'āpu' xat puk putex hok. 'Āte Hōm yōg tik te' xohix xat'ax putup, yā 'āte Xex putup, puk yīkopit. Kaxīy.

¹² Ha Pex te' xexka xop mūtik hām'āktux hā' nōy yānān, ha hām'āktux kux, tu Paot pu hām'āktux, hu:

—Xate Xex mūn putup, hu Xex ha 'āmōg. Kaxīy.

Paot te 'Aginip keppa' xip

¹³ Hāpxip kutōgnāg 'Thā' 'Aginip nūn, tu tikmū'ūn xat, tu' nūn tu nūktu kōmēn Xeyanet tu' xupep, xix Menenīn, tu Pex ha' nūn, nūy 'āneo.

¹⁴ Tu' tihi', 'āmnīy xohix hā' tihi', ha Pex te Paot 'āktux 'Aginip tu', tu hām'āktux, hu:

—Tik 'ūm xip, ha Penik te mīptut kopa' xix, tu' xut pu mōg 'ohnāg.

¹⁵ Hōmā 'ūkxip Yenoyanēn tu', ha Yoneo yōg 'āmānex xexka xop te' kupex, tup-tex putup,

¹⁶ pa 'āte: "Hōm yōg gohet te' xat hok pu tik 'ūm 'ūhok tup-tex hok. 'Āmhok. Hōm yōg gohet te' xat, pu' kupeh xop kāy ha' nūn, nūy kupeh, pu kāy yā yāy 'āktux, nūy kupex xop yōg hām'āktux hā' yānān," kaxīy.

¹⁷ Ha' nūn yāy tu nū'nāhā', ha 'āte' hip putup'ah, tu hāptup nōy hā' xat, pu Paot nūnnāy, 'ūyī' yīkopit.

¹⁸ Ha' kupex xop te' kupex, pa kāy te hāpkummuk mīy 'ohnāg, tup-tex 'ohnāg, tu' xupxet 'ohnāg,

¹⁹ pāyā Yeyox 'āktux, nōm xok, ha Yoneo xop te hām'āktux hā' nōy yānān nām Paot mūtik, ha Paot te: "Yeyox hi putpu'. 'Ūgkuxa yūm ka'ok Yeyox putpu' hi'ax kopah," kaxīy.

²⁰ 'Āte hāmp'e'paxex, hu: "Pute 'ūm nūhū'? Kaxīy. Tuk yīkopit, pāyā' yīkopit yūmmūg'ah, hu Paot pu': "Ok mōg putup Yenoyanēn tu', 'āte 'āyīkopit?" kaxīy.

²¹ Pa Paot te: "'Āmhok. 'Ak mōg putup'ah. 'Āte Xex putup, puk yīkopit," kaxīy. 'Āte' xat, pu nūnte' xix, pu Xex ha mō'kutnā'. Kaxīy.

²² Ha 'Aginip te:

—'Āte kāy yōg hām'āktux 'āpak putup. Kaxīy.

Ha Pex te:

—Hāptup 'Thā hām'āpak putup. Kaxīy.

²³ Hāptup 'Thā 'Aginip nūn, tu tik te' xat'ax yōg topixxap max mō'tat, tu Pex yōg mīptut hām'āta kox xexka hā' mō'nāhā', tu kōmēn yōg xexka xop xix xonat yōg Kononeo xop mūtik mōxakux, ha Pex te' xat, pu Paot nūnnāy, ha' nūn.

²⁴ Ha Pex te:

—'Āxexka 'Aginip, xix 'āxexka xop xohix: 'Āxop te kāy pēnāhā', yā Yoneo yōg tikmū'ūn xohix te' xak, nūy tup-tex.

²⁵ Ha 'āte' yīkopit, ha hāpkummuk xexka 'ūm mīy 'ohnāg, pup-tex, ha yūmmūg xat'ax xexka Xex mūn putup, pu' yīkopit, yīy Xex ha 'āte mō'kutnāp-tup.

²⁶ Tu tappet tu kax'āmi putup Xex pu kamah. Pute 'ūm 'āte kax'āmi'? 'Āp yūmmūg'ah 'āte'. Hu 'āte Paot xat, pu hām'āktux, xayīy yīkopit. Tu' yīkopit kux, kopxix kax'āmi',

²⁷ nūy tappet hā Paot yōg hāpkummuk mīy'ax Xex pu hāmyūmmūgā'. Kaxīy.

26

Paot te yāy pupi hām'āktux 'Aginip keppah

¹ Ha 'Aginip te Paot pu hām'āktux, hu:

—'Āpu, 'āyīy. Kaxīy.

Ha Paot te' yīm pepi' xix, tu hām'āktux, hu:
 2-3 —Āxexka 'Aginip, xate Yoneo xop xat, tu Mōyyex yōg xat'ax yūmmūg, yīk kuxa hittup, tu kupex xop pu hām'āktux hā' yānān putup. 'Ūghip, nūy 'ūg'āpax.

4 —Yoneo xop xohix tek yūmmūg, yā yōgnū hām tuk xip hāmāxap, tuk nūn Yenoyanēn tu', ihāk mūn kakxop tuktap, xi' xiptap.

5 Yoneo xop tek yūmmūg, hak mūn Paniye xop yōg, nōm xop te Topa xak xe'ēgnāg.

6 Yā hōnhā xatek yīkopit Topa te hām'āktux xex hā, ha Topa te mōnāyxop pu hām'āktux xex, hu: "Tikmū'ūn xohix te putpu' hip-tup," kaxīy.

7 Hōmā Topa te hām'āktux xex, ha Yoneo yōg tikmū'ūn xohix te' xak, tu 'āmniy xohix hā Topa pu nūk tetex, pa Yoneo xop tek kupex, ihāk kux yūm ka'ok putpu' hi'ax kopah, xix hāmmax hip.

8 Teptu hāmpe'āpanōm? 'Ok Topa te hāpxopmā'ax ka'ok mīy hok? Yā' mīy. 'Ok Topa te putpu' āhinn'āp-tup hok? Yāp-tup. Kaxīy.

9-10 Tu xe hām'āktux, hu:

—Hōma 'āte hāmpe'paxex, hu: "Yeyox mūn kummuk," kaxīy. Tu Yeyox 'āktux kummuk, tu' kuxa mām ka'ok xop xex kanet kopah, ha Yoneo yōg 'āmānex xop tek xat, tu 'ā' hōm yāy 'āxet'ax, 'ūyīy tu xeh, tu' kix, tuk hittup.

11 Tu' kix kakixnāg Yoneo yōg Topa pet kopah, tu Yeyox 'āktux kummuk yīgāhā', tu' gāynām, tu' pek mōg hāptox tu', nūy mūy, nūy xūyγā'.

Paot te yāy kuxa yūm 'āktux

12 —Yā 'āmānex xexka xop te 'ā' hōm yāy 'āxet'ax, tu kax'āmi tappet tu', ha 'āte nōm tappet mōgāhā', tuk mōg'ax Namān tu',

13 tu putat hāk mōg, māyōn te yāy kote' yūm ihā', 'āte kuyānām ka'ok pēnāhā', ha pexkox tu' xakot, ha māyōn yānām kutōgnāg, pa Topa yōg yānām xexka', hak nōy xop te' pēnāhā kamah.

14 Hak mūg xohix hām tu' xakux, ha 'āte yānmūn xupep'ax 'āpak, ha Yōneo xop yāy yīy'ax hā hām'āktux, hu: "Xaot, Xaot: Teptuk xūyγāhā'? Yā tu nō yāy mūn xūyγāhā'," kaxīy.

15 —Ha 'āte: "'Ū 'ūm 'āmūn?" kaxīy.

—Ha:

"'Ūgmūn yā Yeyox, ha xatek xūyγāhā' kuxa mām ka'ok xop hā.

16 Pa 'āyok, tuk-nīhā xip. 'Āhak nūn, nūy xā yāyktunā', xak mūn pu hāpxopmā', xak mūg pēnāhā hāmāxap, ha xa' mūg putup 'ūxeheh, xak mūn 'āktux tikmū'ūn pu'.

17 Yā 'āte mō'ākutnāp-tup Yoneo yōg tikmū'ūn hah, xix hāmpuknōg xop hah, tu 'āpēnānā' xip, nūy 'āxut nōm gāy xop kopah.

18 'Āte nōm tikmū'ūn kuxa hittupmāp-tup, 'ōg hām'āktux'ax hā' hittupmāp-tup, pu hāpkoxtap 'ūkuxa nīm, ha Topa yōg yānām

xe'e te' kuxa hittupmāp-tup, pu yōgnū putat hā' mōg, ha xate hām'āktux hā, 'āte nōm tikmū'ūn mōy putup Hāmγāyāgnāg tu', puyīy Topa' kummuk mīy'ax xaxogā', pu tu kux, puyīy yāyhā Topa yōg tikmū'ūn, nōm xop kuxa mām ka'ok 'ūgmūn kopah." 'Ūkux. Kaxīy.

19 Tu xe:

—'Ok yūmmūg, 'āxexka 'Aginip? 'Ūgmūg xuxyā tek xat pexkox tu', hak yīpkox xip.

20 Tu hām'āktux Namān tu hāmāxap, tuk-nāy tu Yenoyanēn tu hām'āktux, xix hāpxexka Yonex tu', xi' puknōg xop punethok pu', tu yāyhāhup yūmmūgāhā', pu hāpkummuk mīy kux, nūy Topa ha mōg, puyīy hāmyok mīy, pu' xohix te yāyhāhup pēnā'.

21 Pāyā Yoneo xop tek putup nōg, tuk mūg, ihā Topa pet xexka kopak xip, hak putex putup.

22 Pa Topa tek ka'ogāhā', yīy 'āte hām'āktux kux 'ohnāg, tu' xohix pu hāmyūmmūgāhā', tu Topa tappet hittap puxehnāg hā hāmyūmmūgāhā'. Hōmā Mōyyex te hām'āktux, xix Topa pupi hām'āktux xop te hām'āktux kamah, yīy 'āte tikmū'ūn xohix pu hām'āktux hāmāxap,

23 nūy Yoneo yōg tikmū'ūn kuxa kummuk xit, xi' puknōg xop kuxa kummuk xit, yā hōnhā' hep xop xohix kuxa max yānān'ax. Tu ta tu' kux. Kaxīy.

24 Tu hām'āktux kux, ha Pex yīy ka'ok, tu:

—Paot, 'āp-tox kummuk! Xate tappet punethok mō'kupix, ha tappet te 'āp-tox kummugāhā'! Kaxīy.

25 Pa Paot te:

—'Ap 'ūkputox kummuk'ah. Yā hāpxe'e 'āktux. Kaxīy.

26 Tu 'Aginip pu hām'āktux, hu:

—'Āte yāyhāhup 'ohnāg, ha tikmū'ūn xohix te' yūmmūg. 'Aginip, xate hāmyūmmūg kamah. Topa te' xaptop hā' mīy 'ohnāg.

27 Hōmā Topa pupi hām'āktux xop te Topa te hām'āktux 'āktux. 'Aginip, 'ok 'ākuxa yūm ka'ok Topa pup hām'āktux xop kopah? Yā' yūm. 'A' yūmmūg. Kaxīy.

28 Ha 'Aginip te:

—Nāy, 'ok 'āpe'āpaxex, hu: "Hāpxip kutōgnāg ihā 'Aginip te yāhāp-tup Kunnix yōg"? 'Āmhok! 'A yāyhāp-tup'ah 'āte'. Kaxīy.

29 Ha Paot te:

—Yā' max 'āmūn yāyhā Kunnix yōg. 'Ok pe hāpxip kutōgnāg ihā', 'ok pe hāpxip tap ihā', 'ātep-tup 'āxohix yāyhā Kunnix yōg, 'ūkputuk, pa kupuk māg xap hā' hīy'ax 'a' putup'ah. Kaxīy.

30 Ha 'Aginip tek-nīhā' xip, xix Pex, xix Menenīn, xi' xexka xop xohix te nū mūtik mām xop,

31 tu' mōg, tu hām'āktux hā' nōy yānān, hu:

—Nühū tik max, ha' max'ah tik xix kanet kopah, tup-tex mūn kummuk. Yā tik te hāpχopmā max. Kaxīy.

³² Ha 'Aginip te Pex pu hām'aktux, hu:

—Kāy xupa'ax, pāyā Xex mūn ha' mōg putup, pu hāpχopmā'ax tu' kopit. Pūyā' mōg! Kaxīy.

27

Paot te kōmēn Hōm ha' mōg

¹ Ha Paot mōgāp-tup hāpχexka 'Itat tu' (hak mūn Nok te xe kax'āmi', tuk mōg Paot mūtik), mīpkox hāk mūg mōg, nōm mīpkox te kōnāg yīmū' mōg, ha xonat xop te 100 yōg kapitām te Paot pēnānā' xip, tu' kāy nōy xop pēnāhā kamah, yā Kapitām Yot te xonat xop 'Īpet yōg.

² Hak mūg mōg kōmēn 'Anamātīn yōg mīpkox hā, tu hāpkux te hāpkūyāgnāg hāk mūg mōg, ha hāpχexka Māxenōn yōg 'Anixtah te kōmēn Texanōn, tu' xip, tu' nūn, tuk mūg mūtik mōg.

³ Ha hāptup 'Thā kōmēn Xinōm tu' mōxaha', ha Yot max Paot tu', tu hām tu' mōg tux hok, pu mōg, nūy xape xop pēnā', pu nōm Paot mō'nīynām, nūy nō hāpχop tu' popmā', ha 'āmnīy hā' xape pet tu' nox xip, tu mō'yōn.

⁴ Tu hāptup 'Thāk mūg mōg mīpkox hā, tu hāmīn yūm Xip tu' yīpxe'e hāk mūg mōg, 'āmuuh ka'ok tu' keppa mō'kouk hah.

⁵ Hak mūg mōg kōnāg xexka xak tu', ha hāpχexka Xinix yīkāgnāg, xix hāpχexka Pēnpit, tuk mūg mōg, tu mōktu mōxaha hāpχexka Nix yōg kōmēn Mīha tu'.

⁶ Ha xonat yōg Kapitām te kōmēn 'Anexānit yōg mīpkox xipihī', ha' nūn, tu hāpχexka 'Itat ha' mōg putup, hak mūg mōg nōm mīpkox hā.

⁷ Tuk mūg mōgnāg, pak mūg mōg pu'ūgnāg, 'āmuuh ka'ok hah, ha 'āmnīy punethok 'Thā mōxaha hāmīyok tu', kōmēn Xīnit keppah, pa 'āmuuh gāy, ha mīpkox mōg 'ohnāg, hak mūg mōg yīpxax hah, hāmīn yūm Kenet tu', ha kōmēn Xanmōn yīkāgnāg.

⁸ Ha mīpkox te hām tu' xupep, tu hāpkux yīkāgnāg hā' xip, tu' mōgnāg mōg, tu mōktu mōxaha hāmīyokox Kōnāg Xexka Yīkox Max tu', ha kōmēn Nayet te hāmīhūmnāg.

⁹ Tuk mūg pip 'āmnīy xohix hā, ha hāmīxatamuk ka'ax, yā Yoneo xop te 'āmuk xexka 'āxet'ax "yāy kuxa māxnā'ax" mīy tap, ha hōnhā 'āmuuh gāy 'āxi mō'kouk, ha tex gāy, hu kōnāg xexka gāyāhā', ha Paot te tik te mīpkox mōgāhā pu hām'aktux, hu:

¹⁰ —Tihik, hōnhā mīpkox hāk mōg max'ah, 'āmuuh ka'ok hah, Tu' gāy, hak mūg kix putup kōnāg gāy hā, ha kōnāg te mīpkox kopa' pip hāpχop koxyōy putup, xix mīpkox, xix tikmū'ūn kix putup kamah. Kaxīy.

¹¹ Pāyā Kapitām Yot te hāmpe'paxex, hu:

—Paot te mīpkox mōg'ax yūmmūg kutōgnāg, pa mīpkox xuxyā te' yūmmūg xexka', xix mīpkox yōg tik mōgā'ax. Kaxīy.

Hu' yīpkox pip 'ohnāg Paot pu'. Ha mīpkox xuxyā xi' mōgā'ax mōg putup.

¹² Hāmīyokox Kōnāg Xexka Yīkox Max mūn max'ah, pu māyōn 'ānuk mēy 3 hāk nox pi', nūy 'āmuuh gāy kux'ax hip, nūy hām'āxi hāk pip, hu kōmēn Penix tu' mōg putup, nūy hāmīn yūm Kenet yōg hāmīyokox tuk nox pi'. Penix te mō'kouk yok ha' yūm, hu' max, pu māyōn 'ānuk nūn 3 hāk pip.

'Amuuh gāy te mō'kouk

¹³ Ha 'āmuuh te mō'kouk ha' xuxi', ha hāmpe'panōm, hu: "Yā hōnhā' max 'āmuuh," kaxīy. Ha pipkup putux te mīpkox hām tu' xup kōnāg kopah, ha' xut, tu' mōg, tu Kenet yōg hāpkux hāmīhūmnāg hā' mōg.

¹⁴ Hāpχip kutōgnāg 'Thā 'āmuuh gāy te hām tu' xupep, 'āmuuh 'āxet'ax Nōnet, tu' gāy xe'ēgnāg,

¹⁵ ha tik te mīpkox 'ūm mōgā hok, yā 'āmuuh te nuhuknām, yīy mīpkox yāy tu' mōgāhā'.

¹⁶ Ha hāmīn yūm Kanap tuk mūg mōg, pu 'āmuuh hēnāhā', ha' mōg, 'Thā 'āmuuh te xuxik-tōgnāg, mīpkox kutōgnāg te kōnāg kopa' xip, ha' xut, kōnāg hā nōm nūnnāhā', tu mīpkox xexka kopa pepi' xex, tu' hīy.

¹⁷ Ha' hīy kux, hak mūg mīpkox xexka hīy ka'ok poxīt xexka ka'ok hā, nōm kup tu' hīy ka'ok, pu 'āmuuh koxyōy hok, hak mūg kuxānōg, Nip yōg hāpkux kummuk yīpkutuk tu', tu mīpkox yōg topixxax xexka keppa nūnnāhā', 'āmuuh te nōm mō'kouk, tu' mōgāhā', pu Nip tu' mōg hok.

¹⁸ Ha 'āmuuh gāy te mīpkox mō'yōn, tu mahamnām kōnāg yīmū', ha mīpkox te hāpχop punethok tat, tup-tux, hak mūg kuxānōg, tuk mū'āte nōm hāpχop mō'pok kōnāg tu', pu mīpkox te tutnap.

¹⁹ Tu 'āmnīy 3 hāk mū'āte yāy yōg yīm hā mīpkox yōg hāpχop xupepmāhā'.

²⁰ 'āmnīy xohix hāk mū'āte māyōn pēnā 'ohnāg xix māyōnnāg, ha ta 'āmuuh ka'ok, hak mū'āte hāmpepaxex xakix putup.

²¹ 'āmnīy punethok hāk mūg xit'ohnāg, yīy Paot yok, tuk-nīhā' xip nōm tik xop kopah, tu:

—'Āxop, teptu 'āyīpkox 'ohnāg 'ūgmūn pu'? Teptu Kenet tu' nox 'āpip hok? 'Āte 'āyummūgāp-tup, pāyā xatep-tup nōg, yā hōnhā hāpχop punethok xaxogāhā' kōnāg xexka kopah.

²² Pa 'ākuxānōg hok! 'Ap tik 'ūm xok putup'ah, pa mīpkox mūn yāy koxyōy putup.

²³ 'Āte Topa pu hāpχopmāhā', yīy 'āmnīy koxtap hā pexkox yōg nū'kutnā'ax tek ha' nūn, tuk yīka' xip,

²⁴ tu 'ā hām'aktux, hu: "Paot, 'ākuxānōg hok. Xate Xex keppa xip putup, ha Topa

te mīpkox kopa tikmū'ün pēnānā' xip, xayīy 'āxakix hok, yā' hip-tup," kaxīy.

²⁵ Yīy 'ākuxa hittup, Topa te hām'āktux xex hah, 'ḥāk kuxa yūm ka'ok Topa kopah.

²⁶ Pa mīpkox te hāmīy'ün yūm yōg hāpkux ha' mōg putup. Kaxīy.

²⁷ Ha 'āmīy te 14 nōg, 'ḥāk mū'āte kōnāg xexka Mēnitehān tuk mōxaha', ha 'āmuuh ka'ok te mīpkox yāy mōgāhā', ha 'āmīy kote 'ḥā mīpkox yōg tik xop te hāmpe'paxex, hu:

—Hām 'ūm xip tu hāmhūmnāg. Kaxīy.

²⁸ Tu kōnāg yōg mēt mō'kupix, ha kōnāg xet yōg mēt xohix te 36, ha xe' mōg, tu kōnāg yōg mēt xe mō'kupix, ha mēt te 27.

²⁹ Ha hāpkux yōg mīkaxxap xexka yīpkutuk, tu mīpkox te mīkax tu yāy koxyōy yīpkutuk, yīy mīpkox yōg pipkup putux te 4 kōnāg kopa mō'pok, nōm poxix hīy'ax mīpkox nā'kup tu nō'hāp, pu mīpkox tu mōg hok. Ha Topa tu' xak, pu hāptup mōnāy.

³⁰ Pa mīpkox yōg tik xop te nū'pap-tup, tu mīpkox kutōgnāg te kōnāg yīmū mōg hā' mōxakux, tu tu' xaptop hā' mōgāp-tup, tu hām'āktux, nūy mō'āmā', hu:

—'Ūgmūg mōg, nūy pipkup nōy mō'yōn kōnāg xexka kopah, pu mīpkox tu mōg kux. Kaxīy.

Pāyā' koit.

³¹ Ha Paot te xonat yōg Kapitām pu hām'āktux, xix xonat xop pu', hu:

—'Ūxat, pu' xohix mīpkox kopa' pi', ka 'āxop xakix. Kaxīy.

³² Ha Kapitām te' xat, pu mīpkox kopa' pi', ha xonat xop te mīpkox kutōgnāg xit xak, ha yāy xe'e tu' mōg, ha kōnāg gāy te' xupepmāhā'.

³³ Ha hāptup 'ḥā Paot te:

—'Āpu, 'āxit. 'Āmīy te 14 hā 'āxop xit 'ohnāg, 'ākuxānōg tu'.

³⁴ Yīy xa hām'āktux, xa 'āxit, nūy yāy ka'ogā'. Topa te hām'āktux xex, 'ap 'āxaxok putup'ah, 'ap xakix putup'ah, xix 'ap xūy putup'ah. Kaxīy.

³⁵ Tu hām'āktux kux, tu pām paha', tu Topa 'āktux max, tu' koxip, tu' māhā', ha' xohix te' pēnāhā'.

³⁶ Tu' kuxa hittup, tu' xit.

³⁷ Yā nōm xop te mīpkox kopa' pip xop xohix te 276.

³⁸ Tu' xit, tu' hi ka'ok, tu pām xap xuxnāg te xetox pop, tu kōnāg xexka tu mō'pok, pu mīpkox tu tutnep.

Tikmū'ün xohix te hāmnak tu' mōxaha'

³⁹ Tu hāptup ha ta hām pēnāhā', hām 'ūm 'ap yūmmūg'ah, pa hāpkux pēnāhā', ha' max, ha hāpkux tu mīpkox mōgāp-tup.

⁴⁰ Ha pipkup te nīpkox putux yāhā', ha' mōg 'ohnāg, ha kōnāg xexka kopa mō'pok, tu mīmpe nōm mīpkox mōgā'ax ko'a', ha top-ixxax xexka hīy 'āmuuh te nōm tōmāhā', tu hāpkux ha' mōg.

⁴¹ Pa mīpkox xupup te 'āmōt yīmū' pip, tu' mōg 'ohnāg, ha mīpkox ta kup te kōnāg yīmū' xup, tu yāy mahap, ha kōnāg xexka gāy te' koxyōy.

⁴² Ha xonat xop te tikmū'ün nōm kanet kopa' pip xop kix putup, pu tu nū'pa hok,

⁴³ pāyā xonat yōg Kapitām te Paot putup pax, tup-tex putup'ah, hu' xat hok, pu nōm xop kix hok, tu xe' xat, pu kōnāg tu tuk-nūhām mōg.

⁴⁴ Ha nōm mōg yūmmūg hok xop te mīmpe hā' mōg, ha' xohix te nū'paha', tu hāpkux tu' mōxaha'.

28

Paot te Māot tu' xip

¹ Hak mūg nū'paha', tu hām 'ūm yūmmūg, ha hāmīy'ün yūm 'āxet'ax Māot.

² Ha Māot yōg tikmū'ün tek mūg kuxa ka', tu kuxap xexka mīy, hām 'āxi hah, ha tex tihix, ha' xap tep-tex.

³ Ha Paot te kuh pop, tu kuxap yīmū mō'pok, ha kāyā gāy kuh tu' xupep, pukpex tu' xupep hah, tu Paot yīm putop, tu ta tu' xup.

⁴ Ha Māot yōg tikmū'ün te' pēnāhā', tu' nōy pu hām'āktux, hu:

—'Ōhōm tik kummuk putuk. 'Āte nōm tik te' nōy putex pekpaex. Kōnāg xexka gāy tu' xupaha', pa Topa tep-tup nōg, tu kāyā pup-tōmāhā'. Kaxīy.

Ha kaxīy nōm tikmū'ün te Paot pe'paxex kummuk.

⁵ Pāyā Paot te' yīm puhmīy, tu nō kāyā mō'yōn kuxap kopah, tu' pakut 'ohnāg, tu' xūy 'ohnāg.

⁶ Ha tikmū'ün te Paot yīm mōm hip, tu' xok tu' nā' pēnāp-tup, tu xe' hip, pāyā Paot hittup pax, tu' pakut 'ohnāg, yīy tikmū'ün te' yēy, hu:

—Hamūn yā topahnāg 'ūm! Kaxīy.

⁷ Ha Māot yōg xexka Pup, tup-texop xexkah, yā' yōg hām punethok pip, tu yāy pet ha tuk mūg xānāhā', 'ū non pix, ha 'āmīy 3 hāk mūg pip.

⁸ Ha Pup mūg tak pakut, ha' xax pukpex, tu' xakuk xi' ta hep, ha Paot mōg, tup-tox yīmū' yīm xex, tu Topa pu hām'āktux hā' hittupmāhā', hā xax xuxi'.

⁹ Ha Māot yōg tikmū'ün pakut xop te' xupak, tu' nūn, ha' hittupmāhā'.

¹⁰ Ha' kuxa hittup xexka', tuk mūg hāpxop hok pōpmāhā', ha mīpkox kopak mūg mōg, ha nōm xop te hāpxop punethok 'ūgmū'ā' nīm.

Tu Māot nīm, nūy Hōm ha' mōg

¹¹ Ha mīpkox nōy te hāmīy'ün yūm Māot tu' xip, hām 'āxi' yōg mēy 3 hā' xip, tu kōmēn xexka 'Anexānit tu' nūn, ha mīpkox 'āxet'ax "topak-tonnix", kaxīy. Ha mēy 3 nōg, hak mūg mōg mīpkox hā.

¹² Tu ta kōmēn Xinakox tuk-mūg mōg, tuk pip 'āmnīy 3 hā.

¹³ Tu hāmhūmnāg tu' mōg, tu 'Itat yōg kōmēn Hey pēnāhā', ha hāptup nōy 'Ihā 'āmuuh max te mō'kouk, tuk mūg mōgā mō'ka'ok, tu mōktu 'āmnīy 2 hā kōmēn Potep tuk mūg mōxaha'.

¹⁴ Tuk mūg kuxa mām ka'ok xop xape pipihī', hak mū'āte' pet tu' pip 'āmnīy te 7 hā, tuk mūg mōg, tu mōktu mōxaha kōmēn xexka Hōm tu'.

¹⁵ Hak xape xop te' xupak, tu' nūn, tu nūktu 'Ap yōg hām nākok tu' mōxaha', xix Mēn tikoyuk tu' mōxaha', ha Paot ka'ogāhā', ha Paot te Paot 'āktux max, tu yāy kuxa hittup xexkah.

Tu Hōm tu' xip

¹⁶ Tu Hōm kopak mūg mōxaha', ha Paot te xonat puxehnāg mūtik tihī mīptut kopah, pu pēnānā' xip. Ha Paot te mīptut xuxyā pu tayūmak hōm nūy mīptut kopa 'āti'.

¹⁷ Ha 'āmnīy 3 nōg, 'Ihā Paot te Hōm yōg Yoneo xop xānāhā', ha yāy tu nū'nāhā', ha Paot te:

–'Ūnōy mūnom xop, Yoneo xop tek mūg, pāyā 'āte hāpxopmā 'ūm kummuk 'ohnāg tikmū'ūn tu', xix mōnāyoxop yōg hāpxopmā'ax 'āte kummugā 'ohnāg, ha kanet kopak xix, tu' puknōg xop hak mōgāhā'.

¹⁸ Hak yīkopit, tuk xupagāp-tup, 'āte hāpkummuk 'ūm mīy 'ohnāg hah, 'ūyīk xok.

¹⁹ Pa Yoneo xop tek putup nōg, yāk putex putup, yīy 'āte tu' xak, pu Xex 'ūgyīkopit, yāg gāy 'ohnāg Yoneo yōg tikmū'ūn tu'.

²⁰ Tu 'āpēnāp-tup, nūy xa hām'āktux, hak hīy kupuk māg xap ha Yeyox hā, yā 'Iyaet yōg tikmū'ūn xohix te nōm hip, hāmmax hip tu'. Kaxīy.

²¹ Ha' nōy te:

–'Ak mū'āte tappet 'ūm mō'kupix'ah, ha Yonex yōg xop te nū tappet kutnā 'ohnāg, ha Hōm yōg nōy xop te 'ākummuk 'āktux 'ohnāg.

²² Hak mū'āte 'ōg hām'āktux'ax 'āpak putup, nūy hāmyūmmūg. Teptu Yoneo xop xohix te Yeyox xop putup nōg? Kaxīy.

²³ Ha Yoneo xop te hāptup 'ūm nūn, Yoneo xop punthok nūn, nūy hām'āpax, tu yāy tu nū'nāhā Paot pet tu', ha Paot te Topa te yāy yōg tikmū'ūn xat yūmmūgāhā', tu hāptup tox hā hām'āktux, tu 'āmnīy 'Ihā hām'āktux kux, tu Yeyox 'āktux, tu Mōyyex yōg xat'ax hā hāmyūmmūgāhā', xix Topa pupi hām'āktux xop hā hāmyūmmūgāhā kamah, nūy Yeyox yā Topa yōg hāmyāyutnā'ax 'āktux.

²⁴ Ha' yāg kuxa mām ka'ok, pa' yāg kuxa mām 'ohnāg,

²⁵ tu yāy pu hām'āktux, tu hām'āktux hā' nōy yānān, tu hām'āktux 'Ihā' mōg, Ha Paot te:

–Hōmā Topa Koxuk te hāmyūmmūg, yīy 'Iyait te Topa pupi hām'āktux, tu mōnāyoxop pu hām'āktux, hu:

²⁶ "Āmōg, tikmū'ūn hah, tu hām'āktux, hu:

Āxop te hām'āpak, pāyā hām 'ūm 'āpak 'ohnāg,

tu hāmpēnāhā', pāyā hām 'ūm pēnā 'ohnāg.

²⁷ Yā tikmū'ūn putox ka'ok,

tu mō'yāy yīpkox yīnnīn, nūy hām'āpak hok,

xi' pa kīy kamah, nūy hāmpēnā hok,

ka hāmyūmmūg, xix yāyhāhup,

ka Topa yōg putat hā' mōg 'ūxeheh, 'āte nōm hittupmā'ax,

pāyāp-tup nōg. Yā Topa te' xuktux tap." Kaxīy.

²⁸ Ha Paot xe hām'āktux, hu:

–'Āte xa hāpxe'e 'āktux: Topa te hām'āpak max'ax nū'kutnāp-tup hāmpuknōg xop hah, ha' yīpkox pip, puyīy Topa 'ūkuxa kummuk xit, nūy kuxa max tat 'ūyānan tu'. Kaxīy.

²⁹ Ha Yoneo xop mōg, tu hām'āktux hā' nōy yānān nām hā' mōg.

³⁰ Hāmyāxatamuk 2 hā Paot te' yōg mīptut kopa' xip, ha' xape xop nūn, nūy Paot pēnā', ha' kuxa hittup, tu Topa te yāy yōg tikmū'ūn xat 'āktux pax.

³¹ Tu Topa te Yeyox yāyutnāhā 'āktux tikmū'ūn pu', ha' puknōg xop te' tux hok, pu mīy, 'Ihā' xohix te' yūmmūg.

Ha Nok te Yeyox yōg mō'pok xop yōg hāpxopmā'ax 'āktux kux.

PAOT TE HÖM YÖG KUXA MÄM KA'OK XOP PU KAX'ÄMI'

¹ Ügmün yä Paot, Yeyox Kunnix tu häpoxpmähä', ha Topa tek yäykutnähä', tuk xänähä', nüy mögkutnä', 'äte häm'apak max'ax 'äktux, hu xa kax'ämi nüü tappet.

² Hömä, hämyäxatamuk xohix 'ihä Topa te mönäyop hittap pu häm'äktux xex, ha Topa yög pupi häm'äktux xop hittap te' xuktux, tu tappet tu kax'ämi', hu: "Topa te tik xop mö' pok putup, pu xa häm'apak max'ax 'äktux," kaxiy.

³ Yiy Topa tappet te Topak-tok 'äktux, tu yümüg xuxyä Yeyox Kunnix 'äktux, hak mü yög tikmü'ün kutok pit, yä mönäyoxop hittap Namix mökputox Yeyox.

⁴ Tu' max xe'egnäg, Topa putuk tu', yä Topak-tok xe'e', tu' xok xe'e', yiy Topa te häpoxpmä ka'ok xe'egnäg, tu' hünähä putpu', pu' xohix yümmüg, yä Yeyox mün Topa häk-tok.

⁵ Yä Topa tek yäykutnähä', nüy nügkutnä', tu 'ä yäy 'äxet'ax höm 'ü puknög xop xohix kuxa mämmä kamah, pu tu' yipkox pi häm'apak max'ax pu',

⁶ ha 'äxop kuxa mäm ka'ok kamah, kōmēn Hōm tu 'äpip, ha Topa te 'äxänähä', xa Yeyox Kunnix hä 'äxape'.

⁷ Kaxiy 'äte kax'ämi tappet, tu kōmēn Hōm yög kuxa mäm ka'ok xop pu ka'ämi', yä Topa te mö 'äxop yäy xe'egnäg, tu 'äxop xänähä', xayiy yäyhä' yög tikmü'ün.

Püyä Topa yümüg Tak xik-tok Yeyox Kunnix xa hämmxnä', xix 'äkuxa mämmä'.

Paot te Topa pu häm'äktux, tu' max 'äktux

⁸ Äte Topa pu häm'äktux pax hämäxap, hu: 'Ämax, Topah! kaxiy. Tu Yeyox Kunnix hä' xuktux, tu xa häk hittup kamah. Yä häm xexka xohix yög tikmü'ün xa häm'äktux max, 'äkuxa mäm ka'ok hah.

⁹ Topa tu 'äte häpoxpmähä, nüy mīy mājnäg, tu häm'apak max'ax 'äktux, tu Topak-tok 'äktux, ha' yümmüg Topa te', tu 'äte häpxe'e' 'äktux yümmüg. 'Ap 'äte koit'ah, yä 'äxaxok 'ohnäg.

¹⁰ Tu Topa tu' xak pax, puyiy ka'ogä', tu' xak kamah, pu tu mögkutnä 'ähah, yä Topa te mö yümüg yäy xe'egnäg.

¹¹ Ähak mög putup pax. 'Äte' xak, 'üyiy 'ähak mög, nüy xa hämmxnä', nüy 'äka'ogä'

¹² pu yümüg xohix mö' yäy nijnäm: 'Äxop te mögnijnäm, xik mün te mö'änijnäm, hu Topa yög putat hä yümüg mög kumak mög.

¹³ Ükxape xop, 'äte xa häm'äktux xe'e': 'Ügmög putup 'ähah, yä 'ämny xohix häk mög putup, pak mög 'ohnäg. 'Ähak mög,

'okpa 'äte' xak, nüy kama 'ämögä'. Hömä 'äte' puknög xop mögähä', nöm xop te Yoneo yög tikmü'ün hä' puknög, Topa yög putat hä' mögähä', yä kaxiy 'äte' xak, nüy 'ämögä kamah.

¹⁴ Topa te mögkutnähä, 'äte häm'apak max'ax 'äktux, huk yiy hok'ah. Yä häm'äktux putup Yoneo yög tikmü'ün pu', xix puknög xop xohix pu'. 'Äte ta nemēn, nüy häm'apak max'ax 'äktux 'üxohix pu'. 'Ap tayūmak ta nemēn'ah. Yä' nöy, yiy hämyümmüg xop pu 'äte häm'äktux, xix hämyümmüg 'ohnäg xop pu 'äte häm'äktux kamah, tu häm'apak max'ax 'äktux putup 'üxohix pu',

¹⁵ xix 'äxop pu' xuktux'ax kamah, ha kōmēn xexka Hōm tu 'äpip, yik mög putup 'ögnü kōmēn Hōm tu', nüy xa häm'äktux häm'apak max.

Häm'apak max'ax mün ka'ok

¹⁶ Topa tek xat 'äte häm'apak max 'äktux, pu tikmü'ün kuxa mäm ka'ok Yeyox Kunnix kopah, pu tu' kuxa kummuk xit, nüy kuxa max tat 'üyänän tu'. Yä häm'apak'ax ka'ok, ha 'äte yäyhähup 'ohnäg, nüy häm'apak max'ax 'äktux. Ha Yoneo xop te häm'apak hämäxap, yä häm'apak'ax ka'ok, tu Yoneo yög tikmü'ün kuxa kummuk xit, xix yä' puknög xop kuxa xit kamah, nüy kuxa max tat 'üyänän tu', yä' nöy putuk.

¹⁷ Topa tep-tup, pu tikmü'ün kuxa mäm ka'ok Yeyox Kunnix kopah. Puxi', ha nöm tikmü'ün mö'yäy xe'egnäg. Yä häm'apak max xe'e'! Hömä tik te Topa pupi häm'äktux, tu tappet tu kax'ämi', nüy tikmü'ün pu' xuktux, hu: "Tikmü'ün kuxa yüm ka'ok Topa kopah, puxix Topa' kuxa kummuk tupmä', pu tu max, puyiy tikmü'ün hi xe'egnäg," kaxiy.

Yä' hep xop xohix te häpoxpmä kummuk

¹⁸ Topa gäy tikmü'ün kuxa kummuk hah, yümü'äte' yümmüg, yä Topa tep-tup hok, pu tikmü'ün häpoxpmä kummuk hok. Yä tikmü'ün te häpoxpmä kummuk pax, tu Topa hä' puknög, puxi' nöy Topa yümmüg hok kamah.

¹⁹ Ha Topa gäy, tu' yänän tu' kummugähä, tu' xüygähä', tu nöm tikmü'ün pu hämyümmügä tap, 'ükuxa kopa' yümmügähä', puyiy tikmü'ün Topa yümmüg max,

²⁰ 'ihä' pēnā hok, ha hämnögnöy mīy, xix hahām, ha tikmü'ün xop xohix te hämnögnöy pēnähä', xix hahām, tu Topa te' mīy yümmüg, hu Topa xexka xe'egnäg yümmüg, xix Topa ka'ok xe'egnäg yümmüg, xix Topa xok hok yümmüg. Tep te xiy tikmü'ün te Topa yümmüg hok? Yä Topa hi xe'egnäg.

²¹ Yä hämyümmüg, päyā tikmü'ün te Topa xaxok, tu nöm pu häm'äktux 'ohnäg, hu: "Äxexka Topah, xix 'ämax, xatek mü'ä häpox xohix popmähä'," kaxiy.

‘Ämhok, ‘ap xuktux‘ah, pap-tox kummuk, tu hâmpē‘paxex ‘ohnâg, tu mõktu hâmyümmüg ‘ohnâg, ‘ükummuk tu’.

²² Tu yây hâmyümmüg pe‘paxex, ‘ühitop tu hâmpē‘paxex, ‘üpa te hâmyümmüg ‘ohnâg tu’, tup-tox kummuk.

²³ Yâ Topa hi xe‘ëgnâg, pa tikmü‘ün te nîm, nÿy topa komut xop pu nÿktetex ‘üyânân tu’, ha‘ komut xop te tikmü‘ün putuk, xix putuxnâg putuk, xix xokxop putuk, xi‘ kep hâ‘ mõg xop putuk.

²⁴ Yÿy Topa te tikmü‘ün putox kummuk xop nîm, pu yây putup‘ax mÿy, hu hâpxopmâ kummuk, tu yây kummugâhâ’.

²⁵ tu Topa nîm, tu hâpxop pu nÿktetex ‘üyânân tu’, nôm hâpxop Topa te‘ mÿy, ha Topa xe‘ëgnâg nîm, tu‘ xaxok, nÿy ‘ükoiit‘âx putup ‘üyânân tu’, pa Topa mÿn max, tu‘ hi xe‘ëgnâg, ha‘ nõg ‘ohnâg, Hamün!

²⁶ Yÿy Topa te‘ nîm, ha hâpxopmâ kummuk, tu‘ nõy pu‘ hupmâhâ’, ha ‘ün xop te ‘ün nõy pēnâhâ’, nÿy nÿ mÿtik tu yâyhâ’ xupxet,

²⁷ ha tik xop te tik nõy pēnâhâ’, nõ mõ‘âmâ, nÿy nÿ mÿtik tu nôm kummuk, tu ‘ün putup nõg, pu nÿ mÿtik tu nôm, pa tik xop putup, yâ‘ kummuk, hu yây pu hâpkummugâhâ’, yÿy Topa te‘ kummugâhâ’, ha‘ pago.

²⁸ Tikmü‘ün kummuk te Topa xaxok, tu hâmyümmüg putup ‘ohnâg, yÿy Topa te‘ nîm, pu hâmpē‘panôm kummuk, nÿy hâpxopmâ kummuk.

²⁹ Yâ‘ kummuk xe‘ëgnâg, ‘üxonnix, tu‘ xup-kumÿy nâm, tu‘ nõy pe‘paxex kummuk, tu‘ nõy pu hâpkummugâhâ’, tu‘ yÿpkumÿy, tu yâyix, tu‘ nõy putex, tu yây tuk-mÿy, tu‘ koiit, tu‘ xupmâhÿy kummuk pax,

³⁰ tu‘ nõy ‘âktux kummuk, tu Topap-tup nõg, tu yây mÿn pe‘paxex xexka’, ‘ÿhâ‘ nõy pe‘paxex kutögnâg, tu hâpkummuk mÿ‘ax xak, tu yây tak xi‘ tut pu‘ yÿpkox ‘ohnâg,

³¹ tu hâpkummuk mÿy pax, tu hâmpâktux xex, pâyâ‘ xaxok, hu‘ hitop tu‘ xex, yâ‘ mÿy ‘ohnâg, tu‘ nõy kuxa ka ‘ohnâg.

³² Tu Topa yög xat‘ax yümmüg, ha‘ xat hok pu‘ mÿy hok, ka Topa te: “Pÿyâ tu‘ xok ‘üyânân tu’,” kaxÿy, pa‘ yÿpkox ‘ohnâg, tu hâpkummuk mÿy pax, tu‘ nõy xop pu hâpkummuk yümmügâhâ’, yâ‘ nõy xapit, puyÿy hâpxopmâ kummuk kamah.

2

Topa te hâpkummuk mÿy ha‘ pago

¹ Ok ‘âxop te ‘ânöy yög hâpxopmâ‘ax kopit? Yâ‘ kummuk ‘âktux, pa ‘âxop te hâpkummuk mÿy ‘ânöy putuk, hu yây yög hâpxopmâ‘ax kopit‘ax kamah. Yâ ‘âtix kummuk. Tep te xÿy ‘âxop kama hâpkummuk mÿy?

² Topa mÿn max, ha yümü‘âte‘ yümmüg, ha‘ kopit max, tu‘ xat hok puyÿ‘ xohix hâpkummuk mÿy hok, ha‘ kummugâp-tup ‘üyânân tu’.

³ Pa ‘âxop te hâpxopmâ kummuk, ‘ÿhâ ‘ânöy tu: “‘Ümÿy hok‘ Yâ Topa tep-tup nõg hâpxopmâ‘ax kummuk, hu ‘âxÿygâp-tup,” kaxÿy. ‘Ok xate hâmpē‘âpaxex, hu: “Topa tekün pēnâ‘ah?” Kaxÿy. Yâ‘ koiit! Yâ‘ pēnâhâ! ‘Üxohix te Topa pu yây putuk, yÿy Topa te yâ ‘ög hâpxopmâ‘ax kopit putup kamah, tu ‘ög hâpkummuk mÿy‘ax hâ ‘âxÿygâp-tup.

⁴ Topa pe‘âpaxek-tögnâg hok! Yâ‘ max xe‘ëgnâg Topa, tu‘ hip, xayÿ pēnâ’, nÿy yâyhâhup, nÿy hâpkummuk mÿy‘ax nîm. Yâ ‘âxop te hâmyümmüg.

⁵ ‘Äyÿpkox hok, puxix Topa ‘âxÿygâ, ‘âxÿy kutögnâg nâ‘ mõg, tu mõktu ‘âxÿy xexka, ‘ÿhâ Topa te‘ hep xop xohix yög hâpxopmâ‘ax kopit, pu‘ xohix hâmyümmüg: Yâ Topa te hâmyok mÿy,

⁶ tu‘ xohix yög hâpxopmâ‘ax yümmüg, tu pagop-tup ‘üyânân tu’, yâ tikmü‘ün te hâpxopmâ kummuk, puxix Topa‘ kummugâ’, ha tikmü‘ün te hâpxopmâ max, puxix Topa hâmmaxnâ’.

⁷ Tikmü‘ün yâg te‘ xak, nÿy hâpxopmâ max, xi‘ xak, nÿy tu max xe‘ëgnâg, Topa putuk, xi‘ xak, pu Topa te: “‘Äxop yâ yögñü!” kaxÿy. Tu hâmmax hip, yÿy nôm xop hÿnnâp-tup xe‘ëgnâg nÿy Topa mÿtik tu tihÿ’.

⁸ Pa tikmü‘ün nõy te yây pe‘paxex puxet, nÿy yây putup‘ax mÿy, xix hâpxe‘ep-tup nõg, nÿy hâpxopmâ kummuk pax, ha Topa gâyhâhâ’, ha hâpkummugâp-tup ‘üyânân tu’, nÿy pago.

⁹ Tikmü‘ün xohix te hâpxopmâ kummuk, puxix Topa‘ yânân tu‘ xÿygâ’, yögñü Yoneo yög tikmü‘ün hâmmâxap, hak-nây tu‘ puknög xop xÿygâ’.

¹⁰ Tu tikmü‘ün max pu hâmmaxnâp-tup ‘üyânân tu’, pu tu yâyhâ max xe‘ëgnâg, Topa putuk, ha‘ xekânâp-tup, xi‘ kuxa mâp-tup. Yâ hâmmaxnâp-tup ‘üyânân tu’, tu Yoneo yög tikmü‘ün pu hâmmax nâp-tup hâmmâxap, xik-nây tu‘ puknög xop pu hâmmaxnâp-tup.

¹¹ Yâ Topa pu ‘ühep xohix te yây putuk, tu hâpxopmâ‘ax xohix kopit nÿy yümmüg, ‘ok pe hâpxopmâ max, pe tu kummuk, nÿy tu pago.

¹² Hâm puknög xop te Möyyex yög xat‘ax yümmüg hok, tu hâpxopmâ kummuk, ha Topa te‘ yög hâpxopmâ‘ax kopit, tu tikmü‘ün yây xat‘ax hâ‘ kopit, ‘ÿhâ‘ xat‘ax yümmüg ‘ohnâg, ha: “‘Ükummuk!” kaxÿy. Ha Yoneo yög tikmü‘ün te Möyyex yög xat‘ax yümmüg, tu hâpxopmâ kummuk, puxix Topa‘ yög hâpxopmâ‘ax kopit, tu yây yög xat‘ax hâ‘ kopit, hu: “‘Ükummuk!” kaxÿy.

¹³ Tikmü‘ün te hâpxopmâ max, puxix Topa tep-tup pax, ‘ok pe‘ xat‘ax yümmüg, ‘ok pe‘ xat‘ax yümmüg hok, ha tikmü‘ün te hâpxopmâ kummuk, puxix Topa tep-tup nõg, ‘ok pe‘ xat‘ax yümmüg, ‘ok pe‘ xat‘ax yümmüg hok.

14 Häm puknög xop te Möyyex yög xat'ax yümmüg'ah, pa' puknög te häpxopmä max, puxix tu' mïy, Topa yög xat'ax mïy, 'thä' yümmüg hok.

15 'Üyümmüg. Topa te yäy yög xat'ax yümmügähä', nöm xop kuxa kopa' yümmügähä', yī' kuxa kopa' yümmüg, 'ok pe häpxopmä max, 'ok pe' kummuk.

16 Häptup puxet mō'nā'ax, 'thā Topa te Yeyox xat, pu tikmū'ün xop xohix yög häpxopmä'ax kopit, nūy hāmpē tu panōm yümmüg, nūy hāmpē tu pānōm xaptop'ax xohix yümmüg, ha 'āte hām'āpak, max'ax hā hām'āktux, yā Topa te hāmpē'pānōm xohix kopit putup, tu hām'āpak max'ax hā' kopit putup.

Yoneo xop xix Möyyex yög xat'ax

17 Ha 'āxop te: "Ügmū'üg Yoneo xop yög," kaxīy. 'Ākuxa mām ka'ok Möyyex yög xat'ax kopah, mōnāyxop hittap Möyyex te kax'āmi', ha 'ākuxa mām ka'ok nō'ōm kopah, tu: "Ügmū'üg yā Yoneo xop yög, ha Yoneo yög tikmū'ün yā Topa hā tikmū'ün xe'e'," kaxīy. Yā' hitop tu yāy mūn xexka pe' āpaxex.

18 Tu Topa yög putup'ax yümmüg, xayī' mīy māynāg. Tu hāmmāx'ax yümmüg, xayīy häpxopmä max. Pāyā hitop tu hāmyümmüg,

19 hu yāy pe'āpaxex hitop, hu: "Āte hāmyümmüg, hu hāmyümmüg hok xop pu hāmyümmügā'ax," kaxīy.

20 'Ākuxa mām ka'ok 'ūxat'ax kopah, yā hāmmāx xohix yümmügähä', xix häpxe'e yümmügähä', yīy 'āxop te' tuktpur xop pu hāmyümmügā'ax, xix hāmyümmüg hok xop pu hāmyümmügā'ax.

21 Pāyā yāy pu hāmyümmügā'ax xate' xaxok, tu Topa yög hām'āktux 'āktux, pāyā' mīy 'ohnāg. 'Āxop te: "Āxupxet hok!" kaxīy, tu 'ānōy pu' xat, pu tu' xupxet hok, 'thā xate' xupxet.

22 Tu' xat hok, pu' nōy hā' xupxet hok, pa 'āxop te 'ānōy hā' xupxet kamah. Tu topa komut xop putup nōg, pāyā topa komut pet tu xate' xupxet, nūy puknög xop gāyā'. Yā 'ākummuk!

23 'Āxop te yāymūn xexka pe'āpaxex, Topa te xa' hōm yāy xat'ax hah, pāyā 'a' mīy'ah, 'āyīpkox 'ohnāg tu', yī' puknög xop te Topa 'āktux kummuk, yā 'āxop te Topa pu' hupmāhā', ha' yāyhāhup.

24 Topa yög tappet te: "Üpuknög xop te Topa 'āktux kummuk, 'āxop Yoneo xop te häpxopmä kummuk hah," kaxīy.

25 Yoneo yög yümmüg tikmū'ün te kaxxop pit xop yāy nāg xax yīmap tu' mep, puyīy tikmū'ün te hāmyümmüg. Yā Topa yög tikmū'ün xe'e'. Yoneo xop te' xat'ax pu' yīpkox pip, puxix tu max, pa' yīpkox hok, puxix yāy xax mep 'ūhitop tu'.

26 'Üpuknög xop te' xat'ax pu' yīpkox pi', puxix tu Topa hā tikmū'ün xe'e', 'thā yāy xax yīmap mep 'ohnāg.

27 Ha kaxīy puknög xop te yümmüg yög häpxopmä'ax kopit putup, nūy häpxopmä'ax yümmüg, tu yāy xax yīmap tu' mep 'ohnāg, pāyā Topa yög xat'ax pu' yīpkox pip, nūy häpxopmä max, pa yümū'āte Topa yög xat'ax yümmüg max, tu' pit xop yāy xax mep, pāyā' yīpkox hok, tu häpxopma kummuk, puxi' puknög xop te yümū yög häpxopmä'ax kopit putup.

28 Yoneo yög tikmū'ün yā Topa yög tikmū'ün xe'e'. Piyā' Yoneo xop yög? Tikmū'ün te xīy yā Topa yög xe'e'? Tikmū'ün te' xax xax puxet, tu yāyhā 'ohnāg Topa yög tikmū'ün. 'Āmhok.

29 Pa tikmū'ün kuxa te Topa xax, nō'ōm te Yoneo xop yög xe'e', ha Topa Koxuk te' kuxa tupmāhā, pu tu Topa hā tikmū'ün, 'ūxat'ax te' mīy hok hah. Yā Topa tep-tup, tu' max 'āktux. 'Ap tikmū'ün nōy te hām'āktux'ah.

3

1 Tikmū'ün 'üm te' yīkopit, hu: "Ok max 'ügmūn yā Yoneo xop yög?" kaxīy. Xix: "Ok max Yoneo xop pit yāy nāg xax yīmap nūy xax?" kaxīy.

2 Yā' max xe'e'. Topa tek mū yög Yoneo xop pu yāy yög hām'āktux 'āktux, 'ūyīy tu xeh max.

3 Tikmū'ün 'üm te hām'āktux, hu: "Pa Yoneo yög tikmū'ün punethok yīpkox pip 'ohnāg, tu Topa yög hām'āktux pu' yīpkox 'ohnāg," kaxīy. 'A' yümmüg, pa Topa mūn max, tu Yoneo yög tikmū'ün pu hām'āktux xex, tu' xaxok 'ohnāg.

4 Hamūn! Topa te häpxe'e 'āktux, tu hāmyok mīy, tu' koit 'okpa tikmū'ün xohix te mō'āmā', yīy Topa tappet te:

"Yā Topa te hāmyok mīy, tu häpxe'e 'āktux, tu' koit 'ohnāg,

pu' pa te hāmyümmüg xe'e' yīkopit, tu: 'Ūmax,"

Kaxīy.

5 Yümū'āte häpxopmä kummuk, kopxix tikmū'ün nōy pu Topa mūy, yā hāmyok mīy Topa te', ha yümū yög häpxopmä'ax kummuk hā yümū'āte hāmyümmügähä'. Yā tikmū'ün punethok te hitop tu hām'āktux, hu: "Pūyā Topa 'ügkummugā' hok, nūy yümū yög häpxopmuk mīy hā' pago', 'Ap max'ah Topa 'ügkummugā'! Kaxīy.

6 Nāy, Topap-xehnāg te hāmyok mīy' Yā Topa mūn pa te hāmyümmüg xe'ēgnāg, nūy tikmū'ün xop xohix yög häpxopmä'ax kopit, xi' hep xop xohix yög häpxopmä'ax kopit. Paxpu Topa häpxopmä kummuk, puxix tu tikmū'ün xohix yög häpxopmä'ax kopit hok.

7 'Āte xe hām'āktux, hu: Yāk mūn te koit, pāyā Topap-xehnāg te koit 'ohnāg.

Tikmü'ün xohix te yâ koit pax, hu hämyümmüg. Yâ Topap-xehnäg mün max xe'ëgnäg. Ha tikmü'ün 'üm te hitop tu yïkopit, hu: "Teptu Topa te' yänän tuk kummugähä', 'äte koit hah?" Kaxïy.

8 Tikmü'ün nöy te hitop tu häm'äktux, hu: Yä' max yümü'äte häpkummuk mïy, puyïy Topa hämmxnä', yä' yänän tu hämmxnä', kaxïy. Ha tikmü'ün nöy tek Mün kummuk 'äktux, hu: "Paot te nöm 'äktux." Kaxïy. Tu' koit. Topa te häm'äktux kummuk xop häpkummugäp-tup 'üyänän tu'.

'Üxohix te häpxopmä kummuk

9 'Ok Topa tek mü yög Yoneo xop pe'paxex max, xi' puknög xop pe'paxex kummuk? 'Ämhok! Yä' xohix te yäy putuk Topa pu', 'üxohix te häpxopmä kummuk putup pax, ha' kuxa hïy ka'ok,

10 yïy Topa yög tappet te:

"Tikmü'ün yok 'üm 'ap xip'ah.

11 tu yä hämyümmüg 'ohnäg, xix Topa xak 'ohnäg.

12 'Üxohix te Topa nïm, tu Topa yög putat xak. 'Ü 'üm te häpxopmä max? 'Ap xip'ah, 'ap puxehnäg xip'ah.

13 'Üyïy'ax te xukpot hax xüy, yä' kummuk, tu yä mō'ämä pax,

'Üyïkox te käyānox yïkox putuk, nüy tu yïy'ax häp-tex.

14 Tu' mänög, hu: 'Püyä Topa 'äxat hä 'äp-tex' kaxïy.

15 Yä' xak, nüy tikmü'ün xüygä', nüy putex,

16 tu häpkut'ex kummuk pax nä' xip, tu häpkoxöy pax,

17 tu' nöy kuxa yümmä 'ohnäg,

18 tu Topa yïpkutuk 'ohnäg, nüy tu nüktettex, yä' kuxa te' yëy 'okpa Topa xip." Kaxïy.

19 Yümü'äte hämyümmüg, tu Topa te' xat'ax hōm yümmüg, ha Yoneo yög tikmü'ün pu' hōm, tu' hōm puyi' xohix yäy yög häpxopmä'ax yümmüg, nüy yäyhähup Topa tu', ha Topa te tikmü'ün xohix, xi' hep xop xohix yög häpxopmä'ax kopit putup, nüy yög häpxopmä kummuk yümmüg, nüy yänän tu' kummugä'.

20 Paxpu tikmü'ün Topa xat'ax pu' yïpkox pi', puxi' kuxa tupmä hok. 'Ämhok. 'Üxat'ax te tikmü'ün pu hämyümmügähä', päyā' kuxa kummuk tupmä 'ohnäg.

Tikmü'ün kuxa yüm ka'ok Yeyox kopah, puxix Topa' kuxa kummuk tupmä'

21 Pa Topa te tikmü'ün kuxa kummuk tupmä nōmhä', tu' xat'ax hok hä' tupmähä', ha Möyyex yög xat'ax te yümü'ä hämyümmügähä', xix tik hittap xop te Topa pupi hām'äktux, tu yümü'ä hämyümmügähä kamah, yïy Topa yög tappet te: Ya hamün! Kaxïy.

22 Topa te' kuxa kummuk tupmähä', pu tu kuxa max. 'Ükuxa yüm ka'ok Yeyox Kunnix

kopah, yïy Topa te' tupmähä'. Yä' hep xohix te yäy putuk, yä Yoneo yög tikmü'ün, xix nöm xop te Yoneo xop hä' puknög, yä yäy putuk. Ha Topa te' kuxa mām ka'ok xop xohix tupmähä', pu tu kuxa max.

23 'Ühep xop xohix te Topa yög putat xak, tu' nïm, tu häpxopmä kummuk pax, hu Topa putuk 'ohnäg.

24 Pa Topa te hämmxnähä', tu nöm kuxa kummuk tupmähä', 'ühok hä' tupmähä', yä Yeyox Kunnix xok hä' tupmähä', pu tu kuxa max. Yeyox Kunnix xok, nüy tikmü'ün kuxa kummuk xit, nüy kuxa max tat 'üyänän tu'.

25 Topa te tu' müg Kunnix tu: "'Üpēnä'," kaxïy, tu nöm yäykutnähä', pu mïpkupnix tu tu' xok, puyïy Topa tikmü'ün yög häpkummugä'ax xaxogä', pu tu kux, Yeyox Kunnix xok'ax hä Topa te' xaxogähä', tu hämyok mïy xe'ëgnäg tu' xaxogähä', tikmü'ün kuxa mām ka'ok hä' xaxogähä'. Hōmä Topa te nōā'tot tikmü'ün yög häpxopmä'ax kummuk, tu 'ap koit'ah,

26 pa hōnhä Kunnix müg, ha' xok tikmü'ün pupi', pu tikmü'ün xohi' yümmüg, nüy: "Yä Topa te hämyok mïy, hamün, Topa max xe'ëgnäg," kaxïy. Ha hämyümmügähä', puyïy yümmüg. Yä Topa te tikmü'ün kuxa kummuk tupmähä', tu' kuxa mām ka'ok xop tupmähä', nöm xop kuxa mām ka'ok Yeyox kopah.

27 Putep te xïy yä yäy pe'äpaxex? Putep te xïy 'äyögkänānmām hä 'äxip? 'Ok yümü'äte hämyok mïy, pu Topa yümüg putup? 'Ok yümüg yïpkox pip Topa yög xat'ax pu', nüy yümüg kuxa tupmä? 'Ämhok. 'Ap kaxïy'ah. Päyā yümüg kuxa mām ka'ok Yeyox kopah, hu Topa te yümüg kuxa tupmähä', pu tu kuxa max.

28 Hu' yümmüg, Topa te' kuxa yüm'ax puxehnäg hä tikmü'ün kuxa tupmähä', tu' xat'ax hä' tupmä 'ohnäg, tu' yïpkox pip'ax hä' tupmä 'ohnäg.

29 'Ok Topa te Yoneo xop puxet hä yä Topah? 'Ok pe Topa te' puknög xop hä yä kamah? Hamün! Yä' hep xohix xop hä Topah.

30 Topap-xet, tu Yoneo yög tikmü'ün kuxa tupmähä', 'ükuxa mām ka'ok hä' tupmähä', tu' puknög xop kuxa mām xop kuxa tupmähä'.

31 'Ok Topa te' xat'ax nōā', puyïy tikmü'ün kuxa mām ka'ok Yeyox kopah? 'Ämhok. Topa te' nōā' 'ohnäg, hak mü'äte' xat, puyi' yïpkox pi', nüy mäynäg mïy.

4

Paot te mōnāyoxop 'Amanām 'äktux

1 'Äpu yümü'äte 'Amanām 'äktux, nöm te Yoneo yög tikmü'ün xohix hä mōnāyoxop hāmāxap. Putep 'äktux'ax yümü'äte'?

² Yä Topa te 'Amanām max 'äktux. Teptu Topa te' xuktux? 'Ok häp̄xopmā'ax hä' xuktux? 'Ämhok. Yä' hok tu Topa te mō'yāy xe'ēgnāg, yīy 'Amanām te yāy mūn kutōgnāg pe'paxex.

³ Yä Topa yōg tappet te: "Amanām kuxa yūm ka'ok Topa kopah, yīy Topa te' kuxa kummuk tupmāhā', pu tu kuxa max." Kaxīy.

⁴ Tikmū'ūn hām, hu tayūmak paha', 'ūhok hā' pa 'ohnāg, pāyā hām'ax tu' paha'.

⁵ Ha tikmū'ūn kuxa kummuk, 'ap häp̄xopmā max yūmmūg'ah, pa' kuxa yūm ka'ok Topa kopah, puxix Topa pēnā', nūy kuxa yūm'ax pēnā', tu' hok hā' kuxa kummuk tupmāhā'. 'Ok Topa te tikmū'ūn kuxa kummuk xohix tupmāhā'? 'Ämhok. Pa nōm xop te häp̄xopmā max hok, tu' kuxa mām ka'ok, yā Topa te nōm kuxa tupmāhā'.

⁶ Hōmā mōnāȳxop hittap Namix te hām'äktux, tu tikmū'ūn hittup'ax 'äktux, Topa te' yōg häpkummuk mīy'ax xaxogāhā', yā häp̄xopmā'ax hok hā' tupmāhā', ha' hittup tikmū'ūn, yīy Namix te:

⁷ "Tikmū'ūn kuxa hittup, Topa te 'ūyōg häpkummuk mīy'ax xaxogāhā hah, pu tu kux.

⁸ Tikmū'ūn kuxa hittup, Topa te' yōg häpkummuk mīy'ax mō'kupix 'ohnāg, ha' hittup," kaxīy.

⁹ Pi'yā' tikmū'ūn hittup? 'Ok Yoneo yōg tikmū'ūn puxet hittup? 'Ok pe' puknōg xop hittup kamah? Namix te putep 'äktux? Yā Namix te' hep xop xohix 'äktux, nōm kuxa mām ka'ok xop 'äktux, yīy Topa yōg tappet te xe: "Amanām kuxa yūm ka'ok Topa kopah, yīy Topa te' kuxa tupmāhā', pu tu kuxa max," kaxīy.

¹⁰ Hām 'ūm hā Topa te' tupmāhā'? Pi'yā'? 'Ok pe' Amanām te yāy nāg xex xak 'ūyīmap tu hāmāxap, hak-nāy tu' tupmāhā'? 'Ok pe Topa te' Amanām kuxa tupmā hāmāxap, hak-nāy tu yāy xax xak 'ūyīmap tu'? Yā Topa te' tupmā hāmāxap,

¹¹ hak-nāy tu 'Amanām te yāy xax yīmap tu' xak, puyīy tu yāy kuxa yūm'ax yūmmūgā', yā' kuxa yūm 'ax ha Topa te Amanām putup, tu' kuxa tupmā hāmāxap, pu tu max, yīy 'Amanām te yūmū' hā mōnāȳxop, ha yūmūg kuxa mām ka'ok hā yūmūg kuxa tupmāhā yāy pu', pa yūmūg yāg te yāy xax 'ūyīmap tu' mep hok.

¹² Ha 'Amanām te Yoneo yōg tikmū'ūn hā mōnāȳxop yā kamah, nōm xop kuxa mām ka'ok Topa kopah, tu 'Amanām putuk, Topa yōg putat hā' mōg 'Amanām putuk tu', ha kaxīy 'Amanām kuxa yūm ka'ok hāmāxap, tuk-nāy tu yāy nāg xex yīmāp tu' xak.

Topa te hām'äktux xex

¹³ Topa te 'Amanām pu hām'äktux xex, xix 'Amanām mōkputox pu hām'äktux xex kamah, nūy tu hām xexka hōm'ax 'ōm pu', xī'

mōkputox pu', puyīy yāy yōg nū hām xexkah, ha hām'äktux xex, 'Amanām kuxa yūm ka'ok hah. Teptu hām'äktux xex 'Amanām pu'? 'Ok xex 'ūxat'ax mīy hah? 'Ämhok. Topa mūn te hām'äktux xex hāmāxap, 'Amanām kuxa yūm ka'ok hah, hak-nāy tu 'Amanām te' xat'ax pu' yīpkox xip.

¹⁴ Yoneo yōg tikmū'ūn yīpkox pip Mōyyex yōg xat'ax pu'. Paxpu Topa te hām'äktux xex 'ūyīpkox pip xop pu', puxik-tōgnāg, pu' kuxa mām ka'ok, puxix Topa hām'äktux hitop tu' xex.

¹⁵ 'Ūxat'ax te Topa te hāmyok mīy 'äktux. Tikmū'ūn yīpkox 'ohnāg Topa yōg xat'ax pu', nūy tu häp̄xopmā kummuk, puxix yāy tu Topa gāyāhā', ha Topa te' kummugāp-tup 'ūyānān tu'. Paxpu' xat'ax tu xip hok, puxix tikmū'ūn hāmyūmmūg 'ohnāg, nūy xat'ax pu' yīpkox pi', puxix Topa tu gāy hok kamah.

¹⁶ 'Ūyūmmūg. 'Amanām kuxa yūm ka'ok Topa kopah, yīy Topa te hām'äktux xex xe'e', tu' hok hōm'ax 'Amanām mōkputox pu', nōm xop kuxa mām ka'ok xop pu' hok hōm, nōm te Topa yōg putat hā' mōg, 'Amanām putuk, ha yūmū'ā hā 'ātak, yā yūmūg kuxa kama mām ka'ok.

¹⁷ Ha Topa yōg tappet te: "Ūhēp xop xohix te 'Amanām 'äktux putup, hu: "Amanām yā yūmū'ā hā mōnāȳxop, yā yūmūg kuxa mām ka'ok kamah, 'Amanām putuk," " kaxīy. Yīy Topa te hām'äktux xex ka'ok, ha 'Amanām kuxa yūm ka'ok Topa kopah, yā Topa xexkah, tu tikmū'ūn xakix'ax hīnnāhā', tu hām xexka xohix yōg häp̄xop mīy, tu häp̄xop hok hā' mīy, 'ūxat'ax hā' mīy.

¹⁸ 'Amanām kutut, xī' xetut kutut, 'ūka'ok, tuk-tok 'okpa Topa te ta tu hām'äktux xex, hu: "Ämōkputox xohix xexka pip punethok," kaxīy. Yīy 'Amanām kuxa yūm ka'ok, tu hāmmax hīp, pa' kutut xe'e 'Amanām,

¹⁹ 'ūyōg hāmyāxatamuk xohix te 100, ha' yīn pu'uk, pa' kuxa yūm ka'ok, tu' yīkopit 'ohnāg, 'hā' xetut ka'ok yūmmūg,

²⁰ tu' hittup, tu' kuxa yūm ka'ok, Topa te hām'äktux xex tu', tu nōm pu: "Ämax. Xate 'ā' hōm putup 'ūgkutok pit. Ya hāmūn. Puxi'," kaxīy.

²¹ Tu hāmyūmmūg, hu: "Topa te 'ā' hōm putup 'ūgkutok pit, tu' ka'ok xe'ēgnāg, nūy tu 'ā' hōm," kaxīy.

²² Hu' kuxa yūm ka'ok Topa kopah, ha Topa te' kuxa tupmāhā', pu tu kuxa max.

²³⁻²⁴ Topa yōg tappet te 'Amanām 'äktux, tu yūmū'ā 'äktux kamah, yā Topa te' kuxa mām ka'ok xop xohix kuxa tupmāhā', 'ū tu kuxa max, ha yūmūg kuxa mām ka'ok Topa kopah, nōm te yūmūg xuxyā hīnnāhā' putpu', yā Yeyox Kunnix mūn hīnnāhā',

²⁵ ha te Topa tux hok, pu tikmū'ūn putex, ha yūmūg pupi' xok, nūy yūmūg yōg

hãpxopmã'ax kummuk tu' xok hã' pago, ha Topa te putpu' hinnãhã', nÿy yÿmÿg kuxa kummuk tupmã Topa tu'.

5

Topa te yÿmÿg kuxa kummuk tupmãhã'

¹ Topa te yÿmÿg kuxa kummuk tupmãhã', yÿmÿg kuxa mãm ka'ok hah. Yã Topa gãy kux, ha yÿmÿg kuxa mãm, nÿy tu hittup. Yÿmÿg xuxyã Yeyox Kunnix te yÿmÿg kuxa mãmãhã',

² tu yÿmÿg mÿgãhã', 'ÿmÿg Topa yÿg putat hã. Yã yÿmÿg kuxa mãm ka'ok Kunnix kopah, yÿy Topa te yÿmÿ'ã hãmmãxnãhã', ha Topa yÿg putat hã yÿmÿg mÿg kumak mÿg. Yã yÿmÿg kuxa hittup, 'ÿhã' mãm ka'ok, tu hãmmax hip, nÿy yãyhã tu max xe'ëgnãg, Topa putuk.

³ Yÿmÿ'ãte' hip kamah, 'ÿhã yÿmÿg xÿy, pãyãk kuxa hittup, 'ÿhãk xÿy kamah. Yã kaxÿy yÿmÿg xÿy hã' tot.

⁴ Yÿmÿ'ãte nõã' tot, ha Topa te' pënãhã', tu yÿmÿg putup, yÿy yÿmÿ'ãte hãmmax hip, nÿy yãyhã Topa putuk.

⁵ Yÿmÿg kuxa teknÿg 'ohnãg, yã Topa te hãm'ãktux, tute mÿ yÿmÿg yãy xe'ëgnãg 'ãktux, ha Topa Koxuk te yÿmÿg kuxa yÿmÿgãhã', tu Topa te mÿ yÿmÿg yãy xe'ëgnãg yÿmÿgãhã', ha Topa te yãy Koxuk nõ'kutnãhã yÿmÿ'ã', yÿy hãmmax hip.

⁶ Hõmã yÿmÿ'ãte Topa hãk puknÿg, tu hãpxopmã max hok, ha Kunnix xok, yÿmÿg pupi' xok, yÿmÿg kuxa kummuk, yÿ' xok, ha Topa te 'ãmnÿy puxet yãykutnãhã', ha Kunnix xok nõ'õm 'ãmnÿy 'ÿhã', nÿy yÿmÿg kuxa ka'ogã', 'ÿyÿy yÿmÿg hãpxopmã max.

⁷ Tikmÿ'ÿn 'ÿm te' nõy pupi' xok'ax? 'Ok tik te hãmyok mÿy pupi' xok'ax? Yã' ka'ok, nÿy nõy yãnãn tu' xok, pa tikmÿ'ÿn kutÿgnãg te ÿk max 'ÿyãnãn tu' xok'ax.

⁸ Pa Topa te mÿ yÿmÿg yãy xe'ëgnãg, tu yÿmÿg yÿmÿgãhã', yã Kunnix te yÿmÿg pupi' xok tap, 'ÿhã yÿmÿg kummuk nãm!

⁹ Ha' xok, nÿy yÿmÿg kuxa kummuk tupmã', pu tu kuxa max, puyÿy Topa gãy kuxyã yÿmÿg pupi'.

¹⁰ Hõmã Topa te yÿmÿ'ã tu' gãy, pa Topaktok xok, nÿy yÿmÿg kuxa kummuk xit, nÿy kuxa max tat 'ÿyãnãn tu', ha hõnhã Topa te yÿmÿ'ã hãk xape', ha Kunnix hi putpu', tu yÿmÿg kopa' xip.

¹¹ Yÿmÿg kuxa hittup xe'e', yã Topa yÿmÿ'ã hãk xape, xix Yeyox Kunnix te yÿmÿg kuxa hittupmãhã', yã yÿmÿg xuxyã', tu Topa gãy kuxyãhã', yÿy Topa hã yÿmÿg xape'.

'Anão xix Kunnix

¹² Tik te mãxap puxet te hãpxopmã kummuk hãm xexka tu', hu' xok, hãpxopmã kummuk tu' xok, yÿ' hep xop xohix xakix'ax, 'ÿxohix te hãpxopmã kummuk tu'.

¹³ Hõmã, hãmyãxatamuk xohixnãg hã, 'ap xip'ah Topa yÿg xat'ax, ha' hep xop xohix te hãpxopmã kummuk, pãyã Topa te hãpxopmã'ax kummuk mÿ'kupix 'ohnãg, yã tikmÿ'ÿn te' yÿg xat'ax yÿmÿg hok.

¹⁴ Mõnãyxop hãmãxap 'Anão 'a' yÿpkox pip'ah 'ÿxat'ax pu', tu hãpkummuk mÿy, ha' hep xop xohix te hãpxopmã kummuk, hu' xakix nãm, 'ÿhã 'Anão xip hãpxexka tu', ha' xohix xakix, tu mÿktu mõnãyxop hittap Mÿyyex xip, nõm te Topa yÿg xat'ax kax'ãmi', yã' xohix xakix.

'Anão yã tikmÿ'ÿn kummuk hã mõnãyxop hãmãxap, ha Yeyox Kunnix 'ÿk-nãy tu' nÿn, nõy yãyhã tikmÿ'ÿn kuxa tup xop hã mõnãyxop.

¹⁵ 'ÿyÿmÿg. Topa te hãmmax nãhã', pãyãp-xet'ah. Topa te hãmhok hã' hãmmaxnãhã', pa 'Anão te hãpkummugãhã'. Ya hamÿn. 'ÿhep xop xohix xakix, 'Anão te hãpkummuk mÿy, ha' xakix, pa Topa mÿn max xe'ëgnãg, tu hãmmaxnãhã hãmhok hã', tu tikmÿ'ÿn kuxa kummuk xit, Yeyox xok hã' xit, nÿy kuxa max 'ÿyãnãn tu' tat, Yeyox Kunnix te tikmÿ'ÿn mÿ'yãy xe'ëgnãg hah.

¹⁶ 'ÿyÿmÿg. Tik puxet te hãpkummuk mÿy, ha Topa gãy, tu: "Yã' kummuk 'õhõm!" kaxÿy. Pa Topa te hãpkummuk mÿy'ax xop pu hãmmaxnãhã', 'ÿhok hã hãmmax nãhã', tu hãpkummuk mÿy'ax xexka xaxogãhã', tu' kuxa kummuk xit, 'ÿhok hã' xit, nÿy kuxa max tat tu' yãnãn.

¹⁷ Hamÿn. Tik puxet te hãpkummuk mÿy, yÿ' hep xop xohix xakix'ax. Yã hãpxopmã xexkah, tu' xohix pu hãpkummugãhã'. Pa tik nõy te hãpxopmã xexka xe'ëgnãg, 'ÿxuxet'ax Yeyox Kunnix, tu hãmmax xexka nãhã' 'ÿxohix pu', nõm xop kuxa mãm ka'ok Yeyox kopa' xop pu hãmmaxnãhã', ha Topa te' kuxa kummuk tupmãhã', pu tu kuxa max, ha Kunnix te yÿmÿ'ã xexkãnãp-tup, 'ÿyÿy nÿ mÿtik yÿmÿg hi xe'ëgnãg, nÿy hi mÿkumak mÿg.

¹⁸ Tik puxet te hãpkummuk mÿy, yÿ' hep xop xohix xakix'ax, ha hãpxopmã'ax max puxet nõy te' xohix kuxa tupmãhã', tu' hinnãhã'.

¹⁹ Tik puxet te' hep xop xohix pu hãpkummugãhã', tu Topa pu' yÿpkox xip 'ohnãg, hu yãy putox xop xohix pu hãpkummugãhã', yã' hep xop xohix te hãpkummuk mÿy kamah. Pãyã tik puxet nõy te' xohix pu hãmmaxnãhã', tu' yÿpkox xip Topa pu', hu hãmmaxnãhã', tu' kuxa kummuk tupmãhã'.

²⁰ Topa te' xat'ax hõm, nÿy hãpkummuk yÿmÿgã', ha hãpxopmã'ax kummuk te' nõy nã' mÿg tu mÿktu yã' xohix, pa Topa te hãpxopmã hok hã hãmmaxnãhã', tu nõy nã' mÿg tu mÿktu xohix xexkah.

²¹ Hõmã tikmÿ'ÿn te hãpxopmã kummuk, ha' kuxa hÿy ka'ok, pa hõnhã Topa te

hämmaxnähä', tu' hok hä tikmü'ün kuxa kummuk tupmähä', pu tu max, puyiy hämyok mīy, nūy tu hi xe'ēgnäg mō kuma' yümüg xuxyā mütik, nūy Yeyox Kunnix mütik häpxopmā'ax xohix xat.

6

Kunnix tek müg kuxa tupmähä'

¹ Yümü'ätep-tep 'äktux'ax? 'Ok max, yümüg häpxopmā kummuk pax, puyiy Topa hämmaxnä xexka'?

² Ämhok! Kaxiy hok! Yä yümüg kuxa mām ka'ok Yeyox kopah, ha Topa te yümüg kuxa kummuk tupmähä', pu tu kuxa tup, nūy häpxopmā kummuk putup hok, nūy xuxyā'. Tikmü'ün xok, tu häpxopmā kux, ha kaxiy yümü'äte häpxopmā kummuk tu kux kamah,

³ Yümüg kuxap-xet Yeyox Kunnix kuxa mütik nūy. Yä yümüg pupi' xok, 'üyiy yümüg häpxopmā kummuk tu kux, ha tikmü'ün te yümüg putox pix, puyi' xohix hämyümmüg. Yä Kunnix xok yümüg pupi', pu yümüg kuxap-xet yäy kuxa mütik.

⁴ Yeyox Kunnix xok, ha nō häpkot yümüg pupi kamah, pu yümü yög häpxopmā'ax kummuk xaxogä'. Ha yümüg putox pix, nūy yümü'ä hämyümmügä', 'üyiy häpkummuk mīy kux. Ha Topa yümüg Tak te Kunnix putpu hīnnähä', tu yümüg ka'ogähä kamah, 'üyiy yümüg hi xe'e Yeyox mütik, nūy tu häpxopmā max.

⁵ Yä Kunnix xok, yümüg pupi' xok, 'üyiy yümü'ä häpxopmā kummuk tu kux, ha' putpu' hi yümüg pupi kamah, 'üyiy yümüg hi xe'e'.

⁶ Tu hämyümmüg. Hōmä yümü'äte häpxopmā kummuk, tu' mīy pax, pa Kunnix te mīpkupnix yimü tu' xok, yümüg pupi' xok, nūy yümüg kuxa tupmā', pu häpkummuk yümüg kuxa hīy hok, pu yümü'ä häpxopmā kummuk tu kux, nūy yānān tu häpxopmā max.

⁷ Tikmü'ün xok, tu häpkummuk mīy kux.

⁸ Kunnix xok yümüg pupi', 'üyiy häpkummuk mīy tu kux, tu' putpu' hi yümüg pupi kamah, 'üyiy hi mō'kumak mōg yäy mütik.

⁹ 'Üyümmüg. Topa te Kunnix hīnnähä' putpu', yiy xe xok putup 'ohnäg. Yä Topa te' hīnnähä', pu tu hi mō'kuma' mōg.

¹⁰ Yä' xok, ha häpkummuk mī'ax xop te xe Kunnix putex 'ohnäg, 'ap xep xok putup'ah, pa Topa tu' hi xe'ēgnäg.

¹¹ Yä Kunnix xok 'äxop pupi', nūy 'ög kummuk mīy'ax kuxyā'. 'Üxaxok hok! Hōnhä Kunnix hi xe'e Topa tu', ha 'äxap-xet Yeyox Kunnix kuxa mütik, nūy Topa tu 'ähi xe'e kamah.

¹² Häpkummuk mīy hok, xix yäy putup'ax mīy hok, xayiy yäy kummugä hok.

¹³ Topap-xehnäg pu 'ṭpkox pi', pu tu 'äxat. Yä xa hämmaxnä xexka! Tu 'ähīnnähä', ha Topa tu 'ähi', nūy hämyok mīy, yiy 'änöy pu 'äyīpkox hok, xayiy häpkummuk mīy hok.

¹⁴ Tikmü'ün kummuk pu 'äyīpkox hok. Yä yümüg xat hok. Pa Topa te yümüg hīnnähä', 'ap xat'ax te yümüg hīnnä'ah, pa Topa te yümü'ä hämmaxnähä', tu' hok hä' nähä', ha yümüg hi xe'ēgnäg.

Yümü'ä Topa hä kāmānat xop

¹⁵ Mōyyex yög xat'ax tap, ha Topap-xehnäg te nōmhä yümüg xat, tu yümü'ä hämmaxnähä'. 'Äxop te-putep pe'äpaxex? 'Ok Topa te yümüg kuxa tupmähä', 'üyiy yümüg häpkummuk mīy? 'Ap hamün'ah! Yāmhok!

¹⁶ 'Äxop te hämyümmüg. Tik te' nōy pu' hām, puxix yā' nōy yög kāmānat, tu' yīpkox pip, tu hām'āpak, nūy tu hām max. Ha kaxiy tikmü'ün te Topa pu' yīpkox pip, tu Topa hä 'üyög kāmānat, ha nōm pu hämmaxnähä', tu' kuxa kummuk tupmähä', pu tu kuxa max. Pāyā tikmü'ün yīpkox hok, puxix tu häpxopmā kummuk, tu yäy kuxa tupmā hok. Yiy Topa te nōm putup nōg, 'ükuxa kummuk hah. Yä yäy kummugähä'.

¹⁷ Nū mōy Topa pu hām'äktux, nūy: "Ämax Topah!" kaxiy. Yä hōmä 'äxop te häpxopmā kummuk, pāyā hōnhä Topa pu 'äyīpkox pip, hām'āpak max 'āpak'ax tu', ha tikmü'ün te xa hämyümmügähä', tu xa häpxe'e yümügähä', yiy 'äkuxa tep-tup, tu' hittup xexka'.

¹⁸ Hōmä 'äkuxa hittup 'ohnäg, häpxopmā kummuk tu', pāyā nōmhä Topa yög putat hä 'ämög, nūy häpxopmā max, nūy Topa yög putup'ax mäynäg mīy, hu 'äkuxa hittup xexka'.

¹⁹ 'A 'äxop te hämyümmüg'ah, yiy 'äte hām'äktux'ax hä xa hämyümmüg'äp-tup. Hōmä 'äxop te' xak, nūy häpkummuk mīy, tu' mīy pax, tu 'änöy hä'xupxet, tu 'änöy kummugä pax, Hu mōy, hōnhä xax, nūy Topap-xehnäg pu häpxopmā max, xayiy 'ähi xe'e', xayiy 'änöy pu hämmaxnä'.

²⁰ Hōmä 'äxop te häpxopmā kummuk pax, tu Topa pu 'äyīpkox 'ohnäg.

²¹ Näy 'üxutigä', nūy 'ög häpxopmā'ax kummuk pe'äpaxeh. 'Ok 'ähittup, 'Ihä hämpe'äpaxex? 'Ok pe xate yäyhähup? Yä xate yäyhähup, häpxopmā kummuk tu'. Hōmä 'äkuxa hittup 'ohnäg, yä Hämgyäygnäg Pet ha 'ämög'ax.

²² Pa Topa te 'äkuxa ka', tu 'äkuxa kummuk tupmähä', xa kuxa max, nūy Topap-xehnäg pu 'äxop häpxopmā max, nūy 'ähi xe'ēgnäg mō kuma'ämög.

²³ Tikmü'ün te häpxop kummuk hä yäy kummugähä 'üyānān tu', nūy pago, hu ta xakix. Pa Topa te hämmaxnähä', 'ühok hä hämmaxnähä', nūy tikmü'ün hīnnä xe'ēgnäg. Yeyox Kunnix xok hä' hīnnähä', nō'öm

yümüg xuxyā xe'e', ha yümüg kuxap-xet Kunnix kuxa mütik.

7

Paot te yäyta'ax xop hä hämyümmügähä'

¹ 'Ükxape xop, 'äxop xohix te' xat'ax yümüg, hu häm'äktux yümüg kamah yögnü'. 'Üxat'ax yā' xat tikmü'ün xohix, ha ta' xakix xop 'ap xat'ah.

² 'Üyümüg. 'Ün yäytaha', ha' xat'ax te 'ügmü ka'ok, tu' yīpxox müggā ka'ok, pa' yīpxox xok, puxix 'ühīy'ax koa', ha ta' nīm, tu' hok yüm.

³ Kaxiy, 'ün te tik nōy mütik nōm 'ihā' yīpxox xip, puxix tikmü'ün te: "Yā 'ün kummuk, tu' nōy hä' xupxet," kaxiy. Pa 'ün yīpxox xok, puxix tup-xehnāg, nūy hok yüm, tu nōm pu' yīpxox xip kux, yā' max, 'ün te tik nōy müy, nūy nū mütik yäytax.

⁴ 'Ükxape xop, yā kaxiy 'äxop te 'ähok pip xop putuk. Yā Kunnix xok 'ihā Möyyex yög xat'ax pu 'äyīpxox kux, nūy hōnhā Kunnixp-xet pu 'äyīpxox pi'. Yā 'äxop te Kunnix hä' yīn xexka', tu yā hōnhā 'üyög, ha putpu' hi', 'üyiy yümüg häpxopmä max Topa pu'.

⁵ Hōmā yümü'äte häpxopmähä', tu yā yāy yög putup'ax xohix mīy, tikmü'ün xop xohix putuk, yümü'äte' mīy, ha' xat'ax te häpkummuk mīy xat hok, 'ümīy hok, hu häpkummuk mīy putup xūy, tu mōktu yümüg xakix.

⁶ Pa hōnhā yümüg hok pip, ha yümüg hīy'ax koa', yümüg hok pip, nūy Topap-xehnāg pu häpxopmä max. Topa Koxuk te yümüg hīnnāhā xe'e', tu yümüg putox kummuk tupmāhā, ha' xat'ax hittap te yümüg xat kux.

⁷ Yümü'ätep-tep 'äktux'ax? 'Ok xat'ax kummuk? 'Ämhok! Yā' max, päyā' xat'ax tek mün pu hämyümmügähä', 'ü yümüg, 'ok pe' max, 'ok pe' kummuk. 'Üxat'ax tek xat hok, 'üyiy häpxop putup xūy hok. Paxpuk xat hok, kopxix häpxop putup xūy hok, pa hōnhā 'äte hämyümmüg, hu häpxop putup xūy xe'e'.

⁸ Yī' xat'ax tek xat, 'üyiy tuk nōy yög häpxop putup xūy hok, hu 'äte häpxop putup xūy. Pax puk xat hok, kopxix Topa yög hämpe'paxex yümüg hok, xix yāy yög häpxopmä'ax kummuk yümüg hok. Yā Topa pa te hämyümmüg xe'ēgnāg, hu' xat, 'üyiy häpxopmä max.

⁹ Hōmā 'äte' xat'ax yümüg 'ohnāg, tu hämpe'paxex, hu: "Yā 'äte häpxopmä max," kaxiy. Pa Topa tek xat, 'üyiy häpkummuk mīy hok, ha 'äte' xupak, tu hämyümmüg, tu yāy kuxa kummuk yümüg,

¹⁰ hu yāy kuxa tu teknög. Yā Topa te' xat'ax hōm, puīy tikmü'ün hīnnā', pak yümügähä', 'ü yümü yāy yög häpxopmä'ax kummuk.

¹¹ 'Äte häpkummuk mīy, hu yāy pu mō'āmā', tu yāy mün max pek'paxex, päyā' koit. Hu 'äte yāy kuxa putex, tu: "'Äte Topa yög xat'ax mīy hok." Kaxiy.

¹² Yā Topa yög xat'ax max xe'ēgnāg, tu häpxe'e'.

¹³ Tepte xiy? 'Ok häpxop max tek kummügähä'? 'Ämhok! Päyā 'äte häpkummuk mīy, ha Topa yög xat'ax max, tu yögnü häpxopmä'ax kopit, nūy 'ügmü yümügä', yā 'äte häpkummuk mīy xe'e'.

Tikmü'ün kuxa te yāy tuk-mīy

¹⁴ Yümü'äte hämyümmüg. 'Üxat'ax yā Topa yög, hak mün pu'uk, hu häpxopmä kummuk pax, tu häpxopmä kummuk mō kumak mōg.

¹⁵ 'İntu'. 'Äte häpxopmä maxp-tup, päyā 'ap mīy'ah, tu häpxopmä kummuk putup nōg, päyā 'ümīy.

¹⁶ Tu häpxopmä kummuk, 'ihā nōm putup nōg, kopxix: Yā hamün. Topa yög xat'ax max xe'e'. Kaxiy.

¹⁷ 'Ak mün te' mīy'ah, päyā häpkummuk tek kuxa kopa' xip mün te' mīy.

¹⁸ 'Äte' xak, nūy häpxopmä max, päyā 'a' mīy yümüg'ah 'äte', 'ügxuxa kummuk tu'.

¹⁹ Tu' xak, nūy häpxopmä max, päyā 'a' mīy'ah, tu' yānān tu häpxopmä kummuk.

²⁰ 'A' äte häpkummuk mīy putup'ah, päyā' mīy, yīy häpkummuk tek kuxa kopa' xip tek kummügähä',

²¹ yīy 'äte hämyümmüg. 'Äte häpxopmä max putup, 'ihā häpxopmä kummuk 'üp-xehnāg.

²² 'Ügxuxa te Topa yög xat'ax hä' hittup,

²³ päyā 'äte häpkummuk mīy pax, 'ügxuxa kummuk tu'. Tu häpxopmä max xak, päyāg kuxa kummuk tuk hīy, 'ü häpxopmä max hok.

²⁴ Huk hittup 'ohnāg. 'Ü 'üm mün tek ka'ogā'ax, 'äte häpxopmä max?

²⁵ Topa tek ka'ogāp-tup, yīy 'äte: "Topa 'āmax," kaxiy. Yā Yeyox Kunnix te 'ü 'üm hä 'ätehet.

Kaxiy 'ügxuxa kopa 'äte' xak, nūy Topa yög xat'ax 'ügyīpxox xihīp, nūy 'ügmāynāg mīy, päyā 'äte' mīy yümüg'ah, hu häpkummuk mīy pax.

8

Topa Koxuk tek müg ka'ogähä'

¹ Topa te yümüg kummuk 'üm 'äktux'ah nōmhā, yā yümüg kuxap-xet Yeyox Kunnix kuxa mütik, ha Topa te yümüg 'üm 'äktux kummuk 'ohnāg Yeyox Kunnix hah.

² Topa Koxuk te yümüg hīnnā xe'e' Yeyox Kunnix mütik, tu yümüg mōy, pu' xat'ax yümüg kuxa hīy hok, 'üyiy yümüg häpkummuk mīy hok, nūy yümüg xakix hok kamah.

³ 'Üxat'ax te yümüg 'üm kuxa tupmā'ah. Yümü'äte yāy putup'ax mīy, yīy häpxopmä

kummuk pax, pa Topa ka'ok, tu yümüg kuxa tupmähä', pu tu kuxa max, tu häpxopmä'ax kummuk 'äktux kummuk kamah, huk-tok pit nü'kutnähä', ha yäyhä tikmü'ün kutok nüy häpkummuk kuxyā',

⁴ 'üyiy yümüg häpxopmä max, nüy tu' xat'ax xohix pu yümüg yīpkox pi', yā' xat'ax max xe'e'. Ha Topa Koxuk te yümüg ka'ogähä', 'üyiy yāy putup'ax mīy hok.

⁵ Tikmü'ün te yāy putup'ax mīy, puxix tute häpkummuk mīy, pa tikmü'ün te Topa Koxuk pu' yīpkox pip, puxix tu häpxopmä max, Topa Koxuk pekpaxex tu'.

⁶ Tikmü'ün te yāy putup'ax mīy, puxix tu xaxix, hämpe'paxex kummuk tu', pa tikmü'ün te Topa Koxuk pu' yīpkox pip, nüy häpxopmä max, puxix tu hi xe'e', tu' kuxa mām max, Topa Koxuk pe'paxex tu'.

⁷ Yiy tikmü'ün gāy, tu Topap-tup nüy, nüy yāy putup'ax mīy, tu yā hämpe'paxex kummuk, tu Topa yög xat'ax pu' yīpkox 'ohnäg, tu' mīy 'ap yümmüg'ah,

⁸ yiy Topa te nöm xop putup hok, nöm te yāy putup'ax mīy pax.

⁹ Pa 'äxop te yāy putup'ax mīy 'ohnäg. 'Ämhok. 'Äxop te Topa Koxuk pu 'äyīpkox pip. 'Äxop te nöm pu 'äyīpkox pi', puxix Topa Koxuk 'äkopa xip. Tikmü'ün te Kunnix Koxuk xip hok, puxix Kunnix yög hok.

¹⁰ Kunnix te 'äkopa' xip, puxix Topa Koxuk 'ähinnä', Topa te 'äkuxa tupmähä hah, pa 'äyīn xok putup, xate häpkummuk mīy pax hah.

¹¹ Topa Koxuk te Yeyox Kunnix hīnnähä' putpu', tu 'äkopa' xip, yiy kamah hīnnäp-tup putpu' äxop yīn, yā hōnhä' xip 'äkopah.

¹² 'Ükxape xop: Yä Topa te yümü'ä hämmxnähä', yiy yümü'äte tu ta nemēn. 'Äpu yümü'ä yāy yög putup'ax mīy hok.

¹³ 'Äxop te' mīy, hu ta xok, pa Topa Koxuk pu 'äyīpkox pip, hu ta yā hi xe'ëgnäg.

¹⁴ Tikmü'ün te Topa Koxuk pu' yīpkox pip, yā 'öhöm Topak-tok xe'ëgnäg.

¹⁵ Yä Topa Koxuk te 'äkuxa kummugä 'ohnäg, pa' hittupmähä', nüy tu kuxänög hok. 'Üyümmüg. Yümü'äte yāyhä Topak-tok xop, pu yümüg ka'ogä', 'üyiy Topa pu hām'äktux, hu: "Tak, yögnü 'Ätak!" kaxīy.

¹⁶ Ha Topa Koxuk te yümüg koxuk pu hām'äktux, nüy yümü'ä Topak-tok xop 'äktux.

¹⁷ Yümüg yā Topak-tok xop, hu pexkox yög häpxop max xohix pop putup, Topa te nöm xex yāy yög tikmü'ün pu', ha yümü'äte' pop putup Kunnix mütik. Yä Topa te nöm häpxop max xex Kunnix pu', tu pexkox kopa' xex, ha yümü'äte häpxop mö'koxip putup Kunnix mütik. Nöm mütik yümüg xūy, kopxix yümüg yāyhä max xe'ëgnäg Kunnix putuk.

Yümü'äte yāyhäp-tup max xe'ëgnäg

¹⁸ 'Äte hämpe'paxex, hu: Yümüg xūy kutögnäg nōmhä, tuk kuxa hittup xe'ëgnäg putup hōmä, 'ihä häptup xe'e nöy punethok mö'nähä', 'ihä yümüg yāyhäp-tup max xe'ëgnäg.

¹⁹ Topa te yōnnä'ī xohix mīy, ha' hip, tu' xak, pu Topa nöm tu yāy yög kutok xop müg.

²⁰ Hōmä häpxopmä'ax xohix yāyhä hitop, Topa tep-tup hah, ha hämmax hip,

²¹ puyiy Topa tux hok, pu tik-tox hok, 'ü yāyhä max xe'ëgnäg, Topak-tok xop xohix mütik.

²² Yümü'äte hämyümmüg, nöm yōnnä'ī xop tu' kokōn, tu' xūy, 'ün tek-tok put putup, tu' xūy, tu' kokōn, ha kaxīy yōnnä'ī xohix xūy pu Topa' hittupmä'.

²³ Pāyā' hok pip'ah. 'Ämhok. Yä yümü'äte kopa yā' kokōn kamah, ha Topa te yümü'ä yāy Koxuk hok hōm hāmāxap, ha' hip, nüy yümüg yāyhä Topak-tok xop, yā yümüg tupmähä, 'üyiy yümüg tup mö'kumak mög.

²⁴ Yä yümüg kuxa tupmähä', yümüg kuxa mām ka'ok ha' tupmähä', ha yümü'äte hämmax hip. 'A hōnhä yümü'äte' pēnā'ah, tuk kuxa mām ka'ok, hu hämyümmüg, yā yümü'äte' pēnāp-tup. Pax pu tikmü'ün hämpēnā', puxi' hip 'ohnäg.

²⁵ Pa tikmü'ün te' pēnā hok, puxix tu kuxa mām ka'ok, tu hämmax hip, puyiy Topa 'ā' mīy.

²⁶ Ha Topa Koxuk te mö yümüg nīynām, yümüg kuxa pu'uk hah. Ha yümü'äte Topa mütik hām'äktux yümmüg'ah, yiy Topa Koxuk te Topa tu ta tu' xak, yümüg pupi tu' xak, 'ükokōn 'ihä yümüg pupi' xak, nüy 'üyiy hok hä hām'äktux, nüy Topa pu hām'äktux.

²⁷ Ha Topa te tikmü'ün kuxa kopa pēnähä', tu yāy Koxuk pe'paxex tu' yümüg, ha yāy Koxuk xe'ëgnäg te Topa tu' xak, yāy yög tikmü'ün pupi' xak, tu Topa yög putup'ax yümmüg.

²⁸ Topa te yümü'ä hämmaxnähä', tu hämmaxnäp-tup mö'kuma' mög, tu häpxopmä'ax xohix hä yümü'ä hämmaxnähä'. Yä yümü'äte Topap-tup pax xexka', yümüg yimögatux hah, tu yümüg xānähä', mö yümüg yāy xe'ëgnäg tu', ha yümü'äte' yümmüg, hu yümüg kuxa mām.

²⁹ Topa te yümüg yimögatux tap, tu yāy pu yümüg pop, 'ü yümüg yāyhä 'ähä tuk-tok putuk, pu Kunnix yā māxap, ha yümüg xohix yā nöm mö nü kuhmöy.

³⁰ Ha Topa te yāy pu yümüg pop tap, xix yümüg xānähä', xix yümüg kuxa tupmähä', pu tu kuxa max, 'üyiy yümüg yāyhä max xe'ëgnäg, Kunnix putuk.

Topa te mö yümüg yāy xe'ëgnäg Yeyox Kunnix hä

³¹ Hamün, yiy yümü'ätep-tep 'äktux'ax? Topa te yümü mütik tihi', yiy tikmü'ün kummuk te hitop tu yümü'ä häpkummugähä'.

³² Topa te yāy kutok pit puxet kumīy 'ohnāg, pa yūmū'ā' hōm. 'Ūk-tok hōm yūmū'ā', puxix tu hāp̄xop xohix yūmū'ā' hok popmāp-tup kamah.

³³ Topa te yāy yōg tikmū'ūn yīmōgatux. 'Ok tik 'ūm xip, nūy 'ūkummuk 'āktux? 'Ap tik 'ūm xip'ah, yā Topa mūn te' kuxa tupmāhā', pu tu kuxa max.

³⁴ Yīy tikmū'ūn 'ūm 'a' kummuk 'āktux'ah. Kunnix xok, yā putpu' hi', tu Topa yīpxe'e hā' xip, tu yūmūg pupi Topa tu ta tu' xak,

³⁵ tu mō yūmūg yāy xe'ēgnāg. 'Ap tikmū'ūn 'ūm xip'ah, xix hāp̄xopmā'ax 'ūm xip'ah, nūy Topa pu' hupmā hok, puyīy Topa yūmūg putup hok. Yūmūg xūy xix hāp̄xop xak'ax tat punethok, xix tikmū'ūn te yūmūg xūyghā', ha putup te yūmūg kix, ha topixxax 'ūm yūmūg xip hok, xix tikmū'ūn kummuk te' xak, nūy yūmūg kix, puxix Kunnix mūn mō yūmūg yāy xe'ēgnāg, tu yūmūg nīm 'ohnāg.

³⁶ Topa yōg tappet te: "Āmniy xohix hā tikmū'ūn te yūmūg putup nōg, tu yūmūg kix putup, yūmū'ā yā Topa hā tikmū'ūn hah. Tikmū'ūn te kahnēn mōgāhā', nūy putex, ha taxīy yūmūg mōgāhā', nūy yūmūg kix," kaxīy.

³⁷ Pāyā tute yūmūg nōā hok, Yeyox Kunnix te mō yūmūg yāy xe'ēgnāg hah, yīy yūmūg kuxa hittup xexka', 'Thā pexkox ha yūmūg mōg kumak mōg.

³⁸ Yīy 'āte hāmyūmmūg. Kunnix te mō yūmūg yāy xe'ēgnāg, tu yūmūg nīm 'ohnāg. Pe yūmūg hi', pe yūmūg xakix, puxix Kunnix yūmūg nīm hok. Pexkox yōg xop xix yāmīy xop te yūmūg nīmā hok, ha hōnhā Kunnix te yūmūg mūtīk tihī', tu hāptup hā yūmūg mūtīk hi putup, xix hāptup nōy xohix hā Kunnix te yūmūg 'ūm nīm putup'ah, mō yūmūg yāy xe'ēgnāg tu'.

³⁹ Yā pexkox yōg xop te Kunnix nīmāp-tup hok yūmū'ā', xix hām xexka xix hām kaka' pip xop te yūmū'ā nīmāp-tup hok kamah. 'Ap xip'ah hāp̄xopmā'ax te Topa pu hupmāhā', puyīy yūmūg nīm, ha mō yūmūg yāy xe'ēgnāg, yūmūg xuxyā Yeyox Kunnix hā Topa te mō yūmūg yāy xe'ēgnāg.

9

Topa xix yāy yōg tikmū'ūn

¹ 'Āte xa hāpxe'e 'āktux: 'Ūgmūn yā Kunnix yōg, hu 'ap koi't'ah. Topa Koxuk tek kopa' xip, tuk kuxa pu hāmyūmmūgāhā', tu: "A xatep koi't'ah," kaxīy.

² 'Ūgkuxa hittup 'ohnāg, yāk kuxa xūy, 'Thā 'āte yāy yōg tikmū'ūn pe'paxex. Yāk xape xe'e Yoneo yōg tikmū'ūn, 'ūgmūg hep puxet tu'.

³ 'Āte hām'āktux'ax hu: Pūyā Topa 'ūgkummūgā', nūy 'ūkxape hā hāmmaxnā'! Tu xe hām'āktux'ax, hu: Pūyā Kunnix 'ūgnīm, nūy tuk xape mō'nīynām 'ūyānān tu'.

⁴ Nō'ōm yā Topa yōg tikmū'ūn, ha' yīmōgatux, pu Topa hāk-tok xop, ha Topa te' xexkanāhā', yāy mūtīk, tu' pa'ax mīy nōm xop mūtīk, tu tu' xat'ax hōm. Yā 'ōm te Topa xak, tu' yēy Topa keppah, ha Topa te nō'ōm mūtīk hām'āktux xex.

⁵ Ha mōnāy xop hittap mōkputox, ha Kunnix mūn kama mōnāy xop hā mōkputox. Pūyā' xohix Topa xexka 'āktux mō kuma' mōg, 'ūxexka xe'ēgnāg hah. Hamūn.

⁶ Pa 'a Topa te hām'āktux hitop tu' xex'ah. 'Āmhok. 'Ap kaxīy'ah, pāyā 'Iyaet yōg tikmū'ūn xohix 'a Topa yōg'ah. 'Āmhok. Topa te 'a xohix yīmōgatux'ah.

⁷ Yā Mōnāy xop hittap nām 'Amanām mōkputox, pāyā' yāg Topa hā yāy kutok xop. 'Ap xohix'ah. Yīy hōmā Topa te 'Amanām pu hām'āktux, hu: "Āk-tok 'Iyak mōkputox yā 'āmōkputox xe'e', 'ap nōy xop 'ūm 'āmōkputox'ah. Yā' puknōg," kaxīy.

⁸ Yīy Topa te 'Amanām mōkputox xohix 'ap putup'ah, pa hām'āktux xex 'Amanām mūtīk hu: "Āk-tok 'Iyak mōkputox, nō'ōm 'āmōkputox xe'e', 'āte xa hām'āktux xex hah," kaxīy.

⁹ Tu hām'āktux xex, hu: "Hāpxip 'Thā' put-puk nūn'ax, ha 'āxetut Xat tek-tok put putup," kaxīy.

¹⁰ Ha 'Iyak xetut Hemek, tuk-tok pit 2 pop, ha' tak 'Iyak' ūp-xet,

¹¹⁻¹² pa Topa tek-tok puxet yāy kūtānā tap, hak-tok 2 te' tut tex kopa tihī', 'Thā Topa te' tut pu hām'āktux, hu: "Āk-tok hāmāxap te' taknōy pu' hām putup, tu' taknōy 'ūk-nāy tu' nāhā pu' hām putup," kaxīy. Pa Topa te hām'āktux, 'Thāk-tok 2 te' tut tex kopa' tihī', tu hāp̄xopmā 'ohnāg, pe' māx, pe' kummuk, pa Topa te' yāy kūtānā tap,

¹³ yīy Topa yōg tappet te: "Āte Yako putup pax, tu 'Eyao putup nōg," kaxīy.

¹⁴ Yūmū'āte putep 'āktux'ax? 'Ok Topa te hāp̄xopmā kohe'? 'Āmhok.

¹⁵ Tu Mōnāy xop Mōyeyex pu hām'āktux, hu: "Ātep-tup, nūy tikmū'ūn 'ūm kuxa ka', kopxi' kuxa ka'. Yā puxi'," kaxīy.

¹⁶ 'Ūyūmmūg. Topa te nōm tikmū'ūn kuxa ka', 'ok pe tikmū'ūn tep-tup, 'ok pep-tup hok, 'ok pe tikmū'ūn te hāp̄xopmāhā', pe hāp̄xopmā hok, pāyā Topa te' kuxa ka'.

¹⁷ Topa yōg tappet te Pana'o hittap 'āktux, ha Topa te nōm pu hām'āktux, hu: "Āte 'āxexkanāhā', nūy xa hāmyūmmūgā', xayīy 'ūgmūn ka'ok yūmmūg, puyīy hām xexka xohix yōg tikmū'ūn tek xuxet'ax yūmmūg," kaxīy.

¹⁸ Yīy Topa tep-tup, nūy tikmū'ūn kuxa ka', puxi' kuxa ka', tup-tup, nūy tikmū'ūn nōy kuxa māmā hok, puxi' mām 'ohnāg.

Topa te tikmū'ūn kuxa ka', tu hāpkummuk hā' yānān kamah

19 Pa tikmü'ün te: “Ok Topa te hāpkohe mīy, Ihā tikmü'ün kummuk 'āktux? Topa te tikmü'ün kuxa māmā hok, puxix tikmü'ün kuxa mām 'ohnāg, Topa mūn tep-tup hah,” kaxīy.

20 Nāy. Yāy pe'āpaxex xexka hok. 'Āk-tōgnāg, ha Topa mūn xexka xe'ēgnāg. Xate putōy putuk, nōm hā tikmü'ün te nax mīy. Pax pu putōy te: “Tep tu xāhā nax?” kaxīy.

21 Nāy. Tikmü'ün te putōy hā nax mīy, yā hāmyok mīy, tu' nax hu' mīy, tu naxtox nūnnāp-tup, hu' mīy. 'Ūp-tup, hu' mīy, ha' yāg māynāg, xix 'ūnōy max miāx.

22 Ha kaxīy Topa te hāmyok mīy. Tute' xohix pu' gāy yūmmūgāp-tup, pu' xohix Topa yā 'ūka'ok yūmmūg, yīy tikmü'ün kummuk hā' tot, tu nōm koxyo'y'ax.

23 Tu' max xe'ēgnāg, tu yūmū'ā hāmmaxnāhā', tu yūmū'ā hāmyūmmūgāhā', 'ū yūmmūg. Yīy Topa te yūmūg kuxa ka', 'ū yūmūg yāyhā max xe'ēgnāg kamah, hamūn mūtik,

24 tu yūmūg xānāhā', Yoneo yōg tikmü'ün kopa 'ūyāg xānāhā', xi' puknōg xop kopa 'ūyāg xānāhā'.

25 Hōmā 'Oyex te Topa pupi hām'āktux, tu tappet tu kax'āmi', hu:

“Āte' puknōg xop putup, yā yōgnū tikmü'ün, hōmā 'āte tu nōm xop putup nōg, pāyā hōnhā nōm mō'yāy xe'ēgnāg.

26 'Ōnte Topa xe'ēgnāg te nōm xop pu hām'āktux tap, tu:

'Yā 'āxop puknōg, 'ap yōg'ah tikmü'ün, kaxīy. Yā 'ōnte Topa xe'ēgnāg te yāy yōg tikmü'ün 'āktux putup,

yā Topa hi xe'ēgnāg,” kaxīy.

27 Ha 'Iyait kama te Topa pupi ham'āktux, tu: “Yoneo yōg tikmü'ün xohix punethok yā 'āmot xap xohix punethok putuk, pa 'ātek-tīgnāg yīmōgatux, nūy kuxa kummuk xit, nūy kuxa max mō'tat 'ūyānān tu'.

28 'Ūgnūn mō'ka'ok, tu' hep xop xohix tu pagop-tup, tu' kummugāp-tup 'ūyānān tu',” kaxīy.

29 Hōmā 'Iyait te Topa pupi hām'āktux, tu: “Pax pu Topa xe'ēgnāg yūmūg mōkputox xohix kix, puxix yūmū yōg kōmēn te Xonōm putuk, xix Gōmōg putuk, yā' hok yūm,” kaxīy.

Iyaet yōg tikmü'ün te hām'āpak max'ax 'āpak

30 Yūmū'ātep tep 'āktux'ax? Nūhū': Yā' puknōg te Topa xak ohnāg, tu hāpoxpmā max hok Topa pu', pa Topa te' kuxa tupmāhā', pu tu kuxa max, 'ūkuxa mām ka'ok tu',

31 Ihā Yoneo yōg tikmü'ün te Topa yōg xat'ax xak, nūy Topa pu' xat'ax hā yāy kuxa tupmā', tu' tupmā' hok.

32 Tep tu' tupmā' hok? 'Ūkuxa mām 'ohnāg, tu hāpoxpmā punethok, nūy yāyhā 'ūmax, hu'

kuxa mām 'ohnāg Topa kopah. Tu tikmü'ün putuk, nōm tikmü'ün te mīkaxxap xexka yīmū hām tu' nāhā', ha mīkaxxap yīmū' nāhā'.

33 Yā Topa yōg tappet te Kunnix 'āktux, Ihā mīkaxxap xexka 'āktux, tu:

“Pēnā! Yīktix Xiām tu 'āte mīkaxxap xexka mō'yūm,

pu tikmü'ün hām tu nā', mīkaxxap te' kup hā' tak, ha' nāhā',

ha tikmü'ün kuxa yūm ka'ok mīkaxxap kopah,

puxix tu yāy pu' hūpmā hok,” kaxīy.

Yā tappet te Kunnix 'āktux, nūy tikmü'ün kuxa mām'ax yūmmūgā'.

10

1 'Ūkxape xop, 'āte' xak, puyīy yōgnū tikmü'ün kuxa mām ka'ok Yeyox Kunnix kopah, ha 'āte Topa tu' xak pax tikmü'ün pupi',

2 tu hāmyūmmūg, ha Topap-xehnāg xak, pa hāmyūmmūg 'ohnāg.

3 'Ap kuxa tupmā yūmmūg'ah, tu yāy pe'paxex hā yāy kuxa kummuk tupmāp-tup, pa Topap-xehnāg te tikmü'ün kuxa tupmāhā', pu tu kuxa max.

4 Ha Kunnix nūn, nūy mīpkupnix tu' xok yūmūg pupi', puyīy tikmü'ün kuxa mām ka'ok 'ōm kopah, puxix Topa' kuxa tupmā', pu tu kuxa max, yīy Yoneo xop hitop tu' xat'ax mīy. Yā' kuxa tupmā hok.

Topa te tikmü'ün xohix kuxa kummuk xit'ax

5 Mōnāy xop hittap Mōyyex te' xat'ax 'āktux, hu: “Tikmü'ün yīpkox pip 'ūxat'ax pu', puxi' xat'ax nōm hīnnāp-tup,” kaxīy. Ha kaxīy 'ūxat'ax te tikmü'ün kuxa tupmāhā Topa pu', Ihā tikmü'ün te nōm pu' yīpkox pip, ha Mōyyex te tu' xuktux.

6 Pa Topa yōg tappet te hām'āktux nōy yā kamah, tu Topa te tikmü'ün kuxa tupmā 'āktux, tu Topa te' kuxa mām ka'ok xop kuxa tupmā 'āktux, hu: “'Ūyīpkopit hok, hu: “'Ū 'ūm te pexkox tu' mōg putup, nūy yūmūg kuxa kummuk tupmā'?” ” kaxīy. Tu Kunnix nū'kutnā'ax 'āktux, yā' nūn tap, nūy yūmūg kuxa tupmā'.

7 Tu xe' yīkopit, hu: “'Ū 'ūm te xakix xop pet ha' mōg putup, nūy yūmūg kuxa tupmā'?” kaxīy. Yā Topa te Kunnix putpu' hīnnā tap 'āktux.

8 Tu xe hām'āktux, hu: “Topa te hām'āktux, tu hām'āktux 'ūm mō'kutnāhā xa', ha 'āxop te hām'āpak, tu xe' xuktux, yā 'ākuxa kopa' xip,” kaxīy. Hak mū'āte Topa yōg hām'āktux'ax xa' xuktux, xayīy 'ākuxa yūm ka'ok Topa kopah.

9 'Ok xatep-tup, pu Topa 'ākuxa kummuk xit, nūy kuxa max mō'tat 'ūyānān tu'? Xatep-tup, 'āpu 'ānōy pu hām'āktux, hu: Yeyox mūn yāx xuxyā! Kaxīy. Tu 'ākuxa yūm ka'ok Yeyox Kunnix kopah, Topa te' putpu

hinnähä hah. Xate häpxopmä kaxiy, puxix Topa 'äkuxa kummuk xit, nüy kuxa max tat 'üyänän tu'.

¹⁰ Yümüg kuxa mäm ka'ok, ha Topa te yümüg kuxa tupmä', pu tu kuxa max, yümü'äte' yikox hä xuktux, puxix Topa yümüg kuxa kummuk xit.

¹¹ Topa yög tappet te: "Tikmü'ün kuxa yüm ka'ok nöm kopah, puxix tu yäy pu hupmä hok," kaxiy.

¹² Ha' hep xop xohix pu hämmahnähä', nöm xop kuxa mäm ka'ok Topa kopah, tu Topa pu yäy putuk, Yoneo yög tikmü'ün xi' puknög xop. Topa yä yümüg xuxyā', tu hämmahnähä 'uhep xop xohix pu', nöm xop te Topa tu' xak, pu hämmahnä'.

¹³ Topa yög tappet te xe: "Topa te' hep xop xohix kuxa kummuk xit putup, nüy kuxa max yänän tu' tat, nöm xop te Topa tu' xak, pu' xit," kaxiy.

¹⁴ Pa' hep xop punethok te ta tu' xak hok, 'ükuxa mäm 'ohnäg tu', hu häm'äpak 'ohnäg. Tu häm'äpak hok, tikmü'ün te häm'äktux 'ohnäg hah.

¹⁵ Tu häm'äktux hok, tikmü'ün te mö'kutnä 'ohnäg hah. Topa yög tappet te: "Yä' max tikmü'ün nü', nüy häm'äpak'ax max 'äktux," kaxiy.

¹⁶ 'A' xohix tep-tup'ah. Hömä mönāyxop hittap 'Iyait te Topa pupi häm'äktux, tu kax'ämi', tu: "Topah, pi'yä' yipkox 'üm pip 'ügmü'äte häm'äktux?" kaxiy.

¹⁷ Yiy tikmü'ün te Kunnix 'äktux'ax 'äpak hämäxap, tuk-näy tu' kuxa yüm ka'ok nöm häm'äktux'ax kopah.

¹⁸ Pa 'äte xe' yikopit, hu: 'Ok tikmü'ün te häm'äpak hok? Hamün. Yä' xupak. Topa yög tappet te:

"Tikmü'ün xohix te' yiy'ax 'äpak, yä häm xexka xohix yög tikmü'ün te nöm häm'äktux'ax 'äpak."

Kaxiy.

¹⁹ Hak yikopit, hu: "Ok Yoneo yög tikmü'ün te häm 'üm yümmüg hok?" kaxiy. Yä' yümmüg. Pa hömä mönāyxop hittap Möyyex te Topa yög häm'äktux kax'ämi', tu:

"Äte 'äyipkumiygäp-tup, 'üpuknög xop hä 'äyipkumiygäp-tup,

'üpuknög xop yä' hep puxet 'ohnäg, päyā 'äte 'äyipkumiygä-tup,

'ihä puknög xop yäyhä yögnü tikmü'ün.

'Äte 'ägäyap-tup nöm puknög xop hah, nöm puknög xop pa te hämyümmüg 'ohnäg hä

'äte 'ägäyap-tup," kaxiy.

²⁰ Ha mönāyxop hittap 'Iyait kuxänög 'ohnäg, tu Topa pupi häm'äktux tikmü'ün pu', tu:

"Nöm xop tek 'üm xak hok, pak xipih', kaxiy.

²¹ Tu Yoneo xop 'äktux, hu:

"Äte tikmü'ün xänähä', mö'yäy xe'egnäg tu', päyā' yipkox 'ohnäg, xix häm'äpak 'ohnäg," kaxiy.

11

Topa te 'Iyae't yög tikmü'ün kuxa ka'

¹ Äte xe' yikopit, hu: 'Ok Topa tep-tup hok yäy yög tikmü'ün? 'Üp-tup! 'Ügmün kama nöm Yoneo tikmü'ün yög. 'Ügmün 'Iyae't yög tihik, yäk mün mönāyxop 'Amanäm mökputox, xix Meyamiy yög xop kopak xip.

² Topa te Yoneo tikmü'ün putup hok'ah, tu nöm yimögatux tap. Hömä mönāyxop hittap 'Enit te 'Iyae't yög tikmü'ün 'äktux kummuk Topa pu',

³ tu: "Topah, tikmü'ün te 'ög tik xop kix, nöm xop te 'ämün pupi häm'äktux, ha 'ög mimpex koxyöy, tu mimpex häpxop mö'hap'ax Topa pu' koxyöy, hak mün puxehnäg xip, hak putex putup kama nömhä'," kaxiy.

⁴ Ha Topa te' yänän tu häm'äktux, hu: "Äte tik max xop xohix te 700 yimögatux, ha topa komut Mat pu nüktettex 'ohnäg," kaxiy.

⁵ Yä hönhä kaxiy kamah. Topa te tikmü'ün kutögnäg xop yimögatux, tu nöm xop ha hämmahnähä', tu' kuxa ka',

⁶ tu' yimögatux 'ükuxa ka tu'. Pax pu Topa häpxopmä max hä' yimögatux, puxix tu tikmü'ün kuxa ka hitop tu', päyā Topa te' hok hä hämmahnähä'.

⁷ Yiy Yoneo xop te' xak, puyiy 'üxat'ax hä' kuxa tupmä Topa pu', päyā' hitop tu' xak. Ha tikmü'ün kutögnag Topa te yimögatux, nüy 'ükuxa tupmä yäyüm pu', ha Yoneo nöy xop xexka te Topa pu' yipkox 'ohnäg.

⁸ Topa yög tappet te: "Topa te nöm xop putox ka'ogähä', yä hönhä hämyümmüg 'ohnäg," kaxiy.

⁹ Ha Mönāyxop Namix te:

"Püyā Topa 'üyög häpxopmä'ax kummuk hä' pago.

Püyā yäy yög kummük'ax hä' kummuk xop müg ka'ok.

¹⁰ Püyā' pēnā hok, xix häpxop xak'ax tu' hit-tupmä hok," kaxiy.

¹¹ Äte xe' yikopit. Yoneo yög tikmü'ün te Kunnix putup nöy, yiy Topa te nöm pu häpkummugähä'. 'Ok Topa tep-tup hok? Yäp-tup! Päyā Topa te' hip, pu tu' puknög xop yipkox pi', puyiy Yoneo yög tikmü'ün yipkumiy puknög xop hä, nüy tu' yipkox pi kamah Topa pu'.

¹² Yoneo yög tikmü'ün te häpxopmä kummuk, yiy Topa te' hep xop xohix ha hämmahnähä', tu hämmahnäp-tup xexka', 'ihä Yoneo yög tikmü'ün kama' yipkox pip, 'ihä Yoneo yög tikmü'ün punethok yipkox pip häm'äpak max ta tu'. Yä Topa te' xohix te xiy mö'kupix, pu yipkox pi'.

Topa te Yoneo xop hä' puknög xop kuxa kummuk xit'ax

¹³ 'Áte' puknög xop pu häm'áktux nómhá. Topa te mögkutnähá' puknög xop hah, pu häm'ápak max'ax 'áktux, hak kuxa hittup.

¹⁴ Püyä Yoneo yög tikmü'ün 'úpuknög xop pēnā', nūy kuxa mām ka'ok yūmmūg, hu' yīpkumīy, yā 'áte' xak, pu' yīpkumīy, pu Topa 'ūkuxa kummuk xit, nūy kuxa max yānān tu mō'tat.

¹⁵ 'Úpuknög xop yāyhā Topa hä' xape', 'ihā Topa te Yoneo xop putup nög, tu Yoneo yög tikmü'ün xohix putup 'úxeheh, puxix Topa' xakix xop putpu' hinnā'.

¹⁶ Tikmü'ün te pām koxip, nūy Topa pu 'óm yāg hóm, puxix pām xohix Topa yög. Tikmü'ün te yīpxatit hóm Topa pu', puxix mīm xexka kup kama Topa yög, xix mīm māg kamah. Yā mōnāyxop hittap te mīm yīpxatit putuk, ha mīm māg te hōnhā yög Yoneo xop putuk.

¹⁷ Mīm xexka kup 'Onimet, tu hāmpak'ax xuka' yūm, ha' mīm māg 'um xak, ha 'Onimet kup puknög tu mīm māg xut, 'ūkup te hāmhīpak tu' yūm ha' xut, ha' mīm māg xut, nūy kup nōy putox tu' hīy, pu tu tox, mīm māg nōy putuk. 'Áxop puknög xop te 'Onimet puknög putuk, Topa te xa hāmmāxnāhā', tu xa hāmmāxnāhā Yoneo xop putuk.

¹⁸ Yīy Yoneo xop yāk-tōgnāg pe'āpaxeh hok: 'A 'áxop te yīpxatit putuk'ah. 'Ámhok. Pāyā 'áxop te mīm māg putuk, yā mīm māg te' yīpxatit tu' tup.

¹⁹ Pa 'áxop te: "Tikmü'ün te mīm māg xe'e' xut, nūy nō puknög hīy 'ūp-tox tu', pu tu tox. Ha kaxīy Topa te yāy yög Yoneo xop mōy, nūy 'ūgmūg nōy há' yānān, puk mūg yā yāy yög tikmü'ün, mō 'ūgmūg yāy xe'ēgnāg tu'," kaxīy.

²⁰ Hamūn. Hāpxip kutōgnāg 'ihā Topa tep-tup nög, 'ūkuxa mām 'ohnāg hah, ha 'ākuxa mām ka'ok, yīy Topa te 'āp-tup pax, pa yāy pe'āpaxeh xexka hok. 'Ákuxānōg, ka 'ākuxa mām kux.

²¹ Hōnhā Topa te yāy yög Yoneo xop putup nög. 'Ákuxa te Topa nīm, puxix Topa kamah 'āp-tup nög.

²² Topa te hāmyok mīy, tu tikmü'ün kuxa ka kamah. Tu hāmyok mīy 'ihā tikmü'ün kummuk xūygāhā', tu' yānān tu' kummugāhā', tu 'ākuxa ka', 'āyīpkox pip hah. 'Ayīpkox hok, puxix Topa 'āmōy kamah.

²³ Yoneo yög tikmü'ün te yāy putat kummuk nīm, nūy kuxa mām ka'ok Kunnix kopah, puxix Topa' putpu' kuxa mām mā', yāy yög xip'ax tu'. Ha tikmü'ün te mīm māg xe'e' hīy putpu', puyīy xip ka'ok. Kaxīy Topa te Yoneo xop mām mā'ax 'úxeheh.

²⁴ 'Áxop puknög, tu 'Onimet mīm māg putuk. Tikmü'ün te mīm māg xut, nūy kup xe'e' tu' hīy, pu tu' kup xe'e' hā' mīm māg.

Yoneo yög tikmü'ün te 'Onimet kup xe'e' putuk, ha Topa te yā yāg putup nög, tu' xep-tup'ax kamah, puyīy yāy mūn hā tikmü'ün xe'e' 'úxeheh.

Yā Topa mūn max xe'ēgnāg

²⁵ 'Úkxape xop, 'ūg'āpax: Hōnhā Yoneo yög tikmü'ün yīpkox 'ohnāg, pa hāptup nōy xohix 'ihā' yīpkox pip putup, 'ihā' puknög xop xohix punethok te Topa yög putat hā' mōg, ha Topa te' xohix te xīy mō'kupix, pu mōg. 'Áte xa hām'áktux'ax 'áktux, xayīy yāy yög hāmyūmmūg pe'āpaxeh hok. Ha Topa te hām'áktux xe'e', nūy yāy yög tikmü'ün pu hāmyūmmūgā'.

²⁶ Tu Yoneo yög tikmü'ün xohix mōy putup, hāpkummugā'ax tu' mōy putup, yīy Topa yög tappet te:

"Tik te yiktix Xīām tu' xip, tu' nūn putup, nūy tikmü'ün kuxa kummuk xit,

nūy Mōnāyxop Yako mōkputox

kuxa kummuk xit.

²⁷ 'Áte hāmpa'ax mīy putup tikmü'ün mūtik,

'ihā 'áte' kuxa kummuk xit,

tu' kuxa max yānān tu' tat," kaxīy.

²⁸ Yoneo xop te Topa hä' puknög, hām'āpak max-tup nög tu', ha kaxīy 'áxop yā Yoneo xop'ah, nūy Topa hä' 'āxape', pa Topa te Yoneo xop yīmōgatux tap, mōnāyxop hittap ha' yīmōgatux, tu hām'áktux xex, hu: "'Áte 'āmōkputox hāk xape mōg kumak mōg, tuk kux 'ohnāg," kaxīy.

²⁹ Topa te Yoneo yög tikmü'ün yīmōgatux, tu mō'yāy xe'ēgnāg, ha' hupmā 'ohnāg, yā Topa te' kuxyā 'ohnāg, tu nōm hā hāmmāxnāp-tup.

³⁰ Hōmā 'áxop puknög, 'ap Yoneo xop'ah, 'āyīpkox 'ohnāg Topa pu', ha Topa te 'ākuxa ka', Yoneo xop yīpkox 'ohnāg ha 'ākuxa ka'.

³¹ Yā Topa te 'ākuxa ka', ha Yoneo xop yīpkox 'ohnāg nōmhā, pu Topa kama nōm xop kuxa ka'.

³² Yā' hep xop xohix yīpkox 'ohnāg Topa pu', yīy Topa te' hīy, yāy yög hāpxopmā'ax ha' hīy, ha Topa te' xohix kuxa ka', pu' xohix tu' mūg.

Püyā Topa max xe'ēgnāg 'áktux

³³ Topa te yā xohix ha hāmmāxnā xe'ēgnāg, pexkox yög hāpxop xexka xe'ēgnāg hā, ha hāmyūmmūg xe'ēgnāg. 'A tikmü'ün te Topa yög hāpxopmā'ax xohix yūmmūg'ah, nūy tu nōy pu' yūmmūgā'. 'Ámhok.

³⁴ Yīy Topa yög tappet te:

"Tikmü'ün 'ūm te Topa yög hāmpē'paxex yūmmūg'ah,

tu Topa pu hāmyūmmūgā'ohnāg,

³⁵ tu Topa pu hāpxop hóm 'ohnāg kamah, pu tu ta nemēn,

nūy yānān tu' pago. 'Ámhok." Kaxīy.

³⁶ Yä Topa-xet te häp̄xop xohix m̄y, tu häp̄xop xohix hinnähä', tu yäymün pu' m̄y, xix yäy pu hinnähä'. Yä Topa m̄n xexka xe'egnäg. Püyä tikmü'ün te nöm xexka 'äktux mō kuma' mōg! Hamün!

12

'Äpu yümü'äte Topa tu häp̄xopmā'

¹ Yiy 'äte xak xape xop xapit, xayiy Topap-xehnäg pu yäymün hōm, tikmü'ün te häp̄xop hok hōm putuk. Yä 'äxop te ta nemēn, Topa te 'äkuxa ka hah, xayiy nōm puxehnäg pu 'äȳp̄kox pi'. Yä Topa tep-tup pax. Hamün. Yä kaxiy 'äxop te Topa pu nü'äktetex xe'e'.

² Häm xexka tu' pip tikmü'ün yä Topa hä' puknōg, yiy nōm pu 'p̄kox hok, nüy yōg häp̄xopmā'ax tat hok. Pa Topa te 'äp-tox maxnā'ax, xayiy Topa yōg putup'ax yümmüg, nüy häp̄xopmā max. Topa te nöm putup, yiy 'ä mäynäg m̄y Topa tu'.

³ Topa tek m̄n ha hāmmaxnähä', tuk ka'ogähä', yiy xa hām'äktux, hu: 'Ämpe'äpaxeh max, nüy yäy yōg häp̄xopmā'ax kopit max. Topa te 'äkuxa mām̄mä ka'ok, xayiy 'äxop xohix häp̄xopmā max, Topa te yä 'äxat hah.

⁴ Tikmü'ün yin puxet, tu' kup punethok, xix häp̄xop te yin kopa' pip punethok, xi' m̄y'ax punethok.

⁵ Kaxiy yümüg xohix punethok, päyā yümüg kuxap-xet Kunnix kuxa mütik, yäk puxet, yä 'äȳn putuk.

⁶ Topa te yümüg xohix ka'ogähä', tu' hok hä ka'ogähä', nüy häp̄xopmā', tu' hok hä yäy yümüg ka'ogähä'. Tu tikmü'ün puxet ka'ogähä', pu Topa pupi hām'äktux. Püyä nöm tikmü'ün hām'äktux, Topa te' kuxa mām̄mä ka'ok hah.

⁷ Xix tikmü'ün nōy ka'ogähä', pu' nōy hä tu tehet. Püyä nöm tikmü'ün hä tu' tehet. Xix tikmü'ün nōy ka'ogähä', pu hāmyümmügä'. Püyä hāmyümmügä'.

⁸ Xix tikmü'ün nōy ka'ogähä', pu tu' xape xop mō'n̄yñām, nüy ka'ogä'. Püyä mō'n̄yñām. Xi' nōy ka'ogähä', pu häp̄xop hok popmā'. Püyä' popmā', nüy tu' xupkumiy hok. Xi' nōy ka'ogähä' pu tu' xat. Püyä tu' xat max. Xi' nōy ka'ogähä', pu tu' nōy kuxa ka', nüy tu hittupmā'. Püyä tu hittup, 'ünōy kuxa ka 'Thä'.

⁹ Äxape hä mō'äm̄ä hok, pa nöm putup pax xe'e'. Häpkummuk'ax putup hok, nüy tu hāmma xax, nüy häp̄xopmā max mō kuma' mōg.

¹⁰ Äxop xohix Kunnix hä 'äxape', yiy 'äxop xohix hä yäy xape'. Äpu, yäy putup pax, nüy 'änōy pe'äpaxeh xexkanä xip.

¹¹ Häp̄xopmā max, tu tuknōg hok, nüy Topa pu häp̄xopmā, 'äkuxa hittup tu'.

¹² Äkuxa hittup 'Thä Yeyox Kunnix nün'ax hä' hip, tu häp̄xopmā ka'ok hä' tot, nüy

hāmma xax, xix Topa pu hām'äktux mō kuma mōg, yä' kux hok.

¹³ Äxupkumiy hok, tu 'äxape hok xop pu häp̄xop hōm, xi' puknōg xop xänä', pu 'äpet kopa' mōy mō'xip.

¹⁴ Topa tu' xax, pu hāmmaxnä tikmü'ün kummuk hah, nüy nöm xop te 'äkummugä xop ha hāmmaxnä', ha Topa tu' xax hok, puyiy nöm pu häpkummugä 'üyänän tu'. Ämhok.

¹⁵ Tikmü'ün potaha', 'äpu nü yökämü poho kamah. Tikmü'ün hittup, 'äpu nü mütik 'ähittup kamah.

¹⁶ Änōy mütik 'äti max, ha yäy tukm̄y hok. Yäy pe'äpaxeh xexka hok, pa' nōy te 'äxat'ax pu 'äȳp̄kox pi', nüy nöm pu 'ähäm max. Yäy pe 'äpaxeh hok, hu: Yä puxehnäg 'äte hāmyümmüg. Kaxiy.

¹⁷ Tikmü'ün te xa häpkummugä', 'äpu, 'üyänän tu' häpkummugä hok. Äpu, häp̄xopmā max, puyi' xohix yümmüg, tu: "Häp̄xopmā max 'öhōm," kaxiy, nüy xa hām'äktux max.

¹⁸ Üxax, nüy tikmü'ün xohix mütik yäykix ta tu yäytuk-m̄y 'ohnäg, nüy 'äxohix kuxa mām̄mä'.

¹⁹ Tikmü'ün te xa häpkummugä', 'äpu 'üyänän tu' kummugä hok. Ämhok. Püyä Topa' kummugä', ha Topa yōg tappet te Topa yōg hām'äktux 'äktux, tu: "Ügmün yä Topah, tu häpkummugäp-tup 'üyänän tu', nüy tu pago," kaxiy.

²⁰ Ha Topa yōg tappet te xa hāmyümmügähä', hu: "Tikmü'ün te xa tu' gäy, tup-tup x̄y, 'äpu, tu' hōm häp̄xop, puyi' m̄ä'. Ügäy xop te könäg tat xak, 'äpu, könäg tat, nüy hōm, puyi' xo'op. Kaxiy xate' gäy xop kuxyähä', pu yäyhähup xexka', yä' payin pukpex," kaxiy.

²¹ Tux hok, xa häpkummuk m̄y hok, pa häp̄xopmā max, xayiy hāmma xax.

13

Gohet yōg tik xop pu 'äȳp̄kox pi'

¹ Püyä' xohix gohet pu ȳp̄kox pi', nüy tik xop te tikmü'ün xat'ax pu ȳp̄kox pi'. Yä Topa te' tux hok pu tu tikmü'ün xat.

² Tikmü'ün te gohet xop pu' ȳp̄kox hok, puxix Topa pu' ȳp̄kox hok kamah, ha Topa te nöm tikmü'ün yōg häp̄xopmā'ax kummuk kopit, tu' xüygäp-tup, pu tu pago.

³ Tikmü'ün te häp̄xopmā max, puxix gohet ȳp̄kutuk hok, ha tikmü'ün te häp̄xopmā kummuk, puxi' ȳp̄kutuk. Xatep-tup nüy 'äkuxänōg hok, 'äpu häp̄xopmā max, puyiy tik te 'äxat'ax 'äm̄ax'äktux.

⁴ Öhōm te Topa pu' hām, nüy xa hāmmaxnä'. Xate häpkummuk m̄y, 'äpu 'äxat'ax ȳp̄kutuk, tute 'äxüygä'ax, xa tu pago. Topa te' xat'ax xop xat, pu' yänän tu tikmü'ün kummuk pu häpkummugä'.

⁵ Yiy 'äxat'ax xop pu 'äyïpkox pi', Topa te 'äxat hah, 'äkuxa te 'äxat hämäxap, ha 'äxüygä hok kamah.

⁶ 'Ög tayümak hä pago kama gohet pu', gohet te nöm tayümak xak hah. Yä 'xat'ax xop te Topa pu häpxopmä'hä', 'Thä 'äxat.

⁷ Hu pago tayümak hä xate ta nemen, xix' xat'ax xop pe'äpaxex xexka kama xate ta nemën.

Änöy ha hämmaxnä'

⁸ Tikmü'ün pu ta nemën hok, pap-tup pax xexka'. Tikmü'ün te Topa yög xat'ax mäynäg mïy, 'Thä' nöy putup pax.

⁹ 'Üxat'ax te: "Änöy hä xupxet hok," kaxïy, xix: "Üp-tex hok," kaxïy, xix: "Häpxop hä xupxet hok," kaxïy, xix: "Änöy yïpkumïy hok," kaxïy. Yä 'xat'ax xohix te yümü'ä hämyümmüg'ähä', ha hämyümmüg'ax puxet, hu: 'Änöy putup pax, yä yäy mün putup pax putuk. Kaxïy.

¹⁰ Tikmü'ün te' nöy putup pax, puxi' nöy pu häpkummugä 'ohnäg, yïy tikmü'ün te' xat'ax pu' yïpkox pip, 'Thä' nöy putup pax xe'e'.

¹¹ 'Äpu, 'änöy putup pax. Yä häptup xe'e mō'nā'ax, puxix Kunnix nū', nūy yäy yög tikmü'ün yäy tu nū'xok, 'äkuxa tuknög hok, nūy tikmü'ün mō'yōn putuk hok. Yä hōmä yümüg kuxa mām ka'ok Yeyox kopah,

¹² pa yä häptümmäg, ha häptup te häpkanet hä mō'nā'ax, ha kaxïy yümüg xuxyā xupep putup. 'Äpu, yümü'äte häpkummuk mïy kux, nūy 'ämniy koxtap kopa yög häpxopmä'ax kuxyā', nūy häpkummuk mütik yäy tuk-mïy mäyōn xupep 'Thä'.

¹³ Yiy hämyok mïy nōmhä, yäy xaptop hok. Häpkute'ex kummuk hok, xix kenmuk xo'op hok, nūy 'äpaptux hok, xix 'üpenä pax hok, xayïy häpkummuk mïy hok, xix 'änöy hä xupxet hok, xix hämpe'äpaxeh kummuk hok, xix yäykix hok, xix 'äyïpkumïy hok.

¹⁴ Yä yümüg xuxyā Yeyox Kunnix te 'äpupi' xip, nūy 'äxeh, yï' tux hok pu xeh, ha yäy pu 'ïpkox pip hok, nūy yäy yög putup'ax mïy hok, ka häpkummuk mïy.

14

Änöy yög häpxopmä'ax kopit hok

¹ 'Äxop kopa' pip tikmü'ün kuxa mām pu'uk, 'äpu nöm putup pax, pa häm'äktux hä' nöy yānān hok, 'üyög hämpe'paxeh hä yäy tuk-mïy hok.

² Tikmü'ün kuxa yüm ka'ok, puxi' xit'ax xohix mähä', pa tikmü'ün kuxa yüm pu'uk te xogyin mā 'ohnäg.

³ Tikmü'ün yäg te häpxop xohix mähä'. Püyä' nöy mün putup, nöm te xogyin ma hok, nūy nöm pe'paxeh kutōgnäg hok. Tikmü'ün yäg te xogyin mā 'ohnäg. Puyä' nöy putup, nöm te häpxop xohix mähä', pu

nöm pe'paxex kutōgnäg hok. Topa te nöm putup pax, yä' puxi'.

⁴ 'Ok yäy pe'äpaxex xexka', nūy 'änöy yög kāmānat yög häpxopmä'ax kopit? Yümüg xuxyā te' kopit putup, nūy hämyümmüg, 'ok pe kāmānat häm max, pe' häm kummuk. Yä' häm maxp-tup. Topa te' ka'ogā'ax, puyïy häpxopmä max.

⁵ Tikmü'ün yäg te häptup tuknög putup, 'Thä' nöy te 'ämniy xohip-tup, ha 'ämniy xohix te yäy putuk hamün pu'. Püyä tikmü'ün kuxa xohix mām ka'ok, nūy hämyümmüg, nūy yäy yög häpxopmä'ax yümüg, 'ok pe' max, 'ok pe' kummuk.

⁶ Tikmü'ün te häptup tuknög putup, puxix möy Topa xexka 'äktux, 'Thä nöm häptup putup, ha tikmü'ün te häpxop xohix mā', puxix Topa xexka 'äktux, 'Thä häpxopmä'hä', hu: "Ämax Topah, tu häpxop xohix 'ä' hōm, nūy 'ükxinnä'," kaxïy. Ha tikmü'ün te xogyin mā hok, puxix tu Topa xexka 'äktux 'Thä' mā hok, tu: 'Ämax Topah, xa häm yög häpxop punethok 'ä' hōm, nūy 'ükxinnä'," kaxïy.

⁷ Tikmü'ün puxehnäg hä 'ap hi'ah, tup-xehnäg hä 'ap xok'ah, päyä Topa te yümüg xat, 'ok pe yümüg hi', pe yümüg xakix.

⁸ Yümüg hi, kopix Topa tu yümüg hi'. Yümüg xakix, kopix Topa tu yümüg xakix. Yä kaxïy, pe yümüg hi', pe yümüg xakix, kopix Topa yög yümü'ä'.

⁹ Kunnix xok, tu putpu' hi', nūy tu yäyhä nöm hi xop yäy xuxyā', xi' xakix xop yäy xuxyā kamah.

¹⁰ Xix 'ämün, tep tu xate 'äxape yög häpxopmä'ax kopit, nūy häpxopmä'ax 'äktux kummuk? 'Änöy 'äktux kummuk hok. Yümüg xohix te Topa keppak pip putup, pu yümüg yög häpxopmä'ax xohix kopit, nūy hämyümmüg, 'ok pe yümü'äte häpxopmä max, pe häpxopmä kummuk.

¹¹ Yiy Topa yög tappet te Topa yög häm'äktux 'äktux. Ha Topa te:

"Äte xa häpxe'e 'äktux, tu xa häm'äktux xex: Yäk hi mōkumak mōg, yïy 'ühep xohix xop tek keppa nūktettex putup, nūy tu kuxa' yëy, tutek mün ha Topa xe'ëgnäg 'äktux putup," kaxïy.

¹² Yiy yümüg xohix te Topa keppak pip putup, nūy yäy yög häpxopmä'ax 'äktux.

Änöy kummugä hok

¹³ 'Äxape kummuk 'äktux hok. 'Ämhok, häpxopmä hok, nūy 'änöy pu häpkummugä hok, puyïy häpkummuk mïy hok.

¹⁴ 'Ügkuxap-xet yümüg xuxyā kuxa mütik, hu 'äte hämyümmüg, ha häpxop xit'ax xohix max, 'üyï' mā', pa tikmü'ün yäg te: "Nöm te xokxop mā hok xop. Yä' kummuk tikmü'ün te' mā'," kaxïy, puxix nöm xit'ax yä nöm tikmü'ün hä 'ümä hok.

¹⁵ Xate nôm hâpxop mâ', hu ta 'âxape kuxa hittupmâ hok, tu' kummugâhâ', hu nôm putup nög. 'Äxit'ax hä 'âxape pu hâpkummugâ hok, ka tute Topa yög putat xak. 'Ok yümmüg xate'? Yâ Kunnix te 'âxape pupi' xok, nüy nô hâmmaxnâ', pa xate' kummugâhâ 'âxit'ax hä. 'Äpu 'ânöy kuxa putex hok!

¹⁶ Xate hâpxopmâhâ', tu hâmp'e'âpaxex, hu: "Yâ 'âte hâpxopmâ max," kaxîy. Yâ' max, pa 'âxape mütik hâ'm'âktux hok, nüy nöy yânân hok. Yâ 'âxape te hâmp'e'paxex nöy. 'Äyîy hok, xayîy 'âxape gâyâ hok, ka 'âxape 'ög hâpxopmâ'ax kopit kummuk.

¹⁷ Topa te yây yög tikmü'ün xat, tu tikmü'ün kuxa tu' xat, tu putep mün mâ'ax 'ap xat'ah, xix putep xo'op'ax 'ap xat'ah. 'Ämhok. Topa te tikmü'ün xat, pu max, tu' xat, pu tu kuxa yüm ka'ok, tu' xat, pu tu kuxa hittup xexka', ha Topa Koxuk te' kuxa hittupmâ'ax, tu hâpxopmâ'ax max hä' kuxa yümmâ'ax.

¹⁸ Ha tikmü'ün te Kunnix pu hâpxopmâ kaxîy, puxix Topa nôm 'ümax 'âktux, ha tikmü'ün xohix te nôm 'ümâx 'âktux kamah.

¹⁹ 'Äpu yümü'âte hâxopmâ maxnâ', nüy kuxa yümmâ', nüy yümüg xape ka'ogâ'.

²⁰ Pa nüy ta nöy kummugâ hok. 'Äxit'ax hä 'ânöy kummugâ hok. 'Ämhok. 'Ög pa 'âti'! 'Änöy yâ Topa yög, ha Topa te nôm putup pax, 'üyög hah, ha' kummugâ hok, nüy 'âxit max.

²¹ Topa tep-tup tikmü'ün te xogyîn mâ hok, xix ta hep xupyäg xo'op hok, ka' nöy hä hâpkummugâhâ'.

²² Xate hâpxopmâhâ', tu' max pe'âpaxex, 'âkuxa yüm ka'ok, hu 'âxit, xi' xo'op, ha xate' yümmüg, xix Topa te' nüy yümmüg. Puxi'. Tikmü'ün kuxa yüm ka'ok yây yög hâpxopmâ'ax kopah, puxix tu kuxa hittup xexka', ha' kuxa te yây mün tu: Yâ' max. 'Äte hâpxopmâ max hönhâ', kaxîy.

²³ Pa tikmü'ün kuxa yüm pu'uk, tu yây mün yîkopit, 'ok pe' max, 'ok pe' kummuk, 'ü hâpxop 'üm mâ', puxix Topa' tux hok pu' mâ hok, 'ükuxa yüm 'ohnäg hah. Tikmü'ün kuxa yüm pu'uk, 'ihâ hâpxopmâ', puxix hâpkummuk mîy, 'ükuxa yüm pu'uk tu'.

15

'Äpu, 'ânöy yög putup'ax mîy

¹ Topa tek xat, 'üyîy yümüg xape xop mō'nîynâm, nôm xop kuxa mâm pu'uk mō'nîynâm, nüy nô ka'ogâ', nüy yümüg yây yög putup'ax mîy hok.

² 'Änöy yög putup'ax mîy, nüy nôm ha hâmmaxnâ', pu tu kuxa yüm ka'ok Yeyox kopah.

³ Kunnix te yây yög putup'ax mîy 'ohnäg, yîy Topa yög tappet te Kunnix 'âktux, tu hâ'm'âktux, hu: "Tikmü'ün te 'âkummuk

'âktux, puxik mün kummuk 'âktux kamah," kaxîy.

⁴ Hömâ tik xop hittap te Topa pupi hâ'm'âktux, tu tappet tu kax'âmi', ha mō'yümmüg nîynâm, 'üyîy nōâ'tot, ha Topa yög tappet te yümüg ka'ogâhâ', 'ü Kunnix putpu nün'ax hip.

⁵ Topa te 'âka'ogâhâ', xix xa hä' totnâhâ'. Püyâ Topa 'âxop kuxa puxetnâ', xix 'âp-tox puxetnâ kamah, xayîy Yeyox Kunnix yög hâpxopmâ'ax tat,

⁶ nüy Topa yümüg Tak max 'âktux, nüy 'âyîy'ax puxet hä Topa max 'âktux, yâ 'öhöm yümüg xuxyâ Yeyox Kunnix hä 'Ätak.

Yâ hâ'm'âpak max 'âktux Yoneo xop hä' puknög xop pu'

⁷ 'Äpu, 'âxape putup, yâ kaxîy Kunnix te 'âp-tup, tu mō'âyây xe'ëgnäg. 'Äxape putup pax, pu tikmü'ün te: "Topa mün max xe'ëgnäg!" kaxîy.

⁸ 'Äte xa hâpxe'e 'âktux: Kunnix te Yoneo xop tu hâpxopmâhâ', tu nôm xop ha hâmmaxnâhâ', pu nôm xop yümüg, tu Topa te hâmyok mîy yümmüg. Yâ Topa te' yög hâ'm'âktux xex, tu mō'nâyxop hittap pu' xex, tu' xaxok 'ohnäg, tu mäynäg mîy.

⁹ Ha Kunnix te hâxopmâhâ', pu' puknög xop yümüg kamah, yâ Topa te puknög xop kuxa ka', puyîy Topa max 'âktux, yîy Topa yög tappet te:

"Yâ 'âmax Topah, yîy 'âte' puknög xop pu hâ'm'âktux putup,

tuk-tex putup, nüy 'âmax 'âktux," kaxîy.

¹⁰ Tu xe hâ'm'âktux, hu:

"Püyâ' puknög xop kuxa hittup Yoneo xop mütik.

Yâ Topa te Yoneo yög tikmü'ün yîmögatux," kaxîy.

¹¹ Tu xe:

"Püyâ' puknög xop xohix Topa xexka 'âktux, püyâ' hep xop xohix Topa pu hâ'm'âktux punethok,

nüy tu: "Ämax xe'ëgnäg,' kaxîy, Topa pu'," kaxîy.

¹² Ha mō'nâyxop hittap 'Iyait te Topa yög tappet tu kax'âmi', hu:

"Yexe mōkputox 'üm nün putup, nüy puknög xop xat,

ha' hittup, tu' hip, pu mōkputox nū'," kaxîy.

¹³ Yâ Topa te yümüg kuxa hittupmâhâ', püyâ 'âkuxa mämmâ, xayî' hip, Yâ yümü'â' höm putup pexkox yög hâpxop xohix, ha yümü'âte' hip, nüy pop. Yâ Topa Koxuk te 'âka'ogâhâ', xa hâmmâx hip kamah, nüy pexkox yög hâpxop tu pop.

Paot te hâpxe'e 'aktux

¹⁴ 'Ükxape xop, 'ügkuxa yüm ka'ok 'âkopah, yâ 'âkuxa max, tu hâmyümmüg, ha 'âte 'âyümmüg, ha hâmyümmüg max, nüy 'ânöy pu hâmyümmügâ'.

15 Pa 'äte xa kax'ämi tappet, tu xa häpxe'e 'äktux, tuk kuxänög 'ohnäg, nüy xa xaxogä hok. Yä Topa tek yäyikutnähä', 'ü häpxopmä nöm pupi', tuk hittup xexka'.

16 Yä häpxopmähä Yeyox Kunnix tu', nüy hämpuknög yög xop mō'nīynām, tu Topa yög häm'āpak max'ax 'äktux, 'āmānex putuk tu', puyī' puknög xop kuxa mām ka'ok Topa kopah. Yä mō'yāy xe'ēgnäg, ha Topa Koxuk te nöm xop yimōgatux, nüy Topa kuxa hit-tupmä'.

17 'Üghittup xexka', Topa tu 'äte häpxopmähä', tuk kuxa hittup. Yäk kuxap-xet Kunnix kuxa mütik.

18 'Ap 'ügkuxänög'ah, tu häm'äktux xe'e', nüy Kunnix te häpxopmä'ax 'äktux, 'a 'äte häm'äktux nōy 'äktux 'üm putup'ah, pa Kunnix 'ügmüg 'üm hä häpxopmä ka'ok, puyī' puknög xop kuxa mām ka'ok Topa kopah, 'äte häm'äktux, nüy hämyümmügä', puyī' puknög xop yīpkox pi Topa pu'.

19 Topa Koxuk te mögkutnähä', tuk ka'ogähä', 'äte häpxopmä xe'ēgnäg, puyī' puknög xop pēnä', hak ka'ogähä', 'ü häpxopmä ka'ok xe'ēgnäg. Yä kaxīy tikmū'ün 'üm te' mīy hok, yīk xip Yenoyanēn tu', tuk mög, tuk xupep häpxexka 'Init tu', nüy häm'āpak max'ax xohix 'äktux, nüy Kunnix 'äktux.

20 'Äte häpxopmä punethok, nüy häm'āpak max'ax 'äktux, nüy Kunnix 'äktux puknög xop pu', nöm xop te Kunnix 'äxel'ax 'āpak hok pu' xuktux, nüy nōy yög häpxopmä'ax mīy hok. 'Äte putup'ah, 'ünōy te häpxopmä hämāxap, 'üg-nāy tu häpxopmä'.

21 Ha Topa yög tappet te:
"Tikmū'ün 'üm te nöm 'äktux 'ohnäg, päyā' puknög te' pēnāp-tup, ha häm'āpak 'ohnäg xop te hämyümmüg putup," kaxīy.

Paot te kōmēn xexka Hōm tu' mög putup

22 'Ämnīy xohix hä 'äte' xak, nüy 'āhak mög, päyāk mög'ah.

23 'Äte häpxopmä kux nūnte, kopxix 'āhak mög. Yä 'äte' hip hämyāxatamuk xohix hä, 'üg 'āha mög.

24 Huk mög putup nōmhä. 'Ügmög putup häpxexka 'Expān hah, tu 'āp-tup, xa mögnīynām, 'üyīy 'Expān tuk mög, tu 'āxop mütik 'ükxip putup hämāxap.

25 Hōnhāk mög Yenoyanēn tu', nüy Topa yög tikmū'ün tu häpxopmä'.

26 Yä häpxexka Māxenōn yög kuxa mām ka'ok xop, xix häpxexka Genex yög kuxa mām ka'ok xop te tayūmak pop, nüy Topa yög tikmū'ün pu' popmä Yenoyanēn tu', nüy hok xop pu' popmä'.

27 Nöm kuxa mām xop te' popmāp-tup, nüy hok xop pu' popmä'. Yä' max 'ü popmä', Yoneo xop pu' yānān tu' popmähä'. Yä Yoneo xop te' puknög xop ha hämmāxnähä', yī'

puknög xop te tu ta nemēn, nüy yānān tu' hok xop pu häpxop popmä'.

28 'Äte häpxopmä kux, kopxi' hok xop pu häpxop popmög, tu 'Expān hak mög putup, tuk mög putat hä, kopxix 'āhak mög kamah.

29 'Ügmög, nüy 'āha hämmāxnä', pu Kunnix 'āha hämmāxnä xexka'.

30 'Ükxape xop, 'äte 'āxapit, yümüg xuxyā te mō yümüg yāy xe'ēgnäg hah, xix Topa Koxuk te mögyāy hah, xa mögnīynām, nüy Topa puk 'äktux nām, puk mūn ka'ogä',

31 tuk pēnä max, tuk mögnīy, puyīy Yoneo yög kuxa mām hok xop tek kummugä hok. 'Äpu, Topa tu' xax kamah, puyīy Yenoyanēn yög kuxa mām ka'ok xop 'ügputup, 'äte häpxopmä max hah.

32 Topa tek putup, kopxik mög 'üm 'āhah, tuk hittup xexka', nüy 'ämütik 'ükthi', nüy 'ämütik 'üghittup.

33 Püyā Topa 'ākuxa māmā', xix 'ämütik tihī'. Hamün!

16

Paot te' xape xop pu' āneo

1 Pep yā yümüg xape hex, tu' max, tu kōmēn Xēnkenex yög kuxa mām ka'ok xop pu häpxopmähä', tu' hok xop pu häpxop popmähä',

2 yīy nöm putup, nüy nō tu 'ätehet, yā yümüg xuxyā 'üyög kamah. Püyā' xohix hä tu' tehet, yā tikmū'ün punethok hä' xape, xik mūn hä' xape'.

3 'Äte Pinixit xix 'Ak pu 'āneo hōm, yäk mūn mütik Topa tu häpxopmähä', tu yäk mūn hä 'ükxape xe'e'.

4 Tu 'ā' xok'ax, yīy 'äte nöm pu: 'Ämax xe'e', kaxīy. 'Äte' puknög xop yög kuxa mām ka'ok xop xohix mütik häm'äktux, hu: 'Ämax xe'e'! Kaxīy.

5 'Äte' kuxa mām ka'ok xop pu 'āneo hōm kamah, nöm xop te 'Ak pet tu yāy tu nū'nähä'.

'Äte 'Ēpēn pu 'āneo hōm kamah, hak mūn hä 'ükxape', tu 'Ax yög tik te māxap, nüy kuxa yüm Yeyox kopah.

6 'Äte Mānix pu 'āneo hōm, ha 'āxop pu häpxopmähä punethok.

7 Xix 'Änenōn xix Yōn pu 'āneo hōm, ha kama Yoneo yög tihik, 'ügmūn putuk, tuk mūn mütik pip kanet kopah. Yeyox yög mō'pok xop te' yümüg max, ha' kuxa mām ka'ok hämāxap, hak-nāy tuk kuxa yüm ka'ok kamah.

8 'Äte 'Äpit pu 'āneo hōm, hak mūn hä yā 'ükxape' xe'e, yäg müg kuxap-xet yümüg xuxyā kuxa mütik.

9 Xix 'Ohmān pu 'āneo hōm, hak mū mütik häpxopmähä', tu Kunnix tu häpxopmähä', xix 'Extak pu 'āneo hōm, hak mūn hä 'ükxape xe'e'.

¹⁰ Xix 'Apet pu 'äneo hõm, yã Kunnix tu hãpxopmã xexka', ha tikmũ'ün te' yũmmũg. Xix 'Anixtop pet kopa' pip xop pu 'äneo hõm.

¹¹ Xix 'Enoniãm pu 'äneo hõm kamah, ha Yoneo yõg tik kamah, xix Nãxix pet kopa' pip xape xop pu 'äneo hõm kamah.

¹² Xix Tinipën xix Tinipox pu 'äneo hõm, yã Topa tu hãpxopmãhã', xix Pex, hak mũn hã 'ũkxape', tu yũmũg xuxyã tu hãpxopmãhã xexka'.

¹³ Xix Hop pu 'äneo hõm, yã hãpxopmãhã xexka Topa tu', xi' tut pu 'äneo, yãk mũn hã yã' tut.

¹⁴ Äte 'Axĩn pu 'äneo hõm, xix Penegõn pu' hõm, xix 'Ehẽm pu' hõm, xix Pa'ot pu' hõm, xix 'Ehãm pu' hõm, xix yũmũg xape xop te' pet kopa' pip pu 'äneo hõm.

¹⁵ Xix Pinot pu 'äneo hõm, xix Yonit pu' hõm, xix Neneo pu' hõm, xi' hex pu' hõm, xix 'Onĩm pu' hõm, xix Topa yõg tikmũ'ün xohix pu 'äneo hõm, nõm te' mütik pip xop pu 'äneo hõm kamah.

¹⁶ Yãy kep ha yãy mũg, nũy tu 'äneo. Yã Kunnix yõg tikmũ'ün xohix te 'ãxop pu 'äneo hõm.

Paot te hãmyũmmũgãhã'

¹⁷ 'ũkxape xop, 'äte xa hãm'ãktux: 'Og pa mõxip! Tikmũ'ün kummuk te xa hãm'ãktux hã' nõy yãnãn, puyĩy 'ãgãyã', puyĩy yãy xakot, ha Topa yõg hãm'ãktux yũmmũgã kummuk. 'Äpu, 'ünĩm nõm kummuk xop.

¹⁸ Tikmũ'ün te hãpxopmã kummuk ha xĩy, puxix Kunnix yũmũg xuxyã tu hãpxopmã 'ohnãg, pãyã hãpxop xak, nũy xit. Tu hãm'ãktux mãynãg, nũy yã tikmũ'ün pu mõ'ãmã', nũy tikmũ'ün hãmyũmmũg hok xop pu mõ'ãmã'.

¹⁹ Tikmũ'ün xohix te 'ãyĩpkox pip'ax yũmmũg, ha hãm'ãpak max'ax pu 'ãyĩpkox pip, 'ãyĩy xa tuk hittup, tup-tup, xa hãmyũmmũg, nũy hãpxopmã max, pãyã 'a 'äte putup'ah, xa hãpxopmã kummuk yũmmũg. 'Ämhok.

²⁰ Topa te yũmũg kuxa mãmmãhã', tu hãpxip kutõgnãg 'Ihã Hãmgãyãgnãg koxyõy putup, pu 'ãxop totnok nãm, tu' nõã'.

Pũyã yũmũg xuxyã Yeyox xa hãmmaxnã'!

²¹ Tĩmõn tek mütik hãpxopmãhã', tu xa 'äneo hõm, xix Noxit, xix Yaxãm, xix Xoxit, te 'äneo hõm kamah. Nũ tik xop xohix Yoneo xop, 'ũgmũn putuk.

²² 'ũgmũn Tex, tu Paot pupi tappet kax'ãmi', tu 'ãxop pu 'äneo hõm, yãk mũn Kunnix yõg, 'ãxop putuk.

²³ Xix Gax te 'äneo, hak mũg pip Gax pet tu', ha' kuxa mãm xop te nũ pet tu ta tu yãy tu nũ'nãhã', tu nũ'ãktettex. Xix 'Enax te 'äneo, ha kõmẽn yõg tayũmak xex, xix Koat te 'äneo, ha yũmũ'ã hã' xape'.

²⁴ Pũyã yũmũg xuxyã Yeyox Kunnix 'ãxop xohix ha hãmmaxnã'! Hamũn!

Paot te Topa xexka xe'ẽgnãg 'ãktux

²⁵ Äpu yũmũg Topa xexka 'ũm'ãktux! Tu 'ãkuxa mãmmã'ax ka'ok, xayĩy 'ãkuxa mãm ka'ok mõ' kuma' mõg. Yã hãm'ãpak'ax te' xuktux, 'äte nõm te xa' xuktux, tu Yeyox Kunnix xa' xuktux. Hõmã Topa te hãpxaptop, ²⁶ pa hõnhã hãmyũmmũgãhã', tu tik xop hittap hã' yũmmũgãhã', nõm xop te Topa pupi hãm'ãktux, tu tappet tu kax'ãmi', pu Topa yõg tikmũ'ün hãmyũmmũg, ha Topa hi xe'ẽgnãg mõ kuma' mõg, tu' xat, pu' hep xop xohix pu' xuktux, pu hãm xexka xohix yõg tikmũ'ün pu' xuktux, puyĩ' xohix yĩpkox pi', xi' kuxa mãm ka'ok hãm'ãpak max'ax kopah.

²⁷ Topap-xehnãg, 'ũnõy 'a' ti'ah, ha hãmyũmmũg xe'ẽgnãg. Pũyã' xohix Topa xexka xe'ẽgnãg 'ãktux, Yeyox Kunnix ha hãm'ãktux.

Tu ta tu' kux.

PAOT TE KONĪN XOP PU KAXĀMI' I

1 Ūgmūn Paot, ha Topa tek mūn yāykutnāhā, tu nūgkutnāhā 'āte hāpxopmā Yeyox Kunnix pu', tu xa kax'āmi', yūmūg xape Xox mūtik 'āte xa ka'āmi',

2 nūy tappet xa mō'kutnā, nūy kōmēn Konīn yōg kuxa mām ka'ok xop xohix hah mō'kutnā, 'ākuxa xohip-xet Kunnix kuxa mūtik hah. Yā 'āxop Kunnix yōg xop, nūy Topa hā tikmū'ūn xe'e'. Hak mū'āte tappet mō'kutnā'ax kamah 'ūkuxa mām ka'ok xop xohix hah, nōm xop te yūmūg xuxyā Yeyox Kunnix tu' xak, pu tu' kox ka'ogā'. Yā Yeyox Kunnix te' kuxa mām ka'ok xop xohix hā' xuxyā'.

3 Pūyā Topa yūmūg Tak 'ākuxa māmā', nūy tu yūmūg xuxyā Yeyox Kunnix mūtik xa hāmmāxnā'.

Topa te Kunnix hā yūmū'ā hāmmāxnāhā'

4 Topa te xa hāmmāxnāhā', hak hittup, tu: 'Āmax, Topah! Kaxīy. Yā Topa te xa hāmmāxnāhā', Yeyox te 'āxop pupi' xok ha hāmmāxnāhā'.

5 Yā 'ākuxap-xet Yeyox Kunnix kuxa mūtik, pu hām'āktux ka'ok ha 'āyummūgāhā, xa hāmyūmmūg xohix.

6 'Ākuxa mām ka'ok hām'āpak'ax kopah, ha Kunnix 'āktux,

7 yīy Topa te xa hāmmāxnā xexkah, 'Īhā 'āxop te Topa yōg hāptup mō'nā'ax xexka hip, 'Īhā yūmūg xuxyā Yeyox Kunnix nūn putup putpu'.

8 Ha 'āka'ogāp-tup, 'Īhā' nūn'ax hip, xayīy 'ākuxa tu max, 'Īhā yūmūg xuxyā Yeyox Kunnix xupep, nūy 'ūhep xop xohix yōg hāpxopmā'ax kopit.

9 Topa xip ka'ok, tu mō'āgmūg xohix hā' xip ka'ok, tu yūmūg mūtik tihī, tu yūmūg xānāhā, 'ū nū', nūy yūmūg kuxap-xet yūmūg xuxyā kuxa mūtik, nūy Topak-tok Yeyox Kunnix kuxa mūtik yūmūg kuxap-xet.

'Ūkuxa mām ka'ok xop te yāy tuk-mīy

10 Ūkxape xop, 'āte 'āxop tu' xak, xap-tox puxet xix kuxap-xet, nūy yāy mūtik ta tuk-mīy hok. Yā yūmūg xuxyā te 'ā' hōm yāy 'āxet'ax, 'āte xa' xak, xayīy 'āgāy hok.

11 Kono xape te xa 'āktux, tu 'āxop te yāy tuk-mīy'ax 'āktux,

12 ha kaxīy tikmū'ūn 'ūm te: "'Ūgmūn yā Paot yōg," kaxīy, ha' nōy te: "'Ūgmūn yā Apot yōg," kaxīy, ha' nōy te: "'Ūgmūn yā Pet yōg," kaxīy, ha' nōy te: "Pak mūn yā Kunnix yōg," kaxīy.

13 'Ok 'āxop te Kunnix yōg tikmū'ūn koxip putup yāy pu'? 'Ok 'ūgmūn te mīpkupnix tuk xok 'āxop pupi'? 'Āmhok! 'Ok 'āte yāy

'āxet'ax hōm, pu tikmū'ūn 'ūm 'āp-tox pix? 'Ap hōm'ah. Kunnix puxet te yāy 'āxet'ax hōm, pup-tox pix. 'Ak mūn'ah.

14 'Āte Kīnix xix Gax putox pix, pāyā tikmū'ūn nōy putox pix 'ohnāg, yīy 'āte: 'Āmax Topah! Kaxīy. Tuk hittup.

15 Yā tikmū'ūn te hām'āktux hok, hu: "Paot te yāy 'āxet'ax hōm puyīp-tox pix," kaxīy. Yā' koit.

16 Nāy. 'Āte 'Exteo putox pix kamah, xi' xape xop, pap-tox nōy 'ap pix'ah 'āte'.

17 Kunnix te nū 'ūm kutnā'ah 'ūp-tox pix. 'Āmhok. Pa nūgkutnāhā, 'ūyīy 'āte hām'āpak max'ax 'āktux, 'āte hām'āktux max pu kaxxop tuk-tup yūmmūg max, nūy Kunnix xexkanā'. Yā yūmūg pupi' xok mīkupnix tu', yā hām'āpak max'ax 'ōhōm.

Topa te Kunnix hā tikmū'ūn pu hāmyūmmūgāhā'

18 Tikmū'ūn kuxa yūm 'ohnāg hām'āpak'ax max kopah, puxi' yīxix, tu hām'āktux'ax putup nōg, tu: "'Āp-tox kummuk!" kaxīy, tu' yīpkox 'ohnāg. Pa yūmū'āte' xupak, tu: Hamūn! Yā hāmyūmmūg xe'e! kaxīy, tuk yīpkox pip hām'āktux'ax ka'ok pu', ha Kunnix yūmūg pupi' xok 'āktux, ha Topa ka'ok, hu yūmūg kuxa kummuk xit, nūy kuxa max mō'tat 'ūyānān tu'. Yā hām'āktux'ax ka'ok, tu yūmū'ā hā hām'āpak max xe'e'.

19 Yā Topa yōg tappet te:

"'Āte hām'āktux tox xop yōg hām'āktux kuxyāp-tup," kaxīy.

20 Piyāp xip tikmū'ūn te hitop tu yāy pe'paxex, hu: "'Āte hāmyūmmūg," kaxīy. Piyāp xip tikmū'ūn te hitop tu yāy pe'paxex, hu: "'Āte hām'āktux max," kaxīy. Yā' mōg, tu' yīpkox 'ohnāg. Topa te hām'āktux hitop'ax tu' mūg, hap-tox kummuk xop yōg hām'āktux.

21 Topa te hāmyūmmūg, tu' tux hok, pu tikmū'ūn hāmyūmmūg hok, nūy hāmpē'paxex'ax hā Topa mūn yūmmūg hok, 'Īhāk mū'āte hām'āpak max'ax 'āktux, puyīy tikmū'ūn yūmmūg, ha Topa te tikmū'ūn hā tu tehet, nōm xop kuxa mām ka'ok hām'āpak max kopah, hā tu tehet, 'Īhā' kuxa kummuk xit, nūy nō kuxa max mō'tat 'ūyānān tu'.

22 Yoneo xop te Topa yōg hāpxopmā xe'ēgnāg xak, nūy pēnā', nūy hām'āpak max'ax yūmmūg, ha Genex yōg puknōg xop te hāmyūmmūg xak,

23 pak mū'āte Kunnix 'āktux, ha mīpkupnix tu' xok yūmūg pupi', yā hām'āpak max. Pa Yoneo xop tep-tup nōg, xi' puknōg xop te hām'āpak'ax 'āktux kummuk,

24 pa Topa te yāy yōg tikmū'ūn xānāhā, pe Yoneo yōg tikmū'ūn, pe' puknōg, ha' yīmōgatux, pu hām'āpak max'ax 'āpax, ha Topa te Kunnix nū'kutnāhā', pu yāy yōg tikmū'ūn ka'ogā', nūy yāy yōg tikmū'ūn yūmmūgā'.

²⁵ Ha tikmū'ūn 'ūm te hitop tu hām'āktux, hu: "Yā hām'āpak'ax kummuk, tu hāmyūmmūgā hok," kaxīy. Nāy, tikmū'ūn te hām'āktux kohe'. Nōm hām'āpak'ax yā Topa yōg hāmyūmmūg'ax xe'e'. Ha' nōy 'ūm te: "Yā hām'āpak max'ax pu'uk, tu' ka'ogā hok," kaxīy. Pa Topa te' xuktux, yīy hām'āpak'ax ka'ok.

²⁶ 'Ūkxape xop, hāmpē'āpaxeh nōmhā. Hōmā 'āxop te hāmyūmmūg 'ohnāg, tu tikmū'ūn nōy xat 'ohnāg, ha Topa te 'āxānāhā', yā tikmū'ūn te xa 'āktux 'ūnōy pu', hu: "Hāmyūmmūg kutōgnāg 'ōhōm," kaxīy. Tu xa pe'paxex 'ohnāg.

²⁷ Pa Topa te nōm tikmū'ūn pu' hupmāhā', 'lhā 'āyīmōgatux, 'āk-tōgnāg hah 'āyīmōgatux, xix 'āpuk'uk hah 'āyīmōgatux.

²⁸ Hōmā 'āxop yā hām'ok xop, yā Topa hā' puknōg 'āxop, yīy Topa te 'āyīmōgatux, nūy nōm tikmū'ūn xop yōg hāmpē'paxex kuxyā',

²⁹ pu tikmū'ūn 'ūm te yāy mūn xexka pe'paxeh hok Topa keppah.

³⁰ Pa Topa te 'āxop hā yāykotīnnāhā', tu yāy tu nū' xok Kunnix hā', ha Kunnix te hāmyūmmūg xohix, tu yūmūg hīnnāhā', 'ū tu hī xe'e', yā Topa te mō yūmūg yāy, tu yūmūg kuxa tupmāhā', pu Topa hā yūmū'ā tikmū'ūn. Yā Kunnix te mīpkupnix tu' xok, nūy yūmūg yōg hāp'oxpā'mā'ax kummuk hā' pago.

³¹ Yīy Topa yōg tappet te: "Tikmū'ūn te hāmpē'paxex xexka putup, pūyā Topa yōg hāp'oxpā'mā'ax pe tu paxeh xexkah, nūy yāy yōg hāp'oxpā'mā max pe tu paxeh 'ohnāg," kaxīy.

2

Paot te Kunnix xok'ax 'āktux

¹ 'Ūkxape xop, hōmā 'āte xa hām'āktux, tu xa Topa yōg hām'āktux'ax 'āktux. Hōmā, hāmyāxatamuk xohix hā Topa yīy 'ohnāg, tu hām'āktux 'ohnāg, pāyā hōnhā Topa te hām'āktux, yīy 'āte xa' xuktux Topa pupi', tu hām'āktux max, puyīy kaxxop tuktop kama yūmmūg max.

² Yā 'āte hām'āktux'ax nōy putup 'ohnāg, nūy Yeyox Kunnix puxet 'āktux, nūy Yeyox xok'ax puxet 'āktux. Yā mīpkupnix tu' xok, yūmūg pupi' xok, nūy yūmūg kuxa kummuk xit, nūy kuxa max tat 'ūyānān tu'.

³ Hōmā 'āhak mōg, tu tak pu'uk, tuk kuxānōg,

⁴ tu Topa yōg hām'āktux xa' xuktux, xix xa hāmyūmmūgāhā', pāyā 'ap hām'āktux max'ah, puyīy tikmū'ūn te: "Yā hāmyūmmūg 'ōhōm!" kaxīy. 'Āmhok, pa Topa Koxuk tek ka'ogāhā', 'ūyīy Yeyox Kunnix 'āktux, hak ka'ogāhā kamah, 'āte hāp'oxpā'mā ka'ok, pu tikmū'ūn pēnā', nūy: "Yā Topa te Paot nū'kutnāhā', pu yāy pupi' hām'āktux yūmū'ā', tu hāp'oxpā'mā ka'ok xe'e'," kaxīy.

⁵ Yīy 'ākuxa mām ka'ok Topa kopah, hu 'ākuxa mām 'ohnāg tikmū'ūn yōg hāmyūmmūg'ax puknōg kopah, yā Topaxet kopa 'ākuxa mām ka'ok, 'ūka'ok hah.

Topa te hāmyūmmūg xe'ēgnāg

⁶ Ha 'āte' kuxa mām ka'ok xop pu hām'āktux, nōm xop te Topa Koxuk pu' yīpkox pip, ha 'āte Yeyox Kunnix 'āktux, 'ōhōm yūmūg pupi tu xok, nūy yūmūg kuxa kummuk xit, pāyā hām xexka yōg tikmū'ūn te hām'āktux kohe', tu Yeyox Kunnix putup nōg, xī' xexka xop tep-tup nōg, ha tikmū'ūn te nōm xat'ax xop pu' yīpkox pip putup 'ohnāg.

⁷ Yā 'āte Topa yōg hām'āktux 'āktux, ha hāmyūmmūg xe'e'. Hōmā hāmyāxatamuk xohix 'lhā', 'ap hām 'ūm xip'ah, pāyā Topa te hāmpē'paxex, tu yūmū'ā ha hāmmaxnā xexkap-tup, hu: "Pūyā yāy kutok tikmū'ūn pupi tu xok, nūy nō kuxa kummuk xit," kaxīy. Pāyā' xaptop, tu' xuktux 'ohnāg, tu' yūmmūgā 'ohnāg.

⁸ Pax pu Topa hā' puknōg xop yūmmūg, puxix yūmūg xuxyāp-tex hok, 'ūgāy tup-tex. Pāyā' kuxa mām 'ohnāg, hu yūmūg xuxyā max xe'ēgnāg putex.

⁹ Pa Topa yōg tappet te hāmmaxnā xexka 'āktux, tu yūmūg xuxyā xok yūmūg pupi'ax 'āktux, hu:

"Tikmū'ūn te' pēnā' 'ohnāg, tu' xupak 'ohnāg, tu' pe'paxex 'ohnāg,

pa Topa te hāmpē'paxex, nūy yāy yōg tikmū'ūn pu hāmmax nā xexkah, nūy tup-tup pax xop pu hāmmaxnā xexkah," kaxīy.

¹⁰ Yā hōmā Topa yīy 'ohnāg, pa hōnhā yāy Koxuk te yūmū'ā hām'āktux, nūy yūmūg yūmmūgā', puyīy xehomip xaptop 'ohnāg. Yā Topa Koxuk te tikmū'ūn yōg hāmpē'paxex xohix yūmmūg, tu Topa yōg putup'ax xohix yūmmūg, xix Topa yōg hāmpē'paxex xohix yūmmūg.

¹¹ Tikmū'ūn yāp-xet te yāy yōg hāmpē'paxex xohix yūmmūg, yāp-xehnāg te hāmyūmmūg, ha Topa Koxuk yāp-xehnāg te Topa yōg hāmpē'paxex yūmmūg.

¹² Ha Topa te yāy Koxuk xe'ēgnāg yūmū'ā nū'kutnāhā', tu' koxuk puknōg yūmū'ā nū'kutnā' 'ohnāg, yā Topa Koxuk te yūmū'ā hāmyūmmūgāhā', nūy Topa yōg hām'āktux yūmūgā'.

¹³ Yīk mū'āte Topa Koxuk yōg hām'āktux'ax 'āktux putup, xa tikmū'ūn yōg hām'āktux'ax pu 'āyīpkox hok. Yā kaxīy 'ūgmū'āte hām'āktux, tu Topa Koxuk yōg hām'āktux'ax yūmmūgāhā', tu Topa yōg tikmū'ūn pu hāmyūmmūgāhā', nōm xop te Topa Koxuk pu' yīpkox pip.

¹⁴ Pa Topa Koxuk te tikmū'ūn 'ūm kopa' xhip hok, puxix tu nōm ka'ogā hok. Nōm tikmū'ūn yā Topa hā' puknōg, tu' yōg

hām'aktux 'āpak, pāyā' yūmmūg 'ohnāg. Yā' Koxuk xe'ēgnāg te Topa yōg tikmū'ūn yāp-xet ka'ogāhā'.

¹⁵ Topa Koxuk te tikmū'ūn kopa xihp, puxix tikmū'ūn pa hāmyūmmūg, nūy hāp-xopmā'ax xohix kopit, xix hāmyūmmūg, pe' max, pe' kummuk. Pa' puknōg xop te nōm tikmū'ūn yōg hāp-xopmā'ax kopit hok.

¹⁶ Yīy Topa yōg tappet te:

“Ōk tikmū'ūn 'ūm te Topa yōg hāmp'e'paxex yūmmūg?

'Ok tikmū'ūn 'ūm te Topa pu hāmyūmmūgāhā'?

'Āmhok.

Topa yāp-xehnāg te yāy yōg hāmp'e'paxex yūmmūg,

xix yāy pu hāmyūmmūg xe'ēgnāg,” kaxīy.

Pa Kunnix te hāmyūmmūg, tu yūmū'ā hāmyūmmūgāhā', 'ūyīy putox puxet Kunnix putox mūtik.

3

Yūmū'ā Topa hā kāmānat

¹ 'Āte xa hāp-xe'e 'āktux. Yā 'āxop tek mūn hā 'āxape', pa 'āte xa hām'aktux yūmmūg, 'okpa Topa Koxuk te 'ākopa' xip. Yā 'āxop te hāmp'e'āpanōm kummuk, Topa hā' puknōg xop putuk 'āxop te hāmp'e'āpanōm, nōm te Topa pu' yīpkox 'ohnāg, xix kaxxop putuk hāmp'e'āpanōm, nōm xop te Topa yōg hām'aktux yūmmūg kutōgnāg, yā kaxxop putuk, 'ākuxa mām pu'uk tu'.

² Kaxxop pu'ūgnāg te' yōktat hep xo'op, tu' xit'ax ka'ok mā hok, ha kaxīy 'āxop pu'uk, tu Topa yōg hām'aktux yūmmūg kutōgnāg, hōmā xix hōnhā 'ākuxa mām pu'uk.

³ 'Āxop te Topa hā' puknōg xop putuk, tu hāp-xopmā kummuk, tu' yāyix pax, xix yīpkumīy pax, tu Topa hā' puknōg xop putuk, tu hāp-xopmā kummuk.

⁴ Tikmū'ūn puxet te: “Ūgmūn yā Paot yōg,” kaxīy, ha' nōy te: “Pak mūn yā 'Apot yōg,” kaxīy. Yā Topa hā' puknōg xop putuk hāp-xopmāhā'.

⁵ 'Apot yā 'a' xexka'ah, xix mūn 'ak xexka'ah. Yāk mū'āte Kunnix tu hāp-xopmāhā', puxi'. Tu xa hām'āpak max'ax 'āktux, ha 'ākuxa mām ka'ok yūmūg xuxyā kopah. Yūmūg xuxyā tuk mū'āte hāp-xopmāhā', yāk mūg xat, 'ūyōg kāmānat hah.

⁶ Tikmū'ūn te hāp-xa xexka hā' hām, ha tik hāmāxap te hāp-xop xap xok, ha' nōy kūnāy tu' hām, tu kōnāg hā hāp-xop xokax pix, puyīy tu tuk mō'ka'ok. 'Ūtix hām, pāyā Topa te hāmmaxnāhā'. Ha kaxīy 'āte xa hām'āpak max 'āktux, ha 'Āpot te xa hāmyūmmūgāhā'. Tikmūg hām, pāyā Topa te xa hāmmaxnāhā', tu 'ākuxa māmāhā'.

⁷ Kāmānat xop 'a' xexka'ah, pāyā Topa mūn xexka xe'ēgnāg, tu hāmmaxnāhā'.

⁸ Ha kāmānat xop xohix yāy putuk, ha Topa te' hām'ax tu' pagop-tup, tu kāmānat hām xexka tu' pagop-tup punethok, ha kāmānat hām kutōgnāg tu' pagok-tōgnāg putup.

⁹ Yā 'Apot xik mūn hām Topa tu', 'āxop ha tikmūg hām, puyīy Topa 'āka'ogā', yīy 'āxop te hāp-xa putuk, ha Topa te xa hāmmaxnāhā', ha 'āxop te mīptut putuk kamah, yā Topa yōg mīptut.

¹⁰ 'Ūxuxyā te' xat, pu mīptut max mīy, tu tik puxet xat hāmāxap, pu mīkaxxap mīm mōg hāp-kox kopah, pu nō māykup mō'tat, ha' nōy kūnāy tu' xat, pu nōm mō'xix hāp-kox kopah. Ha Kaxīy Topa tek ka'ogāhā', pu hām'āpak max 'āktux hāmāxap, puyīy tikmū'ūn kuxa mām ka'ok Yeyox Kunnix kopah, ha 'Apot kūnāy tu' nūn, nūy kuxa mām ka'ok xop yūmmūgā max.

¹¹ Mīptut xuxyā te māykup ka'ok putup, yā māykup te mīptut ka'ogāhā', pu tu yūm ka'ok. Ha kaxīy Topa te Yeyox Kunnix yāykutnāhā', pu yāp-xehnāg hā yūmūg pupi tu' xok, nūy yāp-xehnāg hā' kuxa kummuk xit, nūy kuxa max tat 'ūyānān tu'. 'Ap nōy xip'ah.

¹² Ha tikmū'ūn yāg te pipkup yānām 'āta hā hām'āta max mīy, xi' nōy te pipkup yānām ponnok hā' mīy, xi' nōy te xap max hā hām'āta mīy. Ha' nōy te mīmpe hā hām'āta kummuk mīy, xi' nōy te xuxnak hā' mīy, xi' nōy te xuxnāg xux hā hām'āta' mīy. Hā kaxīy Topa yōg kāmānat hām kamah. 'Ūyāg hām max, tu Topa yōg hām'āktux 'āktux, tu Topa yōg tikmū'ūn ka'ogāhā' pu tu hāmyūmmūg. Ha' yāg nōy hām kummuk, yīy Topa yōg tikmū'ūn pu'uk, tu hāmyūmmūg 'ohnāg.

¹³ 'Ūxuxyā te mīptut kummuk mīy, puxix kuxap hā mō'xut mō'ka'ok, ha' nōg. Hā kaxīy Kunnix yōg hāptup xe'e mō'nāp-tup, 'īhā Topa te yāy yōg kāmānat xop yōg hāp-xopmā'ax xohix kopit. Kāmānat hām kummuk, puxi' yōg hāp-xopmā'ax xaxogā'.

¹⁴ 'Ūxuxyā te mīptut max mīy, puxix kuxap hā mō'xut 'ohnāg, yā' yūm ka'ok. Kaxīy kāmānat hām max Topa tu', puxix Topa yōg hāp-xopmā'ax kopit, nūy nō kāmānat ha hāmmaxnā xexka'.

¹⁵ Mīptut kummuk mō'xut kuxap hā, puxix kāmānat te hām hok xip, tu tayūmak pop 'ohnāg, pāyā' xok'ah. Kaxīy Topa yōg kāmānat hām kummuk, puxix yāy kuxa tup, Topa te' tupmā hah, tu Topa yōg putat hām hok hā' mōg, pāyā Topa te nōm kāmānat pu pekkox yōg hāp-xop 'a' hōm putup'ah.

¹⁶ Yā 'āxop Topa pet xe'e', 'ākopa' xip tu', ha 'āxop te hāmyūmmūg, ha Topa Koxuk te 'ākopa' xip,

¹⁷ yīy Topa te 'āpēnā max, 'ākopa' pet tu'. Tikmū'ūn gāy te 'ākoxyōy putup, puxix Topa' yānān tu 'ūkoxyōy, 'āxop yā Topa pet xe'e'.

¹⁸ Pūyā 'āmūn yāy hā mō'āmā hok.

Tikmū'ūn te hāmpē'paxex, hu: “Āte hāmyūmmūg xexka!” kaxīy, pāyā' hitop tu hāmpē'paxex, yā Topa te: “Ōhōm hāmyūmmūg 'ohnāg, 'ūkuxa mām 'ohnāg tu,” kaxīy.

19-20 Topa hā' puknōg xop te: “Yā hāmyūmmūg nō'ōm,” kaxīy, puxix Topa te: “Pūyā yāy hā mō'āmā, hāmyūmmūg hok tu!” kaxīy. Yīy Topa yōg tappet te: “Topa te yāy mūn hā' puknōg xop yūmmūg, tu' yōg hāmpē'pānōm yūmmūg, ha hāmyūmmūg 'ūhitop tu', tup-tox kummuk xop putuk,” kaxīy.

21 Pūyā tikmū'ūn yāy mūn xexka 'āktux hok, tu yāy yōg hāpxopmā'ax tu' kuxa hittup hok. Yā hāpxop xohix 'ōgnū', pu Topa xa hāmmaxnā'.

22 Yīy Paot, xix 'Apot, xix Pet, 'ūxohix te 'āpēnā max, ha Topa te hām xexka mīy, nūy 'ākuxa hittupmā'. Tu 'ākuxa hūnnāhā', xayīy 'āxakix 'lhā, 'āmōg pekkox hah. Yā hōnhā Topa te mō'āyāy xe'ēgnāg, xix hōmā mō'āyāy xe'ēgnāg, xix hāptup 'lhā mō'āyāy xe'ēgnāg putup. Yā' xohix 'ōgnū',

23 ha 'āxop yā Kunnix yōg tikmū'ūn, ha Kunnix yā Topa yōg hāmyāy kutnā'ax xe'ēgnāg.

4

Yeyox yōg mō'pok xop

1 'Ūgmū'āte xa hā Kunnix yōg kāmānat, tu hāpxopmāhā', nūy Kunnix pupi xa hāmyūmmūgā', nūy xa Topa yōg hām'āktux xe'e 'āktux,

2 Yīy Topa tek mūg xat 'ū hāpxopmā max, nūy xa hāmyūmmūgā' max, ha yūmmūg xuxyā tek mū yōg hāpxopmā'ax pēnāp-tup, nūy yūmmūg, 'ok pek mū'āte hāpxopmā max, 'ok pek mū'āte hāpxopmā kummuk.

3 'Āxop tek mūg hām'ax pēnāp-tup. Pūyā tikmū'ūn pa te hāmyūmmūg tuk mūg hām'ax pēnā'. Yā' hitop. 'Āte yāy yōg hām'ax pēnā hok yāy pu kamah.

4 'Ūgkuxa te' mīy max 'āktux, pa yūmmūg xuxyā puxet tek hām'ax pēnāhā', tu' yūmmūg, 'ok pek hām max, pek hām kummuk.

5 Yīy 'ānōy yōg hāpxopmā'ax kopit hok, nūy nō 'āktux kummuk. Nāy, 'ūhip, pu Topa' kopit, 'lhā nū'. Tute hāpxop xaptop'ax mūg putup, xix tikmū'ūn yōg hāmpē'paxex yūmmūg putup, 'lhā Topa te hāpxopmā'ax max pu pago.

6 'Ūkxape xop, 'āte xa hām'āktux tap, tuk mūn 'āktux, xix 'Apot 'āktux. 'Ātek mūg 'āktux, xayīy 'āxop hāmyūmmūg, ha tappet te' xat, hu: “Tappet yōg hām'āktux pu 'īpkox pi',” kaxīy. Yā' kummuk, tik 'ūm 'āktux max, 'lhā' nōy 'āktux kummuk.

7 'Ok 'āxop te yāy xexka pe'āpaxex? 'Ok 'āxop te 'ānōy kutōgnāg pe'āpaxex? Yā' kummuk. Topa mūn te xa hāmmaxnāhā', tu' hok hā hāmmaxnāhā', xayīy yāy hitop xexka 'āktux hok!

8 'Āxop yā yāy pe'āpanōm 'ūptexop, tu yāy pe'āpanōm 'āxexka xop, tuk mūg pe'āpanōm kutōgnāg xop, Pāyā yāy mō'āmā'. 'Ūyā yūmmūg xohix xexka xop!

9 'Āte hāmpē'paxex. Yāk mū'ā mō'pok xop, pe Topa hā yūmmūg ka'ax xop, nūy tikmū'ūn 'ūgmūg kix, 'lhā xohix te' pēnāhā', xix pekkox yōg nū'pok xop xohix te' pēnā kamah.

10 Ha Topa hā' puknōg xop te: “'Ūp-tox kummuk,” kaxīy, huk mūg 'āktux, tu 'āxop 'āktux max, pāyā yūmmūg xohix Kunnix yōg tikmū'ūn. Hak mūg pu'uk, pa 'āka'ok, ha 'āp-tup pax, pak mūg putup nōg.

11 Yā putup tek mūg kix, hak mū'āte kōnāg tat'ax xak. 'Ūgmūg xax kunox, ha' gāy xop tek mūg kix, tu mūg xūyāghā', 'ak pet 'ūm yūm'ah.

12 Tuk mūg hām punethok nūy xit, 'lhā tikmū'ūn te: “Pūyā Topa 'ākix!” kaxīy. Hak mū'āte hām'āktux hā' yānān, hu: “Pūyā Topa xa hāmmaxnā'!” kaxīy. Hak mūg kummugāhā', pāyāk mū'āte' gāy xop yōg hām'āktux kummuk hā' tot, tu hāmmax hip.

13 Ha' gāy xop tek mū'ā hāpkummugāhā', tuk mūg mānōg, 'lhā mūg yīy pu'uk, nūy nōy gāy kuxyā'. Yā Topa hā' puknōg xop tek mūg putup nōg, tu: “Mōg, nūy 'āpep!” kaxīy.

14 'Āte xa kax'āmi', nūy xa hāmyūmmūgā'. 'Āte 'āxop putup pax, 'ūgkutok putuk hah, 'a 'āte xa' hupmāp-tup'ah.

15 Yā tik punethok te xa hāmyūmmūgā'ax, pak mūn puxet hā 'ōg 'ātak. 'Āte xa hā 'ātak, xa hām'āpak max'ax 'āktux tu', ha 'ākuxa mām ka'ok Kunnix kopah.

16 Hu 'āte xa' kax, pu hāpxopmā max, nūy 'ūgmūn putuk. Yā 'āte hāpxopmā max,

17 hu 'āte Timōn mō'kutnāhā', tuk mūn hā 'ūgkutnā', pu hāpxopmā nū mūtik, hak mūg tix hām max yūmmūg xuxyā pu'. 'Āxutigāp-tup, xayīy Topa yōg putat hā 'āmōg ka'ok, yā 'ākuxa mām ka'ok Yeyox Kunnix kopah, ha taxīy 'āte hāmyūmmūgāhā', 'ūkuxa mām ka'ok xop xohix pu hāmyūmmūgāhā'.

18 'Āxop yāy xexka pe'āpanōm, kopix 'āhak mōg hok.

19 Topa 'ūgputup, 'ū mōg, yā hāpxip kutōgnāg kopixik mōg, nūy nōm xop te hāpxopmā'ax yūmmūg. Ha' yīy ka'ok, yāy xexka pe'āpanōm tu'. 'Āpu hāpxopmā ka'ok kamah!

20 Topa te yāy yōg tikmū'ūn xat, puyīy yīpkox pi' xe'e, nūy hāpxopmā max. Tikmū'ūn te hitop tu hām'āktux, tu hāpxopmā max hok, puxix tu yīpkox 'ohnāg.

²¹ Pi'yā' mūn xatep-tup? 'Ok 'ūgmōg, nūy xikot hā 'ākix'ax? 'Ok pep-tup, 'ūyī'ax pu'uk hā 'āhittupmāhā'? Piya' mūn xatep-tup? Yā xatep-tup 'ūg 'āhittupmā, yīy hāpxopmā max.

5

Tik te' nōy hā' xupxet

¹ Tikmū'ūn te 'āxop 'āktux kummuk, yā 'āxop 'ūm yōg tik 'ūm te' nōy hā' xupxet kummuk, yā' xonnix kummuk, ha tikmū'ūn nōy te Topa hā' puknōg te' mīy 'ohnāg. Yā tik te yāy tak xetut mūg, nūy nū mūtik 'ānōm, tu hāpkummuk mīy pax.

² Tep te xīy 'āxop te yāy mūn max pe'āpanōm? Yā 'ākummuk! 'Āpu yāyhāhup, nūy tik kummuk xupmā.

³ 'Ūyāk xhip nōmhā 'āxop mūtik! 'Āte tik yōg hāpxopmā'ax kummuk kopit, 'Thā hāptox tuk xip, ha yūmūg xuxyā Yeyox Kunnix te' 'ā' hōm yāy 'āxet'ax, 'āte tik hāpxopmā'ax kummuk kopit.

⁴ 'Ūyāk xhip 'āxop mūtik, 'Thā 'āxop te yāy kotīnnāhā', ha yūmūg xuxyā te 'āka'ogāp-tup,

⁵ xa tik kummuk hōm Hāmgāyāgnāg pu'. Pūyā tu xok, pāyā Topa te' kuxa kummuk xit, pu' koxuk tu xip ka'ok, 'Thā yūmūg xuxyā Yeyox Kunnix nūn putpu'.

⁶ 'Āxop yāy mūn max pe'āpaxex. 'Ap max'ah. Xate hām hittap yōg hām'āktux yūmmūg, yīy: "Pām yōg tokatogā'ax kutīgnāg te pām xexkanāhā'," kaxīy.

⁷ Yā tokatogā'ax te hāpkummuk mīy'ax putuk, yīy hāpkummuk mīy kux, nūy tu max, tu pām putuk'ax, pām tokatok hok putuk, yā' tūmnāg. Hāpxip kutōgnāg 'Thā 'ūgmū yōg Yoneo xop te 'āmuk xexka 'āxet'ax Nōā'yēn mīy putup, 'Thā kahnēn putex, pu' xohix' mā'. Ha Kunnix te yūmū yōg kahnēn xe'e', tu mīpkupnix tu' xok tap yūmūg pupi', hu yūmūg hā kahnēn xe'e'.

⁸ 'Āpu yūmūg Kunnix pekpaxeh, nōm te yūmūg pupi' xok pekpaxeh, yā 'āmuk xexka Nōā'yēn putuk, yīy yūmū'āte hāpkummuk mīy kux, ha pām yōg tokatogā hok putuk. Yā pām te hāmyok mīy'ax 'āktux, xix hāmmxānā'ax 'āktux.

⁹ 'Āte xa kax'āmi tap, pu tikmū'ūn kummuk mūtik 'ākotīnnā hok, nōm tikmū'ūn te' nōy hā' xupxet.

¹⁰ 'Āxop te hām xexka tu' pip, yīy hāpkummuk mīy xop te xa yāy kote' pip. Yī' xohix tu 'āxop 'āxatat hok. Ha nōm kummuk xop te' nōy hā' xupxet, xi' nōy yōg hāpxop putup pax, xix hāpxopmā kummuk xix topa komut pu nū' xup.

¹¹ Pa tikmū'ūn te yāy 'āktux, tu' kuxa yūm ka'ok'ax 'āktux, tu hām'āktux max, pāyā' nōy hā' xupxet kummuk, xi' xupkumīy, xix topa komut pu nū' xup, xix kenmuk xo'op tu mōktu paptux, xi' nōy kupex, xix hāpxop hā'

xupxet, puxix nōm tu 'āxatat, nūy nū mūtik 'āxit hok.

¹²⁻¹³ 'Āte Topa hā' puknōg xop yōg hāpxopmā'ax kopit hok. Yā Topa mūn te' kopit putup. Pa 'āxop te yāy yōg hāpxopmā'ax kopit'ax. Yā' max xa' kopit. Topa yōg tappet te: "Tikmū'ūn kummuk xupmā', puyīy 'āxop mūtik tu ti hok," kaxīy.

6

Tikmū'ūn te' nōy kumīy kummuk

¹ 'Āxape te xa hāpkummugā', 'āpu 'āxape nōy ha mōg, 'āxape pa te hāmyūmmūg ha 'āmōg, pu 'ātix kopit. 'Āmōg hok Topa hā' puknōg xop hah, pu tu' kopit, pāyā 'āxape ha 'āmōg, tik kuxa yūm ka'ok Yeyox kopa ha 'āmōg.

² 'Ok yūmmūg hok xate'? Topa yōg tikmū'ūn te Topa hā' puknōg xop hāpxopmā'ax kopit putup. 'Ok 'āpa te hāmyūmmūg hok?

³ Yā yūmū'āte pekkox yōg nū'pok xop yōg hāpxopmā'ax kopit putup kama, hu yāy xape yōg hāpxopmā'ax kopit'ax nōmhā, puyī' nōy hā tu xape 'ūxehel.

⁴ 'Āxape te 'ākte'ex kummuk, yā hāpxopmā'ax kutīgnāg, ha 'āxape kummugāp-tup 'ūyānān tu', puxix tik puknōg tu' xax hok, puyīy tu' kopit. Kaxīy hok.

⁵ 'Ok yāyhāhup hok xate'? 'Ok 'āxop mūtik xip hok tik pa te hāmyūmmūg, puyīy 'ātix hu' kopit max?

⁶ Yā' xip! 'Āte' yūmmūg! Pa 'āxop gāy, tu' kuxa mām hok xop ha 'āmōg, nūy tu' xax, pu 'ōg hāpxopmā kummuk'ax kopit.

⁷ 'Āxop yāytukmīy tik puknōg keppah, yā' kummuk. 'Ok xate hāmyūmmūg'ax xohix xaxok? 'Ūtux hok pu 'āxape 'ākummugā'. 'Ūtux hok pu 'āxape 'ōg hāpxop pa'.

⁸ Pa 'āxop te 'āxape pu kummugā pax, ha' nōy yānān tu' ākummugā pax. 'Āhup! Puxi!' 'Āxop xape xop.

⁹⁻¹⁰ Tikmū'ūn kummuk te pekkox ha' mōg 'ohnāg, nōm xop Topa pu' yīpko'x 'ohnāg, 'ap mōg putup'ah hāpkummuk mīy'ax xop xohix, nōm te' nōy hā' xupxet, xix nōm te topa komut pu nū'xup, xix nōm te' nōy xetut hā' xupxet, xi' nōy yīpko'x hā' xupxet, xix nōm tik te tik nōy pēnā kummuk, xix 'ūn te 'ūn nōy pēnā kummuk xix nōm te hāpxop hā' xupxet, xix nōm xupkumīy, xix nōm te kenmuk xo'op tu mōktu paptux, xix nōm te' nōy kupex, xix nōm te hāpxopmā kummuk pax.

¹¹ Hōmā 'āxop 'ūm te hāpxopmāhā kaxīy, pa Topa te 'ākuxa tupmāhā', xa 'ākuxa max, ha hōnhā 'āxop te Topa hā tikmū'ūn, yūmūg xuxyā Yeyox Kunnix hā 'āxop yā Topa yōg tikmū'ūn, xix Topa Koxuk hā 'āxop yā Topa yōg tikmū'ūn.

Topa tu hāpxopmā max

¹² Pa tikmū'ūn 'ūm te hām'āktux'ax, hu: "Āte yāy putup'ax xohix mīy'ax," kaxīy, Hamūn. Pāyā yāy putup'ax mīy, puxix xa kummugā'ax. Āte hāp̄xopmā'ax xohix kamah, pa 'āte' tux hok, pu nō hāp̄xopmā'ax 'ūgkummugā hok.

¹³ Pa tikmū'un nōy te hām'āktux'ax, hu: "Topa te hāp̄xop xit'ax mīy pu tikmū'ūn mā', ha Topa te tikmū'ūn tex mīy, pu yīy tikmū'ūn nō tu xit," kaxīy. Hamūn. Pa Topa te tikmū'ūn tex nōāp-tup, xī' xit'ax nōāp-tup kamah. Yā yūmūg yīn mīy, 'ūyīy yūmūg hāp̄xopmāhā yūmūg xuxyā tu', yūmūg yīn 'ūm mīy'ah, 'ūyīy yūmūg nōy hā' xupxet. Āmhok. Yā yūmūg yīn yā yūmūg xuxyā yōg.

¹⁴ Topa te yūmūg xuxyā putpu' hīnnāhā, hu yūmūg hīnnā'ax putpu kamah, 'ūka'ok tu'.

¹⁵ 'Ok 'āxop te hāmyūmmūg hok? 'Āxop yā Kunnix hā 'āyīn puxet, Yā' kummuk xexka, xa Kunnix yōg tik te xotit mūtik 'ānōm. Yā' xotit hā' yāyhā yīn puxet. Pūyā Topa 'ātux hok, xayīy 'ānōm hok!

¹⁶ 'Ok 'āxop te hāmyūmmūg hok? Yā tik te xotit mūtik nōm, puxix 'ūn hā' yīn puxet, Topa yōg tappet te: "Yā' tix te yāyhā' yīn puxet," kaxīy.

¹⁷ Pa tikmū'ūn kuxa yūm ka'ok Yeyox kopah, puxix tu kuxap-xet yūmūg xuxyā kuxa mūtik.

¹⁸ 'ūg'āpax, xayīy 'ānōy hā 'āxupxet hok. Hāpkummuk mīy'ax nōy tikmū'ūn yāy yīn kummugā'ah, pa tikmū'ūn xonnix, puxix yāy yīn kummugā'.

¹⁹ 'Ok 'āxop te hāmyūmmūg hok? Yā Topa Koxuk xip 'ākopah, ha Topa te nū'kutnāhā', pu 'āmūtik tu xip ka'ok, 'āxop yā yāy mūn xat'ah, 'āmhok, yā Topa te yāy yōg tikmū'ūn xat.

²⁰ Topa te 'āpop, tu hāp̄xopmā ka'ok, nūy 'ākuxa tupmā', yā yāy kutok xok 'āxop pupi', nūy 'ākuxa tupmā', yīy hāpkummuk mīy hok, pu yī' puknōg xop pēnā', tu: "Āxop yōg Topa max, tu 'āka'ogāhā', xayīy hāp̄xopmā max!" kaxīy.

7

Tikmū'ūn te yāyta'ax

¹ 'Āxop te 'ā' kax'āmi tappet tu, tu tappet tu yāy 'āktux, tuk yīkopit, tu: "Ok max tikmū'ūn yāyta'ax?" kaxīy. Yā' max pu yā tik yāyta'ax hok, nūy yā' hok xip,

² pa tikmū'ūn punethok te' nōy hā' xupxet, yīy 'āte: Yā' max tik yāy yōg 'ūn mūy, pu 'ūn kamah yāy yōg tik mūy.

³ Āte xe' xat, pu' yīp̄xox yāy xetut mūtik tu nōm max, xī' xat, pu' xetut yāy yīp̄xox mūtik tu nōm max.

⁴ 'Ūxetut yīn yā' yīp̄xox yōg yīn, yī' yīp̄xox te' xat, ha' yīp̄xox yīn yā' xetut yōg yīn, yī' xetut te' xat.

⁵ Xatix yāy mūn hōm, nūy 'ū nū mūtik 'ānōm, nūy 'āti ka'ok. Pa Topa pu hām'āktux pax, 'īhā 'āp-tox puxet xix 'ākuxap-xet, hu ta hāp̄xip kutōgnāg 'īhā 'āhok 'ānōm. Pa hām'āktux kux, 'īhā nū mūtik 'ānōm 'ūxeheh, pu Hāmgāyāgnāg xatix kummugā hok, 'ānōm putup hah.

⁶ 'Āxep xat'ah 'āte nōmhā, pāyā xa hāmyūmmūgāhā'.

⁷ 'Ātep-tup, pu tikmū'ūn xohi' hok pi', 'ūgputuk nūy, pa Topa te tikmū'ūn xohix ka'ogāhā', pu tu hāp̄xopmā max, tu tik puxet ka'ogāhā pu' hok xip, xī' nōy ka'ogāhā pu yāyta max.

⁸ Yīy 'āte' hok pip xop pu hām'āktux, pu yī' hok pi', hu yāyta hok 'ūg putuk nūy. Ha' hok mām xop pu 'āte hām'āktux kamah, pu' hok mām.

⁹ Yāyta'ax tu te 'āp-tex, 'āpu yāyta'ax. Yāyta'ax 'ūmax, yāyta'ax xūy mūn yā' kummuk, yā kuxap putuk 'ākopah.

¹⁰ Ha 'āte tikmū'ūn yāyta xop pu hām'āktux, yā yūmūg xuxyā te' xat, pu tu yāy xat'ah hok.

¹¹ Yāy xat'ah, puxi' hok xip, tu' nōy mūg hok, tu mōktu xe yāy yīp̄xox mūg, xix yāy xetut mūg, nūy nū mūtik tu ti ka'ok 'ūxeheh.

¹² Tikmū'ūn nōy pu 'āte hāmyūmmūgāhā', 'ap Topa te' xat'ah. Tikmū'ūn kuxa yūm ka'ok Kunnix kopah, ha 'ūn mūg, nōm kuxa yūm 'ohnāg, tu' yīp̄xox mūtik tip-tup, puxix 'āti'. Pūyā' xetut nīm hok.

¹³ Ha 'ūn nōy kuxa yūm ka'ok Kunnix kopah, tu tik mūg, nōm kuxa yūm 'ohnāg, ha' yīp̄xox te nū mūtik nōm putup, puxix 'āti'. Pūyā' yīp̄xox nīm hok.

¹⁴ Yā Topa te' yīp̄xox ha hāmmaxnā'ax, tu' xetut kuxa yūm'ax hā hāmmaxnā'ax, tu 'ūn nōy ha hāmmaxnā'ax, 'ūyīp̄xox kuxa yūm'ax hā' hāmmaxnā'ax, pu yīy tuk-tok xohix hu Topa yōg, ka Topa hā' puknōg xop putuk, nōm te Topa yūmmūg 'ohnāg.

¹⁵ Pe' yīp̄xox kuxa yūm hok te' xetut nīm putup, pe' xetut kuxa yūm hok te' yīp̄xox nīm putup, pūyā 'ā' nīm, ha' kux. Pūyā' kuxa mām ka'ok xop pip. Yā Topa te yūmūg kuxa māmāhā', 'ūyīy nōy xop mūtik tu ti max.

¹⁶ 'A xate hāmyūmmūg'ah, 'a 'ānōy kuxa yūmmūg'ah. 'Ok pe' kuxa yūm'ax Kunnix kopah, 'ok pe' kuxa yūm hok. Pūyā mōg, 'ūgmīy hok.

Topa pu' yīp̄xox xihip

¹⁷ Pūyā tikmū'ūn xohix hāp̄xopmā max. Topa te' xānāhā', pu tu hāp̄xopmā max tikmū'ūn kopah. Pūyā tu pip ka'ok, nūy yāy yōg hāp̄xopmā'ax mīy. Yā 'āte tikmū'ūn kuxa mām xop xohix pu hāmyūmmūgāhā'.

¹⁸ Tik te yāy nāg xax yīmap tu' xak tap, 'īhā Topa te' xānāhā', puxi' xak hok, nūy koex xut. Ha tik te yāy xax xak 'ōhnāg 'īhā Topa te' xānāhā', puxi' xak hok, nūy xax xak hok.

¹⁹ Yā' xax xak'ax, xi' xax xak hok, yā Topa pu yāy putuk, pa Topa yōg xat'ax pu 'īpkox pi', nūy hāpxopmā max.

²⁰ Pūyā' xohix hāpxopmā max, Topa te' xānāhā', pu tu hāpxopma max tikmū'ūn kopah. Pūyā' tu pip ka'ok, nūy yāy yōg hāpxopmā'ax mīy.

²¹ 'Ok 'āhām 'āxat'ax pu, 'Ihā Topa te 'āxānāhā'? 'Ok 'āhok hā 'āhām, tu tayūmak 'ūm pa hok? 'Ūxutigā hok, pa mōg'ax nūy 'ānōy pu 'āhām, nūy tayūmak pop, puxi mōy, tu' hām.

²² Yā yūmūg xuxyā te 'ākuxa kummuk xut, 'Ihā 'āxānāhā', tu' xut, xa mōg, xayīy yūmūg xuxyā hā 'āptix, nūy nōm pu 'āyīpkox xi-hip. Kamah tik hām 'ūnōy pu', nūy tayūmak pop, yā kamah Kunnix hā 'ūptix, nūy yūmūg xuxyā pu' hām 'ūhok hā, nūy nōm pu' yīpkox xip.

²³ Topa te yāy kutok nū'kutnāhā', pu 'āxop pupi tu xok. Yā yāy kutok yāp-xehnāg, ha Topa te mō'yāy xe'ēgnāg, pāyā nū'kutnāhā', pu 'āxop pupi tu xok, puyīy 'āxop hā 'āxuxyāp-xet.

²⁴ Topa te 'āxānāhā', tu 'āyīmōgatux. 'Āpu pi ka'ok, nūy Topa pu 'āhām mō kuma mōg.

²⁵ 'Ūkxape xop: Xatek yīkopit, hu: "'Ok max tikmū'ūn yāytax?" kaxīy. Topa tek xat'ah, 'ūyīy 'āte' hok pip xop pu hām'āktux, pāyā 'āte hāmp'e'paxex max, ha Topa tek kuxa ka', yīy 'āte nōm xop pu hāmyūmmūgā'ax.

²⁶ Hōnhā' gāy xop te yūmūg xūy gā punethok, yī' max, pu tu tik yāyta hok.

²⁷ 'Ok xate 'ūn mūg'ax, nūy yāytax? 'Āpu, yāyta'. 'Ok yā' hok 'āxip? 'Āpu 'āhok xihip.

²⁸ Yā' max pu' xetut mīy, yā hāpkummuk 'ohnāg. 'Ūn hok yūm yāytax, hu ta hāmmax mīy, pāyā' yāy kuxop'ax punethok, ha 'āte 'āp-tup'ah, xa yāy kuxop.

²⁹ 'Ūkxape: 'Āte xa hām'āktux, nūy xa hāmyūmmūgā'. Yā hāmyāxatamuk xohix yōg 'āmnīy xox putox, ha hāpxip kutōgnāg 'Ihā tikmū'ūn xohix hok pip'ax putuk hāpxopmāp-tup, 'ok pe' yāytaha', 'ok pe' yāy tahok.

³⁰ Ha' kuxa hittup 'ohnāg xop te' kuxa hittup xop putuk'ax, xi' kuxa hittup xop te' kuxa hittup 'ohnāg xop putuk'ax, xix hāpxop pop xop te hām hōgnāg pip xop putuk'ax,

³¹ ha nōm xop te hāpxop hā' hām xop te' nōy xop putuk'ax, nōm xop te' yāy kuxop 'ohnāg putuk'ax. Yā hāpxip kutōgnāg 'Ihā hām xexka nōg putup.

³² 'Āte 'āp-tup nōg, xa yāy kuxop, nūy hāpxop xak'ax tat. 'Ūhok pip xop te yūmūg xuxyā kak, nūy tu hām max, puyīy tu xuxyā kuxa hittupmā'.

³³ Pa' yīpkox xop te hāpxop xak'ax tat, puyī' xetut kuxa hittupmā'.

³⁴ Tu yūmūg xuxyā pu hāpxopmā kamah, yīp-tox tix, xi' kuxa tix. Ha' xetut xop te

yūmūg xuxyā pu hāpxopmāp-tup, yāp-tixix, pa' yīpkox kuxa hittupmāp-tup kamah, hu yāy kuxop, tup-tox tix, xi' kuxa tix.

³⁵ 'Āte 'āxop hāk putup, nūy mō'ānīynām, yīy xa hāmyūmmūgāhā'. 'A 'āte 'ākummugāp-tup'ah, pāyā 'āp-tup, xa 'āxop hāpxopmā max, nūy tu māynāg mīy, nūy 'ākuxa hittup, nūy 'ap-tox puxet hā, xix 'ākuxa 'ākuxap-xet hā Topa xa tu hām.

³⁶ Tik te yāyta'ax, pa yāyta hok pe'paxex, tu' xetut 'ap nōm yūmmūg'ah, tu' mūg putup, pūyā' mīy. 'Ap hāpkummuk 'ūm mīy'ah.

³⁷ Pa tik te' hok xip putup tu yāy hok, tu' max pe'paxex, pu' xetut nīm, nūy nū mūtik nōm 'ohnāg, puxix yāyta hok, pāyā' hok xihip.

³⁸ Tik te' xetut xip tap mūg, nūy nū mūtik yāytax, yā hāpxopmā max, pa tik te' mūg 'ohnāg, nūy yā' hok xip, yā hāpxopmā max xe'ēgnāg.

³⁹ 'Ūn te' yīpkox mūg, nūy nīm hok, pa' yīpkox xok, puxix tu kux. Yā' max. pu' nōy mīy, nūy xe yāytax, nūy nōy kuxa yūm ka'ok'ax mūtik yāytax.

⁴⁰ Pa 'āte hāmp'e'paxex, hu: Yā' max xe'e, pu' hok tu xip ka'ok. Yā kaxīy Topa Koxuk te 'ā hāmyūmmūgāhā'.

8

Tikmū'ūn te xogyīn hōm topa komut xop pu'

¹ 'Āxop tek yīkopit, hu: "'Ok max, 'ūgmūg xit'ax xohix mā'?" kaxīy. Yīy 'āte hāpxop xit'ax 'āktux putup, tikmū'ūn te' xit'ax hōm topa komut xop pu'. Tikmū'ūn te hāpxe'e 'āktux, hu: "'Yūmūg xohix te hāmyūmmūg," kaxīy. Pa hāmyūmmūg'ax kutōgnāg te hāpkummugāhā', 'Ihā tikmū'ūn yāy mūn xexka pe'paxex, pāyā tikmū'ūn te' nōy putup pax, tu' nōy ka'ogāhā', tu hāmyūmmūg xe'e'.

² Tikmū'ūn te yāy pe'paxex, hu: "'Āte hāmyūmmūg!" kaxīy, puxix hāmyūmmūg 'ohnāg,

³ pa tikmū'ūn te Topap-tup pax, puxix yā Topa te nōm yūmmūg.

⁴ 'Āte xa topa komut 'āktux'ax. Yūmū'āte' yūmmūg. Topa komut xop 'ap xe'e'ah. Yā mō'āmā'ax xop, Topa yāp-xehnāg xip pexkox tu',

⁵ pa Topa hā' puknōg xop te komut xop 'āxet "topah", ha topa komut pip punethok, hām nōgnōy tu' pip, xix hām tu' pip, ha kamah tikmū'ūn xuxyā punethok pip.

⁶ Pa yūmū'āte Topap-xehnāg yūmmūg, yā Kunnix hā mūnūn tu yūmūg 'Ātak, tu hāpxop xohix mīy, ha Topa tu yūmūg hi'. Ha yūmūg xuxyā yāp-xet xip kamah, yā Yeyox Kunnix, tu hāpxop xohix mīy kamah, yāy Tak mūtik, xi' hep xohix xop mīy, hu yūmūg mīy kamah.

7 Pâyâ' kuxa mām ka'ok xop yā xohix te' yūmmūg'ah, 'ūyāg te topa koumut xop pe'paxex tap, xix hōnhā pe'paxex kamah, tu hāpxop xit'ax pe'paxex, hu: "Yā tikmū'ūn te nōm xit'ax hōm topa komut pu'," kaxīy. Tu' kuxa hittup 'ohnāg, tu' tux hok pu tu xit hok, 'ap xit'ax māp-tup'ah.

8 Pa hāpxop xit'ax 'ūm te yūmmūg kuxa tupmā 'ohnāg, pu Topa yūmmūg putup! 'Āmhok. 'Ok pe' xit'ax mā', 'ok pe' xit'ax mā hok, puxix yūmmūg kuxa kummugā 'ohnāg.

9 'Ōg pa 'āti', yāy putup'ax mīy hok, ka xate 'āxape pu'uk pu hāpkummugā', tu' mōgā kummuk, pu tu yāy pu hāpkummuk mīy.

10 'Āxape kuxa yūm pu'uh, ha' kuxa te' tux hok pu' xit'ax 'ūm mā hok, tu 'āxit pēnāhā', xate komut xop yōg xit'ax māhā', puxix 'āxape' māp-tup, 'Īhā' kuxa te' tux hok pu' mā hok.

11 Ha Kunnix xok 'āxape pu'uk pupi', pâyā 'āxape te Topa yōg putat xak, nūy 'āpe mōg, nūy 'āmūn pu' yīpkox xip, yīy ta 'ānōy mōgā kummuk,

12 tu 'āxape kummugāhā', hu Kunnix pu hāpkummugāhā kamah, Kunnix te 'āxape pupi' xok hah.

13 Yīy 'āte xogyīn mā hok, kak xape mōgā kummuk, pu tu yāy kuxa pu hāpkummuk mīy, 'ūkxit hah.

9

Yeyox te mō tik kutnāhā'

1 'Ok 'āte yāy xat hok? Yāk xat. 'Ok Yeyox Kunnix te nūgkutnā hok? Yā nūgkutnāhā'. 'Ok 'āte yūmmūg xuxyā Yeyox pēnā hok? Yā' pēnāhā'. Yeyox pu 'āte hāpxopmāhā', 'Īhā xa hām'āpak'ax max 'āktux, yīy 'ākuxa mām ka'ok yūmmūg xuxyā kopah.

2 Yeyox Kunnix te nūgkutnāhā', pâyā' kuxa mām xop nōy tek mūn pu' yīpkox 'ohnāg, ha 'āxop tek mūn pu' yīpkox pip, yā 'āmōg Topa yōg putat hā, ha tikmū'ūn xohix te' pēnāhā', hu hāmyūmmūg, yā yūmmūg xuxyā te nūgkutnāhā', 'āte hām'āpak max'ax 'āktux.

3 Tikmū'ūn tek kummuk 'āktux, kopxix yāy 'āktux,

4 hu: 'Ok tux hok 'ā' hōm 'ūkxit'ax, xix xo'op'ax 'ūghām hah?

5 Pax 'ūkxetut mīy, ha' kuxa mām ka'ok, 'ok 'āxop tek tux hok 'āte nōm mōgā', pu nū mūtik mōg, nūy hām'āpak max'ax 'āktux? Yā mō'pok xop nōy te' xetut xop mōgāhā', yā yūmmūg xuxyā Yeyox taknōy xop te' mōgāhā', xix Pet kama te' xetut mōgāhā'.

6 Yā Maname xik mūn puxet hām, 'ūgmūg yīm hāk mūg hām, nūy xit, nūy tu pip'ax tu' pago. Yeyox yōg mō'pok xop nōy te' hok hā hāpxop pop, hāmyūmmūgā'ax tu' pop.

7 'Ok xonat 'ūm hām, 'ok yāy yīm hā' hām, nūy xit, nūy pip'ax tu' pago? 'Ap hām'ah! Yā gohet te' pago. Tikmū'ūn 'ūm te yāy yōg

mīnta xut hok, nūy mā'? Yā' māhā'. 'Ūxohix te yāy yōg kup tu' xut mīnta, tu' māhā'. Maket 'ūm te' yōg mūnūytut hep xo'op hok? Yā' xo'op!

8 'Ūxohix te' yūmmūg, yā hāpxopmā'ax max, pu yāy hām'ax hā tu xit, xix tu pet, yīy Mōyyex yōg xat'ax kamah yā hām'āktux,

9 tu: "Mūnūytut tak yīkox hīy hok, puyī' xit hok, 'Īhā' xuxnāg xetox xap mōy tu' ton-nok. Pūyā' xux mā'," kaxīy. 'Ok Topa te hām'āktux, tu mūnūytut tak putup pax'ax 'āktux? 'Āmhok.

10 Pa yūmmū'ā' xuktux, 'ūyīy yūmmūg yāy hām'ax hā yūmmūg xit, xik pet. Tikmū'ūn te hām'āpak max'ax 'āktux, puxix tik putuk, nōm te hāpxop xap xok, ha tikmū'ūn te hāmyūmmūgāhā', puxix tik putuk, nōm te hāpxop ta'ax nūnnāhā', yā' xohix te yāy hām'ax hā' xit, xī' pet. Kaxīy Maname xik mūn hām, nūy Topa yōg hām'āktux 'āktux. Yā' hām'ax xe'e'!

11 'Ūgmū'āte xa hām'āpak max'ax 'āktux. 'Ok 'āxop tek mū'ā ta nemēn hok, nūy hāpxop 'ūgmū'ā popmā 'ūyānān tu'? Yā 'āxop te ta nemēn.

12 Yūmmūg xuxyā yōg tik mō'pok xop te' hip, xa tu' popmā hāpxop. Yā' max, pa 'āxop tek mū'ā' ta nemēn hāmāxap.

Pâyāk mū'āte xa tu' xak hā hāmhōgnāg, nūy 'āxop pu hupmā hok, nūy Topa puk mūg hām max.

13 'Āxop te hāmyūmmūg. 'Āmānex xop te Topa pet xexka kopa' hām, tu Topa pet tu' xit'ax pop, nūy mā', ha tikmū'ūn te xokxop mō'hap, nūy Topa pu hāxyā, ha 'āmānex xop te xogyīn yāg paha', tu' māhā'.

14 Ha kaxīy yūmmūg xuxyā te' xat, pu' yōg kāmānat xop kama tu xit, tu yāy yōg hām'ax hā' xit, tu hām'āpak max'ax 'āktux hu hā' xit'ax pop hām'āpak xop tu'.

15 Hāmyāxatamuk xohix hā 'āte hāmyūmmūgāhā', tu hāpxop 'ūm xak 'ohnāg, xak mū'ā pago, xix hōnhā 'āte 'a' xak'ah kamah. 'Ūyāk xok, pâyā hāpxop 'ūm xak 'āte putup'ah. 'A xak xet'ah 'āte'.

16 'Āte hām'āpak max'ax 'āktux pax, tuk hit-tup, pa' kummuk 'āte yāy xexka pekpaxex, hām'āpak'ax 'āktux tu'. Yā 'āte ta nemēn Topa pu', nūy hām'āktux. 'Āte hām'āktux hok, puxix Topa 'ūgkummugā'.

17 Yīy 'āte hām'āpak max'ax 'āktux putup pax, tu hāmmax hip kamah, pu yūmmūg xuxyā 'ā hāmmaxnā'. 'Āte hām'āktux, Topa tek xat hah, yā Topa te 'ā' hōm 'ūghām'ax.

18 'Ok Topa te 'ā' pagop-tup? Tu te pago hā xīy? Yāk kuxa hittupmāhā', nūy hām'āpak max'ax 'āktux, nūy hok hā' xuktux, kaxīy Topa te 'ā' pago, tuk kuxa hittupmāhā', ha 'āte' nōy yōg tayūmak xak 'ohnāg.

19 'Āte yāy xat, nūy Topa yōg hām'āktux'ax 'āktux, ha tikmū'ūn tek xat 'ohnāg! Pa

tikmū'ūn xohix puk hām, tuk hok hāk hām, puyīy tikmū'ūn kuxa punethok mām ka'ok Yeyox Kunnix kopah.

²⁰ Ūkhām Yoneo xop mūtik, kopxix 'āte Yoneo xop yōg hāp̄xopmā'ax tat, puyī' kuxa mām ka'ok Yeyox Kunnix kopah. 'A Mōyyex yōg xat'ax tek xat'ah, pa Yoneo xop mūtik xip, 'Ihā 'āte' xat'ax puk yīpkox xip, nūy Yoneo xop hāk xape'.

²¹ Ūkxip puknōg xop mūtik, kopxix 'āte Mōyyex yōg xat'ax xaxogāhā', puyīy puknōg xop kuxa mām ka'ok yūmūg xuxyā kopah. Pa Topa yōg xat'ax puk yīpkox xip, ha Kunnix yōg xat'ax tek xat'ax'e'.

²² Ūxip kuxa mām pu'uk xop mūtik, kopxix 'āte' yōg hāp̄xopmā'ax tat, nūy tu ka'ogā', puyī' kuxa mām ka'ok. Ha kaxīy 'āte' hep xop xohix yōg hāp̄xopmā'ax tat, nūy hāp̄xopmā'ax xohix hā tikmū'ūn 'ūm mōgā Topa yōg putat hā.

²³ 'Āte hāp̄xopmā'ax xohix tat, nūy hām'āpak max'ax 'āktux, pu Topa 'ā hāmmaxnā'.

²⁴ Tikmū'ūn mōg mō'ka'ok, ha' xohix mōg, pāyā yāp-xehnāg xupep tap, xi' yāg nōy xohix mōxa tu kunāy tu', pāyā' xohix mōg, puyī' mōxa tap. Ha kaxīy 'āxop mōg.

²⁵ Ha tik xop mōg punethok, tu' xak, nūy tu xupep tap, tu' mōg mō'ka'ok, pa tik puxehnāg xupep tap, tu kănēy māynāg paha'. Pa hāmyāxatamuk xohix nōg 'Ihā' kănēy yāykoxyōy, pāyā yūmū'āte mōxap-tup, tu pexkox tu mōxap-tup, 'ūyīy pexkox yōg hāp̄xop x'e'ēgnāg pop, ha yāykoxyōy 'ohnāg.

²⁶ Kaxīy 'āte hāp̄xopmā max, tu Topa Koxuk puk yīpkox xip, nūy hām̄yok mīy. 'A 'āte hitop tu hāp̄xopmā'ah, pāyā māynāg hāp̄xopmāhā', tu Topa pu hāp̄xopmā max.

²⁷ 'Āte yāy yōg putup'ax mīy'ah, nūy tu hāp̄xopmā max mōg kumak mōg, tuk kuxa teknōg 'ohnāg, 'ūyīy hām'āpak max'ax 'āktux kux, puyīy Topa te: "Xate hāp̄xopmā māynāg, mā', mōnāy, nūy 'ūyīkāgnāg 'āxip ka'ok!" Kaxīy.

10

Topa komut pu nū'āxup hok

¹ Ūkxape xop, 'āte hām'āktux putup, xayīy xaxok hok. Hōmā 'ūgmūg mōnāy'xop hittap te Mōyyex pe' mōg, 'Ihā hāp̄xexka 'Eyit tu nū'paha'. Hāmgōy xexka te' xohix mō'nīy, tu kōnāg xexka 'Āta' xak.

² Tu hāmgōy xexka kopa' pip, xix kōnāg xexka hā mōxakux, 'Ihā Mōyyex pe' mōg,

³ Ūxohix te pexkox yōg hāp̄xop puxet mähā',

⁴ tu pexkox yōg hep xo'op. Yā mīkaxxap xexka tu' xo'op, ha kaxīy Kunnix tu' xo'opmähā', tu Kunnix mūtik mōg putat tox hā.

⁵ Pa tikmū'ūn punethok te Topa gāyāhā', hu' xakix hām panip xexka tu'.

⁶ Ha Topa te' xat, pu tik tappet mīy, nūy yūmū'ā hāp̄xopmā'ax xohix yūmmūgā', 'ūyīy yūmūg hāp̄xop hitop xak hok.

⁷ 'Āpu topa komut xop pu nū'āktettex hok, nūy Topa x'e'ēgnāg nīm hok. Yā Topa yōg tappet te tikmū'ūn hittap 'āktux, tu: "Tikmū'ūn mām, nūy xit, nūy xo'op, tu' yok, nūy hāmyā' topa komut xop pu," kaxīy.

⁸ 'Āpu yūmūg xonnix hok, yā tikmū'ūn hittap xonnix punethok, yī' yāg xohix te 23.000 xakix, 'āmnīy puxet 'Ihā' xakix.

⁹ 'Āpu yūmū'āte Topa gāyā hok, hāpkummuk mīy tu'. Yā tikmū'ūn hittap te' gāyāhā', tu hāpkummuk mīy pax, yīy kāyā gāy te' kix.

¹⁰ Yā tikmū'ūn hittap te Topa gāyāhā', yīy pexkox yōg mō'kutnā'ax te' kix, yā mō'kutnā'ax 'āxet'ax 'Ūxok'ax.

¹¹ Ha tappet mīy, nūy yūmū'ā' yūmmūgā', 'ūyīy tikmū'ūn hittap putuk hok. Yā hōnhā hāmyāxatamuk xohix ka'ax, tu' xox putox.

¹² 'Ōg pa 'āti'. 'Ākuxānōg, Topa tu' xax, pu mō'ānīynām, xayīy hāpkummuk mīy hok.

¹³ 'Āxop te hāpkummuk mīy putup, yāy yōg putup'ax kummuk tu' mīy, ha kaxīy tikmū'ūn xohix te hāpkummuk mīy putup, pa Topa te xa hām'āktux xex, tu 'āka'ogā'ax, xayīy hāpkummuk mīy hok, yīy Topa tu' xax, hu: Topah, mōknīynām, 'ūyīy hāpkummuk mīy hok!" kaxīy, ha Topa te 'āka'ogāp-tup.

¹⁴ 'Āxop tek mūn hā 'ūg 'āxape xop, hu 'ōg pa 'āti', pu topa komut pu nū'āk-tettex hok.

¹⁵ 'Āte xa hām'āktux, 'āxop te hām̄yūmmūg hah, hu yōgnū hām'āktux kopit max, 'ūyīy 'āxop yūmmūgā'. Yā Topa yōg hām'āktux xe'e'.

¹⁶ Hōmā Kunnix te tik xop pu' hōm kănēy, ha mīnta hep xupyāg 'ūkopa' xup, ha yūmūg xat, 'ū yūmūg xupyāg xo'op kamah, pu yūmū'ā ha hāmmaxnā', yīy yūmū'āte kamah kănēy hā' xo'op, tu Topa pu: "Āmax Topah. Xate yūmū'ā xupyāg xe'e' hōm, tu pexkox yōg xupyāg xe'e' hōm. Puxi'," kaxīy. 'Ok hām̄yūmmūg hok, xate? Xate xupyāg xo'op, hu ta 'āxape xop xohix mūtik xo'op, nūy yūmūg xohix pe'āpaxex, ha yūmūg xuxyā xok, mīpkupnix tu' xok, tu yāy hep 'āta nū'nāhā', nūy yūmū'ā ha hāmmaxnā'. Ha yūmū'āte pām koxip, nūy yūmūg xape xop mūtik mā', nūy yūmūg xuxyā pekpaxex. Yā yūmūg xuxyā te mīpkupnix tu' xūy, nūy yūmū'ā hāmmaxnā'.

¹⁷ Yā pām puxet, ha' xohix te' mähā', yīy Kunnix hā yūmūg yīn puxet kamah, yā yūmūg kuxap-xet Kunnix kuxa mūtik.

¹⁸ Yoneo yōg tikmū'ūn pe'āpaxeh. Tu Topa pet kopa' xit'ax mähā', 'Ihā' āmānēx te mō'hap, nūy Topa pu' haxyā'.

19 Ātep-tep 'āktux putup? 'Ok topa komut ka'ok? 'Ap ka'ok'ah, yā' hitop. 'Ok hāpxop xit'ax ka'ok, tikmū'ūn te nōm topa komut xop pu' hōm? Yāmhok!

20 'Ap ka'ok'ah. Pa tikmū'ūn te nōm xit'ax hōm yāmīy kummuk pu', 'Ihā komut xop pu' hōm, 'ap Topa pu' hōm'ah. Ātep-tup'ah, xa yāmīy kummuk yōg hāpxop pop.

21 Āxop te Topa yōg kânēy hā' xo'op, nūy yūmūg xuxyā pe'āpaxex. Āpu yāmīy kummuk yōg kânēy hā' xo'op hok. Āxop te Topa yōg hāpxop mähā', nūy yūmūg xuxyā pe'āpaxex. Āpu yāmīy yōg hāpxop mā hok.

22 'Ok yūmū'āte Topa gāyāp-tup? 'Ākuxānōg! Paxip! Topa ka'ok, ha ta yūmūg pu'uk.

'Ānōy yōg putup'ax mīy

23 Tikmū'ūn 'ūm te: "Yūmū'āte yāy putup mīy'ax," kaxīy. Mōy mīy, pāyā' mīy'ax 'ūm te xa hāpkummugā'ax. Ha xe: "Yūmū'āte yāy putup mīy'ax," kaxīy. Hamūn. Pa xate' mīy'ax 'ūm 'ūhitop tu' mīy.

24 Yāy putup'ax mīy hok, pa 'ānōy putup'ax mīy, nūy nōm kuxa hittupmā'.

25 Ākuxa te yāy tux hok xa xogyīn mā', 'āpu, xogyīn xohix mā', tu' nōy yīkopit hok.

26 Yā Topa yōg tappet te: "Hām xexka yā Topa yōg, xix hāpxop xohix 'ūyōg kamaḥ," kaxīy.

27 Tikmū'ūn kuxa mām hok te 'āxānāhā xa 'āxit, 'āmōg putup, nūy mōg, nūy hāpxop xohix mā', hu 'ānōy yīkopit hok, ka 'ākuxa 'ākupeḥ, hu 'āhittup 'ohnāg.

28 Pa tikmū'ūn 'ūm te: "Nāy! 'Ūmā hok! Yā topa komut xop pu' hōm tap!" kaxīy, 'āpu' mā hok, ka 'ākuxa 'ākupeḥ, hu' hittup 'ohnāg.

29 xayīy 'ānōy pu hāpkummugā hok.

Ha tikmū'ūn 'ūm te: "Tep tu 'ātek nōy pekpaxex, nūy xogyīn mā hok? Tep tuk yāy putup'ax mīy hok?"

30 Nāy, 'āte Topa pu hām'āktux hāmāxap, hu: "Āmax Topah. Yā xate 'ā' hōm hāpxop,' kaxīy, tuk-nāy tuk xit. Tep tu tikmū'ūn te 'ā xuktux kummuk? Yā Topa te 'ā' hōm xit'ax 'ūg 'ūmā'," kaxīy.

31 Hāpxopmā max, nūy Topa kuxa hittupmā', pe 'āxop xit, peyā' xo'op, pe' yā hāpxopmā', nūy ta Topa pu: "Āmax Topah. Xate 'ā' hōm hāpxop max punethok. Puxi'," kaxīy.

32 Āpu hāpxopmā max, nūy Yoneo xop pu hāpkummugā hok, nūy puknōg xop pu hāpkummugā hok, nūy ta' kuxa mām ka'ok xop pu hāpkummugā hok.

33 Āpu hāpxopmā', nūy yōgnū hāpxopmā'ax tat. 'Āte' xak, nūy xohix kuxa hittupmā', 'ap yāy pekpaxex'ah, pak xape xop pekpaxex, 'ūyī' xohix mōgā Topa yōg putat hā.

11

1 Āpu yōgnū hāpxopmā'ax tat. Yā kaxīy 'āte Kunnix yōg hāpxopmā'ax tat.

'Ūn xop te 'āmūtik kotīnnāhā'

2 Āte xa hām'āktux max, xate yōg hām'āktux xaxok 'ohnāg hah, tu 'ā yīpkox pip.

3 Pa 'āte 'āp-tup, xa hāmyūmmūg. Yā Kunnix te' yīpkox xat, ha' yīpkox te yāy xetut xat, ha Topa te Kunnix xat.

4 'Ap max'ah, pu tik xop kuxxax tat, nūy nō yāykotīnnā' pip, nūy Topa pu hām'āktux, xix Topa pupi hām'āktux 'āxape xop pu'. 'A Kunnix tep putup'ah kaxīy.

5-6 Pa 'ūn xop tep-tox mō'nīy, puxix tu max. Kunnix tep putup. Ūtux hok pu 'ūn tep-tox mō'nīy, nūy yāykotīnnā' pip, nūy Topa pu hām'āktux, xix Topa pupi hām'āktux 'āxape xop pu'. 'A Kunnix tep putup'ah, 'Ihā 'ūn tep-tox mō'nīy hok, tu 'ūn nōy putuk, nōm te' xe mōy. Pūyāp-tox mō'nīy, nūy yāyhāhup hok.

7 Tik xop tep-tox mō'nīy hok. Yā Topa te' nōy yāy putuk ha' mīy, pu Topa kuxa hittupmā', ha' 'ūn te tik kuxa hittupmāhā'.

8 Topa te tik mīy hāmāxap, tuk-nāy tu tik kup tu' xut, nūy 'ūxetut mīy.

9 'Ap Topa te tik mīy'ah, puyī' xetut hā tu tehe'. 'Āmhok. pa 'ūn mīy, puyīy tik hā tu tehe'.

10 Yīy 'ūn xop tep-tox mō'nīy pekkox yōg nū'pok xop hah, nūy pēnā', nūy hāmyūmmūg. Yā' xetut te yāy yīpkox pu' yīpkox pip.

11 Topa yōg putat hā tihik xix 'ūhūn te mō'yāy nīynām.

12 Topa te tik tu' kup xut, nūy 'ūn mīy, ha kama tik te 'ūn tu' nāhā'. Yā Topa te hāpxopmā xohix.

13 Āpu 'āxop te' kopit: 'Ok max, 'ūn putox mō'nīy hok, nūy yāykotīnnāhā' pi', nūy Topa pu hām'āktux?

14 Tik mūn xe tox pu kummuk, yā Topa yōg tikmū'ūn te' yūmmūg,

15 pa 'ūn mūn xe tox pu max, tup-tox mō'nīy.

16 Tikmū'ūn 'ūm te hām'āktux putup yānān tu', tu xe tox 'āktux putup, kopix 'āte tu xe hām'āktux, hu: 'Ūgmū'āte' xat, xi' kuxa mām xop xohix te' xat, pu 'ūn xop tup-tox mō'nīy, nūy yāykotīnnā' pi', nūy Topa pu hām'āktux.

Yūmūg xuxyā yōg xit'ax

17 Hōnhā 'āte xa hāmyūmmūg'ax nōy 'āktux, 'āxop te hāpxopmā kummuk hah. Āxop te yāy tu nū'ānāhā', tu yāy kummugāhā'.

18 Tikmū'ūn te 'ā hām'āktux, tu 'āxop 'āktux, ha 'āxop yāy tuk-mīy pax, 'Ihā yāy tu nū'ānāhā', nūy Topa pu hām'āktux, hak kuxa yūm kutōgnāg nōm hām'āktux kopah.

19 Yā' max 'āxop yāy xat kutōgnāg, pu hāpxopmā'ax max xop tu mūg.

12

²⁰ 'Āxop yāy tu nū'ānāhā', nūy xit, nūy yūmūg xuxyā pe'āpaxex, pu, 'āxit hok.

²¹ Yā 'ūyāg xit mō'ka'ok, nūy 'ūhi mō'ka'ok, ha' yāg putup xūy, ha' yāg nōy paptux.

²² 'Ok yā 'āpet 'ūm yūm hok, hu ta xit xix xo'op, nūy 'āhi'? Kaxīy 'āxop te' kuxa mām ka'ok xop putup hok, xi' hok xop pu' hupmāhā'. Xatep tep pe'āpaxex? 'Ok hāpaxopmā'ax max nō'om? 'Ap max'ah! Yā' kummuk!

²³ Yūmūg xuxyā te 'ā hāmyūmmūgāhā', ha xa' yūmmūgā'ax, hu: Yūmūg xuxyā Yeyox te yāy yōg tik xop mūtik xit 'āmnīy hā, ha tikmū'ūn gāy te' mūg'ax, nūy tup-tex, yīy pām pa' tap,

²⁴ tu Topa pu: "Āmax Topah. Tuk mū'ā' hōm 'āxit'ax max. Puxi'!" kaxīy. Tu pām koxip, tu: "Nūhū 'ūgyīn, yāk xok 'āxop pupi'. 'Ūg pa', nūy mā', huk xaxok hok," kaxīy.

²⁵ 'Ūxit kux, 'thā yūmūg xuxyā te kānēy pa', tu: "Topa te' pa'ax tup mīy tikmū'ūn mūtik, tuk yīn hep 'āta hā' pa'ax mīy, 'ūkxok tu'. 'Āte yāy hep 'āta nū'nāp-tup, nūy pa'ax tup mīy. Kānēy pa', nūy tu' xo'op, 'thāk mūn pe'āpaxex, nūy huk xaxok hok," kaxīy.

²⁶ 'Āxop te pām māhā', xix kānēy tu' xo'op, puxix yūmūg xuxyā xok'ax 'āktux pax, ha mōktu putpu' nūn.

²⁷ Tikmū'ūn kuxa kummuk te nōm pām māhā', xix nōm xupyāg xo'op, puxix Topa gāy, yūmūg xuxyā pe'paxex 'ohnāg hah, yīy Topa te' kummugāp-tup 'ūyānān tu'.

²⁸ Yāy kuxa yīkopit hāmāxap, nūy yāy yōg hāpaxopmā'ax yūmmūg, nūy kunāy tu pām mā', xix kānēy hā' xo'op.

²⁹ Tikmū'ūn xit, xix xo'op, tu hāmp'e'paxex 'ohnāg, tu yūmūg xuxyā pe'paxex hok, puxix Topa gāy, nūy tu' xūyāgā'. Yā yūmūg xuxyā xok yūmūg pupi', nūy yūmūg kuxa kummuk xit.

³⁰ Tikmū'ūn punethok te hāmp'e'paxex 'ohnāg, hu' pakut, xi' pu'uk, ha tikmū'ūn 'ūm xakix tap.

³¹ Tikmū'ūn te yāy kuxa yīkopit hāmāxap, nūy yāy hāpaxopmā'ax yūmmūg, puyīy Topa 'ūkuxa maxnā', puxix Topa' xūyāgā hok.

³² Pa Topa te yūmū yōg hāpaxopmā'ax kopit, nūy tu' yūmmūg, tu yūmūg xūyāgāhā', 'ūyīy Topa yōg putat xak hok, nūy Hāmgāyānāgnāg pet hā yūmūg mōg hok Topa hā' puknōg xop mūtik.

³³ 'Āxop yāy tu nū'ānāhā', nūy Topa yōg xit'ax mā', nūy yūmūg xuxyā pe'āpaxex, 'āpu 'āxape xop hip.

³⁴ Putup te 'āp-tex, yīy ta yāy pet tu 'āxit hāmāxap, tuk-nāy tu 'āxape xop mūtik yāy kotūnāhā', pu Topa 'āxop xūyāgā hok, 'āxop te hāpkummuk mīy hah. Ha hāpaxopmā'ax nōy 'āte' kopit putup, 'thā 'āxop mūtik 'ūkxip.

Topa Koxuk te tikmū'ūn ka'ogā'ax

¹ 'Ūkxape xop, 'āte 'āp-tup, xa 'āxop hāmyūmmūg max, nūy Topa Koxuk yā tikmū'ūn ka'ogā' yūmmūg, ha' kuxa mām ka'ok xop ka'ogāhā', puyīy hāpaxopmā max.

² 'Āxop te 'ōg hāpaxopmā'ax hittap yūmmūg, 'thā Topa hā 'āpuknōg, ha topa komut xop yīy hok te 'āxat, tu 'āmōgā kummuk.

³ Yīy 'āte xa hāmyūmmūgāhā. Tikmū'ūn 'ūm te: "Pūyā Topa Yeyox pu hāpkummūgā'," kaxīy, yā Topa Koxuk te' ka'ogā' ohnāg, pu tu hām'āktux kummuk. 'Āmhok. Ha tikmū'ūn 'ūm te: "Yeyox yā yūmūg xuxyā!" kaxīy, yā Topa Koxuk te' ka'ogāhā', pu tu hāpxe'e' 'āktux.

⁴ Topa Koxuk te tikmū'ūn ka'ogāhā', pu hāpaxopmā max punethok, tup-xehnāg te' ka'ogāhā', pu tu hāpaxopmā'.

⁵ Ha yūmū'āte hāpaxopmā punethok, nūy yūmūg xuxyā tu hāpaxopmā', yā yūmūg xuxyāp-xet puk hām.

⁶ Ha tikmū'ūn 'ūm ka'ogāhā', pu tu hāpaxopmā', tu' nōy ka'ogāhā', pu tu hāpaxopmā nōy, ha Topap-xet te' xohix ka'ogāhā', pu tu hāpaxopmā'.

⁷ Topa te' kuxa mām xop xohix ha hāmmaxnāhā', tu' xohix tu' mūg. Yā Topa Koxuk te' kuxa mām ka'ok xop xohix kopa' xip, ha Topa te' xip'ax tu' mūg, puyī' xohix pēnā'.

⁸ Topa Koxuk te tikmū'ūn 'ūm ka'ogāhā', puyīy' nōy mō'nīynām hām'āktux hā, xi' nōy ka'ogāhā', puyī' nōy hāmyūmmūgā',

⁹ xi' nōy ka'ogāhā', puyīy kuxa yūm ka'ok, xi' nōy ka'ogāhā', puyīy nōy pakut hittupmā

¹⁰ xi' nōy ka'ogāhā', puyīy hāpaxopmā ka'ok xe'ēgnāg, yā tikmū'ūn puxet te' mīy hok, xi' nōy ka'ogāhā', puyīy Topa pupi hām'āktux, xi' nōy ka'ogāhā', puyīy hāmyūmmūg, nūy Topa Koxuk yōg hāpaxopmā'ax yūmmūg, nūy 'ūkoxuk puknōg yōg hāpaxopmā'ax yūmmūg kamah, xi' nōy ka'ogāhā', puyī' yīy'ax puknōg hā hām'āktux, xi' nōy ka'ogāhā', puyīy nō hām'āktux puknōg yūmmūgā'.

¹¹ Yā Topa Koxuk puxet, tu' kuxa mām xop xohix ka'ogāhā', tup-tup, hu tikmū'ūn ka'ogā'ax pu hāpaxopmā punethok.

Kunnix hā 'āyīn puxet

¹² Tikmū'ūn yīn puxet, tu' kup punethok pip, ha' māg te' yīn kopa' pip punethok, xi' kuxa, xi' tex, yā' xohix, hā kaxiy yūmūg xohix, tu Kunnix hā yīn puxet.

¹³ Yā yūmūg xohip-tox pix, Topa Koxuk te yūmūg putox pix, nūy Kunnix hā yūmūg yīn puxet. Yā yūmūg xohix, 'ok pe Yoneo xop, 'ok pe' puknōg xop, 'ok pe tayūmak pop tu yūmūg hām, 'ok pe' xuxyā xat'ax pu yūmūg hok hā' hām, yā yūmūg xohix te Kunnix hā' yīn puxet. Ha Topa Koxuk te yūmūg

xohix kopa' xip, yīy yūmūg kuxap-xet Yeyox Kunnix kuxa mūtik.

¹⁴ Ha' yīn kup puxet'ah. 'Āmhok. Yā' kup punethok.

¹⁵ Pax pu' pata yīy, tu hām'āktux, hu: "Akmūn te yāk yīm'ah, huk yīn yōg 'ohnāg," kaxīy. Puxi' yā' yīn yōg xe'e'.

¹⁶ Pax pu' yīpkox yīy, tu: "Ak pa'ah, huk mūn yīn yōg 'ohnāg," kaxīy. Pāyā yā' yīn yōg xe'e'.

¹⁷ Pax pu' pa puxet xip 'ūyīn kopah, puxix hām'āpak 'ohnāg. Pax pu' yīpkox puxet xip 'ūyīn kopah, puxix tu' hax 'ohnāg.

¹⁸ Yīy Topa te tikmū'ūn mīy, tu' yīn mīy, ha' kup punethok, xi' māg punethok, 'ūp-tup ha' mīy.

¹⁹ Pax pu' kuxap-xehnāg xip, puxix tu kuxap-xet, 'ap yīn'ah. 'Āmhok.

²⁰ Yā' kopa' pip xop xohix hā' yīn puxet.

²¹ Pax pu' tikmū'ūn pa yīy, nūy tu' yīm pu hām'āktux, hu: "Mōg, 'āte 'āp-tupnōg," kaxīy. Yā' kummuk, 'ūhitop tu' xuktux. Ha kaxīy 'āxop yā' 'ākuxa mām ka'ok xop, tu Kunnix hā 'āyīn puxet, tu 'āxape xupmā hok.

²² 'Āmhok. 'Ūyīm xut, puxi' yīn tu pu'uk, ha kaxīy 'āxop yāy xape xut hok, ka' 'āxop 'āpu'uk kamah.

²³ Tikmū'ūn te yāy yīn mō'nīy, 'ūyāg mō'nīy, nūy nō xex max,

²⁴ tu mō' yāg nōy nīy 'ohnāg. Hā kaxīy Topa te tikmū'ūn yīn xohix mīy, ha' xohix max,

²⁵ ha' yāyxatat 'ohnāg, yīy yāy hā tu tehet.

²⁶ 'Ūyīn yāg xūy, puxix tu yīn xohix xūy kamah. 'Ūyīn yāg tap, puxix tu yīn xohix tap. 'Ūkuxa mām ka'ok xop te tikmū'ūn yīn putuk, 'ūyāg xūy, ha' nōy xop xohix hittup 'ohnāg.

²⁷ 'Āxop te Kunnix hā 'āyīn, yā 'āxohix te Kunnix hā 'āyīn yāg.

²⁸ Topa te hāpoxpmā māynāg 'ūkuxa mām ka'ok xop kopah, tu tik xop mō'pok hāmāxap, hak-nāy tu tik xop nōy te Topa pupi hām'āktux, hak-nāy tu tik xop nōy te hāmūmūgāhā', hak-nāy tu tik xop nōy te hāpoxpmā ka'ok xe'ēgnāg, ha tikmū'ūn puxet te' mīy hok, hak-nāy tu tik xop nōy te' pakut xop hittupmāhā', xi' nōy xop te' nōy hā tu' tehet, xi' nōy xop te' nōy xat, xi' nōy xop te' yīy'ax puknōg hā' yīy.

²⁹ 'A' xohix mō'pok'ah, 'a' xohix te Topa pupi hām'āktux'ah, 'a' xohix te hāmūmūgā'ah, xix 'a hāpoxpmā ka'ok'ah.

³⁰ 'A' xohix te' pakut'ax hittupmā'ah, xi' yīy'ax puknōg hā' yīy'ah, xi' nōy pu 'a' yīy'ax 'ūm yūmūgā'ah.

³¹ Yīy Topa tu' xax, pu 'āka'ogā', xayīy 'ānōy ka'ogā' 'ūyānān tu'.

Pāyā 'āte xa' mūg putup putat xe'ēgnāg.

13

Ānōy putup pax

¹ Pax tikmū'ūn yīy'ax hāk yīy, xix pexkox yōg nū'pok xop yīy'ax hāk yīy, pāyā 'ātek nōy putup pax hok, kopxi' hitop tuk yīy, yāk yīy'ax te 'āmānex te xap kāyā'ax putuk, yā' kax ka'ok, pāyā hitop hā' kax, tu' nōy yūmūmūg 'ohnāg.

² Pax 'āte Topa pupi hām'āktux, xix hāmūmūg xexka', xix hām'āktux xe'e yūmūmūg, xix kuxa yūm 'ūm ka'ognāg, nūy yīktix xut hām tu', pap-tup pax hok, kopxi' hitop hā hāpoxpmā'.

³ Pax 'āte yāy yōg hāpox xohix popmā', xix yāy yīn hōm pu mō'hap, nūy Topa pu haxāyā', pa 'ātep-tup pax hok, kopxi' hitop hā hāpoxpmā'.

⁴ Tikmū'ūn te' nōy putup pax, puxi' hip, tu nōā' tot, tu' nōy kuxa ka'. 'Ap yīpkumīy'ah, tu yāy mūn kutōgnāg pe'paxex, 'a yāy mūn xexka 'āktux'ah,

⁵ tu' yīy pu'uk, nūy tu' nōy gāyā hok, 'ap yāy mūn te māxap pe'paxex'ah, 'ap gāy'ah, 'a' nōy yōg hāpkummuk mīy'ax xutigā'ah, pāyā' xaxogāhā'.

⁶ Tikmū'ūn te' nōy putup pax, puxi' nōy hāpkohe' mīy hā tu hittup hok, pāyā hāmūyok mīy'ax hā' hittup.

⁷ 'Ap kuxa teknōg'ah, pāyā nōā'tot, 'ūkuxa yūm ka'ok tu', tu hāmmax hip, puyīy Topa hāpoxpmā'.

⁸ Tup-tup pax, tup-tup kux 'ohnāg. Hōnhā tikmū'ūn te Topa pupi hām'āktux, tu' xuktux kux putup. Ha' yīy'ax puknōg hā tikmū'ūn yīy, pāyā' kux putup kamah. Ha hāmūmūg, pāyā' xaxogāp-tup kamah.

⁹ 'Ūgmū'āte hāmūmūg kutōgnāg, ha tikmū'ūn te Topa pupi hām'āktux kutōgnāg kamah,

¹⁰ pa 'āmnīy 'ūm mō'nā'ax, 'īhā yūmūg xuxyā nūn, 'īhā' xexka xe'ēgnāg tu' nūn, ha Topa Koxuk te tikmū'ūn ka'ogā'ax kux putup, yūmū'āte yāyhā ka'ok hah, ha hāpoxpmā'ax hittap yāyxaxogāp-tup.

¹¹ Hōnhāk kutōgnāg, yāk mūn hā kaxxop, tu hām'āktux, tu kaxxop putuk, xix 'āte hāmekpaxex tu kaxxop putuk, pāyā hōnhāk xip tap, hu 'āte kaxxop yōg hāpoxpmā putuk 'a mīy'ah.

¹² Hōnhā yūmū'āte yāy pa pēnā'ax hā yāy pa pēnāhā', tu' pēnā kummuk, pa 'āmnīy 'ūm mō'nāp-tup, 'īhā yūmū'āte Topa pa pēnā max, 'ūyīkagnāg hā' tūhi tu'. Hōnhā yūmūg'āte Topa yūmūmūg kutōgnāg, pa 'āmnīy 'ūm mō'nāp-tup, ha 'āte Topa yūmūmūg maxp-tup, yā kaxīy hā Topa tek yūmūmūg.

¹³ Hōnhā yūmūg kuxa mām ka'ok Yeyox Kunnix kopah. Yā hāpoxpmā'ax max. Xix yūmū'āte hāmmax hip, tu Kunnix putpu' nūn'ax hip, nūy yūmūg mōg pexkox hah. Yā hāpoxpmā'ax max kamah. Xix yūmūg yāy putup pax, tu' kux 'ohnāg. Yā hāpoxpmā max'ax xe'ēgnāg.

14

Topa Koxuk te tikmū'ūn ka'ogāhā'

1 Ūmax, ta' nōy putup pax. 'Āpu 'ānōy putup pax xexka'. Topa tu' xax pu pexkox yōg hāpxop popmā xa'. Yā' max xe'e', pu Topa pupi hām'āktux.

2 Ūyīy'ax puknōg hā tikmū'ūn yīy, puxix Topa tu hām'āktux, pāyā tikmū'ūn ūm pu hām'āktux'ah, ūyīy'ax yā' puknōg hah, ha Topa Koxuk te' ka'ogāhā', pu Topa yōg hām'āktux xe'e' āktux.

3 Pa tikmū'ūn te Topa pupi hām'āktux, puxix tikmū'ūn pu' xuktux, tu mō'nīynām, tu nō teheh.

4 Tikmū'ūn yīy, ūyīy'ax puknōg hā' yīy, puxix mō yāy nīynām, pāyā tikmū'ūn te Topa pupi hām'āktux, puxi' kuxa mām ka'ok xop xohix mō'nīynām.

5 'Āte 'āp-tup, xa yīy'ax puknōg hā 'āyīy, pāyā 'āte 'āp-tup xexka', xa Topa pupi hām'āktux, nūy 'ānōy xop ka'ogā', ha' nōy te yāy mūn puxet ka'ogāhā'. Yā' yīy'ax puknōg hā hām'āktux. Pāyā tikmū'ūn xip, nūy nōy pu hāmyūmmūgā', puxi' yīy'ax puknōg yōg hām'āktux yūmmūgā', nūy hām'āktux'ax hā' nōy ka'ogā'.

6 Ūkxape, 'āhāk mōg, tu' yīy'ax puknōg hāk yīy, kopxix mō'ānīynām 'okpa Topa yōg hām'āktux xe'e' āktux. Pāyā 'āte xa hāmyūmmūgāhā', 'īhā tikmū'ūn yāy yīy'ax hā 'āte Topa pupi hām'āktux, tu xa' xuktux, kopxix mō'ānīynām xe'e'.

7 Ūg'āpax, xayīy hāmyūmmūg. Tikmū'ūn kutex, ha kama hāpxop kāyā'ax pip punethok. Tik kāyā kummuk, puxix tikmū'ūn kutex yūmmūg 'ohnāg.

8 Tik ūm te kāyā'ax, mīxux xop tut hā kāyāhā', nūy xonat xop xānā', tu kāyā kummuk, puxix xonat te hām'āpak, pāyā hāmyūmmūg 'ohnāg, 'ok yāy'ax, 'ok pe' xit'ax.

9 Ha kaxīy 'āxop te hāpxopmāhā'. Tikmū'ūn te' yīy'ax puknōg hā' yīy, puxi' nōy te hām'āktux ūm yūmmūg'ah, ūpuknōg hah, ha hām'āktux yāyxaxogā'ax.

10 Hām xexka yōg yīy'ax xohix punethok, ha' yīy'ax xohix hā' hep nōy xop te hām'āktux, tu yāy yīy'ax hā hāmyūmmūg.

11 'Āte' yīy'ax yūmmūg hok, puxix tik puknōg hām'āktux, tu 'āhā' puknōg, ha hamūn hāk puknōg kamah.

12 Yīy xax, pu Topa Koxuk 'āka'ogā', pa' xax hāmāxap, pu 'āka'ogā, xayīy 'ānōy xop ka'ogā kamah.

13 Yā' max tikmū'ūn te' yīy'ax puknōg hā' yīy, pāyā max xexka', 'ūnōy xop pu hām'āktux yūmmūgā', nūy tikmū'ūn yāy yīy'ax hā hāmyūmmūgā', puyīy hāmyūmmūg.

14 Topa pu 'āte hām'āktux, ūyīy'ax puknōg hāk yīy, kopxik kuxa te hām'āktux xe'e',

pak putox te hāmyūmmūg 'ohnāg, 'āte' yīy'ax puknōg yūmmūg 'ohnāg tu'.

15 'Āte putep mūn mīy'ax? 'Āte Topa pu hām'āktux yāy kuxa hā, tu' yīy'ax puknōg hāk yīy, pa yāy putox hā 'āte hām'āktux kamah, nūy tikmū'ūn yāy yīy'ax hā hām'āktux, hu hāmyūmmūg.

16 'Ākuxa hā xate Topa pu hām'āktux, puxix 'āxape' xupax, pāyā' yīy'ax yūmmūg hok, puxix hām'āktux yūmmūg hok, nūy tu: Hamūn, kaxīy. Yā' hitop hā' xupak, ūyīy'ax puknōg yūmmūg 'ohnāg tu'.

17 Yīy xate hām'āktux māynāg, 'īhā Topa pu hām'āktux, pāyā 'āxape xop mō'nīynām 'ohnāg.

18 'Āte Topa pu: 'Āmax Topah, xatek ka'ogāhā', 'ūg yīy'ax puknōg hāk yīy punethok, kaxīy. Yāk yīy punethok, ha ta 'āxop yīy kutōgnāg.

19 Pāyā yāy kotīnnā' xop mūtik tihi', kopxix tikmū'ūn yāy yīy'ax hā hām'āktux, 'ātep-tup, pu tikmū'ūn yōg hām'āktux kutōgnāg 'āpax, puyīy Topa' ka'ogā, pu' nōy xop pu nō hām'āktux. Pa' yīy'ax puknōg hāk yōg tox 'āte putup'ah.

20 Ūkxape: 'Āxop hā kaxxop'ah, pāyā hāpxummuk mīy hok, kaxxop putuk, 'īhā hāmpē'āpaxeh 'ūxip tap xop putuk.

21 Yā Topa yōg tappet te Topa yōg hām'āktux'ax āktux, hu:

“'Āte nūhū tikmū'ūn pu hām'āktux putup, tu' yīy'ax puknōg hā hām'āktux putup, xi' puknōg yīxox hā hām'āktux putup, pa yōg tikmū'ūn te hām ūm 'āpak 'ohnāg,” kaxīy.

22 Tikmū'ūn te' yīy'ax puknōg hā Topa pupi hām'āktux, puxix tu' kuxa mām hok xop pu hām'āktux, yā hāpxopmā xe'ēgnāg, pāyā' kuxa mām ka'ok xop pu hām ūm 'āktux'ah.

23 'Āxop yāykotīnnāhā', 'āxohix te' yīy'ax puknōg hā 'āyīy, puxix hāmyūmmūg hok xop te: “'Ūxohip-tox kummuhnāg!” kaxīy.

24 Pa 'āxop xohix te Topa pupi hām'āktux, 'īhā' kuxa mām hok xop mōxakux, puxix hām'āpax, tu yāy yōg hāpxopmā'ax kummuk tu' yāyāhup, ha Topa te' kopit putup, hamūn te hāmyūmmūg hah.

25 Ha Topa te hāmpē'paxex yūmmūgāp-tup, yīy nū'xup putup, 'ūkuxa te' yēy tu', tu: “Yā hamūn! Topa te 'āxop mūtik pip!” kaxīy.

Hāpxopmā max 'īhā yāy kotīnnā' pip

26 Ūkxape xop, 'āte xe xa hām'āktux putup. 'Āxop yāykotīnnā' pip 'īhā', yā' max 'āxape ūm kutex, nūy Topa 'āktux max, xi' nōy hāmyūmmūgā', xi' nōy te Topa yōg hām'āktux xe'e' āktux, Topa te' yūmmūgā' tu' xuktux. Xi' max, 'ānōy yīy'ax puknōg hā tu yīy, xi' nōy te yīy'ax yōg hāmyūmmūg'ax āktux, tu tikmū'ūn yāy yīy'ax hā hāmyūmmūgāhā', puyī' kuxa mām xop xohix mō'nīynām.

27 'Āxop 'ūm yīy'ax puknōg hā 'āyīy putup, 'īhā 'āyīy, 'āp-xet yīy hāmāxap, xik-nāy tu' nōy yīy, xik-nāy tu' noy, tu mōktu yā tikoyuk yīy, tu' hip, pu' nōy 'ūyīy'ax puknōg hā' yānān, nūy tikmū'ūn yāy yīy'ax hā' xuktux, puyī' xohix hāmyūmmūgā'.

28 'Ūxip hok tik te' yūmmūgā', ha ta' kux, tu yāy pu hām'āktux, xix Topa pu hām'āktux yāy kuxa kopah.

29 Tikmū'ūn 2 tu yīy kux, pe 3 tu yīy kux, xa' hip, pu' nōy xop kopit, 'ok pe tik te Topa pupi hām'āktux, 'ok pe' koxuk puknōg pupi hām'āktux.

30 'Ūxape yok, tu hām'āktux putup, 'īhā' nōy te Topa pupi hām'āktux, puxix tikmū'ūn māxap hā hām'āktux kux, tu ta' yūm, pu' nōy Topa yōg hām'āktux 'ūyānān tu' āktux.

31 'Āxop xohix te Topa pupi hām'āktux'ax, 'ūp-xet hāmāxap, hak-nāy tu' nōy te', xik-nāy tu' nōy, tu mōktu 'āxohix te hām'āktux kux, ha kaxīy 'āxop te hām'āktux xohix yūmmūg putup, nūy tu hittup.

32 Tikmū'ūn te Topa pupi hām'āktux, puxix yāy mūn xat, 'ok pe' max hām'āktux, 'ok pe' kummuk hām'āktux.

33 Yā Topa te yūmūg xānā hok, 'ūg hāpxopmā kummuk, pa yūmūg xānāhā 'ūg hāpxopmā max.

Ha kaxīy 'ūkuxa mām ka'ok xop xohix yāykotīnnānā' pip.

34 Ha 'ūn xop yīy hok. 'Ūxat hok, puyīy hām'āktux hok. Yoneo xop yōg xat'ax te' xat hok kamah, yīy tux hok, pu' 'ūn kuxa mām ka'ok xop xat hok kamah.

35 'Ūn te' yīkopit putup, puxi' hip, nūy yāy pet kopa yāy yīpxox yīkopit. 'Ūn te hām'āktux, 'īhā' xohix yāykotīnnāhā' pip, puxix tu hupmā'.

36 'Ok' āxop te Topa yōg hām'āktux mīy? 'Ap mīy'ah. 'Ok pe Topa te mō'āp-xet kutnāhā' 'Āmhok.

37 'Āxop 'ūm te yāy xexka pe'āpaxeh, nūy mō 'ākutnāp-xet pe'āpaxeh, xix Topa Koxuk te 'āka'ogā'ax pe'āpaxeh, kopxix xa hāmyūmmūgā'. Yūmūg xuxyā tek xat 'ūxa kax'āmi'.

38 Tikmū'ūn 'ūm te hām'āpak hok, 'āpu nōm pu 'āyipxox pip hok kamah.

39 'Ūkxape xop: 'Āpu, Topa pupi hām'āktux pax, tu' tux hok, pu yīy'ax puknōg hā tu yīy kamah. Yā' max.

40 Pāyā hāpxopmā māynāg, 'īhā yāykotīnnāhā' āpip.

15

Kunnix te putpu' hi'

1 'Āte xa hām'āpak max'ax 'āktux, ka' xaxok. 'Āxop te hām'āpak, yā 'ākuxa mām ka'ok hōmā xix hōnhā'.

2 Yā hām'āpak max'ax hā 'āxop kuxa tup, tu' mām ka'ok 'āmō kuma 'āmōg. 'Ok pe 'ākuxa te yā hitop hā' mām ka'ok.

3 Topa te 'ā hām'āktux, ha 'āte xa' xuktux, yā hām'āktux xe'e', hu: Kunnix xok, yūmūg pupi' xok, yūmū'āte hāpkummuk mīy pax ha' xok, ha Topa yōg tappet te' xuktux,

4 ha nō hāpkot, ha 'āmnīy 3 nōg, 'īhā' putpu' hi', ha Topa yōg tappet te' xuktux,

5 ha Pet te Kunnix pēnāhā', hak-nāy tu mō'pok xop te 12 te' pēnāhā',

6 hak-nāy tu tikmū'ūn te 500 te' pēnāhā', nōm xop kuxa mām ka'ok te 500 te' pēnāhā'. Tikmū'ūn 'ūm yā' pip, pāyā' yāg xakix hittap.

7 Hak-nāy tu Tiak te' pēnāhā', hak-nāy tu mō'pok xop xohix te' pēnāhā'.

8 Ha ka'ax hā 'āte Kunnix pēnāhā', 'ūka'ax hā kuxa te yūmūg xuxyā kopa' yūm ka'ok.

9 Yā 'āte mō'pok xop hāk ka'ax, tuk kutōgnāg, huk xax te kutuk, tu yāyhāhup, pāyā Yeyox te nūgkutnāhā 'ūka'ax hā. Hōmā 'āte kuxa mām ka'ok xop xūyāgāhā', huk xax te kutuk.

10 Pa Topa te 'ā hāmmaxnāhā', huk mōgkutnāhā, ha 'āte hāpxopmāhā punethok, ha mō'pok xop nōy hāpxopmā kutōgnāg, pak puxet'ah, yā Topa tek ka'ogāhā', 'ūyīy hāpxopmā ka'ok.

11 Yīy 'ātep yūmmūg putup'ah, 'ok pek hām, 'ok pe yāk nōy hām, pak mūg xohix te hām'āpak max'ax 'āktux, ha 'ākuxa mām ka'ok hām'āktux'ax kopah.

Yūmū'āte putpuk hip-tup

12 Hak mū'āte Kunnix te putpu hi'ax 'āktux. Tep te xīy 'āxop 'ūm te: "Yūmūg yog xakix xop te putpu hip-tup 'ohnāg," kaxīy.

13 Pax pu' xakix xop putpu tu hi hok, puxix Kunnix 'a putpu hi'ah kamah.

14 Pax pu Kunnix putpu tu hi hok, kopxik mūg hitop hā hām'āpak max'ax 'āktux, ha yā 'ākuxa kama 'ūhitop hā' mām.

15 Kamah: Kunnix putpu tu hi hok, kopxik mūg yā' koit, 'īhā Kunnix putpu hi'ax 'āktux. Pax pu' xakix xop putpu tu hi hok, puxix Topa yā Kunnix putpu hīnnā hok kamah.

16 Pax pu' xakix xop putpu tu' hi hok, puxix Kunnix putpu tu hi hok.

17 Pax pu Kunnix putpu tu hi hok, puxix 'ākuxa hitop hā' mām ka'ok Kunnix kopah, ha 'ākuxa tup 'ohnāg. Yā' kummuhnāg.

18 Pax pu' xakix xop kuxa hitop tu' mām, tu Topa yōg putat hā' mōg hok, puxix tu Topa hāptox hā' pi nōmhā'.

19 Pax hām tup-xet hā yūmū 'āte Kunnix hip, xix pexkox hā yūmūg mōg hok, puxix yūmūg kuxa xakix putūmnāg, yūmūg hittup 'ohnāg tu', ha' kuxa mām hok xop tu hittup.

20 Pāyā Kunnix te putpu hi xe'ēgnāg, 'āte hāpxe'e' āktux, yī' xakix xop te putpu' hip-tup kamah.

²¹ Tik puxet 'Anão te hāpkummuk mīy, yīy yā' xohix xakix, hā kaxīy tik puxet nōy te' putpu' hīnnāhā'.

²² Ūxohix xakix mōnāy xop te māxap 'Anão hah, hā kaxīy 'ūxohix te putpu' hip-tup, Kunnix hāh. Yā Kunnix te' putpu' hīnnāp-tup.

²³ Tu ta putpu' hi hāmāxap, hak-nāy tu Kunnix yōg tikmū'ūn hip-tup, 'ihā Kunnix putpu' nūn.

²⁴ Yā hāmyāxatumuk ka'ax xohix yōg xox putox, ha Kunnix te hāpkummuk xop yōg xexka xop xohix nōāp-tup, xi' xat'ax kummuk xop xohix nōāp-tup, nūy Topa yūmūg Tak ha' nūnnā', puyīy Topa pu' yīpkox pi'.

²⁵ Ha Kunnix te' xat putup, tu mōktu Topa te' gāy xop kuxyā', tu mōktu hāmgāy xop xohix kuxyāhā', tuk-tok Kunnix ha' nūnnāp-tup, pu tu' nōa'.

²⁶ Ha' ka'ax hā Topa te' xat putup, puyīy tikmū'ūn xakix hok,

²⁷ yīy Topa yōg tappet te: "Topa te' xexka xop xohix nūnnāhā', pu tu' yīpkox pi'," kaxīy. Pāyā Topa mūn xexka', tu Kunnix ha' nūnnā'ax hāmgāy xop yōg xexka xop,

²⁸ tu' kuxyāhā', puxik-tok te yāy Tak pu' yīpkox xihip, pu tu' xat, tu' hep xop xohix xat'ax, 'ūxexka xe'ēgnāg tu'.

²⁹ Tikmū'ūn 'ūm te' nōy xok tup-tox pix, yīy 'āte 'āyīkopit, hu: Teptu xatep-tox pix 'āxape xok pupi', 'ihā xate' putpu' hi'ax 'āktux hok?

³⁰ Xik mū'āg. Tep tuk mūg xūy, xik mūg xakix putūmnāg, nūy hām'āpak max'ax 'āktux?

³¹ Ūkxape xop, 'āte xa hām'āktux, tu hāpxe'e 'āktux. 'Āmnīy xohix 'ihāk xok putūmnāg. 'Āte xa hāpxe'e 'āktux. 'Āxop te hāpxopmā max, yīk hittup, yā yūmūg kuxap-xet yūmūg xuxyā Yeyox Kunnix kuxa mūtik.

³² Hōmāk xip nūnte kōmēn 'Epex tu', ha' gāy xop te hāmgāy putuk, tuk putex putup, 'āte hām'āpak max 'āktux hah. Pax 'āte hām'āktux, puyīy tikmū'ūn 'ūgmax 'āktux, kopxi' hitop hā hām'āktux. Pax pu' xakix xop putpu tu hi hok, kopxi' max yūmūg hāpxopmā hāmpuknōg xop putuk, ha: "Āpu yūmūg xit, xix xo'op. Yā hāptup 'ihā yūmūg xakix," kaxīy. Yā' hitop hā hāpxopmāhā'.

³³ Yāy hā mō'āmā hok. Tik kummuk mūtik 'āmōg, hu ta 'ākummuk kamah.

³⁴ Āpu hāpxopmā kummuk kuxyā', tu Topa yōg putat hā 'āmōg putpu'. 'Āxop 'ūm te Topa yūmūg 'ohnāg. 'Āte xa' xuktux nūy xa' hupmā'.

Yūmūg yīn te putpu' hip-tup

³⁵ Pa tikmū'ūn 'ūm xek yīkopit, hu: "Tep te xīy 'ūxakix xop putpu hip-tup?" kaxīy. "Ūyīn te xīy?" kaxīy.

³⁶ 'Āxop te hāmyūmmūg 'ohnāg! 'Āxop te hāpxop xap xok 'ihā' xok, pu tu' xokax.

³⁷ Ha' xap, 'ok pe xuxnāg xetox xap, 'ok pe mīxux xap nōy, 'ūxap mūn 'ap mīxux yīnmūn'ah.

³⁸ Ha Topa te hāpxop xap xohix yāyhā mīxux, yā Topa tep-tup.

³⁹ Ha' hi'ax xop xohix punethok. Yā tikmū'ūn yīn puxet, xix xokxop yīn yā' nōy, xix putuxnāg xop yīn yā' nōy, xix mām xop yīn yā' nōy.

⁴⁰ Ha pexkox yōg xop yīn yā' nōy, xix hām xexka yōg xop yīn yā' nōy. Ha' xohix max, pāyā hāmmāx nōy. 'Ap nōy putuk'ah.

⁴¹ Māyōn max, tu hāptupmāhā', ha māyōnhex max, tu 'āmnīy tupmāhā', ha māyōhnāg xop xohix max kamah, tu hāptupmā nōy. 'Ap nōy putuk'ah.

⁴²⁻⁴³ Ha kaxīy 'ūxakix xop te putpu hip-tup. 'Ūyīn yā hahām yōg, ha nō hāpkot, 'ūkummuk tu', yā' xok xe'e'. Pa putpu' hi, 'ihā' yīn tup, tu yīn ka'ok, tu yīn max, 'a xep xok putup'ah.

⁴⁴ Putpu' hi, 'ihā yā pexkox yōg yīn. 'Ūyīn hittap yā hām yōg, ha' yīn tup pexkox yōg.

⁴⁵ Yīy Topa yōg tappet te: "Tik te māxap 'āxet'ax 'Anão, ha Topa te' hīnnāhā'," kaxīy. Pa 'Anão nōy 'āxet'ax Kunnix, tu hāpxohix hīnnāhā'.

⁴⁶ Tu hām yōg yīn mīy hāmāxap, nūy kunāy tu pexkox yōg yīn mīy.

⁴⁷ Ha 'Anão te māxap mīy, 'ihā hāpkōnōn hā' mīy, pa 'Anão nōy te pexkox tu' nūn.

⁴⁸ Hām xexka yōg xop te hām yōg 'Anão putuk, ha pexkox yōg xop te 'Anão nōy putuk, nōm te pexkox tu' nūn.

⁴⁹ Yūmū'āte hām yōg tik putuk nōmhā, pāyā tik nōy te pexkox tu' nūn, ha yūmū'āte Kunnix putuk putup.

⁵⁰ Ūkxape xop, 'āte xa hāmyūmmūgāp-tup, hu: Tikmū'ūn yīn yā hām yōg, ha' yīn xi' hep 'āta hā' mīy, yīy Topa pēnā hok pexkox kopah, tu pexkox yōg hāpxop pop hok kamah.

⁵¹ Ūg 'āpax, nūy hām'āktux xe'e 'āpax. 'Ap xohix xakip-tup'ah. pāyā yūmūg yāyhāp-tup pexkox yōg tikmū'ūn,

⁵² hāpxip 'ohnāg 'ihā', tikmū'ūn pa xax te kutāgnāg, 'ihā yūmūg yāyhā pexkox yōg tikmū'ūn, 'ihā mīxux xop tut kāyāp-tup. Ha' xakix xop te putpu hip-tup, 'ūyīn yā pexkox yōg yīn, tu putpu' hip-tup, ha yūmū'āte yāyhāp-tup kamah.

⁵³ Yā Topa te hām yōg yīn xit putup, nūy pexkox yōg yīn hā yūmūg mō'tat 'ūyānān tu', pu tu xakix'ax xop yāyhā xakix hok xop,

⁵⁴ Ha pexkox yōg yīn hā mō yūmūg tat putup, 'ūyīy yūmūg xakix hok, yā Topa te' xat putup, nūy yūmūg xakix kuxyā', 'ūyīy yūmūg hi xe'ēgnāg mō kumak mog. Yā Topa yōg tappet te: "Topa te' xat hok pu tikmū'ūn xep xakix hok, yīy Topa te' xūy'ax kuxyā kamah, Topa mūn ka'ok xe'ēgnāg tu'."

⁵⁵ "Tep tu tikmū'ūn xohix xūy?"

Teptu tikmū'ūn xohix xakix?" kaxīy.

⁵⁶ Yā tikmū'ūn xohix te hāpkummuk mīy, tu' xat'ax pu' yīpkox 'ohnāg, hu' xohix xūy, hu' xohix xakix.

⁵⁷ Pa yūmū'āte Topa pu hām'āktux, tu: "Āmax Topah. Xatek mū ka'ogāhā, 'ūyīg mūg xakix hok, yāk mūg xuxyā Yeyox Kunnix tek mūg hīnā' xe'ēgnāg," kaxīy.

⁵⁸ Yīy Topa yōg putat hā 'āmōy kuma 'āmōg. Topa pu hāpxopmā max, yā yūmūg xuxyā te xa pagop-tup, 'āxop te' yūmmūg.

16

Paot te tayūmak pop mōg putup hāpxexka Yonex tu'

¹ Hōmā 'āte hāpxexka Ganax yōg kuxa mām xop pu hāmyūmmūgāhā, pu tayūmak pop, nūy Yonex yōg 'ūhok xop pu mō'kutnā'. Yā' max 'āxop kaxīy pop kamah, nūy hok pu popmā'.

² Yīy: Yenomīn xohix 'īhā tayūmak 'ūm mōy, nūy xeh, nōm tayūmak 'āxop te' pop'ax, tu mōktu 'āhak xupep, pu tayūmak pop hok 'īhāk nūn.

³ Tuk xupep 'īhā, 'āte tappet mīy putup, nūy mō'kutnā', 'īhā 'āxop te tik xop yīmōgatux, pu tayūmak mōgā kōmēn Yenoyanēn hah.

⁴ Pek mōg kamah tik xop mūtik.

Paot te hāmpē'paxex

⁵ 'Ūgmōg putup hāpxexka Māxenōn ha hāmāxap, nūy kunāy tu 'āhak mōg.

⁶ Pak xip ka'ok putup 'āxop mūtik hām'āxī hā, ha 'āxop 'hā 'āte'ax, pu 'āte hāpkumep kumaknāg.

⁷ 'A 'ātep-tup'ah 'āxop tuk xip pu'ūgnāg. Topa 'ūkputup, 'ūkxip ka'ok.

⁸ Nūn tek xip putup 'Epex tu', tu' hip, pu Yoneo xop yōg 'āmuk xexka 'āxet'ax Pēteket mīy,

⁹ puk hām xexkah, nūy hām'āpak'ax max 'āktux, tikmū'ūn xohix pu', pa tikmū'ūn yāg te hām'āpak max'ax putup nōg.

¹⁰ Tīmōn xupep 'īhā', mōy xānā' pu 'āpet kopa mō'xip, nūy nō hittupmā'. Yā hāpxopmāhā 'ūgmūn putuk, tu yūmūg xuxyā pu hāpxopmāhā'.

¹¹ Pūyā Tīmōn pe'āpaxeh kutōgnāg hok. 'Āmhok, pa hā tu' tehe', pu tu mōg, 'ūkuxa yūm 'īhā', nūy 'ūgha nū putpu'. 'Āte' hip, pu nūk xape xop mūtik.

¹² 'Āte 'Apot 'āktux putup. Hōmā 'āte tu hām'āktux, tu xe' xuktux, pu 'āha mōg, yūmūg xape xop nōy mūtik, pa tute hāmpē'paxex, tu hōnhā' mōg putup'ah. Hāpxip kutōgnāg, puxi' mōg.

Tu ta hām'āktux kux

¹³ 'Ōg pa mōxip, 'ākuxa mām ka'ok. 'Ākuxānōg hok, nūy ta 'aka'ok.

¹⁴ 'Āpu 'āhām, 'īhā 'ānōy putup pax xexka'.

¹⁵ 'Āxop te 'Exteo yūmmūg, xi' xape xop. Nōm xop kuxa mām hāmāxap hāpxexka Genex tu', tu Topa yōg tikmū'ūn pu hāpxopmā max. 'Āte xa tu' xak, yāk xape xop,

¹⁶ pu nōm xop xi' xape xop yōg hāpxopmā'ax tat, tu hām'āpak, nūy nū mūtik hāpxopmā, xa hā tu tehet.

¹⁷ 'Ūgkuxa hittup, 'ūkxape xop nūn, hak kuxa hittup. Yā 'Exteo nūn, xix Potōnān nūn, xix 'Ahkax nūn, ha mōgnīynām 'āxop pupi', 'āxop pip hok hah.

¹⁸ Ha mōgnīynām xexka', tu mō'ānīynām kamah. 'Āte' yūmmūg. Yā' max yūmū'āte nōm xop 'āktux max.

¹⁹ Hāpxexka 'Ax yōg kuxa mām xop te 'āneo. 'Ak xix Pinixit te 'āneo, xi' kuxa mām xop te nōm pet tu yāytu nū'nāhā', tu 'āxop pu 'āneo hōm.

²⁰ Hayūmmūg xape xop nūnte' pip, tu xa 'ūyīmā'ōy, tu 'āmūg putup yāy kep hā, 'āp-tup pax tu'.

Yūmūg xape xop xohix pu 'āneo hōm, 'ūgmūn pupi' āneo.

²¹ 'Āte tappet kup paha', nūy tappet mīy, hu: 'Ūgmūn Paot te xa 'āneo.

²² Nōm xop te yūmūg xuxyā putup nōg, pūyā Topa nōm hā hāpkummūgā'. Yā yūmūg xuxyā nūn putpu', yīy mā', Yāyā'!

²³ Pūyā yūmūg xuxyā Yeyox xa hāmmaxnā'!

²⁴ Yā 'āte 'āxop xohix putup pax Yeyox Kunnix hah. Tu ta tu' kux.

PAOT TE KONĪN XOP PU KAX'ĀMI' II

1 'Ūgmūn Paot. Topa tep-tup, huk xix Yeyox Kunnix yōg mō'pok xop kopah. 'Āte 'āxop pu' kax'āmi nūhū tappet yāy taknōy Tīmōn mūtik. 'Ūgmū'āte 'āxop pu' kax'āmi, yā Topa kopa' kuxa mām ka'ok xop pu kōmēn KonĪn tu' xix Topa yōg tikmū'ūn pu hāp̄xexka Genex xexka tu'.

2 'Ūgmū'ātep-tup, pu yūmū yōg tak Topa xa hāmmāxnā', pu yīy 'ākuxa māmā' xix yūmū xuxyā Yeyox Kunnix xa hāmmāxnā' xix 'ākuxa māmā'.

'Ūmax Topah

3 'Āpu yūmū Topa pu hām'āktux, yā yūmūg xuxyā Yeyox Kunnix mūktak max pu hām'āktux, hu:

–Xatek mū'ā hā 'ātehe'. Yā 'āmax. Kaxīy.

Hamūn, yūmū yōg tak Topa te yūmūg pēnāhā', tu yūmūg kuxa ka', tu tikmū'ūn xohix xexka hā' tehe'.

4 'Ūgmū yōg hāpkummuk pip, ha Topa tek mū'ā hā' tehe', yīk mū'āte tikmū'ūn hāg tehe'. Yā' pip tikmū'ūn yōg hāpkummuk xohix kamah. Topa tek mū'ā hā' tehe', hak mū'āte' pēnāhā', tu hāmyūmmūg, tu tikmū'ūn hāg tehe', yā Topa putuk.

5 Hōmā Kunnix xūy, ha ta hōnhā kamak mūg xūy, yā Kunnix putuk. Topa te Kunnix hā' tehe', ha ta Kunnix tek mū'ā hā' te xexka'. Yā yūmūg xūy, Kunnix putuk, ha Topa tek mū'ā hā' tehe', yā tute Kunnix hā' te putuk.

6 'Ūgmūg xūy, tu 'āxop pu Topa yōg hām'āpak max'ax' āktux, nūy 'āxop hāg tehet, ha Topa te 'ākuxa kummuk xit, nūy 'ākuxa max tat, 'ūyānān tu'. Topa te yūmū'ā hā' tute', kopxik mūg 'āxop hāg tehet kamah, nūy 'āxop ka'ogā', xayīy 'āxop xūy hā tot, tu hāmmāx hip. Yāk mūg putuk, 'ūgmū'āte xūy hā tot kamah 'āxop putuk.

7 'Ūgmū'āte xa hāmmāx hip punethok. Yāg mū'āte' yūmmūg 'āxop xūy 'ūgmūg putuk, ha Topa te 'āxop hā tep-tup, tutek mū'ā' tep-tup putuk.

8 'Ūkxape xop, 'ūgmū'āte xa hām'āktux 'ūxeheh, hōmā 'ūgmūg xūy hāp̄xexka 'Ax tu'. Yā hāpkummuk xexka 'ūgmū yōg, yā' kuxa mām hok xop tek mūg kute'ex kummuk, huk mū'āte hāmp̄kaxex 'ūgmūg xakix kōmnāg.

9 'Ūgmū'āte hāmp̄kaxex tikmū'ūn te' xat, puk mūg kix. Yā hāpkummuk pip, yā' kuxa mām hok xop tek mūg kute'ex kummuk, 'ūyīg kuxa mām ka'ok Topa kopah, 'ūyīy yāy yōg ka'ok'ax kopak kuxa mām hok. Yā Topa 'ūka'ok, tu tikmū'ūn putpu' hīnnā yūmmūg. Yā' ka'ok Topah.

10 'Ūgmū yōg hāpkummuk xexka' pip, hak mūg xakix kōmnāg, pa Topa te' kummuk kopak mūg mōy, tuk mūg mōy putup kamah. 'Ūgmūg kuxa mām Topa kopah, tuk mū'āte' yūmmūg Topa te' kummuk kopak mūg mōy putup 'ūxeheh.

11 'Āxop tek mūg hā 'ā tehe kamah, yā 'āxop te Topa puk mūg 'āktux, yā 'āxop te Topa puk mūg 'āktux punethok, ha Topa te' xupak putup, tu' mīy putup punethok, tuk mū'ā maxnāp-tup, ha xohix te' pēnāp-tup, hu hām'āktux putup, hu:

–Yā' max Topah. Kaxīy.

Paot te hāp̄xopmā nōy

12 'Ūgmū'āte yāy xexka 'āktux putup. 'Ūgmū'āte hāp̄xopmā max punethok, huk yāyhāhup 'ohnāg, yāg mū'āte 'āxop pu hāp̄xopmā max xexka', tuk mū'āte hāmyūmmūg xaptop 'ohnāg, tuk mūg kuxa te' yūmmūg yā' max. Yā Topa tek mūg maxnāhā hā kaxīy, hak mū'āte tikmū'ūn yōg hāmyūmmūg'ax 'āktux 'ohnāg, pa Topa yōg hāmyūmmūg'ax 'āktux.

13 'Ūgmū'āte xa' kax'āmi hāp̄xop, ha 'āxop te nōm mōkupix, tu hāmyūmmūg mō'ka'ok, yā 'āte' kax'āmi 'āhīynāg 'ohnāg. 'Āte' yūmmūg 'āxop te hāmyūmmūg xexkap-tup.

14 Hōnhā 'āxop te xahix yūmmūg, pa 'āte' yūmmūg, hāp̄xip 'hā 'āxop te hāmyūmmūg xexkap-tup, xayīy 'āxop 'ūgmūg 'āktux maxp-tup, 'hā putpu' nūn Yeyox, hak mū'āte' 'āxop 'āktux maxp-tup kamah.

15 Hōmā 'āte nōm yūmmūg xe'e, hu hāmp̄kaxex 'āxop hak mōg, nūy xa maxnā 'ūxeheh.

16 Yā 'āte hāmp̄kaxex 'ūgmōg hāp̄xexka Māxenōm tu', nūy 'āxop hak mōg kamah, nūy putpuk nūn, nūy 'āxop hak mōg 'ūxeheh, xayīy 'ā hā tehet, yā 'ā xit'ax hōm, ha ta putpuk nūn putup hāp̄xexka Yonex tu'. Yā 'āte hāmp̄kaxex te kaxīy, pa 'āmhook, 'ak mōg'ah.

17 'Ok 'āxop te hāmp̄āpaxex 'āte hāmp̄kaxex hitop? 'Ok 'āte: "'Ok pek mōg putup tikmū'ūn hah, pek mōg putup'ah? 'Īntu.'" Kaxīy. 'Āmhok, hā kaxīy 'āte hām'āktux 'ohnāg. Pa 'āte: "'Ātep-tup. 'Ūgmōg putup.'" Kaxīy.

18 Topa te hām'āktux xe'e, ha 'āte hām'āktux xe'e kamah. 'Āte hām'āktux 'ohnāg, hu: "'Ok pek mōg putup, pek mōg putup'ah? 'Īntu.'" Kaxīy. Hā kaxīy 'āte hām'āktux 'ohnāg.

19 Hōmā Xinx te xa Topak-tok 'āktux, yā Yeyox Kunnix 'āktux xix Tīmōn te' xit 'āte'. 'Ok 'ūgmū'āte hām'āktux hitop? 'Āmhok. 'Ok 'ūgmū'āte: "'Ok pe Yeyox te kaxīy pe' kaxīy? 'Īntu.'" Kaxīy. Hā kaxīy 'ūgmū'āte hām'āktux 'ohnāg. Pak mū'āte: "Yeyox te kaxīy." Hā kaxīy 'ūgmū'āte hām'āktux xe'e.

²⁰ Hamūn, hōmā Topa te tikmū'ūn pu hām'āktux xex, nūy Yeyox nū'kutnā'. Hāpxip 'Īhā' nūn Yeyox. Yā Topa te hāpxe'e 'āktux. Hak mū'āte Yeyox 'āktux, tu hāpxe'e 'āktux kamah.

²¹ Ha Topa te yūmū'ā Yeyox yūmmūgāhā', ha yūmū'āte Yeyox yūmmūg xe'e', tu yūmūg kuxa mām ka'ok Yeyox kopah. Yā Topa te yūmūg yīmōgātux, kopxix yūmūg Yeyox yūmmūg.

²² Topa te yūmūg yīmū kax'āmi, hu: "Topa yōg". Kaxīy. Tute yūmū'ā' hōm Topa Koxuk. Hā kaxīy yūmū'āte' yūmmūg yūmūg yā Topa yōg xop, ha Topa te yūmū'ā popmāp-tup hāpxop xohix, yā yūmū'ā hāmmāxnāp-tup punethok.

²³ 'Āte hām'āktux, ha Topa te' xupak, tuk kuxa yūmmūg. Hōmā 'āxop hak mōg 'ohnāg. 'Ātep-tup'ah 'āxop mānōg, huk mōg 'ohnāg 'āxop ha kōmēn Konīn tu'.

²⁴ 'Ūgmū'āte' yūmmūg 'ākuxa mām Yeyox kopah, yīy tak mū'āte xe 'āxop mōgāp-tup'ah, xayīy 'ākuxa mām ka'ok, pa yūmū'ātep-tup, nūy 'āxop pu hāmyūmmūgā', xayīy 'ākuxa hit-tup.

2

¹ Yā 'āte hāmpēpaxex 'a 'āxop hak mōg putup'ah, nūy 'āxop mānōg hok. Yā 'ātep-tup'ah 'ākuxa hittup 'ohnāg.

² 'Āte 'āxop kuxa hittup 'ohnāg mīy, kopxix 'ūgkuxa hittup 'ohnāg kamah. Tep-te 'ūgkuxa hittupmāp-tup? Yā 'āxop te', pa 'ākuxa hittup 'ohnāg.

³ Hōmā 'āte 'āxop pu tappet kax'āmi, pa 'āxop hak mōg 'ohnāg, nūy 'āxop mānōg hok, pa 'āte 'āxop mānōg tappet tu'. Pax 'āxop hak mōg, kopxix 'ōg hāpkummuk mīy'ax pēnā', nūy 'ūgkuxa hittup 'ohnāg. Pa 'āxop tek kuxa hittupmāhā', pu' max. 'Āte' yūmmūg, 'ūgkuxa hittup, ha ta 'āxop kuxa hittup kamah.

⁴ Hōmā 'āte xa kax'āmi, nūy 'ōg hāpkummuk mīy'ax 'āktux, nūy 'āxop mānōg, tuk kuxa hittup 'ohnāg, tuk kuxa nōg, tuk pota punethok. 'A 'āte putup'ah, nūy 'ākuxa hittup 'ohnāg mīy, pa 'ātep-tup, xayīy 'āxop yūmmūg 'āte 'āxop putuppax.

Tik yōg hāpkummuk mīy'ax xaxok, ha' kux

⁵ Yā hōmā 'āte 'āxop pu tappet kax'āmi, nūy 'āxop pu hām'āktux hu: "Āpu tik yōg hāpkummuk mīy'ax hā yānān, nōm te' tut mūti' nōm, nōm te 'āxop kopa' xip". Kaxīy. Yā' xip 'āxop kopah, ha 'āxop kummugā mīax. Yā nōm tik xip'ah 'ūgmūtik, hu 'āte nōm kummugā 'ohnāg.

⁶ Pa 'āxop xohix te' yānān. Puxix. 'Ūkux.

⁷ 'Āpu 'ūxaxogā', pu tu kux. 'Āpu tik kuxa hittupmā', puyīy 'ūkuxa tuknōg xexka hok, nūy Topa yōg putat max xak hok.

⁸ 'Āpu tik pu hām'āktux 'āxop te' putuppax.

⁹ Texīy 'āte xa tappet kax'āmi? Yā 'ātep-tup, nūy 'ōg hāxopmā'ax kopit. 'Ok 'āxop te' mīy 'āte nōm xat? 'Ok 'āxop te tik yōg hāpkummuk mīy'ax yānān putup? 'Ok 'āxop te' xaxok putup, pu tu' kux?

¹⁰ Yā 'āxop te tik yōg hāpkummuk mīy'ax xaxok, ha' kux, ha 'āte' xaxok kamah, ha' kux. Tik te 'ūgkummugā 'ohnāg, pa 'āte' xaxok, ha' kux. 'Āte Kunnix pu nōm 'āktux, 'āxop te' xaxok hah. Yā 'āxop te tik pu hām'āktux 'āxop te' xaxok.

¹¹ Yūmū'āte' xaxok, puyīy Hāmgāyāgnāg xut hok, pa yūmū'āte' xut. Hamūn yūmū'āte' yūmmūg Hāmgāyāgnāg tep-tup, nūy tik koxyōy.

Paot kuxanōg, hu ta' mōg

¹² Hōmāg mōg kōmēn Tonot tu', tu mōktuk xupep, tu Kunnix yōg hām'āpak max'ax 'āktux, tu' yūmmūg Topa tep-tup 'āte Topa pu hāpxopmā 'ōnteh, nūy Topa yōg hām'āpak max'ax' āktux.

¹³ Pax kuxanōg, 'āte yūmūg taknōy Tit xipix 'ohnāg tu', hu' kuxa mām ka'ok xop pu hām'āktux hu: "'Ūgmōg." Kaxīy. Hu tak mōg hāpxexka Māxenōn tu'.

Topa yōg hām'āpakmax'ax' āktux max

¹⁴ Yā' max Topah. Xonat xop mōg, tu mōktu xonat puknōg xop mūtik yāy xix tikmū'ūn mūtik, tu' xut, tu' pop xonat puknōg xop xix tikmū'ūn, tu nōm nūnnāhā', tu nūktu' mōxaha'. Ha' xape xop te' pēnāhā, tu' yūmmūg xonat xop ka'ok. Hā kaxīy Topa te yūmūg mīy yāy yōg xop, ha tikmū'ūn te' pēnāhā', 'ūka'ok Topah. Ha ta' hax max te hāpxumāhā'. Hā kaxīy tikmū'ūn te xohix nōy nā' mōg nōm te' yūmmūg 'ūmax Topah.

¹⁵ Ha ta' 'āmānex xop te' puk kōnnōn kugōy hax max yōg, ha hax max mōg pepix Topa tu' hāptox tu'. Hā kaxīy yūmū'āte tikmū'ūn pu Kunnix 'āktux, ha mōktu tikmū'ūn xohix te Kunnix yūmmūg hāptox tu'. Yā yūmū'āte xohix pu Kunnix 'āktux, yā' kuxa kummuk xit xop pu', xi' kuxa kummuk xit hok xop pu'.

¹⁶ Pa yā hax max 'ohnāg 'ūkuxa kummuk xit hok xop pu', yā hax kummuk, yā xok kutox hax putuk, pa yā hax max 'ūkuxa kummuk xit xop pu', tu nōm hīnnāhā'. Yūmū'āte hax max putuk. 'Ok yūmūg max, nūy hax max putuk?

¹⁷ 'Ūgmū'āte Topa yōg hām'āpak max 'āktux, yā' max Topa yōg hām'āpak, tu hāpxop takat putuk. Yūmū'āte tikmū'ūn putuk 'ohnāg, nōm te Topa yōg hām'āktux 'āktux kummuk, tu hāpxop tamanat hāmenex putuk. Pa Topa te yūmūg mōkpok, kopxix hām'āktux, ha tikmū'ūn te' xupak, ha Topa te' xupak kamah. Yūmū'āte hāpxe'e 'āktux. Yūmūg yā Kunnix yōg kāmānat.

3

Topa yōg pa'ax tup

1 'Āxop te putep mūn pe'āpaxex? 'Ōk 'ūgmū'āte yāy xexka 'āktux? 'Āmhok. Ōk 'ūgmū'āte tik nōy putuk? 'Āmhok. Yā tik tep-tup, pu'yīy tikmū'ūn tappet kax'āmi'. Tappet te: "Ūmax tihik nūhū'. 'Āpu nōm 'āpax!" Kaxīy. 'Ok 'ūgmū'ātep-tup tappet te kaxīy, 'āxop te nōm kax'āmi' pe' nōy te' kax'āmi'? 'Āmhok. 'Ātep-tup'ah.

2 Tikmū'ūn te nōm tappet mōkupix, tu' yūmmūg, 'ūmax tihik. Hā kaxīy tikmū'ūn xohix te 'āxop pēnāhā', tu' yūmmūg, 'āte 'āxop pu hāmyūmmūgā max, yā 'ūgkuxa max.

3 'Ūnōy te tappet kax'āmi', hak mū'āte' mōgāhā tikmū'ūn tu'. Hā kaxīy Kunnix tek mūg pu hām yūmmūgāhā', hak mū'āte tikmū'ūn pu nōm yūmmūgāhā'. Hōmā tikmū'ūn te pipkup xox hā kax'āmi mīkaxxap pe yīmū'. Hā kaxīy Topa Koxuk te tikmū'ūn kuxa maxnāhā', pu'yīy hāpoxpmā max.

4 'Ūgmū'āte hāpxe'e 'āktux nō'ōm, yā 'ūgmūg kuxa mām xe'e Topa kopah, yā 'ūgmūg kuxa mām Kunnix kopah.

5 'Ūgmūg ka'ok 'ohnāg, tu' yūmmūg 'ohnāg Topa pu hāpoxpmā', nūy Topa yōg hām'āpak max'ax 'āktux. Pa Topa tek mūg ka'ogāhā', 'ūyīy Topa pu hāpoxpmā'.

6 Tutek mūg ka'ogāhā', 'ūyīy tikmū'ūn pu Topa yōg pa'ax tup yūmmūgā'. Topa yōg pa'ax tup te Topa yōg xat'ax putuk 'ohnāg. Topa yōg pa'ax tup kax'āmi 'ohnāg tappet tu'. Pa Topa Koxuk te yūmū'ā hāmyūmmūgāhā'. Topa yōg xat'ax te hām'āktux 'ūkummuk tikmū'ūn, yīy ta' xakix tikmū'ūn. Pa Topa Koxuk te tikmū'ūn kuxa maxnāhā', tu' tikmū'ūn mīy Topa yōg tikmū'ūn, yā tikmū'ūn hīnnāhā'.

7 Hōmā 'ūhittap 'ūkax'āmi Topa yōg xat'ax mīkaxxap pe yīmū' pipkup xox hā, ha tikmū'ūn te' pēnāhā yā' max xe'ēgnāg Topah. Ha ta' xip Mōyyex, ha tikmū'ūn te' pēnāhā Mōyyex pa yīn max xe'ēgnāg, pa hāpaxip 'īhā Mōyyex pa yīn max xe'ēgnāg kutōgnāg nōy nā' mōg. Tikmū'ūn pa te māyōn yānām tot 'ohnāg. Hā kaxīy tikmū'ūn te Mōyyex pa yīn pēnā tot 'ohnāg. Hā kaxīy Topa te yāy yōg xat'ax popmāhā'. Topa yōg xat'ax te hām'āktux tikmū'ūn 'ūkummuk, tu' xakix putup. Topa te' xat'ax popmāhā', ha tikmū'ūn te' pēnāhā 'ūmax xe'ēgnāg Topah. Hā kaxīy 'ūmax xe'ēgnāg Topa te yāy xat'ax popmāhā',

8 pa' max xe'ēgnāgnām Topa Koxuk te tikmū'ūn mīy Topa yōg tikmū'ūn.

9 Topa yōg xat'ax te hām'āktux 'ūkummuk tikmū'ūn, pa' max xe'ēgnāg Topa yōg xat'ax, pa' max xe'ēgnāg Topa Koxuk te tikmū'ūn kuxa kummuk xit, nūy 'ūyānān tu' max tat.

10 Yā' max xe'ēgnāgnām hōnhā. Hōmā yā' max xe'ēgnāg, pa' nōg.

11 Hāmyāxatamuk xohix hā' pip 'ūxat'ax, tu' max xe'ēgnāg, pa' nōg. Pa hāmyāxatamuk xohix hā' max xe'ēgnāgnām hōnhā!

12 'Ūgmūg kuxa mām Topa yōg pa'ax tup kopah, huk mūg nōm 'āktux ka'ok, tuk mūg kuxanōg 'ohnāg.

13 'Ap Mōyyex putuk'ah 'ūgmū'āte'. Mōyyex te yāy pa yīn mō'nīy topixxax hā, pu'yīy 'Iyaet yōg tikmū'ūn pēnā hok 'ūpa yīn te' max xe'ēgnāg kutōgnāg nōy nā' mōg, tu' mōktu' nōg.

14 Yā 'Iyaet yōg tikmū'ūn te nōm putuk. Hōmā xix hōnhā 'Iyaet yōg tikmū'ūn te' mōkupix Topa yōg pa'ax hittap yōg tappet, tu' pa te hāmyūmmūg 'ohnāg, yā topixxax te' pa yīn mō'nīy putuk, yīy ta hām yūmmūg 'ohnāg. Ha ta tik kuxa mām Kunnix kopah, tu' tihi Kunnix mūtik, hu' pa pip, tu' hāmyūmmūg, ha 'ap xip'ah topixxax putuk, yā 'ūpa mō'nīy'ax xip 'ohnāg. Yā hāmyūmmūg.

15 Hōnhā ha ta' pip Yoneo xop, tu' mōkupix Topa yōg xat'ax yōg tappet. Mōyyex te nōm kax'āmi', pa tikmū'ūn pa te hāmyūmmūg 'ohnāg, yā topixxax te' pa mō'nīy putuk.

16 Pa Topa tappet te Mōyyex 'āktux, hu: "Tute yōkanām, nūy yūmūg xuxyā pēnā', ha' xut topixxax 'ūpa yīn tu'". Kaxīy. Hā kaxīy Topa te tikmū'ūn yōg hāpummuk mīy'ax mōy, ha tikmū'ūn te hāmyūmmūg.

17 Yā Topa yōg tappet te: "Yūmūg xuxyā'". Kaxīy. Yā Topa Koxuk. Topa Koxuk xip tikmū'ūn mūtik, puxix tikmū'ūn kuxa kummuk xit.

18 Topa 'ūmax xe'ēgnāg, ha hōmā Mōyyex te Topa mūtik hām'āktux, yīy ta' max xe'ēgnāg Mōyyex pa'. Hā kaxīy yūmūg xuxyā Topa Koxuk max xe'ēgnāg, tu' nūn tu' nūktu yūmūg kuxa tupmā nōy nā' mōg.

4

Nax takat 'ohnāg te hāpoxop max xe'ēgnāg tat

1 Topa tek mūg pēnāhā', tuk mūg kuxa ka', tuk mūg xat, 'ūyīy tikmū'ūn pu Topa yōg pa'ax yūmmūgā', yīy tak mūg kuxanōg 'ohnāg.

2 'Ūgmū'āte hāpummuk mīy'ax xohix xaptop'ax kux, nūy yāyhāhup hok, hu' koit 'ohnāg, tuk mū'āte Topa yōg hām'āpak max'ax 'āktux max, tu' koit 'ohnāg 'ūgmū'āte', pak mū'āte hāpxe'e 'āktux, ha tikmū'ūn te' xupak, ha Topa te' xupak kamah, ha tikmū'ūn te yāy kuxa kopa' yūmmūg 'ūgmū'āte hāpxe'e 'āktux, tu' yūmmūg 'ūgmū'āte hāpoxpmā max.

3 'Ūgmū'āte Topa yōg hām'āpak max'ax 'āktux. 'Ūkuxa mām hok xop pa te Topa yōg

hām'āpak max'ax yūmmūg 'ohnāg, pa' nōy xop te' yūmmūg.

⁴ Teptu 'ūkuxa mām 'ohnāg? Yā Hāmgāyāgnāg, yā nōm te hām xexka yōg tikmū'ūn xat, tu tikmū'ūn putox ka'ogāhā', puyīy tikmū'ūn Topa yōg hām'āpak max'ax 'āpak kummuk, xix Yeyox max xe'ēgnāg 'āpak kummuk xix Topa max xe'ēgnāg yūmmūg 'ohnāg. Hamūn, Yeyox te Topa putuk xe'e'.

⁵ 'Ūgmū'āte yāy 'āktux 'ohnāg, pak mū'āte Yeyox Kunnix 'āktux nōm te tikmū'ūn xat, tuk mū'āte hām'āktux 'ūgmū'āte 'āxop pu hāpχopmāhā', yā Yeyox te nōm putup.

⁶ Hōmā Topa te: "Pu yā xip kūyānām, puyīy nōā' hāpχoptap". Kaxīy. Topa te' mīy kama kūyānām putuk yūmmūg kuxa kopah, yā yūmmūg kuxa tupmāhā'. Yā yūmmūg kuxa tup, kopxix yūmmūg 'ūmax xe'ēgnāg Topah, tu Kunnix pa max yūmmūg kamah.

⁷ Yā hāpχop xohix max xe'ēgnāg pip yūmmūg kopah, pa yūmmūg max 'ohnāg, yā takat 'ohnāg putuk. Yā' nax putuk, yā nax te hāpχop max xe'ēgnāg tat, pa' pu'uk nax, tu' takat 'ohnāg. Tikmū'ūn te yūmmūg pēnāhā', tu' yūmmūg Topa 'ūka'oknām, pa yūmmūg pu'uk, yā nax putuk.

⁸ Tikmū'ūn kummuk te yūmmūg kute'ex, pa yūmmū'āte hāpχopmā max kux 'ohnāg. Hāpχip 'īhā yūmmūg kuxa mām pu'uk, pa yūmmūg kuxa mām kux 'ohnāg.

⁹ Tikmū'ūn punethok te yūmmūg tu' gāy, pa yūmmūg xape pip. Yūmmūg xūy, pa yūmmūg kuxa mām kux 'ohnāg.

¹⁰ Yūmmūg xakix kōmnāg punethok, yā Yeyox putuk, puyīy tikmū'ūn pēnā' Yeyox mōg yūmmūg mūtik.

¹¹ Hāpkummuk pip, ha yūmmū yōg hāmāxatamuk tox hā yūmmūg xakix kōmnāg, tu Yeyox pu hāpχopmā max, puyīy tikmū'ūn pēnā' Yeyox mōg yūmmūg mūtik. Yūmmūg xakix putup, pa Yeyox hi hāmāxatamuk xohix kux 'ohnāg hā.

¹² 'Ūgmūg xakix kōmnāg, xayīy tu xa Topa yōg hām'āpak max'ax 'āktux, xayīy hi xe'ēgnāg mōkuma'āmōg, ha' kux 'ohnāg.

¹³ Topa yōg tappet te: "'Ūgkuxa yūm, hu 'āte Topa yōg hām'āpak max'ax 'āktux". Kaxīy. Topa Koxuk te yūmmūg kuxa māmāhā kamah, ha yūmmūg kuxa mām, hu yūmmū'āte Topa yōg hām'āpak max'ax 'āktux.

¹⁴ 'Ūgmū'āte' yūmmūg, hōmā Topa te yūmmūg xuxyā Yeyox putpu' hīnnāhā', tuk mūg putpuk hīnnāp-tup kamah, tuk mūg mōgāp-tup 'āxop mūtik Topa hah, tu mōktu yūmmūg pip putup Topa keppah.

¹⁵ Pa hōnhā 'ūgmūg xūy, xayīy 'āxop hāpχop max pop, ha Topa te tikmū'ūn pu hāmāxnāp-tup, ha nōm xohix nōynāp-tup, tu Topa pu hām'āktux nōynāp-tup, tu Topa pu hām'āktux, hu: "Āmax, xatek mū'ā

hāmāxnāhā'". Kaxīy. Ha Topa te yāy xexka mīy nōynā' mōg putup 'ūkuxa kopah.

Yūmmū'ātep-tuppax pepix pip xop Topa yōg

¹⁶ Yīy tak mūg hup 'ohnāg, tuk mūg kuxa nōg 'ohnāg. 'Ūgmūg yīn pu'uk nōynā' mōg 'āmnīy xohix 'īhā, pa Topa te yūmmūg kuxa ka'ogāhā' 'āmnīy xohix 'īhā'.

¹⁷ Yūmmūg xūy kutōgnāg hōnhā nūnte hām xexka tu', pa' nōg putup, ha hāpχip 'īhā' max xe'ēgnāg, tu' kux putup 'ohnāg pexkox tu'. Yā hōnhā yūmmūg xūy, yā hāpχop kutōgnāg, pa pexkox tu' max xe'ēgnāg, yā hāpχop xexka'.

¹⁸ Yūmmū'ātep-tup 'ohnāg hām xexka yōg hāpχop tikmū'ūn te nōm pēnāhā', pa yūmmū'ātep-tuppax pepix pip xop Topa yōg tikmū'ūn te nōm pēnā' 'ohnāg. Yā hāmpēnā xop 'ūnōg putup, pa hāmpēnā 'ohnāg xop pip mōkuma' mōg hāmāxatamuk xohix kux 'ohnāg hā.

5

¹ Hamūn, yūmmū'āte' yūmmūg yūmmūg pip yāy pet kopah. Hā kaxīy yūmmūg pip yāy yīn kopa kamah nūnte hām xexka tu'. 'Ūkpet nōg. Hā kaxīy 'ūkok putup, yāg yīn xok putup, puxix Topa yūmmū'ā 'ūgyīn nōy mīy pexkox tu', ha yūmmūg pip putup 'ūgyīn tup kopah, yā 'ūkpet tup putuk. Topa mūn te nōm mīy, ha' xip putup mōkuma' mōg hāmāxatamuk xohix kux 'ohnāg hā.

² Pa hōnhā yūmmū'ātep-tup xexka yāy pet pexkox tu', yā yūmmūg yīn tup putup, nūy nōm kopa' pi'.

³ Yūmmūg pip putup yāy pet tup kopah, yā yūmmū'āte mō'tat putup yāy yīn tup, nūy yūmmūg koxuk hok pip'ah.

⁴ Hōnhā yūmmūg pip yāy pet kopah, yā yūmmūg yīn kopah, tu yūmmūg kokōn. 'Ap max'ah. 'A yūmmū'ātep-tup'ah yāy yīn putyōn, pa yā yūmmū'ātep-tup pexkox yōg pet, yā yūmmūg yīn tup putup. 'Ap yūmmū'ātep-tup'ah yāy yīn nōm xok putup, pa yā yūmmū'ātep-tup yāy yīn tup nōm xok putup 'ohnāg. Yūmmūg yīn hittap xok putup, ha ta' pip putup yūmmūg yīn tup pexkox tu'.

⁵ Topa te yūmmūg mīy, 'ūyīy yūmmūg yāy pet hā' nōy yānān, yā yāy yīn hā' nōy yānān, hu Topa te yūmmū'ā' hōm yāy Koxuk. 'Ūxip Topa Koxuk, kopxix yūmmū' yūmmūg Topa te yūmmū'ā yūmmūg yīn tup popmāp-tup.

⁶ Hā kaxīy yūmmūg kuxa hittup. Yūmmū'āte' yūmmūg yūmmūg pip yāy yīn kopa nūnteh, pa yūmmūg pip 'ohnāg Topa pet kopa pexkox tu'.

⁷ Hamūn, 'a yūmmū'āte' pēnā'ah pexkox yōg hāpχop, pa yūmmūg kuxa mām ka'ok, hu hāmāyūmmūg.

⁸ Yūmmūg kuxa hittup xexka', tup-tup, nūy xok, yā yāy yīn nīm, nūy pet nōy pa', yā yāy yīn tup pa', nūy Topa mūtik pi'.

9 Pa yūmū'ātep-tup, nūy Topa kuxa hit-tupmā', pe yūmūg pip yāy yīn kopah, pe yūmūg pip yāy yīn tup kopa pexkox tu'.

10 Hāpxip 'lhā yūmūg xohix mōg putup, nūy Kunnix keppak pi', ha tute yūmū yōg hāpxopmā'ax kopit putup yūmū'āte nōm mīy nūnte hām xexka tu', ha yūmūg xohix te' pop putup yāy yōg hāpxop. Yūmū'āte hāpxopmā kummuk nūnte hām xexka tu', kopxix hāpxop kummuk pop putup. Pa yūmū'āte hāpxopmā max nūnteh, kopxix hāpxop max pop putup.

Topa xape xop

11 Yūmū'āte Topa yīpkutuk yūmmūg, hu yūmū'āte tikmū'ūn xapit, puyīy Topa yōg putat hā mōg. Topa te yūmūg yūmmūg xe'e'. 'Ātep-tup, xayīy 'āxop 'ūgmūg yūmmūg kama 'ākuxa kopah.

12 'Ak mū'ātep-tup'ah, nūy xa yāy 'āktux 'ūxehh, xayīy 'āxop 'ūgmūg putup. Pak mā'ātep-tup, xayīy 'āxop 'ūgmū yōg hāpxopmā'ax max yūmmūg, xayīy 'āxop 'ūgmūg 'āktux max. 'Ūgmū'ātep-tup, xayīy 'āxop tikmū'ūn pu hām'āktux max yūmmūg nōm te hāptopa pēnāhā', pa' kuxa yūmmūg 'ohnāg.

13 Pa 'āte yāy xexka 'āktux, kopxix putox kummuk putuk. Pa 'āte yāy xexka 'āktux, nūy Topa 'āktux max. Pa 'ūkputox max putuk, kopxix 'ūp-tup, xa hāmmaxnā'.

14 Kunnix te yūmūg putuppax, yīy yūmū'āte hāpxopmā max. Hamūn, yūmū'āte' yūmmūg tik puxet te' hep xop xohix pupi' xok, yā tikmū'ūn xohix 'ūkummuk, hu' xakix.

15 Kunnix te' hep xop xohix pupi' xok, puyīy tikmū'ūn yāy pu hāpxopmā pax hok, pa Kunnix pu hāpxopmā'. Tute nōm pupi' xok, tu putpu' hi'.

16 Tikmū'ūn te Kunnix yōg hāpxopmā'ax kopit mō'ka'ok, yā hāmpe'paxex kutōgnāg, tu hām'āktux mō'ka'ok, hu: "Kunnix 'ūkummuk". Kaxīy. Yā yūmūg putuk hōmā. Yā hōmā yūmū'āte Kunnix yōg hāpxopmā'ax kopit mō'ka'ok kamah. Pa hōnhā 'ap kaxīy'ah. Yā 'āte Kunnix yūmmūg xe'e'.

17 Tikmū'ūn 'ūm kuxap-xet Kunnix kuxa mūtik, yā tikmū'ūn kuxa tup. Hāpxop kummuk xohix 'ūhittap nōg, pa hōnhā 'ūtup hāpxop xohix, yā hi'ax tup, tu' max.

18 Yā Topa te hāpxopmā xohix te kaxīy. Hōmā yūmūg 'ūgāy xop, tu Topap-tup nōg. Pa Topa te nū'kutnāhā Kunnix, tu nōmhā yūmūg mīy Topa xape xop, tu mō yūmūg pok, 'ūyīy hep xop xohix mīy Topa yōg xape xop.

19 Yūmū'āte tikmū'ūn pu hām'āktux Topa te Kunnix mūtik tikmū'ūn xohix mīy Topa xape xop, tu tikmū'ūn yōg hāpkummuk mīy'ax xaxok, pu tu' kux.

20 'Ūgmū'āte Kunnix pu hāpxopmā max, tuk mū'āte Kunnix 'āktux, yā Topa tek mū'ā'

hōm yāy 'āxet'ax, 'ūyīy hām'āktux max, tuk mū'āte 'āxop xānāhā'. 'Ūgmū'āte Kunnix mūtik 'āxop xānāhā'. 'Āpu 'ūtux hok, puyīy Topa 'āxop mīy Topa xape xop, yā 'āxop gāy tu' kux.

21 Kunnix te hāpkummuk mīy 'ohnāg. Pa Topa tep-tup, yīy Kunnix te yūmū yōg hāpkummuk mīy'ax tat, tu yūmūg pupi' xok, 'ūyīy yūmūg yāyhāk max xe'ēgnāg Topa keppah, tu yūmūg kuxap-xet Kunnix kuxa mūtik.

6

1 'Ūgmū'āte hāpxopmā max Topa mūtik, tu 'āxop pu hām'āktux, hu: Hōmā Topa te 'āxop pu hāmmaxnāhā'. 'Āpu hāpxopmā hitop hok hōnhā. Kaxīy.

2 Topa te hām'āktux. 'Āpu 'ūxupax. Topa te: "Nōmhā 'āmnīy max xupep. 'Āte 'āxop 'āpak nōmhā. 'Ātep-tup nōmhā, nūy 'ākuxa kummuk xit, nūy 'āxop hāg tehet". Kaxīy. 'Ūxupax. Topa tep-tup, nūy 'āxop pu hāpxopmā max. 'Āpu nōm pop, puyīy Topa 'ākuxa kummuk xit, nūy 'ākuxa max tat, 'ūyānān tu'.

3 'Ūgmū'āte Topa pu hāpxopmā max, tuk mū'ātep-tup'ah hāpkummuk mīy. Tikmū'ūn te' xak putup, pak mū yōg hāpkoxe xipip-tup'ah.

4 Pak mū'ātep-tup, nūy hāmmax mīy xohix, puyīy tikmū'ūn pēnā', tu' yūmmūg 'ūgmūg yā Topa yōg kāmānat. 'Ūgmū'āte hāmmax mīy, tu hāpkummuk hā tot, xix hāpkute'ex kummuk hā tot, xix xūy hā tot.

5 Yā tikmū'ūn tek mūg kix xikot hā, tuk mūg xex kanet ka'ok kopah, tu tikmū'ūn xohix te yāy tu nū'nāhā', nūy 'ūgmūg kute'ex kummuk, hak mū'āte Topa pu hāpxopmā punethok, tu mōgyōn kutōgnāg, tuk mūg xit kutōgnāg.

6 'Ūgmū'āte hāpxe'e mīy, tu hāmūmmūg, tu tikmū'ūn pu hāmmax mīy, yīy tikmū'ūn te' yūmmūg 'ūgmūg yā Topa yōg kāmānat. Topa Koxuk xip 'ūgmūtik, hak mū'āte Topap-tuppax xix tikmū'ūn putuppax, ha Topa 'ūka'ok, tu' xip 'ūgmūg mūtik, yīy tikmū'ūn te' yūmmūg 'ūgmūg yā Topa yōg kāmānat.

7 'Ūgmū'āte hāpxopmā xe'e'. Hā kaxīy 'ūgmū'āte Hāmgyāgnāg kummugāhā', ha Hāmgyāgnāg tek mū'ā kummugā 'ohnāg.

8 Tikmū'ūn yāg tek mūg 'āpak, pa' yāg tek mūg 'āpak 'ohnāg. 'Ūyāg tek mūg 'āktux kummuk, pa yā yāg nōy tek mūg 'āktux max. 'Ūyāg te hāmpe'paxex 'ūgmū'āte' koit, pa' yāg nōy te hāmpe'paxex 'ūmū'āte' koit 'ohnāg.

9 Tikmū'ūn tek mūg yūmmūg 'ohnāg putuk, pa tikmū'ūn xohix tek mūg yūmmūg. Tikmū'ūn te hāmpe'paxex 'ūgmūg xakix putūmnāg, pa yāg mūg hi'. Tikmū'ūn tek mūg kix mīm topnāg hā, pak mūg xakix 'ohnāg.

10 Ūgmūg xūy, pa yāg mūg kuxa hittuppax. Ūgmūg yā hok xop, pak mū'āte tikmū'ūn putexop xexkanāhā putuk. Yūmū yōg hāpxop pip 'ohnāg putuk, pa yā hāpxop xohix yūmū yōg, yā Topa yōg hāpxop.

11 Ūkxape xop kōmēn Konīn tu', 'ūgmū'āte 'āxop pu hām'āktux punethok, nūy xa' xuktux hāpxop xohix 'ūgmūg kuxa kopah.

12 Ūgmū'āte yāy kuxa yōg hāpxop 'āktux. Yā xate yūmūg yūmmūg. Pa 'āxop tep-tup, nūy yāy kuxa yōg hāpxop 'āktux hok, hak mū'āte' yūmmūg 'ohnāg 'āxop kuxa'.

13 'Āte 'āxop pu hām'āktux, yā yāy kutok pu hām'āktux putuk. 'Āte yāy kuxa yōg hāpxop 'āktux. 'Āpu xuktux kama 'ākuxa yōg hāpxop 'ūgmūg putuk.

Ūkummuk xop nīm

14 'Āpu kuxa mām hok xop mūtik 'āmōg hok. 'Ap max'ah. Texīy max xop mōg 'ūkummuk xop mūtik? 'Ap mōg'ah, yā max'ah. Texīy kuyānām xip hāpkoxtap kopah? 'Āmhok. 'Ūxip kuyānām, puxix tu' nōg hāpkoxtap.

15 Texīy Kunnix mōg Hāmgāyāgnāg mūtik? 'Ap mōg'ah, yā' max'ah. Texīy kuxa mām xop te kuxa mām hok xop hā' xape'? Yā 'ap xape'ah.

16 'Ok max tikmū'ūn te Topa pet ha' mōg xix topa komut pet ha' mōg kamah? 'A' max'ah. Yā Topa te:

“Ūkxip putup yāy yōg tikmū'ūn mūtik, tu nōm xop kopak xip putup.

'Ūgmūn yā nōm yōg Topah, ha nōm yā yōgnū tikmū'ūn.” Kaxīy.

17 Topa te xe:

“Āpu kummuk xop nīm, nūy mōg.

'Āpu xupxet xop nīm,

ha 'āte 'āxop pop putup,

18 nūy 'āxop hā 'ōg 'ātak 'ūgmūn,

hak-tok pit xik hex 'āxop.

Hā kaxīy hām'āktux Topa, nōm te hāpxop xohix mīy yūmmūg.”

Kaxīy.

7

1 Ūkxape max xop, Topa te yūmū'ā hāpxop xohix 'āktux xex. 'Āpu yūmū hāpkummuk mīy'ax kux, puyīy Topa yūmūg kuxa pix, tu yūmūg putup'ax kummuk nōā'. 'Āpu yūmū hāmmāynāg mīy, nūy Topa 'āpax max.

Ūkuxa hittup Paot

2 Pu yā 'ākuxa 'ūkxax. Ūgmū'āte tikmū'ūn kummugā 'ohnāg, tu tikmū'ūn koxyōy 'ohnāg, tu tikmū'ūn yōg hāpxop pop 'ohnāg.

3 'A 'āte hām'āktux'ah 'āxop kummuk. Pa hōmā 'āte hām'āktux, xix hōnhā hām'āktux 'āte 'āxop xak, yā hōnhā 'āxop xak, xix pexkox tu 'āxop xak putup kamah.

4 Ūgkuxa yūm 'āxop kopah, tu hāmpekpaxex 'āxop max. Yōgnū hāpkummuk pip, pak kuxa yūm, tuk kuxa hittup xexka'.

5 Hōmāg mūg mōg hāpxexka Māxenōn tu', tu mōktuk mūg mōxaha', hak mū yōg hāpkummuk punethok pip, yā tikmū'ūn tek mūg kute'ex kummuk, hak mūg kuxanōg.

6 Pa Topa te tikmū'ūn kuxa hittupmāhā', tuk mūg kuxa hittupmāhā kamah. Yā Tit nūn, nūy 'ūgkuxa hittupmā'.

7 Yā Tit xupep, yīg mūg kuxa hittup. Yā 'āxop max, yīy Tit kuxa hittup, hu 'ā nōm 'āktux, yīg mūg kuxa hittup kamah. Tit te hām'āktux 'āxop tek xak punethok, tu 'āxop te nōm tik kummuk tu yāyhāhup, tu 'āxop tep-tup punethok, nūy 'ā hā 'ātehet.

8 Hōmā 'āte 'āxop mānōg tappet hā, yīy 'āxop kuxa hittup 'ohnāg. Pa puxix, 'ūmax tappet. 'Ok pe' kummuk 'ākuxa hittup 'ohnāg? 'Āmhok. Yā' max. Yā' max tappet.

9 Hōnhā 'ūgkuxa hittup. 'Ok 'ākuxa hittup 'ohnāg, 'ūyīg kuxa hittup? 'Āmhok. Pa 'ākuxa hittup 'ohnāg, hu hāpkummuk mīy'ax kuxyāhā'. Topa teptup 'āxop kuxa hittup 'ohnāg, nūy hāpkummuk mīy'ax kuxyā'.

10 Yā Topa tep-tup 'āxop kuxa hittup 'ohnāg, nūy hāpkummuk mīy'ax kuxyā, ha Topa te 'ākuxa kummuk xit'ax. Yā hāmmax, 'āxop kuxa hittup 'ohnāg, yā' max. Pax xa kuxa hittup 'ohnāg te' kuxa mām hok xop putuk, puxix tu' kummuk. Yā' kuxa hittup 'ohnāg te tikmū'ūn kix.

11 Pēnā', Topa te hāpxop max mīy, 'hā 'ākuxa hittup 'ohnāg. 'Āxop te hāmmax xak punethok, tup-tup punethok, pu tikmū'ūn yūmmūg 'āxop te hāpxe'e mīy. 'Āxop te hāpkummuk mīy'ax putup nōg xexka', tu nōm hāpkummuk mīy'ax yīpkutuk xexka', tu 'āxop tek xak punethok. 'Āxop te nōm hāpkummuk mīy'ax yānān mō'ka'ok, yā nōm tik kummuk yōg hāpkummuk mīy'ax yānān mō'ka'ok. Tikmū'ūn te' yūmmūg 'āxop te hāpxe'e xohix mīy.

12 Yā hōmā 'āte xa tappet kax'āmi, xayīy 'āxop yūmmūg 'āxop tek mūg putuppax, tu Topap-tuppax kamah. Hā kaxīy 'āte xa tappet kax'āmi'. Nōm tik kummuk te' tut mūtik nōm, tu' tak pu hupmāhā'. Pa hā kaxīy 'āte xa' kax'āmi 'ohnāg.

13 Hōnhā 'ūgmūg kuxa hittup.

Yā 'āxop te Tito kuxa hittupmāhā', yīg mūg kuxa hittup punethok kamah.

14 Hōmā 'āte Tit pu hām'āktux 'āxop max. Hamūn, hōnhā 'āte hāmpekpaxex 'āxop max. Ūgmū'āte 'āxop pu hāpxe'e 'āktux mōkumamōg, tu Tit pu hām'āktux 'āxop max.

15 Ha Tit te 'āxop putuppax nōy nā' mōg, tu' yūmmūg 'āxop yīpkox pip, tu Tit yōg hām'āktux 'āpak, tu' mīy.

16 Ūgkuxa hittup, yā 'ūgkuxa yūm 'āxop kopah.

8

Tayūmak nīm punethok

¹ Ūkxape xop, 'ūgmū'ātep-tup, xayīy 'āxop yūmmūg Topa te hāmmaxnāhā Yeyox kopa kuxa mām xop pu hāpxexka Māxanōn tu'.

² Ūyōg hāpkummuk punethok pip, nūy yōg kuxa mām'ax kopit, pa' kuxa hittup xexkanām, tu tayūmak punethok popmāhā'. Yāp-te xop kutōgnāg, pa' popmāhā 'ūpunethok.

³ Nōm te' popmāhā tayūmak xohix yāy yōg, tu tehomī' popmāhā'. Yā 'ūp-tup,

⁴ tuk mū'ā hām'āktux, hu: "'Ūgmū'ātep-tup xexka' nū tayūmak popmā' Topa yōg tikmū'ūn pu hāpxexka Yonex tu'." Kaxīy.

⁵ Ūgmū'āte hāmpekpaxex, yā' xohix popmāhā'. Yā' xohix, ha nōm te Topa pu yāy popmāhā hāmāxap, tuk-nāy tu 'ūgmū'ā yāy popmāhā kamah, ha Topa tep-tup.

⁶ Tit te 'āxop hā' tehe', xayīy tayūmak yāy tu nū'xoh, hak mū'āte Tit mūtik hām'āktux, puyīy xe 'āxop hā tu tehet, puyīy tayūmak yāy tu nū'xo kux. 'Āxop te' nōy putuppax, hu tayūmak popmāhā'.

⁷ Āxop yāp-te xop kutōgnāg, pap-te xop xexka putuk. Yā 'āxop kuxa mām xexka', tu hām'āktux max yūmmūg, tu hāmyūmmūg xexka', tu' nōy hā 'ātepax xexka', tuk mūg putuppax xexka'. 'Āpu tayūmak xohix popmā kamah.

⁸ Āte 'āxop xat 'ohnāg, pa 'ātep-tup, nūy 'ōg putuppax'ax kopit. Yā 'āxop te' nōy putuppax, yā Yeyox putuk.

⁹ Āxop te' yūmmūg yūmūg xuxyā Yeyox Kunnix te' nōy hā' tehe'. Hōmā 'ūhittap Yeyox 'ūp-te xop xexka pexxox tu', pa' nūn hām xexka tu', tu yāyhāp-te xop kutōgnāg, nūy yūmū'ā hā tu tehet. Yeyox 'ūp-te xop 'ohnāg, pa yūmūp-te xop xexka mīy, yā yūmū'ā hāmmaxnāhā'.

¹⁰ Āte hāmpekpaxex hā kaxīy. Hōmā hāmyāxatamuk nōy 'hā 'āxop te tayūmak yāy tu nū'xoh kōnāmāhā'. Hōnhā tayūmak yāy tu nū'xoh kux, pu' max. 'Āxop te tayūmak popmāhā', ha ta' nōy xohix te' popmā 'ohnāg. 'Āxop tep-tuppax, nūy tayūmak popmā'.

¹¹ Āpu tayūmak yāy tu nū'xoh kux hōnhā. 'Āxop te tayūmak nīm putuppax hāmāxap. 'Āpu tayūmak nīm putuppax hōnhā, nūy nīm kuxyā.

¹² Āxop te tayūmak nīm pax, puxix Topa tep-tuppax 'ōg nīm'ax. Pa' pip 'ohnāg 'ōg hāpxop, puxix Topa pu' max kamah.

¹³ A'ātep-tup'ah, xayīy 'āxop tayūmak xohix nīm, pa' nōy te' nīm 'ohnāg. Yā' max 'ūnōy te tayūmak nīm kamah 'āxop putuk.

¹⁴ Pa hōnhā 'ōg hāpxop punethok pip. Yā' max, 'āxop te nōm hā 'ātehet. Hāpxip, puxix

tu' pip 'ohnāg 'ōg hāpxop, puxix' nōy 'āxop hā' tep-tup, yā' nōy yōg hāpxop punethok pip. Yā hā kaxīy 'āxop te hāpxop hok nīm putup, ha' nōy te hāpxop hok nīm putup yāy putuk.

¹⁵ Yā Topa yōg tappet te nōm 'āktux, hu: "Tik te' pop hāpxop xohix, pap-te xop xexka 'ohnāg

Ha ta tik nōy te' pop hāpxop tūgnāg, pap hok xop 'ohnāg." Kaxīy.

Tit xix yāy xape xop

¹⁶ Āte Topa pu hām'āktux, hu: "Topa, 'āmax. Xate Tit pu hām maxnāhā', ha tutep-tup tikmū'ūn hā' tehe 'ūgmūn putuk". Kaxīy.

¹⁷ Hamūn, hōmā 'āte Tit pu' xak, ha tutep-tup xexka', nūy 'āxop hā tu tehet. Tutep-tup, hu 'āxop ha' mōg.

¹⁸ Ūgmū'āte taknōy mōkutnāp-tup Tit mūtik. Yeyox kopa kuxa mām xop xohix te nōm putuppax, tu nōm 'āpak. Tute Topa yōg hām'āpak max'ax 'āktux.

¹⁹ Yeyox kopa kuxa mām xop te nōm yāykutnāhā', puyīy mūg mūtik mōg, nūy 'ōg nīm'ax xop mōgā', nūy yūmūg xuxyā Yeyox 'ūxexka mīy, xayīy 'āxop yūmmūg 'ūgmū'ātep-tup xexka', nūy 'āxop hāg tehet.

²⁰ Ūgmū'ātep-tup 'ohnāg, puyīy tikmū'ūn hām'āktux, hu: "Paot te tayūmak yāg hā' xupxet". Kaxīy. Yā 'ātep-tup'ah.

²¹ Pak mū'ātep-tup, nūy hāpxe'e mīy. Yā Topa te' pēnāhā xix tikmū'ūn te' pēnāhā kamah.

²² Ūgmū'āte taknōy mōkutnāhā 'ūnōy mūtik. Ūgmū'āte taknōy yōg hāpxopmā'ax kopit punethok, huk mū'āte' yūmmūg 'ūmax, tup-tup xexka, nūy tikmū'ūn hā tu tehet. Nōm taknōy kuxa yūm 'āxop kopah, hu 'āxop hā tep-tup xexka'.

²³ Tit yā yōgnū kāmānat, tu hāpxopmāhā 'ūgmūtik, nūy 'āxop hā tu tehet. Ūmōg putup 'ūtaknōy xop Tit mūtik. Yā' max 'ūtaknōy xop. Yeyox kopa kuxa mām xop te nōm mō'pok, nūy Kunnix pu' mīy hāpxop max, nūy Kunnix 'āktux max.

²⁴ Āpu nōm putuppax, puyīy Yeyox kopa kuxa mām xop yūmmūg 'āxop te nōm putuppax, tu' yūmmūg 'ūgmū'āte 'āxop 'āktux max, tu' koit 'ohnāg.

9

Tayūmak nīm hāpxexka Yonex xop pu'

¹ Yeyox kopa kuxa mām xop xohix te hāpxexka Yonex yōg Yeyox kopa kuxa mām xop pu' nīm tayūmak, ha 'āte xe xa kax'āmi putup'ah.

² Āte' yūmmūg 'āxop tep-tup, nūy tayūmak nō 'ā tehet, ha 'āte 'āxop 'āktux max hāpxexka Māxanōn xop pu'. 'Āte: "'Āxape xop hāpxexka Genex yōg xop tep-tup, nūy tayūmak nōm hā tu tehet. Yā hāmyāxatamuk puxet hā Genex xop tep-tup". Kaxīy. Ha Māxanōn xop te nōm

mōkupix, tu hōnhā tutep-tup, nūy tayūmak nīm kamah.

³ Hōnhā 'āte ūtaknōy mō'pok 'āxop hah, nūy 'āxop 'āktux max hitop hok, pa 'āxop te tayūmak nīm putup. Yā hā kaxīy 'āte hām'āktux hōmā.

⁴ Pa Māxanōn yōg xop mōg 'ūgmūtik 'āxop hah, tu 'pēnāhā 'āxop yōg tayūmak nīm 'ax pip 'ohnāg, kopxix 'ūgyāyhāhup putup, xix 'āxop yāyhāhup putup kamah. Hamūn 'ūgkuxa yūm 'āxop kopah.

⁵ 'Āte hāmpekpaxex 'ūmax ūtaknōy xop mō'pok hāmāxap 'āxop hah, puyīy 'ōg tayūmak nīm'ax yāy tu nū'xoh, 'āxop te hām'āktux xex, hak-nāy tu 'āxop hak mōg putup, tuk xupep putup, ha' pip 'ōg tayūmak nīm'ax, ha tikmū'ūn te' pēnāp-tup 'āxop tep-tup, hu' nīm tayūmak, pa' nōy te 'āxop xat 'ohnāg, pu' nīm.

⁶ 'Āpu 'ūxaxok hok, tikmū'ūn te hāpxop xap xok tīgnāg, puxix mīnta ta tīgnāg pop, pa tikmū'ūn te hāpxop xap punethok xok, puxix mīnta ta punethok pop putup. Hā kaxīy 'āxop te' nīm tayūmak tīgnāg, nūy ta hāmmaxnāk-tōgnāg, pa 'āxop te' nīm tayūmak xohix, nūy ta hāmmaxnā punethok.

⁷ 'Āxop te hāmpe'āpaxex 'ākuxa kopa tayūmak xohix nīm putup. 'Āpu 'ūnīm. 'Ūxupkūmīy xop kuxa hittup 'ohnāg. 'Āpu 'āxupkūmīy hok. Tikmū'ūn te' nīm, 'ūnōy te' xat hah. 'Āmhok, yā' max'ah. Pa 'ākuxa tu hittup hā' nīm, yā' max, yā Topa tep-tuppax.

⁸ Ha Topa te 'āxop pu popmāhā 'ōg hāpxop xohix, ha mōktu 'ōg hāpxop xohix xexka' pip, tu 'āxop 'ūm hok'ah, yā mōkuma 'āmōg, tu 'ōg hāpxop pip, nūy 'āxop hāpxopmā max.

⁹ Hamūn, Topa yōg tappet te: "Topa te' popmāhā hāpxop xohix 'ūhok xop pu', tu hāmmaxnāhā mōkuma' mōg, ha' kux 'ohnāg". Kaxīy.

¹⁰ Topa te hāpxop xap popmāhā', puyīy tikmū'ūn xoh hāpxopxap. Topa te xit'ax popmāhā', puyīy tikmū'ūn mā'. Topa te tikmū'ūn pu hāpxop xap xohix popmāp-tup, tu' tukgāp-tup, ha tikmū'ūn te mīnta ta xohix popmāp-tup. Hā kaxīy Topa te xa hāpxop xohix popmāhā', ha 'āxop te' nīm tayūmak xohix, ha Topa te tikmū'ūn pu' maxnāp-tup nōm te' pop.

¹¹ Topa te 'āxop mīy putup 'ūp-te xop xexka putuk, xayīy 'āxop tikmū'ūn pu' nīm mōkuma'āmōg, ha tikmū'ūn xohix te hām'āktux putup, hu: "Topa, 'āmax. Xatek mū'ā popmāhā hāpxop xohix". Kaxīy.

¹² 'Āxop te tikmū'ūn pu' nīm hāpxop xohix, yīy yōg hāpxop pip, puxix tu Topa pu hām'āktux, hu: "Topa, 'āmax, xate' popmāhā hāpxop xohix". Kaxīy.

¹³ 'Āxop te Kunnix yōg hām'āpak max'ax 'āpak, tu' mīy mōkuma'āmōg, tu nōm 'āktux mōkuma 'āmōg, tu tayūmak xohix nīm

hāpxexka Yonex yōg xop pu' xix tikmū'ūn nōy pu'. 'Āxop te' nīm punethok, yīy tikmū'ūn xohix te Topa 'āktux maxp-tup.

¹⁴ Tikmū'ūn te Topa pu 'āxop 'āktux maxp-tup, tu 'āxop putuppax. Topa te 'āxop pu' hōm hāpxop max, yā Topa te 'āxop pu' hōm yāy Koxuk.

¹⁵ Topa te yāy kutok xe'ēgnāg hōm. 'Āpu yūmū Topa pu hām'āktux, hu: "Topa, 'āmax. Xate yāy Koxuk hōm". Kaxīy.

10

¹ 'Ūgmūn Paot, tu yāy kutōgnāg pekpaxex, tuk gāy 'ohnāg, tu hām'āktux pu'uk, tu 'āxop puk max, yā Kunnix putuk. Pa tikmū'ūn te: "Paot te yāy kutōgnāg pe'paxex, tu hām'āktux pu'uk nūnte 'ūgmūg mūtik, pa hām'āktux ka'ok hato'ah". Kaxīy.

² Hāpxip 'thāg mōg'ax, nūy xihip 'āxop mūtik. 'Āxop yāg te hāpkummuk mīy, kopxix hām'āktux ka'ok. Pa 'a 'ātep putup'ah. 'Āpu hāpkummuk mīy hok. Hamūn, 'āte hām'āktux ka'ok 'ūkummuk xop pu'. Nōm te hām'āktux 'āte hāpxopmā kummuk, nūy yāy yōg putup'ax mīy. Yā' koit.

³ Hamūn, 'ūkxip hām xexka tu', pa Topa pu hāpxopmā max, nūy tikmū'ūn kuxa māmā Yeyox kopah, tu tikmū'ūn mūtik yāy kix 'ohnāg, yā' kuxa mām hok xop putuk 'ohnāg 'āte'.

⁴ 'Ūkuxa mām hok xop te mīm topnāg hā yāy kix xix pox hā, xix mīkax hā. 'Ak mū'āte yāy kix hā kaxīy'ah. Pa Topa te 'ūgmūg ka'ogāhā', 'ūyīy Hāmgyāgnāg yōg yāy xop yōg hāpkummuk mīy'ax nōā', xix Hāmgyāgnāg yōg tikmū'ūn yōg hāpkummuk mīy'ax nōā', xix koit'ax nōā', xix hām'yūmmūgā'ax te koit nōā'.

⁵ Hām te' tux hok, pu tikmū'ūn Topa yūmmūg hok, ha 'āte nōm hāpxop ka'ok xohix koxyōy. 'Ūgmū'āte tikmū'ūn pu hām'yūmmūgāhā', puyīy Kunnix pe tu paxeh punethok, nūy Kunnix 'āpax.

⁶ 'Āxop te Kunnix tu' pip ka'ok, tu 'āyīpkox pip. Yā' max. Pak mū'āte yīpkox 'ohnāg xop te hāpkummuk mīy'ax yānān putup.

⁷ 'Āxop te hām'yūmmūg kutōgnāg. 'Ok xip tihik, tu hāmpe'paxex, yā Kunnix yōg tihik? 'Ūgmūg yā Kunnix yōg tihik kamah.

⁸ Topa tek xexkanāhā', pa 'āte nōm 'āktux kutōgnāg, pak yāyhāhup 'ohnāg. Nōm 'āktux, pu' max. Topa tek ka'ogāhā', 'ūyīy 'ākuxa hittupmā'. 'Ātep-tup'ah 'āxop nōā'.

⁹ 'Ap 'ātep-tup'ah 'ākuxanōā' yōgnū tappet hā.

¹⁰ Tikmū'ūn te: "Paot te hām'āktux ka'ok yāy yōg tappet tu', pa' xip nūnte yūmūg kopah, puxix hām'āktux pu'uk, tu hām'āktux hitop mīy". Kaxīy.

¹¹ 'Ūmax, puyīy tikmū'ūn yūmmūg, pek mū'āte tappet kax'āmi', pek mū'āte 'āxop pu

hām'āktux, yā yāy putuk. Pek xip nūnte, pek mōg, nūy 'āxop kopak xihip, yā yōgnū hām'āktux te yāy putuk.

¹² Ūtihi 'āxop kopa Yeyox yōg mō'pok xop te' koit xop, tu yāy xexka 'āktux. 'Ātep-tup'ah yāy xexka 'āktux, nūy 'ōm xop putuk. Yā tik hitop. 'Ōm te yāy yōg hāpxopmā'ax kopit, tu Topa yōg xat'ax 'āpak 'ohnāg, tu yāy yōg xat'ax mīy.

¹³ Topa tek mūg mōkpok, 'ūyīy mūg tikmū'ūn kopa hāpxopmā max xix 'āxop kopa hāpxopmā max. 'Āte nōm 'āktux maxp-tup. Pa Topa tek mūg mōkpok, 'ūyīy hāpxopmā nōy 'ohnāg.

¹⁴ Hōmāg mūg mōg 'āxop hah, nūy Kunnix yōg hām'āpak max'ax 'āktux 'āxop pu'. Topa tek mūg xat, 'ūyīy hāpxopmā, ha 'āte hāpxopmā nōy mīy putup'ah.

¹⁵ Pa tik nōy te Topa pu' hām, nūy tikmū'ūn kuxa māmā, ha 'āte nōm 'āktux putup'ah 'āte nōm kuxa māmāhā'. 'Āmhok. Yā' nōy te nōm kuxa māmāhā'. Pak mū'āte' hip 'āxop kuxa mām nōy nā' mōg putup, hak mū'āte' hip, 'ūyīy mūg hāpxopmā nōy nāg mōg 'āxop kopah. 'Ūgmū'āte hāpxopmā max, ha Topa te nōm putup, hak mū'āte hāpxop nōy mīy putup'ah 'āxop kopah,

¹⁶ tuk mū'āte Topa yōg hām'āpak max'ax 'āktux yūmmūg hāpxexka nōy tu', ha tik nōy te Topa yōg hām'āpak max'ax 'āktux kamah. 'Ap 'āte nōm 'āktux putup'ah 'ūkpušet te hām'āpak max'ax 'āktux. 'Āmhok. Yā' nōy te' kamah.

¹⁷ Pa Topa yōg tappet te: "Ok 'āxop te yāy xexka 'āktux putup? 'Āpu Topa xexka 'āktux". Kaxīy.

¹⁸ Topa te tikmū'ūn 'āktux max, puyīy tikmū'ūn tu max. Pa tikmū'ūn te yāy xexka 'āktux, puyīy tikmū'ūn tu kummuk.

11

Paot xix Yeyox yōg mō'pok te' koit xop

¹ 'Āte hām'āktux hā hāpkute'ex kutōgnāg putup. 'Āpu 'ūg 'āpax.

² 'Āte 'āxop yīpkūmīy, ha Topa te 'āxop yīpkūmīy. 'Ātak te yāy kutok hex xat, pu yāy tax tik puxet mūtik. Yāk-tok hex yā tuk tup max. Hā kaxīy 'āte 'āxop popmāhā Kunnix pu', yā yāp-xet pu'. Hā kaxīy 'āxop te hex tukput max putuk.

³ Pa 'ūgkuxanōg. Hōmā 'āxop te Kunnix tu 'āpip ka'ok, tu Kunnix putuppax xe'e'. Pa 'āte hāmpekpaxex 'āxop te hāmpe'āpaxex kummuk putup, nūy Kunnix nīm, yā 'Ēma putuk. Tute hāmpe'paxex kummuk. Yā kāyā yōg koit'ax kopa' kuxa yūm.

⁴ Hamūn nōm Yeyox yōg mō'pok xop te' koit xop te 'āxop ha' mōg, nūy Kunnix nōy 'āktux, yā yōgnū Kunnix xe'e 'ohnāg, pa 'āxop te tik yōg hām'āktux 'āpak. 'Āxop te' kozuk

nōy paha', 'a Topa Koxuk'ah. Hōmā 'āxop te Topa Koxuk paha', hak mūg pip 'āxop kopah. Pa 'āxop te hām'āpak nōy paha', 'a yōgnū putuk'ah 'ūgmū'āte 'āxop pu nōm 'āktux.

⁵ 'Āxop te hāmpe'āpaxex Yeyox te mō'pok nōm te' koit xop. 'Ok xexka 'ōhōm, ha tak mūn kutōgnāg? 'Āmhok.

⁶ 'Āte' yūmmūg 'āte hām'āktux max yūmmūg 'ohnāg, pa 'āte hām'yūmmūg, tu nō hām'yūmmūgā max. 'Āxop tek mūg 'āpak punethok, hu' yūmmūg.

⁷ Hōmā 'āte 'āxop pu Topa yōg hām'āpak max'ax 'āktux, pa 'ōg tayūmak pop 'ohnāg. 'Āte yāy kutōgnāg mīy, xayīy 'āxop 'āxexka'. 'Ok 'āte hāpkummuk mīy? 'Āmhok.

⁸ Hōmā 'āte hāpxopmā max 'āxop kopah, 'Thā Yeyox kopa kuxa mām xop nōy te 'ā' popmāhā tayūmak. 'Āte 'ūyōg hāpxop pop, nūy 'āxop hāg tehet, yā' xupxet putuk.

⁹ 'Āte hāpxopmā max 'āxop kopah, pa 'āte 'āxop yōg hāpxop xak 'ohnāg xix 'ōgnū tayūmak xak 'ohnāg, pa hāpxexka Māxenōn yōg taknōy xop te 'ā' nūnnāhā hāpxop xohix. Hōmā 'āte 'ōg hāpxop pop 'ohnāg, tu 'a 'āte 'ōg hāpxop pop putup'ah. 'Āte 'ōg hāpxop pop 'ohnāg putup.

¹⁰ 'Āte hām'āktux Kunnix mūtik. 'Āte hām'āktux 'āte Topa yōg hām'āpak max'ax 'āktux putup hāpxexka Genex yōg tikmū'ūn pu', pa 'āte 'ūyōg hāpxop pop putup'ah, ha tikmū'ūn tek hupmāp-tup'ah.

¹¹ Teptu 'āte nōm 'āktux? 'Ok 'āte 'āxop putuppax 'ohnāg? 'Āmhok. 'Āte 'āxop putuppax.

¹² Hōnhā 'āte Kunnix puk hām putup, puyīy tikmū'ūn yūmmūg 'ūkummuk Yeyox yōg mō'pok te' koit xop, puyīy yāy xexka 'āktux hok. Hamūn, nōm te hām'āktux hāpxopmā yāg mūn putuk. Pa' koit.

¹³ 'Āp Kunnix yōg mō'pok xop xe'e'ah nō'ōm, yā' koit xop. Nōm te hām'āktux hāpxopmā max, tu Kunnix yōg mō'pok xop putuk.

¹⁴ Hāmūn, Hāmgyāgnāg te yāyhā pexkox yōg nū'pok xop putuk, yā' max xe'ēgnāg xop putuk.

¹⁵ Tikmū'ūn xohix te' yūmmūg Hāmgyāgnāg yōg tikmū'ūn te hāpxe'e mīy xop putuk. Nōm te hāpkummuk mīy, ha Topa te yōg hāpkummuk mīy'ax xohix yānān putup.

Hāpxop kummuk Paot yōg

¹⁶ 'Āte xe hām'āktux, 'āpu hāmpe'āpaxex hok, 'āte hāpxopmā hitop. Pa 'āxop te hāmpe'āpaxex, 'āte hāpxopmā hitop, kopxix yāy xexka 'āktux, yā tik hitop putuk.

¹⁷ 'Āte hām'āktux putup, pa Topa te hām'āktux te kaxīy putup'ah. 'Āte yāy xexka 'āktux, kopix tik hitop putuk.

¹⁸ Pa' pip tikmū'ūn xohix, tu yāy xexka 'āktux, yā hām xexka yōg tikmū'ūn kummuk putuk, yīy 'āte yāy xexka 'āktux putup kamah.

¹⁹ 'Āxop te hāmpē'āpaxex hāmyūmmūg xexka', xayīy 'āxop hitop 'āpakpax.

²⁰ Tik te 'āxop xatpax, ha ta 'āxop nōm 'āpax, tu mīy. Tik te 'ōg hāpxop pop, ha ta 'āxop nōm popmā'. Tik te 'āxop tuxhok, xa hāpxopmā hok, ha ta 'āxop nōm mīy 'ohnāg. Tik te yāy xexka 'āktux, ha ta 'āxop hāmpē'āpaxex 'ūxexka tihik. Tik te yāy yīm hā 'āpa yīn kix, ha ta 'āxop hāmpē'āpaxex yā' max tihik.

²¹ 'Ūgyāyhāhup, pa 'āte hām'āktux putup, 'ōgmūg pu'uk hu nōm tik te hāpxopmā putuk 'ohnāg.

Pa tik te yāy xexka 'āktux, kopxix yāy xexka 'āktux putup kamah, tu hām'āktux hitop.

²² 'Ok tik te 'Emeneo xop kopa' pip? Hamūn, yāg mūn kamah. 'Ok tik te 'Iyaet xop kopa' pip? Hamūn, yāg mūn kamah. 'Ok 'Amanām yōg xupepmā xop kopa' pip tihik? Hamūn, yāg mūn kamah.

²³ 'Ok tik te Kunnix pu hāpxopmā max? Hamūn. 'Āte Kunnix pu hāpxopmā max punethok. Yā 'āte hām'āktux hitop, tup-tox kummuk putuk. 'Ūhām pu'uk tihik pak hām ka'ok. Tik pip kutōgnāg kanet ka'ok kopah, pak xip punethok kanet ka'ok kopah. Tikmū'ūn te nōm kix kutōgnāg xikot hā, pak kix punethok xikot hā. Tik xakix kutōgnāg kōmnāg, pak xok punethok kōmnāg.

²⁴ Yoneo xop tek kix xikot hā 'ūxohix te' 39. Hā kaxīy 'ūgkix xohix te' 5.

²⁵ Hōm xop tek kix punethok xikot hā. Hā kaxīy 'ūgkix 'ūxohix te' 3. Yoneo xop te mīkaxxap punethok hāg tux yāp-xet, nūy 'ūkputex. 'Ūgmū yōg mīpkox yāy koxyōy tikoyuk kōnāg yīmū', tuk xip puxet kōnāg kopa māyōn mōg tox hā xix 'āmnīy tox hā.

²⁶ 'Āte hāpkumep punethok, tuk xok punethok kōmnāg kōnāg xexka kopah, tu xupxet tek-tex punethok kōmnāg, ha Yoneo xop tek kummugāhā' xix Yoneo kūnāpa pip xop te'. 'Ūkxok kōmnāg kōmēn kopah, xix mīmātik kopah, xix kōnāg xexka kopah, ha' xape te' koit xop tek kummugāhā'.

²⁷ 'Ūghām ka'ok, hu 'āmnīy punethok 'Īhā mōgyōn kutōgnāg, tu putup tek putex punethok, tu kōnāg putup tek putex punethok, tuk xit'ax pip kutōgnāg, xik pet pip kutōgnāg, xix yōg topixxax kutōgnāg,

²⁸ xix hāpxop xohik-tōgnāg, tu 'āmnīy xohix hā 'āte hāpxopmāhā Yeyox kopa kuxa mām xop xohix pu', yāg hām ka'ok.

²⁹ Hamūn, Yeyox kopa' kuxa mām xop pu'uk, kopxix 'ūgkuxa hittup 'ohnāg, tuk pu'uk kamah. Tikmū'ūn te Yeyox kopa

kuxa mām xop mōgāhā', pu hāpkummuk mīy, kopxix 'ūggāy, tuk kuxa hittup 'ohnāg.

³⁰ Pax 'ū yāy xexka 'āktux, kopxix yāy pu'uk 'āktux putup.

³¹ 'Ūxip Topa yā yūmūg xuxyā Yeyox mūktak. 'Ūmax xe'ēgnāg Topah, tu yōg hāmyāxatamuk xohix kux 'ohnāg. Tute' yūmmūg 'āte' koit 'ohnāg.

³² Hōmā 'ūkxip kōmēn Namān tu', ha ta' xip hāpxexka yōg xat'ax yōg gohenanok te mō'pok xonat, puyīy kōmēn pak'ax yōg hāmyīkox pēnā', puyīy xonat 'ūgmūy. Yā mīkaxxap hā nō'ōm hāmpak'ax, tu' tox.

³³ Pa' xip hāmkoxnāg hāmpak'ax tu', ha 'āte nōm hāg xupep, tu manex kopak yūm, hak xape tek yīyxohōnāhā manex hā poxit hā, ha tak mōg.

12

Paot te hāpxop xe'ēgnāg pēnāhā pexkox tu'

¹ 'A' max'ah, yāy xexka 'āktux, yā' kummuk, yā 'āte xe yāy xexka 'āktux putup. 'Āte yāy yōnkup'ax 'āktux putup, yā Topa te 'ā' mūg hāpxop xohix 'ūgyōnkup hā.

² Hōmā hāmyāxatamuk te' 14 'Īhā hām tek mūg, nūy 'ūgmōgā pepix pexkox tu'. 'Āte' yūmmūg'ah, 'ok pek mōg, 'ok pek yōnkup, 'āte' yūmmūg'ah. Yā Topap-xet te' yūmmūg.

³ 'Āte xe hām'āktux. 'Ok pe hām tek mūg, nūy mōgā pepix pexkox tu', 'ok pek yōnkup, 'āte' yūmmūg'ah, pa Topap-xet te' yūmmūg.

⁴ 'Ūkxip 'ōnte pexkox tu', tu hāpxop xe'ēgnāg 'āpak, pa nōm 'āktux yūmmūg 'ohnāg. Tikmū'ūn te nōm xop 'āktux yūmmūg 'ohnāg.

⁵ 'Āte yāy xexka 'āktux putup'ah, pa yāy pu'uk'ax 'āktux putup.

⁶ Pax 'ū yāy xexka 'āktux, kopxix hām'āktux hitop putup'ah, pa hāpxe'e 'āktux. Pa 'āte yāy xexka 'āktux putup'ah. 'Āte yāy xexka 'āktux, puxix tikmū'ūn hāmpē'paxex 'ūgxexka'. Pa 'āmhok, tikmū'ūn te yōgnū hāpxopmā'ax pēnāhā', tu yōg hām'āktux 'āpak, puxix tikmū'ūn 'ūgyūmmūg.

⁷ Pa Topa tep-tup'ah, 'āte yāy xexka pekpaxex. 'Āte' pēnāhā' hāpxop max xe'ēgnāg pexkox tu', yīy ta 'ā' hōm Topa te' hāpxūy, yā mīmīyām putuk 'ūgyīn kopah, yā Hāmgāyāgnāg yōg mō'kutnā'ax putuk tuk xūyghāhā', 'ūyīy yāy xexka pekpaxex hok.

⁸ 'Āte Topa pu yāy xūy 'āktux tikoyuk, tu Topa pu' kax, puyīy 'ūkxūy xut.

⁹ Pa Topa te: "Āmhok, puxix. 'Ūkxip 'āmūtik, tu xa hāmmaxnāhā'. Puxix. 'Ūgka'ok, 'Īhā 'āpu'uk". Kaxiy. Topa tek hittupmā 'ohnāg. Puxix, 'ūgkuxa hittup. 'Āte yāy pu'uk'ax 'āktux maxp-tup, ha Kunnix xip 'ūgmūtik, tu hāpxopmā max punethok putup. Yā' ka'ok Kunnix.

¹⁰ Ūḡpu'uk, ha tikmū'ūn tek mūn 'āktux kummuk, hak xūy, ha tikmū'ūn tek kute'ex kummuk, ha' max'ah hāpxop, 'Thā 'āte Kunnix pu hāpxopmāhā'. Pa puxix. 'Ūḡkuxa hittup. 'Ūkpu'uk, kopxix 'ūḡka'ok.

Putep mūn mīy putup Yeyox kopa kuxa mām xop

¹¹ Hamūn, 'āte hām'āktux hitop nōmhā, pa 'āxop tep-tup. 'Āxop te hāmpē'āpaxex 'ohnāḡ 'ūḡmax. Hamūn, 'ūkpu'uk, pak max kamaḡ, yā Yeyox yōḡ mō'pok te' koit xop putuk, nōm tihī 'āxop kopah.

¹² Ūkxip Yeyox yōḡ mō'pok xop kopah. 'Āxop te' yūmmūḡ, tu' pēnāhā hāpxopmā'ax 'āte nōm mīy punethok. 'Āte hāpxopmā ka'ok xe'ēḡnāḡ 'āxop kopah, ha 'āxop te' yūmmūḡ Topa te' mīy, ha 'ākuxa te' yēy. Yā hāpxopmā ka'ok xe'ēḡnāḡ.

¹³ 'Āte 'āxop kopa hāpxopmāhā', Yeyox kopa kuxa mām xop nōy xohix kopa putuk, pa 'āte 'ōḡ hāpxop pop 'ohnāḡ xix 'ōḡ tayūmak, pa Yeyox kopa kuxa mām xop nōy xohix te 'ā hā' teheh, tu' 'ā' popmāhā hāpxop xix tayūmak. Yā hā kaxīy max'ah. 'Āte' kummuk mīy. 'Apu 'ūxaxogā', pu tu' kux.

¹⁴ Hōnhā putat tikoyuk 'thāḡ mōḡ putup 'āxop hah, tu' 'a 'āte xa tuk kax putup'ah. 'Āte 'āxop putup, pa 'ōḡ tayūmak putup'ah. Hamūn, 'ūmax'ah 'ūk-tok te yōḡ 'ātak pu popmāhā hāpxop xohix xi' tut pu', pa' max 'ātak tek-tok pu' popmāhā hāpxop xohix xi' tut te'.

¹⁵ Hak kuxa hittup, tu yōḡnū hāpxop xohix pōpmāhā', tu xa hok hām ka'ok putup, nūy 'āxop hāḡ tehet. 'Āte 'āxop puttappax xexka'. 'Ok 'āxop tek puttappax putup kutōḡnāḡ?

¹⁶ 'Āxop te' yūmmūḡ 'āte' pop 'ohnāḡ 'ōḡ hāpxop, pa tikmū'ūn te hām'āktux putup 'āte 'āxop pu' koit, tu 'āxop mōḡgāhā, pa' koit.

¹⁷ Texīy? 'Ok 'āte tik mō'pok, puyīy 'ōḡ hāpxop pop? 'Āmhok.

¹⁸ 'Āte Tit pu: "Apu mōḡ tikmū'ūn hah". Kaxīy. Yīy ta' mōḡ Tit 'āxop hah. Ha 'āte taknōy nōy mō'kutnāhā Tit mūtik. 'Ok Tit te 'ōḡ hāpxop pop? Putep hāmpē'āpaxex? 'Āmhok. 'Ok Tit te hāpxopmā tek mūn putuk? 'Ok Tit tep-tup 'āte nōm putup? Hamūn.

¹⁹ 'Ok 'āxop te hāmpē'āpaxex 'ūgmū'āteput, tu hām'āktux punethok, xayīy 'āxop 'ūgmūn putup? 'Āmhok. Pak mū'āte hām'āktux, ha Topa te nōm 'āpak, ha Kunnix tep-tup nōm hām'āktux. 'Ūgmū'āte hāpxopmā xohix, nūy 'āxop hāḡ tehet.

²⁰ Ūḡkuxa nōḡ. 'Āte hāmpēpaxex 'ūgmūḡ mōḡ putup 'āxop hah, pa 'āxop te yāyhā kummuk, tu' putuk 'ohnāḡ 'āte nōm putup. 'Āte hāmpēpaxex 'āte' putuk 'ohnāḡ 'āxop te nōm putup. 'Ūḡkuxa nōḡ. 'Āte hāmpēpaxex 'āte 'āxop pēnāp-tup, 'Thā 'āxop te yāy mānōḡ,

tu 'āxop te' yīpkumīy, tu 'āxop gāy, tu 'āxop te' xupkūmīy, tu hām'āktux kummuk, tu hāpxūmāhīy, tu yāy xexka pe'āpaxex, tu yāy kute'ex pax.

²¹ Ūḡkuxa nōḡ. 'Āxop hak mōḡ putup. 'Āte hāmpēpaxex Topa tek mūn yāyhāhupmāp-tup 'āxop kopah, hak kuxa hittup 'ohnāḡ putup. 'Āte' pēnāp-tup tikmū'ūn kummuk nōm te hāpkummuk mīy, pa' yāyhāhup 'ohnāḡ, tu hāpkummuk mīy'ax kux 'ohnāḡ, yā' nōy hā' xupxet, tu hāpkummuk mīy'ax xohix putup-pax.

13

Hām'āktux kux'ax

¹ Yā putat tikoyuk nōmhā, ha tak mōḡ putup 'āxop hah. Topa yōḡ tappet te: "Tikmū'ūn tix 'ok pe tikoyuk te, 'Nōm te hāpkummuk mīy, hak mū'āte hāpkummuk mīy'ax pēnāhā". Kaxīy. 'Apu nōm 'āpak. Pa yāp-xet te nōm 'āktux, 'āpu nōm 'āpak hok." Kaxīy.

² Hōmā putat tix 'thā 'āte hāpkummuk mīy xop pu hām'āktux, hu, "'Āxop te hāpkummuk mīy. 'Apu 'ūhup!" Kaxīy. Hōmā 'āte xe nōm 'āktux. Hāpxip 'thāḡ mōḡ putup 'āxop hah, tu 'āte hāpkummuk mīy xohix xop xūyḡp-tup.

³ 'Āte hāpxop xe'e mīy putup, ha 'āxop te' pēnāp-tup, tu' yūmmūḡ Kunnix te 'ā yāy 'āxet'ax hōm. Kunnix 'ūka'ok. 'Āxop te nōm pēnāhā'.

⁴ Pa hōmā Kunnix 'ūpu'uk, yā tikmū'ūn tep-tex mīpkupnix yīmū', pa hōnhā 'ūxip, ha Topa te' hīnnāhā', yīy hōnhā' ka'ok. Yūmū'āte Kunnix kopa kuxa mām, tu nūmūtik mōḡ, tu yūmūḡ pu'uk, pak mūḡ tip-tup 'āxop kopah, ha Topa tek mūḡ ka'ogāp-tup.

⁵ 'Apu yāy yōḡ hāpxopmā'ax kopit. 'Apu yāy kopit, nūy yāy kuxa yūmmūḡ. 'Ok 'ākuxa mām Yeyox kopah? Hamūn, 'āxop te' yūmmūḡ Yeyox xip 'ākuxa kopah. Pa 'ākuxa mām 'ohnāḡ Yeyox kopah, puxix Yeyox xip'ah 'ākuxa kopah.

⁶ 'Āte' hip 'āxop te' yūmmūḡ putup 'ūgmūḡ xe'e', tuk mūḡ pip Yeyox yōḡ mō'pok xop kopah.

⁷ 'Ūgmū'āte Topa pu hām'āktux, tu' xak, xayīy 'āxop hāpkummuk mīy hok. 'Ak mū'āteputup'ah, pu tikmū'ūn hām'āktux 'ūgmūḡ hām max 'āxop kopah, yā 'āxop te hāmmax mīy, pak mū'āteputup, xayīy 'āxop hāmmax mīy, puyīy tikmū'ūn yūmmūḡ 'ūgmūḡ pu'uk, pa Topa 'ūka'ok.

⁸ 'Ūgmū'āte hāpxe'e koxyōy 'ohnāḡ, pa hāpxe'e 'āktux yūmmūḡ.

⁹ 'Ūgmūḡ pu'uk, ha tikmū'ūn tek mūḡ putup nōḡ, kopxik mūḡ kuxa hittup. 'Āxop ka'ok, kopxik-mūḡ kuxa hittup, tuk mū'āte Topa pu hām'āktux, tu ta tuk kax, pu Topa 'āxop max xe'e mīy.

¹⁰ 'Ūkxip hāptox 'āxop tu', tu nū' tappet kax'āmi', nūy 'ūggāy 'ohnāg 'āxop kopah, yā Topa tek xexka mīy putup 'āxop kopah, 'ūyīy 'āxop hāg tehet, 'ūyīy 'āxop koxyōy hok.

¹¹ 'Ūkux'ax tappet. 'Ūkxape xop, 'āpu 'ūxax, nūy hāpxopmā max xohix. 'Āpu yōgnū hām'āktux 'āpax. 'Āpu 'āp-tox puxet 'āxop. Yāy kix hok, ha Topa te mō 'āxop yāy xe'ēgnāg, tu 'āxop kopa xip putup, nūy 'ākuxa māmā'.

¹² 'Āpu yāy mūy xape max xop putuk. Yeyox kopa kuxa mām xop xohix te hām'āktux 'āxop pe'paxex.

¹³ Topa yōg tikmū'ūn xohix te 'āxop pe'paxex.

¹⁴ 'Ūgmū'ātep-tup, puyīy yūmūg xuxyā Yeyox Kunnix 'āxop pu hāmmaxnā', xayīy 'āxop mūtik mōg. Tu ta tu' kux.

PAOT TE HÄPXEKKA GANAX YÖG TIKMŪ'ŪN PU TAPPET KAX'ĀMI'

Tute' kuxa mām ka'ok xop pu 'āneo

¹ Ūgmŭn Paot. 'Āte xa kax'āmi nūhū tap-pet. Yeyox Kunnix tek yāykutnāhā', xix Topa tek yāykutnāhā'. 'A tikmŭ'ūn tek nūnnā'ah. Pa Yeyox Kunnix te nūgkutnāhā', xix yŭmŭg 'Ātak Topa te'. Yā nōm te Yeyox Kunnix putpu' hīnnāhā'.

² Nūnte ti yŭmŭg xape xop. Yā' xohix te xa 'āneo hōm, xix hāpexka Ganax yōg kuxa mām ka'ok xop xohix pu 'āneo hōm.

³ Pŭyā yŭmŭ yōg 'Ātak Topa xa hāmmaxnā', xix yŭmŭg xuxyā Yeyox Kunnix xa hāmmaxnā', xix 'ākuxa māmmā.

⁴ Yŭmŭg xuxyā Yeyox Kunnix te yāy mŭn hōm, nŭy yŭmŭg pupi tu' xok, yŭmŭ'āte hāpkummuk mŭy hah. 'Ūxok, nŭy yŭmŭg mōy hām xexka kummuk kopah. Yā yŭmŭ yōg 'Ātak Topa tep-tup.

⁵ 'Āpu yŭmŭg xohix te Topa max xe'ēgnāg 'āktux mō'kumak mōg, tu' xuktux kux 'ohnāg. Hamŭn.

Yā hām'āpak max puxehnāg Topa yōg

⁶ 'Āy! 'Āxop texīy tu Topa nīm mō'ka'ok. Tute 'āxop xānāhā', puyīy Kunnix xa hāmmaxnā'. Pa 'āxop te hām'āpak max nōy 'āpak nōmhā'. Yā hām'āpak'ax puknōg, 'ap Topa yōg'ah.

⁷ 'Ap xe'e'ah. Nōm xop te 'āxop kummugāhā', tu' xak, nŭy Kunnix yōg hām'āpak max'ax nōy yānān, pu tu' yāyhā hitop.

⁸ Pax 'ūgmŭg xa hām'āpak max nōy 'āktux, puxix Topa 'ūgkummugā', nŭy pago. Pax pu pexkox yōg nŭ'pok xop nŭn pexkox tu', tu xa hām'āpak max nōy 'āktux, puxix Topa 'ūkummugā', nŭy pago. Hamŭn. Hōmā 'āte xa hām'āpak max'ax 'āktux,

⁹ 'ūgmŭ'āte hām'āktux tap, tu hōnhā nōm 'āktux 'ūxeheh. Tik 'ūm te hām'āpak max'ax puknōg 'āktux, pŭyā Topa nōm kummugā', nŭy tu pago. Yā nōm hām'āpak max puknōg.

¹⁰ Piyā 'āte' xak nōmhā'? 'Ok pe tikmŭ'ūn te yōg hāpoxpōmā'ax putup? 'Ok pe Topa te yōg hāpoxpōmā'ax putup? Yā Topah, 'a tikmŭ'ūn'ah. Pax 'ūg xak, puyīy tikmŭ'ūn yōg hāpoxpōmā'ax putup, kopxik mŭn hām hok Topa tu'. Yā tikmŭ'ūn tuk hām'ax. Pa Topa mŭn puk hām xe'ēgnāg.

Texīy Topa te Paot mō'kutnāhā'

¹¹ 'Ūxape xop, 'āte 'āp-tup, xayīy hāmŭmmŭg. 'Āte hām'āpak max'ax 'āktux, 'a tikmŭ'ūn tek xat'ah, 'āte nōm hām'āpak max'ax 'āktux.

¹² 'A tikmŭ'ūn te 'ā hāmŭmmŭgā'ah, tu 'ā' xuktux'ah, pa Yeyox Kunnix te'.

¹³ Ha ta 'āxop te yŭmŭ yōg hāpoxpōmā'ax yŭmmŭg tap. Hōmā 'āte Yoneo xop yōg hāpoxpōmā'ax tat, tu Kunnix kopa' kuxa mām xop kute'ex kummuk pax, tu' xak, nŭy nōm pu hāpkummugā', puyīy nōm xop yāyxatat, tu yāy nōā'.

¹⁴ Hak xexka nōynāg mōg Yoneo xop kopah, yā Yoneo xop mōnāyxop yōg hāpoxpōmā'ax xohix tat 'āte'. Yā' xat'ax xohix 'āte' mŭy māynāg, tu' xat'ax 'ūm xaxok 'ohnāg.

¹⁵ Hōmā 'ūktut tek put xet'ah, 'Thā Topa 'ā yāykutnāhā', tuk xānāhā', nŭy mōgkutnā'. Yā Topa te 'ā hāmmaxnāhā',

¹⁶ tu 'ā' mŭg yāy kutok pit, 'ūyīy hām'āpak max'ax 'āktux Yoneo xop hā' puknōg xop pu'. 'Āte tikmŭ'ūn 'ūm yīkopit 'ohnāg. Nōm te tuk mŭn yŭmmŭgā'ohnāg.

¹⁷ 'Ak mōg' ah kōmēn Yenoyanēn tu', tu hām'āktux 'ohnāg Yeyox yōg mō'pok xop mŭtik. Yā Yeyox te nōm mō'pok hāmāxap, tuk-nāy tuk mŭn mōgkutnāhā. Ha tak mōg 'Anap tu', tu mōktuk xupep. Hāpxip 'Thāg nŭn putpu kōmēn Namēn tu', tu nŭktuk xupep.

¹⁸ Hāmŭxatamuk tikoyuk nōg, ha tak mōg Yenoyanēn tu', nŭy nox xip Pet pet tu', nŭy hām'āktux, tu noxk xip 'amnŭy te 15 hā.

¹⁹ Hamŭn, 'āte pēnāhā Pet xix Tiak, yā yŭmŭg xuxyā yāy taknōy, pa mō'pok xop nōy 'a' pēnā'ah.

²⁰ 'Āte kax'āmi nūhū tappet, tu hāpxe'e kax'āmi', tu' koit 'ohnāg. Topa keppa 'āte' xuktux.

²¹ Hāpxip 'Thā tak mōg hāpexka Xit tu', xix hāpexka Xinx tu',

²² ha hāpexka Yonex yōg kuxa mām ka'ok xop tek yŭmmŭg 'ohnāg,

²³ pāyā hām'āpak, hu: "Hōmā Paot tek mŭg kummugāhā', pa hōnhā Topa yōg hām'āpak max'ax 'āktux. Hōmā tutep-tup, nŭy Topa yōg putat max koxōy, pa hōnhā Topa yōg hāpoxpōmā'ax 'āktux," kaxīy.

²⁴ Tu' kuxa hittup 'ūgmŭn hā, tu Topa 'āktux max.

2

Paot xix Yeyox yōg mō'pok xop

¹ Hāmŭxatamuk te 14 nōg, ha ta xek mōg kōmēn Yenoyanēn tu', Maname mŭtik mōg, tu Tīt mōgāhā',

² Yā Topa te 'ā' pēhāhā', tu 'ā' xuktux, tuk xat, 'ūmōg Yenoyanēn tu', hu tak mōg, tu mōktuk xupep, tu' pēnā max'ax xexka xop mŭtik hām'āktux, 'ap nōy xop mŭtik hām'āktux'ah. 'Āte nōm hāmŭmmŭgāhā hām'āpak max'ax, 'āte nōm 'āktux hām'puknōg xop pu', nōm xop te Yoneo xop hā' puknōg, puyīy xexka xop 'ūghām'ax 'āktux max.

³ Ha Tit mün xip 'ügmütik, tu häp̄xexka Genex yōg tihik, yā Yoneo xop hā' puknōg, pa tik xop tek xat 'ohnāg, pu Tit yāy xax xax 'üyīmap. 'Ämhok.

⁴ Pa' nün mō'āmā'ax xop, 'ap Kunnix kopa' kuxa mām'ah, yā xetxox hex putuk, tu' nün, tu nūktu yūmū yōg xop kopa' mōxahā', nūy yūmū yōg häp̄xopmā'ax max pēnā'. Yā yūmū yōg häp̄xop xak'ax 'ap-tux'ah, yā yūmūg kuxap-xet Yeyox Kunnix kuxa mütik. Pa nōm mō'āmā'ax xop tek putup, nūy yūmūg mōgā putat kummuk hā, nūy yūmūg kuxa hīy, 'üyīy hittup hok. Yā nōm te' xat pax nām. Yā 'üyōg häp̄xop xak'ax putux.

⁵ Ha tak mü'äte nōm komut xop 'āpak 'ohnāg. Hamün, nōm 'āpak 'ohnāg hok'ah, xayīy 'āxop pip ka'ok Topa yōg hām'āpak max tu'.

⁶ Ha ta' xexka xop, yā tikmū'ün te nōm pe'paxex xexka'. ('Ok xexka' pek-tōgnāg? Yā' nōy putuk. Topa te tikmū'ün yōg häp̄xopmā'ax xohix kopit, tu' xax max hā' kopit 'ohnāg, päyā' kuxa kopa' pēnāhā'.) Nōm xexka xop tehomi 'ā hämyūmmūgāhā hām 'ohnāg,

⁷ pa nōm xop tek yūmmūg, Topa te mōgkutnāhā 'ügmün, 'üyīy Topa yōg hām'āpak max'ax 'āktux Yoneo xop hā' puknōg xop pu', pa Topa te mō Pet kutnāhā Yoneo xop hah. Ha nōm xexka xop te' yūmmūg.

⁸ Topa tek ka'ogāhā', tu nūgkutnāhā', 'ümōg Yoneo hā' puknōg xop hah, ha ta Topa te Pet ka'ogāhā', tu mō'kutnāhā', pu Yoneo xop ha mōg.

⁹ Topa te 'ā hāmaxnāhā', ha Tiak te' yūmmūg, xix Pet te', xix Yoām te'. Yā' pēnā max'ax xexka xop tek yīm nuhuk, xix Maname yīm nuhuk, yāk mōg xohix xape xe'e'. 'Ügmū'äte yāy mütik hām'āktux, tu' xuktux, 'ūmax 'ügmūg hām Yoneo hā' puknōg xop kopah, ha ta' nōm hām Yoneo xop kopah.

¹⁰ Pa nōm tek mü'ā' xak, pu häp̄xop popmā pax 'ühok xop pu'. Hamün. 'ātep-tup xexka', nūy häp̄xop popmā pax.

Pet xix Yoneo hā' puknōg xop

¹¹ Hōmā ha ta' nün Pet, kōmēn 'Ätikit tu' nün, ha 'äte tikmū'ün keppa hām'āktux, hu: "Pet, xate häp̄kummuk mīy." Kaxīy.

¹² Hamün. Pet xit hämpuknōg xop mütik, yā' kuxa mām ka'ok xop, ha ta Tiak te nū'kutnāhā tihik, ha nōm nün tu nūktu' mōxaha', ha Pet te' puknōg xop nīm mō'ka'ok. 'Ap putup'ah, puīyīy nūmütik tu xit, Yoneo xop yīp̄kutuk tu'.

¹³ Ha ta' pip kama 'Ätikit yōg Yoneo xop, yā yūmūg xape xop, tu nōm te Pet yōg häp̄xopmā'ax tat, tu' yīp̄kutuk kamah. Hamün, Maname kama te Pet pe' mōg, tu Pet yōg häp̄xopmā'ax tat kamah.

¹⁴ 'Äte' pēnāhā', 'ap hämyok mīy'ah, 'ap hām'āpak max'ax xe'e'ah. 'Äte Pet pu hām'āktux, 'ūxohix keppa' xuktux, hu: "Ämün yā Yoneo, pa 'a xate mōnāy xop yōg häp̄xopmā'ax tat'ah. Texīy xate' xat, pu Yoneo hā' puknōg xop nōm häp̄xopmā'ax tat?" Kaxīy.

'Üxohix kuxa mām Yeyox kopah, yīy Topa te' kuxa kummuk tupmāhā'

¹⁵ 'Ügmūg mün yā Yoneo xop kopak pip. 'Ügmūg tak yā Yoneo, xix mūg tut, yā Yoneo xe'e', 'a' puknōg kummuk xop yōg'ah,

¹⁶ pak mü'äte hämyūmmūg: Tikmū'ün kuxa ka'ok Yeyox Kunnix kopah, yīy Topa te' kuxa kummuk tupmāhā', puīyīy kuxa tu max. Pa tikmū'ün nōy te Topa yōg xat'ax 'āpak, tu' mīy. 'Ok hā kaxīy yāy kuxa tupmā Topa keppa nō'ōm? 'Ämhok. 'Ap kaxīy'ah. Yūmūg mün kama kuxa mām ka'ok Yeyox Kunnix kopah, pu Topa yūmūg kuxa kummuk tupmā. Yā hā kaxīy Kunnix kopa yūmūg kuxa mām ka'ok. Mōyyex xat'ax 'üm te yūmūg kuxa tupmā hok. Tep te Topa yōg xat'ax mīy, puīyīy Topa tikmū'ün kuxa kummuk tupmā', puīyī' kuxa tu max? Yā tikmū'ün 'ohnāg.

¹⁷ Pa yūmūg kuxa mām ka'ok Kunnix kopah, nūy yūmūg kuxa tu max, pa häp̄kummuk mīy. 'Ok Kunnix te häp̄kummuk mīy'ax nōynā' mōgahā'? 'Ämhok.

¹⁸ Hōmā 'äte häp̄kummuk mīy kux. Pax xe' mīy, kopxix 'ügkummuk, yā 'äte Topa yōg xat'ax koxyōy.

¹⁹ 'Ügkummuk, ha Topa yōg xat'ax te' xat, puk putex, pa Kunnix tek pupi' xok, yīy Mōyyex yōg xat'ax tek xat hok. Hā kaxīy 'ügmōg Topa peheh, tu Topa yōkāmūg mōg.

²⁰ Hōmā Kunnix tek pupi' xok mīpkupnix tu', ha Topa te' putpu' hīnnāhā'. Hōnhā 'ak puxet'ah, pa Kunnix xip 'ügkopah. Hōnhā Kunnix mütik 'ügxuxa hi xe'ēgnāg. Yāg kuxa yūm ka'ok Topak-tok pit kopah. Tute mōg yāy xe'ēgnāg, tuk pupi' xok.

²¹ Topah, 'āmax, tu 'ā' hok hā hāmaxnāhā', yīg kuxa hi xe'ēgnāg. Paxpu Mōyyex yōg xat'ax tikmū'ün kuxa kummuk maxnā', puxix Kunnix tu' hok hā' xok. Pa Topa te' hok hā' hōm. Yā yūmūg pupi' xok Yeyox, tu yūmūg kuxa kummuk tupmāhā'.

3

Hā texīy Topa te' kuxa kummuk tupmāhā'

¹ Häp̄xexka Ganax yōg tikmū'ün, yā 'āxop putox ka'ok, tu hämyūmmūg 'ohnāg. Tikmū'ün te 'āxop hitop mōgāhā hato'ah, hām'āktux kummuk hā 'āmōgāhā'. Hōmāg mü'äte 'āxop xohix pu hām'āktux xe'e', Yeyox Kunnix xok mīpkupnix tu', ha xate' yūmmūg,

tu 'ākuxa hā' pēnāhā'. Pa tikmū'ūn te 'āxop mōgāhā hato'ah.

² Āpu hām'āktux puxet. 'Ok' āxop te Mōyyex yōg xat'ax xohix mīy, pu Topa yāy Koxuk nū'kutnā 'ā hah? 'Āmhok. 'A kaxīy'ah. 'Ok' āxop te Topa yōg hām'āpak max'ax 'āpak, tu 'ākuxa mām ka'ok, puyīy Topa Koxuk 'ākopa' xihip? Yā hamūn.

³ 'Āxop texīy 'āhitop xexka? 'Āmōg kōnāmāhā Topa Koxuk mūtik, puyīy 'āka'ogā', pa hōnhā xatēp-tup, nūy 'āp-xet hā mōg, nūy yāy ka'ogā', nūy 'āp-xet hā hāp-xopmā'. Teptu 'āxop te' ka'ax hā yāp-xehnāg mōg Topa yōg putat hā?

⁴ 'Ok' āxop te hitop hā xūy hā tot? Pūyā hitop hok!

⁵ 'Ok' āxop te Mōyyex yōg xat'ax mīy, yīy ta Topa te xa nū'kutnā yāy Koxuk, tu 'āxop kopa hāp-xopmā ka'ok xe'ēgnāg? 'Āmhok. Pa 'āxop te Topa yōg hām'āpak max'ax 'āpak, tu 'ākuxa mām ka'ok, yīy ta Topa te xa mō'kutnāhā yāy Koxuk, ha 'āxop kopa hāp-xopmā max xe'ēgnāg. Hamūn. Yā kaxīy!

⁶ Āpu 'Amanām pe'āpaxeh. Topa yōg tappet te: "Amanām kuxa yūm ka'ok Topa kopah, yīy Topa te' kuxa tupmāhā', pu kuxa tu max. Yā Topa te 'Amanām yōg hāpkummuk mīy'ax xaxogāhā', pu tu kux." Kaxīy. Hā kaxīy yūmūg kuxa mām ka'ok, yīy Topa te yāy Koxuk yūmū'ā nū'kutnāhā'.

⁷ Yā 'āxop te hāmyūmmūg: Yā 'Amanām hā' mōkputox xe'e', yā 'ākuxa mām ka'ok kamah.

⁸ Hōmā Topa yōg tappet te yūmū'ā hāmyūmmūgāhā', hu: "Hāp-xip 'ihā Yoneo hā' puknōg xop kuxa mām ka'ok putup Yeyox Kunnix kopah, yīy Topa te' kuxa kummuk tupmāp-tup, puyī' kuxa tu max." Kaxīy. Tu xe 'Amanām pu hām'āpak max'ax 'āktux, hu: "Topa te 'āmūn hā hāmmaxnāp-tup, yā' hep xop xohix ha hāmmaxnāp-tup, xexka xohix tu' hāmmaxnāp-tup," kaxīy.

⁹ Ha ta 'Amanām kuxa yūm ka'ok, yīy ta Topa te 'Amanām hā hāmmaxnāhā', tu' kuxa mām ka'ok xop xohix ha hāmmaxnāhā', yā 'Amanām putuk.

¹⁰ Tikmū'ūn 'um kuxa yūm ka'ok Mōyyex yōg xat'ax kopah, pu tu' kuxa maxnā Topa pu'. Pa Topa yōg xat'ax te hāpkummuk mīy'ax 'āktux kummuk. Hamūn, Topa yōg tappet te: "Ūxohix 'ūm te Mōyyex yōg xat'ax xohix xexka mīy hok, puxix Topa' kummugāp-tup 'ūyānān tu', nūy nō kummuk mīy'ax hā pago." Kaxīy.

¹¹ Yā tikmū'ūn 'ohnāg te Mōyyex yōg xat'ax xohix mīy, puyīy Topa' kuxa kummuk tupmā', puyī' kuxa tu max. Pa Topa yōg tappet te: "Ūxohix' kuxa mām ka'ok, puxix Topa' kuxa kummuk tupmā', puyī' kuxa tu max. Yā nōm xop kuxa hi xe'ēgnāg," kaxīy.

¹² Pa nōm nōy xop te Mōyyex yōg xat'ax mīy putup, nūy yāy kuxa kummuk tupmā

Topa pu'. 'Ap putuk'ah nōm xop kuxa mām ka'ok Topa kopah, puyīy Topa' kuxa tupmā'. Yā yāy hāp-xopmā'ax hā' kuxa maxnāp-tup. Yā Topa yōg tappet te Mōyyex yōg xat'ax mīy xop 'āktux, hu: "Nōm 'ūm te Topa yōg xat'ax xohix xexka mīy xe'ēgnāg, puxi' kuxa hi'." Kaxīy.

¹³ Topa te: "Yā' kummuk nōm te Mōyyex yōg xat'ax xohix xexka mīy hok. Yā 'āte nōm ha hāpkummu nō gāp-tup, nūyhāpkummuk mīy'ax hā pago." Kaxīy. Pa Kunnix te hāpkummugā'ax hā' tot yūmūg pupi', tu yūmūg pupi' xok, yā tute yūmūg mōy, 'ūyīy yūmūg hi xe'ēgnāg. Yā Topa yōg tappet te: "Yā' kummuk nōm te mīpkupnix tu' xup." Kaxīy.

¹⁴ Ha mōktu Kunnix te yūmūg pupi' xok, 'ūyīy yūmūg hi xe'ēgnāg. Topa te' hok hā hāmmaxnāhā', puyīy Yoneo hā' puknōg xop ha hāmmaxnā'. Yā hōmā Topa te 'Amanām pu hām'āktux xex, tu hāmmaxnā'ax hep xop xohix ha 'āktux, tu hōnhā Yeyox Kunnix hā hāmmaxnāhā', puyī' puknōg xop kuxa mām ka'ok Yeyox Kunnix kopah. Hōmā Topa te hām'āktux xex, tu' xuktux, yā yūmū'ā ha yāy Koxuk nū'kutnāhā'. Ha yūmūg kuxa mām ka'ok, yīy ta Topa Koxuk te yūmūg kopa' xip.

Ūxat'ax xix hām'āktux xex'ax

¹⁵ Ūkxape xop, 'āte xa hāmyūmmūgāp-tup tu tikmū'ūn mīy'ax hā 'āyūmmūgāp-tup. Tik te' nōy pu hām'āktux xex, tu nō kax'āmi tappet tu'. 'Ok tikmū'ūn te nō hām'āktux xex koxyōy? 'Āmhok. 'Ok tikmū'ūn te hām'āktux nōy kax'āmi xehomi'? 'Āmhok.

¹⁶ Hōmā Topa te 'Amanām pu hām'āktux xex, xix 'Amanām yāy mōkputox pu hām'āktux xex. Yā mōkputox puxehnāg 'āktux, 'ap xohix'ah. Yā Kunnix te 'Amanām hā' mōkputox xe'e'. Yā Topa te yāy nōm kutnāhā'.

¹⁷ Ūyūmmūg. Hōmā Topa te nōm pu hām'āktux xex, yā Topa te' pa'ax hittap mīy tikmū'ūn mūtik, ha ta' nōg hāmyāxatamuk xohix te' 430, 'Ihā Topa te tikmū'ūn pu popmāhā Mōyyex yōg xat'ax. 'Ok Mōyyex yōg xat'ax te nō hām'āktux xex koxyōy? 'Ok pa'ax koxyōy? 'Āmhok.

¹⁸ 'Ok Topa te hāmmaxnāhā Mōyyex yōg xat'ax mīy xop hah? 'Ok pe hām'āktux xex 'ūkopa' kuxa mām xop pu hāmmaxnāhā'? Yā hāmmaxnāhā! Pax pu Topa hāmmaxnā Mōyyex yōg xat'ax mīy xop hah, puxix hām'āktux xex xop kuxa mām ka'ok xop ha hāmmaxnā hok. Pa Topa te 'Amanām pu hām'āktux xex, tu nōm ha hāmmaxnāhā'.

¹⁹ Teptu Topa te' xat'ax xohix xat? Ūxat, pu tikmū'ūn hāmyūmmūg, nūy yāy yōg hāpkummuk mīy'ax yūmmūg. Mōyyex yōg xat'ax pip ka'ok, tu mōktu' xupep 'Amanām mōkputox, ha Topa te nōm pu hām'āktux xex, ha pexkox yōg nū'pok xop te tik pu

Möyyex yög xat'ax xohix popmähä', ha tik te tikmü'ün pu nöm popmähä'. Nöm tik te yäy kote' xip.

²⁰ Pa tik te yäy kote' xip, puxix tu punethok. Pa Topa yäp-xet, 'ap punethok'ah. Topap-xet te hām'äktux xex.

Texiy 'uxat'ax popmähä'

²¹ 'Ok Möyyex yög xat'ax te Topa yög hām'äktux xex'ax nōā'? 'Ämhok! Pax pu Möyyex yög xat'ax tikmü'ün hīnnā', puxix tikmü'ün nöm xat'ax mīy, nūy yäy kuxa kummuk tupmä'. Pa 'ämhok, 'uxat'ax te' kuxa tupmä hok.

²² Pa Topa yög tappet te' kummuk 'äktux, tu tikmü'ün xohix xexka kummuk 'äktux, xī' puknög xop xohix xexka kummuk 'äktux, hāpkummuk mīy hah. Topa yög tappet te nöm 'äktux, pu tu kuxa mām ka'ok, puyiy Topa hāmmaxnā'. Topa te nöm pu hām'äktux xex, tu' kuxa mām ka'ok xop pu hām'äktux xex, nöm xop kuxa mām ka'ok Yeyox Kunnix kopah.

²³ Hamün, yümüg kuxa mām ka'ok nōmhā, pa hōmā Möyyex yög xat'ax te yümüg kuxa hīy, kanet ka'ok kopa' hīy putuk, ha möktu yümüg kuxa mām ka'ok nōmhā.

²⁴ Hamün, Möyyex yög xat'ax te yümüg hāmyümmügähä', nūy yümüg mögā', ha möktu' xupep Yeyox Kunnix, pu tu yümüg kuxa mām ka'ok Yeyox Kunnix kopah, puxix Topa yümüg kuxa kummuk tupmä', 'üyiy kuxa tu max.

²⁵ Hu nōmhā yümüg kuxa mām ka'ok, ha Topa yög xat'ax te yümü'ā hāmyümmügähä', ha' kux.

²⁶ 'Äxop xohix kuxa mām ka'ok Yeyox Kunnix kopah, hu ta 'äxop yā Topak-tok xop, yā 'äkuxap-xet Yeyox Kunnix kuxa mütik.

²⁷ Yā 'äxohix mōxaha Kunnix yög xop kopah, ha 'äp-tox pix, yā 'äkuxa mām Kunnix kopah, tu nōmhā Kunnix putuk, yā Kunnix xip 'äxohix kopah.

²⁸ Yā Topa te yümüg xohix hā tehe', ha' yäy putuk 'ükuxa mām ka'ok xop, yā Yoneo xop xī' puknög xop te yäy putuk. Yā nöm te' hok hā' hām, xix nöm te tayūmak hā' hām, tu yäy putuk. Yā tik xix 'ün te yäy putuk. Yā xohix te' nōy putuk, yā' xohix kuxa mām ka'ok Yeyox Kunnix kopah. 'Ap pip'ah 'üxexka xop xik-tōgnāg xop. Yā yäp-xet, 'ükuxap-xet, tu yäy putuk.

²⁹ Yā 'äxop mōxakux Kunnix yög xop kopah, hu ta kama 'Amanām hā 'ämōkputox, ha Topa te xa hāmmaxnāp-tup kamah, yā tute hām'äktux xex 'Amanām mökputox pu'.

4

¹ 'Üyümmüg. 'Ütak 'üm yög hāpxop xohix, tu' xok putup, hak-hāy tuk-tok te' pop putup, 'üyög 'ätak yög hāpxop pop putup. Pa' xip 'ätak, hak-tok 'ühok, yā' hok hā' hām yäy tak

pu'. 'Üyög 'ätak te' popmā'ax hāpxop, yāk-tok yög hāpxop, tu' pop putup, pa hōnhā' pop'ah. Yā hōnhā hāmhögnāg 'ük-tok.

² Ha ta' xuxyā te nöm kutok xat, nūy tu pēnā max, ha ta' xuxyā nōy te hāpxop pēnānā' xip, nöm hāpxop 'ätak tek-tok pu' popmā'ax, yā nöm tek-tok pēnāhā', tu hāpxop pēnāhā', tu möktu nöm 'ämniy 'üm mō'nāhā', yā tik yög 'ätak te nöm 'ämniy 'äktux tap.

³ Hā kaxiy yümüg mün hōmā kamah. Yā yümü'äte nöm kutok putuk, ha yāmīy kummuk xop te yümüg xat kummuk, ha nöm xop pu yümü'äte' hok hā' hāpxopmähä' yāmīy xop pu', xix Topa hā' puknög xop pu yümü'äte hāpxopmähä'.

⁴ Pa hāpxip 'ihā nöm hāptup mō'nāhā', 'ihā Topa te yäy kutok pit nū'kutnāhā', ha' tut te' put, yā Yoneo xop kopa' xip Topak-tok, ha ta Möyyex yög xat'ax xohix xexka pu' yīpkox xip Topak-tok, nūnte hām xexka tu' xip 'ihā'.

⁵ Topak-tok nūn, nūy nōkōpanat yümüg xohix, puyiy Möyyex yög xat'ax yümüg xat hok, tu' nūn, nūy yümüg kuxa hīnnā xe'ēgnāg, 'üyiy yümüg xohix yäyhā Topak-tok xop.

⁶ Yā 'äxop yā Topak-tok xop, yiy ta Topa te nū'kutnāhā yäy Koxuk 'äkuxa hah, ha Topa Koxuk te Topa pu: "Ätak, yōgnū 'ätak!" Kaxiy.

⁷ Hamün, yā hōnhā' kux, 'äxop te 'a hok hā 'ähām'ah, pa nōmhā 'äxop yā Topak-tok, ha Topa te xa' popmāp-tup yäy yög hāpxop, yā yäy kutok pu nöm popmāp-tup.

Paot kuxānög. 'Ok Ganax yög xop kuxa mām kux?

⁸ Pāyā hōmā 'äxop te Topa hā 'äpuknög, ha ta topa komut xop te 'äxop xat pax, tu yā mō'āmā'.

⁹ Pa nōmhā 'äxop te Topa yümümüg, yā Topa te 'äxop yümümüg hāmāxap, hak-nāy tu 'äxop te Topa yümümüg. Texiy tu putpu 'äxop mög, nūy Topa hā' puknög xop yög hāpxopmā'ax tat 'üxeheh? Nöm hāpxopmā'ax te 'äxop hā te 'ohnāg. Yā 'äkummugā'ax 'üxeheh.

¹⁰ Yā 'äxat, xa nit xān 'ihā 'ähām hok, tu 'ämuk xexka mīy'ax xat, xix māyōnhex tup'ax yög 'ämuk xat, xix mō'āgmü'ax yög, xix hāmyāxatamuk yög.

¹¹ 'Ügkuxānög. 'Ok hitop hāg hām 'ügmün 'äxop kopah? 'Ok 'äkuxa mām kux, nūy nō xat'ax hittap mīy?

¹² 'Ükxape xop, 'äpu yög hāpxopmā'ax tat. Yā 'äxop hāgxape, yāg kummugā 'ohnāg.

¹³ Xatek yümümüg, hōmā 'ükpakut, 'ihā noxk xip 'äxop mütik, hu 'äte Topa yög hām'äpak max'ax 'äktux hāmāxap 'äxop pu'.

¹⁴ 'Ükpakut xexka', pa 'äxop tek putup pax, tuk mün tu yäyhāhup 'ohnāg, tuk kuxa ka', tu 'ähāk tehe', tuk hā' tot, yā pexkox nū'pok xop putuk, yā Yeyox Kunnix putuk,

15 ha 'äxop tek mün hä 'ähittup xexka! Hamün, hōmā 'äxop tek mün hä 'ähittup xexka, pa hōmhā 'āmhōk. Texiy?

16 'Ok 'āte xa häpxe'e 'äktux, hu yāyhā 'äxop häk puknōg? Pa tūy! 'Ok 'āhāg puknōg nōmhā?

17 Yā nōm xop te 'āp-tup pax 'äktux, nūy 'äxop mōgā, pāyā yōg putat ka'ax kummuk, tu yūmūg yāy xatat putup, 'äxop xik mün, xayīy nōm pe 'āmōg.

18 Ta' max, pu nōm xop 'āp-tup pax. Tikmū'ün te' nōy putup pax, tu häpxopmā max, 'Thā 'äxop mütik xip, 'äxop mütik xip hok kamah. 'Äte xa häpxe'e 'äktux.

19 'Ügkutok xop, 'Ügkuxa xūy, yā' tut tek-tok put xūy putuk. Hā kaxiy 'āte 'äxop hāg kuxa xūy, ha mōktu 'äxop yāyhā Kunnix putuk.

20 'Ätep-tup, nūy noxk xip 'äxop mütik nōmhā, nūy 'ōg hāmpu tu panōm hä' nōy yānān. 'Ügkuxānōg. 'A 'äxop yōg häpxopmā'ax max'ah.

Tu 'Agah xix Xat' äktux

21 'Äpu, 'ā hām'äktux! 'Äxop tep-tup, nūy Mōyyex yōg xat'ax mīy, nūy yāy kuxa tupmā Topa pu'. Mōyyex yōg xat'ax tep-tup' äktux?

22 'Üxuktux kaxiy: Yā mōnāyxop 'Amanām kutok 2. 'Ük-tok puxet mūg tut yā' hok hä' hām, yā' nōy te' xat, ha' hok hä' hām, yā' puknōg. Pak-tok nōy mūg tut yā 'ün xe'ēgnāg, 'ap hok hä' hām'ah, pāyā kāmānat xat.

23 Ha 'Ün yā' hok hä' hām, tuk-tok pit put, yā kaxiy 'ün xohix tek-tok put. Pa 'ün nōy yā' nōy xat, tuk-tok pit put, ha hāmhūmnāg 'ünā'ax, ha Topa te hām'äktux xex, tu kaxxop putnāhā'.

24 Hamün te yūmū'ā hāmyūmmūgāhā' häpxopmā'ax nōy. 'Ün 2 te häpxopmā'ax yūmmūgāhā', Topa te' pa'ax mīy tikmū'ün mütik. 'Ün puxet yā' hok hām. Yā' xuxet'ax 'Agah, ha 'ün nōy te 'Agah xat. Hā kaxiy Topa te tikmū'ün xat, tu' xat'ax xohix popmāhā yīktix Xīnāy tu', hā kaxiy 'Ägah hä' mōkputox, yā' hok hä' hām, tu' yāy xat'ohnāg.

25 Yīktix Xīnāy xip 'Anap tu', tu' yōg tikmū'ün yā' hok hä' hām, xix kōmēn Yenoyanēn yōg tikmū'ün yā' hok hä' hām. Nōm xop te 'Agah mōkputox putuk.

26 Ha ta' xip kōmēn Yenoyanān nōy, tu pepi' xup pexxox tu'. Nōm yōg tikmū'un te yāy xat, 'ap hok hä' hām'ah, nōm kōmēn yūmū'ā hä' tut xe'e'.

27 Yīy Topa yōg tappet te:

“Ähittup, xate 'äk-tok put xet'ah,

'Ähittup 'äk-tok put tu' 'äxūy 'ohnāg.

Yā tik te' xetut nīm, hak-tok xohix punethok. Ha tik te' xetut mütik nōm, hak-tok kutōgnāg.” Kaxiy.

28 Hōmā Topa te hām'äktux xex 'Amanām pu', yī' xetut Xat tek-tok 'Iyak put. 'Ükxape

xop, hä kaxiy yūmūg yāyhā Topak-tok xop, Topa te hām'äktux xex hāh.

29 Yā hōmā 'Amanām kutok puxet, pa Topa te nōm hāmāxap hä hām'äktux xex 'ohnāg. Ha tak-nāy tu' nōy put, ha Topa Koxuk te nōm hä hām'äktux xex, hak-tok te māxap te' taknōy tek-te'ex kummuk. Yā hä kaxiy hōnhā kamah.

30 Putep xuktux Topa yōg tappet? Yā hām'äktux, hu: “Äpu' xat pu mōg, 'ün te' hok hä' hām, xik-tok. Hāmün, yā 'ätak te yāy yōg häpxop popmāp-tup'ah nōm 'ün kutok pu', pāyāk-tok nōy pu' popmāp-tup, tu yāy xetut xe'ek-tok pu' popmāp-tup.” Kaxiy.

31 Yīy ta 'Ükxape xop, yūmūg mün yā' xetut xe'e häk kutok xop, nōm te' nōy xat. 'Ap 'ün nōy hä yūmūg kutok 'ohnāg, nōm te' hok hä' hām. 'Ämhok.

5

Tute' xat'ax 'äktux, xi' hi xe'ēgnāg 'äktux

1 Yā Kunnix te yūmūg kuxa hīmnā tap, 'üyīy hi xe'ēgnāg. Hōmā Yoneo xop yōg xat'ax te yūmūg xat, ha yūmūg kuxa hīy, pa Kunnix te yūmūg mōy, ha yūmūg mōg. 'Äpu nox pi', puyīy' xat'ax 'äkuxa hīy hok 'üxeheh, ka' hok hä' 'ähām 'üxeheh.

2 'Äpu 'üg-āpax, 'ügmün Paot, tu 'äxop pu hām'äktux: 'Äxop te hitop yāy xax mep 'üyīmap, nūy yāy kuxa kummuk tupmā Topa pu'. 'Ok Kunnix te hitop tu' xok 'äxop pupi'?

3 'Äte xe hām'äktux, tik 'üm te yāy xax mep 'üyīmap, puxi' max, pu tu mīy Mōyyex yōg xat'ax xohix xexka', 'ap xahix'ah. Topa te' xuktux.

4 Nōm 'üm tep-tup, nūy Mōyyex yōg xat'ax mīy, puyīy Topa tikmū'ün kuxa kummuk tupmā', puyī' kuxa tu max, puxix Topa nōm 'üm hä hāmmaxnā 'ohnāg, ha' kuxa tupmā 'ohnāg. 'A Kunnix yōg'ah.

5 Pa yūmūg kuxa mām ka'ok, hu yūmū'āte hāmmax hip, pu Topa yūmūg kuxa kummuk tupmā' yā Topa te yūmū yōg häpkummuk mīy'ax xaxogāhā', ha' kux. Yā yūmū'āte hāmmax hip, 'Thā yūmūg kuxa mām ka'ok, yīy Topa Koxuk te yūmūg ka'ogāhā'.

6 Yūmū'āte yāy xax mep 'üyīmap, pe' yāy xax mep 'üyīmap hok, yā' yāy putuk Topa pu', pa Topa tep-tup, yūmūg kuxa mām ka'ok, hu yūmū'ātek nōy putup pax nōmhā'.

7 Hōmā 'äxop mōg putat max hä, tu 'äyīpkox pip, hu hām'āpak max'ax xe'e 'āpak. Pa nōmhā 'āmhok. Putep te 'äxop mōgāhā', pu nōm putat xak?

8 'A Topa'ah yā Topa te yāy ha 'äxop xānāhā'.

9 'Äpu hāmyūmmūg. Tikmū'ün te: “Üxip hāmāxap pām tokatogā'ax kutōgnāg, pa häpxip 'Thā nōm pām xexka,” kaxiy. Hā kaxiy häpkummuk te' xexka nōy nā' mōg.

¹⁰ 'Ūgkuxa yūm ka'ok Topa kopah, tu hāmyūmmūg, 'a 'āxop te hāmpē'āpaxex nōy putup'ah, pak mūn putuk hāmpē'āpaxex. 'Ūgkuxa yūm ka'ok Topa kopah, tu hāmyūmmūg, Topa te nōm tik kummuk hāyūgāp-tup, nōm te 'āxop mōgāhā hatō'a'.

¹¹ 'Ūkxape xop, putep hāmpē'āpaxex? 'Ok 'āte hām'āktux, pu tikmū'ūn Topa yōg xat'ax mīy, nūy yāy kuxa kummuk tupmā'? 'Āmhok. 'A 'āte' xuktux'ah. 'Ok tikmū'ūn tek kummugāhā'? Hamūn. 'Ok tikmū'ūn te Yeyox yōg xok'ax 'āpak, tu 'xok mīpkupnix tu xupak, tu' gāy hok? 'Āmhok. Yā' gāy tikmū'ūn!

¹² Nōm te 'āxop kummugāhā', yā 'ātep-tup, pu nōm yāy mep xexka'!

¹³ Hamūn. 'Ūkxape xop, Topa te yāy ha 'āxop xānāhā'. Tutep-tup'ah pu' xat'ax 'āxop xat pax nām. Pa Topa te 'āxop mōy, xa mōg. Pa nōmhā yāy putup'ax mīy hok, 'ākuxa te nōm kummuk tep-tup, pa 'āpu 'ānōy putup pax, nūy ta 'ānōy ha hāmmāxānā'.

¹⁴ Yā mōyyex yōg xat'ax xohix te hāpxopmā'ax puxet 'āktux, hu: "‘Āpu 'ānōy putup pax, yā yāy putup pax putuk," kaxīy.

¹⁵ Pa 'āxop yāy mānōg, xix yāy kix, puxix xokxop putuk, yā yāy māhā'.

Topa Koxuk xix tikmū'ūn yōg putup'ax

¹⁶ Pa 'āte xa hām'āktux, 'āpu Topa Koxuk pu 'āyīpkox pip, nūy yāy yōg putup'ax mīy hok.

¹⁷ Yā tikmū'ūn te yāy yōg putup'ax mīy, puxix Topa Koxuk pu' yīpkox hok, ha Topa Koxuk pu' yīpkox pip, puxix yāy yōg putup'ax mīy hok. Yā Topa Koxuk te yūmūg yāy yōg putup'ax hā' puknōg, ha yūmūg yāy putup'ax te Topa Koxuk hā' puknōg. 'Ap yāy putuk 'ohnāg, yīy Topa Koxuk puxet pu 'āyīpkox pip.

¹⁸ Ha Topa Koxuk te 'āmōgā', puxix Mōyyex yōg xat'ax 'āxat pax hok.

¹⁹ Yūmū'āte yāy putup'ax mīy. puxix tikmū'ūn yūmū yōg hāpxopmā'ax pēnā'. Yā yūmū'ātek nōy hāk xupxet pax, tu 'ūn xop pēnā kummuk, tu tik xop pēnā kummuk, tu kokex putuk, tu yūmū'āte hā kaxīy putup pax hāpxopmā'ax xut putux,

²⁰ tu topa komut xop pu nūktetex, tu mīm mīy, tu yūmūg yāy putup nōg, tu yāy kute'ex kummuk, tu yāy tup-tup hāpxop xohix, tu yūmūg gāy, tu yūmūg xupkūmīy, tu yūmūg yāy tuk-mīy, tu yūmū'āte tikmū'ūn xohix nīm, nūy yāgnāg mōgā',

²¹ tu yūmū'āte yīpkūmīy, tu yūmūg pap-tux, tu yūmūg yāy hi pax, nūy hāpkute'ex pax. Nōm te yāy putup'ax mīy xop texīy mīy. Hōmā 'āte xa hām'āktux, tu hōnhā xe' xuktux. Tikmū'ūn te' mīy nō'ōm, 'a' mō'nāp-tup'ah Topa yōg xop kopah, yā Topa te nōm xat xop kopa' xip, pāyā hāpkummuk mīy xop xat 'ohnāg.

²² Pa Topa Koxuk xip yūmūg kuxa kopah, puxi' pip hāpxopmā max xohix yūmūg kopah. Yā mīnta ta putuk yūmūg kopah. Yūmū'ātek nōy putup pax, tu yūmūg kuxa hittop pax, tu yūmūg kuxa mām, tu yūmū'āte hāmmāxānāhā', tu' nōy tu yūmūg pip ka'ok,

²³ tu hāpkummuk yānān 'ohnāg, tu yāy putup'ax mīy 'ohnāg. 'Ūmīy nōm hāpxopmā max, puxix Mōyyex yōg xat'ax hitop tu yūmūg xat.

²⁴ Ha Yeyox Kunnix yōg xop xohix te yāy putup'ax mīy kux. Yeyox Kunnix xok mīpkupnix tu', puyīy yūmū yōg putup'ax kummuk kux.

²⁵ Topa Koxuk te yūmūg kuxa hīnnāhā', nūy yūmūg mōgā', 'ūyīy hāpxopmā max xohix. 'Āpu nōm pu 'āyīpkox pi'.

²⁶ 'Āpu yūmūg yāy xexka pek paxex hok, tuk nōy kute'ex kummuk hok, tuknōy tu yīpkūmīy hok.

6

‘Āpu 'ānōy pupi hāpxop putux tat

¹ 'Ūkxape xop: 'ūxip tikmū'ūn 'ūm, tu hāpkummuk mīy. Ha ta nōy 'ūm xip 'āxop kopah, nōm te Topa Koxuk pu' yīpkox xip pax. Yā' max, nōm te Topa Koxuk 'āpak pax te' nōy putpu' nūnnā putat max tu', tu' nōy te hāpkummuk mīy nūnnā putpu'. Pūyā' gāy hok, Topa Koxuk te nōm xat hah. Pūyā tu yāy kutōgnāg pe'paxeh. Yā paxip, nūy hāpkummuk mīy hok kamah

² 'Āpu 'ānōy yōg hāpxop putux tat, yā 'ānōy yōg hāpkummuk hā' tat. Hā kaxīy xate Kunnix yōg xat'ax mīy.

³ Tik 'ūm te yāy xexka pe'paxex, pāyāk-tōgnāg. Tute' yāy pu' koit.

⁴ 'Āpu yāy yōg hāpxopmā'ax kopit, 'ānōy yōg hāpxopmā'ax kopit hok pa 'ōgnū 'ūp-xet. 'Ānōy yōg hāpxopmā'ax 'āktux kummuk hok, pāyā' yōg max. Hā kaxīy tu xate yāy yōg kopit, tu yāy pēnāp-tup max, 'hā 'ānōy yōg hāpxopmā'ax kopit 'ohnāg.

⁵ Hamūn, 'ūxohix te yāy yōg hāpxop putux tat putup, yā yāy yōg hāpkummuk hā' tot putup.

⁶ Tik 'ūm te 'āyūmmūgāhā Topa yōg tappet. 'Āpu nū mūtik yāy pu' pot 'ōg hāpxop max xohix.

⁷ 'Āpu hāmpē'āpaxeh hitop hok, yā Topa kuxa yūm 'ohnāg koit'ax kopah. Tik te hāpxopxap xok tu nōm hā' ta mōy putup, 'ap ta nōy'ah.

⁸ Tikmū'ūn te pēyōg xap xok hām tu', puxix pēyōg ta nūnnāp-tup yāy pet hah. Hā kaxīy tikmū'ūn te yāy putup'ax mīy, puxix hāpkummuk hā' yānān, ha tikmū'ūn te Topa Koxuk pu' yīpkox xip, tu hāpxopmā max,

puxix tu' hi xe'ëgnāg mō'kuma' mōg, ha' kux
'ohnāg.

⁹ Āpu yūmūg hāpxopmā max, yā tuknōg
hok. Yūmūg hup hok, kopxix hāpxip 'hā
hāmmxnāp-tup, yāy ha hāmmxnāp-tup.

¹⁰ Hu 'āpu yūmūg hāpxopmā max
mō'kumak mōg tikmū'ūn xohix pu', tu' xape
xop pu hāpxopmā max xe'ëgnāg, yā' kuxa
mām xop xape xop pu'.

Ūkux'ax

¹¹ Ta hēnā', 'āte xa kax'āmi xexka', yā
'ūgyīm hā kax'āmi xexka'.

¹² Nōm tik tep-tup, pu tikmū'ūn nōm 'āktux
max. Nōm tik tep-tup nūy 'āxop mōgā',
nūy 'āxop xat, xayīy 'āxax mep 'ūyīmap.
Texīy? 'Ap nōm xop te Kunnix xok'ax 'āktux
putup'ah. Yā mīpkupnix tu' xok, pāyā nōm
xop te' xaxok, puyīy tikmū'ūn nōm kute'ex
kummuk hok.

¹³ Hamūn, nōm te yāy xax mep 'ūyīmap, pa
nōm te Mōyyex yōg xat'ax xohix mīy 'ohnāg,
pa nōm te 'āp-tup, nūy 'āxat, xayīy 'āxop yāy
xax mep 'ūyīmap. Texīy? Nōm tik tep-tup,
nūy yāy 'āktux xexka', 'ūxohix te yāy xax mep
'ūyīmap hah.

¹⁴ Pak mūn 'a yāy xexka 'āktux putup'ah,
pa 'āte yūmūg Yeyox Kunnix 'āktux putup
ha' xok mīpkupnix tu', yūmūg pupi' xok. Yā
Kunnix tek pupi' xok, 'ūyīy hām xexka yōg
hāpxop xohix xak hok, puyīy Kunnix puxet
tuk kuxa hi nōmhā, 'āte nōm pu hāpxopmā'.

¹⁵ Pe yāy xax mep 'ūyīmap, pe yāy xax mep
'ūyīmap hok, yā hāpxopmā'ax kutōgnāg. Pa
Topa te yūmūg kuxa tupmāhā', yūmūg kuxa
tu max, 'ūyīy hāpxopmā max xexka'.

¹⁶ Āpu 'āyīpkox pi', xayīy Topa yōg
putup'ax mīy. Pūyā Topa 'ākuxa māmmā', xix
'ākuxa ka', xayīy Topa hā yāy yōg tikmū'ūn
xe'e'.

¹⁷ Nōmhā puxi'. Āpu tikmū'ūn 'ūxek kum-
mugā hok. Yā hamūn. hōmā tikmū'ūn tek
kummugāhā', yīy kayax pip yōgnū', yā Yeyox
puk hok hāk hām.

¹⁸ Ūxape xop, pūyā yūmūg xuxyā Yeyox
Kunnix xa hāmmxnā mō'kuma' mōg.
Hamūn.

Tu ta kux.

PAOT TE KÕMËN 'EP YÕG TIKMÛ'ÛN KUXA MÂM KA'OK XOP PU KAX'ÂM!

¹ Ûgmün Paot, ha Topa tep-tup, pu Yeyox Kunnix nü'kutnâ', ha 'äte kõmën 'Ep yõg tikmû'ün kuxa mâm ka'ok xop pu kax'âmi, nõm xop te Yeyox Kunnix tu' pip ka'ok, tu' kuxap-xet Yeyox Kunnix kuxa mütik,

² yîy 'äte: Pÿyã 'Átak Topa xa hãmmaxnã', xix 'ákuxa mãmmã'. Pÿyã yümüg xuxyã Yeyox Kunnix kama xa hãmmaxnã xexka', yã 'ákuxap-xet Yeyox Kunnix kuxa mütik.

Topa te Kunnix hã hãmmaxnãhã'

³ Äpu yümüg xuxyã yõg 'Átak Topa pu hãm'áktux, hu: "Ámax Topah," kaxîy. Yã yümüg xuxyã Yeyox Kunnix yõg 'átak, tu yümü'ã ha hãmmaxnãhã', yã yümüg kuxap-xet Kunnix kuxa mütik, yîy Topa te hãmmaxnãhã', tu yümü'ã popmãhã pekkox yõg hãpxop xohix.

⁴ Topa te yümüg yimõgãtux hãmãxap, nüy yümü'ã ha yã yõg tikmû'ün, 'üyîy yümüg kuxap-xet Kunnix kuxa mütik, hak-nãy tu hãm xexka xohix mý. Yã yümüg yimõgatux, 'ü yümüg yãyhã max xe'ëgnãg xop Topa pu', mõ yümüg yã xe'ëgnãg hah,

⁵ hup-tup tap, 'ü yümüg Topa hãg kutok xop, yümüg kuxa mâm ka'ok Yeyox Kunnix kopah, hu hãmyümmüg: Yã Topak-tok xop, kaxîy Topa tep-tup,

⁶ yîy 'äpu yümü'äte Topa xexka 'áktux, ha yümü'ã hã 'úhok tu hãmmaxnãhã', 'Thãk-tok puxehnãg nü'kutnãhã yümü'ã', yã yã kutok mõ'yã xe'ëgnãg.

⁷ Kunnix xok, mîpkupnix tu' xup, tu' xok, nüy yümüg mõy pu mõg, nüy yümü yõg hãpkummuk mîy'ax xaxogã', tu yümü'ã hãmmaxnãhã'. Yã max xe'ëgnãg Topah,

⁸ tu yümü'ã' hok hã hãmmaxnã xexka',

⁹⁻¹⁰ yîy hãmp'e'paxex, nüy hãpxop xohix yã tu nü'xok, nüy pekkox yõg hãpxop xohix, xix hãm xexka yõg hãpxop xohix yã tu nü'xok, puxix tikmû'ün xohix yã tu nü'nãhã', puxix Kunnix tu' xat, puyîy nõm pu' yîpkox pi', yîy yümü'ã hãmyümmügãp-tup, hu' yümmügãhã'. Hõmã Topa te nõm hãm'áktux xe'e yümmügã 'ohnãg, pãyã hõnhã' yümmügãhã', 'üp-tup tu'.

¹¹ Topa te hãmp'e'paxex, tup-tup hãmãxap, tu' mîy, tu yümüg yimõgatux, 'ü yümüg yãyhã 'üyõg tikmû'ün, nüy yümüg kuxap-xet Kunnix kuxa mütik, ha kaxîy Topa tep-tup.

¹² Hak mûg kuxa mâm ka'ok hãmãxap, tu Kunnix hip, tu Topa xexka xe'ëgnãg 'áktux.

¹³ Äxop kamah te hãm'äpak max'ax 'äpak, yã' nõy te xa' xuktux, yîy 'ákuxa mãm ka'ok Kunnix kopah, ha Topa te xa mõ'xut 'ákuxa

pu', yã Koxuk hã xa mõ'xut, yã kaxîy tikmû'ün te münütut mõ'xut nüy yã yõg münütut yümmügã', yã 'äxop yã Topa yõg tikmû'ün xe'e'.

¹⁴ Kaxîy Topa te hãm'áktux xex, nüy yümü'ã popmã pekkox yõg hãpxop xohix, tu yümüg mõy putup, 'ü mõg, ha Topa Koxuk te: "Yã hamün! Yã pekkox yõg hãpxop pop putup!" kaxîy. 'Äpu, yümüg Topa xexka xe'ëgnãg 'áktux!

Paot te Topa pu hãm'áktux

¹⁵ Äkuxa mãm ka'ok yümüg xuxyã Yeyox kopah, tu' xape xohix xop putup pax, yã' kuxa mãm ka'ok xop xohix hã 'äxape, ha tikmû'ün te 'ã' xuktux,

¹⁶ yîy 'äte Topa pu hãm'áktux nãm, tu' kuxyã 'ohnãg, 'ap 'äxop 'üm xaxok'ah.

¹⁷ Tu Topa tu' xak, 'õhõm yã yümüg Tak, tu' max xe'ëgnãg, yã yümüg xuxyã Yeyox Kunnix yõg Topah, ha tu' xak, puyîy Topa Koxuk 'ãha mõ'kutnã', nüy xa hãmyümmügã', xa Topa tu' yümmüg xe'e'.

¹⁸ xix tu' xak, pu 'äp-tox maxnã', xa hãmyümmüg xexka'. Kuyãnam te hãptupmãhã', ha kaxîy Topa te tikmû'ün kuxa yümmügãhã', pu tu hãmmax hip, ha Topa te 'äxop xãnãhã', ha' nü', xayîy pop pekkox yõg hãpxop xohix. Kaxîy Topa te yã yõg tikmû'ün mütik hãm'áktux xex, hu: "Äte 'äxop pu popmãp-tup pekkox yõg hãpxop xohix," kaxîy. Ha 'äte Topa tu' xak, pu pekkox yõg hãpxop xohihnãg xa' mûg, xayîy yümmüg,

¹⁹⁻²⁰ ha hãmyümmügãhã', xa hãmyümmüg, nüy Topa mün ka'ok xe'ëgnãg yümmüg, ha' ka'ok, nüy putpu Kunnix hĩnnã', nüy pekkox kopa' yümmã' Topa yîp'xe'e hah, ha kaxîy Topa te yümüg kuxa kopa hãpxopmãhã', nüy yümüg kuxa hĩnnã kamah.

²¹ Yã Kunnix xexka xe'ëgnãg nõmhã pekkox tu', tu pekkox yõg xop xohix xat, xix hãm xexka yõg xop xohix xat, xix Hãmgãyãgnãg yõg xop xohix xat, xix hãm xexka yõg gohet xohix xat, xix hãm xexka yõg gohet mõ'nã'ax xat putup.

²² Topa te Kunnix xexkã xe'ëgnãg, tu' kuxa mãm ka'ok xop ha mõ'kutnãhã', puyîy 'üp-xehnãg xat, yã' xuxyãp-xet.

²³ Ükuxa mãm ka'ok xop te Kunnix yîn putuk hah, 'ükuxa mãm xohix xop yã Kunnix hã' yîn, ha Kunnix te nõm xop tu' xip, tu yümüg yã putox, tu yümüg xat, nüy yümüg pãnã max. Yã Kunnix te hãm xohix xop xix pekkox xohix xop hã' xuxyã'.

2

Tu yümüg hĩnnãhã xe'ëgnãg

¹ Hõmã 'äxop te hãpxopmã kummuk pax, yã 'äyîpkox 'ohnãg Topa pu',

² tup-tat kummuk hã 'ãmõg, xix yãmîy kummuk pu' 'âyîpkox pip, ha' kummuk xop te 'axat pax, nõm xop yîpkox 'ohnãg Topa pu' xop xat pax.

³ Yã yũmũg xohix te hãpxorpã kummuk, tu yũmũ yõg yã putup'ax mîy, tu yã yũmũ xat kummuk, tu hãmpexax kummuk, hu hãpxorpã kummuk kamah. Ha kaxîy hã Topa te yũmũg kummugã'ax 'üyânân tu', tu yũmũg xũygã'ax,

⁴ pãyã tute yũmũg kuxa ka xexka', tu yũmũg mõ'yãy xe'egnãg

⁵ hu yũmũg hĩnnãhã', Thã yũmũg pu'uk, yũmũg yîpkox 'ohnãg, huk hittup 'ohnãg, ha yũmũg kuxa hĩnnãhã Kunnix mütik, yã' hok hã yũmũg kuxa kummuk xit, nũy kuxa max tat 'üyânân tu'.

⁶ Topa te Kunnix putpu hĩnnãhã', tu yũmũg hĩnnãhã kamah, 'üyiy hi xe'egnãg, yã Kunnix mütik yũmũ'ate' xat, tu pexkox tu' xat Kunnix mütik. Yã yũmũg kuxap-xet Yeyox Kunnix kuxa mütik.

⁷ Topa te yũmũ'ã ha hãmmaxnãhã', pu tikmũ'ũn mõkputox tu' mũg, ha Topa te yũmũ'ã ha hãmmax xe'egnãg nãhã', pu' hep xop xohix mõkputox yũmmũg, ha Topa te nõm mõ'yãy xe'egnãg, ha Yeyox Kunnix te yũmũg pupi' xok, nũy hep xohix xop pu mõ'yãy'ax yũmmũgã'.

⁸ Ha Topa te ta nemẽn 'ohnãg, tu xa hãmmaxnãhã', Thã' hok tu 'axop kuxa kummuk xit, nũy kuxa max tat 'üyânân tu', 'akuxa mãm ka'ok Yeyox Kunnix kopa hah. 'Axop te hãpxorpã max 'ohnãg, pu Topa' yãnân tu' xa hãmmaxnã'. Yãmhok. Topa te xa' hok hã' kuxa kummuk xit.

⁹ Hamũn. 'Axop te hãpxorpã 'ohnãg, puyiy Topa ta nemẽn, nũy 'akuxa kummuk xit. 'ãmhok. Yiy yã mũn max pe'apaxeh hok. Yãk-tignãg. Yã 'akummuk.

¹⁰ Topa te yãp-xehnãg hã 'akuxa kummuk xit, ha Kunnix xok, nũy yũmũg kuxa kummuk tupmã', 'üyiy hãpxorpã max, nũy Topa yõg putat hã yũmũ mõy, nũy yũmũg kuxap-xet Yeyox Kunnix kuxa mütik.

Yũmũg kuxap-xet Kunnix kuxa mütik

¹¹ Hõmã 'axop puknõg, 'ap Yoneo yõg tikmũ'ũn'ah, yiy Yoneo xop te 'axuxet'ax mîy. "Yã nãg xax mep 'ohnãg xop." kaxîy, nũy yã yõg xax mep'ax 'aktux. Yã' hittap hã xix hõnhã Yoneo yõg tikmũ'ũn te' pit xop yã xax mep 'üyimap tu'. Pa 'axop yõg mõnãyxop te' xax xak 'ohnãg, yã Topa hã 'ãpuknõg.

¹² Hõmã 'axop Kunnix hã 'ãpuknõg kamah, 'ap Topa yõg tikmũ'ũn kopa 'ãpip'ah, ha Topa te' pa'ax mîy Yoneo yõg tikmũ'ũn mütik, 'axop mütik 'ap mîy'ah, Topa yũmmũg 'ohnãg hah, tu hãpkutnã'ax Kunnix hip 'ohnãg, puyiy 'akuxa tupmã'. Yã Topa hã 'ãpuknõg, tu tu 'ãpip 'ohnãg.

¹³ Pa hõnhã Yeyox Kunnix mũn te 'axop nũnnãhã', tu Topa yĩkãgnãg ha 'ãnũnnãhã', ha Kunnix xok mĩpkupnix tu', nũy 'ãnũnnã', nũy tu kuxap-xet 'axop kuxa mütik.

¹⁴ Yã hõmã 'axop xix Yoneo xop yãytuk-miy punethok, ha Kunnix xok, xa 'axop xix Yoneo xop yãyhã Kunnix yõg tikmũ'ũn puxet, ha' xok, nũy yãytuk-miy kuxyã', 'ũ yũmũg kuxa xohix tu mãmã', xayiy 'axop yã Yoneo xop hã 'axape',

¹⁵ ha Yoneo xop yõg xat'ax nõã', ha tikmũ'ũn xop 2 yãyhã tikmũ'ũn xop puxet, tu' yãyhã tikmũ'ũn tup, ha Topa te' kuxa mãmãhã',

¹⁶ Yã Kunnix te mĩpkupnix tu' xok, nũy yãykix'ax kuxyã', puyiy Yoneo xop xi' puknõg xop yãy putup pax, yiy Topa ha putpu' nũnnãhã', puyiy Topa yĩkãgnãg hã' pip.

¹⁷ Yã Kunnix nũn, tu hãm'ãpak max'ax 'aktux, tu Topa gãy kux'ax 'aktux, pu tikmũ'ũn kuxa tu' mãm, 'axop puknõg xop pu hãm'aktux, Topa tu hãptox tu 'ãpip, xix Yoneo xop pu hãm'aktux, nõm xop te Topa tu yĩkãgnãg hã' pip.

¹⁸ Hamũn. Kunnix te yũmũg xohix nũnnãhã', pe Yoneo yõg tikmũ'ũn, pe' puknõg yõg tikmũ'ũn, ha yũmũg nũnnãhã Topa hah, ha Topa Koxuk te yũmũg ka'ogãhã', yũmũg Topa hã yĩkãgnãg pi'.

¹⁹ Yiy 'axop puknõg 'ohnãg nõmhã'. Yã Topa yõg tikmũ'ũn kamah, tu Topa hã 'axape'!

²⁰ Topa te tik xop nũ'pok pu hãm'ãpak max'ax 'aktux, tu tik xop nõy nũ'pok, pu Topa pupi hãm'aktux, ha nõm tik xop 2 te Kunnix 'aktux, tu Kunnix xok'ax 'aktux, ha 'axop yîpkox pip, tu' kuxa mãm ka'ok Yeyox Kunnix kopah,

²¹ ha' xohix nõg nõy nã' mõgãhã', tu mõktu xohix, yã Topa yõg tikmũ'ũn xe'e'.

²² Kaxîy 'akuxap-xet Kunnix kuxa mütik, pu Topa 'axop tu' xip ka'ok, nũy yã Koxuk te 'axop tu' xip ka'ok.

3

Paot te Yoneo xop hã' puknõg xop pu hãm'ãpak max'ax 'aktux

¹ Yãk mũn Paot, tu Yeyox Kunnix pu hãpxorpãhã', yã kanet kopak xip, 'axop pu hãm'ãpak max'ax 'aktux tu', tu Topa pu hãm'aktux 'axop pupi'.

² Yã Topa te nũgkutnãhã 'ãhah, nũy xa hãmmaxnã', ha 'axop te hãm'ãpak, tu hãm'yũmmũg.

³ Hõmã, hãm'hittap Thã', Topa te hãmpexax, pa tikmũ'ũn 'ũm pu hãm'aktux 'ohnãg, tu nõm pe'paxex'ax 'aktux 'ohnãg hãm'yãxatamuk xohix hã, tu yãk mũn pu hãm'aktux nõmhã. 'Ate xa kax'ãmi kutõgnãg nũhũ tappet tu'. Yã Topa te hãmpe'paxex tap,

tu Yoneo xop xi' puknōg xop yāy kotinnāp-tup, pūyīy yāyhā' xape', puyīy Topa' xohix ha hāmmaxnā xexka'.

⁴ 'Āxop te tappet mō'kupix, 'a' yūmmūg, yā 'āte tappet mīy, nūy yōg hāmpekpaxex'ax 'āyūmmūgā', nūy xa Kunnix 'āktux, 'ōhōm xok mīpkupnix tu', yūmmūg pupi' xok, nūy Yoneo xop xi' puknōg xop ha hāmmaxnā'.

⁵ Hōmā Topa yīy 'ohnāg, tu hām'āktux 'ohnāg, pa hōnhā Topa Koxuk te hām'yūmmūgāhā', tu tik xop pu' xuktux, tu tik max mō'pok, pu tu hām'āktux, xix tik max xop te Topa pupi' hām'āktux tu' xuktux,

⁶ Yā hām'āktux xe'e', hu: Topa te' puknōg xop xix Yoneo xop ha hāmmaxnāhā', yā yāy putuk. 'Ūxohix te Kunnix hā 'ūyīn. Tikmū'ūn putox te yāy yīn xat, nūy tu' pēnā max, hā kaxīy Kunnix te yūmmūg xat, nūy tuk pēnā max. Yā Topa te Kunnix hā hām'āktux xex, nūy hām'āpak max'ax hā hāmmaxnā', nūy Yoneo xop xi' puknōg xop ha hāmmaxnā', yā yāy putuk.

⁷ Topa tek xānāhā', tu mōgkutnāhā', 'ūyīy 'ā hām'āpak max'ax 'āktux, tuk yāy kutnāhā', xix ka'ogāhā'.

⁸ Yāk-tōgnāg, ha Topa yōg tikmū'ūn xohix xexka', pa Topa tek mūn yāy kutnāhā', 'ūyī' puknōg xop pu hām'āpak max'ax 'āktux, hā hām'āpak'ax te Kunnix 'āktux, ha Kunnix te' kuxa mām xop ha hāmmax xe'ēgnāg gāhā', yīy tikmū'ūn kuxa te' yēy.

⁹ Ha Topa te nūgkutnāhā', 'ū hām'āktux xe'e', nūy hām'āpak max'ax 'āktux tikmū'ūn xop xohix pu', tuk hittup. Hōmā Topa te hāmpe'paxex, nūy Yoneo xop, xi' puknōg xop ha hāmmaxnā', ha hām'yāxatamuk xohix hā' yīy 'ohnāg, pāyā hōnhāk xat, 'āte tikmū'ūn xohix pu hām'yūmmūgā'. Yā Topa max xe'ēgnāg, tu hāpxop xohix mīy, tu kama' hep xohix xop ha hāmmaxnāhā'.

¹⁰ Tu' kuxa mām ka'ok xop ha hāmmaxnāhā', nūy pexkox yōg xexka xop tu' mīy, nūy xat'ax xop tu' mīy, puyīy hām'yūmmūg, yā Topa te hām'yūmmūg xe'ēgnāg.

¹¹ Hōmā, hām'yāxatamuk xohix 'hā', 'ap xip'ah hahām, xix pexkox 'ap xip'ah, 'hā Topa te hāmpe'paxex, nūy Yeyox Kunnix xok'ax hā' hep xohix xop yāy tu nūnnāy, pu nō yāyhā tikmū'ūn yāp-xehnāg. Yā hōnhā Topa te' mīy, yūmmūg xuxyā Yeyox xok'ax hā 'ūmīy,

¹² 'ūyīy yūmmūg kuxap-xet Kunnix kuxa mūtik, hu' mām ka'ok 'ūkopah, hu yūmmūg kuxānōg 'ohnāg, nūy Topa yīkāgnāg hā yūmmūg pī'.

¹³ 'Ūkxūy, pa 'ākuxa tuknōg hok, nūy Topa yōg putat hā mōg. Yā Topa tek xūy hā xa hāmmaxnāhā'.

Kunnix te mō yūmmūg yāy xe'ēgnāg

¹⁴ Yīk kopaxux hāk xip yūmmūg Tak Topa pu'. Yā yūmmūg Tak xe'ēgnāg, tu hāpxop xohix mīy,

¹⁵ tu yūmmūg pēnā max, yūmmūg 'ātak putuk, mō yūmmūg yāy xe'ēgnāg tu', ha hāmmaxnāhā yāy kutok xop ha', tu pexkox yōg kutok xop, xix hām xexka yōg kutok xop ha hāmmaxnāhā'.

¹⁶ Yā' max xe'ēgnāg! 'Āte' xak, puyīy Topa Koxuk 'ākuxa ka'ogā', xa 'āka'ok,

¹⁷ ha tu' xak kamah, pu 'ākuxa mām mā ka'ok, pu Kunnix 'ākuxa kopa xhip, xayīy 'āxapep-tup pax, nūy kama Topap-tup pax xexka',

¹⁸ nūy Topa yōg tikmū'ūn xohix mūtik hām'yūmmūg. Yā Kunnix te tikmū'ūn mō'yāy xe'ēgnāg, yīy nōm pe'āpaxeh mōktu 'ākuxa te' yēy Topa pu', yā yūmmūg putox ka'ok 'hā nōm mō'yāy'ax pekpaxex. Ha kaxīy 'ākuxa hittup xexka', yā Topa mūn te 'ākopa' xip ka'ok,

¹⁹ tu mōktu 'āxop te hām'yūmmūg xe'e', yā Kunnix te yūmmūg mō'yāy xe'ēgnāg mō kuma' mōg. 'Āpu' xak, nūy mō'yāy'ax yūmmūg, nūy 'ākuxa' yēy, ha kaxīy Topa xe'ēgnāg te 'ākopa' xip ka'ok.

²⁰ Pūyā' xohix Topa xexka 'āktux, ha yūmmūg ka'ogāhā', tu yūmmū'ā ha hāmmaxnā xexka', 'hā yūmmū'āte ta tu' xak, pu hāmmaxnāk-tōgnāg. Yā Topa te hāmpe'paxex xexka', ha yūmmū'āte hāmpekpaxex kutōgnāg.

²¹ Pūyā' kuxa mām ka'ok xop xohix Topa max xe'ēgnāg 'āktux, pūyā' xuktux mō kuma' mōg. Yā Yeyox Kunnix te yūmmūg ka'ogāhā' 'ūyīy Topa max xe'ēgnāg 'āktux. Pūyā hām'yāxatamuk xohix hā' xuktux, pu tu kux 'ohnāg, Hamūn.

4

Kunnix hā yūmmūg yīn puxet

¹ Yeyox Kunnix pu 'āte hāpxopmāhā', nūy hām'āpak max'ax 'āktux, hu kanet kopax xip, ha xa tu' xak, xa hāpxopmā max. Topa te 'āxānāhā', xa hāpxopmā max.

² Yāy kutōgnāg pe'āpaxex, nūy 'āyīy pu'uk, nūy 'ānōy hip, nūy nōā'tot, 'āxop te 'āxapep-tup pax tu'.

³ 'Ānōy gāyā hok, nūy yā 'āxop putox puxet, xix 'ākuxap-xet, yā Topa Koxuk te 'āxop nūnnāhā', xa yāyhā tikmū'ūn, nūy yāp-xet.

⁴ Topa Koxuk puxet, xix 'āxop yā Kunnix hā 'āyīn puxet, ha Topa te 'āxānāhā', xa Kunnix nūn'ax hip, xayīy pexkox tu nū mūtik 'āmōg, nūy 'āpīp ka'ok.

⁵ Ha yūmmūg xuxyāp-xet kamah, ha yūmmūg kuxa mām Yeyox Kunnix yāp-xehnāg kopah, ha yūmmūg putox pix kamah, 'ūyīy yūmmūg xuxyāp-xet 'āktux.

⁶ Ha Topa yūmmūg Tak yāp-xehnāg, tu' xohix hā' xuxyā, tu tikmū'ūn kopa hāpxopmāhā' tu' kopa' xip.

7 Kunnix te Topa Koxuk yümü'ā ha nū'kutnāhā', pu yümüg ka'ogā', üyiy yümüg häpxopmā ka'ok, nüy yāy xape ka'ogā kamah.

8 ha Topa yög tappet te:

"Tik te pepi' mōg, tu' gāy xop kīy, nüy yāy mütik mōgā',

xix kanet kopa' pip xop mōy, nüy mōgā kamah,

tu yā tu häpxop hok popmāhā'," kaxiy

9 Tep tu hām'āktux, hu: "Tik te pepi' mōg," kaxiy? 'Üxuktux, nüy tik kaka' mōg hāmāxap'ax' āktux. Tu yā yümüg xuxyā Kunnix' āktux, 'Ihā tik puxet' āktux.

10 Yā tik puxet xok, ha nō häpkot, tu putpu' hi, tu pepi' mōg pexkox ha, yā kaka' mōg hāmāxap, tuk-nāy tu pepi' mōg, hāmndōnyō künapa' mōg, tu hām xexka tu' xip, xix pexkox tu' xip kamah, nüy pexkox xop yīkāgnāg hā' xip, nüy tikmü'ün yīkāgnāg hā' xip kamah.

11 Tu Topa Koxuk hōm tikmü'ün pu', puyī' kuxa mām ka'ok xop ka'ogā'. Tu' yāg ka'ogāhā', nüy mō'pok, xi' yāg ka'ogāhā', pu Topa pupi hām'āktux tikmü'ün pu', xi' yāg ka'ogāhā', pu hām'āpak max'ax' āktux, xi' yāg ka'ogāhā', pu' kuxa mām xop pēnā max, xi' yāg ka'ogāhā', pu' kuxa mām ka'ok xop pu hāmyümmügā'.

12 Yiy Kunnix pu tu häpxopmā max, puyī' kuxa mām ka'ok xop ka'ogā'. Yā' kuxa mām ka'ok xop te Kunnix hā' yīn puxet. Tikmü'ün putox te yāy yīn xat, nüy tu pēnā max, ha Kunnix te' kuxa mām ka'ok xop xat kamah, nüy tu pēnā max.

13 Yā yümüg kuxa mām ka'ok Kunnix kopah, hu yümüg kuxap-xet Kunnix kuxa mütik. Yā Kunnix hā yümüg xohix yā tikmü'ün puxet, nüy yümüg Topak-tok xop xe'ēgnāg, tu mōktu Topa pu yümüg xiptap xop putuk, tu mōktu Kunnix putuk.

14 Yā kaxxop putuk, 'Ihā hāmpē'āpaxeh hok. 'Āpu hāmyümmüg, xa tik kummuk xop pu 'āyīpkox 'ohnāg, tu hām'āktux'ax puknōg 'āpax hok, ka Topa yög putat xax, tik kummuk te xa mō'āmā hah.

15 Hām'āpax hok. Pa hām'āktux xe'e', koit hok, 'ānōy putup pax tu häpxe'e' āktux, nüy Kunnix putuk. Yā Kunnix yāk xohix hā yümüg putox, nüy yümüg pēnā max.

16 Kunnix hā yümüg xohix yīn, nüy nōm hā hām'āpak nām, pu yümüg xohix xat. Ha' kup te' yīn tu yāy hi', nüy tu mōg max, ha kaxiy tikmü'ün kuxa mām ka'ok xop xape xop te yāy tu hi kamah, nüy Kunnix hā' yīn, tu yāy hittupmāhā', tu yāy putup pax.

Yümüg kuxa hi xe'ēgnāg nōmhā

17 Yiy' āte xa hām'āktux nām, hu: Tikmü'ün te Topa yümüg hok, puxix hitop tu hāmpē'paxex. Yā Kunnix te yāy 'āxet'ax 'ā' hōm, 'āte' āxat, hu: Häpxopmā'ax hitop

kuxyā', nüy nōm hāmhitop hāmpē'paxex xop mütik mōg hok, nōm xop yā Topa hā' puknōg.

18 Hap-tox ka'ok, tu hāmyümmüg 'ohnāg, tup-tup nōg, pu Topa 'ūhinnā', tu' yīpkox 'ohnāg Topa pu', yiy nōm kummuk xop nīm, nüy kummuk mīy'ax xop pe 'āmōg hok.

19 Ha yāyhāhup 'ohnāg, tu' nōy hā' xupxet pax, tu' xak, nüy hāpkummuk xohix mīy.

20 Pa 'āxop te Kunnix yümüg max, hu häpxopmā max, Kunnix te häpxopmā max hah.

21 Hōmā tikmü'ün te xa Kunnix' āktux, ha 'ākuxa mām ka'ok nōm kopah, hu nōm mütik hāmyok mīy, nüy Topa yög putat hā 'āmōg,

22 tu häpxopmā'ax hittap nīm, nüy tu yāy putup mīy'ax hok, yā 'ākummugā tap,

23 ha Topa te 'ākuxa xix 'āp-tox tupmā'ax,

24 xa 'āxop max xe'ēgnāg Topa putuk. Yā Topa mün te hāmyok mīy, tu häpxopmā max, tu hāmmaxnā xe'ēgnāg.

25 Yiy koit hok, hu ta 'ānōy pu häpxe'e' āktux, yā yümüg xohix te Kunnix hā' yīn.

26 'Āgāy, 'Ihā hāpkummuk mīy hok, pāyā 'āxuxi', nüy 'āmniy tox hā 'āgāy hok.

27 'Ütux hok pu Hāmgyāgnāg 'ākuxa kummugā hok.

28 Tikmü'ün te' xupxet tap, puxi tu' kuxyā' xupxet, nüy tu max, nüy xe tu xupxet hok, nüy tu hām max, tu hāmyok mīy, puyiy tikmü'ün hok xop pu häpxop popmā'.

29 Hām'āktux kummuk hok, hu ta hām'āktux max, nüy mō'ānōy nīynām, nüy 'ānōy hittupmā'.

30 Topa Koxuk pu' hupmā hok, ka tu' kuxa hittup 'ohnāg. Yā Topa te xa yāy Koxuk nū'kutnāhā', nüy tu hām'āktux xeh, nüy 'āpēnā max. 'Ap max'ah tikmü'ün te Topa Koxuk kuxa pu hupmā'. Yā 'āpēnā max xe'ēgnāg, tu 'ākuxa hittupmāhā', tu xa hām'āktux xex, xayiy Topa yög tikmü'ün. Yiy Kunnix te 'āmōgāp-tup pexkox tu', 'Ihā häptup xe'e' mō'nā'ax, ha Kunnix nūn, nüy yāy xape xop mōgā'.

31 Yīpkūmīy hok, xix 'āgāy hok, 'ānōy mānōg hok, hāpkute'ex kummuk hok,

32 pa 'ānōy kuxa ka', nüy tu' yög hāpkummuk mīy'ax xaxogā', pu tu kux. Yā Topa te 'ōg hāpkummuk mīy'ax xaxogāhā', ha' kux, Kunnix xok'ax hā' xaxogāhā'.

5

Yümü'ā Topa hā yāy kutok xop

1 Topa hā 'āxop kutok xop, ha mō'āyāy xe'ēgnāg, yiy häpxopmā max, nüy 'Ātak Topa putuk 'āxop, nüy häpxopmā max.

2 'Āxape xop putup pax, yā kaxiy Kunnix te mōg yümüg yāy xe'ēgnāg, tu yümüg pupi' xok, ha Topa tep-tup, tu' hittup.

3 Topa hā 'āxop tikmü'ün xe'e', hu hām'āktux max, nüy tu hāpkummuk' āktux

hok, nŷy 'ānōy yōg hāp̄xop putup hok, nŷy xonnix hok, nŷy 'ānōy hā 'āxupxet hok, 'ūmīy hok. Yā Topa yōg tikmū'ūn hām'āktux kummuk pu kummuk,

⁴ pa hām'āktux max, nŷy hām'āktux kummuk tu kux, nŷy hām'āktux hitop tu kux, nŷy tu Topa max 'āktux pax, hu: 'Āmax Topa! Kaxīy.

⁵ Āte xa hāp̄xe'e 'āktux: Topa xix Kunnix te tikmū'ūn xop putup nōg, nōm te' nōy hā' xupxet xop, tu nōm mūtik tikmū'ūn xat 'ohnāg, yā' kummuk xop te hāpkummuk mīy, tu' nōy hā' xupxet, tu' nōy yōg hāp̄xop putup pax, yā hāp̄xop 'ūm te nōm xop hā topa komut, 'ūp-tup pax xexka hah, tu Topa xe'ep-tup kutōgnāg, yā hāp̄xop xohix mūn putup pax xe'e'.

⁶ Ūtux hok pu' nōy 'āmō'āmā hok hām'āktux hitop hā. Topa te hāp̄xopmā'ax kummuk putup nōg, tu' yīpkox 'ohnāg xop kummugāp-tup 'ūyānān tu'.

⁷ Āpu, nōm kummuk xop nīm.

⁸ Yā hōmā 'āxop te hāpkummuk mīy pax, ha hāp̄xoptap te 'ākuxa kopa' xip, pa Topa te 'ākuxa kummuk xit, tu' ākuxa tupmāhā', hu hāp̄xopmā max nōmhā.

⁹ Topa te 'ākuxa tupmāhā', 'āpu hāp̄xopmā max, nŷy 'ānōy kuxa ka', nŷy hāmyok mīy, nŷy hāp̄xe'e 'āktux.

¹⁰ Xi' xak, nŷy xe hāp̄xopmā max'ax hā Topa kuxa hittupmā'.

¹¹ Hāp̄xopmā hitop hok, tikmū'ūn nōy xop mūtik, hāp̄xopmā hok, nŷy xetxox putuk hāp̄xopmā hok. Yā xetxox te hāp̄xoptap 'lhā' xupxet, tu' xaptop. 'Āpu, 'ōg hāp̄xopmā'ax mūg tikmū'ūn tu'.

¹² Yā hāp̄xopmā'ax xaptop te yāy pu' hūpmāhā',

¹³ 'lhā tikmū'ūn nōy te' yūmmūg, ha' kummuk,

¹⁴ ha tikmū'ūn te' yūmmūgāhā', nŷy tu' mūg, yīy Topa yōg tappet te:

“Āxop mō'āyōn xop, yāy koxak,

'āyok, nŷy 'āxit, nŷy 'āhi',

ha Kunnix te xa hāptupmāp-tup,” kaxīy.

Yā hāptupmāp-tup, ha kaxīy Kunnix te yūmmūg hāmyūmmūgāhā', 'ūyīy yūmmūg hāmyūmmūg max.

¹⁵ Ōg pa 'āti'. 'Āpu, Topa yōg putat hā 'āmōg kuma 'āmōg, tu hāmyūmmūg, nŷy hāp̄xopmā max.

¹⁶ Yā hāmyāxatamuk te' nōy hā yāyikutut, yīy 'āmnīy xohix hā Topa pu hāp̄xopmā max, tikmū'ūn nōy te hāp̄xopmā kummuk hah.

¹⁷ Āp-tox ka'ok hok, hu hāmyūmmūg max, pa yūmmūg xuxyā pu 'āyīpkox pi', nŷy 'ūyōg hāmputup'ax mīy.

¹⁸ Ta hep xupyāg xo'op hok, xa paptux hok, ha 'ākummugā'. Pūyā Topa Koxuk 'ākopa xip, nŷy 'ākuxa hittupmā'.

¹⁹ Āxape pu Topa yōg hām'āktux 'āktux, xix Topa yōg hām'āktux'ax kutex, nŷy tu 'ānōy ka'ogā', tu yūmmūg xuxyā Yeyox pu 'āxop kutex, nŷy nōm pu: Yāyā', 'āmax! Kaxīy.

²⁰ 'Āpu Topa yūmmūg Tak pu hām'āktux kamah, nŷy 'ūmax 'āktux, ha yūmmūg xuxyā Yeyox Kunnix tep-tup, 'ū yūmmūg Topa max 'ūm'āktux.

²¹ Yeyox Kunnix yā yūmmūg xuxyā, yīy yūmmūg yāy xape xohix puk yīpkox pip.

Ūyīp̄rox xi' xetut 'āktux

²² Pūyā 'ūhūn yāy yīp̄rox pu' yīpkox xip, nŷy yūmmūg xuxyā Kunnix pu' yīpkox pi' kamah.

²³ Ūyīp̄rox te yāy xetut xat, ha kaxīy Kunnix te' kuxa mām ka'ok xop xat, tu nōm pupi' xok, pu tu yāyhā Kunnix hā tu yīn, nŷy Kunnix pu 'āyīpkox pi'. Yā tikmū'ūn putox te yāy yīn xat, nŷy tu pēnā max. Ha kaxīy Kunnix te' kuxa mām ka'ok xop xat, nŷy tu pēnā max.

²⁴ Pūyā 'ūn yāy yīp̄rox pu yā' yīpkox pi'. Kaxīy 'ūkuxa mām ka'ok xop te Kunnix pu' yīpkox pip.

²⁵ Pūyā' yīp̄rox yāy xetut mō'yāy xe'ēgnāg, yā kaxīy Kunnix te' kuxa mām ka'ok xop mō'yāy xe'ēgnāg, tu nōm pupi' xok,

²⁶ puyīy Topa hā 'ūyōg tikmū'ūn, ha kōnāg hā' pix, xix yāy yōg hām'āktux'ax hā yūmmūg yūmmūgāhā',

²⁷ 'ūyīy yūmmūg māynāg hamūn pu', nŷy hāpkummuk hok hā yūmmūg pip, nŷy yāyhā max xe'ēgnāg.

²⁸ Tik te yāy mūn pēnā max. Pūyā yāy xetut kaxīy pēnā max kamah. Tik te' xetut pēnā max, puxix yāy mūn pēnā max kamah.

²⁹ 'Ok xip tikmū'ūn te yāy mūn putup hok? 'Āmhok, Yāp-tup. Yā' xohix te yāy mūn putup, hu yāy xīnnāhā', ha kaxīy Kunnix te' kuxa mām ka'ok xop putup, tu nōm pēnā max.

³⁰ Yā yūmmū'āte Kunnix hāk yīn, pu yūmmūg xat, nŷy yūmmūg pēnā max,

³¹ yīy Topa yōg tappet te: “Pūyā tik yāy tak nīm, xi' tut nīm, nŷy tu xetut mūy, nŷy nū mūtik 'āti'. Yā yāyhā' yīn puxet. Kaxīy.

³² Ha kaxīy Topa yōg tappet te hām'āktux xe'e', tu yūmmū'ā hāmyūmmūgāhā', hu Kunnix xi' kuxa mām ka'ok xop 'āktux. Yā' kuxa mām xop te Kunnix hāp-tox puxet,

³³ tu 'āxop 'āktux kamah, nŷy yīp̄rox yāy xetut pēnā max, yāy mūn pēnā max putuk, nŷy xetut yāy yīp̄rox pu' yīpkox pi', 'ūyīp̄rox xexka pe'paxet tu'.

6

Ātak mūnōm xop xik-tok xop 'āktux

¹ Kakxop, Topa te 'āp-tup, xa 'ōg 'ātak pu 'āyīpkox pi', xix 'ātut pu 'āyīpkox pi', yā hāmyok.

² Topa yōg tappet te: “Yā 'ātak mūn 'āktux max, xix māy 'āktux max,” kaxīy. Yā Topa te

'ăxat hămăxap, xa 'ătak max 'ăktux, hak-năy tu hăm'ăktux xex, pu tikmũ'ün tu hittup tox, ³hu: "nũy 'ăhittup, pu Topa xa hămmaxnă', xa 'ăhittup tox hăm xexka tu'," kaxiŷ.

⁴'Ătak mũnôm xop, xix mây mônôm xop: 'Ăpu 'ăk-tok kute'ex kummuk hok, nũy tu găyă hok, tu nôm yũmmũgă', puyiŷ hăpxopmă max, yă Kunnix te xa' hôm yăy 'ăxet'ax, xa 'ăk-tok yũmmũgă max.

⁵'Ăxop kămănat xop, 'ăxuxyă nôm te 'ăxat'ax pu 'ăyĩpkox xip, 'ăkuxănôg, nũy măynăg hăpxopmă', nũy Kunnix pu 'ăhăm.

⁶'Ăxuxyă pu 'ăyĩpkox xip, nũy 'ăhăm max, 'ăxuxyă te 'ăpênăhă 'Ĥhă, xix 'ăpênă hok 'Ĥhă' kama 'ăhăm max. 'Ămun yă Kunnix hă kămănat, yiŷ Topa te 'ăxat, xa 'ăxuxyă yôg xat'ax mĩy, 'ăxop te Kunnix putup pax tu'.

⁷'Ăhăm max 'ăhittup tu', Kunnix pu 'ăhăm, hu 'ăhittup, 'ăxuxyăp-xet pu 'ăhăm'ah, yă yũmũg xuxyă Kunnix pu 'ăhăm kamah.

⁸Topa te yă 'ăpênăhă', tu tikmũ'ün xohix xop pu pagop-tup, tute tikmũ'ün te hăpxopmă max pu hămmaxnăhă', xix tikmũ'ün te hăpxopmă kummuk pu hăpkummugăhă'.

⁹'Ăxop 'ăxuxyă xop: 'Ăpu 'ôg kămănat xop pu hăpxopmă max, xix nôm mănôg hok, tu: "Ăte 'ăkix'ax!" kaxiŷ. 'Ūxaxok hok: 'Ăxuxyă xop xix kămănat xop xohix te Topa pu hăm, ha pexkox tu' xip, ha yă xohix Topa yôg kămănat, yă 'ăxohix te Topa pu yă' nôi putuk.

Topa yôg xonat xop

¹⁰Hônăhă 'ăkuxap-xet yũmũg xuxyă kuxa mũtik, hu 'ăka'ok, yă yũmũg xuxyă te 'ăka'ogăhă', 'ũyiŷ hăpkummuk mĩy hok.

¹¹Xonat xop te pipkup hă' yăy môtat, puyiŷ găy xop kummugă hok. Ha kaxiŷ Topa te 'ăka'ogăhă', pu Hămgăyăgnăg 'ăkuxa kummugă hok.

¹²Yă yũmũ'ăte tikmũ'ün găy mũtik yăykix 'ohnăg. 'Ămhok. Păyă pexkox yôg găyxop mũtik yũmũg yăytuk-miŷ. 'Ūxohix yă hăpkoxtap yôg găy xop, tu yũmũg nôăp-tup, yiŷ Topa te yũmũg ka'ogă'ax, 'ũyiŷ' găy xop yôg kummuk mĩy'ax kuxyă'.

¹³'Ăpu, Topa yôg hăpka'ok pa', nũy 'ăka'ok, xonat xop putuk, nũy găy xop yôg hăpxopmă'ax kummuk kuxyă', nũy 'ănũ pa hok, 'ăkuxănôg 'ohnăg tu'. Yă 'ăkuxa tu măm ka'ok 'ăpi'.

¹⁴Ha xonat te' xax ka'ok hă môtat, ha pipkup hă' xax mĩy, pu xonat xop môtăyă nũy, tu yăy kũnăy hĩy pipkup hă'. Kaxiŷ Topa te 'ăxat, xa hămyok mĩy, nũy yăyhăhup hok, yă yăy kũnăy hĩy'ax putuk. Ha tikmũ'ün xohix te 'ăxop 'ăktux'ax, hu: "Yă' koit 'ohnăg," kaxiŷ. Kama xonat te pipkup xax môtat, nũy nôi yăy kep môtăyă, puyiŷ' găy xop xonat xuhmĩy hok. Ha kaxiŷ 'ăxop te hăpxopmă max, puyiŷ tikmũ'ün pênă', hu: "Yă' max 'ôhôm. 'Ăp

hăpkummuk 'ũm mĩy'ah," kaxiŷ. Tu yũmũg xuxyă 'ăktux max.

¹⁵Ha xonat xop te pataxax ka'ok tat, nũy hăpkumep môt'ka'ok, ha kaxiŷ 'ămôg môt'ka'ok, nũy hăm'ăpak max'ax 'ăktux, 'ăkuxa hittup tu', ha hăm'ăpak max'ax te tikmũ'ün kuxa mămăhăhă'.

¹⁶Ha xonat xop te pipkup 'ănuk xexka tat, nũy môtăyă nũy, nũy găy xop yôg pox xox môt'hap'ax tu xok. Ha kaxiŷ 'ăkuxa măm ka'ok Kunnix kopah, nũy Topa tu 'ăpip ka'ok, pu Hămgăyăgnăg 'ăkuxa kummugă hok.

¹⁷Ha xonat xop te môtăyă kux xax ka'ok tat, nũy nôi yăyputox pak, puyiŷ' găy xop 'ũp-tox tak hok. Hă kaxiŷ 'ăxop te Topa pe'ăpaxex, tu 'ăkuxa tuknôg 'ohnăg, hămp'e'ăpaxex max tu'. Yă Topa te 'ăkuxa kummuk xit tap, nũy môt 'ăkuxa max tat 'ũyănăn tu'. Ha xonat xop te mĩkax xexka pop, nũy găy xop kix. Ha kaxiŷ 'ăxop te Topa yôg hăm'ăktux'ax 'ăktux, nũy yămĩy kummuk yôg hăpxopmă'ax kummuk nôtăy, ha Topa Koxuk te 'ăka'ogăhă', xayiŷ hăm'ăktux ka'ok.

¹⁸'Ăxop te Topa yôg hăm'ăktux 'ăktux, ta Topa pu hăm'ăktux pax, ha Topa Koxuk te xa hămyũmmũgă'ax xa Topa pu hăm'ăktux max. 'Ōg pa 'ăti', 'ăkuxa tuknôg hok, nũy Topa yôg tikmũ'ün pupi hăm'ăktux Topa pu'.

¹⁹Tu Topa ta tu' xax, puyiŷ 'ũgmũn pu hăm'ăktux, nũy ka'ogă', 'ũg hăm'ăktux tikmũ'ün pu', nũy Topa yôg hăm'ăktux'ax xe'e yũmmũgă'.

²⁰Tu te nũgkutnăhă', 'ăte hăm'ăpak max'ax 'ăktux, tu' xuktux kamah, 'Ĥhă kanet kopak xip, yiŷ Topa ta tu' xax puk ka'ogă', nũy hăm'ăpak max'ax 'ăktux pax.

Paot te' xape xop 'ăneo

²¹Yũmũg xape Tikik te 'ũgmũtik hăpxopmăhă, nũy 'ũgmũn tu nôi tehet, tu 'ăha' môt'gop putup, hak mũn 'ăktux'ax, nũy xa hămyũmmũgă',

²²tu 'ăha' môt'gop, nũy xa hăm'ăktux, nũy 'ũgmũg hăm'ax 'ăktux, xayiŷ 'ăxop hittup kamah.

²³Pũyă Topa yũmũg Tak xix yũmũg xuxyă Yeyox Kunnix 'ăkuxa mămăhă', xix môtăyăy xe'ėgnăg, xix 'ăkuxa mămăhă ka'ok yăy mũn kopah.

²⁴Pũyă Topa xa kămmaxnă', 'Ĥhă 'ăxop te yũmũg xuxyă Yeyox Kunnix putup pax môt'kuma 'ămôg. Tu ta tu kux.

PAOT TE KŌMĒN PINIO YŌG KUXA MĀM KA'OK XOP PU KAX'AMI'

¹ Ūgmū'ūg Paot xix Tīmōn, tu Yeyox Kunnix puk mū'āte hāpxopmāhā, tu nūhū tappet kax'āmi, tu kōmēn Pinio yōg tikmū'ūn pu kax'āmi', nōm xop kuxa mām ka'ok Yeyox Kunnix kopa' xop pu kax'āmi', ha' kuxap-xet Yeyox Kunnix kuxa mūtik, xī' yōg tik pēnā max'ax xop pu kax'āmi', xix tik xop te' hok xop pu hāpxop popmāhā pu kax'āmi'.

² Pūyā Topa yūmūg Tak xa hāmmāxnā'. Pūyā yūmūg xuxyā Yeyox Kunnix xa hāmmāxnā kamah, nūy 'ākuxa māmā'.

Paot te Topa pu hām'āktux

³ Āte Topa pu hām'āktux, 'Ihā 'āte 'āpekpaex, tu: "Āmax Topa', yā xate Pinio yōg kuxa mām ka'ok xop ka'ogāhā'," kaxīy.

⁴ Hu Topa pu hām'āktux, 'ūgkuxa hittup tu', ⁵ 'Ihā 'āte 'ōg hāpxopmā'ax pekpaxex. Yā 'āxop 'ūgmūn 'ahā 'ātehet, nūy hām'āpak max'ax 'āktux, tu hōmā xix hōnhā 'ūgmūn mūtik hāpxopmāhā', nūy hām'āpak max'ax 'āktux.

⁶ Topa te 'ākuxa kopa hāpxopmāhā', tu xa hāmmāxnāhā', tu' kuxyā 'ohnāg, ha mōktu Yeyox Kunnix yōg hāptup xe'e mō'nāhā', ha tute kuxyāp-tup, 'Ihā Kunnix putpu' nūn. Yā 'āte' yūmmūg.

⁷ Tu 'āxop pekpaxex, 'āmnīy xohix hā hāmpekpaxex, tu 'āte 'āp-tup pax xexka', 'ūgmūn mūtik 'āxop te hāpxopmāhā'. Topa te 'āxop xexkanāhā 'ūgmūtik, tu yūmūg xexkanāhā', nūy hām'āpak max'ax 'āktux, yā 'ōhōm Topa yōg hām'āktux xe'e. 'Āte nōmhā' xuktux, 'Ihā kanet kopak xip, tu hōmā' xuktux, 'Ihā 'āte hāpkumep hā, hām'āktux ka'ok hā tuk mōg.

⁸ Yeyox Kunnix te mō'āyāy xe'ēgnāg, ha kaxīy 'āte 'āp-tup pax kamah, 'ap koi'ah 'āte', Topa te' yūmmūg.

⁹ Ha 'āte Topa tu' xak, pu 'āxop 'āxape kuxa mām xop xohix 'ūp-tup pax, tu mōktu yāp-tup xe'ēgnāg, tu hām'yūmmūg, tu mōktu hām'yūmmūg xexka',

¹⁰ nūy hāmmax 'ūm yāykutnā', nūy 'ākuxa tup tat, 'Ihā Kunnix te putpu' nūn, xayīy yā 'ōg hāpxopmā'ax xa' hupmā hok. Yā Kunnix yōg hāptup xe'e mō'nāp-tup.

¹¹ Ha Yeyox Kunnix yāp-xehnāg te 'ākuxa kopa hāpxopmā max, puyīy tikmū'ūn xohix Topa max xe'ēgnāg 'āktux.

'Āte Kunnix tu hāpxopmāhā'

¹² Ūkxape xop: 'Āte xa hām'yūmmūgāp-tup. Gāyxop tek xūygāhā', xix hīy kanet kopah, pāyā Topa te hāmmāxnāhā nōmhā', hak xape

punethok te 'āhā' tehet, tu hām'āpak max'ax 'āktux,

¹³ ha kaxīy gohet yōg xonat xop te hām'āpak, tu 'āte hāpxopmāhā Kunnix pu' yūmmūg, tuk hām'āx ha kanet kopak xip yūmmūg.

¹⁴ Ha yūmūg xape xop te' yūmmūg kamah, hu' kuxa mām ka'ok yūmūg xuxyā Yeyox kopah, tu' hittup, nūy hām'āpak max'ax 'āktux, 'ūkuxānōg 'ohnāg.

¹⁵ Yā' yāg yīpkūmīy, tu' yāy kix pax, hu Kunnix 'āktux, pa' yāg hittup, nūy xuktux,

¹⁶ 'ūkputup pax tu' 'āktux, Topa te mōgkutnāhā', nūy hām'āpak max'ax 'āktux, ha 'ōm te' yūmmūg,

¹⁷ Ha' yāg nōy te mō'āmā pax, tute 'ūgyīpkūmīy tu', 'ūyīy 'ūgkuxa hittup hok, yā' gāy tu hām'āktux max 'āktux, 'ūyīy 'ūgmūn pu hupmā'.

¹⁸ Yā' xohix te Kunnix 'āktux, yā' puxi'. Yīk kuxa hittup pax,

¹⁹ tuk kuxa yūm ka'ok 'āxop kopah. Yā 'āxop te Topa tu' xak, puk xut kanet kopah, yīy Yeyox Kunnix Koxuk tek ka'ogāhā', hak kuxa yūm ka'ok.

²⁰ Ūgkuxa yūm ka'ok, nūy Topa pu hāpxopmā max, nūy 'āmnīy xohix hā xix hōnhā Topa pu 'āte hāpxopmāhā', nūy yā yāyhāhup 'ohnāg, xix kuxānōg 'ohnāg, pu tikmū'ūn Kunnix 'āktux max, 'ok pek hī'ax, 'ok pek xok'ax.

²¹ Tephak xip hām tu? Hām tuk xip, nūy Kunnix xexka xe'ēgnāg 'āktux. 'Ūkxok, kopxix pekkox hāk mōg, nūy Kunnix mūtik xihip, nūy 'ūghittup xexka mō'kumak mōg.

²² Hām tuk xip, kopxix hā hāpxopmā max Kunnix tu'. 'Ap yūmmūg'ah 'āte', piyā' mūn max, 'ok pek hām tuk xip, 'ok pek mōg pekkox hah.

²³ Yā' max 'ūkxip hām tu, pāyā 'āte' xak, nūy mōy xip Kunnix mūtik pekkox tu'. Yā' max xe'ēgnāg!

²⁴ Pāyā 'āxop puk max, nūy xihip hām tu',

²⁵ tu hām'yūmmūg, hu' 'āxop tuk xip putup, nūy 'āka'ogā', nūy 'ākuxa hittupmā', xayīy 'ākuxa hittup, 'Ihā' mām ka'ok yūmūg xuxyā kopah.

²⁶ Āte putpu 'āhak mōg'ax, xa 'ākuxa tu hit-tup 'ūgmūn hah, yā 'ākuxap-xet Yeyox Kunnix kuxa mūtik.

²⁷ 'Āxop te hām'āpak max'ax 'āpak, tu 'āyīpkox pip, yīy hōnhā hāpxopmā max, nūy Kunnix putup hāpxopmā max. Kaxīy 'āte 'āxop putox puxet yūmmūg'ax, 'ōg hāpxopmā'ax hā 'āte hām'yūmmūg'ax, 'ok pe 'āhak mōg, 'ok pe 'āhak mōg hok. 'Āxop xohix hām max, kopxix 'āxop kuxap-xet yūmmūg, yā 'āxop te hām'āpak max'ax 'āpak, hu' 'ākuxa mām ka'ok.

²⁸ Ūgāyxop yīpkutuk hok, nūy ta tu 'āka'ok, ha kaxīy 'ūgāyxop te' pēnā'ax, tu

hāmyūmmūg'ax, hu: “Yā Topa te nōm xop mūtik ti xe'e', yīk mūg xūyāp-tup 'ūyānān tu', ha nōm kuxa mām ka'ok xop mōgāp-tup pekkox hah, pu tu pip ka'ok,” kaxīy.

²⁹ Ha Topa te 'āxop xexkānāhā', xa hāpxopmā Kunnix pu', nūy 'ākuxa mām ka'ok 'ōm kopah, nūy 'āxūy kamah nōm pu'.

³⁰ Hōnhā 'āxop tek mūtik hāpxopmā'ax, nūy hām'āpak max'ax 'ūm 'āktux, xix 'ūghām'ax pēnāhā', ha' gāy xop tek mūn pu hupmāhā', tu hōnhā kamak xūyāghā', kaxīy.

2

¹ Yā Kunnix te 'āxop mūtik tihi', tu 'āka'ogāhā', tu mō'āyāy xe'ēgnāg, tu 'āhittupmāhā', ha Topa Koxuk te 'āmūtik yāy hi', ha 'āxape kuxa ka',

² xayīy 'āp-xet, nūy hāmpē'āpaxeh puxet. 'Āpu, 'āxop kuxap-xet kamah, nūy 'ānōy putup pax, xayīy 'ūgkuxa hittupmā xexka'.

³ Yā puxehnāg pe'āpaxeh hok, pāyā 'ānōy pe'āpaxeh kamah, nūy yāy pu hāpxopmā', tu' xak hok, pu tikmū'ūn xa hām'āktux max, pāyā yāy pe'āpaxek-tōgnāg, nūy 'ānōy pe'āpaxeh xexka'.

⁴ Topa tu' xax, pu 'ānōy ha hāmaxnā kamah, nūy yāy puxehnāg pu xax hok.

⁵ Āpu hāpxopmā, nūy Yeyox Kunnix putuk, hu:

⁶ Kunnix yā Topa yāy putuk, pa Kunnix xupkūmīy 'ohnāg,

⁷ tu pekkox nīm, xix hāpxop xohix nīm, nūy yāyhā kāmānat, nūy yāyhā tikmū'ūn kutok.

⁸ Tu yāy pe'paxeh 'ohnāg, tu Topa yōg putat hā' mōg,

nūy nōm pu' yīpkox xip, hu yūmūg pupi' xok mīpkupnix tu',

⁹ yīy Topa te' xexkanā xe'ēgnāg, tu' xuxet'ax mīy,

pu tikmū'ūn xohix, xix pekkox yōg xop xohix Yeyox 'āxet'ax 'āpax, tu:

“Yā 'ōhōm xexka xe'ēgnāg, tu yūmūg xohix xat!” kaxīy.

¹⁰ Yā pekkox yōg xop xohix nūktetex Yeyox keppah,

xi' hep xop xohix, xi' xakix xop nūktetex,

¹¹ nūy Yeyox Kunnix 'āktux yāy xuxyāp-xet, nūy yūmūg 'Ātak Topa xexka 'āktux.

'Āxop te māyōnnāg xop putuk

¹² 'Āxop yāk mūn hā 'āxape xe'ēgnāg, tuk mūn pu 'ayīpkox pip, 'Thāk xip 'āmūtik, yīy 'ayīpkox pip max, 'Thāk xip hāptox tu', 'Āpi hāpxopmā max pax, tu 'ākuxānōg, nūy Topa yōg putat xak hok.

¹³ Yā Topa te 'ākuxa kopa hāpxopmāhā', xa hāpxopmā max, nūy nōm pu 'ayīpkox pi', nūy hāmpē'āpaxeh max kamah.

¹⁴ Āpu hāpxopmā max, nūy 'ānōy mānōg hok, nūy yāytuk-mīy hok.

¹⁵ 'Āxop yā Topa hā 'āk-tok xop, hu hāpxopmā max tikmū'ūn kummuk kopah, xix Topa hā' puknōg xop kopah,

¹⁶ ha kaxīy 'āxop te māyōnnāg putuk, yā 'āmnīy hā tikmū'ūn xohix te māyōnnāg pēnā'ax max, Ha kaxīy tikmū'ūn kummuk kopa 'āpip, ha Topa hā' puknōg xop te 'ōg hāpxopmā max pēnāhā', 'Thā nōm xop pu 'āxop te hām'āktux, 'Thā Topa yōg hām'āktux'ax 'āktux. 'Āxop te hāpxopmā max, kopxik hittup, 'Thā Kunnix putpu' hi nū hām tu', ha hāptup xe'e 'Thā' nūn putup, ha 'āpēnā', kopxik hittup, nūy hāmyūmmūg: yā 'āte hitop tu xa hām 'ūm yūmmūgā' 'ohnāg.

¹⁷ Hōmā 'āmānex te xokxop mō'hap, nūy Topa pu' haxyā', pūyīy Topa kuxa hittupmā', ha kaxīy 'āxop kuxa mām ka'ok Yeyox Kunnix kopah, tu yāy mūn hōm, nūy Topa kuxa hittupmā', nūy nōm pu hām'āktux, nūy nōm pu hāpxopmā max. Hak mūn kuxa hittup kamah, nūy 'āxop mūtik Topa pu hāpxopmā max, pe yāk hi'ax, pe yā kamak xok'ax.

¹⁸ Ha kaxīy 'āxop kuxa hittup kama 'ūgmūtik.

Tīmōn xix 'Epaponit

¹⁹ Yūmūg xuxyā Yeyox Kunnix tek putup, kopxix Tīmōn 'āha mō'kutnā', puyīy nōm tek yūmmūgā', 'Thā putpu' nū', 'āxop 'āktux tu', tu mōgñīynām.

²⁰ Tu 'āxop putup pax, 'ūgmūn putuk, tu 'āpēnā max kamah.

²¹ 'Ūxohix te yāy yōg hāpxop xak, tu Yeyox Kunnix xaxok,

²² pa Tīmōn te Yeyox Kunnix pu hāpxop xak, nūy Topa yōg hām'āktux 'āktux, nūy 'āpēnā max, tuk mūtik hāh, tuk mūn hāk-tok, hakmū'āte hāpxopmāhā', nūy hām'āpak max'ax 'āktux, ha 'āxop te' yūmmūg.

²³ 'Āte' hip, pu gohet 'ūgyīkopit kux, 'ūgyīkopit kux, kopxix mō'kutnā'ax, pu xa' xuktux.

²⁴ 'Ūgkuxa yūm ka'ok yūmūg xuxyā Yeyox Kunnix kopah, tu' hip, puk xut, 'ūmōg 'āhah.

²⁵ Tu mō'kutnā'ax 'Epaponit kamah, hak mūn hā yā' xape, ha 'āxop te nū'kutnāhā', puk mūn hā tu tehet, tuk mūn mūtik hāpxopmā max,

²⁶ tu 'āxak, nūy 'āpēnā 'ūxeheh. Hōmā 'ūpakut, ha 'āxop te' yūmmūg, hu 'ākuxa tuknōg, ha 'Epaponit te hām'āpak, tu' kuxa hittup 'ohnāg.

²⁷ Yā' pakut xexka', tu' xok putūmnāg, pāyā Topa te' kuxa ka', xix yāk kuxa ka kamah, tu' hittupmāhā', xix kuxa hittupmāhā kamah.

²⁸ Yīy mō'kutnā'ax 'āha, xa' pēnā', nūy 'ūhittup tap yūmmūg, nūy 'ākuxa hittup, xix kamak kuxa hittup.

²⁹ Āpu 'Epaponit mūg ka'ok yāy kep hā, 'Thā' xupep, 'ākuxa hittup xexka tu', yā 'āxop hā' xape xe'ēgnāg, hamūn xix 'āxop mūn, yā

yūmūg xuxyā hā 'āxape', yī' xānā', pu mōy 'āpet tu' xihp, ha 'Epaponit xuktux max, xix tik nōy xop te Topa pu hāp̄xopmāhā 'āktux max.

³⁰ Yā' xok putūmnāg Kunnix tu', hāp̄xopmā punethok tu', nūy mō'ānīynām, xik mūn mōgnīynām, 'āxop pupi mōgnīynām.

3

Hāmyok mīy xe'ēgnāg

¹ Ūkxape xop, pūyā yūmūg xuxyā 'ākuxa hittupmā' punethok. 'Āte xa xe kax'āmi', tup-tup, nūy xa hāmyūmmūgā max.

² Ūg pa'āti! Tikmū'ūn kummuk xop te' xat, pu' kuxa mām ka'ok pit xop yāy xax yīmap tu' mep, pu yāyhā Topa yōg tikmū'ūn,

³ pāyā mō'āmā', yūmūg yā Topa yōg tikmū'ūn xe'e'. Ha yūmūg kuxa kopa hāp̄xopmāhā', ha ta' kummuk xop kopa hāp̄xopmā 'ohnāg, ha Topa Koxuk te yūmūg yūmmūgāhā', 'ū Topa pu nū'āktetex, ha yūmūg kuxa hittupmāhā'. Yā yūmūg xuxyā Yeyox Kunnix kuxa mūtik yūmūg kuxap-xet, pa yūmūg kuxa mām hok, nūy Yoneo xop mōnāy xop yōg hāp̄xopmā'ax tat hok. Yā tikmū'ūn yāy yōg hāp̄xopmā'ax pu'uk, tu yūmūg kuxa kummuk tupmā 'ohnāg Topa pu'.

⁴ Tikmū'ūn kuxa yūm ka'ok Yoneo yōg mīy'ax kopah, kopxik kuxa yūm'ax ka'ok kamah. 'Ūgmūn yā Yōneo xop yōg, tu nōm mīy'ax xohix mīy tap, 'ūyīy yāy kuxa kummuk tupmā', pāyāk kuxa maxnā 'ohnāg.

⁵⁻⁶ Ūktut tek put, ha 'āmnīy te 7 nōg, 'ihā tikmū'ūn tek nāg xax yīmap tu' xak. Yāk mūn 'Iyaet yōg tihix, tu mōnāy xop Meyamīy mōkputox 'ūgmūn, 'ūkhep Yoneo yōg yā xe'e', tu Paniye xop yōg kamah, hu' xat'ax xohix mīy māynāg, tu' kuxa mām ka'ok xop kummūgāhā',

⁷ pāyā 'āte hāp̄xopmā Ūhitop tu', yīy 'āte' mīy kux, tu' xaxogāhā', nūy 'ūgkuxa yūm ka'ok Kunnix yāp-xet kopah.

⁸ Hamūn. 'Āte hāp̄xop xohix xaxogāhā', xi' mīy'ax xohix xaxogāhā', yā' hitop. Yā hāmhōgnāg, yīy 'āte' mīy kux, nūy yūmūg xuxyā Yeyox Kunnix yūmmūg max, ha' max xe'ēgnāg, hak kuxa te' yīy Kunnix keppah, hu hāp̄xop xohix nīm, nūy Kunnix tuk xip ka'ok.

⁹ Hu' xak, nūy 'ūgkuxap-xet Kunnix kuxa mūtik. Yāk kuxa max 'ohnāg, ha Yoneo xop yōg xat'ax tek kuxa maxnā hok, yīy 'āte' xak, pu Topa tek kuxa maxnā', 'ūgkuxa yūm ka'ok Kunnix kopa hah.

¹⁰ Yā 'āte' xak, nūy Kunnix yāp-xelnāg yūmmūg, nūy Topa yōg hāp̄ka'ok yūmmūg. Ha' ka'ok, hu Kunnix putpu' hīnnāhā, yā 'āte' xak, nūy Kunnix 'ūgputuk, nūy Topa yōg tikmū'ūn puk xok kamah,

¹¹ puyīy Topa xe putpuk hīnnāhā' kamah.

Ūmōg mō'ka'ok

¹² Āte hāp̄xe'e 'āktux: Hōnhā 'āte Kunnix putuk xet'ah, pāyā 'āte' xak, nūy yāyhā Kunnix putuk. Ha tikmū'ūn mōg mō'ka'ok, nūy tu xupep tap, nūy tayūmak xexka pop, nūy kānēy yānām 'āta māynāg pa'. Kaxīy 'ūgmōg kamah Topa yōg putat hā, tuk mōg kumag mōg, nūy hāp̄xopmā māynāg, nūy Kunnix putuk.

¹³ Āxop te hāmyūmmūg. 'A 'āte Kunnix 'ūm putuk xet'ah, pāyā 'āte hāp̄xopmā'ax tap xaxok, tu hōnhā hāp̄xopmā max, nūy hāptup 'ihā xe hāp̄xopmā max.

¹⁴ Tik mōg mō'ka'ok, nūy xupep tap, nūy kānēy māynāg pa'. Ha kaxīy 'āte Topa yīy'ax 'āpak, hak xānāhā', 'ūghām, nūy Topa yōg hām'āktux 'āktux, ha Yeyox Kunnix tek hīnnāhā', 'ūyik hi xe'ēgnāg, ha kānēy māynāg putuk.

¹⁵ Ūyā yūmūg hāmp'e'paxex max kaxīy, yā Topa yōg putat hā yūmūg mōg tap, tikmū'ūn xip tap putuk, nūy yūmūg putox puxet, nūy hāmp'e tu paxeh puxet, nūy hāmp'e tu paxeh max, 'ūyāg te hāmp'e'paxex nōy, puxix Topa' yūmmūgā'.

¹⁶ Āpu yūmūg mōg Topa yōg putat hā, nūy mōg kumak mōg. Kaxīy yūmūg mōg hōmā xix hōnhā', tu Topa yōg hām'āktux pu yūmūg yīpkox pip, nūy hāp̄xopmā max.

¹⁷ Ūkxape xop: Ūkpe mōg kuma mōg, nūy hāp̄xopmā max, 'ūgputuk, xix kuxa mām xop nōy pēnā', xa 'āxop hāp̄xopmā max kamah.

¹⁸ Āte xa hām'āktux tap, tu xe' xuktux, hu: Tikmū'ūn punethok gāy, tu Kunnix putup nōg, ha yūmūg pupi' xok mīpkupnix tu', pap-tup nōg, tu Kunnix hā' puknōg, yīy 'āte xa' xuktux, tuk potahak yūm, 'ihā' xuktux.

¹⁹ Ha' gāy xop te yāy putup'ax pu' yīpkox pip, tu yāy pu hāp̄xop xak, topa komut xop xak'ax putuk, tu hāpkummuk mīy, tu yāyhāhup 'ohnāg, pa yāy mīy'ax 'āktux xexka', tu pexkox yōg hāp̄xop xak 'ohnāg, yīy yāy koxyōy putup Hāmgyāygnāg Pet kopah.

²⁰ Pa yūmūg yā pexkox yōg tikmū'ūn, tu yūmūg xuxyā Yeyox Kunnix hip, ha' nūn putpu', nūy yūmūg mōy hām tu', nūy pexkox ha yūmūg mōgā',

²¹ Tu yūmūg yīn pu'uk ka'ogāp-tup, tu mōktu yāy yīn putuk, tu yūmūg xexkanāp-tup xe'ēgnāg. Yā Kunnix te hām xexka xop xohix xat'ax, xix pexkox yōg xop xohix xat'ax, ha' yīpkox pip putup.

4

¹ Ūkxape xop: 'Āte 'āp-tup pax xexka', tu 'āxak, hak kuxa hittupmāhā', ha 'āte xa hām'āktux, yāk xape xop max! Yīy Topa yōg putat hā 'āmōg kuma mōg.

2 'Ūkxape hex 'Epot xix Xīn, 'āte xa tu' xak, xa yāytuk-mīy kux, xatix yā 'ānōy hā', 'ākuxa mām Kunnix kopah, hu 'ānōy hā tutnōy.

3 Ha 'āmūn, xatek mūtik hāpxopmāhā', yāk xape xe'ēgnāg, yīy xa tu' xak, xa 'ūn 2 hā 'ātehet, ha 'ūn te Kenemēn mūtik hāpxopmā max, xi' xape xop xohix mūtik hāpxopmā punethok, nūy hām'āpak max'ax 'āktux tikmū'ūn xohix pu', ha Topa te' xuxet'ax kax'āmi', yā yāy yōg tappetxax kopa kax'āmi', pu tu hi xe'e', ha 'kux 'ohnāg.

4 'Āmnīy xohix hā 'āhittup, yūmūg xuxyā te 'āmūtik tihi' hah, yā xe xa hām'āktux, hu: 'Āpu 'ākuxa hittup!

5 'Ānōy kuxa ka'. Hapxip kutōgnāg 'Ihā yūmūg xuxyā nūn.

6 'Āxutigā hok, pa Topa tu' xax, pu xa hāpxop xohix popmā', 'Ihā Topa 'ūmax 'āktux, hu: "Āmax Topah! Xate 'ā' hōm hāpxop xohix. Puxi'," kaxīy.

7 Yā Topa te 'ākuxa māmā'ax, yīy tikmū'ūn kuxa yūm, yāy kuxa yūm hā xīy tute' yūmmūg'ah, Topa te' kuxa yūmmā hah, tu kaxīy te 'āpēnā max, xa 'ākuxap-xet Yeyox kuxa mūtik, xix 'āp-tox puxet Yeyox Kunnix putox mūtik.

8 'Āpu, hāmp'e'āpaxeh max, nūy hāpxopmā max kamah. Kaxīy tikmū'ūn xohix te 'ākuxa tup yūmmūg, Hāmp'e'āpaxeh max, nūy hāpxe'e' 'āktux, nūy hāmmāxnā', nūy hāmyok mīy, nūy 'ānōy hā' xupxet hok, nūy 'ānōy putup pax, nūy yā' koit hok. Hāmp'e'āpaxeh max, xayīy hāpkummuk mīy hok.

9 'Āte 'āxop pu hāmyūmmūgāhā'. 'Āpu hāmyūmmūg'ax hā hāpxopmāhā', yā 'āte hāpxopmā max, ha 'āxop te' pēnāhā', xayīy hāpxopmā max kamah, ha Topa te 'āmūtik tihi', tu yūmūg kuxa māmāp-tup.

Paot te' kuxa mām ka'ok max 'āktux

10 Yūmūg xuxyā tek mūtik tihi', yīk kuxa hittup xexka'. Hāpxip punethok hā hāptox tuk xip, pak xaxok 'ohnāg 'āxop te', hu mōgnīynām, tu tayūmak nū'pok, pu 'āte ta tu hāpxop 'ūm pop, nūy puk, nūy mā'. Hōmā tikmū'ūn 'ūm nūn 'ohnāg, hu tayūmak paxnūn 'ohnāg, pa hōnhā' nūn, tu' paxnūn tayūmak, hak hittup.

11 Hōmā 'āte hāmhōgnāg xip, pak hittup, xix hōnhā yōgnū hāpxop punethok, tuk hit-tup nōmhā kamah. Hōmā xix hōnhā Topa te 'ā' hōm hāpxop, tuk hittup, yā puxi'.

12 Hōmā hāpxop putup xūy, ha hōnhā' yānān tuk xit max, hu 'āmnīy xohix hāk hit-tup, xix hāpxexka xohix tuk hittup. 'Ūghok, kopxix yāk hittup, 'ūkputexop, kopxix kamak hittup.

13 Kunnix tek ka'ogāhā', yīy 'ate hāpxopmā'ax 'ūm yīpkutuk 'ohnāg.

14 'Ūkxūy, ha 'āxop te hāpxopmā max, tuk mōgnīynām.

15 'Āxop yā kōmēn Pinio yōg tikmū'ūn, tu mōgnīynām hittap. Hōmā 'āte hām'āpak max'ax 'āktux hāpxexka Maxenōn tu', tu' xuk-tux 'āmnīy kutōgnāg 'Ihā', tu hāpxexka nūm, ha 'āxop kuxa mām ka'ok xop puxehnāg yāy hā 'ātehet, 'ap nōy 'ūm te 'āha te'ah, ha tayūmak 'ā' hōm 'āxop te'.

16 Hāpxexka Texanōn tuk xip, 'Ihā 'āxop hāk tehet, tuk ha tayūmak nū'pok.

17 'A 'āte tayūmak 'ūm xak'ah. 'Āmhok. Pa 'ātep-tup, pu Topa xa hāmmāxnā xexka'.

18 Yā 'āte' pop 'ōgnū tayūmak xohix, xate 'ā nōm nū'pok, yā tayūmak xexka'. Hōnhā 'āte yōg tayūmak xohix punethok, 'Epaponit te' paxnūn hah. Ha Topa tep-tup pax, xa 'āxop hāpxop popmā', xix tayūmak tu' hok hōm, pu hām'āpak max'ax 'āktux 'ūhep xop xohix pu'. Topa pu hāpxop hōm'ax, yā' hax max putuk, tu Topa kuxa hittupmāhā'.

19 Yīy yōgnū Topa te xa' popmā'ax hāpxop xohix, 'ūp-texop xexka tu'.

20 Pūyā tikmū'ūn xohix Topa yūmūg. Tak xexka xe'ēgnāg 'āktux, tu' xuktux mō'kuma' mōg. Hamūn!

Yā' ka'ax hā' xohix 'āneo

21 Topa yōg tikmū'ūn xohix pu 'āneo, 'ōhōm Yeyox Kunnix yōg. Nūnte' pip xape xop te xa 'āneo,

22 xix Topa yōg tikmū'ūn xohix te xa 'āneo, xi' xop te Hōm yōg xat'ax pet xexka tu' hām, tu xa 'āneo.

23 Pūyā yūmūg xuxyā Yeyox Kunnix 'āxohix ha hāmmāxnā! Tu ta tu' kux.

PAOT TE KŌMĚN KONOX YŌG KUXA MĀM KA'OK XOP PU KAX'ĀMI'

1 Ūgmūn Paot, ha Topa tep-tup, pu Yeyox Kunnix nūgkutnā', yīk mūn xik xape Tīmōn te nūhū tappet kax'āmi',

2 kōmēn xexka Konox yōg tikmū'ūn pu kax'āmi', Konox yōg kuxa mām xop pu kax'āmi'. Yā Kunnix te yūmū'ā hā' xape xe'e', yīy yūmūg xape kamah. Pūyā Topa yūmūg Tak 'āmūtik pīp, nūy 'ākuxa māmā', nūy xa hāmmaxnā'.

Tu Topa pu hām'āktux, nūy kuxa mām ka'ok xop max'ax 'āktux

3 Ūgmū'āte yūmūg Tak Topa max 'āktux, 'īhā nōm pu hām'āktux 'āxop 'āxape xop pupi', yā Topa te yūmūg xuxyā Yeyox Kunnix hā' Tak.

4 'Ākuxa mām ka'ok Yeyox Kunnix kopah, tu Topa yōg tikmū'ūn xohix putup pax, hak mū'āte' yūmmūg.

5 Hōmā 'āxop te hām'āpak max'ax 'āpak hāmāxap, hu hāmmax hip, nūy 'āhi xe'e mō kuma mōg, hu 'ākuxa mām ka'ok, xi' nōy putup pax 'īhā' hip, nūy hāpxip punethok 'īhā pexkox yōg hāpxop pop.

6 Yā Topa te hām'āpak max'ax hā tikmū'ūn xohix ha hāmmaxnāhā', yī' hep xop xohix pu hām'āktux, yā kama 'āxop te hām'āpak, tu Topa te' xohix ha hāmmaxnā'ax 'āpak, ha kaxīy Topa te xa hāmmaxnāhā', 'īhā' xupak, ha hōnhā hāmmaxnā kamah.

7 Ha yūmūg xape 'Epap te xa hāmyūmmūgāhā', tuk mūg pupi hāpxopmāhā', tu Kunnix pu hāpxopmā punethok,

8 tuk mū'ā Topa Koxuk 'āktux, ha xa ka'ogāhā', nūy kuxa mām xop xohix putup pax, yīy 'Epap tek mū'ā' xuktux.

9 Hak mū'āte' xupak, tu Topa tu' xak, pu 'āxop pu hāmyūmmūgā', xayīy hāmyūmmūg xe'e', nūy yā Topa putup, xayīy 'āxop yūmmūg, nūy Topap-tup'ax yūmmūg, hu yāy Koxuk te xa hāmyūmmūgāhā',

10 xayīy hāpxopmā max, ha Topa te 'āptux, xa hāpxopmā max mō kuma 'āmōg, tu mōktu yā Topa yūmmūg xe'ēgnāg.

11 Topa ka'ok xe'ēgnāg, tu 'āka'ogāp-tup, xayīy nōā'tot, 'īhā' ākuxa hittup,

12 hu yūmūg Tak Topa pu hām'āktux, hu: "Āmax Topah, xatek mūg ka'ogāhā', 'ū pexkox yōg hāpxop pop, yīy 'ōg tikmū'ūn xohix mūtik pop," kaxīy. Yā Topa te nōm hāpxop xex pexkox kopah, nūy yāy yōg xop pu' popmā'. Yā' popmāp-tup yāy yōg tikmū'ūn pu', nōm te Topa pu' yīpkox pīp.

13 Hōmā yūmūg kuxa kummuk, yā hāpkoxtap putuk yūmūg kuxa kopah, pāyā yūmūg Tak Topa te yūmūg kuxa maxnāhā', tu yūmūg nūmāhā yāy kutok hah. Yā yāy kutok mō'yāy xe'ēgnāg, 'ūk-tok yāp-xehnāg tu', puyīy 'ūk-tok Yeyox Kunnix yūmūg xat, nūy 'ūkpēnā max.

14 Tu yūmūg pupi' xok tap, nūy yūmū yōg hāpkummuk mīy'ax xaxogā', pu tu kux.

Tute Kunnix 'āktux

15 Tikmū'ūn 'ūm te Topa pēnā hok, ha Kunnix te yāy Tak Topa pa putuk xe'ēgnāg, tuk-tok te māxap, hak-nāy tu Topa te hāpxop xohix mīy.

16 Yāk-tok mūtik Topa te hāpxop xohix mīy, tu tu hāpxop xohix xat'ax, tu hāpxop pēnā'ax mīy, xix hāpxop pēnā hok mīy kamah, xix pexkox yōg xexka xop mīy, xi' yōg xat'ax xop xohix mīy. Topa tek-tok mūtik mīy, xik-tok pu' mīy hāpxop xohix.

17 Kunnix xīp tap, 'īhā Topa te pexkox mīy, xix hahām, xix hāpxop xohix mīy, tu nōm mūtik hāpxop xohix xex max, pu tu pīp ka'ok.

18 Ha Kunnix te' kuxa mām ka'ok xop hāp-tox. Yā tikmū'ūn putox te yāy yīn xat, nūy tu pēnā max, ha kaxīy Kunnix te' kuxa mām xop xat, nūy tu pēnā max, tu nōm xop hīmāhā', yā Topak-tok te māxap, tu putpu' hi tap, nūy hāpxop xohix hā tu xexka xe'ēgnāg.

19 Yā Topa tek-tok putup, yā Topa xe'ēgnāg kamah.

20 Yīy Topa te hāmp'e'paxex, tu yāy kutok nū'kutnāhā' hām tu', pu tu xok mīpkupnix tu', nūy tu' gāy nām xop xohix nōā', puyīy Topa hā tu xape'. Tu pexkox yōg gāy xop nōāp-tup kamah, puyī' xohix yā Topa hā tu xape'.

21 Hōmā Topa tu 'āpīp hāptox hah, tu 'āyīpkox 'ohnāg, tu Topa hā 'āpuknōg, 'ōg hāpxopmā'ax kummuk tu', xix hāpe'āpaxex kummuk tu 'āpuknōg,

22 pa Topak-tok xok, ha hōnhā' Tak te xa hā' xape, nūy yāy keppa 'ānūnnā', tu 'ākuxa tupmāhā', tu 'ōg hāpkummuk mīy'ax xaxogāhā', nūy 'āmax 'āktux.

23 Yīy Topa yōg putat hā 'āmōg ka'ok, hu' xak hok. 'Āxop te hām'āpak'ax max 'āpak, ha xa' hipmāhā', xayīy pexkox yōg hāpxop pop, hu' xaxok hok. 'Ūgmūn Paot te hām'āpak'ax max 'āktux pax, tu hāpxexka yōg xop xohix pu' xuktux, hu hāpxopmāhā'.

Paot te' kuxa mām ka'ok xop pupi hāpxopmāhā'

24 Tuk xūy 'āxop pupi', nūy Kunnix pupik xūy, huk kuxa hittup, Kunnix xop pupik xūy tu'. Yā Kunnix hā yūmūg yīn puxet, ha yūmūg xat, nūy yūmūg pēnā max, yāy yīn pēnā max putuk.

25 Topa tek mūn yāykutnāhā', nūy mōgkutnā' Kunnix yīn xop hah, nūy Topa

pupi hām'aktux, nūy xa hām'aktux xohix 'aktux.

²⁶ Hām̄yāxatamuk xohix punethok hā Topa te hāmpe'paxex, tu' yīy 'ohnāg, pa hōnhā' kuxa mām ka'ok xop pu' hām̄yūmmūgāhā', yā hām'aktux xe'e'.

²⁷ Topa te' hep xohix xop pu hām̄yūmmūgāhā', tu hām'aktux'ax xe'e' yūmmūgāhā', ha hām'aktux nūhū', hu: Kunnix te 'ākuxa kopa' xip, nūy xa' popmā pexkox yōg hāp̄xop xohix, yīy 'āxop yāyhāp-tup max xe'ēgnāg, Kunnix putuk.

²⁸ Ha kaxīy 'ūgmū'āte hām'aktux, tu Kunnix 'aktux tikmū'ūn xohix pu', tu hām̄yūmmūg, nūy hām̄yūmmūgā max, nūy 'āmōgā Topa hah, xayīy 'ākuxap-xet Kunnix mūtik, nūy Topa hā 'ātix tap,

²⁹ yīy 'āte hāp̄xopmā punethok, ha Kunnix tek ka'ogāhā', ha 'āte hāp̄xopmāhā' punethok.

2

¹ 'Āte xa hām'aktux, xayīy yūmmūg. 'Ūghām punethok 'āxop pupi', xix kōmēn Namnixet yōg kuxa mām xop pupi', yā' xohix pupi', nōm tek pēnā 'ohnāg pupik hām.

² 'Āte hāp̄xopmāhā', nūy 'ūgnōy ka'ogā', puyī' kuxap-xet yāy putup, nūy hām̄yūmmūg xexka', nūy hām'aktux xe'e' yūmmūg. Kunnix yā Topa yōg hām'aktux xe'e', Topa te tikmū'ūn pu hām̄yūmmūgāhā'.

³ Yāk-tok xe'e te Topa yōg hām̄yūmmūg'ax xohix yūmmūgāhā'.

⁴ Yīy 'āte xa hām'aktux, hu: Koit'ax pu 'ṙpkox pip hok, yā' kummuk xop te mō'āmā pax. 'Ūpa max, ha ta' kuxa mūn kummuk.

⁵ Hāptox tuk xip, pak kuxa te 'ākuxa mūtik yāp-xet, 'ākuxa mām ka'ok Kunnix kopah, hak kuxa hittup xexka'.

Kunnix te yūmmūg hīnnāhā'

⁶ 'Āxop te: "Yeyox Kunnix yā yūmmūg xuxyā'," kaxīy. Hu nū mūtik 'ākuxap-xet, nūy hāp̄xopmā max.

⁷ Mīm yīp̄xatit te hām hā mō'nāhā', tu hām kopa' xip ka'ok, kaxīy 'āpip ka'ok Kunnix tu', puyīy 'āka'ogā', xayīy 'ākuxa mām ka'ok xexka', hak mō'āte xa hām̄yūmmūgāhā', 'ūxaxok hok, nūy Topa pu hām'aktux, nūy: "Āmax Topah!" kaxīy.

⁸ 'Ōg pa 'āti!' Tikmū'un te 'ākuxa hā' xupxet putup, mō'āmā'ax hā 'ākuxa hā' xupxet putup, hām'aktux hitop hā nōm xupxet putup. Nōm hām'aktux yā Topa hā' puknōg xop yōg hām'aktux, 'ap Topa yōg'ah, ha pexkox yōg xexka xop te Topa tu' gāy, tu hām'aktux, pāyā Kunnix te' xuktux 'ohnāg.

⁹ Yā Kunnix te Topa xe'ēgnāg putuk, tu tikmū'ūn kutok xe'e', tu yāy putuk xe'ēgnāg,

¹⁰ ha Topa te Kunnix mūtik 'āhīnnā xe'e', yā 'ākuxap-xet Kunnix kuxa mūtik, ha Kunnix xexka xe'ēgnāg, tu pexkox yōg xop xat,

xix hām tu' pip xop xat, nōm xop hā' xat'ax, tu' xat.

¹¹ Yoneo xop te' pit xop yāy nāg xax mep 'ūyīmap, pāyā Kunnix te 'ākuxa kummuk xit, nūy ta' yānān tu kuxa max tat.

¹² 'Āp-tox pix 'ṙhā 'āxop te hāp̄xopmā kummuk kux, ha Kunnix nō hāpkot, ha Topa te' putpu' hīnnā xe'e'. Yā 'ākuxa mām ka'ok Topa kopa', ha ka'ognāg xexka', tu Kunnix putpu' hīnnāhā', tu kamah 'āxop kuxa hīnnā xe'ēgnāg.

¹³ Hōmā 'āxop te hāp̄xopmā kummuk pax, yā Topa hā 'āxop puknōg, tu kamah Yoneo yōg tikmū'ūn hā 'āpuknōg, pa Topa te 'ākuxa hīnnāhā', Kunnix hīnnā putuk 'āhīnnāhā', tu hāpkummuk mīy'ax xohix xaxogāhā', pu tu kux.

¹⁴ Yā Kunnix te yūmmūg pupi' xok, tu yūmmūg yānān tu' xok mīpkupnix tu', 'ūyīy Topa hāk xape', pūyīy yūmmūg kummuk mīy'ax hā' pago. Yā yūmmūg kuxa kummuk tupmāhā', puyīy yūmmūg kuxa tu max Topa pu'.

¹⁵ Ha hāpkummuk yōg xexka xop pu' kuxyāhā', tu mīpkupnix tu' xup, nūy mōktuk-tōgnāg, tu pipkup māxap'ax hā' hīy, tu' hupmāhā', ha' mōgāhā', pu' xohi' pēnā', tu' yūmmūg, tu Kunnix te' xat xe'ēgnāg yūmmūg, ha hāp̄xohix te nōm pu' yīp̄kox pip.

¹⁶ 'Ūtux hok pu tikmū'ūn 'ōg hāp̄xopmā'ax kopit hok, nūy xo'op'ax hā 'āxat hok, xix 'āxit'ax hā 'āxat hok, xix nit xān hā 'āxat hok, xayīy 'āhām hok. 'Ūtux hok, pu' āxat hok, xayīy nit xap yīy ta 'āhām hok, xix 'āmuk xexka mīy'ax hā 'āxat hok, xix māyōnhex tup 'ṙhā 'āxat hok. Yā' tux hok pu' āxat hok.

¹⁷ Yā' xohix te nū pexkox yōg hāp̄xopmā'ax hā' komut, yā' koxuk putuk, 'ap xe'e'ah. Hōmā Topa te' xat pu Yoneo xop mīy. Topa te tu xo'op'ax xat, xix nōm hāp̄xop xohix xat, nūy tikmū'ūn pu Kunnix 'aktux, pa hōnhā Kunnix xip xe'ēgnāg, yīy hāp̄xopmā'ax komut yāyhā' hitop, ha' kux.

¹⁸ Tikmū'ūn te koit'ax hā 'ṙpkox hok, nōm xop te yāy 'aktux xexka hā 'ṙpkox hok. Tu hāp̄xopmā'ax xe'ēgnāg pēnā'ax 'aktux, tu mō'āmā', 'ṙhā' xat, xa pexkox yōg nū'pok xop pu nūktettex, nūy nōm 'ūxexka'aktux, ha hitop hā yāy kutōgnāg 'aktux, 'ṙhā yāy xexka pe'paxex, tu yāy putup'ax kummuk mīy.

¹⁹ Tu Kunnix nīm, ha' kuxa mām ka'ok xop hāp-tox, puyīy nōm xop xohix yā kuxap-xet, yāy yīn puxet putuk, ha' xohix nōy nā' mōg, tu mōktu xexka', yā Topa tep-tup hah.

Kunnix mūtik yūmmūg hī, xix yūmmūg xakix

²⁰ Kunnix xok, nūy 'ōg hāpkummuk mīy'ax kuxyā', xayīy yāmīy kummuk yōg xexka xop nīm. Tep tu xate nōm 'āpak?

²¹ Ha 'āxat, hu: "Ūxupit hok nūhū'," kaxīy, tu xe: "Ūmā hok 'ōhōm," kaxīy, tu xe: "Ūpa hok nō'ōm," kaxīy. Pa nōm pu 'ṙpkox hok.

²² Hāpɔp xohix nōg'ax, tu yāyxaxogā'ax, ha tikmū'ūn te' xat hok, pu mīy hok, pa Topa te' xat'ohnāg.

²³ Yā' xat'ax puknōg te hāmyūmmūg putuk, pāyā' hitop, ha' xat pu pexkox yōg nū'kutnā'ax pu nū'xup, nūy yāy xax te kutuk, pāyā' koit, yā' hitop, tu tikmū'ūn yōg hāpe'paxex maxnā 'ohnāg, tup-tup'ax kummuk pu hupmā 'ohnāg kamah.

3

¹ Kunnix mūtik 'āhi xe'e'. Hōmā 'āxop te hāpɔpɔmā kummuk kux, hu pexkox yōg hāpɔp xax nōmhā, yā Kunnix yūm 'ōnte', tu Topa yīpxe'e hā' yūm.

² Pexkox yōg hāpɔpɔmā'ax pe'āpaxeh, nūy hām yōg hāpɔpɔmā'ax xaxogā'.

³ Hōmā 'āxop te hāpɔpɔmā mīy pax, pa Topa te 'āhīnnāhā', tu Kunnix hīnnā putuk, tu 'āpēnā max, yā 'āxop kuxap-xet Kunnix mūtik, xix Topa mūtik.

⁴ Kunnix te 'āhīnnā xe'e', nūy 'ākopa tu' xip ka'ok, tu putpu' nūn putup, pu' hep xop xohi' pēnā', ha' nūn, 'Ihā 'āxop xexkanāp-tup, ha mōktu yā 'āxexka', Kunnix mūtik yā 'āxexka putup, pu' xohi' pēnā'.

Yūmūg hi xe'ēgnāg

⁵ Yāy yōg putup'ax kummuk mīy hok, nūy hāpkummuk mīy kux, ha tikmū'ūn te hāpkummuk mīy, tu' nōy hā' xupxet, xi' xonnix, xi' gāy, xi' nōy yōg hāpɔp putup. Tikmū'ūn te hāpɔp putup pax xexka', puxix tu Topap-tup hok, ha kaxīy hāpɔp te topa komut xop putuk, tikmū'ūn tep-tup xexka hah, tu mōktu Topa xe'ēgnāg xaxogāhā',

⁶ ha Topa gāy tikmū'ūn te hāpkummuk mīy tu', nōm xop te Topa pu' yīpkox 'ohnāg, yī' kummugāp-tup 'ūyānān tu'.

⁷ Hōmā 'āxop te yāy putup'ax kummuk mīy, hu' mīy pax, Topa pu' āyīpkox 'ohnāg tu'

⁸ Pa' kuxyā nōmhā, xayīy mīy hok 'ūxeheh, yāy putup'ax kummuk mīy hok, xix 'āgāy hok, xix 'ānōy pu hāpkummugā hok, xatep-tup nōg tu', xi' kupeh hok, xix 'āyīy kummuk hok, nūy 'ānōy mānōg hok.

⁹ Koit hok 'ānōy pu'. Yā Topa te 'ākuxa kummuk xit, nūy kuxa max tat 'ūyānān tu'.

¹⁰ Yīy hāpkummuk mīy'ax xohix kux, pu Topa 'ākuxa tupmā 'āmnīy xohix hā, nūy xa hā yāy putup, xayīy Topa yūmmūg xe'ēgnāg.

¹¹ Yī' kuxa mām ka'ok xop puxet, yā Kunnix hā' kuxap-xet, xip-tox puxet, 'ap 'āxop Yōneo xop yōg'ah, xi' puknōg xop yōg'ah, xix tikmū'ūn yōg'ah, xix 'āyuhuk yōg'ah, xix kamoka xop yōg'ah, xix kāmānat xop yōg'ah, xi' xat'ax xop yōg'ah, pāyā 'āxop yā Kunnix yōg, ha' xexka xe'ēgnāg, tu yāy yōg tikmū'ūn xohix kuxa kopa' xip, ha' xohix te yā yāy putuk Kunnix pu'.

¹² 'Āxop yā Topa yōg tikmū'ūn, ha mō'āyāy xe'ēgnāg, tu 'āyīmōgatux yāy mūn pu', yīy

'ānōy kuxa ka', tu nōā'tot, tu nōm pu hāmmaxnāhā', xix yāy kutōgnāg pe'āpaxeh, nūy 'ānōy pe'āpaxex max, xix 'āyīy pu'uk, nūy 'ānōy gāyā hok,

¹³ nūy 'ūyōg hāpkummuk mīy'ax xaxogā', 'Ihā 'ānōy te xa hāpkummugā'. Yā kaxīy yūmūg xuxyā te 'āxop yōg hāpkummuk mīy'ax xaxogāhā', pu tu kux.

¹⁴ Ha ta mōy 'ānōy putup pax xexka', nūy nōm hā 'ākuxap-xet, xix 'āp-tox puxet.

¹⁵ Pūyā Kunnix 'ākuxa māmā', nūy 'ānōy mūtik tu ti max, nūy yāytuk-mīy hok. Yā Topa te 'āxānāhā', nūy 'ākuxa māmā', nūy nōm hā 'āp-xet, 'āyīn puxet putuk. 'Ūxaxok hok, nūy Topa max 'āktux, hu: "Āmax Topa, tu yūmū'ā hāpɔp xohix popmāhā', yā' puxi'," kaxīy.

¹⁶ Pūyā Kunnix yōg hām'āktux xe'e 'ākuxa kopa' xip, tu xa hāmyūmmūgāhā', xa' yūmmūg, nūy 'ānōy pu' yūmmūgā', tuk-tex, nūy Topa xexka 'āktux, nūy 'ākuxa yā Topa max 'āktux.

¹⁷ 'Ok pe 'āxop te hāpɔpɔmāhā', pe hām'āktux, hu ta yūmūg xuxyā Yeyox 'āktux, nūy Topa yūmūg Tak pu: 'Āmax Topah. Xate yūmūg xuxyā Yeyox yūmū'ā nū'kutnāhā'. 'Āmax! kaxīy.

Te xīy hā hāpɔpɔmāhā'

¹⁸ 'Āte 'ūn xop xat, pu' yīpxox pu yīpkox pi', yā Kunnix te' xat.

¹⁹ Ha' yīpxox xop xat, pu' xetut putup pax, hu' kuxa ka'.

²⁰ Hak-tok xop xat, pu yāy tak pu yīpkox, xi' tut pu yīpkox. Yā Topa te' xat.

²¹ 'Āk-tok gāyā hok, ka 'āk-tok kuxa tuknōā'.

²² Kāmānat xop, 'āxuxyā' nōm tik te 'āxat pu 'īpkox pi', nūy tu hām max, yā 'āmnīy xohix hā hām max, 'ok pe 'āpēnā', 'ok pe 'āpēnā hok, yīy Topa pu hām max, 'āxop tep-tup pax tu'.

²³ 'Āpu hāpɔpɔmā max, pu Topa pēnā', nūy 'ōg hāpɔpɔmā'ax putup, ha Topa pu hāpɔpɔmā', 'āhitup tu'.

²⁴ 'Ūxaxok hok: Yūmūg xuxyā te pagop-tup hok'ah xa', tu pexkox yōg hāpɔp xex yāy yōg tikmū'ūn pu', yā Kunnix te 'āxop hā 'āxat'ax xe'e',

²⁵ tu yānān tu pago, tu hāpkummuk mīy xop kummugāhā 'ūyānān tu'. Yā Topa te hāmyok mīy, nūy xohix pu pago, yā Topa pu 'ūxohix te' nōy putuk.

4

¹ 'Āxop 'āxuxyā xop, 'āpu hāmyok mīy, nūy 'ōg kāmānat pu pago max, Topa yā 'āxuxyā xe'e', tu 'āxat, tu pexkox tu' xip, yīy 'ōg kāmānat xop pu pago max, nūy nōm pu hāmmaxnā'.

Paot te hāmyūmmūgāhā'

² Topa pu hām'aktux pax, tu 'ōg pa mōxip, mō'ōn hok, nūy Topa max 'aktux, xa' popmā hāpxop xohix hah.

³ Ha kamak mūg pupi tu' xax, pu Topa 'ūgka'ogā', 'ūgmū Topa yōg hām'aktux xe'e 'aktux, nūy Kunnix 'aktux. Yā kanet kopak xip, 'āte Kunnix 'aktux tu'.

⁴ Ha Topa tu' xax, puk ka'ogā', 'ū Kunnix hā hāmyūmmūgā max, yā Topa tep-tup pax.

⁵ Hāmyūmmūg, nūy 'ūkuxa mām hok xop pu hāpxopmā max 'āmnīy xohix hā, xayīy hāmyūmmūg'ax hā Kunnix 'aktux max tikmū'ūn pu'.

⁶ Hāmyūmmūg, nūy hām'aktux max, nūy tu hām'aktux hā' nōy yānān max.

Tuk-nāy tu 'āneo

⁷ Yūmūg xape Tikik te Kunnix pu hāpxopmāhā', tuk mūg mūtik hāpxopmāhā', tu xa hām'āpak'ax 'aktux putup, nūy 'ūgmūn 'aktux.

⁸ 'Āte 'āxop hah mō'kutnāhā', pu 'āka'ogā', nūy putpu' nū', nūy xak mūg 'aktux.

⁹ Tu yūmūg xape 'Ōnēy mūtik mōg, ha 'ōgnū kōmēn yōg tihik, tu xa hām'āpak'ax xohix 'aktux'ax, tuk mūg 'aktux'ax.

¹⁰ 'Anixtah 'ūgmūtik kanet kopa' tihī', tu 'āneo, xix Maname tiktak Mā'ak te 'ā 'āneo kamah. 'Āte xa hām'aktux tap, tu 'āha Mā'ak mōg'ax 'aktux, pu tu 'āpet kopa' xip, 'īhā putpu 'āha' mōg.

¹¹ Yoyoe 'āxet'ax nōy yā Hāmyok, tu xa 'āneo kamah. Nū tik 2 te Yoneo yōg tihik, tuk mūtik hām, ha Yoneo xop nōy hām 'ōhnāg 'ūgmūtik, puyīy Topa yāy yōg tikmū'ūn xat, ha' yīpkox pip, ha tik 3 te hāpxopmāhā' punethok, nūy tu yāy hāk tehet.

¹² 'Epap te 'ōgnū kōmēn yōg tihik kamah, tu Yeyox Kunnix pu hāpxopmāhā', tu 'a 'āneo, tu Topa tu' xak pax, 'āxop pupi' xak, puyīy 'āka'ogā', nūy Topa hā 'āxiptap, nūy Topa pu 'āxop hāpxopmā'.

¹³ Yā 'Epap hām punethok, 'āte' yūmmūg, ha 'āxop pupi' hām punethok, xix kōmēn Namnixet yōg tikmū'ūn pu' hām punethok, xix Yenap yōg tikmū'ūn pu' hām punethok.

¹⁴ Notot Nok yūmū'ā hā' xape, tu 'ā' 'āneo, xix Nep te 'ā' 'āneo kamah.

¹⁵ 'Ūgmū'āte Namnixet yōg xape xop pu 'āneo, xix Nī'ip pu 'āneo, xī' kuxa mām ka'ok xop pu 'āneo, nōm Nī'ip pet tu yāy tu'nāhā 'āneo kamah.

¹⁶ 'Āpu nū tappet mō'kupix hāmāxap, nūy kunāy tu Namnixet yōg xop ha mō'kutnā', pu mō'kupix kamah. Mō'kupix Namnixet xop yōg tappet 'ūyānān tu'.

¹⁷ 'Āpu 'Akīp pu hām'aktux, hu: "Yūmūg xuxyā te 'āxat, xa hāpxopmā', yīy hāpxopmā max, nūy nō kuxyā Kunnix pu'," kaxīy.

¹⁸ 'Āte Kax'āmi yāy yīm hā, hu: 'Ūgmūn Paot te 'āxop pu 'āneo. Kanet Kopak xip, yāk xaxok hok!

Pūyā Topa xa hāmmaxnā!
Tu ta tu' kux.

PAOT TE KŌMĒN TEXANŌN YŌG TIKMŪ'ŪN PU TAPPET KAX'ĀMI I

¹ Ūgmŭn Paot. 'Āte' kax'āmi nŭhŭ' tappet, yā 'āxop pu kax'āmi', yā Kunnix kopa kuxa mām xop pu' kax'āmi kŏmĕn Texanŏn tu', yā yŭmŭg 'Ātak Topa yŏg xop pu', yā yŭmŭg xuxyā Yeyox Kunnix yŏg xop pu' kax'āmi'. Xinax te 'āxop pe'paxex xix Tŭmŏn te' kamah. Pu yā Topa xa hāmmaxnā', xayīy 'ākuxa mām.

'Āxop kuxa mām Topa kopah

² Ūgmŭ'āte Topa pu hām'āktux mŏkumak mŏg, hu: "Kunnix kopa kuxa mām xop pu 'āmax." Kaxīy. Yā 'āxop pu' max Topah. Ūgmŭ'āte Topa pu 'āxop 'āktux mŏkumak mŏg.

³ Hamŭn, 'ŭgmŭ'āte yāy 'Ātak Topa pu hām'āktux, tu hāmpe'paxex, 'āxop kuxa mām ka'ok, hu hāpxopmā max xohix. 'Āxop te' nŏy putup pax, hu 'āxop te hāpxopmā max punethok. Xate yŭmŭg xuxyā Kunnix hip kumaknāg. Hā kaxīy yŭmŭ'āte hāmpekpaxex, tu Topa pu hām'āktux.

⁴ Ūkxape xop, Topa te 'āxop putup pax, tu tikmŭ'ŭn xohix kopa 'āxop yŭmŏgātux, tu 'āxop mŭy Topa yŏg tikmŭ'ŭn xe'e'. Hā kaxīy 'ŭgmŭ'āte pe'paxex, tu Topa pu hām'āktux.

⁵ Hŏmā 'ŭgmŭ'āte xa Topa yŏg hām'āpak max'ax 'āktux. Ūgmŭ'āte nŏm 'āktux, tu hāpxopmā ka'ok xe'ēgnāg, tu Topa Koxuk mŭtik xa Topa yŏg hām'āpak max'ax 'āktux, tuk mŭg kuxa mām ka'ok Topa yŏg hām'āpak max'ax kopah. Hŏmāg mŭg tihi 'āxop kopah, ha xatek mŭ yŏg hāpxopmā max'ax pĕnāhā', yāg mŭn max xa'.

⁶ Xate 'ŭgmŭg max pĕnāhā', xix yŭmŭg xuxyā Yeyox yŏg, tu nŏ' max putuk. Ūnŏy te 'āxop kute'ex kummuk, pa 'āxop te Topa yŏg hām'āpak max'ax paha', tu 'ākuxa hittup, yā Topa Koxuk te 'ākuxa hittupmāhā'.

⁷ 'Āxop max, ha 'āmax pĕnāhā Kunnix kopa kuxa mām xop te hāpxexka Māxenŏn tu', xix hāpxexka Genex tu', tu nŏ' max kamah, yā 'āxop putuk.

⁸ Hamŭn, 'āxop te yŭmŭg xuxyā Yeyox 'āktux hāpxexka Māxenŏn tu', xix hāpxexka Genex tu', yā' xohix yŭmap te' yŭmmŭg, 'ākuxa mām ka'ok. Putep nŏy 'āktux putup 'ŭgmŭ'āte'? Puxī'.

⁹ Hŏmāg mŭg tihi 'āxop kopah, ha 'āxop te Topa komut xop nŭm, tu ta Topa xe'e pe 'āmŏg, ha tikmŭ'ŭn xohix te 'āyŭmap te' xupak, tu hām'āktux.

¹⁰ Xate Topak-tok hip, Yā pexkox tu yŭxop-tup Topak-tok. Hŏmā Topa te yāy kutok

Yeyox putpu' hŭnnāhā'. Yeyox te yŭmŭg mŏy putup, 'Īhā Topa gāy 'ŭkummuk xop mŭtik.

2

Paot te hāpxopmā max kŏmĕn Texanŏn tu'

¹ Ūkxape xop, hŏmāg mŭg tihi 'āxop kopah, tu hāpxopmā max, 'ap kummuk mŭy'ah, 'a yāg mŭg hitop ti'ah 'āxop kopah.

² Hŏmā tikmŭ'ŭn tek mŭg kute'ex kummuk komĕn Pinio tu', tuk mŭg mānŏg, pa hāpxip 'Īhāg mŭg mŏg, tu mŏktu 'āxop tuk mŭg mŏxaha 'ŏnte kŏmĕn Texanŏn tu', ha kŏmĕn Pinio yŏg tikmŭ'ŭn tek kute'ex kummuk, 'āxop te' yŭmmŭg. Pa yŭmŭ yŏg Topa tek kuxa hittupmāhā', ha 'āte Topa yŏg hām'āpak max'ax 'āktux.

³ Ūgmŭ'āte Topa yŏg hām'āpak max'ax 'āktux, tuk mŭ'āte pe'paxex kummuk 'ohnāg, tuk mŭ'āte 'ŏg hāpxop xak 'ohnāg, tuk mŭ'āte 'āxop kupex 'ohnāg.

⁴ Ūgmŭ'āte putep mŭn 'āktux? Topa te nŏ putup, 'ŭgmŭ'āte nŏm 'āktux mŏkumak mŏg. Hamŭn. Topa tek mŭg putup, tuk mŭ'ā Topa yŏg hām'āpak max'ax hŏm, tuk mŭg mŏ'pok, ha 'āte tikmŭ'ŭn xohix pu nŏm 'āktux. Ūgmŭ'āte putep mŭn 'āktux? 'Ok pe tikmŭ'ŭn te nŏm putup pax hām'āktux? 'Ok pe Topa te nŏm putup pax hām'āktux? Yā tikmŭ'ŭn yŏg'ah, pa Topa tek mŭ yŏg putup'ax kopit.

⁵ 'Āxop te' yŭmmŭg. Hŏmāg mŭg tihi 'āxop kopah. 'Ak mŭ'āte xa hā xape komut'ah. Ūgmŭ'āte 'āxop kupex 'ohnāg. 'Ok 'ŭgmŭ'āte hām'āktux max, pa 'ŏg hāpxop putup? 'Āmhok. 'Ak mŭ'āteputup'ah 'ŏg tayŭmak. Topa te' yŭmmŭg.

⁶ 'Ak 'ŭgmŭ'āteputup'ah, puyīy tikmŭ'ŭn 'ŭgmŭg'āktux max. 'Agmŭ'āte 'ŏg hām'āktux max xak 'ohnāg, xix tikmŭ'ŭn nŏy yŏg kamah.

⁷ Ūmax, pu Kunnix yŏg mŏ'pok xop tikmŭ'ŭn yŏg hāpxop xak, pak mŭ'āte nŏm hā xak 'ohnāg, 'a' xat'ax xop putuk'ah, pak mŭ'āte xa' hāpxop popmāhā', yā 'ŭn tek-tok pu' popmā'ax putuk.

⁸ Ūgmŭ'āte 'āxop putup pax, hu xa Topa yŏg hām'āpak max'ax 'āktux, xix 'āxop pu yāy mŭn popmāhā, yāg mŭ'āte 'āxop ka'ogāhā'.

⁹ Hamŭn, 'ŭkxape xop, xate' yŭmmŭg. Hŏmāg mŭg tihi 'āxop kopah, tuk mŭ'āte hāpxopmā max punethok. Māyŏn mŏg tox hāg mŭg hām, xix 'āmnyī hā, nŭy pop hok 'ŏg hāpxop xix 'ŏg tayŭmak, tuk mŭ'āte xa Topa yŏg hām'āpak max'ax 'āktux.

¹⁰ 'Āxop te' pĕnāhā', xix Topa te' pĕnāhā', 'ŭgmŭ'āte hāpxopmāhā max 'āxop pu', yā Kunnix kopa kuxa mām xop pu'. Yāg mŭ'āte hāpxopmā max xe'ēgnāg, xix hāpxopmā yok. 'A' hāpxopmā kummuk 'ŭm mŭy'ah.

11 'Ügmü'äte 'äxop xohix häg tehe', yä 'ätak te yäy kutok hä' tehe putuk. 'Äxop te' yümmüg.

12 'Ügmü'äte 'äxop xapit, tu 'äxop kuxa hit-tupmähä', tu 'äxop xapit, xayiy häpxopmä max. Topa te nöm putup pax. Topa te 'äxop yimögatux, xayiy Topa yög tikmü'ün xop mökukox, xayiy Topa max xe'ëgnäg pēnā'.

13 Hōmāg mü'äte xa' Topa yög hām'āpak max'ax 'äktux, ha 'äxop te' xupak, tu 'äyīpkox pip. Xate' pe'paxex, yä Topa yög hām'äktux, 'a' tikmü'ün yög'ah. Hamün, Topa yög. Topa te häpxopmä max 'äxop kopah, yä' kuxa mām ka'ok xop kopah, ha möktuk müg hittup, tu Topa pu hām'äktux, hu: "Ämax. Ämax nöm tikmü'ün pu'." Kaxiy.

14 'Ükxape xop, hōmā Yoneo xop te Yeyox Kunnix yög tikmü'ün xop xohik-te'ex kummuk häpxexka Yonex tu', xix 'äxape xop te 'äxop kute'ex kummuk kamah, yä' nöy putuk.

15 Hōmā Yoneo xop te yümüg xuxyā Yeyox putex, tu Topa pupi hām'äktux xop kix, ha' xakix, tu ta hōnhā yümüg kute'ex kummuk kamah. Topa te nöm xop putup'ah. Nöm te tikmü'ün xohik-te'ex kummuk.

16 Hamün, 'ügmü'äte Yoneo xop künāpa pip xop pu Topa yög hām'āpak max'ax 'äktux. Yä Topa yög hām'āpak max'ax te tikmü'ün kuxa māmähä Topa kopah, ha Topa te tikmü'ün kuxa kummuk xit, nüy kuxa max mö'tat, 'üyānān tu'. Ha ta Yoneo xop tep-tup, nüy nöm hä hām'äktux kuxyā'. Hä kaxiy Yoneo xop te häpkummuk mīy xexka', ha' gāy Topah, tu nöm kopit, nüy yög kummuk hä yānān.

'Ügmü'äte 'äxop xak

17 'Ükxape xop, hōmā yümüg yāy xatat häpxip kutōgnäg hä. Yümüg yāy xatat, pak mü'äte 'äxop pekpxax punethok, tu 'äxop xak nām, tu 'ā hak müg mög putup pax.

18 'Ügmü'äte 'ā hak mög putup pax. 'Ügmün Paot, 'ā hak mög putup punethok, pa Hāmgyāyāgnäg tek kummugā', hak mög 'ohnäg.

19 Yä hamün, yümüg xuxyā Yeyox te putpu' nün putup, 'Thā 'äxop pip putup Yeyox keppah, tu ta 'äte häpxop max hip putup, ha 'äxop tuk müg kuxa hittup putup, tuk mü'äte 'äxop 'äktux xexkap-tup, yä xut'ax 'äktux putup. Yä mö'tat'ax 'äktux putup.

20 Hamün, 'ügmü'äte 'äxop pekpxax punethok, tu 'äxop tuk müg kuxa hittup.

3

1 Hōmā yümüg yāy xatat, hak mü'äte 'äxop xak. 'Äte yāy xatat hä tot 'ohnäg, huk nox xip kōmēn 'Atēn tu',

2 nüy 'ā ha mö'kutnāhā Tīmōn, yäg taknōy, yä Topa pu' häpxopmä max 'ügmütik, nüy

Kunnix yög hām'āpak max'ax 'äktux. 'Äte 'ā ha nö mö'kutnāhā', pu 'äxop mütik tu häpxopmä max, xayiy 'ākuxa mām ka'ok nöy nā mög,

3 xayiy 'äxop xe häpkummuk mīy hok, tikmü'ün te 'äxop kute'ex kummuk hah. Yä hamün, xate' yümüg, Topa tep-tup, pu tikmü'ün yümüg kute'ex kummuk.

4 Hōmāg müg tihī 'äxop kopah, tu 'äxop mütik hām'äktux, hu: "Nöm tek mü'äk-te'ex kummuk putup." Kaxiy. Yä häpxip 'Thā tikmü'ün tek mü'äk-te'ex kummuk. Hamün.

5 'Äte' hip'ax hä' tot 'ohnäg, hu 'ā ha mö'kutnāhā Tīmōn, pu 'ākuxa mām yümüg. 'Ok Hāmgyāyāgnäg te 'ämögähā'? 'Ok 'ügmü yög häpxopmä'ax koxyōy? 'Äte' yümüg putup.

6 Ha ta' mög, Tīmōn, tu putpu' nün, tu hām'äktux, 'ākuxa mām ka'ok Topa kopah, tu 'äxop te yāy putup pax, xix Topap-tup pax. Tīmōn te hām'äktux, 'äxop tek mü'ā hām'äktux max, tu xatek müg pēnāp-tup pax. Hamün, 'ügmü'äte 'äxop pēnāp-tup pax kamah.

7 'Ügmüg xūy, yä nöm tek müg kute'ex kummuk, pak mü'äte 'äxop yög häpxopmä'ax 'āpak, huk kuxa hittup. 'Ükxape xop, 'ügmü'äte 'ākuxa mām ka'ok 'āpak, tuk müg kuxa hittup.

8 Topa yög putat max hä 'äxop mög kuma mög, kopxik kuxa hittup.

9 'Ügmü'äte Topa pu hām'äktux, hu: "Ämax, timü'ün pu'. Tikmü'ün max, kopxik müg kuxa hittup. Ämax. Puxi'." Kaxiy.

10 Häptup kopxix Topa pu hām'äktux xexka xix 'āmnīy, tu hām'äktux, hu: "Äpu 'ügmüg xat, 'ügmüg mög tikmü'ün hah." Kaxiy. Hamün, 'äxop hak müg mög putup, nüy 'äxop pu hämyümügā xate nöm yümüg 'ohnäg Topa yög putat max yög häpxop.

11 'Ügmü'ätep-tup, pu yümüg 'Ätak Topa 'äxop tuk müg mö'pok, xix yümüg xuxyā Yeyox 'äxop tuk müg mö'pok.

12 'Ügmü'ätep-tup, xayiy 'äxop yāy putup pax nöy nā mög, xix 'äxop tikmü'ün xohix putup pax nöy nā mög, ha möktu 'äxop tek müg putuk, yäg mü'äte 'äxop putup pax.

13 Ha möktu Topa te 'äxop ka'ogāp-tup, ha 'äxop maxp-tup, tu 'äxop max xe'ëgnäg yümüg 'Ätak Topa keppah, 'Thā yümüg xuxyā Yeyox te putpu' nün putup 'üyāy yög xop mütik.

4

Häpxopmä'ax max, Topa te nöm putup

1 'Ügmü'äte xe hām'äktux. Häg mü'äte xa' yümügähā häpxopmä max, Topa te nöm putup, ha 'äxop te häpxopmä max. 'Äte xa hām'äktux xix yümüg xuxyā Yeyox te xa

hām'äktux, hu: "Äpu häpxopmā max mīy nōy nā mög." *Kaxīy.*

² Yā hamūn, hōmā yūmūg xuxyā Yeyox tek mūg mō'pok, 'ūgmū 'äxop pu hämyūmmūgā'. *Kate' yūmmūg.*

³ Topa tep-tup, xayīy 'äxop häpxopmā kummuk kux, nūy ta Topa putuk. Topa tep-tup xayīy 'änōy hā xupxet hok.

⁴ Ūmax, pu tik yāy pu xetut xax, nūy nōm nūy, tu häpkummuk mīy 'ohnāg. *Tikmū'ün max te nōm putup.*

⁵ Ūkummuk, pu tik yāy putup'ax kummuk hā xetut xax, yā puknōg xop putuk, yā nōm te Topa yūmmūg 'ohnāg xop putuk.

⁶ Ūkummuk, pu tik yāy taknōy kute'ex kummuk, nūy yāy pu' xetut xax. Hōmāg mū'äte xa' hām'äktux, hu: "Pa 'ätix, yūmūg xuxyā Yeyox te nōm kummuk yānān putup." *Kaxīy.*

⁷ Topa te yūmūg xat, 'ūyīy yūmū nōy hā xupxet hok. Pa Topa te yūmūg xat, yūmūg häpxopmā kummuk kux, nūy ta Topa putuk.

⁸ Tep te nū hämyūmmūgā'ax 'äpak 'ohnāg? 'Ok tikmū'ün yōg hämyūmmūgā'ax 'äpak 'ohnāg? 'Ämhok. Yā Topa yōg. Yā Topa te xa' hōm Topa Koxuk.

⁹ 'Ok 'äte xa putup pax'ax kax'ämip-tup, yā Kunnix kopa kuxa mām xop yōg putup pax'ax? 'Ämhok. 'A 'äte xa kax'ämip-tup'ah. Hōmā Topa te xa' yūmmūgāhā', xayīy xohix putup pax,

¹⁰ ha 'äxop tep-tup pax Kunnix kopa kuxa mām xop xohix häpxexka Māxenōn tu'. Äpu tikmū'ün xohixp-tup pax nōy nā mög.

¹¹ Äpu hämyūmtuk, nūy 'ōg häpxopmā mīy, nūy ta 'änōy yōg häpxopmā'ax kute'ex hok, nūy ta 'ähām, xayīy 'ōg tayūmak pi'. Yā hōmā 'ūgmū'äte xa nōm 'äktux.

¹² Hā kaxīy nōm xop kuxa mām 'ohnāg Yeyox kopa te 'āmax pe'paxex putup, ha ta' nōy te 'äxop hā' te 'ohnāg putup.

Yūmūg xuxyā Yeyox te putpu' nūn putup

¹³ Ūkxape xop, 'ūgmū'äte-tup, xayīy hämyūmmūg xakix xop yōg häpxopmā'ax, nūy xakix xop hā 'äkuxa xūy hok, nūy 'äpota xexka hok, nūy xate' putuk hok nōm te häpxop max hip 'ohnāg.

¹⁴ Yūmūg kuxa kopā' yūmmūg, Yeyox xok xe'e', tu putpu' hi', tu putpu' nūn putup, ha Topa te Yeyox mütik xakix xop nūnnāp-tup, yā nōm kuxa mām ka'ok Yeyox kopa xop nūnnāp-tup.

¹⁵ Topa Xexka te nōm 'äktux, hak mū'äte nōm 'äktux. Yūmūg xuxyā Kunnix te putpu' nūn putup, 'ihā xakix xop putpu' hip-tup, tu mög hāmāxap putup Kunnix hah, hak-nāy tu hi xop mög putup Kunnix hah.

¹⁶ Pexkox yōg nū'pok xop yōg xat'ax te' xat ka'ok putup, ha' nōy te Topa yōg mīxux xop tut kaxyāp-tup, 'ihā yumū xuxyā Kunnix

mūn te pexkox tu' yīxop-tup! Ha ta putpu' hip-tup xakix xop, nōm kuxa mām ka'ok Kunnix kopah.

¹⁷ Hag-nāy tu nōmhā hi xop mögāp-tup pepix kamah, tu möktu' xohix yāy tu nū' nāp-tup hämgōy xexka kopah, nūy yūmūg xuxyā Kunnix mütik mög. Hā kaxīy nōm te Yeyox mütik tip-tup, tu xe' yāy xatat putup'ah.

¹⁸ Äpu tikmū'ün kuxa hittupmā nū hām'äktux hā.

5

Äpu Yeyox te putpu' nūn'ax hip

¹ Ūkxape xop, hām 'üm hā' xip'ax nōm häpxop? Mō'āgmū'ax 'üm? 'Ämnīy 'üm? Putep putuk putup häpxop xohix, 'ihā putpu' nūn putup Yeyox? Hām 'üm hā'? 'Äte' yūmmūg'ah, hu' kax'ämip-tup'ah.

² Yūmūg xuxyā Yeyox yōg häptup xupep putup, ha Yeyox te putpu' nūn putup, yā xupxet'ax xupep putuk, 'ihā tikmū'ün te nōm hip 'ohnāg. 'Äxop te' yūmmūg.

³ Tikmū'ün te hām'äktux putup, hu: "Yāmyīptuk nūnte. 'A' hām xūy 'üm pip'ah. Yā' max häpxop xohix." *Kaxīy.* Pa häpxip 'ohnāg 'ihā hām xūy pip mō'ka'ok, tu xohix koxyo, yā 'ün tek-tok put xūy putuk, yā' xupep mō'ka'ok. 'Ap nūpap-tup'ah tikmū'ün.

⁴ Pa 'äkuxa kopa häpkoxtap 'ohnāg, hu Yeyox yōg häptup hip, yā Yeyox te putpu' nūn hip, yā 'ap xupxet'ax xupep'ax putuk'ah xa'.

⁵ Äxop xohix yā kuyānām yōg tikmū'ün, yā häptup yōg yā 'äkuxa tup. Yūmūg mūn 'a 'ämniy yōg'ah, 'a häpkoxtap yōg'ah, pa hämyūmmūg.

⁶ Äpu mō yūmū yōn hok, yā 'ap nōy putuk'ah. Äpu yūmū pa ka'ok, nūy hämpēnā', nūy Yeyox hip.

⁷ Ämnīy 'ihā mō'yōn pax tikmū'ün, yā 'ämniy 'ihā paptux xop paptux. Yā' kuxa mām 'ohnāg xop te kaxīy.

⁸ Pa 'äxop yā häptup yōg. Pu yūmūg pa ka'ok, nūy hämpēnā', nūy Yeyox hip. Äpu yūmū mō'tat kuxa mām ka'ok'ax xix putup pax'ax. Yā nōm te xonat yōg pipkup hā kep xax putuk. 'A häpxop kummuk te mō'nāp-tup'ah. Äpu yūmū mō'tat kama Topa yōg häpxop max hip'ax. Hamūn, Topa te tikmū'ün kuxa kummuk xit, nūy kuxa max mō'tat, 'üyānān tu'. Ta nōm te xonat xop yōg pipkup hā kuxxax putuk. 'A häpxop kummuk te mō'nāp-tup'ah. Äpu mō'tat.

⁹ Topa te yāy ha yūmūg xānāhā', nūy yūmū'ā tu' gāy hok, pa yūmūg xuxyā Yeyox Kunnix hā yūmūg kuxa kummuk xit, nūy kuxa max mō'tat, 'üyānān tu'.

¹⁰ Yeyox te yūmūg pupi' xok, 'ūyīy nū mütik 'āti', pe yūmūg pip 'ihā putpu' nūn

Kunnix, pe yūmūg xakix, 'Īhā putpu' nūn Kunnix.

¹¹ 'Āpu yāy mūtik hām'āktux, pu yīpkutuk tu nōg. 'Āpu tikmū'ūn kuxa hittupmā'. Yā xate nōm mīy nōmhā. 'āpu 'āhup hok.

'Āpu hāpxopmā te kaxīy

¹² 'Ūkxape xop, 'ūgmū'āte xa' xak, 'āpu hām'ax xupax, nōm te hāpxopmā max 'āxop kopah. Yā Topa te nōm yīmōgātux, puyīy 'āxop mōgā', puyīy 'āxop pu hāmyūmmūgā'.

¹³ 'Āpu nōm hām'ax xupax xexka'. 'Āpu nōm putup pax, tute hāpxopmā max hah. 'Āpu yāy kix hok.

¹⁴ 'Ūkxape xop, 'ūgmū'āte xa' xak. 'Āpu tuknōgnāg xop pu hām'āktux, pu tu hām. 'Āpu 'ūyīpkutuk xop kuxa hittupmā'. 'Āpu pu'uk xop hā 'ātehet. 'Āpu 'ūyōg hāpxopmā max hip punethok.

¹⁵ 'Āpu hāpkummuk mīy'ax hā yānān hok. Pa 'āpu tikmū'ūn pu hāpxopmā max 'āxop. 'Āpu hāpxopmā max mōkuma mōg tikmū'ūn xohix pu'. 'Āpu yāy pu hāpxopmā max 'āxop.

¹⁶ 'Āpu yā māyōn mōg tox hā 'ākuxa hittup pax xix 'āmny tox hā 'ākuxa hittup pax.

¹⁷ 'Āpu Topa pu hām'āktux mōkuma mōg.

¹⁸ 'Āpu hāpxop xohix 'āyīmap 'āktux Topa pu', hu: "Puxi'. 'Āmax xohix pu'. 'Āmax." Kaxīy. Hamūn, Topa tep-tup nōm hāpxopmā'ax 'Īhā 'āxop mōg Yeyox Kunnix mūtik.

¹⁹ Yā Topa Koxuk yōg hāpxopmā'ax kuxyā hok.

²⁰ Hāmpē'āpaxeh hok: "Yā' kummuk, Topa pupi hām'āktux xop te hām'āktux," kaxīy. Yā' max 'ūyōg hām'āktux.

²¹ Pa 'āpu hāpxopmā'ax xohix kopit. 'Āpu hāpxop max putyōn hok, xix hāpxopmā'ax max putyōn hok.

²² 'Āpu hāpxop kummuk mīy'ax xohix kux.

²³ Topa te yūmū'ā' hōm hāmyīptuk'ax. 'Ātep-tup, pu Topa yāy pu 'āxop xohix pop, yā 'ūyōg xop xe'ēgnāg 'āxop. 'Ātep-tup, pu Topa 'āxop pēnā max, yā 'ākoxuk pēnā', xix 'ākuxa, xix 'āyīn, xayīy 'ōg hāpkummuk mīy'ax pip putup'ah, 'Īhā' putpu' nūn putup yūmūg xuxyā Yeyox Kunnix.

²⁴ Hamūn, Topa tep-tup nōm hāpxopmā'ax. Tute 'āxop xānāhā', tu 'āxop tu' xip ka'ok. Topa tep-tup.

²⁵ 'Ūkxape xop, 'āpu Topa pu 'ūgmūn 'āktux.

²⁶ 'Āpu taknōy xohix pu hām'āktux, hu: "'Ūgmū'āte 'āxop xaxok 'ohnāg." Kaxīy. 'Āpu xape xop yāy kep hā mūy, yā taknōy max putuk.

²⁷ 'Āte xa' xak, ha yūmūg xuxyā Yeyox te' xupak, 'āpu nū tappet mōkupix taknōy xohix pu', xix tukūm xohix pu', yā Kunnix kopa kuxa mām xop pu'.

²⁸ Puyā yūmūg xuxya Yeyox Kunnix xa hāmmaxnā'.

Tu ta tu' kux.

PAOT TE KŌMĒN TEXANŌN YŌG TIKMŪ'ŪN PU TAPPET KAX'ĀMI II

¹ Ūgmŭn Paot. 'Āte' kax'āmi nŭhŭ' tappet, 'āxop pu' kax'āmi', yā Kunnix kopa kuxa mām xop pu' kŏmĕn Texanŏn tu', yā yŭmŭg 'Ātak Topa yŏg xop pu', xix yŭmŭg xuxyā Yeyox Kunnix yŏg xop pu'. Xinax te 'āxop pe'paxex xix Tŭmŏn te kamah.

² Pu yā Topa xix yŭmŭg xuxyā Yeyox xa hāmmaxnā', xayīy 'ākuxa mām.

Yeyox nŭn putup, ha Topa te xohix yŏg hāpxopmā'ax kopit putup

³ Ākuxa mām nŏy nā 'āmŏg xexka', tu 'āxop te' xohix putup pax nŏy nā 'āmŏg, yīy ta' max, 'ūyīy' ūgmŭ' āxop 'āktux punethok Topa pu, hu: "Yā' max. Puxi'. 'Āmax 'ūkxape xop pu'." Kaxīy.

⁴ Ūgmŭ'āte 'āxop 'āktux max Kunnix kopa kuxa mām xop xohix pu'. Hamŭn, 'ākuxa mām ka'ok'ax xexka', 'Īhā tikmŭ'ŭn te 'āxop kummugāhā', ha xate kummuk xohix hā tot.

⁵ Tikmŭ'ŭn te 'āxop kummugāhā', yīy ta Topa te tikmŭ'ŭn yŏg hāpxopmā'ax kopit putup, nŭy tu' kummugā 'ūyānān tu'. Yā' kopit'ax yok, 'ap kohe'ah. 'Ūxohix te 'āxūy pĕnāhā', hu' yŭmmŭg, Topa te tikmŭ'ŭn yŏg hāpxopmā'ax kopit putup. Yā' yok. 'Āxop te 'āxūy hā tot, yā' kummuk hā tot, ha Topa te' yŭmmŭg. 'Āmax, yā Topa Xexka yŏg tikmŭ'ŭn xop pu' āmax. Hamŭn, 'āxūy, Topa Xexka yŏg tikmŭ'ŭn xop pu' āxūy.

⁶ Topa te tikmŭ'ŭn yŏg hāpxopmā'ax kopit putup. Yā' yok, yā' xe'e'. Tute kummugā yānān putup, yā nŏm te 'ākummugā hā yānān putup,

⁷ 'Īhā yŭmŭg xuxyā Yeyox te pexkox tu' nŭn pexkox yŏg nŭ'pok xop mŭtik, yā kuxap kopa' nŭn putup, tu 'āxūy nŏāp-tup.

⁸ Tu kummugā hā yānān putup Topa yŭmmŭg 'ohnāg xop pu', xix 'ūyīpkox 'ohnāg xop pu'. Yā nŏm te yŭmŭg xuxyā Yeyox yŏg hām'āpak max'ax 'āpak 'ohnāg.

⁹ Nŏm xop xīy putup mŏkuma' mŏg, hāmāxatamuk xohix kux 'ohnāg hā, tu Topa mŭtik pip putup'ah, xix yŭmŭg xuxyā Yeyox mŭtik pip putup'ah. Nŏm te yŭmŭg xuxyā Yeyox max xe'ēgnāg pĕnāp-tup'ah, xix yŭmŭg xuxyā Yeyox yŏg ka'ok'ax yŭmmŭg putup'ah,

¹⁰ 'Īhā nŏm hāptup mŏ'nāp-tup, 'Īhā putpu' nŭn yŭmŭg xuxyā Yeyox, puyīy Kunnix kopa kuxa mām xop te Yeyox 'āktux max, tu Yeyox pe'paxex max, yā' kuxa mām ka'ok xop xohix xexka te kaxīy. 'Āxop kama nŭ mŭtik pip putup. Hamŭn, 'ākuxa mām ka'ok Topa yŏg

hām'āpak max'ax kopah, 'ūgmŭ'āte xa nŏm 'āktux.

¹¹ Ūgmŭ'āte 'āxop 'āktux punethok Topa pu, xayīy 'āxop 'āmax xe'e Topa pu'. Yā Topa te 'āxop yŭmŏgatux, xayīy 'āmax xe'e'. Ūgmŭ'āte 'āxop 'āktux Topa pu, xayīy 'āxop hāpxopmā max xohix putup, 'āxop te nŏm putup. Topa ka'ok te 'āxop hā tute'ax. Ūgmŭ'āte 'āxop 'āktux Topa pu, xayīy 'āhām xohix kux, yā 'ākuxa mām, hu 'āhām ka'ok.

¹² Hā kaxīy yŭmŭg xuxyā Yeyox 'ūmax xe'e nŏy nā' mŏg putup 'ākuxa kopah, ha ta 'āxop max nŏy nā 'āmŏg putup Yeyox mŭtik, ha tikmŭ'ŭn te' pĕnāp-tup, tu Topa 'āktux maxp-tup. 'Ūmax Topa xix yŭmŭg xuxyā Yeyox Kunnix, tu xa hok hāpxopmāhā'.

2

Tik kummuk xexka'

¹ 'Āte yŭmŭg xuxyā Yeyox Kunnix te putpu' nŭn'ax kax'āmi xix yāy tu nŭ yŭmŭg nā'ax Kunnix mŭtik kax'āmi'.

² Tik 'ŭm te' koit, hu: "Yā' xip yŭmŭg xuxyā Kunnix yŏg hāptup. Yā putpu' nŭn Kunnix tu nŭktu' xip." Kaxīy. 'Āpu 'ūyŏg hām'aktux pa hok. 'Ākuxanŏg hok. Tep te' nŏm 'āktux, pe Topa pupi hām'āktux xop, pe' nŏy te Topa yŏg hām'āpak max'ax 'āktux, pe' nŏy te hām'āktux, 'āte nŏm kax'āmi'. 'Āmhok. 'Ūyŏg hām'āktux pa hok. Yŭmŭg xuxyā Kunnix yŏg hāptup xip'ah, pa' nŭn putup, xix Yeyox xip'ah nŏmhā, pa' nŭn putup.

³ 'Āpu' koit'ax 'āpak hok. Yŭmŭg xuxyā Kunnix yŏg hāptup nŭn putup, yā Yeyox te putpu' nŭn putup, pa' xohix te Topap-tup nŏg hāmāxap putup, ha ta nŏm tik kummuk xexka xip putup hāmāxap, tu tikmŭ'ŭn pu yāy mŭg putup, yā Hāngāyāgnāg yŏg tihik.

⁴ Nŏm tik kummuk xexka te Topap-tup nŏg putup, xix Topa yŏg hāpxop xohix putup nŏg putup. Tute yāy xexka mīy putup, tu Topak-tŏgnāg 'āktux putup. Tu tā' mŏg putup, tu' yŭm putup Topa pet xexka kopah, tu hām'āktux putup, hu: "Ūgmŭn, yā Topah." Kaxīy.

⁵ Xate' yŭmmŭg nŏ'ŏm. Hŏmā 'ūgxip 'āxop kopah, tu nŏm 'āktux.

⁶ Hŏnhā hām te' tux hok, pu' mīy hok nŏm hāpxop kummuk. Xate' yŭmmŭg. Hāpxip 'Īhā nŏm tik kummuk xexka xip'ax.

⁷ Hamŭn, hŏnhā 'Īhā hāpxop kummuk mīy'ax xexka pip, tu' xaptop, pa hāpxip 'Īhā xut putup hām te' tux hok, ha' nŏm hāpxop kummuk mīy'ax pip putup. 'Ap xaptop putup'ah hāpxop kummuk mīy'ax.

⁸ Yā xip'ax nŏm tik kummuk xexka', pa yŭmŭg xuxyā Yeyox te putpu' nŭn putup, tup-tex putup, yā xitxut hāp-tex putup, yā Yeyox yŏg kuyānām hāp-tex putup.

⁹ Hamūn, Hāmġāyāgnāg te nōm tik kummuk xexka ka'ogāp-tup, puyīy hāpxopmā ka'ok xe'ēgnāg xohix. Tute' koit putup, ha tikmū'ūn te yōg mō'āmā'ax pap-tup. Yā tikmū'ūn kuxa mām tik kummuk yōg hāpxopmā'ax ka'ok xe'ēgnāg kopah.

¹⁰ Nōm tik kummuk xexka te Topa yūmmūg 'ohnāg xop pu' koit xohix xekkap-tup. Nōm te hāmyūmmūg xe'e yūmmūg 'ohnāg, tu hāmyūmmūg xe'ep-tup pax 'ohnāg, ha Topa te nōm mōy 'ohnāg hāpkummuk miy'ax kopah. Nōm te Topa pēnāp-tup'ah, pa yāy koxyōy putup.

¹¹ Yīy ta Topa te' xat putup, pu nōm kuxa mām ka'ok koit'ax kopah.

¹² Yīy ta Topa tep-tup nōg putup nōm kuxa mām 'ohnāg hāmyūmmūg xe'e kopah. Yā nōm tep-tup pax koit'ax.

Topa te 'āxop yīmōgātux

¹³ Ūmax, 'ūgmū'āte 'āxop 'āktux punethok Topa pu', hu: "Āmax tikmū'ūn pu'. Puxi'. 'Āmax." Kaxīy. Hamūn, 'ūkxape xop, Topa te 'āxop putup pax. Topa te 'āxop yīmōgatux tikmū'ūn xohix kopah. 'A hōmā' xip'ah hām xexka', 'Thā Topa te 'āxop yīmōgatux, nūy 'āxop kuxa kummuk xit, nūy kuxa max mō'tat, 'ūyānān tu'. Yā Topa Koxuk ka'ok hā 'āxop kuxa kummuk xit, xayīy 'āxop yāyhā Topa yōg tikmū'ūn, tu 'ākuxa mām hām'āktux xe'e kopah.

¹⁴ Hōmāg mū'āte xa Topa yōg hām'āpak max'ax 'āktux, ha Topa te nōm hā 'āxānāhā', xayīy pēnā hāpxop xe'ēgnāg xohix yūmmūg xuxyā Yeyox Kunnix mūtik.

¹⁵ 'Ūkxape xop, 'āpu Topa tu nox pi'. 'Āpu hāmyūmmūg max tu nox pi'. Yāg mū'āte xa' yūmmūgāhā nō'ōm. 'Ūgmū'āte xa hām'āktux nō'ōm, tu xa' kax'āmi nō'ōm kamah.

¹⁶ Yūmmūg xuxyā Yeyox Kunnix te yūmmūg putup pax xix yūmmūg 'Ātak Topa te', tuk mū'ā hok hāpxopmāhā, tu yūmmūg kuxa hit-tupmāhā mōkuma' mōg ha' kux 'ohnāg tu hāpxop max hipmāhā'.

¹⁷ 'Ūgmū'ātep-tup, puyīy yūmmūg xuxyā Yeyox Kunnix 'ākuxa hittupmā' xix yūmmūg 'Ātak 'ākuxa hittupmā', nūy 'āxop ka'ogā', xayīy hāpxopmā max, xayīy hām'āktux max.

3

'Āpu Topa puk mūg 'āktux

¹ 'Ūkxape xop, 'āpu Topa puk mūg 'āktux, 'ūyīy 'ūgmūg yūmmūg xuxyā Yeyox yōg hām'āpak max'ax 'āktux hāpxexka xohix tu' mō'ka'ok, puyīy xohix nōm 'āpax, puyīy xohix putup pax xexka Yeyox yōg hām'āpak max'ax, yā 'āxop putuk kōmēn Texanōn tu'. Xate nōm 'āpak, tup-tup pax.

² 'Āpu Topa puk mūg 'āktux, puyīy Topa 'ūgmū'ā hā tu tehet, 'Thā tikmū'ūn kummuk tek mūg kute'ex kummuk. Hamūn,

tikmū'ūn xohix xexka'ah te Topa yōg hām'āpak max'ax 'āpak. Yā' yīpkox 'ohnāg.

³ Pa Topa te yāy yōg xop tu' xip ka'ok. Tute' āxop ka'ogāp-tup, tu 'āxop hā tu tep-tup, puyīy Hāmġāyāgnāg 'āxop kute'ex hok.

⁴ Yūmmūg xuxyā Yeyox tek mūg kuxa māmāhā 'āxop kopah, yā 'āxop te' mīy nō'ōm. 'Ūgmū'āte xa hām'āktux, tu' mīy putup. 'Ūgmū'āte' yūmmūg xe'e'.

⁵ 'Ūgmū'ātep-tup, pu yūmmūg xuxyā Yeyox 'āxop mōgā', xayīy 'āxop Topap-tup pax, xayīy 'āxop nox pi' Topa yōg putat max kopah, yā Yeyox putuk.

Tikmū'ūn hām 'ohnāg, puxi' xit hok

⁶ Yūmmūg xuxyā Yeyox Kunnix tek xat, tuk mūg xex Yeyox xip'ax kopah, yīk mū'āte 'āxop xat, xayīy 'āxop taknōy tuknōgnāg xop tu nox pi' hok, nōm hām 'ohnāg xop, nōm tek mū yōg xat'ax 'āpak 'ohnāg.

⁷ Ūmax, xayīy 'āxop hāpxopmā', 'ūgmūg putuk. Hōmāg mūg pip 'āxop kopah, 'Thāg mūg tuknōg 'ohnāg.

⁸ 'Ūgmū'āte hok pop'ah tikmū'ūn yōg hāpxop, pa hāpxop xohix hā pago. Tuk mū'āte hāpxopmā max mōkumak mōg. Hāptup 'Thāg mūg hām pax xix 'āmnīy 'Thā, xayīy 'āxop pago 'ohnāg.

⁹ Ūmax, pu Kunnix kopa kuxa mām xop yōg xexka xop 'og hāpxop pop, pak mū'āte 'og hāpxop xak 'ohnāg, tu' pop 'ohnāg, xayīy 'āxop 'ūgmūg pēnā', nūy kama' mīy 'ūgmūg putuk.

¹⁰ Hōmāg mūg tihī 'āxop kopah, tuk mū'āte hām'āktux, hu: "Tikmū'ūn hām 'ohnāg, puxix xit hok, pu' max." Kaxīy.

¹¹ 'Ūgmū'āte kax'āmi nūhū', 'ūgmū'āte' xupak tu', yā tikmū'ūn tuknōgnāg pax pip 'ōnte, yā hāpxumāhīyā pax.

¹² Yūmmūg xuxyā Yeyox Kunnix te' xat, tuk mūg xex Yeyox xip'ax kopah, yīg mū'āte 'āxop xat, xayīy 'āxop tuknōgnāg pax xop pu hām'āktux: "Āmax'ah. 'Āpu 'āxumāhīy hok, nūy hām hā' pop yāy yōg hāpxop." Kaxīy.

¹³ 'Ūkxape xop, 'āpu 'ākuxa tuknōg hok, 'Thā hāpxopmā max.

¹⁴ Pa' pip 'ōnte, nōm te nū' tappet putup nōg putup, tu nōm 'āpak putup'ah. 'Āpu tik te kaxīy tu 'āti hok, puyīy yāy yōg hāpkummuk mīy'ax hā yāyhāhup.

¹⁵ Pa 'āpu nōm tik pu' mīy hāpxop, 'ap puknōg putuk'ah, pa yā 'ātaknōy putuk.

Pu yā Yeyox 'āxop tu xihip ka'ok

¹⁶ 'Ūgmū'ātep-tup, yūmmūg xuxyā Yeyox 'ākuxa māmāhā', 'Thā 'ākuxa mām Yeyox kopah, nūy 'ākuxa mām ka'ok mōkuma' mōg, 'Thā 'āxop te hāpxopmā xohix. Pu yā yūmmūg xuxyā Yeyox 'āxop tu xihip ka'ok.

¹⁷ 'Āte' kax'āmi nūhū, hu: "'Ūgmūn Paot te 'āxop pu kax'āmi', hu 'āte' 'āxop pe'paxex."

Kaxīy. 'Āte yāy yōg 'āxet'ax kax'āmi hā kaxīy.
Yā yōg tappet xohix te kaxīy.

¹⁸ Pu yā yūmūg xuxyā Yeyox Kunnix 'āxop
xohix pu hāmmaxnā punethok.

Tu ta tu' kux.

PAOT TE TĪMŌN PU TAPPET KAX'ĀMI I

¹ 'Ūgmūn Paot. 'Āte xa' kax'āmi nūhū tapet. Topa te mōgkutnāhā xix Yeyox Kunnix te', tu Yeyox Kunnix yōg mō'pok xop kopak xix. Topa te yūmūg kuxa kummuk xit, nūy kuxa max mō'tat, 'ūyānān tu'. Yūmū'āte max hip, yā Yeyox Kunnix hip.

² 'Āte xa' kax'āmi', yā Tīmōn pu', yā 'āmūn yā 'ūgkutok pit putuk, yā Topa yōg putat max kopah yūmūg mōg. 'Ātep-tup, puyīy Topa xix yūmūg xuxyā Yeyox Kunnix xa hāpxopmā max, nūy 'ākuxa ka', xayīy 'ākuxa hāp.

Tik te hāpkummuk yūmmūgāhā'

³ Hōmā yūmūg mōg hāpxexka Māxenōn tu', tu 'āte 'āxak, xayīy hāpxopmā'. Ha ta hōnhā 'āte xe 'āxak nō'ōm. 'Āpu nox xihip kōmēn 'Ep tu'. 'Ōnte' pip nōm te hāpkummuk yūmmūgāhā'. 'Āpu' xat, pu hāpkummuk yūmmūgā kux,

⁴ nūy hām'āktux hitop hā mō'āmā kux, nūy mōnāyop hittap 'āxet'ax xohix xexka kax'āmi hok. Nōm te hām'āktux hā kaxīy, tu' kax'āmi, puxix tikmū'ūn kuxa mām 'ohnāg. Pa Topa tep-tup, pu tikmū'ūn kuxa mām ka'ok nōynā' mōg Topa yōg putat max kopah.

⁵ Putep mūn putup Topa xix-mūn? Yā' kuxa tup te tikmū'ūn putup pax, tu' kuxa max te tikmū'ūn putup pax, tu' kuxa mām xe'e, nūy nōy putup pax.

⁶ Pa yāg xop te nō putat max xaxok, tu yāy xaxok hām'āktux hiŋop kopah.

⁷ Nōm tep-tup, nūy Mōyyex yōg xat'ax yūmmūgā', pa yāy yōg hām'āktux yūmmūg 'ohnāg, xix Mōyyex yōg xat'ax yūmmūg 'ohnāg, pa hām'āktux punethok.

⁸ Yūmū'āte' yūmmūg, yā' max Mōyyex yōg xat'ax, pa xat'ax yūmmūgā kummuk, tu xat'ax mīy kummuk, yā' kummuk.

⁹ Hamūn, tikmū'ūn te hāpkummuk mīy, yīy ta Topa te hāpkummuk mīy xop pu yāy yōg xat'ax popmāhā'. Hāpkummuk mīy xop te 'ūxat'ax mīy 'ohnāg, tu 'īpkox pip 'ohnāg, tu Topap-tup nōg pax, tu hāpkummuk mīy xohix pax, tu' kuxa kummuk te Topa yūmmūg 'ohnāg, tu yāy tak kix pax, tu yāy tut kix pax, tu tikmū'ūn xohix kix pax.

¹⁰ Tu' nōy hā' xupxet pax, tu pit tix yāy mūtik nōm kummuk xix hex tix, tu' xupxet pax, tu' koit pax, tu hām'āktux xex koxyōy pax, tu hāpxop nōy kummuk xohix mīy, tu hāmyūmmūg xe'e' āktux kummuk.

¹¹ Yā hāmyūmmūg xe'e', yā Topa yōg hām'āpak max. Topa 'ūmax xe'ēgnāg, tu 'ā' hāmyūmmūg hōm, 'ūyīy hām'āktux.

Topa max te yūmūg kuxa ka'

¹² Yeyox Kunnix yā yūmūg xuxyā, tuk ka'ogāhā', 'ūyīy Topa pu hāpxopmā max. Yeyox kuxa yūm 'ūgkopah, hu mōgkutnāhā, 'ūyīy Topa pu hāpxopmā max, yā 'āte Yeyox pu hām'āktux, hu: "Āmax." Kaxīy.

¹³ Pa hōmā 'āte Yeyox 'āktux kummuk, tu Kunnix kopa kuxa mām xop kute'ex kummuk, yā Yeyox kute'ex kummuk, tu Yeyox tuk gāy. Pa Topa tek pēnāhā', tuk kuxa ka', 'ūgkuxa yūm 'ohnāg tu', yā 'āte yāy yōg hāpxopmā'ax yūmmūg 'ohnāg.

¹⁴ Tu yūmūg xuxyā Yeyox te 'ā hāpxopmā max, tu 'ā' popmāhā mō'yāy xe'ēgnāg'ax xix kuxa yūm'ax. Nōm hāpxop xohix popmāhā, hak kuxa yūm Yeyox Kunnix kopah.

¹⁵ Ta nū hām'āktux xe'e', ha tikmū'ūn te hām'āktux paha', tu' kuxa mām hām'āktux kopah. Hām'āktux te kaxīy: Yeyox Kunnix te hām xexka tu' nūn tu nūktu' xupep, nūy kummuk xop kuxa kummuk xit, nūy nō' nōy yānān, tu' kuxa max tat, ha tak mūn kummuk xexka nām. Kaxīy.

¹⁶ 'Ūgmūn kummuk xexka nām, ha Yeyox Kunnix te yōg kummuk mīy'ax hā' tot mōkuma', pu tikmū'ūn pēnā', nūy hāmyūmmūg. Yā nōm te' kuxa mām putup Yeyox Kunnix kopah, yā nōm hi xe'ēgnāg mōkuma'mōg, ha' kux 'ohnāg, yā nōm te hāmyūmmūg putup. Hā kaxīy Topa tek pēnāhā', tuk kuxa ka'.

¹⁷ 'Ūmax Topah, tu' xexka'. 'Ūyōg hāmyāxatamuk xohix xexkah. 'Ūyōg hāmyāxatamuk māxap 'ohnāg, 'ap nā'ah. Nōm te māxap tu' xip Topah. 'Ap tut xip'ah, xix' yōg hāmyāxatamuk nōg putup'ah, yā' xok putup'ah. Topa yāy xat 'ohnāg. Topap-xet, yā' nōy xip'ah, ha' nōy te nōm putuk'ah. 'Āpu Topa xexka mīy nōynā mōg, xix 'ākuxa kopa Topa xexka mīy nōynā mōg hāmyāxatamuk kux 'ohnāg mōkuma'. Hamūn.

¹⁸ Tīmōn xōnnē', hōmā Topa pupi hām'āktux xop te 'āmūn' āktux, yīy ta 'āte 'āxat hā kaxīy kamah. 'Āpu Topa pupi hām'āktux xop yōg hām'āktux xaxok hok. Hā kaxīy xate' xut putup, tu Topa pu hāpxopmā max putup.

¹⁹ 'Āpu 'ākuxa yūm mōkuma', nūy 'ākuxa max. Tikmū'ūn 'ūm yīpkox 'ohnāg, tu mōktu yāy yōg kuxa mām'ax koxyōy.

²⁰ Ha yā kaxīy mīy 'Imēnem xix 'Anexān, ha 'āte Hāmgāyāgnāg pu nōm popmāhā', pu nōm pu hāmyūmmūgā', puyīy Topa 'āktux kummuk hok.

2

Topa pu hām'āktux

¹ 'Āte xa hām'āktux putup. 'Āpu nū hāpxop mīy hāmāxap. 'Āpu Topa pu hām'āktux, nūy tikmū'ūn xohix pu hāpxop xax, nūy hāpxop pop tikmū'ūn xohix pu'. 'Āpu Topa pu hām'āktux, hu: "Tikmū'ūn xohix pu 'āmax.

Xate tikmū'ūn xohix pu hāpɔpɔp popmāhā'.
Puxi'. 'Āmax.' Kaxīy.

² 'Āpu Topa pu tikmū'ūn 'āktux hā kaxīy, xix Topa pu xat'ax xohix xop 'āktux, xix Topa pu xexkanāg xohix xop 'āktux, puyīy tikmū'ūn kuxa mām, puyīy tikmū'ūn yāy kix hok, puyīy 'ūyōg hāpɔpɔmā'ax te Topa yōg putuk, nūy hāpɔpɔp max mīy.

³ 'Ūmax, Topa pu tikmū'ūn 'āktux, ha Topa tep-tup pax. Tute yūmūg kuxa kummuk xit, nūy nō' nōy yānān, tu yūmūg kuxa max mō'tat.

⁴ Topa tep-tup, nūy tikmū'ūn xohix xexka kuxa kummuk xit, nūy nōy yānān, tu' kuxa max mō'tat, nūy hāpɔpɔp'e yūmmūg.

⁵ 'Ūxip Topap-xet. Ha Topa te tikmū'ūn mūtik yāy nīm. Ha ta' nōy puxet xip, yā Yeyox Kunnix, yā thihk, tu nōm te' nōy ta' yāy tu' mōxa ha' mām.

⁶ Yeyox te' yāy mūn hōm, tu' xok, nūy Topa pu tikmū'ūn xohix popmā', ha mōktu xohix te' yūmmūg, Topa tep-tup, nūy kuxa kummuk xit, nūy nōy yānān, tu' kuxa max mō'tat.

⁷ Ha Topa te Yeyox yōg mō'pok xop kopak xix, tu mōgkutnāhā', 'ūyiy Yoneo kūnāpa pip xop pu hāmyūmmūgā', nūy kuxa mām 'āktux, xix hāpɔpɔp'e 'āktux. 'Āte' koit'ah, yā hāpɔpɔp'e 'āktux.

⁸ 'Ātep-tup, pu hām xexka yōg tik max xohix te Topa pu hām'āktux, nūy pepi' yīm tigā, nūy gāy hok, nūy yāy mānōg hok.

⁹ 'Ātep-tup kamah, puyīy 'ūn hāmp'e'paxex max, nūy yāy pu topixxax max pop, yā' xax yā tikmū'ūn max tep-tup. Yāy xax mō'tat, pa' xax max xe'ēgnāg pe'paxex hok, pu tu tikmū'ūn xax max xe'ēgnāg pe'paxex hok. 'Ūmax, pu 'ūn yāy xe pahix xexka hok. 'Ūmax, pu 'ūn pipkup yānām xop xohix ta hok, xix xap max xohix ta hok, xix xax te takat xexka tat hok.

¹⁰ Pa' max, pu' kuxa max mō'tat, nūy hāpɔpɔpɔmā max, yā Topa kopa kuxa mām xop yōg 'ūn max putuk.

¹¹ 'Ūmax, pu 'ūn hāmyūmmūg nōynā' mōg, pa hām'āktux kutōgnāg, xix yāy kutōgnāg pe'paxex.

¹² 'Āte' xat'ah, pu 'ūn tik pu hāmyūmmūgā', pu 'ūn tik xat, yā' max'ah. 'Ūmax, pu 'ūn hām'āktux kutōgnāg.

¹³ Hamūn, Topa te 'Anāo mīy hāmāxap, tuk-nāy tu 'Ema mīy.

¹⁴ 'Anāo te koit kopa kuxa yūm 'ohnāg, pa 'Ema te koit kopa kuxa yūm, tu Topa yōg xat'ax koxyōy.

¹⁵ 'Ūmax, pu 'ūn kuxa mām ka'ok mōkuma', xix' nōy mō'yāy xe'ēgnāg mōkuma', xix hāmyok mīy mōkuma', xix yāy kutōgnāg pe'paxex, xik-tok pop. Topa te nōm hāpɔpɔpɔmā'ax kopa xupepɔmāp-tup.

3

Kunnix kopa kuxa mām xop yōg pēnā'ax xexka'

¹ Hām'āktux xe'e nūhū', tik 'ūm tep-tup, nūy yāyhā Kunnix kopa kuxa mām xop yōg pēnā'ax xexka', yā' max, yā hāpɔpɔpɔmā max.

² 'Ūmax, pu Kunnix kopa kuxa mām xop yōg pēnā'ax xexka xohix hā kaxīy, yā hāpɔpɔpɔmā mīy 'ohnāg, tu' xetut puxet, tu' gāy 'ohnāg, tup-tox max, ha tikmū'ūn te nōm pe'paxex max. Nōm te puknōg xop pu hāpɔpɔpɔmā pax, tu tikmū'ūn pu hāmyūmmūgā max,

³ tu' ap paptux'ah, tu yāy kix pax 'ohnāg, pa' pax yīmūg tāmnāg, tu tikmū'ūn mānōg 'ohnāg, tu tayūmak putup pax 'ohnāg,

⁴ tu' yāy kutok xat max, xix xetut xat max, hak-tok yīpɔx pip, tu' tak 'āpagnām.

⁵ Pa tik 'ūm tek-tok xat kummuk xix xetut xat kummuk. 'Ok nōm te Kunnix kopa kuxa mām xop pēnāp-tup max? 'Āmhok.

⁶ 'Ūmax, Kunnix kopa kuxa mām xop yōg pēnā'ax xexka te Topa yōg putat kopa' xip hāmyāxatamuk xohix hā, 'a' tup'ah Topa yōg putat kopah. 'Ūtup, tu yāyhā xexka', puxix yāy xexka pe'paxex putup, yā Hāmgyāgnāg putuk, tu Topa tep-tup nōg putup.

⁷ 'Ūmax, pu Kunnix kopa kuxa mām xop kūnāpa pip xop nōm tik 'āpagnām, puyīy Kunnix kopa kuxa mām xop nōm tik hāhup putup'ah, puyīy Hāmgyāgnāg nōm tik pa hok.

Kunnix kopa kuxa mām xop yōg nōm te hok xop pu hāpɔpɔpɔmāhā'

⁸ Ha ta' max kamah, pu hāpɔpɔpɔmā max Kunnix kopa kuxa mām xop yōg nōm te hok xop pu hāpɔpɔpɔmāhā', tup-tox max, tu 'ap te kexmuk xo'op xet'ah, tu xupkumīy 'ohnāg,

⁹ tu Topa yōg putat yōg hāmyūmmūg tu' pip ka'ok, tu' kuxa tup.

¹⁰ 'Ūmax, pu tikmū'ūn nōm tik yōg hāpɔpɔpɔmā'ax kopit hāmāxap. 'Ūmax, puxix hām putup Kunnix kopa kuxa mām xop pu',

¹¹ ha ta' max, pu' xetut kuxa max kamah, tu' nōy hā xūmāhīy 'ohnāg, tu' paptux 'ohnāg, tu' koit 'ohnāg.

¹² 'Ūmax pu' xetut puxet xip, tu' xat max 'ūxetut xik-tok, puyīy yīpɔx pip.

¹³ 'Ūhām max, puxix tikmū'ūn nōm 'āpak, ha nōm te Topa yōg putat yōg hāmyūmmūg 'āktux max putup, tu' mōg Topa yōg putat kopa Yeyox Kunnix mūtik.

Topa yōg hāmyūmmūg

¹⁴ Ta 'āte xa nū' tappet kax'āmi', tup-tup, nūy mōg hāpɔpɔpɔp kutōgnāg 'thā, nūy 'āxop pēnā'.

¹⁵ Kak xip ka'ok nūnte, puxix nū' tappet xa hāpɔpɔpɔmā'ax yūmmūgāp-tup Kunnix kopa

kuxa mām xop yōg hāpxopmā'ax. Topa hi xe'e, ha Kunnix kopa kuxa mām xop te hāpxe'e yūmmūg.

¹⁶ Hāmyūmmūg yok xe'ēgnāg yūmū yōg Topa yōg putat kopah, ha Topa te yūmūg pēnānā' xip hā kaxīy:

"Yeyox nūn, tu nūktu' nāhā' tu tikmū'ūn putuk, ha Topa Koxuk te yūmū'ā hāmyūmmūgāhā', Yeyox yā' xe'e', ha pexkox yōg nū'pok xop te' pēnāhā', ha tikmū'ūn te Yeyox yōg hām'āpak max 'āktux hāpxekka xohix tu', ha hāpxekka xohix tu xohix te Yeyox kopa' kuxa mām, ha ta Topa te Yeyox mōgāhā pexkox tu'."

Kaxīy.

4

Tik te tikmū'ūn pu hāpkohe yūmmūgāp-tup

¹ Topa Koxuk tek mū'ā' yūmmūgāhā hak mū'āte' xupak max. 'Ūyūmmūgāhā hā kaxīy: Hām xexka yōg hāmyāxatamuk xohix xox putox 'thā tikmū'ūn yāg te Topa yōg putat max kopa' mōg, tu' xak putup, nūy Hāmgāyāgnāg yōg xop te koit xupax, nūy yāmīy xop yōg hāxopmā'ax yūmmūg, nūy mīy.

² Ha nōm tik te nōm hāpxopmā'ax yūmmūg, tu' nōy pu nōm hāpxop yūmmūgāp-tup. Tik te' koit, tu' kuxa kummuk, tu tikmū'ūn pu hāpkohe yūmmūgāhā'.

³ Nōm tik kummuk te' yūmmūgāhā hā kaxīy: "Ūmax'ah yāyaha', yā yāyta hok, xix xit'ax yāg mā hok," Kaxīy. Pa Topa te' xit'ax mīy, pu tikmū'ūn mā'. Topa tep-tup, pu kuxa mām hāmyok yūmmūg xop te Topa pu hām'āktux hāmāxap, nūy Topa pu: "Yā 'āmax. 'Ūxit'ax max. Puxi'." Kaxīy. Tuk-nāy tu' māhā'.

⁴ Topa te hāpxop xohix mīy, ha hāpxop xohix yā' max. 'Āpu hāmpē'paxeh hok, yā hāpxop 'ūm kummuk. 'Āpu hāpxop xohix pop, nūy Topa pu hām'āktux, hu: "Āmax. Hāpxop max. Puxi'." Kaxīy.

⁵ Topa yōg hām'āktux xip, ha tikmū'ūn te Topa pu hām'āktux, puxix Topa pu hāpxop xohix 'ūmax.

Yeyox Kunnix yōg kāmānat max

⁶ 'Āpu Kunnix kopa kuxa mām xop pu' yūmmūgā nō'ōm. 'Ūyūmmūgā', nūy ta 'āmūn yā Yeyox Kunnix yōg kāmānat max. Pu yūmmūgā nūy Topa yōg hām'āktux 'ākokuk hā pa', yā 'ākokuk te Topa yōg hām'āktux māhā putuk, yā' xit'ax putuk. Topa yōg hām'āktux te' yūmmūgāhā 'ākuxa yūm xix hāpxopmā yok. 'Āmōg nōm putat max kopah.

⁷ 'Āpu nōm hām'āktux nōy pa hok, yā Topa yōg'ah, yā hām'āktux hitop. 'Āpu hāpxopmā', xayīy yāy koxuk ka'ogā', nūy Topa putuk.

⁸ Hāpxopmā', nūy yāy yīn ka'ogā', yā' max, pa hāpxopmā', nūy yāy koxuk maxnā', yā'

max xe'e'. Yā 'ākokuk xip nūnte, xix hām nōy tu' xip putup kamah, pa 'āyīn xok putup.

⁹ 'Āpu 'ūpa nū hām'āktux xe'e'. 'Āpu 'ākuxa yūm nū hām'āktux tu'.

¹⁰ Topa xip, tu tikmū'ūn xohix kuxa kummuk xit, nūy kuxa max mō'tat, 'ūyānān tu', tu' kuxa mām ka'ok xop kuxa kummuk xit punethok. Topa xip, yīy ta yūmū'āte hāmmax hip, hu yūmū'āte hāpxopmā max punethok, tu yūmū'āte hāpkummuk hāg tot.

¹¹ 'Āpu 'ūxat nūhū', nūy nōm yūmmūgā'.

¹² 'Āmūn tuktup, pa tux hok, pu tikmū'ūn hām'āktux hok, 'āxekka'ah. 'Āpu hāpxopmā max, ha' nōy te' pēnāhā', tu kama' mīy 'āmūn putuk, tu'ōg hām'āktux 'āpak, tu kama' hām'āktux 'āmūn putuk. 'Āpu tikmū'ūn putup pax, ha' nōy te tikmū'ūn putup pax putup kamah, tu 'ākuxa yūm pēnāhā', tu' kuxa mām kamah, tu'ōg hāpxopmā yok pēnāhā', tu kama' mīy.

¹³ 'Āpu hāpxopmā max punethok māyōn mōg tox hā, ha mōktu xa tuk xupep. 'Āpu Topa yōg tappet mō'kupix, puyīy tikmū'ūn xohix xexka' xupax. 'Āpu Topa 'āktux, nūy yūmmūgā'.

¹⁴ Ta hōmā Topa Koxuk te 'āka'ogāhā', xayīy Topa pu hāpxopmā' max, yā Topa pupi hām'āktux xop te hām'āktux, 'thā tik te Kunnix kopa kuxa mām xop pēnā max xop te 'āyīmūg yīm xex. 'Āpu nōm hāpxopmā mōkuma mōg.

¹⁵ 'Āpu nōm hāpxop xohix mīynām ha tikmū'ūn te'ōg hāpxopmā max nōynā' mōg pēnāp-tup.

¹⁶ 'Āpu 'ōg hāpxopmā'ax kopit, xix 'ōg hāmyūmmūg kopit. 'Āpu nōm hāpxopmā mōkuma 'āmōg. Nōm hāpxopmā mōkuma 'āmōg, nūy ta hāpkummuk mīy'ax hā yāy xatat, ha ta' nōm te' xupak xop hāpkummuk mīy'ax nīm putup.

5

Tīmōn xix Kunnix kopa kuxa mām xop

¹ 'Āpu tik kutut xop mānōg hok, pa nōm tu 'ākax, 'ūk-tok te' tak tu' kax putuk. 'Āpu tik tuktup xop tu'ākax 'ātaknōy putuk.

² 'Āpu 'ūn kutut xop mānōg hok, pa nōm tu 'ākax, 'ūk-tok te' tut tu' kax putuk. 'Āpu 'ūhex tuktup xop tu'ākax 'āhex putuk. 'Āpu hāpxopmā yok.

³ 'Āpu 'ūn hok mām xop hā 'ātehet nōm xuxyā xop ti'ohnāg.

⁴ Pa xuxyā xop 'āti 'ūn hok mām xop yōg, puxi' max, pu xuxyā xop hok mām xop pēnā'. Hā kaxīy kutok te yāy pix xīnnāhā 'ūtut pu', xi' tak pu'. Topa tep-tup.

⁵ Ha ta 'ūn hok mām xop pip, ha xuxyā ti 'ohnāg, nōm kuxa mām ka'ok Topa kopah, tu Topa yōg hāpxop max hip, tu Topa pu

hām'āktux mōkuma' mōg, tu Topa yōg hāpxop xohix xak 'āmnīy 'lhā xix hāptup 'lhā'.

⁶ Pa 'ūn hok mām xop nōy te hāpkute'ex pax. 'Ūxip, pa xakix xop putuk.

⁷ 'Āpu nū' xat, puyīy tu nōy mānōg hok yā yāy kix hok.

⁸ Xuxyā 'ūm te' xape pēnā 'ohnāg, puxix Topa yōg putat max xak. Yā' kuxa mām 'ohnāg xop 'ūkummuk, pa nōm kummuk xexka nām.

⁹ Ta hok yūm 'ūm hām putup Kunnix kopa kuxa mām xop pu'. Yā' max, pu yōg hāmīyāxatamuk 60 tuhomi' mōg, tu yāyap-xet, tu yīpxox nīm 'ohnāg,

¹⁰ tu hāpxopmā max, yā tikmū'ūn te' yūmmūg, tuk-tok hā' tep max, tu puknōg xop hā' tehe' yāy pet tu', tu Kunnix kopa kuxa mām xop pata pix, tu hāpkummuk pip xop hā' tehe'. Yā nōm hok yūm hām putup Kunnix kopa kuxa mām xop pu'.

¹¹ Pa tux hok, pu hok mām xop kutut 'ohnāg xop Kunnix kopa kuxa mām xop pu' hām hok. Hāpxip 'lhā yāyap-tup xūy, tu Kunnix nīm putup.

¹² Yā' kummuk Topa pu'. Yā Kunnix pu hām'āktux xex, pa' koxyōy.

¹³ Tu hāpkumep pax, tu' hām 'ohnāg yā tuknōgnāg, tu xūmāhīyāgā pax, tu' nōy xop yōg hāpxop kute'ex pax, tu hāpxop xaptop 'āktux.

¹⁴ Yā' max, pu nōm yāytax, nūy tuk-tok pop, nūy yīnmūn pēnā max, ha mōktu Kunnix kopa kuxa mām xop kūnāpa pip xop hām'āktux kummuk mīy hok.

¹⁵ Hamūn, hōmā 'ūn hok mām xop yāgnāg te Topa yōg putat max xak, nūy Hāmīyāyāgnāg pe mōg.

¹⁶ Ha ta 'ūn 'ūm xip, tu Topa kopa kuxa yūm ka'ok, tu' yōg yīnmūn xop kopa' xip hok yūm. 'Ūmax, pu nōm hok yūm hā tu tehet, 'ap Kunnix kopa kuxa mām xop te'ah. Yā Kunnix kopa kuxa mām xop te 'ūn hok mām xop hā tutep-tup, nōm xuxyā pip 'ohnāg.

¹⁷ Ta tik te Kunnix kopa kuxa mām xop pēnā max'ax xop kopa' pip, tu' hām max. Tute hāpxopmā max, tu' nōy mōgā max. 'Āpu nōm hā pago tix. Yā hamūn, nōm hām ka'ok, nūy nōy pu Topa 'āktux, nūy nōy pu hāmīyūmmūgā'. 'Āpu nōm hā pago max xe'e'.

¹⁸ Yā hamūn, Topa tappet te hām'āktux, hu: "Mūnūytut tak xexka yīkox mō'yīnnīn hok, nōm te mītkup hep māhā'." Kaxīy. Tu xe: "Āpu kāmānat max tu pago max." Kaxīy.

¹⁹ Nōm puxet 'ūm te nōm tik 'ūm 'āktux, hu: "Yā 'ōm te hāpkummuk mīy." Kaxīy. 'Āpu nōm 'āpax hok. Pa nōm tix pe tikoxyuk 'ūm te nōm tik 'ūm 'āktux, hu: "Yā 'ōm te hāpkummuk mīy." Kaxīy. 'Āpu nōm 'āpax.

²⁰ 'Āpu nōm te hāpkummuk mīy mānōg, puyīy tikmū'ūn xohix xupax, puyīy kuxānōg.

²¹ Topa te' xupak, xix Yeyox Kunnix te' xupak xix pexkox yōg nū'pok xop te' xupak. Yā Topa te nōm yīmōgātux pexkox yōg nū'pok xop. 'Āpu yōg hām'āktux 'āpax, nūy mīy. 'Āpu xohix yāy putuk, nūy yāy hā tu tehet.

²² Nāy, mōg pu'uk, nūy 'ūnōy putox yīmū 'āyīm xeh, nūy nōm ka'ogā', puyīy Topa pu hāpxopmā max. Ta 'āpu' nōy hā 'āte hok, puyīy hāpkummuk mīy hok. 'Āpu hāmīyok mīy.

²³ 'Āpakut 'āhīynāg. 'Āpu kōnāg xo'op, xix xupyāg kutōgnāg xo'op, nūy 'ātex hā 'ātehet.

²⁴ Xate tik yāg yōg hāpkummuk mīy'ax pēnā mō'ka'ok, ha tikmū'ūn te kama' pēnāhā', Topa te' kummuk hā' nōy yānān putup. Pa tik yāg nōy yōg hāpkummuk mīy'ax xaptop, pa hāpxip 'lhā' pēnāp-tup, hāpxip 'lhā' kummuk hā' nōy yānān putup.

²⁵ Hā kaxīy kama xate' nōy yōg hāpxopmā max pēnā mō'ka'ok, tu ta' nōy yōg hāpxopmā max pēnā-tōgnāg, pa hāpxip 'lhā' pēnāp-tup. 'Ap xaptop'ah.

6

¹ 'Āte xa hām'āktux nūhū: 'ūhok hām'ax xop, 'āpu 'āxuxyā 'āpax, puyīy tikmū'ūn Topa 'āktux kummuk hok, xix yūmū yōg hāmīyūmmūg 'āktux kummuk hok.

² 'Ūhok hām'ax 'ūm xix xuxyā te Kunnix kopa kuxa mām xop kopa' tihī'. 'Ūhok hām'ax, 'āpu 'āxuxyā 'āpax. 'Āpu hām'āktux hok hu: "Hamūn 'ūktaknōy putuk. 'Āte nōm 'āpak putup'ah." Kaxīy. 'Āpu nōm pu hām max, xayīy 'āxuxyā pu hāpxopmā max, yā' xip Kunnix kopa kuxa mām xop kopah. Yā nōm hok hām'ax tep-tup pax Kunnix kopa kuxa mām xop. 'Āpu tikmū'ūn pu nū hāpxop yūmmūgā'.

Ūptexop xexka'

³ Ta nōm 'ūm te tikmū'ūn pu hāpxopmā'ax nōy yūmmūgāhā', yā yūmūg xuxyā Yeyox Kunnix yōg hāpxopmā'ax putuk'ah, xix yūmū yōg putuk'ah.

⁴ Hamūn te yāy mūn xexka pe'paxex, pa hāmīyūmmūg 'ohnāg. Yā nōm te yāy mānōg putup xūy, tu hām'āktux hitop, tu yāy mānōg putup pax. Ha hāpxip 'lhā tikmū'ūn te' nōy yīpkumīy putup, tu tikmū'ūn xop tu mō'yāy pot putup, tu yāy mānōg putup, tu' nōy kopa kuxa mām putup'ah,

⁵ tup-tox kummuk xop te yāy mānōg putup, tu' kuxa kopa hāpxe'e 'ūm xip'ah, tup-tup, nūy yāyhā 'ūp-texop xexka nōynā' mōg Topa yōg putat kopah. Yā' hāmpe'paxex kummuk.

⁶ Hamūn, Topa te tikmū'ūn putexopmā xexka Topa yōg putat kopah. Texīy 'ūp-texop xexka? Yā nōm te hāmpe'paxex, hu: "Puxī'. 'Āte hāpxop nōy 'ūm putup'ah." Kaxīy. Hā kaxīy 'ūp-texop xexka'.

7 Hamūn, yūmūg xakux, ʾhā putep paxnūn hām xexka tu'? Yā hām 'ōhnāg. Ta yūmūg xakix putup, tu hām xexka nīm putup, ʾhā putep paxmōg'ax? Yā hām 'ōhnāg.

8 'Ūpip yūmū yōg xit'ax xix topixxax, puxi'.

9 Pa nōm 'ūm tep-tup, nūy tup-texop xexka', yā nōm te hāpkummuk mīy'ax yūmmūg putup. Nōm te hāpxop xohix hitop putup, xix hāpxop kummuk tu hāpxop kummuk mīy'ax hā yāy koxyōy putup, tu mōktu mō'pip, pamāg kopa mō'pip putuk.

10 Tayūmak putup xūy'ax te tikmū'ūn mōgāhā hāpkummuk mīy'ax xohix tu'. 'Ūyāg xop te Topa yōg putat max xak, nūy tayūmak pop, tu mōktu' kuxa hittup 'ohnāg.

ʾĀpu hā kaxīy mīy

11 Timōn, 'āmūn yā Topa yōg tihik. ʾĀpu nō kaxīy hok. ʾĀpu hāpxopmā yok, nūy Topa putuk, nūy 'ākuxa yūm, nūy nōy putup pax, nūy hāpxop xohix hā tot, nūy 'āgāy 'ohnāg.

12 'Āmōg Topa yōg putat max kopah, yā' kuxa mām'ax yōg putat kopah. ʾĀpu mō'ka'ok, nūy hi xe'ēgnāg mōkuma mōg ha' kux 'ohnāg. Hōmā Topa te 'āxānāhā', xa Topa yōg putat hā mōg, yīy xate tikmū'ūn xohix keppa 'ākuxa yūm'ax 'āktux,

13 tu Topa keppa nōm 'āktux kamah. Yā Topa te' yōnnā'ī hīnnāhā'. Xate Yeyox Kunnix keppa nōm 'āktux kamah. Yā hōmā Yeyox te Pōn Pinat keppa hām'āktux max kamah. ʾĀte 'āxat,

14 'āpu 'āyīpkox pi', nūy mīy mōkuma mōg, ha mōktu yūmūg xuxyā Yeyox Kunnix te putpu' nū'. Yā yūmūg xuxyā Yeyox Kunnix yōg hāptup xe'e ʾhā' nū'.

15 Nōm hāptup xe'e ʾhā Topa te Yeyox nū'kutnāp-tup. Topa 'ūmax, yā' xexkap-xet, 'ap nōy xip'ah, yā gohet yōg xat'ax xi' xuxyā xop yōg xuxyā'.

16 Topap-xet 'ap nā'ah. 'Ap tut xip'ah, 'ūtut te' put'ah. Hōmā xip'ah hāpxop xohix, pa Topa mūn xip. Topa xok putup'ah, tu' yōg hāmyāxatamuk xohix mō'kupix 'ohnāg. Yōnnā'ī xohix xexka hā kaxīy'ah. Kūyānām te Topa xakot, ha tikmū'ūn te Topa tu mōxap-tup'ah. Tikmū'ūn te Topa pēnā 'ohnāg, tu pēnāp-tup'ah. ʾĀpu, Topa te xexka nōynā' mōg 'ākuxa kopah. 'Ūyōg hāpxop xohix xexka ka'ok, yā Topa yōg hāmyāxatamuk xohix kux 'ohnāg hā. Hamūn.

17 ʾĀpu, 'ūp-texop xexka xop xat, pu yāy xexka pe tu paxeh hok, puyīy yōg hāpxop punethok kopa kuxa mām hok. Yā hāpxop punethok 'a' pip ka'ok'ah. ʾĀpu 'ūp-texop xexka xop xat, pu Topa kopa kuxa mām. Yā Topa mūn xip ka'ok. Yā Topa te yūmū'ā hāpxop xohix popmāhā' 'ūyīy yūmū kuxa tu hittup.

18 ʾĀpu 'ūp-texop xexka xop xat, pu hāpxopmā max, yā hāpxopmā max hā tahix,

nūy hok nīm pax, nūy popmā yāy yōg hāpxop.

19 Hā kaxīy nōm te yōg hāpxopmā max'ax xex putup pexkox kopa Topa yīka hāmyāxatamuk nōy pu', tu hāpxop nōy pop putup kamah, yā hi xe'ēgnāg mōkuma'mōg, ha' kux 'ohnāg.

20 Timōn, 'āte 'āxat punethok. ʾĀpu nōm hāpxopmā'. ʾĀpu hām'āktux hitop 'āpax hok xix hāmyūmmūg kummuk 'āpax hok. Yā tikmū'ūn te' xuxet'ax mīy, tu: "Hāmyūmmūg." Kaxīy. Pa yā' koit, yā hāmyūmmūg kummuk.

21 Ha tikmū'ūn yāg te nōm hāmyūmmūg kummuk xak, tu Topa yōg putat max xak. ʾĀtep-tup, pu Topa hāpxopmā'ax max 'āxop xohix pu'.

Tu ta tu' kux.

PAOT TE TĪMŌN PU TAPPET KAX'ĀMI II

¹ Ūgmūn Paot. 'Āte xa' kax'āmi nūhū' tap-pet. Topa te mōgkutnāhā 'ūgmūn, tu Yeyox Kunnix yōg mōpkok xop kopak xix. Yā Topa tep-tup. Tute mōgkutnāhā, 'ūyiy hi'ax kux 'ohnāg 'āktux, yā yūmū yōg hi'ax Yeyox Kunnix mūtik hi'ax kux 'ohnāg. Yā hōmā Topa te yūmū'ā hām'āktux xex, nūy yūmū'ā hi'ax kux 'ohnāg hōm, yā yūmūg hi xe'ēgnāg mōkumak mōg, ha' kux 'ohnāg.

² 'Āte xa' kax'āmi, yā Tīmōn pu'. 'Āmūn 'ūgkutok pit putuk Topa yōg putak kopah. Pu yā Topa xix yūmūg xuxyā Yeyox Kunnix xa hāmmaxnā', nūy 'ākuxa ka', xayīy 'ākuxa mām.

'Āpu nō hāpxop max pēnā max

³ 'Āte Topa pu hām'āktux, hu: "Āmax, puxi'. 'Ūmax hāpxop xohix." Kaxīy. 'Āte Topa pu hāpxopmā max, tuk kuxa max, yāg xape xop hittap putuk. 'Āte 'āxutigāhā, yā Topa pu hām'āktux 'āmnīy 'Ihā xix hāptup 'Ihā, yā Topa pu hām'āktux, hu: "Āmax. Puxi'." Kaxīy. Tu Topa pu 'āmūn 'āktux.

⁴ Hōmā 'āpotaha', ha 'āte 'āpota xutigāhā, tup-tup xexka', nūy yāy tu 'āmōxān, nūy 'ūgkuxa hittupmā'.

⁵ 'Ākuxa yūm ka'ok Topa kopah, ha 'āte 'ākuxa yūm ka'ok xe'e pekpaxex, yā 'āxukux Nox kuxa yūm ka'ok putuk, xix 'ātut 'Ēnnīy putuk. 'Āte' yūmmūg, 'ūkuxa mām, yā 'āmūn putuk.

⁶ 'Ākuxa yūm. 'Āpu hāpxopmā xe'ēgnāg. Hōmā Topa te 'āka'ogāhā', xayīy Topa pu hāpxopmā max, 'Ihā 'āte 'āyūmūg yāy yīm xex. 'Āpu hāpxopmā punethok nō'ōm.

⁷ Hamūn. Topa te yūmū'ā Topa Koxuk hōm. 'Ok Topa Koxuk te yūmūg pu'ugāhā xix yīpkutugāhā'? 'Āmhok. Topa Koxuk te yūmūg ka'ogāhā', 'ūyīy xohix putup pax, tu yūmū'āte yāy yōg hāpkummuk mīy'ax mō'nīy.

⁸ 'Āpu yūmūg xuxyā Yeyox Kunnix 'āktux, nūy Yeyox hā yāyhāhup hok xik-mūn hā yāyhāhup hok kamah, 'ūgmūn yā Topa yōg kāmānat. 'Āpu hāpkummuk hā tot, nūy tikmū'ūn pu Yeyox 'āktux, ha Topa te 'āka'ogāp-tup.

⁹ Topa te yūmūg kuxa kummuk xit, nūy kuxa max mō'tat, 'ūyānān tu', ha yūmū'āte yāyhā Topa yōg tikmū'ūn. 'Ok yūmū'āte hāpxopmā max, yīy Topa te yūmūg kuxa kummuk tupmāhā', puyīy kuxa tu' max? 'Āmhok. Pa Topa tep-tup, yā 'ūhok mīy putup, hu yūmūg kuxa kummuk xit. Hōmā' xip'ah hām xexka', 'Ihā Topa te yūmū'ā nō hāpxop hok hōm, yā yūmū'ā Yeyox Kunnix hok hōm, ha' pip hāpxop max yūmū yōg Yeyox mūtik.

¹⁰ Ha ta' nūn Yeyox Kunnix. Ha ta hōnhā' pip nōm hāpxop max yūmū yōg Yeyox mūtik. Yeyox Kunnix te yūmūg kuxa kummuk xit. Yeyox te kaxix'ax nōā', tu tikmū'ūn pu hām'āpak max 'āktux, yā tikmū'ūn pu hi'ax kux 'ohnāg hōm putup.

¹¹ Topa te mōgkutnāhā 'ūgmūn, 'ūyīy hām'āpak max 'āktux, 'ūyīy tikmū'ūn pu hāmūyūmmūgā'.

¹² 'Āte hām'āpak max 'āktux, yīy ta' nōy tek kutex kummuk, yīk xūy nūnteh. Pa yā 'āte yāyhāhup'ah. 'Āte Topa yūmmūg, tuk kuxa yūm Topa kopah. 'Āte Topa pu popmāhā hāpxop xohix, ha tute nō hāpxop pēnāp-tup nōm hāptup 'Ihā. Yā hāptup mō'nāp-tup, ha Topa te tikmū'ūn yōg hāpxopmā'ax kopit putup, 'ok pe max, 'ok pe kummuk. 'Āte' yūmmūg.

¹³ Hōmā 'āte xa' yūmmūgāhā hāpxopmā xohix xe'e'. 'Āpu, nō kopa 'ākuxa yūm mōkuma mōg. 'Āpu tikmū'ūn putup pax mōkuma mōg. Yā' pop nō hāpxop yūmū yōg Yeyox Kunnix mūtik.

¹⁴ Yā xa' popmāhā hāpxop max xohix. Topa Koxuk xip yūmūg kopah. 'Āpu nō hāpxop max pēnā', 'Ihā Topa Koxuk te xa hā tu tehe'.

¹⁵ Xate' yūmmūg, hāpxexka 'Ax yōg tikmū'ūn xohix tek nīm, xix Piy xix 'Ehmōg tek nīm kamah.

¹⁶ Puyā Topa 'Ōnēxip xuxyā xop kuxa ka', nūy nōm pu hāpxopmā max. Hamūn, 'Ōnēxip tek kuxa hittupmāhā punethok. 'Ūkxip kanet ka'ok kopah, pa 'Ōnēxip te 'ā tu yāyhāhup 'ohnāg.

¹⁷ Ūnūn tu nūktu kōmēn Hōm tu' xupep tuk xak, tuk xak, tu nūktuk xīpīhī'.

¹⁸ Pu yā Topa 'Ōnēxip kuxa ka' nō hāptup 'Ihā Kunnix te putpu' nūn. Yā 'Ōnēxip te 'ūgmūg hā tu tehe' punethok kōmēn 'Ep tu'. Xate' yūmmūg.

2

Xonat max putuk Yeyox Kunnix yōg

¹ Xōnnē, 'ākuxa yūm Yeyox Kunnix kopah, tu nūmūtik 'āxip. Tute xa hok hāpxopmāhā'. 'Ūmax, pu Yeyox 'āka'ogā'.

² Xate yōg hām'āktux 'āpak tikmū'ūn xohix mūtik. 'Āpu tik max xop pu' yūmmūgā nōm hām'āktux, puyīy nōm hā tikmū'ūn xohix pu' yūmmūgā'.

³ 'Āpu kummuk hā tot, Yeyox Kunnix yōg xonat max putuk.

⁴ Xonat max te hāpxopmā' puyīy 'ūyōg kapitām tu hittup. Xonat max te hāpxopmā te xonat xop kūnāpa xop hāpxopmā putuk 'ohnāg.

⁵ Ha ta mō'motyōn yūmmūg xop te pēnā'ax 'āpak 'ohnāg, puxix mūn xut 'ohnāg.

⁶ Ha ta tik 'ūm te hām xa ka'ok, puxix hāpxop xohix yīkūy.

⁷ 'Āpu yōg hām'āktux pe'āpaxeh, ha ta yūmūg xuxyā Yeyox Kunnix te xa' yūmmūgāp-tup hāpxop xohix.

⁸ 'Āpu Yeyox Kunnix pe'āpaxeh, yā Namix hā mōkputox, yā' xok tāmñāg, pa yā putpu' hi'. 'Āte nōm hām'āpak max 'āktux.

⁹ Yā 'āte Yeyox yōg hām'āpak max 'āktux, yīy ta tikmū'ūn te kanet ka'ok kopak xix, tuk yīm kīy xik kup kīy pipkup māxap hā, yā xupxet putuk, pe' nōy kix xop putuk. Pa tikmū'ūn te Yeyox yōg hām'āpak max'ax hīy 'ohnāg pipkup māxap hā.

¹⁰ 'Āte' kummuk xohix hā tot Kunnix kopa kuxa mām xop pu', yā Topa te nōm yīmōgātux, puyīy nō kuxa mām Yeyox Kunnix kopah, puyīy Topa nō kuxa kummuk xit, puyīy pēnā hāpxop xohix max xe'ēnāg hām'yāxatamuk xohix kux 'ohnāg hā.

¹¹ Hām'āktux xe'e hu: "Yūmūg xakix Kunnix mūtik, kopxix ti Yeyox mūtik.

¹² Yūmū'āte kummugā hā tot Kunnix mūtik, kopxix yūmūg tikmū'ūn xat putup Kunnix mūtik.

Paxpu yūmū'āte nōy pu' xuktux Kunnix yūmmūg 'ohnāg, ha ta Kunnix te' xuktux putup yūmūg yūmmūg 'ohnāg.

¹³ Paxpu yūmū'āte Kunnix tu pip ka'ok 'ohnāg, puxix Yeyox yūmūg tu' xip ka'ok. Yā Kunnix te kaxīy, tu hāpxop nōy mīy'ah."

Kaxīy.

Kāmānat max

¹⁴ 'Āpu tikmū'ūn yūmmūgā nūhū'. 'Āpu tikmū'ūn yūmmūgā Topa keppa hā kaxīy, hu: "Pa 'ātitx. Yāy mānōg hok. Yāy kix hok." Kaxīy. Hamūn, 'ūyāy mānōg, puxix hāpkummugā', yā' xupak xop koxyōy.

¹⁵ 'Āpu hāpxopmā max, puyīy Topa 'ōg hāpxopmā'ax putup pax xayīy 'ōg hāpxopmā'ax hā yāyhāhup hok. 'Āpu Topa hām'āpak max yūmmūgā max.

¹⁶ 'Āpu hām'āktux hitop 'āpak hok, 'ap Topa yōg hām'āktux'ah. Nōm hām'āktux hitop te tikmū'ūn papuk, pu Topa nāpa mōg.

¹⁷ Kayax te yīn māhā'. Hā kaxīy nōm hām'āktux te hāpkummugāhā', yā hām'āktux te 'īmēnēm yōg hām'āktux putuk, xix Pinet yōg putuk.

¹⁸ Nōm te Topa yōg putat max xak, nūy Kunnix kopa kuxa mām xop kuxa mām'ax koxyōy. Nōm te' yūmmūgāhā, hu: "Hōmā xakix xop yīn putpu' hi'." Kaxīy. Pa yā' koit. 'Ūputpu' hi'ah hōmā, pa' putpu' hip-tup.

¹⁹ Pa Topa 'ūka'ok, xix Topa yōg tikmū'ūn 'ūka'ok, yā mīptut mīm māykup ka'ok putuk, ha Topa te nō mīm māykup yīmū kax'āmi hu: "Topa te yāy yōg tikmū'ūn yūmmūg." Kaxīy.

Tu xe: "Kunnix kopa kuxa mām xop, 'āpu hām'kummuk mīy'ax nīm!" Kaxīy.

²⁰ Mīptut max xexka kopa' pip kāmāyepetxax max xix kanenām max. Yā' pipkup yānām 'ātā yīxux hā' mīy xix yānām ponnok hā' mīy. Yā 'āmuk xexka pu' max. Ha ta' pip kama nōm nōy kummuk, yā mīm hā' mīy xix putōy hā' mīy. Yā 'āmuk pu'.

²¹ Tikmū'ūn te hāpkummuk mīy'ax xohix kux, puxix kāmāyepetxax max putuk xix kanenām max putuk. Topa te nōm hā hāpxopmā max, yā Topa xexka yōg tikmū'ūn, yā' max Topa pu', yā' max mōkuma' mōg hāpxopmā max xohix pu'.

²² 'Āpu tukput xop yōg hāpkummuk mīy'ax kux. 'Āpu hāpxopmā yok, nūy 'ākuxa mām ka'ok, nūy xohix putup pax, nūy yāy kix hok. 'Āpu nōm mīy 'ūkuxa tup xop mūtik, yā Topa tu' kax xop mūtik.

²³ Tikmū'ūn te hām'āktux hitop, tu hām'yūmmūg 'ohnāg. Hāpxopmā hā kaxīy hok 'āmūn. Hāpxip 'thā tikmū'ūn te yāy mānōg xexkap-tup, tu yāy kix-tup.

²⁴ Pa Topa yōg kāmānat te kaxīy'ah, yā yāy mānōg'ah, pa' xohix pu' max, tu' nōy pu hām'yūmmūgā max, tu' nōy yōg hāpkummuk mīy'ax hā' tot.

²⁵ tu' nōy yōg hāpkummuk kohe' mīy'ax yoa', 'thā' gāy 'ohnāg, yīy ta Topa tep-tup nūy kuxa max popmā'. Topa tep-tup, pu tikmū'ūn yāyhāhup, nūy hāpkummuk mīy'ax kux, nūy hām'yok yūmmūg.

²⁶ tu Hām'gāyāgnāg yōg pamāg putuk kopa mōxaha'. Hamūn, hōmā Hām'gāyāgnāg te nōm mūg, tu nōm xat pax, yā pāmāg putuk.

3

Hām xexka yōg hām'yāxatamuk xohix xop putox

¹ Hām'yūmmūg nūhū'. Hām xexka yōg hām'yāxatamuk xohix xop putox 'thā tikmū'ūn pu hāpkummugāp-tup.

² Hamūn. Tikmū'ūn te yāy putup pax putup, tu tayūmak putup, tu yāy xexka pe'paxex putup, tu xuxet'ax kummuk 'āktux putup, 'ap 'ātak 'āpak putup'ah, xix' tut 'āpak putup'ah, tu' xuktux putup'ah hu: "Puxi'. Topa, 'āmax." Kaxīy. Tu Topa putuk 'ohnāg putup,

³ tu' nōy putup nōg putup, 'a' yāy kix kux putup'ah, tu' nōy kupex putup, tu yāy yōg hāpkummuk mīy'ax putup xūy kuxyāp-tup'ah, tu' gāy putup, tu hāpxopmā max putup nōg putup,

⁴ tu' gāy xop mōgāp-tup, puyīy yāy xape xūy'gā', tu' pa te hām'yūmmūg 'ohnāg putup, tu yāy xexka pe'paxex putup, tu' yāy pu hāpxop max xohix xak putup, pa Topa xak 'ohnāg,

⁵ tu Kunnix kopa kuxa mām xop putuk putup, pa yā 'ap-tup'ah, puyīy Topa

hāpɔxopmā max nōm kopah, yā' kuxa kopah. 'Āpu nōm tikmū'ūn pe mōg hok.

⁶ Nōm tikmū'ūn kopā' pip nōm te' nōy yōg xuxyā xop hā mō'xaha', kokex putuk, tu 'ūn mōgāhā', ha 'ūn te' pe' mōg, yā 'ūn te hāmyok yūmmūg kutōgnāg, tu' koit 'āpak pax, tu hāpɔxop kummuk mīy pax, 'ūp-tup pax hāpɔxop kummuk, tu' pe' mōg.

⁷ Tu tikmū'ūn xohix yōg hāmyūmmūg 'āpak, pa hāmyūmmūg xe'e' ohnāg.

⁸ Hamūn, Yān xix Yām putuk. Hōmā nōm te Mōyex putup nōg. Hā kaxīy kama hōnhā nōm te hāmyūmmūg xe'ep-tup nōg. Yā 'ūp-tox kummuk, tu' yōg putahat 'ap Topa yōg putat xe'e'ah.

⁹ Pa yā hāptox ha' mōg putup'ah. Hāpɔxip 'īhā tikmū'ūn xohix te' yūmmūg putup, nōm yōg hāmyūmmūg 'ap xe'e'ah. Hamūn, Yān xix Yām putuk.

'Āpu hāmyūmmūg max

¹⁰ Pa xate yōg hāmyūmmūg 'āpak, tu yōg hāpɔxopmā'ax pēnāhā', tu' yūmmūg yōg putahat, nōm 'ātep-tup, tu' kuxa yūm'ax yūmmūg. 'Āte nōm hāpɔxopmā kux'ah, ha xate' pēnāhā'. 'Āte xohix putup pax, ha xate' yūmmūg. 'Āte Topa yōg putat xak'ohnāg, ha xate' yūmmūg.

¹¹ Tikmū'ūn tek kute'ex kummuk kōmēn 'Ātikit tu' xix kōmēn 'Ikōn tu' xix kōmēn Nixtat tu', yīk xūy, ha xate' yūmmūg. 'Āte' kummuk hā tot, pa Topa te' xūy nōā', ha tak mōg.

¹² Tikmū'ūn max tep-tup, nūy hāpɔxopmā max Yeyox Kunnix mūtik, yā Topa putuk, tu nōm xohix xexka te' xūy hā tot putup, yā tikmū'ūn nōy te nōm xohix xexka kute'ex kummuk putup.

¹³ Yā kummuk xop kummuk nōynā' mōg putup, xix Kunnix kopa kuxa mām te' koit xop kummuk nōynā' mōg putup. Nōm te' koit, ha tikmū'ūn kuxa mām koit kopah, ha nōm kuxa mām yāy yōg koit kopa kamah.

¹⁴ Pa 'āmūn kaxīy'ah. 'Āpu nox xihip hāmyūmmūg kopah, yā xa nōm yūmmūgāhā'. Yā 'ākuxa yūm, nōm kopah. Xate' yūmmūg nōm te xa' yūmmūgāhā'.

¹⁵ Hōmā 'āmūn kaxɔp xix hōnhā 'īhā' yūmmūg Topa tappet xe'e'. Topa tappet te xa' yūmmūgāhā', Yeyox te 'ākuxa kummuk xit, nūy kaxa max mō'tat, 'ūyānān tu', 'īhā 'ākuxa yūm Yeyox Kunnix kopah.

¹⁶ Topa te kax'āmigāhā hāpɔxop xohix xexka Topa yōg tappet tu', yā Topa yōg hām'āktux xohix xexkah. Topa yōg tappet te' yūmmūgā max, tu tikmū'ūn yōg hāpkummuk mīy'ax māmōg, tu hāpɔxopmā kohe yoa', tu hāpɔxopmā yok yūmmūgāhā',

¹⁷ puyīy Topa yōg tikmū'ūn yāyhā tu' ka'ok, tu hāpɔxopmā max xohix yūmmūg, nūy hāpɔxopmā max xohix.

4

¹ 'Āte xa hām'āktux, ha Topa te' xupak xix Yeyox Kunnix te'. Yeyox Kunnix te' kopit putup tikmū'ūn xohix xexka yōg hāpɔxopmā'ax, yā hi xop yōg hāpɔxopmā'ax kopit putup xix xakix xop yōg, tu' max mō'pot xix' kummuk, 'īhā putpu' nūn putup Kunnix, yā' xip yūmūg xuxyā Yeyox Kunnix, tu' xat, yāy yōg tikmū'ūn.

² 'Āte xa hām'āktux, 'āpu Topa hām'āpak max 'āktux mōkuma mōg 'āmīy hā' max 'īhā xix 'āmīy hā' kummuk 'īhā kamah. 'Āpu hāpkummuk mīy'ax xop pu' yūmmūgā putat max. 'Āpu tikmū'ūn tu' kax, puyīy hāpɔxopmā max. 'Āpu tikmū'ūn yōg hāpɔxopmā max hip mōkuma' mōg. 'Āpu tikmū'ūn pu hāmyūmmūgā mōkuma mōg.

³ Hāpɔxip 'īhā tikmū'ūn te hāmyūmmūgā xe'e' āpak putup'ah, pap-tup, nūy hāpɔxop nōy 'āpax, tu notot xop xak putup punethok, ha ta notot xop te' yūmmūgāp-tup hāpɔxop nōy nōm hāpɔxop xohix tikmū'ūn tep-tup, nūy xupax.

⁴ Tikmū'ūn te hāmyūmmūg xe'e' kux putup, nūy hām'āktux hitop 'āpax.

⁵ Pa 'āmūn, 'āpu 'ōg hāpɔxopmā hitop mō'nīy mōkuma mōg. 'Āpu' kummuk hā tot. 'Āpu Topa hām'āpak max 'āktux Yeyox yūmmūg 'ohnāg xop pu'. 'Āpu 'ōg hāpɔxopmā nōy xohix mīy, tu mōktu' kux. Yā Topa pu 'āhām.

⁶ Ha tak xok putūmnāg. Hāpɔxip 'īhāg mōg putup.

⁷ Topa puk hām max, ha' kux. Putat kux ha tak xupep. 'Ūgkuxa yūm kux 'ohnāg.

⁸ Topa te 'ā' hōm putup 'ūxut xop yōg hāpɔxop xe'ēgnāg pexkox tu', yā kuxa tupnāg hōm putup yūmūg xuxyā Yeyox Kunnix keppah. Yūmūg xuxyā Yeyox Kunnix te tikmū'ūn yōg hāpɔxopmā'ax kopit putup. Tute 'ā' hōm putup nōm hāptup, 'īhā' nūn, tu' nōy xohix pu' popmāp-tup 'ūkuxa tupnāg kamah, yā Yeyox Kunnix te putpu' nūn putup pax xop pu' popmāp-tup.

Hā kaxīy 'ūgmūn

⁹ Ta Tīmōn, 'āpu hāpɔxip 'ohnāg 'īhā nū'.

¹⁰ Hamūn, Nep te hām xexka yōg hāpɔxop max putup pax, huk nīm, tu ta' mōg kōmēn Texanōn tu'. Ha ta' mōg Kenexēn kama hāpɔxexka Ganax tu', ha ta' mōg Tit hāpɔxexka Namāy tu'.

¹¹ Ta Nok puxehnāg xip 'ūgmūtik. Mōy, Mā'ak xak, nūy nūnnā', pu tu hām 'ūgmūtik. 'Ūhām max.

¹² Ta 'āte Tikik mō'kutnāhā kōmēn 'Ep tu'.

¹³ 'Ānūn, nūy paxnū' yōg kayak. 'Āte nōm nīm hāpɔxexka Tonot tu' Kap pet tu'. 'Āpu tappetxax paxnū kama xix tappet nōy.

¹⁴ Ha ta 'Anexān tek kummukgā xexka', yā pipkup hā' hām 'Anexān. Yūmūg xuxyā

Yeyox te 'ūyōg hāpkummuk mīy'ax yānān putup.

¹⁵ Paxip tik tu nō'ōm. Tute yūmū yōg hām'āktux mūtik yāy kix pax.

¹⁶ Ha ta hōmā gohet yōg tik pa te hāmyūmmūg te yōg hāpxopmā'ax kopit hāmāxap, 'ihā tikmū'ūn pip 'ohnāg 'ūgmūtik. 'Āte-tup'ah, puyīy Topa nōm tikmū'ūn yōg kummuk mīy'ax yānān.

¹⁷ Pa yūmūg xuxyā Yeyox xip 'ūgmūtik, tuk ka'ogāhā, 'ūyīy Topa yōg hām'āpak max xohix 'āktux, puyīy puknōg xop hām'āpak max 'āpax. Yā yūmūg xuxyā Yeyox tek xut hāmgāy yīkox kopa putuk.

¹⁸ Yūmūg xuxyā Yeyox tek xut putup hāpkummuk xohix kopah kamah, tuk mōgāp-tup pexkox tu'. Yā 'ōnte yūmūg xuxyā Yeyox te' xat putup yāy yōg tikmū'ūn. Yā' max xe'ēgnāg mōkuma' mōg. Hamūn.

'Ātep-tup, pu Topa nox xihip 'āxop mūtik

¹⁹ 'Āpu Pinixit pu hām'āktux xix 'Ak pu xix 'Ōnēxip xuxyā xop pu'. 'Āte nōm xaxok 'ohnāg.

²⁰ Ha ta 'Enax nox xip kōmēn Konīn tu'. Ha ta 'āte Tonop pi' komēn Mīnet tu'. Yā' pakut.

²¹ Ta 'āpu nū' mōg'āgmūg 'āxix hāmmūmū'. Ta 'Eop te xa' hām'āktux xix Pononēn te', xix Nīn te' xix Kanap te' xix Kunnix kopa kuxa mām xop xohix xexka te hām'āktux, 'āxop xaxok 'ohnāg.

²² 'Ātep-tup, pu Topa nox xihip 'ākoxuk mūtik. 'Ātep-tup, pu Topa xa hāmmaxnā'.

Tu ta tu' kux.

PAOT TE TIT PU TAPPET KAX'ĀMI'

¹ Ūgmūn Paot. 'Āte xa' kax'āmi nūhū' tap-pet. 'Āte hāpxopmā max Topa pu'. Yeyox Kunnix te mōgkutnāhā 'ūgmūn. Topa tek yāy kutnāhā 'ūgmūn tikmū'ūn kopah, tu mōgkutnāhā, 'ūyīy Topa yōg tikmū'ūn hāg tehe', puyīy tu' kuxa mām ka'ok nōy nā mōg. Topa yōg hāmyūmmūg xe'e'.

² Topa yōg putat max kopa tikmū'ūn te hi'ax kux 'ohnāg hip. Topa te' koit 'ohnāg. Hōmā tute hām'āktux xex, 'ihā hām xexka xip'ah. Tute hām'āktux, hi'ax kux 'ohnāg hōm putup, yā tikmū'ūn hīnnāp-tup, puyīy hī mōkuma'mōg, ha' kux 'ohnāg.

³ Hāpxip 'ihā Topa te 'ā yāy yōg hām'āpak max'ax 'āktux nō 'āmnīy xe'e' 'ihā. Tute 'ā' hōm yāy yōg hām'āpak max'ax, 'ūyīy tikmū'ūn pu nōm 'āktux. Topa te' xat. Yā Topa te tikmū'ūn kuxa kummuk xit, nūy kuxa max mō'tat, 'ūyānān tu'.

⁴ 'Āte xa' kax'āmi', yā Tit pu' 'ūgkutok pit putuk Topa yōg putat max kopah. Pu yā yūmūg 'Ātak Topa xa hāmmaxnā', xayīy 'ākuxa yūm.

Tit te hāpxopmā max hāpxexka Kenet tu'

⁵ 'Āte 'āxix hāpxexka Kenet tu', xayīy hāpxopmā max, yā 'āte nōm kuxyā 'ohnāg, xayīy yīmōgātux tihik, nōm te Kunnix kopa kuxa mām xop pēnā max kōmēn xohix tu'. 'Āte' xa nōm 'āktux.

⁶ Ūmax, pu tik te Kunnix kopa kuxa mām xop pēnā max xop te hāpkummuk mīy 'ohnāg, ha yāpxehnāg 'ūxetut, yā' xetut nīm 'ohnāg, hak-tok xohix kuxa mām Yeyox kopah, tuk-tok gāy 'ohnāg, tu' tak 'āpak, xi' tut 'āpak.

⁷ Kunnix kopa kuxa mām xop yōg pēnā'ax xop yōg xat'ax te Topa pu hāpxopmā max kamah. Ūmax, pu hāpkummuk mīy 'ohnāg, tu yāy xexka pe'paxex 'ohnāg, tu' gāy mō'ka'ok 'ohnāg, tu paptux 'ohnāg, tu' gāy 'ohnāg, tu hāpxop putup xūy 'ohnāg.

⁸ Ūmax, pu nōm puknōg xop pu hāpxōn pax, tu hāpxopmā max putup pax, tup-tox max, tu hām yok mīy, tu' max Topa pu', tu' kuxa max.

⁹ Ūmax, pu' kuxa mām ka'ok hāmyūmmūg xe'e' kopah, tute nōm yūmmūg hōmā. Hā kaxīy tute tikmū'ūn pu hāmyūmmūg xe'e' yūmmūgāp-tup, tu tikmū'ūn hā tu' tep-tup, tu hāmyūmmūg xe'e' putup nōg xop mūtīk hām'āktux max putup, puyīy kuxa mām.

¹⁰ Hamūn, tikmū'ūn punethok te Topap-tup nōg, tu' nōy mōgāhā koit'ax hā, yā hām'āktux hitop hā, yā Kunnix kopa kuxa mām xop mōgāhā koit'ax hā. Hōmā nōm te' koit pax xop te Yoneo xop nīm, tu hōnhā' pip

Kunnix kopa kuxa mām xop kopah. Yā nōm punethok te tikmū'ūn mōgāhā koit'ax hā.

¹¹ Ūmax, xayīy nōm hām'āktux kummuk kuxyā'. Hamūn, nōm te tikmū'ūn pu hāpxop kummuk yūmmūgāhā', nūy tayūmak pop pax, tu xuxyā xop xohix koxyōy.

¹² Hamūn, hōmā hāpxexka Kenet yōg tik te hāmyūmmūg, tu hām'āktux, hu: "Hāpxexka Kenet yōg xop te' koit pax, tu xokxop gāy mūn putuk, tu' tuknōgnāg pax, tu' xit pax." Kaxīy.

¹³ Hamūn. 'Āp koit'ah. 'Āpu hām'āktux, hu: "Kaxīy hok!" kaxīy, puyīy tikmū'ūn kuxa mām ka'ok,

¹⁴ puyīy tikmū'ūn Yoneo xop yōg hāmāktux hitop 'āpak hok, puyīy 'āpak hok tik yōg xat'ax, yā nōm tik kummuk te hāpxe'e yūmmūg 'ohnāg.

¹⁵ Ūmax xop pu' max hāpxop xohix, pa' kummuk xop pu' kummuk hāpxop xohix, yā' kuxa mām 'ohnāg xop pu' kummuk. Hamūn, 'ūp-tox kummuk, tu' kuxa kummuk.

¹⁶ Nōm te hām'āktux, Topa yūmmūg, pa hāpxopmā kummuk. Tikmū'ūn te' pēnāhā 'ūyōg hāpkummuk mīy'ax, tu' yūmmūg nōm te Topa yūmmūg 'ohnāg. Yā Topa pu' kummuk, tu' yīpkox pip 'ohnāg, tu hāpxopmā max xohix pu' kummuk.

2

Hāmyūmmūg xe'e'

¹ Pa 'āpu tikmū'ūn pu' yūmmūgā hāpxopmā'ax max, yā hāmyūmmūg xe'e'.

² 'Āpu yūmmūgā', puyīy tik kutut xop tu paptux hok, nūy putox max, nūy gāynām hok, nūy kuxa mām ka'ok pax, nūy nōy putup pax, nūy Topa yōg putat xak hok.

³ 'Āpu 'ūn kutut xop pu hām'āktux, puyīy hāpxopmā max Topa te nōm putup, nūy xūmāhīy hok, nūy paptux hok, nūy tikmū'ūn pu hāmyūmmūgā max,

⁴ yā 'ūhex tuk tup xop pu hāmyūmmūgāhā', puyīy yāy yīpkox putup pax xik-tok putup pax,

⁵ nūy putox max, nūy hāpxopmā max Topa te nōm putup pax, nūy tu hām max 'ūxuxyā xop pu', nūy yāy yīpkox 'āpax. Hā kaxīy tikmū'ūn te Topa yōg putat yōg hām'āktux 'āktux kummuk putup'ah.

⁶ Hā kaxīy kamah, 'āpu 'ūpit tuk tup xop pu hām'āktux, puyīy tup-tox max.

⁷ Xix 'āmūn, 'āpu hāpxopmā max xohix, puyīy tikmū'ūn pēnā', tu kama' mīy putup. 'Āpu tikmū'ūn pu hāmyūmmūgā hitop hok, yā kutex hok.

⁸ 'Āpu hām'āktux yok, puyīy tikmū'ūn hām'āktux kummuk hā kutex 'ohnāg. Paxpu kute'ex, puxix yāyhāhup, tu' yēy.

⁹ 'Ūhok hām'ax xop, 'āpu 'āxuxyā 'āpax, nūy hāpɔxopmā max xohix, puyīy 'āxuxyā nōm putup. 'Āpu hām'āktux hā' nōy yānān hok.

¹⁰ 'Ūmax, pu hok hām'ax xop xat'ax xop yōg hāpɔxop hā tu xupxet hok, pa xat'ax xop pu' max mōkuma' mōg. Pu yā nōm tu' pip ka'ok mōkuma' mōg. Hā kaxīy tikmū'ūn te Topa yōg hām'āpak max'ax 'āktux max putup. Topa te yūmūg kuxa kummuk xit, nūy kuxa max mō'tat, 'ūyānān tu'.

¹¹ Topa te hok hāpɔxopmā max tikmū'ūn pu', nūy tikmū'ūn xohix kuxa kummuk xit, nūy kuxa max mō'tat, 'ūyānān tu'. Tutep-tup.

¹² Topa te hok hāpɔxopmā max yūmū'ā'. 'Āpu yūmū Kunnix kopa kuxa mām xop kūnāpa xop hāpɔxopmā putuk hok. 'Āpu yūmū hām xexka yōg hāpɔxop xohix xak pax hok. Pa 'āpu yūmū yāy yōg putup'ax kummuk mō'nīy, nūy hām yok mīy, nūy Topa putuk, 'Īhā yūmūg pip nūnte hām xexka tu',

¹³ tu yūmū'āte' hip, yā Topa max xe'ēnāg hip, xix yūmūg xuxyā Yeyox Kunnix hip. Tute yūmūg kuxa kummuk xit, nūy kuxa max mō'tat, 'ūyānān tu'.

¹⁴ Yeyox xok, 'ūyīy yūmū 'āti'. Yeyox xok, nūy yūmūg kuxa kummuk xit, nūy kuxa max mō'tat, 'ūyānān tu', nūy yūmūg kuxa pix, pūy yūmūg pop, yā 'ūyōg tikmū'ūn yā nōm te' max mīy.

¹⁵ Tit, 'āpu tikmū'ūn pu nū hāpɔxop yūmmūgā'. 'Āpu tikmū'ūn tu' xax, pu nōm mīy. 'Āpu xat 'ūyīpkox pip hok xop. Yā Topa te 'āxexka mīy. 'Ūtux hok, pu tikmū'ūn yīpkox pip hok.

3

Hāpɔxopmā max Kunnix tep-tup

¹ 'Āpu tikmū'ūn pu hām'āktux, pu gohet yōg xat'ax 'āpax, nūy yōg xat'ax mīy, nūy hāpɔxopmā max xohix.

² 'Āpu tikmū'ūn pu hām'āktux, pu tikmū'ūn 'āktux kummuk hok, pu yāy kix hok, pa tikmū'ūn hā tu tehet, yā tikmū'ūn xohix xexka pu' max.

³ Hamūn, hōmā yūmūg hitop, tu yūmūg yīpkox 'ohnāg, tu putat max xak, tu yūmū yōg putup'ax kummuk te yūmūg papuk pax, tu yūmūp-tox kummuk, tu yūmūg yīpkumīy, ha tikmū'ūn te yūmūg putup nōg, ha yūmū'āte tikmū'ūn putup nōg.

⁴ Pa hāpɔxip 'Īhā yūmū'āte' yūmmūg hāpɔxop max Topa yōg, yā Topa te yūmūg putup pax, tu yūmūg hā tu tehe',

⁵ tu yūmūg kuxa kummuk xit, nūy yūmūg kuxa max mō'tat, 'ūyānān tu'. 'Ok yūmū'āte hāmyok mīy, yīy ta Topa te yūmūg kuxa kummuk tupmāhā? 'Āmhok. Pa Topa te yūmūg pēnāhā', tu yūmūg kuxa ka'. Tute yūmūg

kuxa tupmāhā', 'ūyīy yūmūg kuxa tu max, yā hāpɔxop xohix 'ūtup, yā Topa Koxuk hā' mīy.

⁶ Topa te Topa Koxuk hā yūmūg mōgkukoho', 'Īhā yūmūg kuxa mām Yeyox Kunnix kopah. Yeyox te yūmūg kuxa kummuk xit, nūy kuxa max mō'tat, 'ūyānān tu',

⁷ 'ūyīy yūmūg kuxa tu' max. Topa te' hok mīy, tu yūmū'ā' hōm hi'ax kux 'ohnāg. Yā yūmū'āte nōm hip, yā yūmūg hi xe'ēgnāg mōkumak mōg, ha' kux 'ohnāg.

⁸ Yā hamūn. 'Ātep-tup, xayīy 'ū yūmmūgā' xe'e' nū hāpɔxop xohix, puyīy Topa kopa kuxa mām xop hāpɔxopmā max xohix, yā' max xe'e' tikmū'ūn pu'.

⁹ Pa 'āpu 'āpak hok hāmyūmmūg hitop, xix mōnāyɔxop hittap 'āxet'ax 'āktux hitop, xix yāy mānōg'ax, xix Mōyyex yōg xat'ax 'āktux hitop. Yā' xohix te hāmmaxnā 'ohnāg. Yā' max'ah.

¹⁰ 'Ūtux hok, pu yāy kix hok yāy kix pax xop. 'Ūtux hok, tu xe' tux hok, pa' yīpkox pip'ah. 'Āpu nōm tik nīm.

¹¹ Yūmū'āte' yūmmūg, yā nōm tik kohe', yā' kuxa kummuk, tu yāy xūygāp-tup.

Puyā Topa xa hāmmaxnā'

¹² 'Āte mō'pok putup 'Ahat pe Tikik. 'Ōnte xupep, 'Īhā nū' kōmēn Nīkop tu'. Noxk xip'ax 'ōnte mō'āgmūg 'āxix hā.

¹³ 'Āpu nō 'ātehet Yēn, nōm te xat'ax yūmmūg, xix 'Apot nō 'ātehet, pu mōg, pu hāpkumep.

¹⁴ 'Ūmax, pu' xohix hāpɔxopmā max, pu nō 'ātehet 'ūhok xop, puyīy xohix hāpɔxop popmā'.

¹⁵ Yā 'ūxohix nūnte te xa hām'āktux hu: "Āneo." Kaxīy. 'Āpu, 'āneo 'āktux nōm te yūmūg putup pax Topa yōg putat max kopah. Pu yā Yeyox xa hāmmaxnā'.

Tu ta tu' kux.

PAOT TE PINĚM PU KAX'ĀMI'

¹ Ūgmūn Paot, 'ūkxip kanet kopah, Yeyox Kunnix pu 'āte hāpxopmāhā', tu kanet kopak xip, ha yūmūg xape Tīmōn tek mūtik tihī, yīk mū'āte xa kax'āmi', Pinēm, yāk mūg mūtik hāpxopmāhā',

² ha 'kuxa mām ka'ok xop pu kax'āmi kamah, nōm te yāy tu nū'nāhā 'āpet tu', hak mū'āte kamah nū mīy tappet, yūmūg xape hex 'Apit pu' mīy, xix 'Akīp pu' mīy, yā yūmūg mūtik hām kamah.

³ Pūyā yūmūg Tak Topa xa hāmmāxnā', xix 'ākuxa māmānā'. Pūyā yūmūg xuxyā Yeyox Kunnix xa hāmmāxnā'.

Pinēm te' xape xohix putup pax

⁴ Pinēm, xatek mūn hāk xape xe'e', yīy 'āte Topa pu hām'āktux pax, tu 'āpekaxex, tu Topa pu hām'āktux, hu: 'Āmax Topah! Kaxīy.

⁵ 'Āte hām'āktux tap, hu: Xate Topa yōg tikmū'ūn xohix putup pax, ha tikmū'ūn te' yūmmūg, tu' xuktux, ha 'āte' xupak, tu 'ākuxa yūm ka'ok'ax yūmmūg, ha 'yūm ka'ok yūmūg xuxyā Yeyox kopah.

⁶ Topa te yūmū'ā hāmmāxnāhā', tu Kunnix hā hāmmāxnāhā', yīy 'āte Topa tu' xak, puyīy yūmū'ā yūmmūgā', 'ūyīy hāmyūmmūg, nūy yūmūg kuxa mām ka'ok yūmmūg, yā yūmūg kuxap-xet Kunnix kuxa mūtik hah.

⁷ Xatek mūn hā 'āxape', tuk mūn putup pax, tuk kuxa hittupmāhā', ha mōgnīynām. Yā xate Topa yōg tikmū'ūn kuxa xohix ka'ogāhā'.

Paot te Pinēm tu' xak, pu 'Onēy mō'nīynām

⁸ Yīy 'āte xa' xat'ax, 'āhā 'ātaknōy hah, xa hāpxopmā max.

⁹ Pa 'āte 'āp-tup pax xexka', hu xa tu' xak puxehnāg, yāk mūn Paot, tu Yeyox Kunnix pu hāpxopmāhā', huk xip kanet kopah Yeyox 'āktux tu', pa 'āte 'āxat 'ap putup'ah.

¹⁰ Hu xa tu' xak, 'Onēy pupi' xak, hak kutok putuk. 'Āte nō mōgāhā Topa yōg putat hā, yīy 'āhak-tok, ha kanet kopak xip 'Īhāk mūn 'Onēy hā' tak, tu hāmyūmmūgāhā'.

¹¹ Hōmā 'Onēy hām kummuk 'āmūn pu', pa' hām max 'ūgmūn pu', xix 'āmūn pu hām maxp-tup nōmhā.

¹² Yīy mō'kutnāhā 'āha putpu', 'Īhāk kuxa te' xak.

¹³ 'A 'āte mō'kutnāp-tup'ah, pāyā tu xip ka'ok nūnte, hu mōgnīynīynām, 'Īhāk xip kanet kopah hām'āpak max'ax'āktux tuk xip, pu 'Onēy 'ā miy pupi nō tuk tehet,

¹⁴ pāyā 'āte yāy pu' mīy putup'ah, tup-tup, xate 'ā hām'āktux, hu: "Yā' max, 'Onēy xihīp 'āmūtik, nūy 'āhā 'ātehet," kaxīy. Yīy

'āte mō'kutnāhā 'āha, xayīy' tux hok pu putpu nū'.

¹⁵ Pe 'Onēy te xa hāptox ha' xip, nūy hōnhā tu' xip ka'ok 'āmūtik.

¹⁶ Hōmā' hām putup'ah, tu 'ōg kāmānat, tu' hok hā' hām, pa hōnhā 'āmūn hā' xape, 'ātaknōy putuk, tu Kunnix hā 'āxape', ha yūmū'ātep-tup pax, 'āmūn xik mūn, yā yūmū'ā hā' xape xe'e'.

¹⁷ Xate 'āhā 'āxape, 'Īhā 'Onēy xānā', pu 'āpet tu mō'xip, xatek mūn xānā'ax putuk.

¹⁸ Ha hāpxop 'ūm xa' xupxet, kopxix tu pago.

¹⁹ Nūnte 'āte kax'āmi tappet tu', hu: 'Ūgmūn yā Paot, tu 'Onēy pupi pagop-tup. Kaxīy. Hōmā 'āte xa hām'āpak max'ax'āktux, tu yā Kunnix 'āktux, ha 'ākuxa yūm ka'ok, ha Kunnix te 'ākuxa hīnnā xe'e', 'āte xa' xuktux hah, yīy xatek tu 'ā tu yāy xit'ax hā ta nemēn, pāyā 'a 'āte xa' xuktux putup'ah.

²⁰ Ūkxape: 'Āpu 'ūgmūn pupi 'Onēy putup pax, yūmūg xuxyā pupip-tup pax, nūy 'ūgkuxa 'ūm hittupmā', nūy 'āmūn te 'āhā' taknōy.

²¹ 'Āte xa kax'āmi', 'Īhāk kuxa yūm ka'ok xa', tu hāmyūmmūg. Yā xate hāpxopmāp-tup māynāg, nūy 'Onēy hā' 'āxape xe'e'.

²² 'Āxop te Topa pu hām'āktux, tu tu' xak, pu 'āhak mōgā', ha 'āte' hip, pu Topa xe mōgkutnā', yīy 'āte 'āpet tu mō'xip putup.

Tuk-nāy tu 'āneo

²³ 'Epap te 'āneo, yā kanet kopa' xip 'ūgmūtik. Yeyox Kunnix pu' hām, hu kanet kopa' xip.

²⁴ Xix Mā'ak, xix 'Anixtah, xix Nep, xix Nok te 'āneo. Yā' xohix tek mūtik hām.

²⁵ Pūyā yūmūg xuxyā Yeyox Kunnix xa hāmmāxnā'. Tu ta tu' kux.

'EMEO XOP YŌG TAPPET

Topak-tok

¹ Hōmā hāmyāxatamuk xohix hā Topa te hām'āktux pax, tu hām'āktux punethok Yoneo xop yōg mōnāyoxop pu', ha tik xop te Topa pupi hām'āktux, nūy mōnāyoxop pu' xuktux,

² pa Topak-tok te yāy Tak pupi hām'āktux nōmhā, tu yūmū'ā' xuktux. Nō'ōm te Topa yūmūg Tak mūtik hām xexka xop xohix mīy, ha Topa tek-tok yāykutnāhā', pu hām xexka yōg hāpox xohix pop, xix pexkox yōg hāpox xohix pop kamah,

³ yāk-tok max, tu Topa max xe'ēgnāg putuk, tu yā Topa xe'ēgnāg kamah. 'Ūyī'y'ax ka'ok, hu hām xexka xop xohix xat, xix pexkox xop xohix xat, pu tu pip ka'ok, ha māyōn xop mām ka'ok, xix kōnāg xexka xup ka'ok kamah, ha tikmū'ūn kuxa kummuk tupmāhā', tu' tupmā kux, 'īhā pexkox ha' mōg, tu Topa xexka xe'ēgnāg yīm xe'e hā' yūm.

Topak-tok xix pexkox yōg nū'pok xop

⁴ Pexkox yōg nū'pok xop xexkak-tōgnāg, ha Topak-tok xexka xe'ēgnāg, yīy Topa te nū'pok xop 'āxet'ax ka'ok mīy, tuk-tok 'āxet'ax mīy max xe'ēgnāg.

⁵ 'Ap ta nū'pok xop pu hām'āktux'ah, nūy yā nōm xop yāy kutok 'āktux hok, pa yāy kutok pu hām'āktux, hu:

“Āmūn yā 'ūgkutok.
Hōnhā 'āte 'āmūn yāk kutok 'āktux,” Kaxīy.

Tu xe hām'āktux, hu:

“Ūgmūn yā 'ōg 'Ātak.
Yā 'āmūn yāk kutok,” kaxīy.

Tuk-tok pu' xuktux.

⁶ Tuk-tok puxet nū'kutnāhā hāhām tu', ha' xīp ta tu', ha:

“Pūyā pexkox yōg nū'pok xop xohix kuxa' yēy 'ākeppah,

nūy tu nūktettex,” kaxīy.

⁷ Pa nū'pok xop 'āktux, hu:

“Pūyā tu hām mō'ka'ok, kuxap putuk,
pūyā nōm kāmānat xop yā ka'ok,
tu 'āmuuh putuk kamah,” kaxīy.

⁸ Tu yāy kutok pu hām'āktux, hu:

“Topah, xate' xat mō kuma 'āmōg, tu' xat kux 'ohnāg,

tu 'ōg tikmū'ūn xat max, nūy tu hāmyok mīy.

⁹ Xate hāmyok mīy'ax putup pax, xix hāpkohe mīy'ax putup nōg,

yīy 'ōgnū Topa te xa yāykutnāhā', xa tikmū'ūn hā 'āxexka',

nūy 'ākuxa hittup xexka', ha 'āxapek-tōgnāg xop,” kaxīy.

¹⁰ Tu xe yāy kutok pu hām'āktux, hu:

“Hōmā 'āmūn te māxap, tu hām xexka xohix mīy,

yāy yīm hā pexkox mīy, tu hāpoxop xohix mīy.

¹¹ Ha pexkox te yāy xaxogāp-tup, tu' nōg,

xix hāhām te yāyxaxogāp-tup, tu' nōg,

pa ta tu 'āxip ka'ok,

ha hāmyāxatamuk xohix punethok nōg,

puxix pexkox xix hāhām kutok,

tu' nōg putup, tu topixxax kutut putuk nōg,

¹² ha tikmū'ūn te topixxax kutut xut,

nūy nō tup hā' yānān, nūy tu mō'tat,

ha kaxīy xate pexkox xut putup, xix hām xut putup,

nūy nō nōy yānān tup mīy,

pa 'āxip ka'ok, tu kutut 'ohnāg,” kaxīy.

¹³ Ha Topa te pexkox yōg nū'pok xop xānā

'ōhnāg, pu yūhūm, pa yāy kutok xānāhā', hu:

“Yūhūm 'ūgyīp xe'e hā, 'āte nōm kummuk xop nōā',

yīy hip, 'āte nōm kummuk xop nōā',

tu nōm xop xa tu' gāy xop nōā', tu' kum-mugāp-tup 'ūyānān tu',

ha ta xate' hip, puyī' xohix yīpkox pi' 'āxat'ax tu',” kaxīy.

¹⁴ Tep te xīy pexkox yōg nū'pok xop? Yā' koxuk xe'e xop, tu Topa pu hāpoxopmāhā', ha nū'pok, nūy yāy yōg tikmū'ūn mō'nīynām, puyī' mōg, hu mōxakux pexkox tu'.

2

Topa te tikmū'ūn kuxa kummuk xit

¹ 'Āpu yūmūg yīpkox pip, hām'āpak max'ax pu yūmūg yīpkox pip, 'ūyīy hāpoxopmā kummuk hok.

² Pexkox yōg nū'pok xop te hām'āktux, tu hāpxe'e 'āktux, ha Topa te' yīpkox hok xop pu hāpkummugāhā',

³ Tu yūmūg kuxa kummuk xit'ax, tu yūmū'ā hāmmax xe'ēgnāg nā'ax, pa yūmūg yīpkox hok, puxix Topa yūmū'ā hāpkummugā xexka', yūmū'āte Yeyox yōg hām'āktux putup nōg hah. Ha' xuktux hāmāxap, ha hām'āpak xop te' yīkopit, tu hāpxe'e 'āktux,

⁴ ha Topa te hāpxe'e 'āktux kamah, hu hāpoxopmā ka'ok xe'ēgnāg, yā hāpoxopmā xe'ēgnāg punethok, pu tikmū'ūn pēnā, nūy kuxa' yēy, yā tikmū'ūn te nōm mīy hok. Ha Topa Koxuk tep-tup pax, hu tikmū'ūn ka'ogāhā', pu hāpoxopmā ka'ok.

Yeyox Kunnix te' kuxa kummuk xit

⁵ Ha Topa te pexkox yōg nū'pok xop yīmōgatux 'ohnāg, pu pexkox tu 'ūyōg tikmū'ūn xat. 'Āmhok. Pāyā yāy kutok Yeyox yāykutnāhā pu tu xat.

⁶ Ha Topa yōg tappet te:

“Tikmū'ūn yāk-tōgnāg, pāyā Topa te nōm hāmpe'paxex, nūy 'ūxutigā'.

⁷ Ha hōnhā tikmū'ūn kutōgnāg, ha pexkox yōg nū'pok xop xexka',

pa Topa te tikmū'ūn xexkānāhā', pu tu xat,

⁸ Tu' ka'ogāhā', pu tu hep xop xohix xat,” kaxīy.

Hamün. Tappet te' hep xop xohix xat'ax 'äktux, 'a yümü'äte' pēnā'ah nōmhā, 'ap tikmü'ün te' hep xop xohix xat pēnā'ah.

⁹ Pāyā yümüg kuxa te Yeyox pēnāhā', yā hāpxip kutōgnāg 'lhāk-tōgnāg, Topa tep-tup hak-tōgnāg, ha nū'pok xop xexka', pa Yeyox xok, tu' hep xop xohix pupi' xok, pu Topa yümü'ā hāmmaxnā', hu' xexkānā xe'ēgnāg nōmhā, 'ūxok hah xexkānāhā'.

¹⁰ Topa te hāpxop xohix mīy, 'ūp-tup tu' mīy, tuk-tok xop putup, puyīy tu max xe'ēgnāg, nūy Topa putuk tu max xe'ēgnāg. Yīy Yeyox xūy, pu Topa' xūy'ax hā Yeyox yōg hāpxopmā'ax kuxyā'. Yā Yeyox te Topa yōg putat hā yümüg mōgāhā'.

¹¹ Tu tikmü'ün kuxa kummuk tupmāhā', ha nōm xop te Topa hā' Tak, yā Topa te' kuxa mām ka'ok xop hā 'Ātak, yīy Yeyox yāy xape xop 'äktux, 'ap xape tu yāyhāhup'ah.

¹² Yīy tappet te Yeyox yōg hām'äktux'ax 'äktux, hu:

“Topah, 'ātek xape xop pu 'āmün 'äktux putup,

tu 'ōg hāpxopmā'ax ka'ok 'äktux putup, tu xa kutex putup, nūy Topa hām'äktux max, puyīy tikmü'ün xohix yāykotinnānā' pip,” kaxīy.

¹³ Ha tappet te xe:

“Topah, 'ūgkuxa yüm ka'ok 'āmün kopah,” kaxīy.

Tu xe:

“Nūntek xip, 'ūgkutok xop tek mütik pip, Topa te 'ūgkutok popmāhā',” kaxīy.

¹⁴ Yeyox tek-tok 'äktux, ha tikmü'ün xe'e', 'ap koxuk'ah, yā' yīn pip, xi' yīn hep 'āta', yīy Yeyox te yümü'ā hā tikmü'ün kutok, nūy tu xok, nūy Hāmgāyāgnāg nōā', nōm tep-tex.

¹⁵ Ha tikmü'ün kuxānōg, tu' xok'ax yīpikutuk, 'üyōg hāmyāxatamuk xohix hā' yīpikutuk, ha Yeyox te nōm xop kuxa māmāhā, nūy nō kuxānōg kuxyā', pu tu hittap.

¹⁶ Yeyox nūn. Tep ha' nūn? 'Ok nūn, nūy pexkox yōg nū'pok xop mō'nīynām? 'Āmhok. Yā Topa yōg tappet te: 'Ūnūn, nūy mōnāy xop hittap 'Amanām mōkputox hā tu tehet,” kaxīy.

¹⁷ Hamün. Yīy Yeyox yāyhā tikmü'ün kutok, nūy tu xape xop putuk, nūy xape hā 'āmānex xexka xe'ēgnāg. 'Ūmax, tu tikmü'ün kuxa ka', tu Topa tu hāpxopmāhā', tu tuknōg 'ohnāg, nūy tikmü'ün yōg hāpkummuk mīy'ax xaxogā', pu tu kux.

¹⁸ Yā Yeyox xūy, tu yāy putup'ax mīy 'ohnāg, hu hōnhā tikmü'ün hā tu' tehet, tu' ka'ogāhā', puyīy tu yāy putup'ax mīy hok kamah, nūy hāpxopmā kummuk hok.

3

Yeyox xix Mōyyex

¹ 'Ākuxa mām ka'ok Yeyox kopah, huk mün hā 'āxape xop, ha Topa te 'āxānhā kamah. 'Āpu Yeyox 'üm pe'āpaxeh, yā Topa te nū'kutnāhā', pu 'āmānex xat'ax yōg hām'ax hā tu' hām, ha yümüg kuxa mām ka'ok nō 'āmānex xat'ax kopah.

² Topa te Yeyox yāy kutnāhā', pu tu hāpxopmā', ha kaxīy mōnāy xop hittap Mōyyex te hāpxopmā max, yāy xape xop xohix kopa hāpxopmā max, tu' tuknōg 'ohnāg.

³ Tikmü'ün te mīptut max pe'paxex kutōgnāg, pa tikmü'ün te mīptut mīy, ha nōm tu pe'paxex xexka'. Kaxīy mōnāy xop hittap Mōyyex yā xexka 'Iyaet yōg tikmü'ün kopah, ha Yoneo xop te nōm 'äktux max, pāyā Yeyox mün xexka xe'ēgnāg, tu Topa yōg tikmü'ün xohix hā' xuxyā', yā Topak-tok xe'e'.

⁴ Kaxīy mīptut 'üm te yāy 'üm mīy 'ohnāg, ha Topa te hāpxop xohix mīy. Hōmā Topa te 'Iyaet yōg mōnāy xop xānāhā', puyīy yāy hā tikmü'ün.

⁵ Mōyyex hām Topa pu', 'üyōg kāmānat tu', tu yāy xape xop kopa' hām, tu tuknōg 'ohnāg, tu Topa pupi tikmü'ün pu hām'äktux, tu: “Topa te hām'äktux putup,” kaxīy.

⁶ Pa Kunnix te hāpxopmā xexka', tu' tuknōg 'ohnāg, yāy Tak pu' hām tu', tu yāy xape xop pēnā max, ha Kunnix hā yümüg xape, 'lhā yümüg kuxānōg hok, 'lhā yümüg kuxa mām ka'ok, tu hāmmax hip.

⁷ Yīy Topa Koxuk te:

“Hōnhā 'āxop te Topa yīy'ax 'āpak,

⁸ 'Āpu, 'īpkox pi', ka 'ōg mōnāy xop yōg hāpxopmā'ax mō'tat,

ha mōnāy xop yīpkox 'ohnāg, tu Topa gāyāhā', 'lhā hām panip xexka tu' pip,” kaxīy.

⁹ Tu xe:

“Ōnte 'ōg mōnāy xop tek yīkopit, tuk gāyāhā', pāyā yōgnū hāpxopmā'ax xe'ēgnāg pēnā tap, hāmyāxatamuk xohix te 40 hā' pēnāhā',

¹⁰ Yīk gāy nām nōm tikmü'ün tu', tu:

“Yā' kummuk pax, tu hāmp'e'paxex kummuk, tu yōgnū putat xak punethok, hāpkummuk mīy hu',”

¹¹ huk gāy, tu yāy 'āxet'ax hā hām'äktux xex, hu:

'Nōm xop tek xip'ax hā mō'āxakux hok,

nūy 'ūgmütik tu hāpxopmā kux hok,' kaxīy.”

¹² 'Ūkxape xop, 'ōg pa 'āti', ka Topa yōg putat xak, 'ākuxa kummuk tu' xak, xix 'ākuxa mām hok tu' xak, ka Topa xe'ēgnāg nīm.

¹³ 'Āpu hōnhā mō 'ānōy mō'nīynām, 'āmnīy xohix hā mō'nīynām, 'lhā Topa te tikmü'ün xānāhā', puyīy Topa pu' yīpkox pi'. Yā hōmā Topa yōg tappet te hōnhā 'äktux, tu: “Hōnhā Topa te hām'äktux,” kaxīy. 'Āpu, 'āxop yāy nōy ka'ogā', ka 'āyīpkox mo' yāy yīnnīn, yāy pu' koit tu', xayīy hāpxopmā kummuk hok.

14 Hōmā yūmūg kuxa mām ka'ok Kunnix kopah, yā yūmūg kuxa mām ka'ok mō kumak mōg, kōpxix Kunnix hā yūmūg xape'.

15 Yīy Topa yōg tappet te: "Hōnhā 'āxop te Topa yīy'ax 'āpax, 'āpu 'āyīpkox pi',

ka mōnāyxor yōg hāp XORPmā'ax tat, ha mōnāyxor yīpkox 'ohnāg, tu Topa mūtik yāytuk-mīy," kaxīy.

16 'Ū 'ūm te Topa yōg hām'āktux'ax 'āpak, tu nū mūtik yāy tuk-mīy? Yā mōnāyxor te Mōyyex pe' mōg, tu hām'āpak, tu yāytuk-mīy, ha Mōyyex te nōm mōy tap hāp XORPmā 'Eyit kopah.

17 'Ū 'ūm tu Topa gāy hāmyāxatamuk xohix te 40 hā ta tu' gāy? Yā tikmū'ūn te hāp XORPmā kummuk, hu' xakix hām panix xexka tu'.

18 'Ū 'ūm te Topa yōg hām'āktux'ax 'āpak, 'hā' yāy 'āxet'ax hā hām'āktux xex, hu: "'Ōm xop 'ūkxip'ax hā mōxakux hok, nūy 'ūg mūtik tu hāp XORPmā kux hok," kaxīy? Yā tikmū'ūn te hām'āktux'ax 'āpak, tu Topa mūtik yāytuk-mīy.

19 Yīy yūmū'āte hāmyūmmūg, yā' mōxa 'ohnāg, nūy Topa yōg xip'ax hā mōxakux, 'ūkuxa mām 'ohnāg tu' mōxa 'ohnāg.

4

1 Hōmā Topa te yūmū'ā hām'āktux xex, tu hām'āpak max'ax 'āktux, hu: "'Ūkxip'ax hā mō'āxakux'ax, nūy 'ūgmūtik 'āpi,'" kaxīy. 'Āpu, yūmūg pa 'āti', nūy Topa yōg xip'ax hā mōxakux xe'e'.

2 Tikmū'ūn hittap te' xupak, ha yūmū'āte' xupak kamah, tu hām'āpak max'ax 'āpak, kamah, pa tikmū'ūn hittap kuxa 'ūm mām 'ohnāg Topa kopah, yīy Topa te nōm pu hāmmaxnā'ohnāg, 'ūkuxa mām 'ohnāg hah,

3 ha yūmūg kuxa mām ka'ok, tu Topa xip'ax hā mō yūmū xakux, nūy Topa mūtik hāp XORPmā kux, ha:

"'Ūggāy, hu yāy 'āxet'ax hā hām'āktux xex, hu: 'Nōm xop tek xip'ax hā mōxakux hok, nūy 'ūgmūtik tu hāp XORPmā kux hok.' Kaxīy."

Topa te' xuktux tap, 'hā tu hām xexka xohix mīy tu hāp XORPmā kux.

4 Yā Topa yōg tappet te hāptup te 7 'āktux, yā hāptup xe'e', hu: "Topa te hāp XORPmā kux, tu hāptup te 7 'hā hāp XORPmā 'ohnāg, hāp XORPmā kux tu,'" kaxīy.

5 Tu xe: "Nōm xop te Topa xip'ax hā mōxakux hok, nūy nū mūtik tu hāp XORPmā kux hok," kaxīy.

6 Tikmū'ūn hittap te hām'āpak'ax max 'āpak hāmāxap, tu Topa xip'ax hā mōxakux hok, nūy nōm mūtik tu hāp XORPmā kux hok, 'ūkuxa mām 'ohnāg tu', pāyā' nōy xop mōxap-tup, nūy Topa mūtik tu hāp XORPmā kux.

7 Hāmyāxatamuk xohix nōg 'hā Topa Koxuk te xe hām'āktux, ha mōnāyxor Namix te Topa pupi hām'āktux, yīy:

"Hōnhā 'āxop te Topa yīy'ax 'āpak.

'Āpu, 'īpkox pi'," kaxīy.

8 Pax pu mōnāyxor hittap Yoyoe te tikmū'ūn mōgā, pu Topa xip'ax hā mōxakux, nūy tu hāp XORPmā kux, puxix Topa xe' xuktux hok mōnāyxor Namix pu'. Pāyā mōnāyxor mōxa 'ohnāg, 'ūyīpkox 'ohnāg tu', yīy Topa te' xuktux 'ūxeheh.

9 Pa hāptup xe'e mō'nāhā Topa yōg tikmū'ūn pu', nōm xop kuxa mām ka'ok xop pu mō'nāhā', tu Topa yōg hāptup te 7 putuk, 'hā Topa te hāp XORPmā kux.

10 Tikmū'ūn te Topa xip'ax hā mōxakux, nūy nōm mūtik tu hāp XORPmā kux, puxix hāp XORPmā'ax xohix tu kux, tu xe hāp XORPmā 'ohnāg, Topa te hāp XORPmā kux putuk.

11 'Āpu yūmū'ā Topa xip'ax hā mōxakux kamah, nūy Topa mūtik yūmūg hāp XORPmā kux. 'Āpu yūmūg yīpkox pip Topa pu', ku'u yūmūg tikmū'ūn kummuk putuk, tu yūmū'āte mōxakux 'ohnāg.

12 Yā Topa yōg hām'āktux xip ka'ok. Tikmū'ūn mīkax xexka 'ūxox tix hā' xuhmīy, tu' xuhmīy nūy 'ūyīn xit, nūy tu' kup mūggā'. Ha kaxīy Topa yōg hām'āktux ka'ok, tu yūmū'ā yāy kuxa yūmmūgāhā'. Yūmū'āte mō'kupix, xix hām'āpax, puxix nōm hām'āktux yāy pekpaex'ax yūmmūgā', tu yāy pekpaex xohix yūmmūgāhā' xix yāy putup'ax yūmmūgāhā', 'ūyīy yāy kuxa yūmmūg,

13 yīy tikmū'ūn te hāp XORPmā'ax xaptop hok Topa pu'. Yā Topa te hāp XORPmā'ax xohix pēnāhā', tu hāmyūmmūg, tu tikmū'ūn yōg hāmpe'paxex xohix yūmmūg, ha Topa pu yūmūg xohix te yāy yōg hāp XORPmā'ax 'āktux putup.

Yeyox te 'āmānex xop xohix xat'ax

14 'Āpu yūmūg kuxa mām ka'ok, yā hōmā yūmū'āte hām'āktux, tu yūmūg kuxa mām ka'ok Yeyox kopa 'āktux. Yūmū yōg 'āmānex xat'ax xe'ēgnāg te Topa ha' mōg, tu' keppa' xip, yā' xuxet'ax Topak-tok Yeyox.

15 Tu yūmūg kuxa ka', yūmūg pu'uk ha yūmūg kuxa ka', ha' kummuk xop te yūmū'ā' kummugāhā', 'ūyīy hāpkummuk mīy, tu Yeyox kummugāhā kamah, puyīy hāpkummuk mīy, pāyā hāpkummuk mīy 'ohnāg.

16 'Āpu yūmūg mōg, yūmūg kuxānōg hok. Yā Topa ha yūmūg mōg, nūy nōm pu hām'āktux, ha Topa te yūmū'ā hāmmaxnāhā', xix yūmūg kuxa ka', xix mō yūmūg nīynām.

5

1 Topa te 'āmānex xat'ax yāykutnāhā', tu tikmū'ūn kopa' yāykutnāhā', pu tikmū'ūn pupi hām'āktux Topa pu', ha Topa te 'āmānex xohix yīmōgatux, pu xokxop mō'hap, xix hāp XORP, nūy Topa pu haxyā', puyīy Topa

tikmũ'ün yög häpkummuk mĩy'ax xaxogã', pu tu kux.

² Ha 'ãmānex xat'ax yā pu'uk kamah, nũy hāmyümmüg hok xop hã' tot, nũy häpkummuk mĩy'ax xop kuxa ka'.

³ Ūpu'uk, hu yāy mün pu häpxop mō'hap hāmāxap, nũy Topa pu' haxyã', puyĩy häpkummuk mĩy'ax xaxogã', pu tu kux, hak-nāy tu 'ãmānex te tikmũ'ün pu mō'hap kamah, puyĩy Topa' yög häpkummuk mĩy'ax xaxogã' kamah.

⁴ Tikmũ'ün te' xak 'ohnäg pu Topa yāy kutnã', puyĩy tu 'ãmānex xat'ax. 'Āmhok. Topap-xehnäg te yāy kutnãhã', tu mōnāy xop 'Ānām yāy kutnã hāmāxap.

⁵ Ha kaxĩy Kunnix te' xak 'ohnäg, pu Topa' yāy kutnã', puyĩy yāyhã 'ãmānex xat'ax. 'Āmhok. Pa Topa te:

"Āmün yāk kutok!

Hōnhã 'āte xa hã 'ügkutok 'āktux," kaxĩy.

⁶ Ha Topa yög tappet te xe hām'āktux, hu: "Tik hittap Mēkiyenek yā 'ãmānex mō kuma' mōg,

hã kaxĩy 'āmün yā 'ãmānex mō kuma mōg kamah,

tu' kux 'ohnäg," kaxĩy.

⁷ Yeyox xip hām tu', 'ĩhã Topa pu hām'āktux, tu ta tu' xak, tu' yĩy ka'ok, tu' potaha', pu Topa' tux hok pu tikmũ'ün putex hok, ha Topa te' xupak. Yā yāy kutōgnäg pe'paxex hah.

⁸⁻⁹ 'Ūk-tok, pāyã' xũy, nũy tu yĩpkox pip yümmüg, tu hāmyümmüg max, hu tikmũ'ün kuxa kummuk xit'ax, tu tikmũ'ün yĩpkox pip xop kuxa kummuk xit'ax, nũy tu mō kuxa max tat 'üyānān tu'.

¹⁰ Yā Topa te yāy kutok yāy kutnãhã', puk-tok yāyhã' xat'ax, tuk-tok pu hām'āktux, hu:

"Āmün yā 'ãmānex xat'ax, tu tik hittap Mēkiyenek putuk," kaxĩy.

'Ōg pa mōxip, xayĩy kuxa yũm kux

¹¹ Yā 'ügmũ'āte 'ãmānex 'āktux pu' max, nũy xa Yeyox 'āktux, yā yũmũ yög 'ãmānex xat'ax, ha xa hām'āktux punethok, nũy xa hāmyümmügã', pāyã 'āp-tox ka'ok.

¹² Hāpxip punethok hã 'āxop te Topa yög hām'āktux'ax 'āpak, pāyã 'āxop te häpxaxok, hu 'ānōy pu hāmyümmügã hok. Kaxxop te hāmyümmüg 'ohnäg, tu' yōktat puxehnäg xak, hu' xo'op, 'ap te xogyĩn mã'ah. Hã kaxĩy 'āxop te hām'āpak kutōgnäg, tu hāmyümmüg 'ohnäg, kaxxop putuk, 'ap hām'āktux ka'ok 'āpak'ah, 'āp-tox tuknōg tu'.

¹³ Kaxxop pu'ügnäg te' yōktat hep xo'op, tu hāmyümmüg 'ohnäg, 'ok pe hāmyok, 'ok pe hāpkohe'. Hã kaxĩy 'āxop te hām'āktux te māxap yümmüg, pāyã hām'āktux ka'ok yümmüg 'ohnäg, hu häpxopmã'ax kopit kummuk.

¹⁴ Yā' xiptap xop te xogyĩn mãhã', tu hāmyümmüg, tu hām'āktux ka'ok pe'paxex, nũy tu hāmmax yümmüg, nũy tu häpkummuk yümmüg, puyĩy häpxopmã max.

6

¹ Āpu yũmũ hāmpe'paxex max, nũy hāmyümmüg, nũy 'üxiptap xop putuk yũmũ'āte hāmyümmüg, nũy hāmyümmüg'ax te māxap yümmüg max. Yā nōm hāmyümmüg'ax te: Topa te tikmũ'ün kuxa kummuk xit, häpxopmã'ax hok hã' xit, nũy kuxa max mō'tat 'üyānān tu'. Tikmũ'ün kuxa yũm ka'ok Yeyox kopah, puxix Topa' hok hã' kuxa xit. Kaxĩy. Yā hāmyümmüg'ax te māxap 'ōhōm, ha yũmũ'āte hāmyümmüg.

² Ha kama hāmyümmüg'ax te māxap, pu' kuxa mām ka'ok xop 'ünōy putox pix, 'ükuxa yũm ka'ok hah, ha' nōy putox yĩmũ' yĩm xix, puyĩy Topa Koxuk ka'ogã', 'āxop te hāmyümmüg kamah. Yā kama hāmyümmüg te māxap, hu: Topa te' xaxix xop putpu' hĩnāp-tup, ha häptup xe'e mō'nāp-tup, 'ĩhã Topa te' hep xop xohix yög häpxopmã'ax kopit, tu' kummugāp-tup 'üyānān tu', tu häpxaxok 'ohnäg. Yā hāmyümmüg te māxap 'ōhōm.

³ Āpu yũmũ'āte hām'āktux kuxyã', 'üyĩy hām'āktux nōy 'üm 'āktux, puyĩy Topa yũmũ'ā hām'āktux ka'ok yümmügã'.

⁴ Topa yög putat xak hok. 'Āxop te putat xak, nũy häpxopmã kummuk, ta putpu 'ānün hok. Tikmũ'ün te Topa yög putat hã' mōg tap, tu pexkox yög häpxop paha', Topa Koxuk te nōm ka'ogãhã',

⁵ ha Topa yög hām'āktux max xex 'ükuxa kopah, tu pexkox ka'ok'ax yümmüg,

⁶ tu Topa yög putat xak, nũy putpu tu nün hok, puxix Topa xe' hupmã hok, puyĩy yāy yög häpxopmã'ax kummuk kux. 'Āmhok. Yā' nōy te Topak-tok 'āktux kummuk, tu Yeyox mün pu häpkummugãhã'. Tu tep putuk? Tu' kummuk xop putuk, nōm xop te Yeyox putex, ha' kummuk xop putuk, hu ta Topa yög putat xak. Yā Yeyox pu' hupmã xexka'.

⁷ Hām max te tex punethok pop, ha häpxop punethok xokax, tu' tuk, ha häpxa xuxyã hittup, ha Topa te nōm pu hāmmaxnãhã'.

⁸ Ha hām nōy te mĩmyām punethok pip, xix mĩxux kummuk pip, yĩy Topa te nōm pu häpkummugãhã', ha tikmũ'ün te' gōy hax nām. Tikmũ'ün te Topa yög putat xak, tu häpxa kummuk putuk, häpxopmã kummuk tu'.

⁹ Ūkxape xop: 'Āte hām'āktux hã xa hāmyümmügãhã', tu häpxa 'āktux, nũy xa tikmũ'ün kuxa 'āktux. Yā Topa te xa hāmmaxnãhã', 'a 'āxop te häpxa kummuk putuk'ah, nōm Topa tep-tup nōg. 'Āmhok.

Pâyā 'ăxop te hăpxa max putuk, yā 'ămôg kuma môg Topa yôg putat hă.

¹⁰ Topa te hămyok mîy, tu 'ôg hăpxopmă'ax xaxok 'ohnăg, ha 'ăxop te Topap-tup pax, yîy 'ăxape hă tu tehet, nûy nôm xop mô'nîynăm.

¹¹ 'Ūgmû'âte 'ăp-tup, xa 'ăhittup hă Topa yôg putat hă 'ămôg, nûy tu mô kuma môg, nûy pexkox yôg hăpxop hip, nûy pop.

¹² 'Ăkuxa tuknôg hok, pa 'ăkuxa măm ka'ok, nôm xop putuk, nôm xop te Topa yôg putat hă' môg tap, xayîy pexkox yôg hăpxop pop kamah. Yā Topa te xa hăm'ăktux xex kamah, nôm xop putuk.

Topa te hăm'ăktux xex

¹³ Hômă Topa te hăm'ăktux xex mōnăyxop 'Amanăm pu', tu yā' hitop xex hok, tu' xexka xe'êgnăg, ha' xohik-tôgnăg, yîy yāy 'ăxet'ax hă hăm'ăktux, nûy hăm'ăktux xex,

¹⁴ hu 'Amanăm pu hăm'ăktux, hu: "Ăte xa hăm'ăktux xe'e', yā 'ăte xa hămmxnăp-tup, xate yāy kutok pit put putup, pu 'ămôkputox xohix punethok," kaxîy.

¹⁵ Yîy 'Amanăm te' hip, tu môktu yāy kutok put, tu yāy môkputox pēnăhă'.

¹⁶ Tikmû'ün 'üm te' nōy pu hăm'ăktux xex, hu: Hăptup, koxix nû', nûy xa pago. Topa te hămyümmüg. 'Ăte' koi't'ah." Kaxîy. Tu Topa 'ăxet'ax 'ăktux 'İhă ta tu hăm'ăktux xex, puyî' nōy kuxa yüm ka'ok hăm'ăktux'ax kopah, nûy nōy kuxa' yēy.

¹⁷ Topa te hăm'ăktux xe'e', pu tikmû'ün yîkopit hok, hu yāy 'ăxet'ax 'ăktux, 'İhă yāy yôg tikmû'ün pu hăm'ăktux xex, nôm xop te hăpxop pop'ax pu hăm'ăktux xex.

¹⁸ Topa 'ap te koi't'ah, tu hăm'ăktux xex, xix hăpxopmăhă', tu yāy 'ăxet'ax hă hăpxopmăhă', tup te koi't'ohnăg, pu yümüg kuxa măm ka'ok, nûy tu hip, pu Topa yümû'ă hămmxnă', 'ü yümüg kuxa hittup.

¹⁹ Hu yümüg kuxa măm ka'ok, tu yāy pu yîkopit 'ohnăg, pâyă yümû'âte' hip, 'üyîy Topa keppa yümüg pi'. Mîpkox te kônăg yümû' môg, ha pipkup putux xexka te mîpkox tu' hîy, tu kônăg kopa' yüm, puyîy mîpkox môg hok kônăg yümû', ha kaxîy yümüg kuxa măm ka'ok, tu Yeyox puxehnăg kopa' măm ka'ok. Kamah 'ămănex xexka te Topa xip'ax xe'êgnăg hă mô'năhă', tu topixxax max mô'yînnîn'ax hă mô'năhă', nûy Topa keppa' xihîp. Ha yümû'âte' hip kamah, nûy pexkox yôg xip'ax tu 'ămôxaha', nûy môxakux, nûy Topa keppa yümüg pi'.

²⁰ Yeyox te pexkox tu' xupep hămăxap, tu mô'năhă', nûy yümû'ă hămmxnă', yā 'ămănex xop xat'ax xe'êgnăg mô kuma' môg, tu tik hittap Mēkiyenek putuk.

7

¹ Nôm tik Mēkiyenek te kômên Xanêm yôg tikmû'ün xohix xat, tu Topa xe'êgnăg hă 'ămănex, ha 'Amanăm te' gāy xop mütik

yāy kix, tu' xexka xop kix, tu yāy kix kux, tu ta' môg, yāy pet ha putpu' môg, ha ta Mēkiyenek te' pēnăhă', tu: "Pûyă Topa xa hămmxnă'," kaxîy.

² Ha 'Amanăm te' popmăhă hăpxop, 'üyôg hăpxop yâg te 10, tu 'ămănex pu' yâg puxet hôm, ha 'Amanăm te nôm hăpxop môy tap 'ügăy xop tu'. Yā Mēkiyenek 'ăxet'ax nōy mîy, tu: Hămyok xat'ax, kaxîy. Ha kômên Xanêm 'ăxet'ax mîy, hu: 'Ūkuxa yüm'ax, kaxîy. Yîy 'ămănex 'ăxet'ax nōy te: Tik te tikmû'ün xat'ax, tu tikmû'ün kuxa mămmă'ax, kaxîy.

³ Ha tikmû'ün te 'ămănex yāy tak yümüg'ah, xi' tut yümüg'ah, xi' yôg mōnăyxop yümüg'ah, xix hăm 'üm hă 'ütut te' put'ax 'üm yümüg'ah, xix 'ămniy 'İhă' xok yümüg'ah, yā Topak-tok putuk, tu yā hămyăxatamuk xohix hă 'ămănex, ha' kuxa 'ohnăg.

⁴ 'Ūyümüg. Mēkiyenek yā' xat'ax, yîy mōnăyxop hittap 'Amanăm te' hôm hăpxop yâg puxet, ha' gāyxop tu nôm hăpxop môy tap.

⁵ Mōyyex te' xat, pu Nemi môkputox te tikmû'ün tu' yâg puxet pa', 'ünôy yâg te 10 yā tikmû'ün yôg, ha Nemi yôg xop te yāy yôg tikmû'ün tu' paha', yā kama 'Amanăm hă' môkputox.

⁶ Pa Mēkiyenek mûn 'a Nemi hă' môkputox'ah, pa 'Amanăm tu hăpxop ta tu' yâg puxet paha', tu: "Pûyă Topa xa hămmxnă'," kaxîy. Yā Topa te 'Amanăm pu hăm'ăktux xex tap.

⁷ Yā tik xexka xop te hăm'ăktux, ha tik kutôgnăg xop te hăm'ăpak. 'Ăxop te hămyümmüg. Yîy Mēkiyenek te hăm'ăktux, ha 'Amanăm te' xupak.

⁸ Ha 'ămănex xop te' yâg paha', tu hăpxip 'İhă' xakix, ha' nōy te' yănăn tu' paha', tu môktu xakix kamah, tikmû'ün xohix putuk. Pa Topa te Mēkiyenek hi xe'e' 'ăktux, ha mōnăyxop yôg hăpxop 'üyăg paha'.

⁹ Yā Nemi te 'Amanăm mütik pago, ha' môkputox te yāy yôg tikmû'ün tu' pop.

¹⁰ Tikmû'ün te hăm'ăktux hu: Nemi müg tut te' put 'ohnăg, 'İhă' xuxyă 'Amanăm te Mēkiyenek pu pago, yîy Nemi te 'Amanăm mütik pago kamah. Kaxîy tikmû'ün te hăm'ăktux. Yā mōnăyxop 'Amanăm te yāy putix pupi pago.

¹¹ 'İyaet yôg tikmû'ün te Topa yôg xat'ax yümüg, ha' xat'ax te 'ămănex xop 'ăktux, 'ôhôm 'Anăm môkputox, yā 'Anăm xop te Nemi hă' môkputox, tu môktu Topa pu' hăm, 'ap puxi'ah, 'ükuxa tupmă hok tu', yîy 'ămănex nōy nûn, yā Yeyox Kunnix nûn, tu Mēkiyenek putuk, tu 'Anăm yôg 'ămănex xop putuk 'ohnăg.

¹² Yā 'ămănex nōy, yî' xat'ax nōy kamah.

¹³⁻¹⁴ Yā yümüg xuxyă Yeyox nûn, nûy 'ămănex yôg hăm'ax hă' hăm, tu Yona xop

yōg tihik, 'ap Nemi yōg tik'ah, ha Yot xop te 'āmānex yōg hām'ax hā' hām 'ohnāg, yā Mōyyex te Yona xop xat 'ohnāg, pu tu hām.

'Āmānex xat'ax yā Mēkiyenek putuk

¹⁵ 'Āxop te hāmyūmmūg'ax. 'Ūnūn 'āmānex nōy, tu Mēkiyenek putuk, 'ap Nemi hā' mōkputox'ah.

¹⁶ Mōyyex te' xat, pu Nemi mōkputox puxet hām, nūy Yoneo yōg tikmū'ūn hā 'āmānex, ha tikmū'ūn te yāykutnāhā', pu tu hām, pāyā yūmūg xuxyā te yūmū'ā hā 'āmānex xexka', 'ūhi kux 'ohnāg hā yūmū'ā hā 'āmānex.

¹⁷ Yīy Topa yōg tappet te: "Tik hittap Mēkiyenek yā 'āmānex, tu' kux 'ohnāg, hā kaxīy 'āmūn yā 'āmānex kamah, 'akux putup 'ohnāg!" kaxīy.

¹⁸ Yīy Topa te' xat'ax nōā'. Yā tikmū'ūn pu'uk, 'a hāpxopmā max yūmmūg'ah, tu' yīpxop pip Mōyyex yōg xat'ax pu', Mōyyex te' xat,

¹⁹ pāyā yāy kuxa tupmā hok, pu tu max, tu hāmmax hip, pu Topa nūnnā', puyīy tu yāy mūtik ti mō'kuma' mōg. Pāyā Yeyox nūn, yīy yūmū'āte' hip, puyīy yūmūg mōgā Topa yīkāgnāg hah.

²⁰ Yā Topa te' xat, pu Nemi yōg 'āmānex xop tu hām, pāyā nōm xop pu hām'āktux 'ūm xex 'ohnāg, pu tu hāpxopmā kux. 'Āmhok.

²¹ Pāyā hām'āktux xex 'āmānex nōy pu', yā Yeyox mūn pu hām'āktux xex, hu:

"Topa te xa hām'āktux xex,

tu yāy pu' hupmāp-tup 'ohnāg, tu:

"Amūn yā 'āmānex xe'e', 'ap 'ākux 'ohnāg.' "

Kaxīy.

²² Hu Yeyox mūn yā 'āmānex xe'e', tu' pa'ax tūmnāg yōg 'āmānex, yā' pa'ax tup mūn max xe'e', ha' pa'ax hittap mūn miāx.

²³ 'Ūyōg 'āmānex xop xohix punethok, 'ūxakix tu', yī' nōy mōxaha', nūy tu hām.

²⁴ Pa Yeyox hi mō kuma' mōg, 'ūxok putup 'ohnāg, yī' nōy nūn 'ohnāg, nūy yānān tu tu' hām, pāyā Yeyox yā 'āmānex yāp-xet,

²⁵ tu hōnhā tikmū'ūn kuxa kummuk xit'ax, xix hāptup 'īhā' xit'ax, 'ap kux'ah, tu nōm xop kuxa te Topa xak xop mō'nīynām, puyīy Topa yīkāgnāg hā nū'. Ha Yeyox te nōm pupi' xak, nūy mō'nīynām, yā' hi mō kuma' mōg, nūy Topa tu' xax, pu mō tu xape nīynām.

²⁶ Hu Yeyox yā 'āmānex xat'ax xe'ēgnāg, ha yūmūg xohix tep-tup pax, ha hāpkummuk mīy 'ohnāg, yā' max xe'ēgnāg. Topa te Yeyox yāykutnāhā', tu' xut, tu' xexkanā xe'ēgnāg, pu pexkox yōg xop hā tu xexka'.

²⁷ Ha 'āmānex xat'ax nōy te mō'āpxop hap, nūy Topa pu' haxyā', tu 'āmniy tu xohix puxix mō'hap, puyīy yāy yōg hāpkummuk mīy'ax xaxogā', xix tikmū'ūn xohix yōg mīy'ax xaxogāhā'. Pa Yeyox yāy pu mō'hap 'ohnāg, hāpkummuk mīy 'ohnāg tu', tu tu yāy mūn hōm, tu' xok 'āmniy puxet 'īhā', nūy

tikmū'ūn yōg hāpkummuk mīy'ax xaxogā', pu tu kux.

²⁸ Ha Mōyyex te' xat, pu tik xop yīmōgatux, pu tikmū'ūn nō 'āmānex xat'ax, ha' max miāx, pa Topa te hām'āktux xex 'ūk-nāy tu', tuk-tok yā hāmyāykutnāhā', yā Topak-tok max xe'ēgnāg mō kuma' mōg.

8

Yeyox yā yūmū yōg 'āmānex xe'ēgnāg

¹ Yeyox mūn yūmū yōg 'āmānex xe'ēgnāg, yā pexkox tu' xip, tu Topa xexka xe'ēgnāg yīpxe'e hā' yūm, nūy nōm mūtik tu xexka'. Yā hāmyūmmūg xe'e' ōhōm.

² Hōmā hāmyāxatamuk xohix 'īhā Yoneo yōg 'āmānex te Topa pet hā mō'nāhā', tikmū'ūn te nōm pet mīy topixxax ka'ok hā, pu tu xokxop hep 'ūm nūnnāy. Pāyā yūmū yōg 'āmānex xat'ax, tu' hām pexkox kopah, yā nō'om Topa xip'ax xe'e', tu pexkox tu' yūm.

³ Topa te 'āmānex xat'ax xop xohix yīmōgatux, pu hāpxop xix xokxop mō'hap, nūy Topa pu haxyā', nūy Topa pu' hōm, yīy yūmū yōg 'āmānex xat'ax hām kamah, nūy Topa pu yāy mūn hōm, nūy yūmūg xohix pupi' tu xok.

⁴ Pax pu Yeyox hām tu' xihip, puxix yūmū'ā hā 'āmānex hok. Yā Mōyyex te' xat, pu mōnāyxop Nemi mōkputox tu tu' hām, nūy mō xokxop hāp, nūy Topa pu' haxyā', ha Yeyox yā Nemi yōg xop hā' puknōg.

⁵ Ha Topa te Mōyyex xat, pu topixxax ka'ok xexka hā Topa pet mīy, tu' mīy'ax yūmmūgāhā', ha' mīy, ha' pet te pexkox yōg pet hā pet komut.

⁶ Pa Yeyox te 'āmānex yōg hāpxopmā'ax mīy, tu' māynāg mīy, yā 'āmānex xat'ax xe'ēgnāg, hu' pa'ax tup mīy Topa mūtik, xix tikmū'ūn mūtik, Topa te hām'āktux xex ha' pa'ax mīy. Yā pa'ax hittap yōg max miāx, ha pa'ax tup yōg max xe'ēgnāg.

⁷ Pax pu' pa'ax hittap tu ka'ok xe'ēgnāg, puxix pa'ax tup mīy hok,

⁸ pāyā Topa te tikmū'ūn yūmmūg, ha hāpxopmā kummuk punethok, yīy Topa te:

"'Āmniy mō'nāp-tup, 'īhā' āte pa'ax tup mīy'ax, 'īyaet yōg tikmū'ūn mūtik mīy'ax, xix Yona yōg tikmū'ūn mūtik mīy'ax.

⁹ Yā' pa'ax nōy, 'ūtup, ha 'āte nōm hittap mīy mōnāyxop mūtik,

nūy mōgā', nūy hāpxexka 'Eyit tu 'ūxupmā', pa mōnāyxop tek xaxok, tuk pa'ax xaxok kamah,

yīy 'ātep-tup nōg," kaxīy.

¹⁰ Tu xe hām'āktux, hu:

"'Āte pa'ax tup mīy putup,

tu 'īyaet yōg tikmū'ūn mūtik yōgnū hām'āktux xex putup,

'āte tikmū'ūn putox tu' xex putup, xi' kuxa kopa' xex,

'äte nôm tikmũ'ün hã Topah,

hak mün hã yã tikmũ'ün xe'e, 'üyânân tu'.

¹¹ Tute hãmyümmüg putup, yã 'xohix tek yümmüg putup,

hu' nõy yümmügä'ax hitop tu',

'a hãm'üm 'ãktux putup'ah, nõy: 'Topa yümmüg.' Kaxiy.

Yã 'xohix tek yümmüg putup, 'ük-tõgnãg xop tek yümmüg nãm,

ha mõktu xexka xop tek yümmüg nãm.

¹² Ha 'äte hãpkummuk mÿ'ax xaxogãp-tup, pu tu kux," kaxiy.

¹³ Hãpxop kutut te yã xaxogã tãmnãg, Topa te' pa'ax hittap kux, ha yãy xaxogã'ax, yiy pa'ax tup mÿ.

9

Tikmũ'ün kuxa te'yë Topa keppah

¹ Nôm pa'ax hãmãxap te Topa pu nü'xup yümmügãhã, ha tikmũ'ün te Topa pet mÿy, nõy Topa pu nü 'ãxup, 'üpa'ax te' pet mÿy yümmügãhã,

² Ha Topa pet kox hã mõxakux hãmãxap, ha topixxax ka'ok xexka hã' mÿy, ha 'xuxet'ax mÿy, hu: Topa xip'ax. Kaxiy. Ha kuyãnãm kup yüm, xix mĩmpe xup, ha mĩmpe yĩmũ pãm mãm, tu Topa keppa' mãm.

³ Ha topixxax max te hãmyĩkox nõy mō'yĩnnĩn, ha' pet kox 'ãxet'ax Topa xip'ax xe'ëgnãg,

⁴ ha' kopa' xup mĩmpe', tu pipkup yãnãm hã mō'nÿy, pu mĩm xax mō'hap, xix mō xokxop hap, nõy Topa pu haxyã', ha' pa'ax yõg mĩpkox yüm, ha pipkup yãnãm hã' mÿy, tu mĩpkox kopa nax mãyãg yüm, ha' xit'ax 'ãxet'ax mãnãg xex nax kopah, yã pãm putuk, xix mōnãyxop 'Anãm yõg kup tõy xex mĩpkox kopah. Hõmã mĩxux te nõm kup tõy nak tu' xokax, Topa te hãm'ãktux hah, ha' xat'ax yõg mĩkaxxap yüm mĩpkox kopah, ha' xat'ax kax'ãmi' mĩkaxxap tu'.

⁵ Ha mĩpkox yĩmũ' pip 'üyõnnã'ĩ 2, yã pekkox yõg yõnnã'ĩ hã' komut xop, tu Topa xip'ax yümmügãhã, 'üyĩmãg kup te mō'kok nÿy, 'õnte Topa te hãpkummuk mÿ'ax xaxogãhã', pu tu kux. Yã' puxi'. 'Äte hãm'ãktux nõy putup kamah.

⁶ 'Ämnÿy xohix 'Ihã 'ãmãnex xop te Topa xip'ax hã mõxakux, nõy 'ãmãnex yõg hãm'ax hã tu' hãm,

⁷ pa Topa xip'ax xe'ëgnãg hã mõxa 'ohnãg, yã 'ãmãnex xat'ax puxehãg te' xip'ax xe'ëgnãg hã mō'nãhã', tu hãmyãxatamuk yõg 'ãmñÿy puxet, 'Ihã Topa xip'ax xe'ëgnãg hã mō'nãhã', nõy xokxop hep 'ãta nũnnãy 'üxip'ax kopah, tu yãy mün pu nü'nãhã', xix tikmũ'ün xohix pu nü'nãhã', pu Topa tikmũ'ün yõg hãpkummuk mÿ'ax xaxogã', tikmũ'ün te hãpkummuk mÿy hãmyümmüg 'ohnãg tu', ha Topa te' xaxogãhã'.

⁸ Ha kaxiy Topa Koxuk te yümũ'ã hãmyümmügãhã nõmhã, 'üyiy yümüg yümmüg max, yã 'ãmãnex xat'ax te xokxop hep nü'nãhã', puyiy tu hãm mōnãy, pãyã tikmũ'ün nõy te Topa xip'ax xe'ëgnãg hã mõxakux 'ohnãg, yã Topa te' xat hok, pu xip'ax xe'ëgnãg hã mō tu xakux hok.

⁹ Ha 'ãmãnex te Topa pu mō'ãpxop hap, xix xokxop, pu tikmũ'ün Topa pu nü'ãktettex, pãyã 'ap te puxi'ah, yã tikmũ'ün kuxa 'üm tupmã'ohnãg.

¹⁰ Yã Mõyyex te' xat hok, pu' xit'ax 'üm mã hok, xi' xat hok, pu xo'op'ax 'üm xo'op hok, xi' xat, pu yãy xax pix, xix kãnëy pix, nõy Topa pu maxnã', pãyã yãy kuxa tupmã 'ohnãg, hu' hip, puyiy Topa' kuxa kummuk tupmã'.

¹¹ Yiy Kunnix nün, tu yãyhã 'ãmãnex xohix xat'ax, tu yümũ'ã hãmmaxnãhã', tu Topa pet xe'e kopa' hãm, ha tikmũ'ün te nõm pet mÿy 'ohnãg, 'ap hãm xexka tu' yüm'ah, yã pekkox tu' yüm.

¹² Ha Kunnix nün, tu' pet hã mō'nãhã yãp-xet, tu Topa xip'ax xe'ëgnãg kopa mō'nãhã', tu' hep 'ãta nü'nãhã', pãyã 'a münÿytut hep 'ãta 'üm nü'nã'ah, xix 'a mot hep 'ãta 'üm nü'nã'ah. 'Ämhok. Yã yümüg pupi' xok, tu yãy hëp 'ãta nü'nãhã', nõy yümüg kuxa kummuk 'üm xit, nõy tu mō kuxa max tat 'üyãnãn tu', pu yümüg hi xe'e, 'ap kux'ah.

¹³ 'Ämãnex xop nõy te mot hep 'ãta nü'nãhã', xix münÿytut pit hep 'äte nü'nãhã', tu münÿytut kutok pit mō'hap Topa pu', tu xogyĩn putok nü'xok tikmũ'ün tu', pu tu nõ xax maxnã Topa pu', nõy tu hãpkummuk xit, pu tikmũ'ün Topa keppa nü'ãktettex, nõy kuxa' yëy.

¹⁴ Topa Koxuk hi xe'ëgnãg, tu Kunnix ka'ogãhã', pu tu xok mĩpkupnix tu', tu yãy hep 'ãta nü'nãhã', tu yãy mün hõm Topa pu', nõy tikmũ'ün pupi' tu' xok. Ha xokxop hep 'ãta ka'ok kutõgnãg, tu tikmũ'ün kuxa kummuk tupmã hok, pa Yeyox yãy hep 'ãta ka'ok xexka', tu yümüg kuxa kummuk xit, tu yümũ yõg hãpxopmã'ax hitop kuxyã', nõy yümüg ka'ogã', yümũ'äte hãpxopmã Topa xe'ëgnãg pu'.

¹⁵ Yiy Kunnix te tikmũ'ün xapit, pu Topa hã yãy xape xop, tu' pa'ax tup hã' xape, puyiy Topa nõm pu hãmmaxnã', tute nõm xop xãnãhã', nõy tu hãmmaxnã mō'kuma' mõg, tu hãm'ãktux xex tap. Kunnix xok, hu tikmũ'ün mõy pu mõg Topa yikãgnãg hã, nõy hãpxopmã kummuk kux, yã hõmã' mÿy, 'üpa'ax hittap xip, 'Ihã' mÿy.

¹⁶ Tikmũ'ün xok putup, ha yãy xape te' yõg hãpxop xohix pop putup, yiy tappet tu kax'ãmi', pu tikmũ'ün xexka xop mō'kupix, nõy yümmüg, nõy tu' xape xop pu hãpxop popmã'. Ha' xok, puxi' xexka xop 'üyõg

hãpxop popmã', tik xape xop pu' popmã', tappet tu' kax'ãmi tap hah, tu ta' xok xe'e'.

¹⁷ Nôm tikmũ'ün hi', ha ta' pop 'ohnãg, pa' xape xop hip, pu tu xok, ha tappet pu'uk. Pa tikmũ'ün xok, puxix tappet ka'ok, tu' yõg hãpxop popmã'ax yũmmũgãhã', pu tu xape xop pop.

¹⁸ Hã kaxiy 'ũpa'ax hãmãxap te' xat, pu xokxop kix Topa pu, nũy hep 'ãta nũnnãy.

¹⁹ Mõyyex te' xat'ax 'ãktux hãmãxap tikmũ'ün pu', tuk-nãy tu mũnũytut pit xix mot kix, tu' hep 'ãta kanop kõnãg hã, tu nũ' xok, pu topixxax nôm 'ãta xup, nũy nũ'xok, xix mĩxux 'ixop hã nũ'xok, tu' xat'ax yõg tappet yĩmũ nũ'nãhã, xix tikmũ'ün xohix yĩmũ nũ'nãhã',

²⁰ tu: "Topa yõg pa'ax ka'ok, yiy 'ãte nũhũ hep 'ãta nũ'xok, xa 'ãxop xohix pẽnã', nũy 'ãyĩpkox pi pa'ax tu'," kaxiy.

²¹ Kaxiy Mõyyex te' xat, pu' hep nũ'nã Topa pet kopah, xix Topa xak'ax yõg kãnëy tu nũ'xok.

²² Yã' xat, pu' hep 'ãta nũ'xok, pu hãpxop tu max Topa pu'. 'Ühep 'ãta puxehñãg hã Topa te hãpkummuk mĩy'ax xaxogãhã', pu tu kux.

Yã Kunnix te yũmũg kuxa kummuk xit, 'ũxok tu'

²³ Mõnãyxop Mõyyex te' xat, pu Yoneo 'ãmãnex hep 'ãta nũ'xok Topa pet yõg hãpxop tu', puyiy tu hãpxop maxnã Topa pu'. Tu xokxop hep nũ'xok, nũy hãpxop maxnã', xix xogyĩn putok nũ'nãhã', nũy tikmũ'ün xax maxnã Topa pu', pãyã nôm hãmmaxnã'ax te tikmũ'ün kuxa kummuk tupmã 'ohnãg, yiy Kunnix xok, yũmũg pupi' xok, nũy yũmũg kuxa maxnã Topa pu', tu yãy hep 'ãta nũ'nãhã', nũy pekkox yõg hãpxop maxnã Topa pu kamah.

²⁴ Yiy Kunnix xok hãmãxap, tuk-nãy tu pekkox yõg pet xe'e hã mõktu mõ'nãhã', tikmũ'ün te nôm mĩy 'ohnãg, ha Topa yĩpxe'e ha' yũm nũy yũmũg pupi hãm'ãktux Topa pu'.

²⁵ Yoneo xop yõg 'ãmãnex xat'ax te Topa xip'ax hã mõ'nãhã', tu hãmãxatamuk xohix 'ĩhã mõ'nãhã, tu hãmãxatamuk yõg 'ãmniy tup-xet 'ĩhã mõ'nãhã', tu Topa xip'ax kopa mõ'nãhã', tu xokxop hep 'ãta tat 'ũxeheh. Pa Kunnix xok puxehñãg,

²⁶ nũy tu' xũy puxet, tu' xok, nũy tikmũ'ün kuxa kummuk tu xit, 'ap xep xok'ah, yã' kux, yã' puxi'.

²⁷ 'Ühep xop xohix xakix puxet, hak-nãy tu Topa te' yõg hãpxopmã'ax kopit putup, 'ok pe hãpxopmã max, 'ok pe' kummuk, tu' kummuk xop pu hãpkummugãp-tup, nũy tu yãnãn, tu' max xop pu hãmmaxnãp-tup 'ũyãnãn tu'.

²⁸ Ha kaxiy Kunnix xok 'ãmniy puxet 'ĩhã', nũy hãm xexka xohix yõg hep xop xohix pupi tu' xok, nũy hãpkummuk mĩy'ax xaxogã', 'ap xep xok putup'ah, pãyã putpu' nũn putup, nũy yãy yõg tikmũ'ün hãm tu' mõy,

puyiy nũ mütik tu pip ka'ok, tu' hip nõmhã, pu nũ'.

10

¹ Mõyyex te 'Iyaet yõg tikmũ'ün xat, pu mõ xokxop hap, nũy haxyã', ha' xat, nũy tikmũ'ün pu hãmãyũmmũgã', puyiy 'ãmãnex xe'e hip, nõm te tikmũ'ün pupi' xok'ax. Yã Yeyox Kunnix mũn yũmũ yõg 'ãmãnex xe'e, tu yũmũ'ã hãmmaxnãhã'. 'ãmãnex xop te mõ xokxop hap pax, yã hãmãxatamuk xohix 'ĩhã mõ'hap, tu tikmũ'ün kuxa kummuk tupmã 'ohnãg. Yã tikmũ'ün xak, nũy yãy kuxa maxnã Topa pu', puyiy Topa yĩkãgnãg hã' mõg, pãyã yãy kuxa tupmã hok.

² Pax pu tikmũ'ün hãpxop mõ'hap'ax hã' yãy kuxa tupmã Topa pu', puxix hãpkummuk mĩy'ax xaxogã', ha hãpxop mõ'hap'ax kuxyãhã',

³ pa tikmũ'ün te hãpxop mõ'hap, nũy Topa pu haxyã', ha mõ'hap'ax te yãy yõg hãpxopmã'ax kummuk xutigãhã', yĩ' xaxok 'ohnãg, tu hãmãxatamuk xohix hã xe mõ'hap, tu xe mõ'hap,

⁴ Mũnũytut hep 'ãta, xix mot hep 'ãta te hãpkummuk mĩy'ax xaxogã 'ohnãg.

⁵ Yiy Kunnix nũn, tu yiy hãm tu' nũn 'ĩhã, tu' Tak Topa pu hãm'ãktux, hu:

"Åtak, xatep-tup'ah tikmũ'ün te xokxop mõ'hap, nũy tu haxyã',

pak yĩn mĩy.

⁶ 'Ap 'ãkuxa hittup'ah, 'ĩhã tikmũ'ün te 'ãkeppa mõ'hap,

puyiy hãpkummuk mĩy'ax xaxogã'.

⁷ Yiy 'ãte hãm'ãktux, hu: 'Yãk xip, Topah, tuk nũn, nũy 'õg putup'ax mĩy, ha kaxiy tik te' xat'ax yog tappet tu kax'ãmi', nũy 'ũgmũn 'ãktux," kaxiy.

⁸ Tu hãm'ãktux hãmãxap, hu: "Xatep-tup'ah tikmũ'ün te xokxop mõ'hap, nũy haxyã', 'Ap 'ãkuxa hittup'ah, 'ĩhã tikmũ'ün te 'ãkeppa mõ'hap, nũy hãpkummuk mĩy'ax xaxogã'," kaxiy. Tup-tup'okpa' xat'ax te' xat.

⁹ Tuk-nãy tu hãm'ãktux, hu: "Yãk xip, Topah, tuk nũn, nũy 'õg 'ũm putup'ax mĩy," kaxiy. Yã kaxiy Topa te mõ'hap'ax hitop kuxyãhã', nũy Kunnix 'ãktux 'ũyãnãn tu', ha yũmũg pupi' xok.

¹⁰ Yeyox Kunnix te Topa pu' yĩpkox pip, hu yũmũg kuxa kummuk tupmãhã', yã 'ãmniy puxet 'ĩhã' xok, tu yũmũg pupi' xok mĩpkupnix tu', 'a xep xok'ah.

¹¹ Yoneo yõg 'ãmãnex xop xohix hãm, tu 'ãmniy xohix 'ĩhã' hãm Topa pet kopah, tu mõ hãpxop hap punethok, xix xokxop mõ'hap punethok, nũy Topa pu' haxyã', pa mõ'hap'ax te yũmũg kuxa tupmã hok. 'Åmhok.

¹² Yiy Yeyox xok yũmũg pupi', 'ãmniy puxehñãg 'ĩhã' xok, tu xehomip xok 'ohnãg, yã'

puxi', 'ükux, ha Topa yīpxe'e hā' yūm, nūy nū mütik tu' xexka',

¹³ tu' hip, pu Topa tu ta tu gāyxop nōā', tu' kummugāhā 'üyānān tu', puyī' xohix yīpkox pi Yeyox xat'ax pu'.

¹⁴ Ha Yeyox xok puxet, nūy tikmū'ün kuxa tupmā, pu kuxa tu max Topa pu', yīy hōnhā Topa yīkāgnāg hā' pip.

¹⁵⁻¹⁶ Ha Topa Koxuk te hām'äktux hāmāxap, tu tikmū'ün kuxa tupmā'ax 'äktux, hu:

“Hāmyāxatamuk xohix nōg, koxix pa'ax nōy mīy,

yā Topa te' xuktux, tu yā yōgnū' xat'ax xex putup,

tikmū'ün putox tu' xex putup, xi' kuxa kopa' xex putup,” kaxīy.

¹⁷ Tuk-nāy tu hām'äktux, hu: “Äte' xaxogāp-tup 'ōg hāpkummuk mīy'ax, xix 'ōg hāpkummugā'ax 'äte' xutigā 'ohnāg,” kaxīy.

¹⁸ Tu hāpkummuk mīy'ax xaxogāhā', ha' kux, 'ap xe mō'hap'ah, 'ap xehomi xokxop mō'hap putup'ah. Yā' puxi'.

Topa yīkāgnāg hā yūmūg pip

¹⁹ Yīy yūmūg mōg Topa keppah, nūy nū mütik hām'äktux. Yā Yeyox Kunnix xok yūmūg pupi', nūy yūmūg nūnnā', 'üyīy yūmūg mōg, nūy Topa mütik hām'äktux, tu kuxānōg 'ohnāg.

²⁰ Hōmā topixxax max te nōm hāmyīkox mō'yīnnīn, pu tikmū'ün mō tu xakux hok, ha Yoneo yōg 'āmānex xat'ax te' xut, nūy mōnāy, ha kaxīy Yeyox xok, yūmūg pupi' xok, nūy yūmūg mōgā Topa yīkāgnāg hā', nūy yūmūg hi xe'ēgnāg.

²¹ Ha yūmū yōg 'āmānex xe'ēgnāg te Topa pet xe'ēgnāg kopa' xat, tu pexkox tu' xat, 'ūxuxet'ax Yeyox Kunnix.

²² Äpu yūmū mōg Topa yīkāgnāg hā, päyā yā yūmūg kuxap-xet, tu yāy pu mō'āmā hok, 'ümām ka'ok tu', Topa te yūmū yōg hāpkummuk mīy'ax xaxogā hah, pu tu kux, ha yūmūg putox pīx, 'ū yūmū hāpxopmā kummuk kux, 'üyīy yūmūg hāpxopmā max 'üyānān tu'.

²³ Topa te hām'äktux xex, 'äpu yūmūg kuxa mām ka'ok nōm hām'äktux kopah, Topa te yā koit 'ohnāg, yīy 'ūgmū'äte' hip, pu Topa yūmū'ā pexkox yōg hāpxop popmā', ha yūmūg nōy pu' xuktux.

²⁴ Äpu, yūmūg xape kuxa ka', nūy 'üm hāk tehet, 'üp-tup pax tu', nūy tu xape hā hāmmāxnā'.

²⁵ 'Ükuxa mām ka'ok xop te yāykotīnnā' pip, ha ta mōy kamah, nūy nōm xop mütik pi', nūy Topa pu hām'äktux. 'Üxaxok hok. Tikmū'ün nōy mōg'ax kuxyāhā', 'a' max'ah. Päyā 'āmōg pax, nūy 'änōy mütik Topa tu 'ākax, nūy mō yāy nīynām. Yā yūmūg kuxyā nūn putup, yīy yāy tu nū'nā' pax.

²⁶ Topa te xa hāmyūmmūgāhā', yīy 'äxop te' yōg hām'äktux xe'e yūmmūg, hu hāpkummuk mīy kux, nūy xehomip hāpxopmā kummuk hok, 'üp-tup hu' mīy hok, ka Topa 'ōg hāpkummuk mīy'ax xe xaxogā hok. Päyā' xax, xa Topa pu hāpxopmā max. Yā Kunnix xok tap, xayīy 'äxop hāpkummuk mīy'ax kux.

²⁷ Hu 'äkuxānōg, yā Topa te 'ōg hāpxopmā'ax kopit putup, tu kuxap xe'e hā' gāy xop kix xexkap-tup, yā Topa te' yīpkox hok xop nōāp-tup kuxap xe'e hā.

²⁸ Yoneo yōg tikmū'ün hittap te Mōyyex yōg xat'ax pu' yīpkox 'ohnāg, tu hāpkummuk mīy pax, tikmū'ün nōy 2, pe 3 te' pēnā', puxi' xexka xop nōm putex, tu' kuxa ka'ohnāg.

²⁹ Topa te putep-tep mīy putup, 'lhā tikmū'ün te nōm kutok putup nōg? Yā nōm kummuk xop te Yeyox hep 'āta kutōgnāg pe'paxex, hu: “Yāk-tōgnāg, pu Yeyox Kunnix 'ügkuxa tupmā,” kaxīy. 'Üyīpkox hok, puxix Topa' yānān tu' kummugā xexka', hāpkummuk xexka mīy ha'. Yā Topa Koxuk te mō'yāy xe'ēgnāg, ha tikmū'ün te Topa Koxuk kummuk 'äktux, tu' mānōg, puxix Topa' yānān tu' kummugā xexka', hāpkummuk xexka mīy hah.

³⁰ Yūmū'äte hāmyūmmūg, tu Topa te hām'äktux yūmmūg, ha: “Äte hāpkummugāp-tup 'üyānān tu', nūy tu nōy yōg kummuk mīy'ax tu pago,” kaxīy. Tu xe: “Topa te yāy yōg tikmū'ün yōg hāpxopmā'ax kopit putup, nūy nō hāpxopmā'ax yūmmūg, 'ok pe max, 'ok pe kummuk,” kaxīy.

³¹ Topa gāy tikmū'ün tu', tikmū'ün te hāpxopmā kummuk tu' gāy, yīy 'äkuxānōg, nūy Topa xe'ēgnāg gāyā hok.

³² Hōmā Topa te xa hāmyūmmūgāhā', ha 'äxop xūy, ha' kummuk xop te 'äkummugāhā', päyā 'äkuxa tuknōg'ohnāg. 'Üxaxok hok.

³³ Ha' gāy xop te' yāg mānōg, tu' xūyāhā', pu tikmū'ün xohi' pēnā', ha' yāg nōy xūy 'ünōy xop mütik, yā 'äkuxap-xet 'änōy kuxa mütik.

³⁴ Tu kanet kopa' pip xop kuxa ka', tu 'äkuxa hittap 'lhā' kummuk xop te 'ōg hāpxop xohix hā' xupxet, hāmyūmmūg tu hā hittap, yā 'ōg hāpxop māynāg pip ka'ok pexkox tu', ha' nōg 'ohnāg.

³⁵ Yīy 'äkuxa tuknōg hok, ka Topa yōg putat xax, ha Topa te xa hāmmāxnā xexkap-tup 'üyānān tu'.

³⁶ Hāpxopmā'ax ka'ok hā' tot, nūy Topa pu 'äyīpkox pi', nūy nōm putup'ax mīy, xayīy pexkox yōg hāpxop pop, yā Topa te xa hām'äktux xex.

³⁷ Yīy Topa yōg tappet te:

“Nāy. Hāpxip kutōgnāg kopxik nūn putup mō'ka'ok.

³⁸ Ha tikmū'ün te hāmyok mīy, tu' kuxa mām ka'ok,

puxix tu hi xe'e', pa tikmū'ün te yōgnū putat xak,
nūy putpu' mōg, kopxik kuxa hittup 'ohnāg,"
kaxiy.

³⁹ Pa yūmū'āte Topa yōg putat xak putup'ah, hu yāy 'üm nōāp-tup'ah. 'Āmhok. Yūmūg kuxa mām ka'ok, nūy yūmūg hi xe'e, nūy Topa yōg putat hā yūmūg mō kumak mōg.

11

Tikmū'ün kuxa mām ka'ok Topa kopah

¹ Yūmūg kuxa mām ka'ok Topa kopah, hu hāmmax hūp, pu Topa pexkox yōg hāpxop yūmū'ā' popmā', ha ta yūmū'āte nōm hāpxop pēnā hok nōmhā.

² Yā mōnāyop hittap kuxa mām ka'ok kamah, yiy Topa tep-tup pax.

³ Yūmūg kuxa mām ka'ok, hu hāmyūmmūg, yā Topa te pexkox mīy xix hahām, yā hāpxop xohix mīy, hām'āktux'ax hā' mīy, tu hāpxop pēnā hok hā hāpxop mīy, pu tikmū'ün pēnā'.

⁴ Yā mōnāyop hittap 'Ameo kuxa yūm ka'ok, hu mō kahnēn hap, nūy Topa pu haxyā', ha Topa tep-tup pax, pāyā' taknōy Kāyiy yōg mō'hap'ax putup 'ohnāg. Ha 'Ameo te hāmyok mīy, 'ūkuxa yūm ka'ok tu', ha Topa tep-tup pax, ha yūmū'ā hāmyūmmūgāhā'.

⁵ Xix mōnāyop hittap 'Ēnōg kuxa yūm ka'ok, hu' xok 'ohnāg. Yā Topa te hām tu' xut, nūy pexkox ha' mōgā', ha tikmū'ün te 'Ēnōg xak, nūy tu pēnā', pa' pēnā'ah, ha' kux. Ha Topa yōg tappet te: "Topa te 'Ēnōg putup pax," kaxiy.

⁶ Tikmū'ün kuxa yūm hok, puxix Topa nōm putup nōg. Pāyā tikmū'ün kuxa yūm ka'ok tu: "Yā Topa xip!" kaxiy, tu Topa xak, puxix Topa nōm tikmū'ün ha hāmmaxnā'.

⁷ Xix mōnāyop hittap Nōe kuxa yūm ka'ok, hu Topa te nōm pu hāmyūmmūgāhā', tu 'āmnīy mō'nā'ax yōg hāpxopmā'ax yūmmūgāhā', ha' yīpkox xip, tu mīpkox xexka mīy, kōnāg xexka yīmū' mōgāhā', pu nōm mōnāy, nūy kopa' pi', xi' xape xop te' kopa' pi', nūy kōnāg hā mō' tutnā hok, puyiy tu xakix hok. Ha kaxiy Nōe te Topa hā' puknōg xop yā' kummuk 'āktux, 'ūkuxa mām 'ohnāg hah, ha Topa te Nōe kuxa tupmāhā', 'ūkuxa yūm ka'ok hah.

⁸ Xix mōnāyop hittap 'Amanām te Topa te' xānā'ax 'āpak, tu' yīpkox xip, hu' mōg hāptox ha, Topa te hām'āktux xex hah. Ha' kuxa yūm ka'ok, tu yāy yōg hām nīm, tu piyā' mōg yūmmūg, 'okpa' mōg,

⁹ tu' kuxa yūm ka'ok, hu' puknōg xop mūtik tihī', ha Topa te 'Amanām pu nōm hām xexka hōm putup. Tu topixxax ka'ok hā' pet, 'ūk-tok 'Iyak mūtik, hak-tok Yako pet kama topixxax ka'ok hā, ha Topa te nōm mūtik hām'āktux xex kamah, nūy tu hāpxexka hōm.

¹⁰ Yā 'Amanām te' hip, nūy Topa yōg kōmēn xe'e tu' xihip, ha pexkox tu' yūm kōmen, ha' koxyōy hok, Topa te' mīy hah.

¹¹ Xix mōnāyop hex Xat kuxa yūm ka'ok kamah, huk-tok put, tu ta kutut, tu Topa yōg hām'āktux xex yūmmūg, tu' kuxa yūm ka'ok, pu Topa 'ūk-tok putnā.

¹² Hā kaxiy 'Amanām kutut, tu' pu'uk, pāyā' mōkputox xohix xexka punethok, māyōnnāg putuk, xix hāpkux yōg 'āmot xohix putuk.

¹³ Ha nōm xop kuxa mām ka'ok, tu mōktu' xakix, tu Topa yōg hāpxop 'a' pop'ah, pa hāptox tu' pēnāhā', tu hāmyūmmūg, tu yāy mūn puknōg 'āktux, tu hāmyāxatamuk xohix hā hāpkumep, tu' pet 'ohnāg hām xexka tu',

¹⁴ tu hām'āktux, tu yāy yōg hahām xak pexkox tu',

¹⁵ 'a putpu' mōg putup'ah. Pax pu yāy yōg hām hittap xax, nūy putpu' mōg, puxi' mōg,

¹⁶ pap-tup nōg, tu pexkox tu hām nōy xak, nūy ta tu' pi', ha Topa te nōm tikmū'ün hā Topa xe'ēgnāg, tu nōm tu yāyhahup 'ohnāg, hu kōmēn xe'ēgnāg mīy pexkox kopa, tu ta tu' pip ka'ok.

¹⁷ Xix 'Amanām kuxa yūm ka'ok, yiy Topa te' yōg hāpxopmā'ax kopit, tu' xat, puk-tok 'Iyak mō'hap, pu Topa 'Amanām kuxa kopit, nūy ta tu hāmyūmmūg, 'ok pe 'Amanām yīpkox xip, 'ok pe' yīpkox 'ohnāg. Hōmā Topa te hām'āktux xex tap, ha 'Amanām mōkputox punethok 'āktux, pa 'Amanām yīpkox xip, tu mōk-tok puxehnāg hap'ax,

¹⁸ 'Thā' kuxa yūm ka'ok hām'āktux xex'ax kopah, ha: "Āk-tok 'Iyak hā 'āmōkputox tu punethok," kaxiy.

¹⁹ Pa 'Amanām te Topa yūmmūg, tu tikmū'ün putpu hinnā'ax yūmmūg, Pax puk-tok xok, puxi' tak putpu' put, ha 'Amanām kuxa yūm ka'ok.

²⁰ Xix mōnāyop 'Iyak kuxa yūm ka'ok, hu Topa te hāmmaxnā'ax 'āktux 'ūk-tok Yako pu', xik-tok 'Eyao pu' xuktux,

²¹ Xix mōnāyop Yako kuxa yūm ka'ok, tu' xok putup, 'Thāk-tok Yoye kutok pu hāmmaxnā'ax 'āktux, tu kup tōy tu' xup, 'Thā' kuxa te' yēy Topa keppah.

²² Xix mōnāyop Yoye kuxa yūm ka'ok kamah, tu' xok putup, 'Thā 'āmnīy mō'nā'ax 'āktux, tu tikmū'ün te hāpxexka 'Eyit tu nū'pa'ax 'āktux, tu' xat, pu' yōg xokxax mō'tat, nūy hāpxexka nōy tu nō hāpkot.

²³ Ha tik te hāpxexka 'Eyit yōg tikmū'ün xohix xat, tu xonat xop xat, pu 'Iyaet yōg tikmū'ün kutok pit xop xohix kix, 'Thā' tut te' put, ha mōnāyop Mōyyex mūg tak, xi' mūg tut tek-tok pit put, tu' xaptop, tu mēy 3 hā' xaptop, puyiy xonat xop pēnā hok. Yā māynāg kakxop, yī' tak xi' tut te' xat'ax pu yīpkox 'ohnāg, tu' xaptop, puyī' gāy xop 'ūk-tok putex hok.

²⁴ Xix Mōyyex kuxa yūm ka'ok, tu' tuk, tu mōktu xiptap, tu' xat'ax kutok hex nīm, pu tikmū'ūn te yā' xat'ax kutok hex kutok 'āktux hok,

²⁵ Yāp-tup, tu Topa yōg tikmū'ūn mūtik xūy putup, tu hāpkute'ex kummuk putup nōg,

²⁶ tu hāmp'e'paxex, hu: "Yā' max Topa yōg yīmōgatux xop hāk xūy, pāyā' kummuk, 'āte hāpxexka 'Eyit yōg tayūmak xohix pop," kaxīy. Tu pexkox yōg hāpxop puxet xak, puyī' pa'.

²⁷ Yā' kuxa yūm ka'ok 'Īhā hāpxexka 'Eyit nīm, tu tik te' xat'ax yīpkutuk 'ohnāg, xi' gāy'ax yīpkutuk 'ohnāg, tu mō'kuma' mōg, tu Topa 'ātigāhā', 'Īhā' pēnā hok,

²⁸ tu' kuxa yūm ka'ok, tu 'āmuk xexka hāmāxap mīy 'ūxuxet'ax Nōā'yēn, ha' xat, pu hāmyāxatamuk xohix 'Īhā' mīy, tu' xat, pu kahñen hep 'āta hā mō'yīnnīn'ax muk, pu pexkox yōg nū'kutnā'ax mō tu nā hok, nūy tikmū'ūn kutok hāmāxap xohix kix hok.

²⁹ Xix 'Iyaet yōg tikmū'ūn kuxa mām ka'ok, hu kōnāg xexka 'Āta xak, ha hāmnaq, tu' xup 'ohnāg, 'Īhā tikmū'ūn te' xak. Ha 'Eyit yōg xonat xop xak putup, ha ta kōnāg xexka te mō'nīy, ha kōnāg hāp nūm, tū kopap-nūm.

³⁰ Xix 'Iyaet yōg tikmū'ūn kuxa mām ka'ok, tu kōmēn xexka Yenikot yīmap hā' mōg, tu xe' mōg, tu mōktu xohix te 7, ha kōmēn hām'āta ka'ok, tu kōmēn xohix yīmap, tu yāy koxyōy, ha': Nō'!

³¹ Xi' xotit Ha'ap kuxa yūm ka'ok, ha ta 'Iyaet yōg tik 2 te kōmēn puknōg Yenikot ha' nūn, nūy puknōg yōg kōmen pēnā', ha Ha'ap te tik pēnā'ax 2 xaptop, puyīy xonat xop kix hok, yīy Ha'ap 'a xok'ah, pāyā Yenikot yōg tikmū'ūn xohix xakix.

³² 'Āte putep mūn 'āktux'ax? Yā hām'āktux tox 'ātep-tup'ah, nūy Yine'ām 'āktux, xix Manak 'āktux, xix Xānxām 'āktux, xix Yepte 'āktux, xix Namix 'āktux, xix Xāmō'eo 'āktux, xix Topa pupi hām'āktux'ax xop 'āktux.

³³ 'Ūxohix kuxa mām ka'ok, hu hāpxexka yōg tikmū'ūn xohix mūtik yāytuk-mīy, tu hām paha', ha' mōg, ha hāpxopmā max, yīy Topa te tu' hāpxop popmāhā', hām'āktux xex tu tu' popmāhā', ha Topa te' ka'ogāhā', pu tu hāmgāy yīkox mō'yīnnīn, pu' kix hok,

³⁴ ha kuxap xexka kuxyāhā', tu' xupaha', pu mīkax xexka hāp-tex hok, ha' pu'uk, ha Topa te' ka'ogāhā'. Yā' puknōg xop mūtik yāykix tu mōktu hām paha'.

³⁵ Ha 'ūn kuxa mām ka'ok, yī' xape te putpu hi', 'ūxakix ka'ok, tu putpu' hi'.

Ha' gāyxop te' yāg xūyghā', tuk-te'ex kummuk, tu mōktu' kix, ha' xupmāp-tup 'ohnāg, nūy tu hi xe'ēgnāg.

³⁶ Ha' gāyxop te' yāg pu' hupmāhā', tu' kix kakixnāg, tu' yāg nōy hīy, nūy kanet kopa nū'xok,

³⁷ tu' yāg nōy kix mīkaxxap putux hā, xi' yāg nōy pot xehot hā', xi' yāg nōy kix mīkax xexka hā. Ha hāpkumep hitop tu', tu kahñen xokxax mō'tat, xix mōt xokxax mō'tat, tu hām hok, ha' xūyghā', tuk-te'ex kummuk,

³⁸ ha hām panip tu' hāpkumep, tu yīktix pepi' mōg, tu hāpkox kopa' pet. Tu' max, ha hām xexka yōg Topa hā' puknōg xop kummuk.

³⁹ Ha' kuxa mām ka'ok, yīy Topa tep-tup pax, tu nōm pu hām'āktux xex, pa Topa yōg hāpxop 'ap pop'ah.

⁴⁰ Yā Topa te nōm xop hipmāhā', pup-xehnāg hā' pop hok, pāyā' hip, nūy yūmūg mūtik pexkox yōg hāpxop xohix pop.

12

Topa te yūmū'ā hā 'Ātak

¹ Yā nōm tikmū'ūn xohix te' hip, 'ūyīy yūmūg kuxa mām ka'ok, yūmūg xape hitap kuxa mām ka'ok putuk, 'ūyīy yūmūg xohix pexkox yōg hāpxop pop. Yūmūg mōg mō'ka'ok Topa yōg putat hā, kopxix hāpxop putux nīm, nūy mōg xupmān. Yā kaxīy yūmū'āte hāpkummuk mīy hok, nūy Topa puk yīpkox pi'. Yā hāpkummuk mīy'ax te hāpxop putux putuk, yīy mīy hok, 'ūyīy yūmūg mōg mō'ka'ok Topa yōg putat hā', tu kuxānōg 'ohnāg.

² Yeyox pe yūmūg paxeh, 'Īhā yūmūg mōg. Yā Yeyox mūn te yūmūg kuxa māmāhā', 'ūyīy mām ka'ok nōm kopah, ha yūmūg ka'ogāhā', 'ūmōg Topa yōg putat hā yūmūg. Yeyox kuxa tuknōg 'ohnāg, tu' xok mīpkupnix tu', yūmūg pupi' xok, tu' xūy xexka', pāyā yāy pe'paxex, hu: "Yāk xūy kutōgnāg," kaxīy, 'Īhā' gāy xop nōm pu' hupmāhā'. Pāyā Yeyox kuxa hittup xexka', tu Topa hip tu', pu Topa pexkox yōg hāpxop popmā', ha Topa yīpxe'e hā' yūm nōmhā, nūy yāy 'Ātak mūtik tu xexka pexkox kopah.

³ Yeyox yāy xūy'ax pe tu paxeh, xi' kummuk xop gāy'ax pe tu paxeh. Yā Yeyox xūy punethok hā' tot, 'ūyīy kamah yūmūg kuxa tuknōg hok, nūy Topa yōg putat xak hok.

⁴ 'Āxop te yāy putup 'ax mīy kutōgnāg. Topa pu 'āyīpkox pip, pāyā kama yāy putup'ax mīy. Yā' max xa Topa putup'ax puxet mīy, xayīy hāpkummuk mīy'ax xohix tu kux.

⁵ 'Ok 'āxop te Topa yōg hām'āktux xaxok? 'Āxop yā Topa hā 'āk-tok xop, yīy xa hām'āktux, hu:

"Xonnē', 'ūg'āpax! 'Ākuxa tuknōg hok 'āte 'āmānōg hah.

⁶ Yā 'āmānōg, nūy xa hāmyūmmūgā', xayīy 'āmax,

'āmūn yāk mūn hā 'āk-tok xop tu',

ha mō'āyāy xe'ēgnāg," kaxīy.

⁷ 'Āxūy, tu xa hā' tot, Topa yā 'āxop hā 'Ātak, tu xa hāmyūmmūgāhā', 'ōg 'ātak putuk. 'Ok

xip kaxkop 'üm, 'üyög 'ätak te nôm mânög hok? 'Ap xip'ah.

⁸ Pax pu Topa 'ämânög hok, yîy ta 'äxop 'a Topak-tok'ah, hak-tok xohix mânög, nûy tu hâmyümmügä', puyîy hâpxopmâ max 'üyânân tu'.

⁹ Yümüg tak xohix te yümüg mânög, nûy tu hâmyümmügä', ha yümüg yîpkox pip, tu' tak max pekpaxex. Yîy 'äpu yümüg Tak Topa pu 'äyîpkox pi', xayîy 'âhi xe'ëgnäg.

¹⁰ Yümüg tak te yümü'ä hâmyümmügähä', 'ihâ yâ yümü'ä hâ kaxkop, hâmyok tu hâmp'e'paxex hah, pa Topa te hâmyümmügähä' 'ü yümüg tu max, nûy Topa putuk yümüg tu max xe'ëgnäg.

¹¹ Topa te yümüg mânög, ha yümüg kuxa hittup 'ohnäg, pa hâpxip kutögnäg, 'ihâ yümüg kuxa mâm, ha yümü'äte hâpxopmâ max, tu hâmyok mîy 'üyânân tu'.

Topa te hâmyümmügähä'

¹² 'Äyok, 'äknihä xihip, 'äkuxa tuknög hok, nûy Topa yög putat hä mög.

¹³ Tu hâmyok hä mög, nûy tikmü'ün pu'uk mögä max, nûy nôm ka'ogä'.

¹⁴ Tikmü'ün te 'äyîmap hä' pip, yîy nôm mütik yäytuk-mîy hok, päyâ hâpxopmâ max, xayîy Topa pênâ'. Yâ hâpxopmâ'ax kummuk xop te Topa pênâ hok.

¹⁵ Topa te xa hâmaxnâhâ', 'ög pa 'äti', nûy Topa yög putat xax hok, xa tikmü'ün kummugä hok, xix xüygä hok, ka 'äxop mînta xüy putuk, nôm te tikmü'ün xüygähä', yâ 'änöy pu' xüygä hok.

¹⁶ 'Ög pa 'äti', nûy 'änöy hâ xupxet hok, xix Topa yög hâpxop 'äktux kummuk hok, 'Eyao putuk. Tik hittap 'Eyao yâ mônäyxop 'Iyak kutok hâmäxap, tu yây tak yög hâpxop xohix pop'ax. Ha Topa te hâmäktux xex tap, tu 'Iyak kutok hâmäxap ha hâmaxnâ'ax. Päyâ 'Eyao kummuk, tu' tak yög hâpxop pe'paxex 'ohnäg, 'ap hâmaxnâ'ax 'üm putup'ah, yîy 'üxohix nöy yânân, tu' taknöy kuhmöy Yako mütik nöy yânân, nûy 'ämuk kutügnäg pa', 'üp-tup xüy tu'.

¹⁷ 'Äxop te mônäyxop yög hâmäktux yümmüg max. Hâpxip 'ihâ 'Eyao te hâmp'e'paxex, tu yây tak yög hâpxop xak, xix hâmaxnâ'ax xak, hu xe yâ nō' nöy yânân putup, tu' potaha', tu' xak, päyâ' kux. 'Ap xe' nöy yânân'ah.

¹⁸ 'Äxop te Topa yîkägngä hä 'äpip. Yâ 'Iyaet yög tikmü'ün hittap te yîktix Xinây kaka' pip, tu hâpxahîgnäg tu' pip, tu yîktix mō'kâmnäg pênâhâ', tu Topa yög kuxap xexka pênâhâ', tu hâptup 'ihâ hâpkoxtap pênâhâ', xix texgây tu' yânâm pênâhâ', tu kuxânög xexka'. Päyâ 'äxop te nôm hâpxopmâ ka'ok pênâ 'ohnäg nômhâ, yâ 'äkuxânög 'ohnäg.

¹⁹ Ha nôm tikmü'ün te mîxux xop tu kâyâ'ax 'äpak, xix Topa yîy 'äpak, tu hâmp'äpak, tu kuxânög xexka', hu' xak, puyîy tu yîy hok,

²⁰ Topa yîy hä' tot 'ohnäg hah, ha' xat, hu: "Yîktix 'äpit hok, pe tikmü'ün, pe xoxkop, ka mîkaxxap hä tikmü'ün 'ätux, tu 'äp-tex!' kaxîy.

²¹ Tikmü'ün te Topa yög hâpxopmâ ka'ok'ax pênâhâ', tu' kuxânög xexka', yîy Mōyyex te: "'Äte yây puxu'ux, 'ügkuxânög tu!'" kaxîy.

²² Pa 'äxop kuxânög 'ohnäg, yâ yîktix Xiâm tu 'ämōxaha', Topa xe'ëgnäg yög kômên tu 'ämōxaha', pexkox yög kômên Yenoyanên tu 'ämōxaha', tu pexkox yög nü'pok xop xohix punethok pênâhâ',

²³ xix Topak-tok xop te mâxap pênâhâ', ha yây tu nü'nâhâ', tu' kuxa hittup xexka'. Yâ Topa te nôm xop 'äxet'ax kax'âmi pexkox kopah, pu yây mütik tu pip ka'ok pexkox tu', xix 'äxop te Topa pênâhâ', ha' pa te hâmyümmüg, tu' hep xop xohix yög hâpxopmâ'ax kopit putup, tu tikmü'ün yög mîy'ax xohix tu pago. Xix tikmü'ün xakix xop pênâhâ', ha hâmyok mîy, yâ' kuxa tup, Topa te' tupmähä', pu tu kuxa max xe'ëgnäg.

²⁴ Xix Yeyox pênâhâ', ha' pa'ax tup mîy, tu' xok yümüg pupi', tu yây hep 'äta nü'nâhâ mîpkupnix tu', yâ tik hittap Kayîy gây, tu' taknöy 'Ameo putex, tu' yög hep 'äta nü'nâhâ', päyâ Yeyox hep 'äta nü'nâhâ', pu hâpkummuk mîy'ax xaxogä'.

²⁵ 'Ög pa 'äti! Tikmü'ün yîpkox 'ohnäg, puxix tu xakix, tu mōxa hok, nûy Topa mütik tu pip ka'ok, yîy 'äpu yümüg yîpkox pip Topa yög hâmäktux pu', nûy yâ yümüg hi xe'e'.

²⁶ Hōmâ Topa yîy'ax te hâmp nuhuk, pa hōnhâ Topa te: "Hâpxip 'ihâ 'äte xe hâmp nuhuk putup, ha möktu pexkox yây nuhuk kamah," kaxîy.

²⁷ Tu xe hâmp nuhuk 'äktux, ha ta hâmp xexka yög hâpxop nōap-tup, pu pexkox yög hâpxop tu pip ka'ok.

²⁸ Yîy 'üyâ yümüg kuxa te Topa max 'äktux. Yâ Topa mütik yümü'äte' xat putup, tu' xat kux 'ohnäg. Yümü'äte Topa max 'äktux, tu nôm pu yümüg nüktettex, nûy yümüg kuxa' yêy, yâ Topa tep-tup kaxîy.

²⁹ Hamün. Yümü yög Topa ka'ok, tu kuxap putuk. Yâ kuxap te hâpxop xohix nōa', ha kaxîy Topa te tikmü'ün kummuk nōap-tup, nûy 'ümîy'ax kummuk tu pago.

13

¹ 'Äxape xop putup pax, nûy tu nôm putup kux hok. 'Öhōm yâ Kunnix yög tikmü'ün, yîy 'äxop hä 'äxape'.

² 'Äxape puknög xapit, putnü, nûy 'äpet kopa xihip. Hōmâ tikmü'ün hittap te' puknög xop xânâhâ', nûy yây pet tu' pi', nûy nûy mō'nîynâm, tu hâmyümmüg hok, 'ihâ pexkox yög nü'pok xop xânâhâ', ha tikmü'ün pet kopa mō'xip.

³ Kanet kopa' pip xop xaxok hok, pāyā mō'nīynām, xa tep-tup kamah, pu 'ānōy 'āhīy'ax xaxok hok. Xix 'āxape xop xūy'ax xaxok hok, nūy tu mō'nīynām. Xatep-tup kamah pu 'ānōy 'āxūy xaxok hok, nūy mō'ānīynām.

⁴ Yā' max pu yāytax, nūy tu xetut mūtik yāy kep mūg nōm, xī' yīpcox mūtik yāy kep mūg nōm. Topa te' nōy hā' xupxet xop kopit putup, xī' xonnix xop kopit putup, nūy nō hāpkummugā'.

⁵ 'Ok tayūmak putup te 'āp-tex? 'Ūxupkumīy hok, xix 'ānōy yōg hāpcox putup hok, xayīy 'ōg hāpcox tu 'āhittup, yā' puxi'. Topa te xa hām'āktux xex, hu: 'Āte yā 'ānīm 'ohnāg, nūy 'āmūtik 'āti', kaxīy.

⁶ Yīy yūmūg kuxānōg 'ohnāg, nūy tu hām'āktux, hu:

"Topa te mōgnīynām, yīy 'ūgkuxānōg 'ohnāg. Yā tikmū'ūn 'ūm tek kuxa kummugā hok," kaxīy.

⁷ Āpēnā max'ax xop xaxok hok, Topa yōg hām'āktux xa' xuktux hah, ha' kuxa mām ka'ok Yeyox kopah 'ihā' xakix, yīy xax, xa 'ākuxa yūm ka'ok kamah, nūy yā 'ānōy yōg hāpcox'ax tat.

⁸ Yeyox Kunnix xip ka'ok. Yā hōmā hāmyāxatamuk xohix hā' xip ka'ok, xix hōnhā' xip ka'ok, xix hāptup xohix 'ihā' xip ka'ok putup mō'kuma' mōg. Yamūn yīnmūn, tu yāyhā' nōy 'ohnāg, tu yāy yānān 'ohnāg.

⁹ Tikmū'ūn te hāmyūmmūg kummuk hā xa hāmyūmmūgāp-tup, ha ta 'āyīpkox hok, pu 'āmōgā kummuk hok. Yā Topa te yūmūg kuxa ka'ogāhā', 'ūtu max, pu yūmūg'ā hāmmāxnāhā'. Ha' puknōg xop te 'āxat, tu' xat hok, xa' xit hok, yīy 'āka'ogā' 'ohnāg.

¹⁰ Mōyyex te Yoneo yōg 'āmānex xop xat hok, pu xogyīn mō'hap' ax mā hok, tikmū'ūn te Topa pu nōm xogyīn mō'hap, nūy haxyā',

¹¹ hā' yōg 'āmānex xat'ax te xokxop hep 'āta tat Topa xip'ax xe'ēgnāg tu', pu Topa yā tikmū'ūn yōg hāpkummuk mīy'ax xaxogā', pu tu kux. Ha xokxop yīn tat, Yoneo yōg tikmū'ūn te' pip'ax kūnāpa' tat, nūy mōy mō'hap, ha' nōg.

¹² Yīy Yeyox xok kōmēn xexka kūnāpa kamah, nūy yāy hep 'āta nūnnāy, pu Topa tikmū'ūn kuxa kummuk tupmā', pu tu kuxa max.

¹³ Āpu yūmū mōg Yeyox hah, nūy Yeyox pe mōg, nūy yūmūg xūy kamah. Hōmā Yeyox xūy, 'ūkummuk xop te nōm pu' hupmāhā', ha' xūy, ha kaxīy yūmūg xūy kamah, ha' kummuk xop te yūmū'ā' hūpmāhā'.

¹⁴ Hām xexka yōg kōmēn xohix nōāp-tup, 'āpu yūmū'āte pekkox yōg kōmēn xax, yā nōm kōmēn xip ka'ok, yīy yūmū'āte' xak, nūy pekkox ha yūmūg mōg.

¹⁵ Hu yūmū'āte yāy mūn popmāhā Topa pu', nūy nōm max tāmnāg 'āktux, tu Topa pu

hām'āktux, puyī' xupax, hu: 'Āmax xe'ēgnāg, Topah! Kaxīy.

¹⁶ Hāpcox'ax max, tu' xaxok hok, nūy 'ānōy hā' ātehet. Yā Topa tep-tup.

¹⁷ Āpēnā max xop pu 'āyīpkox pi', nūy nō xat'ax mīy. Nōm xop hām Topa pu', tu 'āpēnānā' pip, tu Topa pupi' āpēnā max, xa 'āxop mō kuma mōg Topa yōg putat hā. 'Āyīpkox pi', puxix 'āpēnā max, nūy yāy hāpcox'ax tu kux. 'Āyīpkox pip hok, puxix yāy pu hāpkummugā', ha 'āpēnā'ax xop yāy hāpcox'ax tu' kuxa hittup 'ohnāg.

¹⁸ Topa pu hām'āktux pax, nūy ta tu tu' kax, puk mūg ka'ogā'. Hak mūg kuxa te yāy yīkopit, tu yāy yōg hāpcox'ax 'āktux. Yāk mū 'āte' xak nūy hāpcox'ax max pax.

¹⁹ Tu xa tu' xak nām, xa 'āxop Topa tu xax, puyīy mōgkutnā ka'ok 'āhah.

Topa pu hām'āktux

²⁰ Topa te yūmūg xuxyā Yeyox putpu hīnnāhā', ha Topa yōg tikmū'ūn pēnānā' xīp. Yā' pēnā max'ax xexka'. Kaxīy tik te yāy yōg kahnēn xop pēnā max, yīy Topa te' pa'ax tup mīy, ha Yeyox xok, tu' hep 'āta nū'nāhā', pu Topa pa'ax mīy. Ha' pa'ax xuxyā' 'ohnāg.

²¹ Pūyā Topa 'ākuxa māmā', xix xa hāmmāxnā', xa 'āyīpkox pi'. Pūyā Topa 'āka'ogā', xayīy hāpcox'ax max, nūy Topa yōg putup'ax mīy. Pūyā Topa yūmūg kuxa tupmā', 'ū kuxa tu max, tuk putup tu'. Pūyā tikmū'ūn xohix Kunnix max xe'ēgnāg 'āktux, nūy tu' xuktux mō'kuma' mōg.

Tute hām'āktux kux

²² Ūkxape xop, 'āte xa tu' xak, xa 'āpax, nūy tuk 'āhā' tot. 'Āte xa kax'āmi', nūy 'āk'ogā', xa 'ākuxa tuknōg hok. 'Ap tox'ah nūhū tappet.

²³ Āte xa hām'āpak'ax max 'ūm'āktux, xayīy hāmyūmmūg. Yā yūmūg xape Timōn te kanet tu' xip tap, ha' xut pu mōg. 'ūg ha' nūn, kopxix mō'kutnā 'āxop hah, puyīy 'āpēnā.

²⁴ Āpēnā max'ax xop xohix pu 'āneo, xix Topa yōg tikmū'ūn xohix pu 'āneo. Hāpexka 'Itat yōg yūmūg xape xop te 'āneo kamah.

²⁵ Puyā Topa' xohix ha hāmmāxnā'. Tu ta tu' kux.

TIAK TE KAX'ĂMI'

¹ Ūgmūn Tiak. Topa pu 'āte hāpxopmāhā', xix yūmūg xuxyā Yeyox Kunnix pu 'āte hāpxopmāhā', tu Topa yōg tikmū'ūn te hāpxexka xohix tu' pip xop pu' āneo.

Ākuxa yūm ka'ok, nūy tu hāmyūmmūg

² Ūkxape xop, 'ākuxa hittup Ṫhā 'āxūy xexka',

³ yā 'ākuxa mām ka'ok, hu' xūy'ax hā' tot, nūy Topa yōg putat xak hok,

⁴ nūy 'āmōg kuma 'āmōg, nūy Topa hā 'āxiptap xop, nūy tu hāpxopmā max xe'e'.

⁵ Tikmū'ūn te hāmyūmmūg hok, puxix Topa tu' xax, pu tu hāmyūmmūgā', ha Topa hittup, tu hāmyūmmūgā punethok, tu mōktu xohix, yā Topa mūn max, tu' hok hā tikmū'ūn xohix pu hāmyūmmūgāhā',

⁶ yīy ta tu' xax, Ṫhā 'ākuxa yūm ka'ok 'ōm kopah, tu Ṫkopit hok. Tikmū'ūn kuxa yūm hok te kōnāg xexka mahap'ax putuk, tu' kuxa kopa mahapnām, tu' yūm 'ohnāg.

⁷ Topa te nōm xop pu hāmyūmmūgā 'ohnāg,

⁸ 'ūpu'uk hah, 'ap-tox puxet'ah Kunnix putox mūtik, 'ap hāpxopmā'ax yūmmūg'ah.

Ūp-texop xexka xi' hok xop

⁹ Pūyāk xape hok hittup, Ṫhā Topa te nōm ha hāmmaxnāhā'.

¹⁰ Pūyāk xape tup-texop hittup kamah, 'ihā Topa te hāmhōgnāgāhā'. Yā' yōg tayūmak yāyxaogā'ax, tu mōktu' xok, tu mīnnut puxet putuk, 'ūhok tu'.

¹¹ Māyōn ka'ok, tu mīxux mō'hap, ha' nak, tu tapmāhā', yīy mīnnut nāhā hām tu', tu' mām, tu' nōg, ha kaxīy 'ūp-texop xexka xok.

Hāpkummūgā'ax

¹² Tikmū'ūn xūy, puxix Topa yōg putat xax hok, pāyā' kuxa hittup. Yā Topa te hāpxopmā'ax xohix kopit, tu' kopit kux, Ṫhā 'ūhīnnā xe'ēgnāg, tu ta tu hām'āktux xex, nūy hīnnā', Topap-tup pax hah.

¹³ Pūyā tikmū'ūn Topa kupex hok, Ṫhā hāpkummuk mīy putup, Ṫhā' xūy'ax hā' tot putup'ah, hu: "Topa tekxapit, 'ū hāpkummuk mīy," kaxīy. Yā' koit. Topa te hāpkummuk mīy 'ohnāg, tu tikmū'ūn xapit 'ohnāg, puyīy hāpkummuk mīy.

¹⁴ Pa tikmū'ūn te hāpkummuk mīy, 'ūp-tup tu' mīy, tu yā mō'āmā', nūy mīy.

¹⁵ Tu hāpkummuk pe'paxex, tu' mīy putup, hu hāpkummuk mīy, tu' mīy pax, tu mōktu' xok, tu Topa hā' puknōg xe'e'.

¹⁶ Ūkxape xop, yāy pu koit hok.

¹⁷ Topa te māyōn xop xohix mīy, tu' māynāg mīy pexkox tu', yā pexkox yōg hāpxop xohix māynāg. Yā hāmmax xohix Topa te' mīy, tu pexkox tu yūmū'ā

hāmmaxnāhā'. Yā Topa mūn max xe'ēgnāg, tu yā yīnmūn, tu yāy yānān 'ohnāg, xix yāyhā' nōy 'ohnāg kamah.

¹⁸ tu yūmūg putup, hu' xat, pu yūmūg tut yūmūg put, tu hāpxe'e' āktux, ha yūmūg kuxa mām ka'ok nōm hām'āktux kopah, ha yūmūg xe xanāhā', 'ūyīy yūmūg yāyhā Topak-tok xop te māxap, pu hāpxop nōy xohix Topa hāk-nāy tu' xop.

Hām'āpax, nūy hāpxopmā max

¹⁹ Ūkxape xop, 'ūxaxok hok: 'Ānōy yōg hām'āktux 'āpax punethok, nūy hām'āktux kutōgnōg, yā 'āgāy hok.

²⁰ Tikmū'ūn gāy, puxix hāpxopmā kummuk, ha Topa tep-tup nōg, hāmyok mīy'ax putup tu'.

²¹ Yīy hāpkummuk mīy hok, xix hāpxopmā kummuk hok, yāy mūn kutōgnāg pe'āpaxeh, yā Topa yōg hām'āktux te 'ākopa' xip, yīy Ṫpkox pi', nūy 'ākuxa hi xe'e'.

²² Yāyhā 'āmō'āmā' hok. Topa yōg hām'āktux 'āpax, xa Ṫpkox pi', nūy hāpxopmā max.

²³ Tikmū'ūn te nōm hām'āktux 'āpak, tu' yīpkox hok, puxix tikmū'ūn hāmyūmmūg 'ohnāg putuk, ha Ṫypex hā tute yāy pēnāhā', tu yāy pa pēnāhā', tu hāmyūmmūg: Yā yāy pa xe'e',

²⁴ pa putpu' mōg, tu yāy pa xaxok, ha' kux. Ha kaxīy tikmū'ūn te hāmyūmmūg hok te Topa yōg hām'āktux xaxok.

²⁵ Pa tikmū'ūn te hāmyūmmūg, tu' xat'ax max xe'ēgnāg 'āpak, nūy hāmyūmmūg max, puyi' māynāg mīy, puxi' xat'ax hāmyūmmūgā', puyīy tu' hi' xe'e. Topa te nōm tikmū'ūn ha hāmmaxnāp-tup.

²⁶ Tikmū'ūn te: "Ūgkuxa te Topa xak," kaxīy, pāyā' yīy kummuk pax, puxix tu Topa xak 'ohnāg, tu yā yāyhā mō'āmā',

²⁷ Pa tikmū'ūn te Topa yūmūg Tak xak xe'e', puxix 'ūn hok mām xop hā tu tehet, xix kaxkop yāy tak pip hok xop hā tu tehet, nūy nōm ha hāmmaxnā', tu Topa hā' puknōg xop yōg putat kummuk xak, nūy Topa yōg putat hā' mōg kuma' mōg.

2

Ūxohix yā yāy putuk

¹ Ūkxape xop, 'ākuxa mām ka'ok yūmūg xuxyā Yeyox Kunnix kopah, ha' max xe'ēgnāg, yī' hok xop xix 'ūp-texop xexka putup pax, yā' nōy putuk yūmūg xuxyā pu'.

² Pa tikmū'ūn yāg te' hok xop putup nōg, tup-texop xexka putup pax, hap-texop te 'āxop mūtik yāy tu nū'nāhā' tu' xax max mō'tat, tu pipkup kōnānōg tat yīpkutok hā', ha tik hok nūn, kamah, tu' xax kummuk mō'tat.

³ Pe 'āxop tep-texop pu: "Yūhūm, nūy nū mīpe max yīmū yūm," kaxīy. Tu' hok pu: Pe

yīy 'āknihā xihip 'ōnte', pe yā hām tu yūhūm," kaxīy.

⁴ Puxi', 'āp-tox 2 'ānōy hā, yā 'āxop hā yāy putuk 'ohnāg.

⁵ Ūkxape xop, 'ūg'āpax: Topa te' hok xop yīmōgātux, pu' kuxa mām ka'ok hamūn kopah, nūy yīpkox pi', 'Ihā Topa te' xat, Topap-tup pax tu', yā Topa te hām'āktux xex nōm xop mūtik,

⁶ ha 'āxop te' hok xop putup nōg, pāyā putexop xexka te xa hāpkummugāhā', tu tīk pa te hāmyūmmūg ha 'āmōgāhā', nūy 'ākupeh,

⁷ tu Yeyox Kunnix 'āktux kummuk, ha xa' hōm yāy'āxet'ax. Hap-texop te xa 'āktux kummuk, ha Topa te xa hāmmaxnaha'.

⁸ 'Āxat'ax pu yīpkox pi', puxix hāpxopmā max, ha' xat, hu: "Ānōy putup pax, xate yāy mūn putup pax putuk," kaxīy.

⁹ Āxop te hām hok xop putup nōg, xip-texop putup pax, 'ūxax pēnā tu', puxix Topa yōg xat'ax pu 'āyīpkox pip hok, tu hāpkummuk mīy, ha Topa te' kummuk 'āktux.

¹⁰ Tikmū'ūn te Topa yōg xat'ax puxehnāg pu' yīpkox hok, puxix tu xat'ax xohix pu' yīpkox 'ohnāg. Yā Topa te' xat, pu' xat'ax xohix pu' yīpkox pi'.

¹¹ Ha' xat, hu: 'Āxonnix hok," kaxīy. Tu xe: "Ūp-tex hok," kaxīy. 'Ap xatep-tex'ah, pāyā' xonnix, puxix 'āyīpkox hok, tu' xat'ax koxyōy.

¹² Topa te 'ōg hāpxopmā'ax kopit'ax, yī' xat'ax pu 'āyīpkox pi'. Yā' xat'ax te yūmū'ā hāmyūmmūgāhā', 'ūyīy yūmūg hi xe'e', nūy hāpxopmā max.

¹³ Topa te tikmū'ūn yōg hāpxopmā'ax xohix kopit putup, ha tikmū'ūn te' nōy kuxa ka hok, puxix Topa' ka hok xop kuxa ka hok 'ūyānān tu', pa tikmū'ūn te' nōy kuxa ka', puxix Topa te nōm xop pu hāpkummugā hok.

'Ākuxa yūm ka'ok nūy hāpxopmā max

¹⁴ Ūkxape xop, 'ā' max'ah, yāy kuxa yūm'ax 'āktux, 'Ihā 'ānōy te 'ōg hāpxopmā max pēnā 'ohnāg. Yā' ākuxa yūm pu'uk, 'ap' ākuxa yūm xe'e'ah.

¹⁵ 'Āxape xax kummuk, ha putup tep-tex,

¹⁶ ha tu hāpxop hōm 'ohnāg, xix topixxax hōm 'ohnāg, pa: "Pūyā Topa xa hāmmaxnā', xayīy 'āxit max, nūy 'āxax max tat kamah," kaxīy,

¹⁷ puxix 'ākuxa yūm pu'uk, 'Ihā 'ānōy pu hāpxopmā 'ohnāg, 'ap' ākuxa yūm xe'e'ah.

¹⁸ Tikmū'ūn te: "Ākuxa yūm ka'ok, ha 'āte hāpxopmā max," kaxīy. Yīy 'āte: Tikmū'ūn te 'ākuxa yūm'ax pēnā hok, 'Ihā xate hāpxopmā 'ohnāg. Pāyā 'āte hāpxopmā max'ax hā xa' mūg, xayīy pēnā', nūy tuk kuxa yūm ka'ok yūmmūg. Yā hāpxopmā'ax max hā tikmū'ūn te' pēnā'ax," kaxīy.

¹⁹ 'Ok' ākuxa yūm ka'ok Topap-xehnāg kopah? Yā' max. Yāmīy kummuk xop kuxa

mām ka'ok kamah, tu Topa yīpkutuk, tu yāy nuhuknām 'ūkuxānōg tu'.

²⁰ Āptox ka'ok, tu hāmyūmmūg 'ohnāg! 'Ākuxa yūm ka'ok, 'Ihā hāpxopmā max 'ohnāg, tu' hitop hā 'ākuxa yūm, 'ap puxi'ah.

²¹ Tep te xīy Topa te mōnāy xop hittap 'Amanām max 'āktux? 'Amanām tek-tok 'Iyak hōm'ax, nūy kuxap hā mō'hap Topa pu', hu Topa te 'Amanām max 'āktux, 'ūyīpkox xip hah.

²² Yūmmūg. 'Amanām kuxa yūm ka'ok Topa kopah, tu' yīpkox xip, tu hāpxopmāhā kamah.

²³ Yīy Topa yōg tappet te: 'Amanām kuxa yūm ka'ok Topa kopah, yī' kuxa tupmāhā', pu tu max," kaxīy. Ha Topa te 'Amanām hā' xape'.

²⁴ Yī' yūmmūg. Yā Topa te tikmū'ūn putup pax, 'ūyōg hāxopmā'ax hāp-tup pax, 'ūkuxa yūm ka'ok ha hāpxopmāhā', ha' kuxa tupmāhā'.

²⁵ Xotit Ha'ap te 'Iyaet yōg tik xop hā tu tehet, nōm xop te' puknōg yōg hām pēnā'ax, ha putat nōy ha' mōgāhā', puyīy tu nūmān, yīy hāpxopmā max, ha Topa tep-tup pax.

²⁶ Tikmū'ūn kozuk te' yīn nīm, puxix tikmū'ūn tu xok, hā kaxīy tikmū'ūn kuxa yūm ka'ok, tu hāpxopmā hok, puxi' hi xe'e hok.

3

Tikmū'un yōyxōg

¹ Ūkxape xop: 'Ap max'ah, tikmū'ūn punethok te' nōy xop pu hāmyūmmūgā', 'Ihā yāy kotīnnāhā' pip. 'Ūyūmmūgā'ax, puxix Topa' yīkopit putup, nūy yūmmūg, pēyā hāmyūmmūgā max, pēyā hāmyūmmūgā kummuk.

² Yūmūg xohix te hāpkummuk mīy, ha tikmū'ūn yāy yīy'ax hā hāpkummuk 'āktux hok, puxix' ūmax xe'ēgnāg, tu yāy mōgā max.

³ Tikmū'ūn te kāmānok mōgāhā', tu pipkup kohe te kamānok yīkox kopa' xip hā mōgāhā', pu mōg, ha yūmū'āte yīmū' nām, nūy nō mōg.

⁴ Kamah mīpkox xexka te kōnāg yīmū mōg, ha 'āmuuh ka'ok te' mōgāhā', pa tikmū'ūn te mīm kutōgnāg hā' mōgāhā, nūy nō hāpkux xuhmīy yīmū 'āpep hāmnaq hah.

⁵ Ha tikmū'ūn yōyxōg kaxīy, 'ūk-tōgnāg, pāyā 'ūyīy'ax te hāpxopmā xexka'. Kuxap kup kutīgnāg, pāyā hāmhipak xexka'ok'xut xexka',

⁶ hā kaxīy 'ūyōyxōg kutīgnāg, pāyā' yīy'ax te hāpkummugā xexka', tu Hāmgyāygnāg yōg kuxap gāy putuk, tu' nōy kuxa tuknōgāhā', tu mōktu kummugā xexka', 'ūxupmāhīy kummuk tu'.

⁷ Tikmū'ūn te xokxop xohix mūg'ax xix putuxnāg, xix xokxop yāy hi xip mūg'ax,

xix xokxop yĭkŭy mŭg'ax, xix mām xohix mŭg'ax,

⁸ pa tikmŭ'ŭn te' yōyxōg 'ŭm mŭg hok, puyĭy tu yĭy kux, 'ŭkummuk hah, tu kāyā gāy yōyxōg putuk, tu' yĭy'ax hā' mōy putex.

⁹ Yŭmŭ'āte yāy yĭy'ax hā yŭmŭg Tak Topa max 'āktux, xĭknōy mānōg, hu: "Pŭyā Topa xa hāpkummugā'," kaxĭy, tu' mānōg, yā Topa te' hep xop xohix mŭy yāymŭn putuk, ha yŭmŭ'āte' xaxok.

¹⁰ Tikmŭ'ŭn yĭy'ax 2, tu Topa pu hām'āktux max, 'ĭhā' nōy pu hām'āktux kummuk. 'Ŭkxape xop, kaxĭy 'āktux hok!

¹¹ Kōnāg xupup xox puxet te kōnāg xut, ha kōnāg puxet, pēyā' xuxpex, 'ok pēyā' kohāgnāg, tu kōnāg 2 'ohnāg, pap-xet.

¹² Tikmŭ'ŭn te xupxak xut hok tepta kup tu', tu gōyap xut hok nanŭy kup tu'. 'Āmhok! Yā kaxĭy kōnāg kox kummuk tu kōnāg xux-pex tat 'ohnāg.

Hāmyŭmmŭg xe'e'

¹³ Piyā' xip tikmŭ'ŭn te hāmyŭmmŭg? 'Ok xip 'āxop kopa'? Pŭyā hāpxopmā max, tu yāy mŭn kutōgnāg pe'paxeh, nŭy hāmyŭmmŭg xexka'.

¹⁴ Pa 'āyĭpkumĭy hok, tu yāy mŭn xexka pe'āpaxex hok, xĭ' koit hok, nŭy mō'āmā hok, puyĭ' nōy 'āpe'paxex, hu: "Yā 'ōhōm te hāmyŭmmŭg!" kaxĭy.

¹⁵ Yā hāpxopmā'ax kummuk te yāmĭy xop kummuk yōg hāmyŭmmŭg'ax putuk, xix xokxop yōg, xix Topa hā' puknōg xop yōg hāmyŭmmŭg'ax putuk. Yā' kummuk.

¹⁶ Tikmŭ'ŭn kummuk te yāy mŭn pe'paxex xexka', tu' yĭpkŭmĭy, tu tikmŭ'ŭn xohix kummugāhā', tu' mōgā kummuk, yĭy hāpxopmā kummuk punethok.

¹⁷ Topa te pexkox tu' xip, tu hāmyŭmmŭg xe'ēgnāg, tu yāy yōg tikmŭ'ŭn pu hāmyŭmmŭgāhā', puyĭy tikmŭ'ŭn kuxa tu tup, puyĭy yāytuk-mĭy kuxyā', puyĭ' kuxa yŭm, ha Topa te hāmyŭmmŭgāhā', nŭy hāmmaxnā', nŭy tikmŭ'ŭn hā' xape', tu' kuxa ka', puyĭy hāpxopmā max 'ŭyānān tu',

¹⁸ ha' kuxa yŭmmāhā', puyĭy hāmyok mĭy pax.

4

Topa hā' puknōg xop yā 'āxape hok

¹ Teptu yāy tuk-mĭy 'ānōy mŭtik? 'Āxop te yāy putup'ax kummuk mĭy, tu yāy kix.

² Tu hāpxop putup xŭy, pāyā' pa hok, hup-tex putup, nŭy nōm hāpxop pa', tu 'ānōy yōg hāpxop putup, 'ap pa yŭmmŭg'ah, hu yāy kix, tu Topa tu' xak 'ohnāg, pu xa' hōm.

³ Xate Topa tu' xak, tu' pa 'ohnāg, 'ŭxak kummuk tu'. Tu' xak, nŭy yāy putup'ax mĭy.

⁴ 'Āxop te Topa nĭm'ax. Topa hā' puknōg xop te Topap-tup nōg. 'Ok yŭmmŭg hok

xate'? 'Āxop te nōm puknōg xop hā 'āxape', hu ta Topa hā 'āpuknōg kamah.

⁵ Topa yōg tappet te tikmŭ'ŭn kuxa 'āktux, tu' hitop tu' xuktux 'ohnāg, hu: "Topa te tikmŭ'ŭn kuxa mĭy, ha' yĭpkŭmĭy, tup-tex," kaxĭy,

⁶ Pa Topa ka'ok xe'ēgnāg, tu tikmŭ'ŭn kuxa ka'ogāhā', yā Topa yōg tappet te xe: "Tikmŭ'ŭn yāy mŭn xexka pe'paxex, puxix Topa putup nōg, pak-tōgnāg xop pu hāmmaxnāhā', nōm xop yāymŭn kutōgnāg pe'paxex ha hāmmaxnāhā'," kaxĭy.

⁷ Yĭy 'ĭpkox pi Topa pu', nŭy Hāmgāyāgnāg yĭpkutuk hok, nŭy nōm mŭtik kumĭy, ha' xupap-tup.

⁸ 'Āxop yā hāpxopmā kummuk xop, 'āpu Topa hā mōg, nŭy yĭka hā' pip, ha 'āha' nŭn putup, nŭy 'ākuxa kummuk xit, nŭy kuxa max mō'tat 'ŭyānān tu'. Hāpkummuk mĭy kux, 'āyĭm pix putuk, nŭy 'ākuxa tup, nŭy 'āmax, nŭy 'āp-xet Topa kuxa mŭtik,

⁹ 'Ākuxa hittup hok, nŭy pota punethok, nŭy hāpkummuk mĭy kux,

¹⁰ tu' Topa tu' xax, pu mō'ānĭynām, nŭy 'āka'ogā', ha 'āxexkanāp-tup.

'Ānōy 'āktux kummuk hok

¹¹ 'Ŭkxape xop, 'ānōy 'āktux kummuk hok, 'ŭxuktux kummuk, puxix 'āxop 'ānōy yĭkopit, tu Topa yōg xat'ax kopit kamah, yā 'ākummuk. Tikmŭ'ŭn te Topa yōg xat'ax kopit, puxix Topa tu' yĭpkox 'ohnāg.

¹² Topap-xet te 'āxat, 'ŭpa te hāmyŭmmŭg, tup-xehnāg hā 'ŭhep xop xohix yōg hāpxopmā'ax kopit putup, tu tikmŭ'ŭn kuxa kummuk xit'ax, nŭy yānān tu' kuxa max tat, tu' kummuk mĭy pax xop kix'ax. Yāy 'āpe'āpaxeh hok, nŭy 'āxape yōg hāpxopmā'ax kopit, nŭy Kunnix yōg xop yĭkopit. Kunnix yāp-xet te hāpxopmā'ax xohix kopit, nŭy tu hāmyŭmmŭg, pe yā' max, pe yā' kummuk.

Hāptup pe'āpaxek-tōgnāg

¹³ 'Āxop te: "Pe hōnhā, pa hāptup, kopxik mōg kōmēn tu', nŭy nox xĭhip, nŭy hāpxop hāmenex, 'ŭyĭy tayŭmak xexka punethok pop," kaxĭy. Nāy. 'Ŭg'āpax:

¹⁴ 'Āxop te hāptup yōg hāpxopmā'ax yŭmmŭg 'ohnāg! Tu hāmgōy putuk, yā hōnhā' xip, tu hāxĭp kutōgnāg 'ĭhā yāyxaxogāhā', ha hāxĭp kutōgnāg 'ĭhā 'āxop xaxix putup, ha kama yāy xaxogāp-tup.

¹⁵ 'Āpu hām'āktux kaxĭy, hu: "Topa tek putup, kopxik mŭg mĭy," kaxĭy.

¹⁶ Pa 'āxop te yāy mŭn xexka pe'āpaxex, tu yāy mŭn xexka 'āktux. 'Ap max'ah.

¹⁷ Tikmŭ'ŭn te hāpxopmā'ax yŭmmŭg, tu' mĭy hok, puxix hāpxopmā kummuk.

5

Ŭp-texop xexka pu hām'āktux

1 'Āp-texop, 'ūg'āpax nōmhā: 'Āpota punethok putup, 'āxūy tu'.

2 'Ōg tayūmak kunox, ha' kut te 'āxax kunoxyāhā'.

3 'Ōg tayūmak kutut te yāy koxyōy, 'āxupkūmīy hah, ha tikmū'ūn te' pēnāhā', tu 'ākummuk 'āktux putup, 'āxop te tayūmak punethok pop, tu yāy tu' xex.

4 'A 'āxop te 'ōg kāmānat xop pu' pago'ah, 'ūhām'ax yānān tu' pago 'ohnāg, yīy 'āxop kummuk 'āktux, tu Topa xe'ēgnāg pu hām'āktux, ha' xupak. 'Ok 'āxop te' xupak hok?

5 'Āxop te hāpkute'ex, tu 'āmuk xexka punethok mīy hām tu', tu yāy topmāhā', nūy xok, mūnūytut top putuk 'āxok putup, ha Topa te xa hāpkummugāp-tup 'ūyānān tu'.

6 Yā 'āxop te' hok xop kix, ha hāpkummuk mīy 'ohnāg, pāyā' pu'uk, 'ūhok tu', hu' xakix.

Yūmūg xuxyā nūn'ax hip

7 'Ūkxape xop, yūmūg xuxyā pu yūmūg hip, put nū', 'ūxuxyā xop te yāy yōg hāpxop hip, puyīy hāpxop ta punethok nūnnā yāy pet hah, hu tex hip, xix tex ti hip.

8 'Āpu 'ūhip kamah, nūy yūmūg xuxyā hip, ha' nūn putup mō'ka'ok, yīy 'ākuxa tuknōg hok.

9 'Ūkxape xop, 'āxupmāhīy kummuk hok, ka Topa 'āyīy'ax kummuk 'āktux, 'ūpa te hāmūmmūg tu yūmūg yīka' xip, yā hāpxip kutōgnāg 'lhā' nūn putup.

10 Topa yōg tik xop pe'āpaxeh, nōm xop te Topa pupi hām'āktux, tu tikmū'ūn pu' xuktux, ha Topa te tu yāy 'āxet'ax hōm, ha' xūy'ax hā' tot.

11 Yūmū'āte nōm xop 'āktux max, 'ūxūy'ax hā' tot hah, xix mōnāyxop hittap Yo 'āktux, yā nōā'tot punethok, yīy Topa te hamūn ha hāmmaxnāhā', yā Topa mūn max xe'ēgnāg, tu tikmū'ūn kuxa ka', nūy nōm pu hāmmaxnā'.

12 'Ūkxape xop, 'āte xa hāpxe'e' āktux. Topa 'āxet'ax 'āktux hok, 'lhā hām'āktux xex, xix pexkox 'āktux hok, xix hām 'āktux hok 'lhā hām'āktux xex. 'Āpu hām'āktux kutōgnāg, hu: "Hamūn," kaxīy, xix: "Āmhok," kaxīy. Yā' puxi', ka Topa 'ākummugā', xate hām'āktux kummuk hah.

13 'Āxūy, 'āpu mōg, nūy Topa pu hām'āktux. 'Āhittup, 'āpu 'ākteh, nūy Topa max 'āktux.

14 Tikmū'ūn pakut, puxix tik te 'āpēnā max xop xānā', pu Topa pu hām'āktux, nūy tu hep tox pux, 'ūpakut putox tu' pux, puyīy Topa 'ūhittupmā', yā yūmūg xuxyā te' hōm yāy 'āxet'ax, pu tikmū'ūn hittupmā'.

15 Topa pu hām'āktux, 'lhā' kuxa mām ka'ok Yeyox kopah, puxix Topa' hittupmā', tu hāpkummuk mīy'ax xaxogā'ax, pu tu kux.

16 'Āpu yāy pu 'ōg hāpkummuk mī'ax 'āktux, nūy tu yāy pupi hām'āktux, puyīy Topa 'āhittupmā'. Pūyā' kuxa mām xop xohix yāy

xape xop pupi hām'āktux Topa pu'. Ha Topa te tikmū'ūn yōg hām'āktux 'āpak, ha 'āxape kuxa te Topa xak, puxix Topa hām'āktux 'āpax.

17 Mōnāyxop hittap 'Enit te Topa pupi hām'āktux, tu yūmūg putuk, tu Topa xak, tu nōm mūtik hām'āktux ka'ok, tu tu' xak, pu tex hok, ha hāmūyāxatamuk 3 hā xi' xahix tex ti 'ohnāg, ha hāmnaq mō'nāhā'.

18 Ha xe Topa tu' xak, ha tex xat, ha' tihi', ha hāpxop punethok nūnnāhā'.

19 'Ūkxape xop, 'āxop te Topa yōg putat xak, ha ta 'ānōy te putpu 'āmōgāhā', xayīy Topa yōg putat hā mōg 'ūxexheh, puxix 'ānōy xa ha hāmmaxnā'.

20 'Ūxaxok hok: Tikmū'ūn te' nōy mō'nīynām, puyīy hāpkummuk mīy kux, ha ta hāpxopmā max, ha nōm mōgā max Topa yōg pūtat hā, puyīy hi xe'ēgnāg. Ha Topa te' yōg hāpkummuk mīy'ax xaxogāp-tup, pu tu kux. 'Ap Hāmūyāgnāg Pet ha' mōg putup'ah 'ōhōm. Tu ta tu' kux.

PET TE TAPPET KAX'ĂMI I

1 Ūgmūn Pet, ha Yeyox Kunnix te nūgkutnāhā'. Āte 'āxop pu' kax'āmi nūhū tappet. Topa te 'āxop yīmōgātux, yā Topa yōg xop 'āxop. Āte xa' kax'āmi', tu xa nū tappet mō'kutnāhā hāpaxexka Pō'ōn tu', xix hāpaxexka Genex tu', xix hāpaxexka Kapanox tu', xix hāpaxexka 'Ax tu', xix hāpaxexka Mitīn tu', yā hāpaxexka xohix tu 'āxop nūpaha'.

2 Hōmā 'ūhittap yūmūg' ātak Topa tep-tup, hu 'āxop yīmōgātux, ha Topa Koxuk te 'āxop hā' mīy Topa yōg xe'e xop, xayīy 'āxop Yeyox Kunnix 'āpax, nūy 'āyīpkox pi', ha Yeyox Kunnix te 'āxop pupi' xok, hu 'ākuxa kummuk xit. Puyā Topa xa maxnā xexka'. Puyā Topa 'ākuxa māmā xexka'.

Hāmmax hip

3 Āpu yūmū yūmūg xuxyā Yeyox Kunnix mūktak pu hām'āktux, hu: "Xate yūmū'ā maxnāhā'. Āmax". Kaxīy. Topa te yūmūg kuxa ka xexka', tu Yeyox Kunnix putpu' hīnnāhā', nūy yūmū'ā kuxa tup popmā'. Yūmūg kuxa 'ūtup, hu' max hip punethok.

4 Topa te yūmū'ā' popmāp-tup hāpaxop max xohix pexkox tu', tu yūmū'ā hāpaxopmā maxp-tup. Yūmū'āte nōm hip, ha Topa te yūmū'ā nōm popmāp-tup pexkox tu'. Pa hōnhā Topa te nōm pēnāhā' ōnteh pexkox tu'. Āk-nox putpu'ah, tu 'a hāpaxop kummuk hā kotūnāp-tup'ah, tu 'ap kutut putpu'ah.

5 Yā 'ōgnū hāpaxop, ha Topa 'ūka'ok, tu 'āxop pēnā max, ha 'ākuxa mām Topa kopah, ha hāmyāxatamuk xohix xox putox 'īhā Topa te' mōy putpu' ōg hāpkummuk xohix.

6 Yā' max. Āpu 'ākuxa hittup. Pa hōnhā 'a 'āhittup'ah. Yā 'āxop xūy punethok, ha' kuxa mām hok xop te 'āxop kute'ex kummuk.

7 Āxop te 'ūkummuk hā tot, ha Topa te' yūmūg 'ākuxa mām ka'ok. Yā hāpkummuk pip, pa 'ākuxa mām xe'e'. Tikmū'ūn te yānām 'āta yīxux kopit kuxap kopah. Hā kaxīy Topa te 'āxop yōg hāpaxopmā'ax kopit, 'īhā' pip ōg hāpkummuk. Pa yānām 'āta yīxux yāy koxyōy, pa tikmū'ūn te nōm kopit kuxap kopah. Takat 'ūyānām 'āta yīxux, pa takat xexka 'ākuxa mām'ax. Tikmū'ūn te yānām 'āta yīxux kopit, ha ta Topa te 'ākuxa mām'ax kopit kamah, pu tu xip ka'ok 'ākuxa mām'ax. Āxop te' kummuk hā tot, pu tu' kux, ha ta' putpu' nūn putpu' Yeyox Kunnix, ha Topa te 'āxop 'āktux max putpu, tu xa max xe'ēgnāg mīy putpu, tu hām'āktux putpu 'āxop max.

8 Āxop te Yeyox Kunnix pēnā 'ohnāg, pa 'āxop te Yeyox putuppax. Āxop te nōm pēnā 'ohnāg, pa 'ākuxa mām nōm kopah, tu mōktu 'ākuxa hittup max xexka'. Tep-te nōm hāpaxop

max 'āktux yūmūg? 'Ap yūmūg'ah. Yā 'ākuxa hittup xexka'.

9 Ākuxa hittup xexka', yā Topa te 'āxop mōy xet putpu hāpkummuk mīy'ax kopah. Ākuxa mām, puyīy 'ākuxa mōy hāpkummuk mīy'ax kopah.

10 Hōnhā Topa te Yeyox Kunnix nū'kutnāhā', puyīy 'ākuxa kummuk xit. Ha ta hōmā Topa pupi hām'āktux xop te Yeyox nūn yūmūg xak, tu' yūmūg xak punethok, tu hām'āktux Topa te yāy kutok nū'kutnāp-tup.

11 Hām'ūmhā nū'kutnāp-tup? Texīy hu' nūn putpu? Yā nōm te' yūmūg xak. Topa Koxuk, yā Kunnix Koxuk te Topa pupi hām'āktux xop pu Yeyox xok 'āktux, tu putpu' hi 'āktux, tu pexkox tu' mōg 'āktux.

12 Topa pupi hām'āktux xop te yīy kopit, hu: "Hām'ūm'hā' nūn? Hām'ūmhā' xok putpu, nūy putpu' hi'?" Kaxīy. Ha Topa te: "Yā hōnhā'ah. Yā 'āxape mōgputox xop te' pēnāp-tup". Kaxīy. Ha ta hōnhā 'āxop te' xupak, tu' yūmūg. Yā Topa te 'āxop pu tik nū'kutnāhā', pu xa Topa yōg hām'āpak max'ax 'āktux. Ha ta' xip Topa Koxuk pexkox tu', ha Topa te nōm nū'kutnāhā', pu tikmū'ūn ka'ogā', puyīy xa Topa yōg hām'āpak max'ax 'āktux max. Ha ta pexkox yōg nū'pok xop te' xak, nūy Topa yōg hām'āpak max'ax yūmūg.

Topa te 'āxop xānāhā', xayīy Topa putuk

13 Āpu hāmpē'āpaxeh xe'e', nūy hāpaxopmā max. Āpu pa 'ātix. Āpu hāpaxop max hip punethok. Topa te xa nōm popmāp-tup, 'īhā putpu' nūn putpu' Yeyox Kunnix.

14 Āpu Topa 'āpax, nūy 'āyīpkox pi'. Hōmā 'āxop te hāmyūmūg 'ohnāg, tu' mīypax xate nōm putpu. Āpu xe' mīy hok xate nōm putpu, yā hāpaxopmā'ax kummuk.

15 Pa 'āpu 'ākuxa tup tat. Āpu hām yok mīypax, nūy Topa putuk. Yā Topa te 'āxop xānāhā', xayīy Topa putuk.

16 Yā Topa te yāy yōg tappet kopa hām'āktux, hu: "Āpu 'ākuxa tup tat, nūy hāmyok mīypax, nūy 'ūgmūn putuk". Kaxīy.

17 Āxop te Topa pu hām'āktux, hu: "Ātak". Kaxīy. Topa te tikmū'ūn xohix yōg hāpaxopmā'ax kopit. Tikmū'ūn te hāpkummuk xexka mīy, puxix yānān xexka'. Tikmū'ūn te hāpkummuk kutōgnāg mīy, puxix yānān kutōgnāg. Tikmū'ūn te hāmmax xexka mīy, puxix hāpaxop max xohix popmā'. Tikmū'ūn te hāmmax kutōgnāg mīy, puxix hāpaxop max kutōgnāg popmā'. Yā tikmū'ūn yōg hāpaxopmā'ax kopit xe'e', tu' kopit yāy putuk. Xate' yūmūg. Āpu Topa yīpkutuk ōg hāmyāxatamuk tox hā.

18 Hamūn, 'āxop te' yūmūg hōmā 'āxop te mōnāyoxop yōg hāpaxopmā'ax hitop tat, pa Topa te pago takat, yā yāy kutok nū'kutnāhā, xayīy 'āxop mōnāyoxop yōg hāpaxopmā'ax hitop tat kuxyā'. Yā tute pago takat xexkanām,

Topa te yānām ponnok pago'ah xix yānām 'āta yixux pago'ah. Yā nōm takat miāx. Pa Topa te' pago xexkanām.

¹⁹ Yā tute Kunnix nū'kutnāhā', pu'yīy 'āxop pupi tu' xok, nūy 'ākuxa kummuk xit. Kunnix xok, yā kahñēn max putuk. Yā kahñēn max kup kohe 'ohnāg xi' kup yāy xa'a 'ohnāg. Hā kaxīy putuk Kunnix, yā hāpkummuk mīy 'ohnāg.

²⁰ Hōmā 'ūhittap 'ap xip'ah hām xexka', ha Topa te Kunnix yāykutnāhā', pu'yīy yūmmūg pupi tu xok. Hōnhā yā hām xexka yōg hāmāxatamuk xox putox 'ihā Topa te yūmmū'ā Yeyox mūg.

²¹ 'Ākuxa mām Yeyox Kunnix kopah, tu mōktu 'ākuxa mām Topa kopa kamah. Yā Topa te yāy kutok putpu' hīnnāhā', tu yāy kutok xexka mīy, pu'yīy tikmū'ūn xohix Yeyox 'āktux max. Yā 'ākuxa mām Topa kopah, tu hāpxop max hip Topa yōg.

²² 'Āxop te hām'āktux xe'e 'āpak, tu 'āyīpkox pip, tu yāy kuxa kummuk xit, nūy hāpkummuk mīy hok, nūy Yeyox kopa kuxa mām xop putuppax xe'ēgnāg. 'Āpu nōm putuppax xexkanām.

²³ Topa yōg hām'āktux pip ka'ok, tu yōg hāmāxatamuk xohix kux 'ohnāg. Topa te hām'āktux, yīy ta 'āxop yāyhā Topa yōg tikmū'ūn. Topa yā yūmmūg 'ātak, tu yōg hāmāxatamuk xohix kux 'ohnāg.

²⁴ Hamūn, Topa yōg tappet tu' kax'āmi, hu: "Hāpxip kutōgnāg 'ihā mīxux nak, ha hāpxip kutōgnāg 'ihā nū'nāhā mīnnt. Hā kaxīy tikmū'ūn xohix xexka', yā hāpxip kutōgnāg 'ihā' xakix.

²⁵ Pa Topa xexka yōg hām'āktux pip ka'ok mōkuma'mōg hāmāxatamuk xohix kux 'ohnāg hā." Kaxīy.

Topa yōg hām'āktux, yā Topa yōg hām'āpak max'ax, yā 'ūgmā'āte xa nōm'āktux

2

Topa pet yā Topa yōg tikmū'ūn

¹ 'Āpu hāpkummuk xohix mīy kux. 'Āpu' koit kux, nūy mō'āmā kux. 'Āpu 'āyīpkūmīy kux. 'Āpu hām'āktux kux.

² kaxxop pu'ūgnāg te yōktat hep putup xexka', tu xo'op, tu' tuk. Hā kaxīy 'āxop. 'Āpu kaxxop pu'ūgnāg putuk. Topa yōg hām'āktux te yōktat hep putuk. 'Āxop te Topa yōg hām'āktux pop, ha hāpxop max xohix nōy nā' mōg 'ākuxa kopah, tu 'āxop tuk putup. Yā Topa te 'ākuxa kummuk xit, tu 'ākuxa maxnāhā'.

³ Yā Topa yōg tappet te: "'Ūxit'ax max yā' xuxpex. Hā kaxīy 'ūmax tikmū'ūn te Topa yūmmūg, yā' xuxpex putuk." Kaxīy.

⁴ 'Āxop kuxa mām yūmmūg xuxyā Yeyox kopah. Mīkaxxap hi 'ohnāg, pa Yeyox hi'.

'Ūkuxa mām hok xop te Yeyox putup nōg, pa Topa tep-tup, tu' yūmmūg 'ūmax.

⁵ Tikmū'ūn te mīkaxxap hā' mīy mīptut. Hā kaxīy 'āxop te mīkaxxap putuk, ha Topa te 'āxop hā mīy yāy pet, ha Topa Koxuk xip 'ākuxa kopa xix 'āxop kopah. Mā, pu'yīy Topa 'āxop hā' mīy yāy pet. 'Āmānēx te Topa pet kopa Topa pu' hāpxopmāhā'. Hā kaxīy Topa Koxuk te 'āxop ka'ogāhā', ha Yeyox Kunnix te 'āxop maxnāhā', xaxīy Topa pu hāpxopmā xe'ēgnāg. 'Āmānēx xop te Topa pu mō'hap xokxop, nūy Topa pu' popmā'. Hā kaxīy 'āxop te Topa pu hāpxopmā max.

⁶ Yā Topa yōg tappet te:

"Āte yāy nōm kutnāhā', yā' max nō'ōm, yā takat.

'Ūxip putup kōmēn Xiām tu'.

Hā kaxīy mīptut mīy xop te' yāy kutnāhā mīkaxxap takat, tu nōmhā' mīy 'ūkupkūnīy. Hā kaxīy nōm te yāy yōg xop ka'ogāhā'. Tikmū'ūn te nōm kopa' kuxa mām, tu yāyhāhup putup 'ohnāg, yā' kuxa hittup." Kaxīy.

⁷ 'Āxop kuxa mām Yeyox kopah, tu' yūmmūg 'ūmax xe'ēgnāg Yeyox, yā takat xexka putuk. Pa' kuxa mām hok xop tep-tup nōg Yeyox. 'Ūp-tup nōg, pa Topa te' mīy 'ūxexka', yā Topap-tup xop yōg xexka'. Hā kaxīy Topa yōg tappet te:

"Mīptut mīy'ax te mīkaxxap putup'ah, pa' nōy te nōm hā' mīy 'ūkupkūnīy xexka', ha mīptut te nōm yīmū'ūn." Kaxīy.

⁸ Topa yōg tappet te ye:

"Mīkaxxap te tikmū'ūn nū'xok.

Hā kaxīy tikmū'ūn te nōm kopa kuxa mām putup'ah, tu nōm hā yāy koxoyō putup." Kaxīy.

Hamūn, 'ūkuxa mām 'ohnāg Topa yōg hām'āktux kopah, yā Topa te nōm xat.

⁹ Pa Topa te 'āxop yīmōgātux, yā hep puxet yīmōgātux putuk. 'Āmānēx xop te Topa pu hāpxopmāhā'. Hā kaxīy 'āxop te Topa xexka pu hāpxopmāhā'. 'Āxop te hām xexka yōg tikmū'ūn putuk 'ohnāg, pa yā Topa yōg xop 'āxop. Topa te 'āxop yīmōgātux, xaxīy tikmū'ūn pu Topa max xe'ēgnāg 'ākutux. Hōmā 'āxop te hāpkummuk mīy, yā hāpkoxtap putuk. Pa Topa te 'ākuxa kummuk xit, tu 'ākuxa maxnāhā', yā kuyānām putuk Topa yōg.

¹⁰ Hōmā 'āxop yā Topa yōg tikmū'ūn 'ohnāg, pa hōnhā 'āxop yā Topa yōg. Hōmā Topa te 'āxop kuxa ka', pa 'āxop te' yūmmūg 'ohnāg. Pa hōnhā 'āxop te' yūmmūg.

Topa yōg kāmānat

¹¹ 'Ūkxape xop, 'āxop te hām xexka yōg puknōg xop putuk, yā' kuxa mām hok xop hā puknōg. 'Āpu hāpkummuk mīy hok, 'āxop te nōm putup. Pox te xonat putex. Hā kaxīy hāpkummuk mīy'ax te tikmū'ūn koxoyō.

¹² Topa yūmmūg 'ohnāg xop pip, hu 'āxop xakot. 'Āpu hāpxopmā max xexka'. Nōm te 'ōg hāpxopmā max pēnāp-tup. Nōm te hām'āktux putup 'āxop kummuk, pa nōm te' yūmmūg putup 'āxop te hāpxopmā max pūnethok. Nōm te' yūmmūg putup nōm hāptup 'hā putpu' nūn Yeyox Kunnix. Nōm te' yūmmūg putup 'āxop max. Yā Topa 'ākutux max putup.

¹³ 'Āpu hām xexka yōg gohet yōg xat'ax xop 'āpax, nūy 'āyīpkox pi', yā Topa xexka tep-tup. Yā Hōm yōg xat'ax 'āpax, yā' xexkanām.

¹⁴ 'Āpu gohet yōg gohenanok xop 'āpax kamah, nūy 'āyīpkox pi', yā Topa xexka tep-tup. Yā Hōm yōg xat'ax te gohenanok xop yīmōgātux, puyīy tikmū'ūn hāpkummuk mīy'ax hā yānān, puyīy tikmū'ūn hāmmax mīy xop pu hāpxopmā max.

¹⁵ Tikmū'ūn te hām'āktux hitop, yā tikmū'ūn hitop. Topa tep-tup, puyīy tikmū'ūn 'ōg hāpxopmā max pēnā', nūy tu' yēy, yā hām'āktux hitop kux.

¹⁶ Kāmānat xop te' xuxyā pu' hām, ha' xuxyā te nōm xatpax. Topa yōg xat'ax te tikmū'ūn xat kamah, tu hām'āktux 'ūkummuk tikmū'ūn. Pa Topa yōg xat'ax te xa hām'āktux te kaxīy 'ohnāg. Pa 'āpu xe hāpxopmā kummuk hok, pa 'āpu Topa 'āpax, nūy Topa pu hāpxopmā'.

¹⁷ 'Āpu tikmū'ūn xohix 'āpax. 'Āpu' kuxa mām xop putuppax. 'Āpu Topa yīpkutuk. 'Āpu Hōm yōg xat'ax 'āpax.

Kunnix te yūmmūg pupi' xūy

¹⁸ Kāmānat xop, 'āpu 'ūxat'ax xop 'āpax max, nūy 'āyīpkox pi'. 'Āpu xuxyā 'āpax, yā nōm max 'āpax xix nōm gāy kamah.

¹⁹ 'Āxop te' mīy, puxix Topa xa maxnā'. 'Āxop te' yūmmūg Topa tep-tup. 'Āxop te hāpkummuk hā tot, puxix Topa xa maxnāp-tup. Yā 'āxop te hāpxopmā max, pa tikmū'ūn te 'ākummugāhā',

²⁰ pa 'āxop te hāpkummuk mīy, ha' nōy te 'āxop kix, ha ta' kummuk hitop hā tot. Pa 'āxop te hāpxopmā max, pa tikmū'ūn te 'āxuygāhā', ha 'āxop te' xūy hā tot max, puxix Topa xa maxnā'.

²¹ Yā Topa te' xat, xayīy 'āxūy. Yā hōmā Kunnix te 'āxop pupi' xūy, xayīy 'āxop nōm pēnā', tu kama' mīy Kunnix putuk.

²² Kunnix te hāpkummuk mīy 'ohnāg, hu' koit 'ohnāg. Tikmū'ūn te Yeyox te' koit 'āpak 'ohnāg.

²³ Tikmū'ūn te Yeyox pu hām'āktux kummuk, pa Yeyox te' yānān 'ohnāg. Tute' xūy hā' tot, pa hām'āktux kummuk yānān 'ohnāg, pa Topa kopa' kuxa yūm, ha Topa te tikmū'ūn yōg hāpxopmā'ax kopit putup, nūy kummuk hā yānān.

²⁴ Kunnix te yūmmūg pupi' xok. Kunnix te hāpkummuk mīy 'ohnāg, ha ta yūmū'āte

hāpkummuk mīy, ha Topa te yūmmūg pupi Kunnix xūyghā hā mīpkupnix yīmū', kopix yūmmūg hāpkummuk mīy kux, nūy hāpxe'e mīypax. Kunnix kayax pip, puyīy yūmmūg hittupmā'.

²⁵ Kahnēn te yāy xaxok, tu putat yūmmūg 'ohnāg. Hā kaxīy 'āxop hōmā, tu Topa yōg putat max yūmmūg 'ohnāg. Kahnēn pēnā'ax te kahnēn xīpihi', tu 'nūnnāhā', ha kahnēn te' pe' mōg, ha pēnā'ax te kahnēn pēnāhā'. Hā kaxīy Topa te 'āxop nūnnāhā', Topa yōg putat tu' mōxaha', ha 'āxop pip Topa mūtik, ha Topa te 'āxop pēnāhā', tu 'ākuxa maxnāhā'.

3

'Īrpxox xi' xetut xop

¹ Kāmānat xop, 'āpu xat'ax xop 'āpax. Xetut xop, 'āpu 'āyīpkox xop 'āpax kamah. 'Āyīpkox kuxa mām hok Topa yōg hām'āktux kopah, puxix 'ōg hāpxopmā max pēnā', hu' kuxa mām putup. Yā xate hām'āktux putup'ah,

² pa 'āyīpkox te' pēnāp-tup xate hāpxe'e mīy, tu 'āyīpkox' āpak.

³ 'Ūn te yāy xe panip xap, tu xapmax xohix tat, tu topixxax max mō'tat, puyīy tikmū'ūn xohix 'ūn 'āktux hām. 'Āpu kaxīy hok.

⁴ Pa 'āpu 'āmax yā putuk 'ākuxa kopah, yā 'ākuxa yūm, tu 'ākuxa gāy 'ohnāg. Hā kaxīy 'āmax yāy putuk xexka Topa pu'.

⁵ Yā hōmā 'ūn xop hā kaxīy, yā' kuxa max, tu Topa kopa kuxa mām, nūy hāmmax hip, tu yāy kuxa max mīy, yā 'īrpxox' āpak, tu' yīpkox pip.

⁶ Hōmā Xat te kaxīy, tu 'īrpxox' Amanām 'āpak, tu' yīpkox pip. Xat te 'īrpxox pu: "Āpu xat. 'Āte nō' mīy putup." Kaxīy. Xix hōnhā 'āxop te hāpxopmā max, tu 'ākuxa mām, nūy ta Xat putuk.

⁷ Hā kaxīy 'īrpxox xop. 'Īrpxox xop, 'āpu yāy xetut pe'āpaxeh max, yā 'āxetut pu'uk, ha ta 'āmūn ka'ok. 'Āpu yā xetut 'āpax. Yā Topa te 'āxop hīnnāhā mōkuma'āmōg, ha' kux 'ohnāg, xix 'āxetut hīnnāhā kamah, ha' kux 'ohnāg. Xate yāy xetut pu 'āmax, nūy ta Topa pu hām'āktux maxp-tup. Pa xate yāy xetut pu 'ākummuk, nūy ta Topa pu hām'āktux kummuk putup.

Nōm te hāpxopmā max, yīy tikmū'ūn te nōm xūyghāhā'

⁸ Xix 'āxop kamah. Yā' max 'āp-tox puxet xix 'ākuxap-xet. 'Āpu yāy putuppax, nūy 'ātaknōy xop max putuk. 'Āpu tikmū'ūn pu hāpxopmā max, nūy nōm 'āpax.

⁹ Tikmū'ūn te 'āxop kummugāhā'. 'Āpu 'ūyānān hok. Tikmū'ūn te 'āmānōg kummuk. 'Āpu 'ūyānān hok. Pa 'āpu nōm kummuk xop pu hāpxopmā max. 'Āpu nōm pu hām'āktux max. Hamūn, Topa te 'āxop xānāhā', tu xa hām'āktux xex, nūy xa hāpxopmā max.

¹⁰ Yā Topa yōg tappet te:

“Ok xatep-tup hāpxop max 'ōg hāmyāxatemak xohix tox hā, nūy 'ākuxa hittup?

Āpu hām'āktux kummuk hok, nūy koit hok,
11 nūy hāpkummuk mīy kux,
nūy yāy kix kuxyā pax,
nūy yāy kix kux.

12 Hamūn, Topa te' pēnā max hāpxe'e mīy xop,

ha nōm te Topa pu hām'āktux,

ha Topa te' xupak, nūy mīy.

Pa Topa te hāpkummuk mīy'ax xop 'āpak 'ohnāg." Kaxīy.

13 Āxop te hāpxopmā max putuppax, puxix 'ākoxyōy ka'ok putup'ah.

14 Pa 'āxop te hāpxe'e mīy, pa tikmū'ūn te 'āk-te'ex kummuk, ha ta 'ākuxa hittup. Āpu tikmū'ūn yīpkutuk hok. Āpu 'ākuxanōg hok.

15 Pa 'āpu Kunnix 'āpax, nūy nōm xexka mīy 'ākuxa kopah, yā 'āxuyā xexka'. Texīy 'ākuxa mām Topa kopah, nūy hāmmax hip? Āpu nōm pe'āpaxeh. Hāpxip 'Thā tikmū'ūn te xa yīkopit putup, hu: "Texīy 'ākuxa mām? Texīy xate hāmmax hip?" Kaxīy. Yā xate nōm 'āktux yūmmūg putup nōmhā.

16 Xate yāy kuxa mām'ax 'āktux putup, tu xate hām'āktux max putup, tu' nōy 'āpak max putup.

17 Āxop te hāpxopmā max, yīy tikmū'ūn te 'āxop kute'ex kummuk, yā' max, yā Topa tep-tup. Pa 'āxop te hāpxopmā kummuk, yīy tikmū'ūn te 'āxop kute'ex kummuk, puxix tu' kummuk.

18 Hamūn, Kunnix te tikmū'ūn pupi' xok. Kunnix 'ūmax, pa tikmū'ūn te hāpkummuk mīy, yā nōm max te nōm kummuk xop pupi' xok, nūy tikmū'ūn kuxa māmā Topa kopah. Kunnix yīn xok, pa' koxuk hi',

19 tu ta' mōg Kunnix koxuk, tu mōktu yāmīy pu hām'āktux kanet ka'ok kopah.

20 Yā tikmū'ūn yōg yāmīy. Hōmā 'ūhittap nōm tikmū'ūn pip hām xexka tu', tu Topa kopa kuxa mām 'ohnāg, ha Topa te' hip punethok, ha Nōe te mīpkox xexka mīy, yā mīptut xexka', yā kōnāg yīmū' mōg nō'ōm. Hāpxip 'Thā tikmū'ūn xohix xakix kōnāg kopah, pa xohix te' 8 mōxakux mīpkox kopah, tu' xakix 'ohnāg, 'ap xakix'ah kōnāg kopah.

21 Yā mīpkox kopa' xakix 'ohnāg, yā' hi'. Hā kaxīy tikmū'ūn hi xe'ēgnāg mōkuma'mōg, ha' kux 'ohnāg. Tikmū'ūn kuxa tup, tu' kuxa mām Topa kopah, hap-tox pix. Yā putox pix'ax te tikmū'ūn xax pix 'ohnāg. Yeyox Kunnix putpu' hi', nūy tikmū'ūn hīnnā'.

22 Tu ta' mōg Yeyox Kunnix pepix pexkox tu', tu mōktu' yūm Topa yīm xe'e tu', tu pexkox yōg nū'pok xop xohix xat, xix pexkox yōg xexka xop xat, xix pexkox yōg xexkanāg xop xat.

4

1 Hōmā Kunnix yīn xūy. Hā kaxīy 'āxop xūy putup kamah. Āpu hāmpē'āpaxeh Kunnix te hāmpē'paxex putuk. Hamūn, tikmū'ūn xūy, puxix hāpkummuk mīy putuppax'ah.

2 Āpu 'ūmīypax Topa te nōm putup, tu mōktu 'āxakix, ha Topa te 'āxat putup. Āpu 'ūmīy hok xate nōm putup.

3 Hōmā 'āxop te nōm mīy punethok, tu Topap-tup nōg xop te' mīy putuk. Yā Topap-tup nōg xop te hāpkummuk mīy pax, tu' nōy hā xupxetpax, tu' paptuxpax, tu hāpkute'expax, tu' xitpax tikmū'ūn xohix mūtik, tu yāy kotīnnāhā', nūy kenmuk xo'oppax, tu topa komut xop pu hām'āktuxpax.

4 Pa hōnhā 'āxop te hā kaxīy mīy 'ohnāg Topap-tup nōg xop mūtik. Ha Topap-tup nōg xop te: "Teptu 'āxop te hāpxopmā hok 'ūgmūg mūtik?" Kaxīy. Yā 'āxop gāy 'ohnāg, tu hāpkummuk mīy 'ohnāg nūmūtik, yīy 'āxop mānōg, nūy 'āxop 'āktux kummuk.

5 Pa hāpxip 'Thā nōm kummuk xop te Topa keppa' pip putup, ha Topa te nōm yōg hāpxopmā'ax kopit putup, ha nōm te yāy yōg hāpxopmā'ax 'āktux putup. Yā Topa te hi xop yōg hāpxopmā'ax kopit putup, ha ta' xakix xop putpu' hip-tup, ha Topa te yōg hāpxopmā'ax kopit putup kamah.

6 Hā kaxīy xakix xop te Topa yōg hām'āpak max'ax 'āpak. Hōmā nōm xakix xop yā tikmū'ūn, tu' pip hām xexka tu', ha Topa te yōg hāpxopmā'ax kopit. Nōm xop yōg yāmīy te Topa yōg hām'āpak max'ax 'āpak, nūy hāpxopmā'ax te Topa yōg putuk.

7 Hāpxip 'Thā hāpxop xohix nōg putup. Yā' kux. Āpu 'āp-tox max. Pa 'ātitx, nūy Topa pu hām'āktux max.

8 Āpu 'ānōy putuppaxnām. Xate 'ānōy putuppax, nūy ta' nōy yōg hāpkummuk mīy'ax yūmmūg kutōgnāg.

9 Āpu 'āpet xōnpax, puyīy puknōg xop mōxakux. Āpu hām'āktux hok, hu: "Āteputup'ah puknōg xop nūnteh." Kaxīy.

10 Topa te tikmū'ūn ka'ogāhā', puyīy Topa pu hāpxopmā max. Tute yāp-xet ka'ogāhā', pu hāpxopmā', tu' nōy ka'ogāhā', pu hāpxopmā' nōy mīy, yā 'ūxohix ka'ogāhā' te kaxīy. Āpu nōm xohix mīy, nūy tikmū'ūn hā 'ātehet,

11 Topa te 'āka'ogāhā', xayīy 'āxop tikmū'ūn xohix pu hām'āktux. Āpu Topa yōg hām'āktux 'āktux tikmū'ūn pu'. Topa te 'āka'ogāhā', xayīy 'āxop kuxa mām xop pu hāpxopmā max. Āpu hāpxopmā max, 'Thā Topa te 'āka'ogāhā', puyīy tikmū'ūn te: "Yā' max xe'ēgnāg Yeyox Kunnix". Kaxīy. Āpu Topa pu nōm 'āktux kamah, hu: "Āmax xe'ēgnāg. 'Āka'oknām. 'Ūgmū'āte nōm 'āktux

putup hāmyāxatamuk xohix kux 'ohnāg hā. Kaxīy.

Yeyox kopa' kuxa mām xop xūy

¹² Ūkxape xop, 'āte 'āp-tuppax. 'Āxop te' xūy xexka hā tot, yā tikmū'ūn te 'āxop kute'ex kummuk. 'Āpu hām'āktux hok, hu: "Teptu 'ūkxūy xexka?" Kaxīy. Hā kaxīy hām'āktux hok. Yā Topa te' xat, pu' kuxa mām xohix xop xūy hā tot.

¹³ 'Āpu 'ākuxa hittup. Yā Kunnix te' xūy hā tot, ha ta 'āxop te xūy hā tot kamah. 'Āxop te xūy hā tot, xayīy 'āxop kuxa hit-putup xexka putup, 'Ihā putpu' nūn Yeyox, ha tikmū'ūn xohix te' yūmmūg putup 'ūmax xe'ēgnāg Yeyox.

¹⁴ 'Āxop kuxa mām Yeyox kopah, tu Kunnix mūtik 'āmōg, yīy ta tikmū'ūn te 'āxop māmōg, nūy 'āxop 'āktux kummuk. 'Āpu 'ākuxa hittup. Tikmū'ūn te 'āxop kute'ex kummuk, Topa Koxuk mōg 'āxop mūtik hah, yā Koxuk xe'ēgnāg.

¹⁵ Pa xate' nōy putex, pe' xupxet, pe hāpkummuk mīy, pe hāpxūmāhīy, ha' nōy te xa hā yānān, yīy 'āxūy. 'Āmhok! Kaxīy hok. Yā hitop 'āxūy.

¹⁶ Pa 'ākuxa mām Yeyox Kunnix kopah, yīy ta' nōy te 'ākute'ex kummuk, ha 'āxūy. Hamūn. Yā' max nōmhā'. 'Āpu 'āyāyhāhup hok. 'Āpu Topa pu hām'āktux, hu: "Kunnix, 'āmōg 'ūgmūtik. 'Āmax". Kaxīy.

¹⁷ Hāpxip 'ohnāg 'Ihā Topa te tikmū'ūn yōg hāpxopmā'ax xohix kopit putup, tu yāy yōg tikmū'ūn yōg hāpxopmā'ax kopit putup hāmāxap. Texīy Topa te tikmū'ūn yōg hāmāxopmā'ax kopit kux putup? Yā tute Topa yōg hām'āpak max'ax 'āpak hok xop yōg hāpxopmā'ax kopit putup, nūy hāpkummuk hā yānān.

¹⁸ Yā Topa yōg tappet te: "Yā hāpxopmā'ax ka'ok Topa te tikmū'ūn kuxa kummuk xit, puyīy hāpkummuk mīy'ax hā yānān hok.

Texīy Topap-tup nōg xop nōm te hāpkummuk mīy? Yā Topa te yōg hāpkummuk mīy'ax hā yānān putup." Kaxīy.

¹⁹ 'Āxop te' xūy hā tot, Topa te' xat hah. 'Āpu Topa kopa 'ākuxa mām ka'ok. Topa te 'āxop mīy. 'Āpu 'ākuxa mām Topa kopah, nūy hāpxopmā max. Topa te xa hām'āktux xex, tu nōm xohix mīy.

5

Yeyox kopa kuxa mām xop pēnā'ax xop

¹ Ūkuxa mām xop pēnā'ax max xop, 'āte xa' kax'āmi'. 'Ūgmūn yā' kuxa mām xop yōg pēnā'ax max kamah 'āxop putuk. Hōmā Yeyox xūy, tu' xok, ha 'āte' pēnāhā', tu tikmū'ūn pu nōm 'āktux, yīy tikmū'ūn tek kummugāhā'. Hāpxip 'Ihā putpu' nūn putup

Yeyox, ha 'āte Kunnix pēnāp-tup yā' max xe'ēgnāg, ha Kunnix te xa maxnāp-tup.

² 'Āpu 'ūkuxa mām xop pēnā max, yā kahnēn pēnā'ax te kahnēn pēnā max putuk. Topa te xa' popmāhā 'ūkuxa mām xop, xayīy pēnā'. 'Āpu 'ūp-tuppax, nūy nōm pēnā'. Yā Topa tep-tup. 'Āpu 'ākokōn hok, pa nōm xop pēnā max. Xate' kuxa mām xop pēnāhā', nūy tayūmak pop, puxix tu' kummuk. Pa xate' kuxa mām xop pēnāp-tuppax, puxix tu' max.

³ 'Āpu' kuxa mām xop xatpax hok, xate nōm pēnāhā', pa 'āpu hāpxopmā max, puxix nōm 'āpēnā', nūy kama' mīy 'āputuk.

⁴ Hāpxip 'Ihā putpu' nūn putup Yeyox. Kahnēn xuxyā te' pēnā'ax pēnā max. Hā kaxīy Yeyox te 'āxop pēnā max, tu xa' popmāp-tup 'ūxat'ax xexka yōg kuxxax max xe'ēgnāg, nūy 'āxexka mīy.

⁵ Tik tup xop, 'āpu tik hitap xop 'āpax, nūy 'āyīpkox pi'. 'Āpu yāy kutōgnāg pe'āpaxeh, nūy nōy hā 'ātehet. Yā Topa yōg tappet te: "Topa tep-tup'ah yāy xexka pe'paxex xop, pa Topa te yāy kutōgnāg pe'paxex xop pu hāmmaxnāhā". Kaxīy.

⁶ 'Āpu yāy kutōgnāg pe'āpaxeh nōy nā mōg, ha Topa ka'ok te 'āxop hā tep-tup, tu hāpxip 'Ihā tutep-tup putup, tu 'āxop xexka mīy putup.

⁷ 'Ok 'ākuxanōg? 'Āpu hām'āktux Topa mūtik, nūy 'ākuxa mām ka'ok Topa kopah, nūy 'ākuxanōg kux.

⁸ Pa 'ātit! Hāmpēnā'. Yā Hāmgāyāgnāg 'ūgāy, tu hāpkumep. Hāmgāy te': mīt, mīt, mīt. Yā xok xak, nūy putex. Hā kaxīy Hāmgāyāgnāg tep-tup, nūy 'ākuxa mām'ax kuxyā'.

⁹ 'Āpu 'ākuxa mām mōkumamōg. 'Āpu 'ūtuxhok, pu Hāmgāyāgnāg 'āxop mōgā hok, xayīy hāpkummuk mīy hok. Yā xate' yūmmūg 'āxape kuxa mām xop xohix pip hāpxexka xohix tu', ha' kuxa mām hok xop te nōm kummugāhā', yā 'āxop kummūgā putuk.

¹⁰ 'Āxop xūy putup 'ūxehēh, pa hāpxip 'Ihā' kux, ha Topa max xe'e te xa maxnāp-tup, tu 'āxop xānāp-tup, xayīy pi' 'āxop Kunnix mūtik mōkuma'āmōg, ha' kux 'ohnāg. Yā' max xe'ēgnāg. Topa te 'ākuxa māmāp-tup, tu xa ka'ok hōm putup. 'Ākuxa mām putup Topa ka'ok kopah.

¹¹ Yūmū'āte: "Topa 'ūka'ok xexka hāmyāxatamuk xohix kux 'ohnāg hā. Hamūn." Kaxīy.

Tikmū'ūn te 'āxop pe'paxex

¹² 'Āte hām'āktux, ha Xīnax te hām'āktux kax'āmi nū tappet tu'. 'Āte' yūmmūg Xit yā yūmūg taknōy putuk, tu 'ātu' xip ka'ok. 'Ātep-tup, nūy 'ākuxa hittupmā'. 'Āte xa hām'āktux 'ūxe'e nūhū hām'āktux Topa max yōg. 'Āpu 'ākuxa mām Topa yōg hām'āktux kopah.

¹³ 'Ūpip Yeyox kopa kuxa mām ka'ok xop hāpxexka Maminōn tu', yā 'āxape xop. Topa te nōmyīmōgātux. Nōm te 'āxop pu hām'āktux 'āxop pe'paxex. Ha ta' xip kama 'ūk-tok pit putuk Mā'ak, tu 'āxop pu hām'āktux kamah 'āxop pe'paxex.

¹⁴ 'Āxop yāy tu nū'nāhā'. 'Āpu yāy putup-pax, yā xape xop max putuk. 'Ātep-tup, xayīy 'āxop kuxa mām max, yā 'āxop yā Kunnix yōg xop. Hamūn.

Tu ta tu' kux.

PET TE TAPPET KAX'ĂMI II

1 Ūgmün Ximām Pet. Yeyox Kunnix tek xat, tu nūgkutnāhā'. 'Āte 'āxop pu' kax'āmi nūhū tappet. Topa te 'ākuxa tupmāhā xix Yeyox Kunnix te', xa tu 'ākuxa max. Yeyox Kunnix te yūmūg kuxa kummuk xit. Topa te 'ākuxa māmā max xix Yeyox Kunnix te', 'ūgmūg putuk. Yā' max kuxa mām'ax, yā hāpxop takat putuk.

2 'Ātep-tup, puyīy Topa xa maxnā punethok, nūy 'ākuxa māmā punethok, xayīy 'āxop Topa yūmmūg xix yūmūg xuxyā Yeyox yūmmūg.

Topa te tikmū'ūn xānāhā', tu nōm yīmōgātux

3 Topa 'ūka'ok, tu yūmū'ā hāpxop xohix popmāhā', 'ūyīy hāmmāx mīy, nūy Topa max putuk, tu Topa yūmmūg. Topa te yūmūg xānāhā', 'ūyīy yūmū nūmūtik pī', nūy 'ūyōg max xe'ēgnāg pēnā'. Yā' xexka', tu' max Topah.

4 Ha kaxīy Topa te yūmū'ā hāpxop xe'ēgnāg 'āktux xex, 'ūyīy hāpxopmā kummuk putup xūy kux, tu hām xexka xohix yōg tikmū'ūn putuk hok nōm te yāy kummugāhā', pa yūmū'āte Topa putuk putup.

5 'Āxop kuxa mām ka'ok Topa kopah. 'Āpu hāpxopmā max nōynā mōg. 'Āxop te hāpxopmā max. 'Āpu hāmyūmmūg nōynā mōg.

6 'Āxop te hāmyūmmūg. 'Āpu hāpxopmā kummuk putup xūy kux nōynā mōg. 'Āxop te hāpxopmā kummuk putup xūy kux. 'Āpu hāpkummugā hā tot nōynā mōg. 'Āxop te hāpkummugā hā tot. 'Āpu Topa putuk nōynā mōg.

7 'Āxop te Topa putuk. 'Āpu Yeyox kopa mām ka'ok xop putuppax nōynā mōg. 'Āxop te Yeyox kopa kuxa mām ka'ok xop putuppax. 'Āpu 'ānōy putuppax nōynā mōg.

8 'Āxop te' mīy punethok te kaxīy, nūy ta Yeyox Kunnix yūmmūg xexka', tu tikmū'ūn pu Yeyox 'āktux max putup.

9 Pa xate' mīy 'ohnāg te kaxīy, nūy ta 'āxop hāmyūmmūg kutōgnāg, nūy hāpēnāg-tōgnāg putuk, nūy pa hok xop putuk. Yā Yeyox te 'ākuxa kummuk xit, pa xate' xaxok.

10 'Ūkxape xop, Topa te 'āxop xānāhā', tu 'āxop yīmōgātux. 'Āpu Topa yōg putat hā mōg kuma mog. Hā kaxīy 'ākuxa mām kux putup'ah,

11 tu pexkox hā mōxakux putup, pa' pip putup yūmūg xuxyā Yeyox Kunnix yōg tikmū'ūn, yā' kuxa tup xop, ha Topa te 'āxop xat putup hāmyāxatamuk xohix kux 'ohnāg hā.

12 Hōmā 'āxop te' xupak nōm hāpxop xe'e xohix, tu 'āyīpkox pip, tu' mīy punethok. 'Āxop te nōm yūmmūg xexka'. Pa xa nōm yūmmūgāhā 'ūxeheh, pu' max. 'Āte nōm xop 'āktux putup punethok 'ūxeheh.

13 'Āte hāmpekpaxex 'ūkxip, kopxix xa nōm yūmmūgā 'ūxeheh.

14 'Āte' yūmmūg, hāpxip 'īhāg xip kux putup, yāg xok putup, yā yūmūg xuxyā Yeyox Kunnix te 'ā nōm 'āktux.

15 Hōmā 'āte xa yūmmūgāp-tup punethok 'ūxeheh, xayīy 'āxop nōm xaxok hok. Hāpxip 'īhāg xok putup, ha 'a 'āxop te nōm hāpxop xaxok putup'ah.

Kunnix xe'ēgnāg 'āktux

16 'Ok 'ūgmū'āte xa yāy yōg hām'āktux hitop 'āktux, nūy xa hām'āktux yūmūg xuxyā Yeyox Kunnix putpu' nūn'ax max xe'ēgnāg? 'Āmhok. 'Ap hitop'ah hām'āktux. Pak mū'āte' pēnāhā Yeyox 'ūxexka', tu' max.

17 Yā hōmāg mū'āte' pēnāhā'. Yūmūg 'ātak Topa xip pēpix pexkox tu', ha ta' xip Yeyox nūnte 'ūgmūg mūtik, hak mū'āte' xupak, Topa te: "Nūhū yā 'ūgkutok pīt. 'Āte mō'yāy xe'ēgnāg xexka'." Kaxīy. Hā kaxīy Topa te yāy kutok xexka xe'ēgnāg mīy.

18 Yā nōm yānmūn xupep'ax te pexkox tu' nūn, ha tak mūg pip yīktix yīmū', tuk mū'āte nōm 'āpak, 'īhā' xip yūmūg xuxyā Yeyox xip. Yā' max xe'ēgnāg.

19 Hōmā 'ūhittap Topa pupi hām'āktux xop te Topak-tok 'āktux, ha ta hōnhāg mū'āte Yeyox pēnāhā'. Yā Topa pupi hām'āktux xop te kax'āmi hām'āktux xe'e, yā' koit'ah. Yā' xe'e. 'Āpu nōm hām'āktux 'āpax, ha 'āxop te hāmyūmmūg putup. Kuyānām tat te putat tupmāhā'. Hā kaxīy Topa pupix hām'āktux xop yōg hām'āktux te Topa yōg putat max tupmāhā', yā Topa yōg putat tupmāp-tup, ha mōktu yā Yeyox Kunnix te putpu' nūn nōm hāptup 'īhā'. Māyōnnāg xexka xupep. Hā kaxīy Yeyox xupep putup kamah.

20 'Āpu hāmyūmmūg xe'e'. Hōmā 'ūhittap tik te Topa pupi hām'āktux, tu hām'āktux kax'āmi Topa yōg tappet tu'. Texīy hām'āktux? 'Ok hām yūmmūg xexka', hu hām'āktux? 'Āmhok.

21 'Ok tikmū'ūn tep-tup, hu Topa pupi hām'āktux? 'Āmhok. Pa Topa te tu' popmāhā hām'āktux, ha Topa Koxuk te' yīyāhā'.

2

1 Hōmā Topa pupi hām'āktux koit xop te kuxa mām ka'ok xop mūtik yāy kotīnnāhā', tu hām'āktux Topa pupi' hām'āktux, pa yā' koit. Hā kaxīy tikmū'ūn te 'āxop mūtik yāy kotīnnāp-tup, nūy 'āxop pu hāmyūmmūgā', pa yā' koit, tu tikmū'ūn pu hāmyūmmūgāp-tup, nūy tikmū'ūn kuxa mām kuxyā', tu hām'āktux Topa yōg putat yōg hāmyūmmūg

'äktux, pa yä' koit, tu yümüg xuxyā Yeyox 'äktux kummuk putup. Yeyox te tikmü'ün pupi' xok, pa nôm te hām'äktux putup, hu: "Yeyox 'ap xe'e'ah." Kaxiy. Hā kaxiy mīy, ha Topa te yōg kummuk mīy'ax hā yānān putup mō'ka'ok.

² Topa te' yānān putup, pa nôm kummuk xop te yāy yōg putat kummuk kopa' mōg, ha tikmü'ün te nôm pēnāp-tup, hu Topa yōg putat max 'äktux kummuk putup.

³ Nôm tikmü'ün kummuk te tayūmak putuppax, hu xa yāy yōg hām'äktux hitop yūmmügāp-tup, xayiy 'äxop tu' pago. Pa Topa te' yūmmüg, hu' hip. Hāpxip kutōgnāg 'Ihā Topa te nôm xop yōg hāpxopmā'ax kopit putup, nūy yōg hāpkummuk mīy'ax hā yānān.

⁴ Hōmā 'ühittap pekkox yōg nū'pok xop te hāpkummuk mīy pekkox tu', ha Topa te yōg hāpkummuk mīy'ax yānān, yā nôm putyōn pekkox kūnāpa', tu nôm xex Hāmgāyāgnāg pet kopah, yā kanet ka'ok putuk, tu nôm kīy. Yā hāpkoxtap xexka'. Nôm te' hip, yā hāpxip 'Ihā Topa te yōg hāpkummuk mīy'ax hā yānān putup.

⁵ Hōmā 'ühittap, ha ta tikmü'ün xohix te hāpkummuk mīy kamah, tu Topap-tup nōg. Ha Nōe te tikmü'ün pu Topa yōg hām'äktux xe'e' äktux. Pa tikmü'ün te hāpkummuk mīy kux 'ohnāg, ha Topa te yōg hāpkummuk mīy'ax hā yānān. Yā Topa te' xat, ha kōnāg xexka te hām xexka mō'nīy, ha tikmü'ün xohix xakix kōnāg kopah. Pa' xakix hok Nōe xix yā xape xohix te' 7. Yā' pip mīpkox kopah, yā mīptut xexka kopah, tu kōnāg yīmū' mōg. Pa tikmü'ün nōy xohix xakix kōnāg kopah.

⁶ Hōmā 'ühittap ha ta kōmēn Xonōm yōg tikmü'ün xohix te Topap-tup nōg xix kōmēn Gōmōg yōg tikmü'ün xohix te', ha Topa te yōg hāpkummuk mīy'ax hā yānān, ha kuxap te nôm kōmēn tix puk xix yōg tikmü'ün xohix, ha' xakix. Topa te nôm Topap-tup nōg xop tu' yānān. Hā kaxiy tikmü'ün te' yūmmüg Topa te tikmü'ün xohix yōg hāpkummuk mīy'ax yānān putup.

⁷⁻⁸ Yā No te' pēnāhā'. Yā No te' yāykoitnāhā kōmēn Xonōm yōg tikmü'ün kummuk mütik. Yā tik max No, tu' pēnāhā tikmü'ün te' nōy hā xupxetpax, tu' yīpkox 'ohnāg. No te tikmü'ün yōg hāpkummuk mīy'ax pēnāhā', tu' xupak, hu' kuxa hittup 'ohnāg, yā 'āmnīy xohix hā' kuxa hittup 'ohnāg. Kōmēn yōg tikmü'ün xohix xakix, yā kuxap te' kix, pa Topa te No xut, ha' xok 'ohnāg.

⁹ Hā kaxiy yūmū'āte' yūmmüg Topa te Topap-tuppax xop mōy'ax hāpkummuk kopah, pa Topap-tup nōg xop kīy'ax, ha mōktu nôm 'āmnīy xupep. Yā tute Topap-tup nōg xop yōg hāpkummuk mīy'ax hā yānān putup.

¹⁰ Hamūn, Topa te tikmü'ün yōg hāpkummuk mīy'ax hā yānān xexkap-tup, yā

nôm tep-tuppax hāpxopmā'ax kummuk, hu' mīy 'ūxohix, tu Topa yōg xat'ax mīy 'ohnāg.

Hā kaxiy nôm te' koit xop, nôm te Yeyox kopa kuxa mām ka'ok xop pu hāmyūmmügāhā', pa yā' koit, tu hām'äktux ka'ok, pa hāmyūmmüg 'ohnāg, tu yāy xexka pe'paxex, tu pekkox yōg max xop 'āpak 'ohnāg, pa nôm 'äktux kummuk.

¹¹ Nôm te' koit xop 'ūpu'uk, pa pekkox yōg nū'pok xop 'ūka'ok xexka', pa pekkox yōg nū'pok xop te pekkox yōg max xop 'äktux kummuk 'ohnāg.

¹² Xokxop gāy xop te hāmp'e'paxex max 'ohnāg, pa' gāy. Ha tikmü'ün te nôm xak, nūy kix. Hā kaxiy nôm te' koit xop te hāmp'e'paxex max 'ohnāg, pa' gāy, ha Topa te' kuxyāp-tup.

¹³ Nôm te' koit xop te tikmü'ün kummügāhā', ha Topa te nôm tu' yānān putup. Tikmü'ün te hāpkummuk mīy'ax xaptop, puyiy tikmü'ün nôm pēnā hok. Pa nôm te' koit xop tep-tuppax hāpkummuk mīy, puyiy tikmü'ün nôm pēnā'. Nôm te pām mähā 'äxop mütik, yā 'äxop te pām mähā', nūy Yeyox xok'ax pe'āpaxeh. Yā 'äxop te nôm te' koit xop mütik yāyhāpup. Nôm te pām mähā 'äxop mütik, tu' koit putuppax,

¹⁴ tu 'ün kummuk pēnāpax, tu hāpkummuk mīy'ax putup xūy kux 'ohnāg, tu' kuxa mām pu'uk xop pu hāmyūmmügā kummuk, ha' kuxa mām koit'ax kopah. Nôm koit xop te tayūmak putup xūy, ha Topa te hām'äktux, hu: "Yā' kummuk nō'om". Kaxiy. Topa te nôm xūyāp-tup.

¹⁵ Nôm te' koit xop te Topa yōg putat max xak, tu yāy xaxogāhā', yā hāpxe'e yūmmüg 'ohnāg. Hōmā Mana'am, yā Meot kutok te tayūmak putuppax, tu hāpkummuk mīy, nūy tayūmak pop,

¹⁶ pa Topa te: "Kaxiy hok". Kaxiy. Yā Topa te Mana'am yōg yomēn yīgāhā', yiy hām'äktux, hu: "Kaxiy hok". Kaxiy. Tu Mana'am hupmähā'. Mana'am xip Topa pupi hām'äktux xop kopah, pa' kummak. Hā kaxiy nôm te' koit xop te hāpkummuk mīy, yā Mana'am putuk.

¹⁷ Tikmü'ün te kōnāg xupup xox tu' mōg, nūy kōnāg 'üm tat, pa' nak, puxi' tat 'ohnāg. Tikmü'ün te hāmgōy xexka pēnāhā', tu hāmp'e'paxex tex tip-tup. Pa 'āmuuh te hāmgōy xexka xit, ha tex ti 'ohnāg. Hā kaxiy tikmü'ün mōg, nūy nôm te' koit xop yōg hāmyūmmüg 'āpax, pa hāmyūmmüg max 'ohnāg.

¹⁸ Nôm te' koit xop te yāy xexka 'äktux, tu hām'äktux hitop tikmü'ün pu', tu' yūmmügāhā tikmü'ün te yāy yōg putup'ax mīy, pu' max. Yā' koit, pa tikmü'ün te' xupak, tu' mīy. Yā hōmā tikmü'ün te' kummuk xop nīm, pa hōnhā putpu' mōg.

¹⁹ Nôm te' koit xop te: "Āpu 'ümīy 'äxop te nôm putup, puyiy 'ūnōy 'äxop xat hok." Kaxiy. Pa yā' koit. Xuxyā xop te kāmānat

xop xatpax. Hā kaxīy tik yōg putup'ax te tik xatpax. Hamūn, nōm te' xat te xuxyā putuk, ha' nōy te' mīypax te kāmānat xop putuk.

²⁰ Hā kaxīy tikmū'ūn xohix. Tikmū'ūn te yāy putup'ax mīypax, yā' kummuk. Pa hāpxip ṭhā' kuxa mām yūmūg xuxyā Yeyox Kunnix kopah, ha Yeyox te' kuxa kummuk xit, nūy' yānān tu' kuxa max tat. Pa hāpxip ṭha putpu' yāy putup'ax mīy. Nōmhā' kummuk xexka'.

²¹ Hamūn, tikmū'ūn te Topa yōg putat xe'e hā' mōg 'ohnāg, yā' kummuk miāx. Pa tikmū'ūn te Topa yōg putat xe'e hā' mōg. pa' xak, tu' mōg, yā' kummuk xexka'.

²² Yā hām'āktux hittap putuk. Yā hām'āktux hittap, tu: "Kokex yōgmīy, tu putpu' māhā'." Kaxīy. Tu xe: "Tikmū'ūn te xapup pix, pa putpu' xe nō yāy muk putōy hā." Kaxīy. Hā kaxīy tikmū'ūn te hāpkummuk mīy kux, pa putpu' hāpkummuk mīy.

3

Yeyox putpu' nūn putup

¹ Ūkxape xop, hōmā 'āte xa tappet kax'āmi'. Hōnhā 'āte xa' kax'āmi 'ūxeheh nūhū tappet. 'Āte tappet tix kax'āmi', nūy xa hāmūmūgā 'ūxeheh, xayīy hāmpē'āpaxeh xe'e'.

² Hōmā 'ūhittap Topa pupi hām'āktux xop xe'ēgnāg te Topak-tok putpu' nūn'ax 'āktux, ha Yeyox yōg mō'pok xop te 'āxop pu nōm 'āktux kamah, yā Yeyox yōg hām'āktux 'āktux. 'Ātep-tup, xayīy xe nōm pe'āpaxeh.

³ 'Āpu nū pe'āpaxeh hāmāxap. 'Āpu hāmūmūmūg. 'Āxop te' yūmmūg, hām xexka yōg hāmūxatamuk xox putox ṭhā' pip putup tikmū'ūn kummuk, tu yāy yōg putup'ax kummuk mīypax putup, tu 'āxop kute'ex kummuk putup,

⁴ tu: "Yeyox te hām'āktux xex 'ūputpu' nūn putup. 'Ok kaxīy hām'āktux? Teptu putpu' nūn 'ohnāg? Hōmā Topa te' mīy hām xexka' xix hōnhā', yā 'āmnīy xohix te yāy putuk. 'Ap nūn'ah. 'Ūpip mōnāyoxop, tu' xakix, pa' nūn 'ohnāg." Kaxīy.

⁵ Pa nōm tep-tup'ah, nūy hāmpē'paxeh max. Hōmā 'ūhittap Topa te' mīy hām xexka', yā kōnāg hā' mīy, tu kōnāg hā' xut,

⁶ tu ta hāpxip ṭhā kōnāg hā hām xexka xohix xexka koxyōy xix tikmū'ūn xohix kōnāg hā' kix. Yā Topa te' xat.

⁷ Tu ta' xat putup, tu kuxap hā' koxyōy putup hām xexka xix pexkox yokomak xop. Yā Topa te' hip. Hāpxip ṭhā tute Topap-tup nōg xop yōg hāpxopmā'ax kopit putup, nūy yōg hāpkummuk mīy'ax hā yānān.

⁸ 'Āpu' xaxok hok nū hāpxop puxet. Hāmūxatamuk te' 1.000 te 'āmnīy puxet putuk Topa pu', yā Topa pu' yāy putuk.

⁹ Topa te hām'āktux xex Topak-tok putpu' nūn putup. Tikmū'ūn te hāmpē'paxeh

hāmūxatamuk xohix xexka nōg, pa' nūn 'ohnāg. Pe 'āmhok, 'ap xohix'ah. Topa pu hāmūxatamuk xohix 'ohnāg. Pa Topa te' hip punethok, puyīy tikmū'ūn yāy yōg hāpkummuk mīy kux. Tutep-tup'ah tikmū'ūn koxyōy.

¹⁰ Pa nōm hāptup mō'nāp-tup, ha yūmūg xuxyā Yeyox putpu' nūn putup. Tikmū'ūn te xupxet hip 'ohnāg, tu hāmpē'paxeh 'ūnūn putup'ah xupxet. Hā kaxīy tikmū'ūn te Yeyox hip putup'ah, tu hāmpē'paxeh 'ūnūn putup'ah. Yā nōm hāptup mō'nāp-tup. Tikmū'ūn te' xupak putup hāmūhūn xexka', yā' nōg putup pexkox yokoma' xop, yā māyōnnāg xohix puk putup, xix māyōn, xix māyōn hex, yā' xohix puk putup, ha' nōg putup hām xexka xix hām xexka yōg hāpxop xohix.

¹¹ Hā kaxīy 'ūnōg putup hāpxop xohix. 'Āxop te' yūmmūg. Texīy 'āxop hōnhā? Putep mūn mīy putup hōnhā? Yā 'āpu hāpxopmā xe'e, yā Topa putuk.

¹² 'Āpu Yeyox te putpu' nūn'ax hip. Topa te yāy kutok putpu' nū'kutnāp-tup. 'Āpu hāpxopmā max, puyīy hāpxip kutōgnāg ṭhā' nū' Yeyox. Yeyox nūn putup, ha pexkox yokoma' xop puk putup, ha' nōg putup, yā hāmpukpex xexka', ha māyōn hep pognām putup, xix māyōn hex, xix māyōnnāg xop.

¹³ Pa Topa te hām'āktux xex, ha yūmū'āte nōm hip, yā pexkox yokoma' xop tup hip, xix hām xexka tup. Yā Topa te' mīy putup. Ha 'ōnte tikmū'ūn te hāp'xe' mīy putup.

¹⁴ Ūkxape xop, 'āpu Yeyox te putpu' nūn'ax hip. Pu yā 'ākuxa tup, nūy hāpkummuk mīy hok, yā Topa pu 'āmax, nūy yāy kix hok Topa mūtik.

¹⁵ 'Āpu hāmpē'āpaxeh hōnhā Topa te' hip, yā 'ap xupep'ah Yeyox hōnhā. Tute 'āxop xānāhā'. 'Āpu 'ōg hāpkummuk mīy kux, ha Topa te' 'ākuxa kummuk xit putup, nūy yānān, tu kuxa max tat. Yā yūmūg taknōy Paot te nōm hāpxop kax'āmi kamah. Yā Topa te Paot pu nōm yūmmūgāhā'.

¹⁶ Paot yōg hām'āktux te yōgnū putuk, tu nōm kax'āmi tappet tu'. Yā' pip hāpxop ka'ok 'ūyōg tappet tu', ha tikmū'ūn te' yūmmūg mō'pu'uk. Pa' pip tikmū'ūn, tu hāmūmūmūg 'ohnāg, tup-tox kummuk, tu tikmū'ūn pu Paot yōg tappet yūmmūgā kummuk, tu' koit, yā Topa tappet xohix yūmmūgā kummuk, tu yāy kuxa mām kux.

¹⁷ Ūkxapexop, 'āte xa nōm kax'āmi', ha 'āxop te nōm yūmmūg. Pa 'ātit, nūy hāmūmūmūg, puyīy nōm koit xop xa yūmmūgā kummuk hok. Pa 'ātit, puyīy 'ākuxa mām kux hok. Yā nōm koit xop te Topa yōg xat'ax mīy 'ohnāg.

¹⁸ Topa te xa maxnāhā'. 'Āpu 'ūtuxhok, puyīy Topa xa maxnā nōynā'āmōg. 'Āpu yūmūg xuxyā Yeyox Kunnix yūmmūg nōynā'mōg. Yeyox te yūmūg kuxa kummuk

xit. 'Āpu yūmū hām'āktux, hu: "Yeyox
'ūmax xe'ēgnāg." Kaxīy. 'Āpu yūmū Yeyox
Kunnix xexka mīy hōnhā, xix' xexka mīy
hāmyāxatamuk xohix kux 'ohnāg hā.

Tu ta tu' kux.

YOĀM TE' KUXA MĀM KA'OK XOP PU KAX'ĀMI' I

Hām'āktux te tikmū'ūn hīnnāhā'

¹ Ūgmū'āte xa ka'āmi', nūy xa Topak-tok Yeyox Kunnix 'āktux, ha Topa yōg Hām'āktux putuk. Hōmā hāmyāxatamuk xohixnāg 'īhā', 'ap xip'ah hām xexka', xix pexkox, pa nōm Hām'āktux xip tap, yā Topak-tok, hak mū'āte' xupak, xi' pēnāhā', xik mū'āte' ūgyīm hā' xupit, ha nōm Hām'āktux yā Topak-tok, tu' xohix hīnnāhā'.

² Tu ta tu' xip hām tu, hak mū'āte' pēnāhā', huk mū'āte' nōm hām'āktux 'āktux putup, yā' hī xe'ēgnāg, tu' hī kux putup 'ohnāg, tu yūmūg Tak Topa mūtik ti ka'ok, ha yūmū'ā tu' mūg,

³ tu xa hām'āktux, nūy xa hāmyūmmūgā', yāk mū'āte' pēnāhā', tu' xupak, tu xa' xuktux, xayīk mūg kuxa mūtik yā 'ākuxap-xet. Kaxīy yūmūg kuxap-xet yūmūg Tak Topa kuxa mūtik, xik-tok Yeyox Kunnix kuxa mūtik.

⁴ Ūgmū'āte tappet mīy, nūy 'ākuxa hitupmā', ha mōktu yā hittup xexka'.

Tu Topa te hāptupmāhā' āktux

⁵ Kunnix tek mū'ā hām'āktux, hak mū'āte xa' xuktux, hu: Māyōn te hāptupmāhā', tu 'āmnīy koxtap nōā', hā kaxīy Topa yā max xe'ēgnāg, tu hāpoxpōmā kummuk 'ohnāg.

⁶ Tikmū'ūn te: “Ūgkuxap-xet Topa kuxa mūtik,” kaxīy, tu hāpoxpōmā kummuk pax, puxix tu mō'āmā', tu yā' koit.

⁷ Tikmū'ūn te hāpkumep hāptup 'īhā, puxix putat pēnā max, ha' nōy xop xohix te' yōg hāpoxpōmā'ax pēnāhā'. Hā kaxīy yūmū'āte hāmyok mīy, Topa putuk yūmū'āte hāmyok mīy, kopxix yūmūg kuxap-xet, ha Topak-tok Yeyox Kunnix yūmūg pupi' xok tap, tu yāy hep 'āta nū'nāhā', nūy yūmūg kuxa tupmā, ū yūmūg kuxa tu max.

⁸ Hu: “A 'āte hāpkummuk 'ūm mīy'ah,” kaxīy, kopxix yā' koit, 'ap hāpxe'e' āktux'ah.

⁹ Pa yūmū'āte yāy hāpkummuk mīy'ax 'āktux, xix Topa pu' xuktux, puxix Topa' mīy'ax kummuk xaxogā', pu tu kux, Topa te hām'āktux xex hah, tu hāmyok mīy, nūy yūmūg kuxa kummuk tupmā', ū kuxa tu max.

¹⁰ Yūmū'āte: “Yāk kuxa max. 'Āte hāpoxpōmā kummuk 'ohnāg,” kaxīy, kopxix yā' koit, yā Topa te' koit 'āktux, tu Topa pu yūmūg yīpkox 'ohnāg.

2

Kunnix te yūmūg mōgnīynām

¹ Ūgkutok xop, 'āte nū mīy tappet, xayīy 'āxop hāpkummuk mīy hok. Yūmūg 'ūm te

hāpkummuk mīy, puxix Yeyox Kunnix te hāmyok mīy pax, tu yūmūg Tak Topa pu hām'āktux, yūmūg pupi' hām'āktux,

² ha Topa te yūmū yōg hāpkummuk mīy'ax xaxogāhā', yā Kunnix xok yūmūg pupi', nūy hāpkummuk mīy'ax xaxogā', pu tu kux. Ya' hep xop xohix yōg hāpkummuk mīy'ax xaxogāhā kamah.

³ Topa yōg xat'ax pu yūmūg yīpkox pi', kopxix yūmūg Topa yūmmūg, tuk kuxa mām. Yā Topa yūmmūg xe'e'.

⁴ Tikmū'ūn te: “'Āte Topa yūmmūg,” kaxīy, pa' yōg xat'ax pu' yīpkox hok, puxix yā' koit, tu hāpkohe mīy.

⁵ Tikmū'ūn 'ūm te Topa yōg hām'āktux pu' yīpkox pi', puxix Topa mō'yāy xe'ēgnāg, hā kaxīy yūmūg kuxap-xet 'ūkuxa mūtik.

⁶ Tikmū'ūn te: “Ūgkuxap-xet Topa kuxa mūtik,” kaxīy, pūyā mōg, nūy hāpoxpōmā max, nūy Yeyox Kunnix yōg hāpoxpōmā'ax tat.

Tu' xat'ax tup 'āktux

⁷ Ūkxape xop: 'Ūxat'ax hittap 'āte xa kax'āmi'. Yā hōmā tikmū'ūn te xa' xat'ax 'āktux, tu xa hām'āktux hāmāxap.

⁸ Pa kama' tup 'ūxat'ax. Yā Kunnix te' yūmmūgahā', 'īhā tu hāpoxpōmā max. Yā' xohix te' pēnāhā', tu' hittup. Yā 'āmnīy tox kux putuk. Kunnix nūn, tu hāpoxpōmā max, tu yā hāptup koa putuk. Yā māyōn xupep, tu hām xexka xohix tupmāhā', ha kaxīy Kunnix nūn, tu hāmmax yūmmūgahā', tu hāmmaxnāhā', ha mōktu 'āxop kama te hāpoxpōmā max.

⁹ Tikmū'ūn te: “'Āte hāpoxpōmā max,” kaxīy. Yāy xapep-tupnōg, puxix yā hitop tu hāpoxpōmāhā', tu tikmū'ūn nōy putuk, nōm te 'āmnīy koxtap hā hāpkumep, tu hāmpēnā 'ohnāg, xix hāmyūmmūg 'ohnāg, tu yā yāy mō'āmā'.

¹⁰ Tikmū'ūn te xapep-tup pax, puxix hāmyūmmūg, tu' nōy mō'nīynām, puyīy hāpoxpōmā max, tu' kummugā 'ohnāg. Tu tikmū'ūn nōy putuk, nōm te hāptup 'īhā hāpkumep. Tu hāmpēnā max, nūy nōy mōgā max.

¹¹ Tikmū'ūn te' xapep-tup nōg, puxix tu tikmū'ūn nōy putuk, nōm te yāyxaxok hāpkoxtap kopah. Tu hāmpēnā 'ohnāg, tu tik pa hok putuk, tu hāmyūmmūg 'ohnāg.

¹² Ūgkutok xop: 'Āte xa kax'āmi', hu: Yā Kunnix te 'ōg hāpkummuk mīy'ax xaxogāhā', pu tu kux.

¹³ Ātak mūnōm xop: 'Āte xa kax'āmi', 'āxop te yūmūg xuxyā yūmmūg hah, ha' xiptap, 'īhā Topa te hām xexka mīy, ha 'āxop te nōm yūmmūg. 'Ātuk tup xop: 'Āte xa kax'āmi', 'āxop te hāpkummugā'ax kuxyāhā.

¹⁴ Ūgkutok xop: 'Āte xa kax'āmi', 'āxop te yūmūg Tak Topa yūmmūg hah, 'Ātak mūnōm xop: 'Āte xa kax'āmi', 'āxop te

yūmūg xuxyā yūmmūg hah, ha' xip tap, 'Ihā Topa te hām xexka mīy. 'Ātuk tup xop: 'Āte xa kax'āmi', 'āxop ka'ok hah. Topa yōg hām'āktux te 'ākopa' xip, ha 'āxop te hāpkummūgā'ax kuxyāhā'.

¹⁵ Topa hā' puknōg xop tep-tup nōg, yīy nōm pu' ayīpkox hok, xi' yōg hāpxop putup hok. 'Āxop te 'ānōy yōg hāpxop putup xūy, hu ta yūmūg Tak Topap-tup hok.

¹⁶ Topa hā' puknōg xop te hāpxopmā kummuk, yā' yōg hāpxopmā'ax xohix te: yāy yōg putup'ax kummuk mīy, xi' nōy yōg hāpxop putup, xix hāpxop nū'xok, nūy yāy xexkānā'. Yā' xohix te Topa hā' puknōg xop yōg hāpxopmā'ax, 'ap pexkox yōg'ah.

¹⁷ Ha hām xexka nōg putup, xi' yōg hāpxopmā'ax xohix nōg putup, pa tikmū'ūn te Topa pu hāpxopmā max, xix nōm pu' yīpkox pi', puxix tu hi xe'e kux 'ohnāg.

Tikmū'ūn te Kunnix hā' puknōg

¹⁸ 'Ūgkutok xop: Hāmyāxatamuk xohix xox putox te mō'nāp-tup. Tikmū'ūn te xa hām'āktux, ha hām'āpak, yā tik gāy xexka nūn, tu Kunnix tu' gāy, ha hōnhā tik gāy xop punethok, nōm te Kunnix tu' gāy, ha taxīy yūmū'āte' yūmmūg: Yā hāmyāxatamuk xohix xox putox.

¹⁹ Nōm Kunnix tu' gāy xop te yūmū'ā nīm, 'ūpuknōg tu', 'ūkuxa mām xet tu'. Pax pu yūmū yōg, puxix yā tu pip ka'ok. Pa' mōg, nūy mōy 'ūxohix pu' mūg, yā yūmū'ā hā' puknōg.

²⁰ Kunnix te Topa Koxuk nū'kutnāhā 'āxop hah, ha 'āha yīxoho', tu xa hāpxe'e yūmmūgāhā'.

²¹ 'Āte xa kax'āmi', 'āxop te hāmyūmmūg hah, yā' koit'ax te hāpxe'e hā' puknōg, tu yāy putuk 'ohnāg.

²² 'Ū 'ūm te' koit? Tute' koit, nōm te: "Yeyox mūn 'ap Kunnix'ah, Topa te Yeyox yāykutnā 'ohnāg," kaxīy. 'Ōhōm Yeyox tu' gāy, tu Topa yā Yeyox hā' Tak 'āktux hok, tu Yeyox yā Topa hāk-tok 'āktux hok, tute' koit tu hām'āktux.

²³ Tikmū'ūn te Topak-tok 'āktux hok, puxix kamah 'Ātak 'āktux hok, ha tikmū'ūn te Topak-tok putup, puxix tu' Tak putup kamah.

²⁴ Yīy hām'āktux'ax hittap xeh 'ākuxa kopah, nūy 'āhi xe'ēgnāg Topa yūmūg Tak mūtīk, xīk-tok mūtīk, tu' kuxap-xet Topa kuxa mūtīk, xīk-tok kuxa mūtīk.

²⁵ Yā Kunnix mūn te yūmū'ā hām'āktux xex, tu yūmūg xohix hīnnāp-tup xe'ēgnāg, 'ūg pip Topa yīkāgnāg pexkox tu'.

²⁶ 'Āte xa kax'āmi', puyīy tikmū'ūn xa mō'āmā hok.

²⁷ Kunnix te Topa Koxuk yīxōnnāhā 'āxop hah, ha tikmū'ūn 'ūm te xa hāmyūmmūgā hok. Yā Topa Koxuk mūn te 'ākopa' xip, tu xa

hāmyūmmūgāhā', tu Topa yōg hām'āktux xohix yūmmūgāhā', tu xa hāpxe'e yūmmūgāhā', yīy hāmyūmmūgā'ax pu 'īpkox pi', nūy Kunnix kuxa mūtīk 'ākuxap-xet.

²⁸ 'Ūgkutok xop: Ya hamūn. Kunnix kuxa mūtīk 'ākuxap-xet, hu ta kuxānōg hok, 'Ihā Kunnix te putpu' nūn, yīy yāyhāhup hok, 'ap yāy 'ūm xaptop putup'ah.

²⁹ Kunnix te hāmyok mīy, yīy yāy yōg tikmū'ūn te hāmyok mīy kamah, yā Topap-tok xop nō'ōm. Yā' max 'āxop te hāmyūmmūg.

3

Tu Topak-tok xop 'āktux

¹ Topa te mōg yūmūg yāy xe'ēgnāg, tu mōg yāy xe'ēgnāg, hu yūmūg 'āxet'ax mīy Topak-tok xop. Yā Topa hā yūmū'ā kutok xop xe'e'. Topa hā' puknōg xop te yūmūg putup nōg, Topa mūn yūmmūg 'ohnāg tu'.

² 'Ūkxape xop: Hōnhā Topa hā yumūg kutok xop, ha yūmūg xuxyā nūn, kopxix yūmūg yāy yānān 'ūtup'ax, ha xīy 'a yūmū'ātep yūmmūg'ah, pa Kunnix nūn, kopxix yūmūg yāy yānān, nūy Kunnix putuk, yūmūg xuxyā xe'e pēnāp-tup tu'.

³ Ha tikmū'ūn te Kunnix nūn'ax hip, tu' xak, nūy hāpxopmā max, nūy Kunnix yōg hāpxopmā max tat.

⁴ Tikmū'ūn te Topa yōg xat'ax pu' yīpkox hok, puxix tu hāpkummuk mīy. Yā hāpkummuk mīy, 'Ihā' xat'ax tu yīpkox 'ohnāg.

⁵ Kunnix nūn, nūy yūmū yōg hāpkummuk mīy'ax kuxyā', tu hāpkummuk mīy 'ohnāg. Yā 'āxop te' yūmmūg tap,

⁶ yīy tikmū'ūn kuxap-xet Kunnix kuxa mūtīk, puxix tu hāpxopmā max, tu 'a hāpkummuk mīy pax'ah. Pa tikmū'ūn te hāpxopmā kummuk pax, puxix Kunnix pēnā hok, xi' yūmmūg hok kamah.

⁷ 'Ūgkutok xop: 'Ōg pa 'āti', puyīy tikmū'ūn xa mō'āmā hok. Tikmū'ūn max te hāmyok mīy, ha kaxīy Kunnix te hāmyok mīy.

⁸ Tikmū'ūn te hāpxopmā kummuk pax, puxix Hāmgāyāgnāg yōg, yā Hāmgāyāgnāg te hāpxopmā kummuk tap. Topa te hām xexka mīy, 'Ihā Hāmgāyāgnāg te hāpkummuk mīy tap. Ha Kunnix nūn, nūy Hāmgāyāgnāg yōg hāpxopmā'ax nōā', pu tu nōg.

⁹ Topa Koxuk te Topak-tok xop ka'ogāhā', puyīy hāpxopmā kummuk hok, Topak-tok xop tu'.

¹⁰ Topak-tok xop xix Hāmgāyāgnāg kutok xop 'ap yāy putuk'ah. Yā Hāmgāyāgnāg kutok xop te hāpkoxe mīy, tu' nōy putup hok.

Tu yāy putup pax 'āktux

¹¹ 'Āxop te hām'āktux hittap 'āpak, hu: "'Ūyā yūmūg xohix yā yāy putup pax." Kaxīy.

¹² Tik hittap Kāyīy te yāy taknōy 'Ameo putex. 'Ānōy putex hok, nūy Kāyīy putuk hāpxopmā hok. Ha Hāmgāyāgnāg xop yōg,

tu yāy taknōy putex. Tep tu Kāyīy tep-tex? Yāy kūmīy'ax kummuk tup-tex, ūtaknōy te hāp-xopmā max, yīy Kāyīy tep-tex.

¹³ Ūkxape xop: Topa hā' puknōg xop te 'āp-tup nōg, pāyā 'ākuxānōg hok.

¹⁴ Hōmā yūmū'āte hāp-xopmā kummuk pax, pāyā Kunnix te yūmūg kuxa hīnnāhā', yīy yūmūg nōy putup pax xexka nōmhā. Yā taxīy hā yūmūg yāy kuxa hī'ax yūmmūg. Tikmū'ūn te' nōy putup hok, puxi' kuxa hī 'ohnāg.

¹⁵ Tikmū'ūn te' xapep-tup hok, puxix tu kuxa kopap-tex, ha tikmū'ūn tep-tex, puxix tu kuxa hī 'ohnāg.

¹⁶ Ha yūmū'āte putup pax yūmmūg. Yā Kunnix xok yūmūg pupi', nō yūmūg yāy xe'ēgnāg, tu yūmū'ā tu' xok, ūyā yūmūg xape pupi kakix kamah!

¹⁷ Ūptexop xexka te' nōy hok 'ūm pēnāhā', tu hāp-xop 'ūm hōm hok, ūkuxa ka tu', puxip-texop te Topa 'ūm putup pax 'ohnāg.

¹⁸ Ūgkutok xop: 'Āxop te 'ānōy putup, ha hāp-xopmā max, nūy 'āyīy'ax hāp-tup puxet hok. Pa hāp-xopmā max, nūy 'ānōy hā 'ātehet, nūy tup-tup pax xe'e'.

Tu kuxānōg hok Topa keppa 'āktux

¹⁹ Hā kaxīy yūmū'āte hāmyūmmūg, yāy yōg hāp-xopmā'ax max hā yūmū'āte hāmyūmmūg. Yā yūmūg mūn Topa yōg, hu yūmūg kuxa mām ka'ok Topa kopah.

²⁰ Yūmū'āte yāy kuxa yīkopit, tu yā yāy kupex, puxix Topa hāmyūmmūg, nūy yūmūg kuxa tu yūmmūg kamah.

²¹ Yūmūg kuxa yā yāy kupex hok, kopxix yūmūg mōg yāy nīynām, nūy Topa keppa' pi', nūy nōm pu hām'āktux, nūy yūmūg kuxānōg hok.

²² Topa pu yūmūg yīpkox pip, yīy ta yūmūg xat, ū hāp-xopmā max, hu Topa tu' xak, ū yūmū'ā hāp-xop 'ūm popmā', ha' popmāhā'.

²³ Ha Topa te' xat, hu: "Ākuxa mām 'ūgkutok Yeyox Kunnix kopah," kaxīy. Tu xe: "Āpu 'āxohix yāy putup pax," kaxīy. Yā kaxīy Kunnix te yūmū'ā xat tap.

²⁴ Tikmū'ūn yīpkox pi', puxix tu kuxap-xet Topa kuxa mūtik, xix Topa kuxa nōm mūtik kuxap-xet, tu yāy Koxuk yīxonnāhā', pu yūmū'ā hāmyūmmūgā'.

4

Tu' Koxuk xe'e 'āktux, xi' koxuk te mō'āmā'ax 'āktux

Tu' Koxuk xe'e 'āktux, xi' koxuk te mō'āmā'ax 'āktux

¹ Tikmū'ūn punethok te: "Topa Koxuk tek kopak xip," kaxīy. Nāy, 'āpu nōm xop yīkopit, nūy hāmyū mmūg. Pe yā Topa Koxuk xe'e te nōm kopa' xip. Yā tikmū'ūn punethok te hām'āktux max, pa Topa pupi hām'āktux'ah. Yā mō'āmā'!

² Hā kaxīy 'āxop te' kopit'ax, hu: Tikmū'ūn te Yeyox Kunnix 'āktux, tu Yeyox yā tikmū'ūn kutok 'āktux, puxix Topa Koxuk xip nōm xop kopah.

³ Pa nōm tikmū'ūn te hām'āktux hok, tu: "Ap tikmū'ūn kutok xe'e'ah," kaxīy, puxix Topa Koxuk 'ūkopa tu xip 'ohnāg. 'Āmhok. Pa' koxuk puknōg te' kopa' xip, nōm te Yeyox tu' gāy. Hōmā tikmū'ūn te' koxuk puknōg nūn'ax 'āktux, ha hōnhā hām xexka tu' xip.

⁴ Ūgkutok xop: Yā 'āxop Topa yōg, hu hām'āktux hā mō'āmā'ax xop kuxyāp-tup. Yā Topa Koxuk te' 'ākopa' xip, tu' ka'ok xe'ēgnāg, ha' koxuk puknōg pu'uk.

⁵ Topa hā' puknōg xop te yāy yōg hāp-xopmā'ax 'āktux, ha yāy yōg xape xop te hām'āpak, tu Topa hā' puknōg xop hā' xape, hu hām'āpak.

⁶ Pāyā yūmūg mūn Topa yōg. Tikmū'ūn te Topa yūmmūg, puxix yūmū yōg hām'āktux 'āpax, ha tikmū'ūn te Topa yūmmūg hok, puxix hām'āpak hok. Ha kaxīy yūmū'āte Topa Koxuk yūmmūg, xi' koxuk te mō'āmā'ax yūmmūg kamah.

Topa te tikmū'ūn mō'yāy xe'ēgnāg 'āktux

⁷ Ūkxape xop: 'Ūyā yūmūg yāy putup pax, yā Topa te yūmūg ka'ogāhā', ū xape putup pax. Tikmū'ūn te' xape putup pax, puxix yā Topak-tok, tu Topa yūmmūg.

⁸ Tikmū'ūn tep-tup pax hok, puxix Topa yūmmūg hok, yā Topa te mō'yāy xe'ēgnāg.

⁹ Tu yūmūg yūmmūgāhā', tu tak-tok puxehnāg nū'kutnāhā', tuk-tok puxehnāg nū'kutnāhā' hām xexka tu', pu yūmūg pupi tu' xok, nūy yūmūg kuxa hīnnā xe'ēgnāg.

¹⁰ Ha Topa te yūmūg mōg yāy xe'ēgnāg. 'A yūmū'āte Topa 'ūm mō'yāy xe'ēgnāg'ah. 'Āmhok. Pa Topa te yūmūg mōg yāy xe'ēgnāg, huk-tok nū'kutnāhā', pu yūmūg pupi tu' xok, hak-tok xok, nūy yūmū yōg hāpkummuk mīy'ax xohix xaxogā', pu tu kux.

¹¹ Ūkxape xop: Topa te yūmūg mōg yāy xe'ēgnāg, 'āpu yūmūg kamah yāy putup pax.

¹² 'A tikmū'ūn te Topa 'ūm pēnā xe't'ah. Yūmūg yāy putup pax, puxix Topa yūmūg kuxa hā yā tu kuxap-xet, ha mōktu yā mō'yāy xe'ēgnāg.

¹³ Hā kaxīy yūmūg kuxa mām ka'ok, ūyīy kuxap-xet Topa kuxa mūtik. Yā Topa te yūmūg kopa' xip, tu yāy Koxuk xe'ēgnāg yīxōnnāhā', yūmū'ā'.

¹⁴ Hak mū'āte Topak-tok pēnāhā'. Yā Topa tek-tok nū'kutnāhā' hām hah, pu Topa hā' puknōg xop pupi tu' xok.

¹⁵ Tikmū'ūn te Yeyox Kunnix yā Topak-tok 'āktux, puxix Topa kuxa nōm mūtik kuxap-xet.

¹⁶ Yā yūmū'āte Topa yōg mō'yāy'ax yūmmūg, ha yūmūg mōg yāy xe'ēgnāg, ha yūmūg kuxa mām ka'ok nōm kopah.

Topa mūn mō' yāy'ax xe'ēgnāg, ha tikmū'ūn te' nōy putup pax, puxix tu kuxap-xet Topa kuxa mūtik, ha Topa kuxa te nōm mūtik kuxap-xet 'ūyānān tu'.

¹⁷ Topa te mōg yāy xe'ēgnāg, tu mōktu yūmūg kuxa kopa' xip ka'ok, ha yūmū'āte mōg yāy nīynām. Ha hāptup xe'e mō'nāp-tup, 'Īhā Kunnix xe'e te putpu nūn, nūy hep xop xohix yōg hāpxopmā'ax kopit. 'Ūyā yūmūg hāpxopmā max, Kunnix te hāpxopmā max putuk!

¹⁸ Tikmū'ūn te' nōy putup pax, puxix tu' yīpkutuk hok, tup-tup pax, hu' yīpkutuk hok. Tikmū'ūn te' nōy yīpkutuk, puxip-tup kutōgnāg, tu' gāy'ax yīpkutuk, hu' kuxa xūy.

¹⁹ Topa te yūmūg mōg yāy xe'ēgnāg hāmāxap, yīk-nāy tu yūmū'āte Topap-tup pax.

²⁰ Tikmū'ūn te: “Āte Topap-tup pax,” kaxīy, tu' xape 'ūm nōy putup nōg, puxi' koit. Tikmū'ūn te' nōy pēnāhā', tup-tup hok, puxix Topap-tup hok kamah. 'Ap pēnā xe'ah.

²¹ Yīy Kunnix te yūmūg xat, hu: “Tikmū'ūn te Topap-tup pax, puxi' xape putup pax kamah,” kaxīy.

5

Tute' gāy xop kuxyā' āktux

¹ Tikmū'ūn kuxa mām ka'ok Yeyox Kunnix kopah, tu yā Topa yōg hāmyāyikutnā'ax yūmmūg, puxix nōm tikmū'ūn Topa hāk-tok. Tikmū'ūn te' Tak 'ūm putup pax, puxix-tok xop putup pax kamah.

² Yūmū'āte Topap-tup pax, tu 'ōg xat'ax mīy, hu Topak-tok xop putup pax kamah, tu' yūmmūg.

³ Tikmū'ūn te Topap-tup pax, tu tu' yīpkox pip, 'ap xat'ax ka'ok'ah, yūmūg mōg yāy xe'ēgnāg hah.

⁴ Yā Topak-tok xop te' gāy xop kuxyāp-tup, yūmūg kuxa mām ka'ok, puxix Topa hā' puknōg xop kuxyāp-tup.

⁵ 'Ū 'ūm te' kuxyāp-tup? Nōm xop kuxa mām ka'ok Yeyox kopa xop, tute' kuxyāp-tup, nōm te hāmyūmmūg, yā Yeyox mūn Topak-tok.

Tu Yeyox Kunnix' āktux

⁶ Tu' nūn, hap-tox pix kōnāg hā, ha' hep 'āta nū'nāhā'. 'Ūp-tox pix, 'Īhā Topa te yāy kutok 'āktux, ha yūmūg pupi' xok, 'ūyīy yūmū'ā Topa hā kutok xop kamah. Ha Topa Koxuk te: “Hamūn! Yā hām'āktux xe'e!” kaxīy.

⁷⁻⁸ Yeyox Kunnix yā Topak-tok xe'ēgnāg. Topa Koxuk te yūmūg kuxa kopa hāmyūmmūgāhā', 'ūyīy hāmyūmmūg, xix Yeyox putox pix, 'Īhā Topa te hām'āktux, xix Yeyox te yūmūg pupi' xok, nūy yūmūg kuxa kummuk xit, nūy tu kuxa maxnā', yā

hāpxopmā'ax 3 hā yūmūg kuxa mām ka'ok Yeyox Kunnix kopah.

⁹ Tikmū'ūn te hām'āktux, kopxix yūmūg xupax, ha Topa te hām'āktux, kopxix yūmūg yīpkox pi', hāpxe'e 'āktux hah, ha Topa te Yeyox yā yāy kutok 'āktux.

¹⁰ Tikmū'ūn kuxa yūm ka'ok Topak-tok kopah, puxix yāy kuxa tu: “Hamūn!” kaxīy. Tikmū'ūn kuxa yūm hok, puxix tu Topa te yā' koit 'āktux, Topa yōg hām'āktux pu' yīpkox 'ohnāg hah, ha Topa te: “Yeyox mūn yā 'ūgkutok xe'e!” kaxīy.

¹¹ Tu xe: “Āte 'ākuxa hinnā xe'ēgnāg, 'ūgkutok hā 'ākuxa hinnāhā, ha 'āhi kux 'ohnāg,” kaxīy.

¹² Topak-tok te tikmū'ūn mūtik tihī', puxix tu kuxa hi xe'e, ha tikmū'ūn mūtik tī hok, puxix tu hi 'ohnāg.

Tu' hi xe'ēgnāg, ha' kux 'ohnāg' āktux

¹³ Āte xa kax'āmi', nūy xa hāmyūmmūgā'. 'Āxop kuxa mām ka'ok Topak-tok kopah, tu 'ākuxa hi xe'ēgnāg.

¹⁴ Topa keppa yūmūg pip, tu' yīpkutuk 'ohnāg, tu Topa tu' xak, pu hāpxop 'ūm hōm, 'ūyīy yūmūg hāpxopmā max, puxix yūmū'ā' hōm.

¹⁵ Yūmū yōg hām'āktux 'āpak hah, hu yūmū'ā' hōm putup.

¹⁶ Pēyā tikmū'ūn te' xape pēnāhā', ha hāpkummuk mīy miāx, yīy Topa te' xūyāp-tup, pāyāp xok putup'ah. 'Āpu Topa tu' xax, pu 'āxape hinnā', puyīy tu' xok hok. Yā hāpkummuk miāx. Pēyā' xape te hāpkummuk xexka mīy, pūyā Topa tu' xax hok, puyī' hinnā'. Yā' xok putup.

¹⁷ Hāpkummuk mīy'ax xohix te yāy pu hāpkummugāhā', pa 'ap xohix tep-tex'ah.

¹⁸ Topak-tok xop 'ap hāpxopmā kummuk pax'ah, Topak-tok te' pēnā max hah, yīy Hāmgāyāgnāg te' kummugā hok, ha yūmū'āte' yūmmūg.

¹⁹ Yā yūmū' mūn Topa yōg, ha Hāmgāyāgnāg te Topa hā' puknōg xop xat.

²⁰ Yā Topak-tok nūn tap, tu yūmū'ā hāmyūmmūgāhā', 'ūyīy yūmūg Topa xe'ēgnāg yūmmūg. Topa kuxa mūtik yūmūg kuxap-xet, xik-tok Yeyox Kunnix kuxa mūtik yūmūg kuxap-xet. Yā Topa xe'ēgnāg, tu yūmūg kuxa hinnāhā xe'ēgnāg.

²¹ 'Ūgkutok xop: Topa 'ūm komut nīm! Nōm pu nū'āktetex hok! Tu ta tu' kux.

YOĀM TE 'ŪN KUXA YŪM KA'OK'AX PU KAX'ĀMI' II

¹ Ūgmūn yā tik pēnā max'ax, tuk xape hex pu kax'āmi', xix xape kutok xop pu kax'āmi', 'āte nōm putup pax xe'e'. 'Ak puxet'ah. Yā tikmū'ūn te hāmyok mīy, tu 'āp-tup pax kamah.

² Ūgmū'āte 'āp-tup pax, hāpxe'e tek mū kuxa kopa' xip hah. Yā' xip ka'ok mō kuma' mōg.

³ Pūyā yūmūg Tak Topa xa hāmmaxnā', xix ākuxa ka', xix 'ākuxa māmā'. Pūyāk-tok Yeyox Kunnix mūtik xa hāmmaxnā', xi mō'āyāy xe'ēgnāg, hāmyok mīy tu'.

Tu hāpxe'e 'āktux, xix yāy putup pax 'āktux

⁴ Tikmū'ūn te 'āxop 'āktux, yā 'āk-tok te hāmyok mīy, ha tikmū'ūn te' xuktux, ha kaxīy yūmūg Tak Topa te yūmūg xat, yīk kuxa hittup.

⁵ Ūkxape hex, 'ūyā yūmū yāy putup pax. Yā Topa te' xat tap, 'ūyā yūmūg yāy putup pax.

⁶ Tikmū'ūn te' nōy putup pax, puxix Topa yōg xat'ax mīy. Yā 'āte xe' xat'ax 'āktux, hu: "Ūyā yūmū yāy putup pax mōg kumak mōg," kaxīy.

⁷ Tikmū'ūn punethok te' nōy pu mō'āmā', tu hāpxexka xohix tu' pip. Tu Yeyox Kunnix 'āktux, hu: "Ap tikmū'un kutok xe'e'ah," kaxīy. Yā Kunnix tu' gāy xop, tu yā' koit.

⁸ Ūg pa 'āti', ka 'āhām'ax xaxok, puyīy pexkox yōg hāpxop hā Topa xa pago.

⁹ Kunnix te hāmyūmmūgāhā', yā' puxi', pa tikmū'ūn te hāmyūmmūg putup xūy, hu yāy pu hāmyūmmūg'ax puknōg yūmmūgāhā', puxix Topa nōm tikmū'ūn mūtik tu ti hok. Pa tikmū'ūn te hāmyūmmūg'ax 'āpax, puxix Topa nōm mūtik 'ati', hak-tok te nōm mūtik tihī'.

¹⁰ 'Āha tikmū'ūn nōy mōg, tu Kunnix yōg hām'āktux xe'e yūmmūgā hok, yīy ta 'āpet tu' xānā hok, pu mō'xip, xix hāmmaxnā'ax 'āktux hok, nūy: "Pūyā Topa 'ākuxa yummā'," kaxīy. Ūxuktux hok.

¹¹ Yā tikmū'ūn te' kummuk xop pu hāmmaxnā'ax 'āktux, puxi' kummuk xop mūtik hāpkummuk mīy.

Tu hām'āktux kux

¹² 'Āte xe xa hām'āktux putup, pa kax'āmi'ax hā 'āte 'ap hām'āktux putup'ah xa'. Ūgmōg putup 'āha, nūy xa hām'āktux, xa 'āxop yānān tu 'ā hām'āktux, 'ūyīy yūmūg kuxa hittup xexka'.

¹³ Topa te 'āxape hex yāykutnāhā', hak-tok xop te xa 'āneo. Tu ta tu' kux.

xak mūn 'āktux, nūy yūmūg xape xohix pu' xuktux. Tu ta tu' kux.

YOĀM TE' XAPE 'ĀXET'AX GAX PU KAX'ĀMI' III

¹ Ūgmūn yā tik pēnā max'ax, tuk xape Gax pu kax'āmi', 'āte nōm putup pax xe'e'.

² Ūkxape', 'āte Topa tu' xak tap, puyīy xa hāmmāxnā', xayīy 'ākuxa hittup putuk 'āhittup.

³ Yūmūg xape nūn, tu 'āmūn 'āktux, hak kuxa hittup xexka', hak xape te xate hāp̄xopmā max 'āktux, xix xate hāp̄xaxok hok 'āktux, xix xate hāmyok mīy 'āktux,

⁴ yīk kuxa hittup, 'āmūn tek mūn hā 'ūgkutok tu'.

Tu Gax 'āktux max

⁵ Ūkxape: Yūmūg xape pu 'āhām max, xix yūmūg xape puknōg pu 'āhām max kamah.

⁶ Ha 'āmūn 'āktux, 'īhā' kuxa mām ka'ok xop yāykoṭīnnā' pīp, xix xate 'āxapep-tup pax 'āktux. Hōmhā 'āte xa' xak, xa nūhū 'āxape xop mō'nīynām, pu xe' mōg, nūy hām'āpak'ax max 'āktux, 'āhittup hah, nūy 'āhā 'ātehet, nūy Topa kuxa hittupmā'.

⁷ Yā Kunnix pu' hām, tu hāpkumep, nūy hām'āpak max'ax 'āktux, tu tikmū'ūn kuxa mām hok xop tu tayūmak pop 'ohnāg.

⁸ Yīy yūmū'āte nōm 'a tet'ax, nūy nōm xop mūtik yūmūg pupi' hām, nūy hām'āktux xe'e 'āktux hāp̄xexka nōy tu'.

Tu Niot 'āktux, xix Nemēn 'āktux

⁹ Hōmā 'āte tappet kutōgnāg mīy, tu 'āxop kuxa mām ka'ok xop ha mō'kutnāhā', pa Niot tep-tup nōg, yāy pe'paxex xexka tu', tu 'āxop xat putup,

¹⁰ yīy 'āhak mōg, tu mōktuk xupep, tu Niot pu hām'āktux putup, tu' yōg hāp̄xopmā'ax 'āktux putup. Yāk mūg 'āktux kummuk, tu' koit xexka', Tu hāp̄xopmā kummuk kamah, tu' xape xop 'ap xānā'ah, nūy pet tu mō'xip. Tu' xat hok kamah, pu yāy xape nōy xānā hok, ha' mīy, puxix' xat hok, pu yāykoṭīnnā tu' xip hok 'ūxape xop mūtik.

¹¹ Ūkxape,: 'Ānōy yōg hāp̄xopmā'ax max tat, tu hāp̄xopmā'ax kummuk kuxyā'. Yā Topa yōg xop te hāp̄xopmā max, pa tikmū'ūn te hāp̄xopmā kummuk, 'ap Topa 'ūm pēnā xet'ah.

¹² Ūxohix te Nemēn 'āktux max, ha hāmyok mīy, yīg mū'āte' xuktux max, ha xate' yūmmūg, yāg mū'āte hām'āktux xe'e'.

Tu 'āneo hōm

¹³ 'Āte xa hāp̄xopmā'ax xohix 'āktux'ax, pa tappet tu 'āte' mīy putup'ah,

¹⁴ Hu 'āte' hip, nūy 'āpēnā', 'īhā xa hām'āktux putup.

¹⁵ Pūyā Topa 'ākuxa yūmmā'. Yūmūg xape xohix te 'āneo. 'Āte yūmūg xape xop xaxok 'ohnāg, nōm xop te 'āmūtik pīp. Hu xa' xak,

YOT TE' KUXA MĀM KA'OK XOP PU KAX'ĀMI'

¹ Ūgmūn Yot, Yeyox Kunnix pu 'āte hāpxopmāhā', yā Tiak hāk taknōy, tu xa kax'āmi', Topa te 'āxop xānāhā hah, ha Topa yūmūg Tak te mō'āyāy xe'ēgnāg, xix Yeyox Kunnix te 'āpēnānā' xip, nūy 'āpēnā max.

² Pūyā Topa 'ākuxa māmā', xix mō'āyāy xe'ēgnāg, xix 'ākuxa ka', ha mōktu yā 'ākuxa hittup xexka'.

Yot te mō'āmā'ax xop 'āktux

³ Ūkxape xop, 'āte 'āp-tup pax, tu xa kax'āmi', nūy 'ākuxa ka'ogā', nūy yūmūg xuxyā 'āktux. Yā yūmūg pupi' xok, nūy yūmūg kuxa kummuk xit, nūy yānān tu' kuxa max tat. Yīy 'āte nū mīy tappet, nūy mō'ānīynām, xayīy kuxa mām hok xop pu hām'āktux hā' nōy yānān. Yā Topa te yāy yōg tikmū'ūn pu hām'āktux xe'ēgnāg, tu 'ap xep 'āktux putup'ah.

⁴ Yā tik xop kuxa mām 'ohnāg, tu' xaptop hā' kuxa mām ka'ok xop kopa' tihī', tu Topa yōg tikmū'ūn pu' koit, tu hāmyūmmūgāhā', tu mō'āmā'ax hā hāmyūmmūgāhā', tu Topa yōg hām'āktux xe'e hā' yānān hām'āktux nōy. Yā yūmū yōg Topa te yūmū'ā hāmmaxnāhā', tu yūmūg kuxa kummuk tupmāhā', pāyā tik te koit xop te' nōy xop pu yā mō'āmā', nūy yāy putup'ax kummuk mīy, tu' nōy hā' xupxet pax, tu yūmūg xuxyā puxehnāg putup nōg, nōm te yūmū'ā hāmyūmmūgā xe'ēgnāg. Ha Topa yōg tappet te nōm tik te koit xop 'āktux tap. Yā Topa te' yōg hāpxopmā'ax kummuk 'āktux, tu' kummugāp-tup 'ūyānān tu', nūy tu pago.

⁵ 'Āxop te hāmyūmmūg tap, pāyā' xaxok hok: Yā Topa te 'Iyaet yōg tikmū'ūn mōy hāpxexka 'Eyit kopah, ha hāmyāxatamuk punethok nōg, 'ihā' kuxa mām hok xop kix.

⁶ Pexkox yōg nū'pok xop xohix, pāyā' yāg yīpkox 'ohnāg Topa pu', tu Topa 'āxet'ax xe'ēgnāg pa', nūy Topa yānān tu' xat, yāy xexka pe'paxex, tu' hitop hā yāy xexka pe'paxex, tu' xat kummuk nām, tu yāy xip'ax nīm. Yīy Topa gāy kāmānat kummuk xop tu', tu pexkox yōg kāmānat kummuk hā' gāy, tu pipkup māxap'ax hā' hīy ka'ok, ha nōm koa hok, ha kaxīy Topa te' kummuk xop mōgāhā', tu' tat, ha hāpkoxtap tu' mām, tu' hip, pu Topa' yānān tu' xūyāg xexka', ha' xūy kuxyā 'ohnāg.

⁷ Tikmū'ūn te xa kōmēn Xonōm 'āktux, xix kōmēn Gōmōg 'āktux, xix kōmēnāg te hāmhumnāg tu' pip 'āktux. Ūxohix kōmēn hittap. Ha' yōg tikmū'ūn xop te hāpxopmā kummuk pax kamah, nū'pok xop putuk, tu' nōy mūtik nōm kummuk pax, xi' nōy hā' xupxet. Yā kuxap te mō'hap mō'kuma' mōg,

tu' xūyāgāhā'. Ūxaxok hok, xa 'āxop kaxīy 'āxūy hok.

⁸ Yā nōm te koit xop yāy yōnkup hā hāpxopmāhā', nūy yāy yīn kummugā', 'a Topa yōg hām'āktux 'ūm 'āpak'ah, 'ūyīpkox 'ohnāg tu', tu pexkox yōg nu'pok xop max māmōg kummuk.

⁹ Yā nū'pok xop yōg xat'ax yā Mīget, tu 'ap nōy xop māmōg'ah. 'Āmhok. Hōmā Mīget te Hāmgāyāgnāg pu hām'āktux, tu Mōyyex yōg xokxax 'āktux, ha' nōy yānān, 'Ihā Mīget māmōg 'ohnāg, tute: "Pūyā Topa 'āmānōg!" kaxīy.

¹⁰ Pa tik te' koit xop te māmōg, pa hāmyūmmūg 'ohnāg. Tu hām yōg hāpxopmā'ax puxet yūmmūg, xokxop putuk, ha' nōg.

¹¹ Pūyā tu kuxānōg, nōm tik te koit xop! Tute tik hittap Kāyīy yōg putat kummuk hā' mōg, nūy yōg hāpxopmā'ax kummuk tat, tu tayūmak putup xūy, tik hittap Mana'ām putup, yīy hāpxopmā kummuk kamah. Hōmā Kone gāy Topa tu', ha Topa tep-tex, hāpkummuk mīy hah, ha tikmū'ūn te hāpkummuk mīy kamah, Kone putuk, ha Topa te' kix kamah.

¹² Ha tikmū'ūn te' koit xop te 'āxop yōg 'āmuk xexka hā' mōg, tu kenmuk xo'op, tu mōktu paptux, tu' nōy xop pu' hupmāhā'. Tu yāy pe'paxex, pa' nōy 'ūm pe'paxex 'ohnāg. Yā texgōy xexka putuk, 'āmuuh te 'ūnōā mō'ka'ok. Tu mīnta kup kummuk putuk, yā hāmyāxatamuk xohix hā mīnta 'ohnāg taha', ha mīm kup putuk, tikmū'ūn te nōm xut hām kopah, ha yīpxatit te hāptopa tu' tap.

¹³ Tu kōnāg kox xexka gāy putuk, ha yāy mahapnām. Kaxīy tikmū'ūn te' koit te hāpxopmā'ax kummuk hā' hupmāhā'. Ha māyōnnāg 'ūm putuk, nōm te pexkox yōg putat xaxok, ha hitop hā hāpkumep, tu' xupep 'ohnāg, yīy Topa te' koit xop pu' pet, ha hāpkoxtap kopa' pip ka'ok, mō'kuma' mōg, tu' pip kux 'ohnāg, yā hāptupmā 'ohnāg.

¹⁴ Mōnāyxop hittap xexka 'Ēnōg te Topa pupi hām'āktux, tu tik te māxap 'Anāo hā mōkputox. Yā 'Anāo tek-tok put, ha tehomik tok put, ha tehomik-tok put, ha tehomik-tok put, tu mōktu xohix te 7, ha mōkputox 'āxet'ax 'Ēnōg, tu tikmū'ūn te' koit xop 'āktux, hu: "Pēnā'! Yūmūg xuxyā nūn, pexkox yōg nū'pok xop xohix te 1.000 punethok mūtik nūn,

¹⁵ nūy tikmū'ūn yōg hāpxopmā'ax xohix kopit, tu' nūn, nūy kuxa mām hok xop yōg hāpxopmā'ax kopit, nūy yōg hām'āktux'ax kummuk hā' kopit, Topa 'āktux kummuk ha' kopit putup, tu' kummugāp-tup 'ūyānān tu'," kaxīy.

¹⁶ Yā' koit xop yīy, yā' nōy nāg, hu yāy pupi' gāy nām, xi' nōy kupex, tu yāy yōg putup'ax mīy, tu yāymūn xexka 'āktux, tu tikmū'ūn

nõy pu' hitop hã hãm'ãktux, hu: “Äte 'ãp-tup pax,” kaxîy. 'Ûnõy yõg hãpxop pop'ax tu hãm'ãktux max, pãyã' kuxa kummuk!

Tute hãmyũmmũgãhã'

¹⁷ Pa 'ãxop yã 'ãhã 'ãxape, yîy yũmũg xuxyã yõg mõ'pok xop pe'ãpaxeh, ha Topa pupi hãm'ãktux,

¹⁸ tu: “Hãmyãxatamuk xox putox mõ'nãp-tup, 'hã tikmũ'ũn te' koit'ax nũn putup, tu xa hã yîxix kummuk. Yã nõm xop kuxa mãm 'ohnãg, hu yãy putup'ax mîy,” kaxîy.

¹⁹ Tu 'ãxop gãyãp-tup, xayîy 'ãyãyxatat. Yã Topa Koxuk pu' yîpkox 'ohnãg, pa yãy pup-xet yîpkox pîp.

²⁰ 'Ûkxape xop, 'ãpu 'ãxop mõ'kuma 'ãmõg Topa yõg putat hã, 'ãkuxa mãm ka'ok tu 'ãmõg, nũy yãy ka'ogã'. Yã Topa te hãm'ãktux max xe'ëgnãg, tu 'ãkuxa tupmãhã', xa 'ãkuxa max. Topa te 'ãka'ogãhã', xa Topa pu hãm'ãktux pax.

²¹ Topa te mõ'ãyãy xe'ëgnãg, yîy hãpxopmã max nõm pu', 'ihã yũmũg xuxyã Yeyox Kun-nix hip, puyîy 'ãkuxa ka', nũy 'ãkuxa hĩnnã xe'ëgnãg.

²² 'ãpu tikmũ'ũn yãy kuxa yîkopit'ax xop 'ũm kuxa ka', yãp-tox 2.

²³ Tu' kuxa xakix putũmnãg, 'ũmãm pu'uk tu'. Tikmũ'ũn te kuxap tu hãpxop max mõy, ka mõ'hap, hu' nõg, kaxîy 'ãnõy xop kuxa ka' kamah, pu Topa yã 'ũkuxa ka xexka', pa 'ãkuxãnõg, ka 'ũyõg putup'ax kummuk te 'ãmõgã', xa hãpkummuk mîy.

Tu Topa pu hãm'ãktux, nũy tu' xuktux max

²⁴ Topa te 'ãpãnã'ax max, xa Topa yõg putat xak hok, tu 'ãkuxa tupmã'ax, xa 'ãkuxa max xe'ëgnãg, xix 'ãkuxa hittupmã'ax, xa Topa keppa 'ãpi'.

²⁵ Pũyã Topa yãp-xehnãg max xe'ëgnãg, xi' xexka xe'ëgnãg, xi' ka'ok xe'ëgnãg, xi' xohix xat xe'ëgnãg, yã hõmã xix hõnhã, xix hãmyãxatamuk xohix xox putox 'ihã', mõ kuma' mõg. Pũyã' xohix Topa xexka xe'ëgnãg 'ãktux. Hamũn!.

TOPA TE YOĀM TU' MŪG YEYOX KUNNIX XIX HĀXPOP XOHIK

¹ Yeyox Kunnix te yūmū'ā' mūg hāxpox punethok, tu yāy mūn mūg, ha 'āte nōm kax'āmi tappet tu'. Topa te' xat, pu' mūg yāy yōg tikmū'ūn tu', yā yāy yōg kāmānat xop tu'. Hāxpox kutōgnāg 'īhā tikmū'ūn te nōm hāxpox xohix pēnāp-tup, ha Yeyox Kunnix te yūmū'ā nōm hāxpox xohix mūg. Kunnix te nū'kutnāhā pekkox yōg nū'pok xop, puyīy Yoām tu nōm mūg.

² Yoām te' pēnāhā, tu hāxpox xohix kax'āmi, yā' kax'āmi nū tappet tu'. Topa te' popmāhā, ha Yeyox Kunnix te tu' mūg,

³ ha tikmū'ūn te nū tappet mōkupix, puxix tu' kuxa hittup. Tikmū'ūn te nū tappet 'āpak, tu' yīpkox pip, puxix tu' kuxa hittup. Nū tappet tu' kax'āmi hāxpoxmā'ax, ha hāxpox kutōgnāg 'īhā tikmū'ūn te nōm pēnāp-tup.

Yeyox kopa kuxa mām xop xohix te' 7

⁴ 'Ūgmūn Yoām, tu nū tappet kax'āmi Yeyox kopa kuxa mām xop xohix te' 7 pu' hāpaxekka 'Ax tu'. 'Ātep-tup, pu Topa 'āxop ha hāmmāxnā, nūy 'ākuxa māmā. Hōnhā' xip Topah, tu ta' xip hōmā, tu ta' nūn putup.

Ha ta' pip 'ūkoxuk xohix te' 7 Topa kep-pah xix yōg mīmpe yūm'ax xe'ēgnāg keppah. 'Ātep-tup, pu Topa 'āxop pu hāmmāxnā, nūy 'ākuxa māmā kamah.

⁵ 'Ātep-tup kamah, pu Yeyox Kunnix 'āxop ha hāmmāxnā, nūy 'ākuxa māmā'. Yeyox te yūmū'ā hāpax'e'e xohix 'āktux. Yā Topak-tok te māxap xip tu' xok tāmnāg, tu putpu' hī', tu hām xexka yōg xat'ax xop xat. Tute yāy yūmūg xe'ēgnāg, tu' xok, hu yūmūg kuxa kummuk xit, tu kuxa max mō'tat, 'ūyānān tu',

⁶ tu yūmūg mīy 'āmānex xop, yā Topa yōg xop. Tute yūmūg xat, ha yūmū'āte Topa pu hāxpoxmā max, yā yūmūg 'ātak Topa pu hāxpoxmā max. Yeyox Kunnix yā' max xe'ēgnāg, tu' max xe'ēgnāg mōkuma'mōg, ha' kux 'ohnāg. Hamūn.

⁷ Pēnā', 'ūnūn putup hāmgōy xexka kopah! Tikmū'ūn xohix xexka te' pēnāp-tup. Hōmā ha ta tikmū'ūn te pox xexka hā' xuhmīy. Yā tikmū'ūn te nōm pēnāp-tup, hu potap-tup. Hamūn. Hā kaxīy.

⁸ Topa xexka 'ūka'ok, tu hām'āktux, hu: "Ūgmūn yā māxap xix ka'ax. Hōmā' xip'ah hām xexka xix yōg hāxpox xohix, 'īhāg xip. Ha ta' nōg putup hām xexka xix yōg hāxpox xohix, 'īhāg xip putup. Hōnhāg xip, tu tak xip hōmā, tu tak nūn putup." Kaxīy.

Yoām te Kunnix pēnāhā'

⁹ Ha tak mūn yā 'ātaknōy Yoām. 'Āte' xūy hā tot, yā 'āxop putuk. 'Ūkxip Topa te nōm xat xop kopah 'āxop mūtik, tu Yeyox tuk xip ka'ok 'āxop putuk. Hōmā 'āte tikmū'ūn pu Topa 'āktux xix Yeyox 'āktux, ha tikmū'ūn tek mūg, tuk xix nūnte hām tot tu', ha kōnāg te' yīmap, yā hām tot 'ūxuxet'ax Pat.

¹⁰ Yenomīy 'īhā Topa Koxuk tek mōgāhā', pa 'āte yānmūn xupep'ax ka'ok 'āpak 'ūkxām tu', yā mīxux xop tut kaxyā'ax putuk,

¹¹ tu hām'āktux, hu:

—'Āpu 'ūpēnā xop kax'āmi', tu tappet hōm Yeyox kopa kuxa mām xop te' 7 pu', yā kōmēn 'Ep tu', xix kōmēn 'Exmīy tu', xix kōmēn Pek tu', xix kōmēn Tittit tu', xix kōmēn Xahat tu', xix kōmēn Pinanep tu', xix kōmēn Namnixet tu'." Kaxīy.

¹² Ha 'ūgyōkānām, nūy 'ūkxāmpa' pēnā', nūy nōm te hām'āktux pēnā'. Pa' pip kuyānām tat'ax xohix te' 7. Yā yānām 'āta yīxux hā' mīy kūyānām tat'ax.

¹³ Pa' xip nōm te Tikmū'ūn Kutok putuk kuyānām tat'ax kote'. 'Ūyōg topixxax tox, tu' pata tu' kux, tu' tat 'ūkotex hūy'ax, yā yānām 'āta yīxux hā' mīy,

¹⁴ tu' xep-nok, yā kahnēn xep-nok putuk, pe tex xap ponnok putuk, tu' pa te kuxap xexka putuk,

¹⁵ tu' pata te kuyānām mō'yōn, yā pipkup monōn pukpex xexka putuk, tu' xutnuk. Tute hām'āktux ka'ok, yā xamoka xexka putuk.

¹⁶ Tu' yīpax'e'e hā' tat māyōnnāg xohix te' 7, tu' yīkox tu' xupep mīkax xexka', yā' xox mut tix, tu' pa te kuyānām xexka mō'yōn, yā māyōn putuk mēynix 'īhā'.

¹⁷ Ha 'āte' pēnāhā', tuk nāhā 'ūpata yīkak, tuk xok putuk. Pa tik nūn, tu nūktuk yīmū' yīm xix, tu:

—'Ākuxa nōg hok. 'Ūgmūn yā māxap xi' ka'ax. Yā hōmā' xip'ah hām xexka xix yōg hāxpox xohix 'īhāg xip. Ha ta' nōg putup hām xexka xix yōg hāxpox xohix, 'īhāg xip putup.

¹⁸ 'Ūkxip. Hōmā 'ūkxok, pa pēnā' 'ūkhi putpu', tuk xip putup mōkumakmōg hām'yāxatamak xohix kux 'ohnāg hā. 'Ūgka'ok. 'Āte' xat, puxi' xakix 'ūhohix. 'Āte' xat hok, puxi' xakix hok. 'Āte xakix xop xat kamah.

¹⁹ 'Āpu hāmpēnā'ax kax'āmi yā hōnhā yōg hāxpoxmā'ax kax'āmi xix hāptup yōg hāxpoxmā'ax kax'āmi kamah.

²⁰ 'Āte xa' yūmmūgāhā hāxpox xaptop, yā tikmū'ūn te nōm yūmmūg 'ohnāg. 'Ūpip māyōnnāg xohix te' 7 'ūgyīpax'e'e kopah, ha' pip kūyānām tat'ax te' 7. Māyōnnāg te' 7 yā pekkox yōg nū'pok'ax te' 7, yā nōm te Yeyox kopa kuxa mām xop te' 7 pēnāhā'. Ha ta kuyānām tat'ax yā kōmēn te' 7 yōg Yeyox kopa kuxa mām xop te' 7. Kaxīy.

2

Kômên 'Ep yôg kuxa mām xop pu hām'aktux

¹ Tu xe:

—'Āpu kax'āmi pexkox yôg nū'kutnā'ax pu nôm te kômên 'Ep yôg Yeyox kopa kuxa mām xop pēnāhā'. 'Āpu kax'āmi', hu:

“'Āte xa hām'aktux. 'Āte māyōnāg te' 7 tat 'ūgyīpxe'e hā, tu hāpkumep kuyānām tat'ax yānām 'āta yīxux kote'.

² 'Āte 'āxop yôg hāpxopmā'ax yūmmūg. 'Āte' yūmmūg 'āxop te hāpxopmā max punethok, tu Yeyox tu 'āxop pip ka'ok. 'Āte' yūmmūg 'āxop te' tot 'ohnāg tik kummuk. Tik kummuk te: “'Ūgmūg pip Yeyox yôg mō'pok xop kopah.' Kaxīy. Pa 'āxop te yôg hāpxopmā'ax kopit, tu' koit yūmmūg.

³ 'Āxop te hāmmax hip. 'Āxop yā yōgnū xop, hu 'āxop xūy, pa 'āxop te hāpxopmā max kux 'ohnāg.

⁴ 'Āxop te hāmmax mīy, pa 'āxop te hāpkummuk mīy kamah. Yā hōmā 'āxop tek putup pax max, pa hōnhā 'āmhok.

⁵ 'Āpu hāmpe'āpaxeh. Hōmā 'āxop te hāmmax mīy, pa hōnhā 'a kaxīy'ah. 'Āpu hāpkummuk mīy kux, nūy putpu mōg, nūy xe' mīy 'āxop te nôm mīy hāmāxap. Pa 'āxop te hāpkummuk kux 'ohnāg, kopxi'x 'āxop hak mōg, nūy xut 'ōg kuyānām tat'ax.

⁶ Pa 'āxop max, yā 'āxop tep-tup nōg Nīkonax xop yôg hāpxopmā'ax. 'Ātepx-tup nōg kamah.

⁷ 'Āyīpkox pip, nūy ta xupax Topa Koxuk te nôm 'āktux Yeyox kopa' kuxa mām xop pu'." Kaxīy.

Kômên 'Exmīy yôg kuxa mām xop pu hām'aktux

⁸ Tu xe:

—'Āpu kax'āmi pexkox yôg nū'kutnā'ax pu nôm te kômên 'Exmīy yôg Yeyox kopa' kuxa mām xop pēnāhā'. 'Āpu kax'āmi, hu:

“'Āte xa hām'aktux. 'Ūgmūn yā māxap xi' ka'ax. Yā hōmā' xip'ah hām xexka xix yôg hāpxop xohix, 'Thāg xip. Ha ta' nōg putup hām xexka xix yôg hāpxop xohix, 'Thāg xip putup, tuk xok tāmnāg pa putruk hi'.

⁹ 'Āte' yūmmūg 'āxop xūy. 'Āte' yūmmūg 'āxop putexop 'ohnāg, pa 'āmhok, 'āxop putexop xexka! 'Āte' yūmmūg tikmū'ūn te 'āxop 'āktux kummuk, tu hām'aktux hu: “'Ūgmūg yā Yoneo xop kopak pip.' Kaxīy. Pa 'āmhok, yā' koit, yā Hāmgāyāgnāg yôg xop kopa' pip.

¹⁰ Hāpxip 'Thā 'āxop xūy'ax, pa 'āpu 'ākuxanōg hok. 'Ūxupax. Hāmgāyāgnāg te 'ōg hāpxopmā'ax kopit putup, yā' xat putup, pu tikmū'ūn 'āxop xeh kanet ka'ok kopah, ha 'āxūy'ax 'āmnīy te' 10 hā. 'Āpu 'ātu pip ka'ok,

hu mōg hu yā 'āxakix, ha 'āte xa popmāp-tup 'āhi'ax kux 'ohnāg yôg xexka xop yôg kuxxax.

¹¹ 'Āyīpkox pip, nūy ta xupax Topa Koxuk te nôm 'āktux Yeyox kopa' kuxa mām xop pu'!

Tikmū'ūn te xakixp-tup, tuk-nāy tu' mōg putup Hāmgāyāgnāg pet tu', tu' xūy, pa' xut xop mōg putup'ah." Kaxīy.

Kômên Pek yôg kuxa mām xop pu hām'aktux

¹² Tu xe:

—'Āpu kax'āmi pexkox yôg nū'kutnā'ax pu nôm te kômên Pek yôg Yeyox kopa' kuxa mām xop pēnāhā'. 'Āpu kax'āmi, hu:

“'Āte xa hām'aktux. Yōgnū mīkax xexka xox mut tix xip.

¹³ 'Āte' yūmmūg 'āpip'ax. Yā Hāmgāyāgnāg yôg xexka xop yôg mīmpe yūm'ax xip 'ōg kômên kopah, yā Hāmgāyāgnāg yā' xexka', tu' xat kômên yôg xop. 'Āxop 'ātu 'āpip ka'ok, hu yōgnū putat max xak 'ohnāg. Hōmā' xip 'Ātip, yā yōgnū kāmānat, tu' 'ā tu' xip ka'ok, ha tikmū'ūn tep-tex nōnte Hāmgāyāgnāg yôg xip'ax tu', pa 'āxop te yōgnū putat max xak 'ohnāg.

¹⁴ Pa 'āxop te hāpkummuk mīy, yā yāg pip nōnte, tu Manak yôg hāmyūmmūg tat. Yā hōmā Manak te 'Iyaet xop mōgāhā', pu hāpkummuk mīy, yā xit'ax māhā tikmū'ūn te topa komut xop pu nôm popmāhā'. Tute tikmū'ūn pu' yūmmūgāhā', pu' nōy hā xupxet kamah.

¹⁵ 'Ūpip kama 'ūyāg xop, tu Nīkonax xop yôg hāmyūmmūg tat.

¹⁶ 'Āpu 'ōg hāpkummuk mīy kux. 'Ūkux 'ohnāg, kopxik mōg, nūy yāyix nôm tikmū'ūn mūtik. Yā 'āte yāy kix putup mīkax xexka hā nôm xip 'ūgyīkox kopah.

¹⁷ 'Āyīpkox pip, nūy ta xupax Topa Koxuk te nôm 'āktux Yeyox kopa' kuxa mām xop pu'!

'Āte pām mānā popmāp-tup 'ūxot xop pu'. 'Āte nôm pu' popmāp-tup kama mīkaxxap ponnok, tu nôm yīmū' kax'amīp-tup 'ūxuxat'ax tup, ha nôm te' pop te 'āxet'ax yūmmūg putup, pa' nōy te' yūmmūg putup 'ohnāg." Kaxīy.

Kômên Tittit yôg kuxa mām xop pu hām'aktux

Tu xe:

¹⁸ —'Āpu kax'āmi pexkox yôg nū'kutnā'ax pu nôm te kômên Tittit yôg Yeyox kopa' kuxa mām xop pēnāhā'. 'Āpu kax'āmi, hu:

“'Āte xa hām'aktux. 'Ūgmūn yā Topak-tok, tuk pa te kuxap xexka putuk, tuk pata te kuyānām mō'yōn, tu pipkup monōn pukpex xexka putuk, tu' xutnuk.

19 'Áte 'ög hãpxopmã'ax yũmmũg. 'Áte' yũmmũg 'ãxop te' nõy putup pax, tu 'ãxop te' átu 'ãpip ka'ok, tu 'ã hãpxopmã max punethok, tu 'ãxop te' hãmmãx hip punethok. Hõmã 'ãxop te' hãpxopmã kõnãmãhã', pa hõnhã 'ãxop te' hãpxopmã max punethok.

20 Pa 'ãxop te' hãpkummuk mĩy. Yã' xip nõnte 'ũhũn 'ũxuxet'ax Yeyamet, tu hãpkummuk mĩy, pa 'ãxop te' nõm hupmã 'ohnãg. Tute hãm'ãktux, hu: 'Topa te nõgkutmãhã'. Kaxĩy. Tu tikmũ'ũn pu hãm'yũmmũgãhã', tu' koit, nõy yõgnũ kãmãnat xop mõgã', puyĩ' nõy hã' xupxet, puyĩ' xit tikmũ'ũn te topa komut xop pu nõm popmã'.

21 'Áte' hip, tu 'ũn kummuk pu' popmãhã 'ãmniy xohix, puyĩy hãpkummuk mĩy kux, pa 'ap-tup'ah, yã' kux 'ohnãg.

22 Yĩy 'áte' 'ũn xat putup, puyĩy mĩmpe mõ'yõn'ax tu' xihip ka'ok, tu' xũy xexka putup. Ha ta tik te nõmũtik xonnix, yã Yeyamet putuk, tu' xũy xexka putup kamah. Yã hãpxip kutõgnãg 'ĩhã' áte nõm mĩy putup. Pa tik te hãpkummuk mĩy kux, kopxi' mĩy 'ohnãg.

23 'Áte Yeyamet kutok kix putup, ha mõktu' kuxa mãm xohix xop te' yũmmũg putup, 'áte' tikmũ'ũn kuxa pãnãhã', xip-tox kopa pãnãhã', tu hãpkummuk mĩy'ax hã yãnãn.

24 Pa 'ãxop nõy te kõmẽn Tittit tu' pip, tu nõm hãm'yũmmũg kummuk tat 'ohnãg. Yã hãm'yũmmũg 'ũxuxet'ax, hu: 'Hãmgãyãgnãg yõg hãm'yũmmũg xaptop.' Kaxĩy. Pa tikmũ'ũn te xa nõm yũmmũgã 'ohnãg, yĩy 'ãxop te' nõm yũmmũg 'ohnãg. Nõmhã 'áte xa hãm'ãktux, 'ap' 'áte' 'ãxop xat putup'ah 'ũxeheh, xayĩy hãpxop nõy mĩy. Puxix.

25 'Ûpip 'ãxop yõg hãpxopmã'ax. 'Ápu 'ũxe' mĩy, ha mõktuk nõn putpu'.

26-28 'Áte' xat putup, puyĩy xut xop hãm xexka yõg xohix xop xat. Yã nõm te' mĩy 'áte nõm putup ha mõktu hãm'yãxatamak xohix xox putox, ha 'áte' xat putup, puyĩy nõm hãm xexka yõg xohix xop xat. Yã nõm xat putup, 'ĩhã' áte nõm xat kamah. Yõgnũ 'atak te' xat, 'iyĩy hãm xexka yõg xohix xop xat. Yã Topa tek xexka mĩy, hã kaxĩy 'áte nõm xop xexka mĩy putup, puyĩy hãm xexka xohix xop xat. Yã' xat ka'ok putup. Tik te nax koxyõy pipkup xexka tox hã. Hã kaxĩy 'ũxat ka'ok putup. 'Áte nõm xat xop pu' hõm putup mãyõnnãg xexka'.

29 'Áyĩpkox pip, nõy ta xupax Topa Koxuk te nõm 'ãktux Yeyox kopa' kuxa mãm xop pu!' kaxĩy.

3

Kõmẽn Xahat yõg kuxa mãm xop pu hãm'ãktux

1 Tu xe:

—'Ápu kax'ãmi pexkox yõg nõ'kutnã'ax pu', nõm te kõmẽn Xahat yõg Yeyox kopa' kuxa mãm xop pãnãhã'. 'Ápu kax'ãmi, hu:

“Áte xa hãm'ãktux. 'Áte yã yĩm hã' tat 'ũkoxuk xohix te' 7 Topa yõg xix mãyõnnãg te' 7. 'Áte 'ãxop yõg hãpxopmã'ax yũmmũg. Tikmũ'ũn te hãmpe'paxex 'ãxop hi', pa 'ãmhook, 'ãxop te' xaxix xop putuk.

2 'Ápu yãy koxah. 'Ápu yãy ka'ogã', nõy hãpxopmã'ax ka'ogã', nõy hãpxopmã max hupmã hok. 'Áte' yũmmũg 'ãxop yõg hãpxopmã'ax 'ap xe'e'ah Topa keppah, yã Topa pu' kummuk.

3 Hõmã 'ũndõy te xa hãpxop max yũmmũgãhã', ha 'ãxop te' xupak. 'Ápu nõm pe'ãpaxeh, nõy mĩy, nõy 'ãxop yõg hãpkummuk mĩy'ax nõã'. Pa 'ãxop yãy koxah 'ohnãg, kopxix 'ũgnũn putpu' xupxet nõn putuk, yã tikmũ'ũn te xupxet hip 'ohnãg. Texĩy 'ũgnũn? Hãm'ũmhãg nõn? 'Áxop te' yũmmũg putup 'ohnãg.

4 Pa' yãg tihi Xahat tu', tu yõg topixax tup, yã xutputux 'ohnãg. 'Áxop te hãpkumep putup 'ũgmũtik, tu topixax ponnok tat putup. Yã' max te kaxĩy.

5 'ũxut xop te topixax ponnok tat putup, ha 'a' áte' mõy putup'ah 'ũyõg xuxet'ax tappet tu', Topa te nõm kax'ãmi', yã Topa te nõm tu' kax'ãmi', tikmũ'ũn 'ãxet'ax nõm hi xe'ẽgnãg mõkuma'mõg, ha' kux 'ohnãg. 'Áte hãm'ãktux putup, hu: 'Yõgnũ tikmũ'ũn nõ'õm'. Kaxĩy. Yã Topa keppa 'áte nõm 'ãktux putup xix pexkox yõg nõ'pok xop keppah.

6 'Áyĩpkox pip, nõy ta xupax Topa Koxuk te nõm 'ãktux Yeyox kopa' kuxa mãm xop pu!' Kaxĩy.

Kõmẽn Pinanep yõg kuxa mãm xop pu hãm'ãktux

7 Tu xe:

—'Ápu kax'ãmi pexkox yõg nõ'kutnã'ax pu', nõm te kõmẽn Pinanep yõg Yeyox kopa' kuxa mãm xop pãnãhã'. 'Ápu kax'ãmi hu:

“Áte xa hãm'ãktux. 'Ûgmãx xe'ẽgnãg, tu 'áte hãpxe'e mĩy, tuk yĩm hã tat Namix yõg pipkup hãm'yĩnnĩn'ax. Tute hãpxõn, ha ta tikmũ'ũn te mõhãm'yĩnnĩn yũmmũg 'ohnãg. Tu tu mõhãm'yĩnnĩn, ha ta tikmũ'ũn te hãpxõn yũmmũg 'ohnãg.

8 'Áte 'ãxop yõg hãpxopmã'ax yũmmũg. 'Áte' yũmmũg 'ãxop ka'ok kutõgnãg. 'Áte 'ãxop pu hãm'yũmmũgãhã', ha 'ãxop te' mĩy, tu 'átu 'ãpip ka'ok. 'Áte xa hãpxõn, ha ta tikmũ'ũn te mõhãm'yĩnnĩn yũmmũg 'ohnãg.

9 'Ûxupax. 'Ûpip Hãmgãyãgnãg nõnteh, tu hãm'ãktux, hu: "Ûgmũg pip Yoneo xop kopah.' Kaxĩy. Pa yã' koit. 'Áte' xat putup, ha nõm nõn putup, tu nõktu hãm tu' pip putup 'ãxop keppah, tu' yũmmũg putup, 'áte mõ 'ãxop yãy xe'ẽgnãg.

¹⁰ Āxop te yōgnū xat'ax mīy. 'Āte xa' xat, hu: 'Āpu hāpxop max hip. 'Āpu putat max xak hok.' Kaxīy. Ha 'āxop te' mīy. Yīy 'āte' āxop pēnā maxp-tup, ha ta' nūn putup hāpxop xohix kummuk, puyīy hām xexka yōg tikmū'un xohix yōg hāpxopmā'ax kopit.

¹¹ Hāpxip kutōgnāg 'Thāg mōg putup 'āxop hah. 'Ūpip 'ōg hāpxopmā'ax max. 'Āpu nōm pēnā ka'ok, nūy mīy kux hok, yīy ta' nōy te 'ap xupxet putup'ah. 'Ūxut xop yōg kuxxax yā'ōgnū'.

¹² 'Āte' xut xop hā' mīy māykup putuk yāy pet yōg. 'Āte' āxop ka'ogāp-tup, ha xate xek pet nīm putup'ah. 'Āte xut xop yīmū' kax'āmip-tup Topa 'āxet'ax xix Topa yōg kōmēn yōg 'āxet'ax kax'āmip-tup kamah, yā' xuxet'ax kōmēn Yenoyanēn Tup. Kaxīy. Yenoyanēn Tup te pexkox tu' yīxop-tup. 'Āte xut xop yīmū' kax'āmi putup 'ūyōg xuxet'ax tup kamah.

¹³ Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu!" Kaxīy.

Kōmēn Namnixet yōg kuxa mām xop pu hām'āktux

¹⁴ Tu xe:

—'Āpu kax'āmi pexkox yōg nū'kutnā'ax pu nōm te kōmēn Namnixet yōg Yeyox kopa kuxa mām xop pēnāhā'. 'Āpu kax'āmi, hu:

“'Āte xa hām'āktux. 'Āte Topa tuk xip ka'ok, tu Topa yōg xat'ax mīy pax, yāg hup 'ohnāg, tu tikmū'un pu Topa yōg hām'āktux xe'e 'āktux. Hōmā 'āte' mīy Topa mūtik hāpxop xohix.

¹⁵ 'Āte' ōg hāpxopmā'ax yūmmūg. 'Āxop pukpex 'ohnāg xix xuxix 'ohnāg, yā 'āxop tek putup pax xexka 'ohnāg xik putuppax kutōgnāg 'ohnāg. 'Ātep-tup pe pukpex pe xuxix,

¹⁶ pa 'āxop pukpex miāx, yīy 'āte' āxop yāy yīkox kopa mō'yōn.

¹⁷ 'Āxop te: “Ūgmūg pute xop xexka', tu hāpxop xohix xexka pip 'ūgmū yōg. 'Ak mū'āte hāpxop nōy putup'ah. Puxix'ī. Kaxīy. Pa 'āxop te hāmyūmmūg 'ohnāg 'āxop yāy'īgā', xix 'āhittup 'ohnāg, xix 'āp-te xop 'ohnāg, xix 'āpa hok, xix 'āxax top.

¹⁸ Hōmā 'āte xa hām'āktux, hu: Mā, ha 'āte' āxop mīy putup 'ūp-te xop xexka 'ākuxa kopah. Mā, nūy pop topixxax ponnok, nūy 'āxax top kummuk pak. Mā, nūy pop hehmēn 'āpa pu', nūy hāmpēnā', nūy hāmyūmmūg.

¹⁹ 'Āte mō tikmū'un yāy xe'ēgnāg, ha nōm te hāpkummuk mīy, ha 'āte: Kaxīy hok, yā' max'ah. Kaxīy. Tu nōm xūyāghā'. Yā 'āte mō nōm yāy xe'ēgnāg. 'Āpu hāmpē'āpneh, nūy hāpkummuk mīy kux.

²⁰ Ūxupax. 'Ūkxip hāmyīnnīn'ax yīkah, tu hām'āktux, hu: Hāpxon! Kaxīy. Tikmū'un 'ūm 'ūkopa' xip, tu' xupak, tu hāpxōn, kopxix mōnāy 'ūpet hā, tuk xit putup nūmūtik, ha' xit putup 'ūgmūtik.

²¹ 'Āte' xut xop xat putup puyīy māhām 'ūgmūtik 'ūxexka xop yōg mīmpe yūm'ax yīmū', ha 'āte' xohix xat putup, yā nōm te' xat putup kamah, yāk mūn putuk putup. Hōmā 'āte' xut, tu hōnhāg yūm yōgnū 'ātak mūtik 'ūyōg mīmpe yūm'ax yīmū' 'ūxexka xop yōg.

²² 'Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu!" Kaxīy.

4

Topa 'āktux max pexkox tu'

¹ Hāpxip 'Thā 'āte' pēnāhā pexkox tu', ha hāmyīnnīn'ax xōn, ha nōm yīy 'ūxeheh nōm te 'ā hām'āktux hōmā, yā' yīy te mīxux xop tut kaxyā'ax putuk, tu hām'āktux, hu:

—Mā nūnte pexkox tu', ha 'āte xa mūg hāpxopmā'ax pip'ax hāpxip kutōgnāg 'Thā, yā tikmū'un te nōm pēnāp-tup! Kaxīy.

² Hāpxip 'ohnāg 'Thā Topa Koxuk tek mōgāhā', hak mōg, pa' xip nōm te' xat yōg mīmpe yūm'ax xe'ēgnāg, ha 'ōm te' yīmū' yūm,

³ tu' pa te mō kuyānām yōn, yā mīkaxxap takat putuk, yā mīkaxxap yax putuk, xix mīkaxxap xanōn putuk, ha ta' xip texxux, tu nōm te' xat yōg mīmpe yūm'ax xakot, yā texxux yīxux, tu mīkaxxap 'exmēnat putuk.

⁴ Ha ta' pip kama 'ūxexka xop yōg mīmpe mām'ax xohix te' 24, tu nōm te' xat xakot, ha mīmpe mām'ax te' 24 yīmū' mām tik xexka te' 24, tu topixxax ponnok tat, tu' xexka xop yōg kuxxax yānām 'āta yīxux mō'tat,

⁵ ha nōm te' xat yōg mīmpe yūm'ax te kote' xip, ha ta nōnte tu' xupep yānām kō'āynām, xix hāmnhāhūn, xix tex fīnnāhā'. Ha ta' pip nōm te' xat yōg mīmpe yūm'ax keppa kuyānām tat'ax xohix te' 7, tu yōg kuyānām pip, yā' koxuk te' 7 Topa yōg.

⁶ Ha ta' xip nōm te' xat yōg mīmpe yūm'ax keppa kōnāg xexka', yā gahap putuk, yā mīkaxxap ponnok max putuk.

Ha ta' 'ōm pip, tu nōm te' xat yōg mīmpe yūm'ax xakot, yā yōnnā'ī te' 4, tu' pa pa pip 'ūkeppa xi' xāmpah.

⁷ Yā yōnnā'ī te' 4 ha yāp-xet te xoktut putuk, ha ta' nōy te mūnūytut kutok putuk, ha ta' nōy pa te tik pa putuk, ha ta' nōy te mōmōka putuk, tu topahah.

⁸ 'Ūxohix te' 4 yōg yīmāg pip. Yāp-xet yōg yīmāg xohix te' 6, ha' nōy yōg te' 6, ha' nōy yōg te' 6, ha' nōy yōg te' 6. Yōnnā'ī xohix pa xohix pip 'ūyīmap xi' kopah. Yōnnā'ī tek-te'ex hāptup tox hā xix 'āmny tox hā, tu' hup 'ohnāg, tu:

—Topah, 'āmax xe'ēgnāg, 'āmax xe'ēgnāg, 'āmax xe'ēgnāg. 'Āka'ok xexkanām, nūy

hāpɔxop xohix xexka mīy yūmmūg. Hōmā 'āxip xix hōnhā 'āxip, tu 'ānūn putup. Kaxīy.

⁹ Hā kaxīy yōnnā'ī tek-te'ex nōm te' xat pu, yā nōm te mīmpe yūm'ax yīmū' yūm, yā nōm ti mōkuma'mōg hāmyāxatamuk xohix kux 'ohnāg hā,

¹⁰ Thā tik xexka te' 24 te hām tu' xakux nōm keppah, tu' nōm 'āktux max, nūy nōm xexka mīy yāy kuxa kopah, tu yāy yōg xexka xop yōg kuxxax xex hām tu' nōm keppah, yā nōm te' xat keppah, tu:

¹¹ —Āmūn yūmūg xuxyā', yā yūmū yōg Topah. 'Āmax, ha' xohix te' yūmmūg 'āmax xe'ēgnāg, xix 'āxexkanām, xix 'āka'ok xexkanām.

Hamūn, xate' xohix xexka mīy. Xatep-tup, yīy ta' pip 'ūxohix, tu' hi'.

Kaxīy.

5

Tappet tox xix Kahnēn Kutok

¹ Ha ta' pēnāhā 'āte, pa' xip tappet tox kīy xahix 'ūyīpɔe'e kopah, yā nōm te' xat 'ūyīm kopah, yā nōm te mīmpe yūm'ax yīmū' yūm, ha tappet tox kīy xahix yīmū' pip kax'āmi'ax punethok 'ūkeppa xi' xāmpah, ha kīy'ax xohix te' 7 te tappet tox kīy.

² Ha ta' xip pexkox yōg nū'kutnā'ax ka'ok, yā Topa yōg kāmānat, ha hām'āktux ka'ok, hu:

—Pi'ā' xip nōm max, yā nōm te kīy'ax mep yūmmūg, nūy tappet tox ko'ah? Kaxīy.

³ Pa' xip'ah pexkox tu' xix hām xexka tu' nōm max, yā nōm te tappet tox ko'ah, nūy kopa' pēnā'.

⁴ Ūkpotaha', yā' xip'ah nōm max, yā nōm te tappet tox ko'ah, nūy kopa' pēnā'.

⁵ Ha ta' xip tik xexka', tu hām'āktux, hu:

—Āpota hok. Pēnā', Ūxip nōm ka'ok, tu xoktut putuk, yā xuxet'ax Yona xop yōg xoktut, yā Namix yōg xupepmā xop kopa' xip, yā tute' xut. Tute kīy'ax mep yūmmūg, nūy tappet tox ko'ah. Kaxīy.

⁶ Āte' pēnāhā', pa' xip nōm xuxet'ax Kahnēn Kutok. Kaxīy. Ūk-nīhā' xip nōm te' xat yōg mīmpe yūm'ax yīmū', ha yōnnā'ī te' 4 te Kahnēn Kutok xakot, ha tik xexka te' 24 te Kahnēn Kutok xakot kamah, ha Kahnēn Kutok xok tap, payā' putpu' hi', tup-tox kup xohix te' 7, tu' pa xohix te' 7. Ūp-tox kup xi' pa yā koxuk te' 7 Topa yōg, yā koxuk mō'pok hāpɔxexka xohix tu'.

⁷ Ha ta' mōg Kahnēn Kutok, ha' xip tappet tox 'ūnōy yīm kopah, yā nōm te' xat yīm kopah, yā nōm yūm mīmpe yūm'ax yīmū', ha Kahnēn Kutok te tappet paha',

⁸ yā' paha', ha yōnnā'ī te' 4 te hām tu' pip Kahnēn Kutok keppah xix tik xexka te' 24 te hām tu' pip kamah Kahnēn Kutok keppah. Ha yōnnā'ī yōg 'ap pip, nūy yōg tutxit kaxyā',

xix tik xexka xop te' kamah, tu' xohix yōg kānēy yānām 'āta yīxux pip kamah, nūy nōm kopa mō'hap' ūkōnnōn, nūy tu hax max 'āpɔp pepix. Hā kaxīy 'ūkuxa mām ka'ok xop te Topa pu hām'āktux, ha hām'āktux te pepi' mōg.

⁹ Ūxohix tek-tex tup hāk-tex, hu:

—Āmax 'āpu tappet tox pa', nūy kīy'ax mep.

Hamūn, hōmā tikmū'ūn te 'āp-tex, yā tikmū'ūn pupi 'āxok, nūy tikmū'ūn mōgā Topa hah.

Yā' xohix mōgāhā',

yā hep xohix xop yōg xop, xi' yīy'ax xohix yōg xop,

xix hām xexka xohix yōg xop, xix xop xohix.

¹⁰ Ūxohix te 'āmānex xop putuk, tu Topa pu hāpɔxopmā max.

Topa te nōm xat, yā' yōg tikmū'ūn,

ha Topa yōg tikmū'ūn te' nōy xohix xat putup hām xexka tu'.

Kaxīy.

¹¹ Āte' pēnāhā 'ūxeheh, tu pexkox yōg nū'pok xop 'āpak, yā' xohix te' 10.000 punethok xi' 1.000 punethok. Ūxohix te nōm te' xat xakot, yā nōm te mīmpe yūm'ax yīmū' yūm, xix yōnnā'ī te' 4 xakot, xix tik xexka te' 24 xakot.

¹² Ūxohix tek-tex ka'ok, hu:

—Hōmā tikmū'ūn tep-tex Kahnēn Kutok.

Pa hōnhā 'āxip, yā 'āmax, yā 'āka'ok nōynā'āmōg.

Xate' xohix yōg hāpɔxop pop. Xate hāpɔxohix yūmmūg,

ha' xohix te 'āmūn 'āpak, nūy 'āxexka mīy, nūy 'āmūn 'āktux max.

Kaxīy.

¹³ Ha ta' xupak 'āte 'ūhi xop xohix pexkox tu' xix kōnāg xexka tu', yā xohik-tex, hu:

—Yā' max xe'ēgnāg nōm te' xat, nōm te mīmpe yūm'ax yīmū' yūm.

Yā' max xe'ēgnāg Kahnēn Kutok.

Yūmū'āte nōm pu' popmāhā hāpɔxop xohix.

Yūmū'āte nōm 'āktux max, tu nōm 'āpak, tu' xexka mīy yāy kuxa kopah.

Tute yūmūg xat putup mōkuma'mōg, ha' kux 'ohnāg.

Kaxīy.

¹⁴ Ha yōnnā'ī te' 4 te:

—Hamūn! Kaxīy.

Ha tik xexka xop te hām tu' pip, tu' kuxa te' yēy, tu Topa 'āktux max xix Kahnēn Kutok 'āktux max.

6

Ūkīy'ax

¹ Āte xe' pēnāhā', ha Kahnēn Kutok te' kīy'ax māxap xak. Ha ta' xip yōnnā'ī puxet, nōm te' 4 xop kopa' xip. Ūyīy te tex tinnā'ax putuk. Tute:

—Mā'! Kaxīy.

² 'Áte' pēnāhā', pa' xip kāmānok ponnok, ha nōm te' yīmū' yūm, tu' pox kīy tat, ha' nōy te tu' hōm 'ūxat' ax xexka yōg kuuxax yānām 'āta yīxux. Ha ta' mōg, nūy hām xexka pop xix yōg tikmū'ūn pop.

³ Ha ta xe' xak kīy' ax nōy Kahnēn Kutok te', yā kīy' ax tix, ha 'āte' xupak, ha yōnnā'ī nōy, yā' tix te hām'āktux, hu:

—Mā! KaXīy.

⁴ Yīy ta' xupep kāmānok nōy, yā xuttah, ha 'ōm te' yīmū' yūm, ha' nōy te nōm ka'ogāhā', puyīy tikmū'ūn yāy kix kakīynāgā'. Ha nōm te kāmānok yīmū' yūm, tu' pop mīkax xexka tox.

⁵ Ha ta xe' xak 'ūkīy' ax Kahnēn Kutok te', yā' tikoyuk, ha 'āte' xupak, ha yōnnā'ī nōy, yā' tikoyuk te:

—Mā! KaXīy.

'Áte' pēnāhā', pa' xip kāmānok nōy, yā' mūnnīy. Ha nōm te' yīmū' yūm, tu' tat hāpxop mōmūg'ax.

⁶ Ha 'āte' xupak, ha yōnnā'ī te' 4 te hām'āktux, hu:

—Māyōn puxet ha' hām'ax yōg tayumak te' pop xuxnāg xe tox xap nit puxet pe xenat xap yōg nit tikoyuk. Pa' nōy hok 'ayet hep tox xix xupyāg mōy hok, yā nōnenex hok! KaXīy.

⁷ Ha ta xe' xak 'ūkīy' ax nōy Kahnēn Kutok te', yā 4, ha 'āte' xupak, ha yōnnā'ī nōy, yā' 4 te:

—Mā! KaXīy.

⁸ 'Áte' pēnāhā', pa' xip kāmānok nōy, yā pap-nok putuk. Ha 'ōm te' yīmū' yūm, tu' xuxet'ax yā Xakix'ax, kaxīy, xix Hāmāyāgnāg Pet, kaxīy, tu' kāmānok nōy pe' mōg 'ūyikāgnāg. Ha' nōy te nōm kā'ogāhā', puyīy xat, hām xexka yōg tikmū'ūn yōg yāg te' 4 yōg yāg puxet kix, yā tikmū'ūn te yāy kix kakīynāg putup, tu' putup xūy hā' xakix putup, tu' hāmpakut hā' xakix putup, ha xokxop gāy te' kix putup.

⁹ Ha ta' xak 'ūkīy' ax nōy Kahnēn Kutok te', yā' 5, ha 'āte' pēnāhā', pa' pip yāmīy xohix xokxop mō'hap'ax kakak. Hōnhā yā yāmīy, pa hōnā yā tikmū'ūn, tu' hām xexka tu' pip, tu' Topa yōg hām'āpak max'ax 'āktux, yīy ta tikmū'ūn gāy, tu' kix, ha' xakix, tu' nōmhā yā' yāmīy, tu' pip xokxop mō'hap'ax kakak,

¹⁰ tu' hām'āktux ka'ok, hu:

—Topa, xatek mūg xat, yā 'āka'oknām. Xate' xohix xat. 'Āmax xe'ēgnāg, tu' hāpxe'e mīy. Hām 'ūmhā xate hām xexka yōg tikmū'ūn yōg hāpkummugā'ax hā nōy yānān putup? Yā nōm tek mūg kix, hak xakix. KaXīy.

¹¹ 'Ūxohix te' pop topixxax ponnok tox, ha' nōy te:

—Nāy, 'ūhip kutōgnāg, ha mōktu' xohix xexka nūn, tu' nūktu' mōxaha nūnteh, yā Topa yōg kāmānat kamah, yā 'āxop putuk,

yā 'āxape xop. Tikmū'ūn te nōm kix putup kamah, ha' xakix putup. KaXīy.

¹² Ha ta' xak 'ūkīy' ax nōy Kahnēn Kutok te', yā' 6, ha hām xexka nuhuknām, tu' yāy pot, ha ta māyōn yāy hām-nīy, tu' topixxax mūnnīy putux putuk, ha ta māyōn hex yāyhā xuttah, tu' hep 'āta putuk.

¹³ Ha ta māyōnnāg te pexkox tu' yīxohoh, yā mūnta pik xakux'ax putuk, yā 'āmuuh xexka te' kup nuhuk, hā kaxīy putuk.

¹⁴ Ha ta' nōg pexkox, tu' tappet tox kīy putuk, ha yīktix xohix xexka te yāy pip'ax nūm, tu' ta' mōg xix hām tot kōnāg yōg xohix te yāy pip'ax nūm, tu' ta' mōg.

¹⁵ Ha ta' pip 'ūxat' ax xop, xix xexka xop, xix xonat xexka xop, xix 'ūp-texop xexka xop, xī' ka'ok xop, xix kāmānat xop, xix xuxyā xop. Yā' xohix xexka te yāy xaptop mīkaxxap xexka kakak xix yīktix tu',

¹⁶ tu' yīktix pu hām'āktux xix mīkaxxap pu hām'āktux, hu:

—'Āpu 'ūgmū yīmūg nāy, nūy 'ūgmū mō'nīy, nūy 'ūgmū xaptop, puyīy nōm tek mūg pēnā hok nōm te' xat, yā nōm te mīmpe yīmū' yūm, puyīy Kahnēn Kutok tek mūg yānān hok.

¹⁷ Yā hōnhā nōm gāy xexka'. Tep te' gāy'ax hā' tot putup? Yā 'ap hā' tot putup'ah. KaXīy.

7

'Iyaet yōg tikmū'ūn xohix te' 144.000

¹ Hāpxip 'īhā 'āte' pēnāhā pexkox yōg nū'pok'ax te' 4, ha' pip hām xexka tu', ha yāp-xet xip nōntix tu' ha' nōy xip xot tu', ha' nōy xip māyōn mō'nā'ax tu', ha' nōy xip māyōn xupep'ax tu'. Yā' xohix te' 'āmuuh mūg 'ūyīm hā, puyīy 'āmuuh mōkoux hok hām xexka tu', xix kōnāg xexka tu', xix mīmātik tu'.

² Ha 'āte' pēnāhā', pa' xip pexkox yōg nū'kutnā'ax, tu' māyōn xupep'ax tu' nūn, tu' Topa yōg ka'āmi'ax tat, yā Topa xe'ēgnāg yōg, yā Topa hi xe'ēgnāg. Pexkox yōg nū'kutnā'ax te hām'āktux ka'ok yāy xape te' 4 pu'. Yā Topa te nōm 4 xop ka'ogāhā', puyīy hām xexka koxyōy xix kōnāg xexka koxyōy.

³ Ha nōm pexkox yōg nū'kutnā'ax te:

—Hōnhā' koxyōy hok hām xexka xix kōnāg xexka', xix mīhīm. Nāy, puk mū'āte' ka'āmi Topa yōg kāmānat xohix xexka kux tu'. KaXīy.

⁴ Hā 'āte' xupak 'ūxohix texīy 'ūkux tu' ka'āmiptup, yā Topa yōg xop, yā hep puxet 'Iyaet yōg tikmū'ūn xohix te' 144.000,

⁵ yā Yona yōg xupepmā xop yōg xohix te' 12.000, xix Ho'op yōg xupepmā xop yōg xohix te' 12.000, xix Gat yōg xupepmā xop yōg xohix te' 12.000,

⁶ xix 'Axe yōg xupepmā xop yōg xohix te' 12.000, xix Nāptanix yōg xupepmā xop yōg xohix te' 12.000, xix Mānāxex yōg xupepmā xop yōg xohix te' 12.000,

⁷ xix Ximēām yōg xupepmā xop yōg xohix te' 12.000, xix Nemi yōg xupepmā xop yōg xohix te' 12.000, xix Ixakat yōg xupepmā xop yōg xohix te' 12.000,

⁸ xix Yemonōm yōg xupepmā xop yōg xohix te' 12.000, xix Yoye yōg xupepmā xop yōg xohix te' 12.000, xix Meyamīy yōg xupepmā xop yōg xohix te' 12.000. Yā xohix te' 144.000.

Tikmū'ūn xohix xexka'

⁹ Hāpxip 'lhā 'āte' pēnāhā', pa' pip tikmū'ūn xohix xexka', yā' xohix. Tep-te' mōkupix? Yā mōkupix yūmmūg 'ohnāg. Yā' pip punethok, yā xop xohix yōg, xix hep xohix xop yōg, xix hāpxexka xohix yōg xop, xi' yīy'ax xohix yōg xop. Yā' xohix tek-nūhā' pip nōm te' xat keppah, yā nōm te mīmpe yūm'ax yīmū' yūm, xix Kahnēn Kutok keppa' pip, tu' xohix te' tat topixxax ponnok tox, tu paxxap xux pop 'ūyīm hā,

¹⁰ tu' xohix te hām'āktux ka'ok, hu:

—Topa te yūmūg kuxa kummuk xit, nūy kuxa max mō'tat 'ūyānān tu', yā Topa xexkanām, xix Kahnēn Kutok, tu' xat'ax yōg mīmpe mām'ax yīmū' mām. Kaxīy.

¹¹ Ha pexkox yōg nū'pok'ax xohix xexka tek-nūhā' pip, tu nōm te' xat yōg mīmpe yūm'ax xakot tik xexka te' 24 mūtik xix yōnnā'ī te' 4 mūtik, tu hām tu' pip, tu hām tu' nūktettex, tu' pip nōm te' xat yōg mīmpe yūm'ax keppah, tu Topa xexka mīy yāy kuxa kopah, tu:

¹² —Hamūn, 'āpu yūmū Topa 'āktux max mōkuma' mōg, ha' kux 'ohnāg. Topa yā' max xe'ēgnāg, tu hāmyūmmūg xexkanām mōkuma' mōg, ha' kux 'ohnāg. Topa te yūmū'ā' popmāhā hāpxop xohix, yīy yūmū'āte hām'āktux, hu: “Āmax. Puxix. Ūmax.” Kaxīy. 'Āpu yūmū hām'āktux hā kaxīy hāmyāxatamuk xohix kux 'ohnāg hā. 'Āpu yūmū yāy yōg Topa 'āpax mōkumagmōg, ha' kux 'ohnāg. Topa te hāpxop xohix yūmmūg tu' ka'oknām hāmyāxatamuk xohix kux 'ohnāg hā. Hamūn. Kaxīy.

¹³ Ha ta tik xexka puxet xip, tuk yīkopit, hu:

—Ū'ūm 'ōhōm, yā topixxax ponnok tox tat? Hām 'ūm tu' nūn? Kaxīy.

¹⁴ Ha 'āte:

—'Īntu', xate' yūmmūg. Kaxīy.

Ha:

—Yā hōmā 'ūyōg hāpxop kummuk xexka', tu' xūy xexka', tu yāy yōg topixxax pix Kahnēn Kutok hep 'āta kopah, yīy topixxax ponnok.

¹⁵ Nōm xop pip Topa keppa xix Topa yōg mīmpe yūm'ax keppah. Topa pet kopa' pip 'āmnīy 'lhā xix hāptup 'lhā, ha nōm te mīmpe yūm'ax yīmū' yūm te nōm xop hā tep-tup.

¹⁶ A xe putup 'ūm pip putup'ah xix kōnāg putup pip putup'ah 'ūxeheh. Ha māyōn

yānām ka'ok te nōm xop puk putup'ah 'ūxeheh, xix kuxap ka'ok te nōm xop puk putup'ah 'ūxeheh.

¹⁷ Hamūn, Kahnēn Kutok xip, 'ūxat'ax yōg mīmpe yūm'ax tu' xip, tu nōm xop pēnāp-tup, yā Kahnēn pēnā'ax max putuk, tu nōm mōgāp-tup hāmmax tu', xix kōnāg xupep'ax tu', ha yōg kōnāg te tikmū'ūn hīnnāhā', ha Topa te' pota pa hep xohix nagāp-tup. Kaxīy.

8

'Ūkīy'ax, yā' 7

¹ Ha ta xe kīy'ax nōy xak Kahnēn Kutok te', yā kīy'ax 7, ha' yēy, yā hām'āpak 'ohnāg 'ot xahix hā.

² 'Āte' pēnāhā', pa' pip pexkox yōg nū'pok'ax te' 7 nōm te Topa keppa' pip, tu' pop mīxux xop tut te' 7, nūy kaxyā'.

³ Ha ta' xip pexkox yōg nū'kutnā'ax nōy, tu kōnnōn mō'hap'ax yīka' xip. Tute' pop kugōy hax max yōg kōnnōn, nūy pugā', nūy kugōy yāy kotīnnā 'ūkuxa mām ka'ok xop yōg Topa pu hām'āktux mūtik, puyīy kugōy mōg pepix Topa pu hām'āktux mūtik Topa hah. 'Ūpugāhā kōnnōn mō'hap'ax yānām 'āta yīxux yīmū' nōm te' xat yōg mīmpe yūm'ax keppah.

⁴ Ha pexkox yōg nū'kutnā'ax te kōnnōn nū'xok kōnnōn mō'hap'ax yīmū', ha kōnnōn yōg kugōy mōg pepi' 'ūkuxa mām ka'ok xop yōg Topa pu hām'āktux mūtik, tu mōktu Topa tu' mōxaha',

⁵ ha pexkox yōg nū'kutnā'ax te kōnnōn yōg kānēy paha', tu kōnnōn mō'hap'ax tu' paha kuxap, tu' xix kānēy kopah, tu mō'yōn hām xexka tu', yīy ta tex ūnnā punethok, ha yānām kō'āynām, ha hām xexka nuhuk, tu yāy pot.

Mīxux xop tut kaxyāhā'

⁶ Ha ta' pip pexkox yōg nū'pok'ax te' 7, tu' pop mīxux xop tut, nūy kaxyā'.

⁷ Ha pexkox yōg nū'kutnā'ax māxap te mīxux xop tut kaxyāhā', ha tex xap nū'nāhā xix kuxap hep 'āta mūtik tu nūktu: “Po,” kaxīy hām xexka tu', ha' puk hām xexka yāg puxet, ha ta yāg tix puk 'ohnāg, ha mīm yāg puxet puk, ha ta yāg tix puk 'ohnāg, ha mīxux yīxux yāg puxet puk, ha ta' yāg tix puk 'ohnāg.

⁸ Ha pexkox yōg nū'kutnā'ax nōy xip, yā' tix, tu mīxux xop tut kaxyāhā', ha ta pexkox tu' xip hāpxop, yā yīktix xexka putuk, tu kuxap xexka hā' puk, ha nōm te' paha', tu hām tu' nū'yōn yīktix, ha ta' nāhā', tu nūktu: “Po,” kaxīy, kōnāg xexka tu'. Ha kōnāg xexka yāg puxet te yāyhā hep 'āta', ha ta' yāg tix te yāyhā hep 'āta 'ohnāg.

⁹ Ha ta' xakix kōnāg xexka kopa' pip xop yāg puxet, ha ta' xakix 'ohnāg yāg tix, ha ta yāy koxyōy mīpkox yāg puxet, ha ta' yāg tix yāy koxyōy 'ohnāg.

¹⁰ Ha ta' xip pekkox yōg nū'kutnā'ax nōy pekkox tu', yā pekkox yōg nū'kutnā'ax tikoyuk, tu mīxux xop tut kaxyāhā', ha ta pekkox tu' nāhā māyōnnāg, tu' puk, yā kuyānām tat'ax xexka putuk. 'Ūnāhā, tu nūktu: "Po", kaxīy, kōnāg kox yāg puxet tu', ha ta' yāg tix hā mō'nā 'ohnāg, tu kōnāg xupup kox yāg puxet hā mō'nāhā', ha ta' yāg tix hā mō'nā 'ohnāg.

¹¹ Yā māyōnnāg 'ūxuxet'ax, tu: kohāgnāg'ax. Kaxīy. Ha kōnāg yāg puxet yāyhā kohāgnāg, ha ta yāg tix yāyhā kohāgnāg 'ohnāg, ha tikmū'ūn punethok te' xo'op, hu' xakix.

¹² Ha ta' xip pekkox yōg nū'kutnā'ax nōy pekkox tu', yā pekkox yōg nū'kutnā'ax 4, tu mīxux xop tut kaxyāhā', ha hāp xop te' kix 'ūyāg puxet māyōn yōg, xix māyōn hex yōg, xix māyōnnāg yōg, ha ta' 'ūyōg yāg tix kix 'ohnāg, yīy ta' xohix te yāy yōg kuyānām yāg puxet xaxok, ha ta' yāg tix xaxok 'ohnāg, ha ta hām xexta tu hāpkox tap hāptup yāg puxet, ha ta' yāg tix hāpkox tap 'ohnāg, ha 'āmnīy te kaxīy kamah.

¹³ 'Āte' pēnāhā', pa' xip mōmōka', tu' topaha pepi' mōg, tu hām'āktux, hu:

—Hāpkummuk! Hāpkummuk! Yā' kummuk xexka hām xexka xohix xop yōg, ha pekkox yōg nū'pok tikoyuk nōy te mīxux xop tut kaxyāp-tup. Kaxīy.

9

¹ Ha ta' xip pekkox yōg nū'kutnā'ax nōy pekkox tu', yā pekkox yōg nū'kutnā'ax 5, tu mīxux xop tut kaxyāhā'. 'Āte' pēnāhā, pa' xip māyōnnāg hām xexka tu'. Yā hōmā nōm te pekkox tu' nāhā'. Ha' nōy te tu' hōm pipkup mōhāmīyinnīn'ax hāpkox tox xexka yōg,

² ha māyōnnāg te hāp xōn, ha kugōy xexka xupep, yā 'āmuk'ax xexkanām yōg, tu kugōy te māyōn yānām pak, ha yāyko te hāpkox tap.

³ Ha ta' pip kunihit kugōy kopah, tu ta' mōg, tu mōktu mōxaha hām xexka tu', ha' nōy te kunihit ka'ogāhā', ha' ka'ok, yā xok-patakumhīy putuk.

⁴ Ha' nōy te' xat, pu xux mā hok, xix mīm xux mā hok, xix mīxux puk mā hok, pa' xat, pu tik kute'ex. Hamūn, yā' pip 'ohnāg Topa yōg kax'āmi'ax nōm tik tu'.

⁵ 'Ūxat, pu kunihit tik kix hok, pa' xat, pu tik kute'ex māyōn 'ānuk xohix te' 5 hā, tu' xūyghāhā', yā xokpatakumhīy te' xuhmīy putuk.

⁶ Ha māyōn 'ānuk xohix te' 5 hā' xūy tihik, tup-tup 'ūxakix, pa' xakix 'ohnāg, 'a' xakix putup'ah.

⁷ Yā kunit te xonat yōg kāmānok putuk, nōm te' yāy kix. Tup-tox hā mō'tat 'ūxat'ax xexka yōg kuxxax yānām 'āta yīxux putuk, tu' payīn te tikmū'ūn payīn putuk.

⁸ Tu' xe te 'ūn xe putuk, tu' xox te xoktut xox putuk,

⁹ tu' kep xax te xonat yōg kepxax putuk, yā pipkup hā' mīy, tu' yīmāg payāhā te hāmānāhūn xexkanām putuk, yā xonat xop yōg kāmānok hāmānāhūn putuk, xix hāp xop yīkūy'ax te hāmānāhūn putuk, yā xonat yōg hāp xop yīkūy'ax,

¹⁰ tu' nā'kup xox te xokpatakumhīy nā'kup xox putuk, tu' nā'kup xox te tik xūyghāhā māyōn 'ānuk xohix te' 5 hā.

¹¹ Ha ta' xip kunihit xop yōg xexka', yā pekkox yōg nū'kutnā'ax. Tute hāpkox tox xexka pēnāhā', yā' xuxet'ax 'Amanōm, yā 'Emeneo xop yīy'ax kopah, xi' xuxet'ax 'Apōyām, yā Genex yīy'ax kopah. Yā tikmū'ūn yīy'ax kopah, hu' 'ūkoxyōy'ax. Kaxīy.

¹² Tu ta' kux hāpkummuk māxap, ha' nūn putup hāpkummuk nōy tix.

¹³ Ha ta' xip pekkox yōg nū'kutnā'ax nōy pekkox tu', yā pekkox yōg nū'kutnā'ax 6, tu mīxux xop tut kaxyāhā', ha 'āte' yānmūn xupep'ax 'āpak, yā xok xop mō'hap'ax yōg xup'ax tu' nūn, yā xok xop mō'hap'ax yānām 'āta yīxux xip Topa keppah.

¹⁴ Ha yānmūn xupep'ax te pekkox yōg nū'kutnā'ax pu hām'āktux, yā nōm te' 6 pu hām'āktux, hu:

—'Āpu 'āyīm ko'a', pu mōg pekkox yōg nū'pok'ax te' 4, nōm pip kōnāg kox 'Eppanāt kūnāpah. Kaxīy.

¹⁵ Ha 'īm ko'a', pu mōg. Nōm te' hip nōm 'ot, xix nōm hāptup, xix nōm māyōn 'ānuk, xix nōm hāmāxatamuk. 'Ūhip, nūy tikmū'ūn yāg puxet kix, puyīy tu xakix, ha ta' yāg tix kix 'ohnāg.

¹⁶ Ha 'āte' xupak 'ūxohix nō'ōm, yā xonat te kāmānok yīmū' mām, yā xonat xohix te' 200.000.000.

¹⁷ Ha 'āte' pēnāhā, tu kāmānok pēnāhā xix nōm te' yīmū' mām, ha yōg kep xax pip, yā' xutta te kuxap 'āta putuk, xix yīxux te mīkaxxap xapit putuk, xix xutta yīxux te mīkaxxap 'ūxop putuk. Ha kāmānok putox te xoktut putox putuk, ha' yīkox kopa' xupep kuxap xix kugōy xix mīkaxxap 'ūxop.

¹⁸ Yā hāp xop xūyghā'ax tikoyuk pip, yā kuxap, xix kugōy, xix mīkaxxap 'ūxop, tu tikmū'ūn yāg puxet kix, ha' xakix. Ha ta' yāg tix kix 'ohnāg.

¹⁹ Ha kāmānok te' yīkox hā' nōy kix, xi' nāgkup hā' kix kamah. Yā' nāgkup te kāyāp-tox putuk, ha' xox pip, tu nōm hā tu tikmū'ūn putop.

²⁰ Ha ta' pip 'ūhi xop. Yā hāp xop xūyghā'ax te nōm kix 'ohnāg. Nōm xop te hāpkummuk mīy kux 'ohnāg, tu yāmīy puk-te'ex kux 'ohnāg, tu topa komut xop pu nūktettex kux 'ohnāg, yā pipkup yānām 'āta yīxux hā' mīy topa komut xop, xix yānām ponnok hā' mīy, xix pipkup monōn hā' mīy, xix mīkaxxap hā' mīy, xix mīm hā' mīy. Yā topa komut xop te

hämpēnā 'ohnāg xix hām'āpak 'ohnāg, xix hāpkumep 'ohnāg.

²¹ Tikmū'ūn te' nōy kixpax, pa yāyhāhup 'ohnāg, nūy hāpkummuk mīy kux 'ohnāg, tu mīm mīy, tu' hup 'ohnāg, tu' nōy hā xupxet, tu hāpxop xupxet, tu' hup 'ohnāg.

10

Tappet tox kīy kutōgnāg

¹ Ha 'āte' pēnāhā', pa' xip pexkox yōg nū'kutnā'ax ka'ok pexkox tu', tu kugōy tat, yā topixxax putuk, tu texxux tep-tox xakot, yā' kuxxax putuk, tu' pa te māyōn putuk, tu' kup te kuxap putuk, tu ta' yīxohoh.

² Tu tappet tox kīy kutōgnāg tat 'ūyīm kopah, ha' pata xe'e te kōnāg xexka tonnok, ha' pata nōy te hām tonnok,

³ ha' yīy ka'ok, yā xoktut punethok yīy'ax putuk. 'Ūyīy ka'ok, ha tex tīnnā'ax xohix te' 7 te' yānān.

⁴ 'Ūyīy kux, ha 'āte' kax'āmi putup, pa 'ōm yīy pexkox tu', ha 'āte' xupak, ha hām'āktux, hu:

—Āpu hām'āktux xaptop. Āpu textīnnā'ax yōg hām'āktux kax'āmi hok. Kaxīy.

⁵ 'Āte' pēnāhā pexkox yōg nū'kutnā'ax te kōnāg xexka tonnok xix hāhām, ha' yīm pepi' xix,

⁶ tu hām'āktux, hu:

—Hāpxip kutōgnāg 'lhā' nūn. Topa te yōgnū hām'āktux yūmmūg, yā Topa te' yūmmūg, yā Topa hi mōkuma'mōg hāmyāxatamuk xohix kux 'ohnāg hā, tu pexkox mīy xix yāykoteh, xix nōm kopa' pip xop, xix hām xexka mīy, xix nōm tu' pip xop, xix kōnāg xexka mīy, xix nōm te kopa' pip xop.

⁷ Hōmā Topa te Topa pupi hām'āktux xop pu hām'āktux xex, yā hāpxop xaptop. Hāpxip kutōgnāg 'lhā Topa te nōm hāpxopmāp-tup, ha pexkox yōg nū'pok'ax te' 7 te mīxux xop tut kaxyāp-tup. Kaxīy.

⁸ Ha ta xe' yīy pexkox tu', ha 'āte' xupak, ha hām'āktux, hu:

—Mōg, nūy pa tappet tox nōm xip pexkox yōg nū'kutnā'ax yīm kopah nōm te kōnāg xexka tonnok xix hāhām. Kaxīy.

⁹ Ha tak mōg pexkox yōg nū'kutnā'ax hah, tu:

—Ā' hōm tappet tox kīy kutōgnāg. Kaxīy.

Ha:

—Ūpa, nūy mā'. Xate' māhā', ha' yāyhā' xūy putup 'ātex kopah, pa' xuxpex 'āyīkox kopah, yā pukhep putuk. Kaxīy.

¹⁰ Ha 'āte' paha tappet tox 'ūgyīm kopah, tu' māhā', ha' xuxpex 'ūgyīkox kopah, yā pukhep putuk. 'Āte' māhā', ha hāpxip 'lhā' xūy 'ūktex kopah.

¹¹ Ha tute:

—Xate Topa yōg hām'āktux pop. Xate hām'āktux putup tikmū'ūn xohix pu', xix hāpxexka xohix xop pu', xi' yīy'ax yōg xohix

xop pu', xix hāpxexka xohix yōg tik xat'ax xohix pu'. Xate hām'āktux putup, hāpxop kummuk nūn. Kaxīy.

11

Tik tix te Topa yōg hām'āktux 'āktux

¹ Ha' nōy te 'ā' hōm mōhāmmūg'ax tox, tu:

—Āpu mō Topa pet xexka mūy, nūy mēn xohix texīy yūmmūg, xix xokxop mō'hap'ax yōg mēn kamah. Āpu mōkupix 'ūxohix te Topa keppa nūktettex Topa pet xexka kopah.

² Pa 'āpu mō hām mūy hok hām nuhnōg Topa pet xexka kūnāpah, yā Topa pet xexka yīkagnāg hā. Hamūn, Topa te hām hōm Yoneo xop kūnāpa pip xop pu', ha nōm te hām tonnok putup māyōn 'ānuk xohix te' 42 hā, xix kōmēn xe'ēgnāg tonnok putup kamah.

³ Āte mō'pok putup tik tix, puyīy yōgnū hām'āktux 'āktux hām xexka tu'. Nōm te topixxax kummuk mō'tat, nōm hāg tu xago. Hamūn, yā' kuxa hittup 'ohnāg, yā tikmū'ūn te hāpkummuk mīy. Nōm te Topa yōg hām'āktux 'āktux putup 'āmnīy xohix te' 1260 hā. Kaxīy.

⁴ Yā Topa yōg hām'āktux tat'ax tix te mīm kup 'onimet tix putuk, xix kuyānām tat'ax tix putuk. Nōm te hām xexka yōg xat'ax xexka keppa pip putup.

⁵ Tikmū'ūn 'ūm te nōm tik tix kute'ex kummuk, puxix tik tix yīkox kopa' xupep kuxap, nūy puknōg gāy xop kummuk koxyōy, nūy nōm kix, ha' xakix putup.

⁶ Topa te tik tix ka'ogāp-tup, ha nōm te' xat putup, hu pexkox mō'nīy, yīy tex tīp-tup 'ohnāg, ha tik tix te Topa yōg hām'āktux 'āktux putup. Ha Topa te tik tix ka'ogāp-tup, ha nōm te' xat putup, yīy ta kōnāg xupup kox xohix yōg kōnāg te yāyhā hep 'ātap-tup. Ha Topa te nōm ka'ogāp-tup, puyīy hām xexka kix, yīy ta' nūn putup hāpxop kummuk xohix, tik te nōm putup.

⁷ Tu ta Topa yōg hām'āktux 'āktux kux, ha ta hāpkox tox xexka kopa' xupep xok xexka', nūy tik tix mūtik yāy kix, tu' xat putup, tu' nōy kix putup, ha' xakix,

⁸ ha' yīn pip putat kopa kōmēn xe'ēgnāg kopah, yā tikmū'ūn tep-tex Yeyox mīpkupnix yīmū' kōmēn xe'ēgnāg tu'. Yā kōmēn yōg tikmū'ūn te hāpkummuk mīy. Yā kōmēn 'āxet'ax Xonōm Putuk xix 'Eyiit Putuk.

⁹ 'Ūxohix xop te tik tix yīn pēnāp-tup 'āmnīy tikoyuk xix zahix hā. Hāmūn, 'ūxat putup, pu nō hāpkot hok. 'Ūxohix te' pēnāp-tup, yā hām xexka yōg xohix xop, yā' hep xohix xop xix yīy'ax xohix xop, xix xop xohix,

¹⁰ tu hām xexka yōg tikmū'ūn xohix kuxa hittup putup, 'ūxakix tik tix hah. 'Ūxohix kuxa hittup, tu yāy pu hāpxop max hok popmāp-tup. Hamūn, nōm tik tix te Topa

pupi hām'aktux, tu' xat, pu hām xexka yōg tikmū'ün xūyğā'.

¹¹ Pa 'āmnīy tikoyuk nōg, 'hā Topa te tik tix kopa xitxok, nūy putpu' hīnnā', yīy tak-nīhā' pip, ha' xohix te' pēnāhā', hu' yīpkutuk xexkah,

¹² ha tik tix te' xupak, pa nōm te' xānā ka'ok hu:

—Mā nūnte pepi'. Kaxīy

Ha ta' mōg tik tix pepi', tu hāmğöy xexka hā' mōxaha', tu ta' mōg pepi pexkox tu', ha ta' pip 'ügäy xop hām xexka tu', tu' pēnāhā'.

¹³ Ha hām nuhuk xexka', tu' yāy pot, yīy ta kōmēn yāg puxet koxyöy, ha ta' yāg te' 9 koxyöy 'ohnāg, yīy ta tikmū'ün xohix te' 7.000 xakix hām nuhuk hā. Ha ta tikmū'ün nōy kuxanōg, tu pexkox yōg Topa 'aktux max.

¹⁴ 'Ünōg hāpkummuk tix. 'Üpēnā', 'ünōy nūn.

Mīxux xop tut kaxyähā' yā' 7

¹⁵ Ha ta' xip pexkox yōg nū'kutnā'ax nōy, yā pexkox yōg mōkutnā'ax 7, tu mīxux xop tut kaxyähā', ha ta' yīy ka'ok pexkox tu', hu:

—Yümüg xuxyā xexka te' xohix xat, yā Kunnix te' xat hāpxexka xohix yōg xexka xop, xix yōg tikmū'ün, tu nōm xat putup hām yāxatamuk xohix kux 'ohnāg hā. Kaxīy.

¹⁶ Ha ta' pip tik xexka te' 24 pexkox tu', tu' xexka xop yōg mīmpe mām'ax yīmū' mām, tu ta' yok, tu Topa pu nūktettex,

¹⁷ tu:

—Topa xexka', 'āka'ok, yā 'āxip mōkuma'āmōg hōnhā xix hōmā. 'Āmax, 'āka'ok xexka', tu hōnhā 'āxexka', yā tikmū'ün xohix xat kōnāmāhā'.

¹⁸ Ha Topap-tup nōg xop 'ügäy xexka', yā' yūmmüg 'ägäy hōnhā, tu xakix xop yōg hāpxorp mā'ax kopit putup. Nōmhā xate 'ōg kāmānat xop pu hāpxorp mā maxp-tup, xix tik te 'āpupi hām'aktux xop pu hāpxorp mā maxp-tup, tu 'ōg tikmū'ün pu hāpxorp mā maxp-tup, nōm te 'āyīpkutuk, yā' xexka xop xik-tōgnāg xop. Nōmhā xate' koxyöy putup nōm te hām xexka koxyöy. Kaxīy.

¹⁹ Ha ta' xōn Topa pet xexka pexkox kopah, pa' pēnāhā 'ükopa Topa yōg pa'ax yōg mīpkox. Ha ta yānām kō'āynām, ha tex tinnā xe xexka', tu tex xap nū'nāhā', ha ta hām xexka nuhuk penunehok.

12

'Ühün xix xok xexka 'āta'

¹ Ha 'āte' pēnāhā', pa' xip 'ühün, ha hāpxorp māhā'. Yümū'āte' pēnāhā', hu' yūmmüg hāpxorp mā'ax nūn putup. 'Ün te māyōn tat, yā topixxax putuk, ha māyōn hex xip 'üpata kakah, ha māyōnnāg te' 12 te yōg kuxxax putuk.

² 'Ün tek-tok xuk, tu' put putūmnāg, hu' xūy, hu' potaha'.

³ 'Āte 'ün pēnāhā', pa' xip xok xexka 'āta', tu': Kēm. Yā' xexka nām, pa kakxexka putuk. 'Üp-tox xohix te' 7, tup-tox kup xohix te' 10, ha' xat'ax xexka yōg kuxxax te' 7 pip 'üp-tox xohix yīmū'.

⁴ Xok xexka 'āta te' nāgkup hā' paha māyōnnāg yāg puxet, ha' yāg tix pop 'ohnāg, tu hām xexka tu' mō nōy yōn, ha mōktu: Po. Kaxīy. Ha 'ün tek-tok put putup, ha ta' nūn xok xexka 'āta, tu nūktu 'ün keppa' xip, nūy kutok mā',

⁵ ha 'ün tek-tok pit put, yā-tok te hām xexka yōg tikmū'ün xohix xop xat putup, yā pipkup tox xexka hā' xat putup, yā' xat ka'ok putup. 'Ük-tok put, ha hāpxip 'ohnāg ha ta 'ōm xip, tuk-tok paha', tu nōm mōgāhā pexkox tu', yā Topa ha' mōg xix Topa yōg mīmpe yūm'ax xe'ēgnāg tu'.

⁶ Ha ta 'ün mōxupaha' hām nak tu'. Yā Topa te 'ün pu' xip'ax mīy. Ha Topa te nō tehe 'āmnīy xohix te' 1260 hā.

⁷ Ha ta' yāy kix kakīynāg pexkox tu' Mīget mütik xok xexka 'āta xix Mīget yōg pexkox yōg nū'pok xop mütik.

⁸ Nōm te xok xexka 'āta putyōn pexkox künāpa'.

⁹ 'Ü'üm xok xexka 'āta'? Yā Hāmğäyāgnāg, yā Xatanāy. Yā tute hām xexka yōg xohix xop pu' koit pax. Yā' putyōn pexkox künāpā', xix yāy yōg pexkox yōg nū'pok xop, yā yōg xape xop, ha' yīxohoh, tu nūktu hām xexka tu' mōxoha'.

¹⁰ Ha 'āte' xupak, pa' yīy ka'ok pexkox kopa hu:

—Hōnhā Topa te tikmū'ün mōy hāpkummuk kopah. Hōnhā tikmū'ün te' pēnāhā 'ūka'ok Topah, yā' xexka'. Hōnhā Topa yōg Kunnix te' xohix xat! Hamün, hōmā Hāmğäyāgnāg xip pexkox tu', tu Topa mütik hām'aktux, hu: "Topa kopa kuxa mām xop te hāpkummuk mīy." Kaxīy. Yā 'āmnīy xohix hā hām'aktux te kaxīy xix hāptup xohix hā. Pa' putyōn pexkox künāpah.

¹¹ Hōmā ha ta yümüg xape xop te' xut, ha ta Hāmğäyāgnāg te' xut 'ohnāg. Yümüg xape xop te' xut Kuhnēn Kutok hep 'āta hā xix hām'aktux xe'e hā, tu' xakix yīpkutuk 'ohnāg.

¹² Pexkox yōg xop, 'āpu 'ākuxa hittup! Pa hām xexka tu' kummuk xexka' xix kōnāg xexka tu', yā Hāmğäyāgnāg te hām xexka tu' xupep. 'Üğäy xexka'. Tute' yūmmüg hāpxip kutōgnāg puxix tu' kux. Kaxīy.

¹³ Ha xok xexka 'āta te' pēnāhā', yā hām xexka tu' xip. Pa' xip 'ühün, tuk-tok pit put. Ha ta 'ün yīnnāhā' xok xexka te'.

¹⁴ Pa 'ōm xip, tu 'ün pu' yīmāg tix popmāhā', yā' xexka 'üyīmāg, yā mōmōka yīmāg putuk. Ha ta topaha pepix 'ühün, tu' mōg, tu mōktu' xupep hām nak tu', ha' nōm nōy te 'ün hā' tehe' hām yāxa'amuk tikoyuk

xix xahix hã, ha xok xexka 'ãta te' xũygã 'ohnãg.

¹⁵ Yã xokxexka 'ãta yĩkox kopa' xupep kônãgkox, nũy 'ün mögã'.

¹⁶ Pa hãpxexka te 'ün hã' tehe', tu yã pot, ha kônãg te hãpkox hã mö'nãhã',

¹⁷⁻¹⁸ yĩy ta' gãy xok xexka 'ãta', tu ta' mög, nũy yãykix 'ün xupepmã xop mütik, xix Topa yög xat'ax mĩy xop xohix mütik, xix Yeyox yög hãm'ãktux xe'e 'ãpak xop mütik, tu' xip hãm kux tu' xok xexka 'ãta'.

13

Xok xexka tix

¹ 'Äte' pẽnãhã', pa' xip xok xexka nõy, ha' xip kônãg xexka kopah, tu' xupep, tu ta' mög, tup-tox kup xohix te' 10, tup-tox xohix te' 7, ha xat'ax xexka yög kuxxax te' 10 tat 'üp-tox kup te' 10 yĩmũ', ha xuxet'ax kummuk kax'ãmi 'üp-tox yĩmũ'.

² Yã xok xexka te neppat putuk, yã hãmgãy kōmnãg putuk, tu' pata te 'ux pata putuk, tu' yĩkox te xoktut yĩkox putuk. Ha xok xexka 'ãta te xok xexka xexkanãhã', tu ka'ogãhã', pu' xat.

³ Pa xok xexka putox puxet xok putuk, pa hãpxip 'thã' hittup, yĩy ta' yẽy hãm xexka yög tikmũ'ün xohix, hu xok xexka putup, hu' pe' mög,

⁴ tu xok xexka pu nũktettex. Hamũn, xok xexka 'ãta te xok xexka xexkanãhã', tu' ka'ogãhã', ha tikmũ'ün te xok xexka pu nũktettex, tu:

—Yã xe'ẽgnãg xok xexka'. Yã' ka'ok xexka'. Tep-te yãykix putup xok xexka mütik? Yã yãykix putup'ah. Kaxĩy.

⁵ Ha' tux hok, ha xok xexka te hãm'ãktux kummuk xexka mãyõn' ãnuk xohix te' 42 hã, tu' xat pax kamah,

⁶ tu Topa 'ãktux kummuk kōnãmãhã', xix Topa yög xip'ax 'ãktux kummuk, xix pexkox tu' pip xop 'ãktux kummuk.

⁷ Ha ta' tux hok, ha xok xexka te yãykix Topa kopa kuxa mãm xop mütik, ha xok xexka te' xut. Ha' tux hok, ha xok xexka te' xat 'ũhep xop xohix, xix hãpxexka xohix yög xop, xix 'ũyĩy'ax xohix yög xop, xix xop xohix.

⁸ Hãm xexka yög xohix xop te xok xexka pu nũktettex. Hõmã ha ta hãm xexka xip'ah, ha Topa te yãy yög xop 'ãxet'ax kax'ãmi', yã Topa kopa kuxa mãm xop 'ãxet'ax kax'ãmi yãy yög tappet kopah, pu tu hi xe'e, ha' kux 'ohnãg, yã Kahnẽn Kutok yög xop nõ'õm. Yã tikmũ'ün te Kahnẽn Kutok putex. Pa' nõy xop pip, ha' xuxet'ax kax'ãmi 'ohnãg nõm tappet tu'. Nõm xohix te xok xexka pu nũktettex.

⁹ 'Äyĩpkox pip, 'ãpu xupax.

¹⁰ Topa te' xat, puxix tikmũ'ün Topa kopa kuxa mãm xop pop putup, nũy mögã yãy yög hãm tu'. Pa Topa te' xat hok, puxix nõm

mögã hok. Topa te' xat, puxix tikmũ'ün Topa kopa kuxa mãm xop kix putup mĩkax xexka hã. Pa' xat hok puxi' kix hok, yĩy ta' max, pu Topa kopa kuxa mãm xop Topa tu' pip ka'ok, nũy 'ũkuxa mãm ka'ok.

¹¹ Ha 'äte' pẽnãhã', pa' xip xok xexka nõy, tu hãm kopa' xupep, tu' xip, yã 'üp-tox kup tix, yã Kahnẽn Kutok putox kup putuk, tu hãm'ãktux te xok xexka 'ãta yög hãm'ãktux putuk.

¹² Xok xexka yã' xexka', yã' xat'ax ka'ok, yã xok xexka mãxap te nõm xexka mĩy, ha nõm te xok xexka mãxap pu' hãm xopmãhã', tu' xat, pu hãm xexka yög xohix xop te xok xexka mãxap pu nũktettex. Yã hõmã xok xexka mãxap yög kayax xexka xip, tu' xok putũmnãg, pa' hittup mõ'ka'ok.

¹³ Ha xok xexka te hãpxop ka'ok xe'ẽgnãg mĩy, yã kuxap xãnãhã', ha pexkox kopa' xupep kuxap, tu nũ'nãhã', tu nũktu hãm tu: Po. Kaxĩy. Ha tikmũ'ün xohix xexka te' pẽnãhã'.

¹⁴ Yã xok xexka te hãpxop ka'ok xe'ẽgnãg mĩy, yĩy tikmũ'ün kuxa mãm xok xexka kopah. Xok xexka te' koit, yĩy tikmũ'ün kuxa mãm koit'ax kopah. Xok xexka te hãpxop ka'ok xe'ẽgnãg mĩy xok xexka mãxap kep-pah, tu tikmũ'ün xat, pu topa komut mĩy, yã xok xexka mãxap putuk. Hãmũn 'ünõy te xok xexka mãxap xuhmĩy mĩkax xexka hã, pa' hi'.

¹⁵ Topa te' tux hok, ha xok xexka te xit xok topa komut kopah, yĩy ta' hi', hu hãm'ãktux, tu' xat, pu' kix nõm te topa komut pu nũktettex 'ohnãg.

¹⁶ Tu' xat pu kax'ãmi hãm xexka yög tikmũ'ün xohix yĩm xe'e tu', xi' kux tu'. Yã tikmũ'ün xohix xat te kaxĩy, yã kutõgnãg xop xix xexka xop, xix 'üp-texop xexka xop, xix hok xop, xix kãmãnat xop, xix xat'ax xop. Yã' xohix.

¹⁷ 'ũkax'ãmi'ax xip 'ohnãg, puxix hãpxop hãmenex 'ohnãg. Yã' kax'ãmi xok xexka 'ãxet'ax, pe xok xexka yög xohix texĩy.

¹⁸ 'ãpu hãm yũmmũg. Hãm yũmmũg, xayĩy yũmmũg putup texĩy xok xexka yög xohix texĩy. Yã tik yög xohix texĩy. Yã' 666.

14

Topa yög xop tek-tex'ax tup hãk-tex

¹ 'Äte' pẽnãhã', pa' xip Kahnẽn Kutok yĩktix Xiãm yĩmũ', ha ta' pip tikmũ'ün xohix te' 144.000, ha yũmũg 'ãtak Topa xuxet'ax kax'ãmi pip 'ũxohix kux tu'.

² 'Äte' xupak, pa' xip 'ũyãnmũn xupep'ax pexkox tu', yã xamoka xexka te hãm nãhũn putuk, xix tex fĩnnã xexka putuk, xix 'ap kaxyã'ax putuk.

³ Ha tikmũ'ün te 144.000 te pẽnãhã nõm te mĩmpe yũm'ax xe'ẽgnãg yĩmũ' yũm, xix yõnnã'i te' 4, xix tik xexka'. 'ũxohix tek-tex'ax tup hãk-tex, yã Topap-tup pax xop te' yũmmũg nõm kutex tup, pa' nõy te' yũmmũg

'ohnäg. Topa te nôm kuxa mām xop pop, yā Topa yōg tikmū'ūn,

⁴ yā nôm kuxa tup, tu 'ūn mūtik xon-nix 'ohnäg, yā' tup, tu Kahnēn Kutok pe' mōg. Hōmā nōm te hām xexka yōg xohix xop mūtik yāy kotinnāhā', ha Topa te nôm yīmōgātux, tu nôm pop, yā Topa yōg xop xix Kahnēn Kutok yōg xop.

⁵ Yā nôm xop te' koit'ohnäg, yā hāpkummuk mīy 'ohnäg.

Topa yōg nū'pok'ax tikoyuk te hām'āktux

⁶ 'Āte' pēnāhā', pa' xip pekkox yōg nū'kutnā'ax nōy, tu topaha', tu pepi' mōg, tu Topa yōg hām'apak max'ax 'āktux, nūy hām xexka yōg xohix xop pu nōm 'āktux, yā xop xohix pu', xix hep xohix pu', xix yīy'ax xop xohix pu', xix hāpxexka xohix yōg xop pu'. Yā Topa yōg hām'apak xip ka'ok, tu yōg hāmyāxatamuk xohix kux 'ohnäg.

⁷ Pekkox yōg nū'kutnā'ax te hām'āktux ka'ok, hu:

—'Āpu Topa yīpkutuk, nūy Topa xexka 'āktux max. Hamūn, hāpxip kutōgnäg 'hā Topa te tikmū'ūn xohix yōg hāpxopmā'ax kopit putup. Yā hōmā tute' mīy pekkox xix yāykoteh, xix hām xexka', xix kōnäg xexka', xix kōnäg xupep'ax xohix. 'Āpu Topa pu nūktettex. Kaxīy.

⁸ Pekkox yōg nū'kutnā'ax te' nōy te māxap pe' mōg, tu:

—'Ūkoxyōy, ha' nōg kōmēn xexka Mam-inōn. Maminōn xexka yōg tikmū'ūn te hām xexka yōg tikmū'ūn xohix mōgāhā', pu tu nōy hā xupxet, yā' kummuk, yā xupyāg xūy xexka putuk.

⁹ Ha pekkox yōg mō'kutnā'ax nōy xape tix pe' mōg, tu hām'āktux ka'ok, hu:

—Tep-te xok xok xexka pu nūktettex xix xok xexka yōg komut pu nūktettex? Tep-te' paha xok xexka yōg kax'āmi 'ūkux tu', xix 'ūyīm tu'?

¹⁰ Yā nōm te' pop putup Topa yōg gāy'ax xexka', yā xupyāg xūy xexka pop'ax putuk, yā' xūy xexka 'ūkuxa kopah, yā 'ūxop yōg kuxap kopah,

¹¹ tu' xūy pip hāmyāxatamuk xohix kux 'ohnäg hā, 'hā kugōy te pepi' mōg. Ha' xūy kux 'ohnäg hāptup 'hā xix 'āmnīy 'hā'. Yā' xūy nōm xop, yā xok xexka pu nūktettex xix xok xexka yōg komut pu nūktettex, tu' pop xok xexka 'āxet'ax kax'āmi'. Kaxīy.

¹² 'Ūmax, pu' kuxa mām xop te Topa yōg putat kopa' pip ka'ok, yā Topa yōg xat'ax mīy xop, yā Yeyox tu' pip ka'ok xop.

¹³ Ha 'āte' xupak, pa' xip yānmūn xupep'ax pekkox tu', tu:

—'Āpu kax'āmi nūhū', tu: "Ūkuxa hittup nōm te yūmūg xuxyā Yeyox mūtik mōg 'hā' xaxix." Kaxīy

Ha Topa Koxuk te:

—Hamūn. Hōmā 'ūhām ka'ok, pa nū'yāynōynäg putup pax putup, ha yōg hāpxopmā'ax max mōg putup nūmūtik. Kaxīy.

Mō' put yōn hām xexka yōg tikmū'ūn

¹⁴ Ha 'āte' pēnāhā', pa' xip hāmgōy xexkam-nok, ha 'ōm te' yīmū' yūm, yā tik putuk, tu' xat'ax xexka yōg kuxxax tat, yā pipkup yānām 'āta yixux hā' mīy 'ūkuxxax, ha' xip kupukhe xexka 'ūyīm kopah.

¹⁵ Ha pekkox yōg nū'kutnā'ax nōy te Topa pet xexka kopa' xupep, tu hām'āktux ka'ok 'ūnōy pu', yā nōm te hāmgōy xexka yīmū' yūm, hu:

—'Āpu 'ōg kupukhe xexka pa'. Mōg, nūy hāpxop xohix put. Hamūn, hōnhā yā hāptup xe'e'. Hām xexka yōg tikmū'ūn xohix te mīnta ta putuk. 'Ūmax, xayīy nōm put hōnhā'. Kaxīy.

¹⁶ Ha nōm te hāmgōy xexka yīmū' yūm, tu yōg kupukhe xexka paha', tu mō' put yōn hām xexka yōg, tu' put hām xexka yōg tikmū'ūn.

¹⁷ Ha 'āte' pēnāhā', pa' xip pekkox yōg nū'kutnā'ax nōy, tu pekkox yōg Topa pet xexka kopa' xupep, ha' xip kama 'ūyōg kupukhe xexka xox max.

¹⁸ Ha ta' xip pekkox yōg nū'kutnā'ax nōy. Tute kuxap pēnāhā, yā xokxop mō'hap'ax yōg kuxap Topa pet xexka kopah, tu xokxop mō'hap'ax yīka' xupep, tu hām'āktux ka'ok 'ūnōy pu', yā nōm te kupukhe xexka xox max mūg, yā nōm pu hām'āktux, hu:

—Mōg, nūy 'ōg kupukhe hā put mīnta 'op hām xexka yōg. Hamūn, yā' ta'. Kaxīy.

¹⁹ Ha ta' mōg, tu kupukhe mō' put yōn hām xexka tu', tu mīnta 'op mep, tu mō' nōm yōn hāpxop hep xut'ax kopah, yā Topa 'ūgāy, ha tikmū'ūn koxyōy putup.

²⁰ Yā mīnta 'op hep xut kōmēn kūnāpa', ha tikmū'ūn hep 'āta xupep, tu puxhep xexka mīy, 'ūxexka te' 300 mēn putuk, xi' xet te mēn puxet xix xahix putuk.

15

Pekcox yōg nū'pok xop te hāpxūyā'ax tat

¹ 'Āte' pēnāhā', pa' pip pekkox yōg nū'pok xohix te' 7 pekkox tu', tu hāpxūyā'ax te' 7 tat, yā ka'ax, yā Topa gāy kux putup. Yā 'āte' pēnāhā hāpxop xe'e xaptop.

² 'Āte' pēnāhā', pa' xip kōnäg xexka', yā xunnuk te minino putuk, xix kuxap mūtik yāykofinnā'ax putuk. 'Āte' pēnāhā', pa' pip nōm te' xut xop, pa xok xexka te' xut 'ohnäg, xix yōg komut te' xut 'ohnäg, xix nōm te xok xexka yōg xohix texīy'ax tat, yā 666 kax'ami nōm yīmū', yā' xut 'ohnäg. Ha nōm te' xut xop pip kōnäg xexka yōg hām kux tu', yā kōnäg xexka te minino putuk yōg. Nōm te'

xut xop te 'ap mûg, nûy nôm kaxyâ'. Yâ Topa te tu' popmâhâ',

³ hak-tex Mõyyex yôg kutex, yâ Mõyyex te Topa pu' hâpxopmâ max. 'Ûk-tex kama Kahnên Kutok yôg kutex, tuk-tex, hu:

—Topah, 'âxexka, tu' xohix xat. Xate hâpxopmâ max xe'ëgnâg. 'Âmûn yâ hâpxexka xohix yôg tikmû'ûn yôg xat'ax xexka'. Xate hâpxe'e mîy, yâ hâpxopmâ xe'e'.

⁴ Tep-te 'âyîpkutuk 'ohnâg? Tep-te 'âmax xe'ëgnâg 'âktux putup'ah? 'Âp-xet yâ 'âkuxa tup xe'ëgnâg, ha hâpxexka xohix yôg tikmû'ûn nûn putup, nûy xa nûktettex. Hamûn, xate hâpxe'e mîy, ha' xohix te' pênâhâ'. Kaxîy.

⁵ Hâpxip 'Ihâ 'âte' pênâhâ', pexkox xôn, pa' xip Topa pet xexka', yâ topixxax ka'ok hâ' mîy. Topa xip, ha nômte tikmû'ûn te Topa yûmmûg.

⁶ Ha ta Topa pet xexka kopa pexkox yôg nû'pok te' 7, tu hâpxûyğâ'ax te' 7 tat, tu topixxax tup 'ânuک tat, yâ topixxax nûn, tu' tat 'ûkote hîy'ax, yâ pipkup yânâm 'âta yîxux hâ' mîy.

⁷ Ha ta' pip nôm yônâ'î te' 4, ha ta yâp-xet te pexkox yôg nû'pok te' 7 pu' popmâhâ 'âmuک xak'ax xohix te' 7, yâ pipkup yânâm 'âta yîxux hâ' mîy. 'Âmuک xak'ax hâ nû'xîmnâg Topa gây'ax, yâ Topa xip hâmyâxatamuک xohix kux 'ohnâg hâ.

⁸ Ha ta' xip Topa yây pet kopah, ha' pet hâ nû'xîmnâg Topa yôg hâmmax xe'ëgnâg xî' yôg ka'ok'ax, yîy ta nû'xîmnâg kugöy hâ. Ha tikmû'ûn te' mōxakux yûmmûg 'ohnâg, ha mōktu' kux hâpxûyğâ'ax te' 7. Yâ pexkox yôg nû'pok te' 7 te nôm xat. Hak-nây tu' tikmû'ûn te mōxakux putup.

16

'Âmuک xak'ax kopa' pux Topa yôg gây'ax

¹ 'Âte' xupak, pa' xip yânmûn xupep'ax ka'ok Topa pet xexka kopah, tu pexkox yôg nû'pok xop pu hâ'm'âktux, hu:

—Môg, nûy 'âmuک xak'ax kopa' pux Topa gây'ax hâpxexka tu'. Kaxîy.

² Ha ta' môg pexkox yôg mōkutnâ'ax mâxap, tu' yôg 'âmuک xak'ax kopa' pux hâm xexka tu', ha ta' pip kayax kummuk xexka tikmû'ûn yôg. Yâ nôm yîmû' pip xok xexka yôg kax'âmi, ha nôm te topa komut pu nûktettex.

³ Ha ta' môg pexkox yôg nû'kutnâ'ax nôy, yâ' tîx, tu' yôg 'âmuک xak'ax kopa' pux kônâg xexka tu', ha ta kônâ'âg te yâyhâ hep 'âta, yâ' xakix xop yôg, yîy ta' xakix kônâg kopa hi xop xohix xexka'.

⁴ Ha ta' môg pexkox yôg nû'kutnâ'ax nôy, yâ tikoyuk, tu yôg 'âmuک xak'ax kopa' pux kônâg kox tu', xix kônâg xupepe'ax tu' yîy ta kônâg te yâyhâ hep 'âta'.

⁵ 'Âte' xupak, pa' xip pexkox yôg nû'kutnâ'ax, yâ nôm te kônâg pênâhâ'. Tute:

—Topa 'âmax xe'ëgnâg. Xate hâpxe'e mîy, tu hâpkummuk mîy'ax yânân. 'Âmax xe'ëgnâg. 'Âxip hōnhâ xix hōmâ.

⁶ Hamûn. Tikmû'ûn te Topa kopa kuxa mâm xop xuhmîy, xix Topa pupi hâ'm'âktux xop xuhmîy, ha' hep 'âta nû'nhâhâ', yîy ta xate tikmû'ûn pu' hōm hep 'âta', pu' xo'op. Yâ' yânân. Kaxîy.

⁷ 'Âte' xupak, pa' xip yânmûn xupep'ax xokxop mō'hap'ax tu', tu hâ'm'âktux, hu:

—Topah, 'âxexka', 'âka'ok. Xate tikmû'ûn yôg hâpxopmâ'ax kopit max, yâ' xe'e', yâ' yok. Kaxîy

⁸ Ha ta' môg pexkox yôg nû'kutnâ'ax nôy, yâ' 4, tu yôg 'âmuک xak'ax kopa' pux mâyōn tu', yîy ta' pukpex xexka', ha Topa te' xat, pu tikmû'ûn xax mō'hap.

⁹ Hâmpukpex xexka te tikmû'ûn xax mō'hap, ha nôm te:

—Yâ' kummuk xexka Topah. Kaxîy.

Yâ Topa te' xat, pu' xûyğâ'. Pa nôm te yôg hâpkummuk mîy'ax kux 'ohnâg, tu Topa xexka 'âktux max 'ohnâg.

¹⁰ Ha ta' môg pexkox yôg nû'kutnâ'ax nôy, yâ' 5, tu yôg 'âmuک xak'ax kopa' pux xok xexka yôg mîmpe yûm'ax xe'ëgnâg tu', yîy ta hâpkoxtap xok xexka yôg tikmû'ûn yôg pip'ax tu', ha tikmû'ûn te yây yôyxôg putop, 'ûxûy xexka tu'.

¹¹ tu:

—Pexkox yôg Topah, 'âkummuk xexka'. Xatek müg xûyğâ pax, tuk mü'â kayax popmâhâ'. Kaxîy.

¹² Ha ta' môg pexkox yôg nû'kutnâ'ax nôy, yâ' 6, tu yôg 'âmuک xak'ax kopa' pux kônâg kox 'Eppanat tu', yîy ta' nak. Nômhâ' xip putat nak, pu'yîy hâ'm tu mâyōn xupep tu' nûn 'ûxexka xop.

¹³ Ha 'âte' pênâhâ, pa' pip yâmîy yây'îgâhnâg tikoyuk, yâ hupnâg putuk, tu' pip xok xexka 'âta yîkox kopah, xix xok xexka yîkox kopah, xix Topa pupix hâ'm'âktux mō'âmû'ax xop yîkox kopah, tu ta' môg.

¹⁴ Yâmîy kummuk te hâpxopmâ ka'ok xe'ëgnâg, tu ta' môg hâm xexka yôg xat'ax xexka xohix xop hah, nûy nôm yây tu nû'xoh, pu'yîy yâykix kakhîhnâg Topa ka'ok xexka yôg hâptup 'ihâ'.

¹⁵ "Ûg'âpax: 'ûgnûn putup, yâ xupxet nûn putuk. 'Âpu 'âpa ka'ok, nûy hâmpênâ'. 'Âpu 'âxax xix 'âyîkâgnâg hâ nû tat mō'ka'ok, nûy 'âxax top hok, nûy yâyhâphup hok. Xate' mîy, nûy ta 'âkuxa hittup." Kaxîy.

¹⁶ Hâpxip ha ta yâmîy te yây tunû'xoh 'ûxexka xop hâpxexka tu', yâ' xuxet'ax 'Ahmâget hâpxexka', yâ Yoneo yîy'ax te kaxîy.

¹⁷ Ha ta' môg pexkox yôg nû'kutnâ'ax nôy, yâ' 7, tu yôg 'âmuک xak'ax kopa' pux pexkox

yokoma tu'. Ha ta Topa pet xexka kopa' xip yānmūnxupep'ax, tu:

—Puxix. 'Ūkux. Kaxīy.

¹⁸ Ha yānām kō'āynāg, ha hāmānhūn, ha tex tīnnāhā', ha hām xexka yāy nuhuk xexka', tu yāy pot. Yā hām yāy nuhuk xexka nām. Hōmā Topa te' mīy tihik hāmāxap xix hōnhā hām yāy nuhuk kutōgnāg, pa nōmhā hām yāy nuhuk xexka nām.

¹⁹ Ha ta kōmēn yāy koxip tikoyuk. Ha ta koxyoŷ hāp xexka xohix yōg kōmēn xohix. Ha Topa te kōmēn Maminōn xexka pe'paxex, tu' gāy xexka', tu yōg tikmū'ūn xūyghāhā'.

²⁰ Ha ta' nōg hāp tox xohix kōnāg yōg xix yīktix xohix.

²¹ Ha ta pexkox tu' pip tēxxap xexka', tu ta nū'nāhā tēxxap xexka', yā yāp-xet nō hāp-tux ha' 40 kit. 'Ūnū'nāhā', tu nūktu tikmū'ūn tu nū'nāhā', ha tikmū'ūn te:

—'Ūkummuk xexka Topah. Kaxīy.

Hāmūn, 'ūxūy xexka', yā hāpkummuk, yīy Topa 'āktux kummuk.

17

Xotit xexka'

¹ 'Ūkxip, pa' nūn pexkox yōg nū'kutnā'ax, nōm xip 'ūxape xop te' 7 kopah, yā hōmā 'āmuk xak'ax te' 7 tat. 'Ūnūn tu nūktu:

—Mā. 'Āte xa mūg putup 'ūxūyghāp-tup xotit xexka', yā kōmēn, yā kōnāg kox punethok puka' pip.

² Ha hām xexka yōg xat'ax xexka xohix xop te xotit xexka mūtik yāy kute'ex, tu hāpkummuk xexka mīy nūmūtik, yā' paptux putuk. Kaxīy.

³ Ha Topa Koxuk tek mōgāhā', ha ta pexkox yōg nū'kutnā'ax tek tat hām nak tu', ha 'āte' pēnāhā', pa' xip 'ūhūn, tu kāyā xexka 'āta yīmū' yūm, yā kāyā xexka 'āta yīmū' pip kax'āmi'ax kummuk punethok, yā xuxet'ax kummuk kax'āmi, yā kāyā xexka putox te' 7, tup-tox kup te' 10.

⁴ Ha 'ūn te topixxax 'āta tat, tu' tat xapmax, xix yīm hī'ax, xix yīpkutok tat'ax, xi' yīpkox xap, xix patakup hīy'ax, yā' xohix te pipkup yānām 'āta yīxux hā' mīy, xix mīkaxxap te takat hā' mīy, xix xupxat xap hā' mīy. Tute' tat kānēy, yā pipkup yānām 'āta yīxux hā' mīy, ha kopa' pip hāp xop punethok yāyīgāhnāg xi' xut putux, yā 'ūyōg hāpkummuk mīy'ax yōg hāp xop.

⁵ Ha' kux tu' pip 'ūkax'ami 'ūxuxet'ax xap-top'ax, hu: "Kōmēn Maminōn Xexka', yā xotit xop mūktut, xi' kummuk xop mūktut hām xexka yōg." Kaxīy.

⁶ 'Āte' pēnāhā' 'ūn paptux, yā Topa kopa kuxa mām xop hep 'āta xo'op. Ha Yeyox tu' pip ka'ok, yīy ta' nōy te' kix.

Ha 'āte' pēnāhā', yā 'ūn kummuk. 'Ūgkuxa te' yēy.

⁷ Ha' nūn pexkox yōg nū'kutnā'ax, tu 'ā' yīy kopit, hu:

—Xate xīy tu 'ākuxa te' yēy? 'Āte xa hām yūmmūghāp-tup. 'Ūhūn xix kāyā xexka', yā nōm te 'ūn tat, yā nōm putox te' 7 xix putox kup te' 10.

⁸ Xate' pēnāhā kāyā xexka'. Hōmā 'ūhi', pa' xok. Tute hāp xox tox xexka kopa' xupep putup, ha ta' nōy tep-tex putup. Ha ta' nūn putup tikmū'ūn. Hōmā xip'ah hām xexka', 'Īhā nōm tikmū'ūn yōg 'āxet'ax kax'āmi 'ohnāg 'ūhi'ax yōg tappet kopah, putu hi xe'e, ha' kux 'ohnāg. Nōm nūn putup, tu' pēnāp-tup kāyā xexka xok, hu' yēy. Hōmā 'ūhi', tuk-nāy tu' xok, pa hāpxip 'Īhā putpu' xip'ax.

⁹ —'Āpu hām yūmmūg. 'ūp-tox te' 7 te yīktix te' 7 putuk, ha 'ūn te yīktix te' 7 yīmū' yūm. 'ūp-tox te' 7 te tikmū'ūn yōg xat'ax xexka te' 7 putuk,

¹⁰ tu' xat'ax xexka te' 5 xakix, ha hōnhā yāp-xet 'ūxexka', tu' tikmū'ūn xat, ha' nōy xexka nūn putup, tu hāpxip 'Īhā' xip'ax.

¹¹ Ha ta kāyā xexka', yā 'ūxat'ax xexka nōy, yā' 8. Hōmā' xip, pa hōnhā' xip 'ohnāg. Yā' xip 'ūxape xop te' 7 kopah. 'Ūnōy tep-tex putup.

¹² —Ha xate' pēnāhā 'ūp-tox kup te' 10, nōm te' xat'ax xexka te' 10 putuk, tu hāpxip nōm te tikmū'ūn xat putup. Yā Topa te' xat putup, ha nōm te tikmū'ūn xat putup kāyā xexka mūtik hāpxip kutōgnāg hā,

¹³ tup-tup hāp xop puxet. 'Ūp-tup, nūy kāyā xexka xexkanā',

¹⁴ tu' yāy kix putup Kahnēn Kutok mūtik, pa Kahnēn Kutok te' xut putup, xix Kahnēn Kutok te nōm xānā'ax xop te' xut putup, yā yōg yīmōgātux xop, yā nōm te Kahnēn Kutok tu' pip ka'ok. Hamūn te' xut putup. Kahnēn Kutok, yā xuxyā xop yōg xuxyā', xix xat'ax xexka xop yōg xat'ax xexka'. Kaxīy.

¹⁵ Ha pexkox yōg nū'kutnā'ax te 'ā hām'āktux 'ūxeheh, hu:

—Pute 'ūm kōnāg kox xohix xotit te nōm puka' yūm? Yā hām xexka yōg xop xohix xexka', yā tikmū'ūn xop xohix, yā' hep xop xohix, yā' yīy'ax xop xohix.

¹⁶ Xate' pēnāhā 'ūp-tox kup te' 10 xix kāyā xexka pēnāhā'. Nōm te xotit putup nōg putup. Nōm te' pop putup 'ūyōg hāp xop xohix, ha' xax top'ax, tu xotit yīn māp-tup, tu kuxap hā' koxyoŷ putup.

¹⁷ Hamūn, Topa te' xat, ha tikmū'ūn te kāyā xexka 'āta yōg xat'ax mīy, yā tikmū'ūn tep-tup, yā Topa te' xat.

¹⁸ —Xate' pēnāhā, yā' xip 'ūhūn. Yā 'ūn te kōmēn putuk, ha kōmēn kopa' pip tihik, tu nōm te hām xexka yōg xat'ax xexka xop xat putup. Kaxīy.

18

Ūkoxyōy kōmēn Maminōn

1 Hāpxip ʾhā 'āte' pēnāhā', pa' xip pexkox yōg nū'kutnā'ax nōy, tu pexkox kopa' xupep, tu ta yīxohoh, yā' xexka', tu' xat punethok, ha hām xexka yōg tikmū'ūn xohix te' pēnāhā', yā' max xe'ēgnāg,

2 tu hām'āktux ka'ok, hu:

–Ūnōg, yā kōmēn Maminōn xexka 'ūnōg. Hōnhā yā yāmīy pet xix yāmīy yāy'īgānāg pet, xix putux kummuk yāy'īgānāg pet.

3 Hōmā tute tikmū'ūn mōgāhā', puyīy hāpkummuk xut putux mīy, ha hām xexka yōg xat'ax xexka xop te' nōm nūmūtik, ha tikmū'ūn te yāy hām texop xexka', tu' nōmenex kōmēn Maminōn xexka yōg hāpxop xohix. Kaxīy.

4 'Āte' xupak, pa' xip yānmūn xupep'ax pexkox tu, tu hām'āktux hu:

–Yōgnū tikmū'ūn, mā, 'āpu kōmēn nīm! Mōg! 'Āpu hāpkummuk mīy hok nūmūtik, nūy 'āxūy hok nūmūtik.

5 Yā 'ūyōg hāpkummuk mīy'ax punethok, tu' xexka te yīktix putuk,

tu yīktix xanep te pexkox xuhmīy, ha Topa te yōg hāpkummuk mīy'ax 'ātigāhā'.

6 Kōmēn yōg xop te 'āxop kute'ex kummuk. 'Āpu' yānān.

'Āpu' yānān tix.

Kōmēn yōg xop te 'āxop xūyghāhā'. 'Āpu' yānān, nūy nōm xūyghā tix.

7 Kōmēn yōg xop te yāy xexka mīy, tu yāy putexop xexka mīy. 'Āpu nōm xūyghā xexka', yā' kummugā xexka'.

Hamūn, kōmēn yōg xop te yāy mūtik hām'āktux, hu:

“Ūgmūg, yāg ka'ok, yā' xohix xat.

'Ap hok yūm'ah 'ūgmūn.

'A 'āte hāpkummuk pēnāp-tup'ahl' Kaxīy.

8 Pa 'āmhok. Tute hāpkummuk mīy, yīy ta' nūn mōka'ok hāpkummuk 'āmīy puxet ʾhā. Yā' xakīp-tup, tu' kuxa hittup 'ohnāg putup, tu putup te kix putup,

ha kuxap te' koxyoūy putup.

Yā' ka'ok Topa xexka', tu' nōy yōg hāpkummuk mīy'ax yānān.

Kaxīy.

9 Ha hām xexka yōg xexka xop te hāpkummuk mīy nūmūtik, ha kōmēn mō'hap, ha kugōy te pepi' mōg, ha xat'ax xexka xop te' pēnāp-tup, tu' potap-tup, tu' kuxa hittup 'ohnāg putup,

10 tu' xūy yīpkutuk, tu' pip hāptox tu', tu hām'āktux, hu:

–Tu texīy, tu' kummuk? Kōmēn Maminōn yā' xexka', tu' ka'ok, pa' ot puxet nōg ʾhā' kux. Yā Topa te 'ōg hāpkummuk mīy'ax yānān.

11 Ha hām xexka yōg nōmenex xop te kōmēn hā potaha', tu' kuxa hittup 'ohnāg. Yā tikmū'ūn te yōg hāpxop hāmenex kux.

12 Yā nōmenex 'ohnāg 'ūyōg hāpxop, yā pipkup yānām 'āta yīxux hā' nō'ōm, xix pipkup ponnok hā' nō'ōm, xix mīkaxxap te takat, xix kupxat xap, xix topixxax te nūn hā' mīy, xix topixxax yīxux mūnnīy, xix topixxax te xet hā' mīy, xix topixxax 'āta', xix hāpxop māynāg mīm max hā' mīy, xix hāpxop xohix xoktox xox hā' mīy, xix mīm te takat hā' mīy, xix pipkup monōn hā' mīy, xix pipkup hā' mīy, xix mīkaxxap mām hā' mīy,

13 xix mīpxax kōnnōn kānēn hā' mīy, xix tēpet xuxpex, xix kōnnōn mō'hap ha' hax max, xix mīha' haxnāg max, xix hep haxnāg max, xix xupyāg, xi' top hep 'ayet, xix xuxnāg max kōnnōn, xix xuxnāg xe tox, xix mūnūytut, xix kahnen, xix kāmānok, xix hāpxop yīkūy'ax, xix tikmū'ūn kāmānat xop, xix tikmū'ūn kuxa'. Yā hāpxop xohix hāmenex kux.

14 Ha nōmenex xop te kōmēn 'āktux, hu:

–Kōmēn yōg tikmū'ūn tep-tup hāpxop max xohix, pa hōnhā' nōg. 'Ūp-te xop xexka tu' kux. Hōmā kōmēn max te yāy putuk, pa' nōg, tu xep xip putup'ah. Kaxīy.

15 Ha nōmenex xop te nōmenex punethok kōmēn kopah, tu hōnhā' xūy yīpkutuk, tu' pip hāptox tu', tu potap-tup, tu' kuxa hittup 'ohnāg.

16 Tu:

–Tu texīy tu' kummuk kōmēn xexka'. Hōmā kōmēn yōg tikmū'ūn te topixxax max tat, yā nūn hā' mīy, yā topixxax 'āta', xix topixxax yīxux mūnnīy, xix kahnen xe hā' mīy topixxax 'āta', tu xapmax taha', xi' yīm hīy'ax, xi' yīpkutok tat'ax, xi' yīpkox xap, yā pipkup yānām 'āta yīxux hā' mīy, xix mīkaxxap te takat hā' mīy, xix kupxat xap hā' mīy.

17 Pa 'ot puxet nōg, ʾhā yōg hāpxop xohix xexka xaxok. Kaxīy.

Ha ta mīpkox mōgā'ax xexka xop te' pēnāp-tup hāptox tu', xix nōm te mīpkox hā' mōg xop, xix mīpkox mōgā'ax xop, xix nōm te mīpkox hā tayūmak pop,

18 Yā' xohix te hām'āktux ka'ok putup, hu:

–Hāmyāxatamuk xohix xexka hā' xip 'ohnāg kōmēn nōy te nōm putuk. Kaxīy.

19 Tu yāy putox yīmū hāpkōnnōn mō'pok, yā' kuxa hittup 'ohnāg, tu' potaha', tu' kuxa xūy, tu:

–Tu texīy tu' kummuk? Yā' kummuk kōmēn pu'. Hōmā mīpkox yōg tikmū'ūn xohix mōg kōmēn tu', tu yāyhāp-texop xexka'. Pa' ot puxet nōg ʾhā kōmēn yōg tikmū'ūn te hāpxop xohix xexka xaxok. Kaxīy.

20 Ha ta pexkox kopa' pip xop te:

–'Āpu kōmēn koxyoūy'ax hā 'ākuxa hittup. Yeyox kopa kuxa mām xop, 'āpu 'ākuxa hittup, xix Yeyox yōg mō'pok xop, xix Topa pupi hām'āktux xop. Hamūn, Topa te kōmēn yōg

tikmü'ün yög häpxopmä'ax kummuk yänän. Kaxîy.

²¹ Ha ta' xip pexkox yög nü'kutnä'ax, tu mîkaxxap xexka paha', yâ' xexka', te mîkaxxap könnönä'ax putuk. Tute paha', tu nü'yôn könâg xexka tu', tu hâm'âktux, hu:

—Kaxîy kômên Maminôn xexka nü'yôn putup, yâ nü'yôn mô'ka'ok putup, ha tikmü'ün te' xe pênâp-tup'ah.

²² Tikmü'ün te xe 'ap kaxyä'ax xupak putup'ah kômên kopah, xix kaxyä'ax xop, xix panao kaxyä'ax, xix tonômet kaxyä'ax, yâ xe' xohix xupak putup'ah. Tikmü'ün te 'a' xupak putup'ah kâmânat hâm, xix mîkaxxap könnönä'ax 'âpak putup'ah 'ûxeheh,

²³ tu xe pênâp-tup'ah kuyänâm tat'ax xix yög kuyänâm kômên kopah. Tikmü'ün te xe' xupak putup'ah yäyta xop yög hâm'âktux kômên kopah. Hômä kômên yög nômenex xop 'ûka'ok xexka', pa häpexka nôy yög nômenex xop ka'ok kutôgnâg. Hômä kômên yög tikmü'ün te' koit pax. Kaxîy.

²⁴ Hômä kômên Maminôn yög tikmü'ün te' kix Topa pupi hâm'âktux xop xix Yeyox kopa kuxa mâm xop kômên kopah, tu' kixgâhâ' 'ûxohix häpexka xohix tu'. Hâ kaxîy Topa te yög häpkummuk mîy'ax yänän.

19

¹ Häpxip Îhâ 'âte' xupak, pa' xip yänmün xupep'ax xexka pexkox tu', yâ tikmü'ün xohix yög hâm'âktux putuk. Tu hâm'âktux, hu:

—Ûmax Topah. Topa te tikmü'ün môy häpkummuk kopah. Topa 'ûmax xe'ëgnâg, tu' ka'ok xexka'.

² Yâ' xe'e, tu' yok Topah, hu tikmü'ün yög häpkummuk mîy'ax yänän. Tute xotit xexka yög häpkummuk mîy'ax yänän. Xotit xexka te hâm xexka yög tikmü'ün xohix môgâhâ', puyîy häpkummuk mîy nûmütik. Tute' kix Topa yög kâmânat, yîy Topa te nôm xüygâhâ'. Kaxîy.

³ Tu xe hâm'âktux ka'ok, hu:

—Ûmax Topah. Kômên xexka mô'xut, ha kugöy te pepi' môg putup hämyâxatamuk xohix kux 'ohnâg hâ'. Kaxîy.

⁴ Ha ta' pip tik xexka te' 24, xix yönnâ'î te' 4, tu Topa pu nûktettex, tu Topa 'âktux max, ha Topa yüm mîmpe yüm'ax xe'ëgnâg yîmü'. 'Ûxohix te:

—Hamün. 'ûmax Topah. Kaxîy.

Kahnên Kutok yög yäyta yög 'âmuk xexka'

⁵ Ha ta' xip 'üyänmünxupep'ax 'ûxexka yög mîmpe yüm'ax xe'ëgnâg tu', tu:

—Topa yög kâmânat xop, 'âpu yümü yög Topa 'âktux max. Tihik, yâ' xexka xik-tôgnâg, 'âpu yümü yög Topa 'âktux max. Topa yîpikutuk xop, 'âpu yümü yög Topa 'âktux max. Kaxîy.

⁶ Ha 'âte' xupak, pa' xip hâmnühün, yâ tikmü'ün xohix yög hâm'âktux putuk, pe

xamoka xexka yög hâmnühün putuk, pe tex înnä'ax putuk. 'Âte' xupak, ha nôm te:

—Ûmax Topah. Yümü yög Topa te häpxop xohix xexka mîy yümmüg. Hamün, 'ûxexka'.

⁷ 'Âpu yümü hittup, tu yümüg kuxa hit-tup. 'Âpu yümü Topa 'ûxexka 'âktux. Hamün, häpxip kutôgnâg Îhâ yäytap-tup Kahnên Kutok hah, ha 'ün te yäytap-tup te yây maxnâhâ, nüy yäytax,

⁸ tu' pop topixxax tup, yâ nîn hâ' mîy, yâ' xunnuk 'üyög topixxax. Kaxîy.

Hamün, nôm topixxax nîn te Topa kopa kuxa mâm xop yög häpxopmä'ax max putuk.

⁹ Ha pexkox yög nü'kutnä'ax te 'â hâm'âktux, hu:

—'Âpu kax'âmi, hu: “'Ûkuxa hittup nô'ôm. Yâ Topa te nôm xänâhâ', pu nü' Kahnên Kutok yög yäyta yög 'âmuk xexka hah.” Kaxîy.

Tu xe:

—Topa te hâm'âktux xe'e'. Kaxîy.

¹⁰ Ha 'âte pexkox yög nü'kutnä'ax pu nü'xup, pa tute:

—'Âmhok. Kaxîy hok. 'Âte Topa pu häpxopmä max yâ 'âmün putuk xix 'âxape putuk, yâ Yeyox yög hâm'âpak xe'e' 'âpak xop putuk. 'Âpu Topa pu nü'âxup. Kaxîy.

Yâ Topa pupi hâm'âktux xop te Yeyox yög hâm'âpak xe'e' âktux.

'Ôm te kâm'ânok ponnok yîmü' yüm

¹¹ 'Âte' pênâhâ', ha pexkox xôn, pa' xip kâmânok ponnok, ha nôm te' yîmü' yüm 'ûxuxet'ax Nôm Te' Nöy Tu' Xip Ka'ok xix Nôm Xe'e'. Tute 'ûxohix yög häpkummuk mîy'ax kopit, yâ' yok, tu' nôy mütik yâyix.

¹² 'Ûpa te kuxap putuk, tu' tat 'ûxat'ax xexka yög kuxxax punethok, tu 'ûxuxet'ax kax'âmi tat, pa' xohix te' xuxet'ax yümmüg 'ohnâg, pa nôm puxet te' yümmüg yây yög xuxet'ax.

¹³ 'Ûtat topixxax tox, yâ' patok 'ûhep 'âta hâ. 'Ûxuxet'ax “Topa yög Hâm'âktux.” Kaxîy.

¹⁴ Ha pexkox yög xonat xop te' pe' môg, tu kâmânok ponnok yîmü' mâm kamah, tu ta' môg, tu topixxax nîn ponnok tup tat,

¹⁵ ha mîkaxxexka xox max xip 'üyîkox kopah, tu' xupep. Tute mîkax xexka hâ' xut putup, ha ta hâm xexka yög xop xohix te' xut putup'ah. Tute hâm xexka yög xop xohix xat putup pipkup xexka tox hâ. Tute' koxyöy putup, yâ mînta 'op hep xut'ax putuk. Yâ' gây Topah. Topa te häpxop xohix xexka mîy yümmüg.

¹⁶ Nôm te kâmânok yîmü' yüm, tu topixxax tu' kax'âmi, hu: “'Ûxat'ax xexka yög xat'ax xexka xix xuxyâ xop yög xuxyâ'”. Kaxîy. Tu' paxix yîmü' nôm kax'âmi kamah.

¹⁷ Ha 'âte' pênâhâ, pa' xip pexkox yög nü'kutnä'ax mäyôn yänâm tu', tu' xänâ ka'ok putux xohix xop nôm topaha'. 'Ûxänâhâ, hu: —Mâ, Topa yög 'âmuk ha nü'.

¹⁸ Mā, nūy 'ūxat'ax xexka yīn mā', xix xonat yōg xat'ax xop yīn, xix xonat yīn, xix kāmānok yīn, xix kāmānok yīmū' mām xop yīn, xix tik xohix yīn, yā kāmānat xop yīn, xix xuxyā xop yīn, xī' xexka xik-tognāg xop yīn. Kaxīy.

¹⁹ Ha 'āte' pēnāhā, pa' xip kāyā xexka 'āta, xix hām xexka yōg xat'ax xexka xop pip xix yōg xonat xop. 'Ūxohix tu yāy tu nū'nāhā', nūy yāykix nūmūtik, yā nōm te kāmānok yīmū' yūm mūtik xix yōg xonat xop mūtik.

²⁰ Ha kāyā xexka 'āta te' xut 'ohnāg, ha' nōy te' mūg, tu' hīy, tu' Topa pupi hām'āktux mō'āmū'ax mūg, tu' hīy. Yā hōmā Topa pupi hām'āktux mō'āmū'ax xop te hāpxopmā ka'ok xe'ēgnāg kāyā xexka 'āta pu'. Tute hāpxopmā ka'ok xe'ēgnāg, pa' koit, yīy ta' pe' mōg tikmū'ūn, yā tikmū'ūn tu' xip kāyā xexka 'āta yōg kax'āmi'ax, tu' kāyā xexka 'āta yōg topa komut pu nūktettex.

Ta mō kāyā xexka 'āta yōn kuxap 'ūxop yōg kopah, yā' hi', xix Topa pupi hām'āktux mō'āmū'ax xop kamah. Yā kuxap te kōnāg xexka putuk.

²¹ Ha ta nōm te kāmānok yīmū' yūm yōg mīkax xexka te' yīkox kopa' xupep, tu' xuhmīy xonat xop, tu' kix, ha' xakix, ha ta putux yāy'īgā xop nūn, tu' nūktu xonat xop yīn māhā', tu' hix ka'ok.

20

Hāmāxatamuk te' 1.000

¹ 'Āte' pēnāhā, pa' xip pekkox yōg nū'kutnā'ax, tu' pekkox kopa' xupep, tu ta yīxohoh, tu' yīm kopa' tat hāpkox tox xexka yōg pipkup hāmīyinnīn'ax xix pipkup māgxap tat,

² tu xok xexka 'āta paha'. 'Ū'ūm xok xexka 'āta? Yā nōm kāyā hittap, yā Hāmğāyāgnāg, yā Niap, yā Xatanāy. Pekkox yōg mōkutnā'ax te nōm hīy hāmāxatamuk xohix te' 1.000 hā,

³ Yā' putxok hāpkox tox xexka kopah, tu mō'yīnnīn, tu' kīy, puīy hāpxexka yōg tikmū'ūn xe mōgā hok, puīy tikmū'ūn hāpkummuk mīy hok, ha mōktu' nōg putup hāmāxatamuk xohix te' 1.000, hak-nāy tu Hāmğāyāgnāg xut, pu mōg hāpxip kutōgnāg hā.

⁴ Ha 'āte' pēnāhā', pa' pip nōm xop te' xexka xop yōg mīmpe mām'ax yīmū' mām. Topa te' xat, ha nōm te tikmū'ūn yōg hāpxopmā'ax kopit. Ha 'āte' pēnāhā', pa' pip tikmū'ūn yāmīy. Hōmā nōm tikmū'ūn te Topa yōg hām'āktux kopa kuxa mām, tu hōnhā Yeyox yūmmūg, tu ta' mōg, nūy Yeyox yōg hām'āpak max 'āktux, yīy ta tikmū'ūn te' kix, ha' xakix. Nōm te kāyā xexka pu nūktettex 'ohnāg, xix yōg topa komut pu nūktettex 'ohnāg, tu' pop 'ohnāg kāyā xexka yōg kax'āmi'ax yāy kux tu', pe' yīm tu'. Pa

hōnhā hi', tu yāyhā xexka xop Kunnix mūtik hāmāxatamuk xohix te 1.000 hā.

⁵ Hamūn, 'ūputpu' hi hāmāxap, pa xakix xop nōy te putpu' hi 'ohnāg, ha mōktu' nōg hāmāxatamuk te' 1.000.

⁶ Yā' kuxa hittup nōm te putpu' hi hāmāxap. Yā xe xakix putup'ah, pa' nōy xe xakix putup, tu' pip putup Topa yōg hāptox tu', yā xakix tik putuk. Pa' nōy xe xakix putup'ah. Nōm te Topa yōg 'āmānex xop putuk xix Kunnix yōg, tu' xohi' xat putup Kunnix mūtik hāmāxatamuk xohix te' 1.000 hā.

Hāmğāyāgnāg nu'xok

⁷ Hāmāxatamuk te 1.000 nōg putup, ha ta 'ōm te Hāmğāyāgnāg xut putup 'ūyōg kanet ka'ok kopah.

⁸ Ha ta' mōg putup, nūy koit, nūy mōgā hāpxexka xohix yōg tikmū'ūn hāpxexka xohix tu', yā Goge' xix Māgoge'. Ha Hāmğāyāgnāg te nōm yāy tu nū'xoh, puīy yāykix, yā tikmū'ūn xohix, yā xohix te 'āmot xap xohix putuk hāpkux yōg.

⁹ Yā' xohix te hām panip tu' pip, tu ta' nūn putup, tu nūktu Topa kopa kuxa mām xop xakot, xix Topa yōg kōmēn xakot, yā Topa te nōm putup pax. Pa hāpxip 'īhā kuxap te pekkox kopa' xupep, tu nūktu' nāhā', tu nūktu nōm tikmū'ūn koxyōy.

¹⁰ Yā Hāmğāyāgnāg te tikmū'ūn pu' koit. Ha' nōy te' mūg Hāmğāyāgnāg, tu nū'xok kuxap kopah, yā mīkaxxap 'ūxop yōg kuxap kopah. Yā kuxap te kōnāg xexka putuk, ha' pip kama kāyā xexka xix Topa pupi hām'āktux mō'āmā'ax. Yā' xohix xūy hāptup 'īhā xix 'āmīy 'īhā hāmāxatamuk xohix kux 'ohnāg hā.

Tikmū'ūn yōg hāpxopmā'ax kopit

¹¹ Ha 'āte' pēnāhā', pa' xip 'ūxat'ax xexka yōg mīmpe yūm'ax xe'ēgnāg xexka ponnok, ha 'ōm te yīmū' yūm. Ha nōm keppa 'ūnōg hām xexka xix pekkox yokoma'. Yā 'ap pip'ah.

¹² 'Āte' pēnāhā', pa' pip xakix xop, yā' xexka xik-tōgnāg xop, ha' xat'ax xexka yōg mīmpe yūm'ax xe'ēgnāg keppak-nīhā' pip, ha' xōn tappet, tu' nōy xōn. Yā hi'ax xop yōg tappet yā hi'ax xop 'āxet'ax pip tappet tu', hu' hi mōkuma'mōg, ha' kux 'ohnāg. Yā Topa yīkak pip putup. Ha tikmū'ūn hāpxopmā'ax yōg kax'āmi'ax pip tappet tu'. Ha 'ōm te' mōkupix, nūy tikmū'ūn yōg hāpxopmā'ax kopit.

¹³ Ha ta' putpu' hi' xakix xop, nōm xakix kōnāg kopah. Ha putpu' hi xakix xop, yā nōm pip xukpot tu', tu' xohix nūn, ha' nōy te yōg hāpxopmā'ax kopit.

¹⁴ Ha' putxok kuxap kopa hāpxakix'ax xix xakix xop. Yā kuxap te kōnāg xexka putuk. Kuxap xexka yā xakix'ax tix.

¹⁵ Tikmũ'ün yög xuxet'ax kax'âmi 'ohnâg 'ûhi xop yög tappet tu', puxix nõy nõm nõ'xok kuxap kopah, nõm te kõnâg xexka putuk.

21

¹ 'Âte' pēnāhā', pa' xip pexkox yokoma' nõy tup xix hām xexka nõy tup. Hamũn, 'ünög pexkox yokoma māxap xix hām xexka māxap.

² 'Âte' pēnāhā', pa' xip kōmēn xe'ēgnāg, yā kōmēn Yenoyanēn nõy tup, tu pexkox kopa' xupep, tu ta yīxohoh. Yā' max yāy putuk. Yā 'ün te yāyap-tup putuk, tu' xax max tat, tu' mōg, nõy yāy yīpxox müy.

³ 'Âte' xupak, pa' xip yānmũn xupep'ax 'ūxat'ax xexka yög mĩmpe yũm'ax xe'ēgnāg tu', tu hām'āktux, hu:

—Hōnhā Topa te yāy kotīnnāhā tikmũ'ün mütik. Tute yāykotīnnāp-tup nũmütik. Yā yög tikmũ'ün. Topa xip putup nũmütik, yā tikmũ'ün yög Topah.

⁴ Topa te tikmũ'ün pa hep kutux putup. 'A xep kakix putup'ah, tu xe' xuxa hittup 'ohnâg putup'ah, tu xe' xũy putup'ah. Yā' nõg hāpxop hittap. Kaxīy.

⁵ Ta nõm te' xat'ax xexka yög mĩmpe yũm'ax xe'ēgnāg yĩmũ' yũm, tu:

—Nōmhā 'âte hāpxop xohix tup mĩy putup. Kaxīy.

Tu xe 'ā hām'āktux, hu:

—'Āpu nõm kax'āmi' yā hām'āktux xe'e'. 'Ūmax, pu tikmũ'ün kuxa mām hām'āktux kopah. Kaxīy.

⁶ Tu xe:

—Puxix. 'Ūkux. 'Ūgmũn yā māxap xix ka'ax, yā 'Appa xix 'Ōm. 'Ok kõnâg putup te 'āp-tex? 'Âte xa hok hōm putup kõnā'āg, yā kõnâg xupep'ax yög, ha nõm te 'āxop hīnnāp-tup.

⁷ 'Âte 'ā tu' pip ka'ok xop pu nõm hōm, hak mũn yā 'üyög Topah, yā 'ük-tok xop nõ'ōm.

⁸ Pa' pip 'ükuxanōg xop, xi' kuxa mām 'ohnâg xop, xix yāy'īgā xop, xix nõm te' nõy kix xop, xi' nõy hā xupxet xop, xix mĩm mĩy xop, xix topa komut pu nũktettex xop, xi' koit xop. Yā' xohix yög pip'ax pip, yā mĩkaxxap 'ūxop yög kuxap kopah, yā kõnâg xexka putuk, yā kakix'ax tix. Kaxīy.

Kōmen Yenoyanēn tup

⁹ Ha ta' xip pexkox yög nũ'kutnā'ax, nõm te' xape te' 7 xop kopa' xip. Hōmā nõm xop te 'āmuk xak'ax te' 7 tat, ha nõm kopa' pip hāpxüygā'ax te' 7. Yā nõm pexkox yög nũ'kutnā'ax 'ūkha' nũn, tu nũktu:

—Mā, 'âte xa mũg putup 'ün te yāyap-tup, yā Kahnēn xetut. Kaxīy.

¹⁰ Ha Topa Koxuk tek xat, tuk mōgāhā yīktix xox putox tu', tu 'ā mũg Yenoyanēn, yā kōmēn xe'ēgnāg, ha pexkox kopa' xupep, xix Topa yīka' xupep, tu ta' yīxohoh.

¹¹ 'Ūyög kuyānām yā Topa yög hāmmax xe'ēgnāg'ax. Kōmēn te kuyānām mĩy, yā mĩkaxxap te takat putuk, yā mĩkaxxap yax putuk, xix 'ūtup te mĩkaxxap kinixat putuk.

¹² Kōmēn yög hāmpak'ax tox xexka', ha yög hāmpak'ax yög hāmyīnnīn'ax xohix te' 12, ha pexkox yög nũ'pok te' 12 te nõm pēnāhā'. Ha' pip 'ūkax'āmi'ax hāmyīnnīn'ax tu', yā 'Iyaet xop yög hep xop te' 12 yög xuxet'ax.

¹³ Ha' patpe tu' pip hāmyīnnīn'ax te' tikoyuk, yā patpe xohix te kākīy, yā māyōn xupep tu' tikoyuk, ha xot tu' tikoyuk, ha nōntix tu' tikoyuk, ha māyōn mō'nā'ax tu' tikoyuk.

¹⁴ Ha kōmēn yög hāmpak'ax xip mĩkaxxap te' 12 yĩmũ'. Mĩkaxxap te' 12 tu' pip kax'āmix'a, yā Kahnēn Kutok yög mō'pok te' 12 'āxet'ax kax'āmi'.

¹⁵ Ha pexkox yög nũ'kutnā'ax te hām'āktux 'ūgmütik, tu' tat mōhāmũg'ax, nõy kōmēn yög mēn mōkupix, xix hāmyīnnīn'ax yög mēn, xix hāmpak'ax yög mēn.

¹⁶ Kōmēn yög hāmpak'ax yög patpe te' 4. Patpe xohix yög mēn te yāy putuk. Pexkox yög nũ'kutnā'ax te kōmēn yög mēn mōkupix, 'ūtox te 2.200 kinōm, xix patpe xix patpe nõy yög 2.200 kinōm kamah. Ha kōmēn tox pepix yög kinōm te' 2.200 kamah, yā' yāy putuk.

¹⁷ Pexkox yög nũ'kutnā'ax te hāmpak'ax yög patpe tix yög mēn mōkupix, yā' xohix te' 64, yā tikmũ'ün yög mēn hā' mōkupix pexkox yög nũ'kutnā'ax te'.

¹⁸ Kōmēn yög hāmpak'ax te mĩkaxxap yax hā' mĩy, ha ta kōmēn te pipkup 'āta yīxux hā' mĩy, yā kuyānām mĩy tu' tup, tu minino putuk.

¹⁹ Kōmēn yög hāmpak'ax yög kupkũnīy yĩmũ' pip mĩkaxxap te takat punethok. Yā 'ūkupkũnīy kakak yög mĩkaxxap yax, xix 'ūkupkũnīy yĩmũ' xip tix yög mĩkaxxap xapit, xix 'ūkupkũnīy yĩmũ' xip tikoyuk yög mĩkaxxap 'āk, xix 'ūkupkũnīy yĩmũ' xip 4 yög mĩkaxxap 'exmēnat,

²⁰ xix 'ūkupkũnīy yĩmũ' xip 5 yög mĩkaxxap xanōn, xix 'ūkupkũnīy yĩmũ' xip 6 yög mĩkaxxap xahnix, xix 'ūkupkũnīy yĩmũ' xip 7 yög mĩkaxxap kiniyot, xix 'ūkupkũnīy yĩmũ' xip 8 yög mĩkaxxap menit, xix 'ūkupkũnīy yĩmũ' xip 9 yög mĩkaxxap topay, xix 'ūkupkũnīy yĩmũ' xip 10 yög mĩkaxxap kiniyop, xix 'ūkupkũnīy yĩmũ' xip 11 yög mĩkaxxap yaxin, xix 'ūkupkũnīy yĩmũ' xip 12 yög mĩkaxxap 'āmātit.

²¹ Ha hāmyīnnīn'ax te' 12 te kupxat xap te' 12 hā' mĩy, yā yāpxet te kupxat xap puxet hā' mĩy. Ha kōmēn yög putat te pipkup yānām 'āta yīxux hā' mĩy, yā yānām mĩy, tu' tup, yā minino putuk.

²² Ha 'âte' pēnā 'ohnâg Topa pet xexka kōmēn kopah. 'Ap xip'ah. Yā Topa xip kōmēn kopah xix Kahnēn Kutok xip. Puxix. Topa 'ūxexka', tu hāpxop xohix xexka yũmmũg.

²³ Ha 'ap xip'ah mǎyōn, xix mǎyōn hex, yā 'ap putup'ah mǎyōn yānām xix mǎyōn hex yānām. Hamūn, Topa max xe'ēgnāg xix Kahnēn Kutok, hu kuyānām punethok pip. Puxix.

²⁴ Ha ta' pip tikmū'ūn hām xexka tu', ha kōmēn te nōm yīmū mō kuyānām yōn, ha hām xexka yōg xat'ax xexka xop nūn putup, tu hāp̄xop max nūnnāp-tup, tu nūktu kōmēn hā mōxakux.

²⁵ Ha kōmēn yōg mōhām̄yīnnīn'ax xōn hāptup tox hā, tu nōhām̄yīnnīn putup 'ohnāg. Hāmūn, 'ap xip'ah 'āmniy'ōntheh.

²⁶ Ha hām xexka xohix yōg hāp̄xop xe'ēgnāg nūnnāp-tup kōmēn tu', xix yōg hāp̄xop max.

²⁷ Pa hāp̄xop yāy'īgā nūnnāp-tup 'ohnāg kōmēn tu', yā hāp̄kummuk mīy'ax nūnnāp-tup 'ohnāg xi' koit'ax nūnnāp-tup 'ohnāg. Pa mō'nāp-tup nōm tikmū'ūn, yā 'ūyōg xuxet'ax kax'ami Kahnēn Kutok yōg hi'ax xop yōg tappet tu'.

22

¹ Ha pexkox yōg nū'kutnā'ax te 'ā' mūg kōnāg kox, ha yōg kōnā'āg te tikmū'ūn hīnnāhā', tu kuyānām mīy, tu' tup, tu kinixat putuk. Kōnāg kox te Topa yōg mīmpe yūm'ax xe'ēgnāg tu' xupep xix Kahnēn Kutok yōg,

² tu ta' mōg putat kote', ha ta' pip kōnāg kox yōg hāpkux tix tu' mīm kup tix, yā hi'ax yōg, tu mey puxet 'īhā mīnta ta punethok, ha mey nōy 'īhā mīnta ta' nōy punethok. Yā hā kaxīy mey te' 12 yōg mīnta ta xohix te' 12. Ha yōg mīm xux te hāp̄xexka xohix yōg tikmū'ūn hittupmāhā'.

³ 'Ap xip'ah hāp̄xop kummuk, Topa te nōm putup nōg. Ha ta' xip kōmēn kopa Topa yōg mīmpe yūm'ax xe'ēgnāg xix Kahnēn Kutok yōg, ha yōg kāmānat te Topa pu nūktettex xix Kahnēn Kutok pu nūktettex,

⁴ tu Topa pa pēnāp-tup xix Kahnēn Kutok pa pēnāp-tup, ha Topa 'āxet'ax pip tikmū'ūn kux tu', xix Kahnēn Kutok 'āxet'ax.

⁵ Ha 'ap xip putup'ah 'āmniy'ūxeheh, yīy ta 'ap xip putup'ah kuyānām tat'ax xix mǎyōn yānām. Yā Topa xexka te hāptupmāp-tup, ha Topa yōg xop te' xohix xat putup hām̄yāxatamuk xohix kux 'ohnāg hā.

Yeyox te putpu' nūn

⁶ Ha pexkox yōg nū'kutnā'ax te 'ā hām'āktux, hu:

—Nōm hām'āktux 'ūxe'e. 'Ūmax, pu tikmū'ūn hām'āktux kopa kuxa mām. Ha Topa xexka te Topa pupi hām'āktux xop pu Topa Koxuk hōm, ha ta nōmhā Topa te yōg pexkox yōg nū'kutnā'ax mōkutnāhā', nūy Topa yōg kāmānat pu hām'āktux hāp̄xopmā'ax tēxīy pip'ax hāp̄xip kutōgnāg 'īhā. Kaxīy.

⁷ Ha Yeyox te:

—'Āpu 'ūxupax. Hāp̄xip kutōgnāg 'īhāg mōg putup 'āxop hah. 'Ūkuxa hittup nōm te nū hām'āktux 'āpak, nūy mīy. Nū hām'āktux te 'āxop pu hāp̄xop xohix yūmmūgāhā'. Hāp̄xip 'īhā' pip putup nōm hāp̄xop xohix. Kaxīy.

⁸ 'Ūgmūn Yoām. 'Āte' xupak nōm hāp̄xop xohix, tu nōm pēnāhā'. 'Āte' xupak kux, tu' pēnā kux, tu pexkox yōg nū'kutnā'ax pu nūkxup, yā nōm te 'ā hāp̄xop xohix mūg.

⁹ Pa tute 'ā hām'āktux hu:

—'Āmhok. 'Ūgmūn pu nū'āxup hok. 'Ūgmūn yā Topa yōg kāmānat 'āmūn putuk, xix 'ātaknōy xop putuk, xix Topa pupi hām'āktux xop putuk, xix nōm te nū tappet yōg hām'āktux 'āpak xop putuk. 'Āpu Topa pu nū'āxup. Kaxīy.

¹⁰ Tu xe 'ā hām'āktux, hu:

—'Āpu tikmū'ūn pu nū hām'āktux 'āktux. Nū hām'āktux te tikmū'ūn pu hāp̄xopmā'ax mūg nōm pip putup. Hāp̄xip kutōgnāg 'īhā nōm hāp̄xopmā'ax pip putup.

¹¹ Tikmū'ūn te hāp̄kummuk mīy, puxix xe hāp̄kummuk mīy putup. Tikmū'ūn te hāp̄xop yāy'īgā mīy, puxix xe hāp̄xop yāy'īgā mīy putup. Tikmū'ūn te hāp̄xopmā max, puxix xe hāp̄xopmā max putup. Tikmū'ūn 'ūmax xe'ēgnāg, puxix xe' max xe'ēgnāg. Kaxīy.

¹² Ha Yeyox te:

—'Āpu 'ūxupax. Hāp̄xip kutōgnāg 'īhā 'āxop hak mōg putup. 'Āte 'āxop pu hāp̄xop popmāp-tup. 'Āte nōm te hāp̄xopmā max punethok pu' popmāp-tup hāp̄xop punethok. 'Āte nōm te hāp̄xopmā max kutōgnāg pu' popmāp-tup hāp̄xop tīgnāg.

¹³ 'Ūgmūn yā māxap xix ka'ax, yā 'Appa xix 'Ōm.

¹⁴ 'Ūkuxa hittup nōm te yāy topixxax tox pīx, hā' tup. Topa te' xat, ha nōm te mīnta ta māp-tup 'ūhi'ax yōg mīm kup yōg. Tute kōmēn hām̄yīkox hā mōxakux putup.

¹⁵ Pa kōmēn kūnāpa' pip 'ūnōy hā' xupxet xop, xix mīm mīy xop, xix yāy'īgā xop, xix nōm te Topa komut pu nūktettex, xi' koit xop, tu hāp̄xop mō'āmū' mīy

¹⁶ Ha Yeyox te:

—'Ūgmūn Yeyox. 'Āte pexkox yōg nū'kutnā'ax mōkutnāhā', puyīy nū hāp̄xop 'āktux Topa kopa kuxa mām xop pu'. 'Ūgmūn yā Namix hā xupepmā'. Yōgnū kuyānām ka'ok, yā 'ūgmax xe'ēgnāg, yā mǎyōnnāg xexka kuyānām putuk. Kaxīy.

¹⁷ Ha Topa Koxuk te:

—Mā'. Kaxīy.

Ha 'ūn te yāy'tap-tup te:

—Mā'. Kaxīy.

Ha' xupak xop te:

—Mā'. Kaxīy.

'Ok kōnāg putup te 'āp-tex? Mā', nūy kōnāg hok pa', yā kōnāg te tikmū'ūn hīnnāhā nō'ōm.

Hām'āktux kux'ax

¹⁸ Hak mūn Yoām. Āte xa hām'āktux, hu: Xate' xupak nū hām'āktux, tu xa hāpxopmā'ax 'āktux nōm pip putup. Xate tehomi kax'ami', pe hām'āktux nōy, puxix Topa 'āxūygāp-tup, yā' putuk nōm hāpxūygā'ax kax'āmi nū tappet tu'.

¹⁹ Ha xate nū' hām'āktux yāg xut, puxix Topa te 'ōg hāpxop max xut putup, yā nōm mīnta ta xut putup 'ūhi'ax yōg mīm kup yōg,

tu 'ōg hāpxop xut putup, yā kōmēn xe'ēgnāg yōg Yā nū tappet te nōm 'āktux.

²⁰ Yeyox te:

—Nū tappet 'ūmax. Hamūn, 'āxop hak mōg putup hāpxip kutognāg 'ihā'. Kaxīy.

Hāmūn Yāyā Yeyox, mā' mō'ka'ok!

²¹ Pu yā yūmūg xuxyā Yeyox 'āxop xohix ha hāmmaxnā'.

Tu ta tu' kux.